

资治通鉴纲 目三编

张廷玉

文硕阁

wenshuoge.com

目录

关于我们	4
上谕	6
上谕	7
原序	8
御制明史纲目书成有述【并序】	9
提要	10
凡例	11
卷一	13
卷二	43
卷三	77
卷四	100
卷五	119
卷六	135
卷七	152
卷八	169
卷九	192
卷十	214
卷十一	235
卷十二	257
卷十三	281
卷十四	294
卷十五	314
卷十六	335
卷十七	360
卷十八	383
卷十九	408
卷二十	436
卷二十一	458
卷二十二	477
卷二十三	493
卷二十四	509
卷二十五	526
卷二十六	546
卷二十七	566
卷二十八	588
卷二十九	610

卷三十	633
卷三十一	653
卷三十二	673
卷三十三	690
卷三十四	711
卷三十五	731
卷三十六	745
卷三十七	765
卷三十八	789
卷三十九	819
卷四十	847

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

上諭

乾隆四十年五月十五日內閣奉

上諭前曾命仿朱子通監綱目體例纂爲明紀綱目刊行已久茲披閱叶向高集見其論福藩田土疏所叙向日旨意云養贍地土原給四萬頃卿等屢奏地土難以湊處王亦見辭今減去二萬頃云云則福王當日所得之田僅二萬頃今綱目載福王常洵之國條云賜莊田四萬頃中州腴土不足取山東湖廣田益之與向高有不合又所載青海朶顏等人名對音沿用鄙字與今所定同文韻統音字及改正遼金元國語解未爲畫一是張廷玉等原辦綱目惟務書法謹嚴而未暇考核精當尚不足以昭傳信着交軍機大臣即于方畧館將原書改纂以次進呈候朕親閱鑑定其原書着查繳欽此

上諭

乾隆四十年五月十八日内閣奉

上諭昨因明紀綱目考核未為精當命軍機大臣將原書另行改輯候朕鑒定因思綱目三編雖亦曾經披覽但從前所進呈之書朕鑒閱尚不及近時之詳審若通監輯覽一書其中體例書法皆朕親加折衷一本大公至正為可法則此次改編綱目自當仿照辦理又明史內於元時人地名對音訛舛譯字鄙俚尚沿舊時陋習如𪛗作為兔之類既於字義無當而垂之史冊殊不雅馴今遼金元史已命軍機大臣改正另刊明史乃本朝撰定之書豈轉可聽其訛謬現在改辦明紀綱目着將明史一併查改以昭傳信朕非于此等音譯字面有所偏袒蓋各國語音不同本難意存牽合即如滿洲蒙古文譯為漢文此音彼字兩不相涉乃見小無識之徒欲以音義之優劣強為分別軒輊實不值一噓朕每見法司爰書有以犯名書作惡劣字者輒令改寫而前此書回部者每加犬作 亦令將犬旁削去誠以此等無關褒貶而適形鄙俚實無足取況當海內同文之世又豈可不務為公溥乎將此通諭知之所有原頒明史及綱目三編俟改正時并着查繳欽此

原序

御定通监纲目三编原序

编年之书奚啻数十百家而必以朱子通监纲目為準通监纲目盖祖述春秋之义虽取裁於司马氏之书而明天统正人心昭监戒者几微得春秋大居正之意虽司马氏有不能窺其藩篱者其他盖不必指数矣尝谓读书立言之士论世为难非如朱子具格致诚正之功明治乱兴衰之故其於笔削鲜有不任予夺之私失褒贬之公者自纲目成而义指正大条理精密後儒有所依据踵而续之由宋迄元厘然方策至明代君臣事蹟编辑之难更倍于诸书盖明史已成於百年之後而世变风漓记载失实若复迟待将何以继续编而示来许爰亟命儒臣法朱子通监纲目义例增损编摩大书以提要分注以备言每一卷成呈览朕於几暇亦时御丹铅为之参定虽於天人一贯之精微未之能尽而惟是谨严之义守而弗失简正之旨志而必勉书既成羣臣举唐太宗之事为言勉从其请而为之序云

御制明史纲目书成有述【并序】

乾隆十一年夏四月朔御制

御制明史纲目书成有述【并序】

明史纲目之书不可不亟成之而又不欲率就之盖明史已出於百年以後纲目若复迟待咎将谁诿而取裁义例校閱诸臣一一请示既以身任其事则不得徒博钦定名目已也将天下後世之公论於是乎在书成既亲序以冠简端复为此诗以见意并识有明三百年兴亡之概焉

直道惟凭信史留斯民三代理无偷学探司马治平要书慕文公体例优亦曰此心无予夺敢云我志在春秋编摩端识权衡在鱼鲁何妨付校讐

蛇分星聚瑞符覃崛起原从皇觉庵燕国帝车遥指北金陵王气遂昌南一时开创经猷集奕世风声节义谈若论

兴王自东土比汤慙德更无慙【昔人谓三代以下开创之主要当以汉高祖元世祖明太祖为正然汉明虽起布衣究其宇内之臣也元虽非宋臣犹嫌取自其手惟我朝平李自成之乱而有天下於明为有恩比元尤为尽善云】

金川门外血波横大义奚称旦辅成难讳齐黄疎计畧尚怜气节在公卿缁衣不辨真兮伪斗粟从来弟与兄独笑吉安胡侍讲一猪不忍太痴情

慢言此辈弱而愚甫节鱼童何代无不少英明偏授柄端因威福遂专枢善窥更自依房閼妙术惟应导宴娛屋社当年缘底事厉阶屡肇自宫徒

持盈保泰信惟艱往复平陂理转环拜疏省僚羣自去垂衣宫禁尚耽闲蝸蟠三案纷轆轤门户东林激变患独有思陵殉宗社故宜矜惜动

龙顔【明之亡实亡於万历之惰於为政及天启之闇不尽崇禎之罪也故我世祖以礼葬於思陵加谥建碑较古独厚云】

赏罚当时犹贵信况於万世信无刊【二语本方孝孺史论意】从来旧史传三述亦越新编切五难义利纖毫无或爽劝惩一字必期安试观三百年间事已意曾无爱恶干【从来为史者於本朝多讳词於胜国必过语此春秋以後所以少信史也朕每引为深戒故於明史纲目亦唯善者善之恶者恶之因物付物不敢以己意好恶为褒贬後之观是书者其必有以谅吾矣】

提要

【臣】等谨案

御定资治通监纲目三编四十卷乾隆四十年奉勅撰初大学士张廷玉等奉

勅采明一代事迹撰通监纲目三编以续朱子商辂之书然廷玉等惟以笔削褒贬求书法之谨严於事迹多所挂漏又边外诸部於人名地名多沿袭旧闻无所考正尤不免於舛讹夫朱子翔例之初原以纲仿春秋目仿左传春秋大义数十炳若日星然不详核左传之事迹於圣人予夺之旨尚终不可明况史籍编年仅标梗概於大书而不具始末於细注其是非得失又何自而知即

圣谕所指福藩田土一条其他条之疎漏可以例推至译语惟取对音原无意义而宋人妄生穿凿乖谬不经如赵元昊自称兀卒即乌珠之转音而宋人讹为吾祖遂以为元昊见侮又如萧鹧巴亦非汉名而宋人以对曾纯甫借鹑脯之音以为恶谑沿及明代此习未除如

圣谕所指朶顔青海诸人名书图为兔之类亦往往而有鄙倍荒唐尤不可不亟为厘正是编仰稟

睿裁於大书体例皆遵

御批通监辑览而细注则详核史传补遗纠谬使端委秩然复各附发明以阐褒贬之义各增质实以资考证之功而译语之诞妄者亦皆遵

钦定辽金元国语解一一改正以传信订讹较张

廷玉等初编之本实倍为精密

圣人制事以至善为期义有未安不以已成之局而憚於改作此亦可仰窥万一矣乾隆五十年二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

凡例

一纲目三编现在遵

旨照

御批通览辑览改纂凡纪年系统诸大端及一切书法

均应仰遵

笔削定例永示準绳至三编原本每年所列纲目不过数条而辑览内条数较多于一代治忽所关更为明备自应将辑览所增一并敬谨添辑

一查朱子纲目原有尹起莘发明刘友益书法及质实正误附入各条纲目之下明代所修续纲目内亦有发明广义诸条皆所以推阐大义考证故实足为本书羽翼而纲目三编内从前未经办及现在

御批通监辑览俱仰禀

睿裁大旨微言昭揭星日【臣】等遵照改辑自应于特笔所在各仿照前例恭加发明详悉阐释庶

褒贬谨严大公至正之意更足昭示万世至其间姓名爵里及舆地官制等类本文内未能该尽者并拟各加质实俾读者开卷了然似于體例尤为周密

一原书内如载福王之国拨给庄田四万顷一条叶向高集内实作二万顷仰蒙

圣明指示【臣】等因检明史福王传内诏赐庄田四万顷句下有所司力争常洵亦奏辞得减半之文因原书采摘未全纪载遂致失实又福王传于此条下尚有奏乞张居正没产沿江洲税四川茶银淮扬盐引河南北齐楚间所至骚动等事必须连类并载足以见神宗宠溺失德之实而原书概行刊除亦不免过于简畧今拟各条纪事俱将明史纪传逐一参订考核异同如有舛漏即行详确改正其或有情事未能详尽者亦各酌量添修务令首尾该具核实无讹庶足永称传信

一纲目三编内所有蒙古等人地官名之对音讹舛译字鄙俚者均应仿照现办辽金元国语解之例译改

一此次改编纲目折衷论定均仰荷

圣训详明应请?録前後

谕旨冠于简编次列

御制原序庶俾办理原委次第秩然

卷一

钦定四库全书

御定资治通鉴纲目三编卷一

【起戊申元顺帝至正二十八年明太祖洪武元年尽壬子明太祖洪武五年】凡五年

【戊申元顺帝至正二十八年 是岁闰七月元帝出奔以後为明太祖高皇帝洪武元年】
春正月吴相国李善长等奉吴王朱元璋为皇帝国号明

【元璋字国瑞先世家沛徙句容再徙泗洲父世珍始徙濠之鍾离生四子元璋其季也母陈氏元天历元年元璋生室中数有光比长姿貌雄杰志意廓然至正四年大饥疫时年十七父母兄继歿无所依乃入皇觉寺为僧游食诸州复还寺是时元政不纲盜四起方国珍起海上刘福通奉韩山童起颍州徐寿辉起蕲水衆各数万他盜拥兵据地寇掠甚衆十二年定远人郭子兴等起兵濠州元璋谒之子兴奇其貌留为亲兵战辄胜妻以所抚马氏女明年收里中兵得七百人子兴署为镇抚既而与所部将徐达汤和费聚等南畧定远降驴牌寨民兵三千袭张知院于模润山收其卒二万道遇李善长与语大悦留掌书记遂东攻滁州下之其年张士诚起高邮十五年子兴遣张天佑等攻拔和州命元璋统诸将守其地未子兴卒福通立山童子林儿于亳檄子兴子天叙为都元帅元璋及天佑为左右副元帅元璋不受然以其势方盛可倚藉乃用龙凤年号以令军中常遇春来归遂渡江拔牛渚下太平十六年取集庆路改为应天府会池州已为壽輝将所据士诚自淮东陷平江诸路转掠浙西元璋慮壽輝士诚强江左浙右诸郡遂为所并於是命将取镇江广德寻自称吴国公次第畧定江左浙右士诚兵不得四出势渐蹙而壽輝将陈友谅日强二十年友谅弑壽輝僭伪号尽有江西湖广地欲东取应天元璋患友谅与士诚合设计令其故人康茂才给友谅速来败之于龙湾明年自将舟师征友谅败之於江州克其城友谅奔武昌分徇南康建昌蕲黄广济皆下旋克抚州二十二年友谅伪丞相胡廷瑞以隆兴降改为洪都府元帝遣使授元璋江西行省平章政事不授时林儿屡为元师所败势大窘二十三年士诚将吕珍围林儿于安丰破之杀福通元璋驰救击走珍以林儿归居之滁州友谅大举兵围洪都元璋自将救之友谅撤围逆战于鄱阳湖屡败中流矢死其将张定边以友谅子理奔武昌二十四年元璋自立为吴王建百官复自将征理降之封为归德侯又二年林儿卒遂以明年为吴元年建庙社宫室祭告山川盖至正二十六年也二十七年九月徐达克平江执士诚十月命逵为大将军常遇春副之率师二十五万北定中原十一月汤和克庆元方国珍遁入海十二月国珍降李善长率百官劝进乃以是年春正月乙亥祀天地于南郊即皇帝位定国号曰明建元洪武】质实【天历元文宗年号泰定帝致和元年九月文宗即位改为天历元年至正元顺帝年号龙凤伪宗韩林儿年号沛县秦置元属济州明属徐州今属徐州府句容汉县元属集庆路明属应天府今属江宁府泗州唐置元属淮安路明属凤阳府今直隶州濠州隋置元改临濠府寻复曰濠州明太祖吴元年复曰临濠府洪武二年升为中都六年改中立府七年改凤阳府今因之鍾离汉县元濠州治明改临淮县属凤阳府今省皇觉寺在凤阳府城北明曰龙兴寺颍州後魏置元属汝宁府明

属凤阳府今升府蕲水唐县元属黄州路明属黄州府定远梁县元属濠州明属凤阳府今并因之横涧山在定远县西北七十里滁州隋置元属扬州路明直隶州高邮汉县宋军元路寻改府明为州属扬州府和州北齐置元属庐州路明直隶州今皆因之亳州後周置元属归德府明属凤阳府今属颖州府牛渚山北曰采石相去里许在当涂县西北二十里太平宋州元路明改府今因之应天府元建康路文宗改集庆明初建都今江宁府池州唐置元路明改府平江隋苏州宋平江军寻升府元路明苏州府镇江宋府元路明初曰江淮府寻复曰镇江府广德晋县宋置军元路明初改府寻降直隶州今皆因之龙湾在上元县西北十五里江州隋九江郡唐为江州明改九江府武昌三国吴郡元路明改府南康宋军元路明改府建昌宋军元路明初改肇昌府寻改建昌府蕲州後周置元路明初改府寻降州属黄州府黄州隋置元路明初改府今皆因之广济唐县明属蕲州今属黄州府抚州唐置元路明改府隆兴汉豫章郡治南昌县唐为洪州都督府南唐为南昌府宋改隆兴府元路明改洪都府寻复为南昌府安丰隋壽州宋壽春府乾道四年改安丰军元路明复为寿春府寻降壽州属凤阳府今皆因之鄱阳湖即彭蠡湖在南昌县东北百五十里庆元唐明州宋升庆元府元路明初为明州府寻改宁波府今因之南郊在上元县东北南山之阳方国珍黄岩人刘福通颖州人韩山童栾城人徐壽辉罗田人郭子兴其先曹州人父郭公以日者术游定远遂家马氏是为明孝慈高皇后宿州人徐达字天德汤和字鼎臣皆濠人费聚字子英五河人李善长字百室定远人张士诚泰州人张天佑郭子兴妇弟常遇春字伯仁怀远人陈友谅沔阳人胡廷瑞沔阳人後易名美康茂才字壽卿蕲州人陈理友谅次子】发明【是年闰七月元顺帝出居北汉明始一统故通监辑览用朱子纲目历朝嬗代一岁两系例于是年分为二卷以昭正统之公今作明纪纲目专叙明一代事蹟故于岁首即书洪武纪年仍列元至正於前双行分注至洪武二年始大书标纪两书体例虽有不同而史法之正则一也】

追尊祖考为皇帝

【高祖考曰元皇帝庙号德祖曾祖考曰恒皇帝庙号懿祖祖考曰裕皇帝庙号熙祖考曰淳皇帝庙号仁祖妣皆皇后诏制太庙祭器如事生之仪】质实【高祖伯六曾祖四九祖初一祖妣王氏太庙祭器如事生之仪按明史礼志宗庙祭器用银以金涂之寻尽易以金酒壶盃 每事皆八朱漆盘盂二百四十挥旄枕簟篋笥帟幔浴室皆具】

立妃马氏为皇后世子标为皇太子

【后仁慈有智鉴好书史当吴汉接境战争无虚日后手缉甲士衣履佐军尝言治天下以不杀人为本帝善之既即位欲官后族谢曰爵禄私外家非法力辞而止乃追封后父马公徐王修墓置庙标后长子也】质实【马公逸其名后母郑媪追封王夫人】

以李善长为左丞相徐达为右丞相

【善长有智计习法家言策事多中帝尝问曰四方战鬪何时定乎对曰汉高起布衣豁违大度知人善任不嗜杀人五载成帝业今元纲既紊天下土崩瓦解公濠产距沛不远山川王

气公当受之法其所为天下不足定也帝称善诸将来归善长察其材言之帝复为帝布欵诚使皆得自安帝深倚之自将征讨皆命居守转调兵饷无乏尝请定盐茶法斟酌元制去其弊用益饶而民不困帝称吴王时拜右相国吴元年封宣国公十月命百官礼仪俱尚左改左相国而徐达为右至是诏以左丞相兼太子少师达年二十二从帝与常遇春俱为军锋冠及为大将拔镇江克常川宁国尽护诸将帝称吴王为左相国克庐州平湖湘及淮南北拜大将军征吴达与遇春约曰师入我营其左公营其右令将士曰掠民财毁民居离营二十里者死既破平江执士诚吴人安堵如故封信国公长于谋畧所至不扰帝谕诸将御军持重有纪律战胜攻取得为将之体者莫如大将军达北定中原齐地悉平至是为右丞相兼太子少傅】质实【盐茶法按明史本纪至正二十一年春二月甲申立盐茶课食货志初立盐法置局设官二十取一引茶百筋输钱二百常州隋置州宁国唐置军庐州隋置州元皆为路明改府今皆因之】

庚寅彗星见

【彗星见於昴毕】质实【元史顺帝本纪明史天文志同志又云三月辛卯彗星出昴北大陵天船间长八尺余指文昌近五车四月己酉没於五车北按彗见除旧布新之象】

征南将军汤和克福建元平章陈友定死之

【先是至正二十六年秋八月元以友定为福建平章尽有八闽之地帝命和由明州海道取福州胡美由江西趋杉关而别遣使至延平招友定友定置酒会诸将杀使者?血酒中与衆酌饮之誓以死守已闻杉关破急分军为二以一军守福而自帅一军守延平和舟师抵福之五虎门蚁附登城守将遁参政尹克仁宣政使多尔玛不屈死金院拜特穆尔杀妻妾二女纵火自焚死时胡美已克建宁和遂进攻延平友定欲以持久困之诸将请出战不许数请不已友定疑之杀萧院判军士多出降者会军器局灾成中礮声震地明师知有变急攻之友定呼其属与诀退入省堂仰药死达噜噶齐巴哈玛勒副枢陈英辅皆自经死所部开门纳明师昇友谅出水东门未絶也天大雷雨友定复苏械送京师帝诘之友定厉声曰国破家亡死尔尚何言遂并其子海杀之延平既下兴化彰州皆望风附独漳州路达噜噶齐德密实自杀时称闽有三忠谓友定拜特穆尔德密实也】质实【明州海道自府属定海县沿海而南即取福州之迳道福州唐置元路明府今因之杉关在邵武府光泽县西北九十里西至江西建昌府百二十里延平元路明府今因之五虎门在福州府闽县东百里海中五虎山下建宁宋府兴化宋军泉州漳州皆唐州元皆为路明改府今因之陈友定字安国福清人徙清流多尔玛旧作朶耳麻拜特穆尔旧作栢帖木耳达噜噶齐官名首领也旧作达鲁花赤巴哈玛勒旧作白哈麻德密实旧作迭里弥实今并改】

发明【按明史友定颇任威福有跋扈心漳州守将良责之怒竟以兵诛良而陈瑞孙孔楷詹翰皆被杀威震八闽然事元未尝失臣节岁输粟数十万石海道辽远至者尝十三四顺帝嘉之卒能父子死义其功罪尚不相掩若库库特穆尔忿其削爵见讨遂据太原杀官吏致敌人得以乘衅长驱其貽悞宗邦实甚虽元亡後未尝不以兴复为志崎岖塞外百战不屈明祖

亦叹为天下奇男子不可得而臣然其始之叛逆非晚节所能盖固未可与友定相提而谕矣
】

元削库库特穆尔爵邑命图噜李思齐讨之

【元至正二十五年库库特穆尔受诏平江淮檄关中邠国公李思齐等会师思齐故与库库特穆尔之父察罕特穆尔同起义兵齿位相埒得檄大怒曰吾与若父交若髮未燥敢檄我耶令一骑毋出关库库特穆尔遂入关攻思齐等相持经年数百战未能决元帝诏令罢兵专事江淮库库特穆尔不奉诏遣其骁将摩该趋河中欲出不意搗凤翔覆思齐巢穴行至卫辉军变摩该遂不聽库库特穆尔节制疏列其罪状上之朝初元年章博罗之乱太子阿裕实哩达喇出奔大原欲用唐肃宗灵武故事自立库库特穆尔不可及博罗伏诛奉太子还京师元后谕今以重兵卫入城胁元帝禅位又不从由是太子深衔之而元帝亦心忌其跋扈会摩该奏至元帝乃削库库特穆尔太傅中书左丞相今以河南王就食邑分所部兵隶诸将太子开大抚军院于京师总制天下军马专备库库特穆尔库库特穆尔受诏退军驻泽州其部将关保亦自拔归于朝元帝知其势孤诏思齐等东出关与摩该合攻之而今关保以兵戍太原库库特穆尔愤甚引兵据太原尽杀朝廷所置官吏於是元帝下诏悉夺其爵邑令图噜等四面进讨】质实【河中後周蒲州唐改河中府元属晋宁路明复曰蒲州属平阳府 本朝雍正三年升直隶州六年升府凤翔唐郡寻改府金为凤翔路治置总管府元至元九年更为散府明及今因之卫辉周卫国地唐为卫州元置卫辉路明改府太原秦郡元冀寧路明改太原府今并因之泽州隋置元属晋寧路明为直隶州 本朝雍正六年升府库库特穆尔本王姓小字保保平章察罕特穆尔之甥养为子图噜陕西行省左丞相李思齐罗山人察罕特穆尔沈邱人库库特穆尔旧作扩廓帖木儿图噜旧作秃鲁察罕特穆尔旧作察罕帖木儿摩该旧作貌高博罗旧作孛罗阿裕实哩达刺旧作爱猷识里达腊今并改】

三月修女诫

【帝谓翰林学士朱升等曰治天下修身为本正家为先正家之道始於谨夫妇后虽母仪天下然不可使预政事嫔嫗之属不过备职事侍巾栉恩寵或过则骄恣犯分历代政由内出鲜不为祸惟智者能察于未然其纂述女诫及古贤后妃事可为法者使子孙知所持守】质实【朱升字允升休宁人】

夏四月蕲州进竹簟却之

【命四方无妄有献】

征南将军廖永忠取广东

【永忠自福州以书元行省左丞何真真迎降永忠至广州降卢左丞擒海寇邵宗愚斩之遣使挥使陆仲亨畧定清远英德连州肇庆德庆驰谕海北海南诸道皆降安南闻风纳款广

东悉平】质实【广州三国吴置元路明府清远县梁置元明属广州府英德宋府元路寻复为州明属广州府今直隶州肇庆宋府元路明府德庆宋府元路明改州属肇庆府今并因之元海北海南道宣慰司治雷州明史六月海南海北诸道降安南古交趾地明史十二月国王陈日煚遣使朝贡廖永忠巢人何真东莞人陆仲亨濠人】

将军徐达常遇春大破元兵於洛水北元梁王阿抡以河南降

【徐达下山东会遇春於济宁引舟师沂河趋汴梁守将李克彝走左君弼珠占等降遂自虎牢关入元守将托音特穆尔以兵五万陈洛水北遇春单骑突阵元兵二十余骑攢槊刺之遇春一矢殪其前锋大呼驰入元军大溃追奔五十余里梁王阿抡降嵩陝陈汝诸州次第畧定帝如汴梁改为开封府召徐达至命率师北伐谕之曰中原之民久为羣雄所苦故命将北伐拯民水火元祖宗功德在人其子孙罔恤民隐天厌弃之君实有罪民则何辜前代革命之际肆行屠戮朕实不忍诸将毋肆焚掠妄杀人元之宗戚咸俾安全庶几上荅天心下慰民望达顿首受命帝寻还应天】质实【洛水在洛阳县南十五里济宁元路明初改府洪武十八年改州属兗州府今直隶州汴梁元改金汴京为汴梁路今仍开封府虎牢关在汜水县西二里嵩州金置元属南阳府明改县属河南府今因之陝州後魏置元明属河南府今直隶州陈州周陈国後周置陈州元明属开封府今升府汝州隋置元属南阳府明改直隶州今因之阿抡察罕特穆尔之父阿抡旧作阿鲁温珠占旧作竹贞托音特穆尔旧作脱因帖木儿今并改】

都督同知冯胜克潼关

【师取河南元李思齐及参政张思道合兵驻潼关火焚思道营思齐移军葫芦滩胜攻潼关守将迎战破之遂夺关取华州思齐奔凤翔思道奔酈城寻共推思齐为总兵会于凤翔】质实【潼关在华阴北东四十里葫芦滩在华阴县渭水南华州後魏置元属奉元路明属西安府今属同州府酈城隋郡元酈州属延安路明属西安府今直隶州冯胜定远人初名国胜又名宗异最後名胜张思道元史作张良弼】

六月平章杨璟克广西

【璟攻永州守将邓祖胜敛兵固守璟分营筑垒造浮桥西江急攻之祖胜力尽邱药死遂克永州以次定宝庆全州道州蓝山诸州县进攻静江不下璟谓诸将曰彼所恃西濠水耳决其堤岸破之必矣乃遣将杀守堤兵尽决濠水筑土堤五道传城攻两月会廖永忠及参政朱亮祖自广东取梧州元吏部尚书布延特穆尔战死张翱赴水死定涛贵郁林亮祖以兵来会其总制张荣约降璟与之白?为识夜半从宝贤门入执元平章额尔吉纳其都事赵元龙陈瑜刘永锡廉访司僉事特穆尔布哈元帅约尼图们万户董绰哈府判赵世杰皆自杀移师彬州降两江土官黄英衍岑伯顔等永忠亦定南临象州广西悉平】质实【永州隋置宝庆宋府元路为路明改府全州晋置元路明改州属桂林府道州唐置元路明改州属永州府蓝山县唐置元属桂阳路明属桂阳州静江宋府元路明改桂林府梧州唐置元路明府潯州唐置元

路明府贵州唐置元州明属梧州府今府今并因之郁林汉郡元州明属梧州府今直隶州彬州隋置元路明直隶南宁元路明府象州隋置元州明属柳州府今皆因之杨璟合肥人朱亮祖六安人额尔吉纳唐古特人赵元隆字祖森兴安人陈瑜雷州人刘永锡湘潭人黄英衍左江太平府土官岑伯颜右江田州府土官布延特穆尔旧作普颜帖木儿额尔吉纳旧作也儿吉尼特穆尔布哈旧作帖木儿不花约尼图门旧作元秃蛮董绰哈旧作董丑汉今并改】

秋闰七月元复库库特穆尔官爵命帅师会诸将复河洛

【关保摩该攻晋宁库库特穆尔与战擒之以闲顺帝诏可依军法处治遂皆杀之乃下诏归罪于太子罢大抚军院诛知院事巴延特穆尔等命库库特穆尔仍前河南王左丞相统军马直抵彰德卫辉右丞相伊苏由东道同图噜李思齐四道进兵克复汴洛诏下而明兵已逼库库特穆尔自晋宁退守太原】质实【晋宁元路明改平阳府彰德五代晋置军元路今并因之巴延特穆尔旧作帖木儿伊苏旧作也速今并改】

发明【库库特穆尔不从太子灵武之谋与奇后内禅之计反以致谗顺帝不悞遂疑忌之削夺环攻若拒太敌及其据太原杀官吏叛罪着矣乃受诏讨罪者旋被执戮帝即报可何其孱也是时山东河南尽为明有诏书亟下而事已不可为矣刑赏予夺太阿倒持国之将亡又谁咎哉】

徐达克通州元帝奔上都八月师入大都元监国淮王特穆尔布哈死之元亡

【徐达帅师发开封遣裨将分道徇河北地连下卫辉彰德广平次临清使参政傅友德开陆道通步骑都督副颜时浚河通舟师会常遇春已克德州合兵败长芦拒直沽作浮桥济师水陆并进大败元军于河西务进克通州知枢密院事布延特穆尔力战被执死之元帝诏淮王特穆尔布哈监国以庆通为左丞相同守京师遂御清宁殿集三宫后妃皇太子议避兵北行左丞相实勒们知枢密院事赫色宦者赵巴延布哈以为不可帝不聽巴延布哈恸哭曰天下者世祖之天下陛下当以死守奈何弃之臣等愿率诸军民及诸集赛岱等出城拒战愿陛下固守京城卒不聽丙寅夜半开健德门北去八月庚午达陈兵齐化门将士填濠登城入淮王及左丞相庆通平章德尔毕实保赛音布哈右丞张康伯中丞中丞穆辰等不降杀之余不戮一人封府库及图籍宝物今指挥张胜以兵千人守宫殿门使宦者护视宫人妃主禁士卒毋侵暴吏民安堵捷闻诏示天下以大都路为北平府置六卫留都督副使孙兴祖守之右丞薛显及傅友德等巡古北诸隘口元亡元翰林侍制黄殷仕投井死左丞丁敬可总督郭允中皆死之翰林承旨承旨危素趋报恩寺将入井寺僧大梓挽之曰公死是死国也素遂止兵迫史库素往告镇抚吴勉輦实録而出之】质实【通州金置元属大都路明属顺天府今因之上都金桓州地元中统初建开平府五年号为上都明初置开平卫在独石口东北二百二十五里今多伦诺尔大都金燕京元至元九年建为大都明建北京改顺天府广平汉国元路明府今皆因之临清後魏置元县属濮州明属东昌府後改州今升直隶州德州隋置元治安德县明移治陵县以旧州地为陵县属济南府今并因之长芦北周县宋改镇元迁沧州治此明置盐运司在沧州西北今移驻天津直沽小直沽在今天津县北大直沽在县东南十里河西

务在今武清县东北三十里健德门齐化元至元四年于今都东北至京城方六十里分十一门北之西曰健德东之右曰齐化六卫改飞熊卫为大兴县卫淮安卫为大与右卫乐安卫为燕山左卫济宁卫为燕山右卫青州卫为永清左卫徐州五所为永清右卫古北口在密云县东北百二十里传友德碭山人顾时字时举濠人孙兴祖濠人薛显萧人危素字太朴金谿人入明授韩林侍讲学士年已七十余一日帝御东阁侧室素行帘外履声橐橐然帝问谁也对曰老臣危素帝哂曰朕谓天文祥耳御史王着论素亡国之臣不宜列侍从诏谪居和州守余阙庙岁余卒特穆尔布哈旧作帖木耳不花布延特穆尔旧作卜颜帖木耳庆通旧作庆童实勒们旧作失列门赫色旧作黑厮巴延布哈旧作伯颜不花集赛岱旧作怯薛歹德尔毕实旧作迭儿必失保赛音布哈旧作札赛因不花穆辰旧作满川今并改】

发明【顺帝出塞北去未尝失帝号也太子嗣位改元子孙犹继世称汗不絕盖与明代相终始考诸明史及他书所载洪武三年元祖殂于顺昌太子阿裕实哩达喇嗣依王保保于和林改元宣光洪武十一年夏卒国人謚曰昭宗明太祖自为文遣使吊祭次子特古斯特穆尔继立改元天元洪武二十一年蓝玉破其军于捕鱼儿海特古斯特穆尔以其太子添保努遁去将之和林行抵图拉河为其下伊苏岱尔縊弑之是後国内乱五传至昆特穆尔皆被弑永乐初果勒齐篡立称汗去国号遂称韃靼尔而其属阿噜台以果勒齐非元种杀之迎元之後布尼雅实哩于巴实伯里立为汗永乐八年成祖亲征至鄂诺河布尼雅实哩战败仅以七骑絕河遁去越二年布尼雅实哩为卫拉特玛哈穆特所杀玛哈穆特死于托欢嗣欲自立为汗衆不可乃求元後托克托布哈为主托欢子额森嗣称太师托克托布哈拥虚名而已正统间托克托布哈岁朝贡于明天子厚礼之称曰达勒达汗正统十四年额森谋入寇托克托布哈止之勒森不聽曰汗不为吾当自为于是有土木之役及上皇归额森疑托克托布哈与中国通遂弑之尽收其妻子杀元裔无算而自立为汗时景泰二年也未几知院阿拉攻杀额森保喇复攻破阿拉求托克托布哈子穆尔格尔立之号小王子天顺六年穆尔格尔卒共立其兄图斯称蒙古克噶济苏小王子成化初图斯入贡出沒河套既而保喇弑蒙古克噶济苏玛拉噶杀保汗更立他汗复弑之其後穆都哩入河套称汗穆都哩死成化末犯边者复称小王子弘治元年小王子奉书求贡自称大元大可汗小王子卒弟巴延蒙克代为主小王子正德十三年巴延蒙克卒有三子长阿罗罗次阿珠鄂罗罗前死阿珠称小王子未几卒阿珠之长子伯奇立初保喇玛拉噶相仇杀其余衆立故小王子之支子为达颜汗仍服属于小王子达颜传其次子赛音纳兰有子七人长济农驻牧河套即鄂尔多斯次谿达驻丰州滩即西土默特嘉靖济农谿达于小王子皆从父行雄桀为边患而小王子伯奇富强稍厌兵渐徙而东驻收察哈尔之地因以名部後徙帐于辽东边外四传至林丹汗亦称胡土克图侵暴诸部我】

【太宗天聰六年亲征察哈尔林丹汗闻之渡黄河西奔图伯特八年复征之蒙古诸属部先後悉归于我林丹汗病痘卒于西喇卫古尔部落打草滩九年其子额尔克崆鄂尔额哲全部来降编旗驻义州时明崇禎八年也至是元始灭今于洪武元年秋依史例大书元亡而其支系流传则详为附列以资读史者考证马特古斯特穆尔旧作帖古斯帖木耳添保努旧作天保奴图拉河旧作土刺河伊苏岱尔旧作也速迭儿昆特穆尔旧作坤迭木耳果勒齐旧作鬼力赤阿噜台旧作阿鲁台布尼雅实哩旧作本雅失哩巴实伯里旧作别失八里鄂诺河旧作斡难河卫拉特旧作瓦剌玛哈穆特旧作马哈木托欢旧作托懽托克托布哈旧作脱脱不

花额森旧作也先达勒达汗旧作达达可汗阿拉旧作阿剌保刺旧作孛来穆尔格尔旧作麻儿可儿图斯旧作脱思蒙古克特济苏旧作马古可儿吉思玛拉噶旧作毛里孙穆都里旧作满都鲁巴延蒙克旧作伯颜猛可鄂罗罗旧作阿尔伦阿珠旧作阿着伯奇旧作卜赤达颜汗旧作歹颜可汗赛音纳兰旧作赛音那兰济农旧作吉囊谙达旧作俺答察哈尔旧作持汉图伯特旧作图白忒西喇卫古尔旧作实拉卫古儿额尔克崆鄂尔额哲哲旧作额尔克孔果尔额哲并改】

以应天为南京开封为北京

【先是帝幸汴梁将营都而未果既克元都遂下诏曰朕观中原土壤四方朝贡道里适均然立国之规模固重而兴王之根本不轻其以金陵为南京大梁为北京朕於春秋往来巡狩寻又命徙北平军民于北京】

建六部

【先是中书省设四部掌钱谷礼仪刑名营造之务至是置吏户礼兵刑工六部部设尚书侍郎郎中员外郎主事等官仍属中书省】

大赦

【诏赦殊死以下恤从征将士家逋卒许首免输赋道远者官为转运今岁水旱灾具以实开蠲其租赋镇江旱甚悉免今年秋租及明年夏税避乱民复业者给以荒田复三年阙里常遣官致祭有司以礼聘致贤士中书省量材授任兴学校议刑从中典毋非时决重囚除书籍田器税免逋徭蒙古色目人有才能者一体擢用鰥寡孤独废疾者存恤之民年七十以上复一子他利富当兴革诏所不载者其以闻】质实【阙里在曲阜县城背洙面泗墙南北一百二十步东西六十步四门各有石阙北门去洙水百余步】

御史中丞刘基致仕

【初帝北巡命李善长与基留守基刚严凡中书僚吏宦者宿卫有过必惩中书都事李彬奸事觉彬素附善长善长请缓其狱基不聽驰奏报可时方祈雨善长曰祷两可杀人乎基曰杀李彬天必雨遂斩之故善长衔基及帝还与怨基者诉基专恣戮人坛壝下不敬会基有妻丧赐告归】质实【刘基字伯温青田人】

徵元故官至京师

【既至帝御奉天门召问元政得失马翌对曰元有天下以寬得之亦以寬失之帝曰以寬得之则闻之矣以寬失之未之闻也元季君臣耽于逸乐驯至沦亡其失在纵弛实非寬也圣王之道寬而有制不以废事为寬简而有节不以慢易为简施之失中则无弊矣】

帝如北京

放元宫人

【遣内官往谕之曰宫人皆良家子幽闭深宫诚有可悯至即放遣适人勿使失所】

九月江西行省参政陶安卒

【安传涉经史初帝取太平安迎谒陈王道命知黄州移饶州民怀其德吴元年初置翰林院首召安为学士徵诸儒议礼以为总裁官诸礼律多所裁定至是年四月授江西行省参政及卒追封姑孰郡公】质实【饶州隋置元路明府今因之陶安字主敬当涂人】

冬十月帝还南京

十一月庚子冬至祀天于圜丘

【先是中书省臣李善长等撰进郊祀议请遵古制分祭天地于南北郊冬至则祀昊天上帝于圜丘以大明夜明□辰太岁从祀夏至则祀皇地只于方丘以五岳五镇四渎从祀帝如其议行建圜丘于锺山之阳方丘于锺山之阴有司议配祀帝谦让不许是月庚子冬至前期帝亲为文告太庙及南郊竣事诣太庙告礼成还御奉天殿受贺翌日宴羣臣于奉天殿】质实【此明初分祭两郊之始也郊祀议略言王者事天明事地祭故冬至报天夏至报地所以顺阴阳之义也祭天于南郊之圜丘祭地于北郊之方泽所以顺阴阳之位也周礼大司乐冬至礼天神夏至礼地只此三代之正礼自秦立四时以祀白青黄赤四帝汉高祖复增北时祀黑帝至武帝有雍五时及渭阳五帝甘泉太乙之祠而昊天上帝之祭则未尝举行魏晋以后宗郑元者以为天有六名岁凡九祭宗王肃者以为天体惟一安得有六一岁二祭安得有九虽因革不同大抵多参二家之说自汉武用祠官宽舒议立后土祠于汾阴脍炙人口如祀天而後世因于北郊外外仍祠后土又郑元惑于纬书谓夏至于方丘之上祭昆仑之只七月于泰折之坛祭神州之祗析而为二後世又因之一岁二祭元始间王莽奏罢甘泉泰畤复长安南北郊以正月上辛若丁天子亲合祀天地于南郊由汉历唐千余年间皆因之其亲祀北郊者惟魏文帝周武帝隋高祖唐元宗四帝而已宋元丰中议罢合祭绍圣政和间或分或合高宗以后惟用合祭之礼元成宗始合祭天地五方帝已而立南郊专祀天泰定中又合祭文宗至顺以后惟祀昊天上帝今当遵古制分祭天地于南北郊按唐书睿宗太极元年夏五月祭北郊是月改元延和八月元宗即位改元先天是亲祭北郊者睿宗非元宗也此议偶误耳锺山一名蒋山在江宁府城东北】

遣使访求贤才

【遣文原吉詹同魏观吴辅道赵壽等分行天下访求贤才】质实【文原吉官侍御史詹同字同文婺源人魏观字杞山蒲圻人皆官起居注余未详】

以孔子五十六世孙希学袭封衍圣公希大世袭曲阜县知县

【先是元仁宗封孔思晦秩四品至顺二年改三品帝谓礼部曰孔子万世师後世秩止三品弗称其授希学秩二品锡银印置衍圣公官属曰掌书典籍司乐知印奏差书写各一人立孔顔孟三氏学教授学録学司各一人尼山洙泗二书院各山长一人复孔氏子孙及顔孟大宗子孙徭役其官属皆衍圣公选举】质实【曲阜少昊都周鲁国汉鲁县隋改曲阜县明属兗州府今因之孔希学字士行思晦孙按通监後纪至正八年夏四月乙亥帝幸国子学赐衍圣公银印升秩从二品岂一时特恩而非常制与】

召刘基还

【帝手诏叙基勲伐及彭蠡同舟之难曰今天下一家尔当疾至辅成治功庶不负昔者多难之相与既至赐赉甚厚】质实【彭蠡同舟之难至正二十三年秋七月太祖与陈友谅大战鄱阳湖日数十接基侍侧忽跃起大呼趋更舟仓卒徙别舸未定飞礮击旧所御舟立碎】

建大本堂

【延儒臣教授太子诸王上时临幸评论古今尝御文楼太子侍问近与儒臣讲何史对曰汉七国事问曲直安在对曰曲在七国上曰此讲官一偏之说景帝为太子时以博局杀吴世子及为帝又轻聽鼂错黜削诸侯七国之变实由于此若为诸子讲此则当言藩王当上尊天子毋挠王室公法如此则为太子者知牧睦九族隆亲亲之恩为诸子者知夹辅王室尽君臣之义矣】

十二月徐达克太原元库库特穆尔走甘肃山西平【达既定元都进取山西常遇春先下保定中山真定真定达嚕噶齐济农实克章闻元都破朝服登城西崖坠死冯胜汤和下怀庆度太行取泽潞库库特穆尔遣将来御战于韩店杨璟大败会元帝自开平命库库特穆尔复大都库库特穆尔乃引兵出鴈门由居庸以攻北平达闻之谓诸将曰库库特穆尔远出太原必虚北平有孙都督足以御之今乘敌不备直捣太原所谓批亢捣虚者也彼若还救进退失据必成擒矣诸将皆曰善乃率师趋太原库库特穆尔至保安闻之果还救太原遇春谋于达曰我骑兵虽集步卒未至骤与战必多杀伤若夜袭之可得志达然之会库库特穆尔将呼必玛勒来约降请为内应达夜选精骑袭其营库库特穆尔方燃烛治军书仓卒不知所出跳一足乘驢马从十八骑遁呼必玛降降得甲士四万遂克太原乘势收大同分遣冯胜等徇猗氏平阳絳擒其守将榆次平遥介休以次下山西悉平】质实【甘肃元路明卫今省治臯兰保定元路明府今因之中山周国元府明定州今直隶州真定汉国元路明府怀庆元路明府今俱因之惟真定作正定太行山绵亘数千里在河南怀庆府城北二十里山西泽州府南三十里羊肠险道明师所度也潞州後周置元属平阳路明初为直隶州嘉靖八年升潞安府今因之韩店在潞安府长治县南鴈门关在代州西北二十五里居庸关在昌平州北二十四里保安元州明废後复置今属宣化府大同五代唐置军元路明府今因之猗氏汉县元属河中府明属蒲州今因之州府絳周置国後周置州元属晋宁路明属平阳府今直隶州榆次汉县元

属太原路明属太原府平遥县後魏置介休县秦置元俱属汾州明属汾州府今皆因之
济农实克章旧作锡彰呼必玛勒旧作旧作豁鼻马今并改】

【己酉】明太祖高皇帝洪武二年春正月立功臣庙

【帝亲定功臣位次以徐达为首次常遇春李文忠邓愈汤和沐英胡大海冯国用赵德胜耿再成华高丁德兴俞通海张德胜吴良吴祜曹良臣康茂才吴复茅成孙兴祖凡二十一人立庙鷄鸣山下死者像祀生者虚其位又以廖永安俞通海张德胜桑世杰耿再成胡大海赵德胜七人配享太庙】质实【鷄鸣山一名鷄笼山在江宁府西北七里李文忠字思本盱人明太祖姊子初赐姓朱氏及官浙江行省平章政事乃复姓邓愈初名友德虹人沐英字文英定远人胡大海字通甫虹人冯国用胜之兄赵德胜濠人耿再成字德甫五河人华高和州人丁德兴定远人俞通海字碧泉濠人涉巢张德胜字仁辅合肥人吴良定远人初名国兴字名良吴祜良之弟初名国宝赐名祜曹良臣安丰人吴复字伯起合肥人茅成定远人廖永安字彦敬永忠之兄桑世杰无为人】

免山东北平山西河南及畿内诸郡田租

【诏以海内戡定民尚未苏免山东北平燕南河东山西今年夏秋岁粮其北京河南除徐宿等州已免外西抵潼关北界大河南至唐邓光息一体蠲免又诏免应天镇江太平宣城广德及无为州田租】质实【徐州晋置明初属凤阳府寻改直隶州今升府宿州周宿国唐置州明属凤阳府唐县唐唐州明降县邓州周邓国隋置州明俱属南阳府今皆因之光置梁置明属汝宁府今改直隶州息县同息国後周置州明降县属光州宣城晋郡隋改县明为宁国府治无为宋置军元改州明属庐州府今皆因之】

倭寇山东

【方国珍张士诚相继诛服诛毫亡命海岛纠倭入寇山东濒海州县帝遣行人杨载招谕其国日本王良怀不奉命】质实【倭古倭奴国唐咸亨初改日本地环海东北限大山有五畿七道三岛小国数十皆服属焉国主世以王为姓宋以前皆通中国元代屡招不至至是始入寇山东】

二月诏修元史

【大都既克得元十三朝实录乃诏修元史以左丞相李善长监修前起居注宋濂漳州府通判王炜为总裁徵山林隐逸之士汪克宽胡翰宋禧陶凯陈基赵坝曾鲁高起赵汾张文海徐尊生黄箴传恕王錡傅着谢徽十六人为纂修开局天界寺取元经史大典诸书资参考帝谕之曰元初君臣朴厚政事简畧与民休息时号小康季世嗣君荒淫权臣跋扈兵戈四起民命顛危间有贤哲之臣言不见用用不见信遂至土崩其间君臣行事有贤有否贤人君子或隐或显其言行亦多可称者尔等务直述其事毋溢美毋隐恶以垂鉴戒阅六月书成而元统

以後之史未备乃分遣使者欧阳佑等十二人往北平山东采遗事明年续修仍以濂禕总其事复徵赵垞及朱右贝琼朱廉王彝张孟兼高逊志李懋李汶张宣张简杜寅殷弼俞寅十四人为纂修】质实【经世大典元文宗命奎章阁侍书学士虞集仿六典修经世大典元统顺帝即位年号天界寺在江宁县城南二里宋濂字景濂金华潜溪人迁浦江王炜字子充义乌人汪克宽字德一祁门人胡翰字仲申金华人宋禧字无逸余姚人陶凯字中立临海人陈基字敬初临海人赵垞字伯友新喻人曾鲁字德之新淦人高启字季迪长洲人赵汴字子常休宁人张文海鄞人徐尊生字大年淳安人傅恕字如心鄞人傅着字则明长洲人谢徽字元懿长洲人朱右字伯贤临海人贝琼字廷琚一名阙字廷臣崇德人朱濂字伯清义乌人王?字常宗蜀人迁嘉定张孟兼浦江人名丁以字行高逊志萧县人李汶字宗茂当涂人张宣字藻重江阴人张简字仲简吴县人杜寅字彦正吴县人余未详】

元丞相伊苏侵通州平章曹良臣击走之

【大军徇山西北平守备单弱曹良臣守通州兵不满十人伊苏将万骑营白河良臣曰吾兵少不可与战当以计走之乃密遣指挥件勇等于濒河舟中多立赤帜亘三十余里钲鼓声相闻伊苏惊遁良臣出精骑逐北百余里元兵自是不敢窥北平】质实【白河源出宣化府龙门县东滴水崖东流入密云县北境之石塘岭过县西入通州界】

帝耕藉田

【先是元年冬帝谕廷臣以来春举行藉田礼礼官言汉郑元谓王社在藉田之中先农即神农也唐祝钦明云先农即社宋陈祥道谓社自社先农自先农藉田所祭乃先农非社也享先农与躬耕同日国语云农正陈藉礼韦昭注云祭其神为农祈也汉以藉田之日祀先农由晋至唐宋相沿不废政和间命有司享先农止行亲耕之礼南渡後复亲祀元虽耕藉竟不亲行其祀先农命有司摄事今议耕藉之日皇帝躬祀先农礼毕躬耕藉田以中春择日行事从之建先农坛于南郊在藉田北是月壬午帝亲祭先农以后稷配器物祀仪与社稷同祀毕行耕藉礼御耒耜二具韬以青绢御耕牛四被以青衣礼毕还大次应天府尹及上元江宁两县令率庶人终亩是日宴劳百官耆老于坛所】质实【上元县唐置在今江宁府治东北江宁县隋置在府治西南俱附郭】

三月徐达克奉天常遇春克凤翔

【元将李思齐据凤翔张思道孔兴图鲁卜等驻鹿台以卫奉元徐达兵入关思道遁去郭子兴将轻骑直捣奉元守将弃城走御史桑噶实哩与妻子俱投崖死郎中恩克仰药死检校阿实克布哈自经死三原尹朱春谓其妻曰吾当以死报国妻曰君能尽忠妾岂不能殉节俱投缳死之遂改奉元路为西安府时关中饥诏户赈米三石民大悦遇春兵至凤翔思齐奔临洮】质实【奉元元初曰安西路皇庆初改奉元路今改西安府鹿台即鹿苑原在西安府高陵县西南三十里寰宇记上有鹿台祠祷辄应临洮西魏郡金改府元明因之今改狄道州郭子兴一名兴濠人官都督僉事与滁阳王同姓名 图鲁卜旧作脱列伯桑噶实哩旧作桑哥

失里恩克旧作王可阿实克布哈旧作阿失不花今并改】

夏四月命博士孔克仁授诸子经

【功臣子弟并令入学】质实【孔克仁句容人】

冯胜徇临洮李思齐降

【时张思道弟良臣守庆阳徐达会诸将议所向皆曰张思道之才不如李思齐而庆阳易于临洮请先庆阳达曰不然庆阳城险兵精猝未易拔临洮西控羌戎北界河湟得之其人足备战鬪物产足佐军储蹙以大军思齐不西走则东手就降矣临洮既克于旁郡何有遂度陇克秦州下伏羌宁远入巩昌遣馮胜逼临洮思齐果束手不初思齐在凤翔帝以书谕之且言诚能审去就当以汉待窦融之礼相报思齐得书欲降其养子赵琦本狄道人给思齐奔吐番思齐信之遂奔临洮琦私窃实货妇女逃匿山谷问思齐穷威遂降琦寻亦来归思齐至京帝深慰之授江西行省左丞不之官久之遣往招谕库库特穆尔至则待以礼寻使骑士送之还至塞下辞曰主帅有命请留一物为别思齐曰吾远来无所齐骑士曰愿得公一臂思齐知不能免遂断与之还未几卒】质实【庆阳古义渠国宋府元明及今因之陇坂在陇州西北六十里秦州魏州明直隶州今因之伏羌唐县宁远宋砦改县金废元复明及今县皆属巩昌府巩昌秦陇西郡元府改路明改府今因之狄道汉县元明县为临洮府治今改州属兰州府吐番本西羌属汉发羌南掠秃髮乌孤之後姓勃罕野都逻些城唐贞观八年始通中国元置吐番宣慰司于河州又于四川徼外置乌斯藏明置西番乌斯藏朵甘卫指挥使司今西藏地赵琦世为元土官时呼为赵脱儿】

五月甲午朔日有食之

癸卯夏至祀地于方丘

【羣臣固请配祀帝曰俟庆阳平议之八月庆阳平十一月冬至羣臣复固请乃奉皇考仁祖淳皇帝配天于圜丘明年祀方丘亦如之】

御史中丞章溢卒

【溢初应聘与刘基叶琛宋濂同至应天帝劳之曰我为天下屈四先生今天下纷纷何时定矣溢对曰天道无常惟德是辅惟不嗜杀人者能一之耳浙东设按察使以溢为佾事督饷餉平诸寇数有功帝即位与刘基并拜御史中丞时廷臣伺帝意多尚严苛溢独存大体不以击为能李文忠之征闽也溢子存道以所部乡兵万五千人从闽平诏以所部从海道北征溢奏曰兵已入闽者俾还乡里昔尝叛逆之民藉为军使北上一举而思威着矣帝喜曰非先生一行无能办者溢行至处州遭母丧乞守制不许乡兵既集再乞终制许之哀毁卒帝痛惜亲文祭之】质实【处州隋州明府今因之章溢字三益龙泉人叶琛字景洲丽水人】

六月常遇春克开平元帝奔和林

【遇春下凤翔诏还备北平以李文忠副之帅步骑九万败元将江文清于锦州败伊苏于全宁进攻大兴州分千骑为八伏守将夜遁尽擒之遂拔开平元帝北走追奔数百里获其宗王齐克慎平章鼎住等斩之凡得将士万人车万辆马三千匹牛五万头蓟北悉平】质实【和林在今喀尔喀西部杭爱山东元太祖初都此後置和宁路绵州辽州元属大宁路明置广宁中屯左屯二卫今锦州府治锦县全宁元置全寧路明废故城在今喀尔沁故大寧城西北大兴州即兴州金末尝寄治利民镇俗呼为小兴州故名此为大兴州距古北口可三日程在今热河界内齐克慎旧作庆生今改】

封陈日煚为安南国王

【日煚遣使贡方物因请封爵诏翰林侍读学士张以宁等使其国封日煚为安南国王赐以驼纽涂金银印心宁等以十月至安南界而日煚先以五月卒其侄日煊嗣立迎请诏印以宁不与谕日煊请命于朝以宁驻安南俟命】质实【宋太宗祥符三年交趾郡王黎至忠为其臣闽人李公蘊所篡八传嗣絕传其壻陈日煊日煊之元孙也张以宁字志道古田人】

秋七月副将军鄂国公常遇春卒于军诏李文忠领其衆

【遇春师还次柳河川暴疾卒年四十遇春沉鸷果敢善抚士卒每战出则当先退则殿後未尝败北采石之役舟距砮三丈余遇春奋戈直前敌接其戈乘势登遂拔之鏖战康郎山殪陈友谅克姑苏缚张士诚功最着自言能将十万衆横行天下军中呼常十万长于大将军达二歲其从征伐聽约束惟谨及其自将善以少为衆一时名将称徐常丧归帝用宋太宗丧赵普故事临于龙江追封开平王諡忠武】质实【柳河川在宣化府龙门县西康郎山在饶州府余干县西北八十里翻阳湖之南崖也龙江关名在今江宁县西门外】

八月元兵攻大同李文忠击败之

【文忠受诏会徐达攻庆阳行次太原闻大同围急谓左丞赵庸曰阃外之事苟利于国专之可也遂出鴈门败元游兵于马邑擒其平章刘特穆尔进至白杨门天雨雪已驻营文忠引数骑入山察视疑有伏遽今移前五里阻水自固元兵果乘夜来刼营忠令坚壁不动质明敌大至以二营委之殊死战度敌疲分军为左右翼身当前锋奮击大破之擒其将国鲁卜俘戮万余人穷追至东胜州孟克仓而还先是元帝北走屯哈里泊今图鲁卜孔兴以重兵攻大同欲图恢复至是图鲁卜既被擒孔兴走绥德其部将斩之来降元帝知事无济不复南向矣】质实【马邑秦县元明属朔州今属朔平府白杨门在马邑县北东胜州辽置金元因之明初改东胜左右二卫後废故城在今归化城西南一百四十五里湖滩河朔渡口土名托克托城孟克仓在大同府边外绥德金州元因之明属延安府今直隶州赵庸庐州人刘特穆尔旧作刘帖木孟克仓旧作莽哥仓哈里泊旧作盖里泊今并改】

定内侍官制

【谕吏部曰内臣但备使令无多人顾谓侍臣曰此曹善者千百中不一二以为耳目即耳目蔽以为心腹即腹心病馭之之道当使畏法勿令有功畏法则检束有功则骄恣矣】质实【明太祖实录定置内使监奉御六十人尚宝一人尚冠七人尚衣十人尚佩九人尚履八人尚药七人纪事二人执膳四人司脯二人司香四人太庙司香四人涓洁二人置尚酒尚醋尚麪尚染四局局正一人副二人置御马御用二司司正一人副二人内府库大使一人副使二人内仓监令一人丞二人置东宫典玺典膳典翰典服典药典乘兵六局局郎一人丞一人置门官午门东华门西华门元武门奉天门左右顺门左右红门皇宫门坤宁门宫左门宫右门及东宫门宫东和门东宫後门宫左门宫右门各设门正一人副一人】

封王颙为高丽国王

【颙遣使朝贡且请封爵命符玺郎偁斯賁诏及金印往封之】质实【高丽汉以前曰朝鲜汉末扶余人高氏据其地改号高丽又曰高句骊居平壤即乐浪也後唐时王建代高氏徙居松岳曰东京偁斯溧阳人】

徐达克庆阳擒张良臣斩之陕西平

【达自临洮下兰州袭走元豫王尽收其部落輜重还出萧关克平凉张思道惧使其弟良臣守庆阳而自奔宁夏与其骁将金牌张俱为库库特穆尔所执良臣以庆阳降达遣节显受之良臣先出迎寻叛袭伤显良臣之降也捷闻帝戒曰曰张思道兄弟多谲勿堕其计中良臣果叛达督兵围之良臣求援于库库特穆尔库库特穆尔遣将攻原州陷泾阳为庆阳声援达遣冯胜扼驿马关败其将哈扎尔等良臣挠勇军中呼小平章养子七人皆败战军中语曰不怕金惟怕七条枪良臣自以庆阳城高险上有井泉可据守又倚思道库库特穆尔为声援贺宗哲哈哲尔为羽翼姚暉格斡为爪牙故降而复叛及被围犹日开门出汲驰聘城下达进营逼其四门良臣数出战不利求援宁夏者又悉被获粮乏絶至煮人汁丸泥咽之将士相继开门降达勒兵自北门入良臣父子俱投井引出斩之时元贺宗哲攻凤翔指挥使金兴旺与知府周焕婴城守敌编荆为大箕形如半舫五人负之攻城矢石不能入投藁焚之辄扬起乃置钩橐中掷着其隙火遂炽敌弃箕走复为地道薄城攻不已会百户王辂收临洮降卒还入城共守敌拔营去衆欲追之辂曰未败而还诱我也侦之至五果坡伏果发还师复围城衆欲走兴旺叱曰天子以城畀我岂可去耶以辂所将皆新附乃括城中赀令曰敌退当大犒新兵新兵喜协力固守持十五日宗哲闻庆阳下引去寻掠兰州达遣冯胜率骑往击宗哲渡河遁胜乃引还】质实【兰州隋州宋复置金元明因之今升府萧关在平凉府华亭县西北百四十里平凉金府元明及今因之宁夏元路明改府寻改卫今仍府原州後魏州元复置寻改开成府并置开成县後又改府为州明洪武中省州入开成县孝宗十五年改固原县属平凉府今因之泾阳汉县故城在平凉府西南非西安府属之泾阳也驿马关在庆阳府安化县西南九十里五里坡在凤翔县西哈扎尔旧作韩扎儿格斡旧作葛八今并改】

修礼书

【诏举素志高洁博通古今練达时宜之士年四十以上者礼送至京于是儒士徐一夔梁寅等与曾鲁同纂修明年书成名大明集礼】质实【徐一夔字大章天台人梁寅字孟敬新喻人】

九月置中都

【以临濠为中都营城郭如京师京师制帝召诸老臣问以建都之地或言关中险固或言洛阳天下中汴梁为宋旧京或又言北平故元宫室就之可省民力帝曰所言皆善惟时有不同耳长安洛阳汴梁实周秦汉魏唐宋故都但平定之初民未苏息若建都于彼供给力役悉资江南重劳其民若就北平宫室亦不无更作建业长江天堑龙蟠虎踞足以建国临濠前江後淮有水可恃有水可漕朕欲建为中都何如羣臣皆称善遂营之】质实【长安汉县元属奉元路明属西安府洛阳周下都汉置洛阳县元属河南路明属河南府今皆因之建业孙吴都改秣陵曰建业今江宁府】

发明【帝王之兴以德而地形亦与焉明祖起于濠泗则临濠其丰沛南阳也建都应天以江淮为根本而守江必先守淮鍾离据淮之中定为中都亦一时因地制宜之意然天下形势居北极而拱四方据高屋而建领水冀北为上关中次之是以成祖迁都燕京累世蒙业彼江左偏安之地汴洛四达之冲曷足以较优劣哉】

冬十月诏天下府州县皆立学

【府学设教授一员训导四员生员四十人州学设学正一员训导三员生员三十人县学设教谕一员训导二员生员二十人】

十二月封阿答阿者为占城国王

【阿答阿者奉表贡象虎方物时安南与占城构兵帝既遣使谕解又命中书省管勾甘桓等齎印诏往封之】质实【占城周越裳地秦林邑汉象林县後汉末区连始称林邑王唐时或称占不劳或称占婆王所居曰占城至德後改国号曰环迄周末遂号占城】

元库库特穆尔侵兰州指挥于光死之

【库库特穆尔侦知徐达军还率兵掩至兰州指挥张温固守敌围城数重鷹扬指挥于光守巩昌将兵来援至马兰滩猝与敌遇力战败被执使呼城内出降光大呼曰我不幸被执公等坚守大军旦夕至矣敌怒批其颊遂遇害城中闻光言守益固库库特特尔引去】质实【马兰滩在兰州东大河南岸于光字大用都昌人死时年四十三命配享功臣庙】

【庚戌】三年春正月命徐达李文忠分道北伐

【时元帝尚在近塞帝再致书不报而库库特穆尔为西北边患帝以达为大将军文忠及冯胜邓愈汤和副之分二道出兵达自潼关出西道捣定西取库库特穆尔文忠自居庸出东道絶大汉追元帝二月文忠至兴和降其守将进兵察罕诺尔擒元平章珠占五月次骆驼山走平章沙布鼎次开平降平章沙哈等】质实【定西元州明改安定县属巩昌府今因之兴和辽金抚州元为兴和路明废故城在今张家口外镶黄旗牧厂西南察罕诺尔即白海子在大青山之北骆驼山在张家口外镶黄旗察哈尔东南察罕诺尔旧作察罕脑儿沙布鼎旧作沙不丁沙达哈旧作上都罕今并改】

吏部请谪有罪于儋崖不许

【帝曰前代谓儋崖为化外以处罪人今天下一家若有风俗未淳宜更释良吏治之岂宜居罪人耶】质实【儋耳汉郡唐置儋州宋元曰南宁军明仍为儋州珠崖汉郡随置崖州宋元曰吉阳军明仍为崖州今皆因之属琼州府】

振西安凤翔饥

【先是张李构兵西安诸府旱粟麦不登民多饥死二年冬诏有司正月二月户给米一石至是耆民宋昇等来言户部奏请运粟济之帝曰民旦暮待哺若待运粟死者多矣即命户部主事李亨驰驿往西安凤翔振之户加粟一石】

二月追封郭子兴为滁阳王

【立庙滁州祀之妻张氏为王夫人以其三子从祀】质实【三子从祀按明史郭子兴传子兴长子前战死次天叙天爵俱仕伪宋被杀子兴後遂絶有一女小张夫人出者事太祖为惠妃生蜀谷代三王按通监後编考异辨证曰滁阳夫人张氏次夫人亦张氏据张来仪庙碑初劝滁阳舘高帝于貳室者次夫人也】

免应天等府州及河南山东北平田租

【诏曰成武功者必资民力各郡邑供给有先後丰歉有不同凋弊之余未能苏息其蠲应天镇江徽州宁国池州太平庐州广信饶州金华严州衢州处州广德滁和十六府州及河南山东北平今年田租又免徐邳二州夏税五月又免苏州逋粮三十万五千八百石】质实【徽州宋置元路明改府广信元信州路明改广信府金华元婺州路明改金华府严州元建德路明改严州府衢州唐置元路明改府今皆因之邳州後周置元属归德府明属淮安府今属徐州府】

夏四月封子九人为王

【侠为秦王櫚为晋王棣为燕王櫚为吴王桢为楚王樽为齐王梓为潭王杞为赵王檀为鲁王从孙守谦为靖江王帝惩宋元孤立失古封建意于是择名臣大都豫王诸子待其壮而遣就藩服外卫边鄙内资夹辅其制禄亲王岁万石置相传官属护卫甲士少者三千人多者至万九千人籍隶兵部冕服车旗邸第下天子一等公侯大臣伏而拜谒礼无与钧惟列爵而不临民分藩而不锡土与周汉封国稍异焉】质实【棣帝第二子封西安櫚第三子封太原棣第四子即成祖封北平櫚第五子有司请置护卫于杭州帝以财赋地不可洪武十一年改周王封开封四王俱皇后生桢第六子胡充妃生封武昌樽第七子封青州梓第八子封长沙二王俱达定妃生杞第九子明年殇檀第十子郭宁妃生封兗州守谦帝长兄子文正之子封桂林】

徐达大破元库库特穆尔于沈儿峪

【达至安定库库特穆尔退屯沈儿峪达達军薄之隔深沟而垒日数交战库库特穆尔遣精兵千余人由间道从东山下劫东南垒左丞胡德济仓卒失措军惊扰达亲击却之德济大海养子也达械送京师而斩其下赵指挥等数人以徇明日整兵夺沟死战大破库库特穆尔兵擒郯王济王及国公平章以下文武僚属千八百余人士卒八万库库特穆尔仅挟妻子毅人从古城北遁去至黄河流流木以渡遂奔和林违自徽州南出一百八渡至略阳克沔州入连云栈攻兴元取之邓愈亦自临洮进克河州德济至京师帝释之而以书谕达曰将军效卫青不斩苏建耳独不见穰苴之待庄贾乎且将军在军中诛之则已今下廷议吾且念其信州诸暨功不忍加诛继自今将军毋事姑息是役也都督孙兴祖燕山右卫指挥平定大兴右卫指挥龐禪等兵次拉音布拉克川遇敌兵力战皆?于五郎口音甚悼惜追封兴祖燕山侯谥忠愍配享通州开平王庙】质实【沈儿谷在巩昌府安府县北之车道岷南徽州元置明因之今改县属秦州一百八渡在略阳县城东源出徽县下流入嘉陵江渡凡一百八处故名略阳县元置属沔州明改属汉中府今因之沔州元置明改县今属汉中府连云栈汉中府志褒斜谷中元时有板阁二千八百九十二间统名之曰连云栈兴元唐府元路明改汉中府今因之河州前秦置元河州路明改州属临洮府今属兰州府信州今广信府见上诸暨秦县元州明初改诸全寻复为县属绍兴府今因之赛音布拉克川在兰州府靖远县北其西为五郎口胡大海克信州太祖命德济守之汉将李明道寇信州德济力战擒明道会大海为蒋英所害张士诚遣其将吕珍寇诸全德济救之入城守夜半斫珍营珍遁去此其功也胡德济字世美赛音布拉克川旧作三不拉川今改】

封陈日煬为安南国王

【安南使臣杜舜钦以其王日煬卒来告哀帝御西华门素服见之遣使往奠又命吏部主事林唐臣赉诏封日煬为王】质实【林唐臣名弼漳州人】

元帝殂于应昌

【诏諡之曰顺帝其国人諡曰惠宗子阿裕实哩达喇嗣改元昌光立八年而殂国人諡曰

昭宗】质实【按元史明实录元帝殂在是年四月二十八日丙戌壽五十有一应昌城距故开平卫东北三百里元置应昌路领应昌县在今克什克腾旗西北捕鱼儿海旁朱彝尊书高丽史後曰庚申君遁走沙漠高丽间犹通使称为北平北元主奔应昌以洪武三年庚戌四月殂落国人追谥曰惠字其子嗣立以余兵走和林十年丁巳遣使至高丽行宣光年号国人不允後二年又遣佥院富芬告纪年天元辛遇遣永宁君王彬往贺相传立十一年而殂北元諡为昭宗者也按昭宗殂于洪武十一年戊午非立十一年也洪武十年行宣光年号後二年告纪年天元则其子特古斯特穆尔之元年也彝尊考误 富芬旧作甫非今改】

五月始设科取士

【诏自今年八月为始明年春以天下初定令京府及各行省连举三年自後三年一举乡试以八月会试以二月着为令】

李文忠克应昌获元密迪哩巴拉送京师

【文忠闻元帝殂督兵兼程进围应昌克之元嗣君阿裕实哩达喇北走获其子密迪哩巴拉及后妃诸王官属数百人并护宋元玉玺金宝玉册镇圭大圭玉斧等驼马牛羊无算穷追至北庆州而还道与州国公江文清等降三万七千人至红螺山又降杨思祖之衆万六千余人海宁卫指挥副使孙虎至落马河与元太尉玛鲁战死之追封康安郡伯】质实【北庆州辽置故城在今巴林西北辽史地理志庆州元宁军有赤山黑河即此北边纪事旧庆州在大宁北六百余里地皆大松号曰千里松林红螺山亦作红罗山一统志今独石口 御马厰西有乌兰哈郎噶山即红罗山也明初李文忠败元兵于此落马河一统志落马河在喀喇沁右翼东蒙古名伯尔克源出大斧山北流入敖汉界入老金史大定府松山三韩二县有落马河又翁牛特右翼北有落马河出污达该山西北东南流入老河又方輿纪要落马河在应昌东北相近固都逊地即偏将孙虎战死处 密迪哩巴拉旧作买地里八喇玛鲁旧作买驴汗达该旧作海他汉固都逊旧作苦脱孙今并改】

是月旱六月朔帝亲祷于山川坛越五日雨

【帝斋于西庑皇后躬执?为农家食太子诸王馈于齐所帝素服革屨徒步至坛席藁曝日中夜卧于地凡三日诏省岳囚命有司访求通经术深明至道者越五日大雨】质实【按明实录六月戊午朔壬戌雨】

颁平定朔漠诏于天下封密迪哩巴拉为崇礼侯【李文忠捷至羣臣臣称贺帝谓治书侍御史刘炳曰尔本元臣今日之捷尔不当贺因命礼部榜示凡北方捷至勿与贺者勿与贺翌日中书省草诏进帝见有侈大之词责省臣曰元主中国将百年朕与卿等父母皆赖其生养元之兴亡自是气运于朕何与而以此张之四方有识之士口虽不言心未必以为是也可更草以进密迪哩巴拉至京师羣臣请献俘帝曰武王伐殷用之乎杨宪对唐太宗尝行之帝曰是待王世充耳若遇愍之子孙恐不尔也令以本服朝见赐冠带封崇礼侯谕省臣曰故国之

妃朝于君者元有此礼不必效之令母妃皆朝中宫赐第龙光山又曰前代革命之际获其后妃往往不以礼遇欺孤虐寡非盛德所为朕甚不取今元托郭斯后在此饮食居第务适其宜乃颁诏天下有天命靡常殷鉴可畏语】质实【龙光山即龙舟山一统志覆舟山一名龙舟山在江宁府东北太平门内杨宪字希武阳曲人托郭斯旧作脱忽思今改】

葬宋理宗顶骨于故陵

【先是元至元间西僧萨古密桂欲毁宋会稽诸陵夏人嘉木杨喇勒智为江南总摄奏请如二僧言遂发诸陵取其金宝以诸帝后遗骨瘞于杭之故宫筑浮图其上名曰镇南以厌之以截理宗顶骨为饮器嘉木杨喇勒智败籍入宣政院以赐所谓帝师者帝与侍讲学士危素论宋元兴替素备言始末帝叹息久之即命北平守将吴勉访索顶骨所在得之西僧汝克孛庐中既送至命有司厝于京城之南高座寺西北至是绍兴府以永穆陵图来献遂敕葬于故陵】质实【按西僧毁宋陵事见周密癸辛杂识至元二十二年乙酉事有陵使罗铎买棺置衣收敛又陶宗仪辍耕录所载罗有开义士唐钰瘞宋诸陵骨传及郑元佑书义士林德阳收高孝两朝骨事迹传闻异辞而宋濂高启杨维禎王逢原彭瑋诸家所纪乃甲申僧格为相与嘉木杨喇勒表里使僧萨古密桂上言明年僧格矫制报可嘉木杨喇勒智败饮器归于宫以赐帝师会稽陈县明为绍兴府治今因之萨古旧作嗣古密桂旧作妙高嘉木杨喇勒智旧作杨辇真珈汝克余旧作汝纳僧格旧作桑哥今并改】

立开中盐法

【山西行省言大同粮储自陵县运至太和岭路远费烦请令商人于大同仓入米一石太原仓入米一石三斗给淮盐一小引商人鬻毕即以原引赴所在缴之帝从其请召商输粮而与之盐谓之开中其俊各行省边境帝召商中盐以备边储储计道里远近自五石至一石差】质实【陵县原州明初改县永乐中于县置德州而移县治于旧德州属济南府今因之太和岭即勾注山在雁门关西马邑县东南六十里】

徙苏松嘉湖杭民无业者田临濠

【以五郡地狭民衆无田以耕临濠田多未辟令就垦为业给牛种车粮资遣之三年不征税徙者凡四千余户其後复徙北平山後民散处诸府州县徙沙漠遗民屯田北平又徙江南民十四万于凤阳又徙山西民于河北又屡徙浙西及山西民于滁和北平山东河南终洪武之世徙民最多】质实【松江元府明因之嘉兴宋府元路明改府湖州隋置元路明改府杭州隋置元路明府府今皆因之山後石晋所割新伪儒武云应朔武八州也新今保安州妫今怀来县儒今延庆州武今宣化府云今大同府应今应州州朔今朔州蔚今蔚州】

秋七月中书左丞杨宪有罪诛

【宪有才辨裁决明敏然意刻深有不足于己者辄中伤之为司农卿时浙西初平宪欲增

赋亩为二因倍征之民不堪其苦在中书欲尽易省中故事凡旧吏皆罢去更用已所亲信者汪广洋为右丞以宪专决依违不与较犹不能得宪意宪竟嗾侍御史刘炳刻罢之且请徙广南帝不从且复有所论刻帝觉其诬下炳狱炳吐实遂并诛之】质实【汪广洋字朝宗高邮人】

冬十一月大封功臣

【徐达李文忠师还至龙江帝出劳于江上甲午告武成于郊庙越二日大都督府兵部上诸将功绩帝自定其次第遂班爵行赏封公者六人宣国公李善长进韩国公信国公徐达进魏国公常遇春子茂卿郑国公文忠曹国公馮胜宋国公邓愈卫国公侯者二十八人汤和中山侯唐胜宗延安侯陆仲亨吉安侯周德兴江夏侯华云龙淮安侯顾时济宁侯耿炳文长兴侯陈德临江侯郭子兴巩昌侯王志六安侯郑遇春荥阳侯费聚平凉侯吴良江阴侯吴祯静海侯赵荣南雄侯廖永忠德庆侯俞通源南安侯华高广德侯杨璟营阳侯蕲国公康茂才子铎蕲春侯朱亮祖永嘉侯傅友德颍川侯胡美豫章侯韩政东平侯黄彬宜春侯曹良臣宣宁侯梅思祖汝南侯陆聚河南侯越二日大宴翌日诸臣入谢帝赐座华盖殿从容谕取天下之略曰朕起乡里本国自全及渡江以来视羣雄所为徒为民害张士诚陈友谅尤为巨蠹士诚恃富友谅恃强朕独无所恃惟不嗜杀人布信义行节俭与卿等同心共济初与二寇相恃士诚尤逼近或谓宜先击之朕以友谅志骄士诚器小志骄则好生事器小则无远图故先攻友谅鄱阳之役士诚卒不能出姑苏一走以为之援向使先攻士诚姑苏坚守友谅必空国而来吾腹背受敌矣及北定中原先山东次河洛止潼关之兵不遽取秦陇者以库库特穆尔李思齐张思道皆百战之余未肯遽下急之则并力一隅猝未易定故出其不意反旆而北燕都既举然後西征张李望絶势穷不战而克然库库特穆尔犹力抗不屈向令未下燕都骤与角力胜负未可知也已又封汪广洋忠勤伯刘基诚意伯又封薛显永城侯数其专杀之罪俾居南海】质实【陇州西魏置明属凤翔府今因之唐德宗濠人周德兴濠人华云龙定远人耿炳文濠人陈德字至善濠人王志临淮人郑遇春濠人韩政睢人陈德江夏人梅思祖夏邑人陆聚史未详其乡里余见前】

十二【月】遣官祭历代帝王陵寝

【先是遣使访先代陵寝仍命各行省其图以进凡七十有九礼官考其功德昭着者曰伏羲神农黄帝少昊颡顓唐尧虞舜夏禹商汤中宗高宗周文王武王成王康王汉高祖文帝景帝武帝宣帝光武明帝章帝後魏文帝隋高祖唐高祖太宗宪宗宣宗周世宗宋太祖太宗真宗仁宗孝宗理宗凡三十有六遣秘书监丞陶谊等往修祀礼令有司禁樵采岁时祭祀牲用太牢明年礼臣定议合祀帝王三十五在河南者十陈祀伏羲商高宗孟津祀汉光武洛阳祀汉明帝章帝郑祀周世宗巩祀宋太祖太宗真宗仁宗在山西者一荣河祀商汤在山东者二东平祀唐尧曲阜祀少昊在北平者三内黄祀商中宗滑祀颡顓高辛在湖广者二鄱祀神农宁远祀虞舜在浙江者二会稽祀夏禹宋孝宗在陕西者十五中部祀黄帝咸阳祀周文王武王成王康王宣王汉高帝景帝咸宁祀汉文帝兴平祀汉武帝长安祀汉宣帝三原祀唐高祖体泉祀唐太宗蒲城祀唐宪宗涇阳祀唐宣宗岁祭用仲春仲秋朔设陵户二人守视已而去

周宣王汉明帝章帝增祀娲皇于赵城後魏文帝于宣平宋理宗于会稽元世祖于顺天凡三十有六後又增祀隋高祖于扶风而理宗仍罢祀】质实【孟津县金置明属河南府郑州隋置明属开封府巩县汉县明属河南府今皆因之荣河县宋置元属平阳府蒲州今属蒲州府东平汉国明初府寻降州属济宁府後属兗州府今属泰安府内黄县汉置明属北平大名府今属河南彰德府滑县晋滑壹隋置州改改县属大名府今属河南卫辉府鄆县宋置明属衡州府今因之宁远县宋置明属永州府道州今属永州府中部县姚秦晋明属延安府鄆州今属鄆州咸阳县秦置明属西安府兴平县唐置明属西安府三原县秦置三原护军以在清丰原孟侯原白鹿原问故名西魏置县明属西安府醴泉县隋置明属乾州嘉靖中改属西安府今皆因之蒲城县西魏置明属华州今属同州府泾阳县秦邑明属西安府今因之赵城县隋置明属平阳府今属霍州富平县汉置明属耀州万历中改属西安府扶风县唐置明属凤翔府今皆因之】

自正月至是月日中屡有黑子诏求直言

【起居注万监言日者阳精而有黑子阴奸乎阳也德为阳刑为阴君子为阳小人为阴宜慎刑黜奸吏部尚书郎本中言日者君象君德修则天变消河南中原民未安堵天下才俊学行之上隐于山林天之仁爱人君无所不在则人君体天心而施于政者亦当无所不用其情也】

【辛亥】四年春正月李善长罢以汪广洋为右丞相胡惟庸为左丞相

【善长貌寬和而性伎刻比进封大国意稍骄帝颇厌之以疾致仕初帝尝以吏事责善长刘基言善长勲旧能调和诸将帝曰是数害君君乃为之地耶吾行相君矣基顿首曰是如易柱必得大木若束小木为之且立仆帝又尝欲相杨宪宪索善基基力言不可曰宪有相才无相器夫宰相者心如持水以礼义为权衡而已不与焉者也帝曰汪广洋何如曰褊残殆甚于宪又问胡惟庸曰譬之驾惧其僂轅也帝曰然无逾先生对曰基疾恶太甚又不耐繁剧为之且孤立思天下何患无才惟明主悉心求之目前诸人诚未见其可及宪广洋惟庸皆败如基言】质实【胡惟庸定远人洪武三年为中书省参知政事至是代汪广洋为左丞】

以汤和为征西将军傅友德为征虏前将军帅师伐蜀【先是帝遣杨璟招谕明昇命奉国入覲昇牵于羣议不能决已而帝遣使假道征云南不奉诏其将吴友仁又数寇兴元乃命将讨之和帅副将军同德兴廖永忠等以京卫荆湘舟师由瞿塘趋重庆友德帅副将军顾时等以河南陕西步骑由秦陇趋成都邓愈往襄阳督饷给军】质实【明史明玉珍随州人初为徐壽辉元帅袭陷成都陈友谅弑壽辉玉珍以兵塞瞿塘自立为陇蜀王至正二十二年僭位于重庆国号夏立五年卒子昇嗣改元开熙母彭氏同聽政昇甫十岁诸大臣用事太祖遣杨璟谕使入朝不聽徐达克兴元以兴旺守之吴友仁以兵三万来攻决濠填堑达遣傅友德救之友仁乃引去友仁初为玉珍司徒昇立自保宁移檄诛玉珍养子明昭入国国政及昇降见执帝以其寇汉中首造兵端今明氏失国戮于市瞿塘关在今夔州府治奉节县城东八里重庆府南宋置元为路明复府成都秦城晋国元路明改府襄阳三国魏置郡元路明改府今皆

因之】

免浙江山西被灾田租

【浙之绍兴府诸暨县被水山西丰州东胜州太原府兴县被旱诏免其田租】质实【丰州唐置後唐改天德郡元复为州明因之後为谿达地万历三年赐名归化城今设归化城同知兴县金兴州明初降县属太原府今因之】

二月免太平镇江宁国田租

帝如中都至自中都

【先是建圜丘方丘日月社稷山川坛于太庙于临濠帝谕中书省臣曰临濠为朕兴王之地今置中都宜以傍近州县通漕运者隶之甲戌幸中都壬午还京师】质实【明太祖实录议以壽邳徐宿颍息光六安信阳九州五河怀远定远中立蒙城霍邱英山宿迁睢宁碭山灵璧颍上太河固始光山丰沛萧十八县悉隶中都】

元平章刘益以辽东降

【益为元辽阳行省平章籍所部来降诏置辽东卫指挥使司以益为指挥同知未几元平章洪保保马彦翬等杀益右丞张良佐执彦翬杀之保保走依纳克楚良佐权卫事以状闻帝授良佐盖州卫指挥僉事纳克楚者元穆呼哩裔孙为太平万户府帝拔太平获之待之甚厚纳克楚常郁郁不乐帝召语之曰人臣各为其主况尔有父母妻子乎乃纵之北还据金山屡为边患帝数以书谕之皆不答帝以辽阳悬絶纳克楚未靖八年乃设辽东都指挥使司统辖诸卫命叶旺马云往镇之】质实【辽东秦郡元初置东京总管府後改辽阳路明洪武四年置定辽都卫八年改辽东都指挥使司今辽阳州属奉天府盖州唐置後改辰州金复元及明初因之洪武九年改卫今盖平县金山明史地里志辽东三万卫西北有金山方輿纪要山东南距卫三百五十里考明三万卫今为奉天府开原县地金山盖在县边门外叶旺六安人镇辽阳以功与焉云俱进都督僉事在边十七年修城隍抚辑军民垦田万余顷为永利马云合肥人嘉靖初以二人有功于辽命立祠祀之纳克楚旧作纳哈出穆呼里旧作木华黎今并改】

三月策试天下贡士赐吴伯宗等进士及第出身有差【乙酉朔策贡士于奏天殿登第者百二十人赐吴伯宗等三名进士及第二甲十七人赐进士出身三甲百人赐同进士出身伯宗授礼部员外郎高丽入试者三人惟金涛登第】质实【此廷试始吴伯宗名名佑以字行金谿人】

诚意伯刘基致仕

【帝尝手书问天象基条答甚悉而焚其草大要言霜雪之後必有阳春今国威已立宜济以宽大至是赐归老于乡】

夏五月免江西浙江秋粮

六月汤和至重庆明昇降

【帝之遣傅友德也密谕之曰蜀人闻我师西伐必悉精锐东守瞿塘北阻金牛若出不意直捣阶文门户既隳腹心必溃兵贵神速患不勇耳友德疾驰至陕西集诸军声言出金牛而潜引兵趋陈仓攀援岩石昼夜行抵阶州败其将丁世珍克其城蜀人断白龙江桥友德修桥以渡破五里关世珍复集兵据险都督同知汪兴祖中飞矢石友德攻拔文州龙州进破绵州龙镶卫指挥史监战死将渡汉江会水涨伐木造战舰欲以军声通瞿塘乃削木为牌数千书克阶文龙绵日月投汉水顺流下蜀守者见之皆解体初夏人闻大军伐蜀丞相戴寿等果率众守瞿塘及闻友德破阶文捣江油始分兵援汉州以保成都未至友德已破其守将向大亨于汉州城下授师至友德迎击大败之遂拔汉州帝闻汤和驻兵大溪口欲俟水平进师诏趋之廖永忠闻命先发兵至瞿塘阻铁锁桥不得进永忠密遣人百人持糗粮水筒舁小舟踰山度关出其上流蜀山多草木令将士皆衣青蓑衣鱼贯入崖石间度已至率精锐出墨叶渡夜五鼓分两军攻其水陆寨水军皆以铁裹船头置火器而前黎明蜀人始觉尽锐来拒永忠已破其陆寨将士舁舟出江者一时并发鼓噪而下下流之师亦拥舟急击上下夹攻大破之遂入夔州明日和始至乃分道进永忠帅舟师直捣重庆昇大惧羣下劝奔成都昇母彭泣曰成都可到亦仅旦夕耳不如早降昇乃请降永忠以汤和未至不受越五日 and 至昇乃面缚衔璧舆榼率官属降于军门和等承制抚慰之时丁世珍复陷文州指挥僉事朱显忠千户王均谅死之友德调兵来援世珍遁】质实【金牛峡在汉中府宁羌州北三十里又自沔县西南至四川剑州之大剑关口皆曰金牛道汉中入蜀要路也阶州唐置宋明因之明属巩昌府今甘肃直隶州文州北周置即汉阴平道也元复置州明改县属阶州今因之陈仓县秦置唐改宝鸡县元明及今因之属凤阳府白龙江桥在阶州南亦曰南桥造舟为梁跨白龙江上白龙江源出巩昌府岷州经阶州文县与白水江合五里关在文县北龙州西魏置元属广元路明初仍为龙江嘉靖中升龙安府今因之绵州隋置元初属成都路後属潼川路明属成都府今因之汉江即雒水在汉州城南亦曰中水克龙文龙绵日月按明实录四月丙戌克阶州己丑克文州辛丑克龙州明复克绵州江油蜀汉戍西魏置县元并入龙州明复置江油县属剑江後属龙安府今因之汉州唐置元属成都路明属成都府今因之大溪口在夔州府铁锁桥明史明昇遣莫仁寿以铁索横断瞿塘峡口又遣戴寿吴友仁等助之北倚羊角山南倚砦城砦凿两崖石壁引铁索为飞桥用板置礮以拒守夔州唐置元路明改府今因之丁世珍蜀平章事後率余党犯秦州不克走宿梓潼庙中为帐下小校所杀汪兴祖巢县人张德胜养子追封东胜侯戴寿与向大亨走保成都昇降亦降至夔峡皆凿舟自沉死朱显忠如皋人里创力战为乱兵所杀王均谅先受夏主命摄礼店元帅府同知来朝授文州副千户被执不屈磔死事闻监与显忠均谅赠恤有差】

秋七月傅友德下成都四川平

【友德进围成都戴壽等以象战友德令强弩火器冲之身中流矢不退将士殊死战突其象阵象反走躡藉死者甚衆遂降成都分兵徇州邑克保宁执吴友仁蜀地悉定】质实【保宁唐阆州後唐置保宁军元为保宁府明及今因之】

发明【太祖制平西蜀文盛称友德功第一永忠次之师还授上赏而汤和以逼邈不进屡被责谕则平蜀之功主将不得专之也故和与友德并书于纲】

以方克勤知济宁府

【克勤以治以德化不喜近名曰近名必立威立威必殃民吾不忍也时诏民垦荒闾三岁乃税吏不俟期徵民辄弃田去克勤岁如期区田为九等以等徵发吏不得为奸立杜学数百区葺孔子庙堂延名士为师弟子系籍者三千人盛夏郡将督民筑城克勤曰民方耕奈何畚鍤重困之为请中书省得罢役会天会遂大澍济宁人歌曰孰罢我役使君之力孰活我黍使君之两使君勿去我民父母】质实【方克勤字去矜宁海人见明史循吏传】

封明昇为归义侯

【昇至京羣臣请降御殿受俘如孟昶降宋故事帝曰昇幼弱事由臣下与昶异免其伏地待罪之仪授爵归义侯赐居第】

八月免中都淮阳及泰滁无为田租

质实【淮安宋州元路明改府扬州隋置元路明改府秦州南唐置元属扬州路明属扬州府今皆因之】

振陕西饥

九月庚戌朔日有食之

设粮长

【帝以郡县吏每额外徵收命有司料民田以田多者为粮长督其乡赋税粮万石长副各一人输以时至得召见语合辄蒙擢用其後官军兑运法行粮长不复至京师在州里颇滋民害其孱弱者乃为势豪所凌耽延逋角率鬻产以偿遂至陨身丧家景泰中革未几又复】质实【官军兑运法详见後宣德四年】

冬十一月免陕西河南被灾田租

【西安凤翔庆阳三府开封府属祥符等五县及睢州以旱闻诏免其田税】质实【祥符

县宋置明及今因之为开封府治睢州金置明及今因之属归德府】

十二月逮汉中知府费震寻释之

【震以贤良徵为吉水知州宽惠得民擢知汉中府时陕西旱饥汉中尤甚乡民聚为盗震发仓粟十余万石贷民盗闻皆来归邻境民亦争赴震令占宅自为保伍籍之得数千家秋大熟悉还前贷至是以他事被逮帝曰良吏也释之以为牧民者戒授宝钞局提举】质实【吉水元州明改县属吉安府今因之费震鄱阳人洪武十一年以提举超拜户部侍郎寻进尚书出为湖广布政使致仕】

【壬子】五年春正月置亲王护卫指挥使司

【每王府设三护卫卫设左右前後中五所所千户二人百户十人】质实【明史职官志王府护卫指挥使司设官如京卫掌防御非常护卫王邸有征调则聽命于朝】

遣翰林院待制王禕使云南被执不屈死

【元梁王巴咱尔斡尔密镇云南大都不守顺帝北去王岁遣使自塞外达元帝行在执臣节如故蜀既平天下大定帝以云南僻难进兵而王所遣漠北使者苏成适为北平守将所获乃命禕齎诏偕成往招谕王待禕以礼会元主遣托克托徵饷云南知禕在王所疑王有他意胁以危语王不得已出禕见之托克托欲屈禕禕叱曰天既讫汝元命燭火余烬敢与日月争光耶我奉使远来岂为汝屈遂自刎梁王具衣冠斂之】质实【明史职官志翰林院待制五品品云南汉西南夷滇地唐开元二十六年册南诏蒙归义为云南王天宝九载遂有云南之地僭号大蒙及元灭大理至正十三年立云南行中书省洪武十三年置云南承宣布政使司今因之王禕死事在洪武六年十二月建文中赠翰林学士諡文节正统中改諡忠文巴咱尔斡尔密元世祖第五子云南王和克齐之裔巴咱尔斡尔密旧作把匝剌瓦尔密托克托旧作脱脱和克齐旧作忽哥赤今并改】

徙陈理明昇于高丽

【或告陈理明昇有怨言帝曰童儒辈言语小过不足问也但为小人蛊惑将不能保始终宜处之远方则隙无自生乃徙高丽】

遣徐达李文忠冯胜等分道征库库特穆尔达军败绩文忠胜败元兵而还

【帝与诸将筹边事徐達曰王保保出没边境愿剿絕之帝曰徐远处絕漠以死自卫不如姑置之会诸将皆以达言为然帝乃命达为大将军出雁门趋和林文忠为左副将军出居庸趋应昌胜为征西将军出金兰趋甘肃三月达先遣都督蓝玉败库库特穆尔于图拉河五月库库特穆尔与贺宗哲拒达于岭北达军败死者数万人七月汤和至断头山遇敌指挥同知

章存道力战死胜至兰州遣副将军傅友德前驱败元兵于必里克图山取西凉至永昌下甘州又败元兵于和罗噶口胜复败之索琳山拔萧州下额齐纳路次宾都山元岐王多尔济巴勒遁去获其平章昌嘉努等二十七人友德复追至瓜沙州斩获甚众文忠至胘胸河留輜重疾驰至鄂尔坤河马中流矢指挥李荣以所乘马授文忠而自夺敌马乘之文忠殊死战遂破敌追奔至青海推牛飧士而还是役也宣宁侯曹良臣指挥使周显张耀指挥同知常荣俱战死独胜全师而还以私匿驼马故赏皆不行】质实【金州金置元以彘谷县省入明改县今因之属兰州府图拉河源出喀尔喀鄂诺河西北图埒尔吉岭之西及岭北小克特山断头山在明阳和卫边外今阳城县西北十里必里克图山在凉州北塞外西凉宋置府元改州明改凉州卫今凉州府永昌元路明改府今永昌县属凉州府甘州西魏置元路州路明甘肃卫今甘州府和罗噶口在甘州西北索琳山在肃州北肃州唐置元路明洪武中改卫今直隶州额齐纳路汉居延故城元立总督府在甘州北一千五百里宾都山在肃州西塞外瓜州古允姓戎地唐置瓜州治晋昌元徙瓜州民于肃州明为沙州卫地今安西州沙州前凉置元沙州路明改卫今安西州炖煌县元史地里志沙州去肃州千五百里胘胸河或曰即西平河也今名充鲁伦河源出克特山南直河套北二千里许鄂尔坤河源出喀尔喀杭爱山南流数百里与图拉河合青海方輿纪要云在和林境元为屯田所胘胸河西为图拉河又西为鄂尔坤河又西北为青海蓝玉定远人存道章溢子平阳左卫指挥同知曹良臣追封安国公諡忠壮周显合肥人骁骑左卫指挥使张泰泰州人神策卫指挥使常荣定远人遇春再从弟振武卫指挥同知赐葬必里克图山旧作别力笃山和罗噶口旧作虎刺罕口索琳山旧作扫林山额济纳路旧作亦集乃路宾都山旧作别笃山多尔济巴勒旧作朵儿只班昌嘉努旧作长加奴鄂尔坤河旧作阿鲁浑河青海旧作称海今并改】

以邓愈为征南将军讨湖南广西蛮

【先是三年四月慈利土司覃屋连构诸洞蛮为寇杨璟讨之屋遁入溪岗师还寻复出寇十月周德兴讨之拔温阳关屋复遁至是帝以辰澧诸蛮常便化乃命愈往讨以德兴及吴良副之愈出澧州讨散毛诸洞蛮德兴出南宁讨婪凤安田诸州蛮良山出靖州讨会同五□潭溪古州蛮悉平之】质实【慈利县置元升州明初复县属澧州今因之县西有覃屋寨温阳关在慈利县西辰州隋置元路改改府今因之澧州隋置元路明初为府寻降州属岳州府今直隶州散毛洞元置散毛誓崖等处军民宣慰司明置宣抚司属施州卫今施南府来凤县婪凤宋羈縻州元废地在今田州东安州元来安路明废地在今田州西田州唐置元路明为土府嘉靖七年降州今州属思恩府靖州宋置元路明改府洪武九年降直隶州今因之会同县宋置元明及今因之属靖州五开元上黎平长官司属思州明洪武十八年置五开卫属湖广永乐十一年改置黎平府属贵州弘治十年徙府治卫南今为黎平府开泰县地潭溪宋置长官司元明因之今司属黎平府古州元古州八万洞长官司明古州变夷长官司属黎平府今有同知驻之按五开潭溪古州是时皆属湖广永乐後乃属贵州】

二月安南陈叔明弑其主日熉自立遣使入贡却之【叔明逼死日熉而自立惧讨遣阮汝霖入贡以觐朝廷意主客部受表主事曾鲁取副封白尚书诘使者曰前王日熉今何骤更名汝霖不敢隐具言其实帝曰岛夷乃狡狴如是却其贡叔明复遣使谢罪乃命以前王印视事

】质实【陈叔明日燧伯父按明史传日燧以洪武四年冬被弑主客部礼部属洪武初设六部部各四属亦皆称部至二九年各部增设所属始俱定称清吏司】

置茶马司

【初令卖茶之地宣课司三十取一户部言陕西四川茶宜十取其一以易番马从之于是诸产茶地设茶课司定税额设茶马司于秦洮河雅诸州自碉门黎雅抵朵甘乌斯藏行茶之地五千余里西方诸部落无不以马售者】质实【茶马司明史职官志云茶马司大使一人正九品副使一人从九品掌市马之职宣课司职官志云税课司大使一人从九品典税事明初改在京官店为宣课司府州县官店为通课司後改通课司为税课司府曰司县曰局陕西四川茶明太祖实录四年十二月户部言陕西汉中金州石泉汉阴平利西乡诸处茶园四十五顷茶八十六万余株宜十取其一民所收茶官给直买之无户茶园令汉中府军士薅采官八军二每百斤为一引五年二月又言四川产巴茶凡四百七十七处茶户凡三百十五茶二百三十八万余株官十徵其一无户茶园令人薅种十取其八皆贮以易番马明史食货志云番人嗜乳酪不得茶则病故唐宋来行以茶易马法明制尤密有官茶有商茶皆贮边易马茶课司见食货志茶法中洮州後周制元属巩昌路明改洮州卫今为厅属巩昌府雅州隋置元属巩昌路番等处宣慰司明四川直隶州今升府黎州汉沈黎郡後周置黎州元属土番等处宣慰司明改黎州长官司万历时降千户所今溪县县属雅州府碉门黎雅五代置碉门黎雅安抚司元置碉门鱼通黎雅长河西宁远等处宣抚司及天全招讨司明初合为天全六番招讨司碉门砦在雅州府荣经县西北百五十里黎即黎州雅即雅州朵甘在四川徼外乌斯藏在云南西徼外今西藏西番诸部落明史西域传云西番族种最多自陕西四川云南西徼外皆是散处河湟洮岷间】

三月免京役民

【应天府言运输官物悉役京民帝曰京民自闻国以来劳费倍于外郡今兵革渐息正当休养命免其役未几又赐京民绢户一匹】

以礼部主事魏观知苏州府

【前守陈宁苛刻人呼陈烙铁观尽改所为明教化正风俗郡中翕然课绩为天下最明年擢四川行省参政以部民乞留命还任初张士诚以苏州旧治为宫迁府治于都水行司观以其地湫溢还治旧基又濬锦帆泾兴水利或譖观既灭之基帝怒命御史廉其事遂被诛帝寻悔命归葬观与长洲高启善为移其家郡中帝见启所作上梁文怒腰斩于市】质实【锦帆泾在苏州府盘门内相传吴王锦帆以游故陈宁初名亮赐名寧茶陵人】

高丽国王请遣子弟入国子学

【高丽国王王颙遣密直同知洪师范郑梦周等奉表贺平夏贡方物且请遣子弟入太学

帝以涉海远来离其父母令中书省谕其国王与羣下熟议毋勉强】

夏四月振济南莱州饥

【山东行省言济南莱州连年旱涝伤禾麦民食草实树皮帝即命于淮安运粟振之】质实【济南汉国宋置府元改路明复府莱州隋置元仍为州明洪武九年升府今因之】

诏天下行乡饮酒礼

【应天府及直隶各行省府州县每岁孟春孟冬有司与学官率士大夫老者行之于学校民间里社以百家为一会粮长或里长主之年最长者为正宾余以齿序每季行之读律今则以刑部所编申明戒谕书兼读之武职于每月朔日以大都督府所编戒谕书率僚佐读之】

六月定宫官女职

【帝以汉唐宫官过多宜防女宠法将来命礼部议定设六局一司凡官七十五人女史十八人】质实【六局尚宫尚仪尚服尚食尚寝尚功一司宫正俱正六品】

作铁榜戒功臣

【帝以功臣不能检下作铁榜牖目凡九以申诫之】质实【一内外各指挥千户等不得私受公侯金帛衣物二公侯不得私役官军三不得强占官民场泊园冶四内外官军不得于公侯门首侍立聽候五管庄人等不得倚势欺欧人民六屯佃奴仆及其亲属人等不得倚势侵夺田产财物七不得私托门下影蔽差徭八公侯之私欺压良善侵夺人者四犯与庶人同罪九不得受诸人投献物业】

振山东饥免被灾郡县田租

【山东高唐濮二州聊城堂邑朝城等县饥敕吏部尚书赵瑆坚往振之又命以米六万六千余石振莱州东昌饥蠲登莱二州逋租及今年夏麦是月又命振庆阳府安化合水环三县饥自五月至秋七月凤翔平凉雨雹二麦伤豆麦诏免其税苏州府崇明县水诏以所报报未尽令尽报免之八月免通州海门县被水田租】质实【高唐州元置明及今因之属东昌府濮州隋置明属东昌府今属曹州府聊城秦县明为东昌府治堂邑县隋置明属东昌府今皆因之朝城县唐置明属濮州今属曹州府东昌元路明改府今因之安化县唐置明为庆阳府治合水县唐分隋合水县置环县元环州明改县俱属庆阳府今皆因之崇明县元州明降县弘治中改属太仓州今因之通州後周置明属扬州府今直隶州海门县後周置元明屡徙本朝康熙十一年省入通州今改设海门厅】

秋八月倭寇福寧明州卫指挥僉事张亿讨之中流失卒

【倭入寇前後杀掠居民三百五十余人焚烧庐舍千余家刼官粮二百五十石张亿率兵讨之中流矢卒事闻遣使致祭恤其家】质实【福宁元升长溪县为福宁州明初降县後升直隶州今升府】

元兵侵云内州同知黄里死之

质实【云内州辽置金元因之明废为卫拉特所据今乌喇特旗西北在归化城西三百六十里】

冬十月免应天太平镇江宁国广德田租

十一月纳克楚侵辽东

十二月诏百官奏事启皇太子

御定资治通监纲目三编卷一

卷二

<史部,编年类,御定资治通监纲目三编>

钦定四库全书

御定资治通监纲目三编卷二

【起癸丑明太祖洪武六年尽丙寅明太祖洪武十九年】凡十四年

【癸丑】六年春正月覲天下府州县官

【先是元年春府州县吏来朝谕曰天下新定百姓财力俱困如鸟初飞木初植勿拔其羽勿撼其根惟廉者能约已而爱人贪者必朘人以肥已尔等戒之至是覲府州县官赐酒食明日陞辞论之曰慈祥恺悌】

【身之德也越簿残酷德之贼也若伪为慈祥必无仁夔之实伪为恺悌又无乐易之诚尔等勉之】质实【明会典洪武初外宫每年一朝二十九年始定以辰戌丑未年为朝覲之期】

选朝天宫道士供事郊坛

【天地社稷山川香帑皆令司之】质实【朝天宫在上元县西即吴治城宋天庆观也明初改名】

免辽东金复二州税

【辽东金复二州去年旱税粮不供诏免之】质实【金州本高丽南苏城唐置金州金改苏州後改金州明改卫今寧海县复州辽置金因之元废明改卫今复州属奉天府】

汪广洋罢为广东行省参政

【时左丞胡惟庸专省中事广洋无所建白故黜之】

二月停科举命有司察举贤才

【帝初以官多阙员举人俱免会试赴京听选正月以举人蒋学阎钝为起居注傅宗岩崔莘为给事中赵震殷哲为翰林应奉又择其年少俊异者张唯王辉李端张翀为翰林编修萧韶为秘书监直长继又以王珪张凤任敬马亮陈敏俱为编修入禁中文华堂肄业命赞善大

夫宋濂等为之师帝政暇亲品隲其文曰给光禄酒饌每食皇太子亲王迭为之主岁时赐赉甚厚二月以有司所取多属少年有文无实遂暂罢科举更令有司察举贤才以德行为本文艺次之其目曰聪明正直曰贤良方正曰孝弟力田曰儒士曰孝廉曰秀才曰人才曰耆民皆礼送京师不次擢用而各省贡生亦由太学以进於是罢科举者十年帝又尝令国子生习骑射谕之曰古之学者其文足以经邦武足以戡乱故能出入将相定安社稷今天下承平尔等虽务文学亦岂可忘武备耶】

命御史及按察使考察有司

【命御史台令监察御史及各道按察司察举天下有司有无过犯奏报黜陟帝谕台臣曰君子有犯?出於过误可以情恕小人不去则貽民患故朕于廉能之官虽?有过常加宥免若贪虐之徒虽小罪不赦也】质实【此者察之始明史选举志考察通天下内外官计之其目有八曰贪曰酷曰浮躁曰不及曰老曰病曰罢曰不谨京官六年以己亥岁四品以上自陈取上裁五品以下分别致仕降调间住为民具册奏请谓之京察自弘治时定以外官辰戌丑未年朝覲之期随举行察典谓之外察州县以月计上之府府上下其考以岁计上之布政司至三岁抚按通核其属事状造册具报丽以八分而处分察例有四与京官同迺明相沿行之不废谓之大计计处者不复叙用】

三月癸卯朔日有食之

设六科给事中

【明初统设给事中掌侍从规谏补阙拾遗至是分为吏户礼兵刑工六科各设给事中二人凡十二人後增至八十一人称元士二十二年改为源士二十四年每科增都给事中一人左右给事中各一人】质实【给事中正五品洪武四年改正七品後增给事中共四十人都给事中正八品左右给事中从八品给事中正九品建文中改都给事中正七品给事中从七品不置左右给事中永乐中仍置左右给事中亦从七品】

颁昭鉴录戒诸王

【先是命陶凯张筹等采摭汉唐以来藩王善恶堪为劝戒者会凯出参行省编辑未成於是召文原吉王僎等续修之书成二卷赐名昭鉴录颁赐诸王】质实【张筹字惟中无錫人王僎字幼度祥符人】发明【太祖谓秦王傳文原吉等曰朕於诸子常切谕之此书必时时进说使知所警戒赵伯鲁之失简汉淮南之招客过犹不及非所望也是帝之於诸子虑之非不深教之非不切然而槩多过失柵有异谋至於惠成之间衅深寻斧盖以裂地而封势成宠偏又岂空言之所能禁制哉】

命徐达等帅师镇山西北平

【先是帝命徐达李文忠练兵山西北平寻召还至是以元兵窥塞乃命达文忠及冯胜邓愈汤和等帅师往镇以备之初元宗室四大王逃匿岢岚山中结寨自固寻出攻武州指挥程桂等击败之已而国公鲁尔等侵迁安杀知县永平卫指挥杨某与战死之指挥樊某率兵来援敌引去追至董家口敌返兵接战樊亦死之达驻临清遣文忠及顾时傅友德等统骑兵胜和及俞通源来亮视等统步兵分驻山西北平相机备御元兵复侵武朔等州达俱遣将击走之河州土门峡边警千户王才战死保德河曲为元将普贤努等所陷太原右卫千户冯铭追击之复其地指挥使常守道王约等追元遗兵斩其左丞相瑚图克擒平章鼎鼎达人自大同遣将掩捕武平章等於怀柔县之三角村】质实【岢岚山在岢岚州北百里岢岚州宋岢岚军金升州元为岚州地明置县属太原府寻开州今因之武州唐置元顺寧府明洪武四年废府永乐中为宣府镇宣德五年置万全都司今兴化府迁安县金置元属永平路明属永平府今因之永平卫在永平府南董家口关在抚寧县东北七十里朔州後魏置元属大同路明属大同府今属朔平府土门关在河州西九十里保德州宋军金置州元因之明属太原府今直隶州河曲县金置元省入保德州明初复置属太原府今属保德州怀柔县唐置元废明复置属顺天府今因之三角村在县东北鲁尔旧作驴儿普贤努旧作普贤奴瑚图克旧作忽都鼎鼎旧作定定今并改】

夏四月定开国勲臣諡号

【楚国公廖永安諡武闵豫国公俞通海諡忠烈蔡国公张德胜諡忠毅高阳郡公耿再成諡武壮越国公胡大海諡武庄梁国公赵德胜諡武桓以永义侯桑世保与汉光武封寇恂为承义侯景丹为奉义侯同不重諡初帝定金陵以元御史大夫福寿死节为之立庙至是复议赠其官礼部言元已赠福寿浙江行省左丞相上柱国追封卫国公諡忠肃宜仍其旧帝是之令春秋遣官致祭谕侍臣曰疾风知劲草板荡识忠臣共福寿之谓乎】质实【福壽唐古人唐古旧作唐兀今改】

六月京师城成

【城周九十六里门十有三後复建外郭周一百八十里门十有六】质实【内为宫城外为京城门十三南曰正阳南之西曰通济又西曰聚宝西南曰三山曰石城北曰太平北之西曰神策曰金川曰鍾阜东曰朝阳西曰清凉西之北曰定淮曰仪凤其外郭洪武二十三年建门十六东曰姚坊仙鹤麒麟沧波高桥双桥南曰上方夹冈凤台大驯象大安德小安德西曰江东北曰佛寧上元观音】

元库库特穆尔侵雁门

【守关指挥吴均率衆拒之自卯至午大呼曰援兵至矣衆皆踊跃欲战元兵闻之解去均追击败之】

免河间开封延安汾州被灾田租

【北平河间河南开封陕西延安诸府蝗山西汾州旱诏免共租】质实【河间汉国元路明改府今因之延安隋郡元路明改府今因之汾州後魏置元属冀寧路明万历二十三年升府今因之】

秋七月命户部稽各省水旱灾分数优恤之

以胡惟庸为右丞相陈寧为御史大夫

【自汪广洋罢帝以惟庸为才宠任之所为多称旨遂至大用寧性残刻以惟庸荐擢居宪台益务威严帝屡责之寧不能改】

八月建历代帝王庙

【帝以御史答禄与权等言诏祀三皇乃命礼官考定五帝三王及汉唐宋创业之君俱於京师立庙致祭其余守成贤君令有司立陵庙皆每岁春秋祭之】质实【建历代帝王庙於钦天山之阳同堂异室祀三皇五帝夏禹商汤周文王武王汉高祖光武唐高祖太宗宋太祖元世祖已而寝祀周文王唐高祖增祀隋高祖寻罢与权字道夫其先蛮部人有别号答禄者子孙因以为氏】

九月定有司季报岁报

【初府州县户口钱粮学校狱讼每月具书於册县达州州达府府达行省类咨中书吏牘烦碎公私多糜费又有司决狱笞五十者县决之杖八十者州决之一百者府决之徒以上具狱送行省移驳繁而贿赂行帝命中书省御史台详议革月报为季报以季报之数类为岁报凡府州县狱囚依律断决毋俟转发其有违枉御史按察使纠劾至二十六年定制布政司及府州县笞杖就决徒流军杂犯死罪解部审录具死囚所坐罪名上部详议如律者大理寺拟覆平允监收候决不如律者驳回改正再问驳至三改拟不当将官吏奏闻谓之照驳囚有翻异改调别衙门间拟二次不服则具奏会九卿鞫之谓之圆审三四讯不服而後请旨决焉】

冬十一月潞州贡人参却之

【帝曰人参得之甚难毋重劳民往者金华进香米太原进葡萄酒俱止之国家以养民为务奈何以口腹累人】

振真定饥

【真定府晋州冀州赵州饶阳新河武邑诸县饥诏兵部尚书刘仁等振之初饶阳知县郭贯见邑中大饥民食草实木皮遂以上闻帝览其奏复咨访得晋冀等州皆饥乃命仁等往各州县振之蠲其租赋】质实【晋州元置属真定路明属真定府今因之冀州後魏置明属真

定府今直隶州赵州北齐置明属真定府今直隶州饶阳汉县明属晋州今属深州新河五代时为镇宋置县武邑汉县明并属冀州今因之刘仁武昌人】

闰月録故功臣子孙

【功臣早世恩未及嗣者录凡二百九人後又录丁忠等五百十一人授指挥千百户等官有差】

定大明律

【先是尝颁律令恐民不能周知命大理卿周桢等为之直解又令儒臣同刑官讲唐律日进二十余条至是重命刑部尚书刘惟谦详定大明律每奏一篇揭两庑亲加裁酌明年二月书成篇目一準於唐采用旧律二百八十八条续律百二十八条旧令改律三十六条因事制律三十一条掇唐律以补遗百二十三条合六百有六条分为三十卷至三十年作大明律诰成颁行天下】质实【周桢字文典江寧人刘惟谦明史附周桢传不详何许人大明律篇目曰卫禁曰职制曰户婚曰廩库曰擅兴曰贼盗曰鬪讼曰诈伪曰杂律曰捕亡曰断狱曰名例凡十二】

发明【明太祖初惩元季废弛刑用重典後屡诏厘正至三十年申画一之制令子孙世守羣臣有稍议更改即坐以变乱祖制之罪又诏内外风宪官以讲读律令考校有司欲使人知律意日久视为具文於是奸吏翫法任意轻重因律起例因例生例例愈纷而弊无穷至律有取自上裁临时处治者因罪在八议与一切疑狱及律无明文者设非谓任情生杀之巴英宪以後钦恤微而侦伺炽巨憝罪如山积而中旨纵之不问?无妄无辜而片纸付诏狱为祸尤烈盖锦衣之狱太祖末年禁不复用而成祖违之东廡之设始於永乐作法不臧末流滋甚权移廡卫而律意不可问矣】

【甲寅】七年春正月遣将屯田河南山东北平

【帝初立民兵万户府寓兵於农又遣诸将屯兵龙江诸处惟康茂才绩最诏褒之四年诏河南山东北平陕西山西及直隸淮安诸府屯田且勿徵三年後亩收租一斗六年太仆丞梁额森特穆尔言寧夏四川土膏沃宜招集流亡屯田从之至是以河南山东北平建置兵卫而饷劳民供乃命都督僉事王简往彰德王诚往济寧平章李伯昇往真定涇理屯务明年又命邓愈等诸将分屯陕西河南北平官吏犯罪谪凤阳屯种民犯流罪者凤阳输作一年然後屯种命李善长朱亮祖俞通源抚谕诸屯劝课农事又因海运饷辽有溺死者遂益讲屯田政天下卫所州县军民皆事垦辟其制移民就寛乡?罪徙者为民屯领之有司而军屯则领之卫所边地三分守城七分耕作内地二分守城八分屯种人授田五十亩给牛种教树植复租赋民以不困而军饷益饶梁额森特穆尔旧作良埜僊帖木尔今改】

遣总兵官吴祯巡海备倭

【先是帝遣使倭国告以即位且诘入寇之故其王良怀不受命已又遣赵秩齎诏往谕良怀见之曰往者蒙古欺我小邦令其臣赵姓者来誑我今新天子即位使者亦姓赵岂蒙古裔耶目左右将刃之秩不为动严词折之良怀气沮下堂延秩礼遇甚隆遣其僧祖来奉表称臣贡方物帝以其俗佞佛可以西方教诱也遣僧祖阐等送使者还赐良怀大统历及罗缎等物祖阐等至为其国演教国人颇敬信而良怀故无礼拘之二年始放还倭寇掠如故乃以桢统总兵官都督於显副之总江陰四卫军出海至琉球大洋获其兵船献俘京师其後屡遣僧奉贡但齎书上中书省而无表帝却勿受命礼部移牒责之并谕以欲征之意良怀上表词多倨慢乃专务海防帝着祖训列不征之国十五日本与焉自是朝贡不至而海上之警亦渐息】质实【琉球在福建泉州府东海岛中接漳泉兴福四州界其国王初姓欢斯氏名渴刺兜至元末国分为三有三王曰中山曰山南曰山北皆以尚为姓赵秩官莱州府同知不详何许人赵姓赵良弼事见元史日本传於显黄梅人】

二月丁酉朔日有食之

免济南平阳太原汾州等州县被灾田租

【先是正月振松江府水灾八千余户户赐钱五千是月以济南府历城等县蝗平阳太原府汾州及卫辉府汲县旱皆免租苏州府属县民缺食遣官发米麦振贷之】质实【历城汉县明为济南府治汲汉县明为卫辉府治今皆因之】

修曲阜孔子庙

【立孔顏孟三氏子孙为教授俾讽其族人】

三月方国珍卒

【国珍以至正二十七年来降幕下士詹鼎为表乞哀甚至帝心怜而赦之趋入朝授广西行省左丞食禄不之官至是卒於京师】质实【詹鼎寧海人】

夏四月都督蓝玉拔兴和

【时元将托音特穆尔守兴和玉大败其衆於白酒泉擒国公特尔默齐及官属五十九人托音特穆尔弃城走】质实【白酒泉在故兴和城西南托音特穆尔旧作脱因帖木儿恃尔默齐旧作帖里密赤今并改】

五月日历成

【学士承旨詹同请编日历命同与宋濂为总裁官吴伯宗等为纂修官自起兵临濠至六年冬征代礼乐政刑及羣臣功过四夷朝贡皆载焉既成共一百卷名曰大明日历藏之金匱

於是濂等复请仿唐太宗贞观政要分类更辑凡四十类厘为五名皇明宝训嗣後凡有政绩史官日纪录之检类增入】

免真定等四十二府州县旱灾田租

减苏松嘉湖极重田税之半

【帝既振苏州饥民三十万户以苏松嘉湖四府租税太重命户部计其数如亩税七斗五升者除其半】

六月汰北方府州县官

【帝以北方郡县民稀事简命吏部量减河南北平山东府州县官凡三百八人】

陕西雨雹山西北平河南山东蝗诏蠲其租

秋七月李文忠拔高州

【三月文忠奉命同徐达以所统将士分布山西北平屯驻因遣兵出塞获元平章邓博罗特特穆尔寻遣裨将至赛音布拉克擒陈安礼至顺寧斩其将珠辰鲁至朔州擒太尉巴延布哈至是文忠复自率兵攻高州大石崖拔之斩宗王托克托实勒擒承旨伯嘉努追奔至彊?山击斩鲁王获其妃及司徒达哈勒济等九月燕山都卫指挥使朱杲通州卫指挥僉事郑治汝寧卫指挥僉事冯俊密云卫指挥僉事张斌等率师出古北口防秋卒遇寇皆力战死帝命厚恤其家制文祭之】质实【高州辽置明废故城在今喀喇沁故大寧城西北彊?山在故大寧城北通州卫在通州治南汝寧卫明初建於汝阳寻废为千户所密云卫中卫在密云县治东右卫在古北口 邓博罗特特穆尔旧作邓孛罗帖木儿珠展鲁旧作真珠驴托克托实勒旧作朶朶失理伯嘉努旧作百家奴达哈勒济旧作答海俊今并改】

倭寇胶州

【官军击败之寇大任海口百户许彰追之战死】质实【胶州元置明初属青州府寻属莱州府今因之大任海口在即墨县】

八月申定兵卫之制

【帝以前代兵多虚数监其失置内外卫所凡一卫统十千户一千户统十百户百户领总旗二总旗领小旗五小旗领军十皆有实数至是重定其制大率以五千六百人为一卫而千户以下所领之数则同遇有事征调则分统于诸将无事则散还各卫管军官员不许擅自调用拣练樵绥务在得宜违者俱论如律】

振河间广平顺德真定饥

质实【顺德元路明改府今因之】

九月遣崇礼侯密迪哩巴拉北归

【遣老成宦官二人护行并遗元嗣君书】

冬十一月定服制

【先是贵妃孙氏薨勅礼官定服制礼部尚书牛谅等奏仪礼父在为母服期庶母则无服帝曰父母之恩一也低昂若是不情甚矣命儒臣考定宋濂等考古人论服母丧者四十二人愿服三年者二十八人服期年者十四人帝曰三年之丧天下通丧人情所安即天理所在乃定制子为父母庶子为其母皆斩衰三年适子衆子为庶母皆齐衰杖期五服丧制皆有升降书成帝亲为序命之曰孝慈录颁天下时贵妃无子命吴王櫓行慈母服斩衰三年主丧事皇太子及诸王皆齐衰杖期大子曰在礼惟士为庶母服缌大夫以上则无服今陛下贵为天子臣忝居嫡长而为庶母服期非所以敬宗庙重继体也不敢奉诏帝大怒羣臣震讟不知所出正字桂彦良言于太子曰殿下当缘君父之情不可执小礼以亏大孝因持衰服之太子乃服以拜谢帝怒始解】质实【贵妃孙氏陈州人牛谅字士良东平人桂彦良名德偁以字行慈谿人】

高丽李仁任弑共王颙

【颙无子以宠臣辛旽之子禑为嗣仁任弑颙立禑又杀朝廷使者而遣使告丧阳言朝使实盗所杀今已诛之帝疑其诈拘其使而遣使吊祭已仁任又为故主请諡帝曰是欲假朝命以镇抚国人且掩其弑逆事不许释前使还自是朝贡皆不纳】

【乙卯】八年春正月命有司察穷民

【令天下郡县访穷民无告者月给衣食无依者给屋舍谕中书省曰昔吾在民间目击鰥寡孤独饥寒困踣之徒常自厌生恨不即死心常惻然今代天理物已十余年若天下之民有流离失所者非惟昧朕之初志於代天之工亦不能尽尔等为辅相当体朕怀不可使天下有一夫不获也】

诏天下立社学

【帝以京师郡县皆有学而乡社之民未沾教化命有司更立社学延师儒教民间子弟】

河决开封

【坏大黄寺堤百余丈诏河南参政安然集民夫三万余人塞之】质实【开封黄河自河南府巩县流入境经汜水县北与怀庆府温县分界又东经郑州北与怀庆府原武县分界又东南流经中牟县北阳武县南又东经祥符县北又东经封邱县南又东经陈留县北又东经兰阳仪封二县北入归德府考城县界大黄寺堤即埽头堤在开封封府东北四十里安然祥符人】

二月帝耕藉田

三月立钞法

【时中外各置局铸钱有司责民出铜毁器物输官颇以为苦而商贾沿元之旧习用钞多不使用钱乃诏中书省造大明宝钞其等六曰一贯曰五百文四百文三百文二百文一百文每贯準钱一千银一两四贯準黄金一两禁民间不得以金银货物交易违者罪之税课钱钞兼收钱什三钞什七百文以下止用钱遂罢宝源宝泉局越二年复设宝泉局铸小钱】质实【洪武七年设宝钞提举司是年诏中书省造大明宝钞以桑穰为料其制方高一尺广六寸质青色外为横文栏横题其额曰大明通行宝钞其内上两旁复为篆文八字曰大明宝钞天下通行中图钱贯十串为一贯其下云中书省奏準印造大明宝钞与钢钱通行若五百文则画钱文为五串余如其制而递减之】

发明【钞法始於唐之飞钱宋之交会金之交钞元世始终用钞钱几废矣然钱法尚有私铸私销之弊至钞多则贱久则敝倒钞有工墨之需伪造较冶范为易非良法也是以明初钱钞并行严禁金银物货交易而两浙江西闽广民间重钱轻钞有以钱百六十文折钞一贯者物价翔贵而钞法益壞至宣德初米一石用钞五十贯後乃益严其禁交易用银一钱者罚钞千贯贼吏受银一两者追钞万贯更追免罪钞如之及成化时钞一贯不能直钱一文至弘正间钞法遂废盖权宜之法不可以为经久之制也】

免河间府州县旱灾田租

【户部言洪武四年北平河间府献州交河县旱灾饥民流移者一千七百三十户荒田三百三十余顷至今租税无徵诏免之】质实【献州金置明洪武八年四月改县交河县宋置明俱属河间府今皆因之】

赐德庆侯廖永忠死

【初韩林儿在滁州帝为吴王遣永忠迎归应天至瓜步覆其舟死帝以咎永忠及大封功臣帝曰永忠战鄱阳忘躯拒敌可谓奇男子然使所善儒生窥朕意邀封爵故止封侯而不公後与杨宪相比宪诛永忠以功大得免至是坐僭用龙凤诸不法事赐死永忠勇而善谋平两广善抚绥民为立祠克重庆禁侵掠卒取民七笏立斩之蜀人感其威惠遂降既死子权嗣侯】质实【瓜步在六合县东二十五里】发明【永忠之死明实录讳之曰甲申德庆侯廖永

忠卒上賻遗之甚厚而寧宪王通监博论记丙午年事云是岁廖永忠沈韩林儿於瓜步大明恶永忠之不义後赐死博论於洪武二十九年奉勅编定既成表上之则其言非无稽也是以刘辰国初事蹟王世贞史乘考误俱以为永忠被诛夫林儿僭号十二年明祖固用其年号矣崛起之势不无凭藉犹汉高之於楚心光武之於更始也如永忠者其亦黥布谢禄之流乎】

免驿夫田租

【帝念天下驿传马夫供役倍於他役诏免其田租以地有闲剧役有繁简定自京会同馆至宿州驿十三南至京师西出秦晋北抵燕蓟劳最甚租全免自百善道至郑州当秦晋二道劳次之免三之二自荥阳至陕西山西北平驿百二十一又次之免三之一】质实【百善道驿在宿州西七十里寰宇记云古百战道也荥阳汉县明属郑州今属开封府】

夏四月帝如中都祀天地於圜丘谒陵至自中都质实【明祖陵在凤阳府西南十二里太平乡】

免彰德大名临洮平凉河州被灾田租

质实【大名五代汉置府元改路明仍为府今因之】

罢营中都

【帝初欲如周汉制建两京至是以劳费罢其役】

诚意伯刘基卒

【基佐帝定天下工谋画料事若神暇则敷陈王道帝以比张子房常呼先生而不名然性刚疾恶胡惟庸深忌之初瓠括间有隙地曰谈洋为盐盗藪基奏立巡检司守之奸民弗便也会逃军为乱吏匿不以闻基令长子璉奏其事不先白中书省惟庸方掌省事怒使吏讐奏谈洋地有王气基图为墓迫逐居民以致乱基坐夺俸帝初欲相惟庸基不可既而惟庸相基曰使吾言不验苍生福也忧愤疾作惟庸秧医往视饮其药如有物积腹中遂笃帝遣使护归居月余卒基在元时得天文书於燕市一夕成诵已为高安丞进贤邓祥甫精象纬学尽以其术授之愈洞其要及将卒以天文书授子璉曰亟上之母令後人习也世传基事多神奇然帝尝言基数以孔子之言导予是知陰阳风角之术基所重不在此】质实【瓠括谓温州处州二府温州于汉为东瓠国治唐置温州元路明府今因之处州亦汉东瓠地隋初置处州治括苍县开皇十二年改括州详见二年谈洋隘在处州府青田县南二百七十里接温州府瑞安县界高安唐县明瑞州府治进贤唐镇宋县明属南昌府今皆因之刘璉字孟藻】

五月遣中官赵成使河州

【自钞法行西番马至者少帝遣成齋罗绮及巴茶往河州市之马稍积率厚其值偿之中官奉使自此始成寻为多尔济巴勒所杀】质实【多尔济巴勒旧作朶儿只班今改】

秋七月己未朔日有食之

诏百官奔丧毋俟核报

【北平按察司僉事吕本言近制士大夫出仕在外闻父母丧必待移文原籍审核俟其还报然後奔丧近者弥月远者半年请自今官吏若遇亲丧其家属陈於官移文任所即令奔赴然後核实帝深然之故有是命】质实【吕本寿州人】

京师地震

【十二月复震】

免应天太平寧国镇江及蕲黄诸府旱灾田租

【先是六月景州沧州河间旱俱免租】质实【景州唐置明属河间府今因之沧州後魏置明属河间府今属天津府河间县高齐置明河间府治今因之】

八月元库库特穆尔卒

【自元时帝遣使通好於库库特穆尔库库特穆尔留使者不遣前後七致书皆不答既出塞复遣人招之亦不应帝心益敬之尝大会诸将问曰天下奇男子谁也皆对曰常遇春帝曰遇春虽人杰吾得而臣之吾不能臣王保保乃奇男子耳竟册其妹为秦王妃保保库库特穆尔小字也刘基亦尝言於帝以库库时穆尔未可轻及徐达败後大兵稀出塞库库特穆尔从其主徙金山至是卒於喀喇诺海之衙庭其妻毛氏自经死】质实【喀喇诺海在和林北喀喇诺海旧作哈刺海今并改】

九月遣湖广参政吴云使云南为所杀

【帝以云南未下再遣使招谕会梁王使其臣鐵知院等使汉北为官军所获帝释之命与云偕行知院等以已奉使被执且得罪乃诱云改制书诈为元使者给梁王云以死拒知院等杀之】质实【吴云宜兴人】

冬十月改都卫为都司

【帝初置各都卫指挥使司节制方面至是诏改为都指挥使司凡都司十有三北平陕西山西浙江江西山东四川福建湖广广东广西辽东河南行都司三西安大同建寧十五年增

置贵州云南二都司二十年置大寧都司二十七年置四川行都司於建昌宣德中置万全都司成化中置湖广行督司於鄆阳】质实【明史职官志都司正二品贵州元置八番顺元等处军民宣慰使司隶四川行省明洪武四年置贵州宣抚司永乐十一年设贵州等处承宣布政使司今因之太寧辽中京大定府元大寧路明大寧卫今喀喇沁右翼南有故大寧城址明洪武二十年置大寧都司明年改北平行都司永乐元年仍为大寧都司徒保定以大寧地界朵顏三卫万全元宣德府宣平县地明洪武二十六年置德胜堡永乐二年移万全右卫治此今改万全县属宣化府万全都司见六年武州注建昌南诏置府元路明改卫今寧远府鄆阳晋鄆乡县元鄆县属均州明初因之成化中置府今因之行都司成化十二年置】

十二月陕州人献天书诛之

【州民有妄言得天书惑衆者命斩之】

賑苏州湖州嘉兴松江常州太寧国杭州水灾

【先是六月高邮州水免租六万三百余石仍賑之十月以开封府祥符杞陈留封邱兰阳商水西华及睢州淮安府盐城水诏皆免其租】质实【杞县周杞国隋杞州五代晋改县陈留秦县封邱汉县兰阳金县明俱属开封府今皆因之商水宋县西华汉县明俱属开封府陈州今属陈州府盐城宋县明属淮安府今因之】

纳克楚侵辽东都指挥使马云叶旺击败之

【帝以纳克楚必至勅云等预为备未几果至见备御严不敢攻越盖州径趋至金州指挥韦富王胜等伏弩城下擒其骁将鼐喇呼敌大沮沿祚河遁旺先引兵扼河缘河垒冰为墙沃以水经宿凝沍如坚城旁设坑穽敌至伏四起纳克楚急趋连云岛遇冰城旁走悉陷穽中衆大溃云自城中出合兵追击至将军山必噜河旺等乘胜逐至猪儿峪斩获无算纳克楚仅以身免】质实【祚河亦曰梓河在今奉天府盖平县南西流入海连云岛在盖平县西十五里明设关于此将军山方輿纪要与毕噜河相近毕噜河在盖平县东南九十里明一统志源出盖平县东南山谷间流经复州卫入海通志源有三一出布雾山一出猫儿岭南流至金州界内归服堡东入海唐书伐高丽刘仁愿出毕列道金史苾里海皆即此也猪儿峪边防考在盖州卫 鼐喇呼旧作乃喇吾毕噜河旧作必栗河今并改】

【丙辰】九年春正月命汤和等帅师镇延安

【元将巴延特穆尔为边患帝以和为征西将军防延安巴延特穆尔乞降帝召诸将悉还独留傅友德备之秋七月巴延特穆尔来侵友德破擒之降其衆巴延特穆尔旧作伯顏帖木儿今改】

二月太白昼见

【自乙巳至於己酉凡五日三月壬申复见】

三月免近畿及山西陕西河南福建江西浙江北平湖广田租

【诏以比年西征北伐及秦晋二府宫殿之役畿辅既极烦劳外郡疲於转运其淮揚安徽地五府及山西等八省今年租悉免之】质实【安庆宋军庆元元年升府元路明初改寧江府洪武六年复曰安庆府今因之】

以和尼齐为翰林蒙古编修

【更其姓名曰霍庄】质实【和尼齐旧作火你赤今改】

夏四月庚戌雨

【京师自去年八月不雨至是日始雨】

五月癸酉霁

【自庚戌雨至是二十四日始霁】

六月改行中书省为承宣布使司

【浙江江西福建北平广西四川山东广东河南陕西湖广山西诸行省俱改为承宣布政使司罢行省平章政事左右丞等官设布政使一员置左右参政各一员後设左右布政使各一员复增置左右参议】质实【职官志初改布政使秩正二品左右参政从二品十三年改布政使正三品参政从三品十四年增置左右参政正四品寻增设左右布政使十五年置云南布政使司二十二年定秩从二品参政从三品参议从四品永乐十一年置贵州布政使司两京不设布按於旁近布按分司带管按察使明初置正三品副使正四品佥事正五品十三年罢十四年复置并置各道按察分司二十九年改置分司为四十一道】

秋七月癸丑朔日有食之

免苏松嘉湖水灾田租

【凡二十九万九千四百余石是月免永平旱灾田租仍赈之十二月以苏松嘉湖及常州太平寧国浙江杭州湖广荆州黄州诸府水遣户部主事赵乾等赈之】质实【永平隋平州北平郡金为滦州元为永平路明改府荆州汉置唐为江陵府元为中兴路明改荆州府今并因之】

闰九月诏求直言

【以五星紊度日月相刑故有是诏】质实【按洪武实录是年二月岁星逆行入天微三月荧惑犯井四月犯鬼五月太白犯毕井有客星大如弹丸白色止天仓越数日益有光入紫微垣埽文昌寻入於张自六月戊子至七月乙亥凡四十八日乃灭】

冬十一月平遥训导叶伯巨应诏言事下狱死

【伯巨上书言三事畧曰臣观当今之事太过者三曰分封太侈也用刑太繁也求治太速也先王之制大都不过三国之一今秦晋燕齐梁楚吴蜀诸国无不连城数十异时尾大不掉然後削其地而夺之权则必生觖望甚者缘间而起防之无及矣愿及诸王末之国之先节其都邑减其兵卫限其疆理以待封诸王子孙割一时之恩制万世之利莫先於此臣又观历代开国之君未有不以任德结民心以任刑失民心者今用刑多裁自圣衷治狱之吏趋承意旨深刻者多功平反者获罪虽删定旧律减宥有差然有寛宥之名未见寛宥之实所谓实者诚在上不在下也古之为士者以登进为荣今之为士者以溷迹无闻为福以受玷不録为幸以屯田工役为必获之罪以鞭笞捶楚为寻常之辱其始也取天下之士网罗摭摭务无余逸有司敦迫上道如捕重囚比至除官多以貌选所学非所用所用非所学居官一有差跌苟免诛戮则必在屯田工役之科率是为常不少顾惜此岂陛下所乐为哉诚欲人惧而不敢犯也窃见数年来诛杀亦不少矣而犯者相踵自今宜存大体赦小过昔者周自文武至于成康教化大行汉自高帝至於文景始称富庶致治文道固不可骤今陛下切切於民俗浇漓人不知惧乃至令下而寻改已赦而复收天下臣民莫知适从甚不称陛下求治之心也臣愚谓求治之道莫先於正风俗正风俗之道莫先於守令知所务风宪知所重今之守令不过具文案备照刷而已风纪之司不过听讼讞狱而已非所以使民迁善远罪为治之大者也古者教士於学俊造递升论定後官任官後爵故成周得人为盛今天下诸生升太学者未数月遽选入官臣恐其人未谙时务上乖国政而下困黎民也开国以来选举秀才不为不多所任名位不为不重自今数之在者有几此皆求治太速之过书上帝大怒曰小子间吾骨肉逮下狱瘐死初伯巨将上书语其友曰今天下惟三事可患其二事易见而患遲其一事难见而患速纵无明诏吾犹将言之况求言乎其意盖为分封也是年春帝以诸王将之国告於郊庙有许修武事以备外侮云云至十一年後始相继就藩故伯巨以为其患难见迨帝末年燕王奉命屡出塞势始强後因削夺称兵遂有天下人乃以伯巨为先见云时上书者又有海州学政曾秉政刑部主事茹太素皆累万言帝嘉秉政而杖太素寻又采太素疏中数事行之因命中书定奏对式凡臣下上书言得失者文辞毋得过繁是年考较钱穀策书空印事起主印吏及署字有名者皆逮系狱凡数百人帝以为欺罔守令署印者欲置之死佐贰以下为军远方丞相御史皆知空印者无他莫敢谏有诸生郑士利者叹曰上不知以为空印大罪诚得人言之圣明寧有不悟适星变求言士利曰可矣乃为书数千言以为深罪空印者恐奸吏得挟印纸为文移以虐民耳文移必完印乃可今考较策书合两缝印非一印一纸纵得之不足用况不可得乎钱穀之数府必合省省必合部省府远者去户部六七千里待策书既成而後用印则往来非期年不至故先用印而後书此权宜之务从来久矣且国家诸法必明示之而後罪犯者以其知而故犯之也自立国至今未尝有空印之律一旦捕而诛之何以使受诛者甘心乎书成而泣曰

杀我生数百人何所恨遂入奏帝怒究使者士利笑曰吾业为国家言事自分必死谁为我谋狱具输作江浦而空印者竟多不免】质实【海州东魏置明属淮安府今直隶州江浦本六合县地洪武九年分六合及滁和二州地置浦江县属江寧府今因之叶伯巨字居升寧海人曾秉政南昌人茹太素泽州人郑士利字好义寧海人】

发明【伯巨所陈三事切中当时之弊而分封太多尤为先见其言有曰昔贾谊劝文帝尽分诸国之地空置之以待诸王子孙向使文帝早从谊言则必无七国之祸云若明祖深思伯巨之言亦岂有燕藩不靖骨肉相残之衅哉乃怒其离间至欲取而亲射之何其溺亲爱而忘远害也不独一传之後事势洞如观火至於高煦宸濠相踵效尤福王之国几竭府库皆明祖作法於凉实阶之厉奈何博求諫之虚名而弃扁仓之药石哉】

十二月遣元臣蔡子英归和林

【子英元至正中进士察罕特穆尔辟为参军累迁行省参政元亡从库库特穆尔走定西库库特穆尔军败子英单骑走关中入南山帝遣人绘形求得之传诣京师至江滨亡去久之复被获械过洛阳见汤和长揖不拜抑之跪不肯爇火焚其须不为动其妻适在洛子英避弗见至京授以官不受退而上书畧曰陛下以万乘之尊全匹夫之节不降天诛反疗其病易冠裳赐酒饌授以名爵陛下之量包乎天地臣感恩无极非不欲自竭犬马但名义所存不敢辄渝初志自惟身本韦布知识浅陋过蒙主将知荐跃马食肉十有五年愧无尺寸功以报国土之遇及国家破亡又复失节何面目见天下士哉臣被获以来日夜思惟咎往昔之不死至於今日分宜自裁陛下待臣以恩礼臣固不敢卖死立名亦不敢偷生苟禄苟察臣之愚全臣之志禁锢南海毕其余命则虽死之日犹生之年帝览书益重之馆之仪曹忽一夜大哭不止人问故曰思旧主耳帝知终不可夺命有司送出塞从其故主於和林】质实【南山即终南山在西安府城南五十里西自凤翔府郿县入境连亘蓋屋鄠又及长安咸寧四县又东抵蓝田县界蔡子英永寧人】

【丁巳】十年春正月翰林学士承旨宋濂致仕

【濂年老艰於步趋帝命选良马以赐为作良马歌命臣咸赋之每燕见必命茶赐坐濂不能饮一日侍饮醉帝欢甚命侍臣咸赋醉学士歌曰使後世知吾君臣同乐如此也至是年六十八赐告归及归後每岁一朝至则恩礼加厚】

益秦晋燕三府护卫

【秦府西安护卫益以羽林卫军晋府太原护卫益以兴武等卫军燕府燕山护卫益以金吾左等卫军所益各二千二百余人】质实【西安护卫隶陕西都司羽林卫掌守卫巡警名为亲军太原护卫隶山西都司後革兴武卫明初亦为亲军後隶後军都督府燕山护卫吏北平都司後陞为亲军金吾卫明初为金吾侍卫亲军都护府後改卫与羽林等号上十二卫】

发明【初秦晋燕三府护卫各一千数百人叶伯巨已谓优以甲兵卫士之盛恐数世之後尾大不掉宜及其未之国之先减其兵卫云云矣太祖既不用其言又从而加益之盖以是三府者皆临边扼塞欲厚其势以扞外侮耳於是晋燕二王尤被重寄数命统兵出塞大将皆受节制而怙宠凭强燕藩卒挟以构逆不可谓燕诒之善也後乃渐惩其弊往往献还护卫宗藩不过食租税而已积重必返亦其势与】

振苏松嘉湖水灾

夏四月遣邓愈帅师击吐蕃平之

【初邓愈克临洮帝遣陕西行省员外郎许允德招谕吐蕃诸族而以指挥使韦正守临洮会吐蕃来寇正击降之既而允德還元吐蕃宣慰司何索诺木袞布诣邓愈军门降镇西武靖王伯讷呼亦以诸部来降遂移正使守河州时河州城邑空虚人骨山积衆欲委弃之正不可日夜抚巡劳徕不数年遂为乐土於是乌斯藏摄帝师纳木札勒巴勒藏布及国公纳木喀萨丹巴嘉木灿等皆入朝置朵甘乌斯藏二卫其後数遣使朝贡往往被吐蕃侵掠帝命愈为征西将军偕都督同知沐英讨之分兵三道穷追至崑仑山俘斩万计留兵戍诸要害而还】质实【崑仑山元史志朵甘思东北有大雪山番名伊拉玛博罗即崑仑也按伊拉玛博罗今名阿木尼玛勒占木逊山明师穷追至崑仑即此乃大积石元明误以为崑仑也韦正字正卿寿州人本姓甯为韦德成养子冒姓韦德成初从帝渡江战死何索诺木袞布旧作何琐南普伯讷呼旧作卜纳刺纳木札勒巴勒藏布旧作喃加巴藏卜纳木喀萨丹巴嘉木灿旧作南哥思丹八亦监藏伊拉玛博罗旧作亦耳麻不美刺今并改】

五月诏韩国公李善长曹国公李文忠议军国重事【中书省都督府御史台事悉总之议当然後奏行】

振湖广水灾

【黄州常德武昌三府及岳州沔阳二州水户给钞一錠户部主事赵乾振荆蕲遲缓斩之九月免浙西被水田租振绍兴金华衢州水灾】质实【常德宋府元路明改府岳州隋置元路明初改府洪武九年降州十四年复为府今皆因之沔阳梁郡元府明改直隶州後属承天府今属汉阳府绍兴宋置元路明改府今皆因之钞一錠犹一贯也按食货志云钱一錠五千文则与钞异】

六月诏臣民言事实封达御前

命政事啓皇太子裁决奏闻

秋七月置通政使司

【掌出纳诸司文书章奏封驳之事】质实【职官志通政使一人正三品左右通政各一人正四品左右参议各一人正五品】

发明【前月甫诏臣民言事实封达御前矣至是遂置通政司考职官志通政司凡在外之题本奏本在京之奏本并受之於早朝彙而进之有径自封进者则参驳午朝引奏臣民之言事者有机密则不时入奏然其後奸嵩弄权以私人赵文华为通政劾疏至皆预为计则其壅蔽甚矣夫日理万几出纳之司固不可废然惟宜收通以时戒其沈滞而尤在人主之明察勤於访览若明之中叶左右大臣召覲且希羣臣虽晓晓廷讼褒如塞纒引奏之典既虚喉舌之权积重安能无弊哉】

始遣御史巡按州县

【俾询民间疾苦廉察风俗申明教化所按藩服大臣府州县官诸考察举劾尤专大事奏裁小事立断按临所至必先审录罪囚吊刷文卷有故出入者理辩之】

八月改建大祀殿於南郊

【帝感齐居陰雨览京房灾异之说谓分祭天地情有永安欲举合祀之典命即圜丘旧址为坛以屋覆之曰大祀殿】

九月以胡惟庸为左丞相汪广洋为右丞相

【帝以惟庸才可倚宠遇日盛独相数年生杀黜陟?不奏径行内外诸司上封事必先关白四方蹂进之徒及功臣武夫失职者争走其门馈遗金帛名马玩好不可胜数广洋浮沈守位而已】

冬十一月卫国公邓愈卒

【愈征吐蕃还卒於寿春年四十一追封寧河王諡武顺愈事母孝抚弟之幼孤有恩敬礼儒士简重慎密有士君子之行云】

丁亥冬至合祀天地於奉先殿

【以大祀殿工未成也】

免河南陕西广东湖广田租

十二月乙巳朔日有食之

【戊午】十一年春正月封子五人为王

【椿为蜀王栢湘王桂豫王模汉王植卫王其後桂改封代模改封肃植改封辽】质实【椿帝第十一子郭惠妃生封成都栢第十二子胡顺妃生封荊州桂第十三子郭惠妃生封大同模第十四子母郤无名号封甘肃植第十五子韩妃生封广寧】

徵天下布政使及知府来朝

【命吏部课其殿最称职无过者为上赐坐宴有过称职者为中宴而不坐有过而不称职者为下不预宴序立於门宴毕然後退朝覲考核自此始】

三月诏秦王檣晋王櫟之国燕王棣周王橐楚王桢齐王搏驻凤阳

诏奏事毋先白中书省

夏四月元阿裕实哩达喇卒

【子特古斯特尔穆嗣帝两遣使往吊自为文祭之十月归故元平章旺札勒布哈於丞相鲁尔谕以通好十一月大同白羊镇巡检张文焕遇敌兵於焦山战歿其妻开之同日死一子贫寒十指俱堕帝命取至京师月给米一石以终其身】质实【白羊口在大同东北天镇县北少西三十里焦山砦在广灵县东北旺札勒布哈旧作完者不花今改】

存问苏松嘉湖被水灾民

【济饥民六万二千八百余户户赐米一石蠲逋租六十五万二千有奇十二月以苏松嘉湖杭屡被水灾罢五府河泊所以其利与民】

六月五开蛮叛杀靖州指挥僉事过兴以辰州指挥杨仲名为总兵官讨平之

【五开洞蛮吴面儿等作乱靖州卫指挥僉事过兴以兵三百捕之兴父子为赋所执俱被害诏以辰州指挥使杨仲名为总兵官讨之十月遣内官吴诚往谕仲名且观兵十一月仲名破诸蛮面儿远遁帝复遣尚履奉御吕玉诣军閱胜是役帝两使内官至军云帝尝读唐书至鱼朝思为观军容使谓侍臣曰汉末宦官虽骄纵尚无兵权唐以兵柄授之驯至刼胁天子废兴在其掌握朕深鉴前辙左右服从之外重者传命四方而已】质实【靖州卫在州城内】

秋七月苏松扬台海溢遣使振之

质实【台州唐置元路明改府今因之】

八月免应天太平镇江寧国广德诸府州秋粮

冬十月河决兰阳

【诏免其租】

十二月遣僧宗泐等使西域

【帝以佛经遗佚遣宗泐偕其徒往求之十四年冬还额埒苏军民元帅府拜哲万户府俱遣使随宗泐朝贡】质实【宗泐字季潭临海人额埒苏旧作俄力思拜哲旧作巴者今并改】

【己未】十二年春正月始合祀天地於南郊

【帝亲作大祀文并歌九章】

遣征西将军沐英击洮州番大破之

【洮州十八族番酋三副使汪舒朵儿癭噶子乌都儿等叛据纳麟七站地帝命英讨之复命李文忠往筹军事英至洮州旧城寇遁去追击大破之擒三副使等筑城东笼山南川置洮州卫文忠言官军守洮州饷艰民劳帝曰洮州西控番戎东蔽湟陇汉唐以来备边要地今番寇既斥弃之不守数年後将复为患虑小费而忘大虞岂良策哉卒置卫守之】质实【纳麟七站在今洮州厅西洮州旧城在洮州西南七十里即古洮阳城也後汉书西羌传诸羌退聚洮阳即此东笼山在洮州东番人耕种於此洮州卫明属临洮府今为厅属巩昌府】

平羌将军丁玉击松州番平之

【先是四川威茂土司董贴里叛以玉为平羌将军讨之玉至威州贴里降指挥胡渊童胜击降汶州叛酋杨者七等诏置茂州卫仍命渊等从玉军征松州及是松州平玉遣指挥高显城之遂并藩州於松州置松藩卫时眉县彭普贵作乱知县顾师胜捕之为所害贼等焚掠十四州县玉回师讨平之明年帝以松州远在山谷屯种不给命罢之未几指挥耿忠经畧其地言松州为番蜀要害地军卫不可罢乃命复置】质实【松州唐置元属吐蕃宣慰司明洪武十一年置松州潘州二卫寻并为松潘卫今松潘厅属龙安府威州唐维州宋改威州元明因之今裁归保县属茂州茂州唐置明属成都府今直隶州汶川县晋置明属茂州今因之旧潘州在松潘卫北七百五十里本吐蕃潘罗支地宋崇寧中生番纳土分潘州为上中下三州今漳腊营即故下潘州地眉县西魏眉州元属嘉定路明洪武九年降县十三年复为直隶州今因之丁玉河中人初名国珍後赐名玉】

二月给天下贫民钞

【又命审京民孤幼者户给盐十五斤孤寡者户十斤】

夏四月给致仕官诰勅复其家

【秩三品以上仍旧四品以下各加一级给诰勅八月又命致仕者复其家终身无所与其居乡与宗族亲党相见序尊卑如家人礼异姓无官者相见不答礼庶民则以官礼谒见】

蠲北平田租

六月遣都督佖事马云征大寧平之

秋七月以李文忠领大都督府事

冬十二月赐汪广洋死

【广洋与胡惟庸同相惟庸所为不法广洋知而不言占城贡方物使者至省部不以时奏帝以为壅蔽切责宰相广洋惧御史中丞涂节言刘基遇毒死广洋宜知状帝问之对曰无有帝怒责广洋欺罔贬海南舟次太平遣使勅责广洋自缢死】质实【涂节进贤人】

徵元吏部侍郎巴延资中不至饮鸩卒

【巴延资中初为元建昌教授江西盗起授分省都事使守赣州而陈友谅兵已破赣巴延资中间道走闽陈友定素知之辟为行省员外郎巴延资中出奇计收复建昌浮海如元都献捷累迁至吏部侍郎持节发广东何真兵救闽至则真已降於廖永忠已延资中堕马求死不得折其一足永忠释之乃变姓名浪迹江湖间帝求之不得簿录其妻子巴延资中竟不出常齎鸩自随誓不复仕至是江西布政使沈立本言於朝以币聘巴延资中慨然曰死晚矣为歌七章哭其祖父师友饮鸩死】质实【巴延资中西域人祖父仕江西因家焉建昌宋置军元路明改府赣州宋置元路明改府今皆因之巴延资中旧作伯顔子中今改】

【庚申】十三年春正月胡惟庸谋反及其党陈寧涂节等皆伏诛

【惟庸贪贿弄权无所畏忌刘基徐达吴伯宗韩宜可皆尝言之其定远旧宅井中忽生石笋出水高数尺谀者争言瑞应又言其祖父塚上夜有光惟庸益喜自负有异谋吉安侯陆仲亨自陕西归擅乘传平凉侯费聚奉命招降蒙古无功帝皆切责之二人惧惟庸因以权利胁诱之令在外收辑军马又与陈寧坐省中閱天下军马籍令都督毛骥取卫士刘遇贤亡命魏文进等为心膂太仆寺丞李存义者太师善长弟惟庸兄女婿李佑父也惟庸令陰说善长善长惊悸曰尔言何为者若尔九族皆灭後十余日惟庸又令存义告善长善长不能制惟庸乃遣指挥林贤下海招倭与期会又遣元故臣封绩致书称臣於元请兵为外应事皆未发会惟庸子驰马於市坠死车下惟庸杀挽车者帝怒命偿其死惟庸请以金帛给其家不许惟庸惧

乃与御史大夫陈寧中丞涂节等谋起事寧性严酷其子孟麟数谏寧怒杖之死帝恶其不情曰寧忍於其子奚有君父耶寧惧遂与惟庸通谋方汪广洋之赐死也广洋妾陈氏从死帝询之乃入官陈知县女怒曰浸官妇女给功臣家文臣何以得给勅法司取勘惟庸及六部咸当坐罪至是涂节遂上变告时中丞商高谪为中书省吏亦以惟庸陰事告帝大怒命羣臣更讯词达寧节廷臣言节本预谋见事不成始上变告不可不诛乃诛惟庸寧并及节善长仲亨等置不问惟庸既死其反状犹未尽露至十八年李存义为人首告十九年林贤狱成二十三年善长仲亨家奴皆首发词所连及坐诛者三万余人迄数年未靖云】质实【明纪事本末正月戊戌惟庸诡言第中井出醴泉邀帝临幸帝许之驾出西华门内使云奇冲辟道勒马衔言壮气方勃舌馱不能达意帝怒左右挝捶乱下云奇右臂将折垂毙犹指贼臣第勿为痛缩上悟登城望其第藏兵复壁间刀槊林立即发羽林掩捕考掠具状磔於市与明史及实录不同按实录正月癸巳朔甲午御史中丞涂节告左丞相胡惟庸等谋反戊戌赐惟庸等死若然则正月二日惟庸已被告发不应戊戌尚有邀帝幸第之事盖传闻异词云韩宜可字伯时山陰人官监察御史封绩何南人故元臣来归命之官不受遣还乡不去谪戍於边】

罢中书省更定六部官秩改大都府为五军都督府【帝惩惟庸乱政罢丞相以政归六部部设尚书一人秩正二品分大都督为中左右前後五府征调则隶兵部二十八年勅諭羣臣国家罢丞相设府部院寺分理庶政事权归於朝廷立法至为详善以後嗣君母得议置丞相臣下敢以请者寘重典】质实【初设尚书正三品侍郎正四品仍隶中书省十三年陞尚书正二品侍郎正三品五军都督府正一品】

始南北更调用人

【北平山东山西陕西河南四川人於浙江江西湖广直隸用之浙江江西湖广直隶人於北平山东山西陕西河南四川广东广西福建用之广东广西福建人亦於山东山西陕西河南四川用之考核不称职及以事降谪者不分南北悉於广东广西福建汀漳江西龙南安远湖广柳州之地选用】质实【直隸明都江南後以北平为直隸此为南直隸汀州唐置元路明府今因之龙南县南唐置安远县萧齐置明俱属贛州府今皆因之】

发明【考核不称职以事降谪者悉选用两广闽楚等处犹是唐宋迁谪之意耳然三年吏部请谪有罪於儋崖帝不许曰天下一家若风俗未淳宜更择良吏治之何此制之不符也不称职而令治荒远岂良法哉】

三月减苏松嘉湖粮额

【初帝平吴怒苏松嘉湖为张士诚守乃籍诸豪族及富民田以为官田按私租簿为税额杨宪为司农卿又以地膏腴增其赋亩加二倍视他方倍蓰亩税有二三石者苏最重嘉湖次之杭又次之已而诏减四府极重田租之半然重者犹徵至七斗以上至是复命户部裁其额亩科七斗五升至四斗四升者减十之二四斗三升至三斗六升者槩徵三斗五升其以下仍旧时苏州一府秋粮二百七十四万六千余石额与浙江通省埒其重犹如此】

燕王棣之国

【给赐燕山中左二护卫侍从将士五千七百七十人钞二万七千七百七十一錠】

沐英袭元将托和齐等於额齐讷路擒之

【元国公托和齐知院按珠屯和林帝命英率陕西兵击之英至灵州侦知托和齐等在额齐讷路遂度黄河经寧夏历贺兰山涉流沙七日夜至其境去敌营五十里分军为四乘夜衔枚而进合围擒之托和齐额苏尽获其部曲以归都督濮英又袭元柳城王虏之至白城获平章瑚图克特穆尔至赤斤站获幽王额琳沁及其部曲千四百人】质实【额齐纳路见五年灵州汉灵洲县後魏置灵州唐灵武郡元复为州明改灵州所今州属寧夏府贺兰山在寧夏府西六十里流沙方輿纪要在沙州卫西今炖煌县西又瓜州北有白城子今安西州北赤斤站元瓜州地明永乐中建赤斤蒙古卫今玉门县属安西州濮英庐州人托和齐旧作脱大赤阿苏旧作爱足瑚图克特穆尔旧作忽都帖木儿额琳沁旧作亦怜真今并改】

夏四月命羣臣各举所知

【应举至京者八百六十余人授职各有差】

五月雷震谨身殿大赦

【诏洪武十三年五月初三日以前罪无大小咸除之山西民为军者二万四千余户悉还为民释在京及临濠屯田输作者】

诏免天下今年田租

【凡官员以罪黜罢情非实犯者还其职从征士卒老疾者许以子代寡独者有司资遣还乡】

六月雷震奉天门

【帝避正殿省愆罢王府工役榜示天下凡军民嫁娶丧祭之物舟车丝布之类皆无税罢天下抽分竹木场】

置谏院官

【左右司谏各一人秩正七品左右正言各二人从七品】

秋八月诏天下学校师生日给廪膳

【米人日一升鱼肉盐醢之类皆官给之】

九月置四辅官

【帝以密勿论思不可无人乃建四辅官以四时为号诏天下举贤才户部尚书范敏荐耆儒王本等召至告於太庙以本及杜佑龚敦为春官杜敦赵民望吴源为夏官秋冬官缺以本等摄之俱兼太子宾客一月内分司上中下三旬位列公侯都督之次勅以协赞政事均调四时既而敦等相继罢本坐事诛复召安然李干何显周等代之然寻卒干出为知府显周亦罢此职遂废】质实【范敏闻乡人王本不详里籍杜佑安邑人龚敦沿山人杜敦字致道壶关人赵民望藁城人吴源莆田人李干绛州人何显周内黄人】

发明【明祖置四辅官责以变理陰阳之事曰是年自春徂秋天灾叠见秋暮天气尚暄諭本等沐浴致齐精勤国务以均调四时本等奉命竭诚边立冬朔风酿寒以成冬令感应之机如响云云所谓务虚名而非实政也所举诸人不过饰老更引年之典何足以膺凝丞辅弼之任旋各诛罢亦自知其无益矣】

冬十月安置翰林学士承旨宋濂於茂州道卒

【濂傅太子十余年一言动必以礼法讽諭使归於道至有关政教及前世兴亡事必拱手曰当如是不当如彼太子每敛容嘉纳其孙慎坐胡惟庸党被刑籍其家械濂至京帝怒欲诛之皇后以濂亲教授太子诸王乞赦其死帝意解发茂州安置明年五月行至夔州以疾卒濂於学无所不通一代礼乐制作多所裁定四方求文者非其人不与日本使尝奉勅请文以百金为献却不受帝问之对曰天朝侍从而受小夷金非所以崇国体也海外诸国朝贡至者必问濂安否其卒也朝野惜之】

【辛酉】十四年春正月元兵侵边命徐违御之

【先是十三年冬十一月元平章旺札勒布哈鼐尔布哈入桃林口犯永平指挥刘广战歿千户王辂裹创击败之擒旺札勒布哈至是命达率汤和等讨鼐尔布哈达率诸将出塞傅友德夜袭灰山克之沐英等获全宁四部以归达仍镇北平自是每岁春出冬暮召还以为常】质实【桃林山在永平府北六十里有桃林关灰山方輿纪要在故大寧城东北刘广罗田人鼐尔布哈旧作乃儿不花今改】

定赋役籍

【诏天下编赋役黄册以一百十户为一里推丁粮多者十户为长余百户为十甲岁役里长一人甲首十人董一里一甲之事城中曰坊近城曰厢乡都曰里凡十年一周先後以丁粮多寡为序里编一册册首为图鰥寡孤独不任役者附十里後为畸零册有四一进户部其三布政司府县各留一焉每十年有司更定其册以丁粮增减而升降之二十年复命国子生分

行州县随粮定区设粮长四人量度田亩方圆次以字号编类为鱼鳞册黄册以户為準鱼鳞册以土田為準鱼鳞册为经土田之讼质焉黄册为纬赋役之法定焉】

二月以郑湜为福建布政司左参议

【郑氏素以孝义闻累世同居几三百年有诉其家交通胡惟庸者湜兄弟六人争欲行湜曰弟在其忍累诸兄乎自诣吏仲兄濂先以赋长在京师湜至迎谓曰吾家长当任其罪湜曰兄年老吾自辨之万一不直当服辜二人争入狱帝闻之召见劳勉之曰有人如此肯从人为非乎擢湜为参议十九年濂坐事当逮从弟洧曰吾家称义门吾可不代兄死乎诣吏自诬服斩於市】质实【郑湜字仲持濂字仲德洧字仲宗金华浦江人宋郑绮八世孙绮载宋史孝义传六传至文嗣旌为义门载元史孝友传】

三月大赦

【诏曰朕抚育黔黎十有四年狱讼未清良由委任非人致陷刑辟今大赦天下与民更始】

秋八月遣赵庸讨闽广盗平之

【先是广东右卫百户翁显讨山寇房文广力战死之倭屡寇海上郡县帝命南雄侯赵庸往镇之至是平阳春盗奏捷诏以俘囚数多命戮其魁散遣余衆庸又平南靖海阳程乡诸盗海寇攻掠东莞南海及肇翁原诸府县庸率步骑舟师八道击破之擒贼二万余贼属八千有奇斩馘五千余获兵器万九千船一千二百招降番禺等县民三千三百余户奏籍蟹户万人为水军】质实【阳春县梁置明属肇庆府府靖元南胜县後改南靖明属漳州府海阳县晋置明为潮州府治今皆因之程乡县萧齐置明属潮州府今改嘉应直隸州东莞县唐置明属广州府南海秦郡隋县明广州府治西翁源县梁置明属韶州府番禺秦县明广州府东治今皆因之翁显建昌新城人诏赠昭勇将军都指挥僉事】

河决原武

【并决祥符中牟有司请兴筑帝以为天灾令护旧堤而已勿重困民明年春复决陕西朝邑其秋又决滎泽禹武】质实【原武汉县明属开封府今属怀庆府中牟汉县明属开封府今因之朝邑县西魏置明属同州今属同州府滎泽县隋置属属郑州今属开封府阳武汉县明属开封府今因之】发明【御灾扞患经国之要务也苟恤民力则内发帑金以工代食何伤焉诿之天灾而不亟筹补救以为勿重困民几於因噎废食矣其後连年被水患至二十四年河决原武之黑阳山逼开封城仅五里而旧道遂淤岂非因循不塞之贻害哉】

九月遣传友德等征云南

【帝以云南自恃险远遣使招谕辄为所害乃以友德为征南将军蓝玉为左副将军沐英为右副将军率步骑三十万往征之谕曰朕览輿图识云南厄塞当先遣骑将率一军自永寧向乌撒而大军自辰沅入普定分据要害然复进师曲靖曲靖云南咽喉彼必并力於此以抗我师既下曲靖一将军向乌撒以应永寧之师大军直捣云南破之必矣云南破分兵径趋大理可毋顿刃也】质实【永寧元州寻废明复置今属贵州安顺府乌撒宋乌撒部元路明军民府今改威寧州属贵州大定府沅州唐置元路明改州属辰州府今改沅州府普定元路明府寻改卫今为安顺府治曲靖本唐曲州靖州地元并为路明改府今因之大理段氏有南诏地称大理国元收附置路明改府今因之】

冬十月壬子朔日有食之

制法司录囚会翰林春坊官给事中集议以闻

【会议平允然後复奏论决】

免应天等五府秋粮

【应天太平广德镇江寧国五府秋粮官田半徵民田全免又免开封祥符等八县及陈州被水田租】

十二月命翰林春坊官考验诸司章奏

【令编修检讨典籍同左春坊左司直郎正字赞读考驳诸司奏启平允则署其衔曰翰林院兼平驳诸司文章事某官某列名书之】质实【此翰林平驳之始至成祖初以解缙黄淮等七人直文渊阁预机务则翰林入阁之始司直郎从六品正字从九品赞读不常设余详十八年更定官制条】

傅友德下曲靖元梁王巴咱尔斡尔密走晋寧自杀蓝玉沐英遂克云南

【友德至湖广遣都督郭英湖海等由永寧趋乌撒英等击破蛮兵于赤水河平凉侯费聚安陆侯吴复趋普定友德玉英率大军由辰沅趋贵州克普定普安梁王遣司徒平章达尔玛将兵十余万屯曲靖以备沐英谓友德曰彼不意我师深入若倍道疾趋出其不意破之必矣友德是之遂进师未至曲靖数里忽大雾四塞冲雾行阻水而止则已临白石江矣顷之雾霁达尔玛大江友德欲渡英曰我兵疲恐为所厄乃率诸军严陈若将渡者而奇兵从下流济出其陈後张疑帜山谷间人吹一铜角元兵惊扰英急挥军渡江纵铁骑捣之生擒达尔玛俘获万计友德悉抚而纵之使各归业蛮人皆喜慰友德自率衆击乌撒分遣蓝玉沐英趋云南先是梁王以女妻大理酋段有功尝倚其兵力後以疑杀之失大理援至是闻败度不能支乃走晋寧州之忽纳砦焚其龙衣驱妻子赴滇池死与其左丞托迪右丞鲁尔夜入革舍俱自经死玉英师至板桥右丞观音保以城降玉等整军入城戒辑军士抚定其民友德击破乌撒蛮遂

城之又克七星关以通毕节进至可渡河于是东川乌蒙芒部水西诸蛮皆望风降附】质实【晋寧州晋置郡元置州明因之今属云南府明史譌作普寧赤水河在永寧州东南百四十里普安元路明州今属贵州南笼府白石江在曲靖府南寧县东北八里源自马龙州界流经此下流入南盘江忽纳砦在晋寧州西滇池在云南府城南一名昆明池延袤三百余里晋寧州西三里有海宝山相传下有窍滇池之水由此泻入潯江府之龙泉汉板桥驿名在云南府昆明县东三十里七星关在贵州大定府毕节县西七星山上下临七星河有城当云贵川三省之交为咽喉地毕节明卫今为县属大寧府可渡河在今威寧州南九十五里河南沾益境河北乌撒境东川元路明军民府属四川今府属云南乌蒙元路明军民府属四川今改昭通府属云南芒部宋时蛮名元路明改镇雄军民府今为州属昭进府水西蛮地名黔记蜀汉时蛮火济从诸葛武侯南征有功封罗甸王凡数十世保有水西之地明时土司安氏即其後也木朝康熙间安氏叛讨平之置黔西府後改州属贵州大定府郭英濠人郭子兴弟胡海字海洋定远人观音保後为金齿指挥使赐姓名李观 达尔玛旧作达里麻托迪旧作达的鲁尔旧作驴儿今并改】发明【梁王分藩南徼抚治有方力抗蜀夏之师危而复安及庚申北去中土已非元有而王守云南自若岁遣使自塞外达和林行在执臣节如故者十余年明师南下一木不支耻为衔璧之谋甘同蹈海之节虽田横之不辱何以加焉】

【壬戌】十五年春正月命编类蒙古译语

【帝以前元素无文字但借高昌之书制为蒙古字而译语未有成书难以通晓乃命翰林院侍讲和约尔济勒编修玛实伊克等以华言译其语凡天文地理人事物类服食器用具载复取元秘史参考纽切其字以谐其声音既成诏刊行之自是使臣往复朔漠皆能通达其情】质实【和约尔济勒旧作火原洁玛实伊克旧作马沙亦黑今并改】

命朝覲官各举所知一人

【帝谕之曰古之荐举者以实不以名後世徇名而遗实故治不如古今尔等来朝其各举所知有一善可称一才可录者皆具实以闻朕将随才用之】

二月遣驸马都尉李祺振河南水灾

质实【李祺善长长子尚临安公主】

闰二月蓝玉沐英克大理擒土酋段世属郡悉下云南平

【先是景川侯曹震定远侯王弼分兵下临安威楚诸路及是玉英帅师至大理大理城倚点苍山西临洱河以上下二关为固土酋段氏闻大兵且至聚衆扼下关英攻之不克乃命王弼等由洱水东趋上关自以兵纵下关为犄角势别遣胡海夜从石门间道渡河绕出点苍山後缘崖而上立旗帜昧爽军在下关者望见之皆譟噪蛮衆惊乱英身先士卒策马渡河水没马腹将士随之胡海之师亦自山而下遂斩关入拔其城世就擒分兵取鹤庆畧丽江破石门

关下金齿于是诸蛮部皆下云南平置都指挥司布政使司置贵州都指挥司】质实【临安古句町国元临安路明改府今因之威楚元路明改楚雄府今因之点苍山在大理府太和县西山高千余仞有峰十九悬瀑注十八川苍翠如玉蒙氏尝封为中岳洱河在大理府城东即叶榆水源出浪穹县罢谷山上下二关上关曰龙首关在太和县北七十里当洱河之首下关曰龙尾关在太和县南三十里当洱河之尾皆南诏皮罗合所筑石门间道方輿纪要云大理府西南三十五里一曰石马桥亦曰天桥自河尾顺流而下有石门巨石横亘是下关亦兼石门之称鹤庆元路明改府丽江元宣抚司明改府今皆因之石门关在丽江府旧通安州西大理府北八十里当点苍山之背唐时石门南道也金齿百蛮之俗以金裹两齿者曰金齿蛮元初置金齿宣抚司于银生崖甸後以远不可守移於近地今云南永昌府治是也曹震濠人王弼定远人後徙临淮段世初元宪宗取云南至大理段智兴降乃封智兴为摩诃罗嵯管领八方由是段氏仍世守大理至段宝已十传世宝之子也】

夏四月杀大理寺卿李仕鲁

【帝颇好释氏教诏徵东南戒律僧数建法会于蒋山应对称旨者辄召入禁中赐坐讲论时寄以耳目诸僧怙宠请为释氏创立职官于是设左右善世阐教等皆高其品秩道教亦然仕鲁疏言陛下方创业意指所向即示子孙万世法程奈何舍圣学而崇异端章数上不听仕鲁性刚介以闻佛自任及言不见用遂乞骸骨置笏帝前帝大怒命武士摔搏之立死阶下】质实【李仕鲁字宗孔濮州人】

免畿内浙江江西河南山东田租

置锦衣卫

【初置拱卫司管领校尉三年改为亲军都尉府而设仪銮司隸之至是罢仪銮司改置锦衣卫掌侍卫缉捕刑狱之事镇抚司隸焉帝时有所诛戮辄下镇抚司杂治不由三法司其从校五百人禄秩名号无异京卫军士而独不隸大都督府称为亲军】质实【供卫司秩正七品仪銮司正五品锦衣卫秩从三品十七年改正三品】

旌表辽东高希凤家

【元臣名祖自定辽来归帝问辽东风俗名祖言俗尚礼教往年石城有高希凤者本光州固始人戊戌秋在辽东老鸦寨为乱兵所掠断腕死其妻刘氏披虏骂不絶口死之希凤仲弟药师努亦死于乱妻李氏携其子文殊及孤侄僧保往高丽避难中途度不两全以其子差长弃之挈侄以行及明兴辽民复业李氏访得其子同归守夫墓希凤季弟布延布哈为纳克楚所杀妻郭氏高丽人居浑滩自缢于马枥希凤从子达实鼎为仇诬陷死妻金氏与姑邢氏缢於鱼坞又言定辽南河寨干罗村有卒裴皮铁者死其妻李氏女直人年二十三後二年葬其夫自经于桑邻人合葬焉帝即日诏旌表希凤家为五节妇之门裴皮铁家为贞节之门】质实【石城县金置寻省在今辽阳州东北五十七里石城山之下固始汉县明属光州今因之

药师努旧作药师奴布延布哈旧作伯顏不花达实鼎旧作塔失丁今并改】

五月帝诣国子监释奠於先师

【初以应天府学为国子学至是太学成改学为监帝亲行释菜礼命祭酒吴顥等进讲遂亲说尚书大禹臯陶谟洪范大旨赐宴还监分六堂以馆诸生厚给廩饥岁时赐布帛文绮诸令节俱赐节钱】质实【吴顥河南人以儒士举】

流广平府吏王允道于岭南

【允道请开磁州铁冶帝曰朕闻治世无遗贤不闻无遗利今军器不乏若复设此必重扰民杖之流海外】质实【磁州唐置元升滏源军明州属河南彰德府金属直隸广平府】

秋八月复行科举

【三年一行为定制时虽复行科举而监生輿荐举人才参用者居多尝擢监生刘政等六十四人为布政按察使及参政副使等官?用为御史给事中而荐举之途尤广贤良郭有道秀才范敏曾泰税户人才郑沂儒士赵槃皆起家为尚书其他由布衣登大僚者不可胜数】质实【曾泰江夏人郑沂浦江人郑濂第二十六年擢国子生刘政等为福建左布政使等官】

皇后马氏崩

【后勤于内治暇则讲求古训以宋多贤后命女史录其家法朝夕省览或言宋过仁厚后曰过仁厚不愈于刻薄乎前殿决事?震怒后伺帝还宫辄随事微谏帝为缓刑戮帝幸太学还后问生徒几何帝曰数千后曰人才衆矣诸生有廩食妻子何所仰给帝遂立红板仓积粮赐其家诸将克元都俘宝玉至后曰元有是而不能守意者帝王自有宝欵帝曰后意谓得贤为宝耳后拜谢曰诚如陛下言及寢疾羣臣请祷祀求良医后谓帝曰死生命也祷祀何益且医何能活人使药不效陛下能不以妾故而杀诸医乎疾革帝问所欲言曰愿陛下求贤纳谏慎终如始子孙皆贤臣民得所而已丙戌崩年五十一帝恸哭服丧十五日遂不复立后命内外臣民服三日丧音乐祭祀停百日其嫁娶文官停百日军民停一月謚曰孝慈皇后】

九月葬孝慈皇后

【葬于孝陵】质实【孝陵在今江寧府上元县东北朝阳门外当鍾山之阳明太祖陵也今设陵户守卫禁樵牧】

选僧侍诸王

【高后崩诸王奔丧将还帝命各以一僧与之令诵经修佛事吴僧道衍先以宗泐荐名在

燕府籍中见燕王棣即深相纳数以奇谋进棣甚信任之】质实【道衍即姚广孝长洲人】

冬十月更定都察院官制

【初吴元年置御史台设御史大夫中丞侍御史等官十三年罢台至是更置都察院设监察都御史八人分监察御史为十二道明年设左右都御史左右副都御史各一人左右僉都御史各二人】质实【明史职官志御史大夫从一品中丞正二品侍御史从三品十五年设监察都御史正七品浙江河南山东北平山西陕西湖广福建江西广东广西四川十二道御史正九品十六年陞都察院左右都御史正三品副都御史正四品僉都御史正五品十七年陞都御史正二品副都御史正三品僉都御史正四品十二道监察御史正七品永乐十九年罢北京道增设贵州云南交趾三道宣德十年罢交趾道始定为十三道】

十一月置殿阁大学士

【以礼部尚书邵质为华益殿大学士翰林学士宋讷为文渊阁大学士检讨吴伯宗为武英殿大学士典籍吴沈为东阁大学士又置文华殿大学士徽耆儒鲍恂余詮张长年为之以辅导太子秩俱正五品当是时以翰林春坊详看诸司奏启兼司平驳大学士特侍左右备顾问而已】质实【宋讷字敏仲滑县人吴沈字濬仲兰溪人鲍恂字仲孚崇德人余詮字士平丰城人张长年高邮人】

【癸亥】十六年春二月令天下学校岁贡士于京师

【时谏官关贤言国朝崇儒期为用也奈所司非人师道不立及至选贡贤愚混淆甚至布政按察司将俊秀生员选充承差有乖育才之意宜令府州县学岁贡生员各一人中式则赏及所司教官否则论如律生员罚为吏从之命天下学校自明年始岁贡生员各一人正月至京翰林院试经义四书义各一道判语一条中式者入国子监不中者罚之】

三月诏傅友德班师命沐英留镇云南

【明年春师还论功封友德颍国公蓝玉等爵及子孙仍封赏有差其後沐氏遂世镇云南】质实【沐氏世镇云南英子春晟昂及晟子斌昂孙璘璘弟璘斌子璘璘孙崑崑子绍融绍勋子朝辅朝弼朝弼子昌祚昌祚子觐觐子启元启元子天波皆相继镇云南与明代终始】

复凤阳临淮二县民世世无所与

【谕户部曰凤阳朕故乡皇陵在马昔汉高帝生于丰起于沛丰沛之民终汉世受惠朕今永免凤阳临淮二县税粮徭役其榜谕之】

夏五月免畿内各府田租

【先是賑大同饥免寧国逋租至是说免应天太平镇江寧国广德五府田租又免畿内十二州县养马户田租一年滁州克二年】

秋八月壬申朔日有食之

冬十月安陆侯吴复卒於普定

【复征普定攻破诸路山寨由关索岭开箐道取广西泗城州蛮寨前後杀?甚衆至是卒于普定追封黔国公諡威毅妾杨氏年十七视殮毕沐浴更衣自经死事闻贈贞烈淑人】质实【关索岭在普定南五十里明置守御千户所泗城州宋置明初移治古礮洞今改府】

【甲子】十七年春三月颁科举条式

【子午卯酉年乡试辰戌丑未年会试试各三场第一场试四书义三道经义四道四书义主朱子集注易主程朱传义书主蔡沈传及古注疏诗主朱子集传春秋主左氏公羊谷梁胡安国张洽传礼记主古注疏第二场试论一判语五诏诰章表内科各一第三场试经史策五其应乡试者国子学生及府州县学生之学成者儒士之未仕者官之未入流者皆由有司申举其罢闲官吏及倡优之家与居父母丧者皆不许入试乡试中式者各布政使司送礼部会试会试中式者赴殿试】

曹国公李文忠卒

【文忠器量沈宏常师事金华范祖干胡翰通晓经义其释兵家居恂恂若儒者常劝帝少诛戮諫帝征日本又言宠宦者过甚非天子不近刑人之义及疾帝亲临视使淮安侯华中护医药至是卒年四十六御制文祭之追封岐阳王諡武靖帝疑中毒之贬中爵故其家属于建昌诸医并妻子皆斩】质实【文忠帝姊子初赐姓朱氏范祖干字景先胡翰见二年华中定远人葺云龙子】

大赦

秋七月禁内官预外事勅诸司毋通内官监文移【諭侍臣曰宦寺輿外臣交通觜视动静夤缘为奸假窃威权以乱国家为害非细故也朕为此禁所以戒未然耳】

盱眙人献天书诛之

【县民有伪造天书献者命斩之】质实【盱眙秦县明属泗州今因之】

八月河决开封杞县

【决开封东月堤自陈桥至于陈留横流数十里又决杞县入巴河遣官塞之蠲被灾租税】质实【陈桥驿在开封府城东北二十里巴河在陈留县东北三十五里一名泌水黄河之支流也】

九月免西安府旱灾田租

【凡十三万三千九百余石】

冬十月册李氏为淑妃摄六宫事

【妃壽州广武卫指挥僉事李杰女】

河南北平水遣使振之

闰十月诏天下刑狱刑部都察院详议大理寺覆讞奏决

【谕刑官曰王良善御岂在于策周公善治岂在于刑刑者辅治之具用之不可不详故每令三审五覆无非求其生而已】

十二月弛中表相婚禁

【翰林待诏朱善言民间以姑舅两姨之子女法不当为婚讐家讐讼或已聘见絶?既婚复离?儿女成行有司逼夺按古重世婚其显然可证者如温峤之玉镜台以舅之子娶姑之女也吕荣公夫人张氏待制张昱之女而待制夫人即荣公母申国夫人之姊非以小姨之子娶大姨之女乎朱子小学有取焉今江西两浙此弊尤甚狱讼繁兴贿赂公行愿下羣臣议弛其禁报可】质实【朱善字备蒿丰城人】

【乙丑】十八年春二月雷电网雪诏臣民极言得失

【国子监祭酒宋讷献守边屯田策每将以东西五百里为率国子监博士高允宪言察郡县明劝戒学正陈潜夫言獎直臣简师儒励廉耻审用人四事】

太傅魏国公徐达卒

【达言简虑精屡为大将善拊循與下同甘苦士无不感恩效死尤严戢步伍所平大都一省会三郡邑百数间井宴然归朝之日单车就舍延礼儒生谈议终日在帝前恭谨若不能言帝常称之曰受命而出成功而旋不矜不伐妇女无所爱财帛无所取中正无疵昭明乎日月大将军一人而已先是太阴犯上将帝心恶之时达在北平召还有疾帝为祷于神至是卒帝震悼辍朝追封中山王諡武寧赐楚鍾山之陰御制神道碑文纪其功子辉祖嗣爵】质质【

徐辉祖初名允恭达长子】

三月始选进士入翰林及为庶吉士

【帝廷试进士擢一甲丁显练子寧黄子澄俱赐及第为翰林院修撰二甲赐进士出身马京等为编修吴文为检讨李震为承勅郎陈广为中书舍人三甲赐同进士出身蹇瑬等为中书舍人命进士观政於诸司其在翰林院承勅监中书六科者曰庶吉士在六部都察院诸司者仍称进士引奏下第举人俱为教官】质实【进士入翰林及庶吉士观政进士之名俱自此始永乐二年乃定制以庶吉士专属翰林丁显建阳人练子寧名安以字行新淦人黄子澄名湜以字行分宜人会试第一马京武功人蹇瑬已县人赐名义字宜之】

免应天太平寧国镇江广德滁和七府州田租

命天下郡县掩骼埋胔

定翰林院官制

【先是翰林无常员亦无定秩至是更定品员学士一人正五品侍读侍讲学士各二人从五品侍读侍讲各二人正六品始以侍读先侍讲史官修撰从六品编修正七品检讨从七品俱无定员其侍书待诏则不常设】质实【明史职官志吴元年置翰林学士正三品侍讲学士正四品直学士正五品修撰典簿正七品编修正八品洪武二年置学士承旨正三品改学士从三品修撰正六品增侍读学士从四品待制从五品应奉正七品典籍从八品十三年增检閱从九品十四年定学士正五品罢承旨直学士待制应奉检閱典簿而设孔目五经博士侍书待诏检讨】

夏四月思州蛮叛命楚王桢率汤和等讨平之

【思州诸洞蛮叛命和为征虏将军周德兴为副将军帅师从楚王桢讨之和等分屯诸洞立栅与蛮人杂耕作以计擒其魁余党悉平先是吴面儿既遁帝谕杨仲名不必穷追九月面儿寇古州复命桢率和讨之和至古州击平诸洞擒面儿送京师诛之俘获四万桢还藩亲王统兵自此始】质实【思州唐思州地元安抚司明初设宣慰司永乐十一年改府今因之】

秋七月遣使封高丽国王禡

【先是高丽贡使数至帝皆不纳谕政府令遣官往视嗣王如何政令安在若政令如前嗣王不被拘囚则当依前王言岁贡马千匹明年贡金百斤银万两马百细布万仍悉送还所拘东民方见王位真而政令行否则弑君之贼必讨无赦以後屡勅边吏絶之十七年六月禡遣使贡马二千匹言金非地所产愿以焉代输余皆如约许之是年正月贡使至帝谕礼臣曰高丽请约束不已故索岁贡以试其诚伪非以此为富也今既听命宜损其贡数令三年一朝贡

马五十匹至是禡上表请袭爵并乞故王諡乃遣使封之赐故王顥諡恭愍】

八月振河南水

九月太白经天

【戊寅经天輿荧惑同度丁亥昼见犯荧惑】

冬十月颁大诰於天下

【帝患民狃元习徇私灭公乃辑官民过犯条为大诰其目有十颁学宫以课士里置塾师教之囚有能读大诰者罪减等其後复命刑官撮大诰条日要畧附载於律谓之律诰而大诰所载诸峻令未尝轻用云】

十一月免河南山东北平湖广田租

十二月平缅宣慰使思伦发叛

【先是大兵下金齿平缅壤地相接思伦发惧请降诏以为宣慰使寻又命兼统麓川之地至是思伦发反率衆十余万寇景东都统冯诚御之会天大雾官军失利千户王昇战死】质实【平缅古百蛮地元置麓川平缅二路明初并为麓川平缅宣慰思後改陇川宣抚司今云南永昌府腾越州东北距布政司六十六程景东南诏银生府元置开南州明为景东府今改厅】

【丙寅】十九年春二月振河南饥

【复遣御史蔡新等检核振济不及者三千一百户补给之典卖男女者官为收赎六月青州郑州蝗皆遣官振之】质实【青州刘宋置元益都路明青州府今因之】

夏五月妖僧彭玉琳等作乱诛之

【玉琳福建将乐县阳门庵僧初名全无用行脚至新淦自号弥勒佛祖师作白莲会县民杨文曾尚敬等惑之同谋作乱玉琳称晋王建元天定伪置官属知县率民兵掩捕之械玉琳并其党送京师伏诛】质实【将乐县三国吴置明属延平府新淦秦县元升州明复为县属临江府今皆因之】

六月诏有司存问高年

【贫民年八十以上月给米五斗肉五斤九十以上岁加帛一疋絮十斤有田产者罢给米

应天凤阳富民年八十以上赐爵社士九十以上乡士天下富民年八十以上里士九十以上社士皆与县官均礼复其家鰥寡孤独者岁给米六石】

秋七月诏举经明行修练达时务之士

【年六十以上者置翰林备顾问六十以下於六部布按二司用之】

冬十二月癸未朔日有食之

御定资治通监纲目三编卷二

卷三

钦定四库全书

御定资治通鉴纲目三编卷三

【起丁卯明太祖洪武二十年尽戊寅明太祖洪武三十一年】凡十二年

【丁卯】二十年春正月以冯胜为征虏大将军率师征纳克楚

【元太尉纳克楚拥衆数十万屯金山数侵辽东帝以胜为大将军傅友德蓝玉为副帅师二十万征之谕曰彼情诡诈尔等且驻师通州遣人覘其出没元兵若在庆州宜以轻骑掩其不备若克庆州全师竟捣金山纳克楚不意吾师之至必成擒矣复遣前所获元将孛喇固北还以书谕纳克楚等军次通州闻元兵有屯庆州者蓝玉乘大雪帅轻骑袭破之斩平章郭勒禽其子布喇奇胜出松亭关分筑大宁寛和会州富峪四城驻兵大宁】质实【金山在今开原县西北庆州在今巴林西北东西相距约二千里方輿纪要自喜峯口而北一百二十里有故松亭关辽金时戍守处也其相近者曰寛河城自是而东北曰会州城由会州城东曰富峪城又东北为大宁新城俱洪武时筑孛喇固旧作乃剌吾郭勒旧作果来布喇奇旧作不兰奚今并改】

焚锦衣卫刑具

【时天下重罪逮至京者多收系锦衣卫断治适有富民系卫狱用事者非法凌虐帝闻之怒曰讯鞫法司事也或令锦衣卫审之欲先得其情耳岂令其锻链耶执用事者治之悉焚其刑具以囚送刑部二十六年复申明其禁诏内外狱毋得上锦衣卫大小咸经三法司】

夏六月冯胜至金山纳克楚降

【胜自大宁帅师趋金山遣使送孛喇固还至松花河纳克楚见之大惊相劳问孛喇固述帝恩德纳克楚心动遣其左丞刘特默齐等来献马胜受之而引兵径踰金山降金国公和通进压纳克楚营而军初纳克楚分兵为三营一曰榆林深处一曰养鹞庄一曰龙安伊图河畜牧蕃盛及是为大军所逼又已先入孛喇固言意犹豫不决因遣使阳为请降以覘兵势胜遣蓝玉往受之纳克楚所遣使亦还报极言大将军兵盛纳克楚乃仰天叹曰天弗使吾有此衆矣遂率数百骑诣玉玉大喜饮以酒纳克楚酌酒酹玉玉解衣衣之纳克楚不肯服王亦不饮争让久之纳克楚取酒浇地顾其下咄咄语郑国公常茂在坐其麾下赵指挥解蒙古语密告茂纳克楚将遁矣茂直前缚之纳克楚惊起欲就焉茂拔刀斫伤其臂不得骑都督耿忠拥以见胜胜重礼之使忠与同寝食纳克楚将士妻子十余万衆在松花河北闻纳克楚伤惊溃有欲来追者胜遣和通谕降之先後凡二十余万王九国公郡王四太尉国公五行省丞相一司徒平章十三右丞左丞三十一凡官属将校三千三百余人所获辎重马蓄亘百余里还次金

山伊玛河复收其残卒三万初帝闻捷即驰谕胜留兵五万於大宁防後患散处降衆浑阳崖头间与辽东兵参住耕牧而胜以常茂惊溃敝衆惧不测乃尽俘其衆内徙大宁兵亦悉拔归都督濮英以三千兵殿後时纳克楚溃卒散匿者尚数万闻之设伏于途谋窜取大军过不敢发英役至猝为所乘马蹶被执英絶食不言乘间引佩刀刺腹死三千人殲焉胜之趋金山也临江侯陈镛失道战歿事闻诏追封英金山侯谥忠襄以米帛给镛家纳克楚至京帝召见慰劳甚至封海西侯鞬喇固授千户赐金帛】质实【松花河即松花江一名混同江在吉林乌拉城东南源出长白山北流会嫩江黑龙江等江入海即古粟末水也龙安即金隆安府元开元路明三万卫今开原县伊图河在龙安城东下流入松花江浑阳辽金庸州元浑阳路明浑阳卫今盛京陈镛濠人陈德子

刘特默齐旧作刘探马赤和通旧作观童伊图河旧作一秃河伊玛河旧作亦迷河今并改】

秋七月太白三辰昼见

八月召冯胜还以副将军蓝玉领其军

【胜奏常茂激变状械至阙茂胜之壻也胜每於衆中卑折之茂不逊胜怒及纳克楚衆溃胜归罪於茂会有言胜多匿良马使阍者行酒於纳克楚妻求大珠异宝王子死二日强娶其女失降附心而茂亦许胜遇帝怒收胜大将军印召还以蓝玉摄之寻命胜就第凤阳奉朝请而安置茂於龙州】质实【龙州宋置元为万户府明仍为州土官赵氏世袭今改下龙上龙二司属广西太平府】

九月置大寧都指挥使司

【司治大寧义至大寧中左右及会州等卫皆隶焉明年改为北平行都司】质实【会州城在大寧卫西南二百四十里】

诏商税毋定额

【户部言天下税课视旧有亏宜以洪武十八年所收为定额帝曰商税多寡岁有不同限以定额岂不病民不从】

以蓝玉为大将军帅师北伐

【帝以故元特古斯特穆尔尚在终为边患乃即军中拜玉为大将军延安侯唐胜宗武定侯郭英副之都督耿忠孙恪为左右参将率师十五万往征之是冬元将托克托降於玉】质实【孙恪兴祖之子参将明初设无品级无定员多以勲戚充之其後秩在副总兵下游击次之托克托旧作脱脱今改】

冬十一月命汤和筑濒海城备倭

【先是帝以倭患命和巡视浙江福建沿海诸城又命江夏侯周德兴於福建滨海福漳泉兴化四郡筑城练兵以备之德兴相视形势筑城十有六民户三丁取一以充戍卒是时和已请老会倭寇上海帝召和谓曰卿虽老强为朕一行和请与方鸣谦俱鸣谦国珍从子也习海事帝访以御倭策鸣谦曰倭海上来则海上御之耳请量地远近置卫所陆聚步兵水具战舰砦垒错置其间则倭不得入入亦不得傅岸其兵则藉近海民四丁取一以充无烦客兵也帝以为然命和芾具事和乃度地浙东西置卫所并海筑城五十有九选丁壮三万五千人尽发州县钱及籍罪人赉给役役夫往往过望而民不能无扰浙人颇苦之或谓和曰民讟矣奈何和曰成速筭者不恤近怨任大事者不顾细谨国无备及干戈鋌井里将圯余何有焉复有讟者齿吾劒踰年而城成选丁壮五万八千余人戍之海防大饬其後嘉靖间东南苦倭患和所筑城坚致久而不圯民赖以相保咸歌思之请于朝立庙祀焉】质实【上海宋镇元县明属松江府今因之】

十二月振济南东昌东平登莱饥

【振济南三府饥民凡六万三千八百余户又遣刑部尚书唐铎运钞百余万锭振登莱饥】质实【登州唐置明初属莱州府九年陞府今因之】

【戊辰】二十一年春正月诏治有司匿灾者罪

【青州饥有司匿不以闻诏逮治之且着为令于是遣人驰驿往振户凡二十一万四千六百钞五百三十六万锭有奇】

三月沐英讨思伦发破走之

【先是思伦发诱羣蛮寇马龙他郎甸之摩沙勒寨沐英遣都督同知甯正击破之至是思伦发悉举其衆寇定边号三十万英选骑三万驰救以轻骑三百挑之百夷以万人驱三十余象酋长跨巨象直前指挥张因率骑卒五十余人作为前锋注矢中象左膝及胁象仆射杀酋长大呼突阵衆逆却英曰贼无能为也乃置火礮劲弩为三行蛮驱百象被甲翼以标枪銳甚英分军为三都督冯诚居前同知甯正友汤昭右英与将士约有功者实退切者斩因乘风纵火礮弩并发象皆反走贼有昔刺者殊死鬪左军少却英登高望之取佩刀命左右斩帅首来左帅见一人握刀驰下恐奋呼突阵大军乘之无不一当百蛮大败斩馘四万余生?象三十七贼帅各被百余矢伏象背死思伦发遁去明年遣使入贡麓川平缅遂平】质实【马龙他郎甸今云南元江州新平县西北有故新化州寓为马龙他郎二甸地明陞为州今裁摩沙勒寨在故新化州东南其地羣山夹江险隘如峡定边明县属楚雄府今并入蒙化厅置巡司於此】

夏四月蓝玉袭破元特古斯特穆尔于捕鱼儿海获其子廸保努

【玉以大军出大寧至庆州闻特古斯特穆尔在捕鱼儿海间道驰进次纽琿南道无水军士渴甚路傍小山忽涌四泉士马得不困乏至百眼井去捕鱼儿海四十余里不见敌玉欲还

定远侯王弼曰吾等提十万衆深入至此无所得何以後命玉曰然令军士穴地而爨母见烟火乘夜驰至捕鱼儿海黎明东北去敌营八十余里时大风扬沙昼晦军行无知者敌不设备弼为前锋大破之斩太尉曼济等降其衆特古斯特穆尔以其太子添保努等数十骑遁获其次子廸保努及妃主以下百余人追获吴王代王等官属三千男女七万七千余人并宝玺符勅金牌金银印等物马驼牛羊十五万车三千奏捷京师帝大悦遣使齎勅劳玉比之卫青李靖玉又破哈喇章营获人马六万师还进凉国公廸保努及妃主进京帝命有司给第宅廩饩既有言玉私元主妃事帝怒玉无礼切责玉妃闻而自缢廸保努由是有怨言帝闻之曰朕尝与儒臣议欲封之以尽待亡国之礼廸保努乃若是岂可使复居内地于是遣使送往琉球仍厚贐遣之时元四大王久匿山中其下逃散畧尽四大王穷蹙诣晋王府降帝命徙之云南是年纳克楚亦卒以其子察罕为潘阳侯後坐蓝玉党死】质实【捕鱼儿海在庆州西北今克什克腾西北周数十里纽琿南道及小山泉方輿纪要云在庆州西境廸保努旧作地保奴纽琿南道旧作游魂南道曼济旧作蛮子今并改】

高丽李成桂囚其王禑而立禑之子昌

【禑欲寇辽东使其军都相往莹李成桂缮兵成桂遣千户陈景屯艾州以粮不继而退禑怒杀成桂之子成极还兵攻之逼禑逊位于其子昌陈景来降成桂又以禑本幸阍子禑之子亦不可为王氏後明年乃废昌别求王氏疎属定昌国院君瑤立之】质实【艾州一统志作忧州隶黄海道在朝鲜国城西南】

五月甲戌朔日有食之

六月信国公汤和归凤阳

【帝春秋寝高不欲诸将久典兵未有以发也和以间从容乞骸骨帝大悦赐钞治第凤阳并为诸公侯治第至是第成和筑城海上还率妻子陛辞帝褒谕之赐赆甚厚】

秋七月以解缙为监察御史

【缙举是年进士授中书庶吉士甚见爱重一日帝在大庖西室谕缙曰朕与尔义则君臣恩犹父子当知无不言缙即日上封事万言畧曰臣闻令数改则民疑刑太繁则民玩国初至今将三十载无几时不变之法无一日无过之人臣闻陛下锄根剪蔓诛其奸逆矣未闻褒一大善赏延于世始终勿替者也或朝赏而暮戮或忽罪而忽赦陛下每多自悔之时辄有无及之叹此由存养之功少加密耳若夫祀天宜复扫地之规尊祖宜复七庙之制奉天不宜为筵宴之所文渊犹未备馆阁之隆太常非俗乐可肄官妓非人道所为禁絶倡优易置寺闾执戟墀陛皆用俊良勿兴土木之工勿贪四裔之地减纽县省冗官痛惩法外威刑永革京城工役妇女非帷簿不修毋令逮系大臣有过恶当诛不宜加辱近岁台纲不肃以刑名轻重为能事以问囚多寡为勲劳御史纠弹皆承密旨每闻上有赦宥则必过以执持意谓如此则上思愈重此皆小人趋媚効劳之细术陛下何不肝胆而镜照之哉陛下进人不择贤否授职不量轻

重椎理鬻悍之夫閭茸下愚之革朝捐刀镊暮拥冠裳左弃筐篋右绾组符虽曰立贤无方亦盍忱询有德古者善恶乡邻必记今互知之法虽严而训诰之方未备臣欲求古人治家睦邻之法若古蓝田吕氏乡约今义门郑氏家范布之天下世臣大族率先以劝将见作新於变至于比屋可封不难矣臣闻地有盛衰物有盈虚而商税之徵率皆定额既税於所产之地又税於所过之津何夺民之利如此密也且多贫下之家逃亡转徙无前日之生植有前日之税粮或膏腴而税反轻瘠鹵而税反重此胥里之弊也欲拯困而革弊莫若行投田均田之法兼常平义仓之举积之以渐至於九年之食无难者夫连坐起於秦法拏戮本於伪书今为善者妻子未必蒙荣有过者里胥已陷其罪况律以人伦为重而有给配妇女之条听之于不义则又何取夫节义哉同寅协恭相倡以礼今内外百司捶楚属官甚於奴隶是使柔儒之徒荡无廉耻甚非所以励风节也臣但知罄竭愚衷急於陈献所奏畧兴次序 惟陛下垂鉴书奏帝称其才缙尝入兵部堂索皂隶语嫚尚书沈潛以闻帝曰缙以冗散自恣耶遂命为御史既而缙复代郎中王国用草疏为李善长申雪又尝为同官夏长文草疏劾都御史袁泰於是大臣皆恶之会有诏近臣父皆得入覲缙父闻至帝召谓曰大器晚成若以而子归益令进学後十年来用未晚也遂罢归】质实【解缙字大绅吉水人沈潛字尚贤钱塘人】

发明【缙年二十成进士负才穎敏受特达之春纵言无讳自以为贾鼂不过也数上封事言分封势重万一不幸必有厉长吴濞之虞深中时弊然敷陈繁传或不尽切於事理即如授田均田之疾实泥古而不可行且疎放自恣露才扬已其後不能殉建文之难卒被高煦之讒僵死纪纲之手惜哉】

九月勅天下卫所屯田

【更定屯田法凡卫系冲要都会及王府护卫以十之五屯田系卫所以五之四岁得粮五百余万石】

越州蛮叛命沐英傅友德讨之

【越州土酋阿资故知州龙海子也沐英南征时驻兵其地谕降龙海奏以为知州未几即叛英以计禽之徙辽东阿资袭父职益桀骜至是反帝命英友德会兵讨之友德道过平彝以其山险峻留兵千人守之进击阿资於普安大破之蛮衆攀岸缘壁坠死者不可胜数阿资遁还越州阿资之叛也揚言曰我地有万山之险岂能尽灭英乃请置越州马龙三卫扼其险要又分兵剿捕阿资穷蹙遂请降金都御史黄政从征云南还次普安遇寇与其子琬力战死之】质实【越州本苦麻蛮部元时内属置越州明改卫今裁故城在曲靖府南寧县平彝明卫今改县属曲靖府马龙元州明属曲靖府今因之按苦麻元史地理志作普麼今作明史曲靖土司传黄政殒山人】

以卓敬为户科给事中

【敬鯁直无所避时制度未备诸王服乘拟太子敬乘间言京师天下视效陛下於诸王不

早辨等威而使服饰与太子埶嫡庶相乱尊卑无度何以令天下帝笑曰尔言是朕未虑及此益器重之他日敬与同官进见适八十一人帝命改官为元士寻以六科为政事本原又改曰源士已复称给事中】质实【卓敬字惟?端平人】

冬十月元伊逊岱尔弑其主特古斯特穆尔

【特古斯特穆尔既遁将依丞相耀珠于和林行至图拉河为其下伊逊岱尔所袭衆遂散独与知院讷克林等十六骑俱耀珠来迎欲共往依库库特穆尔会大雪不得发伊逊岱尔兵猝至以弓弦缢杀之并杀其太子添保努讷克林等遂来降自是五传至坤特穆尔皆被弑不复纪年有郭勒齐者篡立称汗去国号遂称鞑靼云】质实【耀珠旧作咬住讷克林旧作捏怯来库库特穆尔旧作濶阔帖木儿别一人非王保保也今并改】

十二月安南黎季犁废其王炜寻杀之

【陈叔明立三岁传其弟熾熾死弟炜代立其相黎季犁窃柄废炜弑之立叔明子曰焜立国事】

【己巳】二十二年春正月改大宗正院为宗人府

【府设令一人左右宗正宗人各一人以秦王棣为宗人令晋王櫜为左宗正燕王棣为右宗正周王橚为左宗人楚王桢为右宗人其後以勲戚大臣摄府事不备官】质实【大宗正院洪武初设】

二月禁武臣预民事

【时广西都指挥耿良造譙楼发民丁青州等卫造军器科民财於是诏申明其禁凡有造作達五军都督府奏准方行】

湖广千户夏得忠作乱靖寧侯叶昇讨之得忠伏诛【安福千户夏得忠诱九溪洞蛮为寇昇同胡海等讨之驻兵贼境昇独潜兵出贼後掩擊禽得忠送京师斩之置九溪永定二卫改大庸卫为千户所】质实【安福千户所在澧州慈利县西北今改安福县属澧州九溪即九渡溪慈利县西三十里有九渡山上有仙楼下有九溪水水经注九渡水南出九渡山山下有溪又以九渡为名九溪故卫在今安福县北永定卫在慈利县西南今改永定县属澧州大庸所在永定西南叶昇合肥人】

夏四月赐江西山东湖广贫民钞

【帝谕户部九江黄州汉阳武昌岳州诸郡多贫民其遣人运钞往振之又赐山东流民居京师者钞振莱州兗州饥又振常德长沙辰州靖州衡州永州宝庆郴州德安沔阳安陆襄阳

贫民凡钞二百六十四万余锭户部请造小钞自一十文至五十文以便民用从之遣御史按山东官匿灾者御史许珪巡按河南言自开封永城至彰德旱请减夏税左都御史詹徽以其希旨要誉请罪之帝曰御史能恤民隐逵下情何罪耶即命振贷蠲其税】质实【汉阳元郡元明府兖州隋置明府长沙秦郡明府衡州梁置明府德安刘宋郡宋元明府今皆因之安陆元府明降州嘉靖中升承天府今仍安陆府永城县隋置明属归德府今因之詹徽字资善同之子】

五月置泰寧朶顏福余三卫

【三卫地本乌梁海所居在黑龙江南元大寧路北地元辽王阿尔察锡喇及惠寧王朶顏元帅内附帝即其地置三卫曰泰寧以阿尔察锡喇为指挥使塔本特穆尔为指挥同知曰朶顏以托罗海彻尔为指挥同知曰福余以哈克三纳達齐为指挥同知各领所部以安畜牧独朶顏地险而强初三卫分地延袤共千余里在潢水北及後斩徙潢南自全寧抵喜峯口近宣府皆属朶顏自锦义历广寧至辽河皆属泰寧自黄泥洼东逾潘阳铁岭至开原皆属福余东西亘三千里】质实【三衡按今土默特阿鲁科尔沁等部为泰寧卫故地喀尔沁敖汉奈曼翁牛特巴林等部及热河五厅为朶顏卫故地科尔沁郭尔罗斯杜尔伯特札赉特等部为福余卫故地黑龙江上源曰谿诺河自西北流六千余里经萨哈连乌拉城东南与混同江合方輿纪要云饶乐水或谓之乌龙江大寧在乌龙江南渔阳塞北即饶乐水矣潢水在临潢城南一曰黄岩水即西喇穆楞河也源出古北口北五百余里蒙古克什克腾界内之伯尔克和尔特克东流经口外诸蒙古驻牧地又东南至开原县西北会赫尔苏河入边为辽河喜峯口在遵化州东北七十里义州金置明义州卫今义州属锦州府广寧金府元路明广寧卫今广寧县属锦州府辽河在奉天府西一百里广寧县东北二百三十里有东西二源自边外合流而南经开原铁岭二县西又南经承德辽阳海城之西又南入海黄泥洼方輿纪要云广寧卫东南七十里为三岔儿堡近堡有黄泥洼铁岭卫故城在今铁岭县东南五百里洪武二十六年徙置今县地开原元开元路明改开原置三万卫今开原县 乌梁海旧作兀良哈阿尔察锡喇旧作阿札失里塔本特穆尔旧作塔宾帖木儿托罗海彻尔旧作脱鲁忽察儿哈克三纳達齐旧作海撒男答奚今并改】

秋九月丙寅朔日有食之

十一月擢海州同知陈龚福为太仆寺少卿

【陈龚福故元御史大夫福壽之子也坐事当戍边帝念其父死节特宥而擢之】

冬十二月迁周王橚於云南寻止之

【橚擅弃其国来居凤阳帝怒命迁之云南寻止勿徙使居京师二十五年复勅归藩】

【庚午】二十三年春正月命晋王橐燕王棣帅师北伐【命传友德等以北平兵从燕王

王弼等以山西兵从晋王征耀珠及鼐尔布哈】

二月河决归德

【决归德东南凤池口径夏邑永城诸县发兴武等十卫士卒舆归德属县民并力筑之一月成及秋又决开封西华诸县灾遣使振万五千七百余户】质实【归德黄河自开封府仪封县流入境东经睢州考城商邱虞城夏邑县北又东入江南砀山县界归德唐军金府明降州嘉靖中复为府夏邑县本下邑明改夏邑属归德府今皆因之】

三月燕王棣至伊都元太尉鼐尔布哈等降

【棣出古北口侦知鼐尔布哈营伊都冒大雪驰进去敌一磑先遣指挥和通往和通故善鼐尔布哈至则相持泣顷之大军压其营鼐尔布哈等惊欲遁和通止之引见棣赐酒食慰谕遣还鼐尔布哈喜过望遂偕耀珠等来降二十五年命元降军赴北平听燕王调用棣兵自此益强】质实【伊都方輿纪要云明初王师擒鼐尔布哈於兴和西北则伊都当在兴和城西北伊都旧作迤都今改】

夏四月潭王梓自焚死

【梓聪明好学尝会府僚设醴赋诗品其高下而赉予之妃於氏都督显女也显与子琥坐胡惟庸党诛梓不自安帝遣使召之大惧与其妃自焚死无子国除】

闰四月诏百官期服母奔丧

【初百官闻祖父母伯叔兄弟丧俱奔赴吏部言一人或连遭五六期服或道路数千则居官日少更易繁数旷官废事请自今期年服不许奔丧从之】

五月以杨靖为刑部尚书

【时诏在京官三年皆迁调着为令靖以户部尚书改刑部帝谕曰愚民犯法如啗饮食嗜之不知止设法防之犯益衆惟推恕行仁或能感化靖承旨治岳明察而不事深文在部多所平反尝鞫一武弁门卒检其身得大珠僚属惊异靖徐曰伪也安有珠大如此者立碎之帝闻叹曰靖此举有四善焉不献朕以求容悦一也不究其所投献息大狱二也不獎门卒杜小人侥幸三也千金之珠猝然至前斥以为伪而辟之有过人之智应变之才四也】质实【杨靖山阳人】

赐韩国公李善长死

【先是善长弟存义免死安置崇明善长不谢帝衔之至是善长年七十七毫不检下尝欲

营第从信国公汤和假卫卒三百人和以闻四月京民坐罪应徙边者善长数请免其私亲丁斌等帝怒按斌斌故给事胡惟庸家因言存义等往时交通惟庸状命逮存义父子鞫之词连善长或告善长云将军蓝玉至捕鱼儿海获惟庸通沙漠使者封绩善长匿不以闻於是御史交章劾善长而善长奴卢仲谦等复告善长与惟庸通赂遗交私语吉安侯陆仲亨家奴彭特穆尔等亦告仲亨及延安平凉南雄侯等皆与惟庸结党狱具坐以大逆会星变言者谓其占当移大臣遂赐善长死并杀其家属七十余人子祺尚临安公主免死徙江浦祺子芳茂以公主恩得不坐吉安侯陆仲亨延安侯唐胜宗平凉侯费聚南雄侯赵庸河南侯陆聚宜春侯黄彬豫章侯胡美荣阳侯郑遇春等皆同时坐惟庸党死帝条列其罪作奸党录布告天下明年虞部郎中王国用上言善长与陛下同心出万死以取天下勲臣第一生封公死封王男尚公主亲戚拜官人臣之分极矣藉令欲自图不轨尚未可知而今谓其欲位胡惟庸使善长佐惟庸事成不过勲臣第一而已寧复有加於今日且善长岂不知天下之不可幸取当元之季欲为此者何限莫不身为齑粉覆宗絕祀善长胡乃以衰倦之年身蹈之也凡为此者必有深讎急变人不得已或至相挟以求脱祸今善长子祺托陛下骨肉亲无纤芥嫌何苦而忽为此若谓天象告变大臣当灾杀之以应天象则尤不可臣恐天下闻之谓功臣如善长且如此四方因之解体也臣亦知善长已死言之无益愿陛下作戒将来耳帝覽之亦不罪也
彭特穆尔旧作封帖木今改】

秋七月崇明海门海溢

【诏遣官振之发民二十五万筑堤】

八月诏母以隸卒充选举

【诏凡选举毋録隶卒之徒】质实【按明洪武实録明史本纪俱作吏卒考选举志进士为一途举贡等为一途又有吏员承差知印诸杂流为一途所谓三途并进也不得云凡选举毋録吏矣按朱国桢大政记作隶卒合之选举志所云倡优之家不许入试者正相比附隶为人役讹作吏今从大政记作隶】

振河南山东北平水灾

【给钞七十万錠又振湖广灾凡钞二十二万余錠】

九月庚寅朔日有食之

冬十二月罢天下岁织文绮

【诏工部罢天下岁织段匹凡赏赉皆给绢帛如或匱乏就京织造工部尚书秦逵言造弓箭亦扰民帝命俱於京师後湖置局造之】质实【後湖一名元武湖在上元县北秦逵字文用宣城人】

【辛未】二十四年春正月免山东登莱青兗济南水灾田租【二月振高密栖霞莒州被水民万五千九百余户】质实【高密秦县明属胶州今属莱州府栖霞县金天会中刘豫析蓬莱县置明属登州府今因之莒州隋置明属青州府今属沂州府】

三月戊子朔日有食之

夏四月河决原武

【河水暴溢决原武黑洋山东经开封城北又东南由陈州项城太和颍州颍上东至壽州正阳镇全入于淮而贾鲁河故道遂於又由曹州鄆城漫东平之安山元会通河故道亦淤遣官振之】质实【黑洋山在原武县北二十里与阳武县接界项城隋县明属陈州今属陈州府太和宋置泰和县明改泰为太属颍州今属颍州府颍上隋县明属颍州今属颍州府正阳镇亦名东正阳在壽州西六十里与颍上县之西正阳镇夹淮相对贾鲁河故道元顺帝至正十一年以贾鲁为总治河防使自仪封县东北之黄陵冈南達曹县之白茅村攸于单县之黄固归德之哈只等口又自黄陵西至曹县杨青村凡疏凿二百八十里有奇河复故道曹州周曹国後周置州明属兗州府今升府鄆城隋县明属济寧州今属曹州府安山东平州西南三十五里有安山一曰安民山志云漕河西岸有安民山山下为安山湖湖濬洄百余里流入小洞庭湖仍合汶水亦名积水湖元会通河故道元世祖至元二十六年间会通河起安山西南山寿张西北至东昌又西北至临清引汶水以達御河长二百五十余里建插三十一以时蓄泄即今山东运河也贾鲁字友恒河东高平人】

封子十人为王

【?为庆王权寧王榷岷王榑谷王松韩王模藩王楹安王桢唐王栋郢王□伊王】质实【?帝第十六子介妃生封寧夏权第十七子杨妃生封大寧榷第十八子周妃生封岷州寻徙云南榑第十九子郭惠妃生封宣府松第二十子周妃生封开原模第二十一子赵妃生封潞州楹第二十二子母未详封平凉桢第二十三子李贤妃生封南阳栋第二十四子刘惠妃生封安陞□第二十五子葛丽妃生封洛阳】

秋八月命皇太子巡抚陕西

【帝念天下形势在西北欲徙都关中先遣太子相宅故有是命秦王檣闻帝欲徙都有怨言帝怒召至京錙之及太子还为之解明年令归藩】

九月倭寇雷州

【倭寇雷州遂溪县雷州卫百户李玉镇抚陶鼎战死事开皆官其子】质实【雷州唐置明府遂溪县唐置明属雷州府今皆因之】

冬十月以冯坚为金都御史

【坚南丰县典史上书言九事一曰养圣躬清心省事以为民社之福二曰择老成辅导诸王使正心直言以图匡救三曰务农讲武屯戍边圉以备不虞四曰精选有司旌别属吏使人勇於自治五曰褒祀典俾末俗有所兴劝六曰省?寺以防内权七曰调易边将以防外患八曰采廉能以惩贪墨九曰会关防以革奸弊书奏帝嘉之称其知时务達事变又谓侍臣曰坚言调易边将则未然边将数易则兵力勇怯敌情出没山川形势无以备知倘得赵充国班超者又何以数易为哉乃擢坚金都御史坚在院颇持大体寻卒于官】质实【南丰三国吴置明属建昌府今因之】

十一月皇太子还京师

【太子还上陕西地图遂病病中犹上言经略建都事】

【壬申】二十五年春正月河决阳武

【旁浸陈州中牟原武封邱祥符兰阳陈留通许太康扶沟杞十一州县诏免其租振贫民七万四千余口发民丁及安吉等十七卫军士修筑会冬大寒役遂罢】质实【通许宋镇金县太康隋县扶沟汉县明俱属开封府今因之安吉卫属河南都司後为通州卫亲军】

发明【上年河决原武全入于淮而贾鲁河及会通河故道皆淤至是再决漫州县十余为患大矣未闻讲求濬复之策冬寒罢役而明春不复修举非御灾勤民之道也至永乐九年会通河开而故道乃复】

前军都督金事何福讨都匀毕节诸蛮平之

【先是二十二年福平都匀蛮俘斩万计收降寨洞一百五十二处二十四年拜平羌将军讨越州叛蛮阿资破降之至是平都匀所部九名九姓及毕节诸蛮毕节复叛大掠屯堡百户宋礼曲通皆战死福檄後军都督金事茅鼎等捣其巢禽叛酋戮之分兵捕诸蛮建堡设戍】质实【都匀本都云蛮元置都云军民府明改都匀卫弘治二年置府今因之九名九姓苗种元独山州长官司明改九名九姓独山州长官司弘治八年升为州属都匀府今因之何福凤阳人】

宥死囚输粟北边

【见系死囚贷之令还鄉里备贖输粟北边赎罪於是重囚得宥死者四百四十八人】

夏四月皇太子标卒

【帝御東角門召對羣臣慟哭曰太子不幸至此古云國有長君社稷之福朕意欲立燕王何如學士劉三吾進曰皇孫世嫡承統禮也即立燕王置泰晉二王於何地帝立孫之意遂決八月祔葬孝陵東諡懿文太子初師事宋濂通經史大義帝命裁決庶務寬仁平敏於刑獄多所減省天性友愛秦周諸王數有過輒調護之使歸國或告晉王有異謀帝大怒太子巡陝西還偕之至京為涕泣以請帝意解王亦更以慎聞】質實【劉三吾名如孫以字行茶陵人】

建昌衛指揮使伊魯特穆爾叛命藍玉討誅之

【伊魯特穆爾合德昌會川迷易栢興邛部諸番攻建昌轉攻蘇州玉遣指揮瞿能討之至雙狼寨擒其將賊衆大潰伊魯特穆爾遁能督兵追捕進至打冲河又敗之伊魯特穆爾走栢興州玉遣百戶毛海誘縛其父子送京師誅之盡降其衆會川土官知府王春作亂千戶劉成戰死指揮僉事俞輔擊降之】質實【德昌元路明千戶所在建昌衛南一百四十里今置巡檢隸西昌縣會川元路明改衛今為會理州屬寧遠府迷易明千戶所屬建昌衛後屬會川衛在衛西北八十里今置巡檢隸會理州栢興元栢興府明初因之尋改為州後改鹽井衛今鹽源縣屬寧遠府邛部後周置郡南詔為邛部州元州隸建昌路明改越嶲衛今越嶲廳屬寧遠府蘇州本漢蘇示縣地元置蘇州明改衛今為冕寧縣屬寧遠府雙狼寨一作雙浪寨在西昌縣水砦關西北打冲河在寧遠府西源出吐蕃蠻名黑惠江又名納夷江下流至會理州合金沙江瞿能合肥人伊魯特穆爾旧作月魯帖木儿今改】

六月西平侯沐英卒

【英沉毅寡言笑好賢禮士抚卒伍有恩未嘗妄杀在滇百务具举简守令课农桑垦屯田百余万亩滇池溢浚而广之通盐井之利以来商旅疏节濶目民以便安帝尝曰使我高枕无南顾之忧者英之功也及是卒年四十八远夷皆为流涕追封黔寧王諡昭靖】

秋七月高麗李成桂逐其君瑤而自立

【成桂在國威權日盛瑤雖為所立慮禍必將及已與近臣圖之事泄成桂遂逐瑤而自立瑤出居原州王氏自五代後唐時得國傳四百數十年至是絕成桂尋以國人表請命帝以高麗僻在海隅非中國所治詔聽之既又請更國號帝命仍古號曰朝鮮】質實【原州隸江原道在朝鮮國城東面】

改詹事院為府

【先是東宮官多以大臣兼領十五年更定左右春坊官各置庶子諭德中允贊善司直郎又各設大學士尋定司經局官設先馬校書正字二十二年以官聯無統始置詹事院至是改院為府設詹事及少詹事等官】質實【詹事一員正三品少詹事二員正四品左右春坊大學士庶子俱正五品諭德洗馬從五品中允正六品贊善從六品校書正九品二十九年增設清紀郎司諫通事舍人】

甯岢岚州学正吴从权山陰县教谕张恒于远方【从权恒给由至京帝召问氏间疾苦从权恒皆言职在课士民事无所知帝曰宋胡瑗教授苏湖设经义治事二斋兵农水利无不兼之当时得人称盛尔二人既不通世务罔识民情则平口所教何事生徒中纵有人材亦为尔辈所坏矣命甯之远方且榜示天下学校以为鉴戒】质实【山陰县金置明属应州今属大同府给由明史职官志凡内外官给由吏部考功司掌之三年初考六年再考并引请九年通考奏请综其称职平常不称职而陟黜之】

八月给公侯岁禄

【初帝赐勲臣公侯丞相以下庄田多者百顷又赐诸武臣公田以其租入充禄勲臣庄佃多倚威干集帝每召诸臣戒谕之至是给岁禄归赐田于官】

九月立孙允炆为皇太孙

【允炆太子第二子也既立为太孙帝命裁决庶务宽厚如太子缘其意而有加焉中外颂德帝尝大怒有所诛谴退朝太孙进曰如得其情哀矜勿喜是或一道也帝意解逡者获盗七太孙目之言于帝曰六人者盗其一非是讯之果然帝问何以知之对曰周礼听狱色听为先此人眸子了然顾视端详必非盗也帝喜曰治狱贵通经信然】

诏求精晓历数之士

【其数往知来试无不验者爵封侯山东国子生周敬心上言臣闻国祚修短在德厚薄不在历数陛下但当修德皇祚自传万世何必问诸小技之人又言陛下连年北征臣民皆以为欲得传国宝臣闻传国宝出自楚平王秦始皇名之曰玺石敬瑭乱潞王携以自焚则秦玺固已毁矣敬瑭更以玉制昔王入辽辽亡遗於桑乾河元世祖时扎拉尔者渔而得之今元人所挟石氏玺耳易曰圣人之大宝曰位何以守位曰仁是仁乃人君之宝玉玺非宝也昔者三代圣王不知有玺天下治安享国长久秦始制玺不旋踵而亡陛下奈何忽大玺而求小玺耶又言方今户口虽多而劳民者衆仓廩虽实而民穷者多教化传而民不悦法度严而民不从昔汲黯言於汉武帝曰陛下内多欲而外施仁义奈何欲效唐虞之治乎今国则愿富兵则愿强土地则愿广人民则愿衆于是多取军卒广积税粮征伐不休营造无极如之何其可治也又言洪武十二年钦録天下官吏十三年连坐胡党十九年逮官吏积年为民害者二十三年大戮京民妄立罪名不分臧否岂无善良偶入诬误之中者昔汉时误杀一孝妇东海枯旱三年方今四海水旱未臻大稔未必不由杀戮无辜感伤和气之所致也疏入报闻】质实【扎拉尔元穆呼里氏也穆呼里曾孙硕迪已死而贫其妻出玉玺一鬻之或以告御史中丞崔或或召秘书监丞杨桓辨其文曰受命于天既壽永昌传国玺也献之故太子妃鸿吉哩氏时世祖方晏驾妃手以授于成宗桑乾河源出山西马邑县北山下东流经山阴县应州大同府阳高县天镇县界又东经直隶西寧县南蔚州北又东经宣化县南界又东经保安州南与洋河会又东南入宛平县界为永定河即古湿河也
扎拉尔旧作札刺尔硕迪旧作硕德鸿吉里旧作弘吉烈今并改】

发明【天难谶命靡常岂术数之学所能窥测哉睦孟京房於汉何补唐太宗得秘讖书言唐中弱有女武代王遂以武卫将军李君茨小字五娘疑而杀之不知才人武氏早已入宫故李淳风以为多杀无辜不能违也明祖过举闻敬心谦言可以悟矣】

以方孝孺为汉中教授

【孝孺少好学恒以明王道致太平为己任十五年以吴沈荐召见帝喜其举止端整谓太子曰此庄士当老其才礼遣还至是又以荐召至帝曰今非用方孝孺时除汉中教授蜀王椿闻其贤聘为世子师名其读书之庐曰正学】质实【方孝孺字希直一字希古寧海人克勤之子】

冬十二月徵安陆知州余彦诚下吏寻释之

【彦诚以徵税愆期逮州民杨么等伏阙乞留帝赐宴遣还么等亦赐宴时帝操重典绳羣下守令坐小过辄逮系其部民走阙下乞留旋遣还且加赏赉有因以超擢者】质实【余彦诚德兴人】

【癸酉】二十六年春二月凉国公蓝玉以罪诛

【玉有勇略敷总大军多立功帝遇之厚寢骄蹇自恣多蓄庄奴假子乘势渔猎尝占东昌民田御史按问玉捶逐御史北征还夜叩喜峯关閤吏不即纳玉纵兵毁关入帝闻之不乐又有言其私元主妃者镌其过于券玉犹不悛及西征归以玉兼太子太傅而冯胜传友德俱兼太子太师玉攘袂大言曰我固不当为太师耶比奏事多不听益怏怏语所亲曰上疑我矣至是锦衣卫指挥蒋瓛告玉谋反廷鞫之狱词云玉与鹤庆侯张翼普定侯陈桓景川侯曹震舳舻侯朱壽东莞伯何荣及吏部尚书詹徽户部侍郎传友文等谋为变将伺帝出籍田举事狱具族诛之列侯以下坐党夷灭者万五千人於是元功宿将相继尽矣 玉常遇春妻弟懿文太子元妃常氏遇春女也玉初征纳充楚还言於太子曰臣观燕王在国陰有不臣心又闻望气者言燕有天子气殿下宜审之燕王闻而衔之及太子卒燕王来朝帝问曰民间近谓朕若何对曰诸公侯纵恣无度不诛将有尾大不掉忧帝由此愈疑忌功臣王归不数月而玉祸作】质实【张翼临淮人陈桓濠人何荣真之子詹徽资险刻李善长死有力焉从懿文太子録囚太子多所舍徽必入之以语上上怒太子坐病悸曰死我者詹徽及从太孙録玉玉不服徽叱曰速吐实毋徒株连人玉大呼徽即臣党猝徽下断手足戮之见臣林记】

发明【燕王请诛功臣以逞私志适当帝猜忌之时故其言易入蓝玉之罪虽由自取而蔓延之诛未免太甚其後燕师起而元功宿将尽矣李九江輩何能为役哉】

三月命晋王櫓燕王棣节制山西北平军事

【诏二王军中事大者方以闻宋国公马胜颍国公传友德并受节制】

夏四月诏有司振饥毋俟报

【谕户部曰戚荒民饥必候奏请道途往返远者动经数月民之饥死者多矣凡遇岁饥慰以奏】

旱诏羣臣言事理狱囚

【帝以雨泽愆期命礼部令天下郡县以雨泽之数闻】

秋七月甲辰朔日有食之

九月以郑齐为左庶子王勲为右庶子

【初东宫官属缺命廷臣举孝义笃行之士工部尚书严震直以浦江郑氏对帝曰朕素知郑更闻其里王氏力行郑氏家法可用以励天下乃徵两家子弟年三十以上者诣阙令自推举郑氏举济王氏举勲遂并拜官】质实【浦江唐析义乌兰溪富阳三县地置浦阳县吴越改浦江明属金华府今因之郑济濂之弟王澄浦江人慕义门郑氏风将终集子孙海之曰汝曹能合食同居如郑氏吾月瞑矣子孙拜受教澄之子子觉子麟子伟承父志子觉生应为郑济所举授参议子伟生勲义门王氏之名遂埒郑氏严震直字子敏乌程人】

冬十二月户部奏是岁天下户口之数

【户一千六百五万二千八百六十口六千五十四万五千八百十二】

【甲戌】二十七年春正月发天下预备仓谷贷贫民

【先是命户部遣耆民於各郡县籴谷置仓储之民间委富民守视以备荒歉议省以粟藏久致腐宜贷於民而收其新者於是遣使给贷之】

三月命工部藏兵甲

【帝以四方底定命工部收兵甲裹而藏之示勿复用】

秋八月遣使修天下水利

【帝谕工部湖堰坡塘可蓄泄以备旱涝者皆因地势修治之乃分遣国子生遍诣天下督修水利凡开塘堰四万九百八十七处】

九月命礼部定旌表例

【日照县民江伯儿母病割脇肉以疗不愈祷岱岳祠誓杀子祀神已而母病愈竟杀其三子山东守臣以闻帝怒曰父子天性小民无知灭伦害理亟宜治罪遂逮伯儿杖之百遣戍海南因下礼官定旌表孝行例尚书任亨泰议曰卧冰割股事非恒经割股不已至于割肝割肝不已至于杀子违道伤生莫此为甚堕宗絕祀不孝之大宜严行戒谕倘愚民遇父母有疾医治弗愈无所控诉不得已而割股卧冰亦听其所为不在旌表之例诏曰可】质实【日照县金置明属青州府今属沂州府任亨泰襄阳人】

修寰宇通衢书成

【帝命儒臣以天下道里之数编类为书其方隅之目有八东距辽东都司东北至三万卫西极四川松潘卫西南距云南金齿南踰广东崖州东南至福建漳州府北暨太平大寧卫西北至陕西甘肃纵一万九百里横一万一千七百五十里四裔之驿不与焉】

冬十一月赐颍国公傅友德死

【友德身冒百死自偏裨至大将每战必先士卒以故所至立功二十五年友德请怀远田千亩帝不悦曰禄赐不薄矣复侵民利何居尔不闻公仪休事乎及是竟赐死久德与蓝玉先後同统兵有功王诛友德内惧定远侯王弼谓曰上春秋高旦夕且尽我辈奈何帝闻之未几弼亦赐死】质实【怀远宋置军元改县明县属凤阳府今因之】

【乙亥】二十八年春正月西平侯沐春讨越州蛮平之【越州蛮阿资恃险屡叛春与都督何福率师营越州城北伏精兵道左以羸卒诱贼贼悉衆出伏起大败之阿资亡山谷中春詗知所在树垒断其粮道已出不意捣其巢遂禽阿资斩之得具党越州平】

二月赐宋国公冯胜死

【胜自金山归不复将大兵二十五年命与傅友德练军山西帝春秋高多猜忌胜功最多数以细故失帝意蓝玉诛之月与友德自山西召还胜尝筑稻塲瘞觚其下以碌礪碾之取其鞮鞢声走马其旁以为乐有樊父者胜兄国用妻家也有所干索於胜胜不予樊父遂告胜家居不法塲下悉瘞兵器帝召胜赐之酒是夕暴卒诸子皆不得嗣】质实【觚小甕也】

秋八月命都督杨文等讨龙州奉议诸蛮

【龙州土司也洪武初其酋赵帖坚归附诏以为知州许世袭二十一年帖坚死无子从子宗壽当嗣会常茂以罪戍州帖坚妻黄以爱女予茂为小妻擅州事茂病死黄与宗壽相告讐帝以远人释不问宗壽卒得嗣已而或构蜚语言茂匿龙州实不死宗壽知状帝怒命宗壽捕茂并谕都督府檄宗壽诣阙宗壽惧迁延不敢出广西守臣奏宗壽抗命且言奉议诸蛮皆梗化乃以文为征南将军指挥使韩观都督佥事宋晟为副发江西湖广诸卫兵讨之复命致仕尚书唐铎往谕宗壽文等师未至铎还奏茂实死宗壽亦伏罪请朝乃罢征龙州令文等移师

讨奉议诸蛮平之】质实【奉议州宋置明改卫今仍为州属广西镇安府韩观字彦宾虹县人宋晟字景阳定远人唐铎凤阳人】

信国公汤和卒

【和前有酒过守常州时请事不得醉出怨言曰吾镇此城如据屋脊坐左顾则左右顾则右帝闻而衔之镌其过於铁券晚年益为恭慎入闻国谕一语不敢外泄当时公侯诸宿将先後丽法稀得免者和独享壽考以功名终卒年七十追封东瓯王諡襄武】

九月免山东秋粮

【以供给辽东山西平军需诏蠲其租又免应天等五府秋粮】

颁皇明祖训

【初帝命儒臣编祖训錄其目十有三曰箴戒持守严祭祀谨出入慎国政礼仪法律内令内官职制兵卫营缮供用六年书成帝自为之序命大书揭於右顺门内西南乡下帝覽损益至是更定名曰皇明祖训颁示内外诸司谕曰後世有敢言更制者以奸臣论毋赦】

【丙子】二十九年春二月命燕王棣帅师巡边

【寧王权言近者骑兵巡塞见有脱辐遗於道上恐有边警帝乃命燕王棣选精骑巡大寧全寧沿河南北踪迹所在掩击之】

三月败元兵於察察尔山又追败之於乌梁海图城而还

【棣至察察尔山遇元兵大败之禽其将布琳特穆尔等数十人追至乌梁海图城遇哈拉固义战败之遂旋师】质实【察察尔山方輿纪要云在大寧卫北 察察尔山旧作彻彻儿山布琳特穆尔旧作李林帖木儿图城旧作秃城哈拉固旧作哈刺兀今并改】

定孔子庙从祀

【帝以行人司副杨砥言去杨雄进董仲舒】质实【杨砥字大用泽州人】

秋八月免应天五府田租

【诏免应天太平寧国广德镇江五府租以酬民劳】

杀监察御史王朴

【朴性鯁直数与帝辩是非帝怒命戮之及市召还谕曰汝其改乎对曰陛下不以臣为不肖擢官御史奈何摧辱至此使臣无罪安得戮之有罪又安用生之臣今日愿速死耳帝大怒趣命行刑过史館大呼曰学士刘三吾志之某年月日皇帝杀无罪御史朴也竟戮死】质实【王朴同州人本名权帝为改焉】

九月大赉致仕武臣

【凡二千五百人悉召入朝大赉之各晋秩一级】

【丁丑】三十年春二月白虹亘天贯日

三月荧惑入太微八十日

刑部请加叛逆法不许

【刑部署尚书夏恕都察院署左佥都御史司中等奏请加叛逆法以汉法反者夷三族宜改大明律依汉法不分异姓同居三族皆坐帝曰古者父子兄弟罪不相及汉用秦法故谋反逆者皆夷三族其法太重明刑定律务在公平加之於人虽死不怨传之後世必不能有所变更恕等固请帝不允但令如律】质实【夏恕洛阳人】

夏五月壬子朔日有食之

命楚王桢湘王栢帅师讨古州叛蛮

【先是古州蛮林寛作乱攻陷龙里守将千户吴得镇抚并孚杀贼数十人战死事闻诏赠得指挥佥事孚正千户以湖广都指挥使齐让为平羌将军讨之既而寛犯新化攻平茶千户纪逵突阵手杀数人流矢中臂拔之复战贼大惊曰是平茶纪蒙耶蛮呼官为蒙乃遁帝命楚王桢帅师湘王栢副之由黔阳辰溪进剿二王不临军而请饷三十万帝屡诘责之以让逗遛不进命都督杨文充总兵官往代文未至让俘寛以献帝卒诛让命文讨寛余党悉平之时贵州水西土酋居宗必登等亦叛帝命顾成会何福等讨之成击斩数千人以计禽其党卜刺赞射杀阿火者居宗必登覆絶远遁水西平】质实【龙里元寨明置蛮夷长官司今司属贵州黎平府新化明初置长官司永乐中设府宣德中府废仍为长官司今司属黎平府平黎明守御所今废故城在黎平府东黔阳宋县明属沅州今属沅州府辰溪隋县明属辰州府今因之吴得全椒人并孚盱眙人】

六月策试礼部下第举人

【初制礼闈取士不分南北是春考官学士刘三吾纪善自信蹈榜发宋琮等五十二人皆南士廷试擢陈?第一诸生上言考官南人私其乡帝怒命侍读张信等覆閱下第卷得六十一

人以进不称旨或又言三吾信?嘱信等故以陋卷呈帝益怒自閱卷取任伯安等六十一人皆北士廷试擢武城人韩克忠第一信蹈及信等论死三吾以老戍边时谓之南比榜又曰春夏榜云】质实【武城本汉县隋改清河县别置武城於古夏城宋大观中河决移今治西至清河县六十里明属高唐州今属东昌府宋琮泰和人善易学授检讨语人曰翰苑有厄吾其窜乎既而考官祸作琮亦遣戍复起刑部检校乡人杨士奇辈贵显琮无所攀援宣德中犹以检讨掌助教事卒官陈?闽县人张信定海人任伯安题名録作伏伯安归德人】

秋八月河决开封

【城三面受水诏改作仓库於荥阳高阜以备不虞冬蔡河徙陈州先是河决由开封北东行至是下流淤又决而之南】质实【蔡河一曰沙河在开封城东南自汴河分流至鹿邑县合颍水其在陈州东曰百尺沟是年大河南决拥蔡水入陈州而蔡河之流渐絶】

沔县吏高福兴作乱命征西将军耿炳文讨诛之【先是正月福兴及县民田九成僧李普治谋为乱教谕王朴知之言於汉中卫卫发兵捕普治?之次阳平关之土门贼大集逆战官军败贼遂入畧阳杀知县吕昌焚徽州杀学正顔叙彬陝蜀番民皆响应炳文时练兵陝西帝命移兵讨之?文驻文县遣将分道追剿至是福兴就禽并获其党悉诛之宥胁从者为军凡四千余人】质实【阳平关在宁羌州东北九十里】

九月平缅甸刀斡孟遂其宣慰使思伦发诏沐春讨之【平缅俗不好佛会有僧自云南至思伦发尊信之又有金齿戍卒逃入其境思伦发喜其技能俾系金带与僧俱位部长上部长刀干孟怒遂叛攻腾冲思伦发走云南沐春送至京师帝悯之命春与何福等讨干孟遣思伦发还谕春先以兵送之金齿檄干孟来迎不应明年遣何福等将兵五千踰高良公山直捣南甸大破之斩其酋刀名孟回军击景罕寨贼凭高坚守官兵粮且尽福告急春帅五百骑救之乘夜渡潞江破之乘胜击破崆峒寨干孟乞降帝不许】质实【腾冲唐白蛮所居号腾冲府元改腾越府明洪武末改腾冲守御千户所嘉靖二年改腾越州属永昌府今因之高良公山亦曰高黎共山一名崑仑冈在腾越州东北一百二十里蒙氏僭封西岳南甸元路明改府又改州正统时为宣抚司今属永昌府景罕寨在永昌府潞江安抚司西南路江在潞江安抚司东北五十里亦曰怒江以波涛汹涌故名源出吐蕃南流又东经永昌府界下流至缅甸入南海蒙氏僭封四渎之一崆峒寨方輿纪要云在潞江安抚司境】

【戊寅】三十一年春二月倭寇山东浙江

【倭寇山东寧海州百户何福战死杀镇抚卢智寧海卫指挥陶铎击败之浙江都指挥言倭贼二千余入寇海澳寨楚门千户王斌镇抚袁润等皆战死诏发兵出海追捕】质实【寧海州金天会中刘豫置寧海军大定中升州明属登州府今因之寧海卫在州西海畧镇在寧海县南一百里旧作铁塲於此楚门台州府太平县西南有灵山与玉环山相接其峡如门名楚门港海舶由此出入楚门千户所明置在太平县西南六十里何福与前军都督同姓名】

夏五月帝不豫

【临朝决事如平时】

命都督杨文从燕王棣武定侯郭英从辽王植备边开平俱听燕王节制

【勅杨文总北平都司行都司并燕谷寧三府护卫随燕王郭英总辽东都司并辽府护卫随辽王驻开平防边俱听燕王节制】

发明【考明太祖实録是年四月乙酉勅燕王防秋五月甲寅帝不豫戊午勅杨文郭英乙亥再勅燕王节制诸军又云遣中使持符召燕王还京至淮安用事者矫诏却还成祖实録云太祖不豫遣中官召上已至淮安太孙与齐泰等谋诈令人齎勅符令上归国云云所谓勅符即此勅也按太祖实録重修於永乐中凡所云帝欲立燕王者已不可尽信而成祖实録则於建水之间更多诬辞不足为信史也洪武二十八年秦王棣卒是年三月晋王櫓卒燕虽势居宠偏然节制之命岂足以为易储之据哉】

闰五月帝崩

【乙酉帝崩於西宫年七十有一遗诏皇太孙允炆仁明孝友天下归心宜登大位诸王临国中毋至京师天下臣民临三日皆释服无妨嫁娶】质实【按明太祖实録闰五月丙子朔乙酉十日也】

太孙允炆即位

【以明年为建文元年】

诏行三年丧

【羣臣请以日易月帝曰朕非效古人亮陰不言也朝则麻冕裳退则齐衰杖经食则饘粥郊社宗庙如常礼遂命定仪以进】

葬孝陵

【辛卯葬孝陵距崩七日遵遗诏也諡曰开天行道肇祀立极大圣至神仁文义武俊德成功高皇帝庙号太祖时诸王尚未闻丧遂投遗诏止母会葬】

【明史赞曰太祖以聪明神武之资抱济世安民之志乘时应运豪杰景从戡乱摧强十五载而成帝业崛起布衣奄莫海宇西汉以後所未有也惩元政废弛治尚严峻而能礼致者儒考礼定乐昭揭经义尊崇正学加恩胜国澄清吏治修人纪崇风教正後宫名义内治肃清禁

宦豎不得干政五府六部官職相維置衛屯田兵食俱足武定禍亂文致太平太祖實身兼之至於雅尚志節听蔡子英北歸晚歲忧民益切嘗以一年間支河暨塘堰數萬以利農桑備旱潦用此子孫承業二百余年士重名義閭閻充實至今苗裔蒙澤尚如東樓白馬世承先祀有以哉】

詔文臣五品以上及州縣正官各舉所知

【非其人者坐之】

六月省并州縣汰冗員

質實【建文初所汰冗員見於革除編年者有革都察院司獄四員革天下陰陽醫學革建昌府盱江遞運所南城县藍田巡檢司又革鳳陽開封懷慶平陽等府屬遞運所凡數十處省左右布政司一員革五軍都督府斷事官革夔州府大昌縣省衛輝府胙城县訓導二員省永州府江華縣縣丞主簿各一員革各府照磨所檢校司獄省廣州府連山县以其地入連州等甚詳宪章錄載有革略阳县革南丹卫附庆远省兴济县入青县省翁源县入英德省保昌县省忻城县入东兰省沔县入褒城省两当县入徽州省?城县】

戶部侍郎卓敬請徙封燕王棣於南昌不聽

【敬密疏言燕王智慮絕人酷類先帝北平形勝地士馬精強金元所由興也宜徙封南昌萬一有變亦易控制奏入翌日帝召謂敬曰燕王朕骨肉至親卿何得及此敬叩頭曰臣所言天下大計愿陛下察之帝曰卿休矣事竟寢】質實【南昌唐南昌軍南唐升府明初曰洪都府尋復南昌府今因之】

召方孝孺為翰林院侍講

【帝在東宮時素聞孝孺賢及即位自漢中馳騾召至日侍左右備顧問帝好讀書有疑即使讲解臨朝奏事臣僚面議可否或命孝孺就展前批荅之】

以齊泰為兵部尚書黃子澄為太常寺卿參預國事【泰為兵部侍郎習邊事太祖嘗問邊將姓名泰歷數無遺又問諸圖籍出?中手冊以進簡要周密大奇之子澄先以修撰充東宮伴讀帝為太孫時嘗坐東角門謂曰諸王尊屬擁重兵多不法奈何對曰諸王護衛兵僅足自守倘有變臨以六師其誰能支漢七國非不强卒底?亡順逆之禮異也至是遂命子澄兼翰林學士與秦同參國政時燕周齊湘代岷諸王相煽動流言聞於朝帝謂子澄曰先生憶昔東角門之言乎對曰不敢忘】質實【齊秦初名德賜名泰溧水人】

秋七月長星西隕

【有声如雷诏行宽政赦有罪蠲逋税】

周王橐有罪废为庶人

【橐子有?告橐谋不轨辞连燕齐湘三王齐泰与黄子澄谋泰欲先图燕子澄曰不然周齐湘岷诸王在先帝时多不法今告变者已在周矣莫若先取之周燕之母弟消周是剪燕手足也谋定入白帝遂命曹国公李景隆以备边为名猝至开封围王宫执之以归帝欲释之泰子澄不可未决出相语曰上妇人之仁耳事势如此安可不断明日复言之乃废橐为庶人窜蒙化诸子皆别徙已复召还京锢之】质实【蒙化元置府寻升路降州明初因之属大理府正统间升府今改云南直隶厅李景隆文忠子小字九江】

八月诏天下卫所军单丁者放为民

西平侯沐春卒于军

【春在镇七年大修屯政辟田三十余万亩凿铁池河灌宜良涸田数万亩民复案者五千余户至是卒年三十六无子弟晟嗣诏何福领其众】质实【铁池河一名大池江一名盘江在宜良县东八十里源自曲靖府陆良州流入境至铁池铺入山峡数十里入澂江府界谓之铁池河宜良县元置明属云南府今因之】

冬十月荧惑守心

【诏求直言举山林岩穴怀才抱德之士壽州学训导刘亨言六卿秩卑於五府当并为一品国子祭酒师表天下士位不当在太仆下诸将子弟宜设武学教以事上使下之道帝嘉纳之擢武进县丞於是苏州府知府姚善荐钱芹授户部司务又郑恕楼璉郑楷皆以荐擢用】质实【武进县孙吴改丹徒曰武进明为常州府附郭县今因之刘亨字嘉会庐陵人燕王立罢归屡荐不出姚善字克一安陆人钱芹字继忠吴县人善迎芹上座质经义芹曰非今所急也授以一册皆守御策郑恕仙居人楼璉金华人成祖既杀方孝孺以草诏属侍读楼璉璉不敢辞归语妻子曰我甘死恐累汝辈耳其夕自经死或曰草诏乃栝苍王景又曰无錫王達郑楷浦江人】

前都督府断事高巍上书言时政

【巍在洪武时侍母萧氏疾以孝行旌由太学生试前军都督府左断事寻谪戍贵州及帝即位赦还辽州知州王钦辟巍应诏时用事者方议削诸蕃巍独上书请加恩畧曰高皇帝分封诸王比之古制既皆过当诸王又率多骄逸不法违犯朝制不削则纪纲不立削之则伤亲亲之恩贾?曰欲天下治安莫如衆建诸侯而少其力今盍师其意勿行鼂错削夺之谋而效主父偃推恩之策在北诸王子弟分封於南在南子弟分封於北如此则藩王之权不削而自削矣臣又愿益隆亲亲之礼岁时伏腊使人馈问贤者下诏褒赏之骄逸不法者初犯容之再犯

赦之三犯不改则告太庙废处之岂有不顺服者哉帝颇嘉之不能用及燕兵起命从李景隆出师参赞军务巍复上书请使燕令休兵归藩代朝廷十万师帝壮其言许之巍至燕自称国朝处士上书燕王极陈祸福具言大丧未终毒兴师旅其舆夷齐泰伯让国求仁之义不大径庭乎虽大王有肃清朝廷之心天下不无篡夺嫡统之议即幸而不败谓大王何如人哉书屡上不报已而景隆兵败遂自拔南归】质实【断事职官志洪武十七年五军都统府各设左右断事秩从五品寻升正丘品建文中革辽州隋置明直隶山西布政司今因之高巍辽州人】

颁示御史尹昌隆谏疏於天下

【帝有疾晏朝昌隆疏谏畧曰昔高皇帝鸡鸣而起昧爽而朝百官成惧不敢稍怠陛下嗣膺大业宜追绳祖武未明求衣日旰忘食今乃即於晏安日上数刻犹未临朝恐自此上下懈弛旷职废业非社稷福也左右请以疾谕之帝曰直谏难得何可沮也其以疏宣示天下使咸知朕过】质实【尹昌隆字彦谦泰和人】

发明【有疾而晏朝御史谏而宣其疏可谓勉於劝言矣然明年昌隆即以抗疏谪福宁知县则帝亦好名而非有改过迁善之实也厥後燕王入捕昌隆等为奸党同驱就戮昌隆当陞大呼曰臣曾上章劝以位让陛下奏牍尚在可覆按也将贷死改官昌隆以刚直自负卒被吕震之譖竟夷其族惜乎其死之不早耳】

十二月赐天下明年田租之半

都督何福禽刀干孟斩之

【沐英既卒贼复怀贰福率兵讨之禽斩刀干孟思伦发始归平缅】

以张昺为北平布政使谢贵张信为北平都指挥使【自帝为太孙中外属望独燕王棣心不平常怀窥觊及即位削藩议起僧道衍劝棣为逆棣曰民心向彼奈何道衍曰臣知天道安问人心乃进相士袁珙及卜者金忠自是棣陰事一切与道衍谋棣居元故宫称疾不出道衍练兵後苑穴地作重屋周缭厚垣密甃瓴甌瓦缶日夜铸军器畜鹅鸭乱其声久之事益露上变者日甚帝问齐泰黄子澄子澄曰先发者制人请讨之泰曰今方有边报但当以防边为名发军戍开平护卫精锐悉调出寨羽翼既除虽欲为变不能矣帝然之乃更置守臣以工部侍郎张昺为北平布政使谢贵张信为北平都指挥使并受密命伺察燕事寻命都督宋忠悉兵屯开平以燕护卫卒隶之又调北平二卫於彰德诸处】质实【张昺泽州人谢贵木阳所自洪武时官锦衣卫指挥僉事降河南卫指挥僉事张信临淮人袁珙鄞县人善相术棣召见谛视曰太平天子也年四十须过脐即登大宝矣已见藩邸诸校卒皆许以公侯将帅棣益自喜逆谋遂决金忠鄞县人宋忠未详何许人洪武时官锦衣卫指挥使】

御定资治通鉴纲目三编卷三

卷四

<史部,编年类,御定资治通监纲目三编>

钦定四库全书

御定资治通监纲目三编卷四

【起己卯明惠帝建文元年尽壬午明惠帝建文四年】凡四年

【己卯】恭闵惠皇帝建文元年春正月修太祖实录

【帝受朝不举乐诏修太祖实录以礼部左侍郎兼翰林院学士董伦右侍郎兼翰林院学士王景彰为总裁官太常寺少卿廖昇侍讲学士高逊志侍讲方孝孺副之修撰李贯国子监博士王绅汉中府教授胡子昭教授杨士奇训导罗恢吏目程本立等死编纂官】质实【董伦字安常恩县人王景彰名景以字行松阳人廖昇襄阳人李贯吉水人王绅字仲缙金华人禕之子胡子昭字仲常嘉定州荣县人杨士奇名寓以字行泰和人州荐徵授教授当行修撰王叔英复以史才荐遂召入翰林充编纂官罗恢崇仁学训导程本立字原道崇德人周府长史坐累谪云南马龙他郎甸长官司吏目迁右佥都御史】

二月追尊皇考曰孝康皇帝

【庙号兴宗妣常氏为孝康皇后】

尊母吕氏为皇太后

质实【皇太子妃吕氏壽州人太常卿本之女】

立妃马氏为皇后子文奎为皇太子

质实【皇后马氏光祿少卿全之女文奎皇后生七岁燕师入莫知所终】

封第三人为王

【允熲为吴王允熒衡王允熙徐王俱不之藩】

诏诸王毋得节制文武吏士

【太祖遗诏王国所在文武吏士听朝廷节制故申是命】

更定官制

【用方孝孺等议内外品官阶勲悉仿周礼更定又撰礼制颁行天下然无济实事徒为燕王棣藉口】质实【成祖实录洪武三十五年吏部言建文改旧官制如六部尚书旧正二品陞正一品又增设侍中二员正二品所属诸司旧有清吏二字皆除去户刑二部属旧皆十二司改为四司工部增设照磨所兵部旧设典牧所户部设赃罚库皆革罢都察院改为御史府旧设十二道改为左右两院御史止设二十八员改通政使司为通政寺旧设通政使左右通政左右参议改为卿少卿丞翰林院官旧设学士及侍读学士侍讲学士其侍读侍讲五经博士典籍侍书待诏为属官修撰编修检讨为史官孔目为首领官中书舍人旧在内府别有印信于翰林非统属建文于翰林增设正官学士承旨一员在学士之上又改侍读学士侍讲学士俱为文学博士设文翰文史二馆文翰馆以居侍读侍讲侍书五经博士典籍待诏其侍书五七品文史馆以居修撰编修检讨改孔目为典簿创典簿厅条记而革中书舍人改为侍书以隶翰林又增设文渊阁待诏及拾遗补阙革罢五军断事五军制禄仓革罢大理寺左右寺寺正寺副增置本寺首领官典簿及太常寺赞理郎二员太祝一员光禄寺少卿旧五品陞四品寺丞旧六品陞五品又增设监事及司圃所改司牲司为孳牲司陞其品级太仆寺寺丞旧六品陞五品又改其首领官职名而陞其品级及增设录事及典廩典牧二署驩驩等十八羣滁阳等八牧监龙光等九十二羣官鸿胪寺少卿旧从五品陞正五品寺丞旧从六品陞正六品又改其首领官职名亦陞品级革罢司仪司宾二署而陞其鸣赞序班品级行人司旧别有衙门印信于鸿胪寺非统属革罢行人司而以行人隶鸿胪寺陞国子监丞为堂上官革罢学正学录增设钦天监五官监候增设选士院及应天府知候所改五城兵马司指挥副指挥为兵马副兵马陞各卫经历品级又增设知事增设旗手等四十四卫武学及置锦衣卫带管优给武学所教授增置各王府宾辅伴讲伴书各布政使司布政使旧从二品陞正二品参政旧从三品陞正三品参议旧从四品陞正四品改各处提刑按察司为肃政按察司并请复旧制又兵部言建文中改浠阳左卫为衡山护卫右卫为临安护卫遂命凡天下军卫建文所改革者悉复其旧按所载建文朝更改官制最核故详录之】

三月命刑部尚书暴昭户部侍郎夏原吉等充采访使分巡天下

【使凡二十四人敕獎廉平黜贪墨便宜行事昭至北平得燕王棣诸不法状密奏之请预为备】质实【暴昭潞州人夏原吉字维喆其先德兴人徙湘陰】

京师地震

【诏求直言御史尹昌隆言奸臣专政陰盛阳微谪见於天是以地震谪福宁知县寻召还官】

夏四月湘王柏自焚死齐王榑代王桂有罪废为庶人【柏膂力过人握刀槊弓矢驰马若飞至是有告其反者帝遣使即讯柏惧焚其宫室弯弓跃马投火中死榑数历塞上以武功自喜时与燕通为府中人所告会代邸亦上变乃废二王为庶人榑榑京师幽桂大同户部侍郎

郭任以朝廷不先图燕而徒削夺诸藩乃上言天下事先本後末则易成今日储财粟备军实果何为者乃北讨周南讨湘舍其本而末是图非策也且兵贵神速苟旷日持久銳气既竭姑息随之所谓强弩之末势不能穿鲁縞徒坐自困耳帝不能从】质实【郭任丹徒人或曰定远人金川门陷任不屈死之子经亦论死少子成广西本朝乾隆四十一年追諡郭任忠愍】

遣燕世子高炽及其弟高煦高燧还北平

【太祖崩时燕王棣遣三子入临京师高煦勇悍无赖其舅徐辉祖切戒之不听至是棣称病乞三子归齐泰欲遂收之黄子澄曰不若遣归使彼不疑因遣还棣喜曰吾父子复得相聚天赞我也高煦濒行入辉祖廨盗善马径去辉祖追之已渡江矣途中辄杀吏民至涿州又杀驿丞于是朝臣举以责燕燕谋益急】质实【燕世子高炽是为仁宗与高煦高燧俱燕王妃徐氏出涿州汉涿县唐改为范阳于县置涿州明省县入州属顺天府今因之】

发明【燕王三子在京齐奉请收之子澄不可遂遣归事载成祖实录夫泰欲收之固属无名然使羁留於京师未尝不可为制燕之一法子澄本无胜算而徒曰遣归使不疑则疎甚矣时辉祖密奏高煦勇悍不忠他日必为大患及燕师起高煦勦力为多帝始悔不用辉祖之言又按逊国纪宪章录臣林外纪明史槩明纪事本末诸书载建文元年二月燕王来朝行皇道入登陛不拜御史曾凤韶劾王不敬帝曰至亲勿问三月燕王还国明史皆不取考成祖实录无入觐之事此无可讳而不载则知诸书皆出於传闻之辞也且以时势考之燕王未必肯轻身而来朝既来朝矣齐黄诸人方日夜发愤谋燕岂御史昌言之而当国者反置之不议乎又逊国臣纪载建文初藩王入觐驰皇道入且不拜凤韶侍班言殿上宜展君臣之礼宫中乃叙叔侄之伦诏勿问则或者他藩之事而传者譌以为燕也】

安置北平按察使陈瑛于广西

【金事汤宗告瑛受燕王金钱通密谋逮谪广西】质实【陈瑛滁人汤宗字正传浙江平阳人】

六月岷王榑有罪废为庶人

【西平侯沐晟奏榑不法废为庶人徙漳州】

秋七月燕王棣举兵反

【棣以僧道衍为谋主护卫张玉朱能为爪牙选将校勾军卒部署已定问道衍师期对曰未也棣始称病或佯狂赴市夺酒食或卧土壤中弥日不苏盛暑围火炉犹摇头颤曰寒甚宫中亦杖而行会燕山卫百户倪谅告变帝下诏让棣遣中官逮王府僚属北平都指挥使谢贵布政使张昺部署军士列九门防守以都指挥张信为棣旧所信任密敕之使执棣信叛附於棣以情输之昺库吏李友直亦以昺谋告棣棣乃用道衍计令张玉朱能潜纳勇士八百人入

府守卫及朝使至棣伪缚官校置庭中给贵曷入至端礼门为伏兵所执皆不屈死张玉等率勇士攻九门克其八独西直门不下都指挥彭二跃马呼市中曰燕王反从我杀贼者赏集兵千余人将攻燕府会燕健士从府中格杀二中护卫指挥唐云谕之兵遂散尽夺九门燕府长史葛诚护卫指挥卢振初皆与贵曷谋诛棣至是并遇害夷其族伴读余逢辰泣谏杀之参政郭资副使墨麟僉事吕震并降棣棣乃上书於朝指齐泰黄子澄为奸臣并援祖训朝无正臣内有奸恶则亲王训兵待命天子密诏诸王统领镇兵讨平之书既发遂举兵反自署官属称其兵曰靖难夺居庸关破怀来都督宋忠战败与指挥余瑱彭聚孙泰俱死之寻陷蓟州指挥马宣镇抚曾濬不屈死于是通州遵化永平密云诸守将皆以城叛衆至数万】质实【信叛附于棣按明史张信传信受密诏令与张曷谢贵谋燕王棣信忧惧不知所为母怪问之信以告母大惊曰不可汝无妄举灭家族棣称病信三造燕邸辞不见信固请入拜牀下密以情输棣棣愾然起立召诸将定计德信甚呼为恩张棣伪缚官校置庭中给贵曷入按明纪事本末燕王称疾愈御东殿先伏壮士左右及端礼门内遣人召贵曷不至复遣官属内官以所就逮名往乃至卫士甚衆门者呵止之贵曷入王曳杖坐赐宴行酒出爪数器曰与卿等尝之王自进片爪忽怒詈曰齐民足弟宗族尚相恤身为天子亲属旦夕莫必其命县官待我如此天下何事不可为乎掷瓜于地护卫军皆怒前擒贵曷下殿王投杖起曰我何病迫于若奸臣耳遂曳贵曷等斩之又按明实录贵曷入至端礼门壮士出禽之无掷瓜之事九门元京城门十一曰丽正顺承文明安贞健德崇仁齐化光熙和义肃清平则明洪武九年徐达经理元都缩其城之北五里废光熙肃清二门其九门俱仍旧端礼门明初燕王建府于元之皇城旧址即今之西苑门四东曰体仁西曰尊义南曰端礼北曰广智怀来唐妫州明初置怀来所永乐中改卫今改县属宣化府蓟州唐置明属顺天府今因之遵化後唐置县明属蓟州今升直隶州密云後魏置县明属昌平州今属顺天府张玉字世美祥符人朱能字士弘怀远人倪谅燕山左护卫百户一作千户棣即位收谅杀之初张曷被杀丧得还燕王称帝出曷屍焚之族其家法司以其近戚程亨等五人见怒曰张曷之亲与铁同顽直须鑪冶耳引出生烧之彭二逸其名为燕健卒龐来兴丁胜所杀葛诚不知所由进与卢振约为内应余逢辰字彦章宣城人闻异谋力谏遗书戒其子誓必死兵起泣谏死之又有北平人杜奇极谏棣立斩之郭资武安人墨麟高陵人吕震字克声临潼人本朝乾隆四十一年追諡谢贵张曷忠烈彭二葛诚卢振宋忠余瑱彭聚孙泰马宣曾濬烈愍余逢辰节愍杜奇入祠】

谷王橧自宣府奔京师

【宣府地近北平燕兵既破怀来宣府震恐橧弃其国走还京师】

诏削棣属籍命长兴侯耿炳文帅兵讨之

【棣反书闻帝告太庙削棣属籍废为庶人诏示天下曰邦家不造骨肉周亲屡谋僭逆去年周庶人橧僭为不轨辞连燕齐湘三王朕以亲亲故止正橧罪今年齐王榑谋逆又与隶柏同谋柏伏罪自焚榑已废为庶人朕以棣于亲最近未忍穷治其事今乃称兵构乱图危社稷获罪天地祖宗义不容赦用是简发大兵往致厥罚以炳文太祖时宿将拜征虏大将军驸马都尉李坚都尉甯忠副之帅师讨燕寻命安陆侯吴杰江陰侯吴高都尉耿璫都指挥盛庸潘

忠杨松顾成徐凯李友陈晖平安分道并进设平燕布政使司于真定以暴昭掌之时齐泰黄子澄益慷慨任事请声其罪或难之泰曰名其为贼敌乃可克名正言顺又何疑焉一切命将兴师皆二人主之】质实【耿炳文时年六十五李坚武陟人尚大名公主吴杰复之子吴高良之子耿璫炳文次子顾成字景韶其先湘潭人後徙江都平安滁人小字保儿】

八月耿炳文及棣战於滹沱河北败绩

【炳文次真定令徐凯屯河间潘忠杨松屯鄭州使先锋九千人驻雄县值中秋方宴会不设备燕将张玉夜半疾驱袭陷之寻陷鄭州忠松被执炳文部将张保叛降于棣时大兵号三十万先至者十三万分营滹沱河南北棣欲与北军战惧南军乘之乃纵保归杨言燕王率兵且至诱炳文移军尽北渡河棣率张玉谭渊等循河蹴击炳文军不得成列大败丧师三万副将李坚甯忠都督顾成皆被执炳文退保真定棣围之三日以炳文老将未可克乃引去】质实【滹沱河山海经泰戏之山滹沱之水出焉在山西繁峙县东北百二十里流经直隶正定保定河间诸府至天津之静海县名子牙河注直沽入海其别河至青县会于漳雄县五代周雄州明改县属保定府今因之鄭州汉鄭县高齐分置任邱县唐于鄭县置鄭州开元十三年改鄭为莫宋省莫县入任邱移州治之金州县俱废改置莫亭县元于莫亭置莫州并置任邱县属之明洪武七年省州入任邱县属河间府今因之莫州故城在任邱县北三十五里谭渊清流人李坚械送北平道卒甯忠亦死】

召耿炳文还以李景隆代之

【炳文败帝商代者黄子澄荐曹国公李景隆景隆读书通典故与方孝孺友善齐泰极言不可帝不听赐景隆通天犀带亲为推轂饯之江浒景隆至德州收集炳文将卒并调诸路兵五十万进营河间当是时帝倾国兵以畀景隆谓燕可旦夕破棣闻之顾大喜曰昔汉高止能将十万景隆何才乃以五十万付之是自坑其衆也吾破之必矣会吴高耿璫及都指挥杨文方围永平棣语诸将曰景隆知我在此必不敢至不若往援永平以致其师吴高怯不敢战闻我至必走是我一举解永平围而破景隆也遂帅师援永平吴高等尽弃輜重走退保山海关景隆知燕兵出果引兵趣北平直薄城下筑垒九门燕世子高炽坚守不战夜遣勇士缒城出斫营营中惊扰骤退都督瞿能与其子帅精骑千余攻张掖门垂克景隆忌能功令止之燕人夜汲水沃城明日冰凝不得上时御史韩郁上言诸王亲则太祖遗体贵则孝康皇帝手足尊则陛下叔父乃?儒偏见病藩封太重疑虑太深于是周王废湘王焚齐代相继被摧为计者必曰兵不加则祸必稔今燕举兵两月矣前後调兵不下五十万而一矢无获将不效谋士不效力徒使中原赤子困于转输九重之忧方深也谚曰亲者割之不断疏者续之不坚陛下幸垂洞鉴兴灭继絶释代王之囚封湘王之墓还周王于京师迎楚蜀为周公俾各命世子持书劝燕罢兵守藩慰宗庙之灵明诏天下笃厚亲亲宗社幸甚不听】质实【山海关汉榆关唐曰临渝一名临闾明曰山海关在永平府抚寧县东百里张掖门金燕城门十三西曰彰义明北京九门方輿纪要西之北曰西直旧名彰义嘉靖中增筑外城门七西曰广宁今亦呼彰义是西直广宁俱蒙彰义旧称也是时外城未建瞿能所攻盖西直门也张掖则彰义声之转耳韩郁字康郁铅山人燕师入郁弃官遁不知所终】

冬十月棣诱执宁王权夺其衆及朶顔三卫归北平【权国大宁在喜峯口外东连辽左西接宣府为巨镇所属朶顔三卫骑兵皆骁勇善战燕兵起朝廷虑权与燕合召权及辽王植归京师植泛海还权不至坐削护卫棣闻之喜为书贻权至是以单骑入大宁诡言穷蹙求救执权手大恸求代草表谢罪而陰令吏士结三卫部长及诸戍卒乃辞去权祖之郊外伏兵起拥权行三卫彊骑及诸戍卒一呼毕集守将朱监不能御力战死宁府长史石撰每以臣节讽宁王城陷愤誓不屈支解死都指挥卜万无都督刘真陈亨帅兵扼松亭关亨欲降畏万不敢发燕行反间贻万书盛称万诋亨亨执万下狱死籍其家亨降真由海道遁还京师王府妃妾世子皆随入松亭关归北平棣以其衆分隶各军大寧城为空】质实【朱监卜万见明史马宣传未详里系石撰平定人刘真合肥人陈亨壽州人本朝乾隆四十一年追諡朱监烈愍石撰卜万节愍】

十一月李景隆及棣战于郑村坝败绩奔德州

【诸军方围北平燕兵乘胜抵城下城中兵鼓噪出内外夹攻李景隆不能支宵遁翌日九垒犹固守燕兵次第破四垒诸军闻景隆走皆溃景隆还德州亡士卒十余万明年春棣兵陷蔚州攻大同使景隆疲于奔命景隆自紫荆关赴援燕兵已旋居庸官军多冻馁死者不见敌而还】质实【郑村坝在顺天府大兴县东二十里蔚州汉代郡地唐置安边县属蔚州天宝初自灵邱移州来治五代晋初改县曰灵仙明洪武四年省县入州属山西大同府 本朝雍正六年改属直隶宣化府紫荆关在易州西八十里即太行蒲陰陁也地记太行第七陁为蒲陰宋时谓之金陂关金以後始名紫荆】

罢兵部尚书齐泰太常寺卿黄子澄

【棣以前所上书不报再上书请去奉子澄帝为罢二人以谢燕陰留之京师仍参密议】

发明【此仍诛鼂错之说也黜陟王者大柄岂寇逆所能倒持此时以泰子澄为非则伐燕亦非以伐燕为中罪致讨所不得已则奉子澄亦不可罢二臣纵谋之不臧然帝既用其言即不宜谗以谢过况燕势已猖獗虽去齐黄又乌能止兵而消逆适示怯耳乃阳罢之又陰留之进退失措徒为见讐者笑不亦辱乎】

【庚辰】二年春正月均江浙田赋

【初太祖时屡蠲苏松嘉湖极重田赋至是帝复下诏曰国家有维正之供江浙赋独重而苏松官田悉準私租起税用惩一时岂可为定则今悉与减免亩不得过一斗有司违者罪之後永乐中尽革帝政浙西赋复重】

发明【惠帝即位庶务纷更虚文多而实政少惟此为爱民之事成祖苟欲尽反其所为不问是非并此而改之则盪矣】

夏四月李景隆败棣于白沟河再战败绩景隆奔德州【景隆大誓师于德州合武定侯郭英安陆侯吴杰等军六十万进次白沟河列阵数十里棣先营苏家桥已由西北循河而进都督佥事平安预伏万骑河侧棣至伏发棣曰平安竖子耳往岁从出塞识我用兵今当先破之安挺矛直前瞿能父子亦奋击所向披靡战至暝棣以三骑遁迷失道下马伏地视河流辨东西始知营垒所在是日也棣几殆安失马百余匹而已明日再战能及安搗燕将房寬阵败之景隆挥骑绕出棣後大战良久景隆军飞矢如雨棣三易马矢尽挥劒劒折阻于堤几为瞿能所获力走登堤佯引鞭招後继者景隆疑有伏不敢前会高煦救至棣乃得免比日晡能复引衆搏战大呼杀贼指挥俞通渊滕聚俱以兵赴之会旋风起折景隆大将旗阵动棣以劲骑绕其後乘风纵火烟焰涨天能父子及通渊聚皆死有王指挥者被重创脱胄付其仆曰以此报家人立马植戈而死安与朱能战亦败官军大乱奔声如雷郭英溃而西景隆溃而南尽弃其所赐玺书斧钺走德州】质实【白沟河在雄县北三十里方輿纪要云燕王与李景隆大战于白沟河即此处也源出广昌县涑山曰涑水一名巨马河至容城县东白沟店以下为白沟河以宋辽分界于此亦曰界河苏家桥在霸州东二十里文安县北四十里当往来孔道自苏家桥以下诸水俱谓之淀泊房寬陈州人俞通渊巢县人俞通海弟王指挥临淮人常乘小马军中呼小马王 本朝乾隆四十一年追諡瞿能忠烈俞通渊滕聚小马王俱烈愍】

五月棣陷德州进攻济南

【燕兵乘胜进攻德州未至景隆先奔燕兵入城得粮储百余万石势益张先是白沟河之溃参景隆军事高巍南走至临邑遇参政铁铉相持痛哭共趋济南直五日酺酒同盟偕入城与都督成庸等誓以死守景隆往依之燕兵遂自德州攻济南时景隆兵在城下者尚十余万棣乘其未阵驰击景隆大败南走帝用齐泰黄子澄计遣尚宝司丞李得成如棣军谕罢兵以缓之棣不听得成附于棣棣射书中谕降不下棣堰水灌城城中人大惧铉曰无恐计且破之乃佯令守陴者皆哭尽辍守具出居民城外伏地请降预悬铁板城门上伏壮士闔堵中候棣入下板击之别设伏断城外桥乃遣人请棣入抚谕棣在军逾年往来战守仅得永平保定及北平三府诸州县旋破旋守不肯降济南为中原要会得济南断南北则江淮可图也闲济南降大喜遂下令受降棣乘马张盖鼓吹徐行渡桥至城下军上失约棣未入门板骤下伤棣马首急易从马奔及桥伏兵起桥仓猝不可断遂得逸棣愤甚筑长闻昼夜攻之】质实【铁板诈降之事载明史铁铉传本出李贤古穰杂录及逊国纪诸书独国史考异以为文皇善用兵不应信轻率若此明旧史例义深然之按考异之辨为成祖讳耳贤在天顺朝去革除未远见闻必非无据今仍据明史并采逊国纪诸书录辑临邑汉县属济南府今因之铁铉邓州人洪武中由国子生授礼科给事中调都督府断事尝谏疑狱立白太祖喜字之曰鼎石李得成涑水人】

秋八月承天门灾

【诏求直言从方孝孺议改谨身殿为正心殿午门为端门端门为应门承天门为臯门前门为路门】

都督盛庸参政铁铉击败棣兵于济南复德州

【时平安营单家桥谋出御河夺燕饷舟又选水卒五千人渡河攻德州棣惧将解济南围北归铉与庸乘夜出兵掩击燕衆大败铉等乘胜复德州帝闲擢铉山东布政使参赞军务寻进兵部尚书封盛庸历城侯拜平燕将军于是庸进驻德州吴杰平安守定州徐凯屯沧州相犄角以困北平】质实【单家桥在河间府献县南为南北通途滹沱河之分流黑龙港河径其下御河一名卫河本隋之永济渠自山东东昌府恩县流迤直隶故城南又东北流经山东德州西南新窑口又东北流经德州之桑园镇入直隶吴桥县界即古清河也】

九月诏录洪武功臣罪废者後

【洪武中武臣以过误废及得罪者皆徵其子孙录之】

冬十月诏李景隆还赦不诛

【御史大夫练子宁宗人府经历宋徵御史叶希贤并言景隆失律丧师怀二心宜诛黄子澄亦请正其罪以谢天下皆不听子澄拊膺曰大事去矣荐景隆误国万死不足赎罪锦衣卫镇抚杨本从景隆讨燕有功景隆忌之不以闻约日出战又不为援本劾景隆辱国遂以孤军出被禽系北平狱高燧杀之】质实【宋徵里系未详叶希贤松阳人杨本中牟人或曰处州人通禽遁术本朝乾隆四十一年追諡杨本烈愍】

十二月盛庸大败棣于东昌斩其将张玉棣遁还【先是徐凯方屯沧州棣佯出兵攻辽东至通州循河而南渡直沽昼夜兼行袭执凯斩万余级降三千人谭渊一夜尽杀之复纵兵掠四境献县知县向朴集民兵与渊战被执怀印死棣遂自长芦渡河过德州遣人至城下招盛庸庸坚壁不出陰令轻骑蹶棣後棣击败之乃转掠临清大名越汶上至济寧庸与铁铉屯兵东昌以邀之棣率兵薄营庸开阵纵棣入围之数重斩其骁将张玉已而朱能率番骑来救殊死鬪翼棣溃围出以百骑走馆陶庸既胜军势大振自燕人犯顺转鬪两年锋銳甚至是失大将燕军夺气棣乃引还北平】质实【汶上鲁中都邑金置汶上县明属兗州府今属济寧州馆陶汉置县明属东昌府今因之向朴字遵博慈谿人本朝乾隆四十一年追諡向朴节愍】

【辛巳】三年春正月复齐泰黄子澄官

【以东昌捷告太庙命泰子澄任职如故】

三月盛庸败棣于夹河斩其将谭渊复战败绩

【棣耻东昌之败意怠欲稍休道衍力趣之曰臣前言师行必克但费两日耳两日者昌字也自此全胜矣棣遂复率衆南出保定盛庸营夹河棣将轻骑来覘掠阵过庸遣千骑追之都指挥庄得力战斩其将谭渊燕军大挫而朱能张武等殊死鬪棣自以铁骑贯阵与能合官军

稍却庄得皂旗张陷阵死骁将楚智被执不屈死之日暮各敛兵棣以十余骑逼庸营野宿及明起视已在围中乃从容引马鸣角穿营而去庸诸将皆以帝有诏毋使朕负杀叔父名仓卒相顾愕眙不敢发一矢明日复战棣军东北庸军西南自辰至未胜负畧相当大风东北起飞埃蔽天庸军面迎砂砾咫尺不辨物棣纵左右翼横击斩首数万庸大败走德州时吴杰平安自真定引军来会闲庸败引还棣以计扬言散军取粮诱之出战杰安列阵滹沱河南棣率骑循河绕出阵後安缚木为楼高数丈战酣辄登楼望发强弩射燕军矢集棣旗如蝟毛死者甚衆忽大风拔树声如雷安遂败仍走入真定】质实【夹河在冀州武邑县南漳水分流也又东入滹沱庄得一作德故隶宋忠怀来之战一军独全张武浏阳人皂旗张逸其名或曰张能官都指挥力挽千斤每战麾皂旗先军中呼皂旗张战死犹执旗不仆楚智官都指挥马陷被执死庄得等三人皆未详何处人 本朝乾隆四十一年追諡张能忠烈庄得烈愍楚智节愍】

贬齐泰黄子澄谕棣罢兵棣不奉诏

【帝闻庸军败大惧诏窜泰子澄于外密令为募兵计棣闻二人已窜上书请罢盛庸吴杰平安兵帝以问方孝孺孝孺曰燕兵久顿大名天暑雨当不战自疲急令辽东诸将入山海关攻永平真定诸将渡卢沟捣北平彼必归救我以大兵蹙其後可成擒也今其奏事适至宜且与报书往返踰月使彼将士心懈我谋定势合进而蹴之不难矣帝以为然命孝孺草诏遣大理寺少卿薛嵩驰报赦燕罪令罢兵归藩棣不奉诏燕诸将请杀嵩棣不许送之出境未几盛庸吴杰平安分兵断燕饷道棣患之复遣其指挥使武胜上书申前请帝将许之孝孺曰兵罢不可复聚彼长驱犯阙何以御之愿毋为所惑帝乃下胜狱以絶燕】质实【卢沟即桑乾河一曰湿水源出山西马邑县入直隶境至顺天府西南曰卢沟河薛嵩阆乡人】

夏六月棣将李远寇沛县焚粮艘

【官军驻德州资粮皆道徐沛棣遣李远以轻兵六千诈为官军袍铠皆插柳枝为讞由济宁至沛焚粮艘数万河水尽热鱼鼈皆浮死盛庸遣都督袁宇帅三万骑追之为远伏兵所败】质实【李远怀远人】

秋七月都督佥事平安攻北平不克

【燕兵掠彰德陷林县安在真定度北平空虚帅万骑攻之棣方军大名遣将驰救安战不利引还时燕高煦高燧谋倾世子高炽世子与高燧守北平高煦从棣军有寵方孝孺门人林嘉猷者尝以事至燕邸知其状孝孺言于帝曰兵家贵间燕父子兄弟可间也帝命孝孺草书遣锦衣卫千户张安如燕贻世子令归朝廷许以王燕世子得书不啓封并安等送之军中官黄俨方曲事高燧使人驰报棣曰世子且反棣疑之问高煦高煦曰世子固善太孙语未竟世子所遣使以书及张安至棣啓视遽曰嗟乎几杀吾子乃囚安等盛庸檄大同守将房昭引兵入紫荆关畧保定据易州西水砦以窥北平吴杰遣都指挥韦谅以兵万余转饷昭军棣曰昭得粮守险未易拔也引兵围之都指挥花英等往援与棣战于齐眉山大败昭谅走棣勒兵还北平】质实【林县汉隆虑县东汉改隆为林金林州明改县属彰德府今因之易州隋置明

属保定府今升直隶州西水砦在州西南八十里郎山上四面险绝齐眉山在易州西南百里亦曰峨眉山林嘉猷名昇以字行宁海人】

九月倭寇浙东

【倭登岸剽掠象山县钱仓所千户易绍宗密令游兵间道焚贼舟贼惊救绍宗格战追至海岸陷淖中手刃数十贼遂被害先是绍宗书壁誓死命妻子具牲酒生奠之诀而出妻携孤奏于朝旌之】质实【象山县唐置明属宁波府今因之易绍宗攸县人】

冬十二月诏驸马都尉梅殷镇淮安

【殷尚宁国公主有谋畧太祖十六女诸驸马中尤爱殷太祖春秋高诸王强盛尝受密诏辅皇太孙至是命充总兵官镇淮安】质实【殷字伯殷夏邑人汝南侯思祖从子宁国公主孝慈皇后生】

棣大举南犯

【棣称兵三年亲战阵冒矢石屡濒于危所陷城邑兵去旋复为朝廷守故不敢决意南下无何有以中官奉使侵暴为言者诏所在有司系治于是中官密遣人赴燕具言京师空虚可取状约为内应棣慨然曰频年用兵何时已乎要当临江一决不复返顾矣遂大举兵而南】

发明【中官之祸肇于永乐终明之世深受其毒建文稍稍戢制则又泄机事召外兵致燕决意南犯议不返顾此辈实为祸媒甚哉小人之难养也春秋寺人貂始漏师於多鱼古志之矣其垂戒深哉】

【壬午】四年春正月命魏国公徐辉祖帅师御棣兵于山东【棣兵由馆陶渡河连陷东阿东平诸州县东平吏目郑华济阳教谕王省死之山东大震于是命辉祖帅师往援而棣兵已突至沛县知县颜伯玮不能御遣县丞胡先间行至徐州告急援不至指挥王显开门降伯玮衣冠南向再拜自经死主簿唐子清典史黄谦被执谕子清降曰愿从颜公地下遂死之遣谦往徐州招降不从亦死燕别将王聪破萧县知县郑恕亦不屈死棣兵遂薄徐州】质实【东阿汉县後汉分置谷城北齐废入东阿明移治于故谷城属东平州今属泰安府东平汉国治无盐晋徙治须昌刘宋为东平郡宋改府元改路明洪武初为府八年降州属济宁府十八年改属兗州府今属泰安府萧县秦置明属徐州今属徐州府郑华字思孝临海人由行人司贬吏目燕兵至州长贰尽弃城走华率吏民凭城固守城破与其妻萧氏俱死王省字子职吉水人为燕游兵所执从容引譬词义慷慨衆舍之归坐明伦堂伐鼓聚诸生大哭以头触柱死按宪章録以省之死节系于建文二年五月与明史恭愍帝纪异颜伯玮名瓌以字行庐陵人子有为亦自刎死郑恕字本忠仙居人二女俱从死本朝乾隆四十一年追諡颜伯玮忠节郑华节愍王省唐子清黄谦颜有为并入祠】

夏四月官军连败棣兵于淮北寻召辉祖还

【先是左都督何福及平安陈暉军次济宁闲棣兵自徐趋宿遂引兵南追及于淝河燕将白义王真各率百骑诱安军缚草置囊中为束帛状安帅兵驰击义等佯弃囊走安军士竞取之伏发两军鏖战真被重创自刎死棣乃身自迎战安部将和尔和挺枪大呼直刺棣马忽蹶反被擒安军遂败宿州陷至是棣兵抵小河为桥以济福安等往争桥张左右翼并进斩其将陈文安转战至北阪几获棣番骑王骐跃入阵掖棣走于是官军驻桥南棣军驻桥北相持数日棣潜移军三十里夜半渡河而南绕出官军後比旦官军始觉适辉祖来会战于齐眉山斩其将李斌时王师再捷燕人大惧会淮土盛暑湿蒸燕诸将请旋师观衅棣不从下令曰欲渡河者左诸将皆左棣怒曰任汝曹所之乃不敢复言而帝闲讹言谓燕兵已北召辉祖还福军遂孤福欲持久老燕师移营灵壁深堑高垒自固而粮运为燕所阻安分兵往迎棣率精锐横击断安军为二福开壁来援与安合击杀燕兵数千高煦伏兵自林间突出福等俱败走诸将请移驻淮河就粮夜令军中闻三礮即发翼日燕兵猝薄垒亦发礮三福军以为已礮也争趋门出燕兵乘之遂大乱人马坠濠堑俱满指挥宋瑄力战死福单骑走安暉及侍郎陈性善等三十七人皆被执性善死之】质实【淝河北淝水也在宿州南九十里州南有龙山湖淝水出马东南流入怀远县界注於淮小河在灵壁县北六十里即古睢水旧自河南永城县流迳宿州灵壁至宿迁入泗後宿州以上已成平陆其在睢寧宿迁者谓之小河齐眉山在灵壁县西南三十里灵壁本虹县灵壁镇宋升县明属宿州今属凤阳府王真咸宁人宋瑄定远人宋晟长子陈性善名复初浙江山陰人既被执寻释归令说朝臣性善朝服跃马入河以死余姚黄墀陈子方与性善友亦同死按明史性善传性善及大理寺丞彭与明钦天监副刘伯完同被执纵还与明变姓名与伯完俱亡去不知所终明纪事本末则云与明死之与史传异本朝乾隆四十一年追諡宋瑄烈愍陈性善节愍黄墀陈子方并入祠和尔扣旧作火耳灰今改】

五月辽东兵溃於直沽

【先是帝命杨文帅辽东兵十万赴济南与铁铉合以断棣後及是至直沽军溃无一人至济南者】

棣兵渡淮陷扬州

【棣兵陷泗州盛庸方军淮上以兵数万战舰数千列淮南岸棣兵不得渡遣使至淮安假道於驸马都尉梅殷殷劓其使曰留汝口还为而王言君臣大义棣气沮凤阳知府徐安亦拆浮桥絶舟楫以遏燕棣乃令邱福朱能等帅骑勇数百人潜自上流以渔舟济猝薄庸军鸣礮庸军惊突击之庸败走尽获其战舰遂渡淮陷盱眙守淮兵部主事樊士信死之乘胜出天长进攻扬州指挥王礼等开门降巡按御史王彬指挥崇刚死之】质实【天长唐县明属泗州今因之徐安宁波人邱福凤阳人樊士信应城人王彬字文质东平人崇刚逸其里籍逊国臣传云崇刚姓邓本朝乾隆四十一年追諡樊士信烈愍王彬崇刚节愍】

徵天下兵勤王

【帝遣御史练子宁右侍中黄观修撰王叔英等分道徵兵苏州知府姚善首以兵入卫请召还齐泰黄子澄帝从之时宁波知府王璉徽州知府陈彦回乐平知县张彦方前永清典史周縉各帅兵入援】质实【乐平县唐置明属饶州府永清县唐置明属顺天府今皆因之黄观字伯澜一字尚宾贵池人王叔英字原采黄岩人王璉字器之日照人陈彦回字士渊莆田人张彦方江西龙泉人由给事中以便养改乐平知县周縉字伯绅武昌人】

下罪已诏遣庆成郡主诣燕军

【时棣兵往来江上江南北郡县俱密输欸诏下京师内外臣民恸哭而已方孝孺进曰事急矣可遣人许以割地稽延数日俟募兵渐集然後决战江上乃遣庆成郡主往燕军议割地罢兵郡主棣从祖女兄也见棣述太后及帝意棣曰吾此来欲得奸臣不在上地郡主默然遂辞归帝命诸将集舟师江上为御守计兵部右侍郎陈植监战植慷慨誓师部将杀之以降棣诛部将具棺殓植瘞之】质实【庆成郡主蒙城王女嫁黄琛初封庆阳郡主建文时改封庆成郡主蒙城王为熙祖之孙郡主则太祖从父兄弟之女也陈植庐江人葬白石山本朝乾隆四十一年追諡陈植烈愍】

六月棣兵渡江犯京师谷王橐及李景隆迎降京师陷帝不知所终

【盛庸徐辉祖等败棣兵於浦子口会高煦引番骑来援殊死鬪庸军退驻高资港都督佥事陈瑄以舟师叛附于棣棣率兵自瓜洲渡江庸败走镇江守将童俊率衆降棣进军龙潭帝命诸王分守都城遣景隆及兵部尚书茹瑺都督王佐诣燕师讲和棣曰吾无罪而削为庶人今救死何以地为景隆等不能发一语遽还帝复令谷王橐安王楹往棣卒不奉诏左右或劝帝他幸以图兴复方孝孺请坚守京城以待四方援师即事不济当死社稷乙丑棣进兵屯金川门左都督徐增壽谋内应帝手剑斩之橐景隆及指挥佥事刘清守金川门登城望见棣麾盖开门迎降御史连楹叩马欲刺棣被杀都城陷宫中火起帝不知所终棣遣中使出后屍于火诡云帝屍越八日用学士王景言备礼葬之然葬地所在後无闻焉或曰帝由地道出亡其後滇黔巴蜀间皆传有帝为僧时往来迹世遂以帝为逊国云正德万历崇祯间诸臣请续封帝後及加庙諡皆下部议不果行大清乾隆元年追諡曰恭闵惠皇帝】质实【逊国之说畧云金川门失守帝欲自杀编修程济曰不如出亡即为帝祝髮从鬼门出由吴楚而滇浙黔蜀粤东西至正统五年有同寓僧诡称建文帝思恩知府岑瑛以闻按问乃钧州人杨应祥下狱死时并系帝因自言其实老閹吴亮识之入西内以壽终云明旧史例议力辨其妄朱彝尊亦深斥其不足信但据王鏊陆树声薛应旗朱国祜等所载诸书其官阶年月事蹟固多舛讹抵牾然未必尽出无因且据明史胡濙传称惠帝之崩於火或言遽去诸旧臣多从者帝疑之五年遣濙颁御制诸书并访仙人张邈邈徧行天下隐察建文帝所在二十一年还朝驰谒帝于宣府帝已就寝闻濙至急起召入濙悉以所闻对漏下四鼓乃出先濙未至传言建文帝蹈海去帝分遣内臣郑和数辈浮海下西洋至是疑始释後神宗时尝命阁臣録建文帝在滇诗以进则逊国之说在明代君臣迄无定论传闻各异姑从阙疑附着其畧於此浦子口在江宁府

江浦县东二十里为南北要津有城今设守备驻此高资港在镇江府丹徒县西五十里北通大江接仪徵瓜洲在扬州府江都县南四十里龙潭镇在句容县北八十里陈瑄字彦纯合肥人茹瑄衡山人徐增壽中山王达第四子成祖实录是年九月陞宣府中护卫指挥僉事刘清为都指挥同知旌其开金川门奉迎功也连櫓襄垣人被杀屍植立不仆
本朝乾隆四十一年追諡连櫓忠烈】

棣自立为皇帝

【茹瑄先羣臣叩头劝进文臣迎附知名者吏部右侍郎蹇义户部右侍郎夏原吉侍中刘儁兵部右侍郎古朴刑部侍郎刘季箴大理寺少卿薛嵩翰林学士董伦侍讲王景修撰胡靖李贯编修吴溥杨荣杨溥侍书黄淮芮善待诏解缙户科给事中金幼孜兵科给事中胡濙兵部郎中方宾刑部员外郎宋礼国子助教王达邹缉吴府审理副杨士奇桐城知县胡俨等棣入京杨荣迎谒马首曰陛下先谒陵乎先即位乎棣遽趋谒陵毕己巳羣臣备法驾迎诣奉天殿即皇帝位茹瑄入贺迎谓曰瑄吾今日得罪天地祖宗奈何瑄曰陛下应天顺人何谓得罪乃大悦大索黄子澄齐泰等榜其姓名曰奸臣时揭榜者二十九人子澄泰及陈迪方孝孺练子宁黄观胡闰邹瑾王钝郭任卢迥侯泰暴昭郑赐黄福张紬毛奉亨陈继之董鏞曾凤韶王度高翔魏冕谢昇尹昌隆宋徵卓敬王叔英巨敬既而郑赐王钝黄福尹昌隆皆迎附又以茹瑄言并有张紬皆复其官其後复揭榜朝堂增徐辉祖葛诚周是修铁铉姚善甘霖郑公智叶惠仲王璉黄希范陈彦回刘璟程通戴德彝王艮卢原质茅大芳胡子昭韩永叶希贤林嘉猷蔡运卢振牛景先周璿等凡五十余人】质实【刘儁字子士江陵人古朴字文质陈州人刘季箴名韶以字行余姚人胡靖本名广字光大吉水人建文二年廷试对策有亲藩陆梁人心摇动语帝亲擢广第一赐名靖迎附後复名广吴溥崇仁人杨荣字勉仁建安人杨溥字弘济石首人黄淮字宗豫永嘉人芮善南城人金幼孜名善以字行新淦人胡濙字源洁武进人方宾钱塘人宋礼字大本河南永宁人王达无锡人邹缉字仲熙吉水人胡俨字思若南昌人陈迪字景道宣城人官礼部尚书胡闰字松友鄱阳人官大理寺少卿邹瑾永丰人官大理寺丞王钝字士鲁太康人官户部尚书卢迥仙居人与郭任卓敬俱官户部侍郎侯泰字顺怀南和人官刑部尚书郑赐字彦嘉建宁人官工部尚书黄福字如锡昌邑人官工部右侍郎张紬字昭季富平人官吏部尚书既降附未几成祖临朝而叹咎建文时之改官制者令紬及王钝解职务紬惧自经於吏部後堂妻子相率投池中死毛泰亨为吏部侍郎紬死泰亨亦死陈继之莆田人官给事中董鏞不知何许人曾凤韶庐陵人王度字子中归善人高翔朝邑人魏冕江西永丰人谢昇诸城人鏞凤韶度翔冕昇与尹昌隆俱官监察御史昌隆将就刑大呼曰臣尝上疏让位陛下奏牒可覆帝取閱之叹曰火烧头早从所言朕亦无此劳苦也免昌隆死使往北京辅太子巨敬平凉人官户部主事充史官周是修名德以字行奉和人官衡府纪善甘霖怀宁人官御史郑公智字叔贞宁海人官御史叶惠仲临海人官南昌府知府黄希范官徽州府知府刘璟字仲璟基次子官谷王府长史程通绩溪人官辽府左长史戴德彝奉化人官左拾遗王艮字敬止吉水人官修撰卢原质字希鲁宁海人孝孺姑子官太常少卿茅大芳名誦以字行泰兴人官副都御史胡子昭时官刑部侍郎韩永西安人或曰浮山官给事中蔡运南康人历官四川参政罢归起知宾州牛景先沅州人官御史或云所镇抚周璿官左僉都御史】

削魏国公徐辉祖爵

【辉祖当燕师渡江犹引兵力战京师陷诸武臣咸迎附劝进辉祖独守父祠于是下吏命引罪不屈削爵幽私第追封徐增壽为武阳侯諡忠愍明年进爵定国公永乐五年辉祖卒乃命辉祖长子钦嗣封魏国公自是中山王之後有魏定二公居南北京神宗时録建文忠臣以徐辉祖为首追赠太师諡忠贞】

杀兵部尚书齐泰太常卿黄子澄文学博士方孝孺皆夷其族坐党死者数百人

【初帝发北平道衍以孝孺为嘱曰城下之日彼必不降幸勿杀之杀孝孺天下读书种子絶矣帝颌之及陷京师镇抚伍云縶孝孺至帝顾左右收之曰勿令遽死将即位召令草登极诏孝孺斩袞入悲恸声彻殿陛帝降榻劳曰先生无自苦予欲法周公辅成王耳孝孺曰成王安在帝曰彼自焚死曰何不立成王之子帝曰国赖长君曰何不立成王之弟帝曰此朕家事顾左右授笔札曰诏天下非先生不可孝孺投笔于地哭且骂曰死即死耳诏不可草复强之乃大书燕贼篡位四字帝大怒令以刀抉其口两旁至两耳复系狱泰子澄先被召还之命未至遽闻变泰走外郡乞兵有识其马者曰此齐尚书马也执之子澄就嘉兴杨任谋举事为人告见收至是并械至京帝亲诘之抗辩不屈遂命与孝孺同磔於市孝孺慷慨就戮赋絶命词而死时年四十六其门人廖鏞廖铭检遗骸瘞聚宝门外山上寻被逮与胡子昭卢原质原朴郑公智林嘉猷郑居贞俱坐死孝孺弟孝友亦死妻郑氏及二子中宪中愈先自经二女投秦淮河宗族亲友及门下士坐诛者八百七十三人泰从兄弟敬宗等俱坐死叔时永阳彦等谪戍子甫六岁宥死给配子澄族人无少长皆斩一子变姓名为田经仅得走免杨任亦磔死二子礼益俱斩大理寺丞杨端刑部郎中王高坐纵孝孺息树陰同弃官去劓鼻死孝孺主应天鄉试所得士有刘政方法政闻孝孺死呕血卒法官四川都司断事诸司表贺登极法不肯署名投笔出被逮自沈於江】质实【逊国臣传云孝孺投笔哭骂上怒叱曰汝焉能遽死朕当灭汝十族後系狱据其宗支及母族林彦法等妻族郑原吉等示且胁之执不从上怒甚乃使朋友门生廖鏞等为十族诛之然後诏磔於市坐死者八百七十三人外亲之外亲族尽数抄没发充军坐死者复千余人臣林外纪云成祖曰吾固能族人孝孺曰族至三赤矣成祖曰吾能四乃大收其朋友门生凡刑七日纪事本末云文皇大声曰汝独不顾九族乎孝孺曰便十族奈我何旧史例议以廖鏞等逮论在孝孺死後朱彝尊以孔安国及马郑解九族上至高祖下至元孙不及异姓则反轻于秦法之三族谓十族之说非实按夏侯欧阳解九族者父族四母族三妻族二皆据异姓有服成祖并非经生一时激怒不同议礼何暇辨九族之当从何家言乎又按彝尊明诗综诗话长陵靖难受祸者莫惨于正学先生坐方党死者相传八百七十三人其次黄太常坐累死者族子六十五人外戚三百八十人若胡大理之死郡志称其族弃市者二百十七人坐累死者数千人茅大芳妻毙于狱有与狗吃之旨载袁褰奉天刑赏録云然则当日或加三为四或加九为十传闲异词不足辨而一时门生朋友滥及无辜则亦不能为之讳也秦淮河源自溧水县北西北流经上元县东南入通济门横贯府城中西出江宁县三山水门又西北入大江廖鏞永忠之孙铭鏞之弟孝孺墓在江宁县聚宝山旧志孝孺死门人王徐辈收遗骸殓之于此与明史异案徐字叔丰金华王禕之孙革除编年云徐与孝孺表侄郑珣至聚宝门外求其遗骸归葬不可得卒逮系文皇念其祖禕死国功特宥死据此则

徐盖尝谋归葬而不得非瘞孝孺于聚宝山者也逊国臣记收遗骸者都督廖镛与明史同孝孺絕无後惟孝孺父克勤之弟克家有子曰孝复洪武间上书请减宁海赋谪戍庆远卫以军籍获免或曰錄孝孺家时魏典史泽藏其幼子嘉靖时松江人俞斌自称孝孺後方氏讼其伪云泽字彦恩溧水人卢原朴原质之弟郑居贞名桓歙人或曰闽人官河南左参政杨任嘉兴人官袁州知府致仕刘端王高俱南昌人成祖实錄永乐十一年正月大理寺左寺丞刘端右寺丞王高以纵奸恶外亲弃市盖与坐纵孝孺之说不同刘政字仲理长洲人方法字伯通桐城人法次望江瞻拜乡里曰得望我先人庐舍足矣遂自沉 本朝乾隆四十一年追諡齐秦忠敬黄子澄忠愍方孝孺忠文杨任烈愍廖镛胡子昭卢原质郑公智林嘉猷郑居贞节愍卢原朴方孝友方中宪方中愈齐敬宗杨益杨礼方法并入祠】

杀御史大夫练子宁户部侍郎卓敬皆夷其族

【缚子寧至语不逊磔死夷其族姻戚俱戍边子宁从子大亨官嘉定知县闻变同妻沉刘家河死敬尝建议徙燕帝责以离间骨肉敬厉声曰惜先帝不用敬言耳帝怒犹怜其才命系狱使人讽以管仲魏徵事敬曰人臣委质有死无二先皇帝曾无过举一旦横行篡夺恨不即死见故君地下乃更欲臣我耶姚广孝故与敬有隙进曰敬言诚见用上宁有今日乃斩之夷三族时殉难者太常少卿廖昇闻燕师渡江恸哭与家人诀遂自缢最先死卫镇抚徐让卫健皆战死城陷前一日修撰王良与胡广解缙吴溥比居俱集溥舍缙陈说大义广亦奋激慷慨良独流涕不言三人去溥子与弼尚幼叹曰胡叔能死大佳溥曰不然独王叔死耳语未毕隔墙闻广呼家人谨视豚溥顾谓弼曰一豚尚不能舍肯舍生乎须臾良舍哭饮鸩死矣于是都给事中龚泰投城下死叶福守门死衡府纪善周是修江西副使程本立自经死大理寺丞邹瑾御史魏冕同自杀秦府长史邹朴不食死兵部郎中谭翼自焚死妻邹子谨皆自经及帝即位礼部尚书陈迪不屈与子凤山丹山等六人磔于市妻管缢死户部主事巨敬与迪同死夷其族礼部右侍中黄观尝草制极诋斥燕至是索国宝不得或言已付观出收兵矣命收其妻翁氏及二女给象奴翁携二女及家属十人投淮清桥下死观募兵至安庆闻京师陷或告曰宫已焚帝失所在新天子即位三日矣观命舟至罗刹矶朝服东向拜投急湍死刑部尚书暴昭侯奉及其弟敬祖子圯户部侍郎郭任卢迥及任子经礼部侍郎黄魁副都御史茅大芳及其子顺童道童金都御史周璿司中皆被杀召大理少卿胡闰御史高翔至皆衰絰哭杀闰及其妻王氏子传道四岁女郡奴入功臣家稍长日以灰污面髮至寸剪之终身不嫁族诛翔发其先冢亲党悉戍边诸给高氏产者皆加税曰令世世骂翔也又有工部侍郎张安国修撰王叔英编修陈忠左拾遗戴德彝给事陈继之韩永御史林英谢昇甘霖丁志方董镛姚瑄宗人府经历宋徵刑部主事徐子权晋府长史龙鐔前都督府断事高巍浙江按察使王良苏州知府姚善徽州知府陈彦回乐平知县张彦方漳州教授陈思贤及诸生伍性原陈应宗林珏邹君默曾廷瑞吕贤先後各以死殉而松江同知死尤烈逸其姓名或曰周继瑜也既而给事中黄钺赴水死御史曾凤韶自刭死王度以方党谪戍坐语不逊族谷府长史刘璟曰殿下百世後逃不得一篡字下狱自经死武臣之死者指挥使张伦都督同知陈质所镇抚周拱元又若御史叶希贤宾州知州蔡运以奸党被戮御史牛景先走死萧寺或又以三人为从亡云初燕师起北平所属州县官朱宁等弃职去者二百九十人及破金川门朝臣弃位去者四十余人世传有程济及河西佣补锅匠冯翁之属济名尤着或曰惠帝为僧出亡济左右之莫知所终

又有会稽云门寺僧若耶溪樵及金华玉山樵者雪庵和尚皆为建文遗臣又有梁田玉梁良玉梁良用梁中节何申宋和郭节何洲郭良等九人他若乐清临海二樵夫投水死储福为燕山卫卒北平兵起逃去後勾入藉中不食死龚翊为金川门军门开恸哭遂隐而死】质实【嘉定宋嘉定十年析崑山之嚠城乡置嘉定县元升州明复县属苏州府今属太仓州刘家河即娄江在嘉定县北二十四里淮清桥在上元县东秦淮与青溪相接处或曰翁夫人死于赛工桥桥在江宁县南驯象门外罗刹矶在池州府东流县西滨江方輿纪要岩石森立舟帆艰险宾州唐置明属柳州府今属思恩府云门山在府南三十里若耶山在府东南四十四里山下有溪玉山在东阳县东百五十里乐清晋置乐成县五代吴越改乐清明属温州府临海县吴置唐为台州治明台州府治今皆因之徐让卫健不知何许人让山西布政司理问健山西孝义县丞同应募使燕议和不答是年五月还授镇抚赴军前差遣战歿吴与弼字子传龚泰义乌人叶福侯官人周是修具衣冠为赘系衣带间入应天府学拜先师毕自经于尊经阁程本立由佾都御史贬江西副使未行邹朴永丰人或曰朴即大理寺丞邹瑾子黄观死弟觐匿其幼子于他处或云觐妻毕氏孀居母家遗腹生子故黄氏有後于贵池观妻投水时呕血石上成小影陰雨则见名翁夫人血影石观同时金侍郎逸其名徵兵江西有朱进者常州人随行俱被执戮茅大芳之子一作顺童道壽文生二孙添生归生毙于狱胡传道一作传庆张安国与其妻弃舟入太湖凿舟自沈王叔英募兵至广德闻变书絶命词自经元妙观银杏树下妻金氏亦自经二女赴井死陈忠字思中鄞县人林英古田人募兵广德闲京城陷与妻宋氏俱自经死丁志方聊城人姚瑄嘉兴人以奸党诛籍徐子权新淦人闻练子宁死痛哭赋诗自经死龙鐔字德刚万载人高巍自经驿舍又有高不危亦死义或曰不危即巍字也王良字天性祥符人集诸司印九积薪自焚妻先投水死仍徙其家于边陈思贤茂名人帅六生为位哭建文帝于明伦堂皆被戮六生皆龙溪人黄钺字叔杨常熟人建文三年丁父忧孝孺吊问之钺云童俊狡不可任姚善忠义大势当守上游国变杜门不出以户科召自投于水曾凤韶刺血书絶命词于衣襟自杀妻李氏守节死刘璟尝至燕与王奕王曰不稍让我耶对曰不可让者不敢让也王默然燕兵起随谷王归京师献十六策不听命参李景隆军事军败归青田帝即位召之以疾辞逮入京犹称殿下遂及于难张伦不知何许人屡战有功帝招伦降伦笑曰张伦将自卖为丁公乎死之时武臣多降附从容就义者伦一人而已陈质守大同代王欲应燕质持之不得发蔚州广昌附于燕质复取之被执不屈死周拱元沅州人牛景先改姓名徐行死杭州僧寺後籍其家妻子发教坊传五世至滨皆不肯辱身万历中除名复姓程济朝邑人或曰绩溪有道术官岳池教谕上书言某月日北兵起逮下狱释之改官编修从亡数十年後不知所终河西佣行乞金城佣于庄浪鲁氏买羊裘覆以故葛衣数年不易以死或曰赵天泰也天泰官编修三原人补锅匠往来夔州重庆间一日遇冯翁于夔州市相持哭不知所终或曰王之臣翁盖冯?也之臣官钦天监正襄阳人?官刑部司务黄岩人云门寺有老僧泛舟赋诗归则焚之若耶溪樵夫画诗于沙或从後抱持窥之则孤臣去国之词也金华之东山有樵者麻衣戴笠为王姓者题诗曰宗人故疑其王姓雪庵和尚名暨隐于重庆白龙山好读离骚读一篇则投于水投已辄哭至成化初将死其徒曰师何许人张目曰松阳故疑其为松阳叶希贤或曰郭节也梁田玉官郎中为僧良玉中书舍人鬻书海南市良用为舟师死于水中节为道士皆定海人何申中书舍人奉使四川闻变呕血发疽死宋和郭节皆中书舍人何州海州人俱走异域卖卜郭良为道士九人者松阳王诏游治平寺于转轮藏上得书一卷载建文亡臣二十余人可辨者九人乐清樵夫闻杀方博士号哭投港桥下死临海东湖樵夫闻新

诏痛哭投湖死储福无锡人妻范年二十有贵官闻其色欲委禽焉执刀自防养姑以卒龚翊字大章崑山人宣德中巡抚两荐之辞曰翊仕无害于义恐负往日城门一恸耳 本朝乾隆四十一年追諡练子宁忠肃卓敬忠毅陈迪巨敬暴昭王良姚善陈彦回忠烈廖昇王良龚泰周是修黄观茅大芳胡闰王叔英高巍黄钺曾凤韶刘璟忠节侯泰郭任高翔张彦方周继瑜陈质烈愍练大亨叶福程本立邹瑾魏冕邹朴卢迴黄魁周璿戴德彝陈继之韩永林英谢申甘霖丁志方董鏞宋徵徐子权陈思贤王度张伦蔡运节愍陈凤山陈丹山侯敬祖侯玘郭经茅顺童茅道壽胡传道伍性原陈应宗林珏邹君默曾廷瑞吕贤叶希贤牛景先程济河西佣补锅匠冯翁云门僧若耶溪樵玉山樵者梁田玉梁良玉梁良用梁中节何申宋和郭节何洲郭良乐清临海二樵夫储福龚翊并入祠】发明【惠帝以柔牵之资丁强藩之逼智力兼困以至于亡然其天性仁厚亲贤好学除军卫单丁减苏松重赋泽施未久善政在民是以天命虽移人心犹结而成祖本由逆取复果于残杀一时忠义如林蹈九死而不悔何其酷也至若遯山逃海诸人流离昧身之既隐焉用文为而闻风感兴若将亲炙然疑交作所由来矣夫据左氏传则程婴杵臼皆为乌有然马迁逸事人人乐道故明史以为与其过而去之宁过而存之忠贞之气屈极而伸至今四百年後易名列祀折一衷而定论见他说以阙疑所以揭幽潜于日月惧乱贼于春秋岂不韪欤】

迁孝康皇帝主于陵园

【仍旧諡称懿文太子遣安王楹祭告迁其主于陵园太后吕氏仍称太子妃改封吴王允燧广泽王衡王允熲怀恩王徐王允熙敖惠王随母妃吕氏居陵园寻废允燧允熲为庶人锽凤阳改封允熙为甌宁王奉太子祀】

秋七月革建文年号

【诏以今年为洪武三十五年明年为永乐元年建文中更改诸法一复旧制山东北平河南被兵州县复徭役三年未被兵者与凤阳淮安徐滁扬三州蠲租一年余天下州县蠲今年田租之半】质实【案成祖不欲用惠帝年号又不欲于季夏改元故于即位之初仍以洪武三十五年为纪说者遂谓止改是年不知据成祖实录是年六月己巳即位庚午命五府六部一应建文中所改易洪武政令条格悉复旧制遂仍以洪武纪年今年称洪武三十五年秋七月壬午朔下诏改明年为永乐元年又按实录洪武三十五年十月定北平守城功赏以岁月久近为第洪武三十二年至三十五年为上洪武三十三年至三十五年次之洪武三十四年至三十五年又次之则是革除之明证矣其後史官修实录于洪武三十五年六月以前但书元二三四四年而无号盖曲为迁就以掩其非所谓名不正则言不顺亦不足置辨矣】

召陈瑛为左副都御史

【瑛前以受燕邸金通密谋谪广西至是召为副都御史署院事瑛天资残忍受宠任益务刻深言廷臣效死建文者如黄观廖昇王叔英周是修王良顏伯玮等其心与叛逆等请追戮之帝不听後瑛閱方孝孺等狱词遂簿録观叔英等家疎族外亲莫不连染胡闰之狱所籍数

百家号冤声彻天两列御史皆掩泣瑛谓人曰不以叛逆处此辈则吾等为无名于是诸忠臣无遗种矣】

复官制

【吏部言建文中凡中外大小衙门有创革陞降官员额数有增减者及所更改文武散官并宜遵复旧制帝曰前人创制皆有深意行之既久无弊辄改此其所以败亡也俱速改复旧】

以房吉田庆张本为扬州知府

【滁州知州房吉首诣军门朝见泰州知州田庆协谋劾顺江都县知县张本率全城归附皆擢扬州知府吏部言今扬州已有知府谭友德帝命同理府事】质实【江都县汉置明为扬州府治今因之张本字致中东阿人】

发明【成祖但知赏迎附之功而不以任贤安民为务一郡而太守四焉几于治丝而棼之矣一时刑赏不亦滥乎】

八月以侍读解缙编修黄淮入直文渊阁侍读胡广修撰杨荣编修杨士奇检讨金幼孜胡俨同入直预机务【初缙入临太祖为有司所劾谪河州卫吏建文中以董伦荐官翰林待诏帝即位擢侍读与淮常立御榻左备顾问或至夜分帝就寝犹赐坐榻前语机密至是命七人同入直预机务谓之内阁内阁之名及参预机务皆自此始帝于宫中得建文时羣臣所上封事千余通有干犯者命缙等徧閱有关军马钱粮数日者留余悉焚之从容问曰尔等亦有之乎衆稽首未对修撰李贯进曰臣实无之帝曰尔以独无为贤耶食其禄者任其事尔等前日事彼则忠于彼今日事朕当忠于朕耳】

执兵部尚书铁铉至不屈杀之

【初燕兵渡江铉屯淮上兵亦溃至是执铉至反背坐廷中嫚骂令其回顾终不可遂磔于市年三十七子福安戍河池父仲名年八十三母薛并安置海南】质实【河池宋置县明永乐六年升州属庆远府今因之纪事本末铉被执不屈割其耳鼻不肯顾爇其肉纳口中问曰甘否铉厉声曰忠臣孝子肉有何不甘遂寸磔之骂不絶舁大镬油熬之屍不可转令内侍以铁棒十余夹持之使北面笑曰尔今亦朝我耶油沸蹙蹙起丈余仍反背如故乃大惊詫命葬之幼子康安充匠死或曰先死二女发教坊终不辱本朝乾隆四十一年追諡铁铉忠定】

杀御史大夫景清夷其族

【清倜傥尚大节燕师入诸臣死者甚衆清独委蛇班行人怪之一日早朝衣绯怀刃入先是钦天监奏异星赤色犯帝座甚急帝故疑清及朝清独着绯搜得所藏刃诘责之清奋起曰

欲为故主报讐耳遂磔于市族之籍其乡转相攀染谓之瓜蔓抄村里为墟】质实【王鏊守溪笔记文皇至金川门百官迎拜江次清独直立骂不已乃命左右抉其齿且抉且骂含血直嚔上衣乃命醢之罪及九族久之上画寢梦清入殿追之上曰清犹能为厉耶乃籍其乡转相攀染谓之瓜蔓抄其说与明史异纪事本末有青州教授刘固者依清居清遇害连及固与弟国母袁氏同受刑于聚宝门外固子超年十五有膂力临刑仰天大呼网索俱断夺刀连杀十余人诏磔之本朝乾隆四十一年追諡景清忠壮】

九月论邱福等三十人功封爵有差

【邱福淇国公朱能成国公张武等侯者十三人徐祥等伯者十一人又以欸附功封王宁为侯茹瑄陈瑄王佐皆为伯】质实【张武封成阳侯陈珪泰州人封泰宁侯郑亨合肥人封武安侯孟善海丰人封保定侯霍亲蒙古人封同安侯顾成封镇远侯王忠孝感人封靖安侯王聪蕲水人封武城侯徐忠合肥人封永康侯张信封隆平侯李远封安平侯郑亮合肥人封成安侯房寛陈州人封思恩侯徐祥大冶人封兴安伯徐理西平人封武康伯李濬和州人封襄城伯张辅字文弼玉长子封信安伯唐云封新昌伯谭忠渊子封新宁伯孙岩凤阳人封应城伯房胜景陵人封富昌伯赵彝虹人封忻城伯陈旭全椒人封云阳伯刘才字子才霍邱人封广恩伯王宁封永春侯茹瑄封忠诚伯陈瑄封平江伯王佐封顺昌伯又追封张玉荣国公谭渊崇安侯陈亨泾国公王真金乡侯 霍亲旧作火真今改】

冬十月重修太祖实录

【以建文中所修为失实乃重修之命李景隆茹瑄监修前纂修官南昌知府叶惠仲以直书燕起兵事族诛】质实【本朝乾隆四十一年追諡叶惠仲节愍】

十一月立妃徐氏为皇后

【后中山王徐达之女】

御定资治通监纲目三编卷四

卷五

钦定四库全书

御定资治通监纲目三编卷五

【起癸未明成祖永乐元年尽己丑明成祖永乐七年】凡七年

【癸未】成祖文皇帝永乐元年春正月复周齐代岷四王国【帝即位复四王爵辽王植改封荊州至是四年皆子旧封各令之国谷王穗以开门功赏赐优渥寻徙封长沙辽府长史程通建文朝上封事陈御备策有言其多指斥者下狱死并捕其友人徽州知府黄希范论死籍其家】质实【按明史诸王表以辽王植之改封荊州系之永乐二年而辽简王传云建文中燕兵起植渡海归朝改封荊州是又谓植之改封在建文时考明成祖实录洪武三十五年九月敕辽王植曰弟以辽地荒远经涉海洋固请改国荊州且以广宁重镇就留三护卫于彼以益边防欲于荊州别给一卫备使令言之再三却而复至勉从所请建国荊州而仍旧封号则植之改封荊州实于成祖即位之九月明史表传皆误本朝乾隆四十一年追谥程通黄希范节愍】

以北平为北京

【设北京留守行後军都督府行部国子监行太仆寺改北平为顺天府】质实【行都督府置左右都督同知僉事等官行部置尚书二员侍郎四员所属六曹各设郎中等官】

二月遣御史分巡天下

【命监察御史分诣各布政司巡视民瘼自是为定制至洪熙元年定出巡史期以八月】

徙宁王权于南昌

【初权之被诱入关也帝许以事成中分天下及即位留之京师时大宁残废已无可归乃乞改南土请苏州及钱塘皆不许封之南昌诏即布政司为邸瓴甌規制无所更已而有告权巫蛊诽谤者密探无验得已权自是日韬晦构精庐一区读书鼓琴其间终帝之世得无患】质实【姜清秘史王屏从兵与老中官数人偕往南昌称病卧城楼乞即封南昌帝不得已封之考明史宁王以善谋称既被成祖诱执复不许封内地当必图免祸自全岂有不俟命而径往南昌之理成祖实录云遣王之国赐钞一万锭亲制诗送之野史不足据也钱塘秦钱塘县改唐为塘明为杭州府治今因之】

遣中官侯显等使外域

【帝闻乌斯藏僧哈里马勒善幻化欲致一见因通迤西诸番命显齎书币往迤选壮士健马护行未几又遣马彬使瓜哇苏门答刺诸国李兴使暹罗尹庆使满刺加柯枝诸国于是中官衔命异域者纷纷四出矣】质实【瓜哇在占城西南宣德七年入贡表书一千三百七十六年盖汉宣帝元康元年乃其建国之始苏门答刺在占城西南海中或言即汉条支唐波斯大食二国地西洋要会也暹罗即隋唐赤土国後分为暹与罗斛二国元时罗斛并有暹地遂称暹罗斛洪武十年来朝赐暹罗国王之印自是始称暹罗满刺加在占城南海中或言即古顿逊唐哥罗富沙柯枝在西海中或言即古盘盘国 哈里玛勒旧作哈立麻今改】

三月徙大宁都司于保定始以大宁地界乌梁海【初北平兵起厚赂三卫说之来既诱执宁王权乃选乌梁海三千人为奇兵从战至是改北平行都司为大宁都司徒保定遂割大宁地界乌梁海以偿前劳自是洪梁中所筑诸城尽废北边失一重镇天顺末末辽为东西及三岔河北故地悉为乌梁海所有辽东宣府声援隔絕矣】质实【辽河在奉天府西一百里有东西二源自边外合流而南经开原铁岭二县西又南经承德辽阳海城之西又南入海三岔河一作三汉河辽河流经铁岭县北清河自东来会入双峡口西南分为二曰内辽河外辽河远县之西南合为一至开城为巨流河又分流复南漕经海城县之西与太子河会谓之三汉河左右即辽东辽西所由分】

命平江伯陈瑄等督海运饷北京辽东

【洪武中靖海侯吴祯等先後督江浙边海卫军岁转辽饷至三十年以辽饷赢羨罢海运及是北方军储不足乃命瑄与都督佥事宣信帅舟师由海道运粮四十九万石饷北京辽东自後岁以为常】

振直隶北京山东河南饥

夏四月命户部尚书夏原吉浚吴淞江

【时苏松嘉湖数郡频年水灾命原吉治之原吉上言浙西诸郡苏松最居下流嘉湖常颇高环以太湖绵亘五百里纳杭湖宣歙溪涧之水散注淀山诸湖以入三泖顷为浦港湮塞涨溢害稼拯治之法在濬吴淞诸浦按吴淞江袤二百余里广百五十余丈西接太湖东通海前代常疏之然当潮汐之衡旋疏旋塞自吴江长桥抵下界浦百二十余里水流虽通实多窄浅从浦抵上海南跑浦口百三十余里潮汐淤塞已成平陆灏沙游泥难以施工嘉定刘家港即古娄江径入海常熟白茆港径入江皆广川急流宜疏吴淞南北两岸安亭等浦引太湖诸水入刘家白茆二港使其势分松江大黄浦乃通吴淞要道今下流遏塞难濬旁有范家浜至南跑浦口径达海宜濬令深濶上接大黄浦达泖湖之水庶几复禹贡三江入海之旧水道既通乃相地势各置石闸以时启闭每岁水涸时预修圩岸以防暴流则水患可息帝命发民丁开濬原吉昼夜经画布衣徒步以身先之明年原吉复行九月功遂成】质实【吴淞江即古松江自太湖分流经吴江县东南下流至嘉定县入海太湖在苏州府西南常州府东南湖州府北周五百里亦曰五湖震泽具区笠泽皆是也歙县秦置明为徽州府治今因之淀山湖在崑山县

东南八十里松江府西北七十二里淀山旧在湖中岁久沙淤山去湖十余里三泖即泖湖在娄县西三十五里有上中下三名北为上泖亦曰圆泖中为大泖南为下泖亦曰长泖长桥在吴江县东二里长一百三十丈下界浦一作夏驾浦在崑山县东南二十里南泖浦旧志在上海县东北三十六里今堙刘家浜即刘河口在嘉定县北二十四里太仓州东南七十里娄江入海之口也常熟县梁置唐移置于故海虞城明属苏州府今因之白泖港在常熟县东七十里今日白?浦在太仓州东北宋尝置砦于此安亭在崑山县东南四十五里今有镇大黄浦在松江府东南十八里首受三泖诸水东流经华亭诸县至上海县东北合吴淞江入海相传楚春申君所凿亦名春申浦范家浜在松江府东二十五里三江史记正义苏州东南三十里名三江口一江西南上七十里至太湖曰松江一江东北下三百余里入海曰下江亦曰娄江一江东南上七十里至白蚬湖曰上江亦曰东江方輿记要云按原吉治水时多艳称之议者谓原吉浚白茅欲以泄湖水不知白茅势高于湖终不足以泄震泽之水又凿下驾浦掣吴淞江水北达娄江不知娄江虽通仅自复故道而新洋下驾二浦横冲松江之腹是反为之害也又浚上海范家浜掣吴淞江南达黄浦入海不知松江为东西横流大水势顺流驶黄浦为南北纵流小水势逆流缓导南北之纵浦夺东西之巨流是通其小而塞其大计一时之近功忘百世之远图也其後三吴多水患实原吉创垂未善云】

秋八月徙富民实北京

【时发流罪以下垦北京田又徙直隶苏州等十郡浙江等九省富民实之】

削历城侯盛庸爵寻自杀

【帝初命庸镇淮安旋移山东庸常不自安陈英诬以心怀异谋遂削其爵庸自杀】

冬十一月颁大统历于朝鲜诸国

北京地震

闰十一月封胡?为安南国王

【建文初黎季犁弑国王陈日焜立其子顓又弑之立其弟 复弑 而篡其位更姓名曰胡一元名其子苍曰胡?谓出帝舜裔胡公後僭国号大虞年号元圣寻自称太上皇传位于?朝廷不知也帝初践祚?遣使奉表朝贡诡言安南王陈氏嗣絶臣陈氏甥为衆所推乞赐封爵帝遣使齎敕谕其陪臣耆老询以陈氏继嗣有无及推立诚伪?随遣使还奏遂诏封?未几安南旧臣裴伯耆诣阙告难言臣祖父皆执政大夫死国事贼臣黎季犁乃故经畧使黎国髦之子弑主篡位屠戮忠良灭族者以百十数臣兄弟妻孥亦遭害臣御寇东海遁逃诣阙明年老挝送前国王日焜弟陈天平来奔请兵复讐?方使贺正旦帝出天平示之皆错愕下拜有泣者伯耆责使者以大义帝始悔封?之悞遣使诘责令具篡弑之状以闻?复遣使谢罪请迎天平归国帝信之三年冬遣都督僉事黄中吕毅以兵纳天平於安南四年春将至芹站山径险??

伏兵邀杀天平辅行薛崑自经死中等整兵欲战桥断不得前引还帝大怒决意兴师徵中毅至贷其死随军立功自赎】质实【成祖实录陈天平奏云臣天平前安南王烜之孙天明之子日烜弟也日烜卒弟暉立子睨继之睨子顒顒子 皆为黎季犁所弑与史传小异老挝古不通中国成祖即位土官刀线歹贡方物始置老挝军民宣慰使司其地南至交趾西北六十八程至云南布政司今为南掌国芹站在 安南国旧谅山府鸡陵关南吕毅项城人?有低邸二音又七修类稿安南黎季□及子查□疑即?字音昨查权上声玉篇甚大也】

始命内臣出镇

【初惠帝御内臣严燕兵逼江北多逃入军中漏朝廷虚实帝深以为忠於已及即位封赏既行诸宦官言功不已帝患之会镇远侯顾成都督韩观刘真何福等出镇贵州广西辽东宁夏诸边乃命宦官有谋者与之偕行赐公侯服位诸将上未几云南大同甘肃宣府永平宁波亦各相继遣使已又设京营提督大权悉以委寄遂为一代厉阶】质实【王世贞史料以中官出镇自永乐八年遣马靖始明史本革除备遗录始于是年特书于本纪今据之书于此】

【甲申】二年春三月始选进士为翰林院庶吉士

【先是庶吉士不专属翰林及是春廷试进士赐曾棨等及第出身有差复命於第二甲择文学优等杨相等五十人及善书者汤流等十人俱为翰林院庶吉士于是庶吉士遂为翰林官寻又命学士解缙等选才资英敏者就学文渊阁缙等选修撰槩庶吉士相等二十八人以应二十八宿之数庶吉士周忱自陈年少愿学帝喜而俞之时人谓之挨宿以其在二十八宿之外也】质实【选进士为翰林院庶吉士谓之馆选其後或闲科一选或连科屡选或数科不选所选多寡无定额比三年试之其留者二甲授编修三甲授检讨不得留者为给事中御史主事或外为州县官谓之散馆宣德五年始命学士教习万历以後掌教习者以吏礼二部侍郎为之曾棨字子启永丰人杨相泰和人汤流泰和人周忱字恂如吉水人按实录缙等选修撰曾棨编修周述周孟简庶吉士杨相刘子钦彭汝器王英王直余鼎章敞王训柴广敬王道熊直陈敬宗沈升洪顺章朴余学夔罗汝敬卢翰汤流李时勉段明倪维哲袁添禄吾绅杨勉二十八人就学文渊阁命司礼监月给笔墨纸光禄给朝暮膳礼部月给膏烛钞人三铤工部择近第宅居之周述字崇述吉水人孟简述从弟刘子钦吉水人彭汝器安福人王英字时彦金谿人王直泰和人余鼎星子人章敞字尚文会稽人王训庐陵人柴广敬余姚人王道永嘉人熊直丰城人陈敬宗字光世慈谿人沈升海宁人洪顺怀安人章朴宁海人余学夔泰和人罗汝敬吉水人卢翰星子人李时勉名懋以字行安福人段明守时举武进人倪维哲一作惟善晋江人袁添禄衡山人吾绅字叔缙开化人杨勉江宁人】

夏四月立子高炽为皇太子封高煦为汉王高燧为赵王

【帝初起兵高煦常从战有功帝以为类已高煦亦以此自负谋夺嫡及议建储邱福等言高煦有功宜立独金忠力争以为不可帝召解缙问之缙称皇太子仁孝天下归心帝不应缙又顿首曰好圣孙为皇孙瞻基也复问黄淮尹昌隆对与缙同帝意乃决】质实【高煦初封

云南後改乐安高燧封彰德皇孙瞻基仁宗孝诚张皇后生是为宣宗】

以僧道衍为太子少师

【道衍从帝藩邸定策起兵战守机事皆决焉帝即位授道衍僧録司左善世及是论功为第一拜资善大夫太子少师复姚姓赐名广孝帝与语呼为少师而不名命蓄髮不肯赐第及两宫人皆不受常居僧寺退朝仍緇衣帝往来两都出塞北征留辅太子於南京皇长孙出阁就学又侍说书】

六月汰冗官

【帝以吏部所録中外官数比旧额增数倍命汰之尚书蹇义等言在京各官额外添设者送部别用在外令所隶上官严行考核今年所取二甲三甲进士量留七十员分隶诸司观政各王府教授伴读缺於第三甲内选用余悉遣归进学从之】

封哈密恩克特穆尔为忠顺王

【哈密汉伊吾卢地元末以威武王纳固尔镇之改封肃王卒弟恩克特穆尔嗣帝即位遣使招谕遂入贡诏封忠顺王明年迺北汗郭勒齐毒死之以病卒闻命其兄子托克托袭封】质实【伊吾卢後汉置宜禾都尉於此唐置伊州明设哈密卫其後为土尔番所据今编旗视各蒙古有通判驻之在嘉峪关西北一千六百里纳固尔元族子恩克特穆尔旧作安克帖木儿纳固尔旧作纳忽里托克托旧作脱脱今并改】

秋九月周王橚来朝献驹虞

【百官请贺帝曰祥瑞之来易令人骄是以明主遇祥自警未尝因祥自怠警怠者国之安危系焉驹虞若果为祥在朕更当修省】

以胡俨为国子祭酒

【俨在阁承顾问尝不欲先人然少戇帝以为祭酒遂不预机务】

冬十月河决开封

【命河南都司布政司城池有冲决者即修之】

黄河清

【蒲城河津黄河清十二月同州韩城黄河亦清】质实【河津宋宣和初改龙门县曰河

津明属蒲州今属绛州同州西魏置明属西安府今升府韩城隋改夏阳县曰韩城明属同州今属同州府】

籍长兴侯耿炳文家炳文自杀

【刑部尚书郑赐都御史陈英劾炳文衣服器皿有龙凤饰玉带用红鞢僭妄不道诏籍其家炳文遂自杀子璿前军都督僉事尚懿文太子长女江都公主建文初进驸马都尉炳文北伐璿劝直捣北平不听帝即位璿称病不出坐罪死弟璘後军都督僉事与弟尚宝司卿瑄皆坐罪死炳文虽太祖功臣然以惠帝肺腑戚故赐等希旨劾之遂及】

十一月京师地震

【济南开封亦震】

蠲苏松嘉湖杭水灾田租

十二月李景隆有罪削爵

【初景隆以迎降功加太子太保授左柱国朝廷有大事景隆以班首主议诸臣皆不平周王首发其建文时至邸受赇事廷臣复劾其与弟增枝谋逆有状诏削勲号絶朝请至是李至刚复言其居家不道事遂夺爵固私第籍其家】质实【李至刚名纲以字行华亭人】

【乙酉】三年春正月鞬鞞索和尔内属

【初北平兵起会果勒齐弒坤特穆尔称汗遣使贺之遂与通和其国公赵图噜根等率衆助战并厚加犒赐及帝即位屡使致书果勒齐赐之银币并及其知院阿噜台等至是阿噜台别部索和尔及察罕达噜噶等先後来归】质实【索和尔旧作埽湖儿赵图噜根旧作脱列干达噜噶旧作达鲁花今并改】

免顺天永平保定田租二年

【以数年用兵供给特劳故休息之】

二月命赵王高燧居守北京

夏四月除直隶浙江湖广四川广东江西福建河南户絶田租

【计田三万五千一百八十余顷是春免湖广被水田租六月振苏松嘉湖饥免天下农民户口食盐钞秋九月蠲苏松嘉湖水灾田租凡三百三十八万石】

六月遣中官郑和使西洋

【帝疑建文帝亡海外命和及王景弘等踪迹之多齎金币率兵二万七千余人造大船六十有二由嘉定刘家港泛海至福建达占城以次遍历西洋颁天子诏宣示威德因给赐其君长不服则以兵慑之五年和等还诸国使者随和朝见帝大喜未几复命和往遍赉诸国由是来朝者日衆和先後凡七奉使三擒番长诸番利中国货物益互市通商往来不絶故当时有三保太监下西洋之说而後之奉命海表者莫不盛称和以夸外番然中国前後耗费亦不貲其随行军士或以舟败漂没异国有十余年始得还者什不存一二云】质实【郑和云南人初使擒旧港酋陈祖义旧港故三佛齐国也再使擒锡兰国王伊埒古鼐尔及其妻子最後苏门答刺王锡幹拉谋弑其主并欲杀和和率兵讨擒之和是年奉使五年九月还六年九月再使九年六月还十年十一月往十三年七月还十四年冬往十七年七月还十九年春往二十年八月还二十二年正月往比还成祖已晏驾洪熙元年二月仁宗命和以下番诸军守备南京南京设守备自和始宣德五年六月和景弘复奉命历忽鲁谟斯等十七国而还和事三朝所历占城瓜哇真腊旧港暹罗古里满刺加渤泥苏门答刺阿鲁柯大葛兰小葛兰西洋琐理琐里加异勒阿拔把丹南巫里甘把里锡兰山南渤利彭亨急兰丹忽鲁谟斯比刺溜山孙刺木骨都东麻林刺撒祖法儿沙里湾泥竹步榜葛刺天方黎伐那孤儿凡三十余国伊埒古鼐尔旧作亚烈苦奈儿锡幹拉旧作苏幹刺今改正】

遣中官山壽师出云州

【时命武城侯王聪规边兵别遣山壽师骑兵出云州北行会之人齎一月粮每三十里置五骑以待驰报宦者典兵自此始】质实【云州驿在今赤城县北三十里即元故云州也明洪武初废州置驿宣德五年置城戍为云州堡景泰五年增设千户所 本朝改设守备】

冬十月杀驸马都尉梅殷

【初殷守淮安悉力防御及帝即位殷尚拥兵淮安帝迫公主啗血为书招之殷得书恸哭乃还京既入见帝曰驸马劳苦对曰劳而无功徒自愧耳帝默然二年陈英奏殷祝诅畜养亡帝命执殷家人送辽东至是殷入朝都督佥事谭深指挥赵曦挤殷死桥下以殷自投水闻公主牵帝衣大哭问驸马安在帝曰为主迹贼无自苦寻都督同知许成发其事帝命法司治深曦罪深曦大呼曰上命也奈何罪臣帝大怒立斩之籍其家封成永新伯官殷二子顺昌为中府都督同知景福为旗手卫指挥使 鄂尔和者降人也事殷久请於帝断深曦手足剖其赐祭殷遂自经死又国子博士黄彦清坐在殷军中私謚建文帝诛死】质实【黄彦清歙县人本朝乾隆四十一年追謚彦清节愍 鄂尔和旧作瓦刺灰今改正】

十二月沐晟讨八百大甸降之

【初洪武二十一年八百入贡设宣慰司自是及永乐初频入贡赐予如例二年以土官刀招你为八百者乃宣慰使其弟刀招散为八百大甸宣慰使已而遣内官齎敕谕孟定孟养等

部道经八百大甸为招散所阻及是晟帅车里诸宣慰兵至八百境破其猛利石崖及者答二寨又至整线寨木邦兵破其江下等十余寨八百恐诣军门降勅班师】质实【八百世传部长有妻八百各领一寨因名八百媳妇元元统初招附置八百等处宣慰司其地东至车里南至波勒西至大古喇与缅甸北至孟艮好佛恶杀寺塔以万计俗名慈悲国嘉靖间为缅所并其酋避居景线为小八百孟定本古蛮地名景麻甸元至元中置孟定路军总管府明洪武十五年改孟定府後废成祖即位复置今因之隶永昌府孟南汉永昌西徼地蛮名迤水元至元中置云远军民总管府明洪武十五年改云远府十七年改孟养府後废成祖即位复置永乐二年改宣慰使司今为孟艮土司地车里古产里元置撒里路军民总管府洪武十五年改置车里军民府天启中亡于缅甸木邦一名孟邦元立木邦木邦路军民总管府洪武十五年改木邦府後废成祖即位复置永乐二年改宣慰使司在今永昌府徼外】

【丙戌】四年春正月初御午朝

【谕六部及近臣曰早朝四方奏事多君臣之间不得尽所言午後事简卿等有所欲言可从容陈论毋以将晡朕倦於听纳朕有所欲言者亦欲及此时与卿等商榷也】

三月帝诣国子监行释奠礼

【帝服皮弁行四拜礼御彝伦堂授经设几榻赐讲官及大臣翰林坐祭酒司业博士助教序进坐讲诸生圜立以听祭酒胡俨讲尧典同业张智讲泰卦赐百官茶】质实【张智顺昌人】

置开元广宁马市

【设马市三一在开原南关以待海西一在开原城东一在广宁以待朵颜三卫既而城东广宁市皆废惟南关市独存】

夏四月诏求遗书

【帝视朝暇辄御便殿阅书史召翰林儒臣讲论尝问文渊阁经史子集皆备否学士解缙对曰经史粗备子集尚多阙乃命礼部遣使四出购求遗书】

振常州庐州安庆饥

【是秋九月振苏州常杭嘉湖流民复业者十二万余户】

六月己未朔日有食之

【是日陰云不见礼部尚书郑赐请贺帝曰天下至大他处见者多矣且陰阳家言日食而

陰云不见者水将为灾可贺乎不许】

秋七月以成国公朱能为征夷将军帅师讨安南【帝大发兵讨安南命能为征夷将军沐晟张辅副之帅十八将军分道进能出广西晟出云南诏之曰安南皆朕赤子惟黎季犁父子首恶必诛他脇从者勿治罪人既得择陈氏子孙贤者立之母养乱母玩寇母毁庐墓母害禾稼母攘财货掠子女母杀降有一於此虽功不宥焉】

闰七月营北京宫殿

【廷臣请建北京宫殿以备巡幸乃分遣大臣诣川湖各省采木命泰宁侯陈珪等董治瓠璧徵天下工匠选在京诸卫及河南山东等处军民赴北京供役期以明年五月兴工】

八月齐王榑有罪废为庶人

【榑性凶暴复国後益骄纵帝赐书戒之不悛五月榑入朝廷臣劾榑罪榑厉声曰奸臣喋喋又欲效建文时耶会尽斲此辈帝闻之怒留之京邸削官属护卫及是召其子至并废为庶人】

冬十月朱能卒於军诏以张辅代之

【能至龙州病卒追封东平王諡武烈】

十一月高文雅上书言事诏授以官

【先是通政使受四方章奏非重务不以闻帝知之降旨切责至是户部人材高文雅上书言时政首举建文事次及救荒恤民陈瑛劾其狂妄请罪之帝曰草野之人不知忌讳言苟可采勿以直而废之谕郑赐曰不罪直言则忠言进谀言退瑛刻薄非助朕为善者命吏部量授文雅官】

十二月赦

【先是五月谕法司曰决狱贵明而无滞前见刑部引奏辽东卫官纵军士往高丽者一指挥专理屯田未尝与知而一概逮系久不疏决至於病危设死是枉杀之也今天气已热徒流以下令所在发遣十一月法司进月系囚数几数百人大辟十之一帝曰寒沍淹禁必有死不当罪者凡杂犯死罪以下约二日悉发遣至是大赦天下】

张辅大破安南兵

【辅军出凭祥度坡垒关檄季犁二十罪进破隘留鸡陵二关道芹站抵新福沐晟亦由蒙

自莲花滩出宣光江径野蒲斩木通道夺诸关隘营白鹤安南有东西二都依宣洮沱富良四江为固贼缘江南岸树栅筑城於多邦隘城栅桥舰连亘九百余里兵七百万欲据险以老辅师辅军次富良江遣都督朱荣破贼於嘉林江遂与沐晟合军进攻多邦城夜四鼓令都督黄中等将死士人持炬火铜角越重濠云梯傅其城都指挥蔡福先登士蚁附而上角鸣万炬齐举遂入城贼驱象迎战辅以画狮蒙马冲之翼以神机火器衆皆反走贼大溃追至繖圆山尽焚缘江木栅进充东都辑吏民抚降附遣别将李彬陈旭取西都分军破其援兵三江州县皆望风降季犁焚宫室仓库遁入海明年春定东潮谅江诸府大破季犁舟师於木丸斩首三万余级】质实【凭祥宋凭祥峒明置县後升州属思明府今为土州属太平府坡垒关在凭祥州西南界首关南三十里隘留关在安南旧谅山府北隘留南为鸡陵关又南为芹站永乐五年改鸡陵关为镇夷关新福安南县属北江府在芹站西蒙自县元置明属临安府今因之莲花滩在蒙自县南为入安南大道即梨花江所经也宣光江在安南旧宣化府旷县北源自云南临安府教化长官司入境流七百余里达宣化野蒲隘在宣化府西北白鹤江在安南旧兴化府北东西二都交人以交州府为东都即古龙编城以清化府为西都即古九真城洮江即云南澜沧江下流经安南临洮府谓之洮江其北曰宣江亦曰宣化江其南曰沱江合流处曰三口至交州界为富良江多邦隘在安南旧广威州西嘉林江在安南旧北江府西南富良江支流也以经嘉林州故名繖圆山在安南旧嘉兴州东三江府领洮江宣江沱江三州东潮州属旧新安府谅江府在安南旧交州府东北木凡江在交州成祖实录辅得谍报贼舟往来富良江距交州下流二十里又言季犁等聚舟於黄江等处遂领军次木丸江水陆并进朱荣字仲华沂人】

甌宁王允熙卒

【邸中火王暴卒年十六諡哀简】

【丁亥】五年春二月谪解缙为广西参议

【缙建议立太子语稍稍传外庭高煦深怨之潜缙泄禁中语帝怒遽出缙】

三月封西僧哈里玛勒为大宝法王

【前年冬侯显偕哈里玛勒至帝令建齐於灵谷寺为高帝高后荐福或言卿云甘露青鸟白象之属连日毕见帝大喜侍臣多献赋颂乃封哈里玛勒万行具足十方最胜图觉妙智慧善普应佑国演教如来大宝法王西天大善自在佛领天下释教赐印诰其徒三人亦封灌顶大国师】质实【灵谷寺在上元县东北鍾山之阳】

夏四月皇长孙瞻基出阁就学

【时生十年矣】

五月张辅禽黎季犁及其子苍送京师

【官军追贼至胶州县闷海口还至咸子关贼以海艘入富良江辅与沐晟夹岸迎战都督柳升等以舟师横击大破之季犁父子以小舟遁至海门泾鹄浅时久晴水涸贼弃舟走官军至骤雨水涨数尺舟毕渡抵茶笼循举厥江至日南州奇罗海口永定卫卒王柴胡等生擒黎季犁於海口山中土人武如卿等获其子苍於永盎海口高望山及其伪太子诸王将相大臣等槛送京师安南平】质实【胶水县在安南旧奉化府西南闷海口其地下湿不可驻咸子关在旧建昌府快州西北自东南海道入者此为要会之处茶笼城在安南旧乂安府北奇罗县在乂安府东南方輿纪要禽黎苍於天琴山山在奇罗县东是秋八月前军都督佥事高士文捕七源州余寇至广源州遇寇力战死辅遣将讨平之高士文咸阳人赠建平伯柳升怀远人】

河南饥逮治匿灾有司

【谕都察院曰河南郡县荐罹旱涝有司匿不以闻有言雨赐时若禾稼茂实者及遣人视之民所收十不及四五或十不及一至掇草实为食闻之惻然亟发粟振之已有饥死者此朕任用匪人之过已悉寘於法其榜谕天下有司凡灾伤不以闻者罪之不宥】

六月置交址布政司以行部尚书黄福领之

【求陈氏後不得乃以安南为交址设交州北江谅江三江建平新安建昌奉化清化镇蛮凉山新平演州乂安顺化十五府分辖三十六州一百八十一县又设太原宣化嘉兴归化广威五州直隶布政司分辖二十九州县其他要害咸设卫所控之置三司以前工部侍郎张显宗福建布政司左参政王平为左右布政司前河南按察使阮友彰为按察使命尚书黄福兼掌布政二司事吕毅掌都司黄中副之】质实【成祖实录改交址龙兴府为镇蛮府建兴府为建平府天长府为奉化府新兴府为新安府国威州为威蛮州宣光州为宣化州上福州为福安州安邦州为靖安州日南州为南靖州布政州为政平州明灵州为南灵州龙眼县为清远县安世县为清安县应天县为应平县山明县为山定县上福县为保福县龙潭县为清潭县丹凤县为丹山县龙拔县为陇拔县天施县为施化县古战县为古平县统兵县为统宁县佛誓县为善誓县天本县为安本县独立县为平立县黎家县为黎平县御天县为新化县费家县为古费县安邦县为同安县安兴县为安和县茶龙县为茶清县杜家县为古杜县上路县为路平县上福县为福康县布政县为政和县邓家县为古邓县左布县为左平县世荣县为士荣县余仍其旧定交址所隶州县交州北江谅江三江建平新安建昌奉化清化镇蛮凉山新平演州乂安顺化总十五府以威蛮福安三带慈廉利仁五州隶交州府本府亲领东关慈廉二县威蛮州领清定清威应平大堂四县福安州领保福扶留清潭三县三带州领扶隆安朗扶寧安乐立石元郎六县慈廉州领丹山石室二县利仁州领清廉平陆古榜古者古礼利仁六县以嘉林武宁北江三州隶北江府本府亲领超类嘉林二县嘉林州领安定细江善才三县武宁州领仙游武宁东岸慈山安丰五县北江州领新福善誓安越三县以谅江南策上洪三州隶谅江府本府亲领清远古勇凤山那岸陆那五县谅江州领清安安宁古陇保禄

四县南策州领青林至灵平河三县上洪州领唐濠唐安多锦三县以洮江宣江沱江三州隸三江府洮江州领山围麻溪清波夏华四县宣江州领东栏虎岩西栏三县沱江州领陇拔古农二县以长安州隶建平府本府亲领懿安安本平立大湾望瀛五县长安州领威远安谟安宁黎平四县以东潮靖安下洪三州隶新安府本府亲领峡山太平多翼阿瑰西关五县东潮州领东潮古费安老水棠四县靖安州领同安支封安立安和新安大读万宁云屯八县下洪州领长津四岐同利清沔四县以快州隶建昌府本府亲领俸田建昌布真利四县快州领仙吕施化东结芙蓉永涸五县以美禄胶水西真顺为四县隶奉化府以清化爱九真三州隶清化府本府亲领古滕古弘东山古雷永宁安定梁江七县清化州领俄乐细江安乐磊江四县爱州领河中统宁宋江支俄四县九真州领古平结悦缘觉农四县以新化廷河古兰神溪四县镇蛮府七源上文下文万崖广源上思朗下思朗七州隶凉山府本府亲领新安如敖丹巴邱温镇夷渊董七县七源州领水浪琴脱容披平县六县上文州领杯兰庆远库三县以政平南灵二州隶新平府本府亲领福康衙仪知见三县政平州领政和古邓从质三县南灵州领丹裔左平夜度三县以演州隶演州府演州领千冬芙蓉芙菡琼林四县以南靖驩二州隶义安府本府亲领衙仪丕禄古杜支罗真福土油偈江土黄八县南靖州领河黄磐石河华奇罗四县驩州领石塘东岸路平沙南四县以顺化二州隶顺化府顺州领巴阆利调安仁三县化州领利蓬士荣乍令茶偈思容蒲苔蒲浪七县改太原等五镇为太原宣化嘉兴归化广威五州直隶布政司太原州领富良司农武礼洞喜永通宣化弄石大慈安定感化太原十一县宣化州领旷当道文安平原底江收物大蛮杨一九县嘉兴州领笼蒙四忙三县归化州领安文盘文振水尾四县广威州领麻笼美良二县又设库仓儒学医学僧纲司税库司局河泊所巡检司递运所盐课司等官交址城中立交州左中右三卫富良江北立交州前卫昌江邱温各立卫市桥隘留关各立守御千户所设三江清化义安新平顺化五卫及演州南靖二守御千户所又设交州後卫镇夷凉山二卫及十五千户所明年设交址按察司之山南山北海东海西四道分司升太原州宣化州为府按此所载交址疆域最详足资考证故备列之张显宗字明远宁化人王平息县人】

以丁钰为刑科给事中

【山阳民里社赛神钰诬讐其聚衆谋不轨坐死者数十人法司因称钰才可用立命为给事中伺察百僚小过辄上闻举朝侧目钰居官十年贪黷不顾廉耻母丧未朝起复视事辄随衆大祀斋宫复与庆成宴为言官所劾谪戍边】质实【丁钰山阳人】

发明【告讐小人奸黠之事也给事耳目清切之官也帝於是可谓教民偷而濫天爵矣一时陈瑛纪纲马麟秦政学赵纬李芳等肆其毒螫朝野侧目殃及无辜意旨所在其流滋甚是年刑部尚书则吕震也都御史则陈瑛也瑛不足道史称震为人佞谀倾险首先降附即迎旨举钰一节鄙夫情状不亦可耻乎】

秋七月皇后徐氏崩

【后好读书常为帝言当世贤才皆高皇帝所遗陛下不宜以新闻旧又言帝尧施仁自亲

九族始帝辄嘉纳初后弟增壽为惠帝所诛帝欲赠爵后力言不可不听竟封之使其子景昌袭以告后后曰非妾志也终弗谢及是崩年四十有六帝悲恻为荐大齐於灵谷天禧二寺听羣臣致祭光禄为具物謚曰仁孝皇后】

冬十一月彗星见

【谕赵王高燧曰彗星见燕分尔宜谨慎出入伺察边境毋或怠忽】

修永乐大典书成

【先是元年秋七月帝谕翰林侍读学士解缙等曰天下古今事物散载诸书篇帙浩穰不易检閱朕欲悉采各书所载事物类聚之而统之以韵尝观韵府回溪二书事虽有统而纪载大畧尔等其如朕意凡书契以来经史子集百家至於天文地志陰阳医卜僧道技艺之言备辑为一书毋厌浩繁二年十一月翰林院学士兼右春坊大学士解缙等进所纂錄韵书赐名文献大成既而上览所进书尚多未备遂命重修敕太子少师姚广孝刑部侍郎刘季篪及缙总之命翰林院学士王景侍读士王达国子祭酒胡俨司经局洗马杨溥儒士陈济为总裁翰林院侍读邹辑修撰王褒梁潜吴溥李贯杨觀曾棨编修朱紘检讨王洪蒋驥潘畿王偁苏伯厚张伯頴典籍梁用行庶吉士杨相左春坊左中允尹昌隆宗人府经历高得暘吏部郎中叶砥山东按察僉事晏璧为副总裁命礼部简中外官及四方宿学老儒有文学者充纂修简国子监及在外郡县学能书生员繕写开馆於文渊阁命光禄寺给朝暮膳至是书成凡二万二千九百三十七卷一万一千九十五册赐名永乐大典帝亲制序冠之赐广孝等二千一百六十九人钞有差】质实【韵府羣玉元陰时夫陰中夫撰回溪史韵宋钱讽撰陈济字伯载武进人以布衣召书成授右赞善梁潜字用之泰和人王洪字希范钱塘人王偁字孟扬闽人叶砥上虞人】

【戊子】六年春正月岷王梗有罪削其官属

【梗在藩与沐晟交恶帝以书谕梗而诏戒晟梗沈湎废礼杀戮吏民帝怒夺宝册寻念梗建文中久囚系复子之梗不悛削其官属护卫洪熙初徙武冈寄居州治久之始建王邸】质实【武冈州宋武冈军明初府寻降州属宝庆府今因之】

二月除北京逋赋

【诏除北京永乐五年以前逋赋免诸色课程三年三月除河南山东山西永乐五年以前逋赋】

夏四月始命云南乡试

【云南巡按御史陈敏言云南自洪武中已设学校请如各布政司三年一试从之】

五月京师地震

六月张辅沐晟班师还京

【自唐之亡交趾沦于蛮服四百余年至是复入版图辅等振旅还京上交趾地图东西相距千七百六十里南北相距二千八百里户三百十二万帝为赋平安南歌论功辅封英国公晟封黔国公王友清远侯柳升安远伯余爵赏有差】质实【王友荊州人】

秋八月交趾复乱

【大军之讨黎氏也陈氏故官简定先降将遣诣京师复逸去说化州伪官邓悉阮师等下之定僭号称大越改元兴庆出没乂安化州山中大军还即出攻盘滩咸子关扼三江府往来孔道诸州县皆响应事闻帝命沐晟以兵四万讨之至冬成与简定战於生厥江败绩参赞尚书刘儒被围自经死吕毅及参政刘昱皆死明年春复命张辅王友帅师与晟协剿简定自称上皇立陈季扩为帝改元重光季扩本蛮人诡言陈氏後交人不忍陈氏之亡相率归季扩贼势益张】质实【生厥江在交州府西刘昱武城人】

九月诏里狱囚

【科臣劾刑部都察院淹禁罪囚瘐死者衆帝召尚书吕震等切责期三日内悉疏杂犯死罪以下囚】

冬十二月命安远伯柳升平江伯陈瑄率舟师沿海捕倭

【明年春升遇倭於灵山败之瑄追至白山岛百户唐錠等追至朝鲜义州界捷奏敕还师】质实【灵山在莱州府胶州东南海中白山岛在登州府蓬莱县海中】

阿鲁台杀果勒齐立布尼雅实哩为汗

【鞑靼知院阿鲁台以果勒齐非元裔杀之迎元之後布尼雅实哩于巴什伯里立为汗】

【己丑】七年春正月申茶禁

【洪武中以茶易马上马给茶八十筋中下以次减之帝初年招来远人递增其数至是碶门茶马司至用茶八万余筋仅易马七十匹且多瘦损乃申严茶禁增设茶马司後又特遣御史巡督】

二月帝北巡命皇太子监国

【诏惟文武除拜边军调发上请行在自余常务悉后太子处分命吏部尚书蹇义兵部尚书金忠右春坊大学士黄淮左谕德杨士奇辅太子监国时御史袁纲覃珩党附陈瑛?兵部主事李贞太子察其冤立白之以帝方宠瑛故特宥英而下珩於狱又御史方恢匿父丧太子令械送行在于是人皆服用法之当】质实【袁纲覃珩陷兵部主事李贞明史瑛言兵部主事李贞受皂隶叶转等四人金请下贞狱贞妻击登闻鼓诉冤皇太子命大臣廷鞠之自辰至午贞等不至惟叶转至讯之云贞不承不胜拷掠死三皂隶皆笞死三日矣贞实未尝受金先是袁纲覃珩至兵部索皂隶贞猝无以应纲珩衔之兴化狱】

茹瑺下狱死

【瑺以首劝进封忠诚伯坐不送赵王遣归里既复逮至京得释还过长沙不谒谷王王以为言时方重藩王礼谷王又开金川门有功帝意向之陈瑛遂劾瑺违祖制远下锦衣卫狱瑺知不免命子铨市毒药服之死法司劾铨毒其父请以谋杀父母论後以铨实承父命减死与兄弟家属二十七人谪戍广西河池仁宗立释还】

发明【瑺洪武时起家监生至尚书太子少保健文朝暴昭发其贼罪出掌河南布政司寻复召为兵部尚书任亦重矣乃金川门之启不能致命反首先劝进遂封爵子监尚秦府郡主以为可长保富贵也岂知仰药囹圄?其子於大恶人孰无死如瑺真悔其不早耳史称瑺居官谨慎谦和有容其死也人颇惜之瑺盖庸鄙者流迫於瑛纲之毒手虽杀不以罪而不书其官所以励臣节也】

三月都督佥事平安自杀

【初惠帝时安以列将骁勇善战屡挫燕军已而兵败被执送北平帝即位累进後军都督佥事及是帝览章奏见安名曰平安尚在耶安闻遂自杀】

夏闰四月诏重罪皆五覆奏

【发遣以上皆五覆奏以示钦恤】

五月封威喇特玛哈穆特为顺宁王太平为贤义王巴图博罗为安乐王

【威喇特蒙古部落在鞑靼西元亡其强臣孟克特穆尔据之帝自起兵北平即与之通和已而孟克特穆尔死衆分为三其渠曰玛哈穆特曰太平曰巴图博罗帝即位屡遣使谕赐至是使诺观达什等来贡马仍请封遂封三人皆特进金紫光禄大夫加王号自是岁一朝贡】质实【威喇特驻铁柱谷在归化城西三百六十里巴图博罗旧作把秃孛罗孟克特穆尔旧作猛可帖穆儿诺观达什旧作煖答失今并改余见前】

遣给事中那驥使鞑靼为所杀

【帝以书谕布尼雅实哩不听命至是复遣驥往布尼雅实哩杀之】

诏御史勿复用吏

【召御史张循理等二十八人至问其出身皆由进士及监生惟洪秉等四人由吏帝曰用人虽不专一途然御史为朝廷耳目之寄宜用有学识达治体者黜秉等为序班诏自今勿复用吏明年冬申谕吏部着为令】

秋七月以邱福为征虏大将军帅师征鞑靼败绩【帝以福为大将军王聪霍亲副之王忠李远为左右参将将精骑十万北讨时布尼雅实哩已为威喇特所袭破与阿鲁台徙居胪胸河福帅千骑先驰遇游兵击败之遂渡河获其尚书一人言布尼雅实哩闻大兵至惶恐北走去此可三十里福大喜曰当疾驰擒之诸将请俟诸军集侦虚实然後进福不从率衆直薄敌营战二日每战敌辄佯败引去福銳意乘之初帝虑福敢战轻敌陞辞曰戒之曰兵事宜慎重勿易敌为所给及是李远谏曰敌诱我深入进必不利始天子与将军言何如而遂亡之耶王忠亦力言不可福皆不听敌衆奄至围之数重聪战死远马蹶被执骂不絶口死福及霍亲王忠皆被杀全军尽没事闻帝震怒夺福封爵徙其家海南追赠远莒国公諡忠壮聪漳国公諡威毅念诸将无可任遂决意亲征】

九月庚午朔日有食之

冬十一月张辅讨交址破之获简定

【辅以贼负江海不利陆师乃驻北江仙游就叱览山伐木造舟招諒江诸府避寇者复业遂进至慈廉州破喝门江克广威州孔目栅遣徐政戍盘滩贼党邓景异来攻飞枪洞政脇犹力战腹溃死辅进师咸子关贼以舟蔽江为营时八月西北风急官军冲击乘风纵火俘斩无算追至太平海口邓景异迎战短兵接击斩三千级余衆皆溃于是季扩遣使自言陈氏後请绍封辅曰向者徧索陈氏後不应今诈也吾奉命讨贼不知其他叱斩之遂遣朱荣等以步骑先辅舟师继之自黄江至神投海会师清化获简定於美良山中及其党送京师皆伏诛惟陈秀扩遁去帝留沐晟讨之召辅还】质实【喝门江在交州府西南太平海口在咸子关南黄江在旧清化府东元和志谓之小黄江下流入海神投海亦曰神符海口在旧建平府南美良交址旧县在故广威州东南徐政仪真人建文时为扬州卫副千户全城归陞都指挥同知】

始令中官刺事

【守京城内使言城门郎纵酒擅离所守城门郎亦言以母病白内使暂归即来尝以事忤内使故构臣皇太子曰城门郎无罪内使上网朝廷下诬无罪者下锦衣卫治之令榜示今後内官内使言事不实及诬私枉人者寘重典】

御定资治通监纲目三编卷五

卷六

<史部,编年类,御定资治通监纲目三编>

钦定四库全书

御定资治通监纲目三编卷六

【起庚寅明成祖永乐八年尽己亥明成祖永乐十七年】凡十年

【庚寅】八年春正月免扬州淮安凤阳陈州水灾田租【揚州淮安凤阳陈州去年被水至是免其所逋田租军民有典卖子女者官为赎回】

二月帝自将征鞑靼

【以北征诏天下命户部尚书夏原吉总行在九卿事辅皇长孙瞻塞留守北京命学士胡广庶子杨荣谕德金幼孜从以生友督中军柳升副之何福郑亨督左右哨陈懋刘才督左右掖刘江督前哨衆五十万出塞】质实【陈懋为陈亨子壽州人封宁阳侯刘江即刘荣宿迁人初冒父名江後永乐十七年以破倭功封广寧伯始更名荣】

夏五月大败鞑靼于鄂诺河布尼雅实哩遁遂征阿鲁台

【帝至胪胸河布尼雅实哩闻大军至惧欲与阿鲁台俱西阿鲁台不从衆溃散君臣始各为部布尼雅实哩西奔阿鲁台东奔帝追及于鄂诺河布尼雅实哩拒战帝麾兵奋击大败之布尼雅实哩弃輜重牲畜以七骑遁遂诏移师征阿鲁台】质实【鄂诺河即黑龙江上流发源自鲁克伦河西北二百里许肯特山之忒勒尔几岭此河之北喀尔喀与俄罗斯接壤河源之南东为鲁克伦河源西为土喇河源即元太祖始兴之地也 鄂诺河旧作斡难河今改】

六月击阿鲁台败之

【帝次青杨戍度飞云壑阿鲁台乞降帝察其诈命诸将严阵以待已而果悉衆来犯阿鲁台率千骑当中坚帝自将精骑冲击矢下如注阿鲁台堕马遂大败追奔百余里斩其名王以下百数十人至广漠戍班师擒蹶後者殲之】质实【一统志明永乐中北征其度漠驿站自库楞海子回至开平有青杨戍苍松峡飞云壑静卤镇广漠戍诸处方輿纪要库楞海子在饮马河东飞云壑在鄂诺河东北广漠戍在磧北 库楞海子旧作濶冻海子今改】

秋七月次开平宴劳军士

【帝在军念士卒艰苦每蔬食是日宴赉始复常膳】

振安庆徽州凤阳镇江饥

帝还北京

【御奉天殿受朝贺论功行赏】质实【奉天殿芜史皇极门内居中向南者曰皇极殿即奉天殿左向西者曰文昭阁即文楼右向东者曰武成阁即武楼】

八月寧远侯何福自杀

【福为太祖时宿将惠帝时与盛庸平安御燕师于淮北战败奔还帝即位推诚用福聘其甥女为赵王妃命镇寧夏移甘肃委寄甚重及从征数违节度羣臣有言其罪者福益快快师还都御史陈瑛劾其怨望福惧自缢死爵除赵王妃寻废】

河溢开封

【河决开封坏城二百余丈民被患者万四千余户没田七千五百余顷帝以国家藩屏重地特遣工部侍郎张信往视】质实【张信祥符人时有两张信一临淮人注见前】

冬十一月帝还京师

十二月阿噜台贡马

【阿噜台使来贡马帝纳之自是数入贡】

陈季扩乞降以为交址右布政使不受命

【先是沐晟追陈季扩于灵长海口大败之斩首三千余级获伪将军黎弄季扩蹙奉表乞降帝心知其诈姑许之诏授交址布政使其党阮帅胡具邓景异邓熔并都指挥陈原擢右参政潘季祐按察副使诏下贼无悛心寻复反】质实【灵长海口在安南国旧乂安府东】

始命内官监军

【敕王安等监都督谭青军马靖巡视甘肃马骥镇交址此监军巡视之始】质实【谭青清流人崇安侯渊子】

发明【洪武十一年六月讨五开蛮之役太祖尝遣内侍吴诚观兵吕玉閱胜虽云传命四方而实开监军之渐兹成祖八年遂有中官王安马靖马骥等监巡镇守之敕未几而马骥即以采办激变致骚动炎方交人屡叛而後嗣不悟踵其覆辙终明之世监军之祸史不胜书履霜坚冰有以哉】

【辛卯】九年春正月复命张辅帅师讨交址

【季扩既不受命放兵劫掠势又滋蔓官军不能制帝以张辅为交人所惮乃命辅为征讨副将军会晟讨之辅至申军令都督黄中违节度诘之不逊斩以?将士惕息无敢不用命者】

发明【交人好乱苦中国拘束又数为吏卒扰往往叛服不常张辅自代朱能征交址军命严明将士用命都督黄中之斩无不悚慴故三擒伪王镇慑南域威足以定之也後惟黄福善治交然马骥激变莫之禁倒马坡之役柳升败没福奔还至为守关所执其不及辅远矣】

二月都御史陈瑛以罪诛

【帝初即位御下多用重典瑛承风旨专以搏击为能帝寵任之瑛益务深刻倾陷不可胜计帝北巡皇太子监国刑科给事中耿通等劾瑛擅杀无辜中允刘子春等劾瑛方命自恣太子皆宥之心恶瑛至是帝始闻其不法状乃下狱死天下快之】

发明【瑛为北平僉事时受燕府金钱通密谋成祖称帝召擢宪职一泄事即请追戮效死诸臣狱辞连染百家号泣殆无遗种成祖以其能发奸寵任之排陷无算一时如纪纲马麟丁珏秦政学赵纬李芳之徒皆以倾险为能事瑛固首希风旨实由成祖逆取天下欲以严酷立威瑛得中其隐耳迨诛瑛而残贼已多其能独罪瑛乎】

诏赦交址

【自永乐九年二月二十四日以前交址但有啸聚山林者咸赦其罪军复原伍民复原业其官员军民有犯已发觉者咸赦除之】

倭陷昌化千户所

【倭掠广东昌化千户所杀守将敕副总兵李珪戴罪自赎】质实【昌化千户所按千户所洪武二十五年建在昌化县治北一十里今昌化县属琼州府】

命工部尚书宋礼浚会通河

【河为元转漕故道岸狭沙浅元末已废不用洪武中复因河决遂淤及帝建北京河海兼运海运险远多死亡而河运则由江淮達阳武陆挽百七十里入卫河民苦其劳济寧州同知潘叔正请复会通河帝命礼与侍郎金纯治之礼以会通之源必资汶水乃用汶上老人白英策筑坝东平之戴村遏汶流使南无入洸北无归海滙诸泉之水尽出南旺中分为二道以四分南流接徐沛六分北流達临清南旺地势高决其水南北皆注所谓水脊也因相地势置闸三十有八以时蓄泄礼又请疏东平沙河合马常泊之流以益汶运道乃成】质实【卫河源出河南辉县苏门山百门泉经新乡汲县而东至濬县境淇水入焉宋元名曰御河由内黄东

出至山东馆陶西漳水合焉东北至临清与会通河合北历德沧诸州至青县南合滹沱北达天津会白水入海所谓卫漕也汶水泰安府莱芜县东北水经汶水与淄水俱出原山西南入洸戴村在东平州东洸水水经不载汶水支流也元初遏汶入洸以益泗而洸河之名始着自宁阳北三十里西南流循县西三里许又南流三十里至高吴桥会宁阳诸泉又六十里经济宁东与沂泗合入天井闸至宋礼分水南旺汶遂不通洸诸泉水汶河泉派凡百四十有五南旺湖名在兖州府汶上县西南有东西二湖漕渠贯其中其南为蜀山湖北为马踏湖东平沙河汶水交流逸而西出经东平州境谓之沙河马常泊即马场湖在济宁西北与蜀山湖接礼言会通河以汶泗为源夏秋霖潦则马常泊之流亦入焉汶泗合流互济宁分为二河一入徐州一入临清河流深浅舟楫通塞系乎泊水之消长泊水夏秋有余冬春不足非经理河源及引别水以益之必有浅澁之患今汶河上流上自宁阳县已筑坝堰使其水尽入新河东平州之东境有沙河一道本汶河支流至十里口通马常泊比年流沙淤塞河口宜及时开濬况沙河至十里口故道具存不必施工河口当濬者三里河身宜筑堰者计百八十丈从之礼既得请又于汶上东平济宁沛县诸处立水柜?门水柜有四曰南旺曰安山曰马场曰昭阳以蓄水?门建于各闸左右平时则常闭水盛则尽启以泄涨宋礼字大本河南永宁人金纯字德修泗州人汶上老人乡官名洪武中命有司择民年高而公正可任者听其乡辞讼谓之老人事重者始白于官余皆老人理之】

三月浚祥符县黄河故道

【张信既奉命诣开封相视黄河上言祥符县鱼王口至中泺下二十余里有旧黄河岸与今河面平宜濬而通之使循故道则水势可杀绘图以进时尚书宋礼侍郎金纯方开会通河帝乃发民夫十万命兴安伯徐亨侍郎蒋廷瓚等偕纯相治并令礼总其役乃引河自封邱金龙口下鱼台塌场会汶水徐吕二洪南入于淮是时会通河已开黄河与之合漕道大通而河南水患亦稍息】质实【鱼王口在祥符县北中泺镇在封邱县南大河北岸元人运道以此为中顿金龙口一作荆隆口在封邱县东鱼台鲁棠邑汉方与唐改鱼台明属兖州府今属济宁州塌场在鱼台县南洪武初徐达开此通饷永乐後为运道所经至嘉靖中河决遂堙废徐吕二洪徐州洪即百步洪在府东南二里泗水所经也吕梁洪在府东南六十里有上下二洪徐亨大冶人祥之孙蒋瓚滑县人】

夏六月下交址右参议解缙于狱

【缙初谪广西李至刚言缙怨望改交址督餉化州入奏事会帝北征谒太子而还高煦言缙伺上出私觐太子径归无人臣礼帝震怒时检讨王侁亦以罪谪交址缙偕侁道广东览山川上疏请凿赣江通南北奏至逮下狱拷掠备至辞连大理丞汤宗宗人府经历高得暘中允李贯赞善王汝玉编修朱紘检讨蒋骥潘畿萧引高并及至刚俱系狱得暘贯汝玉紘引高俱瘦死缙在狱四年锦衣卫帅纪纲上囚籍帝见缙姓名曰缙犹在耶纲遂使狱卒醉以酒埋积雪中毙之仍籍其家妻子徙辽左 後仁宗即位诏归缙妻子英宗正统元年八月诏还所籍家产宪宗成化元年复缙官赠朝议大夫】质实【赣江江西赣州府城东有贡水一名东江自福建长汀县流入界城西有章水一名西江自湖广宜章县流入界二水环城而北合流为赣

江纪纲临邑人燕王起兵时授忠义卫千户及即位擢锦衣卫指挥使进都指挥僉事】

秋七月张辅大破交址贼於月常江

【贼据月常江树桩四十余丈两崖置栅二里列船三百余艘设伏山右辅遣将连槛拔桩以进而自率步队剿其伏兵水陆夹攻贼大败是冬又败之于生厥江】质实【月常江在安南国旧清化府东】

冬十月封哈密推勒特穆尔为忠义王

【初哈密忠顺王托克托自幼俘入中国帝拔之俾列宿卫後得归袭封帝春特厚而托克托顾凌侮朝使且沉湎不恤国事帝赐勅戒谕未至而托克托暴卒乃复封其从事推勒特穆尔为忠义王赐印诰世守哈密自是修贡维谨】质实【推勒特穆尔旧作兔力帖木儿今改】

复修太祖实录

【帝以前监修官李景隆心术不正又期限迫促未能精详乃命姚广孝等重修】

十一月蠲陕西逋赋

立长孙瞻基为皇太孙

【冠于华盖殿冕服如皇太子玉圭如亲王】

命韩观镇交址

【拜观征夷副将军仍佩征南将军印总兵镇交址】质实【韩观字彦宾虹人高阳忠壮侯成子】

筑海门扞潮堤

【海溢旧堤圯自海门至盐城凡百三十里诏陈瑄以四十万卒筑治之为扞潮堤万八千余丈已而瑄又言嘉定濒海地江流冲会海舟停泊无高山大陵可依请于青浦筑土山方百丈高三十余丈立堠表识既成赐名宝山帝亲为文记之】质实【旧堤始自唐名扞海堰宋范仲淹复修之名范公堤後屡筑屡圯盐城汉盐渎县晋改盐城明属淮安府青浦元为华亭上海二县地明析置青浦县属松江府今皆因之宝山在太仓州宝山县南吴淞江口今县以此名山周四百丈高五十余丈海洋空濶遥见千里有明成祖御制碑记刻石亭上】

浙江湖广河南顺天扬州水河南陕西疫遣使振之【壬辰】十年春正月诏入覲官言事

【时入覲官千五百余人命各陈民瘼不言者罪之言有不当勿问】

振平阳饥

【蒲州等处耆老言岁歉民饥采蒺藜掘蒲根以食帝恻然遣官驰驿振之逮治布政使及郡县官不奏闻者】

二月蠲山西河南逋赋

【免八年以前逋租】

削辽王植护卫

【植之改封荆州也请止给一卫以备使令而留其三卫于广陵防边然帝终嫌其起兵时貳于已至是并一卫削之留军校厨投三百人备使令】

秋八月张辅大破交址贼于神投海

【辅驻舟师安谟海口遥见贼舟入神投海遂帅都指挥方政击之贼舟四百余艘亦出神投海外分列为三时北风作辅督衆冲其中坚贼气鋭甚官军奋勇直前与贼连舟刀槊竞进火器迅发贼不能支开船走官军追蹙之贼大败生擒其伪将及余贼千余人溺死者无算贼党阮帅等望风奔溃】

勅边将治濠垣

【自长安岭迤西至洗马林皆筑石垣深濠塹以固防御】质实【长安岭在今宣化府龙门县东南九十里洗马林在今宣化府万全县西北七十里】

九月以藺芳为工部侍郎

【芳为都水主事河决阳武中盐堤漫中牟祥符尉氏遣芳按视芳言堤当急流之冲夏秋泛涨势不可骤杀宜卷土树桩以资扞御无令重为民患又言中滦导河分流使由故道北入海诚万世利但缘河堤埽止用蒲绳泥草不能持久宜编木成大困贯桩其中实以瓦石复以木横贯桩表牵筑堤上为杀水固堤之长策诏悉从之後皆遵用其法以宋礼荐擢侍郎】质实【尉氏春秋郑大夫尉氏邑秦置县宋属开封府明仍旧今因之藺芳夏县人】

冬十一月命庶子杨荣经略甘肃

【凉州部娄达袞叛守将击败之娄达袞走赤斤蒙古卫帝欲发兵讨之乃遣荣至陕西会丰城侯李彬议方畧荣还言隆冬非出兵时彬亦言道远饷难宜缓图之乃赐勅结责赤斤蒙古明年赤斤蒙古遂缚娄达袞来献】质实【赤斤蒙古卫明一统志古西戎地秦末汉初属匈奴武帝时为酒泉炖煌二郡 娄达袞旧作老的罕今改正】

十二月杀浙江按察使周新

【时锦衣卫指挥纪纲用事使千户缉事浙中作威受赇新捕治之千户脱走诉于纲纲诬奏新罪帝遽命逮新旗校皆锦衣私人在道掠掠无完肤既至伏陛前抗声曰陛下诏按察司行事与都察院同臣奉诏擒奸恶奈何罪臣帝怒命戮之临刑大呼曰生为直臣死当作直鬼竟杀之新初为大理评事善决狱改御史敢言不避权贵人目为冷面寒铁及按浙江屡雪冤狱周廉使名闻天下至是以谗死人咸冤之】质实【周新南海人初名志新字曰新成祖常独呼新遂为名因以志斩字洪武中授大理寺评事成祖即位改监察御史继擢云南按察使未赴政浙江】

【癸巳】十一年春正月辛巳朔日有食之罢朝贺

【先是鸿胪寺奏习元旦贺仪上召礼部翰林官问曰正旦日食百官贺礼可行乎尚书吕震对曰日食与朝贺之时先後不相妨侍郎仪智曰终是同日免贺为当杨士奇曰日食天变之大者前代元旦日食多不受贺宋仁宗时元旦日食富弼请罢宴彻乐吕夷简不从弼曰万一契丹行之为中国羞後有自契丹回者言是日罢宴仁宗深悔今免贺诚当帝从之勅曰朕乖治理上累三光衆阳之宗薄食元旦羣臣尚勉辅朕消弭灾变朝贺宴会其悉罢免】

二月置贵州布政使司

【贵州古罗施鬼国汉西南夷牂牁武陵诸傍郡地元置八番顺元诸军民宣慰使司以羁縻之太祖克陈友谅兵威远振思南宣慰田仁智思州宣抚田仁厚率先归附即以故官授之命世守其地时元至正二十五年也及洪武五年贵州宣慰霭翠同知宋钦及普定府女总管适尔等先後来归皆予以原官世袭朝廷为立贵州长官司即其地设卫命顾成为指挥使是时云南未定仁智等恪修朝贡赋税听其白纳未尝郡县其地迨帝即位後思南宣慰田宗鼎凶暴与其副使黄禧构怨奏讐累年朝廷以田氏世守其土又先归诚曲宥之改禧为辰州知府未几思州宣慰田琛与宗鼎争沙坑地有怨禧遂与琛结合攻思南宗鼎挈家走琛杀其弟发其祖坟并戮其母屍所过无不残害宗鼎诉於朝屡勅琛禧赴阙自辨拒命不至并有逆谋乃命镇远侯顾成帅兵五万擒之琛禧相继械送京师诏分其地为八府设贵州布政使司而以长官司七十五分隶焉贵州为省属内地自此始】质实【八番五季时马殷遣八帅讨溪洞诸蛮各分据之为八番今定番州诸长官司即其地顺元汉牂牁郡宋置总管府元改顺元路明贵州省治今因之思南秦属黔中郡汉为武陵郡唐置务州治务川县贞观间改为思州宋为羁縻州後置思州元置思州安抚司泰定中改宣抚司明洪武初改思南宣慰司隶湖广布政司永乐後改为府领长官司四县二属贵州布政司今因之八府以思南地设思南镇远

铜仁乌罗四府以思州地设思州新化黎平石阡四府贵州布政司治贵州宣慰司後成化中分置程番府至隆庆末始改程番曰贵阳府为布政司治而宣慰司如故府所治在城北宣慰所治在城南贵州为省属内地洪武中设贵州都指挥使司至是领十八卫而以长官司七隶焉後二年复设按察使司于是贵州二司官与各省同而乡贡尚附于云南按明制布政司而以长官司七十五分隶者属户部都指挥使领十八卫而以长官司七分隶者属兵部府以下多用土官土官分属吏礼兵各部田仁智田仁厚宋田佑恭之裔佑恭思州人生有明识为番部长愿为王民政和间召入覲徽宗厚赐之建炎初剧贼王辟等破归州蜀帅调田氏兵败贼衆玺书加劳後田氏得世为思州守霭翠蜀汉火济之裔济从诸葛亮南征有功封罗甸国王後为宋普贵传至元阿画世有土于水西霭翠其裔後为安氏宋钦宋宋景阳传至元为阿重之孙为宋钦旧名蒙固岱在前元时以平寇功授将军八番顺元等处宣慰使加镇国上将军兼四川等处行中书省参知政事洪武初钦同霭翠归附赐名钦袭原职始领水东田宗鼎仁智之孙田琛仁厚之孙 蒙固岱旧作蒙古歹今改】发明【贵州古西南夷地蜀汉有火济者从诸葛亮擒孟获有功世有爵土自汉以来未有郡县之者然滇南之境非贵不达无贵州是无云南汉不能有贵必自巴蜀道邛笮达牂牁踰历险远不能使黔滇被声教唐亦于南诏不得志诚有由也太祖抚有云南贵州至成祖竟郡县其地不特贡赋与诸服同而道路毕达矣太祖平滇诏书言霭翠辈不尽服虽有云南不能守也成祖废二田剿台罗斩苗贼奄有贵州而郡县之其亦成前志哉】

令民牧马

【洪武初令应天太平镇江庐州凤阳扬州六府滁和二州民皆牧马既而复令飞熊广武英武三卫军五人共养一马岁课一驹解京寻又以牧监羣马悉归有司专令民牧江南十一户江北五户各养马一匹免其身役课驹如三卫军至是行之北畿计丁养马十五丁以下养马驹如三丁以上养马二其以事编发者七户养一马除其罪为良民自後马日蕃辄责民牧民年十五即养马後散之山东河南民渐苦之】质实

【以牧监羣马悉归有司明史职官志洪武二十八年乃悉罢羣牧监以其马隶有司牧养养马山东河南按明会典宣德四年令山东兖州济南东昌三府领养孳生马每五丁养骡马一三丁养儿马一正统十一年令河南彰德卫辉开封三府照例领养孳生马匹飞熊广武英武三卫军按明会典飞熊卫属前军都督府广武卫属左军都督府英武卫属右军都督府】

帝如北京皇太孙从命皇太子监国

【以尚书蹇义学士黄淮谕德杨士奇洗马杨溥辅太子监国】

葬仁孝皇后

【先是帝营壽陵于昌平车驾临视封其山曰天壽至是始成名曰长陵以后葬焉】质实【昌平汉置昌平军都二县後魏初省昌平入军都天平中於军都城置东燕州及昌平县後

周州废明正德元年升县为昌平州属顺天府今因之天壽山在顺天府北百里】

夏四月帝至北京

【帝于奉天殿丹陛设坛告天地遣官祭北京山川城隍诸神遂御奉天殿受朝贺】

五月定死罪纳赎例

【命法司定议死罪情重者杀之情轻者得纳赎斩八千贯绞六千贯流徒以下纳钞有差无力者发天壽山种树】

秋七月封阿鲁台为和宁王

【先是帝自将击破布尼雅实哩及阿鲁台兵卫拉特玛哈穆特上言请得早为寇计继又累请封赏留勅使不遣帝遣中官賫勅责之未几玛哈穆特弑其主布尼雅实哩立塔尔巴为汗阿鲁台遣使来告愿输诚内附为故主复仇请发兵讨贼自率所部为先锋帝义之故有是命】质实【卫拉特旧作瓦剌玛哈穆特旧作马哈木塔尔巴旧作答里巴今并改】

八月北京地震

十一月玛哈穆特犯边命将士严守备

【玛哈穆特兵渡饮马河将入犯扬言袭阿鲁台开平守将以闻因命边将严备】

十二月张辅沐晟大败交趾贼于爱子江

【时辅偕晟合军至顺州贼党阮帅等设伏爱子江据山列象阵迎敌辅戒士卒一矢落象奴二矢射象鼻象奔还自躁其衆乘势进击矢落如雨贼大败生擒伪将军潘径阮徐等五十六人遂追奔尽降其衆】质实【爱子江在顺州东北】

【甲午】十二年春二月诏亲征卫拉特

【阿鲁台使至言玛哈穆特率骑卒至兴和使朝廷动静帝下诏亲征以柳升领火营郑亨领中军陈懋李彬领左右哨王通谭青领左右掖刘江朱荣为前锋先遣荣等率师驻兴和】质实【李彬字质文凤阳人封丰城侯王通咸宁人金乡侯真之子封成山侯】

振凤翔陇州饥

【凤翔陇州饥振之按长吏不言者罪】

三月张辅追获陈季扩于老挝

【辅进军政和贼帅胡同降言伪将军邓景异率党黎蟾等七百人逃?蛮昆蒲栅辅进师罗蒙江道险舍骑行比至贼遁追至叱蒲捺栅贼又遁昏夜行二十余里辅率将校衔枚疾趋黎明抵叱蒲干栅江北贼寨南岸官军渡江围之矢中邓景异胁擒之追捕邓熔邓銳等又遣别将追斩伪将军阮帅於南灵州初季扩逃父安山中辅遣都指挥师佑袭之走老挝辅令佑深入破其三关贼党尽奔遂缚季扩及其孥送京师斩之】质实【罗蒙江在交址废田和县界三关方輿纪要在老挝之东南与交址接界处】

帝发北京皇太孙从

【帝谓侍臣曰朕长孙聪明英銳智勇过人宜历行阵俾知兵法且可悉将士劳苦知征伐不易又命学士胡广庶子杨荣谕德金幼孜等每日军中闲暇即为太孙讲论经史】

夏六月至和拉和锡袞大破卫拉特兵追至图拉河玛哈穆特遁

【前锋都督刘江等遇敌于刚哈拉海擒斩数十人帝命诸军兼程进至和拉和锡袞玛哈穆特等三部率衆逆战见阵整顿兵山岭帝升高阜见寇衆分三队遂令铁骑挑之寇奋而下帝命柳升等攻其中陈懋王通攻其右李彬谭青马聚攻其左神机銃炮齐发帝亲率铁骑驰击大破之斩其王子十余人部衆数千级追奔度两高山寇勒余衆复战又败之追至图拉河玛哈穆特遁帝欲穷追皇太孙请及时班师从之宣捷于阿鲁台还至三峰山阿鲁台遣使来朝遂以平卫拉特诏天下】质实【和拉和锡袞方輿纪要在漠北故和林东刚哈拉海亦漠北地去和拉和锡袞旧作忽兰忽失温刚哈拉海旧作康哈里孩今并改】

秋八月帝还北京

【御奉天殿受朝贺宴羣臣论功行赏】

发明【成祖亲征漠北至辄平定威之所加远矣考其时北庭亦实有可乘之间焉玛哈穆特负篡逆罪阿鲁台又从而倾之故得權其强及阿鲁台败于卫拉特而额森等又从而叛之故得蹙其势寇自仇杀反覆不常中国乃得弭衅而奏功岂徒师武臣力哉】

蠲北京州县田租二年

九月下右春坊大学士黄淮等于狱

【帝亲征还太子遣使进迎銮表帝以其缓且奏书失辞时入高煦诸悉徵东宫官属问罪黄淮先至遂下狱越日杨士奇及司经局正字金问至命法司鞫治宥士奇召问东宫事士奇叩头言殿下孝敬诚至凡所稽迟皆臣等罪上悦而罢诸臣奏士奇不宜独宥乃下锦衣卫系

之未几特有复职金问辞连杨溥等遂并徵下狱】质实【金问字公素吴人】

冬十一月废晋王济熺为庶人进封平阳王济熿为晋王

【济熿少狠戾失爱于父及长太祖召秦晋燕周四世子及庶子之长者教于京师济熿与燕王子高煦周王子有?邪诡相比兄济熺嗣位帝封济熿平阳王济熿追憾其父并憾济熺嗾其弟庆成王济炫等日诉济熺过于朝又诱府中官校文致其罪帝信之夺济熺爵及世子美圭并为庶人俾守恭王园而立济熿为晋王济熿立益横暴进毒弑嫡母谢氏逼烝恭王侍儿吉祥幽济熺父子蔬食不给父兄故侍从宫人多为所害莫敢言】质实【济熺济熿并晋恭王櫟之子】

命翰林学士胡广等修五经四书及宋儒性理诸书【谕胡广等曰五经四书传注之外诸儒有发明者其采附于下周程张朱所着如太极通书西铭正蒙亦类聚成编命举朝臣及四方文学之士同纂修开馆东华门外广等总其事书成名曰大全】

蠲苏松杭嘉湖水灾田租

【苏松杭嘉湖水灾蠲田租四十七万九千余石】

【乙未】十三年春正月玛哈穆特遣使来朝

【玛哈穆特遣使谢罪贡马词极卑顺帝曰卫拉特故不足与较受其献馆其使者】

二月张辅等师还

【张辅既定交址至是班师还论功赏赉有差】

释工作囚徒

【先是命出系囚输作赎罪既而多亡者有司请捕之帝曰此皆衣食空乏出于不得已遂命见役者俱还家共释四千九百余人】

三月帝策士于北京

【赐陈循等三百五十一人及第出身有差建进士题名碑于北京国子监】质实【陈循字德遵泰和人】

罢海运

【会通河既濬漕运大通遂罢海运】

夏四月命英国公张辅出镇交址

【辅班师甫还会韩观卒复命佩征夷将军印出镇辅至交址讨余寇陈月湖等平之】

兵部尚书兼詹事金忠卒

【忠少读书善易卜兄戍通州亡忠补戍既至编卒伍卖卜北平市多中市人传以为神僧道衍称于帝将起兵召忠卜得铸印乘轩之卦曰此象贵不可言自是出入燕府常以所占劝举大事帝深信之遂赞戎务为谋臣及帝即位论佐命功擢工部右侍郎进兵部尚书帝起兵时高煦从战有功许以为太子邱福等劝立之独忠以为不可历数古适孽事帝不能夺于是立世子为王太子而忠为东宫辅导以尚书兼詹事帝北征辅太子监国帝入高煦譖悉徵东宫官属下狱以忠勲旧不问而密令审察太子事忠言无有帝怒忠免冠頓首愿连坐以保之以故太子得无废而宫僚黄淮杨溥等亦获全至是卒】

五月丁酉朔日有食之

开清江浦

【初漕粟至淮安陆运以达清河劳费甚鉅平江伯陈瑄总漕运采故老言请自淮安城西管家湖凿渠二十里为清江浦导湖水入淮置四闸以宣泄又缘湖十里筑堤引漕舟直达于河漕运称便】质实【清江浦在淮安府山阳县西北运河由此出清口为水陆孔途旧名沙河宋转运使乔维岳所开其後淤塞瑄因其旧渠开河置牐易名曰清江浦清河泗河亦名清河在清河县治西自山东泗水县由徐邳经桃源县至清河县西北分为大小清河大清河由县东北小清河由县东南俱入于淮管家湖在淮安城西望云门外旧有南北二湖自湖至淮河鸭陈口仅二十里与清河口相直四闸曰移风曰清江曰福兴曰新庄以时啓闭严其禁时浚仪真瓜州通潮凿石梁百步二洪平水势开泰州白塔河通大江筑高邮湖堤堤内凿渠亘四十里以疏湖流】

发明【天下之赋半出东南东南之水不治漕运何由北达永乐九年既复会通河至是复因乔维岳故道开清江浦湖水入淮始通漕舟视旧之输挽艰而人力费者其利溥矣此齐鲁之间宋礼功多江淮之间陈瑄功多也夫】

六月振北京河南山东水灾

秋八月振山东河南北京顺天州县饥

九月北京地震

冬十月命死罪皆五覆奏

【时法司奏冒支官粮者帝怒命戮之及覆奏帝曰朕过矣其论如律自今死罪者皆五覆奏着为令】

十二月蠲顺天苏州凤阳浙江湖广河南山东州县水旱田租

【丙申】十四年春正月振北京河南山东饥

【免永乐十二年逋租发粟一百三十七万石有奇振之】

三月阿鲁台败卫拉特来献捷

【玛哈穆特与阿鲁台战阿鲁台败之执俘献捷赐赉有差】

夏四月礼部尚书吕震请封禅不许

【礼部郎中周讷请封禅震力讚之言圣德神功昭格上下宜如讷请帝谓震曰今天下虽无事然水旱疾疫亦间有之朕每闻郡县上奏未尝不惕然于心岂敢自谓太平之世且圣经未尝言封禅唐太宗亦不为封禅魏徵每以尧舜之事望太宗尔欲处朕於太宗之下亦异乎徵之所以爱君者矣不许】发明【封禅非古也其事始于秦震礼官藉其说以希主谬矣曹县献驹虞榜葛刺国献麒麟震皆贺至大岩山三呼万岁震以为山川效灵帝斥为非君子事君之道乃终不改壽星见则贺五色云见则贺金水河太掖池冰凝亦贺宗伯之职不务寅清之道止言祥瑞夫古者巡狩方岳告祭柴望所以尊天而怀百神非封禅之谓震请封禅且逢事辄贺岂徒不学无术哉盖亦諂谀实甚矣】

秋七月河决开封

【决开封州县十四入于淮】

掌锦衣卫事纪纲伏诛

【纲便辟诡黠善钩人意帝爱幸之令典诏狱都御史陈瑛灭建文朝忠臣数十族亲属被戮者数万人纲希帝旨广布校尉日摘臣民陰事帝悉下纲治深文诬诋帝以为忠擢都指挥僉事掌锦衣卫事纲益恣横且谋不轨内侍讐纲者发其罪命给事御史廷劾下都察院按治具有状即日磔于布家属无少长皆戍边天下快之】

九月京师地震

始命御史巡盐

冬十月帝还京师

十一月议营建北京

【先是车驾至自北京将分建两都工部奏请择日兴工帝以营建事重命文武羣臣议之上疏曰北京乃圣上龙兴之地北枕居庸西峙太行东连山海南俯中原沃壤千里山川形胜足以控四夷制天下诚帝王万世之都也比年圣驾巡狩万国来同民物阜成嘉祥協应天意人心昭然可见然重干劳民延缓至今惟宗社大计正当为之时况今漕运已通储蓄充溢营建之辰天实啓之乞早赐圣断勅所司兴工以成国家悠久之业从之】

召张辅还

【辅凡四至交址前後建郡邑及增设驿传递运规画甚备交人所畏惟辅至是召还】

【丁酉】十五年春二月谷王橐有罪废为庶人

【橐自徙封长沙恃前开门功日益骄恣夺民田侵公税杀无罪人招匿亡命习兵法战阵谋不轨其护卫张兴惧祸及因奏事北京白之帝未信兴过南京复啓太子且曰乞他日无连坐橐致书蜀王椿为隐语欲结椿为援椿贻书切责不听会椿子崇宁王悦燂得罪逃橐所橐因诡衆曰我开金川门出建文君今在邸中我将为大义椿闻之上变告帝叹曰朕待橐厚张兴常为朕言不忍信今果然乃召橐入朝示以蜀王章橐伏地请罪羣臣请诛之又下诸王议皆以为当死帝曰诸王羣臣奉大义国法固尔吾宁生橐乃废橐及其二子并为庶人诛诸通谋者兴以先发不坐】

命丰城侯李彬镇交址

【命彬佩将军印充总兵官往镇交址且谕曰交址本中国地其人皆朝廷赤子朕怀抚绥勤于夙夜尔久事藩邸付兹重寄宜日亲贤人君子效古良将之所为审度事机区画有法庶副朕委任】

命泰宁侯陈珪缮北京工柳升王通副之

【铸印给之制视都督府文曰缮工之印】

三月汉王高煦有罪徙封乐安州

【高煦初封云南煦曰我何罪斥万里不肯行帝北巡力请归南京不得已听之又请得天

策卫为护卫曰唐太宗天策上将吾得之岂偶然又乘间请益两护卫所为益恣每从北征在帝左右媒孽东宫事潜解缙至死黄淮等系狱已而改封青州又托故不欲往帝始疑之高煦私选各卫健士为腹心又募兵三千人不隶籍兵部纵使劫掠兵马指挥徐野驴擒治之高煦手铁瓜挝杀野驴衆莫敢言遂僭用乘舆器物帝闻之怒还京师尽得其不法数十事召至切责之褫冠服繫西华门将废为庶人皇太子涕泣力救乃削两护卫诛其左右数人徙封乐安州趣即日行】质实【乐安州唐棣州明为乐安州後改名武定今升为府领州一县九属山东省天策卫隶南京前军都督府西华门紫禁城其门凡八曰承天门曰端门曰午门东曰左掖门西曰右掖门再东曰东华门再西曰西华门向北曰元武门】

帝北巡命皇太子监国

【帝巡北京命皇太子监国胡广杨荣金幼孜从】

秋八月瓯宁人进金丹斥之

【行在通政司言瓯宁县人进金丹及方书帝曰此妖人也秦皇汉武一生为方士所欺求长生不死之药此又欲欺朕朕无所用金丹令自食之方书亦与毁之母令别欺人也】质实【瓯宁县宋置明与建安县同为建宁府治今因之】

九月曲阜孔子庙成

【修曲阜孔子庙讫工帝亲制文勒石】

冬十一月命赵玭巡督塞北屯戍

【以玭为兵部尚书巡督塞外凡军民利病及边务不便者具以闻】质实【赵玭字云翰夏县人】

【戊戌】十六年春正月交址复乱

【交人故好乱中官马骥以采办至大索境内珍宝人情骚动桀黠者鼓煽之大军甫还即并起为寇顺州土官段公丁陈思齐力战死李彬遣将讨之而反者犹不止至是俄乐巡检黎利及乂安知府潘僚南灵州千户陈顺庆乂安卫百户陈直诚复乘机作乱其他奸宄四起自署官爵皆杀将吏焚庐舍彬东西征剿日不暇给利初事陈氏为金吾将军归命後授巡检以是常怏怏及大军还遂僭称平定王以弟石为相国与其党放兵肆掠交址左右参政侯保冯贵死焉帝以贼久未平命荣昌伯陈智为左参将助彬讨之其後羣寇悉破灭惟利窜匿老挝彬檄其长发所部兵捕之不获】质实【段公丁陈思齐交址南策州人侯保赞皇人交址右参政黎利为寇保率民兵筑堡于要害御之贼来攻保战死马贵武陵人交址左参政抚辑流民归附者衆有土兵二万余人皆劲勇习战每出阵有功中官马骥疾之尽夺其上兵及黎利

反衆强贵剿捕止以卒数百遇贼兵贵力战而死陈智壽州人】

三月姚广孝死

【帝用兵有天下广孝之力为多既拜太子少师归长洲候同产姊姊不纳访其友王宾宾亦不见但遥语曰和尚误矣和尚误矣复往见姊姊詈之广孝惘然至是死追封荣国公】质实【王宾号光庵长洲人王宾不见广孝旧史例议谓广孝出振苏湖至长洲曾徒步访宾宾譔若平生为作振灾记铺陈其功德考震泽记闻宾称吴中高士岂肯漫作谀语颂要人功德且其记亦不传旧说不足信今明史广孝本传采建遗文迹语当可据】

夏五月重修太祖实録成

【夏原吉等重修太祖实録成上之共二百五十七卷为二百五十册又宝训十五?为十五册御殿以受令别録藏古今通集库颁赏有差】

胡广卒

【广以醇谨见幸帝北征与杨荣金幼孜从数召对策殿或至夜分过山川厄塞立马议论行或稍後辄遣骑四出求索帝再北征皇长孙从命广与荣幼孜军中讲经史帝徵乌斯藏僧作法会为高帝高后荐福言见诸祥异广乃献圣孝瑞应颂礼部郎中周讷请封禅广言其不可上却封禅颂帝益亲爱之广性缜密帝前所言及所治职务出未尝告人故始终保恩宠时人以方汉胡广及是卒广初与解缙同侍宴帝曰尔二人生同里仕又同官缙有子广女可妻之广顿首曰臣妻方娠未卜男女帝笑曰定生女已而果生女遂约婚缙子祯亮及缙家戍辽东广欲离婚女截耳誓曰薄命之婚上主之父面承之有死无二越数年解家获赦还女卒归祯亮事姑极孝】

发明【广秉性敦厚居官缜密故始终恩宠弗衰然一以委蛇求合主意在建文朝则对策斥亲藩在永乐朝则以首先迎附见幸雍容揄扬曲学阿世虽没世固宠亦有愧其女矣广既不能死而又少骨鲠风为世所讥宜哉】

秋七月下赞善梁潜司諫周冕于狱杀之

【时太子监国宦寺黄俨等党赵王高燧陰谋夺嫡百端谗构会有陈千户擅取民财太子令谪交址立功後念其旧有军功且宥之或言陈千户不当宥太子擅赦罪人帝怒以潜冕预闻之而不谏止辅导有阙俱下狱死】质实【周冕繁昌人】

冬十二月申严官吏犯赃禁

【帝谕法司曰唐太宗恶官吏贪浊犯赃必寘法吏尚清谨民免掊克贞观所以为盛朕屡

勅中外诸司不许妄役一夫擅歛一财而官吏恣肆自若百姓苦之继今犯赃必论如法】

命成山侯王通振陕西饥

【陕西旱命王通偕户部官驰传往振谕之曰民饥朝不保夕譬之赴救水火当速往毋缓于是振饥民九万八千余户给米十万四千三百余石】

【己亥】十七年夏六月免顺天水灾田租

倭寇辽东总兵官刘江击破之

【倭数寇海上南讫浙闽北抵辽阳凡濒海郡邑多被害江總兵领之相度形势至金州卫金线岛西北望海埚上其地特高广可驻兵防御凡寇至必先经此实滨海咽喉地上疏请于此筑城堡设烽堠严兵以待寇帝从之时了者言东南海岛中举火江急引兵赴埚上倭至王家山岛乘海直逼埚上登岸鱼贯行一贼貌甚恶挥兵率衆势大銳江畧不为意依山设伏别遣将潜烧贼船断其归路以步卒迎战佯却贼入伏中礮举伏起贼大败走入空堡中江开西壁纵之复分两路夹击尽覆之斩首千余级生擒百余人无一逸者自是倭大创不敢复入辽东】质实【金线岛在金州卫东又有莲花岛杏园岛共七十二岛环列海滨望海埚在金线岛北今属奉天府宁海县埚地特高可屯兵了望为濒海要地王家山岛在宁海县东南海中空堡为櫻桃园旧堡】

冬十二月命在外死囚送京师审錄

【帝谕法司曰刑者圣人所慎匹夫匹妇不得其死足伤天地之和召水旱之灾甚非朕寬恤之意自今在外诸司死罪咸送京师审錄必三覆奏然後行刑】

御定资治通监纲目三编卷六

卷七

钦定四库全书

御定资治通鉴纲目三编卷七

【起庚子明成祖永乐十八年尽乙巳明仁宗洪熙元年】凡六年

【庚子】十八年春二月蒲台妖妇唐赛儿作乱讨平之【赛儿蒲台县民林三妻自称佛母以幻术聚衆据益都卸石栅寨为乱指挥高凤领兵捕之败歿势遂炽其党董彦昇等攻下莒即墨围安邱诏安远侯柳升与都指挥刘忠将京军往剿升至围贼寨贼遣人诡乞降云寨中食尽且无水东门旧有汲道议趋此宵遁升自以大将意轻贼信之即往据汲道贼夜袭官军军乱忠力战中流矢死赛儿遁去比明升始觉追不及别贼宾鸿等攻安邱益急知县张?县丞马撝集民夫八百余人以死拒战贼复合莒即墨衆并力攻之声言屠城都指挥佾事卫青备倭海上闻围急帅千骑昼夜驰抵城下奋击败之贼收余衆再战又大败之斩馘六千余人时城中旦夕不能支使青救稍迟城必陷比三日升始至青迎谒升怒其不待已摔出之鳌山指挥王真亦殲贼诸城贼遂平而赛儿卒不获帝赐书劳青切责升刑部尚书吴中劾奏升征剿妖贼失机冒功贼徒凭高无水且乏资粮当坐困之升全不留心及临贼境又不设备致贼夜斫营杀伤军士刘忠身先士卒升不救援卫青解安邱围反忌青功而摧辱之请治其罪遂下升狱擢青山东都指挥使真都指挥同知旗擢左右参议已乃释升帝以赛儿久不获虑削髮为尼或混处女道士中遂命法司凡北京山东境内尼及女道士悉逮至京诘之所在多扰既擢刑部郎中段民为山东左参政民至力为矜宥人情始安】质实【蒲台汉湿沃县地隋置蒲台县宋省入渤海县金复置属滨州元属般阳路明仍属宾州今属山东武定府益都汉侯国三国魏置益都县金益都府元益都路明仍置县属青州府今因之卸石栅在益都县西南即墨齐邑汉县为胶东国治北齐废隋复于不其故城东北置即墨县元属胶州明属莱州府今因之安邱春秋莒渠邱父封邑汉置安邱县属北海郡与琅邪之安邱异隋复置安邱县宋金元仍旧明属青州府今因之鳌山卫名在即墨县东四十里洪武二十一年建今裁诸城汉诸县北齐省入东武县隋改诸城唐置密州治此明改县属青州府今因之高凤张旗马撝里系未详卫青字明德松江华亭人王真里系未详吴中字思正武城人段民字时举武进人】

夏六月北京地震

秋八月丁酉朔日有食之

九月召皇太子

【北京宫殿将成钦天监言明年正月朔日上吉宜御新殿遂遣夏原吉齎勅召皇太子寻又勅皇孙从行期十二月终至北京】

诏自明年改京师为南京北京为京师

【命行在礼部明年正月朔以北京为京师去行在称取南京各印信给京师诸衙门南京衙门别铸加南京二字】

冬十一月以迁都诏天下

【诏曰朕皇考高皇帝建都江左肇造邦基肆朕缵承惟怀永图眷兹北京实为都会天意所属卜筮攸同乃仿古制徇輿情立两京置郊社宗庙创建宫室上以绍先志下以诒子孙营建以来天下军民乐于趋事天人协赞景贶骈臻今工告成以明年正朔御奉天殿朝百官】

振青莱饥

【凡十五万三千七百余户皇太子过邹县见民草食下马入民舍皆衣不掩体叹曰民隐不上闻若此乎山东布政使石执中来迎诘之对已奏请停今年秋税太子曰民饿且死尚及徵税耶速督郡县勘饥民口数近地约三日远五日悉发官粟振之执中请人给三斗曰与六斗汝毋惧吾自奏上也及至京以闻帝是之曰昔范仲淹子犹能举麦周济其父之故旧况百姓吾赤子乎】质实【邹县汉置驺县晋改邹明属兖州府今因之】

十二月北京郊庙宫殿成

【初营建北京凡庙社郊祀坛塲宫殿门阙規制悉如南京而高敞壮丽过之复于皇城东南建皇太孙宫东安门外建十王邸通为屋八千三百五十楹自永乐十五年六月兴工至是乃成】质实【东安门皇城周十八里有奇东曰东安门】

置东厰

【帝七年已令中官刺事及北京初建尤銳意防奸令锦衣官校专司辑访复虑外官瞻徇乃立东厰于东安门北以内监掌之由是中官之势口重讫于明亡不可复制】

发明【明太祖初制内侍不许读书惟置监局而不兼文武衙不侵外廷政备掖廷供洒扫而已建文御内侍严多逃入燕军泄朝廷事成祖德之即位後颇加委任监军出使将兵分镇往往用之乃至立东厰刺外事寄以心腹势敌锦衣後宪宗信用汪直更有西厰之设罗织益横倍于东厰泊末季乘时窃柄日擅威福元气削而天下用是危矣此东厰为滥觞而成祖实阶之厉也】

【辛丑】十九年春正月迁都北京赦

【正月甲子朔上躬诣太庙奉安五庙神主命皇太子诣天地坛奉安昊天上帝后土皇地

祗神主皇太孙诣社稷坛奉安太社太稷神主黔国公沐晟诣山川坛奉安山川诸神主御奉天殿受朝贺甲戌大祀天地于南郊戊寅大赦天下】质实【太庙五庙明会典国初于阙左建四庙德祖庙居中懿祖居东第一庙熙祖居西第一庙仁祖居东第二庙庙与主皆南向三祖合食于德祖庙德祖南向三祖以次东西向洪武九年改建太庙其制为正殿前後为寝殿俱翼以两庑寝殿九间以一间为一室中一室奉安德祖神主懿祖居东第一室熙祖居西第一室仁祖居东第二室主皆南向及时享于正殿德祖居中南向懿祖列于左西向熙祖列于右东向仁祖列于懿祖之次西向洪武三十一年以後奉安高庙神主于寝殿西第二室居熙祖之次此南京太庙之制及迁都北京建庙与南京同天坛在正阳门外南郊地坛在安定门外北郊社稷坛明会典国初太社太稷异坛同壇祭太社以后土勾龙氏配祭太稷以后稷氏配洪武十年改建社稷坛于午门外之右同坛同壇临祭时太社居东太稷居西俱北向奉仁祖配西向至是始罢勾龙后稷洪武三十一年後更奉太祖配永乐中北京社稷坛成与南京旧制同山川坛明会典国初建山川坛于天地坛之西正殿七间祭太岁风云雷雨五岳五镇四海四卖鍾山之神东西庑各十五间分祭京畿山川坛西有先农坛坛东有旗纛庙坛南有藉田一所京师山川坛俱与南京旧制同惟正殿鍾山之右添祭天壽山之神】

夏四月奉天谨身华盖三殿灾诏羣臣直言阙失【诏曰朕仿古建二京乃三殿同灾朕心惶惧意者敬天事神礼有怠欵祖法戾政务乖欵小人在位贤士隐遯欵刑狱冤滥欵谗慝交作欵掊克及田里欵蠹财妄费用无度欵祖税太重徭役不均欵军旅未息征调无方馈饷乏欵工作过度民力敝欵奸人附势羣吏弄法有司闕茸不治欵尔文武羣臣条陈无隐于是诏罢不便于民及不急诸务蠲十七年以前逋赋及十八年被灾田租】质实【华盖殿在奉天殿北再北曰谨身殿】

命蹇义等分巡天下安抚军民

【以三殿灾勅廷臣二十六人分巡天下问军民疾苦文武长吏扰民者奏黜之】

杀主事萧仪

【左庶子兼侍讲邹缉应诏上言畧曰陛下肇建北京工鉅费繁调度甚广农民终岁供役犹且伐桑枣以供薪剥桑皮以为楮加之官吏横征日甚一日非其土产动科千百小民转购他所其值倍蓰及至进纳多不中程往复辗转重为民累又自营建以来工匠假托威势驱民移徙号令一出屋宇立摧奥突粗完又复重徙有三四迁而不能定居者此陛下所不知而民人疾怨者也贪官污吏徧布内外朝廷每遣一人虐取苛求初无限量有司承奉唯恐不及剥下媚上有同交易小民所积几何而诛求若此今山东河南山西陕西水旱相仍民至剥树皮掘草根为食而京师聚僧道万余人日耗廩米此夺民食以养无用也朝廷岁賫钱币市马外蕃所出数十万而所取不能一二散马民间马死辄令赔补不知人民耗矣多马奚裨漠北降人皆怀窥觐非真远慕王化乃使羣居輦轂盛供帐厚赏賚以优之此岂足明广大耶夫奉天殿陛下正朝也灾首及焉自非省躬责已改革政化疏涤天下穷困之人不能上回天怒愿陛下还都南京保养圣躬散遣工匠停止征派毋听小人重劳天下将灾沴不作太平可致矣疏

入不省时帝方以定都诏天下忽罹火灾颇惧而言事者金云迁都不便帝不恚义言尤峻切帝于是发怒杀仪而缉竟得无罪】质实【萧仪乐安人】

五月出给事柯暹御史郑维桓等为知州

【柯暹郑维桓等言事忤直俱谪知文址】质实【柯暹字啓晖池州建德人郑维桓慈谿人】

秋八月辛卯朔日有食之

冬十一月遣使核天下库藏

【分遣内官监察御史查勘两京及天下库藏通年出纳之数】

下户部尚书夏原吉等于狱兵部尚书方宾自杀【帝将大举北征诏原吉宾及刑部尚书吴中等议皆以为兵不当出帝召宾宾力言军兴费绌帝不恚召原吉问边储多寡对曰比年师出无功军储十丧八九灾眚迭作内外俱疲乞遣将往征勿劳车驾立命原吉出视开平粮储而吴中入对如宾言帝益怒下原吉及中子狱宾惧自经死遂命侍郎张本等分往山东山西河南及应天顺天诸府督造粮车发丁夫挽运期以明年二月集宣府】

下侍读李时勉于狱

【先是时勉应求言诏条上时务十五事极言北京营建之非及远国入贡人不宜使羣居辇下忤帝意已观其他说多中时病抵之地复取视者再率多施行会大臣希旨诋言者谤讪至是遂下狱】

【壬寅】二十年春正月己未朔日有食之

【罢朝会诏羣臣修省】

三月诏有司遇灾先振後闻

【户部奏直隶开州等州县民饥帝叹曰有司必至饥民嗷嗷始达于朝又必待命下乃振之馁死者已不逮矣其令自後遇饥即验实发仓振之而後闻】质实【开州金置明属大名府今因之】

帝自将征阿鲁台命皇太子监国

【阿鲁台初为卫拉特所败穷蹙南窜帝纳而封之数年生聚繁富浸桀骜拘留朝使其贡

使归多行刦掠又时出没塞下为寇至是大入兴和杀都指挥王焕帝于是决策亲征】

夏六月雨水伤稼

【南北畿山东数十州县霪雨伤稼】

秋七月帝至沙浑原阿鲁台遁遂征乌梁海

【大军至开平谍报阿鲁台攻万全诸将请分兵还击帝曰诈也彼虑吾捣巢欲以此牵制我知大军北行必已丧胆况敢攻城哉疾驱之攻万全者果遁去大军次沙浑原阿鲁台大惧母妻皆冒之于是与其家属直北走尽弃輜重於库楞海侧乃命发兵焚之收其牲畜而还帝谓诸将曰阿鲁台敢悖逆恃乌梁海为羽翼也当移师剪之遂简步骑二万五道并进谕曰军至寇且西走邀之必获至奇拉尔河其衆数万果驱牛马车辆西走遇大军仓卒迎战帝麾骑夹击自率前锋冲之斩首数百级余走散其地背河面左皆山大军依山而军帝乘高望之见其衆稍聚乃麾兵绕出其右分兵渡河断其後衆突至尽获之又麾兵绕出其左先伏神机弩於深林中又命严阵山下以待已而其衆尽弃輜重走左帝麾骑与山下兵驰追之及林间伏发遂大溃追奔三十里斩部长数十人别以兵徇河西斩获甚衆乌梁海余党老弱皆诣军门降】质实【沙浑原在兴和北奇拉尔河方輿纪要在朶顏境内奇拉尔河旧作屈裂儿今改】

免南北畿山东河南州县粮刍七十万

【南北畿山东河南各州县水灾粮三十三万八千有奇刍三十八万有奇皇太子皆免之】

八月诏班师

【诸将分道捕击者亦以次献捷乃下诏班师】

九月帝还京师

【壬戌帝乘法驾入京城躬告天地宗庙社稷御奉天门朝百官受贺】

下左春坊大学士杨士奇吏部尚书兼詹事蹇义于狱寻释之

【太子屡遭谗构帝以士奇辅导有阙下锦衣狱礼部尚书吕震壻张鹤朝参失仪太子宥之帝怒义不匡正命与震并下狱寻皆释之】质实【张鹤时官户部主事】

冬十月遣使核天下仓储

【分遣中官及朝臣八十人核天下仓粮出纳之数】

闰十二月乾清宫灾

【戊寅夜乾清宫灾】质实【乾清宫在乾清门内】

【癸卯】二十一年春三月御史王愈等决囚误杀无罪四人坐弃市

【监察御史王愈及刑部锦衣卫官四人会决重囚误杀无罪四人事闻帝命法司执愈等偿死即日皆弃市】质实【王愈修武人】

夏五月免开封南阳卫辉凤阳等府水灾田租

【去年夏秋霪雨黄河泛溢伤田稼帝命遣人按视蠲其租税】质实【南阳秦郡元明为府今因之】

赵护卫指挥孟贤等谋逆伏诛

【先是高燧与高煦谋夺嫡时时谮太子凡太子宫僚多得罪既而帝闻其不法事大怒诛其长史顾晟褫高燧冠服以太子力解得免至是帝有疾护卫指挥孟贤等结钦天监官王射成及内侍杨庆养子造伪诏谋进毒于帝俟晏驾诏从中下废太子立赵王时總旗王瑜姻家高以正者为贤等画谋谋定告瑜瑜上变帝曰岂应有此立捕贤等得所为伪诏帝顾高燧曰尔为之耶高燧大惧不能言太子又力为之解曰此下人所为高燧必不与知乃得免贤等悉伏诛】质实【总旗明史兵志凡千百户所各设总旗二小旗十王瑜字廷墨山阳人仕至右军督都府佥事】

六月庚戌朔日有食之

秋七月释李时勉于狱复其官

帝复自将征阿鲁台命皇太子监国

【边将言阿鲁台将率衆南犯帝曰去秋寇犯兴和朕率师捣其巢穴复剿其党乌梁海其穷甚矣今以朕既得志必不复出朕当率兵先驻塞外以待之彼不虞吾兵已出而轻肆妄动我因其劳而击之破之必矣于是部分诸军以宁阳侯陈懋为前锋驰攻之】

八月免两京山东郡县水灾田租

【皇太子谕户部曰今年南北直隶并山东郡县水旱之处粮刍皆无出而有司徵索不已

甚为朝廷歛怨其悉蠲之】

冬十月帝至上庄堡蒙古额森托噶来降诏班师【大军至西阳河闻阿噜台为卫拉特所败部落溃散遂驻师前锋陈懋追寇至宿嵬山不见敌遇王子额森托噶率妻子部属来归遣人驰奏命偕来入见帝大喜封为忠勇王赐姓名曰金忠赏赉甚厚遂班师】质实【上庄堡在万全右卫北其地有上庄堡膳房堡新开口堡新河口堡俱永乐以後置今宣化府万全县北境西阳河即西洋河在宣化府怀安县西北自山西天镇县流入经西阳河堡下流与东洋河合宿嵬山方輿纪要在兴和北亦曰宿嵬口度漠处也额森托噶元太保布哈六世孙额森托噶旧作也先土干布哈旧作不花今并改】

十一月帝还京师

【驾至京师陈鹵簿帝乘御辇入告天地宗庙社稷御奉天门朝羣臣时诸番贡使咸集阙下羣臣上表称贺】

【甲辰】二十二年春正月复诏北征

【金忠数请击阿噜台愿为前锋自効帝初不许会开平守将言阿噜台犯边羣臣劝帝如忠言帝意遂决敕边将整兵俟命徵山西山东河南陕西辽东五都司及西宁巩昌洮岷各卫兵期三月会北京及宣府】质实【西宁秦为西羌所居湟中地汉置破羌县隋改湟水县为鄯州治唐吐番据之曰青唐城宋复置鄯州又改西宁州明为卫今升府岷州西魏置明为卫今复为州属巩昌府】

夏四月帝发京师命皇太子监国

【大学士杨荣金幼孜从杨士奇等留京师辅太子大军至开平获谍者知阿噜台遁帝意亦厌兵乃下诏暴阿噜台罪而宥其来降者谕诸将曰武有七德禁暴除乱是其首也又谓止戈为武今罪人阿噜台耳胁从之衆有归降者宜悉意抚绥非持兵器向我师纵勿杀时比年用兵白骨被野帝命瘞诸道旁亲制文祭之至应昌宴羣臣命中官歌太祖御制词五章曰此先帝所戒後嗣也虽军旅不敢忘帝亦自制词五章述奉天法祖勤政恤民意亦命中官歌之】

六月至达兰纳穆尔河诏班师

【前锋至达兰纳穆尔河不见敌命张辅等穷搜山谷三百余里无一马迹帝进驻河上命陈懋等前覘懋至白邨山无所遇以粮尽引还】质实【达兰纳穆尔河方輿纪要在和林东北或谓即库库诺尔元太祖初会集部落之地白邨山方輿纪要在漠外达兰纳穆尔旧作答兰纳木儿库库诺尔旧作濶濶纳浯儿今并改】

南京地震

秋七月帝有疾至榆木川崩

【帝还至清水源命杨荣金幼孜刻崖石为铭遣吕震以旋师谕皇太子诏告天下帝已不豫次仓崖成疾甚顾左右叹曰夏原吉爱我至榆木川疾大渐遗诏传位皇太子丧礼一如高皇帝遗制遂崩年六十有五杨荣金幼孜等议以六师在外秘不发丧熔锡为梓以斂载以龙輦所至朝夕上膳如常仪荣及御马少监海壽驰赴太子太子遣太孙奉迎鵬鹗谷太孙至于军中始发丧将及郊迎入仁智殿加殓纳梓宫】质实【榆木川在故开平城西北清水源在漠北永乐八年春帝北征过此甘泉溢出名之曰神应鵬鹗谷在宣府城东北二百七十里元云州鵬窠站洪武四年于此置浩岭驿宣德六年改置堡今属宣化府龙门县东境仁智殿在武英殿後】

发明【成祖雄才远畧世称英主然以藩封篡立慙德实多革除之际惨行屠戮季年屡北征虽威震沙漠而躬泣戎行亦云疲矣榆木川之变当时传闻异辞如明辑畧明书等编谓成祖夜感异梦召问近臣且军多讹言衆心惶惑及秘不发丧召匠熔锡制梓以斂且杀匠灭口军人莫测于是傳会者遂有不得善终之说稗官野史固未可据为传信或由成祖前此之多行不义残刻滥诛怨讟之于人所致耶】

八月太子高炽即位

【大赦天下以明年为洪熙元年】

释夏原吉黄淮等于狱复其官

【时原吉及吴中杨勉黄淮杨溥金问皆久系狱中遗诏至京师太子即释之咨原吉以时事原吉对以振饥省赋役罢西洋取宝及云南交址采办悉从之既即位复原吉等官】

复置三公三孤官

【洪武初置三公官以李善长等为之三孤无兼领者建文永乐间罢公孤官至是复设以公侯伯尚书兼之】

加杨荣金幼孜杨士奇黄淮等官领内阁事如故【初解缙等入文渊阁皆编检讲读之官不得专制诸司诸司奏事亦不得相关白帝即位以荣士奇等皆东宫旧臣乃进荣为太常卿幼孜为户部右侍郎兼文渊阁大学如故士奇为礼部左侍郎兼华盖殿大学士黄淮为通政使兼武英殿大学士俱掌内制已复置谨身殿大学士改荣为之未几荣士奇皆迁尚书阁职渐崇】

汰冗官

【帝以古者官不必备今设官太冗廉污无别则廉者之心或怠贤否并处则小人之势常胜其令中外廉察不称者罢之】

九月召黄福于交址以兵部尚书陈洽代之

【福在交址十九年编氓籍定赋税兴学校置官师数召父老宣谕德意戒属吏无苛扰一切镇之以静上下帖然帝以福久劳于外召还命兼詹事辅太子以兵部尚书陈洽代掌布按二司事福还之日交人扶携走送号泣不忍别福既还交址贼遂剧讫不能靖】质实【陈洽字叔远武进人】

河溢开封

【免今年田租命右都御史王彰往抚恤之】质实【王彰字文明郑州人】

诏自今官用物悉于所产地市之

【诏工部曰古者任土作贡不强所无比年如丹漆石青之类所司不究物产之地槩徵郡县科派病民自今官所用物必于所产地计直市之违者罪不宥】

羣臣请公除不许

【易月制满礼部尚书吕震请即吉侍郎杨士奇不可尚书蹇义兼取二说进帝曰梓宫在殡易服岂臣子忍言士奇执是也帝乃素冠麻衣絰而视朝时羣臣皆已吉服惟士奇及英国公张辅服如常帝叹曰辅武臣也而知礼过六卿由是益见亲重】

增诸王岁禄

【先是召汉王高煦赴京比至与赵王高燧并厚赐之复赐诸王金币有差帝曰诸叔在者无几诸兄弟唯赵王居京师他皆守藩于外朕旦夕念焉户部其各益禄米差次之】

始置南京守备

【以襄城伯李隆为之兼领中军都督府事为南京要职】质实【此置南京守备之始李隆字彦平和州人濬之子】

镇守交址中官山壽请授黎利清化知府从之

【初利未叛时与壽相善及利逃老挝益深匿李彬奏言利窜老挝请官军毋入当尽发所部兵捕利今久不遣其情叵测朝廷疑老挝匿贼令彬送其使臣至京诘问老挝乃逐利已而率衆求抚仍匿俄乐不出帝践阼後寻寇茶笼败镇守参将方政兵杀指挥伍云会壽入朝力言利与已相信今往谕之必来归帝曰此贼狡诈若为所给则其势益炽不易制也壽叩头言如臣往谕而利不来臣当万死帝颔之遣壽斋敕授利清化知府慰谕甚至敕甫降利已犯清化杀指挥陈忠利得敕无降意佯言俟秋凉赴官而寇掠不已】质实【茶笼交址旧州属义安府方政全椒人伍云定远人陈忠临淮人】

散畿内民所养官马于诸卫所

【谕兵部曰今太仆马增数倍而畿民一夫或畜三匹四匹毕力于此耕桑尽废其散马给诸卫所及临边戍卒养习之】质实【明会典在京在外卫所俱有孳牧马匹以给官军骑操之用在京及南北直隶卫所属两京太仆寺在外属各该行太仆寺苑马寺及都司皆委官提督每卫委指挥一员所千百户一员专管孳牧其搭配科驹起解比较等项悉照民间事例】

赐少傅兼吏部尚书蹇义等银章

【义进少傅杨士奇进少保杨荣进太子少傅金幼孜进太子少保赐银章各一曰绳愆纠缪谕以协心赞务或政事有阙或羣臣言而未从者用此章密疏以闻既而进户部尚书夏原吉少保赐原吉银章谕勉如义士奇等】

冬十月复魏国公徐钦爵

【初辉祖以忤成祖夺爵及卒复封其子钦十九年来朝不辞径去成祖怒罢为民至是复故爵】

诏有司奏雨泽者即以闻

【通政司请彙四方雨泽章奏送给事中收贮帝曰祖宗令天下奏雨泽欲前知水旱以施恤民之政积之通政司已失之矣今又令收贮是欲上之人终不知也自今奏至即以闻】

立皇后张氏

【后始为帝妃操妇道至谨稚得成祖及仁孝皇后懽帝数为汉赵二王所间体肥硕不能骑射成祖恚至减太子宫膳濒易者屡矣卒以后故得不废及帝立册为皇后】质实【皇后张氏永城人兵马副指挥张骥之女骥追封彭城伯后于洪武十六年封燕世子妃永乐二年封皇太子妃】

立子瞻基为皇太子封子八人为王

【封子瞻埈为郑王瞻墉越王瞻墉襄王瞻埈荆王瞻埈淮王瞻埈滕王瞻埈梁王瞻埈卫王】质实【郑靖王瞻埈帝第二子就藩凤翔後迁怀庆越靖王瞻墉帝第三子封衢州未之藩卒襄献王瞻墉帝第五子就藩长沙後迁襄阳荆宪王瞻埈帝第六子就藩建昌後迁靳州淮靖王瞻埈帝第七子就藩韶州後迁饶州滕怀王瞻埈帝第八子封云南未之藩卒梁庄王瞻埈帝第九子就藩安陆卫恭王瞻埈帝第十子封怀庆未之藩卒其第四子为蕲献王瞻埈初封静乐王永乐十九年卒帝即位追封无後】

诏举贤才

【令在京七品在外五品以上官及知县于五品以下官及军民中访荐德行惇笃才能出衆文学优长者量才擢用举後犯赃则连坐举者】

命大学士会法司录囚

【帝性仁恕谕杨士奇杨荣金幼孜曰比年法司之濫朕所深知所拟大逆不道往往出於文致自今审决重囚卿三人必往同讞有冤抑者虽细故必以闻】

十一月宥建文诸臣家属

【诏礼部建文诸臣家属在教坊司锦衣卫浣衣局及习匠功臣家为奴者悉宥为民还其田土言事谪戍者亦如之】

发明【成祖革除之际为忠义所不容于是肆其毒虐倒行而逆施建文诸臣备遭惨酷而并取其家属悉发教坊锦衣浣衣及与功臣为奴又并及其外戚全家戍边怨毒之流古所未有仁宗心识其冤即位之初首宥诸臣家属旋复放还外戚之戍边者可谓寛大之政易称干父之蛊仁宗有焉】

阿鲁台来贡马

【阿鲁台遣使贡马赐赆有差降敕宥其前过许令通好】

诏羣臣极言得失

【帝曰朕承大统君临亿兆亦惟赖文武贤臣共图康济矧属亮陰之际尤切倚毗之心嗣位初首诏直言而涉月累旬言者无几夫京师首善地民困於下而不得闻弊胶于习而不知革卿等无虑後譴相与至诚必有嘉谟嘉猷辅朕不逮】

赦乌梁海罪

【帝遣使敕谕乌梁海官民曰朕承大统凡四方万国罪无大小悉已赦宥若乌梁海官民敬顺天道许令改过自新仍前朝贡聽往来生理谕侍臣曰彼有过而不宥之既无所容将来必为边患吾不吝屈己以安百姓也】

遣御史巡察边卫

【遣御史巡核缘边诸卫稽部曲申号令】

遣御史分巡天下考察官吏

【帝曰国以民为本民安则国安比年牧守官不体朝廷恤民之意侵削扰害民不聊生今分行考察然才器不同当明白具实以闻无惑于小人无屈于势要无私于亲故询之于衆断之以公可也又御史朕之耳目勉副朕心必先自治乃可治八若弃廉耻违礼法朕亦不贷往勉之】

禁所司擅役屯田军士

【帝曰古者寓兵于农而不夺其时民无转输之劳而兵食足後世莫善于汉之屯田先帝立屯种法用心甚至所司数以征徭扰之既失其时遂无其效其令天下卫所凡屯田军士不许擅差违者处重法】

命都督方政同荣昌伯陈智镇交址

【命政与智协同镇守智暗懦素无将畧憚战因借抚以愚中朝且与政忤遂顿兵不进而山壽一意主抚专进止以故贼益猖獗官军不能制】

十二月宥建文诸臣外戚全家戍边者留一人余悉放还

【建文中齐黄诸臣外戚全家谪边者令家存一丁于戍所余放为民】

书天下三司官姓名于奉天门西序

【帝曰庶官贤否军民休戚所系唐太宗书刺史名于屏朝夕省览闻有善政则各疏于下故当时皆思奋励致治效斗米三钱外户不闭皇考亦尝书中外官姓名于武英殿南廊今五府六部朝夕接见得询察贤否若三司官朕既不识又不悉姓名虽或闻其贤否邪正既久不能不忘有善上忘谁肯自励有不善上忘亦谁肯自戒如此何以望治具书三司官姓名揭诸西序朕得观之以考察行事而黜陟焉】

葬长陵

【谥曰体天宏道高明广运圣武神功纯仁至孝文皇帝庙号太宗葬长陵嘉靖中更庙号曰成祖】质实【长陵在昌平州天壽山中峯之下】

【明史赞曰成祖少长习兵据幽燕形胜之地乘建文孱弱长驱内向即位以後躬行节俭水旱朝告夕赈无有壅蔽知人善任表里洞达雄武之畧同符高祖六师屡出漠北尘清季年威德遐被四方宾服受命入贡者殆三十国幅 之广远迈汉唐成功骏烈卓乎盛矣然革除之际倒行逆施慙德又曷可掩哉】

【乙巳】仁宗昭皇帝洪熙元年春正月壬寅朔御奉天门受朝不举乐

【帝御奉天门朝羣臣命礼部鸿胪寺不作乐羣臣止行五拜三叩礼先是礼部尚书吕震请受贺作乐如大朝仪帝不从震固请乃止受朝不举乐】

勅内外臣修举职业

【谕曰朕祇绍洪图仰惟祖宗创业守成之难夙夜惓惓体天为治嗣位初蠲逋负赦有罪不急之务一切停罢选任贤良共图维新之治期天下安於太平今天下庶事未尽理生民未尽安斯朕之责亦尔文武羣臣之责尚思勉之】

建弘文阁

【建弘文阁于思善门诏选诸臣有学行者入直杨士奇荐侍讲王进儒士陈继蹇义荐学录杨敬训导何澄诏以继为博士敬为编修澄为给事中日直阁中命学士扬溥掌阁事进佐之帝亲授溥阁印曰朕用卿左右非止助益学问亦欲广知民事为治道辅有所建白封识以进】质实【弘文阁殿阁词林记仁宗即位建弘文館於思善门外驾常临幸讲论经史但作館不称阁又考明典故纪闻仁宗作弘文阁於思善门外作印章命翰林学士杨溥掌阁事据此应是阁思善门芜史思善门外桥西为武英殿陈继字嗣初吴人幼孤母吴氏躬织以资诵读比长贯穿经学人呼为陈五经奉母至孝府州交荐以母老不就母卒哀毁过人仁宗幸弘文阁问今山林亦有名士乎杨士奇以继对召为国子博士寻改翰林五经博士宣宗初迁检讨引疾归卒】

二月命太监郑和守备南京

【命郑和领下番官军守南京於内则与内官王景宏等协同管事遇外有事则与襄城伯李隆等商议施行】

帝耕藉田

【帝躬祭先农耕藉田】

南京地震

【凡十有六震四月又三震五月复震】

三月以权谨为文华殿大学士

【谨奉母至孝初为光禄署丞以省侍归母年九十终庐墓三年致泉涌兔驯之异有司以闻帝命驰驿赴阙出其事状令侍臣廷诵之即拜文华殿大学士谨辞帝曰朕擢卿以风天下为子者】质实【权谨字仲常徐州人永乐四年荐授乐安知县迁光禄署丞至是拜大学士寻扈从皇太子监国南京宣宗嗣位以疾乞归改通政司右参议赐白金文绮致仕】

诏求直言

【初大理寺少卿弋谦言事过激帝不怪尚书吕震吴中等劾谦诬罔帝召士奇等言之士奇对曰谦不谄大体然心感超擢恩欲图报耳主圣则臣直惟陛下优容之帝乃不罪谦然每见谦词色甚厉士奇从容言陛下诏求直言谦言不当触怒外廷悚惕以言为戒今四方朝覲者集阙下见谦如此将谓陛下不能容直言帝曰此固朕不能容亦吕震辈迎合以益朕过今当置之免谦朝参令专视司事未几言者益少复召士奇就榻前书敕引过曰朕即位以来臣民上章以数百计未尝不欣然听纳间者弋谦所言多非实事羣臣交章奏其卖直请置诸法朕但免谦朝参自是言者益少去冬无雪春亦少雨阴阳愆伏必有其咎岂无可言而为臣者怀自全计退而默默何以为忠朕于谦一时不能含容未尝不自愧咎尔羣臣勿以前事戒於国家利弊政令未当者直言勿讳谦朝参如故寻擢为右副都御史】质实【弋谦代州人】

发明【弋谦以言事过激吕震吴中等辄劾其诬罔迨士奇进言仁宗已知震等之迎合且为下敕引过而於震中辈不闻有所踈斥史称吕震佞谀倾险吴中为时论所鄙皆一时宵小之流仁宗为明辟既察其奸而优容如故岂所谓英断不足者欤】

振隆平饥

【隆平县饥时栢乡县多贮官麦有司请以贷之帝曰饥即振之何贷为】质实【隆平汉广阿唐招庆宋改隆平明因之今县属赵州栢乡汉鄱县隋栢乡宋省为镇後复置县明因之今县属之赵州】

诏法司慎刑

【诏曰刑者所以禁暴止邪导民于善非务诛杀也吏或深文傅会以致冤滥朕深悯之自今其悉依律拟罪若朕过于嫉恶法外用刑法司奏执五奏不允同三公大臣执奏必允乃已诸司不得鞭囚背及加人宫刑有自宫者以不孝论人之为非父子不相谋是以舜罚不嗣文罪不孥自今非谋反勿连坐亲属古之盛时采听民言用资戒傲今奸人往往摭拾诬为诽谤

法吏刻深锻链成狱刑之不中民则无措其除诽谤禁有告者一切勿治】

以阳武侯薛禄为镇朔大将军率师巡开平大同【敕命阳武侯薛禄佩镇朔大将军印充总兵官率官军自开平至大同缘边巡哨遇寇相机剿捕】质实【薛禄胶人行六军中呼曰薛六後贵更名禄】

命安平伯李安与荣昌伯陈智同镇交址

【帝改元後铸将军印分颁边将智得征夷副将军印至是命安平伯李安往佐之】质实【李安怀远人莒国公远之子】

诏北京诸司复称行在

【将迁都南京诏北京诸司悉称行在复北京行部及行後军都督府】

发明【成祖建都北京为久远计仁宗欲复都南京乃复建北京行部及行後军都督府其时南北两京官吏互为徵调且谕内监王景宏等修治南京宫殿意甚决矣仁宗即位初銳意求治多善政独此欲迁都一事深违成祖定制时南北困于供亿咸以都南京为便不知成祖排羣议而都北京实据天下全势而筹立国大计岂可轻议迁移者乃士奇辈无一言谏及何哉】

夏四月免山东淮徐今年租税之半

【帝闻山东及淮徐民乏食有司徵夏税方急乃御西角门召士奇草诏免今年夏税及秋粮之半士奇言上恩至矣但须户工二部预闻帝曰有司虑国用不足必持不决救民之困当如救灾拯溺不可迟也趋命中官具楮笔令士奇就门楼书诏帝览毕即用玺付外行之顾士奇曰今可语部臣矣】

命皇太子居守南京

【命皇太子谒孝陵往居守】

振河南及大名饥

【河南监察御史行在户部俱奏请发所在仓粟振济从之】

五月左迁李时勉罗汝敬为监察御史寻下狱

【侍读李时勉抗疏言事帝怒召至便殿对不屈命武士扑以金山脇折者三曳出几死明

日改交址道御史命日虑一囚言一事章三上乃下锦衣卫狱时侍讲罗汝敬亦言事改御史俱下狱】质实【罗汝敬名简以行字吉水人】

帝不豫遣使召皇太子

【召蹇义杨士奇黄淮杨荣至思善门命士奇书敕遣中官海壽驰召皇太子于南京】

帝崩

【年四十有八遗诏皇太子即位】

六月太子瞻基至自南京即位

【太子方谒孝陵海壽至太子即日就道时南京颇传凶闻又传汉王高煦谋伏兵于道邀太子羣臣请整兵卫或请从间道行太子不可曰君父在上谁敢干之驿道驰还至良乡内监杨瑛尚书夏原吉吕震捧遗诏至宣讫太子哭尽哀入宫发丧越十日即位大赦以明年为宣德元年】质实【良乡燕中都地汉良乡县明属顺天府今因之】

尊皇后为皇太后立皇后胡氏

【后于永乐十五年选为皇太孙妃已为皇太子妃及是立为皇后】质实【后名善祥济宁人光禄寺卿胡荣之女】

秋闰七月以翰林学士杨溥入内阁

【罢弘文阁召溥入内阁与杨士奇等共典几务王进等以原职隶翰林院帝谓溥曰古君臣更相戒飭用致太平卿将何以辅朕对曰臣受国厚恩安敢忘报帝曰直箴朕过报朕多矣溥曰直言非难能受直言为难陛下既以命臣臣敢不尽忠以告】

八月始置巡抚官

【以大理寺卿胡概参政叶春巡抚南畿浙江设巡抚始此自是遇灾荒盗贼辄遣大臣往巡抚事已召还成化以後遂成定员而三司之任渐轻】质实【胡概字元节丰城人本姓熊随母适胡氏因胡姓叶春海盐人】

九月葬献陵

【谥曰敬天体道纯诚至德弘文钦武章圣达孝昭皇帝庙号仁宗】质实【献陵在昌平州天壽山西峯下】

【明史赞曰当燕兵起仁宗以世子居守全城济师其後成祖乘輿岁出北征东宫监国朝无废事然中遭媒孽濒于危疑者屡矣而终以诚敬获全善乎其告人曰吾知尽子职而已不知有谗人也是可为万世子臣之法矣在位一载用人行政善不胜书使天假之年涵濡休养德化之盛岂不与文景比隆哉】

更定科举法

【初制乡试取士虽有定额自洪武十七年诏从实充贡毋以额限嗣後遂多寡不一仁宗时杨士奇请定其额并言礼闈士试当分地而取仁宗以为然乃议乡试取士南京国子监及南隶共八十人北京国子监及北直隶共五十人江西如之其次浙江福建又次湖广广东又次河南四川又次陕西山西山东皆自五而杀广西二十人云南交址各十人贵州有应举者就试湖广会试取士不过百人南人十六北人十四议既定未及行帝即位遂诏行之】质实
【明初乡试定额按明史选举志洪武三年诏京师行省各举乡试直隶贡额百人河南山东山西陕西北平福建江西浙江湖广皆四十人广东广西皆二十五人】

御定资治通监纲目三编卷七

卷八

<史部,编年类,御定资治通监纲目三编>

钦定四库全书

御定资治通监纲目三编卷八

【起丙午明宣宗宣德元年尽卒亥明宣宗宣德六年】凡六年

【丙午】宣宗章皇帝宣德元年春正月赦死罪以下运粮宣府自赎

【勅输刑部都察院大理寺曰岁事肇新春生伊始见问罪囚宜从宽典除情重者不宥外余皆宥罪俾运粮赴宣府其杂犯死罪自备粮十五石运纳文职官吏除用武职调卫徙流迁徙罪运官粮十石武官复职文职官吏调用杖罪运官粮五石各还职役军民人等应运纳者皆复役宁家】

命吏部侍郎黄宗载等清理天下军伍

【时军伍颇缺卫所勾军州县多不以实无丁之家诛求不已有丁之户行贿得免兴州军士范济诣阙言乃命宗载等十五人分往直省清理之其後定清军例二十四条遣京卿给事中御史以为常】质实【黄宗载一名屋字厚夫丰城人官至吏部尚书】

二月悉除开荒田逋税

【巡按山西监察御史张政言民人先有逃徙荒废田土逋负税粮近诏赦宥令其复业所有积逋悉为蠲免欢腾远迩莫不来归臣见山西民人多复愁沮盖初逃时有司惧罪未申户部负租不准开豁缘其旧弃久弃今归生计尚无若复追徵恐又逃徙帝谓夏原吉曰大赦之後何逋不除岂可谓初未申闻便要徵纳其即下有司悉与蠲免】质实【张政广德人】

耕藉田

南京地震

【正月甲辰震至是戊寅又震】

三月荣昌伯陈智都督方政讨黎利败绩

【先是黎利攻围茶笼义安知府琴彭署州事拒守閱七月粮尽卒疲无援者巡按御史以

闻奏至而仁宗崩帝初即位敕责智及三司官智等不为意洪熙元年冬茶笼陷琴彭死之尚书陈洽以闻帝敕智等责以来春平贼召杨士奇杨荣於文华殿帝曰昨谕荣昌伯等敕已行矣朕有一言独与卿二人知之昔在南京皇考曾与朕言太祖定天下安南最先归化黎氏篡陈所必当讨求陈氏之後不得故郡县其地若陈氏尚有後立之犹是太祖之心而一方亦得安静此语藏在朕心未尝忘士奇荣对曰永乐三年初征黎贼凡诰敕皆臣等亲承面命圣志惓惓在于兴灭继絶帝曰其时朕虽髫年尚记一二圣语亦如卿等所言卿二人但识朕意三二年内朕必行之至是智与政败绩于茶笼州智懦而多忌政勇而寡谋不相能而山壽拥兵父安不救是以屡败】质实【琴彭交址人赠交址左布政使】

以礼部左侍郎张瑛兼华盖殿大学士直文渊阁【初帝为皇太孙瑛以给事中与陈山俱侍讲读至是以旧恩遂有是命瑛善承风旨虽参机务委蛇受成而已帝亦弗重也】质实【张瑛邢台人陈山沙县人】

夏四月遣成山侯王通征黎利

【时渠魁未平小寇蜂起宣化贼周臧太原贼黄庵芙蓉贼潘可利云南宁远州红衣贼长擎俱叛附利帝降旨切责智政以通为征夷大将军充总兵官马瑛为参将帅师讨利尚书陈洽参赞军务智政俱削爵充为事官听通节制通既出师一日帝御文华殿蹇义夏原吉杨士奇杨荣侍帝曰交址自建郡县以来用兵无宁岁昨遣将出师朕反覆思之欲如洪武中使自为一国岁奉常贡以全一方民命卿等以为何如义原吉对曰太宗皇帝平定此方劳费多矣二十年之功弃于一旦臣等以为非是帝顾士奇荣曰卿两人云何对曰交址唐虞三代俱在荒服之外汉唐以来虽为郡县叛服不常汉元帝时以贾捐之议罢珠崖郡前史称之元帝中主犹能布行仁义况陛下父母天下与此豺豕较得失耶帝颌之五月下诏大赦交址罪人黎利潘僚降亦授职停采办金银香货欲以弭贼而贼无悛心】质实【宁远州元至治三年置直隸云南行省明洪武十五年属临安府宣德元年与安南按明宣宗实录交址太原宣化二府属县隣近云南宁远州其人皆红衣黑胸故号红衣贼土官知州刀吉罕纵令劫掠命沐晟讨之】

颁外戚事监及历代臣监

【御制外戚事监及历代臣监成颁赐外戚及羣臣帝曰治天下之道必自亲亲始文武之臣欲同归于善前事之不忘後事之师也故于暇日采辑前代近戚及羣臣善恶吉凶之迹类为此书用示法戒其择善而从以保福祿二书皆帝手序之】

五月录囚

【谕三法司曰古者孟夏断薄刑出轻系仲夏拔重囚益其食所以顺时令重人命也祖宗时遇隆寒盛暑必命法司录囚今天气向炎不分轻重悉系之非钦恤之道卿等当体此心即量轻重区别之务存平恕毋致深刻】

诏毁身疗亲疾者不得旌表

【初洪武中礼部定议凡人子卧冰刲股者不在旌表例至是总旗卫整女母病笃刲肝煮液母饮之而愈礼部特为请旌帝曰孝亲有道剖腹刲肝岂可为孝若因此伤生其罪益大女子无知不必加罪所请不允】

六月免南京囚解行在

【行在刑部都察院奏南京轻重罪囚俱解赴行在道中亡故者多其囚已经大理寺审允又赴行在则复矣宜令南京刑部都察院除军民职官命妇犯轻重罪及旗军校尉力士余丁犯徒流死罪皆监候奏请其余皆就彼依律决遣从之】

秋七月京师地震

始立内书堂

【洪武中设内官监典簿掌文籍以通书算小内史为之又设尚宝监掌御宝图书皆仅识字不明其义及永乐时始令听选教官入内教习至是开书堂于内府改刑部主事刘翀为翰林修撰专授小内使书其後大学士陈山修撰朱祚俱专是职选内使年十岁上下者二三百人读书其中後增至四五百人翰林官四人教习以为常于是内官始通文墨掌章奏照阁票批朱与外庭交结往来矣】质实【洪武十七年更定内官诸监库局品职内官监设令一人正六品丞二人从六品典籍一人正九品尚宝监凡用御宝则奏请然後付尚宝司官用之毕则捧入设令一人正七品丞一人从七品明史宦官传太祖鑒前代失宦者不过百人末年须祖训乃定为十有二监及各司局称备员十有二监曰神宫曰尚宝曰孝陵神宫曰尚膳曰尚衣曰司设曰内官曰司礼曰御马曰印绶曰直殿曰都知刘翀济宁洲人】

均蓟州军户畜马

【初以蓟州之东地广草肥宜畜牧令永平卫军人牧牝马一免他役後军士调发既多畜者皆老幼残疾之人一人有畜至二三十匹者两载责纳一驹人愈穷困马亦耗巡按御史李骥奏请变通帝命兵部视蓟州诸卫马少者分给均养】

京师地生毛

【长尺余】

免山东夏税

【山东旱无麦诏免今年夏税】

诏中官传旨必覆奏始行

【时中官传旨辄令径行帝闻之即下法司治屡申谕部科覆奏而内官内使之擅传旨者终不能禁部科亦不能违也】

罢湖广采木

【时湖广发民运粮调军征讨遇旱灾人皆艰食工部勘合采杉松大材七万株巡按御史刘鼎贯奏请罢役从之尚书吴中请罢其半帝命悉罢之】

河南霖雨河溢

【六月至七月雨黄汝二河溢开封南阳河南】质实【汝水源出河南汝州天息山东流过郊县又东南与滎水合沙河入之过襄城县又东南过鄆城县北又东南入汝宁府境迳汝阳上蔡又东南迳新蔡东流入于淮河南汉郡唐府元路明洪武初复为府今因之】

八月汉王高煦反帝亲征

【高煦身長七尺余轻趫善骑射自负其雄武潜蓄异志永乐中成祖尝命同仁宗谒孝陵仁宗体肥重且足疾两中使掖之行恒失足高煦从後言曰前人蹉跌後人知警时帝为皇太孙在後应声曰更有後人知警也高煦回顾失色既徙封乐安益怨望仁宗崩帝自南京奔丧高煦谋伏兵邀于路仓卒不果帝即位赐高煦及赵王视他府特厚益自肆与其党日夜造军器籍丁壮为兵破狱出死囚厚养之集旁近无赖子弟及逋逃赐银币编队甲夺府州县官民畜马立五军四哨部署已定伪授指挥王斌知州朱恒长史钱巽千户盛坚典仗侯海教授钱常等为太师尚书都督侍郎等官其余各以差授职遣人约山东都指挥靳荣为助期先取济南然後犯阙御史乐安李濬家居变姓名诣京白其事山东文武军民真定等卫所告变者亦踵至高煦遣亲信枚青入京约英国公张辅为内应辅立繫以闻帝遣中官侯泰赐高煦书泰至高煦盛兵见泰曰靖难时非我出死力不得至是太宗轻听谗言削我护卫徙我乐安仁宗徒以金帛饵我今上举口谈祖制吾安能郁郁久居此乎因命泰观其军马兵器曰以此横行天下可也尔归报尔主速执送奸臣然後议我所欲耳泰惧不敢言归亦不以实对帝曰泰二心锦衣官从泰往者具陈其事帝怒已而高煦所遣百户陈刚賫奏至多所指斥索诛奸臣以夏原吉为罪首帝遣阳武侯薛禄往讨之夜召诸大臣入议原吉免冠谢死罪帝曰卿何为是言彼借卿为兵端耳休戚与卿共之命诸大臣坐屏左右密语杨荣首劝帝亲征帝难之张辅曰愿假臣兵二万擒献阙下不足烦至尊荣曰彼谓陛下新立必不自行故敢尔以天威临之事无不济臣请先驱原吉曰独不见李景隆已事耶臣昨见所遣将命下即色变退语臣等泣临事可知且兵贵神速卷甲趋之所谓先人有夺人之心也荣言是议遂决命郑王瞻埈襄王瞻埈居守薛禄等率兵二万为先锋车驾发京师过杨村马上顾从臣曰度高煦计安出或对曰必先取济南为巢穴或曰彼曩不肯离南京今必引兵南下帝曰不然济南虽近未易攻闻大军至亦不暇攻护卫军家乐安肯弃之南走乎高煦外强中怯敢反者轻朕年少新立衆心

未附不能亲征耳他将来以甘言厚利诱之侥幸成事今朕来已胆落敢出战乎至即擒矣】质实【五军指挥王斌将前军韦达左军千户盛坚右军知州朱恒後军诸子各监一军高煦自将中军四哨指挥韦宏韦兴千户王玉李智领之真定卫在真定府治东南明洪武三年建今裁杨村在武清县东南五十里朱恒应天人李濬由太学生官监察御史时丁父忧家居至是擢左佾都御史】

帝至乐安高煦降遂班师

【高煦初约靳荣取济南山东布按二司觉之防荣不得发既闻薛禄将喜曰易与耳及闻帝亲征始惧朱恒力言宜引精兵取南京大事成矣衆不从曰尔愿赴家柰我辈何其党有自拔来归者帝厚赏之令还谕其衆复遣高煦书曰张敖失国本之贯高淮南受诛成于伍被今六师压境王即出倡谋者朕与王除过恩礼如初不然一战成擒或缚王来献朕虽欲保全不可得矣前锋至乐安高煦约诘朝出战帝闻令大军蓐食兼行驻蹕乐安城北诸将壁其四门王斌等乘城举礮大军发神机铳擊之声如雷震诸将请即攻城帝不许复再敕谕高煦又以勅矢射城中谕遂党祸福城中多欲执高煦献者高煦大惧密遣人请降愿假今夕诀妻子明日出归罪帝许之其夜高煦焚兵器及通逆文书火通夕不息昧爽帝移蹕城南高煦将出城王斌固止之曰宁一战死无为人所擒高煦给斌等复入宫潜从间道出为官军所执羣臣请正典刑帝不允以劾章示之高煦顿首言臣罪万万死惟陛下命帝令高煦为书召诸子同归京师余党悉就擒赦城中罪脇从者不问命薛禄及兵部尚书张本镇抚乐安改曰武定州遂班师】

九月帝还京师遣使谕赵王高燧

【师还次单桥陈山迎谒请乘胜袭彰德执赵王杨荣以帝意令杨士奇草勅士奇曰太宗皇帝惟三子今上惟两叔父有罪者不可赦无罪者宜厚待之疑则严防之使无虞而已何遽加兵伤皇祖在天意乎时惟杨溥与士奇合请皆入以死诤二人入阁者不纳帝召蹇义以士奇言白帝移兵事遂罢至京师高煦亦言尝遣人与赵通谋帝语士奇曰议者喋喋多言赵王事柰何士奇曰赵王与陛下?亲陛下当保全之无惑羣言帝曰吾亦思之今欲封羣臣章示王令王自处何如士奇曰得一玺书更善帝从之明年遣驸马都尉广平侯袁容等奉书及羣臣所上章至赵赵王大喜已泣曰吾生矣即上表谢且献常山中护卫及羣牧所仪卫司官校言者顿息】质实【单桥即单家桥在河间府献县南袁容寿州人尚成祖女永安公主】

废高煦为庶人

【筑室西安门内谓之逍遥城并其诸子錡之王斌朱恒等皆伏诛长史李默以尝谏免死谪口北为民天津山东诸都督指挥以预谋诛死者六百四十余人戍边者千五百余人帝亲制东征记备书其事後数年宁王权上书请赦高煦不从一日帝往视之高煦伸足勾帝仆于地帝命舁铜缸覆之缸重三百筋高煦顶负之辄动乃命积炭于其上燃之逾时火炽铜熔高煦死诸子亦死】质实【春明梦余录西安门明制皇城外门凡六曰大明门曰长安左门曰

长安右门曰东安门曰西安门曰北安门俗呼厚戟门仍元旧也天津宋金为清沧二州地元因之明永乐初置天津左右二卫为河间府地 本朝雍正三年改直隶州九年升府】

冬十月释李时勉于狱复以为翰林侍读

【初仁宗大渐谓夏原吉曰时勉廷辱我言已勃然怒原吉慰解之其夕帝崩时勉既下狱至是或言其得罪先帝状帝震怒命校尉缚以来亲鞫必杀之已又令王指挥即斩西市母入见指挥出端西旁门而前校尉已缚时勉从端东旁门入不相值帝遥见骂曰尔小臣敢触先帝疏何语趣言之时勉叩头曰臣言谅闇中不宜近妃嫔皇太子不宜远左右帝闻言色稍霁徐数至六事止帝令尽陈之对曰臣惶惧不能悉记帝意益解曰是第难言耳草安在对曰焚之矣帝乃太息称时勉忠立赦之复其官比指挥诣狱还则时勉已袭冠带立阶前矣】质实【端东西旁门荒史入端门内为六科东曰阙左门西曰阙右门按阙左右门即端东西旁门也】

大雷电雨

【是月己卯夜也】

十一月王通兵至交址遇贼于应平败绩参赞尚书陈洽死之

【先是陈智遣都指挥袁亮击黎利弟善於广威州亮遣指挥陶森钱辅等渡河中伏并死亮被执善遂分兵三道攻交州府一攻下关都督陈濬击却之攻边江小门者为李安所败善夜走参将马瑛破贼清威至石室会通兵至遂与之合进次应平之宁桥诸将言地险恶恐有伏宜且驻师觐贼通不听麾兵径渡人马行泥淖中不能成列伏四起军大溃死者二三人通中脇走尚书陈洽跃马入贼阵创甚坠马左右欲扶还洽张目叱曰吾为国大臣食禄四十年报国在今日挥刀杀贼数人自刳死黎利在清化州闻之自将精卒鼓行至清潭进围东关通本无将畧以父真死事封朝廷不知其庸劣误用之一战而败心胆皆丧陰遣人许为利乞封不奉朝命擅割清化以南地畀贼令官吏军民尽还东关檄至清化知州罗通不从与指挥打忠攬城拒守利移兵攻之不下贼万余人攻隘留关百户黄彪等遇害百户万琮登城大呼出南门擊走之明年春利犯交州通出兵擊之贼大败斩其伪官以下万余级利惶惧欲走诸将请乘胜急擊通犹豫数日贼得树栅掘濠塹四出攻掠遂分兵陷昌江城都指挥李任前後三十战力竭自刳死复攻邱温都指挥孙聚力拒之邱温去广西凭祥止二宿总兵官顾兴祖拥兵不救城遂陷指挥使徐麒千户蔡顥死之】质实【宁桥临沙河昌江城在故谅山府北凭祥宋为凭祥峒明为镇後为县今州属广西大平府罗通字学古吉水人官御史以言事出为清化州知州通许利请封檄清化以南归黎氏罗通曰非君命而欲卖城义不可连战败走之初都督蔡福守义安被围福不战率都指挥朱广薛聚于瓊指挥鲁贵千户李忠降贼至是福驰马清化城下大呼守城者宜见几全首领罗通大骂乃去李任金华永康人利以贼八万余攻昌江城任与指挥顾福等竭力拒贼皆自刳死中官冯智大哭誓不从贼与指挥刘顺谅江知府刘子辅及其一子一妾俱死城中军校及男女同死者数千人贼纵火焚烧劫掠一空子

辅庐陵人徐麒桂林中卫指挥使蔡顥南宁千户邱温被围麒顥率疲卒固守城陷皆死无一降者】

谕御史勿穷治高煦余党

【左都御史刘观等言高煦之党同谋者皆伏法其护卫军丁居他州者尚多当罪之帝曰凡先调卫及商贩在外者皆不预逆谋其释之不必穷治】质实【刘观雄县人】

十二月免六师所过秋粮

录囚

【命行在刑部都察院锦衣卫三日内悉上所鞠狱囚罪状帝亲览决真犯死罪依律连坐以下免死谪戍追赃流徒以下运甄赎罪及罚钞释免有差凡宥免三千余人】

遣安远侯柳升征黎利黔国公沐晟自云南引兵会之【帝闻王通败大骇乃命升充总兵官保定伯梁铭副之都督崔聚为右参将尚书李庆参赞军务帅师由广西赴讨又命沐晟及兴安伯徐亨新宁伯谭忠从云南进兵敕通固守以俟又以黄福仍兼交址布按二司事与升等同行】质实【梁铭汝阳人崔聚怀远人李庆字德孚顺义人徐亨兴安伯祥之孙】

【丁未】二年春正月申明屯田法

【帝命户部申明屯田之法谓侍臣曰海内无事军士量留守备余悉屯种所收足以给衣食则国家可省养兵之费然朕以为立法固善尤在任用得人其令兵部移文所司选老成军官提督屯田仍命风宪官以时巡察】

南京地震

【是年凡卜有一震】

二月以户部左侍郎陈山为尚书兼谨身殿大学士直文渊阁

【先是山与张瑛俱侍帝讲读瑛既为大学士山亦有是命】

夏四月晋王济熿有罪废为庶人

【初济熿既构陷济熺幽其父子空室中蔬食不给恭王宫中老嫗走诉成祖乃即狱中召晋府故承奉左微问之尽得济熿构济熺状立命微驰召济熺父子济熺幽已十年左微者故因济熺牵连繫狱或传微死已久及至一府大惊微入空室释济熺父子相持大恸时成祖北

征謁行在所帝见济熿病惻然封美圭平阳王使奉父居平阳界以恭王故田会帝崩济熿靳不与仁宗连以书谕卒不听又闻朝廷赐济熿王者冠服及他赀予益怨望成祖仁宗之崩不为服使寺人代临幕中广致妖巫为诅咒不辍帝即位济熿密遣人结高煦谋不轨宁化王济焕告变比擒高煦又得济熿交通书帝未之问而济熿所遣使高煦人惧罪走京师自首内使刘信等告济熿擅取屯粮欲应高煦并发宫中诅咒事济熿亦始知谪母被弑驰奏帝遣人察之皆实乃免为庶人幽之凤阳同谋官属及诸巫皆论死】质实【恭王故田在连伯滩成祖与美圭济熿久不与仁宗谕之不从美圭言连伯滩地隶平阳不隶太原仁宗遣人视滩果隶平阳又书谕济熿卒不与】

王通许黎利和介其使上表

【利围交州久通闭城不敢出利益易之致书请和上表谢罪通欲许之集衆议按察使杨时习曰奉命讨贼与之和而擅退师何以逃罪通怒厉声叱之衆莫敢言遂遣人偕利使至京进表及方物】

五月薛禄督饷开平

【命阳武侯薛禄佩镇朔大将军印充总兵官率师防护粮饷赴开平时开平备御都指挥唐铭等屡奏寇出没边境故也铭等又云孤城荒远薪刍并难猝遇寇至别无应援请添官军神铕守备下其事於英国公张辅及羣臣议皆以为添官军愈难馈给宜准阳武侯薛禄初奏於独石筑城立开平卫以开平备御官军家属移于新城且耕且守而以开平及所调他卫官军选其精壮分作二班每班一千余人更代于开平旧城备哨新城守御官军不足者暂于宣府及附近卫分酌量添拨候发罪囚充军代还仍敕薛禄于防护粮饷之余相宜区昼筑城安恤毕事而归帝命俟秋成後为之】质实【独石在赤城县东北一百里在宣化府东北三百十里其南为独石城明宣德五年自故开平城移置开平卫于此景泰三年设上北路参将本朝康熙三十二年并卫入赤城县仍设参将驻防曰独石路雍正十三年设副将十二年增设同知】

秋七月松潘番叛遣都督同知陈怀等讨之

【松潘卫当发军戍交址将士惮行千户钱宏与衆谋诡言番叛冀免调都司果罢其役而发军讨番宏潜至番寨胁以大军将致讨逼取牛马财物番本不反忽闻大军且至衆遂惊走约生番为乱杀指挥陈杰衆至五万人合攻松潘城焚上下四关及诸屯堡又围威茂疊溪诸卫所官军屡战皆败帝以怀充总兵官与指挥蒋贵合兵讨之而梟宏于松潘以徇明年正月官军连败贼复疊溪招抚诸番三十余寨松潘平命怀镇其地】质实【疊溪在松潘卫南二百三十里唐翼州宋元皆为羌据洪武时平西羌以古翼州置疊溪千户所今疊溪营属松潘镇陈怀合肥人蒋贵字大富江都人】

发明【时松潘番固未反也钱宏冀免征调乃诡言番叛且勒索激变致生番果反挠败官

军于是令陈怀等合讨而臬宏以徇宏之滋事一方诛戮固由自取而其时都司误听宏言发军致讨尤不得为无罪夫以千户狡黠自私之词为将备者果察其情伪不肯遽尔兴兵虽有宏之逼胁番衆尚不至挺而为乱然则斯役也都司实为祸阶而怀贵等竟置不问岂非漏网哉】

薛禄败敌于开平

【时鞬鞞数为边患禄至开平寇先已逼城下所得而退禄遂率精兵往袭之昼伏夜行踰三夕见敌营纵轻骑径薄之杀数十人生擒镇抚百户等十二人获其男妇六十四人马八百余匹牛羊四千余头既还衆蹙其後禄纵兵奋击又大败之遂远遁】

令官吏军民入米赎罪

【自死罪至笞四十分十等纳米百石至二石有差纳者赃罪得不死徒流以下皆复用不能纳者虽笞杖久系不释往往至死御史张纯言贫人罪轻者始免追系】质实【张纯江陵人】

命都督僉事山云镇广西

【柳庆蛮韦万黄等纠合猺獞为乱镇远侯顾兴祖以不救交址被逮公侯大臣举云廉勇有智畧命云佩征蛮将军印充总兵官率官军讨之时贼方刼掠临桂诸县聚衆保山巔山峻险挂木于藤垒石其上官军至辄断藤下木石无敢近者云夜半束火牛羊角以金鼓驱向贼贼谓官军至亟断藤比明木石且尽衆噪而登斩首万余级贼降云乃筑四城九堡传舍九十余区以镇要害初土官馈献帅率受之然卒为所持云闲府吏郑牢刚直召问曰馈可受乎牢曰洁衣被体一污不可复湔将军新洁衣也宁可污乎云曰彼且疑柰何牢曰黷货法当死将军不畏天子法乃畏土夷耶云曰善尽却之由是土官畏服调发无敢後者云所至抚善良察诬枉土人皆爱之】质实【柳庆柳州百粤地唐置柳州元路明为柳州府庆远百粤地宋置庆远府元路明为为府临桂县唐置明为桂林府治今皆因之山云徐州人郑牢帅府老吏尝逮事韩观观醉辄杀人牢辄留之醒乃以白性刚直为士大夫所重以吏终】

发明【山云镇广西凡柳浔平乐桂林宜山思恩诸蛮先後讨平猺獞屏迹其功亦卓卓矣方其议代兴祖时衆荐为廉勇有智畧则土官馈献之陋习岂有不立斥其非者乃犹待取决于府吏而始却而不受哉或当时嫉云者欲污其洁白之操故曲为传闻之说以形其所守未坚见利而心动耳乃史家转称道之其亦未之加察矣】

八月黄淮罢

【帝亲征乐安命淮居守至是以疾乞休许之赐钱万贯】

免两京山西河南州县被灾税粮

九月柳升进军倒马坡遇伏死诸军尽歿

【升奉命久俟诸军集至是始抵隘留关黎利与王通已有成言乃诡称陈氏有後率大小头目具书诣升军乞罢兵立陈氏裔升不啓封遣使奏闻趣进兵连破关隘数十直抵镇夷关升以贼屡败易之郎中史安主事陈镛恐贼示弱以诱官军亟言于李庆曰柳将军辞色皆骄骄者兵家所忌防贼设伏宜力言之时庆及梁铭皆病甚强起告升都事潘禪亦劝升持重广侦探引宁桥事为戒升不为意进薄倒马坡与百余骑先驰度桥桥遽坏後队不得进升泥淖中伏发升中鏢死从者皆歿其夕铭病卒明日庆亦卒崔聚整军至昌江遇贼殊死鬪贼驱象大至阵乱聚为贼所获诱之降不屈遂被杀官军或走或死无一人降者安镛禪及主事李宗昉皆死时黄福再抚交址比至升已败奔还至镇夷关为守者所执欲自杀守关者力阻之曰公我父母也公不归我曹岂敢至此黎利闻馈白金餽粮以负与送出境福至龙州尽以贼所遗归之官】质实【黎利等书畧曰太宗皇帝兴师吊伐诏求陈氏子孙以继陈祀是时陈族罹季犁之毒奔窜远徙无从访求今陈氏遗嗣有鬻者窜身老挝二十年本国人民不忘陈氏先王之泽已求鬻于羈次欲得鬻继宗祀倘蒙天恩循太宗皇帝继絶明诏使陈氏灭而复续实一国之人戴天恩於无穷也倒马坡在鷄陵关南镇夷关即鷄陵关史安字志静丰城人陈镛字叔振钱塘人潘禪鄞人官後军都事李宗昉里系无考】

冬十月王通弃交址与黎利盟而还

【通闻柳升败歿益惧更利和教利立陈暲为陈氏後诡言实先陈王暉三世孙今访得之交人欲奉以为後辄立坛集军民官吏与利盟誓退师因宴利遗利锦绮利以重宝赂通为驰上表即引兵还沐晟领军至水尾闻已议和遂引退贼乘之晟大败】

十一月诏赦黎利罢交址兵悉召文武吏士北还【鸿胪寺进黎利与柳升书王通使以利所奉陈暲表亦至词畧相同帝览之心知其诈然欲藉此息兵乃以表示廷臣命集议张辅曰此诈也请益发兵讨之臣期一年以擒贼蹇义夏原吉亦以为不可许而杨士奇杨荣知帝厌兵且前有欲弃交址语因力言许利便帝意遂决廷臣不敢复争于是遣礼部左侍郎李琦工部右侍郎罗汝敬等齎诏谕交址赦除其罪并谕利兴灭继絶意令具陈氏後人之实以闻勅召王通马瑛及三司卫所府州县官吏尽撤军民北还诏未至王通已由陆路还广西陈智及中官马骐山寿由水路还钦州官吏军民得还者八万六千余人爲贼所获及拘留者不可胜计】质实【利所奉陈暲表畧曰安南国先臣陈日烺三世嫡孙臣陈暲惶恐顿首上言曩被贼臣黎季犁父子篡国杀戮臣族殆尽臣暲奔窜老挝以延残息今二十年国人闻臣尚存逼臣还国欲臣陈情请命臣仰恃天地生成大恩谨奉表上请钦州隋置明初为钦州府後改州属廉州府今因之李琦元氏人】

皇子生赦

【帝年三十胡皇后未有子又善病而孙贵妃有宠乃陰取宫人子为已子帝以长子生大喜宠贵妃有加诏大赦天下免明年税粮三分之一】质实【孙贵妃邹平人幼育宫中有美色永城县主簿孙忠之女帝即位立为贵妃故事皇后金宝金册贵妃以下有册无宝宣德元年五月帝请于太后制金宝赐焉贵妃有宝自此始】

十二月振陕西饥

【帝语户部尚书夏原吉曰非闻关中旱饥已命有司发廩又命卿出京库布帛往振之此皆朝政阙失所致因作诗志愧卿亦当与朕同忧也】

【戊申】三年春二月立子祁镇为皇太子

【皇子生八日羣臣即上表请立为太子皇后亦屡表请早定国本贵妃佯惊曰后病瘥自有子吾子敢先后子耶帝不允贵妃子遂立】

作帝训成

【御制帝训凡二十五篇曰君德奉天法祖正宗睦亲仁民经国勤政恭俭微戒用贤知人去邪防微求言祭祀重农兴学赏罚黜陟恤刑文治武备驭夷药餌以教子孙修身齐家治国平天下之道大要备具帝自为之序复题其後以致意焉】

三月废皇后胡氏立贵妃孙氏为皇后

【太子既立帝以春秋母以子贵将废后而立贵妃召诸大臣言之杨士奇以为不可帝乃独召士奇至武英殿密谕之士奇曰皇后今有疾惟以疾辞位逊居别宫则进退有礼帝谕之乃令后上表辞位退居长安宫赐号静慈仙师而册贵妃为皇后胡后既废张太后常召居清寧宫内廷朝宴命居孙后上孙后常快快至正七年十月太后崩后痛哭不已踰年亦崩用嫔御礼葬金山天顺七年七月追谥恭让皇后修陵寝不祔庙】质实【金山在顺天府宛平县西北二十里其南曰瓮山】

阿噜台入贡

【遣使臣四百六十人来朝贡马及方物】

宴大臣于西苑

【帝命蹇义夏原吉杨士奇杨荣等十有八人从游万岁山复赐登御舟泛太液池帝指御舟曰治天下犹此舟矣利涉大川卿等之力也是时帝方励精求治诸大臣亦同心辅政海内渐臻治平帝乃仿古君臣豫游事每岁首百官旬休选胜宴乐帝亦时游西苑诸学士皆从问

民间疾苦赋诗赓唱朝野称盛事云云】质实【明彭时赐游西苑记西苑在宫垣西中有太液池周十余里池中驾虹梁以通往来桥东为圆台台上为圆殿殿前有古松其北即万岁山上有殿亭六七所最高处广寒殿也池西南又有一山最高处为镜殿乃金元时所作其西南曰南台则宣帝常幸处也按西苑在今西华门之西入苑门即太液池南北亘四里东西二百余步其上源自玉泉山合西北诸水至北安门水门流入滙为太池元时亦名西华潭夹岸多槐柳池中蒲藻纷敷禽鱼翔泳望如仙洲胜境池上跨长桥坊楔对峙东玉螭西金鳌桥北称北海桥南称中海瀛台以南称南海其中海之东岸有蕉园旧址稍南为万善殿殿西有亭为太液秋风即燕京八景之一又按万岁山金名琼华岛元中统三年修之至元八年名万岁山其山皆叠玲珑石为之明宣宗广寒殿记万岁山石即宋之艮岳也金徙于此今为白塔山又按明广寒殿镜殿今皆无其南台即今瀛台旧一名趵台在太液池中由西苑门入度板桥有门曰德昌中建殿五楹殿之南石堤数十步过堤历级而登为翔鸾阁涵元殿香辰殿迎薰亭而统名之曰瀛台台二面临水奇石森列花树芬鬱天然林壑之致】

夏四月诏自今官民建言尚书都御史给事中会议以闻

【帝曰致治之道莫先于广言路天下之大吏治得失民生休戚人不言朝廷何由悉知古人谓明主视天下犹一堂满堂饮酒一人对隅而泣则一座不乐若令天下有匹夫匹妇不得其所实为君德之累凡有建言民瘼者卿等勿讳】

闰月免山西旱灾租遣使抚辑流民

【山西布政司言平阳府属八州三十三县旱诏免其租仍振恤之工部郎中李新自河南还言山西饥民流徙南阳诸郡不下十余万官司遣人捕逐民愈穷困死亡日多帝即命遣官抚辑发廩振之】

王通陈智等及布政使弋谦内官马骐山寿俱以弃交址罪下狱论死

【通等至京文武诸臣廷鞫俱论死下狱籍其家时议以通弃地擅和骐恣虐激变罪尤重然帝皆不诛长系待决而已顾兴祖先被逮亦下狱廷臣劾沐晟徐亨谭忠等逗留不进违命丧师罪帝不问初交址右布政戚继以贪淫黜命谦往代通弃交址谦非其罪亦论死】

发明【王通等与贼议和擅弃交址山寿庇护叛寇马骐激变一方皆罪之尤者当时惟长系不诛沐晟及徐亨谭志等总兵助剿其始不救柳升?又不进援引兵退回致贼势猖獗亦复置之不问盖宣宗早定弃珠崖之见故遂不行子玉之诛耳而史独谓弋谦论死非罪谦官布政守土是其专责乃竟听其议和弃地无一言救正视彼通智骐寿辈或可量从末减然又乌得云无罪哉】

五月复遣罗汝敬等谕黎利立陈氏後

【李琦还自交址利遣使奉表谢恩谎言鬻于正月物故陈氏子孙絶国人推利守其国谨俟朝命帝亦知其诈不欲遽封复遣汝敬等谕利及其下令访陈氏後并尽还官吏人民及其眷属】

赠恤交址死事诸臣

【先是交址布政使弋谦以都指挥同知李任等死节事闻帝恻然曰大丈夫为国固当杀身成仁舍生取义任等可谓无愧矣至是赠李任为都督同知燕山前卫指挥使顾福昌江卫指挥使刘顺广西桂林中卫指挥使徐骐俱为都指挥同知交址前卫指挥僉事周安为指挥同知南宁卫正千户蔡顥为指挥僉事燕山左卫副千户桂胜为正千户谅江府知府刘子辅谅山府知府易先俱为左布政司参政政平州知州何忠为府同知内官冯智为内官监太监召任等子孙承袭惟指挥陈麟尝与朱广开门纳贼死不掩过思不及】质实【何忠字廷臣江陵人与桂胜俱被拘骂不屈并忠子皆受害易先湘陰人自缢死周安守又安陷贼与陈麟夺贼刀杀数人皆自刎死所部九千余人悉被杀】

免北京被灾夏税

【真定顺德广平所属州县奏自去年十月至今年夏不雨麦无收帝命免徵夏税】

免汝南王有?新安王有熺为庶人

【初汝南王有?新安王有熺祥符王有燭皆周王有炖弟有?数许有炖帝既书谕之有?又与有熺诈为有燭与赵王高燧书内外皆有祥符王印识系箭上置彰德城外词甚悖都指挥王友得书以闻帝逮友讯无迹召有燭至曰必有?所为讯之具服有?少与高煦善建文中尝诬定王反成祖即位後定王请诛之成祖不忍徙之大理定王老始归有熺喜食人肝脑薄暮伺人于门掠而杀之其邸前日未晡行迹为断至是并免为庶人】质实【有炖有?有熺有燭皆周定王橚子】

蔡福等六人伏诛

【福为都督与都指挥朱广薛聚于瓚指挥鲁贵千户李忠守义安为贼所围福不与战而率广等降贼且教贼造攻具以攻东关时有官军九千余人欲焚贼营福告贼贼尽杀九千余人遂攻昌江等城福历说各城人出降至昌江清化为李任罗通骂而去黎利送福等归京师鞫之伏罪命皆弃市籍其家】

六月免陕西被灾夏税

【自正月至五月不雨命勘实除税是月又振山西饥】

秋七月以顾佐为右都御史

【帝召杨士奇杨荣谕曰祖宗时朝臣谨飭年来贪浊成风何也士奇曰永乐末已有之今为甚耳荣曰永乐末无踰方宾帝问今日谁最甚者荣对曰刘观问谁可代者士奇荣荐通政使顾佐右都御史为京尹政清弊革帝乃出观巡视河道擢佐右都御史赐敕奨勉命察诸御史不称职者黜之佐视事即奏御史不法及老疾者三十二人朝纲肃然于是御史交章劾观并其子辐诸赃污不法事遂逮观父子下狱将置重典特贷其死乃谪辐戍辽东而命观偕往佐性严毅每旦趋朝小憩外庐立双藤户侧百僚过者皆旋折避之入内直庐独处小夹室非议政不与诸司羣坐人称为顾独坐云都察院吏诤佐受隶金私遣隶归帝密示士奇曰尔不尝举佐廉乎对曰有之朝官俸薄仆马薪刍资之隶不得不遣半归使出资免役官得资费隶得归耕永乐以来朝臣皆然即臣亦然帝叹曰朝臣贪乃如此因怒诉者曰朕方用佐小人辄敢诬之必下法司治士奇对曰细事不足干上怒帝乃以吏状付佐曰汝自治之佐召吏吏恐甚佐曰上命我治汝汝改行吾当贷汝帝闻谓佐得大体益喜】质实【顾佐字礼卿太康人】

八月皇子祁钰生

【宣宗次子贤妃吴氏生】

罢北京行後军都督府及行部

【初仁宗将还都南京设行後军都督府及行部凡五府六部文移申达必经行府行部多重稽误至是帝命公侯伯尚书都御史翰林学士议于是张辅蹇义等言北京既有府部行府行部宜罢从之其诸司行在字至正统六年始去】

帝自将巡边败乌梁海济勒默特之衆于寛河

【帝次石门驿闻乌梁海济勒默特万余人已入塞乃留大军於遵化而自率精骑三千人人二骑持十日粮出喜峰口遇敌於寛河帝亲射其前峰殪三人分铁骑为两翼夹击之飞矢如雨神机礮并发乌梁海人马死者过半帝亲率百余骑追奔其衆望见黄龙旗悉下马罗拜请降遂生缚之斩其骁渠命诸将搜山谷获军器马驼不可胜计】质实【寛河在今喀尔沁左翼南源出寛山东流会额类河入 盛京宁远州东石门驿在遵化州西有镇】

九月帝还京师

【帝亲制诗歌劳将士至京师谒告於庙】

冬十月命中官郭敬镇守大同

【武安侯郑亨久镇大同治军严肃抚士卒有恩常云大同我国家後门我死後来者何人幸勿坏我家事也当时凡中官镇边者总兵官往往畏之敬至大同亨与议事无所挠亨卒敬始纵恣】

发明【明代以宦官监军分镇实自永乐始王安洩谭青营马靖镇什肃马骐镇交址至则擅用威福生事激变有滥觞之势矣宣宗於阉竖尤加亲信巡边之使四出边将皆为所胁制郑亨镇大同最久治军严肃即敬至亦无所挠然则中官之滋扰边庭者固由朝廷之偏任奸璫之弄权亦由为将者不能秉正持公整军飭武致若辈无所忌憚得乘间而挠败之此监军诚为弊政而总兵又何可无畧哉】

十一月锦衣指挥鍾法保请采珠广东下狱

【帝曰此小人欲生事扰民以图已利也即收系於狱】质实【按明实录锦衣指挥鍾法保言广州有珠池产大珠请同内官往采时宣宗斥之下狱以其请采珠恐扰民也大政记作采朱砂误今以明实录为正鍾法保广州东莞县人】

十二月广西总兵官山云讨擒忻城蛮

【忻城蛮谭团作乱云讨擒之斩首千五百余级归所掠军民三百八十五人】质实【忻城县唐置明属庆远府今因之】

【己酉】四年春正月两京地震

【北京是年震者三南京震者七】

夏四月山云讨平柳浔蛮

【云讨平柳浔诸蛮冬雒容蛮出掠遣指挥王纶破之】质实【雒容县唐置属柳州明属柳州府今因之】

命工部尚书黄福平江伯陈瑄经畧漕运

【帝即位後命瑄守淮安督漕运至是瑄言济宁以北水道淤塞计用十二万人疏濬半月可成帝念瑄久劳命尚书黄福同经理大臣督漕自此始】

五月勅授交址人不从贼者职

【工部右侍郎罗汝敬奏交址广源州人闵顔岑斗烈谭忠谨初以龙州地归附授顔本贯知州斗烈判官忠谨吏目黎利叛三人义不从利咸归龙州烈临终属其子元成曰受天朝官

不可貳心从贼今顔已死乞悯其忠量与元成等职事而处之善地帝命元成仍为知州判官吏目职如旧俱於广西布政司支俸有司常加抚恤】

六月诏赃吏不得赎罪

【御史王翱言官吏害民蠹政赃犯为甚今官吏罪无轻重运转复职是贪黷者幸免廉洁者鲜劝非为治之道也请自今赃吏坐死但许赎罪不许复官从之未几文职有赃罪纳米者吏部请降一级用帝曰纳米乃一时之权宜惩贪为立国之大法自今文吏官吏犯赃者悉依律治】质实【王翱字九皋盐山人】

初设钞关

【洪武定制有商税而无船税至是户部尚书郭资言钞法不行由商居货不税请行纳钞例御史罗亨信李奇耿定相继言之乃沿两京水道设关收钞於是置灤县济宁徐州淮安杨州上新河浒墅九江金沙洲临清北新诸钞关量舟大小修广而差其额谓之船料不税其货惟临清北新则兼收货税各差御史及户部主事监收钞关之设自此始】质实【灤县在通州南四十五里辽灤陰县元灤州明灤县属通州今并入通州上新河在今江宁县江东门外稍南五里浒墅在长洲县西北本名虎踞唐讳虎钱氏讳嚬改为浒墅金沙洲在江夏县西南大江中北新在仁和县北武林门外十里罗亨信字用实东莞人】

秋七月幸文渊阁

【驾幸文渊阁与少傅杨士奇太子少傅杨荣论经史咨政务悉召诸学士及史官谕之曰国史贵详实卿等宜尽心赐钞有差以後数临幸置庖设饌并制诗赐士奇等】质实【帝制诗在是年十月再幸同侍者士奇荣外有金幼孜杨溥曾棨王直王英李时勉钱习礼陈循等】

九月放免南北监生

【南北京国子监生年五十以上学无成效及老疾者二百五十三人令还乡为民】

令天下学校生员兼习书算

【北京国子监助教王仙言学校教养人材固当讲习经史至於书数之学亦当用心近年生员止记诵文字以备科贡其於字学算法畧不晓习乞令天下学校生员兼习书算从提调正官按察司巡按御史考试庶几生徒才可致用从之】

发明【明太祖洪武三年京师及行省开乡试三場中式後书算曾与骑射律并试然亦祇場後及之非取士之正则也二十五年又曾令儒学生员兼习书算然不久即罢良以通经致

用为重习书习算祇为游艺小道耳宣宗听王仙言令天下下生员兼习书算而又重以考校令之所在趋如流水德成艺成渐致无分本末岂造就人才之良法哉】

冬十月帝制猗兰操赐大臣

【帝作猗兰操示大臣曰孔子自卫反鲁而操猗兰伤不遇也朕虑谷中之贤有不仕者辄拟斯篇夫以人事君大臣之道也卿等宜勉副朕怀】质实【猗兰操词兰生幽谷兮??其芳贤人在野兮其道则光嗟兰之茂兮与衆草为伍於乎贤人兮汝其予辅】

张瑛陈山罢

【瑛与山先後俱为大学士直文渊阁帝以旧恩除之而瑛与山虽参机务无所建白帝浸厌薄之是月朔帝御门遥见山趋朝问杨士奇曰陈山何如人对曰山寡学昧大体帝曰然往者赵王事几为误遂命山辍机务专授小内使书瑛亦出为南京礼部尚书】

阅武近郊

【召丰城侯李贤等命之曰朕以农务既毕阅武近郊命卿等居守遇机密重务计议即行仍驰奏】质实【李贤丰城侯彬之子彬卒嗣侯】

十一月阳武侯薛禄帅师巡边

【禄充总兵官?顺侯吴克忠副之都督谭广武安侯郑亨各选士马听调】质实【吴克忠蒙古人恭顺伯允诚之子允诚旧名巴图特穆尔永乐三年来归因赐姓名克忠初名达兰允诚卒成祖更其名曰克忠世袭父爵洪熙元年进侯谭广字仲宏丹徒人巴图特穆尔旧作把都帖木儿达兰旧作答兰今俱改】

【庚戌】五年春正月少保兼太子少傅户部尚书夏原吉卒【原吉与蹇义皆起家太祖时义秉铨政原吉筦度支皆二十七年时称蹇夏名位先於三杨仁宣之世外兼台省内参馆阁与三杨同心辅政义善谋荣善断而原吉与士奇尤持大体有古大臣风烈及是原吉卒赠太师谥忠靖原吉有雅量尝言处有事当如无事处大事当如小事若先自张皇则此中无主何能应事同列有善即采纳之有小过必掩覆之吕震尝倾原吉震为子乞官原吉以震有守城功为之请陈瑄初亦恶原吉顾时时称瑄才或问原吉量可学乎曰吾幼时有犯未尝不怒始忍於色中忍于心久则无可忍矣尝与同列饮他所夜归值尝过禁门有欲不下者原吉曰君子不以冥冥墮行其敬慎如此】

二月罢工部采木

【帝谕侍臣曰为国之道农事最急今国家无大营缮当东作时而工部采运木植未已岂

不妨农事凡已采之木随处堆积军夫悉罢遣归农】

下诏宽恤

【帝以春和将下诏宽恤先谕杨士奇欲蠲免灾粮宽民间追偿畜马士奇对曰圣念及此真民生之幸但今当宽恤者尚不止此因请免积欠薪刍量减官田租额部符采买当按土宜法司理刑务敦平恕工匠在京者宜分户丁之半还家帝悉嘉纳命士奇即草敕行之】

帝奉皇太后谒长陵献陵

【帝亲囊鞬骑导太后辇至清河桥下马扶辇畿民夹道拜观陵旁老穉皆山呼迎拜太后顾曰百姓戴君以能安之耳皇帝宜重念帝奉太后过农家召老妇问所业赐钞币有进蔬食酒浆者太后取尝之以与帝曰此田家味也皇帝宜知之扈从臣张辅蹇义杨士奇杨荣金幼孜杨溥见太后于行殿太后慰劳之帝还见道中耕者取其耒三推顾侍臣曰朕三推已不胜劳况常事此乎赐之钞凡所过农家皆赐之】质实【清河在宛平县西北二十里上有广济桥永乐中建】

夏四月薛禄帅师筑赤城等处城堡

【命禄帅师筑赤城鵬鹗云州独石团山城堡敕大同宣府总兵官及府州各发兵夫赴役仍令以精骑防护皆听禄节制并赐之诗有出车命南仲城齐维山甫句禄稽首受赐退问杨士奇南仲山甫何如士奇具以告曰上以古贤人待尔也禄拊心曰禄武夫敢望前贤然上所命不敢不勉】质实【赤城堡以元赤城站置水经注沽水迳赤城东即此本朝康熙三十二年改置赤城县属宣化府团山堡在明故永宁县西北十五里今延庆州东】

五月以郎中况鍾等九人为知府赐勅遣之

【帝以知府多循资格不称职会雄剧地九郡缺守命大臣举京官廉能者用之乃擢鍾及郎中赵豫莫愚罗以礼员外郎陈本深邵旻马仪御史何文渊陈鼎等皆赐勅俾驰骑之任其冬复用薛广等二十九人亦如之诸人俱有治绩有居官至一二十年者吏称其职民安其业一时蒸蒸称盛而其间尤着声者况鍾赵豫鍾在苏州务锄豪强植良弱兴利除害不遗余力奏免重赋七十余万石民有况太守民父母之歌豫在松江一意拊循与民休息在职十五年尤以恺悌称及去老穉攀辕留一履以志遗爱时论谓鍾为能吏而豫为循吏云】质实【况鍾字伯律靖安人初以吏而尚书吕震奇其才荐授仪制司主事迁郎中赵豫字定素安肃人以兵部郎中知松江莫愚临桂人知常州请减宜兴进茶数禁公差官凌虐有司严核上官荐劾之实罗以礼桂阳人初知西安寻移绍兴建昌所至多惠爱凡二十七年乃致仕陈本深字有源豐人知吉安除豪强破贼盗为政举大纲不苛细邵旻知武昌性忠直为政公平治三载事举弊除马仪知杭州有惠政民戴之邵旻马仪史失传里系何文渊字巨川江西广昌人知温州减陆田税革军仓弊利兴害絕政声大振陈鼎新兴人知建昌惩桀骜民畏法更布教条

施德意一时官校歛衽四境晏然】

六月迁开平卫于独石

【洪武初李文忠克元上都设关平卫守之置八驿东接大寧古北口西接独石永乐间大寧既弃开平势孤至是遂徙开平卫于独石弃地三百里尽失龙冈滦河之险边备益虚】质实【八驿东曰凉亭泥河赛峰黄崖四驿接大寧古北口西曰桓州盛卤明安隰宁四驿接独石龙冈在故开平卫北一名卧龙山形势雄险元上都北枕龙冈即此山也滦河源自口北开平东南流经迁安县界至卢龙县合滦河又南至乐亭县入于海】

发明【明初设卫开平与大宁古北口独石相接为北边之要镇成祖初藉三卫以胁宁王迨事成即以大宁地全畀三卫以偿前劳不思大寧既弃开平之势遂孤宣宗君臣又无深谋远虑无端移镇独石以为聊固吾围竟至蹙国三百余里夫祖宗之成业纵不能使辟地有加而式廓之版图忽然而自我侵削继序其皇之谓何宣宗犹为明代令辟何计不及此而为此弗克负荷之举耶】

遣使捕畿内蝗

【永平河间蝗谕户部曰往年捕蝗之使害民不减于蝗宜知此弊因作捕蝗诗示之】

秋八月己巳朔日有食之

【陰雨不见礼部请表贺不许】

命工部尚书黄福总理畿南山东河南淮北屯田寻罢【福上言永乐间虽营建北京南讨交趾北征沙漠资用未尝乏比国无大费而岁用仅给即不幸有水旱征调将何以济请役操备营缮军士十万人於济宁以北卫辉真定以东缘河屯种初年自食次年人收五石三年收倍之既省京食口粮六十万石又省本卫月粮百二十万石岁可得二百八十万石帝善之下行在户兵二部议郭资张本言缘河屯田实便请先以五万顷为率发附近居民五万人垦之但山东近年旱饥流徙初复卫率多力役宜先遣官行视田以俟开垦帝从之命吏部郎中赵新等经理屯田福总其事既而有言军民各有常业若复分营田役益劳扰本等以闻事遂不行】

九月更定在外罪囚赎罪例

【除真犯外文职官吏犯赃者送京师如律处治军职犯死罪者令纳米赎罪毕日送京师调卫非赃罪则不分轻重俱令纳米毕日送职役】

以周忱为工部侍郎巡抚南畿

【帝以天下财赋多不理而江南为甚思得才力重臣往厘之乃用大学士杨荣荐擢忱工部右侍郎巡抚江南诸府兼督税粮许便宜行事忱至召父老问逋税故皆言豪户不肯加耗并徵之细民民贫逃亡而税额益缺忱乃创为平米法令出耗必均又请敕工部颁铁斛下诸县準式革粮长之大入小出者旧例粮长正副三人皆科歛充之忱止设正副各一人民大便又於收粮设辖收总收法於运粮设拨运法运法以次就理时苏州逋赋最多一郡积至八百万石而赋额亦较他府独重官民田租共二百七十七万石而官田之租乃至二百六十二万石民不能堪帝屡诏减之忱乃与知府况鍾曲算累月减至七十二万余石他府以次减民因获苏先是大理卿胡概为巡抚用法严忱一切治以简易凡告讦者辄不省或面讦忱公不及胡公忱笑曰胡卿勅旨在祛除民害朝廷命我但云安抚军民委寄正不同耳忱与吏民相习若家人父子每行村落屏去驺从从农夫饷妇相对从容问疾苦为之商畧处置其馭下虽卑官冗吏悉开心访纳遇长吏有能者则推诚咨画务尽其长故事无不举尝相视水利督濬崑山嘉定诸浦时以匹马往来江上见者不知为巡抚也是时与忱同命者北畿山东曹宏湖广吴政由员外郎江西赵新浙江赵伦由郎中河南山西于谦由御史皆擢陞侍郎为巡抚而忱与谦任最久政绩亦最着】质实【辖收总收忱本传忱见诸县收粮无团局粮长即家贮之曰此致逋之由也遂令诸县於水次置囤囤设粮头囤户各一人名辖收至六七万石以上始立粮长一人总之名总收民持帖赴囤官为监纳粮长但奉期会而已拨运纲运忱置二簿拨运记支拨起运之数预计所运京师通州诸仓耗以次定支纲运听其填注剥浅诸费归以偿之又支拨义余存贮在仓曰余米次年余多则加六徵又次年加五徵曲算漠徐岳算术记遗了筭之法一位为一了字其了有三曲其下股之末内主一外主九下次第一曲内主二外主八当第二曲内主三外主七其第三曲内主四外主六当了字之首则主五故首惟秉五腹背两兼濬嘉定崑山诸浦忱诣松江相视水利见嘉定上海间沿江生茂草多淤塞乃濬其上流使崑山顾浦诸积水迅流驶下壅遂尽涤崑山县梁置元升州明洪武二年降县属苏州府今因之曹宏益阳人吴政丽水人赵新字日新富阳人赵伦邠州人于谦字廷益钱塘人宣德初授御史继超迁兵部右侍郎巡抚河南山西】

帝巡近郊

【乙卯巡近郊命李贤张本顾佐等居守己未驾还京师】

帝巡边至洗马林阅武而还

【丙子帝发京师丙戌至洗马林遍阅城堡兵备召见诸将咸加赐劳乃还】

十二月两京地震

【北京震者一南京震者四】

【辛亥】六年春正月罢湖广采木

【先是工部奏往湖广采办材木并发民运旧所采木赴南京至是帝闻湖广旱灾军民艰苦遂罢其役】

大雨雷电

【是月十有五日庚辰也】

二月工部侍郎罗汝敬督陕西屯田

【宁夏甘肃膏腴地时为镇守官及各卫豪横官旗所占俱不报官输租其卑下瘠地则分与屯军致屯粮亏欠兵士饥困陕西参政陈琰言乞遣官行视帝命汝敬往同三司经理】

三月命考察外官自布政按察二司始

【时巡抚江西侍郎赵新奏今方面官虽出身不同皆由资格陞擢有临政畧无施設者有贪虐为非者名与实异行与言违近吏部勘合令其考察郡县官吏已不能正焉能正人是以好恶不公去取多谬乞令吏部先察布政司按察司贤否贤者留否者黜然後可以责令考察帝是其言命自今考察外官必自二司始】

夏四月兵部侍郎柴车经理山西屯田

【巡按御史张勗言大同地虽寒平原曠野种粟麦有收其地多为军官占据民无地可种日以贫困请遣官往视占多者分与军民便帝命车往视之】质实【柴车字叔舆钱塘人】

六月命黎利权署安南国事

【四年春罗汝敬等还利复言陈氏无遗种请别命因贡方物及代身金人又言臣九岁女遭乱离散後知马骥攜归充宫婢臣不胜儿女私冒昧以请帝心知陈氏即有後利必不言然以封利无名复命李琦汝敬齎勅諭再访且以利女病死告之五年春琦等还利遣使贡金银器方物复饰词具奏并具头目耆老奏请令利摄国政帝复以访陈氏裔还中国遗民二事諭之词不甚坚至是利遣使谢罪以二事饰辞对复进头目耆老奏仍为利乞封帝乃许之命礼部侍郎章敞右通政徐琦齎勅印命利权署安南国事利虽受敕命居国僭称帝纪元顺天建东西二都东都在交州府西都在清华府分十三道曰山南京北山西海阳安拜凉山太原明光谅化清华义安顺化广南各设承政司宪察司总兵使司置百官设学校以经义诗赋二科取士其制度多拟中国云】质实【徐琦字良玉钱塘人宁夏卫籍】

秋七月朵顏三卫市易

【遣锦衣卫指挥齎勅諭三卫听其来朝及往来市易但严饬部属恪遵法度毋辄侵犯边

境】

帝微行

【漏下十二刻帝从四骑幸杨士奇宅士奇仓皇出迎顿首曰陛下奈何以宗庙社稷之身自轻帝曰朕思卿一言故来耳越数日帝遣内官问士奇微行有何不可对曰陛下尊居九重幽隐岂能遍洽万一冤夫怨卒窥间窃发诚不可不虑後旬余获二盗如士奇言帝语士奇曰今而後知卿之爱朕也】质实【获二盗盗尝杀人官捕之急遂私结约候车驾之玉泉山挟弓矢伏道旁林莽中作乱时有捕盗校尉亦变服如盗入盗羣中真盗不疑以其谋告之遂为所获】

冬十一月令官军兑运民粮

【北京初建水陆转漕惟海运用官军其余皆用民运自开会通河後平江伯陈瑄改用官军支运造浅船三千余艘时淮徐临清德州各有仓江西湖广浙江民运至淮安仓分遣官军就近挽运自淮安至徐以浙直军自徐至德以京卫军自德至通以山东河南军以次递运岁凡四次可三百万余石名曰支运既而官军多所调遣仍用民运道远 愆期宣德四年瑄及尚书黄福董理漕事建议复支运法乃令江西湖广浙江民运百五十万石於淮安仓苏松宁池庐安广德民运二百七十四万石於徐州仓应天常镇淮杨凤太滁和徐民运二百二十万石於临清仓令官车接运至京至是瑄上言民运粮诸仓往返经年失悞农业若令民兑与附近卫所官车运载至路给与路费耗米则军民两便是为兑运帝命羣臣会议吏部蹇义等上言官军兑运民粮加耗则例以地远近为差每石湖广八斗江西浙江七斗江以南六斗江以北五斗民有运至淮安兑与军运者止以四斗如有兑运不尽仍令民自运赴仓其不愿兑者听其自便兑运与支运参行军既加耗又给轻齎银为洪闸盘拨之费且得附载他物皆乐从而民亦多以远运为艰由是兑运者多而支运者少矣】质实【洪闸谓徐吕二洪及会通河诸闸】

十二月中官袁琦有罪伏诛

【琦自幼侍帝恃恩纵肆擅遣内官内侍假采办名虐取官民财物事觉下锦衣卫狱籍其家金宝千万计服用僭侈非法遂磔琦并戮其党十余人仍命都察院榜琦罪示天下】质实【按明实录六年十一月内官袁琦事觉下狱上以其所遣在外者尚多於是遣太监刘宁御史张骏李灝等往籍其赃及执其从人宁骏灝往直隸苏松诸郡御史蒋彦广往福建胡智往湖广施信往江西高超往广东刘祜往广西胡敬往河南于奎往南京郭原往河间唐慎往直沽梁軫往四川云南内裴可烈在苏松诸郡贪暴尤甚特命械系至京时内使马俊公差还京至良乡闻袁琦事自经有司以闻上曰此正与袁琦同恶害民者命戮其屍梟首于市又中官唐受以公差南京纵恣贪酷事闻捕至具服械赴南京磔梟于市十二月命磔琦而斩阮巨阮诰武葬武路阮可陈友赵维王贵杨四保陈海等十人裴可烈亦下锦衣卫狱死】发明【袁琦一使令之宦者耳恃恩欺妄遂假采办为名内官内使纷然四出虐取金银动累万计天

下含冤无愬怨及朝廷其时风宪之官受其胁制无可如何流毒几遍天下至是宣宗觉之遣御史分捕伏罪然官吏军民受害已非一日诛之晚矣始不慎其几而後复不絕其本宦?之祸遂与明代相终始其为厉阶者岂一朝夕之故哉】

太子少保武英殿大学士金幼孜卒

【幼孜简易静默寬裕有容眷遇虽隆而自处益谦疾革家人属请身後恩幼孜曰此君子所耻也及卒贈少保諡忠靖】

御定资治通监纲目三编卷八

卷九

钦定四库全书

御定资治通监纲目三编卷九

【起壬子明宣宗宣德七年尽癸亥明英宗正统八年】凡十二年

【壬子】七年春正月辛酉朔日有食之

【勅羣臣谨天戒免朝贺】

赐中官金英范洪免死诏

【赐英及洪免死诏辞极褒美】

三月复下诏宽恤

【帝召杨士奇谕曰恤民诏下已久今更有可恤者乎士奇固请抚流民减税课察贪吏荐贤能京官三品以上及布按二司各举所知备方面郡守选军民中有文学勇略者羣臣察举以闻极刑家子孙皆得化进帝从之谢部臣曰朕以官田赋重十减其三乃开异时蠲租诏下户部皆不行甚者约有司不得已诏书为辞是废格诏令使泽不下究也自今令在必行毋有所过乃出减租诗示之】

夏四月免山西逋赋

【山西旱免逋赋二百四十万石有奇】

六月修天下府州县仓

【巡抚湖广御史朱监言洪武年间府州县四乡皆置仓指谷多者万余石少者四五千石仓设老人监之富民守之遇水旱以贷贫民今皆废毁宜遵旧制俾旱潦有资从之】质实【朱监字用明青江人】

作官箴戒百官

【帝谕曰朕抚兆民实赖中外文武羣臣同心同力兴起治功远臣既不得数见而人谕之近臣虽朝夕相接亦不得数以言谕因取古人箴儆之义凡中外诸司各着一篇使揭诸厅事朝夕览观庶几有儆然古之君臣有交儆之道凡在位君子有以嘉谏告朕者尤朕所乐闻也】

箴凡三十五篇】质实【官箴三十五篇都督府史部户部礼部兵部刑部工部都察院太常寺大理寺通政司詹事府翰林院左右春坊司经局六科光禄寺鸿臚寺太仆寺国子监钦天监京府行人司锦衣卫中都留守司各都指挥司内外诸卫布政司按察司各府各州各县王府盐运司各儒学】

秋七月揭豳风图于殿壁

【帝閱内库书画得元赵孟頫所绘豳风图赋诗一章命侍臣书于图右而揭诸便殿之壁尝夏日午朝退咏聂夷中锄禾日当午句谓侍 曰吾每诵此未尝不念农人帝又尝以所赋织妇词示侍臣以见蚕事之劳苦】

八月宥诽谤者罪

【有男子大呼西华门外语涉讪诽守门者执至帝前呼仍不已羣臣请下法司帝曰圣人之世设诽谤木以未谏者此人宁可罪耶其释之】

谕京官三品以上举贤才吏部都察院黜方面有司不职者

【帝曰近惟少傅士奇荐举交趾南灵州知州黎恬等诸臣旷旬积月无一人焉岩薮窟穴岂皆产哉吏部即会三品以上官推择才行文学之士方面有司昏懦贪暴者共与都察院奏黜之】质实【黎恬清江人以进士擢御史与同列上章力诋大臣因荐知南灵州黎利反恬北归至是以荐入翰林官至右春坊右谕德正统初卒士奇尝称恬在内为良御史在外为良郡守云】

置苏州府济农仓

【故时公侯禄未军官月俸皆支于南户部苏松民转输南京者石加费六斗周忱奏请就给苏松止与船偿米一斗所余五斗通计米四十万石有奇并官钞平糴米共得七十五万石有奇置仓贮之又每岁民粮起运羨余存贮在仓者曰余米皆书诸册而官掌之贫民借贷及纲运风漂盗夺者皆资给焉秋成抵数还官其修圩筑岸间河清湘所支口粮不责偿耕者借贷必验中下事力及田多寡给之秋与粮并赋凶岁再振其奸顽不偿者後不复给忱与况鍾定为条约以闻帝悉允行名其仓为济农久之岁有余羨贫民不能偿者多不追取忱在任二十年百姓不知凶荒两税未尝逋负後之巡抚江西者莫及焉】质实【官钞平糴宣德七年江南大稔诏今诸府县以官钞平糴备振贷】

免两畿及嘉兴湖州水灾税粮

【癸丑】八年春二月録囚

【帝亲閱三法司所上系囚罪状命从寬典宥免五千余人】

三月赐进士宴于礼部

【宁晋曹鼐初由卿举授训导愿就别职改太和县典史七年督工匠至京师疏乞入试复中顺天乡试及是举进士一甲第一赐宴礼部进士宴礼部自鼐始】质实【曹鼐字万钟寧晋人】

论内外官优恤军士

【违者风宪官察奏罪之】

两京河南山东山西旱遣使振恤

【各守臣皆奏民因灾伤缺食乞发官仓粮振济从之】

夏四月下诏寬恤

【以旱灾诏蠲京省被灾逋租杂课免今年夏税赐复一年军民乏食者所在官司验口给粮如无官粮劝有粮大户借贷待丰熟时抵十偿之勅直隶巡抚御史在外按察使理冤狱减殊死以下赦军匠在逃者罪有司各举贤良方正一人巡按御史按察使纠贪酷史及使臣生事者】

五月总兵官萧授讨平贵州乌罗蛮

【永乐中授以右军都督僉事充总兵官镇贵州至是乌罗蛮吴不尔等叛讨平之械送贼首等至京师命系锦衣卫狱授在镇二十余年威信大行诸蛮懾服】质实【乌罗在铜仁府西二百里元置乌罗等处长官司永乐十一年改置乌罗府後废府仍置长官司属铜仁今因之萧授华容人】

山云讨平宜山蛮

【广西自韩观卒後诸蛮渐横云先後讨平之及是禽杀宜山蛮寇苏公夏等余贼悉解散】质实【宜山唐龙水县宋改宜山县以县有宜山故名明属庆远府今因之】

六月帝作闵旱诗示羣臣

【祷雨不应作闵旱诗】

诏中外疏决罪囚

复振两京河南山东山西湖广饥免税粮

秋七月免江西水灾税粮

【江西自六月初旬以後天而不止凡濒江诸府大水漂流居民淹没田稻帝特命户部察视有灾处诏悉蠲其租】

八月汰冗官

【载行在户兵工三部大理光禄鸿胪行太僕寺及顺天府官七十七员】

閏月西域贡麒麟礼官请表贺不许

【西域来贡麒麟诸物帝受之行在礼部尚书胡濙以麒麟瑞物率羣臣称贺帝曰远方之物朕非有爱但念其尽诚远来故受之不足贺也】质实【胡濙字源深武进人】

景星见

【礼官请贺不许】

发明【国家以时和岁稔为上瑞麒麟贡自异域不足言祥景星之见人事迹而天道远两皆请贺不许宣宗可谓知本务矣胡濙以累朝旧臣不忠崇实政以襄郅治而乃侈言祥瑞屡表称贺皆首署名当时谓其性善承迎不虚也】

九月遣使鞫天下重囚

【帝曰朕体好生风夜念刑三法司所决重囚凭案牒耳安得察顔色其遣廉明者分临覈囚审复不厌其心者奏献之母轻率枉死人】

【甲寅】九年春二月振凤阳淮安扬徐饥

三月山云讨平思恩蛮

【广西思恩蛮覃公砦等累年作乱至是讨平之斩贼首一千五百余级仍督官军搜捕余党】质实【思恩古百粤地唐置羁縻思恩州明为思恩府今因之】

夏四月黎利死子麟来告丧命麟权署安南国事【利受枚命居国称帝僭位六年私諡太

祖子麟继麟一名龙勾是其君皆有二名以一名奏天朝麟遣使告讞命麟权署国事】

秋八月振湖广饥

敕两京湖广江西河南三司官行视灾伤蠲秋粮十之四罢工部采办

卫拉特托欢袭杀鞑靼阿噜台于穆纳山

【阿噜台为托克托布哈所袭妻子死孽畜畧尽独与其子硕尼堪等徙居穆纳山未几卫拉特托欢袭杀阿噜台及硕尼堪托欢遣使来告且献玉玺帝赐敕曰王杀阿噜台见王克复世仇甚善顾王言玉玺传世久远殊不在此王得之王用之可也赐遣之阿噜台子谔博尔济延及其孙妻苏默德斯等丧败无依来乞内附帝怜而抚之】质实【穆纳山在今乌乌特旗西穆纳山旧作母纳山乌拉特旧作吴喇忒托克托布哈旧作脱脱不花硕尼堪旧作失控干谔传尔济延旧作阿卜只俺苏默德斯旧作苏木答思今俱改】

九月帝巡边至洗马林还

【诸将言卫拉特猎所去洗马林不远袭之可大克也帝曰朕此来飭边备耳非来捕寇夜召问杨荣荣对曰陛下屡遣人招谕命其近边猎牧故感恩而来若击之是前敕诱之矣且彼闻上至必先遁虽击何益徒失戒心耳乃决意止将士勿击】

冬十月松潘番叛都督佥事方政讨平之

【六年松潘诸族及空郎龙溪诸寨叛总兵官陈怀讨平之八年御史及按察使奏怀僭侈踰分且日荒于酒不飭边备帝怒召怀还命方政代擢参将蒋贵以副之至是诸番复叛政谕以祸福多聽命惟任昌等寨梗化政等分道进剿以次平三十余寨捷闻进政都督同知明年政移镇大同而以贵代政为总兵官镇守松潘】质实【松潘诸族明史土司传十三族长官司曰勒都曰阿昔洞曰北定曰牟力给曰蛞匝曰祈命曰山洞曰麦匝曰者多曰占藏先结口包藏先结曰班班曰白马路其後复隶松番者长官司四曰阿思曰思囊儿曰阿用曰潘干赛安抚司四曰八郎曰阿角寨曰麻儿匝曰芒儿者後又以思囊曰安抚司附焉空郎龙其诸寨方輿纪要松潘卫南归化关左右有龙溪诸番寨】

振两畿浙江湖广江西饥

冬十一月免四川被灾税粮

【四川奏早潦不一所种无收帝命户部复视之蠲其租】

十二月帝不豫

【帝不豫卫王瞻埈摄李太庙免明年正旦贺礼命百官朝皇太子于文华殿】

【乙卯】十年春正月帝崩太子祁镇即位

【帝崩于乾清宫年三十有八遗诏国家重事白皇太后行时太子方九龄外廷传言太后取金符入内欲召立襄王杨士奇杨荣率百官入临请见太子太后即至乾清宫携太子泣曰此新天子也士奇等伏谒呼万岁浮议乃息】质实【乾清宫皇极殿後曰云台门东曰後左门西曰後右门又东则景运门西则隆宗门中则乾清门上则乾清宫】

罢金银朱砂铜铁坑冶免其课

减税钞

【悉如洪武旧额】

少师兼吏部尚书蹇义卒

【义历事六朝凡五十年帝即位齐宿得疾遣医往视问所欲言对曰陛下初嗣大宝望敬守祖宗成宪始终不渝耳卒年七十三赠太师谥忠定】

罢十三布政司镇守中官

【其守备南京镇守诸边收粮徐州临清巡盐淮浙者如故】

加户部尚书黄福少保参赞南京机务

【留都文臣参机务自福始时襄城伯李隆守备南京福以参赞尝生隆侧然隆待福礼甚恭公退即推福上坐福亦不辞福遇事先筹定付隆隆敬信悉从之及视事皆隆处分福不出一语或以为言曰体当如是且守备何尝一事错由是政肃民安远近悦服】

二月尊皇太后为太皇太后

【左右有请垂帘聽政者太后曰母壞我祖宗法第罢不急务斥宫中玩好之物时时勗帝向学而已朝廷大政羣臣白太后太后令悉送内开俟杨士奇等议决然後行太后兄彭城伯都督昇惟令朝朔望母得与闻国政昇素贤士奇等请加委任太后终不许】质实【彭城伯杲都督昇皆彭城伯张骥之子昭皇后之兄也从成祖起兵取大宁战郑村坝俱有功授义勇中卫指挥同知永乐初累官锦衣卫指挥使仁宗立擢左都督封彭城伯予世袭昇字叔晖成祖起兵以舍人守北平有功授千户历官府军卫指挥僉事仁宗即位拜都督同知宣德初进左都督正统五年封忠安伯予世袭】

发明【英宗方九龄太皇太后悉以朝廷大政委之杨士奇等可谓得人为大臣者正宜以道为闭预防其渐始为不负寄托士奇等乃以太后关预朝政遂有委任张昇之请未免意存迎合幸而太后不许昇固素贤事亦遂寢然三杨实秉国钧而委蛇瞻顾乃心王室者宜若是乎律以春秋责备之义当亦无可置喙云】

尊皇后为皇太后

封弟祁钰为郕王

封平阳王美圭为晋王

【晋自济熿废後不立王者已八年至是以美圭绍封】

三月放教坊司乐工

【几三千八百余人】

江西盜作乱僉事彭森等讨平之

【先是江西连年水旱人民艰窘有司不能振恤大盘山贼曾子良等为乱衆至三万屡抚不服森与吉安知府陈本深率官军民壮讨之本深以计擒斩子良余衆潰散】质实【大盘山在抚州府乐安县西北山延袤数十里夸新淦永丰二县界吉安唐吉州元置吉安路明改府今因之】

诏死罪必三覆奏

【谕三法司死罪临决三覆奏然後加刑其後太监王振擅权忤旨者辄加诛戮不俟覆奏矣】发明【古者用刑明辟必以三刺唐臣徐坚上书云令有三覆请如令覆奏要以人命至重虑其失情故於勘问得实之後仍不憚再三审慎此即求其生而不得之心也仁宗五奏未免过滋烦冗英宗始有死罪必三覆奏之诏可谓慎讞良法惜行之未久而即为阉?擅作威福竟不待覆奏而已加诛则兹钦恤之诏亦属空文耳】

夏四月以元儒吴澄从祀孔子庙庭

【从慈利教谕蒋明之请也】质实【慈利隋县元升州明复为县属澧州今因之】

五月诏自今初任者不得除风宪官

六月葬景陵

【諡曰宪天崇道英明神圣钦文昭武宽仁纯孝章皇帝庙号宣宗】质实【景陵在昌平州天寿山东峯下距长陵东少北一里许】

【明史赞曰仁宗为太子失爱于成祖其危而复安太孙盖有力焉即位以後吏称其职政得其平纪纲修明仓庾充羡阁阁乐业岁不能灾盖明兴至是历年六十民气渐舒蒸然有治平之象矣若乃强藩猝起旋即削平扫荡边尘狡寇振慑帝之英姿睿畧庶几克绳祖武者欤】

秋七月太白经天

八月減光禄寺膳夫

【凡四千七百余入】

九月诏四方毋进祥瑞

【龙州宣抚司以瑞麦献有一茎六穗七穗者诏曰今旱蝗相望独一方称瑞如天下饥民何自今有若此类者毋献】

释御史陈祁主事郭循于狱复其官

【宣德间祁请讲大学衍义帝怒曰祁以朕为未读大学耶薄朕至此不可不诛命籍其家逮其亲属同下锦衣狱妇女发浣衣局时拓西内皇城修离宫别馆循为刑部主事极谏帝怒命裹以氊至大内亲诘之循对不屈帝益怒手射之亦下锦衣狱至是皆赦复职】质实【陈祁字永錫吴人郭循字循初庐陵人】

以王振掌司礼监

【振少选入内书堂侍帝于东宫为局郎及帝立年少振狡黠得帝欢遂越金英等数人掌司礼监导帝用重与御下防大臣坎弊于是大臣下狱者不絕而振得因以市权然是时太皇太后贤方委政内阁阁臣杨士奇杨荣杨溥皆累朝元老振心惮之未敢逞太后尝遣振至问问事士奇拟议未下振辄施可否士奇愠三日不出太后问故荣以实对太后怒鞭振仍令至士奇所谢罪且曰再尔必杀无赦自是问数日太后必遣使至阁问连日曾有何事来议如何施行令具帖以闻】质实【王振蔚州人】

冬十月诏天下卫所皆立学

十一月戊辰朔日有食之

命杨士奇杨荣杨溥议臣民章奏

【太皇太后委任三人三人同心辅政士奇有学行通達国体荣谋而能断溥有雅操淳谨小心每议事士奇引古义荣出一言决之诸大臣争可否或有违言溥舍已从人畧无系吝时论贤之号三杨】质实【三杨以居第曰士奇曰西杨荣曰东杨溥尝自书郡望曰南郡因目为南杨】

阿尔台寇甘肃总兵官陈懋击败之

【阿鲁台既死其故所立阿尔台王子及所部多尔齐巴勒等复为托克托布哈所窘窜居额齐讷路外为纳款而数入寇甘凉至是陈懋连击败之追至苏武山而还】质实【苏武山在凉州府镇番州东南三十里相传汉苏武牧羝处山右有苏武庙因名阿尔台王子旧作阿台王子多尔济巴勒旧作朵尔只伯今俱改】

【丙辰】英宗睿皇帝正统元年春正月发京军屯田畿辅【杨士奇言国家?用粮储皆自东南转运军民劳苦今京军操练外余卒尚多宜令于北京八府屯田可省南方转运之费帝命户部兵部议行之于是拨京军三万就近地下屯又言先因巡边调选大宁都司及南北直隶卫所官军更番赴京操备今天下已靖请不必赴京俱令下屯既省转输之劳又养精锐之气帝善其策俟从容行之】质实【北京八府谓顺天保定河间真定顺德广平大名永平也】

三月始御经筵

【杨士奇杨荣杨溥请开经筵并择老成重厚识達大体者数人以供侍讲之职太皇太后然之命士奇荣溥及侍读学士王直等为经筵官每十日会讲文华殿余日仍令讲读官四人入讲经史宣德以前儒臣进讲无定日亦无定所至是定於文华殿以月之初二十二二十二共三日为定期】

夏五月始置提督学校官

【南京户部尚书黄福言比来生员学艺疎浅宜令布政按察二司遍历考试庶得真才于是雨畿及十三布政司各置提督学校官一员两畿以御史十三布政司以按察司僉事着为令】

秋七月复圣贤後裔

【令有司访求南宋衍圣公孔端友及宋儒周敦颐程颢程颐司马光朱熹後裔蠲其徭役祠墓倾圯者修之】

两畿山东河南陕西湖广广东大水

八月以右都督蒋贵充总兵官都督同知赵安副之帅师讨阿尔台多尔济巴勒

【贵自松潘召还为右都督会阿尔台多尔济巴勒数犯甘凉边将告急乃命贵及安往讨未出师敌又犯庄浪都指挥江源战死亡士卒百四十八镇守甘肃侍郎徐曦上章劾贵廷议以贵方选军甘州势不相及而庄浪正曦所统责曦委罪置贵不问明年春谍报敌驻贺兰山後诏贵等出塞遂之贵至鱼儿海子都指挥安敬言前途无水革遂引军还】质实【庄浪元路寻降州明改县属静宁州今属平凉府鱼儿海子在今凉州府镇番县东北即白亭海古林屠泽也赵安狄道人徐曦江陰人】

始徵金花银入内承运库

【初州县岁赋有折银者俱送南京供武臣俸禄及北京既建各卫官支俸南京道远费多所余无几副都御史周钰请於直省不通舟楫之州县折收白金布绢赴京充俸巡抚江西侍郎赵新尚书黄福亦为言帝问尚书胡濙濙言太祖时尝行於陕西浙江民以为便乃仿洪武制米一石折银二钱五分麦亦如之南畿及浙江江西湖广福建广东广西共折银百万余两不送南京尽解内承运库谓之金花银除给放武臣俸余专供内用其後概行於天下自起运兑运外粮四石折银一两解京以为永例由是诸方赋入折银者几半而仓廩之积渐少矣】质实【岁赋折银明史食货志洪武九年天下税粮许民以银钞代输于是谓米麦为本色诸折钞者谓之折色内承运库在东下马门周铨怀远人】

九月遣侍郎何文渊王佐副都御史朱与言督两淮长芦浙江盐课

【勅曰命尔等与内臣提督务俾盐丁得所商贩无滞国课不亏奸弊殄绝有不便于民者具实以闻其阻挠盐法倩犯重者械送京师钦差巡盐自此始】质实【王佐海丰人朱与言字一鶚万安人】发明【明太祖初起即立盐法以官领之洪武时诸产盐地次第设都转盐运使各省皆有盐课而两淮两浙长芦为首重英宗既遣侍郎副都御史巡盐已足厘整奸弊而又令其与内臣提督其信用阂?如此迨宪宗以後诸璫窃势甚至奏讨淮浙盐无筭且买充正课之外复奏闻残盐夹带影射诸患百出盐臣希承风旨更列零盐所盐之目于是盐法日益坏矣明季信任宦官诸事皆然岂独一盐政哉】

封黎利子麟为安南国王

【初利死以其子麟权知国事麟遣使入贡谢恩至是年四月以宣宗赴遣使进香又以帝即位及尊上太皇太后皇太后位号各遣使表贺贡方物闰六月复贡帝以陈氏宗支既絶麟事朝廷甚?欲使麟正位下廷议咸以为宜乃遣兵部侍郎李郁等齎勅印往封之】质实【李郁洛阳人】

冬十一月诏廷臣举堪任御史知县者各一人

【诏京官三品以上举堪任御史者四品及侍从言官举堪任知县者各一人】

十二月下兵部尚书王骥于狱寻释之

【王振初用事欲令朝臣畏已会骥议边事五日未奏振教帝召骥而贵之曰卿等欺朕年幼耶遂执骥及右侍郎邝埜下狱寻释之未几右都御史陈智劾张辅回奏稽廷并劾科道不举奏帝释辅不问杖御史给事中各二十自是言官承振风旨屡摭大臣过自公侯驸马伯及尚书都御史以下无不被劾或下狱或荷校至谴谪殆无虚岁】质实【王骥字尚德束虎人邝埜字孟质宜章人陈智湖广咸宁人】

【丁巳】二年春正月太皇太后召见大臣于便殿

【太皇太后御便殿帝西面立后傍召张辅杨士奇杨荣杨溥胡濙入见五人东面稍下立太皇太后谕曰卿等老臣嗣君幼幸同心共安社稷又召溥前曰先帝念卿忠屡形愁叹不意今复得见卿溥泣太皇太后亦泣左右皆悲怆始仁宗为太子居守时以谗故官僚多下狱溥及黄淮一系十年濒死者数矣仁宗每于宫中言及东宫时事惨然不乐以故太皇太后言之太皇太后又顾帝曰此五臣先帝简任俾辅后人皇帝万畿宜与五臣共计有顷宣王振至太皇太后顿怒曰汝侍皇帝起居多不律今当赐汝死时女官杂佩刀剑侍遂以刃加振颈帝跪为振诮五臣皆跪太皇太后曰皇帝年幼岂知此辈自古误人家国我听帝暨诸大臣留振此後不得令干国事也振故心惮太皇太后自此稍敛戢已而太皇太后病遂跋扈不可制矣】

夏五月免河南被灾田粮

五月遣王骥经理甘肃边务

【蒋贵赵安帅师出塞既无功而侍郎柴车徐曦都御史曹翼相继整饬边备皆不能御敌帝命骥往许便宜行事骥疾驰至军大会诸将问将校往时追敌鱼儿海先退者谁金曰安敬骥先承密旨戮敬遂缚斩军门并责贵曰汝大将亦当死姑贷汝立功自赎诸将皆股栗莫敢仰视于是校閱将士分兵画地使各自防御边境肃然寻还报命会阿尔台复入寇帝命骥帅都督仕礼及贵安繫之骥遣贵为前锋而自与礼统大军继进戒贵曰不捷无相见也贵繫敌石城走之骥及礼复败之胡桐林安等又及之多喇穷追至黑泉而还是役官军出漠千余里诸将左右夹繫殲敌几尽先後获其部长百五十人阿尔台多尔济巴勒皆远遁寻为托克托布哈所杀】质实【石城在今甘州府边外故居延城北胡桐林多喇黑泉俱在额齐讷路按胡桐木名汉书西域传注胡桐似桐虫食其叶而沫出下流者俗名胡桐泪可以污金银即此旧误作梧桐林非是曹翼蕲州人任礼字尚义临漳人多喇旧作刁力今改】

免陕西平凉六府旱灾夏税

【命户部遣官勘实蠲之】

诏旌出谷振荒者为义民复其家

【时义民十人各出稻千石有奇佐官振济诏畅玺书旌劳复其家】质实【十人胡有初谢子宽吉安府人范孔孙浮梁县人于敏榆次县人巩得海邳州人张雷石州人梁璧李成俞胜徐成俱淮安府人】

六月以宋儒胡安国蔡沈真德秀从祀孔子庙庭【肇庆知府王莹等以安国作春秋传沈作书传德秀作大学衍义有功于圣门请从祀孔庙下礼部议奏称莹等言是故有是命】质实【王莹鄞人】

振江北河南饥

【南直隶之凤阳淮安扬州诸府徐和滁诸州河南之开封诸府奏四月至五月雨河淮泛溢民居漂没将流徙乃命副都御史贾谅工部右侍郎郑辰往振之】质实【贾谅字子信峰县人郑辰字文枢浙江西安人】

秋九月以指挥僉事杨洪守备独石

【洪初副李谦守备寺城独石谦老而怯与洪不相能洪尝励将士杀敌谦笑曰徒杀吾人耳敌可尽乎御史张鹏劾罢谦遂以洪代洪纪律严明烽堠修饬与乌梁海战斩其渠威名闻岭北称杨王】质实【杨洪字宗道六合人】

【戊午】三年春三月京师地震

【己亥夜四更地震五鼓复震庚子夜又震甲辰画震至暮又震】

振陕西饥

夏四月设大同马市

【刑部尚书魏源等以卫拉特贡马援辽东开原例以六事开曰置马市选贡马输贡具严禁约择通市设牙行帝以马市劳军民不必置待远人宜後马不必选供具取给公帑勿扰民余如议巡抚大同僉都御史卢睿复言大同宜立马市复从之】质实【魏源字文渊建昌县人卢睿字仲愚东阳人】

秋七月下礼部尚书胡濙等户部尚书刘中敷等于狱寻俱释之

【礼部失印命逮湊等下锦衣街狱狱具而盗得先是军官俸粮于通州支給中敷等令于京舍支給中官讽给事中御史劾奏故有是命寻皆释之】质实【刘中敷大兴人】

八月振陕西饥

【令杂犯死罪以下输银赎罪送边吏易米振之】

九月蠲两畿逋赋

【凡免粮六十四万石以正院元年二年连被灾伤故也】

冬十一月逮天下逋逃工匠四千人

【宣德间徼天下军民工匠多所兴造帝即位悉罢之未几建宫殿修九门改五府六部诸司公署又建京城内外诸佛寺工役繁兴匠多逃者二年二月以後已逮六千余人至是又逮四千二百余人後又逮万人逮至者皆桎梏赴工六年夏以盛暑始脱桎梏】

发明【国家大工大役原有当举但役之有道董之有方何至役而逃逃而被逮至千万余人并令桎梏赴工岂复成政体乎英宗即位初既惩宣德兴土木罢徵军民工匠曾未几时乃繁兴而加之厉其於初政何不克有终若是乎】

十二月下刑部尚书魏源等于狱

【先是巡抚湖广侍郎吴政等奏辽王贵给诸不法事而匿其黷伦罪诏逮政等命三法司鞫之源等论政罪不当遂逮源等及都察院右都御史陈智等下狱命张辅等会同辽狱论吴政等规避不奏当斩明年间二月释源智等复其官并有弃交址王通马骥罪及弋谦俱罢为民】质实【贵烺简王植子】

【己未】四年眷二月总兵官萧授平贵州叛苗

【贵州计沙贼苗金虫苗总牌等纠洪江生苗作乱伪立统千侯统万俟号授督兵分攻大破之都督同知吴亮追斩苗总牌等生苗尽降授谕遣之而命千户尹胜诱苗金虫斩以徇】质实【计沙苗多以苗为姓其所居曰苗沙洞在黎平府城南三郎司西洪江即洪州工在黎平府城东洪州司北吴亮来安人】

三月大赦

【以春和下寬恤诏殊死以下罪无大小咸赦除之蠲通税】

辽王贵烺有罪废为庶人

【初府僚乞加王禄不许及贵烺杖杀长史笞荆州知府为抚按官所劾帝以闻其内乱召讯具服废为庶人俾守简王园已封其弟贵煖为辽王】

夏五月京师大雨水溢

【坏官廨民居三千三百余区贫民露宿长安街皆满以京几水灾祭告天地谕羣臣修省下诏宽恤求直言】

六月彗星见

【长丈余五十四日乃?】

京师地震

【八月又震】

秋七月免两畿山东江西河南被灾税粮

【凡免秋粮二十一万三千余石】

冬十二月都督同知李安金都御史王翱讨松潘祈命族叛番

【松潘指挥赵得奏祈命族番寇桑巴作乱官军捕禽之其弟小桑巴复聚浦江新塘等关据险刼掠帝命李安充德兵官王翱参赞军务调官军土兵二万讨之已翱知指挥赵谅诱执国师桑巴掠其财与同官赵得诬以叛至则出桑巴于狱遣人招其弟抚定余党而诛谅成得复桑巴国师松潘遂平】质实【浦江关在松潘卫南一百二十里今名镇江关新塘关在松潘卫南七十里亦名新镇关桑巴旧作商巴今改】

【庚申】五年春正月少保南京户部尚书黄福卒

【福历事六朝多所建白公正睿恕素孚于人当官无赫赫名事微细无不谨忧国忘家老而弥笃安南贡使入朝或指福问曰识此大人否对曰南交草木亦知公名安得不识其卒也赐谥不及士论惜之至成化初始赠太保谥忠宣】

二月以翰林院侍讲学士马愉侍讲曹鼐入内阁预机务

【王振至内间语杨士奇杨荣曰朝廷事久劳公等公等皆高年倦矣当若何士奇曰老臣

尽瘁报国死而後已荣曰不然吾辈衰残无以効力当释後生可任者报圣恩耳振喜而退士奇咎荣荣曰彼厌吾辈矣一旦内中出片纸令某人入阁且奈何及此时进一二贤者同心辅政尚可为也士奇以为然翌口列愉鼐及侍讲学士苗衷侍讲高谷名以进伦务遂先彼擢用】质实【马愉字性和临朐人苗表字秉彝定远人高谷字世用扬州兴化人同曹鼐共四人皆帝初御经筵士奇等所荐】

三月建北京宫殿

【永乐中宫阙未备奉天华盖谨身三殿成而复灾以奉天门为正朝至是重建三殿并修缮乾清坤宁二宫役工匠官军七万人】质实【坤宁宫乾清宫中则交泰殿上则坤宁宫】

夏四月免山西旱灾逋税

六月两畿山东河南浙江江西大水江河皆溢

陕西大雨雹

【深尺余】

度僧道二万余人

【王振喜释道每岁必一度之是年五月以前已度二万一千人至是又度前後共二万二千三百余人黄冠缁衣布满街市僧道之多莫逾於此】

发明【王振擅权以後穷极奢侈既建第皇城束又建智化寺繁兴土木滋害军民乃又岁度释道前後至二万余人之多缁黄满街滥费无度徒以諂佛奉道卒至蠹国扰民败坏天下其害可胜言哉】

秋七月遣刑部侍郎何文渊等分行天下修荒政【从杨士奇请也时太皇太后专以养民为务每四方水旱振济动亿万计蠲免灾粮或数百万石闾閻安乐虽灾不为害迨王振用事悉反初政惟蠲租振荒尚仍之不改云】

少师谨身殿大学士杨荣卒

【先是正统三年荣与士奇俱进少师至是春乞师省墓比还至杭州卒年七十赠太师諡文敏授世袭都指挥使 荣历官五朝谋而能断成祖初与解缙等七人同入阁荣年少最警敏一日宁夏报被围成祖示以奏荣曰宁夏城坚人皆习战奏上已十余日围解矣夜半奏至围果解成祖与诸大臣议事未决或至发怒荣至辄霁威事亦随决李时勉夏原吉皆以荣言得无死尝语人曰事君有体进谏有方以悖直取祸吾不为也故其恩遇亦始终无间性喜宾客

虽贵盛无稍崖岸士多归心或谓荣处国家大事随机应变不媿唐姚崇而不拘小节亦颇类之】

冬十一月河南僧杨行祥诈称建文帝下锦衣卫狱寻死

【有僧年九十余由云南至广西自称建文帝命其徒清进诣思恩府土官知府岑瑛执送总兵官柳溥械至京会官鞫之僧乃言其姓名为杨行祥河南钧州白沙里人洪武十七年度为僧历游两京云南贵州至广西帝令锦衣卫锢禁之四踰月死从者十二人皆戍边】质实【明史牛景先传有金川门启帝亦为僧出亡莫知所终之语然旁采见闻未尝据以为实而杨行祥一事见明正统实录当时纪载家每多附会传讹有以杨行祥作杨应能而建文托其姓名以逃之见宪章录谓思恩州岑瑛遇一老僧于道从者呵之不避请其度牒检之乃杨应能遂自言曰此非吾姓名乃托此而逃也自金川失守大内起火吾遂由地道出自湖湘入蜀至云南最后入广西至横州南门寿佛寺居焉居十五年归者口聚吾复往南宁陈步江一寺而归者如之乃去南宁云游四方以度岁月迤邐至此老朽待尽愿送骸骨归瑛大骇闻于巡按御史奏之驿送赴京号老佛及至京朝廷未审何人以尚膳太监吴亮建文时内使使审视老佛见亮曰汝非吴亮耶亮曰不是曰我昔御便殿弃片肉于地汝伏地舐食之何为不是遂取老佛入西内居之有以建文居寺一日自称建文帝为僧白官府者见逊国记谓建文出自滇南呼寺僧曰我建文皇帝也僧大惧白官府迎至藩堂南而跌足坐地白称朱允炆曰胡濙访张儼偈实为我众悚然闻于朝乘传至京有司皆以王礼见入居大内以寿终葬西山不封不树有以杨行祥作应祥为建文同寓僧迨系僧而并及帝者见明史纪事本末谓建文喜为诗广西同寓僧窃帝诗自请建文帝诣思恩知州岑瑛瑛闻之藩司因系僧及帝蜚章以闻至京御史鞫之便称年九十余且死思葬祖父陵旁耳御史言建文君生洪武十年距正统五年当六十四岁何得九十岁廉其状僧实杨应祥僧论死帝适有归思白其实御史密以闻于是迎入西内宫中呼为老佛以寿终葬西山传闻异词往往失实皆不可信也钧州金置明神宗时避讳改禹州属开封府今因之白沙里即白沙镇在禹州城西北六十里柳□怀宁人升之子】

【辛酉】六年春正月己亥朔钦天监言日食不应

【礼官请表贺不许】

以蒋贵为平蛮将军王骥总督军务讨麓川蛮

【洪武中麓川平缅宣慰司思伦发为其头目刁干孟所逐赴京陈诉太祖仍命为宣慰同居麓川成祖时分其地设府三曰孟养木邦孟定长官司四曰潞江千崖大候湾甸寻又陞孟养木邦为宣慰司久之孟养木邦与缅甸相仇杀时思伦发已前死子行发任发相继袭职任发性桀黠喜兵遂欲乘机侵夺尽复其故地称兵援南甸突千崖进陷腾冲屡诏抚谕不受命黔国公沐晟请发兵进剿帝命都督方政会晟及其弟昂共讨之任发佯言遣使修贡冀缓师晟遽信其降无渡江意任发乃遣众万余夺潞江沿江造船三百余欲取云龙帝以贼势日盛

賁晟等玩寇养患会政亦至军欲出战晟不可造舟欲济师晟又不许政不胜愤乃独率麾下击贼破其大寨又追败之高黎共山下斩首三千余级乘胜突入逼任发于上江上江贼重地政远攻疲甚求援于晟晟怒不遣既以少兵往至夹象石又不进政不得已渡江贼知其孤军无援也遂出象阵冲击全军皆没事闻朝廷切责晟晟惧罪暴卒勅昂代统其军久亦无功思任发由是愈横既乃遣其头目以象马金银来修贡且请罪帝用杨士奇言降敕许赦其罪侍郎何文渊亦请罢兵遣官诏谕命下廷臣议皆如文渊言而王振方用事欲示威四夷先已召还甘肃总兵官蒋贵等使待命尚书王骥揣知振意力主用兵振大悦遂出廷议以贵为平蛮将军都督用知李安僉事刘聚为副骥总督军务大发东南诸道兵十五万人往讨麓川侍讲刘球上疏諫不听】质实【按沐晟之死记载家谓饮桀死明史作晟惧罪暴卒大事记独谓上江贼重地不可易视前军轻锐中军当自持重势不相及以自败没未可以是尤晟得疾而卒非由惧罪然考明史土司传晟初无渡江意遂致思任发夺潞江取云龙势益日甚英宗责晟等玩寇养患时政欲出战晟屡不许及击败贼又不肯援是纵贼于前坐视于後僨轡之咎实无可逃其为惧罪暴卒明史当可据潞江长官司蛮名怒江甸元置柔远路明?武十五年改府後废属麓川平緬司永乐元年析置路江长官司十六年升安抚司今司属永昌府干崖长官司蛮名干赖啖又渠澜啖元置镇西路明洪武十五年改府後废属麓川平緬司永乐元年析置干崖长官司正统九年升宣抚司今司隶胜越州大候长官司蛮名孟佑元属麓川路洪武二十四年置大候长官司後废属麓川平緬司永乐元年复置宣德三年升州万历二十五年更名云州属顺宁府今因之湾甸长官司蛮名细啖元属镇康路明洪武十七年置湾甸州後废属麓川平緬司永乐元年拆置湾甸长官司寻复改为州今仍为土州隶永昌府緬甸古朱波地在永昌府西南云龙唐初为匡州西境蒙昏云龙甸段氏因之元置云龙甸军民府明洪武十七年改州属大理府今因之上江即龙川江源出腾越州徼外流经麓川为麓川江下流入大盈江蛮人以江在麓川者为上江近腾越者为下江夹象石在腾越州东龙川江东岸渡江而西即高黎共山麓也刘聚大监刘永诚从子刘球字廷振安福人】

三月下巡抚侍郎王谦于狱既而释之

【谦巡抚山西河南十二年威惠大行每入京师无私谒王振衔之谦以在外久乞召入荐参政王来孙原贞自代右通政李錫阿振指劾谦以久任不迁怨望擅举人自代会谦来朝遂下法司论死系狱三月得释左迁大理寺少卿山西河南吏民伏阙上书请留谦者以千数乃命复原官时山东陕西流民就食河南者二十余万谦请以河南怀庆二府积粟振之今布政司抚集其衆授田给牛耕种流民以安】质实【王来字原之慈谿人孙原贞名瑀以字行德兴人】

夏五月太白经天

遣使録囚

【先是以灾异遣使省天下疑狱至是复遣刑部侍郎何文渊等録在京刑狱巡抚侍郎周忱等録南京刑狱】

秋七月振浙江湖广饥

九月奉天华盖谨身三殿乾清坤宁二宫成

【宫殿成宴百官故事中官不爽外廷宴是日帝遣使问王先生何为王先生谓王振也帝在宫中呼振先生而不名使至振方大怒曰周公辅成王我独不可一坐耶使复命帝蹙然命开东华中门召振至百官候拜于门外振始悦】

发明【振以宦侍耳始以狡黠得幸继以跋扈弄权英宗乃领心听之褒之以赐敕且称之以先生与汉灵帝张父赵母之称先後一辙无怪当日公侯勋戚羣呼翁父尚书侍郎下且有称儿屈膝者朝廷上下恬不知耻振罪固大英宗亦何迷谬若是哉】

冬十月下户部尚书刘中敷等于狱

【中敷与侍郎吴玺陈瑞以京城草束不足请供御牛马分牧民间言官劾其变乱成法并下狱论斩诏荷校长安门外凡十六日而释闰十一月卫拉特入贡诏问马驼刍菽数中敷等不能对王振言于帝复下狱论斩踰年释中敷为民玺瑞戍边】质实【吴玺邵武人陈瑞孝感人】

免畿内被灾税粮

进苏州知府况锺吉安知府陈本深秩正三品

【锺起刀笔然重学校礼文儒刚正廉洁孜孜爱民前後守苏者莫能及锺先丁母爰当去郡民诣阙乞留诏起复任及秩满请再任者至二万余人走诉巡按御史诏进正三品仍视府事及卒于官吏民聚哭为立祠本深为政大猾殲除府中无事问有讼者呼至櫺前析曲直遣之久之民耻争讼秩满当迁郡人乞留一如况之在苏诏亦进正三品视府事前後守吉安十八年政化大行一日升堂闻鼓乐声问知廨前民嫁女本深笑曰我来时乳下凶也今且嫁我尚留此耶遂请老既去郡人肖像祀之】

十一月大赦

【以宫殿成大赦定都北京文武诸司不称行在】

免河南山东及凤阳等府被灾税粮

【凡免四十四万三千三百余石】

十二月王骥等克麓川思任发走孟养

【驥濒行赐驥与蒋贵金兜牟细铠蟒绣绯衣朱弓矢驥请得以便宜从事驰传至云南将抵金齿贼酋守镇康者遣人乞降驥受之密部署诸将分三路进取右参将冉保由东路攻昔刺寨趋孟定驥与贵由中路趋上江副总兵刘聚右参将宫聚自下江夹象石合攻贼立寨坚守銃弩飞石交下如雨攻五日不下会大风官军纵火焚栅斩首五万余级遂拔其寨由夹相石渡下江通高黎共山道至腾冲由罗卜思庄长驱抵杉木笼山贼乘高据险筑七垒相救驥遣将分左右翼缘岭而上自将中军奋击贼大溃连破之乘胜至马鞍山进捣贼巢山?絕深堑环之东南面江壁立不可上贼更从问道潜师出大军从驥戒军中无动而令都指挥方瑛以六千人突入贼寨瑛直前左右击斩数百人蹙死者无算又诱败其象阵会冉保亦由束路破诸蛮寨以兵来集驥令截守西戕渡防贼軼乃分督诸将四面环攻西风大作复纵火焚死者不可胜计溺江死者又数万人思任发携其二子走孟养犁其穴获其虎符金牌及印章三十有奇驥留兵守之而还捷闻进贵爵定西侯驥封宁远伯余迁赏有差惟副总兵李安以攻余贼败绩下狱论死】质实【镇康蛮名石睽元立镇康路明改府寻改州今为土州属永昌府昔刺寨在镇康州南罗卜思庄在南甸司南七十里杉木笼山在南甸司南一百马鞍山在陇川司北石罈中流温泉成河热如沸西戕渡在芒市司南路通木邦方瑛政之子初袭指挥使已论政死事功迁都指挥同知】

【壬戌】七年春二月帝如天壽山

【二月庚申如天寿山谒长陵献陵景陵三月甲子还宫】

夏四月两畿山东山西河南陕西旱蝗

【先命吏部左侍郎魏驥等分往南北畿及各郡捕蝗至是振陕西饥免山东山西河南被災税粮】质实【魏驥字仲房萧山人由训导召修永乐大典】

五月立皇后钱氏

【后族单微帝欲封后父贵为侯后辄逊谢故后家独无封】质实【皇后钱氏海州人】

六月遣户部侍郎焦宏备倭

【倭屡入寇至是陷大嵩所杀官牢百人掠三百人粮四千四百余石军器无算乃命宏整饬浙江备倭事兼理苏松福建】质实【大嵩守卫千户所洪武二十年建在宁波府定海县东南二百三十里】

冬十月太皇太后张氏崩

【大皇太后大渐命中官问杨士奇杨溥国家尚有何大事未举士奇举三事其一言建文君虽亡曾临御四年当修实录仍用建文年号其二言太宗诏有收方孝孺诸臣遗书者死宜

弛其禁其三未及上而太皇太后已崩遗诏勉大臣佐帝惇行仁政语甚淳笃諡曰诚孝昭皇后王振自太后有疾数年间已纵恣及太皇太后崩遂益无忌惮矣】

十一月卫拉特遣使入贡

【先是四年托欢死子额森嗣称太师淮王于是北部皆服属托克托布哈具空名不复相制岁入贡主臣并使朝廷亦两敕答之称托克托布哈曰达达可汗额森曰太师赐赉甚厚并及其妻子部长故事卫拉特使止三十余人其後利朝廷赏赉所遣动以千计大同供应费至三十余万巡抚卢睿俱以供馈有缺至下狱是年春帝亦以贡使太多限三百人入间其秋至大同者复二千余人旬日又百余人帝悉纳之使人以马易弓藏于衣筐不可胜计巡抚罗亨信请于居庸关诘捡之帝不许镇守太监郭敬岁造箭簇数十览遗其使帝亦不问】

十二月葬诚孝皇后

【合葬献陵祔太庙】

【癸亥】八年春正月以王直为吏部尚书

【先是以灾异罢大臣不职者郭璉等自陈帝切责而有之及璉致仕遂以王直为吏部尚书直子为南京国子监博士考满至京选司欲改北学以侍直直曰乱法自我始矣固止之直遇王振未当少降辞色振每坐直前居其右曰太监四品吾尚书二品也振无如之何更加礼貌焉】质实【郭璉字时用新安人初名进仁宗更名璉】

夏五月复命王骥蒋贵帅师讨麓川蛮

【思任发二走孟养也诏能擒获者即以麓川地与之既而思任发自木邦窜缅甸缅人执之挟以求地而其子思机发复帅余衆据者蓝奏乞入朝谢罪廷议欲因而抚之王振不可七年八月复命骥总督云南军务未至而思机发遣弟招寨入贡不纳且敕骥图缅甸骥因请济师至是复命蒋贵为平蛮将军与骥合兵再讨麓川发卒转饷凡五十万人骥至金齿檄缅人献思任发缅人佯诺不遣及大军逼境缅人以楼船来觐官军而潜以他舟载思任发遁骥分军为五进薄之缅人坚执前诏必与地始出思任发骥知缅人资木邦水利为唇齿且虑思机发将以献其父故仇之故终不肯献思任发骤乃趋者蓝捣思机发巢破之思机发遁去俘其妻子部衆立陇川宣抚司而还後二年缅人始出思任发献云南思任发垂死千户王政斩之函首归京师】质实【者蓝麓川别寨地通孟养陇川宣慰司地旧名陇把司在陇川城北距省布政司六十六?】

雷震奉天殿

【震殿鸛吻帝辍朝祭告敕修省求直言】

大赦

六月太监王振杀翰林院侍讲刘球

【球应诏言事畧曰自古帝王政自己出则权不下移太祖太宗曰视三朝进大臣于便殿裁决庶政故权总于上陛下临御今已九年愿守二圣之成规复亲决之故事使政本归一古之择大臣者必询诸左右大夫国人及其有犯虽至大辟亦不加刑第赐之死今用大臣未尝皆出公论及有小失辄桎梏箠楚之未几又复其职甚非所以敬大臣也今之太常即古之秩宗今卿贰皆缺宜选习礼儒臣使领其职京师营作已五六年曰不烦民而役军军独非国家亦子乎今营筑多完宜罢工以苏人力麓川用兵死者十七八军资爵赏不可胜计今又遣将远征缅甸责献思任发假使得寇以归不遏献诸廷梟诸市而已然彼挟以为功必求与木邦分地不与则致怨与之则两蛮并大是灭一麓川生二麓川也设有蹉跌兵事无已死者必多卫拉特贡使日增包藏祸心诚所难测宜分遣给事御史督视官军及时训练毋使借工各厰服役私家仍公武举之选以求良将定招募之法以求武勇庾屯田公盐法以厚蓄储庶武备无缺而外患有防疏入下廷议惟择太常官宜从令吏部推举修撰董璘遂乞改官太常奉享祀事初球言麓川事振固已衔之钦天监正彭德清球乡人也倚振为奸公卿多趋谒球绝不与通德清恨甚遂摘疏中揽权语谓振曰此指公耳振益大怒会璘疏上振遂指球同谋并下锦衣卫狱嘱指挥马顺杀球顺遂夜携一小校持刀至球所球方卧起立大呼太祖太宗校前断其首血流被体犹植立支解之瘞户户下至景泰初赠球翰林学士諡忠愍】质实【董璘字德文高邮人有孝行明史刘球传马顺杀球璘从旁窃血裙遗球家後球子钺求得一臂裹裙以殓顺有子病久忽起摔顺髮拳且蹴之曰老贼令尔他日祸逾我我刘球也顺惊悸俄而子死小校亦死璘狱解遂归不复出】

下大理少卿薛瑄于狱既而释之

【瑄有学行人称为薛夫子初为山东提学僉事王振问杨士奇吾乡有可为京卿者乎士奇以瑄对召为大理少卿瑄至士奇使谒振瑄曰拜爵公朝谢恩私室吾不为也一旦会议束阁公卿见振皆趋拜瑄独屹立振知为瑄也先揖之自是衔瑄会指挥某死振从子山欲强娶其妾诬指挥妻毒杀夫处极刑瑄辨其冤三却之都御史王文承振指劾瑄故出人罪振复讽言官诬奏瑄受贿下狱论死将行刑振苍头忽泣于?下问故曰闻薛夫子特刑也振感动会兵部郎中王伟亦申救乃免】质实【薛瑄字德温可津人王文字千之初名强宣德时赐今名束鹿人王伟字士英攸县人】

秋七月祭酒李时勉荷校于国子监门三日释之【时勉与南京祭酒陈敬宗并以师道着闻时称南陈北李时勉请改建国子监帝命王振往视时勉待振无加礼振衔之廉其短无所得时勉尝芟?伦堂树旁枝振遂言时勉擅代官树坐枷署门旨下时时勉方坐束堂閱课士卷徐呼诸生品第高下顾僚属定甲乙揭榜乃行方盛署枷三日不解监生李责等三千余人诣阙乞贷有石大用者上章愿以身代诸生圜集胡同呼声彻殿廷振闻诸生不平恐教变及通政司奏大用章振内慙适会昌侯孙忠生日公卿皆为寿忠太后父也助教李继因公卿请于

忠太后使至忠家忠言今岁生辰殊不乐以公卿皆集独李先生荷校不至耳使复奏太后言于帝帝始知振所为即释之】质实【陈敬宗字光世慈谿人李贵凤阳人石大用岂润人朴鲁初不为六館所知及是名动京师李继史不详其里系时勉传云继不拘检桺时勉尝规切之继不能尽用然心感时勉言至是竟得其助】

冬十二月免山东复业民税粮二年

御定资治通监纲目三编卷九

卷十

<史部,编年类,御定资治通监纲目三编>

钦定四库全书

御定资治通监纲目三编卷十

【起甲子明英宗正统九年尽己巳明英宗正统十四年】凡六年

【甲子】九年春正月遣成国公朱勇等击乌梁海

【王振言于帝曰三卫虽錫为朝贡而数寇边宜讨之乃命朱勇出喜峯口着督马亮出刘家口兴安伯徐□出界岭口都督陈怀出古北口各同太监钱僧保曹吉祥刘永诚□□等率精兵四万人分剿之已而诸将皆捷勇奏败敌于富峪川亨奏败敌于土河怀奏败敌于虎头山亮奏败敌于黑山然俱无大功捕其扰边者□曰所掠人畜而已兵部尚书徐曦劾勇等不会访军深入遽旋师宜治罪命宥之寻论功加勇太保进亨兴安侯封亮招远伯怀平乡伯诸将士并陞赏有差其後巡边者多以斩击邀功由是三卫积怨遂导卫喇特入寇】质实【刘家口在永平府迁安县东北有关旧为出大寧要路界岭口在永平府抚寧县北旧有阙城土河在今喀喇沁右翼东南一百八十里虎头山在故大寧城北黑山方輿纪要在朵颜东境朱勇能之子马亮淇县人徐亨祥之孙曹吉祥滦州人刘永诚永乐时以内官为偏将累从北征後监镇甘凉军】

三月帝诣国子监行释奠礼

【以新作国子监成也祭酒李时勉当进讲会久病及升堂讲尚书辞旨清朗帝悦赐有加时勉为祭酒六年列格致诚正四号训励甚切崇廉耻抑奔竞别贤否示劝惩诸生督令读书灯大达旦吟声不絕人才盛于昔时英国公张辅暨诸侯伯奏愿偕诣国子监听讲帝命以三月三日往时勉升师席诸生以次立讲五经各一章毕事设酒饌诸侯伯让曰受教之地当就诸生列坐惟辅与抗礼诸生歌鹿鸣之诗宾主雍雍尽暮散去人称为太平盛事】

少师华盖殿大学士杨士奇卒

【士奇公正持大体雅善知人好推毂寒士所荐逵有初未识面者于谦周忱况鍾之属皆用士奇荐居官至一二十年廉能冠天下为世名臣帝初即位凡所建白无不行及王振用事擅作威福士奇与杨溥依违其问无所救正士奇既薨子稷傲很尝侵暴杀人或告士奇稷乃讐告者私事诋士奇士奇辄信稷稷恶日甚士奇不得闻於是言官交章劾稷朝议不即加法封其状示士奇复有人发稷朴虐事遂下之理士奇已老疾在告帝恐伤其意降诏慰勉士奇感泣忧不能起至是遂卒年八十赠太师谥文贞後数月稷瘐死狱中次子 以廕补尚宝丞

初士奇言卫喇特渐强将为边患边军缺焉请于附近太仆寺关领西番质马悉给之士奇歿未几有土木之难识者思其言】质实【土木驿堡在今宣化府怀来县西二十五里西至保安州四十里为往来孔道本名统汉镇唐初高开道据怀戎时所置後讹为土木明永乐初置堡】

夏四月以翰林学士陈循入内阁预机务

【初延议天下吏民建言章奏皆三杨主之至是荣士奇已卒循及曹鼐马愉在内阁礼部援故事请帝以杨溥老宜优间令循等预议于是循与鼐愉遂皆参决】质实【陈循字德遵泰和人】

秋七月下驸马都尉石璟于狱

【璟詈其家奄王振恶贱已同类下璟狱】质实【石璟昌黎人尚宣宗女顺德公主】

免河南被灾税粮

【免开封卫辉南阳河南怀庆彰德等府所属去年被灾粮三十万三千余石】

闰七月复开福建浙江银场

【浙福之交山谿深奥故多银场洪武末年定岁课永乐及宣德间增之地力竭民不堪帝初即位诏封坑冶福建参政宋彰浙江参政俞士悦以盗矿日炽言开银场则利归于上而盗无所容下三司议浙江按察使轩輗奏曰复开银场虽一时利然凡百器用皆出民间恐有司横加科人心摇动其患尤深为今之计莫若挥官典守严加禁捕盗白衰息朝廷是挽言得止至是矿盗叶宗留及陈鑑胡等聚众至数千盗福安矿肆行劫掠参议竺渊往捕之被杀死于刑科给事中陈傅复请开矿中官及言利诸臣争和之乃命户部侍郎王质往经理定岁课福建银二万一千余两浙江银四万一千余两虽比宣德时减半已十倍洪武时官属供亿资较课银尚过之日是民困而盗益众】质实【明实录洪武中福建藏课二千六百七十余两浙江二千八百七十余两永乐中福建增课三万二千八百余两浙江八万二千七十余两宣德中福建增课四万二百七十余两浙江九万四千四十余两福安宋析长溪置福安县明属福宁州今属福宁府宋彰交址人彰与中官多故旧侵渔万计案明史丁瑄传作宋新与明实录异俞士悦长洲人轩輗字惟行鹿邑人竺渊奉化人陈傅闽县人王质大和人叶宗留青田人陈监胡丽水人】发明【聚乌合亡命之侣为徒手攘利之举此即奸民之尤者及其未炽而剪灭之惟恐不速迨盗势日张乃欲开银场而使盗无所容此犹抱薪救火也幸而从轩輗奏停止而所云严加禁捕者有司又不实力奉行徒为文具致叶宗留肆行劫掠寻至戕害参议尚不痛加剿捕以靖乱阶而转踵前辙议仍开矿以弭其变政治之颠倒纒繆莫此为甚厥後屡兴大师合数省兵力声讨无功延至景泰初年始得平戢涓涓不息流为江河可不慎欤】

雷震奉先殿

【震殿?吻】

八月免陕西被灾税粮

【免粮四十八万六千石有奇】

敕诸将严边备

【额森充狡桀骜北部皆服属惟乌梁海未附额森屡击破之又结婚沙州赤斤诸卫胁制哈密巡视陕西都部史陈镒以闻帝勅诸将严为备九月命王骥陈镒经理西北边防】质实
【陈镒字有戒吴县人】

冬十月丙午朔日有食之

戍御史李俨于铁岭卫

【俨在光禄寺监收祭物王振过之怒其应对不跪下锦衣卫狱谪戍之时振以义子马顺掌镇抚司官无大小悉送顺考讯戕害甚衆顺大通贿赂车马冠盖其门如市】

【乙丑】十年春正月磔锦衣卫卒王永

【王振专恣日甚朝臣无敢言者永心不平乃数振罪恶为书揭之通衢又揭于振侄王山家为缉事者所获刑部坐以妖言当斩诏即磔之不必覆奏】

二月京师地震

免陕西逋赋

帝如天壽山

【壬申车驾发京师三月甲戌朔谒陵丙子还宫自是岁三月谒祭以为常】

夏四月甲辰朔日有食之

六月振陕西饥免田租三之一

秋七月下霸州知州张需于狱戍之

【需见民游食者衆每里置簿列男女大小口数计具耕桑树畜为设方畧服则躬自巡视有不如教者罰之民皆勤力州以饶富有中官牧马扰民者需笞其校卒中官詣于王振执下锦衣卫狱箠楚几死诏戍边并坐需举主顺天府丞王铎罢为民】质实【霸州後周置明属顺天府今因之王铎池州人】发明【振之为毒甚矣天下恐不得良有司如张需者禁游民设方畧俾百姓勤力闾里富饶此真以实心牧民者乃以禁责扰民校卒倾陷戍边且牵连妄坐不问是非逞阉党而肆福威扰生民而贼善政天下事尚可问哉】

八月免湖广旱灾秋粮免苏松嘉湖十四府州水灾秋粮

冬十月以兵部侍郎苗衷工部侍郎高谷入内阁预机务【衷谷与焉愉曹鼐皆杨士奇所荐及是四人并在内阁而鼐尤通达政体阁务多取决焉】

【丙寅】十一年春正月予太监王振等锦衣卫世职

【振若林世制指挥僉事钱僧保侄亮高让侄玉当吉祥弟整蔡忠侄军俱世袭副千户】

发明【明季之宠任宦宦濫窃名器无所不至而书予世袭者始于王振後极于魏忠贤夫赏延於世为国家酬庸褒德莫大之与寻常勲旧且不得轻与璫竖何物而竟邀此殊锡乎既施於振之从子而因及其同类私人几似锦衣一职为若輩所得世据之官卒至厚毒族诛小人之自为身家计者□以稔其祸哉】

二月异气见奉天华盖二殿

【异气见于华盖殿金顶及奉天殿?吻之上帝遣官祭告天地诏恤刑狱】

三月下户部尚书王佐刑部尚书金濂右都御史陈镒等于狱寻释之

【安乡伯张安与弟争祿诏逮治法司与户部相诿言官劾佐及濂镒等俱下锦衣卫狱数日释之】质实【金濂字宗瀚山阳人张安寿州人安乡伯兴之子】

遣御史柳华讨矿盗

【福建银場既开盜矿者益衆叶宗留为贼首自称大王帝遣户部郎中杨谿招抚浙江参议吴昇言福建矿盗出没浙江江西广东诸境东捕则西逃南搜则北窜若合而为一其患不小宜特遣朝臣专董勒捕乃命柳华督福建浙江江西军讨之华至福建遣兵分捕羣盜令村聚皆置隘门望楼编民为甲择其豪为长使自置兵器督辖巡夫盜稍戢而宗留刼掠如故】质实【柳华吴县人吴昇怀寧人】

夏六月京师地震

【丙辰夜震有声】

秋七月增市税

【先是以于谦言天下税课司局课钞不及三万贯者悉罢之领其税于有司上下称便至是户部尚书王佐诸增税课置彰义门官房收商税课钞天下税课司一万五千贯以上者俱诸复设征榷渐繁】质实【税课司局明史食货志京城诸门及各府州县市集凡四百余所其後以次裁并正统初于谦奏革直省税课司局领其税于有司罢济宁徐州及南京上新河船料钞移溲县钞关于河西务船料当输六十贯者减为二十贯商民称便】

少保武英殿大学士杨溥卒

【溥入内阁後杨士奇杨荣二十余年及卒亦最在後溥质直廉静无城府性?谨每入朝循墀而走诸大臣论事争可否或至违言溥平心处之诸大臣皆叹服时谓士奇有学行荣有才识溥有雅操皆人所不及云比荣士奇相继卒在阁者皆後进望轻溥孤立王振益恣横溥卒年七十五赠太师谥文定官其孙壽尚宝司丞三杨俱卒後中外大权一归王振矣】

八月谪大理寺丞罗绮戍边

【先是绮参赞寧夏军务尝以争劾指挥任信陈斌二人皆王振党至是信斌讪绮不法事下总兵官黄真覆核真谓绮尝冒宦官为老奴以激怒振召还京法司拟赎振令改锦衣卫再霸指挥马顺鍛链成狱谪戍辽东】质实【罗绮磁州人】

下吏部尚书王直等于狱寻释之

【光禄寺卿奈亨谄事王振擢户部侍郎亨尝以事干请吏部不行怨郎中赵敏构之词连尚书王直侍郎曹义赵新并下狱三法司六科廷鞫论亨斩直义新俱徙帝宥直义夺新亨俸视职如故时行人尚褫言右者刑不上大夫今文武大臣偶因微眚遽陷囹圄事或涉虚旋即复职是今日衣冠之大臣即昨日受辱之囚系面僚友而统属官寧能无愧请自今有犯者召至午门大臣会问事实则疏其轻重请上裁决不实即奏还其职帝颇然之而惑于王振不能改也褫寻授南京御史时工部郎中王佑亦以谄振擢本部侍郎佑无须一日振问之对曰爷无须儿安敢有闻者莫不鄙之】质实【奈亨香河人曹义字子宜句容人尚褫字景福罗山人王佑字廷佐浙江山陰人】

冬十二月大雨雷电

【是日壬寅翼日乃止】

【丁卯】十二年春三月始命天下学校考取附学生

【洪武初设学校生员未几即命增广不拘额数宣德中定增广之额京府学六十人在外府学四十人州县以次减十及是凤阳府知府杨瓚言民间子弟可造者多请增广生员毋限额礼部议如瓚请于是诸生日衆初设食廩者谓之廩膳生员增广者谓之增广生员仍依洪武宣德时定额以岁科两试高等者补充之而提学言考校取额外俊秀准令入学者谓之附学生员天下学校之有附学生自是始】质实【杨瓚蠡县人】

免杭嘉湖被灾秋粮

【凡免粮五十一万五千余石】

徙沙州卫之衆于山东

【永乐初沙州酋长昆济楞迈珠率衆来归帝置沙州卫授二人指挥使寻擢迈珠都指挥同知昆济楞都指挥僉事久之迈珠卒昆济楞掌衙事进秩都督僉事及帝即位昆济楞屡为哈密所侵且惧卫喇特见逼率其属二百余人走塞下陈饥窘状诏边臣发粟济之令议所处置边臣请移之苦峪从之自是不复还沙州但遥领其部而已元年又进秩都督同知四年其部衆百三十余家亡入哈密赤斤亦纳其叛人而罕东久驻牧沙州不去昆济楞屡诉于朝朝廷数敕责诸部多不奉命九年昆济楞卒长子讷格率其弟恭罗凌戡来朝授讷格都督僉事其弟都指挥使赐勅戒谕既还兄弟乖争部衆携贰甘肃总兵官任礼欲乘其饥窘迁之内地会讷格亦来言请入居肃州礼遂遣使偕讷格先赴沙州抚谕其衆而亲率兵随其後比至讷格意中变阴持两端其部下多欲奔卫喇特礼进兵迫之收其全部入塞居之甘州凡二百余户一千二百三十余人帝命徙之山专居其头目于东昌平山二卫分其部落为三屯居清平博平二县于是沙州遂为罕东所据初太祖成祖以次置哈密沙州罕东赤斤四卫于嘉峪关外屏蔽西陲及是沙州先废而诸卫亦渐不能自立肃州遂多事】质实【苦峪城在今安西州东南罕东卫在嘉峪关西南明洪武三十年置後废地在今安西州煌煌县东南东昌卫明宣德五年建在东昌府城南平山卫明洪武五年建在东昌府治东今东昌设东昌卫及濮州所清平县隋置元属德州传平县汉置宋徙冤河镇明并属东昌府今皆因之嘉峪关在肃州西嘉峪山西麓明洪武初置有城关外即沙漠地昆济楞旧作困即来迈珠旧作买住讷格旧作喃哥?罗凌戡旧作克俄罗领占今俱改】

国子监祭酒李时勉致仕

【时勉以王振擅柄不能谄事屡疏乞休至是始得命朝臣及国子生出钱都门外者几三千人鼓乐前导观者塞途商贾为罢市或远送登舟俟舟发乃还无不泪下】

夏四月免苏松常镇被灾秋粮

【凡免粮八十八万四千余石】

六月夺英国公张辅田

【大监喜寧侵辅田宅辅不从寧弟胜帅阎奴毆辅家人妻堕孕死辅诉之帝宥寧胜而戍关奴于边已而争喉青县知县奏辅占民田二十顷帝命以田还民而置辅不问辅实未尝占也时王振视勲戚如奴隶诸勲戚亦望尘顿首呼曰翁父惟辅独与抗礼振亦致敬于辅至是辅既衰老又数为喜寧所侮亦少屈以避祸矣】质实【青县宋青州明改青县今县属天津府喜寧本降番後土木之难又降于额森】

秋八月庚申朔日有食之

九月礼部侍郎兼学士马愉卒

【愉端重简点门无私谒论事务寬厚尝奏天下狱久者多瘐死宜简使者分道决遣帝纳马边警方命将而别部使至衆议执之愉言赏善罚恶为治之本波及于善非法乘人之来执之不武帝然之及是卒赠尚书兼学士赠官兼职自愉始】

冬十一月皇长子生

【贵妃周氏生是为宪宗皇帝】质实【贵妃周氏昌平人】

以大理寺少卿于谦为兵部右侍郎

【先是谦巡抚山西河南以父忧归至是起复适革山西河南巡抚官乃有是命】

以宋彰为福建左布政使

【彰为福建参政与都指挥僉事邓安进表至京以万金馈王振又嘱安其疏荐之为吏科所劾帝特允安请遂迁布政使彰抵任後计所费命县官验户歛钱民不堪命由是盗贼四起】

以杨洪为总兵官镇宣府

【洪威望素着卫喇特使至托克托布哈及额森皆致书于洪并遗之马洪开于朝敕令受之而报以礼】

【戊辰】十三年春三月复遣王骥征麓州蛮

【思机发窜匿孟养屡遣使入责谢罪朝廷亦屡敕招谕许以不死然心疑畏终不敢出诏总兵官沐斌讨之未几以粮尽瘴作引还王振以斌师出无功必欲生致思机发犁其巢穴意

乃嫌于是复命驥总督军务都督同知宫聚为平蛮将军侍郎焦宏督饷统兵十五万讨之】
质实【沐斌字文辉晟之子晟卒斌尚幼嗣爵居京师而以晟弟昂代镇昂卒斌始之镇云与宏字克明叶县人】

夏四月两畿山东河南湖广旱蝗陕西江西水

五月禁用铜钱

【洪武中钞一贯折钱千文至是止折钱三文帝从御史蔡愈济言诏交易用钱者以阻钞论追一万贯全家戍边後至天顺中乃弛其禁】

秋七月河决

【一自新乡漫曹濮抵东昌冲张秋溃寿张沙湾瓌运道东入海一自茌泽漫原武经祥符南又由陈留历睢亳入涡口至怀远界入淮淹地二千余里坏城垣庐舍溺死男妇不可胜计命工部侍郎王永和往理其事永和至山东後以沙湾未成冬寒停役且言河决自卫辉宜敕河南守臣修塞帝切责之明年三月永和濬黑洋山西湾引其水出太黄寺以资运河修筑沙湾堤大半而不敢尽塞置分水闸设三空放水自大清河入海且设分水闸二空于沙湾西岸以泄上流是时河势分横溢自沙湾分流而东不专向徐吕于是二洪遂胶浅而临清以南运道亦益艰阻】质实【新乡古鄆国地隋县明属卫辉府今因之张秋镇在东阿县西南六十里运河所经与壽张阳谷二县分界明弘治七年赐名安平镇寿张东汉县金大定中移治竹口镇十九年复还旧治明洪武初废寻复置移治王陵店属兗州府今因之沙湾在壽张县东南三十里永乐初分黄河支流由此至临清入卫河涡口在凤阳府怀远县北一里涡水自颍州府蒙城县流入又东入淮谓之涡口唐李吉甫云濠有涡口之险即此太黄寺堤在开封府境大清河即古清水自泰安府东平州东南戴村坝分泄汶河之水西北流经州城西北至卢家村与七里河会古济汶合流处也又北流经东阿县西东北流经平阴肥城二县西北又东北流入济南长清县界俗亦呼为璽河王永和字用鄆崑山人】

发明【河自宋至和间始决大名 寧问始次澶州河遵而趋遂至梁山泺分为二派一合南清河入于淮一合北清河入于海此黄河入淮之始也明洪武二十四年决原武经闻封南至颍州寿州则全入于淮而黄河故道遂淤永乐九年复疏入故道至是决自茌泽终合并于淮夫隋唐以前河与淮分各自入海宋中叶以後河始合淮明至正统间横溢至二千余里子是河尽入淮遂成古今河徒之一大局矣】

京师蝗

【是日乙酉朔飞蝗蔽天】

罢保举

【宣德朝及正统初保举得人最盛後渐奔竞徇私者有之教论傅璿给事中余忬御史涂諫屡以为言遂罢之】质实【传璿上虞人余忬奉化人涂谦丰城人】

发明【保举之行也似亦月人之一法然行之既久则奔竞开而私谒盛滋弊实繁诏罢之良是也乃说者谓既罢之後进退人材大权一归王振殊不知振之窃弄威擅柄操予夺即保举仍着为令安保振之无意喻色授百司之不希风承旨乎是罢与不罢一也本实先拨寻其枝叶何补耶】

八月福建贼邓茂七作乱遣御史丁瑄讨之

【茂七江西人与弟茂八杀人避仇走关之寧化县依县豪民陈政景假信义集无赖为衆所推先是福建多矿盗部史柳华往按令编民甲茂七茂八皆为甲长益役属郷民其俗佃人输粟田主例馈少物茂七倡其党令佃者毋馈而田主自往受粟田主讼于县县远茂七不赴下巡检追摄茂七拒捕者杀官兵数人上官闻遣军三百剿之被杀几尽巡检知县皆遇害茂七遂刑白马歃血誓衆举兵反大肆刘掠攻沙县尤溪进围延平时政景亦率党攻汀州推官王得仁击之先败被擒送京师斩之独茂七势不可制有尤汉垆主蒋福成者亦乘乱集衆与茂七为声援茂七益猖獗其进围延平也刷卷御史张海登城谕贼贼曰吾等皆良民苦富民鱼肉有司不我直耳乞贯死免三年徭役即解散海以闻帝遣御史丁瑄剿抚而命都督刘聚金都御史张楷以大军继後当是时福建兵卫久弛及茂七倡乱村氓闻风畏死又皆苦布政使宋彰虐政于是相率从茂七为盗衆至数万茂七据陈山寨自称剡平王设官属攻陷二十余县都指挥范真指挥彭玺等先後被杀东南震动帝以聚等兵少复命寧阳侯陈懋为平夷将军保定伯梁瑄平江伯陈豫副之尚书金濂参赞军务率京营浙江兵会讨】质实【寧化县本沙县地唐置黄连县後败寧化明属汀州府沙县尤溪俱唐置明属延平府今皆因之陈山寮在沙县西南二十里陈山之麓王得仁名仁以字行新建人丁瑄史传不详里系张楷字式之慈谿人梁瑄汝阳人铭之子陈豫字立卿合肥人瑄之孙】

冬十月幸大兴隆寺

【寺王振重修役军民万余人麀帑数十万既成壮丽甲京师延崇国寺僧主之帝亲传法称弟子公侯以下趋走如行童马】质实【大兴隆寺在西长安卫本名庆寿寺金章宗时建元初建二塔一九级一七级正统十三年二月修大兴隆寺改赐新额树牌楼曰第一丛林十月完工嘉靖十四年四月大兴隆寺史十五年五月改为讲武堂】

【己巳】十四年春正月太白昼见

二月御史丁瑄击斩邓茂七于延平

【瑄始至先令人賫敕往抚茂七不肯降瑄驰赴沙县图之贼首林宗政等万余人攻後坪欲立砦瑄令通判倪冕等率衆先据要害而身与都指挥雍埜等邀其归路斩贼二百余级□

其渠陈阿岩送京师?诛及是瑄用沙县民罗汝先诱贼复攻延平瑄督兵分道冲击贼大败遁走指挥刘福遣之遂斩茂七余贼在陈山寨者闻茂七死复拥其兄子伯孙聚後洋攻劫州县瑄擒斩其渠林子得郑永祖等会陈懋军至诸将欲尽殲贼衆恐不可下令招之其党多降寻进攻贼寨破之伯孙走余衆溃散懋遣兵剿捕获伯孙送京师诛之先是张楷等监大军讨贼至建寧顿不进日饮酒贼诗为乐及闻瑄破贼则疾驰至延平攘其功瑄被胁依违具奏刘福心不平欣陈懋奏之诏责瑄具状楷等皆获罪瑄有功不问然功亦竟不録当是特浙闽盗所在剽掠为民患皆以诛王振为名诸将帅率玩寇而文吏励民兵拒贼往往多斩获闽则建寧知府张瑛汀州推官王得仁之属浙江则金华知府石瑁擒贼苏才于兰谿处州知府张佑击败剧贼擒斩千余人于是帝降敕数诘让诸将诸将无以自解指挥佥事邓安等因归咎于前御史柳华擅编夫甲时王振方欲杀朝士威衆因坐华奉诏捕盗措置失当致贼益炽遂逮华华时已出为山东副使闻命仰药死并籍其家男戍边妇女没入浣衣局而宋彰辈以贪虐激变反得长系寻遇赦谪驿丞天顺初犹复官天下咸恶振之横擅威福而咎朝廷之失刑云】质实【後洋在延平府沙县陈山之後通汀州府寧化县兰谿唐县今属金华府张瑛字彦华浙江建德人擢参政後以逐贼被执死之石瑁应州人张佑舍山人】

王骥击思机发再破之思机发遁遂班师

【骥自腾冲会师直抵金沙江贼栅西岸官军造浮梁济师拔其栅大破之贼又栅鬼哭山巔骥连破其十余栅坠溺死者万计而思机发竟脱去时官军已踰孟养至孟那海其地在金沙江西去麓川千余里诸蛮皆震讟曰自古汉人无渡金沙江者今王师至此岂天威耶骥虑大军远涉馈饷不继谋引还时思机发虽遁匿而思任发少子思陆复拥衆据孟养骥度贼终不可灭乃与思陆约立石金沙江为界表誓曰石烂江枯尔乃得渡思陆亦惧而听命遂班师四川会川卫训导詹英抗疏劾骥大畧谓骥多役民夫舁彩繒散诸土司以邀厚利擅用腐刑诡言进御实充私役师行无纪十五万人一日起行互相蹂践每军负米六斗跋涉山谷自縊者多抵金沙江旁皇不敢渡既渡不敢攻攻而失都指挥路宣翟亨等又多捕鱼户为俘以地分木邦?甸掩败为功奏下法司王振左右之得不问而命英从骥军自劾英知往且获罪匿不去】质实【金沙江在孟密司南与唐勒江俱环司治西流入缅甸此江达南海与丽江府之金沙江名固而流异鬼哭山本名鬼窟山在孟养司东极其险峻蛮人据为硬寨俗讹为鬼哭山思陆蛮称其长曰发时思机发尚在故思陆不称发思机发脱去後至景泰五年为缅人所执送京师诛之詹英贵州人】

发明【王骥屡讨麓川以师老而还议者咎之会詹英抗疏劾骥所陈罪状多切中处而以王振左右其间遂不问夫事关军务下之法司而可以中寝纪纲之谓何且尤可异者英劾骥罪而即令英从骥军自劾是欲塞人言骥之口而与之英以听其挫折振之险巖肆毒几至莫敢谁何而詹英者若隐然知中旨不出于朝廷亦竟匿而不去卒亦未闻以此罪英上下朦朧各行其私意可胜咎哉】

夏四月矿盗叶宗留为其党陈监胡所杀巡抚浙江大理寺少卿张骥招监胡降之

【邓茂七之乱宗留铤胡往附之散掠浙江江西福建诸境参议耿定金事王晟败歿于丽水都指挥吴纲御之建阳都督陈荣与战玉山皆死监军金都御史张楷机永丰知县邓顥击之顥伏兵截杀贼衆大至顥力战不敌遂被执不屈骂贼死贼势日炽远近皆震及茂七诛宗留监胡拥衆如故至是以酒色相角监胡遂杀宗留自称大王国号太平建元泰定伪署帅将进围处州然是时官军渐集监胡亦颇惧骥遣丽水丞丁寧率老人王世昌等齎榜入其寨招之鍛胡遂偕其党出降惟陶得二不就抚入山为乱如故监胡至京法司以首恶不赦请论如法命宥死系于狱後遇赦释充留守卫军额森入犯铤胡乘问亡】

【被获伏诛】质实【丽水隋析松阳地置括苍县唐改丽水县明为处州府治建阳晋析建安县地置宋改嘉禾元复为建阳明属建寧府玉山唐析常山须红弋阳三县地置以怀玉山而名明属广信府今皆因之永丰唐析上饶县北置寻省宋复置明属广信府今改广丰县仍属广信府张骥字仲德安化人耿定和州人王晟郢城人邓顥乐昌人死事後赠光禄寺少卿谥忠毅丁寧以招降监胡陞处州同知王世昌等授巡检】

五月命太监会同法司録囚

【筑坛大理寺英张黄盖中坐尚书以下左右列坐九卿抑于内官之下遂为永制】

以翰林侍读学士张益入内阁预机务

【益博学强记三杨雅重之及是入直文渊阁】质实【张益字士谦江寧人】

福建巡按御史汪澄坐失机弃市并以前御史柴文显匿贼不奏磔之

【澄初按福建以茂七乱檄浙江江西会讨寻以贼方议降止兵勿进既知贼无降意复趣进兵而贼已不可制浙江巡按御史黄英恐得罪具白澄止兵状兵部因劾澄失机福建三司亦言贼初起接臣柴文显匿不奏酿成大患遂俱下狱澄弃市磔文显籍其家】质实【汪澄仁和人柴文显浙江建德人】

六月旱

荧惑入南斗

【时侍讲徐理颇知天文私语其友刘溥曰福不远矣亟命其妻子南还】质实【徐理字元玉後改名有贞吴人】

南京谨身等殿灾

【是夜雷电大震风雨骤作明日殿基生荆棘高二尺诏修省大赦】

前少保大学士黄淮卒

【淮性明果达于治体宣德二年以病乞休父性卒赐葬祭淮诣阙谢值灯时赐游西苑诏乘肩舆登万岁山命主会试此归钱之太液池帝为歌送之英宗立再入朝至是卒年八十三諡文简】

秋七月卫喇时分道入寇

【自正统初以来卫喇特遣使入贡王振以藻饰太平为名赏赉金帛无算凡所请乞亦无不予已而额森以二千人贡马号三千振怒其诈令礼部计口给饷虚报者皆不与而所请又仅得立之一额森恚怒遂诱挟诸部分道大举入寇初额森欲举兵内犯托克托布哈止之额森弗听曰汗不为吾当自为其部衆有来归者言之帝亦不报及是额森遂借核减贡使为兵端托克托布哈以乌梁海寇辽东阿喇知院寇宣府围赤城别将寇甘肃额森自拥衆从大同入至猫儿庄参将吴浩迎战败死西宁侯宋瑛武道伯朱冕都督同知石亨与额森战于阳和口为监军太监郭敬所挠瑛冕战歿亨单骑奔还敬革中得免诸边守将俱逃匿是时广寧右卫指挥僉事赵忠守镇静堡敌围堡甚急忠乘城力战归语其妻左氏曰若城破吾不苟活汝母子当自为计敌攻益急讹言城陷妻与三女皆缢死攻围凡两昼夜以堡坚解去守臣上忠全城功擢都督同知赠左氏淑人旌其门曰贞烈】质实【猫儿庄在大同府阳高县北一百里有堡明永乐初筑阳和口在今阳高县西北十五里亦名前口其东北二十里有将军口又东二十里名後口按宋瑛朱冕与额森战处则後口也广寧右卫在今锦州府广寧县城内西北隅明洪武二十七年置初治大凌河永乐元年徙治于此今发镇静堡在今广寧县北宋瑛定远人晟之子尚成宁公主死赠郅国公諡忠顺朱冕沂州人荣之子与瑛俱练兵大同死諡忠愍石亨渭南人阿喇旧作阿剌今改】发明【按元自顺帝北去国号尚存元主殂顺昌後阿裕实哩达喇称宣光特古斯特穆尔称天元皆子孙承绪继世称汗凡南北交兵犹以兴复为词自蓝玉深入破其军特古斯特穆尔偕子天保努欲遁往和林为其臣伊逊岱尔所袭杀部落遂溃五传至坤特穆尔篡弑相寻不复知有国号矣建文永乐之交郭勒齐篡立称汗非元种布尼雅实哩继之亦元远族且改号称鞑靼其後西部卫拉特有三曰玛哈穆特曰太平曰巴图博罗而玛哈穆特尤强君臣间自相攻杀元後如托克托布哈穆尔格尔蒙古勒克呼青吉斯等皆随弑随立置如奕棋跋扈者欲自汗不可不得已而奉之而其主亦皆土元远支与顺帝嫡裔有别今于额森大举则特书入寇以见国号既改部落并吞正如匈奴在汉颉利在唐凡与中国交兵例宜书寇谨以春秋大一统之义为断也】

帝亲征命郕王祁钰居守

【边报日数十至王振劝帝亲征兵部南书郎埜侍郎于谏力言六师不宜轻出不听吏部尚书王直率百官力谏曰陛下宜固封疆申号令坚壁清野蓄鋭以待之可图必胜不必亲御六师远临塞下况杖暑未退旱气未回青草不丰水泉犹塞士马之用未充兵凶战危臣等以为不可亦不纳遂下诏令郕王居守车驾即发京师振及英国公张辅诸公侯伯尚书侍郎以下官军私属五十余万人从行仓卒就道军中常夜惊过居庸关羣臣请驻蹕不允至宣府风

雨大至边报益急羣臣交章请留振虢怒成国公朱勇等白事皆膝行听命尚书王佐卽桡桡振意跪革中至暮不得请钦天监正彭德清振私人也告振曰象纬示儆再前恐危乘輿振曰倘有此亦命也学士曹鼐曰臣子不足惜主上系宗社安危岂可轻进振终不从至阳和见伏屍满野衆益危惧】

八月师还溃于土木额森以帝北去

【是月戊申朔帝至大同王振尚欲北行郭敬密止之始班师振初议从紫荆关道由蔚州邀帝幸其家既恐蹂其乡禾复改道宣府鄜陜再上章请疾驱入关严兵为殿不报又诣行殿申请振怒曰腐儒安知兵事再妄言必死桡曰我为社稷生灵何得以死惧我振愈怒叱左右掖出之及发宣府额森兵袭军後?顺侯吴克忠及其弟都督克勤御之力战死後军溃散畧尽成国公朱勇永顺伯薛绶帅师四万往援次鹞儿岭遇?全军俱覆辛酉次土木日未晡去怀来仅二十里衆欲入保城中振輜重未至留待之即驻营土木地无水革敌已合围掘井深二丈余不得水其南十五里有河已为敌所据人马饥渴束手不得动敌分道自土木傍麻路口入都指挥郭懋拒战终夜敌益增明日围御营不得发额森遣使议和帝诏曹鼐革勃许之敌佯退振据令移营回族问行列已乱敌以劲骑四面蹂躪入大呼解甲投刃者不杀衆裸袒蹈藉死屍蔽塞川野诸宦监宿卫士矢被体如蝟帝与亲军突围不得出下马据地坐敌拥之去中官喜宁从振等皆死官军死伤者数十万英国公张辅泰宁侯陈瀛驸马都蔚井源平鄉伯陈怀襄城伯李珍遂安伯陈垺修武伯沈荣都督梁成王贵户部尚书王佐兵部尚书卽桡吏部左侍郎直内阁学士曹鼐刑部右侍郎丁铉工部右侍郎王永和右副都御史邓棨侍读学士张益左通政龚全安太常寺少卿黄养正载庆祖王一居大仆寺少卿刘容尚宝司少卿凌寿给事中包良佐姚铎鲍辉中书舍人俞拱潘澄钱曷监察御史张洪黄裳魏贞夏诚申佑尹竑童存德孙庆林祥凤郎中齐汪冯学明员外郎王健程思温程式遼端主事俞监张塘郑瑄大理左寺副马预行人司正尹昌行人罗汝墉钦天监夏官正剽信序班李恭石玉等五十余人皆死帝既入敌营敌以枝尉袁彬来侍额森拥帝至宣府传谕杨洪罗亨信开门出迎城上人对曰所守者陛下城池日暮不敢奉诏乃复拥帝至大月索金币广寧伯刘安都督僉事郭登侍郎沈固给事中孙祥知府霍瑄等出谒伏地恸哭以金二万余及宋瑛朱冕内臣郭敬家资进帝以赐额森等是时敌营城西登譟遣壮士劫营迎驾不果额森遂拥帝北行】质实【按明实録八月戊申朔驾至大同自戊申至辛酉凡十有四日其明日帝北去盖十有五日壬戌也鹞儿岭在今宣化府宣化县东二十里麻峪口在今宣化府保安州之南当龙门南口有堡明洪武二十五年筑吴克忠赠邠国公諡壮勇克勤赠遵化伯諡僖敏朱勇进封平阴王諡武愍薛绶本蒙古人其祖薛台洪武中降赐姓遂家于昌平追封永顺侯諡武毅张辅追封定典王諡忠烈陈瀛奉州人珪之曾孙死赠宁国公諡愍井源邢台人尚仁宗女嘉兴公主追封钜鹿侯諡荣愍陈怀追封平乡侯諡忠毅李珍和州人赠襄城侯諡悼僖陈垺巴县人追封遂安侯諡荣怀沈荣滁州人赠修武侯諡僖愍梁成赠任邱伯諡壮勇王贵追封阜城伯諡武僖王佐赠少保諡忠简鄜陜赠少保諡忠肃曹鼐赠少傅尚书兼文渊阁大学士諡文襄後加太傅改諡文忠丁铉字用济丰城人赠尚书諡襄愍王永和赠尚书諡襄敏邓荣字孟扩南城人赠右都御史谥襄敏张益赠翰林学士諡文僖龚全安兰溪人赠通政使黄养正名蒙以字行瑞安人赠木寺卿戴庆祖溧阳人赠本寺卿王一居上元人赠本寺卿包良佐字克忠慈谿人姚

铎候官人鲍辉字淑大浙江平阳人张洪安福人黄裳字元吉曲江人魏贞怀远人申佑字天锡贵州婺川人尹竑字太和巴人童存德字居敬兰谿人孙庆安州人林祥凤字鸣皋莆田人齐汪字源澄天台人程思温婺源人程式常熟人逯端仁和人俞监字元吉桐庐人张璠字廷玉慈谿人郑瑄济寧人尹昌吉水人罗如壖字本崇庐陵人刘容梁成王贵凌寿俞拱潘澄钱曷夏诚冯擎明王健马预刘信李恭石玉等里屋悉无考袁彬字文质江西新昌人刘安宿迁人荣之子郭登字元登濠人英之孙沈固丹阳人孙祥大同人霍瑄凤翔人赛堪旧作赛刊达通旧作大同今俱改】

皇太后命郕王监国

【帝入敌营之明日命袁彬作书遣千户梁贵齎以示怀来守臣言被留状且索金帛守臣送至京师以是夜三鼓从西长安门入太后遣使齎金宝文绮载以八骑皇后括宫中物佐之诣额森营请还车驾羣臣闻之聚哭于朝议战守时京师疲卒羸马不满十万人情??侍讲徐琨大言曰验之星象稽之天数天命已去惟南迁可以纾难尚书胡濙不可曰文皇定陵寝于此示子孙不拔之计也侍郎于谦厉声曰言南迁者可斩也京师天下根本一动则大事去矣独不见宋南渡乎请速召勤王兵誓以死守学士陈循是谦言力赞之太监兴安亦厉声曰若去陵寝将谁与守金英因叱琨出之太后以问太监李永昌对曰陵寝官阙在兹仓虞府库百官万姓在兹辞甚切太后怡议遂定中外始有固志越三日太后遣额森使不得报命郕王总百官大小事俱啓王始行】

运通州粮入京

【时议欲焚通州仓以絶寇资会历天巡抚周忱在京言仓米数百万可充京军一岁饷令自往取则立尽何至遂付灰烬于谏以为然王乃令京官及军有能运通州粮至京者官以脚值给之都御史陈谔总其事】

徵两京河南山东江北军入卫

【检取两京河南备操军山东及南京沿海倭倭军江北及北京诸府运粮军亟赴京师】

令羣臣直言时事举人才

【令谕文武羣臣曰国家为政莫急于听言用人人臣为国莫先于辅忠荐士尔等国之股肱耳目凡有治国安民除邪辅正御灾扞患备贼方畧并许直言无隐】

皇太后立皇子见深为皇太子

【皇太子时年二岁仍命郕王为辅代总国政抚安天下】

以于谦为兵部尚书

【谦上言寇得志要留大驾势必轻中国长驱而南诣饬诸边守臣协力防遏京营兵械且尽宜亟分道募民兵令工部缮器甲修战具分兵九门列营郭外附郭居民皆徙入内文臣如轩輗者宜用为巡抚武臣如石亨杨洪柳溥者宜用为将帅至军旅之事臣身当之不效则治臣之罪王深纳也】

籍王振家夷其族

【郕王摄朝御午门左门右都御史陈鎰等恸哭请族诛王振振党马顺叱羣臣退给事中王竑捽顺髮啗其肉骂曰汝倚振作威今尚敢尔耶与衆共击之立毙朝班大乱卫卒声??王惧欲起于谦直前掖王止请王宣谕百官曰顺等罪当死勿论衆乃定谦袍袖为之尽裂寻执王山至令缚赴市磔之振族无少长皆斩籍其家得金银六十余库玉盘百珊瑚高六七尺者二十株他珍玩无算已而郭敬自大同逃归亦籍其家下狱锢之方于谦之止王谕衆也既定退出左掖门吏部尚书王直最笃老执谦手曰国家正赖公耳今日虽百王直何能为于是朝廷益倚重谦谦亦毅然以社稷安危为己任】质实【下门左掖门春明梦余録紫禁城门凡八曰承天门曰端门曰午门东曰左掖门西曰右掖门再东曰东华门再西曰西华门匈奴北曰元武门王竑字公度其先江夏人祖戍河州遂着籍】

封杨洪为昌平伯仍镇宣府

【额森以帝命诱洪开门者三洪皆不聽又令帝为书遣洪洪封上之王遣使报洪曰此书伪也自今有书悉拒毋受于是洪一意坚守】

以罗通为兵部员外郎提督守备居庸关

【初通自交趾还改户部员外郎出理宣府军饷继迁兵部郎中从尚书王骥整饬甘肃边务以事谪广西容山闸官已调广东东莞河泊所官及是于谦荐之遂复以员外郎守备居庸通上言开敌送驾回京恐因之入寇大小关口宜各增兵口凡三十有六可通人马者七宜各增人千可通人不可通马者二十九宜各增人百仍命大将一人统兵三万分驻十营于关外从之通寻进郎中又擢副都御史】质实【容山在梧州府容县西北二十五里东莞番禺地晋置宝安县唐改东莞明属广州府今因之】

月昼明

【是月辛未月昼见与日并明壬申癸酉夜天鸣有声如泻水】

召前大理寺少卿薛瑄

【用给事中程信荐乃召为大理寺丞】质实【程信字彦实休寧人】

以翰林院修撰商辂彭时入内阁预机务

【以陈循高穀荐也彭时以继母丧乞终制不许】质实【商辂字宏载淳安人举乡试第一正统十年进士会试殿试皆第一终明之世三试第一者辂一人而已彭时字统道安福人】

九月广宁伯刘安以罪下狱

【安以额森欲与帝结婣启王王切责之寻自大同驰至京师言帝已进已为侯廷臣劾安擅离守地自加仆爵宜正与刑王令禁锢之时云南盐课提举司吏目胡仲论坐事入都奏言今日之事不可屈者有七万乘之主媚于寇敌此不可屈者一也敌假议和使我无备二也和亲之後骄尊自大三也索我金帛使我坐困四也以送驾为名乘机入犯五也逼上手诏诱取边城六也欲求山後之地七也七者稍从其一则大事去矣今宜亟命大同宣府守将固守城池整肃军伍使敌不敢轻进果其送驾还京密勅揭洪邀其归路石亨据其险既俊驾至关坚闻勿出则战无不胜而圣驾得还矣若不战而和非计之得也事下礼部议行之】

皇太后命郕王即位

【廷臣合辞请太后曰车驾北狩皇太子幼冲古云国有长君社稷之福请定大计以安宗社太后允之羣臣以太后旨告王王惊让再三逊归邸羣臣复固请于谦曰臣等诚忧国家非为私计会都指挥岳谦使卫喇特还口传帝旨以王长臣贤令继统以奉祭祀王始受命癸未即位以明年为景泰元年】

遥尊帝为太上皇帝

【尊帝为太上皇帝颁诏大赦书谕诸王】

巡抚山西副都御史朱监请罢内官监军不从

【敬上言窃见王振乱天下江南寇发俱以诛振为名夫事归朝廷则治归宦官则乱况今额森诡诈百端往来觐伺宜专将帅事权悉罢监军中贵重悬赏格鼓励义旅庶大驾可还敌兵自退帝虽嘉纳不能从也已而山东布政使裴纶言山东既有巡抚又设内官镇守有司供应以一科十实为扰民请下廷议凡内地已有巡抚者镇守内官悉召还京疏入责纶陈状纶服罪乃已时临洮府同知田暘听选知县单宇陕西举人段坚工部办事吏徐镇俱上言诣召还监军镇守中官诏以为祖宗旧制不可更皆不纳其後南京军匠余丁华敏上书言宦官十害畧曰内官家积金银珠玉动以万计从何而至非内盗府藏即下腴民膏害一也怙势矜宠占公侯邸舍兴作工役劳扰军民害二也家人外亲皆市井无赖纵横豪悍任意为奸纳粟补

官贵贱淆杂害三也建造佛寺耗费不貲营一己之私破万家之产害四也广置田庄不入粮税寄户府县不受征徭阡陌联亘而民无立锥害五也家人中盐虚占引数转售他人倍支钜万坏国家之法夺商人之利害六也奏求塌房邀接商旅恃强賒买经岁不还行贾坐敌莫敢谁何害七也卖放军匠俾办月钱致内府乏人工役烦重捶楚不堪害八也买置物料以一科十亏官损民害九也监工所至非法酷刑军匠涂炭害十也事下礼部寝不行】质实【裴纶监利人】

发明【议罢置监军于土木既溃之後已为亡羊补牢景帝日擊閹寺之败裂至此义当王振籍家夷族之後乘机因势改弦而更张之易如反掌乃始则嘉纳而不能从继则以祖制而不敢易至十害之陈言皆痛切亦止下部议而卒不行岂真积重难返欤前车不鉴是後车又当覆也可慨也夫】

减浙江福建银场课

【帝以浙闽银场岁课重为民困乃诏减其额寻命封闭之】

以郭登为总兵官镇大同

【先是登以都督僉事充参将佐刘安镇守大同时大同军士多战死壁垒萧条城门画闭人心??登慷慨奋励修城堞缮器械拊循士卒吊死问伤亲为裹创傅药曰吾誓与此城存亡不令诸君独死也帝监固进都督同知充副总兵及是代刘安为总兵官登初莅镇士卒堪战者才数百马百余匹不数年马至万五千精卒数万大同兵遂为天下最】

以杨信民为僉都御史讨广东贼黄萧养

【萧养以行刼被获系都司狱狱甲重囚皆山海巨盗萧养密与结乘间杀出威喜诺行贿狱吏饮酒携物出入自如禁益疏纵一日潜使人纳斧饭中以入伏其党于外至夜与囚百七十人皆破械出刼军器局收兵仗啸聚海滨旬日间衆至万余人进围广州总兵官张安败死指挥僉事王清被杀围三月不解将士战辄败禁民出入樵采以絶卿民避贼来者拒不纳多为贼所害民益愁苦于是从贼者益衆时信民方以于谦荐守备白羊口广东人官京师者上章乞信民乃以信民为僉都御史巡抚其地信民先为广东参议有惠政士民闻其来皆喜信民至开城门发仓廩刻木楔给民得出入贼见木楔曰此杨公所给也不敢伤避贼者悉收保民若更生信民益厉甲兵多方招抚降者日至乃使使持檄入贼营谕以恩信萧养曰得杨公一言死无憾尅日请见信民单车诣之濠与语贼党望见謹曰果杨公也争罗拜泣下萧养且降而朝廷以都督同知董兴为左副总兵侍郎孟监赞理军务徵江西两广兵会剿明年二月兴至广州贼忽中变逾月信民暴卒军士聚哭城中皆绮素贼闻之亦泣曰杨公死吾属无归路矣益复大掠聚舟千余艘势甚炽诸将以徵兵未集请济师有天文生马轼者从兴在军中谓兴曰广民延颈久矣所徵狼兵骁悍往击犹拉朽耳兴从之进兵奋击杀溺死者甚衆余多就抚萧养中流矢死函首以献贼党皆伏诛】质实【杨信民名诚以字行浙江新昌人董兴

长垣人孟监字克明博野人贵萧养南海人】

冬十月额森奉上皇至大同遂入紫荆关

【先是都指挥僉事季铎奉皇太后命诣上皇所告帝即位及立皇太子铎还帝复命铎奉书上皇并致书额森言即位之故额森以帝立会衆议欲大举入寇帝必南迁大都可有也叛阉喜寧初从上皇北狩遂附额森为问谋尽以中国虚实告之教额森奉上皇至边胁诸将开关召总兵镇守官出见则留之可以得志额森以为然乃诡言奉上皇还京至大同总兵官郭登不纳遂由阳和进陷白羊口守将遁守备通政司谢泽督兵扼山口大风扬沙不辨人马或请移他关避贼泽不可贼至兵溃泽厉声叱贼遂被杀贼抵紫荆关喜寧与额森弟達通王夹攻关城守备都御史孙祥都指挥韩青战死敌遂入关长驱而东】质实【谢泽上虞人】

诏诸王遣兵入卫

【时监生练纲条八事一曰谨天变二曰急先务三曰军法四曰布思泽五日广言路六曰屏奸邪七曰公荐举八曰察羣吏大要谓中兴之业转败为成因请京军坚守亲王大举入援纳之】质实【练纲字从道长洲人寻授御史】

以于谦提督各营军马

【诏诸将皆受谦节制都指挥而下不用命者先斩以徇然後奏闻】

京师戒严

【廷议御敌之策石亨请毋出师第坚壁以老之于谦曰敌张甚矣如此则示弱令敌益轻我乃即分遣诸将帅师二十二万列阵九门外谦自与亨帅副总兵范广等陈德胜门当额森悉闭诸城门絶士卒返顾下令临阵将不顾军先退者斩其将军不顾将先退者後队斩前队于是将士知必死皆肯用命】质实【分遣诸将列阵九门明实録总兵官武清伯石亨陈于德胜门都督陶瑾陈于安定门广寧伯刘安陈于东直门武进伯子朱瑛陈于朝阳门都督刘聚陈于西直门副总兵顾兴祖陈于阜成门都督指挥李端陈于正阳门都督刘得新陈于崇文门都指挥杨节陈于宣武门皆受石亨节制京城九门南曰正阳南之左曰崇文南之右曰宣武北之东曰安定北之西曰德胜东之北曰东直东之南曰朝阳西之北曰西直西之南曰阜成范广辽东人】

诏宣府辽东总兵官山东山西河南陕西巡抚皆入援【大臣有奏留边将守京师者兵科给事中叶盛言今日之事边关为急独石马营不弃师何以陷土木紫荆白羊不破寇何以薄都城即此而观边关不固则京城虽守不遇保九门而已宜急固守宣府居庸为便时总兵官等皆率兵入卫边境人心惶惧帝从盛言入援者旋遣其留者以别将代之】质实【马营堡在赤城县西北六十里元为灵州之大同猫儿峪明宣德七年筑堡叶盛字兴中崑山人】

额森犯京师于谦督诸将击却之

【额森自紫荆开奉上册遇易州至良乡父老进茶果羊酒进次卢沟桥园官进果上册作书三一奉皇太后一致帝一谕文武羣臣额森列阵至西直门上皇止德胜门外是日都督高礼毛福寿败敌彰义门北杀数百人夺还所掠千余口明日额森拥上册登土城喜宁噉额森邀大臣迎驾帝以通政司参议王复为右通政中书舍人赵荣为太常少卿出城朝见喜宁又噉额森以二人官小邀于谦石亨胡濙王直出见索金帛万万计复荣不得见上册而还廷臣欲议和遣人至军中问谦谦曰今日止知有军旅他非所敢闻已而额森遣骑窥德胜门谦亨设伏空舍令数骑诱敌敌遂以万骑来薄伏兵出范广发火器击之额森弟博罗平章茂诺海中礮死敌转至西直门都督孙镗斩其前锋数人逐之敌益兵围镗镗力战不解会石亨分兵至敌引退欲还土城居民皆升屋呼号争投砖石击敌器声动地王?毛福寿亦来援敌遥见旗帜不敢复前额森初轻中国既至相持五日邀请既不应战又辄不利其别部攻居庸者五万会天大寒罗通汲水灌城冰坚不得近七日敌遁走通追击之三战三捷斩获无算额森气大沮丧又闻勤王师且至乃夜拔营由良乡而西大掠所过州县仍拥上册北去帝以谦亨功大进封亨武清侯加谦少保谦固辞不允敌之退也焚毁长献景三陵寝殿而余寇之未出关者分屯畿内四出剽掠诸降人亦乘开并起帝以昌平伯杨洪充总兵官帅孙镗范广讨捕之遣官复修三陵寝】质实【卢沟桥在宛平县西南三十里卢沟河上金大定二十九年以卢沟河流湍急命建石桥明昌三年成名曰广利明正统九年修本朝康熙元年重修土城在德胜门西北亦名土城关即古蓟门遗址亦谓之蓟邱毛福寿祥符人王复字初阳固安人赵荣字孟仁其先西域人後家闽县孙镗字振远东胜州人博罗旧作孛罗茂诺海旧作卯那孩今改】

诏止勤王兵

【寇既退出紫荆关因诏止各藩府各镇勤王兵】

卫喇特托克托布哈遣使入贡

【时卫喇特君臣鼎立额森专国兵最多托克托布哈虽为汗兵较少阿喇知院兵又少三人外亲内疎其合衆南犯利多归额森而害则均受至是托克托布哈遣使入贡帝从胡濙王贡等议厚赏赐以间之】

十一月修沿边关隘

【时顾兴祖刘安刘聚等坐罪落职兵部以缺官巡关乃复起用以兴祖为左军都督同知安为右军都督同知聚为中军都督僉事修塞沿边关隘】

上册至卫喇特

【额森以上皇至老营惟袁彬哈铭从初上皇入敌营之夕额森有异志会雷震死其所乘马而上皇寝幄复有异彩乃止及是上皇所居毳帐每夜有赤光奕奕统其上若龙蟠额森见之大惊异寻欲以妹进上皇上皇却之愈敬服自是五七日必进宴置酒为寿稽首行君臣礼上皇在迤北所居止毳帐敌帟旁列一车一马以备转徙而已袁彬周旋患难未当违忤夜则与上皇同寝天寒甚恒以胁温足】质实【哈铭蒙古人幼从其父为过事至是亦侍上上宣谕额森尝使铭额森辈有陈请亦铭为转达】

以左都督朱谦镇宣府金都御史王竑镇居庸关【先是杨洪奉诏入援宣府人心危惧欲弃城走都御史罗亨信仗剑军门谕止之衆始定至是学士陈循以洪善战请帅所部留京罗通晓畅兵事请亦召还参洪军务帝从之于谦言宣府京师之藩篱居庸京师之门户今洪既留京通复召还宜更选重臣镇守宣府乃以朱谦镇守纪广杨俊副之王竑及夏忠鲁瑄守居庸关】质实【朱谦夏邑人杨俊洪之子】

十二月尊皇太后为上圣皇太后

【宣宗后孙氏英宗立尊为皇太后至是太后命郕王即位尊为上圣皇太后】

以王骥充总兵官讨贵州叛苗

【初骥自麓川还会湖广贵州诸苗所在蜂起围平越清平诸卫贵州东路闭骥至民遮道诉骥曰吾定命征麓川不受命讨苗也去之军无纪律苗前後截击死亡数万比至武昌诏还军讨苗会土木难作羣臣劾王振兼及骥朝议以骥方在军且倚之平苗置弗问至是苗益炽命骥佩平蛮将军印充总兵官讨之】质实【平越元为平月长官司明洪武十四年改平越卫万历二十七年分播州地置府于卫城内清平明初置清平卫後分卫地置清平县属都匀府今并因之】

尊生母贤妃吴氏为皇太后立妃汪氏为皇后

【吴太后帝生母也宣德三年封贤妃至是尊为皇太后汪后正统十年册为郕王妃至是册为皇后】质宝【皇太后吴氏丹徒人皇后汪氏顺天人】

上皇后钱氏徙居仁寿宫

【帝北狩后倾中宫赍佐迎驾夜哀泣吁天倦即卧地损一股以哭泣复损一目至是徙居别宫】质实【仁寿宫在奉先殿東北履顺蹈和二门之内】

彗星见

【丙辰彗星见至乙亥凡二十日始灭】

额森犯宁夏

【喜宁勒额森西犯宁夏掠苑马直趋江表居上皇南京袁彬谓上皇曰天寒道远陛下又不能骑徒取冻饥且至彼而诸将不纳奈何额森闻之怒欲杀彬上皇力解乃止额森遂自寇宁夏掠人畜期月始退仍留数千人于河套时入宁夏为寇】质实【河套明史地理志大河自宁夏卫东北流过榆林卫北至废胜州东北乃折而南所谓河套也一统志今为鄂尔多斯地】

御定资治通监纲目三编卷十

卷十一

钦定四库全书

御定资治通鉴纲目三编卷十一

【起庚午明景帝景泰元年尽丙子明景帝景泰七年】凡七年

【庚午】景皇帝景泰元年春正月朔罢朝贺

【以上皇在卫喇特也】

筑城天壽山南

【名曰永安以居陵卫官军三年移昌平县治于内】质实【永安城即今顺天府昌平州治州在府北少西七十里旧治白浮图城在今州西八里】

始令输纳者给冠带

【户部议令军民输纳者给冠带官吏罪废者输草于边得复职帝用给事中翟敬议止给冠带时输纳之例或米或粟或豆或草或鞍马或牛驴或银始于宣府大同其後两畿及诸布政司辽东皆行之而米之输尤多已而监生郭佑言非以国用耗乏谋国大臣欲行一时之急令民纳粟者赐寇带今军旅稍宁而行之如初是以空乏启戎心也章下廷议格不行】质实【翟敬大兴人】

诏会试取士无拘额

【初洪熙时既定礼闈取士之额分南北取士及宣德时复分为南北中卷以百人为率南取五十五人北取三十五人中取十人正统中增额至百五十人而分地如故至是从大理寺丞李奎之请乃有是诏明年礼部奉行而给事中李侃争之言部臣欲专以文词多取南人刑部侍郎罗绮亦助侃言事下礼部覆奏臣等奉诏书非私请也取士若不以文词考官将何所据北方中土人才所生古大圣贤皆非南人即以今言如靖远伯王骥都御史王朔王文皆永乐中不分南北所取进士岂可预谓北无其人奏入帝命遵诏书行不从侃议未几给事中徐廷璋复诣依正统间例礼部奏请裁定於是复从廷璋言分南北中卷】质实【南北中卷明史选举志南卷应天及苏松诸府浙江江西福建湖广广东北卷顺天山东山西河南陕西中卷四川广西云南贵州及凤阳庐州二府滁徐和三州也李奎汲县人李侃东安人徐廷璋罗山人】

闰正月郭登败卫喇特于栲栳山

【寇入大同至沙窝登召诸将问计或言贼衆我寡莫若全军而还登曰我军去城百里一思退避人马疲倦贼以铁骑来逼即欲自全得乎按剑起曰敢言退者斩径薄贼营奋勇击之诸将继进呼声震山谷遂大破其衆追奔四十余里又败之栲栳山斩贼首甚衆夺所掠男女一百十六人马九十八匹牛骡驴六百二十一头器械四百有奇自土木败後边将无敢与寇战是役登以八百骑破寇数千军气益振捷闻封定襄伯後寇数至登屡击却之】质实【栲栳山在朔平府平鲁县西北沙窝在朔平府东北即沙楞河口】

二月帝耕藉田

悬赏格招陷敌军民

【副都御史罗通奏请圣旨榜文于沿边谕衆凡被陷人口有能自还者军免差役三年民免徭役终身官支全俸各赏银一两布二疋有能杀贼一级者军民人等俱与冠带赏银五两官陞一级一体给赏若能杀额森赏银五万两金一万两封国公太师杀巴延特穆尔喜宁者赏银二万两金一千两封侯诏即行之】

遣武清侯石亨都指挥同知杨能巡边

【帝用于谦议遣石亨率京军三万巡大同杨能统京军一万五千巡宣府时有敌三人至大同欲朝廷通好参将许贵以闻事下兵部于谦言前边指挥季铎岳谦往敌两敌随入寇通政王复少卿赵荣不见上皇而还和不足恃明矣且我与敌不共戴天理固不可和万一和而彼肆无献之求从之则坐团不从则速变势亦不得和贵居边疆重地恒怯如此何以敌忾移檄切责之自是边将无敢言和者】质实【杨能字文敬洪从子许贵字用和江都人】

叛阉喜宁伏诛

【先是宁数导诱额森扰边上皇患之言于额森使宁及总旗高 等还京索礼物而命袁彬以密书付 俾报宣府设计擒宁宁抵独石宣府守将设伏野狐岭令 给宁至其地伏尽起 直前抱持之遂擒宁送京师羣臣杂治磔于市上皇闻宁诛喜曰自此边境稍宁吾南归有日矣时设伏擒宁者乃都指挥江福而参将杨俊饰奏于朝谓已定谋遣福等擒之帝嘉俊功加右都督赐金币言官及兵部请如所悬赏格封俊侯爵赉福等以黄金千两白金二万两帝不允复赐俊等金币有差擢福都督僉事既而俊冒功事露兵部请下俊狱夺所加官 帝别赏福等而宥俊使立功赎罪】质实【按明史于谦传称谦令镇将擒宁考之明实录谦实未尝与谋惟载杨俊奏有总兵官朱谦委臣相机行事语传者或以同名致讹耳野狐岭在今宣化府万全县东北三十里】

发明【额森屡挟上皇入寇皆出喜宁之策是宁一日不诛上皇一日不归也自江福擒宁额森失其向导寻即有宣府之挫遂决意遣使议和上皇南归虽曰天幸岂非人事乎宁日侍左右而英宗能察其卖已潜以计诛之不可谓非一隙之明也生于忧患者固若是乎乃复辟

而首崇王振之祀抑独何也】

三月卫喇特复分道入寇

【阳和大同偏头关野狐岭万全卫皆被寇时边将御敌互有杀伤惟宁夏庆阳朔州被敌杀掠甚衆】质实【阳和卫金白登县元属大同路明洪武初废二十六年置卫宣德元年徙高山卫来同治本朝顺治七年改阳高卫雍正三年改卫为县属大同府偏头关五季北汉砦元改为关明置偏阙所今为县属宁武府按关为古武州地西逼黄河与套仅隔一水其地东仰西伏故名偏头】

録土木死事诸臣後

【以死事诸臣忠子难各官其子有差】质实【按明英宗实録附载景泰元年三月辛亥以户部尚书王佐子道阳兵部尚书邝埜子仪俱为主事吏部侍郎曹鼐子恩刑部侍郎丁铉子琥副都御史邓棨子瑞俱为评事左通政司龚全安子廷晖太常少卿刘容子监俱为部照磨钦天监正廖羲仲子景明为司历大医院使钦谦子智为本院吏目翰林侍读学士张益子翊尚宝少卿凌壽子晖俱为序班佐等俱从征阵亡故録其子而正统十四年八月壬戌备载土木死事诸臣无廖羲仲钦谦二人盖明实録之疎漏也】

夏四月旱

【自去冬至春灾异迭见黑气四塞烈风拔木至是雨久缺大旱】

五月总督侍郎侯璉及副总兵田礼破贵州苗

【时羣苗西至龙里东至沅州北至武冈南至播州不下二十万平越被围已九月城中食尽掘草根煮弩革食之而王骥顿兵辰沅不进巡按御史黄镐置疏竹筒中募土人乞援于朝乃更命保定伯梁瑄都督方瑛会湖广总督侯璉帅师往讨时副总兵田礼已解平越围璉遣兵攻败水西诸贼贵州道始通又调云南兵由乌撒会师开毕节诸路檄普安土兵援安南卫而自率兵改破紫塘等数十寨会贼复围平越回师击退之遂分哨七盘坡羊肠河等处东至重安江与王骥兵会镇远道亦通已而璉复檄方瑛攻赏改诸寨擒伪王王阿同及清平贼阿赵等而骥亦俘获剗平王苗富虫皆送京师伏诛是秋梁瑄亦破湖广苗会璉卒以王来代之明年春来与方瑛分兵连破三百余寨苗衆缚其酋韦同烈并贼将五十八人以降】质实【播州汉牂牁地唐置郎州改播州宋置播州安抚司明初为宣历司後改遵义府隶四川今隶贵州安南卫元为普安路地蛮名尾洒明洪武十七年置尾洒驿後改置安南卫隶贵州都司今为县属南笼府紫塘蛮寨名在平越府境七盘坡在平越府城东南五里盘回七里坡下有溪羊肠河在平越府城东二十里西南流合马肠江入麻哈江重安江在平越府黄平州南三十里源出苗境经湖南靖州界为黔楚要津镇远元初置镇远沿边溪洞招讨使後改府明初改州永乐中仍置镇远府今因之赏改苗寨名侯璉字廷玉泽州人黄镐字叔高侯官人】

朱谦败卫拉特兵于宣府

【卫拉特二千骑屯贾家营谦与参将纪广等力战却之封谦抚宁伯是时寇气甚骄屡扰宣府大同意二城且旦夕下而谦守宣府郭登守大同数以羸师挫其劲骑额森由是气益沮】

卫拉特遣使请和

【喜宁既诛额森失间谍所部兵亦多死伤而托克托布哈王阿拉知院又皆欲和于是额森决意息兵又耻自屈乃先令阿拉知院遣参政旺扎勒托欢等至怀来议和边将以闻帝用陈循言赉使令还而以勅谕阿拉未行额森忽拥上皇至大同遣使赉文书以讲和为言而自率衆至城下郭登仍欲谋夺上皇敌觉遂拥上皇去登以使及书奏帝厚赉使令与旺扎勒托欢皆还王直率羣臣上言曰太上皇惑细人言轻身一出至於蒙尘陛下宵衣旰食徵天下兵与羣臣兆姓同心戮力期此朝食以雪不共戴天之耻乃者天诱其衷额森有悔心之萌而来求成于我请还乘輿此转祸为福之机也望陛下俯从其请遣使往报因察其诚伪而抚纳之奉太上皇以归少慰祖宗之心帝曰卿等言良然但前後使者五辈往终不得要领今复遣使设彼假送驾为名来犯京师岂不为苍生患贼诈难信其更议之已而阿拉使复至胡濙等复以为言於是帝御文华门召廷臣谕以宜絶状直又对曰必遣使无貽後悔帝不悦曰朕非贪此位而卿等强树焉今复作纷纭何衆不知所对于谦从容曰天位已定宁复有他顾理当奉迎万一彼果怀诈我有辞矣帝意释羣臣既退太监兴安出呼曰公等欲报使孰为富弼文天祥者词色交厉直面折之曰廷臣惟天子使既食禄敢辞难乎安始语塞乃以给事中李实为礼部侍郎大理寺丞罗绮为少卿及指挥马显等令齎玺书与阿拉使偕往谕卫拉特君臣】质实【敕谕阿拉文畧曰我朝与尔卫拉特和好额森违天犯顺朕兄太上皇帝兴师问罪额森又辄遮留毒我生灵残我边徼朕嗣承大统宗室臣民咸请兴兵讨罪复讐朕念额森屡请送大驾回京以故遣人赐书授赏乃额森诡诈反覆今阿拉又使至朕欲从尔但闻额森尚聚衆塞上意在胁挟义不可从即阿拉必欲和好待卫拉特诸部落北归议和未晚不然朕不惜战也李实字孟诚合州人旺扎勒托欢旧作完者脱欢今改】

发明【景帝当国家烦危之後能任贤用将一意战守使敌不敢猖獗可谓转危为安有功社稷矣然其不欲奉迎上皇虽羣臣屡请而遣使答书止言息兵讲和不肯一语及迎复意委君亲于草莽实出贪恋天位之私说者谓宋之徽钦迎请愈勤愈不可得卒委骸骨为万世羞当日不急于迎复正使敌不能以奇货可居挟留为质然上皇之归实出天幸设以拒敌者弃君而君或竟不得归其将何以对天下後世耶】

秋七月遣右都御史杨善等使卫拉特

【李实等既行托克托布哈及额森所遣使丕勒玛尼哈玛尔等复至赐之宴丕勒玛尼哈玛尔言于馆伴曰昨知院使来朝廷遣人偕往今吾等乃汗及太师所命若不报使事必不济胡濙等奏其语廷议请简四人往帝命侯实还议之及是使者将返王直等固请报使乃命善

及工部侍郎赵荣为正使以都指挥同知王息锦衣卫千户汤允积副之賫金银书币以往濬等言上皇在卫拉特久御用服食宜付善等随行不报未几实还述额森语云迎使夕来大驾朝发廷议请更遣大臣帝曰杨善既去不必更遣但以奉迎意敕谕额森足矣】质实【杨善字思敬大兴人汤允积字公让东瓯王和之曾孙 丕勒玛尼哈玛尔旧作皮儿马黑】

八月上皇发卫拉特

【杨善奉使时賫赐额森金币外余无他赐善乃捐已赀揣彼中所需者多市以往既至馆伴田氏亦中国人留饮帐中善与语相得因以所齎遗之馆伴喜明日善谒额森亦大有所遗额森亦喜善因诘之曰太上皇帝朝太师遣贡使必三千人岁必再賫金币载途背盟见攻何也额森曰奈何削我马价予帛多剪裂前後使人往多不归又减岁赐善曰马价非削也太师马岁增而不忍拒故微省之太师自度价比前孰多帛剪裂者通事为之即太师贡马有劣弱貂或敝岂太师意耶贡使多至三四千人有为盗或犯他法故自亡去中国留之何用赏赐惟据现在数浮于人则不与非减也额森屡称善善见额森辞色和因曰太师再攻我屠戮数十万太师部曲宁无损今还上皇和好如故中国金帛日至不亦美乎额森曰上皇归何以处之善曰天位已定难以再移知院巴延特穆尔劝额森留善而遣使要复上皇位额森惧失信不可乃引善见上皇设燕奉饯额森自弹琵琶妻妾奉酒令善生善辞上皇曰太师命坐则坐善叩头少坐即起周旋其间额森顾左右曰有礼巴延等亦各设宴毕额森筑土台坐上皇台上率妻妾部长罗拜台下上皇行额森送数十里遣知院帅兵卫送而自下马伏地恸哭良久去】

诏议迎上皇礼

【初廷臣闻上皇将还欲奏请奉迎都御史王文厉声曰公等谓上皇来耶额森不索土地金帛而遽送还耶衆素畏文皆愕然不决而罢及是果得还乃诏礼部议迎上皇礼尚书胡濙具议以上传旨以一舆二马迎于居庸关至安定门易法驾给事中刘福言礼太薄帝曰昨得上皇书具言迎驾礼宜从减省朕岂得违之羣臣乃不敢言会千户龚遂荣为书投高谷而匿其名言奉迎宜厚主上当避位恳辞而後受命如唐肃宗迎上皇故事谷袖之入朝与王直朝濙等共观之直曰此礼失而求诸野也濙欲以闻王文不可而给事中叶盛已奏之有诏索书濙等因以书追且言肃宗迎上皇礼正可仿行帝不悦曰第从朕命无事纷更乃遣太常少卿许彬至宣府翰林侍读商辂至居庸迎上皇时帝索遂荣书所从得甚急遂荣自缚诣阙言之下诏狱坐遣久之得释】质实【刘福建安人龚遂荣淮安人业盛字与中崑山人许彬字道中宁阳人】

上皇至京师入居南宫赦

【上皇至自东安门入帝迎拜上皇答拜相持泣各述授受意推逊良久帝遂送上皇至南宫百官随入行朝见礼赦天下诏词有曰礼惟有隆而无替义则以卑而奉尊虽未酬复怨之私姑稍遂厚伦之愿先是李实使上皇言于上皇曰南归後当引咎自责上皇滋不悦及至宣

府仅命许彬草勅谕羣臣而已复辟後实竟斥为民】质实【南宫在禁垣之巽隅亦有首门二门以及两掖门即所称小南城者是也二门内亦有前後两殿旁有两庑其他离宫以及圆殿皆天顺间所增饰者非初制也】

以刑部侍郎江渊兼翰林学士入内阁预几务

【时苗衷罢以渊代之初渊与徐理同官侍讲理倡议南迁为太监金英叱出踉跄至左掖门渊适至迎问之理曰以吾议南迁不合也于是渊入具陈固守之策遂见知超擢刑部侍郎及是参与机务】质实【江渊字世用江津人】

御经筵

【御史许士逵言经筵旧典每月不过初六十六二十六三日如遇寒暑又援例停止一暴十寒圣学何以有成正统间上下蒙蔽无敢言者酿成大患陛下知之矣愿陛下于经筵之外日召儒臣讲论经史验之于古会之于心以应无方之变帝优诏褒答】质实【许士逵歙县人】

九月南京吏部尚书魏骥南京国子监祭酒陈敬宗致仕

【初骥为吏部侍郎端慎劲直王振方凌虐公卿独严重骥称先生寻调南京进尚书至是以请老至京大学士陈循骥门生也请问曰公虽位冢宰未尝立朝愿少待事在循辈而已骥正色曰若为辅臣当为天下进贤才不得私一座主退语人曰渠以朝廷事如一已事只为私谋安得善终竟致仕去敬宗在官方严率下立教条革陋习六馆士千余人每升堂听讲设饌会食整肃如朝廷先是以秩满入都王振欲致之不可得会应天巡抚周忱亦在京振知其与敬宗善今通意敬宗曰吾为诸生师表而私谒中官何以对诸生忱退谓振曰陈公倔强未可以势力致顾善书法公试以礼币求书彼来谢或可致耳振遂贻文锦羊酒求书程子四箴敬宗书讫署名而已返其币终不往见以故在南太学十七年不调及是与骥同引年致仕家居不轻出有被其容接者莫不兴起骥在籍二十余年衣布粝食不殖生产事兄教谕骥虽耄益恭教子孙孝弟力田讲明理学以最後进所行动应理法萧山故多水患有宋时县令杨时湖堤遗蹟骥增修螺山石岩诸塘堰扞江湖兴湖利乡人赖之】质实【萧山唐置明属绍兴府今因之螺山在萧山县东南二十里石岩在萧山县西南十二里】

冬十一月礼部尚书胡濙请令百官贺上皇生日不许【上皇生日礼部请令羣臣诣延安门行朝贺礼帝命免行】

十二月濙又请明年正旦百官朝上皇于延安门亦不许

【自是岁为始诏皆免行给事中林聪欲上疏言之叶盛谓曰今上孝弟上皇盛德两宫帖然安静若益以言则涉衆易疑恐无中生有反为非便聪乃止御史盛?目盛曰已不为而又阻

人为之耶盛曰此大事当熟虑惟安与静久长之道也】质实【林聪字季聪宁德人盛?吴江人】

发明【监国而即改元奉迎而不让位景帝之攘为已有久假不归之意形迹已自显然即使仪文礼节曲意尊崇且恐无以共白于天下乃生日既不称贺元辰复不许朝徒以逼已生嫌竟至百寮礼絶何忍而为此耶叶盛辈恐疏争开衅固为弥缝苟且之图然亦有以深窥其隐矣】

【辛未】二年春正月令军民输纳者世袭武职

【都给事中金逵疏谏不听其後给事中曹凯言近输豆四千石以上得授指挥彼受禄十余年费已偿矣复令世袭是以生民膏血养无功子孙而彼所息长无穷也乞自今惟令带俸不得任事帝然之今已授者如故未就者悉如凯言】质实【曹凯字宗元益都人】

度天下僧道

【先是僧道三年一度帝特诏停之至是太监兴安以皇后旨度僧道五万余人于谦上言今四方多流徙之民三边缺战守之士度僧道太多恐乖本末帝不省】

二月帝诣国子监行释奠礼

【礼既成帝升御座祭酒萧鎡讲尚书天聪明章辞旨敷畅帝甚嘉之】质实【萧鎡字孟勤泰和人】

吏部郎中李贤上中兴正本策

【其日有十曰勤圣学顾箴警戒嗜慾絶玩好慎举措崇节俭畏天变勉贵近振士风结民心帝深嘉纳命翰林写置左右备省览】质实【李贤字原德邓州人】

以星变修省

【钦天监奏土星逆行太微垣此上天垂象伏望日新圣德仍饬文武羣臣各加修省帝曰上天仁爱垂象示警朕当省悔五府六部都察院翰林院其计议宽恤条例以闻】

夏四月遣都督佥事孙安守备独石

【初额森入犯独石等八城俱残毁议者欲弃之于谦曰弃之则不但宣府怀来虽守京师不免动摇乃荐安授以方畧率兵守之安招士卒修城堡饬战具吊死问伤流亡复业八城遂完】质实【八城独石马营云州鴈鹑赤城龙门李家庄长安岭凡八城】

发明【明代边患一失于割广宁以界三卫再失于弃开平而守独石若更弃八城则藩篱尽失根本为之动摇矣议者可谓无识幸于谦力排衆论特以孙安镇守之兼授以方畧据龙门之关募屯田之士且战且守而八城复完不然委牖户于敌庭其能一日安枕耶】

五月遣卫拉特托克托布哈书

【上皇归後托克托布哈及额森屡使致贡上皇所亦别有献帝意欲絶卫拉特不复使使额森以为请尚书王直金濂胡濙等皆言絶之恐启衅帝曰遣使有前事适以滋衅尔曩入寇时岂无使耶因敕额森曰前者使往小人言语短长遂致失好朕今不复遣而太师请之甚无益也太师使朕皆优礼厚给之顾亦须少人赏赉乃得从厚至是托克托布哈使又至送还帅掠招抚使高能等请通好直等复相继言之帝曰使臣不遣朕志素定巧享其使而以书报之】

复以杨洪镇守宣府

【时宣府总兵官朱谦卒于镇乃命洪复镇宣府从子能信充左右参将洪奏言臣既佩印充总兵官而兄子能都督同知信都督僉事俱充参将子俊右都督管三千营一门父子同握重兵盛满难居乞赐臣休致或调能等他镇不许居数月以疾召还京卒洪久居宣府御军严肃士马精强为一时边将冠】

六月戊辰朔日当食不见

【钦天监言是月卯初刻日当食至期不见】

秋七月京师地震

【癸丑夜京师地震自北而南八月壬申南京地亦震】

八月复午朝

【自永乐初举午朝後渐罢不行给事中叶盛疏请复之帝即报可】

冬十月免山西被灾税粮

【凡一百八万二千余石】

十二月广通王徽燝阳宗王徽燾谋逆废为庶人【徽燝惑家人段友洪致仕都事干利宾等言谓徽燝有异相当王天下作伪敕分遣友洪及蒙能陈添仔等以银印金币诱诸苗为乱封苗酋杨文伯等为侯令发兵来攻武冈阳宗王徽燾亦与通谋友洪归为镇南王徽燝所执

有司以闻帝废徽燂徽燂为庶人幽徽燂京师而锢徽燂于凤阳蒙能率苗兵二千至武冈闻事败叛入广西称蒙王纠生苗为乱】质实【徽燂岷王梗第三子徽燂梗第五子徽燂梗第二子】

立团营

【明初京营兵隶五军都督府永乐中复置京军三大营于是五都督府虽仍旧制其掌府者治常行文书而已非特命不预营事及是于谦以营政久弛京军分隶三营各为教令临期徵发挑选凑拨兵将不相习请辽三营军十万分五营团操名曰五团营具法五十人为队队有长百人两队有领队官千人有把总五千人有都指挥体统相维兵将相识量敌多寡以为调法明年十二月谦又请益兵五万并前五营为十团营每营置都督一人都指挥三人把总十五人指挥三十人每队置管队官二人仍各统以武臣内臣而谦及石亨内臣刘永诚曹吉祥往来提督其余军不在团营者归本营训练以卫京师名曰老营由是京军之制一变已而谦绘阵图上进依古法而变通之其为论甚悉帝然之命依法训练谦号令明审目视指屈口奏悉合机宜石亨虽大将受成而已】质实【京军三大营一曰五军一曰三千一曰神机初洪武时建京卫四十有八成祖增至七十二永乐八年征布尼雅锡哩分步骑军为五曰中军左掖右掖左哨右哨既旋师仍之谓之五军营岁调中都山东河南大宁兵更番上京师隶之是外又有十二营围子手营及幼官舍人营之属悉附五军营中此五营之部也已得边外降丁三千立营分五司一掌执大驾龙旗实纛勇字旗负御宝及兵仗局什物上直官军一掌执左右二十队勇字旗大驾旗纛金鼓上直官军一掌传令营旗牌御用监盔甲尚冠尚衣尚履什物上直官军一掌执大驾勇字旗五军红盔贴直军上直官军一掌杀虎手马轿及前哨马营上直明甲官军随侍营随侍东宫官舍辽东备御曰还官军此三千营之部也已征交址得火器法立营肄习谓之神机营营有中军左右掖如五军又因得都督谭广马五千匹置营名五千掌操演火器及随驾护卫马队官军此神机营之部也三营各提督以内臣武臣居常五军肄营阵三千肄巡哨神机肆火器大驾征行则大营居中五军分驻步内骑外骑外为神机神机外为长围周二十里而樵采其中三大营之制如此按明兵志谦请于诸营选胜兵十万分十营团练于谦传云择精锐十五万人分十营团练其说互殊考明实银景泰三年十二月癸巳谦与石亨议选五军神机三千等营精锐官军十五万分为十营则谦传为得实而兵志误也】

以礼部侍郎王一宁祭酒萧鎡并兼翰林学士入内阁预机务

【鎡先代李时勉为祭酒元年以老疾辞国子生三千人叩阙请留帝允之至是与一宁并以本官兼学士入内阁一宁软熟希世鑄学问该博而性猜忌遇事多退避二人在位皆无所树立云】质实【王一宁仙居人】

额森弑其主托克托布哈

【托克托布哈娶额森姊生子额森欲立之托克托布哈不从额森亦疑其与中国通将害

己遂治兵相政托克托布哈败走额森追杀之收其妻子遣使献捷且贡马于谦上言额森虽悔过摅诚遣使入贡而罪大恶极终不可容今其君臣自相仇杀是天授我复仇之机臣请统团操军马分往宣府大同讨贼帝不从】

【壬申】三年春二月户部尚书金濂有罪下献寻释之【旧制秋粮输米有折收银布者夏税输麦有折收丝绢者帝即位诏免景泰二年税粮三之一濂檄有司但减米麦其银布丝绢微如旧学士江渊以告帝诘贵户部濂言未尝追徵给事中李侃等请追问有司奉何明文濂恐事败乃言丝绢银布诏书未载今国家多用若概免国计何资于是给事中御史劾濂失信于民为国斂怨且讪其陰事帝欲宥之言官力争遂下都察院狱三日释之削太子太保改工部吏部尚书何文渊言理财非濂不可遂复还户部濂上疏自理乞骸骨帝慰留之】质实【给事中御史讪濂陰事按明实録濂奏臣被御史给事中劾臣充生员时为盗出妻盖永乐七年臣因妻兄董英盗臣财物告官将英枷决妻亦休出又言臣往福建时母死不临及还不发丧盖臣以军务至重不敢以私废命後蒙取回奏乞奔丧不允】

三月诏锦衣卫官访事

【初王振乱政以指挥马顺理卫事流毒天下帝既即位廷臣极言官校缉事之弊帝切责其长令所缉送法司有诬罔者重罪之于时官校为之斂戢及是帝欲陰察外事乃命指挥同知毕旺董司侦访而锦衣卫官渐用事矣】

夏五月废皇太子见深为沂王立子见济为皇太子【帝即位後久欲以见济代太子而难于发言迟回久之太监王诚舒良为帝谋先赐陈循高谷白金各百两江渊王一宁萧鎡商辂半之用以緘其口然犹未发也会广西土目黄?以私怨戕其弟思明土知府?并减其家巡抚李棠以闻下有司治其事?父子入狱?急使其党千户袁洪至京师行赂有教其迎合帝意者乃上疏请易太子其疏曰太祖百战以取天下期传之万世往年上皇轻身御寇驾?北庭寇至都门几丧社稷不有皇上臣民何归今且踰二年皇储未廷臣惟人心易摇多言难定争夺一萌祸乱不息皇上即循逊让之美欲全天叙之伦恐事机叵测反覆靡常万一羽翼长养权势转移委爱子于他人寄空名于大宝阶除之下变为寇讐肘腋之间自相残蹙此时悔之晚矣乞与亲信文武大臣密定大计以一中外之心絶觊觎之望疏入帝曰万里之外乃有此忠臣即下廷臣议且令释?罪于是礼部尚书胡濙集羣臣会议衆相顾莫敢发言惟都给事中李侃林聰御史朱英以为不可尚书王直亦有难色太监兴安厉声曰此事不容已即以为不可者勿署名毋得首鼠持两端羣臣皆唯唯署议于是濙等上言陛下膺天明命中兴邦家统绪之传宜归圣子黄?奏是制曰可礼部具仪择日以闻遂简置东宫官及是更封太子为沂王立见济为太子诏曰天佑下民作之君实遗安于四海父有天下传之子斯固本于万年大赦天下命百官朔望朝太子赏诸亲王公主及边镇文武内外羣臣有差义加赐循等诸阁臣黄金各五十两东宫公孤官皆兼支二俸而?罪竟得释且赦其子云】质实【黄?以私怨残其弟?按明实録广西思明府土官知府黄?致仕子钧已代为知府?庶兄都指挥使?欲杀钧代以己子?守备浔州托言徵兵思明府令其子纠衆结寨于府三十里外夜驰至府袭杀?一家支解?及钧瓮 後圃仍归原寨明日乃入城诈发哀遣人报?捕贼以掩其迹方杀?时?仆福童得免走

诉宪司乃以事闻?疏出衆皆惊愕谓必有教之者或疑侍郎江渊後粵人邱濬入翰林曰此易辨也广西纸与京师纸异索?奏视之果广西纸其疑乃白思明唐羈縻州元为思明路明为思明土府属广西布政司本朝改属大平府雍正九年改为思州土州李棠字宗楷缙云人朱英字时杰桂阳人】

废皇后汪氏立妃杭氏为皇后

【帝初欲易太子独汪后不可曰如监国之称何帝不从后以太子杭妃所生遂让焉】质实【皇后杭氏锦衣卫指挥使昱女】

封上皇子二人为王

【封见清为荣王见淳为许王】质实【见清上皇第二子万宸妃生封荣王天顺复辟後改封德王居德州复改济南见淳上皇第四子王惠妃生封许王明年卒】

官顏孟二氏子孙各一人

【命礼部取顏孟子孙长而贤者各一人至京官之遂以顏希惠孟希文并为翰林院五经博士子孙世袭未几以希惠非嫡子乃改官其兄子议】质实【顏希惠复圣五十九代孙孟希文字士焕亚圣五十六代孙顏议字定伯】

六月建大隆福寺

【时太监兴安用事佞佛甚于王振请帝建大隆福寺费数十万明年三月工成帝克期临幸礼部郎中章纶谏河东盐运判杨浩除官未行亦上章言之帝乃止】质实【大隆福寺在大兴县东大市街之西北章纶字大经乐清人杨浩济南人】

河决沙湾

【河自正统十三年经由沙湾决口入海运道口益浅涩帝勅山东河南巡抚都御史洪英王逵协力合治积数月无功时议者谓沙湾以南地高水不南入运河请别引水以灌运甚或言沙湾水湍急投以石铁冲浮若羽非人力可为宜设齐醮符咒以禳之帝心甚忧命工部尚书石璞往治而加河神封号璞至濬渠自黑洋山至徐州以通漕而沙湾决口如故遣中官黎贤阮洛御史彭谊助之乃于沙湾筑石堤以御决河开月河二引水以益运河且杀其决势堤既成璞还朝至是大雨浹旬河复决沙湾北岸四十余丈旁近地皆淹没诏英督有司修筑及冬工甫竣明年正月河又决新塞口之南至四月决口甫塞五月大雷雨又决沙湾北岸掣运河水入盐河漕舟尽阻帝复命璞往乃凿一河长三里上下通运河而于决口筑坝截之令新河运河俱可行舟以济漕】质实【石璞字仲玉临漳人洪英福建怀安人王逵字景阳浙江山陰人彭谊字景宜东莞人】

秋七月杀内使王瑶

【御用监阮浪侍上皇于南宫上皇赐浪镀金绣袋及镀金刀各一浪以与瑶锦衣指挥卢忠见之醉瑶酒而窃之上变言浪传上皇命以袋刀结瑶图复位帝震怒下浪瑶诏狱穷治之忠箠于术者全寅寅以大义折之且曰此大凶兆死不足赎忠惧佯狂以冀免商辂及中官王诚言于帝曰忠病风无足信不宜听妄言伤大伦帝意少解乃并下忠狱坐以他罪谪广西立功錮浪于狱而瑶竟磔死】

八月王一宁卒

【一宁之入阁也以中官王诚辈尝受业私相援引遂致显达非士论所与也及是卒于官】

九月江渊以母丧起复

【初侍读学士倪谦遭丧渊荐谦为讲官谦遂夺哀至是御史周文言渊引谦正为今日地帝以事既处分不问诏自今羣臣遭丧毋滥保】质实【倪谦字克让上元人】

闰九月开处州银场

【时浙民乞复开银场镇守浙江】

冬十月以左都御史王文入内阁预机务

【时王一宁既卒阁中尚有五人陈循高谷江渊萧鎡商辂也循最宠任谷与循不相能以文强悍欲引文自助乃请增阁员循举其乡人萧维禎谷举文文方巡视江淮以得中官王诚助遂召入阁二品大臣入阁自文始文既居政府反与循比而不附谷人谓谷自生一敌云】质实【明史职官志都察院左右都御史正二品王文时为左都御史始以二品入阁考明直阁诸臣表翰林入内阁自解缙始加少保入内阁自杨士奇始都御史入内阁自王文始明朝重冢宰虽内阁历二三十年不领吏部尚书内阁之领吏部尚书亦自文始内阁兼太子太保左都御史吏部尚书翰林学士者亦自文始于时陈循则户部尚书翰林学士少保太子太傅华盖殿大学士文渊阁大学士高谷则工部尚书翰林学士少保太子太傅谨身殿大学士东阁大学士且兼五官矣以故体统尊于三公而内阁之望益隆萧维禎名兆以字行庐陵人】

十一月己未朔日有食之

于谦辞总督军务不许

【帝知谦深凡所陈奏无不从而谦亦每事抒忠直陈无隐由是人多忌之方敌初退都御

史罗通劾谦上功不实且言韩信起自行伍襁苴拔于寒微宜博搜将士中如信苴者与议军事若今腰玉珥貂皆苟全性命保爵禄之人未足与议也意盖诋谦与石亨辈谦疏辨且乞罢请通指荐韩信襁苴其人者廷臣共留谦又谓通志在灭贼无他帝两解之及论德胜之功石亨功不如谦而得世侯内媿疏荐谦子冕诏召赴京师谦辞不允冕至谦言国家多事臣子义不得顾私恩且亨位大将不闻举一幽隐拔一行伍微贱以裨军国独荐臣子于公议得乎臣于军功力杜侥幸决不敢以子监功亨大悲既立团营亨与谦共事亨纵恣谦每裁抑之亨恨甚疏辞总兵不许谦上言祖宗朝本无总督迺因边事孔棘命臣兼领此一时之宜非经久之法即今敌情不定将任宜专臣见石亨累奏辞职以臣为之轩轻也岂可以臣之弩钝使亨不得行其志乞解臣总督军务俾亨专任其事帝亦不允通与亨皆谦所荐举顾前後齟齬之而言者复摭摭不已诸御史屡以深文弹劾赖帝力持之谦畧得尽其所施設然谦故性刚负才气遇事有不如意辄拊膺叹曰此一腔热血竟洒何地视诸选奕大僚勲臣贵戚意颇轻之故愤怨者益衆谦尝留宿直庐不还私第素病痰疾作景帝遣兴安舒良更番往视闻其服用遇薄诏令上方制脰至醯菜毕备又亲幸万岁山伐竹取沥以赐或言宠谦太过兴安等曰彼日夜分国忧不问家产彼去令朝廷何处更得此人】

遣使抚辑畿内山东山西流民

【先是五月河南流民复业者计口给食五年至是畿内山东山西逃民复赋役五年】

十二月额森使来廷臣请遣使报之不许

【额森自弑托克托布哈後屡使贡马至是复遣使贺来年正旦尚书王直等请遣使答之诏兵部议于谦言臣职司马知战而已行人事非所闻帝从谦言遣使议乃罢既而洗马刘定之言北庭遣使宜敕羣臣公议不当但委兵部盖和战皆所以待敌而兵部必不以和为请犹巫医皆所以治病而巫者必不以乐为言各护其所短而欲见其所长也诏下羣臣更议给事中路璧以遣使有五不可帝以璧议为是使卒不遣】质实【刘定之字主静永新人路璧安福人】

【癸酉】四年春二月以土酋黄?为前军都督府同知【勅?驰驿至京召见便殿以?有机谋勇畧命治前府事赐第居京师後天顺复辟?间自杀发棺戮其屍捕其子震诛之或云怀献太子卒?仰药死】

三月凤阳淮徐饥巡抚金都御史王竑振之

【凤阳淮安徐州大水道殪相望竑不待报辄开仓振之山东河南饥民亦相率就食竑以徐州广运仓有余积欲发以振典守中官不可竑曰民旦夕且为盗若不吾从脱有变吾先斩若然後自请死耳中官憚竑名不得已从之竑乃自劾专擅罪因言广运所储仅支三月请令死罪以下得入粟赎帝从其议复命礼部侍郎邹干齎帑金驰赴听竑便宜竑乃躬自巡行散振不足则令沿淮上下商舟量其大小出米作粥以食饥民又劝富民出米麦谷粟而以银钱

绢布参之分给被灾之家全活二百一十余万赋牛种及招抚复业者七万九千余户他境流移安辑者万六百余家病者给药死者具槥鬻子女者赎而归之还籍者子道里费民忘其饥颂声大作歌曰生我者父母活我者巡抚初竑奏淮扬饥帝忧甚及得竑自劾疏喜曰好都御史不然饥死我百姓矣于是尚书金濂大学士陈循等颂竑功就进左副都御史时济宁亦饥帝命南京户部尚书沈翼賫帑三万往振散给仅五千金余归之京库竑劾翼奉使无状请以银易米备振从之】质实【邹干字宗盛余杭人沈翼字克敬山阳人】

开建宁银场

【时浙江银场既开户部奏福建建宁银场与之相连亦请并开故从之命少监戴细保提督孙原贞又奏臣覆视各银场亲临各坑见坑路深远矿脉细微亦有坚石深泉之处实难开煎伏望仍前封闭俟岁丰民富时徐议其事乃罢】

夏四月始令生员纳粟为国子生

【命各布政司及直隶府州县学生员输粟八百石于临清东昌徐州振济者入监读书循资出身寻减三百石以胡濙言遂罢初洪武中监生与荐举人材参用故其时太学生最盛迨荐举既废进士日重而监生渐轻至是纳粟例开不久即止然其後或遇岁荒或因边警或大兴功作率据前例行之而军民子弟亦得援生员之例以入监谓之民生亦谓之俊秀或竟谓之例监而监生日益轻矣】

六月吏部尚书何文渊下狱寻释之

【文渊自吏部侍郎进尚书协王直理部事铨选多私御史练纲等言直素行本端为文渊及侍郎项文曜等所罔宜按问其罪帝虽宥文渊等然颇以纲为直及是给事中林聪等劾文渊儉邪左庶子周旋疏言具枉聪等攻益力并劾旋御史曹凯复廷争之遂与旋俱下狱文渊素善太监兴安聪疏中有嘱托内臣语安请帝诘主名时安方用事聪终不敢斥言乃释文渊命致仕文渊前议易储尝言父有天下传之子阁臣草诏即用其语後天顺复辟或传朝廷逮捕遂自经死】质实【项文擢字应昌淳安人周旋永嘉人】

秋八月额森自立为汗

【额森迫胁诸部东踰乌梁海西及赤斤哈密遂自立为汗以其次子为太师遣使致书称大元特克坤達罕未日添元元年诏廷臣议报书所称给事中林聪以为但勅谕来使不必报书安远侯柳溥以为宜仍称太师郎中章纶以为可称卫拉特王而府部大臣则言宜从北俗称为汗帝从大臣议书称卫拉特汗赐之】

冬十月以徐有贞为左佥都御史治沙湾决河

【有贡即徐理以倡议南迁为太监兴安金英所叱久不得迁因谄事陈循以玉带遗之且用星术言公带将玉矣无何循果加少保大喜会太子立因引为右谕德时少保于谦方为帝所倚任凡用人多密访之谦理属谦门下士游说求国子祭酒谦为言于帝帝曰此议南迁者耶为人倾危将坏诸生心术理不知谦之荐之也以为沮已深怨谦循揣帝恶理告理曰若第更名无为内家习知庶可希进用遂改名有贞及是河决沙湾已六年矣随筑随决前後遣王永和石璞等治河皆无功璞所凿新河虽成帝恐不能久令璞且留处置而命廷臣举一人以专治沙湾衆共推有贞乃擢金都御史以往】

十一月皇太子见济卒

【諡怀献】

【甲戌】五年春正月命江渊等抚辑山东河南两淮军民【时山东河南雨淮大寒人畜多冻死巡抚都御史王竑上言比年饥饉洊臻人民重困顷冬春之交雪深数尺淮河抵海冰冻四十余里人畜僵死万余弱者鬻妻子强者肆劫斂衣食路絶流离载涂陛下端居九重大臣安处廊庙无由得见使目击其状未有不为之流涕者也陛下嗣位以来非不敬天爱民而天变民穷特甚者臣窃恐圣德虽修而未至大伦虽正而未笃贤才虽用而未收其效邪佞虽屏而未尽其类仁爱施而实惠未溥财用省而上供未节刑罰寬而冤狱未伸工役停而匠力未息法制颁而奉行或有更张赋税免而有司或仍牵制有一於此皆足以干和召变伏望陛下修厥德以新厥治钦天命去祖宗正伦理笃恩义戒逸乐絶异端斯修德有其诚矣进忠良远邪佞公赏罚寬赋税节财用戒聚斂却贡献罢工役斯图治有其实矣如是而灾变不息未之有也帝褒纳之命阁臣江渊偕平江侯陈豫抚辑山东河南两淮军民并敕内外臣工同加修省陈弭灾之道】

三月减国子生额

【监生二千余人俱仰给官廩以户部侍郎孟监言留年深者千余人余放归】质实【孟监字克明傅野人】

命学士王文抚恤扬州及苏常诸府

【尚书仪铭以江南北积雪沍寒死亡载道奏请振恤帝得奏即驰勅江渊王竑振淮北而命阁臣文振扬州及苏常诸府先是正统以来苏松常鎮四府粮自兑运外每四石折白金一两民以为便後户部仍徵米输淮徐凡一百余万石率三石而致一石民多破家文以便宜停之发米振饥民三百六十余万】质实【折白金按州县岁赋自起运兑运外粮四石折银一两解内承运库谓之金花银事详英宗正统元年份铭字子新高密人智之子】

夏四月壬午朔日有食之

五月下礼部郎中章纶御史鍾同於锦衣卫狱

【先是怀献太子既卒纶与同偕朝语及沂王皆泣下因与约疏请复储会定州获北谍言额森使侦京师将以秋初大举深入同闻之上疏抗论时政遂及复储事其畧曰近得贼谍言额森使侦京师及临清虚实期秋初大举深入直下河南臣闻之不胜寒心而庙堂大臣皆恬不介意臣草茅时闻寺人构恶戕戮直臣刘球遂致廷臣箝口假使当时犯顔有人必能谏止上皇之行何至有蒙尘之祸陛下赫然中兴锄奸党旌忠直命六师御敌于郊不战而三军之气自倍臣谓陛下方且鞭撻四裔坐致太平奈何边氛甫忠疮痍未复遂生侈心失天下望伏愿取鉴前车厚自奋厉又言父有天下固当传之于子乃者太子薨逝足知天命有在臣窃以为上皇之子即陛下之子沂王天资厚重足令宗社有托伏望扩天地之量敦友于之仁蠲吉具仪建复储位实祖宗无强之休又言昔尝命将帅各陈方略经旬踰时互相委责及石亨柳溥有言又不过庸人孺子之计平时尚尔一旦有急将何策制之夫御敌之方莫先用贤陛下求贤若渴而大臣顾排抑之所举者率多亲旧富厚之家即长材屈抑孰肯为言朝臣欺谩若此此臣所以抚膺流涕为今日妨贤病国者丑也疏入帝不恚下所司议宁阳侯陈懋吏部尚书王直等请帝纳其言因引罪求罢帝慰留之越数日章纶亦疏言复储并陈修德弭灾事其大者谓内官不可干外政佞臣不可假事权後宫不可盛声色又言孝弟者百行之本愿陛下退朝後朝谒两宫皇太后修问安视膳之仪上皇君临天下十有四年是天下之父也陛下亲授册封是卫皇之臣也上皇传位陛下是以天下让也陛下奉为太上皇是天下之至尊也陛下与上皇虽殊形体实同一人伏读奉迎还宫之诏曰礼惟加而无替义以卑而奉尊望陛下允蹈斯言或朔望或节旦一幸南宫率羣臣朝见以展友于之情极尊崇之道更请复汪后於中宫正天下之母仪还沂王於储位定天下之大本帝得疏遂大怒时日已暝宫门闭传旨自门隙中出立执纶及同下诏狱榜掠惨酷逼引主使及交通南宫状频死无一语会大风扬沙天地昼晦狱得稍缓令錮之方同下狱礼部郎孟圯者亦疏言复储事帝不罪而进士杨集上书于谦曰奸人黄?献议易储不过为逃死计公等遽成之今同等又下狱脱诸人死杖下而公等坐享崇高如清议何谦以书示王文文曰书生不知忌讳要为有胆当一官处之乃以集知安州】质实【安州金置元属保定路明属保定府今因之鍾同字世京吉安永丰人孟圯闽人杨集常熟人】

发明【方黄?疏请易储之时景帝遂议立见济其时如林聪朱英辈夙以亮直表节亦竟不能争及见济既卒储位未定纶与同二人岂不知奏不济必死然激於忠义遂慷慨不能自己其志洵可与刘球争烈矣彼分金受饵诸臣当国家大事畏首畏尾曾无所补救殊多愧耳】

乌梁海三卫乞居大宁城不许

【额森虐使三卫逼徙其部落於黄河穆纳地三卫不能堪其酌奇里玛格根特穆尔等亡归请得近边屯驻因乞居大宁废城于谦以为不可乃止】质实【奇里玛旧作乞儿蛮格根特穆尔旧作革干帖木儿今并改】

秋八月减两京课钞

【时以钞法不行今两京市肆园场税悉纳钞户部按月征之商民以为病或闭户不敢市易拔图蔬伐果木以避之给事中陈嘉猷言两京根本重地军民尤宜加恤岂可当岁歉之时兴扰民之政从使钞法通而民已不聊生矣诏蔬果等暂免纳钞】质实【陈嘉猷余姚人】

九月免苏松常扬杭嘉湖漕粮

【共免二百余万石】

冬十月额森为阿拉所杀

【额森既弑托克托布哈自立为汗恃其强日益骄恣荒於酒色阿拉为额森知院求为太师曰主人衣新衣幸以故衣赐臣不许阿拉怒额森忌阿拉欲讨之恐不胜乃自遣其子守西番召阿拉二子从先鸩杀其次子阿拉惧诈言乌梁海盗马请召还其长子合击之额森先使赛堪达通二王与俱临行觴焉中途阿拉长子亦中鸩死阿拉益怨给赛堪达通前渡川自後率部落三万攻额森数其三罪曰汉儿血在汝身托克托布哈王血在汝身乌梁海血亦在汝身天道好还血在我矣额森无以应约明日与战退而与巴延特穆尔等议帐中有阿拉故部曲三人事额森久额森不之疑因共趋帐中拔所佩劔刺额森杀之并杀巴延时穆尔等赛堪王闻变领七千人蹶之既知额森死弃衆去为其下所杀而达通王领其人马西奔未几鞑靼部保喇者复杀阿拉夺额森母妻并其玉尔求托克托布哈子穆尔格尔立之号小王子自是卫喇特遽衰额森诸子穷依哈密部衆分散而保喇与其属玛拉噶等皆雄视部中鞑靼势复炽】质实【按额森既亡数传至博汗其世次不可考博汗生子曰乌琳台巴丹太师遂统部落是为准噶尔之始保喇旧作孛来穆尔格尔旧作麻儿可儿玛拉噶旧作毛里孩又博汗旧作孛汗乌琳台巴丹旧作乌林台巴鞑今俱改】

十二月贬都给事中林聪为国子监学正

【聪遇事敢言为执政大臣所嫉王文尤恶之会聪甥陈和为教官欲得近地便养文嚙御史黄溥等劾聪下廷讯至专擅选法当斩胡濙不肯署称疾不朝者数日帝遣兴安问疾濙曰老臣本无疾前日议事惊悸至今不宁耳安问何为曰谏官有小罪而欲杀之所以悸也安入告高谷亦力言之聪乃得释贬国子监学正】质实【黄溥弋阳人】

【乙亥】六年春正月以江渊为工部尚书

【渊在内阁好议论每为同官所抑意忽忽不乐会于谦以病在告诏推一尚书协理部务衆佯推渊渊欣然不辞属商辂草奏陈循王文密示以石兵江工四字渊在旁方知也比诏下改工部尚书石璞于兵部而以渊代璞渊大失望】

雨木冰

【癸酉晓刻四方浓雾既而成霜附木自是日至丁丑凡五日】

二月命太监王诚同法司録囚

【时中外系囚有至十余年者帝以灾变命诚会法司审録之由是得减免者甚衆】

夏四月丙子朔日有食之

鞑靼遣使入贡

【穆尔格尔遣使贡马驼礼部言迤北未有君长请量减赏赐诏从旧给之以慰其心】

五月帝祷雨南郊

【以两畿及各省旱蝗也】

予太监王诚等锦衣卫世职

【命太监王诚侄敏舒良弟玉张永兄琮郝义侄安王勤侄贤俱为锦衣卫带俸世袭百户】

六月以宋儒朱子九世孙挺为翰林院五经博士世袭【寻复以宋儒程颐十七代孙克仁周敦颐十二代孙冕俱为世袭博士奉祀事】质实【朱挺字益龄朱子九世孙世居福建建安之紫霞洲程克仁程子十七代孙世居嵩县之六浑周冕周子十二代孙其先道州人熙宁中周子葬母江州子孙因家庐山莲花峯下按克仁冕之授博士事在景泰七年五月时又以福建僉事吕昌奏增祀黄干蔡沈刘燾真德秀于朱文公祠】

闰六月两畿湖广水

【遣官省视振恤】

徐有贞治沙湾决口成

【有贞至张秋上治河三策一置水门一开支河一濬运河议既定督漕都御史王竑以漕渠淤浅滞运请急塞决口帝勅有贞如竑言有贞守便宜言临清河浅旧矣非因决口未塞也漕臣但知塞决口为急不知秋冬虽塞来春必复决徒劳无益臣不敢邀近功诏从其言有贞乃踰济汶沿卫沁循大河道濮范相度地形水势上言河自雍而豫出险固而之夷斥水势既肆由豫而兗土益疎水益湑而沙湾之东所谓大洪口者适当其冲於是决焉而夺济汶入海之路以去诸水从之而泄堤以溃渠以淤涝则溢旱则涸漕道由此阻然骤而堰之则溃者益溃

淤者益淤今请先疏其水木势平乃治其决决止乃濬具淤於是设渠以疏之起张秋金堤之首引而西南百里踰范暨濮又上而西北经澶渊以接河沁内倚古金堤以为固外恃梁山泊以为泄又置上下二闸以节宣之凡河流之旁出不顺者筑九堰以障之堰各长万文崇三十有六尺厚什之栅木络竹实之石而键以铁凡五百五十余日而工成赐其渠名广济由是河水不东冲沙湾而北出济漕乃濬漕渠北至临清南抵济寧建闸於东昌者八水道以平先是有贞始兴工有谓河决宜塞不宜疏者帝遣中使即问有贞出二壶而穿其一为五窍注水其中五窍者先涸中使还报乃决用其策及工将竣江渊请遣中官偕文武大臣督京军五万人往助役有贞言京军一出日费不貲今泄口已合决堤已坚但用沿河民夫自足集事乃止自沙湾之决垂十年至有贞治之决口始塞阿鄆曹濮间旧出沮洳者百数十万顷山东河患少息然亦会黄河南趋徐吕东流渐杀故有贞得奏厥功云有贞之初筑决口也下木石则皆若无者有贞思数日忽悟曰此下殆有龙窟耶吾有以制之矣乃熔铁下之不移时而决口塞有贞事竣还帝厚劳之寻复命巡视漕河明年秋山东大水河堤多坏惟有贞所筑如故有贞乃修旧堤决口自临清至济宁水患悉平还朝帝召见獎劳有加进左副都御史】质实【按有贞疏上三策一置水门畧曰臣闻水之性可使通流不可使堙塞禹凿龙门辟伊阙为疏导计也故汉武堙瓠子终弗成功汉明疏汴河踰年着绩今谈治水者甚衆独乐浪王景所述制水门之法可取盖沙湾地土皆沙易致坍决故作坝作闸皆非善计请依景法损益其间置闸门於水而实其底令高常水五尺小则拘之以济运大则疏之使趋海则有通流之利无堙塞之患矣一开支河畧曰凡水势大者宜分小者宜合分以去其害合以取其利今黄河势大故恒冲决运河势小故恒乾浅必分黄水合运河则有利无害请度黄河可分之地开广济河一道使水大不至泛溢为害小亦不至乾浅以阻漕运其一则濬运河请复陈瑄旧制置捞浅夫挑深河道以利漕运沁河源出沁州沁源县东北羊头山西南流合水峪河又西南流合清河又南流迳县东又南流合青龙河又西南流合西川河又南流合大南川又南流入平阳府岳阳县界范县春秋晋范武子采邑汉置范县明属濮州 本朝雍正十三年改属曹州府金堤在今东阿县平镇南连壽张县界参差隆起延亘鄆濮俗称始皇堤汉文帝时河决酸枣东溃金堤即此澶渊在今大名府开州西梁山泊在今壽张县东南七十里梁山下久湮广济渠西起张秋金堤通寿张之沙河至于范濮以達河沁渠口即通济闸也八闸在今东昌府龙湾及魏家湾迤南阿鄆曹濮谓东阿甄城曹州濮州也东阿汉县後汉分置谷城县北齐废入东阿明洪武八年移东阿县治于故谷城属东平州 本朝雍正十三年改属泰安府鄆城隋县明洪武初省县入濮州故城在州东二十里】发明【沙湾之决在正统十三年维时陈留大水涨夏决金村黑洋秋决新乡入柳树口漫曹濮抵东昌冲张秋溃寿张沙湾由是坏运道东入海而徐吕二决遂浅澁理其事者先後如王永和洪英王暹石璞彭谊赵荣辈竭力修治而沙土易坏随筑随决迄无成功有贞独建三策用疏而不用塞会是时黄河亦南趋徐吕下流日有渐杀之势可谓因利集事顾有贞以河决改名诡进始得仔肩其事诈以取功何足齿哉】

太白昼见

【帝即位後大白常画见至是御史倪敬盛?杜宥黄让罗俊汪清以灾异频仍请罢齐僧辍游宴止兴作寬直臣之囚疏入帝不恠未几都御史萧维祜考察其属谕令去之遂黜敬等为典史】质实【倪敬字汝敬无錫人社宥江陰人黄让无湖人罗俊安福人汪清固始人】

八月杖南京大理少卿廖庄於阙下谪为驿丞复下礼部郎中章纶御史锺同於狱同死纶仍锢狱

【先一年庄在南京疏言臣曩见上皇遣使册封陛下每遇庆节必令羣臣朝谒东庑今上皇在南宫愿陛下时时朝见或讲论家法或商治道岁时令节命羣臣朝见以慰上皇之心又言太子者天下之本上皇诸子陛下之犹子也宜令亲儒臣督书策以待皇嗣之生使天下臣民晓然知陛下有公天下之意疏入不报及是庄以事至京诣东角门朝见帝忆前疏大怒命杖八十谪定羌驿丞左右言事皆由锺同倡实罪魁帝乃封巨梃就狱中杖同及纶各百同竟死纶死而复苏系如故是年刑科给事中徐正请间言事亟召入乃言上皇临御岁久沂王尝位储副天下臣民仰戴不宜居于南宫宜迁置所封之地以絶人望别选亲王子育之宫中帝惊愕大怒立叱出之命谪远仕已复得其淫秽事遂谪戍铁岭卫又御史高平亦言南城多树事巨测遂尽伐之时盛暑上皇尝倚树憩息及树伐得其故大惧至天顺复辟後正平皆伏诛赠同大理寺左丞释纶于狱命内侍检纶前疏不得内侍从旁诵数语帝嗟叹再三擢礼部侍郎】质实【定羌城在河州南九十里廖庄字安止吉水人按明实録庄上疏在五年七月锺同之上疏也策马出马伏地不肯起同叱曰吾不畏死尔奚为者马犹盘辟再四乃行同死马长号数声亦死徐正吴江人高平里籍未详】

濬京师城河

【备两潦也】

冬十一月以方瑛为平蛮将军讨湖广叛苗

【初庶人岩煤既废其家人蒙能窜入苗中为乱诈作妖书纠生苗三万余攻龙里新化铜鼓诸城官军屡剿不能克至是帝命瑛为平蛮将军尚书石璞总督军务率京军讨之时诸苗酋多与能相应合衆攻平溪卫都指挥郑泰以火枪击能能被枪贼昇还寨而死余贼流劫武同分藕塘诸寨势尚炽已而瑛进驻沅州分三道一自清浪一自平溪一自镇远会于贼境破鬼板等一百六十余寨蒙能余党以次平】质实【新化明守御所今为长官司属黎平府铜鼓明卫今为锦屏县属黎平府平溪明卫今为玉屏县属思州府清浪明卫今为清溪县属思州府】

【丙子】七年春二月皇后杭氏崩

【諡肃孝】

三月天鼓鸣

【辛巳夜无云西南方有声如雷】

夏四月彗星见

【彗东北见於胃其光芒或长数丈或长丈余自是月至于六月凡两月余及十二月又复见於毕宿】

五月勅内外羣臣修省

【以星变故也】

六月葬肃孝皇后

河决开封

【时河南大雨决开封河南彰德三府田庐淹没无算】

秋七月两畿山东河南大水

【自夏至秋大雨不止诸水并溢高地大余】

以工匠蒯祥陆祥为工部侍郎

【蒯祥以木工陆祥以石工俱累擢太仆寺少卿至侍郎仍督工匠时称匠官】

八月浙江江西湖广旱

裁冗官

【帝以官多扰民勅吏部等议裁革于是省参政三参议二副使五僉事二同知以下一百五十余员】

九月赐大学士王文陈循子俱明年会试

【自设科以来辅臣子弟少登第者是秋文子伦循子瑛应顺天乡试被黜文循构考官刘俨黄谏欲杀之台省譁然高谷言于帝曰大臣子与寒士竞进已不可况又不安于命欲杀考官可乎帝命翰林院礼部覆閱贡士卷有优于伦瑛者有相等者有不及者勉徇二人意命其子一体会试而心薄之于是六科给事中言宋范质为相其从子求迁秩质作诗戒之韩亿之子维举进士以父执政不就廷试方之陈循王文贤不肖何如也况应试者十八百有奇而中式者百三十五人倘一概援例求进是坏科目之制矣循等所行乖悖乞正其罪诏姑贷之】质实【刘俨字宣化吉水人黄谏字廷臣兰州人】

追諡宋丞相文天祥侍郎谢枋得

【从巡抚江西佥都御史韩雍之请諡天祥曰忠烈枋得曰文节】

冬十月振江西饥

十二月振畿内山东河南水灾

免被灾税粮并蠲逋赋

【是年凡免天下税粮计米麦二百四十五万四千二百余石】

帝有疾

【癸亥帝不豫罢明年元旦朝贺】

御定资治通监纲目三编卷十一

卷十二

<史部,编年类,御定资治通监纲目三编>

钦定四库全书

御定资治通监纲目三编卷十一

【起丁丑明英宗天顺元年尽甲申明英宗天顺八年】凡八年

【丁丑】八年【英宗睿皇帝天顺元年】春正月羣臣请立太子不许【帝不豫储位未定中外忧擢百官问安左顺门太监兴安出谓曰公等皆朝廷股肱耳目不能为社稷计日日徒问安何益衆嘿然都御史萧维祜副都御史徐有贞退语诸御史曰若皆知安意否金曰安谓早请建储耳维祜有贞曰然乃谋请复沂王为太子议于朝大学士王文曰今只请立东宫安知上意谁属学士萧鎡曰沂王既退不可再也于是共请建元良为太子维祜举笔曰我欲更一字乃更建为择笑曰吾带亦欲更也疏进诏曰朕偶有寒疾十七日当早朝所请不允时羣臣见疏中有早择元良语遂喧传文与中官王诚等谋召取襄世子云】质实【景泰八年为英宗睿皇帝天顺元年按是年正月壬午英宗复辟丙戌改元天顺今依朱子纲目书唐中宗及分注睿宗例大书景泰八年而以天顺元年分注其下左顺门芜史明制午门居中向南者曰皇极门即奉天门也左曰宏政门即东角门也右曰宣治门即西角门也向西曰归极门即右顺门也向东曰会极门即左顺门也襄世子襄王瞻墉子祈镛】

武清侯石亨右副都御史徐有贞等以兵迎上皇于南宫遂复位以有贞入内阁预机务下少保兵部尚书于谦及大学士王文于狱

【先是帝舆疾宿南郊斋宫召石亨至榻前命摄行祀事亨见帝疾甚退与都督张軏左都御史杨善及太监曹吉祥谋立太子不如复上皇可邀功赏軏吉祥等然之以告太常卿许彬彬曰此不世功也彬老矣无能为徐元玉善奇策盍与图之元玉徐有贞字也亨軏遂夜至有贞家有贞大喜曰须令南城知此意軏曰已陰达之矣有贞曰必得申报乃可亨軏去十六日夜亨軏与吉祥矫太后制复会有贞所辄曰报得矣计将安出有贞乃升屋步乾象亟下曰时在今夕不可失相密语人不闻计定仓皇出有贞焚香祝天与家人诀曰事成社稷利不成门族祸归人不归鬼矣会明日帝将视朝门早启有贞以三鼓即至朝房亨軏等率羣从子弟家兵混同守御官军入天色晦冥軏等惶或有贞趣行軏顾曰事济否有贞大言曰必济进薄南宫城毁垣坏门而入见上皇于烛下上皇问故衆俯伏合声请登位乃挥兵士进犖皆惊战莫能举有贞率诸人助挽以行忽天色明霁星月开朗上皇顾问有贞等为谁各具职官姓名对至东华门门者拒弗纳上皇曰我太上皇也遂入至奉天门升座时百官咸待漏阙下忽闻南城呼噪震地咸失色须臾鸣钟鼓有贞出号于衆曰太上皇帝复位矣趣入贺百官震骇入谒上皇曰卿等以景泰皇帝有疾迎朕复位其各官任事如故羣臣呼万岁方景帝闻钟鼓声大惊问左右曰于谦耶既知为上皇连声曰好好上皇御文华殿命有贞以右都御史兼学士入

内阁预机务召陈循等有贞草诏谕羣臣日中御奉天殿即位于谦甫聽宣谕毕即班执之与大学士王文太监王诚舒良张永王勤同下狱】质实【南郊斋宫在正阳门外圜丘之西前正殿後寢殿傍有浴室四闥墙垣以深池环绕之东西悬太和钟每郊祀候驾起则钟作登坛即止礼毕升驾又声之张帆祥符人河间王玉之子定兴王辅之弟陈汝言潼关卫人】

以太常寺卿许彬大理寺卿薛瑄为礼部侍郎兼翰林学士入内阁预机务

【帝自卫喇特还彬至宣府奉迎帝命草谕羣臣勅遣祭土木阵亡官军以此受知于帝及是遂与瑄同入阁帝闻瑄学行数召对于便殿所陈皆关君德帝甚重之】

改元大赦

【告即位于宗庙陵寢诏天下曰朕昔恭膺天命嗣承大统十有四年民物康阜卫喇特之变朕念宗社生灵亲率六师以庶弟郕王监国不意兵律失御乘輿被遮岂期监国之人遽攘当宁之位皇天悔祸寇贼革心奉朕南还既无复辟之诚反为幽闭之计族废皇储爰立已子惟天不佑未久而亡杜絶谏诤愈益执迷矧失德之良多致沉疾之难疗朝政不临人心共愤今月十七日朕为公侯驸马伯及文武羣臣六军万姓之所拥戴请命于圣母皇太后祇告天地社稷宗庙复即皇帝位其改景泰八年为天顺元年大赦天下咸与维新诏辞徐有贞所撰也】

録夺门功

【封石亨忠国公张帆太平侯輓父安伯杨善兴济伯进徐有贞兵部尚书予太监曹吉祥等锦衣卫世职有贞意未慊数请于亨曰愿得冠例注从兄後亨入言之寻封武功伯太监兴安见有贞等俱邀封赏言于帝曰当日若附和南迁不知置陛下于何地又安有夺门耶帝不应後给事御史皆劾安与王诚舒良等为党逆宜同罪帝宥之但罢其司礼监职时中官坐诛者衆安仅获免云】质实【侧注武弁也张輓河间王玉次子帆之兄也】

杀于谦王文籍其家

【先是徐有贞石亨等既定议迎复有贞恐亨等中变乃诡辞以激亨曰于谦王文已遣人迎襄世子矣又曰帝已知君谋将于十七日早朝执君亨大惧谋遂决及是谦文已下狱有贞与亨等噤言官劾谦文谋迎外藩入继大统命鞫于廷文抗辨曰召亲王须用金牌信符遣人必有马牌内府兵部可验也辞气俱壮谦笑曰亨等意耳辨何益都御史萧维祜曰事出朝廷不丞亦难免遂文致其词以意欲二字傅会成坐谋逆律当寘极刑奏上帝犹豫未忍曰于谦实有功有贞曰不杀谦此举为无名帝意遂决薛瑄力言于帝乃减一等改斩弃谦等于市籍其家家属戍边有教谕吾豫言谦罪当族所举文武大臣并寘诛部议持之而止千户白琦又请榜谦等罪示天下一时希旨取宠者率以谦为口实云谦性忠孝才畧开敏自遭寇变忘身忧国敌先後入犯卒不能逞保全社稷皆谦功也为有贞及亨辈所嫉遂及于难死之日阴霾

翳天朝野冤之指挥多喇者本隶曹吉祥部下以酒酹谦死所痛哭吉祥怒扶之明日复酹恻如故都督同知陈逵感谦忠义收遗骸殡之踰年始归葬杭州逵故举将材出李时勉门下者也谦之籍也家无余貲惟正室鐫钥甚固启视则皆上所赐蟒衣剑器诸物也皇太后初不知谦死比闻嗟悼累日帝既而悔之也】质实【吾豫开化人多喇蒙古降人陈逵六合人多喇旧作朵儿今改】

戍陈循江渊于铁岭卫斥萧鎡商辂为民

【徐有贞既入阁欲尽揽事权遂佐石亨辈撼去诸阁臣循虽素有德于有贞亦弗恤也先是王文等请建东宫景帝不允王直胡濙将继奏请复立沂王为太子推辂草疏以曰暮未及上而亨已迎帝复辟疏章留礼部侍郎姚夔所帝即位复召辂与高谷入便殿温旨谕之命草复位诏亨密语辂赦文不须别具条款辂曰旧制也不敢易亨不悦亨与有贞嗾言官劾循等朋奸遂并及辂下之狱辂上书自愬言复储疏在礼部可覆验不省及是与鎡并斥为民而戍循渊于铁岭卫】质实【姚夔字大章桐庐人】

罢巡抚提督军务

【石亨恶文臣节制武臣言于帝罢之时王竑巡抚江北改浙江参政石亨张軏辈追论竑击杀马顺事除名编管江夏居半岁帝于宫中得竑疏见正伦理笃思义语感悟顾左右曰竑所奏多为朕也命还河州勅有司善视之】质实【江夏隋县明为武昌府治今因之】

尚书王直胡濙致仕

【直年七十有八濙年八十有一皆以老乞休并赐金币给传归直性严重不苟言笑及与人交恂恂如也在翰林二十余年稽古代言编纂纪注之事多出其手洊为侍郎以次当入阁杨士奇不欲也长吏部凡十四年既告归时从诸佃仆耕蒔击鼓唱歌诸子孙更迭奉觞上寿直叹曰曩西杨抑我令不得供事我不能无望然使我在□今上复辟当不免辽阳之行安得与汝曹为乐哉後六年卒年八十有四濙节俭宽厚喜怒不形于色能以身下人在礼部久表贺祥瑞以官当首署名人因谓其善承迎历事六帝立朝垂六十年及归有三弟年皆七十余须眉皓白燕乐一室遂明其堂曰寿恺又七年卒年八十有九】

杀昌平侯杨俊

【俊初守永宁怀来闻额森欲奉上皇还密戒将士毋轻纳及驾还又言是将为祸本至是张軏舆俊不协言于朝遂徵下狱坐诛】质实【永宁城在今延庆州东四十里明永乐中置永寧县寻于县置卫今并废】

二月废景泰帝仍为郕王迁之西内

【以太后制废之遂归西内皇太后吴氏复号宣庙贤妃削肃孝皇后杭氏位号改称怀献太子为怀献世子钦天监掌监事汤序请革除景泰年号帝不从初正统二年京师旱街巷小儿为土龙祷雨拜而歌曰雨帝雨帝城隍土帝雨若再来还我土地说者谓雨帝者与帝也帝弟同音城隍者郕王再来还土地者当复辟也至是果验】

罢团营

【初范广副石亨提督团营军马亨所为不法其部曲多贪纵广数以为言亨衔之谮罢广止领毅勇一营】

高谷罢

【王文陈循等皆诛窜谷谢病帝以谷长者语廷臣曰高谷在内阁议迎驾及南内事尝左右朕其赐金币给驿舟以归谷为人清直持议正王文由谷荐挤谷谷屡请解机务不许及谷既去位杜门絶宾客有问景泰天顺间事辄不应居四年卒年七十谷位至台司敝庐瘠田仅足衣食而已】

以吏部侍郎李贤芜翰林学士入内阁预机务

【贤入阁位许彬薛瑄上与徐有贞其事帝深眷之未几进吏部尚书】

杀都督范广

【景泰初张軏自贵州征苗还于谦劾其失机不可用景泰宥之乃衔谦既夺门复辟与石亨首谋杀谦谦素信任范广軏与广不相能于是诬广党附谦为逆谋立外藩并论杀之籍其家广既被軏谮死明年春軏早朝还途中为拱揖状左右怪问之曰范广也遂惊悸得暴疾及归家月余而卒】

郕王薨

【谥曰戾毁所营壽陵葬金山与殀殤诸王公主坟相属帝欲以汪妃殉李贤曰汪妃虽尝为后即幽别宫况妃无子所生两女皆幼尤可悯帝乃已以妃唐氏等殉葬寻沂王复储位雅知汪妃前谏易储事请于帝迁居旧王府得尽携宫中所有而出与周太后相得甚欢岁时入宫叙家人礼性刚执一日英宗问太监刘桓曰记有玉玲珑击腰今安在桓言当在汪妃所英宗命索之妃投诸井对使者曰无之已而告人曰七年天子不堪消受此数片玉耶後有言妃出所携钜万计英宗命捡取之立尽】质实【周太后英宗妃宪宗生母也昌平人】

【明史赞曰景帝当倥偬之时奉命居摄旋正大位以系人心事之权而得其正者也笃任贤能励精政治强寇深入而宗社以安再造之绩良云伟矣而乃汲汲易储南内深锢朝谒不

许恩谊愀然终于舆疾斋宫小人乘间窃发事起仓卒不克以令名终惜夫】

三月以袁彬为锦衣卫指挥同知

【初帝在迤北彬周旋左右一年之内帝视彬同骨肉也南还後景泰帝授彬锦衣试百户至是进指挥同知赐予优渥时召入曲宴叙患难时事欢洽如故】

复立沂王见深为皇太子

【太子废立盖六年矣至是复立为皇太子】

封子四人为王

【见潯德王见潯秀王见泽崇王见浚吉王】质实【见潯初名见清景泰三年封荣王至是改封初国德州後改济南成化三年就藩见潯英宗第五子母高淑妃生于南宫成化六年就藩汝寧越二年卒无子封除见泽英宗第六子宪宗同母弟成化十年就藩汝寧旧秀邸也见浚英宗第七子德王同母弟生于南宫成化十二年就藩长沙】

下大同巡抚年富于狱既而释之

【时革巡抚官富亦罢归顷之石彪以私憾劾富逮下诏狱帝问李贤贤称富能祛弊帝曰此必彪为富抑不得逞其私耳贤曰诚如圣谕宜早雪之谕问官从公鞫事果无验乃释之令致仕】质实【年富字大有怀远人本姓严讹为年景泰二年春以右副都御史巡抚大同提督军务富一意拊循苏困祛弊石亨等令家人领官库银帛柴米入边多所乾没富首请按治诏宥亨等抵家人罪亨所遣卒越关抵大同富复劾亨专擅亨输罪又劾石彪等罪以是彪衔之明年以廷臣荐复起用】

鞑靼保喇寇边

【帝复位即遣都督马政等使迤北赐故巴延特穆尔妻金币以帝在北时巴延特穆尔敬护尤至也保喇遮政等执之而使使入贺且请献玉玺帝敕之曰玺已非真即真亦秦不祥物献否惟尔第毋留我使以速尔祸保喇不受命遂寇延绥都督李懋等败歿犯宁夏参将种兴战死又遣千骑屯大同边外窥偏头关帝命石亨为将军讨之亨至边无功而还已而寇势益炽边警迭闻帝忧形于色恭顺侯吴瑾侍进曰使于谦在当不令敌至此帝默然复命安远侯柳溥御之溥战辄败时饰小捷以闻】质实【吴瑾蒙古人允诚孙克勤子土木之变瑾为後拒被寇执逃归嗣侯】

夏四月帝露祷于上帝

【以灾异数见也复命廷臣列军民利病以闻】

襄王瞻墀来朝

【初帝之北狩也诸王中瞻墀最长且贤衆望颇属太后命取襄国金符入宫不果召而瞻墀上书太后请立太子命郕王监国急募勇敢之士务图迎复仍乞训谕郕王尽心辅政比书至景泰帝已立数日矣及帝还京师居南内瞻墀复上书景泰帝宜朝夕省问率羣臣朝朔望毋忘恭顺帝既复辟石亨等诬戮于谦王文以迎立外藩帝颇疑瞻墀寻于宫中得瞻墀所上二书而金符固在太后阁中乃赐书召瞻墀比二书于金膝比至宴便殿特命百官朝王于馆寻请还帝亲送至午门外瞻墀伏地不起帝问叔父欲何言顿首曰万方望治如饥渴望省刑薄斂帝拱谢曰谨受教诸王自谷府变後来朝久不许矣至是乃特行之四年复入朝六年又召以老辞岁时存问礼遇为诸藩所未有】

发明【于谦王文之死有贞辈诬以谋立外藩英宗遂疑其属意瞻墀及得襄王书比之金膝嫌疑顿释来朝礼遇特隆始终无间亦当悟狱词迎立之诬而谦文之冤死矣奈何甘受奸邪之诬罔而始终不为之辨雪哉】

释河南按察使王概于狱

【概初亦以被诬下狱会襄王入朝言于帝曰臣过汴汴父老遮道言按察使王概贤以诬逮诏狱愿皇上加察帝立出概命为大理寺卿】质实【王概字同节庐陵人】

振北畿山东饥

【侍郎周瑄振北畿命都御史林聪振山东帝恐瑄聪巡历不能周遍复遣侍郎黄仕儁继往聪屡请发帑帝诏徐有贞李贤议有贞曰发帑振济徒为里书乾没耳贤曰虑乾没而不贷坐视民用是因噎废食也帝卒从贤议】质实【周瑄字廷玉阳曲人黄仕儁四川富顺人】

五月柳州千户卢忠太监高平伏诛

【初忠为锦衣指挥诬告南宫太监阮浪传帝命结内使王瑶图复位微商辍解帝几危及是遣人收忠及平礫之市平实与忠合谋者也】

彗星见

【是月见于危芒长五寸指西南至八月余芒尚存十月复见】

下御史张鹏杨瑄等于狱并逮系都御史耿九畴罗绮【初景帝不豫廷臣请立东宫不许瑄与同官约疏争会夺门事起乃已及是印马畿内至河间民遮欣曹吉祥石亨夺其田瑄以

闻并列二人怙宠专权状帝语阁臣李贤徐有贞曰真御史也遂遣官按核而令吏部识瑄名将擢用吉祥闻而大惧诉于帝请罪之不许未几石亨自延绥还会彗星见掌道御史张鹏周斌等将劾亨吉祥诸违法事给事中王铉闻之泄于亨亨乃先与吉祥泣诉于帝诬鹏为己诛内监张永从子结党排陷欲为报讐明日疏入帝大怒遂收鹏及瑄御文华殿悉召诸御史擢弹章俾自读斌且读且对神色自若至冒功滥职帝诘之曰彼率将士迎驾朝廷论功行赏何云冒滥斌曰此辈皆贪天功当时迎驾止数百人光禄赐酒饌名数具在今超迁至数千人非冒滥而何帝默然竟下瑄鹏及诸御史于狱榜掠备至且诘主使者瑄等无所引乃坐九疇绮主谋并逮系之论瑄鹏死余遣戍亨等复谮诸言官帝谕吏部给事御史年踰三十者留之余悉调外凡三十六人】质实【给事御史调外三十六人按明史杨瑄传给事中何玘等十三人为州判官御史吴祜等二十三人为知县寻以灾变得不调皆复原官张鹏字腾霄涑水入杨瑄字廷献丰城人耿九疇字禹范卢氏人周斌字国用昌黎人王铉临安人】发明【英宗复辟以後举措皆出于已私若卢忠高平之收磔于市犹曰以诬王瑶之罪罪之固忠平所自取耳至杨瑄之劾曹石且叹其为真御史张鹏等之疏纠冒滥亦未尝不悟其非诬而卒下瑄鹏诸御史于狱且逮坐九疇等论死遣戍几若出于不得不然者周由曹石之簧鼓噂?而实木英宗有已之一念成之是磔忠平者为其祸已也逮鹏瑄者为曹石之有德于已也刑赏以公天下而悉以私意行乎其间宜纪纲之颠倒若是哉】

六月下徐有贞李贤于狱

【有贞为曹石所引用既得志则思自异窥帝意亦微厌二人乃稍稍裁抑之且微言其贪横状帝亦为之动杨瑄奏劾曹石侵占民田帝问有贞及李贤皆对如瑄奏有诏獎瑄亨吉祥大怨恨日夜谋构有贞时帝方眷有贞尝屏人密语亨吉祥令小监窃听故泄之于帝帝惊问曰安所受此语辄对曰受之有贞且曰某日语某事外间无弗闻帝由是始疏有贞会张鹏狱起亨吉祥疑诸御史论劾皆有贞主之并疑贤二人遂同至帝前具陈迎驾夺门功因曰今内阁专权欲先除臣等不然诸御史安敢尔相与悲哭不已帝心动乃谕言官劾有贞贤图擅威权排斥勲旧遂并下狱】质实【曹石石亨曹吉祥揽权恣肆当时谓之曹石】

大风雷雨雹

【大风震雷发屋拔木雨雹大如鸡卵击毁奉天殿东吻正阳门下马牌飞掷郊外都人震恐】

以灾变释徐有贞李贤及耿九疇等降谪有差

【风雹之变曹石二家尤甚大木尽拔雹深尺余钦天监正汤序本亨党亦言上天示警宜恤刑狱帝感悟乃出有贞广东参政贤福建参政绮广西参政九疇江西布政司御史周斌等十二人为知县杨瑄张鹏戍辽东贤未行以尚书王翱荐为吏部侍郎瑄鹏就道寻遇赦还或谓二人当诣曹石谢二人不可乃复戍南丹】质实【按御史十二人为周斌盛顥费广张寛王监赵文博彭烈张奎李人仪邵铜郑冕陶复俱为知县其余当调者给事中何玘等十三人

为州判御史吴祜等二十三人为知县南丹卫名隶广西庆远府今置南丹州属庆远府】

以通政司参议兼侍讲吕原入阁预机务

【原内端外和石亨曹吉祥皆敬之每大议事有不可据理争未尝谀言媚色徇人】质实【吕原字逢源秀水人】

礼部侍郎兼学士薛瑄致仕

【瑄在内阁数月见石亨等用事叹曰君子见几而作宁俟终日遂致仕去】

以翰林院修撰岳正入内阁预机务

【薛瑄既去帝谋代者尚书王翱以正荐帝亦素知其名召对文华殿正长身美须髯帝遥见色喜既登陛问年几何家安在何年进士正具以对帝连称善曰尔年正强仕畿县人又吾所取士今用尔内阁其尽力辅朕正顿首受命趋出会石亨张軹进见遇之愕然曰何自至此比入帝曰朕今日自择一阁臣问为谁帝曰岳正两人阳贺帝曰但官小耳当为吏部左侍郎兼学士两人曰陛下既得人俟称职加秩未晚帝默然遂命以原官入阁】质实【岳正字季方灞县人正统十三年会试第一赐进士及第授编修进左赞善天顺初改修撰教小内侍书】

秋七月承天门灾

【下诏罪已敕羣臣修省】

许彬罢

【彬性坦率门不多浮荡士及参政後欲谢客客竞腾谤且为石亨所忌竟不安其位出为南京礼部侍郎甫行贬陕西参政旋乞休去】

进李贤吏部尚书兼翰林学士复入内阁预机务【石亨知帝向贤虽恨贤无如何乃佯与交驩贤亦深自匿非宣召不入而帝益亲贤顾问无虚日时帝亦厌亨吉祥骄横屏人语贤曰此辈干政四方奏事者先造其门朕今一断以至公趋附者当自息贤曰愿陛下制之以渐时亨吉祥犹用事贤顾忌不敢尽言每从容论对所以裁抑之者甚至】

谪岳正为钦州同知寻下狱杖戍肃州

【正负气敢言既为帝亲拔益感激思自効或为匿名书列曹吉祥罪状吉祥怒请出榜购之帝令撰榜格正与吕原入见曰为政有体盗贼责兵部奸宄责法司岂有天子自出榜购募

者且事缓之则自露急之则愈匿帝是其言遂不究石彪镇大同遣使献捷下内阁问状使者言捕斩无算不能悉致皆梟林木间正按地图诘之曰此地皆沙漠汝梟何所其人语塞时亨吉祥恣甚正言于帝二人权太重恐久不可制请以计间之帝许马正出见吉祥曰忠国公常令杜清来此何为者吉祥曰辱石公爱致诚欵耳正曰不然彼使伺公所为耳宜谢遣之因劝吉祥辞兵柄复诣亨谕令自戢且曰上使我告公如此二人揣知正意因诣帝前免冠泣请死帝内愧慰谕之召正责漏言正对曰臣观二家必以谋叛灭臣欲全上恩故令早自为计耳二人闻之益怒会承天门灾帝命正草罪己诏因历数弊政无所避亨吉祥遂构蜚语谓正卖直讪上帝怒谪正钦州同知入阁仅二十八日耳既行道潮以母老留家月余复为尚书陈汝言所劾遂逮系诏狱杖百戍肃州行至涿夜宿传舍手攀急气奔且死涿人杨四辞卒酒脱正攀剗其中且厚赂卒乃得至戍所】质实【岳正复为尚书陈汝言所劾按明史岳正传正尝极言陈汝言小人今既为尚书可用卢彬为侍郎二人者俱谄悍若同事必相齟齬乘其隙可并去之帝虽不纳汝言怨之及正谪留家月余汝言令巡校言状并劾正尝夺公主田遂逮系诏狱杖戍边或让正以未信而谏正曰上顾我厚惧无以报称子奈何以谏官处我後在戍所帝念之曰岳正倒好只是大胆正闻自为像赞述帝前语曰岳正倒好只是大胆惟帝念哉必当有感如或赦汝再敢不敢臣尝闻古人之言盖将之死而靡憾也其自信不回如此然意广才踈欲以纵横之术离间权幸反为所噬人皆迂而惜之杜清时为都督出石亨门下後造妖言有土木掌兵权语盖言杜也亨诛清亦流金齿】

大赦

【以承天门灾也】

放徐有贞于金齿

【有贞既出石亨等憾未已必欲杀之令人投匿名书指斥乘輿因奏云此有贞怨望使其客马士权者为之遂追执有贞于德州并士权下诏狱时锦衣卫都指挥门达承亨等意痛加拷治濒死者数四士权终无所言会承天门灾肆赦亨等犹虑有贞见释乃言于帝曰有贞自撰武功伯券辞云纘禹成功又自择封邑武功禹受禅为帝武功曹操始封也有贞志图非望帝出以示法司法司鞫于庭士权大呼曰岂有自撰诰券露其逆谋之理耶及狱具谓有贞不能感恩报德乃敢玩法欺公诈为制文窃弄国柄罪当弃市为人臣欺罔戒帝以犯在赦前免死发金齿为民】质实【马士权秦州人博学有气节与有贞厚故亨辈连逮之有贞初出狱时拊士权背曰子义士也他日一女相托有贞自齿归士权时往候之絶不及婚事士权辞去终身不言人是以薄有贞而重士权门达丰城人】

九月以太常寺少卿彭时兼翰林学士入内阁预机务【初景帝监国时以修撰入阁寻丁母忧力辞不允明年兵事稍息得请终制及除服景帝命供事翰林院不复与阁事至是帝特召见仍命入阁阁臣为帝亲擢者时与岳正二人而已然帝方向用李贤数召贤独对而贤雅推重时退必咨之时引义争可否或至失色贤初小忤久之心折曰彭公真君子也】

冬十月诏为故太监王振立祠

【初土木之难言官劾振擅权误国或有言其在卫喇特为敌用者振坐族诛帝复位振党言之帝大怒谓振为敌所杀朕乃亲见追责言者过实皆贬窜帝犹念振不置复其官刻香木为振形招魂以葬建祠祀之赐额曰旌忠】

释建庶人文奎

【文奎建文帝少子永乐初幽中都号为建庶人帝怜其无罪久系欲释之问李贤贤顿首曰此尧舜用心也天地祖宗实式凭之帝意遂决即凤阳赐室宇奴婢月给薪米听嫁娶出入文奎系时方二岁至是已五十七出见牛马亦不能识未几卒】

十二月封太监曹吉祥养子钦为昭武伯

【帝复辟後吉祥以司礼监总督大营养子钦从子铉铎 皆官都督至是钦进封昭武伯】

【戊寅】二年春正月兵部尚书陈汝言有罪下狱

【汝言附曹石由郎中骤进尚书阴险贪墨边将皆出其门得贿无算始善徐有贞寻与曹石共济之既而又欲去曹石以自固亟于帝前陈二人过恶二人闻之大怒喉言官劾之遂下狱籍其家赃数十百万帝召大臣入视曰于谦终始景泰朝被遇若一身死无余赀汝言官未久何多耶因连称好于谦者三亨等俛首流汗不能对】质实【言官劾汝言按明实録时六科十三道劾汝言受总兵官杨能石彪等贿赂不赀专擅选调其弟琰理殊无功次冒升镇抚与都指挥卢旺结为心腹僭居驸马第宅私役工匠千余人造舍违式及诸不法事请正邦刑廷议汝言及旺当斩琰理罢职能等当究治上命固禁汝言及琰理旺充军能等姑宥之】

上皇太后尊号

【初岷王徽燦请上皇太后尊号礼部以非本朝故事乃止已而尚宝司少卿钱溥谓陈汝言曰复辟之初非奉太后诏谁敢提兵入禁令论功行赏无虚日而母后徽号未加宁非阙典汝言以闻帝大悦会汝言败未及行至是问李贤曰此莫大之孝也遂上尊号曰圣烈慈壽皇太后明代宫关徽号自此始】质实【钱溥字原博松江华亭人】

二月开云南福建浙江银場中官市云南珍宝

【司礼监太监福安奏云南福建浙江旧有银矿悉令采办煎销上纳京库近年或采或止国用不足请如旧制遣官开场煎办又请内官于云南等处出库收买黄金珍珠宝石从之】

夏四月太子始讲学于文华殿

【自後日在殿之东厢即所谓左春坊也帝退朝御文华殿閱章奏故令太子居此】质实【明史职官志左春坊大学士左庶子左谕德各一人左中允左赞善左司直郎各二人左清纪郎一人左司諫二人右春坊坊亦如之司经局洗马一人校书正字各二人詹事掌统府坊局之政事以辅导太子少詹事佐之凡入侍太子与坊局翰林官番直进讲尚书春秋资治通监大学衍义贞观政要诸书前期纂辑成章进御然後赴文华殿讲读讲读毕率其僚属以朝廷所处分军国重务及抚谕诸蕃恩义陈说于太子】

复设巡抚官

【时廷议复设巡抚官乃命户部侍郎年富巡抚山东金都御史程信叶盛李秉巡抚辽东两广大同】质实【程信字彦实其先休宁人家河间李秉字执中曹县人秉持法公正总兵官不乐言其专擅帝寻召还以潜下狱斥为民】

五月徵江西处士吴与弼至授左谕德不拜

【石亨知衆谕不容欲引贤者为已重谋于李贤贤或称与弼学行亨即属贤草疏荐之帝遣行人曹隆齎玺书加束帛徵与弼赴阙比至帝问贤与弼宜何官贤对曰宜以宫僚侍太子讲学遂授左春坊左谕德召见文华殿顾语曰闻处士义高特行徵聘对曰臣草茅贱士本无高行陛下垂聽虚声又不幸有犬马疾束帛造门臣慙被异数匍匐京师今年且六十八矣实不堪供职帝曰宫僚优闲不必辞赐文绮酒牢遣中官送馆次谓贤曰此老非迂濶者务令就职时帝眷良厚而与弼再三辞疏称学术荒陋苟冒昧狗禄且必旷官诏不许乃请以白衣就邸舍假读秘阁书帝曰欲观秘书且勉授职令贤谕意与弼留京师二月遂以疾笃请贤终叩其所以不就之故谓勅书崇重聘以伊傅礼意当大用而以宫僚无事虑不得即行其志故不受贤为言于帝请曲从放还始终恩礼以光曠举帝然之赐勅慰劳赉银币复遣行人送还令有司月给米二石与弼归上表谢陈崇圣志广圣学等事】质实【吴与弼字子传崇仁人年十九见伊洛渊源錄慨然向慕遂罢举子业读四子五经洛闽诸錄不下楼者数年正统景泰间屡荐不起叹曰宦官释氏不除而欲天下治平难矣至是徵至阙与弼初至李贤以宾师礼事之推之上座编修尹直至令坐于侧直大愠出即谤与弼作琐綴錄以讥之言与弼为石亨跋族谱自称门下士又布衣陈真晟于天顺二年詣阙上程朱正学纂要不报归闻与弼方讲学欲就之过南昌张元祯止之宿与语大推服曰斯道自程朱以来惟先生得其真如与弼者不可见亦不必见也石亨谱世固未有见之者後顾允成论之曰此好事者为之与弼归知府张瓚谒见不得大恚募人代其弟投谍讼与弼立遣吏摄之大加侮慢始遣还与弼知非弟意友爱如初元祯不知始末遣书诘让有上告素王正名讨罪语与弼应聘之招议犹宋儒杨时也成化五年与弼卒年七十九学者称康斋先生伊直字正言太和人陈真晟字?德漳州镇海卫人自号漳南布衣张元祯字廷祥南昌人张瓚番禺人顾允成字季时无錫人】

严自宫之禁

【初石亨等收留自宫之人至是乃自首其大名等府金吾等卫军民人等凡自宫者亦各自投首帝俱宥其罪发南海子艺蔬】质实【南海子即飞放泊在大兴县南永定门外二十里元史兵志冬春之交亲幸近郊纵鹰隼搏击以为游豫之度谓之飞放方輿胜览下马飞放泊在大兴正南广四十顷又北城店黄埃店俱有飞放泊广三十顷明一统志南海子旧为下马飞放泊】

秋八月诏修一统志

【帝谕李贤彭时吕原曰朕欲览天下輿图之广我文祖太宗尝命儒臣未究厥绪景泰间虽有成书繁简失当卿等尚折衷精要继成初志于是命贤等为总裁官书成凡九十卷】

冬十月李贤请罢锦衣官校刺事不许

【帝虑廷臣党比欲知外事倚锦衣官校为耳目由是指挥使门辽僉事遼杲俱得幸而杲更强鸞帝尤委任之杲遣校尉侦事四方所至官吏震恐多进声伎货贿以求免虽亲藩亦然无贿者辄被逮每逮一人必破数大家四方奸民诈称校尉乘传纵横无所忌贤请撤还帝不许于是其势益张】质实【遼杲安平人】

十一月免山东秋粮

【免济南东昌兖州青州四府所属被灾秋粮共五十一万一千三百余石】

【己卯】三年春正月保喇犯安边营总兵官石彪杨信击败之【先是彪备敌大同击斩巴图王搦其旗封定远伯既而充总兵官御寇宁夏至是保喇以二万骑入犯安边营彪与延绥总兵官彰武伯杨信击之连战皆捷斩其平章郭勒齐追出塞转战六十余里复大败之生擒四十余人斩首五百余级获马驼牛羊二万余为西北战功第一都督僉事周贤都指挥李监俱歿于阵捷闻进彪为侯彪既屡立战功与亨并封公侯势盛而骄多行不义驯至于败】质实【安边营在榆林府定边县东北有新旧二营相去六十里令以新营并入旧营设都司驻守周贤滁州人中流矢死赠都督同知巴图王旧作把秃王令改正】

二月采珠广东

【遣御史吕洪同内官往广东雷州廉州采州从太监福安奏也】质实【廉州唐置元路明府今因之吕洪平阳县人】

幸太监曹吉祥宅

【吉祥以夺门功得帝宠遂幸其宅时有百户李成者善谗称沙狐狸随迤北有功擅入内府求陞职帝怒命锦衣卫鞫之指挥僉事哈铭与额森特穆尔谋欲脱成罪伺帝幸吉祥宅乃

报额森特穆尔先期往候比至奏言成有功监禁乞宥帝问知事由哈铭命锦衣卫监之後録奏罪囚乃降铭副千户调发贵州卫差操】质实【贵州卫在贵阳府治西隅明洪武中置今废额森特穆尔旧作也先帖木儿今改】发明【人君幸臣工第史策每艳称之以为荣遇然亦不仅见也阁寺之徒岂能邀帝临之盛典吉祥与养子钦统领兵权家多藏甲不一二年後即有逆谋英宗懵然罔觉尚欲幸其私宅观哈铭等预期伺谋则知临幸其家者非一日矣土木之役亦以王振志在邀驾荣其乡里致罹奇变困心衡虑之余犹尚出此耶】

夏四月南和侯方瑛大破东苗

【东苗千把猪等僭号称王攻都匀诸卫命瑛与赞理军务都御史白圭合川湖云贵军四道击之瑛圭兵进青崖总兵李贵进牛皮箐参将刘玉进谷种参将李震进鬼山所向皆捷合攻石门山贼退据六美山翁受河复会兵大进生擒千把猪送京师磔之瑛前後讨川湖贵州诸苗克寨二千俘斩四万余平苗之功前此莫与比者瑛晓古兵法尝上练兵法及阵图老将多称之】质实【东苗即白苗在贵阳府贵筑龙里诸县界青崖一曰青岩在贵筑县南五十里牛皮箐形势狭长横亘于台拱八寨古州丹江都江青江六厅之间东西绵长一百四十余里南北宽三四十里周围统计三百六十余里今有屯田隶贵州丹江通判谷种寨在湖广绥宁县西境鬼山六美山皆生苗之地与贵州接境石门山在贵筑县东六十里翁受河一曰瓮首河在贵定县南大平伐司东南二十里白圭字宗玉南宫人刘玉字仲玺磁州人李震南阳人】

六月复命巡抚官以八月集京师议事

【命户部移文各巡抚以地远近分年赴京议事】

秋八月石彪有罪下狱

【彪自陕西召还谋镇大同与亨表里握兵柄令千户杨斌等奏保帝觉其诈收斌等拷讯得实大怒下彪诏狱令门逮鞫之得其绣蟒龙衣及违式寝牀诸不法事罪当死遂籍彪家并逮其党治之彪事既发言官将于朝班劾之有泄于彪者帝闻之大怒乃勅文武大臣无故不得相往来给事中御史及锦衣官不得与文武大臣交通违者依太祖铁榜例治罪】质实【铁榜明史宦官传太祖尝镌铁牌置宫门曰内官不得干预政事预者斩】

冬十月石亨以罪罢

【先是亨以彪下狱大惧请罪帝慰谕之亨请尽削弟侄官放归田里不许法司再鞫彪言初为大同游击以代王增禄为已功王至跪谢自是数款彪出歌妓行酒彪凌侮亲王罪亦当死因交章劾亨招权纳贿肆行无忌私与术士讲论天文妄谈休咎宜置重典帝命锢彪于狱罢亨闲住絶朝参】质实【代王代隐王仕壘也仕壘简王桂之孙正统十一年桂卒其世子逊熾先卒十三年以仕壘嗣封】

诏自今章奏勿用夺门字诸冒功者黜之

【石亨既得罪帝以夺门字问李贤贤曰迎驾则可夺门岂可示後天位乃陛下固有夺即非顺彼时亦幸成功耳万一事机先露亨等不足惜不审置陛下何地帝悟曰然贤曰若景泰果不起羣臣表请复位此辈虽欲陞赏以何为功老臣耆旧依然在职何至有杀戮降黜事致干天象招权纳贿何自而起国家太平气象岂不益盛今为此辈损削过半矣帝深然之乃诏自今章奏勿用夺门字诸冒功得官者自首更正黜四千余人朝署为清】

诏霜降後録囚着为令

【每岁霜降後三法司会同廷臣审録重囚谓之朝审遂为定制】

【庚辰】四年春正月石亨以罪下狱二月亨瘐死石彪伏诛【遼杲奏亨怨望逾甚与从孙後等日造妖言且蓄养无赖专伺朝廷动静不轨迹已着廷臣皆言不可轻宥乃下亨诏狱坐谋叛律应斩没其家赀未几亨瘐死彪及後并戮于市帝初缘亨复位德之亨无日不入见即不召必假事以进一日亨引二人侍于文华殿帝问曰此何人亨曰此千户卢旺彦敬臣有机密事必与谋如迎请复位其功实多乃擢二人为指挥使自是干请无虚日弟侄家人冒功锦衣者五十余人部曲亲故窜名夺门籍得官者四千余人亨每见出必张大其言在亨门下者得亨语即扬于衆以为声势朝臣奔走恐後以货之多寡为授职美恶入之先後为得官遲早时有朱三千龙八百之谣谓郎中朱铨龙文辈俱以贿被擢也既以宿怨残害忠良大狱数兴廷臣侧目大权悉归于亨亨预政事所请或不从艴然见于辞色久之帝不能堪以语李贤贤曰惟独断乃可因勅左顺门非宣召毋纳总兵官亨燕见遂稀所请亦渐有不从者亨犹不悟恣横如故初帝命所司为亨营第既成壮丽踰制帝登翔凤楼见之问谁所居吴瑾侍侧谬对曰此必王府帝曰非也瑾曰谁僭踰若此帝颔之遼杲本亨所擢密受帝旨往往伺亨所为以报而亨竟不知从子彪本以战功起家不籍父兄荫然一门二公侯所蓄材官猛士不下数万中外将帅半出其门又谋镇大同为天下精兵处权倾人主羣疑其有异志故遂及于祸】质实【按明纪事本末瞽人童先者出妖书曰惟有石人不动劝亨举事亨谓其党曰大同士马甲天下吾抚之素厚今石彪在彼可恃也异日以彪佩镇朔将军印专制大同北塞紫荆关东据临清决高邮堤以絶饷道京师可不战而困及保喇寇延绥帝命亨往御之童先又力劝亨亨曰为此不难但天下都司除代未周待周为之未晚也先曰时者难得而易失亨不聽会彪败罢亨而亨谋渐急事益露其家人上告变逮治之据此则亨不轨之谋乃其家人所发而明史亨传以为杲奏存考翔凤楼在南内龙文泰和人】

夏四月大雨雪

【月余乃止】

秋七月乙亥朔日有食之

徵天下逋逃工匠

【凡三万八千四百余名命吏部铨官二十员分往督捕之】

淮水决没军民田庐遣使振恤

【凤阳府自五月连雨抵七月淮水溢决坝埂没田庐甚多事闻命加意振恤所决城坝以渐筑之】

下工部侍郎翁世资于狱贬知衡州府

【苏抗等府织染局岁造有定数帝遣内使增造彩緞七千尺世资请减之帝怒下锦衣卫狱寻贬衡州府知府】质实【翁世资字资甫莆田人】

八月鞑靼分道入寇

【保喇与玛拉噶等分三道自大同威远西拥衆南行总兵官李文不敢出保喇直抵雁门至代朔忻诸州肆掠帝遣都督顔彪率师至紫荆关冯宗至倒马关御之寇稍引去】质实【威远卫名在大同府城一百八十里代州秦为雁门郡隋置代州明初改代县後仍为州属太原府今升隶州忻州秦属太原郡随置忻州明属太原府今升直隶州倒马关在易州广昌县南七十里东南至定州二百五十里李文西番人 玛拉噶旧作毛里孩今改】

冬十二月释徐有贞归

【有贞在金齿三年石亨败帝谓李贤曰有贞何大罪为石亨辈所陷耳其释归田里有贞既归犹冀复召时时仰观天象谓将星在吴益自负常以铁鞭自随数起舞及闻韩雍平两广有功乃投鞭太息曰孺子亦应天象耶遂放浪山水间十余年而死】质实【韩雍字永熙长洲人】

【辛巳】五年春二月巡抚广东都御史叶盛请罢采珠池从之【菜盛奏广东珠池经二次采取今珠螺稀嫩须暂停缓方得长大况雷廉等府州县夫蜚累被广西流贼刼杀必须大兵宁靖人力寛苏之日方可采捞帝命户部议行】

免山东被灾税粮

【免山东粮二十四万余石】

三月免苏松常镇被灾税粮

【免苏松常镇四府粮五十三万余石】

湖广贵州总兵官李震会广西军剿猺獞悉破之【震从方瑛平贵东苗千把猪瑛卒即以震充总兵官镇湖广贵州初李添保以逋赋逃八苗中伪称唐太宗後拥衆万余僭王号建元武烈剽掠远近震进击大破之添保遁入贵州鬼池诸苗中复诱苗作乱震擒送京师伏诛至是进剿猺獞皆破之长驱至广西会总兵官大克诸猺前後俘斩数千人】质实【李天保麻城人】

夏五月免河南被灾秋粮

【免河南粮二十六万余石】

杀弋阳王奠璫

【初遼梟聽詞事者言诬奠璫烝母帝令奠璫兄靖王奠培具实以闻遣官与梟按问奠培奏无其事梟按亦无实帝怒责问梟梟惧乃执如初帝竟赐奠璫母子死焚其尸方昇尸出大雷平地水深数尺人咸以为冤】质实【弋阳王奠璫宁献王权之孙】

下南雄知府刘实于狱寻死

【实居官三十余年廉介爱民中官过郡多邀索弗与中官折辱之郡民大呼拥实去中官慚忿诬以罪逮下诏狱瘐死郡民哀而祠之】质实【南雄宋州元路明府今因之刘实字嘉秀安福人】

六月遣尚书马昂怀宁伯孙镗击保喇

【保喇衆万余屯庄浪攻凉州诸卫副总兵仇廉御之败绩敌渡河剽掠官军莫敢撓其锋关中震恐帝以昂总督军务镗充总兵官率军击之未行而曹吉祥之乱作】质实【庄浪卫本唐凉州地明洪武中置卫寻改守御所永乐中复置卫今设庄浪营参将隶凉州镇马昂字景高沧州人】

彗星见

【戊戌夜见东方光芒长三尺余尾指西南庚子丙午夜复见至丙寅夜始灭】

秋七月太监曹吉祥及其养子钦反怀宁伯孙镗讨之钦败死吉祥伏诛

【正统间吉祥屡出监军辄选达官善骑射者隶帐下师还蓄于家故家多藏甲石亨败吉祥不自安渐蓄异谋日犒诸达官金钱谷帛恣所取达官亦恐吉祥败而已随退黜也皆愿尽

力结为死党千户冯益景泰间请从上皇于沂州复辟後以吉祥请得不诛因客钦所钦问曰古有宦官子弟为天子者乎益曰君家魏武其人也钦大喜钦有家人百户曹福来者得罪逃去奏行捕治钦乃别遣家人寻获至家私掠死为言官所劾帝令指挥逮杲按之且降勅徧谕羣臣毋自专干宪典钦惊曰前降勅遂捕石将军今复尔殆矣反谋遂决使其党掌钦天监太常寺少卿汤序择是月庚子昧爽钦拥兵入废帝而已以禁兵应之谋定钦召诸達官夜饮时怀宁伯孙镗奉诏西征将陞辞是夜与恭顺侯吴瑾俱宿朝房达官马亮恐事败逸出走告瑾趋告镗从长安右门隙投疏入曰急变即达御前迟则用军法斩镗与瑾俱拙于书惟曰曹钦反曹钦反帝得奏急繫吉祥于内而勅皇城四门京城九门闭勿启钦以亮逸知事泄中夜驰往逮杲家杀杲斫伤李贤于东朝房以杲头示贤曰杲激我也逼草奏释己罪亡何又执尚书王翱贤乃就翱所索纸佯草疏乃获免钦又杀都御史寇深于西朝房遂率衆攻东西长安门不得入纵火守卫者折河墻甃石塞诸门贼往来叫呼门外镗遣二子急召西征军大呼曰有狱贼反获者得重赏西征军奔集至二千人镗曰不见长安门火耶曹钦反能杀贼者必赏遂击钦钦走攻东安门瑾将五六骑觐贼猝与遇力战死钦复纵火门毁门内聚薪益之火大炽贼不得入天渐曙钦党稍稍散镗勒兵逐钦镗子砍钦中膊钦走突安定诸门门尽闭奔归家拒战会大雨如注镗督诸军奋呼入钦投井死其家无大小尽诛之帝出吉祥与钦尸同磔于市汤序冯益及姻党皆伏诛马亮以告反授都督进孙镗为侯李贤王翱进太子少保封吴瑾凉国公谥武庄赠寇深少保 谥庄?将士陞赏有差以擒贼诏示天下大赦】质实【沂州後魏置北徐州周改曰沂州明属兗州府 本朝雍正二年升直隶州十二年升府寇深字文渊唐县人永乐间为庠生其乡人有谋不轨驰京师告发得为国子生正统中以右佥都御史镇守四川松潘以功陞左副都御史景泰二年召还复命提督辽东军务英宗复辟陞左都御史初亦阿事曹钦父子已而疏之故及于祸】

免南畿被灾税粮

【免应天等府粮五十九万七千七百石有奇】

求直言

【诏曰凡朝廷得失生民利病百僚贪暴奸邪近侍风宪职皆当言近多嘿嘿畏避权势今後无讳不当者亦不罪焉】

河决开封

【城中水深丈余官舍民居漂没者过半周王及诸守土官乘舟筏避于城外军民死者不可数计】质实【周王周定王橚之孙懿王子堕也天顺元年袭封】

罢孙镗西征遣都督冯宗充总兵官代之

【孙镗既不行边报益急因命宗充总兵官御之起副都御史王竑于家与兵部侍郎白圭

参赞军务八月保喇三上书乞和帝遣指挥使唐昇齎勅谕之自是每岁入贡而寇掠如故明年白圭王竑巡边遇敌皆败之时穆尔格尔与保喇相仇杀未几穆尔格尔死衆共立其兄蒙古勒克埒青吉思亦号小王子自是鞑靼部长益各专擅】

九月京师地震有声

【壬戌巳时地震有声起自西南方至东南方止】

冬十一月丁酉朔日有食之

【壬午】六年夏四月免河南被灾税粮

【免河南开封等五府所属四十州县去年被灾秋粮二十八万四千余石】

五月都督佥事顔彪击广西猺破之

【自元年春大藤峡猺为乱两广苗猺獞蠡起广西残毁殆偏前年帝命彪为总兵官讨之彪会两广兵攻破七百余寨驻军大藤峡进击龙山直抵梧浔所向皆捷而彪多滥杀冒功剿捕不能尽贼故不久即发明年贼夜薄梧州城时总兵官陈涇驻兵城中会议调兵贼三更驾梯入涇不觉贼遂入府治劫官库放罪囚杀死无算大掠城中执副使周璫为质杀死训导任璩有致仕布政使宋钦挺身出以大义谕贼为贼害贼声言官军莫动动则杀周副使涇拥兵自卫不敢发一矢纵贼出城而与讲和贼亦寻遣璫还时官军数千贼仅七百骑事闻帝降旨切责而已】质实【大藤峡在广西浔州府桂平县西北浔州之境万山盘亘中有水曰浔江发源抑庆东绕至浔带象州永安修人荔浦平乐诸郡县夹江诸山 硯巖其最险恶地为大藤峡宏石矶之下弩滩之上通罗渌三洞紫荆罗运等三十六巢峡岸有大藤横生过江日沉水底夜浮水面连亘峡涧势如徒杠贼渡而南以通龙山别寨南截浔水为府江自藤峡至府江约三百余里地惟藤峡最高登藤峡岭数百里皆见军旅之聚散往来可顾盼尽也诸蛮以此为与区桂平大宣乡崇姜里为前庭象州东乡武宣北乡为後户藤县五屯障其左贵县龙山据其右而峡北岩洞更以百计如仙人关诸处其极险厄者峡以南则有牛肠古岵诸村皆缘江立寨藤峡府江之间为力山力山之险不下藤峡又南为府江周遭六百里峡中冥岩奥谷悬磴絶壁入者手挽足移十步九折若一失足陨身万仞中产猺人蓝胡侯盘四姓为渠魁力山又产獞人善傅毒药弩矢中人立死虽四姓猺亦惮之景泰中猺渠侯大狗等倡乱啸聚万人羣起应之攻堕郡县出没山谷守臣不能制辄招抚縻之天顺中益纵恣诏能捕大狗者予千金爵一级竟不可得久之蔓延两广所至残毁为楚粤大害矣龙山在浔州贵县北五十里以为藤峡左臂陈涇泰州人泰寧侯陈珪之後宋钦苍梧人】

秋七月淮安海溢

【溺死盐丁一千三百余人命免两淮盐课三十万引】

九月皇太后孙氏崩

【谥孝恭皇后】

广锦衣卫狱

【初逮梟给事门达左右达倚为腹心及梟得志达反为之用至是梟已死达欲踵其所为益布旗校于四方告讐者日盛寻以囚多狱舍不能容请城西武库隙地增置之及达败始毁去】

冬十一月葬孝恭皇后

【合葬景陵祔太庙】

翰林院学士吕原卒

【初石亨曹吉祥用事贵倨独敬原原朝会衣青袍亨笑曰行为先生易之原不答寻与岳正列亨吉祥罪状疏留中二人怒摘勅谕中语谓阁臣谤讪帝大怒坐便殿召对厉声曰正大胆敢尔原素恭谨阿正何也正罢去原得留至是遭母丧乃归葬寝苦哀毁体素丰遂羸瘠甫襄事而卒原佐李贤秉政贤通达遇事立断原守正济以持重会彭时亦入三人同心辅政庶务称理原卒年止四十五赠礼部左侍郎谥文懿】

【癸未】七年春二月以陈文为礼部侍郎兼翰林学士入内阁预机务

【文自广东左布政使丁母忧特召为詹事侍东宫讲读吕原卒帝问李贤谁可代者对曰柯潜可出告王翱曰陈文年资皆深举潜置文何地明日贤入见固请用文帝乃许之文既入阁每事与贤争曰吾非若所举也】质实【陈文字安简庐陵人柯潜字孟时莆田人】

夏四月杀巡按御史李蕃

【蕃巡按宣大锦衣卫侦事者言其擅挾军职逮治之又辽东巡按御史杨璉山西巡抚御史韩祺并以中官诬奏相次被逮蕃与祺并荷校死】质实【李蕃云南河阳人杨璉祈县人韩祺萧山人】发明【巡按许其便宜行事有明一代之纪政立法固未为善然既奉诏巡行则谘询疾苦整励风教亦其职分所宜即偶有过举亦当廉察其是否倚势作威而後治之乃以一锦衣侦事者之言竟成定讞绣衣特设之谓何不若罢之之为愈也况官校刺事自李贤请撤後其势益张至是而中外耳目悉寄于若辈矣岂独冤一李蕃哉】

五月己丑朔日有食之

秋七月免陕西被灾税粮

【免陕西粮九十一万石】

闰七月追上宣宗后胡氏尊谥

【孙太后崩钱皇后为帝言胡后贤而逊位其歿也人畏孙太后殓葬不如礼因劝复其位号帝问李贤贤对曰陛下此心天地鬼神实临之臣以陵寝享殿神主俱宜如奉先殿式帝从之奉册宝上尊谥曰恭让诚顺康穆静慈章皇后】

冬十月振陕西饥

【振陕西西安诸府饥粮一百八十万余石】

十一月下锦衣卫指挥同知袁彬于狱寻释之

【彬与门达同掌锦衣卫事彬恃帝旧恩不为达下达深衔之乃诬彬罪且言其尝受曹石贿奏下彬于狱有军匠杨坝者愤然不平为彬讼冤上疏言昔者驾在北庭独彬以一校尉保护圣躬备尝艰苦今卒然付狱乞御前录审则死无憾并条陈达诸不法事击登闻鼓以进诏并下达治时大学士李贤方被宠任数陈达罪达憾入骨欲并去之乃榜坝究主使坝知达意即谬曰此李学士导我也达大喜即奉闻请法司会鞫于门外帝遣中官裴当监视达欲执贤为质当曰大臣不可辱乃止及讯坝仰曰吾小人何由见李学士门锦衣实教我言之达色沮不能言彬亦历数达纳贿状法司畏达不敢闻坐彬绞输赎坝斩帝命彬赎罪毕调南京锦衣而禁锢坝】质实【杨坝或作杨瑄为彩漆军匠】

发明【民有讼其有司者必易他吏治之此犹闺阁细故也况大狱乎杨坝为袁彬讼冤并及门达诸不法事时达方权倾朝野即下诸司讯鞫犹恐有所顾畏未能尽得其情何乃竟付达治耶迨门达之纳贿已确凿可数李贤之主使又毫无可凭而法司犹论彬坝以死可知是非颠倒实由英宗不能自操阿柄使然观袁彬传载当达诬奏彬时英宗语之曰任汝往治但以活袁彬还我此岂君人者之言耶】

【甲申】八年春正月帝不豫命太子视事文华殿

【有间大子于帝者帝卧文华殿密召李贤告之贤顿首伏地曰此国本也愿陛下三思帝曰然则必传位太子乎贤又顿首曰宗社幸甚帝起立召太子至贤扶太子令谢太子抱帝足泣帝亦泣谗竟不行】

帝崩遗诏罢宫妃殉葬

【初太祖崩宫人多从死者历成祖仁宣二宗皆用殉多者至数十人景泰帝以郕王薨犹用其制至是帝遣诏罢之】

太子见深即位

【以明年为成化元年】

大赦

免明年田租三之一

释参政罗绮于狱

【绮前以张鹏杨瑄狱降广东参政过磁州会州同知龙约自京还与绮言帝为王振建祠事绮叹曰朝政如此吾辈自应降黜怨家闻而告之帝捕绮下狱籍其家至是帝立赦为民还其资产】

侍读学士钱溥以罪贬官

【溥尝授内使书东宫内侍王纶从受学英宗疾笃纶私诣溥计事陈文与溥比舍居密观之已而英宗崩李贤当草诏文起夺其笔曰无庸已有草者因言溥纶定计欲以溥代贤而以兵部侍郎韩雍代尚书马昂贤怒发其事会大敛时纶衰服袭貂帝怒之因数纶罪执下狱词所连者十余人谪溥顺德县知县降雍为浙江参政】质实【顺德县景泰中析南海县地置属广州府今因之王纶典玺局局丞】

二月指挥僉事门达下狱戍边

【达先以王纶必柄用预为结纳及纶败调贵州都匀卫甫行言官交章劾之左都御史李宾疏言达恃恩藐法玩弄威权文纲苛细大狱屡兴假托上旨恣逞贪残官校驿骚子弟奸比罪浮于谪遣当正国法于是逮系坐斩籍其家後贷死戍广西南丹卫】质实【李宾字廷用顺义人宾刚简镇默以伉直着名门达廷讯时负固强辨至宾前曰公直讯我遂引服】

袁彬复掌锦衣卫事

【门达败召还袁彬代之】

始以内批授官

【帝命中官传旨用工人作文思院副使自後相继不絕一传旨姓名至百十人谓之传奉

官文武僧道滥恩者以千数】质实【明史职官志工部文思院大使一人正九品副使二人从九品】

发明【授官必由阁部亦古者爵人于朝与衆共之之义所以遴选才能慎重名器即至微曹散秩亦悉由铨次之常若除授径出于内批则是斜封墨敕之滥觞矣况传奉至于千百滥予及于工人僧道尤前代所罕有厥後方外继晓李孜省辈皆以内侍荐授致位尊显而诸杂流加侍郎通政等衔者不可悉数作福擅威朝野侧目其弊至于不可救药宪宗早位储宫中更多故宜其虑患之深而初政已如是其又谓之何哉】

三月尊皇后为慈懿皇太后贵妃周氏为皇太后【帝命议上两宫尊号中官夏时欲独尊贵妃为太后李贤彭时持不可顷之中官传贵妃旨曰子为皇帝母当为皇太后岂有无子而称太后者宣德间有故事彭时曰今日事与宣德异胡后上表让位故正统初不加尊今名分固在安得为此中官曰如是何不草让表时曰先帝时未尝行今谁敢草中官复厉声恫之时拱手面天曰太祖太宗神灵在上谁敢二心且钱后无子何所规利而为之争不忍默者欲全主上圣德若推大孝之心则两宫并尊为宜贤亦极言之议遂定将上册宝彭时曰两宫同称则无别钱皇后请二字以便称谓从之越数日中官覃包至内阁曰上意固如是但迫于太后不敢自主非二公力争几误大事陈文初默无一语闻包言大愧】

放宫人

【时日黯无光李贤偕同官上言曰者君象君德明则日光盛惟陛下敬以修身正以御下刚以断事明以察微持之不怠则天变自弭又言天时未和由阴气太盛自宣德至天顺间选取宫人太多浣衣局没官妇女愁怨尤甚宜皆放还帝从之中外大悦】

召岳正还

【诏正以原官直经筵正自谓当大用而李贤欲用为南京祭酒正不悦会有忌者伪为正劾贤疏草贤嫌之未几出为兴化知府正至官筑堤溉田数千顷节缩浮费经理预备仓欲有所兴革乡士大夫不利其所为腾谤言正亦厌吏职後以入覲遂致仕寻卒年五十五无子正博学能文章高自期许气屹屹不能下人在内阁才二十八日勇事敢言便殿论奏至唾溅帝衣英宗亦悉其忠】

复立团营

【帝用会昌侯孙继宗等言于五军神机三千营选壮勇官军一十二万分立十二营各命侯伯都督等官坐营团练命继宗同太监刘永诚总管提督每遇操时仍遣给事中御史各一员巡察明年正月复罢去又明年复立】质实【十二营曰奋武曰耀武曰练武曰显武曰敢勇曰果勇曰鼓勇曰効勇曰立威曰申威曰扬威曰振威孙继宗字光辅孝恭章皇后之兄】

夏四月癸未朔日食不见

【下天文生贾信于狱帝以信所言失实非惟术数不精且事涉轻率故逮治之】

五月大风雨雹

【大雨雹大风飘瓦拔郊坛树李贤上言天威可畏陛下当凜然加省无狎左右近幸崇信老成共图国是帝嘉纳之】

葬裕陵

【谥曰法天立道仁明诚敬昭文宪武至德广孝睿皇帝庙号英宗】质实【裕陵在石门山距显陵西三里自显陵碑亭前分西为裕陵神路】

【明史赞曰英宗承仁宣之业朝野清宴大臣辅政纲纪未弛独以王振擅权开衅遂至乘輿播迁乃复辟而犹追念不已抑何惑也然而释建庶人之幽系罢宫妃之殉葬则盛德之事可法後世者矣】

秋七月立皇后吴氏八月废之冬十月立妃王氏为皇后

【时有司以遗诏请大?南京吏部侍郎章纶言山陵尚新元朔未改陛下践祚之初当以孝治天下乞俟来春徐议大礼疏至京而册立已行矣后立甫逾月以万贵妃已擅宠摘其过杖之帝怒废居别宫乃册王氏为后贵妃宠冠後宫王后处之澹如也以是得安】质实【废后吴氏顺天人皇后王氏上元人万贵妃诸城人时年三十有五帝宠之颛房】

前礼部侍郎兼学士薛瑄卒

【瑄告归凡七年及得疾危坐正寝而逝年七十有二赠礼部尚书谥文清瑄学一本程朱其修己教人以复性为主充养邃密言动可法尝言自考亭而後斯道大明无烦着作直须躬行耳有读书録二十卷平易简切皆自言其所得学者宗之】

始置皇庄

【以没入曹吉祥地为宫中庄田皇庄之名自此始给事中齐庄言天子以四海为家何必与民争利弗聽自是戚畹及中贵家多夺民地为庄田矣】质实【抄没曹吉祥地在顺义县安乐里板桥村】

立武举法

【初吴元年始定武科洪武二十年用武举令武臣子弟于各直省应试寻废不行至是复命直省举诸武艺人兵部同总兵官考校策畧弓马分别甲乙以备録用指挥以下子弟悉令入学】质实【考校策畧弓马按明史选举志帅府试策畧教场试弓马答策二道骑中四矢步中二矢以上者为中式骑步所中半者次之成化十四年太监汪直请设武科乡会试悉视文科例弘治六年定武举六岁一行先策畧後弓矢策不中者不许骑射十七年改定三年一试出榜赐宴正德十四年定初场试马箭二场试步箭三场试策嘉靖初定制各省应试举者巡按御史于十月考试两京武学于兵部选取俱送兵部次年四月会试翰林二员为考试官给事中部曹四员为同考官乡会场期俱于月之初九二十五起送考验监试张榜大率仿文闈而减杀之】

十二月免京官杂犯罪

【敕两京文武除犯赃外杂罪记录者悉免之】

御定资治通监纲目三编卷十二

卷十三

钦定四库全书

御定资治通鉴纲目三编卷十三

【起乙酉明宪宗成化元年尽庚寅明宪宗成化六年】凡六年

【乙酉】宪宗纯皇帝成化元年春正月遣都督赵辅僉都御史韩雍讨广西猺

【守臣奏广西猺獞流剽广东又越湖广江右日益蔓延乞选将征讨兵部尚书王竑亦言贼非大创不止荐雍才气无双平贼非雍莫可乃命辅为征夷将军以太监卢永陈瑄监其军召雍为左僉都御史赞理军务】质实【赵辅字良佐凤阳人】

开纳粟例

【以备两广军饷】

二月诏雪于谦狱

【御史赵敌言于谦等为石亨辈诬陷榜示天下其後亨辈不一二年亦皆败露陈循等已邀恩宥无俟臣言独思正统十四年寇犯京城谦一人保守其功甚鉅伏乞收回前榜死者恤赠生者録用帝曰朕在东宫时即闻谦冤谦有社稷之功而受无辜之惨所司其急如敌言施行释子冕还家冕先授副千户明年八月复冕官遣行人往祭谦墓制辞有云当国家之多难保社稷以无虞惟公道之独持为权奸所并嫉在先帝已知其枉而朕心实怜其忠天下传诵之】质实【陈循已邀恩宥按明史循传石亨败循自眨所上书自讼言天位陛下所固有当天与人归之时羣臣备法驾恭诣南内奉请临朝非特宫禁不惊抑亦可示天下万世而亨等侥幸一时计不出此卒皆自取祸败臣服事累叶曾着微劳实为所挤惟陛下怜察诏释为民赵敌武进人】

帝耕藉田

彗星见

三月帝诣国子监行释奠礼

【帝视太学释奠先师始加牲用乐停祭酒官以下宴】

荆襄盗起

【荆襄上游为郧阳古麇庸二国地元至正间流贼聚此作乱终元世不能制洪武初邓愈以兵剿除空其地禁流民不得入然地界秦豫楚之间又多旷土山谷院塞林箐蒙密中有草木可采掘以食正统二年岁饥民徙入不可禁聚既多罔稟约东其中巧黠者稍稍相雄长汉中守臣以闻请诛之英宗曰小民为饥寒迫耳奈何即用兵命御史抚辑谪戍数人余阳听抚而大奸潜伏不出寻复纵势益滋蔓有锦衣千户杨英者奉使河南策其必反上疏言流逋之衆宜选良吏抚恤渐图所以散遣词甚淳切不报三省长吏又多谗非已境因循不治至是有刘通者纠其党石龙刘长子及苗龙苗虎等聚衆数万为乱伪称汉王建元德胜伪署将军元帅寇襄邓境指挥陈昇等二十四人死焉时王恕方以副都御史出抚悬榜晓谕而未受征讨之命贼扭为故常横掠如故恕闻于朝曰民可抚而奸民好乱者非兵不慑于是命抚宁伯朱永为总兵官尚书白圭提督军务发军会王恕李震进讨之至南漳破贼永适疾留镇使知贼巢在豆沙河万山之中列为七屯明年夏圭督诸军分道进连击之贼乃据险抗官军下木石如雨官军四面仰攻蚁附而登贼不能支遂大败破其巢生擒通等二千八百七十余人斩二千五百六十级获贼属子女一万一千六百余人牛马驴骡一万有奇石龙刘长子逸去会永病愈帅师搜余贼龙等又转掠四川毁巫山大昌圭分兵蹙之贼被围食尽刘长子缚龙以降并获通妻连氏遂班师贼息】质实【南漳汉临沮中庐二县地隋置南漳县明旧属襄阳府今因之豆沙河在郧阳府保康县西北下流入筑水巫山楚巫郡秦巫县隋改巫山县明属夔州府今因之大昌晋泰昌县後周改大昌宋属火宁监元并入大宁州明洪武四年复置後又并入大宁县永乐初复置属夔州府 本朝康熙九年省入巫山县刘通河南西华人少负膂力县治门有石狮重千斤通手举之因号刘千斤石龙号石和尚刘长子号刘子龙王恕字宗贯三原人朱永字景昌夏邑人谦之子纪事本末白圭遣指挥张英诱降刘长子诸将忌英功潜于朱永以事捶杀英】

夏五月大雨雹

【避正殿减膳敕羣臣修省】

四川盗赵铎作乱官军击斩之

【宣德时四川郫彭诸县盗贼蠭起夺财杀人事闻上命副都御史贾谅等往会四川三司调军捕之仍敕谅巡视军民利病谅等捕获盗首王洪陰海等正法未几土豪王永义?城堡肆掠官军讨失利悬千金购而诛之而赵铎复继起作乱铎初与绵竹人徐贵有隙贵告铎家匿羣盗县官捕之急遂反与贼徒杨瓚僧悟昇陈焕章黄鷄子等流劫延至襄邓诸郡瓚等相继败死铎再听招抚复业辄复为乱纠合番蛮四散剽掠伪号赵王至是巡抚金都御史汪浩檄官军合击之铎走彰明县千户田仪等设伏间道分兵直捣其巢贼大败铎与余党奔仪侦知之追及仪以手刃刺铎铎堕马斩之传首成都赋平】质实【郫县古郫邑秦置郫县明属成都府彭县古彭国唐置彭州明改州为县属成都府今皆因之绵竹县汉置明属汉州今属绵州彰明县汉涪县地唐昌明後唐改为彰明属绵州今属龙安府赵铎德阳人汪浩石首人】

六月夺张瑾杨宗袭爵

【瑾父太平侯軼宗父兴济伯善俱以夺门功封时以迎复袭爵者皆革夺惟瑾宗尚袭封指挥同知董源等援例乞复遂并革瑾宗以瑾为锦衣指挥使宗为指挥同知】

秋七月免天下军卫屯粮十之三

八月两畿湖广浙江河南饥

【给事中袁芳等上言比来救荒无术老弱转死丁壮流移南阳荆襄十余万流民两京浙豫或水或旱禾麦绝收乞敕官司振济于是命王恕及浙豫撫按各振其属旋遣工部侍郎沈义往保定金都御史吴琛往淮扬内外诸臣请缓徵盐钞逋赋等皆从之义琛无他策惟条上纳粟事例既而皆以不恤民瘼斥罢】质实【袁芳丰城人沈义江都人吴琛繁昌人】

冬十月韃靼玛拉噶寇延绥

【敌衆甚盛诏大同总兵杨信宁夏总兵李杲陕西巡抚项忠等率所部兵御之官军力战乃引去初鞑靼入寇或在辽东宣府大同或在宁夏庄浪甘肃去来无常为患不久景泰初始犯延绥然部落少不敢深入天顺间有阿勒楚尔者率属潜居河套遂逼近西边出没为患河套古朔方地唐张仁愿筑三受降城处也地在黄河南自宁夏至偏头关延袤至二千里饶水草外为东胜卫东胜而外土地平衍敌来不能隐明初守之後以旷绝内徙至是保喇与小王子并玛拉噶等先後继至掳中国人为向导抄掠延绥无虚时矣】质实【三受降城唐景隆二年筑东受降城在今归化城西黄河东岸中受降城在今卫特喇旗西黄河北岸西受降城在今卫喇特旗西北黄河北岸项忠字荇臣嘉兴人阿勒楚尔旧作阿罗出勒今改】

发明【东胜卫既废日以旷绝内徙渐屏藩篱以可牧可屯二千里肥饶之野置之瓯脱之区是弃以资敌也小王子马拉噶等先後入居河套得坐待以乘其隙遂至大同宁夏岁无宁日此与割广宁弃开平同一失策其酿兆边患亦与明代相终始云】

韩雍破獠于大藤峡

【初国子监生封登奏浔州夹江诸山险峻中有大藤如斗延亘两崖势如徒杠蛮衆蚁度号大藤峡中产獠人又有獞人自景泰以来啸聚为乱隳城杀吏所至邱墟乞调兵剿灭报闻及朝议用兵编修邱濬上书李贤言贼在广东者宜驱在广西者宜困贤善之献于朝诏录示诸将诸将多主其说欲分兵两广韩雍曰不然贼已蔓延数千里而所至与战是自败也大藤峡贼之巢穴我以全师捣之控制四面势如常山之蛇动无不应心腹既溃余迎刃解耳赵辅知雍才足办贼军谋一听于雍雍乃率官军倍道至全州破阳峒西延叛苗斩指挥失律者四人军中震悚无不听命遂抵桂林雍与诸将议曰修仁荔浦藤峡之羽翼也不剪则藤峡不孤乃以土兵十六万先破修仁荔浦寻长驱至峡口衆议峡天险不可攻宜屯兵围之且战且守雍曰不然峡山六百余里安可围也且屯兵日久懈将士心今我军勇气百倍贼已丧魄因而乘之可立破也遂长驱至峡口儒生里老数十人伏道左欲为向导雍见即骂曰贼敢给我叱

左右缚斩之左右皆愕既缚而袂中利刃出推问果贼也悉支解刳肠胃分挂林箐间累累相属贼大惊曰韩公天神也雍督诸军水陆并进猺贼悉力出扞峡南排栅坚密滚木礮石鏢枪毒矢雨下如注官军登山仰攻雍督死战呼声撼峡若崩贼气大溃遂连破山南石门林峒古营诸巢焚其石室积聚追蹙至九层崖等山先後破贼三百二十四寨生擒贼渠侯大狗及其党七百八十余人斩首三千二百级余坠溺死者不可胜纪先是峡中大藤画沉夜见贼以为神及是雍用斧断之改名断藤峡勒石纪功而还捷闻帝赐勅嘉劳召辅还封武靖伯雍进右副都御史提督两广军务明年余贼郑昂等攻洛容北流诸县流劫至广东境雍发兵扑灭之雍又议置武靖州于碧海滩以上隆州土知州岑铎掌州事从之】质实【阳峒在全州境内西延镇名在全州西百里荔浦汉旧县唐置荔州寻废仍为荔浦县明初并属桂林府孝宗四年俱改属平乐府今因之九层崖在大藤峡北洛容唐置洛容县宋省象县入焉元仍旧明属柳州府今因之北流隋置北流县唐属容州宋元仍旧明改属鬱林州今因之碧滩在浔州府西北八十里雍议峡江百里有上中下三滩上曰勒马下曰献俘中曰碧滩请置武靖州及移思隆巡司于此武靖州成化三年置属靖州府神宗末州废为镇在今挂平县东北三十里上隆州宋置元属田州路明初属田州府自岑铎移治武靖而州遂废故州在今田州北八十里邱濬字仲深琼山人】

【丙戌】二年春三月遣右都督李震讨靖州苗破之

【湖广靖州铜鼓五开武岗等苗为患巡抚王俭不能讨乃以命震震督诸军由铜鼓天柱诸境分道入破八百余寨又大破猺獠于桂阳威名著西南苗獠畏慑呼为金牌李】质实【铜鼓在靖州南境州南百八十里曰黄团驿相接者曰铜鼓驿天柱明守御所後改县属靖州今县属贵州镇远府桂阳宋军元路明洪武初为府寻降州属衡州府今升直隶州王俭铜梁人】

南畿大饥

【发淮徐仓米四十万石振之】

夏五月李贤以父丧起复修撰罗伦疏谏贬福建市舶司副提举

【贤丁父忧令驰驿归葬即还视事贤再疏乞终制不许及还京修撰罗伦诣贤沮之不听伦遂上疏谏畧曰臣闻朝廷援杨溥故事起复李贤窃谓贤大臣起复大事纲常风化系焉昔子夏问三年之丧金革无避礼与子曰鲁公伯禽有为为之也今陛下于贤以金革之事起复之与则未之有也以大臣起复之与则礼所未见也且陛下必欲贤身任天下之事则贤身不可留而口实可言或降温旨使贤于天下事知必言言必尽陛下于贤之言闻必行行必力贤虽不起复犹起复也苟知之而不能尽言言之而不能力行贤虽起复无益也又何必逆先王之礼经损大臣之名节哉疏入黜为福建市舶副提举王翱以文彦博敕唐介事讽贤贤曰潞公市恩归怨朝廷吾何可救之竟不从】质实【罗伦字彝正吉安永丰人居父母丧踰大祥始食盐酪】

秋七月封弟见治为忻王见沛为徽王

质实【见治英宗第八子未就藩八年薨无後见沛英宗第九子十七年就藩钧州正德元年薨子简王佑台嗣】

八月玛拉噶寇宁夏

【七月玛拉噶犯固原八月犯宁夏都指挥焦政战死】

冬十二月少保华盖殿大学士李贤卒

【阁臣得君自三杨以後无如贤者而贤亦自以受知人主所言无不尽及是卒年五十九帝震悼赠太师諡文达贤尝言内帑余财不以恤荒济军则人主必生侈心而移之于土木禱祠声色以故频请发帑振贷恤边前後不可胜计故事方面官三品大臣保举行之既久营竞成风贤令吏部每缺举二人请帝简用并推之例始此当时翕然称为贤相然自郎署受知景泰帝超擢侍郎而所着书诋帝荒淫多过其实其抑叶盛挤岳正不救罗伦尤为世所惜云】

以太常少卿兼侍读学士刘定之入内阁预机务【李贤既卒故有是命定之谦恭质直以文学名一时尝有中旨命制元宵诗内史却立以俟据案伸纸立成七言絶句百首又尝一日草九制笔不停书有质宋人名字者就列其世次若谱系然人服其敏博】

镇守开原太监韦朗有罪赦不问

【时内侍梁芳韦兴谄事万贵妃日进美珠珍宝钱能韦眷王敬郑忠等争假采办名先後出监大镇皆纵恣帝以妃故不问也朗镇开原坐失律当逮治其同官镇守太监李良上言昔武侯失律街亭韩琦丧师西夏兵家之常未尝以一眚遂弃朗请戴罪立功兵部覆奏谓武侯汉之名臣韩琦宋之贤相街亭好水川之败以马谡任福违节制非武侯韩琦之过也朗私役军人胎悞大事岂得援以为比宜勿许内批仍允之】质实【街亭即街泉亭本汉县後汉省在今甘肃秦安县东北好水川今名甜水河在平凉府隆德县东】

发明【宦寺夤缘出镇假采办之名肆骚扰之实盖明恃宫闈之宠故败逞其所为宪宗果置之不问惑已甚矣至韦朗失律罪当逮治而李良曲为奏解同党相援公然徇庇虽以兵部之覆劾而仍由内批允行徇璫竖而自隳军纪此威柄所以下移也】

【丁亥】三年春二月丁酉朔日有食之

玛拉噶三上书求贡许之

【时鞑靼诸部内争保喇弒蒙古勒克呼青吉思玛拉噶又杀保喇更立他汗阿勒楚尔复

与玛拉噶相仇杀玛拉噶遂杀其所立汗逐阿勒楚尔而使使入贡寻渡河掠大同帝命抚宁侯朱永等征之会玛拉噶再乞通贡而别部长颇罗鼐亦遣人入贡帝许之诏永等驻军塞上时给事中程万里上言玛拉噶窥伺边疆其情叵测然臣度其有可败者三近我边地止二三日程彼客我主一也兼并诸部驰驱不息既骄且疲二也比来散逐水草部落四分兵力不一三也宜选精兵二万统以骁将使探玛拉噶所在潜师捣之破可必也帝壮其言而不能用】质实【程万里华容人颇罗鼐旧作孛鲁乃今改】

御经筵

【故事经筵讲毕辞退帝必口宣赐酒饌阁臣讲官承旨叩谢出及是刘定之请以例赐母烦玉音自是君臣之间无一辞相接时咸以定之巽顺为过云】

三月召商辂复入内阁

【辂既罢归英宗每念辂谓朕所取士尝与姚夔侍东宫不忍弃之然以忌者竟不复用至是帝驿召至京命以原官入阁辂疏辞帝曰先帝已知卿枉卿其勿辞】

开浙江福建四川云南银场

【以内臣领之】

夏四月四川地震

【四川自去年六月至于是月地凡三百七十五震敕所在官吏修省遣使祭其山川】

六月雷震南京午门诏羣臣修省

【言官劾罢户部尚书张睿南京礼部侍郎俞纲等于是陈文彭时商辂刘定之姚夔并乞免帝皆慰留之】质实【张睿鄱陵人俞纲嘉善人】

遣襄城伯李瑾尚书程信等讨四川山都掌蛮

【四川三面皆蛮蛮依山居往往出肆剽掠而都掌蛮尤甚都掌古属犍为郡在叙州府西偏地介川贵间既僻且饶与芒部乌撒接诸峯盘互大坝为门户又进为九丝所在结寨无虑千百明初诣大军降随地安插入籍输赋分山都六乡水都四乡皆隶戎县水乡平衍其黠逆者犹难逃遁山乡深阻莫可穷诘更啸聚为患宣德初讨平之正统中兵备稍弛蛮始纵恣景泰天顺间屡讨屡抚贼林箐出没愈猖獗成化元年翰林侍读周洪谟上方畧言蛮各有主请择素有名望衆所畏服者一人立为长官司统各寨蛮民即隶本府戎县统属既定边境自宁周故叙人习知利害诏军帅行之会是时总兵官先已进剿屡破贼寨移兵珙县进至戎县贵

州兵亦至抵金鷺池遂合攻大坝斩获甚多以捷闻然蛮性叛服不常军还则又出寇至是陷合江等九县所过屠城赤地千里朝议大发兵讨之以瑾佩将军印充总兵官信进尚书提督军务信言山势险恶必得土兵向导请敕诸土司集兵听调仍守境勿纵贼逃从之而贼已攻烧上下罗计等寨师乃由永宁尅期分道进合势奋击所向克捷贼遁入深箐乘风纵火穷追力攻贼大败先後焚贼寨二千斩首三千有奇生擒一千余人获铠仗孳畜无算又讨九姓苗之不奉化者改大坝为太平川长官司山都水都分地以治设官控制之蛮于是惕息不敢动师还进瑾为侯信亦兼大理卿支二俸与白圭同莅兵部】质实【山都掌今四川叙州府兴文县本西南蛮地名大坝都掌唐始置晏州元改戎州属马湖路明初降为戎县神宗後改县曰兴文即今县是也叙州汉犍为郡唐为戎州地宋置叙州元为路明改府今因之大坝元大坝军民府洪武中废成化时置太平长官司今为大坝营在叙永厅西北九丝城在今叙州府建武城东南珙县唐巩州元为上下罗计长官司寻改为珙州明降为县属叙州府今因之金鷺池在今叙永厅西北九姓司西南五十里合江汉符县地东汉改曰符节北周为合江县隋属泸州宋元明仍旧今因之永宁元永宁路明初为长官司後升宣抚司今改县叙永厅治九姓元九姓罗氏党蛮夷长官千户明洪武初置九姓长官司地在今叙永厅西北李瑾和州人濬之孙隆之子周洪谟字尧弼长宁人】

秋八月增江西督赋官

【巡按御史赵敌言江西赋繁官少催征不力逋负者多请增设司府佐贰官俾专督理乃增布政使参政一南昌吉安抚袁临江饶瑞七府同知各一】质实【临江宋军元路明府瑞州宋置元路明府今并因之】

冬十一月前少保吏部尚书王翱卒

【先是翱疾甚致仕未出都寻卒年八十有四赠太保諡忠肃翱清心寡慾方严质直循守礼法不竞文艺其在边方一惟镇静及典铨衡门无私谒有所论荐不使人知尝曰吏部岂快恩怨地耶自奉俭素历仕五十三年第宅服食不改于旧与李贤同得帝眷焉然性颇执尝有诏举贤良方正经明行修及山林隐逸士至者率下部试翱黜落百不取一二翱性不喜南士英宗尝言北人文雅不及南人顾质直?伟缓急当得力翱由是益多引北人此不无少损云】

十二月杖谪翰林院编修章懋黄仲昭检讨庄?【以明年上元张灯命词臣撰诗词进奉懋仲昭?同疏进谏畧曰今川东未靖辽左多虞三楚豫章赤地千里正陛下宵旰焦劳之日不宜更耽宴乐至翰林以论思为职宣宗皇帝御制翰林箴曰啓沃之言惟义与仁尧舜之道邹鲁以陈张灯岂尧舜之道诗词岂仁义之言帝王慎小谨微必矜细行者正以欲不不可纵渐不可长也乞停止烟火移此视听明日达聪省此资财赈饥恤困则灾祲可消太平可致矣帝以元夕张灯祖宗故事责懋等妄言杖之谪懋仲昭知县?通判时以懋等与罗伦同称为翰林四谏】质实【章懋字德懋兰谿人黄仲昭名潜以字行莆田人庄?字孔赐江浦人懋等既谪在道以给事中毛宏等论救懋仲昭改南京大理评事?改南京行人司副】

【戊子】四年春三月免湖广被灾秋粮

【免荊州等处一十四府七十五州县并武昌等二十三卫所粮一百七万三千余石以去年旱故也】

禁勲戚请民田夏四月庆云伯周寿求涿州田许之【先是番僧扎实巴勒乞静海地为常住田嘉善公主求文安地数百顷德王请壽张地四千余顷皆予之户科给事中邱宏等上言国初北直隶山东地方土旷人稀太祖太宗屡颁明诏许民耕种允不科税乃权豪怙势专利病民率指为闲田乞奏至数十百顷夫地踰百顷古者百家恒产也岂可徇一人之私而夺百家恒产哉乞收前命还给下民仍勅该部痛革往弊帝然之诏自今乞请皆不许扎实巴勒等所乞还之于民未几周壽以太后弟冒禁求涿州田六十余顷帝不得已许之自是翊圣夫人刘氏求通州武清县地三百余顷寿弟长宁伯彧求武强武邑地六百余顷皆予之给事中李森疏諫不复省】质实【静海金以清州窝子口也置静海县明洪武初改静海属河间府今属天津府文安汉县五代周属霸州宋至明因之今属顺天府武清县唐置明属通州今属顺天府武强县汉武隧晋置武强明属晋州今属深州周壽昌平人锦衣卫千户周能之子能女为英宗妃生宪宗是为孝肃皇太后能卒寿嗣太后弟也宪宗擢左府都督同知寻封庆云伯寿弟彧封长宁伯嘉善公主英宗女成化二年下嫁王增兵部尚书王骥之子邱宏字寬叔上杭人李森字时茂历城人扎实巴勒旧作劄实巴今改】

发明【勲戚乞请闲田病民专利因言官之奏而禁之是矣乃其禁甫申寻又允周壽等所请虽台垣力諫置之不省後且屡乞不已转以彭韶季琮覆勘不奉命下之诏狱抑何前後异轍坎周壽輩冒禁行私固为藐法而宪宗徇情寡断忘小民之恒业恣贵戚之贪婪选悞迁就而使法不能行国是尚可问哉】

加番僧封号

【西僧扎巴置勒灿以秘密教得幸封万行庄严功德最胜智慧圆明能仁感应显国光教宏妙大悟法王西天至善金刚普济大智慧佛扎实巴勒为清修正觉妙慈普济护国衍教灌顶宏善西天佛子大国师索诺木置勒灿为静修宏善国师其徒加封錫诰命者不可胜计服食器用僭拟王者出入乘轎輿卫卒执金吾仗前导其他羽流加号真人高士者亦充盈都下而佞幸由兹更进矣】质实【扎巴置勒灿旧作劄已坚参索诺木置勒灿旧作鎖南坚参今俱改】

陈文卒

【文素以才自许在外颇着劳绩士大夫多冀其进用及居宫端行事鄙猥既参大政无所建白子弟家人大通贿赂文每退朝则引宾客故人置酒曲宴专务请属性又卞急遇睚眦必报罗伦论李贤夺情文以已为詹事时方丁母忧益内媿陰助贤逐伦更为时论所鄙李贤卒後文恣意而行名节大丧及是卒】

六月免江西被灾秋粮

【以旱灾免二百八十八万六千三百余石】

慈懿皇太后钱氏崩

【初英宗之北狩也钱后倾宫中赀佐迎驾夜哀泣吁天倦即卧地损一股复损一目及在南宫英宗不自得后曲慰解故英宗大渐时遗命曰钱皇后千秋万岁後与我同葬大学士李贤退而书之册及营裕陵贤请营三圻中旨不可事遂寝至是周太后不欲后合葬帝召大臣议彭时曰合葬裕陵主祔庙定礼也翼日又问时对如前帝曰朕岂不知虑他日妨母后耳时与商辂刘定之合词言曰皇上大孝当以先帝心为心今若安厝于左而虚右以待将来则两全其美矣帝颌之是夕时等复疏言汉文帝尊所生母李宸妃而吕后仍葬长陵宋仁宗追尊生母李宸妃而章献刘后仍祔太庙今若陵寝之制稍有未合则有乖前美貽讥来叶下礼官及羣臣聚议皆请如时言帝曰乖礼非孝违亲亦非孝其议别卜明日廷臣百四十七人并上疏谏又明日礼部尚书姚夔合诸大臣疏言天下者祖宗之天下皇上当守祖宗成法岂可阿顺母后显违前典帝犹豫未决给事中毛宏倡言此大事吾辈当以死争合羣臣伏哭文华门外帝命退衆叩头曰不得旨不敢退自己至申帝与太后皆感动乃许之羣臣齐呼万岁出】质实【文华门在端本宫之右毛宏字士广鄞人】

秋八月京师地震

九月葬孝庄睿皇后于裕陵

【上尊諡曰孝庄皇后允羣臣议合葬裕陵】

振陕西饥

彗星见

【是月癸亥有客星苍白色芒长三文尾指西南变为彗星扫三台越五十八日乃灭时彭时等上疏言外廷大政固所当先宫中根本尤为至急谚云子出多母今嫔嬙衆多维熊无兆必陛下爱有所专而专宠者已过生育之期故也望均恩爱为宗社大计六科给事中魏元等亦言畧曰今春以来灾异叠见近日彗星又见东方光拂台垣人心汹惧皆陰盛阳徽之验也臣传闻宫中盛宠匹耦中宫陛下富有春秋而震位尚虚岂可以宗庙社稷之大计一付于爱专情一之人而不求所以固国本安民心哉伏愿思祖宗传体之重使陰阳各归厥分万年之基将在乎此十三道御史康永韶等亦以为言帝曰宫中之事朕自有处不听】质实【魏元字景善朝城人康永韶字用和祁门人】

冬十一月都督刘玉副都御史项忠讨开城叛寇满俊平之

【俊自称招贤王拥衆啸聚不数月衆至数万关中震动乃以玉为副将军忠总督军务讨之八月巡抚陈价总兵官任寿吴琮及满俊战败绩都指挥蒋泰申澄被杀玉等抵石城前军已屡败贼乘胜逐之伏羌伯毛忠夺其西北山几破忽中流矢死玉被围诸军欲退项忠斩一千户以徇衆力战忠亲冒矢石不少避玉得出复连战数十贼大衄会天寒甚忠虑贼乘冻度河与套寇合乃督兵直薄城下列围困之贼窘欲降忠偕玉单骑赴之贼遥望罗拜忠直前挟俊侄璫以归俊疑惧不出有贼将杨虎狸夜出汲被获忠贯其死谕以购贼赏格且赐之金带鈎纵归使诱俊出战伏兵擒焉贼尽殲于是毁石城送俊京师伏诛先是朝廷闻价等之败抚宁侯朱永将京军赴援永多所邀请彭时恶其张大且度军可无行第令整】

【旅以待适忠以围石城驰疏至帝遣中官偕白圭程信至阁议时曰贼四出攻掠锋诚不可当今入石城自保我军围甚固此困兽易擒耳信曰安知忠不退师时曰彼部分已定何故退且今出师何时到信曰来春时曰如此益缓不及事事成败冬月决矣信忿出危言曰忠若败必斩一二人然後出师衆危之间时何所见曰观忠疏曲折知其能若闻别遣禁军则退避不敢任贼不可知矣时惟商辂然其言至是贼果平人乃大服】质实【满俊亦名满四其祖巴丹洪武初即率所部归附世以千户畜牧为长仍其故俗无科徭地在开城县固原里俊素犷悍藏匿奸盗会有狱连俊有司迹捕至其家多要索遂激衆为乱守臣遣俊侄指挥璫往捕俊杀其从者遂刼璫据石城以叛石城今在固原州西即唐吐蕃石堡城最险固城在山岭四面削壁中凿五石井以贮水惟一径可缘而上陈价铜梁人任壽临漳人宁远侯礼之子吴琮蒙古人遵化伯克勒之子毛忠凉州人其曾祖于洪武初归附从军征役祖又以征哈密战没父宝永乐中以出塞功授百户忠嗣立功甘凉陞都督成化三年以讨番功封伏羌伯镇甘肃固原里地】

【己丑】五年夏五月以礼部侍郎万安兼翰林学士入内阁预机务

【安由编修累迁礼部左侍郎外寛而深中同年生詹事李泰中官永昌养子也齿少于安安兄事之得其欢泰每当迁必推安出已上至是议简阁臣复推安曰子先之我不患不至故安得入阁而泰忽暴病死安无学术既柄用惟日事请托结诸阉为内援时万贵妃宠冠後宫安因内使致殷勤自称子侄行妃尝自愧无门阀闻则大喜妃弟锦衣指挥通遂以族属数过安家两家妇日相往来通妻着籍禁中恣出入安得备知宫中动静益自固】质实【万安字循吉眉州人李泰香河人】

六月癸丑朔日有食之

秋八月礼部侍郎兼学士刘定之卒

【定之谦恭质直历官以来多所建白至是卒赠礼部尚书諡文安】

御经筵

【先是刘定之请御经筵兼讲太祖御制诸书斥异端邪教勿令害政耗财帝留其疏至是乃复御经筵视午朝】

下刑部郎中彭韶监察御史季琮于狱

【太后弟周彧已奏乞武强武邑地六百余顷至是又欲于其外籍民田帝遣官按视皆民所垦辟输赋者因据籍步之每亩百步余没入为闲田得七十余顷彧不满复言于帝改命韶琮覆视韶琮往不复步田周视径归上疏自劾曰真定田自祖宗时许民垦种即为恒产除租赋以劝力农功臣戚里家与国咸休岂当与民争尺寸地臣诚不忍夺小民衣食附益贵戚请伏奉使无状罪疏入诏以田归民而责韶等邀名方命下诏狱言官争论救乃释】质实【彭韶字凤仪莆田人季琮仁和人】

冬十一月起复韩雍总督两广

【先是雍以两广地大事殷请于东西各设巡抚帝可之而命雍总理军事未几雍以忧归贼复炽僉事陶鲁言两广地势错互当如指臂相使不可离析近贼入广西臣与广东三司议调兵匝月未决以是贼得大肆刼掠乞仍命大臣一人总之庶事权一而责有所归乃起雍为总督闲府梧州】质实【陶鲁字自强鬱林人】

【庚寅】六年春二月遣使巡州郡

【兵部尚书白圭等言陕西屡遭寇掠川广盗攘未息疫疠行于闽越灾异见于淮南两畿齐豫雨雪愆期二麦槁死荆襄流民动数十万奸盗由之乞简大臣循行天下便宜兴革于是遣大理寺少卿宋旻侍郎曾翬原杰黄琛副都御史滕昭巡视畿内大名诸府暨浙江河南四川福建访军民疾苦考察官吏奏斥贪残吏甚衆其南北直隶陕西山西山东湖广荆襄两广贵州有巡按者江西有抚民按察使者及云南多土官者皆不遣使责所在官司恤民察吏】质实【宋旻浙江淳安人曾翬字时叔泰和人原杰字子英阳城人滕昭字自明汝州人】

三月免湖广山东被灾税粮

【湖广免二十八万余石山东免三十九万余石】

免苏松常镇四府被灾税粮

【免苏松常镇四府及苏太镇三卫所去年秋粮二十四万八千余石屯粮七千一百余石】质实【苏州卫太仓卫镇江卫并隶中军都督府】

命抚宁侯朱永都御史王越等御敌延绥

【先是玛拉噶虽求贡而屡犯延绥寻後纠三卫入寇榆林大扰大同巡抚王越遣许宁及杨信等连败之至是博勒讷与阿勒楚尔合别部伽嘉色凌博勒呼亦入据河套伽嘉色凌旧居土尔番天顺间尝遣使朝贡朝廷使往抚谕之已乃稍引而东与诸部相雄长遂窃入套中为久居计延绥告急帝命永为将军以越参赞军务往御之永至数以捷闻越等皆论功陞赏而敌据套自如既而越辞大同巡抚诏听之加总督军务专办西事然是时敌衆数万而官军堪战者仅万人又分散防守势不相敌因上战守二策廷议以粮匮马乏难于进剿且命边将慎守御以图万全乃勅吏部侍郎叶盛往巡边与越等议战守】质实【榆林隋县为榆林郡治唐为胜州治宋入于西夏明正统中筑榆林城成化中置卫今改府土尔番明史西域传土尔番在火州西百里去哈密千余里今在阿斯塔克西北五十八里东距辟展城三百二十三里北倚金岭岭麓有泉南流周绕国城回民资其耕种唐高昌县有安乐城即其遗址也王越字世昌濬州人许宁字志道江都人贵之子
土尔番旧作土鲁番伽嘉色凌旧作乱加恩兰博勒呼旧作孛罗忽今俱改】

夏四月旱

【北畿山东河南大旱陕西四川山西两广云南并饥先後振之】

六月戊申朔日有食之

大水

【顺天河间永平诸府大水时旱涝相仍民食草木几尽从吏部尚书姚夔请遣使振恤】

秋七月皇子生于西内

【皇子即孝宗母纪氏贺县人本土官女征蛮俘入掖庭授女史警敏通文字命守内藏时万贵妃专宠而妬後宫有娠者皆堕之帝偶行内藏妃应对称旨悦幸之遂有身万贵妃知而恚甚命婢钓治之婢谬报曰病瘡乃谪居安乐堂久之皇子生使门监张敏溺焉敏惊曰上未有子奈何弃之稍哺粉餌饴密藏之他室贵妃日伺无所得时吴后居西内近安乐堂密知其事往来哺养帝与妃不知也】质实【安乐堂芜史由金海桥玉熙宫迤西曰棂星门迤北曰羊房夹道牲口房虎城在焉内安乐堂在焉成化间万贵妃专宠孝穆纪皇后有娠托疾居此诞生孝宗张敏同安人】

免南畿四川被灾税粮

八月下诏寬恤

【以水旱相仍故也】

冬十月免畿内河南山东被灾税粮

【以水灾免保定等卫子粒二万三百石有奇以旱灾免河南民田夏税三十七万七千七百石有奇军屯子粒八万六百石有奇以旱灾免济南兖州等处秋粮二十八万九千七百石有奇济南昌平清州德州诸卫所子粒七千三百石有奇】质实【保定卫属大宁都司济南卫青州卫并属山东都司德州卫隶後军都督府】

十一月荆襄流民作乱命项忠总督军务讨之

【初白圭讨平刘通荆襄流民屯结如故通党李胡子者始与石和尚等啸聚为逆通等就擒李与其党王彪小王洪等掠南漳诸县流民附贼者至百万伪称太平王署其党为总兵先锋等又立一条蛇坐山虎等号官军屡剿不利荆襄诸郡骚然诏忠与李震讨之忠至襄阳请调永顺保靖土兵而先分军列要害多设旗帜钲鼓遣人入山招谕流民来归者四十余万会彪引骑觐军且阻归者出不意擒之时白圭为兵部欲止土兵毋调忠疏言贼在万山中据险为乱复有流民从之患且不测今以诏旨谕其生路民扶老携幼出山不絶若中止土兵怨民闻之仍怀二心彪虽授首而元恶未殄鸟伏鼠窜设复再聚重调为难乃听调土兵如故合二十五万分八道逼之流民归者又数万贼潜伏山砦伺间出劫忠命将击之遇于竹山县乘溪涨半渡截击遂擒李胡子小王洪等贼多溺死】质实【永顺宋羈縻州明永顺宣慰司隶湖广都司今改永顺府保靖宋羈縻州明保靖宣慰司今改保靖县属永顺府竹山县古庸国地秦置上庸县梁析置安城县西魏改曰竹山明初县属襄阳府成化十二年改属郧阳府今因之李胡子名原新郑人】

发明【白圭之平刘通至此才五年耳使当贼渠就缚之後即能殲除支党抚定流民或因地利置官或增兵设戍俾山谿榛莽之中无复少留余孽亦何遽烦项忠之申讨耶乃仓猝班师初不筹善後之策如党魁李原者尚听之潜匿山林遂至不数年间啸聚如故圭已无所辞咎及忠请调土兵欲为剿绝之计而圭又请止无调若欲掣忠之肘者既貽患于後复仗他人之功绩而陰挠之圭尚为时论所推惜乎其不讲于公忠体国之道者也】

御定资治通监纲目三编卷十三

卷十四

钦定四库全书

御定资治通鉴纲目三编卷十四

【起辛卯明宪宗成化七年尽戊戌明宪宗成化十四年】凡八年

【辛卯】七年春正月诏举堪任州县者

【英宗正统初尝诏廷臣举御史知县至是从都御史李宾言复命京官五品以上及科道官各举堪任州县者一人】

以余子俊巡抚延绥

【时寇数入边兵部尚书白圭请罢延绥巡抚王銳推浙江左布政使余子俊代之以子俊尝历官陕西习边事也先是延绥镇治绥德州属县木脂吴堡孙悬镇外寇以轻骑入掠镇兵觉而追之辄不及往往得利去子俊既至徙镇榆林增益兵卫攻守器毕异榆林遂为重镇寇杪渐稀军民得安耕牧】质实【米脂宋以米脂川地置砦金升县民属绥德州今因也吴堡宋收西夏地置砦金升县明属葭州今改属绥德州余子俊字士英青神人初由西安府知府历陕西布政六年转左调浙江甫半载有是命王銳迁安人】

二月复设九江苏州杭州钞关

【宣德间始设钞关九江及苏之浒墅杭之北新关皆同时建置成化四年罢之至是户部以京库岁用钞不足遂议复设是年三月又从工部尚书王复请分遣司属往芜湖荆州杭州抽分竹木易银解京以资营缮】质实【芜湖汉县明属太平府今因之荆州抽分廠设于府治东南之沙市其设于杭州者谓之南新关在仁和县侯潮门外】

夏五月瘞京师暴骸

【?大疫民多道死乃置漏泽园六所于都城外以瘞之後二年四月因主簿邵文梧言复命巡街巡河御史瘞骸骸之暴露者】

秋八月振山东浙江水灾

【户科给事中李森等言山东七府及浙江嘉湖杭绍四府旬夏霪雨两伤稼漂损庐舍人畜无算望遣廉干名望大臣勘灾蠲振从之】

九月浙江潮溢

【是月二日辛未潮溢冲决钱塘江岸千余丈漂没居民田宅守臣以闻闰九月命工部侍郎李顥往祭海神修筑堤岸】质实【钱塘江即浙江亦名曲江在杭州府城东南李顥字思城博罗人】

始立漕粟长运法

【宣德间平江伯陈瑄请立兑运法与支运参行至是户部因应天巡抚滕昭议又变瓜淮兑运为长运令运军径赴江南水次交兑加耗外复给米为渡江费後数年命淮徐临德四仓支运七十万石之米悉改水次交兑而官军长运遂为定制】质实【按江米之法寅德时已与瓜淮兑运并行明史周忱传云忱与陈瑄议民运至瓜淮水次交兑漕运军运至通州其附近军未过江者即仓交兑加过江米二斗所谓附近军者考诸瑄传盖谓湖广江西浙江及苏松安庆军士而浙江兑运粮岁六十万苏松安庆九十一万八千附近军领兑不尽仍多赴瓜淮交兑昭建此议则并令江北军过江就兑浙江等处石加过江米一斗南直隶等处一斗三升户部会议定石加脚米六升乃悉罢瓜淮兑运是为长运法之始自宣德兑运法行支运米日少天顺时岁运粮四百三十五万石内支运者止七十一万一千八百石及是从昭议改兑运为长运而四仓支运未改其改兑则九年九月也後孝宗从户部言山东改兑粮复听民自运临德二仓于是山东独支运如故】

发明【明季转漕之法由民运而文运由文运而兑运至是始定为长运官任转输之责民免飞挽之劳其法可谓善矣顾交兑之际弊窦易生即责成于地方有司尚不能保无吏胥耗蠹乃听民自兑于运军则额外之需求必且日滋增益况既经改为长运则凡有漕糈皆当量为酌剂俾达之辇下以供官府廩食之需乃考食货志称淮徐临德四仓由支改兑者止限以七十万石之额其余交兑不尽者仍令民运赴四仓民力既未能纾而其後久无支销遂致有红朽陈腐者又其时苏松常嘉湖五府之白粮船俱仍令民运如故此皆立法未为周祥奉行不能尽善所致非长运之不可行也厥後漕臣邵宝徒见流弊之滋转谓长运之之未善而欲复行支运是何异因噎而废食哉】

冬十月命王恕为刑部左侍郎总理河道

【时运河淤塞廷臣言平江伯陈瑄治河通运六七十年近岁以未规制废弛滩沙壅涩不加挑濬泉源漫伏不加搜涤遂至漕舟阻浅急宜命官修治复瑄之旧然自通州至仪真瓜州二三十里势非一人所能独任当分沛县以南德州以北及山东为三道各委曹郎暨监司专理且请简风力大臣总理其事期以三年底绩于是始以恕为总河】质实【仪真唐析江都县地置扬子县宋为真州治明洪武初以州治扬子县省入寻降州为仪真县属扬州府今改曰仪微仍属扬州府】

十一月立子佑极为皇太子

【佑极以五年四月生至是立为太子】质实【佑极宪宗次子栢贤妃生】

十二月彗星犯紫微

【光长竟天正昼犹见帝避正殿撤乐敕羣臣修省条时政得失彗至明年正月乃灭】

见阁臣于文华殿

【彗星久见羣臣多言君臣否隔宜召大臣议政大学士彭时商辂力请中官约以御殿曰召对且曰初见时情未洽勿多言姑俟他日将入复约如初比见时言天变可畏帝曰已知卿等宜尽心时又言昨御史有疏请减京官俸薪武臣不免觖望乞如旧便帝可之万安遂顿首呼万岁欲出时辂不得已皆叩头退中官戏朝臣曰若辈常言不召见及见止知呼万岁耳一时传笑谓之万岁阁老帝自是不复召见大臣其後尹直入阁欲请见计事安止之曰君不闻彭公耶诗召对一语不合辄叩头呼万岁今吾辈每事尽言太监择而闻之上无不允者胜而对多矣安之容悦不识大体且善归过于人如此】质实【明实録御史张敦因星又陈八事其一为两京官俸禄宜暂减半时所谓昨御史有疏者盖谓敦也】

【壬辰】八年春正月皇太子佑极卒

【传者谓万贵妃害之也諡曰悼恭】

四川盜起

【时四川荣县盜起杀人攻城据府库緞狱囚已又焚劫犍为恣行剽掠官军捕之辄为所败镇守中官梅忠等以闻事下兵部尚书白圭言往者蜀寇赵铎等聚衆流劫所司不能以时扑灭势乃益炽至一再用兵然後充之今疮痍甫定盜复窃发宜勅忠偕巡按御史严督三司刻期擒?兵力不支可徵威茂永宁分守官军协剿毋如前日养寇帝纳之寻擢江西布政使夏坝为副都御史巡抚四川任以平盜坝至官立互知会捕法盜为之少戢】质实【荣县唐析大牢县地置旭川县为荣州治宋改县曰荣德元省入荣州明洪武九年降州为县犍为县隋置明与荣县并属嘉定州今并属嘉定府夏坝字宗成天台人】

二月预徵山西河南明年賦

【以谋搜套也先是正月延綏参将钱亮御玛拉噶于安边营败绩都指挥栢隆陈英战死伽家色凌犯固原平凉边警叠告兵部尚书白圭复建预徵之议檄下山西河南诸府县於是内地骚然兵科给事中梁璟言山西预徵草豆每夫科银二十两岁旱民饥逃亡载路太原一县五日内已亡三百八十余家人心骇惧乞发帑补买以苏民困事下户部议格不行时侍讲倪岳亦言山西河南之民飞刍挽粟徒步千里夫运而妻供父挽而子荷乃转输不足又有预徵水旱不可先知丰歉未能逆卜徵如何其可预也论者皆韪其言】质实【太原秦晋阳县

北齐分置龙山县隋改龙山曰晋阳改旧晋阳曰太原宋废二县改置平晋元属冀宁路明洪武八年复曰太原县属太原府今因之梁璟字廷美崞县人倪岳字舜咨上元人】

发明【预徵非制唐庄宗衰世苟且之法也然同光四年所谓预徵者亦只于三月徵秋夏之税如唐代宗之税青苗而已非悬丰歉不可知之明年而先责其赋也明至宪宗之时国用不节倾内帑以恣中官梁芳辈之侵并府藏既虚而欲大举搜套遂至以预徵为筹饷之计谬矣且豫晋为师行经过之区其民方任转输尤当减赋缓征以纾其力而乃行此苟且之法以重困之民劳不大可念乎况是时所发京兵素号冗怯前後令遣朱永赵辅刘聚三大将又皆畏葸不任战者徵匱竭之饷以饱媮惰之兵一矢未发而内地且骚然矣虽欲复套得乎】

夏四月旱

【京畿速月不雨运河水涸遣使祷于天地社稷山川淮渚东海之神】

遣使録天下囚

【初南京户部侍郎陈翌因灾异陈事请如正统例遣使録囚部又寝之至是帝忆其言乃分遣郎中刘秩等十四人会巡按御史及三司官审録後从商辂请复遣郎中张文昭等録天下囚遂定为五年一遣之例】质实【陈翌字冲霄虹县人刘秩安福人张文昭平山卫人】

五月占城遣使告难

【占城自洪武二年遣使奉表入贡代着恭顺正统七年安南关王黎麟卒子濬继濬侵占城夺新州港掳其王摩诃赉该以归帝为立新王摩诃赉来敕谕濬归其故王濬不奉诏侵掠占城人口至三万三千余天顺三年濬庶兄谅山王琮弑濬而自立越九月为图人所诛以濬弟灏继成化四年灏侵据广西凭祥帝命守臣谨备之七年又攻破占城虏其王盘罗茶全王弟盘罗茶悦逃山中至是使臣乐沙弄来告难兵部言安南并吞与国若不为处分非惟失占城归附之心抑恐启安南跋扈之志宜遣使齐敕寅谕还其国王与家属帝虑安南逆命欲赐其贡使至赐敕责之逾月以盘罗茶悦请封命给事中陈峻等持节往而占城已为黎灏所据改为交南州不克入灏既灭占城遂忧扰边境广东之琼雷广西之龙州镇安云南之临安广南皆数告警中朝务为姑息惟屡降敕谕灏益玩侮无畏忌言占城王盘罗茶全侵化州道为其弟盘罗茶遂所弑遂自立将受封而盘罗茶悦子茶质苔来又弑之其国自乱非臣灏罪帝虽知其诈不能诘】质实【琼州唐分崖州地置元路又改乾宁军民安抚司明改府今因之镇安宋右江镇安军民宣抚司元路明改府广南宋时蛮名特磨道元置广南西道宣抚司明洪武中改广南府今皆因之陈峻顺天人】

命武靖侯赵辅为将军偕王越帅师搜河套次于榆林【业盛既奉命至延绥与王越等议军事以边备久虚搜套未可轻议请守固而後战越因乞偕盛还朝而廷议以套寇不灭三边终无宁岁遂拜辅将军以搜套任之敕陕西延绥寧夏三镇兵皆受节至越仍总督军务比至

榆林寇已深入大掠辅越不能制乃奏言搜套非十五万兵不可今馈饷烦劳公私困竭宜姑事退守会陕西巡抚马文升复报寇警兵部论辅越拥兵坐视命给事中郭镗往勘还言寇于六月入平凉巩昌临洮杀掠人畜三十六万四千有奇七月纵横庆阳境辅越至榆林不进致部将遇敌辄以不得号今为辞当治其弛兵玩寇罪而辅越方以寇不战自屈奏请班师兵部劾两人欺谩帝终不之责也】质实【马文升字负图钧州人郭镗恩县人】

秋七月南畿浙江大水

【南畿大风雨坏天地郊坛孝陵庙宇苏松扬三郡亦以水旱告浙江海溢杭绍嘉湖寧五府地各被水灾凡八郡淹没田禾漂毁官民庐舍畜产无算溺死者二万八千四百七十余人】

冬十一月赵辅有疾命宁晋伯刘聚往代之

【辅称疾屡疏乞还郭镗亦言其以病废事乃有是命聚既代辅为将军明年寇入花马池率裨将击却之其冬博勒呼们都圻伽嘉色凌连兵深入直抵秦州安定会寧诸州县纵横数千里聚拥兵不能救寇既饱掠去会王越捣巢自红盐池还遂以大捷闻纪功兵部员外郎张谨劾其虚冒所报首功皆边民被掠者诏遣给事中韩文往勘还奏如谨言帝以寇既遁置之辅还犹督京营兵郡言辅既称疾宜解营务帝亦置不问】质实【花马池在庆阳府城北周回四十余里安定宋安定堡元改县明属延安府会寧金西宁县元移会州治此寻省西寧县入会州明洪武初改会寧县属巩昌府今皆因之红盐也在榆林府西北与寧夏府接界张谨定远人韩文字贯道洪洞人】

【癸巳】九年春正月真人张元吉有罪释之

【元吉袭封真人恣行不法僭用乘舆器服擅易制书夺良家女子逼取人财物家置狱前後杀四十余人有一家三人者事闻帝恕械元吉至京会百官廷讯论死刑部尚书陆瑜等请停袭去真人号不许命仍旧制时成化五年四月也元吉坐系二年竟以夤缘免死杖百发肃州军言官争之不纳至是其子元庆复为父陈情斩免帝允之给事中虞瑶等言律杀一家三人者磔元吉以睚眦杀四十余人罪岂容诛贷死发戊巳为枉纵今又有释归田里臣实未谕若以元吉母老子幼情或可矜则元吉所杀四十余人岂无可矜如元吉者祖法朝纲不可不慎奏入命俟终养遣戍寻竟释为民】质实【陆瑜字廷王鄞人虞瑶缙云人】

土尔番据哈密

【初哈密忠顺王布拉噶卒无子王母寧温达锡里主国事伽嘉色凌窥哈密无主袭破其城王母率亲属部落走苦峪遣使告难朝廷不能援成化二年鞑靼兵已退乃资遣还故土其头目哀请以都督同知巴图穆尔袭封巴图穆尔者故忠义王托欢特穆尔外孙也帝因擢为右都督摄国王事又卒其子哈商请嗣职帝许之而不命其主国事政令无所出是时土尔番

酋阿尔自称苏勒坦乘机入哈密虏王母劫金印去留其妹婿伊兰据守之兵部言哈密实西城咽喉弃而不救恐赤斤蒙古等卫亦为所胁则我之藩难尽撤而甘肃之患方殷使套寇不退关中供亿愈难于是命都督同知李文右通政刘文赴甘肃经畧抵肃州遣锦衣千户马俊往谕阿尔抗不逊羈俊月余文等乃檄哈商及赤斤罕东默克埒诸部集兵进讨】质实【默克埒番部名在哈密北托欢特穆尔布拉噶之族祖父也布拉噶之祖曰忠顺王托克托永乐八年卒封其从弟推勒特穆尔为忠义王卒宣德元年复以托克托子布达锡哩嗣忠顺王是为布拉噶之父寻因忠顺王年幼命推勒特穆尔弟嗣忠义王同理国事即托欢特穆尔也刘文四川荣县人 布拉噶旧作卜列革宁温达锡里旧作弩温达失里巴图穆尔旧作把塔木儿托欢特穆尔旧作脱欢帖木儿哈商旧作罕慎苏勒坦旧作速檀伊兰旧作牙兰阿尔旧作阿力默克埒旧作也克力托克托旧作脱脱推勒特穆尔旧作兔力帖木儿特达锡哩旧作卜答失里今并改】

三月山东大饥民相食振之

【是年畿内陕西山西皆饥湖广南畿亦被灾而山东饥尤甚饿死者枕籍骸无余髣乃命免今年租巡抚牟俸前後请发济南仓储减价以糴令临清关税收米麦助振又以民多转徙请敕邻境抚院官随所在安辑秋成赉遣复业且乞开中淮浙盐百万引尽蠲州县道课诏具如所请更命移临清仓粟十万石以振俸寻乞截留漕粮并贷饥民布棉免柴夫折价银移河南输边粟济山东而别给银为边饷山东输京租二十万石给本地用帝皆嘉纳于时俸不俟命檄发东昌济宁仓粟十余万石为军士月粮而以德州临清寄库银易米振济请伏专擅毕帝特宥之月之甲午及四月丁卯境内忽黑暗如夜八月旱蝗旋大水明年又饥复诸发仓储出货俸抚山东五年治尚烦苛然颇尽心荒政所全活甚衆】质实【明史食货志柴夫折价银自宣德五年置易州山厰金北直隶山东山西民夫转运後令输直雇役所谓折价银也牟俸巴县人】

夏四月辛酉朔日有食之

閱武臣骑射

【帝以武备废弛乃御西苑命武臣骑射黜指挥李胜等四十六人十一月重閱西苑罢定襄伯郭嵩等四人英国公张懋三发皆中帝大喜厚赉之】质实【郭嵩定襄伯之侄张懋英国公辅之子】

秋九月镇守浙江太监李义杀指挥马璋不问

【义至寧波指挥马璋馈白金二十两意不慊遂杖杀之璋母讼于朝帝命义自陈言因公事杖璋璋病死非毙杖也帝命宥之既而镇守云南太监钱能杖守矿千户一人死巡按御史甄希贤劾之帝亦未尝罪能也】质实【甄希贤麟游人】

们都尔博勒呼嘉伽色凌并入寇王越袭破其孥于红盐池

【三酋大举深入直抵秦州安定诸州县王越策寇尽锐西出必不备东偏乃率总兵官许宁游击将军周玉各将兵四千六百为左右哨从榆林红儿山出境尽夜兼行八十里涉白盐滩北又百五十里侦知寇老弱俱在红盐池乃分兵千余伏他所而身宁宁玉张两翼直薄其营伏兵又从後夹击大破之焚其庐帐而还及寇饱掠归则妻子畜产已荡尽相顾痛哭自是稍徙北去不复居河套间盗边不敢大入亦数遣使通贡於是延绥得息肩者数年】质实【红儿山在榆林府北白盐滩即白盐池在定边县西北周玉字廷璧滁州人们都尔旧作门都埒博勒呼旧作孥罗忽今俱改】

【甲午】十年春正月命王越总制三边

【前年冬刑部主事张鼎言延绥甘肃宁夏三边镇抚不相统一宜推文武重臣一人总制章下所司乃议设制府于开成控制三边总兵巡抚而下并听节制诏即以越任之时因红盐池之捷论功加越太子少】

【保增俸一级而越自谓功大赏薄遂怏怏称疾还朝】质实【此三边设总制之始越还朝即罢不设至弘治十年又起越为之十五年以命秦紘正德元年继以杨一清遂为定员嘉靖十九年改称总督张鼎字大宇陕西咸寧人】

三月罢总督两广右都御史韩雍

【雍在粤於镇守中官黄沁不为礼沁憾之会柳浔诸蛮复叛参将杨广等俘斩九百人方更进而贼怀集兵部劾雍奏报不实沁亦讪雍坐视且言其土赏费财帝遣给事中张谦等往勘而广西布政何宜副使张敦冲雍素轻已共酝酿其罪谦还奏事虚实交半乃命致仕去雍有雄畧善断临战躬亲矢石不目瞬既承制专决自奉尊严军门设铜鼓数十仪节详密三司皆长跪白事裨将以下绳押无所假又坦中不为崖岸挥斥财帛不少惜故虽令行禁止而谤议亦易起雍既去两广人念其功为立庙祀】质实【怀集刘宋析四会县置元局贺州明改属梧州府今因之何宜福清人张谦清苑人】

夏六月武靖侯赵辅请世袭伯爵许之

【辅辞侯乞世伯帝许其世伯侯如故言官力争不听】质实【明史功臣侯表辅子承庆嗣伯传爵至明亡乃纪】

发明【国家所以驭下者赏有功刑有罪而已赵辅受命西征坐视敌骑之蹂躪封殪而不加一矢弛兵玩寇罪孰甚焉宪宗即念辅大藤峡之旧劳贯之不正刑诛亦已幸矣顾曲徇其世伯之请辱酬庸大典以加有罪之人则是獎边臣之媮惰而劝其效尤也此明之边事所由日坏哉】

闰六月筑边墙

【初余子俊上言三边惟延庆地平易寇屡入犯获边人为导径入河套自是寇顾居内我反屯外急宜于沿边筑墙置堡其旧界石所在多高山陡厓依山形随地势以成边墙于计为便尚书白圭以边民方困奏缓其役八年秋子俊复言征套士马屯延绥者八万刍茭烦内地若今冬寇不北去又须备来年军资约八百二十五万公私烦扰至此安得不变计臣前请筑边墙诏事宁举行请於明年春夏寇马疲乏时役陕西运粮民夫五万给食兴工帝从之会王越袭寇红盐池患少息子俊得一意兴筑东起清水营紫城砦西抵花马池延袤千七百七十里凿厓筑墙掘堑其下连比不絕每二三里置敌台崖砦修巡警又于崖砦空处筑短墙斜一斜二如箕状以了敌避射凡筑城堡十二边墩十五小墩七十八崖砦八百十九时谓之橐驼城既告竣墙内地惠分屯垦岁得粮六万余石】质实【按边墙之筑明史兵志谓在成化七年地理志谓在九年考明宪宗实录八年三月叶盛疏云七年六月内用总兵巡抚议依界石山势铲削如城然未借役民夫而成堡守备兵不足供役乞量起山西陕西民修筑诏今官军以次整理不必借役于民则子俊初建边墙之议已令官军兴筑第格于部议未尝役及民夫兵志以为七年筑者盖据官军兴筑之始也九年十二月张瑾劾赵辅等昌功之罪有云余子俊方修治边墙难于槩治则子俊告竣之疏所谓不三月功成八九者特约畧言之以见其成之速而其实辅等御寇韦州之际即已纠衆兴工地理志以为九年筑者盖据民夫兴筑之始也叶盛疏又云正统间创筑榆林城堡二十有三于其南二三十里之内植军民种田界石是时即子俊疏所谓旧界石也明史杨一清传云边墙在延绥者余子俊修之甚固後边备日踈墙堑渐夷又明世宗实录二十五年曾铣奏云余子俊修筑边墙东起黄甫川西至定边营千五百余里岁久倾颓不异平地则子俊所筑边墙至正德时渐夷逮嘉靖中圯矣铣时余址间存故所言东西起止颇与子俊告竣之疏互殊也延庆谓延安庆阳非宣化府之延庆州清水营紫城砦并在府谷县东北】

秋八月以赵胜爲将军御伽嘉色凌命太监刘恒覃平监之

【伽嘉色凌寇宣府乃命胜率京军万人以恒平监军往御之寇退寻召还是年冬复自马营赤城入寇游击将军周玉败之明年春寇大同参将李镐等败之自寇徙出套延绥之患寢稀而宣府大同诸边颇被其扰矣】质实【赵胜字克功迁安人李镐大同右卫人】

发明【自永乐八年都督谭青营有中官王安与名奏事为明世阉宦监军之始驯至正统四年曹吉祥兴兵既久藏甲于家遂有天顺五年七月之变宪宗亦既目击之矣乃改元之岁即命唐慎监米永军寻又命裴当监杨信军传恭顾恒监永军至是复命恒平视师宣府厥後汪直继之睨然挟两钺以横恣于边疆其不为吉祥之续者一间耳语曰前车之覆後车之鉴若宪宗者可谓甘蹈覆辙者欤】

赐广东按察司副使孔镛佐事陶鲁林锦诰命

【镛初以连山令从都御史叶盛征广西有功荐擢高州知府府四境屯徭贼十余部其魁

冯晓邓公长势尤炽镛单骑谕降公长选壮士二百人乘夜捣晓巢缚其妻子归晓亦以五百人降已又与佥事陶鲁败贼廖婆堡余贼乃悉散去患以戢寻陟副使陶鲁故尝为新会丞会广西猺流劫高廉惠肇诸府破城杀吏无虚月鲁召父老语曰贼气吞吾城不早备且陷乃筑堡砦缮甲兵练技勇以孤城扞贼冲建郭掘濠布铁蒺藜刺竹于外城守大固贼来犯辄击破之亦以盛荐就迁知县韩雍征大藤峡鲁与有功进佥事既与镛破廖婆堡之明年复连破黄公汉于思恩浔州又明年廉州知府林锦亦以能御寇陟佥事盖成化四年事也锦自合浦训导条上御盗方畧中机宜即为盛所异历知灵山廉州皆值岁饥诸猺四起剽掠锦绥辑流移讨其梗化者境内悉平是时粤东西猺寇作乱卅郡无赖子应之所在盗贼充斥叶盛韩雍先後奉命督军务材镛等三人屡荐擢至监司以高雷军事任镛钦廉任锦而令鲁治新会阳江阳春】

【新兴诸县兵分道剿抚猺寇以渐衰息至是巡抚吴琛具三人治绩闻于朝并赐诰命锦终按察副使鲁後擢湖广布政使仍留治广东兵备领广西事时称鲁为三广公广大倚之如长城镛後累官至贵州巡抚有苗贼阿溪者桀骜多智横行诸部中守臣皆纳溪赂纵其流劫镛询得溪所昵者二人以计擒溪磔之羣蛮皆震慑】质实【连山隋县明属连州惠州北宋置元路明府合滴汉县明为廉州府治今皆因之灵山唐县明属钦州今属廉州府阳江县萧铣时置新兴县晋置明并属肇庆府今因之孔镛字韶文长洲人林锦字彦章连江人】

九月癸丑朔日有食之

诏侯伯及驸马年少者入国子监

【司业耿裕以勲戚子弟当先束身礼法乃采辑古诸侯贵戚言行可师者人授一编帝闻而称善明年祭酒周洪谟以士风浇漓请复洪武中学规帝纳其言命礼部榜谕于国子监崇信伯费淮怠不就学洪谟劾之夺冠带以儒中赴监停岁禄之半学政肃然】质实【耿裕字好问卢氏人刑部尚书九畴之子费淮南直隶定远人崇信侯璫之孙璫于宣德元年封伯子世袭】

冬十月都督同知李文等进兵讨土尔番不克引还【文等引兵至布隆吉尔川谋报阿尔集衆抗拒更结别部谋掠罕东赤斤二卫文等不敢进遂请旋军肃州州散遣二卫兵固守本土令哈商及默克埒辉和尔之衆退居苦峪驻牧章下兵部具如所请且以哈密人民无统教哈商权生国事因其请给米布赐以谷种文等无功而还土尔菜知中国不足惮久?哈尔十三年冬乃命边臣筑苦峪城移哈密卫于其地】质实【布隆吉尔川在今安西州西北流迓敦煌县入于哈喇诺尔辉和尔哈密种落之一明史哈密传言其种落杂居一曰回回一曰辉和尔一曰哈勒琿 布隆吉尔川旧作卜隆吉儿川哈喇诺尔旧作哈拉脑儿辉和尔旧作畏兀儿哈勒辉旧作哈刺灰今并改】

十二月罢采金

【时内费日侈帑金不足用命湖广宝庆等郡开采岁役五十五万人死者无算仅得金三十余两抚臣刘敷奏请已之户部檄所司开辽东黑山金场亦以巡抚彭谊言而罢】质实【黑山在今奉天宁海县东刘敷字叔荣永新人彭谊字景宜东莞人】

【乙未】十一年春三月少保文渊阁大学士彭时卒

【时与万安同在阁帝怠于政大臣希得见安结中官戚畹上下壅隔时顾怀忧每上言或留中或下所司多不见用常悒悒不得志屡请疾在告力恳放还不许至是疾革衣冠端坐徐言曰死生常理不足惊但冒居大位上不能报国下不能养老父耳卒年六十赠太师谥文宪时立朝三十年持正存大体有所论荐不使人知燕居无惰容非义不取有古大臣风】

夏四月以吏部左侍郎刘珝礼部左侍郎刘吉入内阁预机务

【珝先以旧宫僚晋官直经筵日讲反覆开导词气祝侃刘定之称为讲官第一帝亦爱重之入阁後尝呼东刘先生珝性疎直吉则多智与万安比】质实【刘珝字叔温壽光人刘吉字佑之博野人时内阁三人安贪狡吉陰刻珝稍优顾喜谈论人目之为狂躁皆充位无所匡正谚谓之纸棚三阁老云】

乾清宫门灾

【是月十四日壬辰夜也越四日乙未以灾告于奉先殿谴躬自责】

五月始召见皇子於西内

【帝自悼恭太子薨常郁郁不乐一日召太监张敏栉髮照镜叹曰老将至而无子敏伏地曰万岁已有子也帝愕然问安在对曰奴言即死万岁当为皇子主于时太监怀恩侍即叩首曰敏言是皇子潜养西内今已六岁矣匿不敢闻帝大喜即日幸西内遣使至安乐堂迎皇子使至妃抱儿子泣曰儿去吾不得生儿见黄袍有须者者即儿父也衣以小绯袍乘小舆拥至阶下时犹未剪胎髮髮披地走投帝怀帝置之膝抚视久之悲喜泣下曰我子也类我使怀恩赴内阁具道其事阁臣皆大喜怀恩并道帝意欲宣示外廷商辂曰当降敕礼部以定名为辞于是廷臣相率入贺帝即命皇子出见廷臣越数日帝复召阁臣问曰皇子既出将何以处之辂顿首曰陛下践阼十年储副未立天下引领望久矣当即立为皇太子安中外心帝颔之遂定名佑橿颁诏中外】质实【怀恩高远人】

六月皇子母纪氏卒

【先是帝召见皇子留宫中而纪妃仍居西内大学士商辂恐有他患而难以显言偕同官上疏曰皇子聪明岐嶷国本攸系重以贵妃保护恩踰已出但外议谓皇子母因病别居久不得见宜移就近所俾母子朝夕相接而皇子仍藉抚育于贵妃宗社幸甚纪妃遂移居永壽宫

数召见逾月妃病笃辇言如有不讳礼宜从厚且请命司礼监奉皇子过妃宫问祖帝皆从之及乙巳卒追封淑妃諡恭恪庄僖】质实【明史后妃列传妃居永壽宫万贵妃日夜怨泣曰羣小给我其年六月妃暴薨或曰贵妃致之死或曰自缢也张敏亦吞金死事与商辂传所载互朱盖传闲之异永壽宫春明梦余錄月华门往北曰顺德右门再北向东与凤彩门相对者曰咸和右门南者曰毓德宫原名安乐宫後又改永壽宫】

秋八月浚通惠河

【先是漕运总兵杨茂言自张家湾舍舟车挽至都下雇值不赀通州至京旧有通惠河道石牐尚存修牐瀦水用小舟剥运便帝遣尚书杨鼎侍郎乔毅相度上言旧牐二十四通水行舟但元时水在宫墙外舟得入城今水由皇城金水河出故道不可复行请濬玉泉龙泉及月儿柳沙诸泉水使入西湖闭分水青龙牐引诸泉水从高粱河分其半由金水河出余从都城外濠流转会正阳门并流大通桥牐河随旱涝启闭则粮艘可近仓甚便帝善其议以灾异工未及举至是命平江伯陈銳等督漕卒七千人疏浚明年六月讫工濬泉三增牐四漕舟稍通然元时所引昌平白浮诸泉俱遏不行独引一西湖又仅分其半河窄易盈涸不二载浅塞如故】质实【明史河渠志通惠河即大通河在大兴县东南元郭守敬所凿由大通桥东下抵通州高丽庄与白河合至直沽会卫河入海长百六十里有奇十里一牐蓄水济运又以白河榆河浑河合流亦名潞河洪武时渐废永乐中濬河故道置牐以瀦之未几俱湮此所浚者自大通桥至张家湾浑河六十里也方輿纪要张家湾在通州南十五里元万户张瑄督海运至此而名元史地理志金水河源出玉泉山流入皇城故名金水戴司成集玉泉在京城西三十里西山之麓有石洞泉自中而出其上有芙蓉阁金章宗避暑处明实錄龙泉月儿柳沙诸泉其源皆出于西北一带山麓水经注西湖东西二里南北三里盖燕之旧池也渌水澄澹川亭望远为游瞩之胜所水部备考青龙牐在都城西北三十里元史河渠志高粱河在顺天府城西自昌平州沙涧流经高粱店又东南流入都城积水潭白浮泉在昌平县界西折而南经瓮山泊自西水门入都城焉杨鼎字宗器陕西咸宁人乔毅字志弘山西乐平人陈銳合肥人平江伯瑄之曾孙】

们都尔伽嘉色凌遣使入贡

【遣使通阿等来朝贡马燕贐甚厚仍以彩段酬其马直通阿等九十二人皆授官有差予冠带初伽嘉色凌以女妻们都尔故立为汗屡挟以入寇及是通贡患少息已而伽嘉色凌专恣日甚托罗该与伊斯玛音谋杀之未几们都尔亦死诸强酋相继略尽边人稍得息肩】质实【托罗该们都尔部下大头目伊期玛音乃穆哩罕之子其谋杀伽嘉色凌事在成化十五年通阿旧作桶哈托罗该旧作脱罗干伊斯玛音旧作亦思马因今并改】

九月丁未朔日有食之

冬十一月立子佑樞爲皇太子

【时皇太后居仁壽宫语帝曰以儿付我太子遂居仁壽宫一日贵妃召太子食太后谓曰儿去无食也太子至贵妃治食曰已饭进羹曰疑有毒贵妃曰是儿数岁即如是他日鱼肉我矣因恚成疾仁壽宫在奉先殿东北履顺蹈和二门之内】

以朱英总督两广军务

【自韩雍大征诸蛮以来将帅喜邀功利俘掠名为鵬剿英至镇以宁静约饬将士毋得张贼声势妄请用师招抚獠獞效顺者定为编户给复三年于是马平阳朔苍梧诸县蛮悉望风附而荔浦立山乡贼李公主有衆数万久负固亦遣子纳款为置永安州处之俾其于孙世吏目自是归附日衆凡为户四万三千有奇口十五万有奇帝甚嘉之初雍在两广虽有平寇功恢廓自奉赠遗过侈有司困供亿公私耗竭既而吴琛代雍务为廉谨至英益持清节其威望不及雍而惠泽过之】质实【马平梁县明属桂林府阳朔隋县明属桂林府苍梧汉郡治广信县隋改县名苍梧明属梧州府今皆因之立山乡在永安州治东永安州本唐立山县明洪武中省入平乐县至是置县属平乐府今因之】

十二月改諡郕戾王爲景皇帝

【初制门州训导高瑶上言正统己巳之变先帝北狩宗社危如一髮使非郕王继统国有长君则祸乱何日平銮輿何由返六七年间海宇宁谧厥功不小迨先帝复辟贪天功者遂加厚诬使不得正其终节惠跻祀未称典礼望敕礼官追加庙号以尽亲亲之恩章下廷议久不决而左庶子黎淳力争谓不当复且言昌邑既废不闻复为汉某帝更始既废不闻复为汉某王瑶此言有死罪二一诬先帝为不明一?陛下于不孝此必有小人主之者不然彼草茅疎远安敢妄言帝曰景泰往事朕未尝介意淳乃欲献媚希恩邪切责之议遂寝其後御史杨守随复请改諡事亦未行然帝终感瑶言至是乃命阁臣议复郕王位号商辂力赞成之遂下诏曰朕叔郕王践阼戡乱保邦奸臣谗构请削帝号先帝旋知其枉深怀悔恨以次抵诸奸于法不幸上宾未及举正朕敦念亲亲用成先志郕王可仍旧里帝号寻上尊諡曰恭仁康定景皇帝令所司修饰陵寢】质实【荆门宋军元州明洪武初属荆州府嘉靖十年改属承天府今府复名安陆州仍属焉高瑶字庭坚闽县人杨守随字维贞鄞县人】

【丙申】十二年春正月南京陰霾地震

【敕羣臣修省于是南京科道官上言弭灾之策乞进君子以正朝廷择将帅以备边鄙设法制以弭盗贼并乞饬天下镇巡官及三司郡县省刑薄歛拯饥缉盗毋妄兴土木毋因公科扰诏下所司行之】

二月乙亥朔日有食之

夏五月命左副都御史原杰抚治荆襄流民

【初项忠既平荆襄盗先後招抚流民九十三万有奇移军竹山捕遗孽复招出流民五十万俘?贼党家属二万八千七百余人家选一丁偕其孥屯戍湖广边卫其流民已附籍者给复三年未附籍者逐归其乡而着籍虽久或占山数十里招集无赖千人争鬪刼杀者亦令遣逐于是有司一切驱迫不前即杀之贼党发戍者舟行多疫死廷臣遂一此咎忠忠陈善後十事亦祇增设营堡巡司多方侦守以厉入山之禁不数年禁渐弛流民复聚朝廷以为忧祭酒周洪谟着流民说畧言东晋时庐松之民流至荆州乃侨置松滋县于荆南陝西雍州之民流聚襄阳乃侨置南雍州于襄西其後松滋遂隶荆州南雍州遂治襄阳今当增置郡县听附籍为编氓可实襄邓户口都御史李宾善其说闻于帝帝然之遂命杰出抚杰徧历山溪宣朝廷德意诸流民欣然附籍乃大会湖广河南陝西抚按官籍之得户十一万三千有奇口四十三万八千有奇用轻则定田赋民大悦杰相度地势以襄阳所割郧县居竹房上津商洛诸县中道路四达且去府治远山林深阻将吏鲜至猝有盗贼难遥制乃拓其城置郧阳府以县附之且置湖广行都司增兵设戍而析竹山置竹谿析郧置郧西析汉中之洵阳置白河与竹山上津房咸隶新府又于西安增山阳南阳增南召桐柏汝州增伊阳各隶其旧府制既定将还以地界湖广河南陝西事无统纪因荐御史吴道宏自代诏即命道宏绥辑人民十五年就擢大理寺卿抚治郧阳襄阳荆州南阳西安汉中六府郑阳之有抚治自此始也杰事方竣进南京兵部尚书未任卒于南阳郧襄民为立祠】质实【忠陈善後十事一流民已复叶者给复三年复流入者全家戍边卫一禁入山窃矿一增设营堡十二巡司八一竹山县设立千户所一汉中西安流民责令陝西副使等官夔州流民责令四川巡守官御其越界一所留戍卒卫卒委指挥分领操练以助新堡声威一撤回分守赞画守备等官裁革新增抚民官及兴山县知县一荆襄德安令湖广镇巡官督属防守南阳令巡按河南御史督属防守一专任抚民之参政等官宜时巡历竹山诸县及新建诸堡以遏窃矿流民一流民所弃山外田地分授主户承佃山谷新垦田税俱与间谿松兹汉县属庐江郡晋咸康中县民避乱于荆南因侨置松滋县明属荆川府今因之汉之松滋今为颍州府霍邱县地南雍州晋太元中侨置今为襄阳府地郧县汉锡县晋改郧乡元改郧县明为郧阳治治房县後汉房陵隋为房陵郡治唐为房州治明改县属襄阳是年改属郧阳今并因之上津隋置元省明复置襄阳是年改属郧阳今省上津县故城在郧西县北一百四十里商洛谓商县与洛南也後周始置商州洪武七年降县是年升州隶西安府今为直隶州洛南县隋置金废为镇元复置属商州明洪武初改属华州是年复属商州天启初改洛为维今因之商东东九十里别有商洛废县则後周所置金贞元二年废竹溪以尹店社置郧西以南门堡置洵阳汉旬阳後汉省晋复置曰洵阳元省明复置属金州以隶于汉中府万历十一年改金州曰兴安州二十三年升直隶州更以白河属焉白河以白石河置山阳晋丰阳县金废为镇至是复是以在北山之南丰河之北故名山阳南召以南阳县之南召堡置桐柏隋县元废为镇至是复置伊阳以隋伊阙县置今并因之吴道宏宜宾人】

秋七月黑眚见

【有物金睛修尾状如犬狸负黑气夜入民家至则人昏迷徧城惊扰帝常朝奉天门侍卫见之而譁顷之始定帝于禁中祭告天地以四事自责大学士商辂疏弭灾八事曰番僧国师法王母滥赐印章四方常贡外勿受玩好许诸臣直言分遣部使録囚省冤狱停不急营造实

三边军储守沿边关隘设云南巡抚帝优诏褒纳】质实【四事自责用度不节一工役劳民二忠言不闻三仁政不施四】

八月以王恕巡抚云南

【大学士商辂以云南远在万里西控诸夷南接交趾而镇守中官钱能纵恣不法议遣大臣有威望者为巡抚镇压之乃改王恕为左副都御史以行先是能遣指挥郭景奏事京师诡言安南捕盗兵入境帝即命景齎敕戒约之旧制使安南必由广西而景径自云南往能因遗安南王黎灏玉带宝纁蟒衣珍奇诸物灏遣将率兵送景还欲遂通云南道景惧後祸给先行白守关者扬言安南寇至关吏戒严黔国公沐琮遣人谕其帅始返而诸守臣畏能匿不奏能又遣景及指挥卢安苏本等交通干崖孟密诸土官纳其金寗恕至皆廉得之遣骑执景景惧自杀因劾能私通外国罪当死帝诏刑部郎中潘蕃往按之恕再疏发能贪暴状且言昔交趾以镇守非人致一方陷没今日之事殆又甚焉陛下何惜一能以安边徼能大惧急属贵近请召恕还恕遂改掌南京都察院能事立解蕃勘上得实诏宥能而论其党九人罪能更为祈免亦多宥之恕抚云南仅九月威行徼外黔国以下咸惕息奉命疏凡二十上直声动天下】质实【孟密本木邦属部景泰中蛮妇曩罕弄叛木邦子思柄自称宣慰使後大学万安入其赂乃请析置孟密安抚司事详成化十九年神宗十三年改宣抚司地距今云南省三十三程沐琮黔国公成孙也藩蕃字廷芳崇德人初冒鍾姓後始复】

发明【人臣无越境之交况能以阉寺镇守边隅谬膺重任敢与安南黎灏潜通馈问此岂寻常纵恣所可曲宥者乎且史称灏素欲窥伺云南故发兵随景假道使非沐琮遣人谕止其势正未可测则能之罪更有不可胜诛者乃宪宗既得王恕之奏不特不明正能罪而转改恕南京不惟能自邀曲贷抑且庇及党侪国宪王章颠 至於如此又何怪乎能辈之日横也】

九月令太监汪直刺事

【妖人李子龙者本侯姓名得权易州人少为僧行脚河南遇道士授以符术遂蓄髮变姓名先是陕西民李氏产子子龙有异徵得权因冒之往来真定间迤邐至京师主军匠杨道仙家夤缘中官鲍石潜入大内石党韦寒等敬信子龙皆北面礼为上师寻锦衣校侦其谋不轨白中官黄赐上变寒自杀子龙及石等伏诛帝心恶之銳欲知外事御马监太监汪直故大藤峡猺种初给事万贵妃宫为人便黠因命易服服将校一二人密密出伺察人莫之知也】

冬十月京师地震

【是月十一日辛巳也後六十日壬午陕西之兰州亦地震】

十一月南京大雷雨

【是月二十三日癸亥也明年二月甲戌安庆大雪雷电应天巡抚牟俸言雷者阳气之发

雪者陰气之凝十一月一阳初复而震雷早发已乖二气之常二月四阳既盛而恒雪不已雷电复作陰阳杂糅尤天变之大者乞修人事以弭之帝乃诏求直言】

【丁酉】十三年春正月增孔子庙筵豆乐舞之数

【初洪武四年定祀孔子礼筵豆以十舞以八佾前年秋祭酒周洪谟请备天子之制章下礼部尚书邹干駁止之洪谟再疏争言孔子像以冕旒十二既用天子之礼而佾舞乃用诸侯之乐以礼论乐则乐不备以乐论礼则礼为僭乞如前所请增筵豆为十二舞为八佾庶礼乐相称益足章尊崇之典帝从其议乃命大学士商辂以增定礼制告孔子庙学士王献告于阙里】质实【王献字惟臣仁和人】

置西廠以太监汪直领之

【永乐中始置东廠令宦官访缉逆谋大奸与锦衣卫均权势至是又别设西廠刺事以汪直督之所领缇骑倍东廠势远出卫上会建宁卫指挥同知杨勰与父泰为仇家所讐既命刑部主事王应奎锦衣百户高崇往勘而勰亡入京师因其姊婿礼部主事董序求计于韦瑛韦瑛者素无赖子鬻于宦官韦其蒙其姓冒延绥功授百户方欲从直刺事无繇也乃诺勰为营解倾助其貲而潜报直谓勰父子杀人惧罪辇金钜万匿序所将贿诸用事者以缓其狱直信之即遣人捕勰序顾勰貲已尽于瑛大索序家无所得因考讯勰琶之三琶者锦衣酷刑也以加人骨节皆寸解勰不胜琶妄言寄金于其叔父兵部主事仕伟所瑛遂夜率逻卒突入仕伟家缚仕伟拷掠及其妻子翰林侍备陈音与仕伟比屋居闻其声甚楚乘墉大呼曰尔擅辱朝臣不畏国法耶逻卒应曰尔何人不畏西廠音厉声曰我翰林陈音也瑛乃繫仕伟去而应奎崇勘狱犹未报直奏其受泰赂与泰并械至京狱具勰崇已庾死泰坐弃市籍其家应奎遣戍仕伟序并谪官直既发勰事颇诬左右大臣多得勰贿帝虽含隐不发然愈谓直可倚任直由此亦遂倚任瑛屡构诬狱刑部郎中武清礼部郎中乐章行人张廷纲太医院院判蒋宗武浙江左布政使刘福左通政方贤皆系西廠狱被收案凡西廠逮捕朝臣初不俟奏请气焰薰灼自诸王府边镇及南北河道所在校尉罗列民间鬪詈鸡狗琐事辄寘重法人情大扰】质实【西廠在灵济宫前武清自广被收系按明实錄武清自广西勘事还至通州西廠官校言其有所齎载执系之狱鞫无实释之竟不以闻方贤时以左通政掌太医院事韦瑛索药不得遣人恣掠其家得片脑沈香以为盗之官库且藏有御墨及龙凤甃器俱以违法论寻谪戍辽东乐章张廷纲同使安南还廠校执之鞫其受馈遗有迹奏闻命冠带闲住刘福先已擢副都御史以母忧去寻坐为浙江布政时督造岁币不如法当镌一级服除命以三品官外补构之于直者遂执系西廠亦以鞫无实释之旋授陕西按察使蒋宗武无故被囚五月革西廠竟衣囚服返其家家人犹未之觉也建宁卫属福建行都司本朝顺治十八年裁杨勰杨仕伟董序皆建安人勰少师荣之孙陈音字师召莆田人王应奎慈谿人武清大同人乐章横州人张廷纲江宁人刘福益都人】

三月命慎妖言之狱

【时西廠旗校以捕妖言图官赏多为膺书诱愚民而後捕之冤死相属廷臣莫敢言有通判曹鼎知县薛方者宁晋人也会罢闲家居廠枝诬其邑人王凤与瞽者康文秀受妖书株连及之发卒围其家榜掠诬伏既论死鼎方两家人数声冤下法司覆验狱果妄而分守怀来中官廖礼复兴妖人赵大狱所收系甚衆巡抚殷谦等具奏如礼言狱成命官按之亦妄帝始悟向所罪妖言多被诬者乃下诏责礼等而谕诸法司慎鞫妖言之罪毋或瞻徇以虐非辜】质实【宁晋唐县人属赵州今因之殷谦字文擢涿州人】

夏五月大学士商辂兵部尚书项忠等请罢西廠【辂以西廠官校势日横因率同官劾直罪且言陛下委聽断於直直又寄耳目于羣小擅作威福虐善良陛下若谓摘奸禁乱为有益则前此数年何以帖然无事近自直用事以来人心疑畏卿大夫不安于位商贾不安于途庶民不安于业若不亟去直天下安危未可知也帝得疏愠曰用一内?何遽危天下谁主此奏者命太监怀恩覃吉至阁诘责辂正色曰朝臣无大小有罪皆请旨逮问直擅抄没三品以上京官大同宣府边城要害守备俄顷不可缺直一日械数人南京祖宗根本地直擅收捕留守大臣诸近侍在帝左右直辄易置直不去天下安得无危辂等同心一意为朝廷除害无有先後恩等以实覆奏传旨慰劳翌日兵部尚书项忠亦倡九卿劾之帝不得已令直归御马监调韦瑛边卫散诸旗校还锦衣卫中外大悦】

六月斥兵部尚书项忠爲民

【忠之倡九卿劾直也既具疏草令郎中姚璧持诣诸尚书署名先诣吏部尹旻旻素交驩直却曰奏出项尚书兵部宜为首璧对曰公六卿之长也旻怒曰今日乃知六卿长耶既署名即驰报直直衔忠甚谋于锦衣千户吴绶绶尝从征荆襄以罪为忠所劾亦深憾忠遂相与伺之急忠不自安乞归治病未行而直绶喉东廠校诬忠以刘江事刘江者金吾左卫都指挥也注选为江西都司巡按御史以其未诸军政檄使领操而更令僉事掌都司印江不胜忿疏其事以请事下兵部言江妄奏当罪帝方以都指挥例得掌印江未为妄切责兵部阿御史言而东廠校忽腾飞语谓江选都司非例乃夤缘中官黄赐属兵部得之赐故与陈祖生为司礼监直忤其位已上不相能商辂之劾直直疑出赐祖生意赐祖生皆闽人直既譖其为乡人杨给事中郭鏗等遂上章劾忠词构江事诬忠且以倾赐给事中郭鏗等遂上章劾忠词连兴武伯李震等交通忠状震初与忠洪平荆襄贼亦吴绶所恶也诏并下法司会锦衣卫廷鞫忠抗辩不少屈衆虽知忠枉事皆无左验然重违直意而绶又方为锦衣理刑官遂周内其狱黜忠为民江遣戍姚璧亦被牵引与震等谪有差】质实【姚璧桐庐人少保夔之子尹旻字同仁历城人吴绶江夏人】

御史戴缙上书颂太监汪直功乃复开西廠大学士商辂引疾归

【时西廠方革人心稍安顾帝眷直不衰令?出外刺事如故御史戴缙者性险躁干进以九年秩满不得擢用探知帝意乃假灾异上疏言近岁以来灾变屡臻敕谕廷臣修省未闻大臣进何贤退何不肖亦未闻羣臣祛何裨政效何嘉猷独有太监汪直缉捕杨勰等之奸恶惩治高崇王应奎之赋贪凡所摘发允协公论足以警惩服人特其部下官校韦瑛輩行事或涉张

皇为大臣所奏罢伏望陛下推诚任人务俾宿弊尽革然後天意可回也缙初为此奏属所善锦衣千户吴绶以稿示直直得之大喜为言于帝疏入遂复开西厰商辂引疾请归帝先入直譖谓辂受杨勱金徒以大臣故置不问至是遂聽辂去而缙所上疏并乞令两京大臣自陈以倾直所不悦者于时大臣以次陈免者数十人士大夫皆俛首事直直势愈恣矣然直虽倚势多作奸亦时或发奸以取信于帝明年南京镇守中官覃力朋进贡还以百艘载私塩武城典史诰之力朋击折其齿射杀一人直廉得以闻逮治论斩力朋後得幸免而帝以此谓直不私益幸直】质实【武地古夏城地隋改旧武城为清河县别置武城于此明属高唐州今属临清州戴缙字子容南海人】

发明【明自宦官王振乱政御史李铎以遇振不跪谪戍铁岭卫于是言官之气始慑于宦官然未尝显与宦官比也前七年云南镇守中官钱能以疾将召还巡按御史郭阳誉能刚果有为乞留镇守为士论所鄙然犹不至倾朝士以悦宦官也戴缙险躁于进訛訛颂西厰之功而揚其焰且以倾直所不悦者嗣後宦官用事遂多与言官相表里驯至末流崔呈秀倪文焕之徒皆甘心効逆阉鹰犬毒痛海内以速明祚之亡而作俑实自缙始缙罪可胜诛哉】

秋八月振南畿山东州县灾

【帝以应天诸府及山东兗州水潦伤稼民大饥乃分遣曹郎往发仓振之并赐之敕所在有司贪酷者许逮治以闻】质实【分遣曹郎按明实録振兗州者刑部郎中张文淮安则兵部郎中张谨扬州则户部郎中谷琰徐州则吏部员外郎国泰凤阳则户部郎中李炯然】

锦衣卫执工部尚书张文质下狱

【东厰官校发云南百户左昇私事词连掌通政使兵部尚书张文质锦衣卫遂执下狱帝不知也在通政何琮等以掌印请帝乃知而释之锦衣卫官以擅系大臣停俸青】质实【张文质昌黎人何琮字文璧仁和人】

九月京师地震

【月之十日甲戌夜地震者三次】

【戊戌】十四年春二月皇太子出阁就学

【命太常少卿王献等入侍学士彭华等充讲读官敕阁臣万安刘珣刘吉董督之时有老阉覃吉者朝夕侍太子口授四书章句及古今政典帝赐太子庄田劝勿受曰天下皆太子有也太子偶从内侍读佛经吉入太子曰老伴来矣急手孝经是年太子方九岁端本正始吉有力焉】质实【彭华字彦实安福人大学士时之族弟也】

三月复开辽东马市

【永乐间设马市于广宁及开原城东以待泰宁朵颜福余三卫正统间以其部衆怀贰罢不设会们都埒暴强侵掠三卫三卫部长皆走避塞下颇饥困屡请复开马市兵部持不可至是辽东巡抚陈钺复为之请乃许之而通事刘海姚安肆侵牟朵颜诸部挟怨遂扰广宁不复来市後钺长兵部惧罪及已因诣治海安二人罪令参将布政司官一人监市毋有所侵克于是互市如故】质实【陈钺字廷威献县人】

上杭盗起以高明巡抚福建督兵讨平之

【上杭地接江西广东山谿险阻为闽之盗藪天顺中李宗政作乱巡按伍骥率兵捣其巢俘斩八百余人乱乃定至宗曾宗邓嵩等复屯结出掠勅镇守中官卢胜巡按戴用督捕之而势益炽时高明方服阕特起为福建巡抚任以讨贼明至汀即督兵入山不数月盗皆以次禽缚诛首恶三十六人余减死遣戍析其地置永定县由是上杭无盗患】质实【上杭宋县明属汀州府永定县明属汀州府今皆因之高明字上达贵溪人自幼事母以孝闻初为南京右佥都御史会扬州私贩盐者啸聚为寇守兵失利诏明讨之造巨舰曰筹亭往来江上督战沿江置逻堡侯望贼踪踪无所匿遂平之明廉约清峡所至事辄办既平上杭盗旋移疾归伍骥字德良一字体纯安福人骥与都指挥丁泉同讨贼泉力战为贼所害骥平贼後亦旋卒闽人并祠祀之知县萧定闻于朝赐祠额曰褒忠戴用万安人丁泉汶上人】

夏五月以戴缙爲右佥都御史

【缙既颂直功复开西廡即擢尚宝司少卿然缙意未慊也直力荐之于帝旋有是命明年复自中旨擢副都御史甫踰年进都御史代王越掌院事於时御史王亿等竞效缙所为相率媚直谓西廡摘伏发奸不惟可行之今日实足为万世法传闻四方无贤愚皆唾罵之指缙为罪首而缙骤跻显秩益甘心党直依阿湏臾台中纪纲扫地後直宠日衰缙知不为廷臣所容谋出为南京工部尚书直败黜为民】质实【王亿铜梁人】

六月太白岁星同昼见

四川巡抚张瓚讨平松潘叠溪苗

【先是松潘诸番寇边佥事林璧言松茂惟设二参将以副使居中调度事重权轻临敌稟令上官千里请战谋泄机缓故常失利宜别置重臣弹压或即命巡抚兼领专其责成乃诏瓚兼督松茂安绵建昌军务瓚至军审度形势令副总兵克戎军松潘参将孙嵩军威叠为夹攻计而自率兵攻白草坝数大砦斩获无算移师狗茂州叠溪所过降附贼魁皆殲先後破灭五十二砦其他一百五砦悉献马纳款诸番尽平留兵戍要害乃班师】质实【安县唐曰龙安元安州明降县属成都府今改属绵州白草坝番砦名在今龙安府属之平武县南张瓚字宗器孝感人林璧武冈州人】

太监汪直行辽东边

【前年冬辽东巡抚陈钺以掩杀冒功激变直欲自往定之而帝命马文升往安抚直不悦文升驰至镇宣玺书抚慰无不聽抚者事垂定直思攘其功固请于帝挟其私人锦衣百户王英日驰数百里箠守令远近驿骚钺闻之惧先遣人赂直左右令所过居民跪迎道左比至钺出迓于郊望尘蒲伏盛供张以娱直左右既得赂复争称钺贤直大喜至开原再下令招抚文升乃推功於直内慚文升又与抗礼奴视其左右直益不悦而钺与文升素不合日夜譖之直直于是必欲倾文升矣】

发明【明代宦官采办刺事分镇监军出使皆肇自永乐而特遣巡边则自宪宗之命汪直始夫直之擅作威福其时中外已莫不震聳原不待巡行边徼而始张其声焰也即今考其传载率飞骑日驰数百里所过箠官吏各边都御史皆服囊鞬迎谒供张甚盛左右从者悉大通贿赂远近爲之驿骚则于边事又何益哉直年少喜兵欲以边功自固乃有此行而为宪宗者亦何至曲徇其请而罔顾边衅之日启也耶】

秋七月京畿山东大水

【分遣郎中林孟乔刘道员外郎袁江王臣往勘灾振之寻诏廷臣条恤民事宜而命南京刑部侍郎金绅巡视江西灾时江西亦大水也于是科道官应诏言近岁以来工匠以斧斤劳劳滥膺禄秩旗校捕获妖言辄得迁官前虽勅法司慎鞫斯狱而缉捕者希求陞职恐其中不免枉诬刑赏过中灾祲亦或繇此疏入帝下所司议之是年四月襄阳江溢坏城郭诏免被灾秋粮五月陕西商州大水民多渰死者】质实【林孟乔福清人刘道怀仁人袁江祥符人王臣蒲城人金绅字缙卿上元人】

八月下苏松巡抚牟俸於锦衣卫狱

【俸巡抚山东时陈钺为布政使两人负气不相遂遂相恶也钺既为汪直所喜欲逞前憾于俸从容言俸短直信之会俸议事至京直请执下锦衣狱先是俸所亲学士江朝宗除服还朝道俸所部俸出迓之与联舟并下所至有司供张颇盛直方求俸罪闻之疑朝宗必有所关说并下狱榜掠朝宗不能堪诬引僉事吴?等十余人俱被逮系狱半载戍俸湖广边卫谪朝宗等官有差踰年俸竟卒戍所】质实【江朝宗巴县人吴编山阳县人】

九月擢嘉兴府杨继宗爲浙江按察使

【继宗为嘉兴知府以一仆自随署斋萧然性刚廉孤峭人莫敢犯时集父老问疾苦为祛除之大兴社学遇学官以宾礼师儒竞劝文教大兴御史孔儒来清军里老多挾死继宗榜曰御史杖人至死者诣府报名儒怒继宗入见曰为治有体公但厘剔奸弊劝惩官吏若比户稽核则有司事也儒不能难心衔之濒行突入府署发篋视之敝衣数袭而已儒慙而去中官过者索钱于继宗即发牒令取库金曰金具在与我印券中官咋舌不敢受入覲直欲见之之不可帝问直朝覲官孰廉直对曰天下不爱钱者惟杨继宗一人耳至是秩满超迁按察使数与中官张庆忤庆兄敏在司礼每于帝前毁继宗帝曰得非不私一钱之杨继宗乎敏惶恐遗书

庆曰善遇之上已知其人矣】质实【杨继宗字承芳阳城人孔儒句容人】

河决开封

【坏护城堤五十丈河南抚抚李衍上言河南累有河患皆下壅壅塞所致宜疏开封西南之新城下抵梁家浅旧河口以泄杏花营上流而自八角河口抵南顿则当分导之以散其势庶可免祥符鄢陵睢陈归德之灾帝勅衍酌行之明年正月迁荥泽县治于河北然衍所疏浚者不久亦塞】质实【明史河渠志祥符护城大堤天顺元年所修筑也方輿纪要杏花营在开封府城西二十里一统志八角河口今日八角店在祥符县西南三十里南顿南顿子国春秋时又迫于陈而南徙因名南顿今陈州府商水县北有故顿城鄢陵汉县明属开封府今因之李衍字文盛其先历城人永乐初有李义者谪戍南丹後改编隆庆州民籍遂为隆庆人】

御定资治通监纲目三编卷十四

卷十五

<史部,编年类,御定资治通监纲目三编>

钦定四库全书

御定资治通监纲目三编卷十五

【起己亥明宪宗成化十五年尽丁未明宪宗成化二十三年】几九年

【己亥】十五年春二月修开国功臣墓

【南京礼部言勲臣李文忠等十三人坟墓俱在南京城外文忠曾孙李萼等以岁久颓坏为言请命工修治帝可其奏且令无後者置守塚一人】质实【按明实録勲臣十三人为常遇春李文忠邓愈汤和冯国用吴复俞通海康茂才赵德胜丁德兴张德胜吴祜吴良明年复命南京工部修耿再成墓从其曾孙俊之请也】

夏四月以方士李孜省为太常寺丞

【孜省初为江西布政司吏骹法受赃既历京考得冠带而赃事发当褫为民匿不归时帝好方术孜省乃学五雷法厚结中官梁芳钱义以符籙得幸中旨授太常寺丞御史杨守随言祖宗官人之制必考素行是以奸利衰止流品不清李孜省故犯赃之吏其资格则刀笔也其情罪则胥靡也太常职司祭祀厥选尤重奈何用此赃秽罪人以渎事天地宗庙给事中李俊亦以为言帝不得已为改上林苑监副然宠幸日甚赐以印章二曰忠贞和直曰妙悟通微许密封奏请孜省因与梁芳表里为奸干乱政事】质实【李俊字子英岐山人李孜省南昌人】

五月下兵部右侍郎马文升于锦衣卫狱谪戍

【文升既抚定辽东还赉以牢醴理部事如故而陈钺终欲徼功饰罪复激变失事为言官所劾遣汪直偕定西侯蒋琬尚书林聪往勘之会兵部亦以激变劾钺钺疑出文升意倾之益急直故恶文升而庇钺欲卸其罪因奏文升行事乖方禁互市农器故致边患然文升实禁市军器非农器也琬聪畏直势不敢异奏皆如直言遂逮文升下锦衣卫狱谪戍重庆卫并诘责言官容隐不劾奏廷杖李俊等五十六人钺既倾文升遂讽直请于帝大发兵树边功是年冬以抚宁侯朱永充总兵官直监军钺赞军务帅师出辽东塞遇贡使六十人掩杀之更发墓斲髑髅以张级数捷闻封永保国公增直岁禄陞赏者二千六百余人钺亦论功晋右都御史寻代杨鼎为户部尚书】质实【重庆卫在重庆府西洪武六年置隶四川都司蒋琬江都人定西侯贵之孙】

秋七月太监汪直行大同宣府边

【宣大镇巡官屡报寇将扰边兵部患们都埒伽嘉色凌尽銳南侵请敕重臣往视边备然是时伽嘉色凌已为其族弟伊斯玛音所谋杀部下方内乱实无意南侵镇巡官言边警冀虚张守御功以觐赏也而兵部未知伽嘉色凌死遽信边臣言乃有是请帝竟命直往所至饰厨传供张百里外都御史服囊鞬偕其属伏道左泥首迎谒须过乃敢起至舘易服请见膝行起居叱之出乃唯唯退左右索赂不贲各倾帑以给之边储为之空】

九月播州诸蛮作乱

【先是播州宣慰使杨辉欲立庶长子友为嗣长官张渊阿顺之安抚宋韬等諫乃止辉致仕帝命辉适子受嗣辉以友不得袭职谋割地予之问计于渊渊劝辉取生苗所据天坝干湾溪等砦授友长官韩瑄以苗不为乱諫母征取辉怒与渊计执瑄杖杀之而以苗乱闻于朝乞令湖广贵州会兵进讨廷议以辉难独任宜敕四川巡抚张瓚督其军瓚至播州与辉攻败诸苗请于湾溪设安宁宣抚司即以友为之时成化十二年也天坝干等砦虽旧隶播州以僻阻弃不问生苗耕其地居之与邻坏诸蛮安韩日久既立宣抚烂土蛮恶其逼遂煽诸蛮作乱攻围安宁爱友力弗支求援于川贵二镇兵部乃奏起辉统兵以剿敕川贵兵助之已而天坝干贼首賚果复纠合九姓丰宁及荔波贼万人攻剿愈亟帝责诸守臣玩寇命镇守太监张成总兵吴经相机剿抚迄莫能靖也】质实【湾溪蛮砦名地在今平越府黄平州废重安司境天坝干亦蛮砦名地在今遵义府废播州司境烂土长官司明洪武十六年置地今在独山州东一百十里丰寧长官司明洪武二十年置地在今独山州南一百十里荔波宋羁縻州元属南丹安抚司明洪武元年并入思恩县十七年析置荔波县隶广西庆远府正统十二年改属南丹州孝宗十七年改属河池州 本朝雍正十年改隶贵州都匀府】

【庚子】十六年春二月逮河间府知府滕佐等罪之

【中官陈喜以事出河间会岁饥知府滕佐偕其属分振所部失迎谒邮传仓卒治供张又不当喜意喜怒归白于帝乃命逮佐等至京罪谪有差】质实【滕佐字辅臣临洮人】

王越袭鞬鞞于威宁海子破之

【初越红盐池之捷自谓当得封爵尚书白圭持之叙不踰常格心憾甚既而汪直用事越于西征识其党韦瑛遂破名检因瑛以交直屡喉直立边功固宠直之构衅辽东越私于朱永讽其荐已督师为陈钺所阻钺骤寵心益艳之会延绥守臣有言敌骑将渡河犯边者越喜甚乃说直请出师诏以永为将军直监军越提督军务越侦知敌无犯延绥意河水泮方移帐威宁而恶辽东之役永不援已与偕也乃以计给直奏令永帅师由南路已与直将轻骑循塞垣而西俱会榆林越至大同告直以敌帐所在尽选宣大两镇兵二万出孤店分数道进值大风雨雪晦冥潜行至威宁海子时伊斯玛音等不为边患不虞师之猝至相顾惊愕壮者仓卒乘马避因杀其老弱报首功四百三十余级获马驼牛羊六千师不至榆林而还永至榆林不见

敌无功由是增直岁禄越封威宁伯提督团营领都察院事如故】质实【一统志威宁海子在今正黄旗察哈尔南其西南旧有威宁城金时故县也孤店关名在大同县东北】

三月诏减光禄寺供奉

【时京畿山东洊饥谕礼部曰比岁以来顺天北直隶山东府县旱潦相仍朕甚忧之书曰民惟邦本本固邦宁朕重赖吾民供奉玉食于上而吾民有不饱半菽者日当典膳进御兴念及此为之辍食其令被灾府县应徵入光禄寺供用量为减省自今有可恤吾民者具悉以闻】

夏六月巡按辽东御史强珍劾陈钺罪不问

【初御史王崇之巡按辽东劾巡抚陈钺啓衅召敌钺大恐谋之汪直以崇之受都指挥庭参不为礼坐违制下锦衣卫狱输赎调延安推官及直钺用兵方论功而敌大入钺与镇守中官韦朗等匿不以闻钺既召入为户部尚书朗始入告珍往巡按得其状请正钺等欺罔罪事下兵部尚书余子俊覆奏如珍言帝乃命停钺等岁禄都给事中吴原御史许进言钺罚不蔽罪恐自此边将效尤疆事日壤语甚剴切帝是之而卒置钺等不问】质实【强珍字廷贵沧州人王崇之临海人吴原字道本漳浦人许进字季升灵宝人】

秋八月申存恤孤老之令

【户部言大兴宛平岁廩孤老七千四百九十余人凡贍粮二万六千九百余石布如人数近有司疎于稽察董其事者日肆侵牟无告之民不濡实德宜敕府尹月再巡视俾惠泽下流毋负朝廷恫癯至意帝俞其请且诏天下有司殫心存恤所在巡按御史廉其怠者奏闻治罪】质实【大兴金以折津县改置宛平辽以幽都县改置明并为顺天府治今因之】

太监汪直逮治御史强珍于御马监以中旨谪戍之【直方自矜辽东功闻珍指为啓衅劾钺罪怒之会直閱边还钺郊迎五十里诉珍诬已直益怒奏珍所劾皆妄遣锦衣千户萧聚往勘械赴京比至直系治珍于御马监榜掠备至然後奏闻命法司廷鞫皆不敢忤直意坐以奏事不实当输赎直心未慊降中旨罪珍欺罔谪戍辽东而免钺等所停岁禄责兵部言官先尝劾钺者各停禄三月】

发明【御马监非鞫狱之地也借使珍有罪岂无朝廷三尺法在直顾擅执而私榜掠之其弁髦纪纲甚矣陈钺啓衅边陲敢于隐饰停禄之惩已为轶罚而直甫还朝遽寢前命反移边臣欺罔之罪以罪言官诏令发施若操其手太阿之柄果安在哉】

冬十二月鞑靼犯大同

【伊斯玛音自威远卫入犯报威宁海子之役也大同鎮守官告警复命朱永汪直王越率

京军御之明年三月捷还加直岁禄三百石永世袭爵进越太子太传明制文臣不得封公侯越从勲臣例改掌前军都督府自是真为武人且望侯矣】

【辛丑】十七年春正月以方士顾珏为太常寺少卿

【珏以扶鸾术得幸屡繇传奉为太常丞至是晋少卿逾月丧母乞祭诰故事四品官未三载无给诰赐祭者帝特予之未几进本寺卿时李孜省用事珏与赵玉芝浚中倚以为奸玉芝亦善方术因中官高谅进中善书给事文华殿三人者皆累擢至太常卿权势稍亚于孜省而廷臣艳其宠颇諂附之珏之为母乞祭诰也尚书尹旻欲献媚于珏因请并给诰赠其父其二子经纶寻亦以中旨授官帝方崇信左道故珏等致荣显如此】质实【顾珏大兴人大德顯灵宫庙祝也赵玉芝番禺人凌中史未详】

二月南京地震

【是月十日甲寅也凤阳淮安扬州和州及山东河南州县同日皆震礼部言考之传记春动者饥二月动者水今地动踰千里况凤阳南京宗庙社稷所在关击尤重乞敕有司恤冤矜寡施德泽以弭灾异广储蓄以备岁凶修渠堰以防水患从之】

夏四月旱风霾

【敕羣臣修省】

命司礼监同法司錄囚

【时遣太监怀恩同三法司錄囚自是丙辛之岁内臣审錄以为常谓之大审南京则命内守备太监行之初成祖定热审例决遣轻罪仁宗命阁臣会审重囚英宗又命三法司同公侯伯会审谓之朝审至帝罢阁臣预审之制而内臣大审所矜疑放遣常倍于热审】质实【按明史刑法志成化时会有弟助兄鬪因殴杀人者太监黄赐欲从未減尚书陆瑜持不可赐曰同室鬪者尚被髮纓冠救之况其兄乎瑜不能难卒为屈法考瑜于成化八年致仕赐于十三年以汪直潛被斥则宪宗之遣内官会审不自是年始矣特是年始定为大审之例耳】

五月鞞鞞犯宣府

【命汪直监督军务王越为将军充总兵官御之比至敌亦退因留屯其地诏所在鎮巡官聽直越节制至冬请班师而其时直已为尚铭所间宠渐衰请之再不许尚铭者东廠中官也始因直进附于直直之还自威宁会有盗西内物者帝命廠校索之急而东廠捕得盗铭以闻帝大喜赉铭甚厚直恶其自以为功也曰铭敢负我铭闻之虑将倾已谋发直事以先之直初与王越甚昵时或泄禁中语于越後直主陈钺议用兵辽东言官多以啓衅劾钺钺方领都察院事不能制也而钺潛于直谓皆越所嗾者直怒而窘辱越越挟前所泄语以抵之直乃沮寻

两人意释交如初顾所泄语颇闻于人铭廉得之乘直监军于外白诸帝帝于是始疑直不欲直还而陈钺未之知也时钺以余子俊忧去方代长兵部遂复为直请班师帝切责钺直越大惧】

六月雨雪

【是月十九日癸亥也】

秋七月雷震郊坛

【是月二十五日己亥也前三日丙戌南京大风雨社稷及太庙殿宇皆摧十一月丁酉南京复大雷雨雪】

八月以方士李孜省为右通政

【命寄俸于通政司仍掌上林苑事同官王?恶其奸邪乱政过之无加礼孜省衔?谪于帝左迁太仆少卿故事寄俸官不预郊坛分献帝特以命孜省大臣惩?事无执奏者居二年进左通政】质实【王?灵璧人】

发明【甚矣宪宗之遂过也前二年命孜省为太常卿以杨守随之谏而改官上林是宪宗既知孜省为赃秽罪人不可以典祭祀矣而竟复用为右通政俾预郊坛分献则明知其不可而故蹈之也夫孜省之得幸于宪宗以善方术耳左道乱政法所必诛乃宪宗且崇之信之羣邪蔓引相倚为奸二十一年星变求言始勉从廷臣之议复贬孜省上林丞而旋贬旋擢甫及再期遽貳秩宗甚至刘敷李裕援之而进马文升杨守随挤之而退威福恣行朝野侧目乱政之极一至是哉厥後嘉靖时邵元节陶仲文之徒弊如出一辙者传曰作法于凉宪宗之谓已】

冬十月以道士邓常恩为太常寺卿

【常恩因中官陈喜进日导帝祀淫词帝曲听之是时岳鎮海瀆诸祠并置石函周以符篆中藏金书道经一卷杂贮金银钱宝石及五谷为厌胜皆常恩所为也後孝宗即位从都御史马文升言乃毁之】质实【邓常恩临江人】

【壬寅】十八年春二月太监郭文杀沛县民诏逮知县马时中于狱谪之

【文自南京还过沛怒时中治供张不时榜掠时中子不胜楚溺于河时中赴救之起呼冤之益怒褫时中衣繫以行县民愤甚绕船大呼厉叱之不退文使家人待兵击之杀二人时中讼于朝而帝先入文愬命锦衣卫械时中至京谪降广西庆远府经历未几有尚膳监中官齎荐新节物道出南旺湖辟行舟或避之绥缚其人悬于檣笞之死管河右通政杨恭以闻命刑

部郎朱守孚往勘守孚古中官请治恭等巡河不能禁约之罪帝皆不问】质实【杨恭岐山人朱守孚桂阳人】

三月振南直隶山西饥

【先是淮阳巡抚张瓚以凤阳淮安饥入告发两淮盐直五万振之至是南京给事中刘玘复告南直隶诸府州灾命以淮安常盈仓粮三万石振凤阳以苏松常鎮四府岁储余米徐州广运仓粮一万石各振其地之民以南京常平仓粮三万石赈应天滁州以揚州钞关及税课司夏季应征之钞準贯纳米赈淮安揚州敕瓚与苏松巡抚王恕董其事时山西大同亦饥户部主事汪洪奉命往微边储知其状疏请缓微并乞命山西巡抚何乔新大同巡抚郭镗檄所属賑恤从之既而畿内山东饥复遣使分賑】质实【何乔新字廷秀江西广昌人刘玘临清人汪洪大兴人】

罢西廠

【先是有小中官阿丑者工俳优一日于帝前为醉者嫚骂状人言驾至嫚如故言汪太监至则避走曰今日但如汪太监也又为直状操两钺趋帝前曰吾将兵仗此两钺耳问何钺曰王钺陈钺也帝听然而笑稍稍悟然廷臣犹未敢攻直也自尚铭既发直越交通状命留鎮宣大不许其班师旋又召还京营将士改直越专鎮大同宠日替言者始交章请罢西廠未报可阁臣万安知铭日潛直於帝帝虽未俞言官请意固欲罢之乃上章极言东廠法制之善人易遵循西廠事出权宜当革从之安以西廠既罢直与已不两立而王越多智数恐其导直谋复入寻请调越延绥以离之於是直势益衰】

陈钺有罪免

【右军都督马仪言钺抚辽东时侵牟帑金交结近侍以希擢用私役军官入京調事擅杀贡使乾没其方物与汪直诬?侍郎马文升御史强珍谪戍其子澍冒功授锦衣千户亦倚势为奸利事下都察院请遣官按之时帝已知钺为直党仪所劾钺罪皆实然马文升诸人之谪虽由钺等所构实帝命也颇恶仪言及之不欲究其事乃令钺致仕去调澍于永平卫右所而仪亦南京闲住】质实【明史兵志永平卫隶後军都督府】

夏四月哈商复哈密城

【哈商寄居苦峪十年至是幸所部兵八千六百人纠罕东赤斤二卫衣袭哈密城破之伊兰遁乘势连复八城遂居故土总兵官王玺巡抚王朝远奏其事帝喜赐勅嘉獎朝远因请封哈商为王廷议不从乃进左都督】质实【王朝远名汉以字行进贤人】

以铅山县知县张曷为监察御史

【曷性廉明善治狱所雪冤狱至多政声達于朝故有是命时与曷相先後以治行称者有陈钢丁积皆能兴民利而除所疾若所在民怀之然二人竟终郡县史】质实【铅山唐置場南唐升县元升州明洪武初复为县属广信府今因之张曷字仲明其先慈谿人後徙於鄞其令铅山时邑有嫁女者及壻门而失女讼于前令不能决曷至行县界见大树妨稼欲伐之民言树有神巢其顛不听率衆往伐有衣冠三人拜道在曷叱之忽不见比伐树血流出树间衆惧欲止曷手斧之卒仆其树则二妇人堕焉一即前所失女也有巫以隐形术宣淫邑中曷执巫痛杖之无所苦已并巫失去曷驰缚归印巫背鞭之立死乃尽毁诸淫祠嫠妇子为虎所噬其母诉于曷曷齐戒□城隍神期五日必驱虎至县庭听讼及期二虎伏庭下曷叱曰孰伤吾民法当死无罪者去一虎起歛尾去一虎伏不动曷射杀之以?嫠妇曰虎抵而子死矣陈钢字坚远应天人黔阳知县县城当沅湘合流数决坏庐舍钢募人采石甃堤千余丈水不为害南山厓官道数里径仄甚行者多随厓死钢积薪烧山沃以醢拓径文许行者便之钢病民争吁神愿灭已算益钢寿?长沙通判及卒黔阳长沙并祠祀之丁积字彦诚宁都人新会知县宦者梁芳邑人也时方用事其弟长横于乡官吏莫敢谁何积捕之系狱由是权豪屏迹令甲民出钱输官供役曰均平钱其後吏贪复使甲首出钱供用曰当月钱贫者至鬻子女积一切杜絶岁大旱筑坛以祷昕夕伏坛下者八日雨大澍而积遂得疾以卒士民聚哭于途一姬哭极哀或问之曰来岁当甲长丁公死无以聊生矣】

六月鞞鞞寇延绥击败之

【伊斯玛音寇延绥都指挥刘宁败之于塔尔山巡抚何乔新指挥同知支玉败之于天窰梁中嘴千户白道山败之于木瓜园总兵官许宁败之于三里塔参将周玺游击董升等败之于黑石崕时寇扼于边墙不得出遂大衄】质实【一统志塔尔山在葭州西北上有小塔因名天窰梁中嘴在山西保德州河曲县北木瓜园在葭州府谷县北三里塔在榆林县北黑石崕在保德州西南下临黄河刘宁字世安山阳人支玉闻喜人周玺字廷玉迁安人】

秋八月大水

【卫漳滹沱并溢河南霪雨自六月至于是月漂损庐舍三十一万四千二百余间渰死居民一万一千八百余人】质实【明史河渠志漳水出山西长子曰浊漳乐平曰清漳俱东经河南临漳由直隶眞定河间趋天津入海其分流至館陶与卫河合】

闰八月逮中都留守指挥郭玉下吏

【王上言守备中官狗奴隶之言掣诸司之肘决狱惟货多不以情请罢勿设使帝以临濠乃祖宗根本地特命中官往鎮寄以守备之权循祖制也玉何敢议罢革下巡按御史逮问妄奏之罪】

诏天下刑官毋滯讼

【山西巡抚何乔新劾按察僉事尚敬刘源视狱多淹滞乃下诏曰刑狱重事也周书曰要囚服念五六日至于旬时盖言慎也今有司乃或瘵厥职推鞫不以时凡罪囚应省释者亦桎梏而久圜圉之若一旦瘵死则是有司杀之矣乔新言是其即治敬源赎官罪自後有司滞讼半年以上者所在巡按御史奏闻逮治令天下刑官勤决献以副朕意】质实【尚敬临颖人刘源宛平人】

冬十二月文华殿大训成

【以教太子也书凡二十八卷列纲四曰进学曰养德曰厚伦曰明治帝亲制文弁其首命詹事彭华中允周经等进讲于太子太子每起立拱听万安以为劳谓讲官宜跪请坐听华与经不从竟得如礼】质实【周经字伯常阳曲人按明宪宗实录书既成帝亲序之复题其後曰朕临驭以来兢业图治十有九年于兹盖尝因早郊祷惕于星变肆赦海内葺郊坛以奉大祀增筵豆乐舞以礼先师广进士之额重老臣之归加养济穷民之廩开武学儒生之贡减棗出賑以济民饥恤刑审録以清讼狱修文究武飭内攘外朕宵旰靡遑虑功业之未茂也夫为治之道举纲必挈其要张目必该其凡是编所述庶几尽之尔尚究心副朕豫教之意念之哉】

【癸卯】十九年春二月録故大理寺丞鍾同子为通政司知事

【同景泰中御史以疏请复储杖毙锦衣卫狱英宗复辟追赠大理寺丞録其长子起为国子生至是帝念同死于忠义虽已一子未足酬之诏赐越一命给同妻罗氏月廩越同次子也寻赐同諡恭愍从祀吉安忠节祠同少时尝过祠下见所祠殿阳修杨邦义诸人叹曰死不入此非丈夫也竟如其初志云】

三月禁太监中盐牟利

【自成化二年太监李棠始闻中辽东盐万引既而梁芳有宠假市珍玩名侵盗库金以数十万计不足则给以盐前後赐芳两淮余盐存积盐不下数十万引怙帝宠所请乞无不允诸内臣相率效之寻戚畹家人亦有希恩妄乞者帝皆曲从其请计臣不能执争凡所乞中盐至无算商引壅不行边储日匱至是中官王钿复请支河东盐二万四千引帝始厌其扰曰祖制内臣无私产矧敢牟利中盐乃命户部榜諭禁之】质实【明史食货志洪武定额两淮岁办大引盐三十五万二千余引弘治时改办小引盐倍之所输边甘肃延绥寧夏宣府大同辽东固原山西神池诸堡岁入太仓余盐银六十万两浙歲办大引盐二十二万四百余引弘治时改办小引倍之所输边甘肃延绥宣府大同蓟州歲入太仓余盐银十四万两芦歲办大引盐六万三千一百余引弘治时改办小引十八万八百有奇所输边宣府大同蓟州入太仓余盐余十二万河东岁办小引盐三十万四千引弘治时增八万引歲输宁夏延绥固原饷银三万六千余两凡大引四百斤小引二百斤余盐者竈户正课外所余盐也存积盐者正统时从巡抚周忱议以淮浙长芦盐十分为率八分给守支商曰常股二分收贮于官遇边警始召商中纳谓之存积】

夏五月诏罢京军杂役

【时汪直报大同寇警请调京军赴援兵部尚书张鹏以边兵四万已足守御奏止勿遣因言京军所以控敌近年工役频繁未遑训练猝有徵发恐不足用乞罢遣归营以蓄锐气时卢沟堤及京仓通州仓诸役一时并兴是年春又命襄城侯李瑾督军万人修大慈恩寺凡团营见军九万三千四百有奇更番赴工者至五万二千人故鹏言及之会保固公朱永复以为言帝乃诏罢京仓之役余令趣工速竣即休舍之然于时团营弊日滋营帅中官习以军士供私役谓之应役市井游贩之徒以赂窜名军籍惮营操征调率贿将弁祈免谓之买开而提督守营诸官又诡以空名支饷缺伍辄以万计寻定西侯蒋琬奏其状帝命怀恩偕户部尚书余子俊閱实之弊迄莫能革也】质实【明一统志大慈恩寺在顺天府西海子上旧名海印寺】

秋七月鞑靼寇大同官军败绩

【延绥总兵官许宁既与王越易镇至大同以争坐不协于汪直巡抚郭镗以闻调直御马监别遣中官蔡新代镇守时谍者屡告边警镗问战守计于宁宁皆不应小王子骤率兵三万大入连营五十里宁既未有备御猝见敌至势方盛不敢撓其锋乃欲示以持重伺其情邀击之因歛兵城守而令别将刘宁董升军西山周玺屯怀仁相犄角敌侦知宁无能为遂纵兵大掠焚代王别墅王趣战使众哭于辕门宁犹不听适有人自京师至者服佩颇异守门卒报云行事校尉来矣宁不得已与□新等将中军营城外寇以十余人为诱新部骑驰击宁将士争赴之遇伏大败死者千余人刘宁董升闻中军失利督众自守敌围之数重几陷发礮击敌围乃解玺自怀仁还兵援之道遇敌乘胜前锐甚玺厉将士曰今日有进无退大呼阵敌少却久之短兵接臂中流矢援鏃战益急与子鹏及麾下将士击杀数十人会刘宁兵至中军溃卒亦稍集敌乃退而宁竟掩败以捷闻敌既得利长驱入顺圣川宣府巡抚秦紘总兵周玉力战却之已而巡按御史程春震发宁败状宁与镗新俱下狱镗降六官新以初任降三官宁降指挥同知闭住】质实【西山亦名雷公山方輿纪要云在大同府西北十五里後唐清泰末云州军乱节度使沙彦珣走西山雷公口即此怀仁辽县明属大同府今因之顺圣川在今宣化府西宁县东代王代简王桂曾孙惠王成链也成化二年袭封秦弦字世纓单县人程春震云梦人】

八月太监汪直以罪贬王越免

【言官劾直八罪一负恩欺罔二冒功滥叙三亏盗帑金四诬善獎奸五擅作威福六招纳无籍七朋邪乱正八妄开边衅诏从末减贬直南京奉御王越以党直夺诰券编管安陆州二子以功得官者皆削籍戴缙吴绶并斥为民韦瑛前已调万全卫陈越亦先致仕皆不问明年瑛欲邀功希复用诬报卫人刘德兴谋不轨覆验之妄恶其稔恶诛之直後竟得良死】

九月妖人王臣伏诛

【中官王敬挟千户王臣等采药江南臣以妖术为敬所信倚敬势矫旨括民间珍玩因夺

室女纵淫所至騷然长吏多被辱至苏州召诸生写妖书辞不赴即令有司捕系至驿中乱箠之诸生大譁敬奏其抗命下巡按御史逮问巡抚王恕亟疏论敬等罪敬亦诬奏恕并及常州知府孙仁遂械仁至京恕抗章申救三疏劾敬会中官尚铭诉敬诸不法状乃下敬等狱戍其党十九人弃臣市传首江南仁得释归诸生从轻拟输赎】质实【孙仁新涂人】

发明【汪直王敬之横恣甚矣宪宗一旦谴斥时共快之然商辂发直之奸甫踰月而直复用王恕论敬之罪至三疏而敬自如时以尚铭一言譖诉乃始贬直而下敬于狱则宪宗之谴斥宦官者仍以信任宦官直敬贬而尚铭用事铭固直敬之类也厥後梁芳之废以蒋琮刘瑾之诛以张永亦皆其类之自相倾轧而非在上者果能察其乱政务决去之此明世宦官之祸所以蔓延而不可图也】

召陈献章为翰林院检讨寻乞归

【献章举正统中御试再上礼部不第从吴与弼讲学居半载读书穷日夜不辍筑阳春台静坐其中数年无户外迹久之复游太学祭酒邢让重之扬言于朝以为杨龟山复出由是名藉甚京师寻复归四方来学者日进广东布政使彭韶总督朱英交章荐召至京令就试屡乱疾不赴疏乞放归田里就医奉母乃授检讨归】质实【邢让字逊之襄陵人按王世贞弇山堂别集云尹直琐缀录谓邱濬修宪宗实录以陈献章作十絶句媚梁芳自是为世所鄙而薛应旗宪章录因之谓出张元祯笔考实录谓献章貌谨厚诗文亦有可取者然于理学未究也一时好事妄加推尊形诸荐奏虽其乡里前辈以德行文自负者亦疑之及授官归沿途拥驺从列仗槩扬扬得志而去其诋献章亦甚矣第不载十絶句媚梁芳事而所谓乡里前辈者盖谓濬也若出濬笔不当隐然以前辈自谓元祯庶几为近又云张元祯贻书诮与弼有岂容先生久窃虚名语事亦与其纂修实录甚诋献章相类琐缀录固诬妄不足信而元祯以誉望自负于献章之躬行心得者不可同日语伎心诬诋所谓蚍蜉之撼大树多见其不知量也】

旌表僧继晓母朱氏

【继晓以秘术因梁芳进封国师其母朱氏本娼家女也继晓日陈乞旌诏不必勘核遽旌其门】质实【继晓江夏人】

冬十二月都给事中王瑞御史张稷等请罢传奉官【帝即位之二月始命内臣传旨授官左右近习如梁芳辈遂立门户引进私人至是传奉益溢瑞因倡同官上言爵赏天下公器自非公德才能雍以弋获近年幸窦如達鶚荣若市恩纶内降始忝窃于艺术之人今则更及无庸胥吏矣武阶廕叙始冒濫于内使之家今则更及外方白丁矣下至厮养贱夫市井童稚并得夤缘除授玷列朝班名器之?于兹已甚乞悉行革絶稷等亦言传奉各官至有逃军逋囚赃官贪吏易姓名匿罪状而冒进者帝览奏颇悟命自今瀆请希恩者罪不宥于是降李孜省二秩他贬黜者又十二人朝野称快明年八月罢闲赃吏周璉以善星命干梁芳得召遂传奉如故而孜省亦复迁左通政矣】质实【王瑞字良璧望江人张稷实应人周璉庐陵人】

发明【明之有传奉官盖即汉所谓西邸之爵唐所谓斜封之官宋所谓内批之降也宪宗时宦官方士相倚为奸匪人因之而进然犹曰为羣小所蒙耳今一旦因瑞稷之言大为感悟自无复再误之虞禁令方中寻即召用即知之而复蹈之则洵乎痿痹之疾不可药也】

【甲辰】二十年春正月京师地震

【是月二日庚寅也永平诸府及宣府大同辽东皆同日地震敕谕羣臣曰朕仰惟祖宗丕绪夙夜惕兢图惟政理然治效未着地震京师天戒至矣斋心涤虑省愆修德尔文武羣臣与朕共天职者得无有窃位苟禄以召致灾咎者乎自今宜痛自惩艾以毗朕志于时御史徐鏞向珫请暂免庆成宴以法古者减膳彻悬之意帝以其妄议变制下锦衣卫狱讯之已并谪知县】质实【徐鏞兴国州人何珫顺德县人】

太监尚铭有罪

【铭既倾汪直益擅权势鬻爵市官恣为奸利闻京师有富室辄以事罗织得重贿乃已帝寻觉之谪充南京净军籍其家辇送内府数日不尽初铭以附直得领东厰後其党李荣萧敬援之入司礼监铭既贬而荣敬犹用事于是都给事中王瑞上言李荣萧敬昔党汪直坏事于前继党尚铭坏事于後祖宗大业岂容小人屡坏之京师之人皆曰直开西厰兆以黑胥之变铭入司礼监应以地震之灾若非宸衷内断早见而勇去之後日坏事或不止此然铭等虽以罪谴而荣敬尚在窃恐汪直尚铭之患未已也乞并加贬斥以絶其根株则宗社生民幸甚疏入帝置荣敬不问而以太监陈準代铭督东厰準为人谨愿既莅事诫诸校尉曰有大逆告我非此则有司之事若勿预也由是都人安之】质实【陈準顺德县人】

三月以盛颺巡抚山东

【山东自牟俸後不设巡抚者十年至是岁旱饥盜起廷议复遣大臣往抚之颺逐自南京刑部侍郎拜是命既下车雨祷大澍槁木复苏条荒政数十事下所司修举之根粟以充逮毕振余粟尚百余石颺益默暴除苛推行九则法于诸府盜不禁而戢】质实【盛颺字时望无锡人九则法者颺令束鹿时所创法也天顺中颺以御史偕同官劾石亨曹吉祥得罪贬束鹿知县县故多豪家徭役苦不均颺为立九则法以均之豪家皆歛手奉法曰是尝劾石将军者不可犯也毋忧去服除民相率诣阙乞还颺再任益不用鞭朴讼者谕之辄叩首不复辩治行上闻擢知邵武府复以任治剧调延平累迁陕西布政使所至皆有声而其令束鹿时隣邑讼不决者亦赴颺愬状片言折之各心服去郊外有隙地争来筑室争居之遂成市号清官店云】

处士胡居仁卒

【居仁性行淳笃闻吴与弼讲学崇仁往从之游其学以主忠信为先求放心为要操而勿失莫大乎敬遂以敬名其齐端庄凝重对妻子如严宾手置一册详书得失用自程考鵷衣簪

食宴如也筑室山中四方来学者甚衆皆告之曰学以为己勿求人知曰吾道相似莫如禅学後之学者误认存心多流于禅或欲屏絶思虑以求静不知圣贤惟戒慎恐惧自无邪思不求静未尝不静也鹜于空虚与溺于功利者均失其患有二一在所见不真一在工夫间断承学之士皆佩之为笃论居仁闇修自守布衣终其身人以为薛瑄之後粹然一出于正居仁一人而已卒年五十一神宗十三年追諡文敬】质实【崇仁隋置明属抚州府今因之胡居仁字叔心余干人】

夏六月以思柄为孟密安抚使

【孟密云南土司木邦所辖部也其部长曰思外法娶木邦宣慰使罕揲法之女曰曩罕弄已而罕揲法死传袭至其孙罕落法时曩罕弄方以夫死代领所部自分尊属不乐受节制遂叛木邦曩罕氏族人与落法构难逐出之孟都盖景泰四年也其後孟密兵力日强益攻罕落法侵掠隣境陇川孟养曩罕弄自称天娘子其子思柄自称宣慰使黔国公沐琮奏委三司官往抚曩罕弄骄蹇不服且欲外结交趾兵逼胁木邦八百诸部琮等复以闻兵部尚书张鹏主用兵诏延臣集议皆以孟密与木邦仇杀未犯边境宜抚乃遣副都御史程宗驰传与译者序班苏詮往於时为成化十八年初曩罕弄貳于木邦畏隣境不平潜使人从间道至京献宝石黄金且重赂阁臣万安请别立孟密安抚司开设治所直隶布政司下内阁议安欲许之刘翊刘吉曰孟密故属木邦今叛而请命于朝若许之是周天子命三晋大夫为诸侯也土官谁不解体安曰不从则当代之往日麓川之败不可不戒翊对曰何以伐为但命守臣严边备而敕隣境土官合兵蹙之彼奚能为事遂寝及宗率詮往抚詮受思柄金导宗迎安风旨示意曩罕弄复遣人入贡如前请会云南巡抚吴诚卒官即令宗代下其事于宗议可否宗遂言曩罕弄与木邦仇杀已久势难再合别立安抚司使因命思柄为安抚使盖孟密地有实井曩罕弄擅其利恣行贿遗而木邦为孟密所侵兵力积弱不能报虽屡奏诉竟不得直思柄恃有朝命益肆意侵夺先後占据木邦地凡二十七所自是诸部扰攘中国用兵且数十年】质实【明史土司传孟都蛮地近陇川方輿纪要宝井在孟密西南由陇川十日至孟密又二日至宝井程宗字源伊常熟人吴诚钱塘人】

大旱

【京畿山东湖广陕西河南山西俱大旱山西陝尤剧赤地千里道殣相望寻从巡抚叶淇请发帑金三万振山西未几预度天下僧道六万人令输粟给牒济山陝饥】质实【叶淇字本清山阳人】

秋八月太白岁星同昼见

九月乙酉朔日有食之

冬十月下刑部员外郎林俊及都督府经历张黻于锦衣卫狱寻释之并谪官

【时岁大饥僧继晓方以秘术擅宠先後赐美妹十余人金宝不可胜纪又请建大永昌寺于西市逼徙居民数百家糜国帑数十万于是俊上言今年以来灾异迭臻京师地震陵寝动摇日月继蚀监戒之昭莫此为甚陕西山西河南频年饥馑人民流离道殣相望振济无从可为流涕而僧继晓以妖言荧听竭有用之财供无益之费工役不息人怨日兴臣谓当斩继晓以谢天下然纵继晓之恶者梁芳也芳倾覆陰狠引用邪佞排斥忠良数年之间假名乾没祖宗百年余之府藏殆尽家赀山积尚铭不足多所在风扰汪直莫能过今内而朝臣外而市井之徒皆痛心饥民之死莫不欲食芳继晓之肉而卒不敢以此言进者所惜者官所畏者死耳臣何忍畏罪不言以悞陛下疏入帝大怒下俊锦衣卫狱拷讯後府经历张黻救之并下狱帝欲诛二人司礼监怀恩力争帝怒投以砚曰若助俊讪我恩免冠伏地号哭帝叱出恩遣人告鎮抚司曰汝曹諂芳倾俊俊死汝曹何以生遂称疾不起帝怒亦渐解各杖三十谪俊云南姚州判官黻师宗知州时言路久塞两人直声震都下为之语曰御史在刑曹黄门出後府明年以星变复二人官改南京】质实【大永昌寺按明宪宗实录寺先建于西市已有成绪继晓以星变譴随废梁芳请更择地建之得故广平侯袁瑄宅又市其旁民居数十家大兴工役视旧加广盖二十二年冬十二月也武宗实录正德五年大永昌寺改建为仓赐名曰太平六年以太平仓赐永壽伯朱德为私第八年改为鎮国府又按两京求旧録鎮国府嘉靖初仍改太平仓都人至今呼西帅府衙口也姚州唐置後入于南诏元时蛮部内附复置州明属姚安军民府今属楚雄府师宗州元因蛮部名置州明属澂江府今改县属广西州林俊字待用莆田人张黻吉水人】

【乙巳】二十一年春正月甲申朔星陨有声诏羣臣言阙失【是日申刻有光自中天坠化白气曲折上腾踰时复有赤星如椀自中天西行轰然如雷震帝颇惧诏羣臣陈阙失于是吏部尚书尹旻等论传奉官过多吏科给事中李俊率科臣上疏曰今之弊政最大且急曰近幸干纪也大臣不职也爵赏太滥也工役过烦也进献无厌也流亡未复也天变之来率由于此夫内侍之设国初皆有定制今或一监而丛十余人一事而参六七辈分布藩郡总领边疆援引儉邪投献奇巧司钱谷则法外取财贡方物则多方责贿兵民坐困官吏蒙殃杀人者见原僨事者逃罪如梁芳韦兴陈喜辈不可枚举惟陛下大施刚断无令干纪奉使于外者悉为召还用事于内者严加省汰则近幸戢而天意可回矣今之大臣非夤缘内臣则不得进非依倚内臣则不得安此以财贸官彼以官鬻财无怪其赂受四方而计营三窟也如尚书殷谦张鹏侍郎艾福杜铭南京尚书李本侍郎刘俊皆老而儒尚书张璠大理卿田景阳南京尚书张瑄侍郎尹直皆清论不愜惟陛下大加黜罚勿为姑息则大臣知警而天意可回矣爵以待有德赏以待有功今或无故而爵一庸流或无功而赏一贵幸方士献炼服之书伶人奏曼延之戏掾吏胥徒皆叨官禄俳优僧道亦玷班资一岁而传奉或至千人数岁而数千人矣数千人之禄岁以数十万计是皆国之租税民之脂膏不以养贤才乃以饱奸蠹诚可惜也如李孜省邓常恩辈尤为诞妄此招天变之甚者乞尽罢传奉官毋令污玷朝列则爵赏不滥而天意可回矣都城佛刹迄无宁工京营将士不复遗力如国师继晓假术济私糜耗特甚中外切齿愿陛下内惜资财外惜民力不急之役姑赐停罢则工役不顺而天意可回矣近规利之徒率假进奉为名或録一方书市一玩器购画图制簪珥所费不多获利十倍愿陛下留府库之财为军国之备则进献息而天意可回矣陕西河南山西赤地千里屍骸枕籍流亡日多萑苻可虑愿陛下体天心之仁爱悯生民之困穷追録贵幸盐课暂假造寺贖财移振饥民俾苟存活则

流亡复而天意可回矣疏入帝优诏答之降左通政李孜省上林丞太常卿邓常恩本寺丞继晓革国师为民斥罢传奉官五百余人中外大悦时两京诸臣争应诏陈言给事中卢瑀秦昇童祝御史汪奎员外郎崔陞彭纲主事张吉苏章周軫李旦等言尤剴直帝以方修省不罪然心忌之密谕尹旻出瑀等且书六十人姓名于屏俟奏迁则贬远恶地于是瑀等相继贬斥俊亦寻调外陞章应迁而部臣故迟之不奏仅得免奎以纠失仪稍缓杖之于廷居数月复出为夔州通判而孜省常思等仍复官有宠愈甚】质实【艾福字天锡襄阳人杜铭字敬修金堂人李本字立之富顺人刘後新乡人张釜字廷器华亭人田景暘高阳人张瑄字廷玺江浦人卢瑀鄞人秦昇南昌人童祝兰谿人汪奎字文灿婺源人崔陞字廷进其先乐安人後为彰德人彭纲字性仁清江人张吉苏章皆余千人周軫莆田人李旦字启东献县人】

大赦

【诏曰往者灾沴迭兴天时亢旱岁竟不登河南山东畿内率多饥馑陕西山西尤剧至有弃恒产家室不顾者元元何辜罹此危厄博采羣议发内帑仓储敕所司多方振济期此矜人咸归乐土不意岁首星变有声朕愈兢惕载敕廷臣备陈时改得失采纳而行方春时和祗承资始之仁诞敷宽恤之典其大数天下】

振陕西山西河南饥

【遣侍郎李衍何乔新贾俊以帑金二十五万往振未几又转漕四十万石振陕西是年两京皆饥并发粟分振】质实【贾俊束鹿人】

三月泰山震

【太监梁芳韦兴糜帑藏为奇技淫巧结万贵妃欢累朝金七害俱尽帝一日视内藏诮芳及兴芳曰建显灵官及诸祠庙为陛下祈万年福耳帝曰吾不汝瑕疵後之人将罪汝矣芳大惧逐说贵妃劝帝废太子而立兴王司礼大监怀恩固争帝不恚斥居凤阳会泰山连震占者谓应在东宫帝心惧寢其事】质实【显灵宫春明梦余录在皇城西永乐时建成化中更拓其制又建弥罗阁嘉靖中复建昊极通明殿东辅萨君殿曰昭德西弼玉帅殿曰保真兴王名佑杭宪宗第四子邵太后生即世宗父兴献帝也二十三年七月受封时未封称兴王者史家追叙之辞】

夏四月以康永韶为礼部右侍郎

【永韶故为御史有直声谪知县继有荐其知天文者中旨召还进太常少卿掌钦天监时陕西大饥永韶言今春星变当有大咎赖秦民饥死足当之诚国家无疆福帝悦擢礼部右侍郎明年坐历多讹字落职归】

五月京师地震

【是月十三日壬戌夜也十一月丙寅复震】

六月罢汰冒滥军职

【廷臣条时政阙失多以官爵太滥为辞诏下两京部臣察实澄汰至是南京兵部核武职之冒滥者具名以闻中率多内臣厮养乃寝前诏令任事如故】

秋八月己卯朔日有食之

以万通家人徐逵为指挥僉事予世袭

【万通贵妃弟也少业货既骤贵益贪黷无厌日命其家人牟利四方徐逵以善居奇为通所喜因得官百户通歿帝春通不已庶子方二岁养子方四岁俱授官而逵亦得擢至指挥僉事秩正四品许传袭不替逵尝奏请两淮塩引三万时帝已渐恶乞盐之扰犹命立予之其荷恩宠如此初通父贵姓醇谨见子姓皆得官每忧形于色曰吾家德不胜福何以堪也诸子或屑越赐物辄或曰县官所赐皆着籍他日复宣索汝曹将重得罪诸子窃笑以为迂自贵卒後通与其兄喜弟逵等逐日骄横其家凭倚恩春声势烜赫矣】质实【万通诸城人锦衣指挥贵之子】

九月刘珣罢

【万安与南人相党附珣及尹旻王越又与北人为党顾珣性疎直自以宫僚旧臣遇事无所曰护刑部员外郎林俊以劾梁芳继晓下狱珣于帝前解之李孜省辈左道乱政欲动摇东宫珣密疏谏帝皆不悦珣又素薄安尝斥安负国无耻安忿日夜思中珣汪直宠衰安侦知西厰可罢邀珣同奏珣惩商辂前事且见言官方交章请罢皆不允以为直宠固无恙也因辞不与安逐独奏之陰使人讪珣与直有连帝疑未发安又使人为刘公子曲增饰秽语杂教坊院本奏之刘公子谓珣子鎡也帝怒遣中官持手封书一函诣阁乃人讪珣书安与刘吉佯惊敕言当令乞休去以全始终翌日珣具疏乞休诏允之其实排珣使去者安吉两人谋也】

冬十一月召马文升为兵部尚书

【汪直败之岁文升复官致仕其明年起为左副都御史巡抚辽东文升凡三至辽军民闻其来皆鼓舞益禁益中官总兵使不得朘削衆益大喜逾年进右都御史总督漕运会淮安及徐和二州饥移江南粮十万石盐价银五万两振之寻即有是命时李孜省方怙宠文升既入朝颇恶其为人有所言孜省亦深嫉文升矣】

十二月以彭华为吏部左侍郎兼翰林学士入内阁预机务

【华深刻多计数善伺人短与万安李孜省相结得入阁素嫉尹旻与安等伺得旻子侍讲

龙诸陰事下龙诏狱执讯午门多所株连旻致仕去龙除名由是人皆畏华而恶之踰年以风疾罢】质实【按尹龙之狱事载宪宗实录旻乡人有武选郎邹袭者以司吏樊忠韩锡盗敕事发坐防范不谨调外袭素与旻子龙及侍读焦芳交善因谋为指挥张旺等一百二十三人保留袭疏上之既下吏部议旻复奏曰此公论也乞复袭官帝已疑旻私袭曰尔何繇知为公论然尚勉从旻议不深责旻也未几东廠缉事者发袭等交通状旻自服罪帝责其徇情妄奏落旻太子太传为太子少保时二十二年四月也甫踰月而廠校又发龙纳贿事给事中张雄刘清刘昇御史陈孜等交章劾龙并及旻帝宥旻而下龙锦衣卫狱令法司会鞫于午门通判王范经历张璲并以赂龙得官逮讯词连郎中刘绅员外郎董宁同知朱绅副使谢显王锦冯兰六人狱上命旻以尚书致仕龙削籍范等谪有差侍郎耿裕黎淳以阿默停禄三月而焦芳坐为袭革保留疏谪同知于是御史吕璋等复劾侍郎侣锤秦紘大理寺丞刘璈寺副苏泰大仆寺卿张海顺天府丞黄杰洗马罗景给事中马龙御史刘璧于璧高辅张鼐编修王敕员外郎杨槃袁弼皆以山东人坐旻党调降龙献之本末如此】

【丙午】二十二年秋七月前少保谨身殿大学士商辂卒【辂再入阁前後预机务二十一年家居十年卒年七十三赠太傅諡文毅辂平粹简重宽厚有容临大事决大议毅然莫能夺既谢政刘吉过访邸第见其子孙林立叹曰吉与公同事历年未尝见公笔下妄杀一人宜天之报公厚辂曰正不敢使朝廷妄杀一人耳】

八月谪江西巡抚闵珪为广西按察使陕西巡抚郑时为贵州左参政

【江西南贛诸郡多盜率獻贄强宗投为仆事发辄相倚庇拒有司不就捕珪请连坐其主以清盜藪法司议从之而泰和尹直新建谢一夔皆怒珪竟谪官广西命下一夔喜谓人曰珪之謬也非吾孜省密啓于帝吾乡缙绅尚得高枕乎人乃知珪之左降李孜省力也郑时自十九年抚陕西频岁大饑人相食请于朝发帑金十万转漕四十石躬督属吏给振铢粒皆有籍无敢渔者所全活甚衆会孜省以灾异贬顷之复用事与梁芳乱政如故时闻之叹曰如此则灾未有已也吾安可以外吏循默遂条上五事曰尽诚敬以回天意明义理以杜妖妄减供奉以苏民困重名器以待有功罢传奉以抑侥幸盖为芳孜省发也疏入寻有贵州参政之贬陕民哭送之至遮道不得行帝闻颇悔为斥传奉官十人系六人献诏自今中旨授官者俱覆奏然不罪芳孜省也时有御史姜昂者亦愤孜省等乱政倡同官疏劾其罪帝怒昂妄言杖午门外】质实【泰和隋改西昌县置太和元升州明改太和县属吉安府新建宋析南昌县地置明属南昌府今并因之闵珪字朝瑛乌程人郑时字宗良舒城人姜昂字恒頰太仓州人谢一夔字大韶新建人初冒姓王後改】

九月罢南京兵部尚书王恕出马文升代之

【前二年恕自应天巡抚改南京兵部尚书林俊以劾梁芳继晓下狱恕疏争俊不当罪帝不怪恕侃侃论列无所避先後应诏陈言者二十一建白者三十九皆力阻权幸天下倾心慕之过朝事有不可必曰王公胡不言也或又曰公疏且至矣已恕疏果至时为謡曰两京十二部独有一王恕于是贵近皆侧目帝亦颇厌苦之是年起用传奉官恕谏尤切帝愈不悦会南

京兵部侍郎马显乞罢忽附批曰王恕老劣矣亦令致仕而文升为李孜省所潜遂出以代恕一举而闲废两名臣朝野大骇工部主事王纯疏请留恕命杖之贬二秩外调】质实【马显字文明广平人王纯仙居人】

逮广东布政使陈选道卒

【选于天顺中巡按江西尽斥贪残吏成化初督学河南汪直出巡都御史以下皆拜谒选独长揖久之进按察使决遣轻系数百人重囚多所平反囹圄为空治尚简易独于赃吏无所假贷广东左右布政使时诏减省贡献而市舶中官韦眷肆横奏乞均徭户六十人添办方物选持诏书争帝命与其半眷由是怒选番人马力麻诡称苏门答刺使臣欲入贡私市易眷利其厚赂将许之选闻立逐之番禺令高瑶发眷通番事没其赀巨万入官都御史宋旻不敢结选移檄獎之且闻于朝春恨选益甚逐诬选瑶朋比为贪墨遣刑部郎中李行及巡按御史徐同爱勘之眷贿选所黜吏张褰令诬证褰坚不从拷掠无异辞行等畏眷竟以诬狱上与瑶俱被逮士民数万号泣遮留使者辟除乃得出至南昌疾作行阻其医药竟卒张褰闻选死哀悼乃上书曰窃见故罪人选子处羣邪之中独立衆憎之地太监韦眷通番败露知县瑶按法持之选移文獎劝以激贪懦固贤监司事也都御史宋旻及同爱怯势养奸致眷横行胸臆秽蔑清流勘官李行颐指煅炼竟无左证臣本小吏詿误触法被选黜罢实臣自取眷谓臣憾选厚赂瞰臣臣虽胥役敢昧素心行等逮臣致理拷掠百端臣忍死吁天终无异口行等乃文致其罪选故刚直不堪屈辱愤懣旬日身婴重疾行等幸其殒身阻其医疗讫命之日密走报眷小人佞毒一至于此臣摈黜罪人秉耒田野百无所图诚痛忠良衔屈而为圣朝累也不报】质实【陈选字士贤临海人後家于鄞案明史选传弘治初主事林沂疏雪选冤诏复官礼葬正德中追赠光禄卿諡忠愍宋旻字宏泽淳安人李行新喻人徐同爱常山人】

遣刑部左侍郎何乔新勘播州土司讼

【初巡抚张瓚之奏设安宁宣抚也受播州致仕宣慰楊辉属因请任辉庶长子友为使而友仗其弟爱嗣辉职虽授宣抚使意未慊辉没友与长官张渊谋刺爱不果遂诬奏爱居处器用僭拟朝廷又通唐府密书往来私习兵法天文谋不轨事乃遣乔新住勘将行请曰杨氏主播州五百余年诸蛮服从久矣历代寬以文法盖治之以不治也今但宜二人面质眞伪无令惊疑帝是之乔新至尽得其始末白爱诬夺友官迁保宁羈管斩张渊播州遂安】质实【唐府谓定王桎孙庄王芝址也成化十二年袭封】

以尹直为户部左侍郎兼翰林学士入内阁预机务【直明敏博学练习朝章而躁于进取性矜忌不自检饬前为侍读学士觊擢礼部侍郎而尚书尹旻不欲荐直直竟以中旨得之翼日遇旻于朝举笏谢旻曰公所谓简在帝心者由是两人交恶直寻以忧去服除起南京吏部侍郎就改礼部凡在南部八年郁郁不得志属其党万安谋内召旻辄持不可诸朝臣亦皆畏直幸其在南卒倚安及李孜省力召为兵部侍郎益比孜省与彭华共倾旻以泄怨至是复由中旨入阁物论鄙之】

【丁未】二十三年春正月皇贵妃万氏卒

【妃服用器物穷极僭拟中官倭幸钱能覃勤汪直梁芳韦兴辈皆假贡献苛敛民财倾竭府库以结妃欢四方进奉异物皆归之父兄弟侄皆授都督指挥千百户等官性嫉妬掖庭御幸有身饮药伤坠者无数至是卒帝震悼辍朝七日謚曰恭肃端慎荣靖皇贵妃】

命南京右都御史屠浦谕护占城王古来归国

【初安南黎灝据占城复发兵执王弟盘罗茶悦王孙斋亚麻弗庵与弟古来走佛灵山避难中朝屡谕灝返侵地灝率诡辞对其後乃访斋亚麻弗庵立之界以国南边地而占城故壤凡二十七所四府一州二十二县里计三千五百有奇割界才十之二余为灝据如故王孙既新立遣使请封给事中冯义行人张瑾齎印册在行而闻王孙死虑空还失利亟抵其国封提婆苔为王获厚赂而返提婆苔者灝伪敕所封占城畔人也义返至海洋病死瑾自广东上其事诡言王孙为弟古来所弑不得已封其国所欲立者而古来贡使已前至方告斋亚麻弗庵之丧请嗣封且乞宣谕安南悉还故壤犹不知提婆苔之据其国也于是礼官劾瑾妄下锦衣狱讯之伏罪论斩寻勅古来抚谕提婆苔令上国王印提婆苔不受命乃遣给事中李孟阳行人叶应册封古来为国王孟阳以提婆苔方窃据惮行请传谕古来诣广东受封古来乃自老挝挈家赴崖州封事竣欲躬诣阙廷奏安南之罪总督宋旻以闻廷议遣大臣经理其事因以命浦至广东即传檄安南宣示祸福募健卒二千人驾海舟二十艘护古来还国安南以浦大臣奉特遣不敢抗古来乃得人】质实【屠浦字朝宗鄞县人冯义韩城人张瑾吴县人李孟阳睢州人叶应归善人】

二月以李孜省为礼部右侍郎

【孜省既贬复用益作威福假扶鸾术言江西人赤心报国于是致仕副都御史刘敷礼部郎中黄景南京兵部侍郎尹直工部尚书李裕礼部侍郎谢一夔皆因之以进执政大臣万安刘吉从而附丽之所喜者则援之通显所怒者则构之贬斥憾应天府丞杨守随尝劾已谪于帝谪南宁知府去他所排挤甚衆朝野侧目前年冬擢通政使至是进礼部侍郎掌通政司如故一时倭幸窃权宠者无与侔比矣】质实【黄景上高人李裕字咨德丰城人由南京都御史召为工部尚书寻改吏部与阁臣彭华并以贿孜省得擢时人为之謡曰八百宪台陞李裕三千馆阁荐彭华孝宗实录于华之卒载其语云】

发明【明季门户之习为一代深锢之患然当成化以前未有显然援结茆其乡里连及闔省者也自李孜省擅宠荐引乡人彭华入阁复假邪术言江西人赤心报国而同省大臣皆因之以进厥後孜省既败焦芳用事衔孜省辈之黜已遂减江西解额且榜禁之使不得选朝官誉北故南相寻报复党祸之结自此始矣夫人臣植党树援未有不害于而国者然多以学术意气私相矜许久之乃成角立之?若孜省者一倭幸小人习五雷道法迎合宪宗意旨与奸僧继晓窃取尊显偶假扶鸾仙鬼之伎遂开朋党比附之门使朝局为之一变可不慎欤】

秋七月封子五人为王

【佑杭兴王佑楸岐王佑棻益王佑棹衡王佑橚雍王】质实【明史诸王传岐王宪宗第五子後之藩德安益王第六子後之藩建昌衡王第七子後之藩青州雍王第八子後之藩衡州岐王永王皆邵太后生益王衡王皆张德妃生】

八月帝崩

【是月庚辰帝不豫甲申命皇太子视朝于文华殿戊子大渐己丑崩】

九月太子佑橚即位赦

【是为孝宗以明年为弘治元年】

太监梁芳方士李孜省等及外戚万喜以罪谪戍有差【言官劾孜省及其党邓常恩赵玉芝交结太监芳外戚喜等诸不法事论死上以宅忧谪芳南京少监喜指挥使孜省常恩玉芝等戍陕西边芳等既谪戍遇赦当还印绶监太监蒋琮言芳等罪大不当赦复逮下狱孜省不胜拷掠死常恩玉芝寻复遇赦仍徙边方废死】

冬十月罢传奉官夺僧道封号

【帝用科道言降黜传奉官通政任杰侍郎蒯纲指挥僉事王荣等二千余人罢遣禅师真人等二百四十余人法王佛子国师等七百八十余人并追诰敕印仗遣归本土】质实【任杰王荣皆不知何许人】

尊皇太后为太皇太后皇后为皇太后立皇后张氏【先是孝穆太后薨外廷藉藉指万贵妃帝即位鱼台丞徐瑛疏请上母妃尊諡迁葬并追究薨故廷臣议建万氏戚属下锦衣鞠治万安惧不知所出曰我久与万家不往来刘吉亦有运自危与尹直共拟旨寢之帝仁厚恐伤先帝意不问安吉得无事】质实【皇后张氏兴济人】

万安罢

【安草登极诏书禁言官风闻言事中外譁然安寻亦悔之及上两宫尊号遂诏陈天下利弊御史汤鼐诣阁安从容曰此非里面意吾辈维持君等耳鼐即以其语闻谓安归过于君无人臣礼于是庶吉士邹智御史文贵姜洪等交章列其罪状先是歙人倪进贤者粗涉书史无行諂事安日与讲房中术安昵之因令就试得进士授为庶吉士除御史帝一日于宫中得疏一小篋皆论房中术者未署曰臣安进帝令怀恩特至阁曰此大臣所为邪安愧汗伏地不能出声及诸臣弹章入复令思就安读之安数跪起求哀无去志思直前摘其牙牌曰可去矣始惶惧归第乞休去时年七十余在道犹望三台星冀复用居一年卒安在政府二十年每遇试

必其门生为考官子孙甥壻多登第者子翼南京礼部侍郎孙弘璧翰林編修安死无几翼弘璧相继死安遂絕】质实【汤鼐字用之壽州人邹智字汝愚合州人文贵湘乡人姜洪字希范广德人】

追諡母纪氏为孝穆皇太后

【帝悲念太后遣人求太后家先是太后在宫中尝自言家贺县姓纪幼不能知亲族也于是有妄冒太后戚畹以希宠贵者十数輩後事露皆謫戍而太后家终不可得其後礼臣上言可仿太祖封徐王故事定拟太后父母封号立祠桂林致祭帝诏曰孝穆太后早弃朕躬每一思念怒焉如割初谓宗亲尚可旁求宁受百欺冀获一是卿等谓岁久无从物色请加封立庙以慰圣母之心皇祖既有故事朕心虽不忍又奚敢违遂封后父庆元伯后母伯夫人立庙桂林府有司岁时祀焉大学士尹直撰册文有云覩汉家尧母之门增宋室仁宗之恻帝燕闻念诵辄歔歔泣下也】质实【贺县汉临贺县唐为贺州治明洪武初以临贺省入贺州寻降州为县属桂林府今因之】

以吏部左侍郎徐溥兼翰林学士入内阁预机务【寻进礼部尚书兼文渊阁大学士已刘吉罢去遂为首辅溥承吉恣睢之後鎮以安静务守成法尝曰祖宗法度所以惠元元者至矣患不能守耳时人比之汉丙吉云】质实【徐溥字时用宜兴人】

十一月召王恕为吏部尚书以马文升为左都御史【时恕致仕家居言官论安者辄荐恕司礼监怀恩亦素重之力劝帝故即家起用之而文升亦以时望得内召】

尹直罢以刘健为礼部右侍郎兼翰林学士入内阁预机务

【给事中宋琮御史许斌言直自为侍郎以至入阁夤缘攀附皆取中旨帝于是薄其为人令致仕健学问深粹以身任天下之重先为少詹事充东宫讲官受知于帝帝立乃有是命于时羣邪渐黜衆正并升海内欣然望治矣】质实【刘健字希贤洛阳人宋琮陇西人许斌阳曲人】

礼部左侍郎邱濬进大学衍义补

【濬以眞德秀大学衍义止述修身齐家事而治国平天下阙焉乃博采羣书以补之至是表上于朝帝称善进濬尚书赉金币诏刊行其书既而濬以书中所载皆可见之行事请摘其要者下内阁议行之帝报可】质实【大学衍义补六十一卷诚意正心之要曰审几微治国平天下之要曰正朝廷曰正百官曰固邦本曰制国用曰明礼乐曰秩祭祀曰崇教化曰备规制曰慎刑宪曰严武备曰固封圉曰成功化】

十二月葬茂陵

【諡曰继天凝道诚明仁敬崇文肃武宏德圣孝纯皇帝庙号宪宗】质实【茂陵在昌平州聚宝山东少南】

【明史赞曰宪宗早正储位中更多故而践阼之後上景帝尊号恤于谦之冤抑黎淳而召商辂恢恢有人君之度矣时际休明朝多耆彦帝能笃于任人谨于天戒蠲赋省刑闾里日益充足仁宣之治于斯复见顾以任用汪直西廠横恣盗窃威柄稔恶弄兵夫明断如帝而为所蔽惑久而後觉妇寺之祸固可畏哉】

御定资治通鉴纲目三编卷十五

卷十六

钦定四库全书

御定资治通鉴纲目三编卷十六

【起戊申明孝宗弘治元年尽丙辰明孝宗弘治九年】凡九年

【戊申】孝宗敬皇帝元年春正月以何乔新为刑部尚书【乔新初为刑部侍郎以刚正为万安刘吉所忌帝嗣位安等拟旨出乔新为南京刑部尚书僭升秩以远之中官怀恩不平诣阁正色曰新君立当用正人胡为出何公安等默然既而刑部尚书杜铭罢羣望属乔新而吉代安为首辅终忌之阙久不补帝以王恕荐乃有是命】

二月帝耕藉田

【礼毕宴羣臣教坊以杂伎进马文升厉色曰新天子当知稼穡艰难岂宜以此瀆乱宸聪邪即斥去之自是岁子仲春行藉礼定为制】质实【按明史礼仪志洪武二年太祖始躬行耕藉礼永乐以後惟登极初一行之至是乃定有常仪前期百官致斋顺天府官以为耜及耨耨种进呈内官仍捧出授之由午门右出置彩舆鼓乐送至藉田所至期帝翼善冠黄袍诣坛所具服殿服兗冕祭先农毕还更翼善冠黄袍太常卿导引至耕藉位南向立三公以下各就位户部尚书北向跪进言耜顺天府官北向跪进鞭帝秉耒三推三反讫户部尚书跪受耒耜顺天府官跪受鞭太常卿奏请复位府尹挟青箱以种子播而覆之帝御外门南向坐观三公五推尚书九卿九推太常卿奏耕毕帝还具服殿陞坐府尹率两县令耆老行礼毕引上中下农夫各十执农器朝见令其终亩百官行庆贺礼赐酒饌三品以上丹陛上东西坐四品以下台下坐并宴劳耆老于坛旁宴毕驾还宫大乐鼓吹振作农夫人赐布一疋】

封哈密卫左都督哈商为忠顺王

【前二年卫喇特扬汗拥衆数万谋犯边哈商知之来告边将严设备扬汗不得利去憾哈密兵还掠其拉木城甘肃巡抚唐瑜因请假哈商以名使益固臣节至是其国人复诉卫喇特之逼欲得中国封以威隣部乃命哈商袭忠顺王给金印时卫拉特已与哈密和且约婚不复扰而土尔番兵端遂自此起】质实【拉木城方輿纪要在哈密城西自土尔番入哈密其往来未尝不经拉木者又有哈喇城在其西按西城图志哈密旧有十堡今四境凡五堡得五城自哈密城西六十里曰苏木哈喇城亦名头堡又西二十里曰阿斯塔纳亦名二堡又西北四十里曰托郭栖亦名三堡又西南二十里曰拉布楚喀亦名五堡其四堡在拉布楚喀西二十里曰哈喇都伯此皆哈密西境之城为入土尔番孔道则旧称哈喇者乃今哈喇都伯旧称拉木者乃今拉布楚喀音讯为拉木耳唐瑜字廷美上海人扬汗旧作养罕拉木城旧作刺木城今并改】

罢选淑女

【中官郭镛请预选妃嫔以广储嗣庶子谢迁上言山陵之工未毕谅开之痛犹新此必宦竖巧为谀词以动陛下非本心也陛下富于春秋俟祥禪之後徐议未晚愿亟寝前命从之】质实【谢迁字于乔余姚人】

三月揭文武大臣等姓名于文华殿壁

【两京文武大臣外官知府守备以上吏兵二部并号其姓名揭于殿壁如有迁罢即以新除者易之】

帝诣国子监行释奠礼

【帝亲释奠于光师加币用太牢改分献曰分奠坐?伦堂命祭酒费闇等进讲闇举商书说命篇敷陈时宪钦若之义词旨了畅帝耸听良久徐谕曰六经载圣人之道匪知难惟行之艰朕与尔师生勉之】质实【费闇字廷言丹徒人】

御经筵命儒臣日讲视午朝

【先是吏部侍郎杨守陈请遵祖制开大小经筵日再御朝畧言大经筵及早朝但如旧仪若小经筵当择端介博雅之臣以次进讲必于圣贤经旨帝王大道以及人臣贤否政事得失民情休戚讲之明而无疑乃行之笃而无弊凡前朝典籍祖宗谟训百官章奏皆当贮文华後殿退朝披览日令内阁一人讲官二人居前殿右厢有疑辄问一日闲居文华殿之时多处乾清宫之时少则欲寡心清临政不惑得于内者深而出治之本立矣午朝则御文华门大臣台諫更番侍直事已具疏者用揭帖举崖畧口奏陛下详问而裁决之在外文武官来观俾条列地方事面陈大要付诸司评议其陞辞赴任者随所职任而戒谕之有大政则御文华殿使大臣各尽其谋勿相推避不当则许言官驳正其他具疏进者召阁臣议可否以行而於奏事辞朝诸臣必降词色详询博访务竭下情使贤才常接于目前视听不偏于左右合天下之耳目以为听明则资于外者博而致治之纲举矣如或经筵常朝祇循故事百官章奏皆付内臣调旨批荅臣恐积弊未革後患滋深疏入帝深嘉纳遂于月之丙子开经筵翼日丁丑命儒臣日讲越六日壬午视午朝皆自守陈发之时谢迁为讲官务积诚开帝意每进讲敷词详切帝数称善】质实【杨守陈字维新鄞人】

起用言事谪降诸臣

【时擢林俊强珍为按察副使命科道官关者悉增补南京吏部主事储巏因言先朝直諫诸臣既蒙軫念起改官资而前主事张吉王纯中书舍人丁玘进士敖毓元尚弃岭海蛮瘴之间臣甚惜焉又前进士李文祥当陛下御极之初倡衆敢言冀益新政大臣厌其少年阳示培植而陰挫抑之天下皆知非陛下意方今增补諫官乞召此五人寘之风纪论思之地言论手

采必有可观帝命部臣起用之纯初以抗章留王恕称恕社稷臣忤旨贬玠毓元应星变记与张吉各陈时政疏言过切直留中谪玠普安州判官毓元後谒选得横州知州中旨降云南县丞文祥者万安孙弘璧同榜进士安重其才歛之家尝以诗规安安怒帝即位内阁拟登极诏书诫谏官毋言事文祥上对事极论其非比之李吉甫王安石安与刘吉皆怒票旨授系剧县丞历练遂为陕西咸寧丞以去至是帝虽俞巘言及吏部拟擢官多为吉所纠驳颇不尽起用明年文祥复以王恕荐召为兵部主事】质实【横州唐置明属南寧府咸寧唐置明倚西安府治东今皆因之储巘字静夫泰州人丁玠字玉夫丹徒人敖毓元新喻人李文祥字天瑞麻城人】发明【自孝宗更新庶政軫念言事谪降诸臣一时如林俊强珍辈皆得起改官资布列清要于是储巘以丁玠等五人列诸荐剡既从其请而召用之何又任刘吉之陰为阻挠俾丁玠卒滞远州而李文祥者复待王恕上章再荐始召为兵部主事及莅任未踰一月遂假吉人之狱阑入其名竟至获罪而去虽曰吉实为之然果孝宗英察有余吉亦安能施其陰狡哉】

夏四月厘正祀典

【礼科给事中张九功请正祀典章下礼部尚书周洪谟等条议以释迦牟尼文佛上清太上老君不宜修建斋醮遣官祭告古礼幽祭祭星今北极紫微大帝像之为人称之为帝非典风云雷雨南郊合祀山川坛复隆秋报今徇道家言又有雷声普化天尊之祀是瀆也岁以正月十五日为真君张道陵生辰遣天祭告非制大小青龙神祷雨无应不足祀梓潼帝君者传云神姓张名亚子蜀人仕晋战歿人为立庙唐宋屡封至英显王元加号为帝君景泰中因京师旧庙新之岁以二月三日生辰遣祭神庙食于蜀宜也与文昌六星无涉其祠在天下学校者当毁永乐中以道士周思得传王灵官法有验乃建天将庙祀灵官谓宋徽宗时有西蜀萨坚授法于林灵素者其师也因于庙立祖师殿宣德中改大德观封灵官曰崇恩尊君祖师曰隆恩真君成化初改显灵宫岁易袍服其费不貲当革灵济宫祀金阙上帝玉阙上帝盖五代时徐温子知证知谔也神世系事蹟非甚异其僭号亦当革於是祀典为之一正时洪谟建议并谓元武七宿不当信道家武当山修鍊之说城隍非人鬼不当有五月十一日诞辰之祭东岳泰山既专祭封内且合祭郊坛则朝阳门外东岳庙之祭实为烦瀆帝以崇祀既久不尽从也】质实【大小青龙神明史礼仪志云有僧名卢寓西山有二童子来侍时久毕童子入潭化二青龙遂得雨後肠卢号曰感应禅师建寺设像别设龙祠于潭上宣德中建大圆通寺加二龙封号春秋祭之文昌六星史记天官书斗魁戴匡六星曰文昌宫一上将二次将三贵相四司命五司中六司禄汉书天文志谓五司禄六司灾晋志则谓四司禄五司命六司寇周礼大宗伯以饔飩祀司中司命盖即文昌之祀也灵济宫在西长安门稍北明永乐十五年建元武七宿石氏星经云北方黑帝其精元武七宿斗牛女虚危室壁有龟蛇蟠结之像武当山在均州南一百里一曰太和山亦曰簪上山又曰仙室明永乐中改名太岳太和山张九功陕州人周思得杭州人】

五月嘉兴盗起命刑部侍郎彭韶讨平之

【嘉兴百户陈辅以盗贩盐为逋者所发革官遂招集无赖作兵器四出剽掠郡县吏置不

问辅益恣与其父端子文壻邓夔等率衆攻府治知府徐霖踰墙走因据府库纵狱囚劫军器千户所执千户白监大掠城中夺舟趋太湖官军不能遏镇守中官张庆以闻帝以浙江财赋甲天下有银鑛盐塲之利易以生盗而官吏怠玩武备废弛嘉兴城守辏集之地尚寇贼纵横则山谿僻县奸宄僭伏乘机窃发者更不可诘乃命韶驰往巡视偕镇巡官督诸司讨捕之韶至浙官兵大集败辅衆于吴江端等就擒余党多杀伤或赴水辅还走秀水合兵蹙之辅自杀贼遂平是年十一月癸未也于是郡县吏皆被劾去】质实【吴江县五代梁开平三年吴越以吴之松林镇置元升州明仍降县属苏州府秀水县明宣德四年析嘉兴县地置为嘉兴府治西北偏今皆因之徐霖襄城人】

六月癸亥朔日有食之

鞑靼求贡

【小王子率部落僭住大同近边营亘三十里遣百人款求通贡巡抚许进以便宜纳之闻于朝所上书自称大元汗朝廷方务优容许遣五百人诣京师至八月与其别部巴延蒙克王使人俱入朝自是屡入贡然寇抄诸边如故且渐往来套中矣】质实【巴延蒙克旧作伯顏猛可令改】

命户部左侍郎李嗣刑部右侍郎彭韶清理盐法【淮浙盐自宪宗以来为势家乞中者所扰虽尝申谕禁迄莫能屏絶运司不敢与忤每事姑息以是盐法日坏商病而课不充边储匮乏户部尚书李敏请简风宪大臣整理帝以韶方在浙因即命韶理浙盐而别遣嗣于两淮皆兼命都御史嗣至淮乃建置补余盐之议初洪武创制商支盐有定场无许越塲买补竈户勤者正课外有余盐送场司二百斤为一引给米一石其盐招商开中不拘资次给与成化後令商收买而劝借米麦以振贫竈至是嗣请令商人买余盐补官引而免其劝借且停各边开中俟逋课完日官为卖盐三分价直二充边储而留其一以补商人未交盐价由是以余盐补充正课而盐法小变诏以浙商苦抑配为定折价额蠲宿负悯竈户煎辨徵赔折閱之困绘图以献条其利病奏行之】质实【李嗣字克诚南海人李敏字公勉襄城人】

冬十一月妖僧继晓伏诛

【初继晓以林俊劾已获谴知为廷臣所恶虞祸及托称养母乞空名度牒五百道以归及星变华国师为民至是给事中林廷玉请逮治之乃令有司执送京师法司论其罪以犯在赦前免死给事中陈璠言继晓罪大不当宥命弃市】质实【林廷王侯官人陈璠字玉汝长洲人】

土尔番杀忠顺王哈商复据哈密

【土尔番阿尔死其子阿哈玛特嗣为苏勒坦闻哈商封忠顺王怒曰哈商非忠顺族安得封乃伪与结婚诱引杀之尽夺哈密地留六十人佐伊兰据卫城而遣使入贡称与哈商締姻

乞赐蟒服及九龙浑金膝襴诸物使至甘州哈商都指挥阿穆呼朗告变朝廷亦不罪番使但令还谕其主返侵地阿哈玛特傲不奉命明年阿穆呼朗觐知伊兰势单弱请授于边臣调赤斤罕东兵夜袭破其城伊兰遁去因命哈商弟恩克保喇袭都督同知给新印而阿穆呼朗等以力薄不能守寻引还哈密城为土尔番据如故】质实【明史西域传阿哈玛特嗣为苏勒坦在成化十四年阿哈玛特旧作阿黑麻阿穆呼朗旧作阿木朗今并改】

【己酉】二年春二月振四川饥

【命发湖广岁漕米二十万先後遣户部郎中江汉王宏往振之嗣发帑金二万为饥民耕种之具及秋复命镇巡官勘状免被灾税粮暨流民复业者杂役三年先是流民逐食四出巡抚谢士元檄所部置广室十余区作糜食之且令所在给符遣归道经郡县验而廩之粟乃浙复业时朝廷虽命转湖广漕久不至赖士元区尽民得以济会湖广岁赤歉转漕竟止不发四川故多盗有野王刚者啸聚且五年矣劫掠夔州新宁往来大寧大昌诸县前守臣畏罪匿不以闻乘岁饥土番大小娃复煽乱士元托行边驰诣其地大小娃惧泥首迓道左立谕散之刚更入转湖广竹山竹谿据陕西汉中金州平利西乡诸郡县副都御史戴珊方抚治郧阳请集四川湖广陕西兵讨之于是士元亦遣兵会讨贼闻风溃珊督湖广兵捣其巢盗悉平是年七月畿内亦饥给贫民麦种遣官振河间永平免其税粮户给米一石十一月顺天饥发仓粟减直赈于民】质实【新寧西魏县明属夔州府今属达州大宁宋监元州明洪武九年降县属夔州府今因之金州西魏置隋改西城郡唐复置明属汉中府神宗十一年改兴安州二十三年升直隶州平利唐县明属兴安州西乡晋县明属汉中府今皆因之江汉旌德人王宏文登人谢士元字仲仁闽县人戴珊字廷珍浮梁人】

下监察御史汤鼐于狱戍之

【初鼐与庶吉士邹智中书舍人吉人进士李文祥交善并负意气裁量人物帝即位文祥上书言新政既谪戍宁丞去智复疏劾万安刘吉尹直荐王恕王竑彭韶极言宦官权重之害未几安直相继罢斥恕果召更新庶政言路大开智喜谓志且得行而鼐以吉罪与安直均独得留抗章请申黜陟语甚剴挚然鼐抨击自豪间及海内人望王恕以盛暑请辍经筵鼐三疏争语侵怨恕惟自引咎而周洪谟倪岳张悦马文升亦尝为所吹索以故大臣多畏之吉尤恨鼐次骨使人问御史魏璋曰君能去鼐行佥院事矣璋欣然日夜伺鼐短于是吉人之狱起时帝方命官振四川饥吉人上言宜遣四使分道振且择才能御史为巡按庶荒政有裨因荐给事中宋琮陈璘韩鼎御史曹璘郎中王沂洪钟员外郎东思诚评事王寅理刑知县韩福及壽州知州刘槩可使而巡按则鼐足任之璋遂草疏伪署同官陈景隆等名言吉人抵抗成命私立朋党帝怒下人锦衣狱令自引其党人以鼐璘思诚槩福对璋又嗾同官陈璧等言璘福思诚非其党其党则鼐及李文祥邹智知州董杰逮是也槩尝馈送鼐白金貽之书谓夜梦一人骑牛几堕鼐手挽之得不仆又见鼐手五色石引牛就道因解之曰人骑牛国姓意者国倾将赖鼐扶之引君当道也鼐槩等自相标榜诋毁时政请并文祥智杰逮治疏上吉从中主之悉下锦衣狱坐槩妖言律斩鼐受贿戍肃州人欺罔削职智文祥杰皆谪官王恕以槩书词虽妄与妖言有间上疏申救帝意动命姑系狱既而热审何乔新等言槩本不应妖言律且槩五岁而

孤无兄弟母孙氏守节被旌槩死母必不全务恤乃臧槩死戍海州方鼐之论暑月辍讲也董杰谒选至京亦疏抗争之由是知名为吉所忌故障指以为吉人党文祥自咸寧召为兵部主事未逾月而复坐累谪吉以泄旧愤也璋遂擢大理寺丞】质实【海州辽海州南海军寻置临海县为州治金改澄州元省明洪武中置海州卫属辽东都司 本朝顺治十年改海城县属辽阳府十四年改属奉天府吉人长安人张悦字时敏松江华亭人魏璋鄱陵人寻坐事下狱黜为九江同知悒悒死韩鼎合水人曹璘字廷暉襄阳人王沂武进人洪锺字宣之钱塘人东思诚华州人王寅容城人韩福陕西西安人刘槩济寧人陈景隆福建长乐人陈璧高邮人董杰字万英泾县人】

以马文升为兵部尚书兼提督团营

【前年夏文升以都御史督团营至是代余子俊为尚书兼督如故时兵政废弛西北部落不时窥塞下文升严核诸将黜贪懦三十余人奸人大怨夜持弓矢伺其门作谤书射入东长安门内帝闻诏锦衣卫缉捕给骑士十二人卫出入文升乞休慰谕之文升以营军久苦工役力陈其弊又请于每营选马步銳卒二千遇警徵调且遵洪永故事五日一操以二日走阵下营三日演武皆报可】

夏五月河决开封入沁河

【河决自原武由开封黄沙冈六所又决埽头五所东北入河沁溢流为二一决南岸自于家店经兰阳县南东至归德由徐邳入淮一决北岸自封邱县之荆隆口漫祥符溃仪封县之黄陵冈东经曹濮入张秋运河郡邑多被害汴梁尤甚议者请迁开封城于许州以避患布政司使徐恪持不可乃止命所司役夫五万人治之已而命户部侍郎白昂总理河道昂举郎中娄性协治役夫二十五万筑阳武长堤以防张秋引中牟决河出荣泽濬宿州古汴河又濬归德睢河使河流入汴汴入睢睢入泗泗入淮以达海南北分治水患稍寧】质实【一统志埽头堤在开封府城东北四十里于家店在阳武县东接封邱县界仪封县元因卫邑名置县明属开封府今因之黄陵冈在仪封县东北五十里接山东曹县界许州春秋时许国秦汉为汴县後周为许州明属开封府今升直隶州古汴河在宿州城北自河南永城入界又东南流入虹县界隋时自汴开河经州境至泗长千三百里两岸筑堤今州城东南尚有故迹名曰隋堤归德睢河在府城南自陈留县东南经睢州宁陵之南流入境又东至夏邑永城之南而入徐州汴水即禹贡之澠水谓河出为澠也春秋时谓之邲水秦汉间曰鸿沟汉志谓之狼荡渠泗水源出山东泗水县东五十里陪尾山至济宁分流北流谓之北清河南流谓之南清河南清河南流至江南宿迁县睢水入焉又南至清河县分西北三?河口达淮徐恪字公甫常熟人白昂字廷仪武进人】

秋七月诏求直言

【诏曰近者京师霪雨南京有大风雨之异朕当检身飭行祇谨天戒尔文武羣臣其勉加修省政事有阙失当更正者以闻于是给事中韩重等应诏陈四事一存敬畏以契天心一慎

用人以奉天命一祛弊政以消天变一谨号令以肃天威帝深嘉纳然御史欧阳旦上言七事极诋阁臣刘吉不职乞罢归田里帝以其妄言切责之】质实【韩重降州人欧阳旦安福人】

冬十二月甲申朔日有食之

赐故少保于谦谥

【从应天府尹于冕谪也帝曰谦能安社稷以遏寇畧其定国扞患之绩着矣中罹权奸之害虽先帝已尝昭雪优加褒恤而不使之庙食于後犹未足为効忠者劝乃加赠光禄大夫上柱国谥忠愍立祠墓所赐额曰旌功】质实【西湖志旌功祠在三台山案明史本传作肃愍与明实录作忠愍者异】

【庚戌】三年春正月下南京御史姜绂等十人于狱寻贬官宥太监蒋琮罪不问

【南京沿江荐塲故隶三厰给中官采用成化初江浦县田多沉于江而濒江生沙洲六民请耕之以补沉江田额洲与芦塲近太监黄赐为守备时受奸民献指为芦塲收其利民失业岁额租课仍责偿之民帝立诏势家悉返投献地县民乃相率愬于朝下绂等覆按守备太监蒋琮胁绂右已绂怒偕同官劾琮夺民利因及其侵渔诸不法事刑部尚书何属新请移南京法司勘其罪琮条辨绂疏谓已尝奏下李孜省狱绂乔新其乡人共倾已图报复事未白而太监蒋镛请再勘後湖田之狱後湖者洪武时置黄册库其中令主事给事中各一人守之百司不得至且禁湖墾勿田岁久湖渐淤墾日廓太监陈祖生遂垦为田御史余濬劾其违制下南京主事卢锦勘报时锦与给事中方向监後湖黄册祖生虑锦勘实遂讐锦向尝伐湖滩华实侵官利复下其事于应天府尹寻白矣会郭镛奉使两广道南京驾方舟泛湖御史孙紘以擅游禁地劾镛镛怒归愬于帝言府尹杨守随勘锦向失出御史不劾奏独绳内臣帝乃遣太监何穆大理寺少卿杨谧再勘後湖田及绂琮互讐事比报谓守随失出如镛言绂琮互讐皆私忿琮不当受献地属勘官诬指绂乔新为孜省党绂等不当逞忿瀆奏乃褫锦职谪守随向有差绂与同官孙紘刘逊金章纪杰曹玉谭肃徐礼余濬给事中缪樗皆逮治给事中陈璘等言不宜以一内臣而置御史十人於狱不听至是遂宥琮而贬绂等为州判官祖生虽违制垦田亦不问是时大学士刘吉方牢笼言路建议超迁科道官处以不次之擢顾两京言官攻吉不已吉恨甚既嗾魏璋兴吉人狱以斥己所恶者而绂琮互讐事复起琮素恃才辩为同类所疾独吉比之因太监镛亦恶言官遂交谮于帝故帝特宥琮而抑绂等尚书李敏等屡言琮绂同罪异罚失平帝先入吉谮不纳也由是中外益恶吉所为为之侧目】质实【姜绂字壬卿弋阳人余濬慈谿人卢锦长寿人方向字与义桐城人孙紘字文冕鄞人杨谧字文宁仪封人刘逊安福人金章崑山人纪杰磁州人曹玉江宁人谭肃壽张人徐礼余姚人缪樗字全之溧阳人】

二月免河南南畿湖广税粮

【时以河南当河决後民困未苏特诏蠲其秋粮越三日户部以凤阳淮揚鄆阳南阳诸郡水旱请免徵刍粮及麦丝之税帝曰凶岁当损上益下必欲取盈如民病何部臣言甚称朕旨亟如所请行已而潞沁二卫所屯田被灾明制屯田灾及三分乃免粮部臣格于例不敢请蠲帝闻之曰岁饥方将振之安可复徵特免之】质实【潞州卫沁州千户所并隶山西都司】

三月限天下预备仓积粟之数

【洪武中始设预备仓选耆民掌之後渐废弛于谦抚河南山西修其政周忱抚南畿别立济农仓他人不能也正统时重侵盗之罪至金妻发戍且定纳谷千五百石者敕獎为义民免本户杂役凡振饥米一石俟有年纳稻谷二石五斗还官至是限州县十里以下积谷五千石二十里积二万石其上以是为差至八百里以下限积十九万石卫千户所积五千石百户所三百石考满之日稽其多寡以为殿最不及三分者夺俸六分以上谪官】

秋闰九月禁宗室勲戚奏请田土及受人投献

【帝登极後诏势家所受献地悉归之民寻有南京芦塲之讼其弊未革刑科给事中胡金复以为言乃申是命已而奉御赵瑄献雄县地为东宫庄户部尚书周经劾其违制下瑄诏狱敕诸王辅导官导王奏请者罪之然帝性寬厚虽屡申禁不能尽执法其後奏献不絕乞请亦愈繁徽兴峻衡四王田多至七千余顷会昌建昌庆云三侯争田帝辄赐予卒莫之禁也】质实【按外戚恩泽表会昌侯孙继宗子铭成化十六年袭庆云侯周壽成化十七年封建昌侯则张延龄也胡金汉阳人】

发明【明宗室勲戚之有庄田自太祖始其有乞请则自仁宣时始厥後投献之风起侵夺之弊生而庄田厉民滋甚孝宗烛知其害一旦申禁而约飭之庶乎除民所疾苦矣乃未几而奏献如故陈乞愈繁四王三侯竞取膏腴以挠法制不知孝宗何所瞻徇而竟不能使令行于贵近哉方成化四年宪宗禁勲戚请民田寻又曲从庆云伯之请其取讥于选悞固宜独孝宗求治方殷顾亦出此屡申禁而中多更变施善政而弗克有终优柔姑息之害於政事一致此耶】

冬十一月有星孛于天津诏羣臣言阙失

【大学士刘吉等言妖星见天津历杵臼近营室考之载籍其占为兵为饥为水旱今两畿河南山西陕西旱蝗四川湖广岁不登倘明年复然恐盗贼窃发祸乱将作愿陛下节用度罢宴游屏谗言斥异教留怀经史讲求治道沙河修桥江西造瓷器南海子缮垣墙皆非急务宜悉停止帝嘉纳之初吉在成化时无所规正及帝即位见帝仁明同列徐溥刘健皆正人而吉于阁臣居首两人有论建吉每署名于前托正论以自盖焉】质实【晋书天文志天津九星横河中主四渎津梁杵臼辑览注引晋天文志杵三星在箕南按史记天官书杵臼星危南注杵三星在文人星旁主军粮占正下直曰吉与臼不相当军粮絶也臼星在南主春其占覆则岁大饥仰则大熟也又史记营室为清庙注元命苞云营室二星埏陶精类始立纲纪包物为

室尔雅云营室谓之定郭璞注定正也天下作宫室皆以营室中为正也一统志南沙河在昌平州南即古易荆水也源出神头岭山东流迂巩华城南又东迳窦家庄入北沙河】

十二月京师地震

【是月十二日己未也日凡再震】

【辛亥】四年春二月敕法司慎刑

【敕法司曰曩因天道示谴敕天下诸司审录重囚矜疑放遣者数十百人朕以为宽之于终孰若慎之于始嗣後两京三法司及天下问刑官务存心仁恕持法公平详审其情罪所当毋姑息毋苛刻毋传致于一时冀不坐于他日】

三月逮两广总督秦紘寻免归

【初紘涖镇劾总兵官安远侯柳景贪暴不法逮下狱景亦讦紘勘无左证法司当景死景连嫪周太后家有奥援讦紘不已命并逮紘连鞫卒无罪诏宥景死夺爵闲住而紘亦罢归王恕请留紘不纳紘自成化末被诬为尹旻党谪官帝即位以恕荐督漕运寻督两广军务在制府二年多所饬治时中官武臣镇两广者率纵私人扰商贾高居私家擅理公事贼杀不辜交通土官为奸利前督臣宋旻屠蒲噤不敢言紘至疏闻于朝且言天下镇守官皆得擅执军职受民讼非制请严禁絶总镇府故有赏功所岁储金钱数万费出无经宜从都御史勾稽广潮南韶多盗当设社学编保甲以絶盗源帝悉从其请恩城知州岑钦攻逐田州知州岑溥与泗城知州岑应分据其地紘督兵入田州逐走钦还溥于府留官军戍之乱遂定复遣将讨平黎贼于陵水猺贼于德庆方议剿後山贼而逮治命下紘部署军事毕从容就道仪卫殆从不贬损既踰岭囚服就系谓官校曰两广蛮夷杂处总制体尊遽就拘执恐损国威既踰岭真囚矣人服其知体】质实【潮州隋州元路明府韶州隋置无路明府今皆因之恩城在田州北二百五十里唐羈縻州明设土知州隶广西布政司岑钦既为紘逐走岑应所乞兵缕镇官即檄应捕钦钦遂杀应已而应弟接伴以兵送钦就道上杀之钦孙桂佩党乱被诛州遂废陵水隋置明属万州以隶于瓊州府後山在广州境按雷礼列卿记紘令按察使孔鲁讨後山贼鲁檄广州知府林泮绘其地图遣都指挥马羲李敬何清统官军土兵分四哨以进攻破黄竹长坪等山砦十余所斩获一千八百有奇紘被逮时所议剿者盖此後也柳景安远侯溥之孙】

夏六月京师地震

【月之六日辛亥也日凡三震八月乙卯南京及淮揚二府同日震】

秋八月封弟五人为王

【佑楮寿王佑棼汝王佑樛泾王佑枢荣王佑楷申王】质实【明史诸王传寿主宪宗第

九子姚安妃生十一年之藩保寧正德元年以岐王世絕改就岐邸于德安汝王宪宗第十一子张德妃生十四年之藩卫辉泾王宪宗第十二子与申王佑楷皆杨恭妃生十五年之藩沂州荣王宪宗第十三子潘端妃生正德三年之藩常德申王宪宗第十四子未之藩卒按明孝宗实录称汝王为十弟泾王为十一弟荣王为十二弟申王为十三弟盖宪宗第十子未名殇不入诸子之序故所称行次与明史异】

罢刑部尚书何乔新

【时刘吉窃威福屡兴大狱乔新率据法直之吉憾甚前二年夏京城大水乔新请恤被灾者家又虑刑狱失平条上律文当更议者数事吉悉格不行大理丞阙御史邹鲁觐迁而乔新荐郎中魏绅会乔新外家与乡人讼鲁即诬乔新受赇曲庇吉取中旨下其外家锦衣卫狱乔新乃拜疏乞归顷之穷治无验鲁坐停俸乔新亦许致仕乔新自为刑部郎时都指挥袁彬有所属执不从彬怒使人拊搯无所得即着刚直声性尤廉介既居家播州宣慰杨爱感乔新勘讼白其诬遣使厚致赠坚却之乔新後竟不复起居十二年卒】质实【邹鲁当涂人魏绅曲阜人】

九月以彭韶为刑部尚书

【前二年秋韶还自浙江寻改吏部与王恕甄人材核功实仕路为清何乔新既致仕以韶代之时安远候柳景为秦紘所劾罢当没入赃数千徵仅十一以其母诉免韶执奏曰昔唐宣宗元舅郑光官租不入京兆尹韦澳械其庄吏宣宗欲寬之澳不奉诏景无元舅之亲赃非负租之比独蒙宥除是臣等守法愧於澳也不从】

冬十月河溢

【开府怀庆及宣武睢阳诸卫皆被灾命有司振其家】质实【明史兵志宣武卫睢阳卫并隶河南都司】

以礼部尚书邱濬兼文渊阁大学士预机务

【尚书入阁自濬始初内阁委寄虽重然大学士秩五品非加三孤及宫傅者仍班尚书下濬前以礼部尚书掌詹事与恕皆晋太子太保恕吏部长六卿位濬上及濬入阁自以阁臣任隆当尊异而恕循旧制弗让也濬不悦既而内宴濬径居恕上其後由侍郎詹事入阁者班皆列六部尚书上矣】质实【按王琼双溪杂记尚书入内阁自焦芳始王世贞史乘考误谓以大臣入阁者芳以前有王文邱濬何云芳始】

十二月土尔番献还哈密城

【先是阿哈玛特既据哈密十一城朝廷不加诘责但令贡使还谕其主归侵地番人知中

国易与不奉命复遣使来贡从廷臣议拘留其使臣乃稍惧既而偕赛玛尔堪贡狮子愿献还城印帝喜召使臣入大内纵观狮子戏赉以尚食及使还命内官张芾护行阁臣因言阿哈玛特杀我所立或不即讨亦当封关絶贡今优宠其使臣又边中使伴送於恩则已过矣况闻彼方集兵秣马谋犯肃州名虽奉贡意实叵测使彼恃恩无惮或更狡焉以逞则损中国之威不小帝乃止芾行却其後使时耿裕长礼部马文升长兵部咸知国体於贡使多所裁抑阁臣刘吉方自矫饰亦颇能持却贡议于是阿哈玛特知中国有人欵关顾还十一城及前阿尔所掠金印边臣闻诸朝许之至是果以城印来归乃厚赐其使先所拘者尽释还之】质实【赛玛尔堪即汉罽宾地元太祖荡平西域尽以诸王附马为之君长始有赛玛尔堪之名距嘉峪关九千六百里 赛玛尔堪旧作撒马儿罕今改】

凤阳陵火

【时有遗火山场者遂延熬九十构里巡按官劾留守王正等罪赎杖还职】

召秦紘为南京户部尚书

【言官论紘无罗诏起之初紘巡抚山西劾镇国将军奇涧横恣不法奇涧父庆成王锺镒为奏辨且诬劾紘宪宗重违王意逮紘下法司治事皆无验内官尚亨籍紘家以所得敝衣数事奏宪宗叹曰紘贫一至此耶赐钞万贯旌之於是夺奇涧爵王亦削禄三之一而改紘抚河南时成化十六年也紘自为大臣先後以劾宗戚几重得罪赖廉直受主知又所在皆着劳绩为廷臣所推故得再仆再起也】质实【明史诸王表庆成王济炫晋恭王橐第四子永乐元年封别城汾州锺镒其孙也正统十二年袭封奇涧锺镒庶子】

【壬子】五年春二月减陕西织造绒氍之半

【巡按御史张文言陕西岁歉之俊民病未苏司礼监近下帖子降图式织造绒氍数百事并宜停止以其价振业贫民命减所织之半是年八月复以水灾停南畿浙江额外织造召督造官还】质实【明史食货志永乐中始令陕西织造驼氍又云明制苏杭等府各有织染局岁造有定数天顺四年遣中官往苏松杭嘉湖五府於常额外增造彩緞七千疋增造望???於此始张文泰州人】

三月立子厚照为皇太子大赦

【帝长子前年秋九月丁酉生张皇后所出也】

夏五月求遗书

【大学士邱濬言高皇帝当至正丙午之岁始肇帝业首求遗书既平元都得其馆阁秘藏又广购於民间一时贮积不减前代太宗当多事之时犹集儒臣纂永乐大典以备考究今承

平百年中外无事乌可使经籍废坠夫民庶之家迁徙不常好尚不一既不能广有储藏即储藏亦不能久远所赖石渠阁积聚之多收藏之密局鐫之固类聚者有掌故之官阙畧者有缮写之吏损坏者有修补之工散佚者有购访之令然後不致废残阙失前代藏书之多有至三十七万卷者近内阁书目不能什一数十年来在内未闻考校在外未闻购求及今失之恐遂放佚自古藏书不一所汉有东观兰台鸿都唐有秘书监集贤书院宋有崇文馆秘书省国朝罢前代台监馆省之官并其任于翰林院设典籍二员掌文渊阁书籍南京国子监虽设典籍仅掌累朝颁降之书及旧钁书板而已今请敕内阁所藏书籍令学士以下督典籍官彙若干册册若干卷检其有副本者分贮一册于两京国子监若内阁所无或不备者乞敕礼部行天下提学官榜示购访俾所在有司校録賚呈其藏书之所二在京师曰内阁曰国子监一在南京曰国子监使一书而存数本一本而藏三所每岁三伏时令翰林院寮属同赴阁监曝书毕事局鐫廷臣有因事欲稽考者奏请诣閱以为常规则于文治有裨焉疏上帝嘉纳之寻有是命】质实【前代藏书之多有至三十七万卷者北史隋西京嘉则殿有书三十七万卷炀帝命秘书监柳顾言詮次其重复得正御本三万七千余卷石渠汉韦元成传注石渠阁在未央殿北东观後汉和帝纪注陆机洛阳记曰在宫南高阁十二间介于承凤观兰台汉百官表御史中丞在殿中兰台掌图籍秘书鸿都後汉灵帝纪光武元年始制鸿都门学注鸿都门名也秘书监唐百官志秘书省监少监丞各一人掌经籍图书之事宋志设官同集贤书院唐百官志注开元五年置乾文院写四部书六年更号丽正十三年改丽正书院为集贤殿书院按四部之分始于魏秘书监荀勗一曰甲部纪六艺及小学等书二曰乙部有古诸子家近世子家兵书术数三曰丙部有史记旧事皇览簿杂事四月丁部有诗赋图赞汲冢书然勗所分四部以史次子後自梁处士阮孝绪撰七録改列纪传録于兵録之前而隋更定四部遂以六艺经纬史之所记诸子集部为序唐四部书因之又以四部各为一库经库钿白牙轴黄带红牙籤史库钿青牙轴缥带緑牙籤子库雕紫檀轴紫带碧牙籤集库緑牙轴朱带白牙籤以分别之崇文馆宋太宗纪太平兴国三年以三馆新修书院为崇文院按宋书王俭传称明帝置东观祭酒晋志称魏兰台选二御史居殿中唐志称龙朔二年改秘书省曰兰台则宋亦有东观魏唐亦有兰台不独汉也通典称汉延熹二年置秘书监唐志称东宫官崇文馆学士二名唐六典注称魏有崇文馆则秘书郎掌始於唐崇文馆亦非始于宋也宋志称秘书郎掌集贤院图籍则宋亦有集贤院不独唐也唐宋皆设秘书省其官皆称曰监亦非唐谓之监而宋谓之省也濬云然者特临文偶举耳】

六月下御史彭程于狱寻遣戍

【程巡视光禄寺见造皇坛祭器皇坛者宪宗斋醮之所也程疏言光禄金钱皆民膏血用之得当犹恐病民况投无益之地先帝笃信李孜省继晓辈意在求福今二人已伏事尚不能自免祸焉能福人陛下即位若辈废斥殆尽何复有皇坛置器果复有此则宜遏之将萌如无之请治所司逢迎罪时帝初无造皇器之命特光禄仍故事未革置以备也帝得疏以程暴扬先帝过下之锦衣狱给事中丛兰亦巡视光禄寺继上疏论之帝宥兰夺光禄寺卿胡恭等俸已而刑部尚书彭韶拟程赎杖还职帝不许韶复抗章申救且言光禄寺廉用无籍经费不支牲物槩除之市肆大为贾人累及今不节恐无以善後程欲国家惜经费心本无他但不应引李孜省事疏入帝令光禄寺籍岁出之数以闻而戍程及家属于边】质实【彭程字万里鄱

阳人丛兰字廷秀文登人胡恭扶风人】

秋七月振南畿浙江山东饥

【从尚书马文升请也寻命侍郎吴原巡视浙江督有司振饥先是余杭致仕尚书邹干疏言浙江水旱相仍民穷且盗乞行蠲恤帝曰干家居尚忧国其赐羊酒文绮劳干于是浙江特有督振之命时给事中吴世忠请振灾无俟勘覆其言尤切畧云近者南畿及山东诸行省各以灾告而浙江为甚致厘宸衷屡飭百司经昼乃振恤之典有加而实泽未究良由府县官吏发粟不时文书勘报动淹旬月俟既得食而饥者已死而流者已远又况书吏胥役因缘为奸更有不可胜言者今欲约之以法莫若稽注册籍以产之多寡验民穷富凡遇给振视此为则富者不得滥支贫者获沾实德庶弊革而惠行因条上兴水利复常平仓二事诏举行之】质实【余杭秦县明属杭州府今因之吴世忠字懋贞金谿人】

八月刘吉罢

【吉居内阁十八年柄政久权势烜赫帝初颇加委任後眷亦渐衰而吉无去志及是帝欲封后弟伯爵命吉撰诰券吉言尽封二太后家子弟乃可帝不悦遣中官至其家讽令致仕给驿归吉性机诈善附会自矫饰銳於行私屡为言路所攻屡晋官至少师人目之为刘棉花以其耐弹也吉疑言出下第举子因请举人三试不第不得复会试时适届会试期举子已羣集都下礼部为请诏姑许入试後如令已而吉罢令亦不行吉归踰年歿】质实【按明史恩澤侯表孝宗张皇后苻弘治四年封壽宁伯五年三月进侯八月卒十一月子鹤龄袭次子延龄八年封伯十六年进侯则时所欲封伯者盖鹤龄也旋当袭父侯爵故封伯之命亦寢】

冬十月更中盐法

【洪武时於各边开中令商人募民垦种筑台堡自相保聚边储以充成化中始以银易米然未尝着为令至是户部尚书叶淇请召商纳银运司类解太仓分给诸边每引输银三四钱有差视国初中米直加倍而商无守支之苦旧制商输粟毕书所纳粟及应支盐数齎赴各运转提举司如数支盐既而塩不时给有祖孙相代候支盐不得者商人大困报中亦浸息淇新法行争便之一时太仓银累至数百万然赴边开中之法废商屯撤业菽粟翔贵边储日虚矣】

发明【叶淇召商纳银之议论者多咎其更开中法以致边储日匱而不知明代边储之匱自在屯政不修而不尽关於盐法其盐法之坏又在势家乞中而不关淇之变法也盖产盐有盈有绌边地不能悉知则但知召商开中而初不为支盐计故守支之弊在永乐时已所不免远宪宗之世势家争先奏乞所赐盐引动以万计且许其越塲支盐不限年次于是商人益困守支而盐亦壅阏不行夫商人挽输数千里外守文至数十年之久而不得盐及既得盐复为奏乞盐所壅阏而不获速售然则商人之病开中亦极矣虽日下令招之其谁应哉淇见报中之怠乃为更制以利商商利则报中多报中多则国课裕是亦救弊之策也如云商屯撤业边

粟翔贵独不思塞下之地商可屯军不可屯乎明食货志称成化时屯田法废戍卒多役于私家子粒不归于公廩论者不深咎此而徒责其变法亦昧于轻重之计者矣】

十一月停纳粟例

【初成化末开纳米例振陕西河南诸省饥及是尚书王恕言永乐宣德正统间天下亦有灾伤各边亦有军饷当时无纳粟例粮不闻不足军民不闻因弊比年来一遇灾歉辄行捐例人既以财进身欲其砥厉廉隅为循吏岂可得也帝即命止之】

【癸丑】六年春二月録常遇春李文忠邓愈汤和裔世袭指挥使【五年春立皇太子颁恩诏中外以太庙配飨功臣追封王者六人皆佐太祖定天下有大勲而其子孙不替爵者惟中山黔寧二王裔余皆凌夷与编氓伍令吏部访以闻乃得常遇春元孙复李文忠元孙璿邓愈五世孙炳汤和六世孙绍宗皆命入指挥使奉先祀时有滁人郭琥自言滁阳王子老舍四世孙亦命予冠带奉祀已而为宥氏所讐宥氏者故滁阳王邻太祖复其家令世守王基者也礼部审滁阳王碑文王果无後老舍非滁阳王子夺琥冠带】质实【功臣追封王者六人按明史功臣表为中山王徐达开平王常遇春岐山王李文忠宁河王邓愈东甌王汤和黔宁王沐英】

河决张秋以刘大夏为右副都御史治之

【河决张秋戴家庙掣漕河与汶水合而北行遣工部侍郎陈政督治政寻卒命廷臣会荐才识堪任者大夏方为浙江左布政使以王恕荐赐敕遣之时河流湍悍决口濶九十余丈大夏行视之曰是下流未可治当治上流于是即决口西南开月河三里许属之旧河使通漕乃濬黄陵冈南贾鲁旧河四十余里由曹出徐以杀水势又濬孙家渡口别凿新河七十余里导使南行由中牟颍上东入淮又濬祥符四府营淤河由陈留至归德分为二一由宿迁小河口一由亳州涡河俱会于淮然後沿张秋两岸筑台立表贯索联巨舰穴而窒之实以土至决口去窒沈舰压以大埽且合且决随决随塞连昼夜不息功乃成帝遣行人往劳张秋名安平镇大夏又言安平决口既塞下流已治黄陵冈居安平镇之上流河口广九十余丈荆隆等口又居黄陵冈之上流其广四百三十余丈黄河至此寛漫奔放必筑塞诸口导河上流使南下徐淮庶可为运道久安之计廷议如其言八年正月大夏乃兴工筑塞黄陵冈及荆隆等口七处五旬而毕于是上流河势复归兰阳考城迺归德徐州入运河会淮水东注于海南流故道以後又筑长堤亘三百六十里起胙城抵徐州复筑荆隆口等堤凡一百六十里起于家店历铜瓦厢抵小宋集大小二堤相翼溃决之患始息水大治乃召大夏还黄河自金明昌中南北分流其後南流盛而北流渐微明正统景泰间尝东决大清河入海虽即修治而支渠犹有存者至黄陵冈既塞于是黄河始全入于淮而北流遂絶】质实【戴家庙水道提纲运河自安开折而西西北流有魏河自西南来会又西北为戴家庙闸又西北过安平镇盖庙在东平州西安平镇东南明一统志孙家渡在荣泽县东南五十里正统十三年河尝决此四府营在开封府城北宿迁唐县明属邳州今属徐州府小河口在宿迁县东亦曰睢清口亳州涡河在州西三十八里从河南鹿邑东流至城壮与马家河合流入蒙城县界考城东汉县明属睢州今属

归德府胙城隋县明属卫辉府今省入延津铜瓦厢初名铜牙城在兰阳西北元尝置县後废刘大夏字时雍华容人陈政字以正江西新昌人】

夏四月土尔番复据哈密

【土尔番既献还哈密城马文升言番人素服蒙古非元裔镇之不可乃访求定安王沁布之族人曰善巴将册为王以主哈密沁布怒曰善巴不应嗣王爵爵应归绰尔济善巴者故忠顺王托克托近属从孙而绰尔济者沁布弟也先是哈密无主廷臣固尝属绰尔济惮哈密多事不欲立既事定又觊得爵兵部以其反覆持不许会诸番亦言善巴可立遂嗣封忠顺王而以阿穆呼朗为都督僉事辅之时五年春二月也已而诸番索善巴犒赏不得皆怒寻阿穆呼朗又引默克埒人掠土尔番牛马阿哈玛特怒潜兵夜袭哈密围之三日诸番莫肯扞御沁布以立非己意亦不救纳默克埒卫拉特二部兵来援俱败去乃执善巴禽阿穆呼朗支解之伊兰复据守事闻邱濬谓马文升曰西陲事重烦公一行文升曰西域人嗜利自古未能为中国患者徐当靖之濬复以为言文升请行廷臣僉言北寇方强本兵不当远出乃命兵部侍郎张海都督同知缙谦往经畧二人庸才但遣土尔番人归谕其主令还侵地身驻甘州待之明年阿哈玛特遣使叩关求贡诡言愿还善巴及哈密廷议以番人谲诈欲弃善巴已闲关不通贡海等闻之大喜遽逐土尔番使者封嘉峪关而还言官劾其罪并下吏贬秩】质实【张海字文渊德州人 沁布旧作千奔善巴旧作陕巴绰尔济旧作绰尔加今并改】

发明【土尔番复据哈密已睨然有轻中国之心海等奉命经畧惟当厚集赤斤罕东诸部兵深入决胜袭斩伊兰庶可震慑番人俾不敢复萌窥伺何竟一筹罔展坐待甘州及闻敕书将弃善巴乃遂闭关逐使拜疏还朝孝宗仅予降秩以示措置乖方之谴固为轶罚然与其治之事後何如慎之事前使当日不为廷臣所惑决意用马文升以任斯役亦何至若海等之所为哉】

闰五月免应天苏松田租

【蠲租一百八十余万石水灾故也是年以灾蠲者浔阳诸卫屯粮六万四千余石顺天州县夏税万五千余石及河间保定山西太原诸府平阳诸县夏税河南开封诸府夏税之半祥符诸县秋粮而苏松与山东仍皆饥从应天巡抚倡锺请留苏松常湖四府漕粮三十万石畧锺分振山东巡抚王霁先後请发帑金五十余万米二百余万石选廉能吏验口给之活饥民二百六十余万】质实【倡锺字大器郢城人王霁字景明上海人】

罢吏部尚书王恕

【邱濬与恕不相能恕考察天下庶官奏罢二千人濬请未及三载者复任贪暴非显著及素行不谨在陞任前者勿斥留九十余人恕屡争不能得因力求罢不许太医判刘文泰者求迁官为恕阻衔之文泰故往来濬家知濬忤恕因讪恕变乱选法且言恕居里时属人作传镂版行之历数先帝之失无人臣礼恕知文泰受旨于濬乃奏辨乞赐廷鞫于是下文泰锦衣卫

讯状词果连濬濬亦疏辨帝心不悦怒乃贬文泰御医责怒沽名令焚所镂版置濬不问怒连章辞去听其驰驿归恕敷历中外五十余年天下称名臣必首推恕濬顾尼之由是衆论大不直濬】

六月大旱蝗

【飞蝗过京师自东南而西北日为掩者三日户部请遣顺天府丞毕亨行县督捕其直隶府卫及各布政司并令正佐官行视从之】质实【毕亨山东新城人】

总督两广右都御史闵珪击破古田叛獐

【初古田獐种甚繁最强者曰韦曰白曰闭既而皆并于韦贼首韦朝威据古田县官窰会城遣典史入县抚谕烹食之前年春副总兵马俊参议马铉自临桂进讨遇伏败死诏夺闵珪等俸及是珪与总兵官毛銳复进兵连破七寨他贼百余寨皆就抚獐患渐戢于是南京户部员外郎周琦上讨獐三策谓桂林之古田柳州之马平山势绵亘复径冈连大军北进则贼南走西进则贼东走师甫退则贼盘据如故以是屡发兵讨迄不能创贼所当厚集兵力环四面銳攻遏其奔窜之路以覆其巢抚定残獐召还逋名编户给田薄租赐复或析村附邻县或因俗置土官三年安堵然後班师此为计长久之策如不能然仍止调附近官军与土兵进剿则师期不可不早往者讨獐之师大抵秋徵冬集春初入山雨水即多瘴疠将发势不能久驻若于六月调发霜降进攻不致迫于撤兵则深阻可穷而功乃克集且獐之贼叛虽常数十洞蝟起而倡乱特一二凶渠郡县既闻窃发四五百里稟命制府议抚议剿辄淹旬时贼得以其间连结诸獐势乃益炽若责成分镇军官乘其蠢动即率所部偕郡县吏以时扑威则可不徵师不糜饷而事济此二者亦创贼之策也骑马平人生长诸獐出没之地知其情势故所陈策颇得贼要领廷议皆是之下两广守臣议行而古田寻告捷守臣幸纾患目前遂置琦策不用】质实【古田唐置古县明初置古田属桂林府後没于獐隆庆四年开复五年改置永宁州仍属桂林府今因之马铉永新人毛銳西海人?羌伯忠之孙】

秋七月罢刑部尚书彭韶

【韶涖任三年昌言正色与王恕何乔新称三大老时内官王明苗通高永杀人减戍昌国公张峦建坟踰制役军至数万畿内民冒充陵庙户及勇士旗校辄免徭役致见户不支流亡日衆韶抗章极论皆格不行而贵戚近习深疾之韶连疏乞休竟致仕去明年南京地震御史宗?等言韶乔新诸臣宜召用不报又明年韶卒谥惠安】质实【张峦封壽宁候赠昌国公宗彝随州人】

八月京师大雨雹

【是月辛未雨雹大如弹丸平地壅积礼部尚书倪岳疏弭灾急务劝帝勤圣学开言路止无功之赏停不急之役黜奸贪进忠直帝嘉纳之先是四方所报灾异礼部于岁终类奏率为

具文岳在部乃以日月先後彙分条析未复援证经史为帝垦切言之】

九月荆王见瀟有罪赐死

【初荆王祁镐三子长见瀟次都梁王见溥樊山王见潞见瀟与见溥同母怨母之昵见溥也媼母夺其衣食竟死出柩于窆召见溥入後园箠杀之遇淫其妃何氏从弟见潭都昌王妻茆氏美求通焉见潭母马氏防之严见瀟髡马氏鞭之囊土压见潭死械系茆氏入宫尝集无籍子轻骑微服涉汉水掠人妻女见潞惧其及也密闻于朝召至京帝御文华门命廷臣会鞫见瀟引?废庶人媼西内盖前年冬十二月也寻见瀟从西内摺奏见潞罪诬其兴楚府永安王谋不轨帝遣使往按问不实见潞更奏见瀟尝私造弓弩与子佑柄有异谋验之实赐见瀟死废佑柄而以见溥子佑櫚嗣为荆王】质实【明史诸王表祁镐荆宪王瞻?子都梁悼惠王见溥成化二年封樊山温懿王见潞成化三年封见潭都昌惠靖王祁监庶长子成化十六年封楚府永安王盖靖安王荣澹也荣澹为孟炯曾孙成化八年袭封正德十五年卒孟炯楚昭王第二子建文元年始封永安】

冬十二月南京大雷雨

【拔孝陵树明年六月癸亥七月庚寅并如之】

【甲寅】七年春三月诏羣臣言阙失

【以六年冬孝陵风雨之变也寻从给事中马子听御史刘琬言命内外慎刑狱决轻系】质实【马子听广平人刘琬宜春人】

三月巡抚贵州都御史邓廷瓚讨平都匀苗

【都匀苗也富架长脚等作乱恣掠清平诸卫前二年冬命廷瓚偕湖广总兵官顾溥贵州总兵王通讨之廷瓚以副使吴倬善计画引赞军事倬遣熟苗诈降富架诱入寇伏兵擒之乘势深入连破百余寨生擒长脚以归羣苗震懾廷瓚言都匀清平旧设二卫九长官司以土人世官自用其法恣虐激变苗民乱四十余年今元凶就除非大更张不可请改为府县设流官与土官兼治庶可久安于是设府一曰都匀州二曰楣山麻哈县一曰清平苗患自此渐息】质实【九长官司曰都匀废司在都匀府西南元地理志所谓上都匀也曰平浪曰邦水曰平州陆洞曰九名九姓曰丰宁曰乐平曰平定曰陈蒙烂土麻哈州元玃猺寨长官司属新添葛蛮安抚司明洪武五年改置麻哈长官司隶平越卫至是升州属都匀府今因之清平县与清卫城同治属都匀府本朝康熙七年省县入麻哈州十一年复置县以卫省入仍属都匀府邓廷瓚字宗器巴陵人吴倬字克大淳安人】

命两畿捕蝗

【民捕蝗一斗给米倍之】

夏六月康济河成

【初曰昂治开封决河既讫工遂自山东循运河而南抵扬州议所濬治时御史孙珩郎中吴瑞方董南河事皆谓高邮州运河九十里自州西北三里入新开河道于湖者五十里湖东南北为堤洪武中障以椿正统中固以石屡决而复修其西北则与武安张良七里珍珠璧社诸湖相灌注萦回数百里每风涛作扶舟触堤石辄坏多覆溺者当于湖东开复河以避其险昂是之上其议遂召工开凿起杭家嘴历清水潭抵丁志港长竟四十里两岸壅土为堤堤首尾置牐与湖通堤之东又置牐四涵洞一工竣赐名康济河会刘大夏治张秋河亦成于是漕河上下无大患者二十余年】质实【康济河在高邮州西北新开河东南俱通运河长濶各五十里天长以东之水皆滙此而入淮武安湖在高邮州西南五十里张良河在州北二十里七里湖在张良湖南三里珍珠湖在州西七十里璧社湖在州西二十里清水潭在州北三十里丁志港在清水潭北十里列卿记杭家嘴在高邮州北二里孙珩徐州人吴瑞崑山人】

秋七月京师地震

【月之十九日乙巳也九月戊寅夜南京地震十一月壬子京师地复震】

命工部左侍郎徐贯经理苏湖水利

【时三吴水道堙塞给事中叶绅巡按御史刘廷瓚乞遣官濬治乃命贯往偕巡抚何监理之贯上言东南财赋所出而水患为多永乐初命夏原吉濬治时以吴松江灇沙浮荡未克施工逮今九十余年港浦愈塞矣臣相度地势疏吴江长桥导太湖散入淀山阳城昆承等湖又开大石赵屯等浦泄淀山湖水由吴松江入海开白鱼洪鮎鱼口等处泄昆承湖水由白茅港入江开斜堰七浦塩铁等塘泄阳城湖水由七了港入海下流既通于是开湖州之漚泾泄天目安吉诸山水自西南入太湖开常州之百渎泄溧阳镇江练湖之水自西北入太湖又开诸斗门以泄运河河之水由江阴入大江上流亦通东南水患少衰初贯奉命奏以主事祝萃自随明年四月事竣凡修濬河泾港渎湖塘平门岸百三十五所役夫二十余万萃之功居多然是时进于成功疏白茅未深广十数年後遂复壅塞】质实【阳城湖在长洲东北受吴松江之水东接崑山县界昆承湖在常熟县东南五里大石浦在崑山县东南三十里赵屯浦在青浦县西淀山湖之北南受湖水泻于松江濶五十丈通江五大浦之一也鮎鱼口在吴江县北十八里自太湖分流出此斜堰在崑山县西北三十四里与常熟分境七浦在崑山县西北三十里一名七浦塘塩铁塘在常熟县东北五十里在嘉定县西十五里七了港一名七鸦浦太仓州北三十六里又东三十余里曰七鸦浦入于海漚泾在岛程县西南郡有七十二漚在乌程者三十八在长兴者三十四导苕霅之流注于太湖旧时皆有坝堰节宣所资後多堙废天目山在孝丰县西南六十里杭湖诸山其脉皆本于天目安吉东汉析鄞县地置唐麟德元年移治于旧县东北三十里明正德二年升州属湖州府今仍降县百渎在直兴县西南七十五里者为上渎县北六十里者为下渎昔以荆溪居数郡下流于太湖口疏百派以分其势人开

横塘袤四十里以贯之导荆溪下太湖频湖畎浍皆通焉後渐废溧阳唐分溧水县地置元升州洪武初复为县属应天府今属镇江府练湖在丹阳县城北一名链塘又号曲阿後湖江阴梁太平三年置县元升路後降州明洪武初仍改为县属常州府今因之徐贯字源一淳安人叶绅字廷搢吴江人刘廷瓚光州人何监世光浙江新昌人祝萃字维贞海寧人】

八月以李东阳为礼部右侍郎兼翰林侍读学士典诰勅

【东阳素绩学为文典雅流丽甚负时名预修宪宗实錄及成由左庶子兼侍读学士进太常少卿至是阁臣徐溥等以诏勅繁请如先朝王直故事设官专领乃推东阳入阁典之】质实【明宪宗实錄二百九十三卷刘吉等奉勅修成于四年八月吉徐溥刘健为总裁邱濬汪谐副之监修者张懋也李东阳字宾之茶陵人以戌籍居京师】

冬十月立金民壮法

【初正统景泰间尝募民壮愿自効者然未立金法至是从给事中孙儒言乃令州县七八百里以上里金二人五百里三人三百里四人百里以下五人俱于丁衆粮多之家选年力强以充有司以时训练遇警调发给粮以行而禁役占贿纵之弊富民不愿者则上直于官官自为募】质实【孙儒凤阳人】

免北京河南湖广陕西山西被灾税粮

【乙卯】八年春正月鞑靼寇凉州甘肃总兵官刘宁击走之【时鞑靼北部伊毕喇伊木王等入套驻牧小王子及陀罗海之子和硕居贺兰山後与之相倚势日强及是月壬子入犯凉川宁与战擒斩五十余相持至暮收辎重南行寇复来袭擒其长一人明日参将颜玉来援副将陶贞兵亦至寇乃遁俘其稚弱马驼牛羊二千论功进右都督然寇寻犯宣府三入辽东明年犯宣大巡綏三边皆震动鞑靼自元年通贡後出没套中数扰边边将率婴城怯战间有俘获即以捷闻未能一挫衄之由是恣抄掠无忌帝常念军民苦寇特敕镇巡官振恤给牛种顾御边将寬不以玩寇罪也】质实【伊毕喇伊木旧作亦卜刺因和硕旧作大筛今并改】

发明【明史称鞑靼诸部长迭出为边患与明终始此虽由鞑靼之强亦明代军政不修有以致之耳当洪武之世叛服固亦无常而戎索相维未至大为边患厥後军纪荡然擒获无几即以为功玩纵频年而不以为罪所以九边之士云屯三捷之书月奏而敌锋终未稍挫寇警日益频仍骄兵惰帅习焉成风论者谓御边将太寬所致然岂独一孝宗哉】

二月乙卯朔日有食之

武英殿大学士邱濬卒

【濬在内阁五年尝以寬大启上心忠厚变士习廉介嗜学所居邸第极湫隘四十年不易

既老右月失明犹披览不辍然议论好矫激讥范仲淹多事谓岳飞未必能恢复秦桧有造功闻者无不骇其言性褊隘与刘健议不合至投冠于地言官建白不当意辄面折之与王恕不相得至不交一言卒令所私刘文泰讦之去及是卒赠太傅谥文庄文奉往吊濬妻叱出之曰以若故使相公王公贡不义名何吊为】

以礼部右侍郎兼翰林侍读学士李东阳少詹事兼翰林侍讲学士谢迁入内阁预机务

【迁方居忧力辞服除始拜命晋詹事时徐溥为首揆刘健班在二东阳迁继入阁协心辅政事有不可辄共争之已而溥致仕去凡论言批答裁决机宜悉健与东阳迁三人天下翕然称贤相为之语曰李公谋刘公断谢公尤侃侃】

夏四月下山东副使杨茂元于锦衣卫狱

【初命刘大夏治张秋决河已复遣中官李兴平江伯陈锐往协治之兴威虐絜辱按察使且多索供亿茂元代摄司事上言治河之役官多而贵不专有司供亿日糜百金诸臣初祭河天色阴晦帛不能燃所焚之余宛然人面具耳目口鼻观者骇异鬼神示怪夫岂偶然乞召还兴锐二人专委大夏功必可成且言山东既有内臣镇守复命李全镇临清徒滋民扰亦宜撤还疏入下山东抚按官勘奏言焚帛之异诚有之所奏供亿多过其实而兴锐连章劾茂元妖言诏遣锦衣百户胡节逮之茂元莅官有惠政父老遮道愬节乞还杨副使既下锦衣狱节遍叩中官备述父老愬冤状中官多感动会言官交论救部议赎杖还职特谪长沙同知】质实【杨茂元字志仁鄞人吏部右侍郎守陈之子】

发明【刘大夏奉命治河其所陈修濬之策皆可施行其才足以胜任而愉快而必遣中官李兴董其事是视李兴过于大夏也杨茂元第下按抚核勘兴核茂元而即遣锦衣往逮是信茂元不若信兴之笃也孝宗初政可观独于倚任中官之弊犹踵武英宪然则焚帛所余之异不足为国家之祲而偏听璫豎之私乃真足以召阴阳之怪也欤】

振应天浙江饥

【时应天之苏松等府浙江之嘉湖等府并以灾告因命工部侍郎徐贯协同都御史何监振之凡给谷水五十六万三十余石帑金三千九百五十余两所活饥民百二十万有奇寻人特蠲南畿被灾秋粮是年北直隶及湖广被灾税粮亦皆优免】

五月定国子监生分拨历事期

【初洪武中国子监设六堂以课诸生行积分法岁内积八分者为及格与出身不及者仍坐堂肄业又令诸生于各司分习吏事谓之历事又谓之拨历其期以入监者年月为先役送吏部选用具超异者奏请上裁多擢显官具常调者为府州县六品以下官已而进士日重监生日轻虽积历事不改初法而监生析多淹滞拨历或致十余年之久景奉以后乃频减拨历

岁月以疏通每岁拣选优者辄与之拨历坐监有未及一年者及是监生在监者少而吏部听送至万余人又不得官礼部尚书倪岳乃定议监生诸司历事一年旧例必日月满後方许分拨由是诸生在监稍久而选人亦不壅塞时林瀚为祭酒以监生不敷拨历请增贡额岳亦议行之翰典国学垂十年饌银岁以百数计悉贮之宫以次营立署舍师儒免僦居自瀚始】质实【积分之法司业二员分为左右各提调三堂凡通四书未通经者居正义崇志广业一年半以上文理条畅者升修道诚心又一年半经史兼通文理俱优乃升率性升至率性乃积分其法孟月试木经义一道仲月试论一道诏诰表内科一道季月试经史策一道仲月试论一道文理俱优者与一分理优文劣者与半分纰缪者无分凡监生历事吏部四十一名户部五十三名礼部十三名大理寺二十八名通政司五名行人司四名五军都督府五十名谓之正历三月上选满日增减不定又有诸司写本户部十名礼部十八名兵部二十名刑部十四名工部八名都察院十四名大理寺通政司俱四名随御史出巡四十二名谓杂历一年满改上选林瀚字亨大闽人王世贞盛事述云林文安瀚子廷机孙爌俱为国子祭酒三代大司成近世所罕也】

秋七月以宋儒杨时从祀孔子庙廷

【正统中训导王昌顺请以时入祀孔庙下礼部议未及行至是特命从祀追封将乐伯位司马光之次】质实【按明史礼志孔子庙从祀先儒为左邱明公羊高谷梁赤伏胜高堂生孔安国毛萇董仲舒后苍社子春王通韩愈胡瑗周敦颐欧阳修邵雍张载司马光程颐杨时胡安国朱熹张栻陆九渊吕祖谦蔡沉真德秀许卫二十九人乃嘉靖以後更定之制弘治中荀况戴圣刘向贾逵马融何休王肃王弼杜预吴澄十人未罢祀卢植郑众郑元服范甯五人未改祀于其鄉后苍王通胡瑗欧阳修陆九渊五人未从祀于是从祀先儒凡三十八人自杨时入祀为三十九人孝宗实录言时位列司马光之次而志述先儒位次为程颐颐之次为时盖分列两庑则时位次光而统左右庑序之则时又居颐之次也】

广西参将欧磐击破平乐叛獠

【漓江入平乐府境夹江南岸皆高山盘东辽遶七八百余里谓之府江诸獠之所巢也由府江而西南百六十里曰永安州故为立山鄉自成化中獠贼李公主降始建州而州西茶山力山诸獠凭险阻与府江贼相声援于是并起为乱总督闵珪调兵六万分四哨往讨磐自象州修仁直捣六峒所向摧克遂偕诸军连破山砦百八十六斩首六千有奇磐以功进都指挥使迁副总兵】质实【平乐三国吴置平乐县唐武德四年于县置乐州贞观八年改昭州天宝初曰平乐郡元大德中改府明及今因之漓江源出兴安县海阳山流二百里至桂林府东北复绕流而南行至漓山北麓阳江流入焉又南合相思江入平乐府界一名府江亦名桂江茶山在永安州西四十里力山在州西南三十里六峒永安州之古造六峒与修仁山泽相连至为险阻毆磐滁人】

八月马湖土知府安鳌有罪伏诛改设流官知府【鳌性残虐计口歛民财岁以银万计纵淫所部土妇用妖僧百足魔魅杀人怒其族长官王大庆不阿已遣人杀之大庆闻而逃乃杀

其弟横恣且二十年有司利鰲贿置不问及是金事曲銳请巡按御史张鸾按治按察使洪钟赞决之捕鰲送京师寘极刑马湖自汉时为牂柯郡地寻没于蛮唐设羈縻州四统名马湖部时安民已租税其地为所私据者盖数百年至是始设流官云】质实【马湖元路置土官总管府洪武四年改府仍命安氏世袭知府今省府地入屏山县方輿纪要府西有废浪川州废驷州废骋州府南有废瀉州唐所置羈縻州也曲銳莱阳人张鸾字应祥陕西咸宁人】

冬十二月复哈密

【土尔番既袭执善巴令伊兰据守哈密僭称汗侵沙州迫罕东诸部附已马文升曰此寇桀骜不大创终不知畏宜用汉陈汤故事袭斩之以指挥杨翥熟番情召询方畧翥备陈哈密可取状文升请于帝敕发罕东赤斤苦峪兵令副总兵彭清将之隶巡抚许进往讨进厚结土尔番世讐什噶图使以四千骑先往杀数百人什噶图中流矢卒其子布拉噶岱愤欲报父仇进复厚结之使断贼道无东援伊兰而重犒赤斤罕东及哈密遗种居苦峪者令出兵助讨于是清以精銳千五百出嘉峪关前行进与总兵刘宁中官陆闇统兵分数道继之至伊济穆尔川毕会薄暮大风扬沙军士寒凛僵卧马下进出帐外劳军有异鸟悲鸣将士多泣下沾衣进慷慨曰男儿报国死沙场幸耳何泣为将士皆感奋夜半风止大雨雪时番兵集惟罕东兵未至衆欲待之进曰潜师远袭利在捷速兵已足用无待也冒雷倍道进奄至哈密城下伊兰已遁去拔其城俘馘八百讯之则皆哈密人为伊兰所刼者寧附进耳曰斩此八百人可侯矣进不可抚定之探伊兰所向分守要害疏请怀辑罕东诸卫散土尔番党与以孤其势遂班师是役也文升授方畧拟从罕东至哈密阾道调罕东兵三千为前锋持数日粮兼程进而罕东兵失期进仍由故道伊兰觉之遂逸去斩获无几然番人素轻中国谓不能涉其地至是始知其邻部以□关不得贡胥怨之阿哈玛特亦悔後二年欵关求贡以善巴来归仍命为忠顺王镇哈密】质实【哈密行程行都司志嘉峪关外有三道中道自关西二十里至大草滩滩西三十里至黑山儿七十里至回回墓墓西四十里至扇马城中有二水北流城西八十里至赤斤城城西二百里至苦峪城东有河苦峪西一百二十里至王子庄庄西八十里至布隆吉河俗名川边河西一百五十里至莽赉泉有水草泉西一百八十里至茨泉有水草泉西一百五十里至那南那只令西一百里至红柳泉有水草泉西一百二十里至哈喇郭勒无水草哈喇郭勒八十里至五?井泉口井西一百二十里至古墩子西一百里至雅克特穆尔泉口西八十里至哈密城一道由苦峪南岐而少西经瓜州西阿丹六百二十里抵沙州即汉东左卫有水草逾布格寺七百里至哈密地虽坦而迂曲且无水草人罕由之一道自苦峪岐而少北至伊济穆尔经阿赤等地皆山口石路甚为险厄丐必脚輶难行三道俱达哈密按此乃明时通哈密旧道也 本朝雍正二年建安西镇于布隆吉五年改筑镇城于都尔伯勒津哈密络联其抵哈密之路又分为两道一由安西镇一由沙州由沙州者自州城东北库克舒至峡口七十三里又二十五里至博罗川井六十五里至博罗托欢三十里至锁锁林二十五里至芦杆泉七十九里至苦水百三十里至哈什布拉克八十里至哈密水尾三十五里至哈密城共六日程并汲新井有泉水惟芦杆至哈什布拉克一程乏水必驮水行彭清字源洁榆林人 什噶图旧作小秃列布拉噶岱旧作卜六阿歹伊济穆尔川旧作羽集也川莽赉旧作莽来哈喇郭勒旧作哈喇骨布格旧作鉢和都尔伯勒津旧作杜尔伯津库克萨克苏旧作库库沙克舒博罗川井旧作博罗川井博罗托欢旧作博罗肯哈什布拉克旧作哈什布喇今并改】

发明【考马文升曾授方畧于彭清令取捷经调番兵袭斩伊兰意欲假道罕东为导耳许进既会师于伊济穆尔川矣而罕东失期不至自不可以坐待师贵神速若潜兵远袭而塞上逍遥徒足启敌人窥伺之隙进冒雪倍道而成功可谓知所权变者至不杀被俘之哈密八百人以冒功邀赏尤为人所难能胡世宁跋进所撰平番始末称其结请戎为智深入决胜为勇不杀脇从为仁虽榆杨或有溢词然其善相机宜以视张海彭泽相去不可以道里许之矣】

命内阁大学士撰三清乐章既而寝之

【帝颇崇信斋醮因有是命大学士徐溥等言天至尊无对汉祀五帝儒者犹非之况三清乃道家妄说耳一天之上安得有三大帝且以周柱下史李耳当其一列人鬼于天神矫诬甚矣郊社乐章皆太祖所亲制今使制为时俗词曲以享神明褻瀆尤甚臣等于邪说俚曲素所不习不敢以非道事陛下近日常筵早休日讲久曠异端乘间而入此皆臣等无状不足以启圣心保初政忧愧之至无以自容奏入帝嘉纳之遂寝前命】

发明【此即嘉靖时所谓青词也徐溥等正言执奏力折矫诬其视顾鼎臣袁炜之徒以赞元修取容悦者相去远矣孝宗即位之初诛李孜省窜邓常恩赵玉芝异端方士斥逐一空乃至是复信道家之说崇祀三清岂遽忘孜省前事邪犹幸从諫转圜遂寝乐章之命可谓善补过矣而中官李广顾仍以烧炼斋醮得幸何哉】

【丙辰】九年夏四月以周经为户部尚书

【经初为吏部侍郎佐尚书王恕秉铨以公正称通政司经历沈禄者壽宁侯张峦妹婿也恕在告中官传旨擢禄本司参议经言非面承旨又无御批不敢奉命复与恕争之事虽不能止时论譴焉灵壽奸民献地于中官李广户部持不得经倡九卿疏争卒罪献地者至是代裴淇为户部尚书时帝寬仁而户部尤奸蠹所萃挟势行私者不得胜纪少不如意谗毁随之经悉按祖宗成宪无所顾四方告灾必奏请蠲除寬逋缓征裁节冗滥雍王佑檄乞衡州税课司及衡阳县河泊所税供王府用给事中鲁昂请尽括税役金钱输太仓经言不可帝嘉纳之织造中官请增给两浙盐课引二万经以盐筴佐边不宜滥给先以裁仓塲监督中官复增用少监莫英等三人经谓其徒滋侵扰不可遣壽宁侯张鹤龄家人夺民田毆民至死且请加徵庄田租经上疏劾论皆不听然经遇事辄諫虽言不尽用终不肯少依阿宦官贵戚咸憚而疾之】质实【灵壽汉县明属真定府今属正定府衡阳三国吴临烝县唐徙衡阳县治于此明为衡州府治今因之鲁昂吴江人】

下给事中龐泮御史刘绅等六十二人于锦衣卫狱寻释之

【御史刘逊既与同官姜绂劾中官蒋琮得罪谪泮州判官寻迁武冈知州岷王不检下逊裁抑之王怒王支岁禄逊不以期给遂讎于朝帝遣锦衣官校逮逊于是泮绅等偕同官上言锦衣天子亲军非重事不宜轻遣逊坐给禄愆期而王奏牵左证百人势难尽逮请敕抚按官勘报帝以亲王劾一州官辄交章奏陛下泮绅等六十二人于锦衣卫狱六科署空吏部尚书

屠瀟请命尚宝司及中书代收部院封事侍读学士杨守祉贻书极诋瀟失寻瀟与府部诸臣申救泮等得释贬四川行都司断事而守祉书颇传于世瀟甚憾之】质实【岷王盖庄王梗曾孙简王膺钰也按明史诸王传庄王初封岷州寻改云南洪熙元年徙武冈州三传至简王于成化十六年当袭封居丧饮博无度承奉刘忠制禁之遂杀忠验实革冠带停封居四年乃嗣龐泮字元化天台人刘绅掖县人杨守祉字维立鄞人】

发明【刘逊以岷王不检下思欲裁抑之本未可厚非即岁禄不以期给其失亦细乃遽遣锦衣伴绅等即率同官交章奏阻明代言官意气相矜遇事辄合词争论大率类此实为恶习孝宗欲矫其弊而创惩之意非不善第以细故逮六十二人同时下狱科署为之一空抑复成何政体耶】

六月诏举将才

【初宣德间定举将才之制令天下都司岁选一人资遣至京都督府甄别録用自天顺末立武举法材勇多由科目进後虽特诏举用将才罕有应者至是马文升请广选举令府部台省诸人别其材所堪者以闻仍会官考校如武举制帝然其言乃有是诏已而给事中蔚春又请敕天下郡县访有山林之士材堪将帅者以礼聘之或擢总兵营或命专大镇逮有成功赏及举者帝亦从之然卒无以应诏也蔚春合肥人】

免江西被灾税粮

【时江西南昌等九府三十四县并以灾告乃命免税粮五十万八千余石是年顺天及河南湖广被灾税粮并令有司察核蠲之】

冬十二月刑部吏徐珪请革东廠黜为为民

【帝改元之岁员外郎张伦请革东廠不报时司廠中官罗祥杨鹏称敛戢无敢横然已不胜弊满仓儿之狱法司承鹏指问拟罪失平珪愤因抗疏论之满仓儿者千户吴能女也先是能以女付媒者鬻于乐妇张给曰此庆云侯家後转鬻乐工袁璘所能歿妻聂访得之女怨母鬻已诡言非已母聂与子刼女归璘讼于刑部郎中丁哲员外郎王爵讯得情璘语不逊哲答璘璘归数日而死御史陈玉主事孔琦验瘞之鹏从子尝与女淫教璘妻欣冤于?而令张指女为妹引前媒者证聂女固鬻于侯家此非是奏下镇抚司坐哲爵等罪复下法司锦衣卫讞索女庆云侯周彧家无有复命府部大臣及给事中御史廷讯张与女始吐实法司坐哲因公杖人死当徒爵王琦及聂母当杖而科女罪与母同珪言聂女之狱哲断之审矣鹏拷聂使诬服镇抚司共相蔽欺陛下令法司锦衣卫问惧东廠莫敢明至鞫之朝堂乃不能隐夫女诬母仅拟杖哲反坐徒轻重倒置如此皆东廠威劫所致也臣在刑部三年见鞫问盗贼多东廠镇抚司缉获或校尉挟私诬陷或为人报讐或受首恶赃令傍人抵罪刑官洞见其情无敢擅更一字以致枉杀多人臣愿陛下革去东廠以絶祸源则太平可致臣一介微躯左右前後皆东廠镇抚司之人祸必不免顾与其死于此辈孰若死于朝廷陛下斩臣首行臣言虽死无恨帝以

其狂诞发原籍为民哲等亦放归观政进士孙磐上疏曰近者言官劾人率乘势败而排触奸幸反出胥吏议者羞之请定建言为四等最上弹劾权贵其次补拾阙遗又其次建白时政有裨国家皆分别擢叙粉饰文具循默不言者黜之时不能用後珪以荐仕为丞历通判论平盗功擢知州】质实【徐珪应城人丁哲岷县人王爵安福人陈玉辉县人孔琦长安人孙磐辽阳人】

御定资治通监纲目三编卷十六

卷十七

<史部,编年类,御定资治通监纲目三编>

钦定四库全书

御定资治通监纲目三编卷十七

【起丁巳明孝宗弘治十年尽乙丑明孝宗弘治十八年】凡九年

【丁巳】十年春三月诏求直言

【以旱霾修省也于是主事胡燿上言中官李广杨鹏列左道刘良辅辈惑乱圣听滥设斋樵札蠹国储不肖士大夫方昏暮乞怜于其门交通请托阴盛阳徵灾何由弭因极论方壬仲官相结传奉冗员之害疏入留中不报时祠祭郎中王云凤给事中叶绅御史张缙等皆应诏陈时事大旨如燿言绅历数广罪更书广假果户为名侵夺畿民地几至激变四方翰纳上供威取势逼致民破产内而皇亲驸马事之如父外而总兵镇守呼之为公疏凡数百言斥广为肘腋大奸而云凤请斩广首以弭灾变其言甚激广衔云凤刺骨令校尉日伺其出入欲中伤之不得会帝以祠祀省牲还云凤骑马从銮舆後遂劾下锦衣狱谪知陕州当成化时宦官用事帝即位虽间有罢黜而势积重不能骤返忤之者必结党排陷不胜不止前後庶僚以忤璫被陷者户部员外郎周时从请寘先朝遗奸汪直钱能辈于重典察核两京及四方镇守中官诸宦官摘其奏中宗社字不越格命法司逮治理刑知县王岳为中使李彪所窘辱御史任仪不平上其事并仪下吏御史车梁条列时政言东厂所获盗先以严刑具成案然後送法司法司不敢平反请自今径送法司毋先刑讯主东厂者言梁从父郎中霆先以罪为东厂所发挟私妄言遂下锦衣狱主事盛应期范璋董□河中官采荐时新物者怒其辟除民舟不力劾应期璋阻挠内使刘雄道仪真以知县徐淮厨传不饬愬之南京守备中官以闻皆械系至京下狱赖诸所排陷者帝亦旋悟其过廷臣申救即宽之仅子簿遣不深罪也方燿等应直言诏劾广衆忧其必为广陷而广怒云凤甚尊意倾之燿等竟得免】质实【胡燿字仲光芜湖人王云凤字应韶和顺人张绅华亭人周时从史不详其乡邑王岳灵璧人任仪闽县人车梁车霆并山西永宁人盛应期字斯微吴江人范璋余姚人徐淮武城人】发明【史称孝宗恭俭有制勤政爱民在明代诸帝中当与仁宣媲美其时阉寺之横恣亦未若英宪两朝之甚所宠任特着者惟李广而已广既为胡燿所劾云凤等复相继交章则立正广罪以符修省应天之实斯可矣乃置若罔闻以致广辈转得阴伺其隙逮下锦衣然则所谓求直言者何所取耶】

召大臣议政文华殿

【先是大学士徐溥上言旧制内殿日 进奏事重者不时上闻又帝面召儒臣咨访政事今奏事日止一次朝参之外不得一望天颜章奏批答不时断决或稽留数月或竟不施行事多壅滞有妨政体且闻有以齎醺修链之说进者宋徽宗崇道教科仪符籙最盛卒至乘舆播

迁金石之药性多酷烈唐宪宗信柳泌以殒身其祸可鉴陛下若明正道行仁政福祥善庆不召自至何假祿?之说今虽太平无事然忧先于事可以无忧事至而忧无益于事愿陛下三复唐臣李绹之言帝纳之及是御经筵毕遂召溥及刘健李东阳谢迁于文华殿授以诸司题奏曰与卿辈议溥等拟上帝应手改定事端多者健请出外详閱帝曰盍就此面议既毕赐茶而退帝即位以来宣召顾问自此始】

夏五月小王子寇潮河川指挥刘钦等战死

【指挥王玉偕钦等出御敌佯走追之遇伏败绩钦等二十七人战死玉仅以身免寻复纵兵犯大同连营二十里巡抚刘瓛等惟报寇警而已时寇数入边无虚岁京师民讹言震惊兵部请榜谕给事中屈伸曰若傍示人心愈惊汉建始中都人讹言太水至议今吏民上城避之王商不从顺之果定今当以为法事遂寝明年洪钟抚顺天以潮河川去京师二百里居两山间广百余大水涨成巨浸水退则坦然平陆因言古北口东三里许其山外高内库约余二丈可凿为两渠分杀水势而于口外斜筑石堰以东水置关堰内守以百人使寇不得驰突可免京师北顾之忧且得屯种河壩地兵部尚书马文升等请从之比兴工凿山山石崩压死者数百人言者请罢役不聽未几工成侍郎张逵往视还言石洞仅泄小水地近边垣多沙石不利耕种屈伸因劾钟欺妄罪诸言官及兵部皆请逮钟帝以钟为国缮边不当罪停俸三月】质实【方輿纪要湖河川在密云县东南自古北口流入县界西南至顺义县合于白河按今湖河水自密云县东南即入白河水流湍悍其声如潮刘瓛安福人屈伸字引之任邱人张逵字时逵泰和人】

六月命户部侍郎刘大夏督理宣大饷

【大夏将行尚书周经谓曰塞上势家子以市采为私利公母以刚贾祸大夏曰处天下事以理不以势俟至彼图之初塞上采买必粟千石刍万束乃得告纳以故中官武臣得操利权大夏令有刍粟者自百束十石以上皆许势家无所牟利不两月储积充羨先是李敏巡抚大同见北方诸省转饷至者道远耗费及为户部尚书会计岁支奏令粮一石徵银一两输边民乐轻齎一时称便然军储由此全资市采始则利归势家後乃空乏时告云】

秋九月振山东水灾

【时济兗青登莱五府大水命有司振之十一月振四川水灾是年免南畿山西陕西被灾税粮】

冬十月起王越总制三边军务

【帝即位初越自安陆赦还屡疏讼冤下廷议列上其功罪诏复左都御史致仕时越年已七十矣复结中官李广以中旨召掌都察院事言官交章论奏乃寝及是鞅鞫诸部屡犯边辽东宣大延绥甘肃俱被蹂躪廷议复设总制官先後会举七人不称旨吏部尚书屠滹以越名

上诏起原官总制甘凉军务越言甘镇兵弱非藉延寧两镇兵难以克敌请兼镇两镇从之】

简閱禁兵

【马文升疏言历代兵制不使权归一人汉制有南北军南军守王宫主禁卫北军护京师聽征讨各有所掌而南军尤托以心腹我太祖法古置十六卫亲军指挥使司不隶五府为禁兵即古之南军也其他卫属五府以备征讨即古之北军也永乐中增设十二卫又选精壮数千人属御马监更番上直近年禁兵废弛请敕大臣拣选操链令更番直各门官为铃束出入从之】质实【洪武亲军十六卫按明史职官志上直卫亲军指挥使司二十有六曰锦衣卫旗手卫金吾前卫金吾後卫羽林左卫羽林右卫府军卫府军左卫府军右卫府军前卫府军後卫虎贲左卫是为上十二卫洪武中置曰金吾左卫金吾右卫羽林前卫燕山左卫燕山右卫燕山前卫大兴左卫济阳卫济州卫通州卫是为上十卫永乐中置曰腾骧左卫腾骧右卫武骧左卫武骧右卫宣德八年置番上宿卫名亲军以护宫禁不隶五都督府据此则洪武中所置亲军不隶五府者止十二卫未尝有十六卫永乐中所增置者亦止十卫未尝有十二卫与马文升所称洪武之制颇互异焉】

【戊午】十一年春三月皇太子出阁就学

【太子生八年矣犹未出阁给事中叶绅请择讲官侍学寻有是命太子性颖慧善矜饰每聽讲容色庄谨端目若领会不数日儒臣与讲读者皆识其姓名或以故不至必顾问曰某先生今日安在而东宫宦竖不欲太子近儒臣数以事间讲读詹事吴寬上疏曰东宫讲学寒暑风两则止朔望令节则止一年不过数月一月不过数日一日不过数刻进讲之时少辍讲之日多岂容复以他事妨之古人八岁就傅即食宿于外欲令离近习亲正人庶民且然况太子天下本哉帝嘉纳焉】质实【吴寬字原博长洲人】

秋七月王越袭小王子于贺兰山破之

【小王子居山後久熟知迳路累招伊玛克等扰边越分兵三路进俱有斩获日晡收兵回别伏道傍敌来袭复追杀至柳沟获驼马牛羊器械千数自小王子频年入寇诸守臣未能有御之者是年五月甘肃参将杨翥一败之肃州境外至是越复败之柳沟边人竞以战胜贺然古北口寻报警未几又入辽东都指挥王臣死之敌势固未尝少挫也论功进越少保方条上制置哈密事宜会李广得罪死言官连章劾广党皆及越越闻忧恚卒初越举景泰二年进士廷试对策忽旋风起扬其卷去更给卷乃毕事及秋朝鲜使至言其王视朝时有卷从风中堕谨持以献视之乃越卷也帝语吏部曰此当任风宪官因授越御史不五年即擢大同巡抚院其後屡告边功晋威宁伯督兵既久健将武校多出其门赏予畧无吝惜尝一夕值大雪越故豪纵方围炉饮诸伎拥琵琶侍一小校调敌还陈敌情未竟越喜酌金卮命饮即赐之卮语毕益大喜指伎絶丽者立子之校感激所至为尽死力越胆智过人自负豪杰而比汪直得封爵既耄复结李广谋起用士大夫以其破败名检咸鄙之】质实【柳沟在平夏府平罗县西北伊玛克等旧作野也克力今改】

华盖殿大学士徐溥致仕

【溥以目眚乞休帝眷留之三疏乃许溥在内阁十二年值帝方向泊所言多听从钦天监革职监正李华为昌国公张峦择葬地中旨复官溥等言即位以来未有内降幸门一开末流安底臣不敢奉诏占城奏安南侵扰帝欲遣大臣往解溥言外国相仇有司檄谕之足矣若遣使万一抗命亏损国体问罪兴师则坐耗中国非计之得也于是罢不遣溥性凝重有度从容辅导遇大狱必委曲调剂天下阴受其福】

冬十月清宁宫灾

【太皇太后宫也以灾告天地太庙社稷山川于是大学士刘健等言近年以来灾异频仍而清宁宫之灾为尤异恐议者或谓天道茫昧变不足畏此乃慢天之说或谓天下太平患不足虑此乃误国之言或以斋醮祈祷为弭灾此乃邪妄之术适足以?天或以纵囚释罪为修德此乃姑息之弊适足以长恶向来奸佞之人每用此荧惑圣听妨蠹圣政贿赂公行赏罚失当纪纲废弛贤否混淆工役繁兴徵敛百出公私耗竭军民困惫而大小臣僚被其胁制畏罪避祸箝口结舌下情不达上泽不宣愁叹之声仰干和气灾异之积正此之由尤望特降纶音戒谕臣工痛加修省广求直言指陈弊政并加采择次第施行以收人心以回天意实宗社生民之福疏入帝嘉纳之先是有熊踰西直门兵部请严武备郎中何孟春曰宜慎火已而礼部内府军器库番经厰内官监连年灾或问孟春何以以前知曰余不晓占书宋绍兴中永嘉灾前数日有熊至城下州守高世则谓其倖曰熊于字能火郡中宜慎火後果延烧官民舍十之七八予忆此事而云然耳不意其验也】质实【清宁宫陆钱病逸漫记本太子所居之宫军器库刘若愚芜史北安门里街东曰黄瓦东门门之东街南曰尚衣监北曰司设监 东曰酒醋麵局曰内织染局其後临河有梓潼庙曰火药局即兵仗局之军器库也番经厰芜史云念习西方梵呗经凡有佛事本厰内官易番僧?衣红袍黄领黄护腰盖厰亦设于内府何孟春字子元郴州人】

太监李广有罪自杀犹赐祭

【广以符籙祷祀获宠任权倾中外劝帝建毓秀亭于万岁山亭成幼公主殇宫复灾日者谓建亭犯岁忌太皇太后悲曰今日李广明日李广果然祸及矣广惧饮药死帝疑广有异遣使即其家索之得贿籍多文武大臣名馈黄白米各百千石帝曰广食几何乃受米如许左右曰隐语耳黄者金白者银也帝怒下法司按问诸臣皆惧昏夜至壽宁候张鹤龄求解时方以宫灾求直言编修罗玘因言今日之事如癭瘤割之去易而身危消之去迟而身安窃见文武官贿广求进廉耻扫地其间有部寺之尊将帅之寄天下四夷方以为丙魏姚宋方召卫霍今一旦暴白恐生慢易虽实有方召丙魏之徒亦不复信此大可忧也如遂已之廉耻愈衰乞密谕贿广者引退或以他事黜之庶可消已成之党絶未起之祸章下所司而言者犹讦大臣不已又未得贿籍主名各以意揣论劾有及尚书周经者经素刚介愤甚上疏曰昨科道劾廷臣奔竞李广阑入臣名虽蒙恩不问实含伤忍痛无以自明夫人奔竞李广翼其进言左右图宠眷耳陛下试思广在时曾言及臣否且贿籍具在乞检有臣姓名否更严鞫广家人臣如有

寸金尺帛遗广或尝一造其门即治臣交结之罪斩首市曹以为奔竞无耻之戒若无毫毛干涉亦乞为臣洗雪否则含污忍垢即填沟壑臣且不瞑帝命所司知之广虽惧罪自杀然帝犹怜广诏予祠额祭葬大学士刘健以广赃迹昭着争不当予乃罢给祠额仍撰文赐祭是时中官以赐祭闻者又有余杭何鼎鼎以冤死时论颇哀之先是壽宁侯张鹤龄侍内庭宴帝如厕鹤龄倚酒带帝冠他日复窥御惟鼎鼎因诉鹤龄无人臣礼帝怒鼎鼎妄言下锦衣狱李广遂承中官旨杖杀之已而帝追思鼎鼎赐祭勤文于碑】质实【马汝驥西元集万岁山在子城东北元武门外为大内之镇山高百余丈周回二里许林木茂密一名百果园毓秀亭在寿明洞之上按万岁山有二一即琼华岛今白塔山是也注详宣德三年其一即此乃今之景山也罗玘字景明南城人】

发明【朝廷之有赐祭赐祠所以优恤贤劳獎勵忠盖特为隆典非其人曷克当此若以是加之宦竖非特濫假名器转使饰终崇礼为不足重轻矣李广之擅权纳贿自知不可幸逃竟以仰药死揆之国宪漏网实多乃孝宗惑于司设监之请虽刘健抗疏执争犹命撰文赐祭其始终怜广之意可谓述而不悟矣观其即家求索异书由广素日以符籙祷祠献媚所致小人之蛊惑君心迎合固宠可胜咎哉】

免畿内租

【顺天广平顺德河间保定五府以旱灾告乃命免租四万七千八百余石是年免山西陕西西南畿广西广东被灾税粮】

十一月给事中吴仕伟请罢镇守中官不聽

【李广既以赃败仕伟因疏论宦官不可用乞尽召回镇守中官帝不能从也然是时中官出镇者帝屡申谕戒饬之福建邓原浙江麦秀河南蓝忠宣府罗清颇以廉洁爱民称特赐敕獎勵】质实【吴仕伟宣平人】

閏十一月壬戌朔日有食之

下御史胡献于锦衣卫狱谪蓝山县丞

【献言屠浦为吏部尚书王越李蕙为都御史皆交通中官李广得之广得售奸皆陛下任广太过也虽广事既往然当慎于将来而见今弊政有不可不革者京通二仓总督监督中官每收米万石人索白金十两以岁运四百万石计之人四千两夫监督仓储自有户部焉用中官愿赐罢遣总兵坐营等官勒令京操军士办纳月钱乞严革以苏其困东廠校尉本以缉奸还者但为外戚中官泄愤报怨如御史武衢忤寿宁侯张鹤龄及太监杨鹏主事毛广忤太监韦泰廠校推求细事诬以罪名举朝皆知其枉无一人言者臣亦知言之必为所陷然臣职言官弗敢默也疏入鹤龄泰各疏辨会给事中胡易劾监库中官贺彬贪黷罪彬亦讐易遂下献易锦衣狱献寻谪官久之易乃得释】质实【胡献字时臣揚州兴化人李蕙字德声当涂人

武衢沂水人毛广平湖人胡易宁都人】

【己未】十二年春正月辽东总兵官李景等诱杀朵颜三卫人以捷闻

【成化末鞬靬别部诺海拥三万衆攻杀三卫头目巴延等掠去人畜以万计朵颜三卫乃相率携老弱走匿边圉势衰久不振及小王子及和硕相待日强为东西诸边患辽塞屡失事杲与巡抚张玉镇守中官任良欲冒功掩罪策三卫积弱可欺乃令都指挥崔监王玺鲁勲设酒席诱其来市者三百余人尽杀之而奏捷于朝者三诡称三卫分道入寇官军御之前後斩馘如干廷臣以三卫安辑久颇疑杲等诈顾未有以发也既而朵颜诸部来贡诉其事乃命副都御史顾佐往核久不报科道官请亟治杲等欺饰罪马文升亦屡以为言帝乃趣佐连报明年佐还勘杲等罪实镌监玺勲官一级敕责杲等寻取良回予杲玉致仕于是科道争言杲玉欺饰罪当显戮而优以致仕之礼恐三卫闻之积愤反侧非所以塞边臣愆有罪帝不问朵颜诸部恨次骨遂北结和硕请为复讐数犯□宁宁远诸卫所由是辽塞益报警矣】质实【宁远元锦州及瑞州地明初置广宁前屯中屯二卫宣德三年分二卫地置宁远卫属辽东都指挥使司本朝康熙二年东割塔山所地入锦县西尽并前屯卫地改为宁远州三年属广宁府四年改属锦州府张玉吴桥人顾佐字良弼临淮人诺海旧作鄂孩今改】

发明【边将之习为欺诈自古已然非申严军律无以示惩若李景等之欺三卫积弱诱杀而诡以捷闻曷功掩过其罪实不容诛乃被劾勘得实仅予杲等致仕镌级法纪可为荡然孝宗性固寛仁意存姑息遂致疆事日非边圉多警良可慨耳厥後都指挥僉事张斌仍踵李杲故智掩杀无辜饰词诬奏而朱晖史琳之徒违败冒功效尤者且比比也师律顾可弗慎欤】

夏四月前礼部主事杨循吉请复建文君位号不从【循吉言建文君乃高皇帝嫡孙躬受神器後太宗入继大统削建文位号百余年来未蒙显复夫建文虽以左右非人得罪社稷而实则生民之主也请复尊号如景皇帝故事庶几裨益先圣有光大孝下礼部议格不行前六年春给事中吴世宗请恤建文殉节诸臣略云昔靖难时如方孝孺周是修练子宁邹公瑾魏公冕顔瑰齐泰黄子澄等皆仗节以死至今未及褒表实为阙典仁宗皇帝之初即赦孝孺等子孙明着诏书称其忠义此祖宗所已行者伏乞陛下以祖宗之心为心褒美诸臣赐爵諡崇庙食録其後人後其族属为忠义劝疏入亦为部议所格不行时论皆韪之】质实【杨循吉字君谦吴县人】

礼部右侍郎程敏政下狱

【敏政与李东阳主会试举人徐经唐寅预作文与试题合给事中华?劾敏政鬻题乃下?经寅狱时榜未发诏敏政母閱卷其所録者令东阳会同考官覆核二人卷皆不在所取中东阳以闻帝意欲置之而给事中林廷玉复攻敏政可欵者六事于是敏政亦下狱坐经尝贽见敏政寅尝从敏政乞文黜为吏敏政勒致仕?以言事不实调南京太仆主簿廷玉亦谪海州判官经江阴富人是实贿敏政家僮得之而寅才名噪江左竟以黜废论者惜焉或言敏政之狱傅瀚欲夺其位令?奏劾事秘莫能明也】质实【按明史选举志程敏政唐寅传具戴此狱志

于寅有惜词敏政传于此狱有疑词惟唐寅传云江阴富人徐经鬻题子敏政家僮然言之不详盖由明孝宗实录极诋傅瀚华杲以为瀚嫁祸于敏政故明史存疑而不详其颠末敏政传所谓事秘莫能明者亦以此也考当礼列卿记载礼部尚书徐琼事蹟附纪此狱颇悉又王世贞史乘考误则谓实录所载乃焦芳为敏政掩复之词今并录以备考列卿记云琼于己未知贡举是年主考为李东阳程敏政敏政发策以刘静修退斋记为题人罕知者其昵幸门生徐经平日独伺得之尝与南畿解元唐寅陈说至是果以发难举答无遗二子矜夸雀跃舆论沸腾谓敏政卖题受贿给事中华?劾之琼关知敏政在开皇惑无措自言夙构试目为家僮窃卖乃繙閱试卷凡知策问出处者俱黜落揭晓後给事中林廷玉复疏言敏政受贿虽无指实而自言家人窃卖迹有可疑诏逮敏政经等俱下狱经服称平日尝以双绮储敏政敏政受之出入门下夙构试目实从家人购得之狱成敏政勒致仕经寅其黜为吏史乘考误云焦芳修孝宗实录谓溥瀚嫁祸程敏政复果代其位时刘健当国既偏溺于恚怒莫之能辨适大学士谢迁谕德王笔俱憾敏政而都御史闵珪与迁华皆同乡乃属科道数辈内外并力交攻罗织成狱而华?之甘心鹰犬者不足道也世贞按传文穆有倾程之意人亦知之至于家僮鬻题事已彰着且与刘谢不相关盖芳乃李南阳贤门客程则南阳壻也故颇为揜覆而刘谢与芳有隙遂肆其丑诋如此程敏政字克勤休宁人唐寅字子畏吴县人华?无锡人传瀚字曰川新喻人】发明【是非不容两立?等之劾敏政杲鬻题事不实则敏政为无罪而罪在言官若其事实则言官为无罪而罪在敏政顾黜经寅罢敏政矣又复谪杲玉等官神何模校两可也且徐经辈出入门下预购试题既有成讞敏政虽不与知而以夙构之试目俾家人得以私售此非寻常不检东臧?者可比林廷玉所谓受贿虽无指实窃卖迹有可疑者固不得为苛论而史称傅瀚欲夺其位族?劾奏又云事秘莫能明瀚之有此事与否本无实据亦不必深求但使敏政家僮无鬻题之事则瀚又何从构衅耶】

免湖广江西被灾税粮

【寻免南畿被灾秋粮是年秋复免南畿仄河南被灾夏税】

六月阙里至圣庙灾

【遭大常卿李杰祭告敕山东抚按官重建庙成又遣大学士李东阳往祠焉东阳还疏言臣奉使遄行适遇亢旱天津一路夏麦已枯秋禾未种挽舟者无完衣荷锄者有菜色盗贼纵横青州尤甚南来人言江南浙东流亡载道户口消耗军伍空虚库无旬日之储宫缺累岁之俸东南财赋所出一岁之饥已至于此北地沍飧素无积聚今秋 歉何以堪之事变之生恐不可测臣自非经过其地则虽久处官曹日理章疏犹不得其详况陛下高居九重之上耶臣访之道路皆言冗食太衆国用无经差役频繁科派重叠京城土木繁兴供役军士财力交殫每遇班操宁死不赴势家巨族田连郡县犹请乞不已亲王之藩供亿至二三十万游手之徒托名皇亲仆从每于关津都会大张肆市纲罗商税国家建都于北仰给东南商贾惊散大非细故更有織造内官纵羣小掎击牖河官吏莫不奔骇鬻贩穷民所在骚然此又臣所目击者夫闾閻之情郡县不得而知也郡县之情庙堂不得而知也庙堂之情九重亦不得而知也始于容隐成于蒙蔽容隐之端甚小蒙蔽之祸实深臣在山东伏闻陛下以灾异屡见敕羣臣尽

言无讳然诏旨频降章疏毕陈而事关内臣贵戚者动为掣肘累岁经时俱见遏罢诚恐今日所言又为虚文乞取从前内外条奏详加采择断在必行帝嘉叹悉付所司】质实【李杰字世贤常熟人】

秋九月小王子入居河套

【成化中鞬鞞诸部既徙出套编修谢铎请蓄兵养锐及时收复东胜据三授降城以扼险阻而朝廷以敌退无事置不问既而威宁桃衅大同宣府寇抄无宁岁方幸延绥患少纾更无言及东胜者于是河套二十余里仍弃之疆外帝元年小王子既通贡遂驻败套中然冰坚则来冰泮则去虽出没为寇犹不废朝贡寻以入贡赏薄益大肆杀掠至是竟入居河套延绥乃复为敌冲矣】

冬十二月吏部尚书屠滹兵部尚书马文升等请罢传奉官不报

【帝初即位既罢成化时传奉官寻修京城河桥成从太监李兴请中旨授工匠四人官已又传陞通政司经历沈禄为参议王恕周经争之不能止嗣後传奉渐多及是一月中陞授二百余人滹言传陞文职过多请惜名器之滥究夤缘之奸文升言祖宗设武阶以待军功非有临战斩获不得轻授实欲奔走天下豪杰责其効死以报国家今传奉指挥张玘辈特画工耳岁有俸月有给亦既可赏其劳或优宠之赏以金帛荣以冠带足矣乃竟槩铨武职悉注锦衣准其袭替则介冑之士衡冒矢石着绩边陲者陛下更何以待之幸门一开恐不足为天下劝不报是时言官亦皆上疏极谏而给事中张閔至陈初政渐不克终八事其言尤切曰初汰传奉官殆尽近匠官张广宁等一传至百二十余人少卿李纶指挥张玘等一传至一百八十余人异初政者一初戮方士李孜省斩僧继晓近烧炼齐醮不息异初政者二初去万安李裕辈朝弹夕斥近被劾数十疏如尚书徐琼者犹臝然居位异初政者三初尝谕有大政召大臣面议近自十年三月召见文华殿後不复一召上下否隔异初政者四初撤增设内官近已还者复去已革者复增异初政者五初慎重诏旨左右不敢妄干近陈情乞恩率俞允异初政者六初令兵部申旧章有妄乞陞武职者奏治近乞陞无违拒异初政者七初节光棣供亿近冗食日繁移太仓银賒市物异初政者八章下所司而已】质实【张閔至字时行笔亭人徐琼字时庸金溪人】

【庚申】十三年春二月更定律例

【初洪永间定制法司断狱一依律拟议英宪以後巧法吏往往舍律用例条例由此日系前八年以鸿胪寺少卿李鏊诸命刑部尚书彭韶删定问刑条例及是给事中杨廉复言高皇帝肇造之初特命刘基陶安等详定律令且谕之曰立法贵简若条绪繁多可轻可重吏得夤缘为奸圣祖重律轻例之意见矣百三十年来律行既久条例渐多近令法司详议革其繁琐臣以为非深于经者不足以议律非深于律者不足以议例望特选素有经术深明律意者专理其事以太祖立法贵简之心为主一切近代冗杂之例悉为革去俾以例通律之穷不以例淆律之正庶刑官有所遵守帝嘉纳之乃下尚书白昂会九卿定议择条例可行者二百九十

余条与律并行诏如所请颁之中外时帝所任刑官前後如何乔新彭韶及昂闵珪持法皆平会情比律一归仁恕天下翕然称颂焉】质实【李鏊字时器汤阴人杨廉字方震丰城人】

夏四月彗星见

【是月十一日甲午夜也见室壁间芒尺余至五月辛巳夜入紫微垣六月戊戌夜乃?给事中屈伸言灾异频告边方多警愿惕然敬畏以应天赫然震怒以御侮纳之】

和硕寇大同游击将军王杲败绩

【敌自大青山数道入威远卫杲登城望之见敌止二十余易之曰失此不击令他人分吾功都指挥邓洪固止之不聽遂率兵出战敌佯走杲驰赴之既见敌骑渐多知坠计急驻兵未定伏骑七千余噪而出横突官军阵离为五裨将死者五十二人军士死亡千余人战马兵仗称是时副总兵马昇参将秦恭分兵列营距杲战所仅十里许逗留不敢进杲孤军无援故大败守臣讳之不以实闻乃命给事中许天锡往勘以平江伯陈銳为将军充总兵官太监金辅监军户部侍郎许进提督军务往御之寻天锡还言状论杲恭昇罪死总兵官王玺谪戍巡抚洪汉夺官】质实【青山在大同府西北塞外许天锡字启衷闽县人洪汉章邱人】

召阁臣面议军务

【大同之警京师戒严兵部请甄别京营诸将帝召刘健李东阳谢迁至平台出英国公张懋等自陈疏面议去留乃去遂安伯陈韶成山伯王镛宁晋伯刘福三人盖是月壬子也五月丙辰复面议军政亲书手敕召镇远侯顾溥督团营时帝视朝烦晏健等以为言帝颔之】质实【平台即後左门陈韶巴县人遂安伯志曾孙王镛金乡侯真之曾孙刘福寧晋伯聚之子顾溥江都人镇远侯成五世孙】

夏五月甲寅朔日有食之

和硕复寇大同游击将军张俊御却之

【威远之役敌既得志去乃复拥五万余骑入大同左卫纵掠俊遣兵三百邀其前复分兵三百为莱应而亲率军出击面被数箭犹力战敌乃却时陈銳为大帅怯懦无将略副总兵刘宁从銳军虽宿将顾已老病又與銳不協敌至銳患丧师令诸军坚壁毋出战故敌所向无阻俊独奋击之以少却衆为一时奇功帝闻大喜立擢都督佥事顷之代王玺为总兵官然是年冬敌 入大同南掠百余里俊亦不能御也】质实【大同左卫明永桑七年置在大同府西南百二十里今省张俊宣府前卫人】

秋七月京师地震

【是月十七日己巳夜也十月戊申两京皆震】

八月振江西灾

【先是诏免江西被灾秋粮寻复以水灾告命巡抚等官发粟振之是年山西被灾税粮亦令优免】

九月下行人司行人王雄于狱贬其官

【先是帝以陈锐出师月余无功乃召锐及金辅许进刘宁还以保国公朱晖代锐太监会同其军于是雄上言克敌在将得其人选任不可不慎比者寇入大同廷臣首推陈锐以众之死生国之存亡试之谋勇未闻之人寇益猖獗今斥陈锐用朱晖特以晖从父征伐尝履战阵顾锥之处囊末犹未见安知晖之多于锐耶愿陛下及晖未发而止其行贵前日举锐之罪然後援其生长边陲结发习战者俾专阃外勿署监军提督以挠之今之监督即唐观军容使与监单之任也以郭子仪李光弼之勇略然鱼朝思为观军容使而九节度皆溃相州况其下手帝以雄安言下狱谪孙丞比晖至寇已退乃还】质实【相州今彰德府朱晖字东阳夏邑人保国公永之子】

【辛酉】十四年春正月朔陕西地大震

【是日庚戌延安庆阳二府同笔诸州咸阳长安诸县潼关诸卫皆震声如雷朝邑尤甚频震十七日城垣民舍多摧压死人畜无算县东地坼水溢成河于是兵部尚书马文升言陕西与敌为隣延庆二府尤密迤河套乃地震未已此外寇侵袭之兆今小王子部落日众精兵数万其酋长和硕鼐雄桀黠往往以诈计败我官军其患非小且海内民困财竭兵衰将懦文恬武嬉法令不振正安内攘外之时修德弭灾之日伏乞行仁政以养民谋武备以固国节财用停斋醮止传奉冗官禁奏乞闲田撤还陕西织造内臣振恤被灾之家帝从其言旋召织造内臣还京时河南之永宁卢氏山西之蒲州安邑荣河亦于是日震二月乙未至三月癸亥蒲州地凡二十九震十月辛酉南京地震】质实【潼关卫汉华阴县地後汉建武中始置潼关明洪武中设潼关守御十户所九年置潼关卫属河南都司永乐六年改隶中军都督府本朝属西安府雍正四年改置潼关县属华州寻省入华阴县永宁汉澠池县地後周始置熊耳县隋改曰永宁明属河南府今因之卢氏汉县明初属陕州神宗初改属河南府今仍属陕州安邑汉县明属解州今因之】

三月以陈寿巡抚延绥

【先是寇犯延绥神木乘胜掠紫陌沟镇巡官不以实闻为言官所劾帝命给事中艾洪刑部郎中黄暉往勘至是洪等还言总兵官陈瑛退避玩寇巡抚王嵩坐视蒙敌宜治其罪乃逮嵩等下法司而以寿代嵩既至蒐军实广间谍分布士马为十道使互相应援军势始振既而诸部复大入先以百余骑来诱诸将请击之寿不可自出帐拥数十骑?胡状指挥饮食寇望见

疑之引去诸道袭击斩获甚多朝廷方遣中官苗逵等统重兵至寿已奏捷帝嘉之加禄一等逵欲合五路师捣巢驻延绥战马三万匹日费刍菽不貲寿请出牧近塞就水草衆有难色寿跨马先行衆皆从之省费数十万当战捷时或劝注子弟名籍寿曰吾子弟不知弓槊宁当与血战士同受赏哉在镇三年士卒皆感激乐为之用】质实【神木金砦元县明属葭州今属榆林府方輿纪要神木县有紫陌沟成化中寇入神木堡乘胜犯紫陌沟是也案明宪宗实录无寇犯紫陌沟事盖即指此役误以为成化耳陈寿字本仁宁远籍新淦人王嵩汲县人王暉汝宁府人】

夏四月小王子及和硕连兵入寇命朱晖帅师御之【敌大举自红塩池花马池入纵横数千里延绥宁夏守臣皆告警乃命晖佩将军印统都督李俊李澄杨玉马仪刘寧五将往而以中官苗逵监军右都御史史林提督军务御寇延绥比至巡抚陈寿已扞之出境而宁夏纵寇抄掠既饱亦引去】质实【史林字天瑞余姚人】

秋七月泰宁卫人犯辽东

【时海西有僧格者以不得通贡怨中国数以兵阻诸蕃入贡诸蕃并衔之总兵官蒋骥巡抚陈瑶旋招僧格议欵于是卫人以僧格为辞驻兵塞下攻辽阳迤东诸堡分守副总兵孙文毅等帅官军四千御之敌窥迤西无备乘虚毁边墙四十余道拥八千骑分道直入长胜诸堡辽东大震镇巡官讳之巡按御史车梁以闻遣给事中鍾渤等往勘状渤等还奏如梁言且劾骥瑶纳侮邀功致寇深入方下刑部议会广宁复师败骥瑶伪以捷闻言者攻之下巡按御史核实刑部请还骥瑶廷鞫乃召骥瑶还】质实【长胜堡明置堡内有北界胡家坨等十三墩以官军四百九十五人守之地在今锦州界蒋骥江都人定西侯贵之孙陈瑶全州人鍾渤东莞人僧格旧作商古今改】

普安苗妇米鲁作乱命南京户部尚书王轼督师讨之【米鲁沾益州土知州安民女普安州土判官隆畅妾也初以罪为畅所出居其父家畅老子礼袭有营长曰阿保者与米鲁通因讽礼迎归同爇之畅闻怒诛礼毁阿保寨阿保挟米鲁与其子阿鮓等攻畅畅走云南时东宁伯焦俊为总兵官与巡抚钱钺和解之既归米鲁于道中毒畅死遂与阿保举寨反畅别有妾曰适乌生二子出居安南卫阿保欲并杀之筑寨围其城又别筑三寨于普安而今阿鮓等防守名所居寨曰承天自号无敌天王出入乘黄纛官军不能制镇巡官以闻发诸卫及土兵万三千人分道进责安民杀贼自赎民乃攻斩阿保父子米鲁亡走焦进等责安民献米鲁民陰资米鲁兵五百袭杀适乌及其二子据别寨杀掠又自请袭为女土官镇巡官皆受米鲁路请宥米鲁严旨切责必诛之乃已会焦俊卒曹恺代为总兵官遂与钱钺及镇守中官杨友共发兵进讨而按察使刘福陰索赂于米鲁故绥师贼益炽官军败续都指挥吴远被执普安几陷友等请济师帝以命轼轼未至而友等遣人招贼贼扬言欲降益拥束攻围普安安南卫城断盘江道又乘间刦执友右布政使闻钺及都指挥李宗武郭仁史韬李雄吴达等死焉刘福亦被祸】质实【按米鲁明实录以为隆畅妾明史土司传以为畅後妻又土司传以米鲁为安民女明实录于十二年九月纪米鲁事亦云然但实录于十四年六月调云贵兵会讨米鲁则云米鲁亡入沾益州匿其侄土官安民家是又以米鲁为安民姑矣未详孰是存考沾益州汉

宛温县地元置州明属曲靖府今因之普安卫在普安州西南洪武二十二年置盘江方輿纪要在普安州东百里自安南卫流入永宁州界又遶流入州境王轼字用敬恭安人焦俊蒙古人东宁伯礼之孙钱钺杭州卫人闾钲泾州卫人】

朱晖等帅五路师袭寇于河套不见敌引还以大捷闻【时寇已徙帐晖与琳逵率刘宁等大发兵出红城子墩搗巢于河套无所遇遂还以斩首三级奏捷于朝未几小王子和硕拥十万骑分道入散掠开成宁夏境戕杀惨酷关中震动两镇将婴城不敢战而晖等不急赴降旨切责已而韦州环县花马池诸路官军先後得敌人首级十二又以捷闻是役也大帅非制胜才师行纡回无纪律边民死者遍野诸郡困转输饷单费八十余万他徵发称是所斩馘无几而上搗巢有功将士万余人下兵部陞叙尚书马文升力持之然竟録二百十人署职一级晖等皆赏赉有差】质实【红城子在灵州东北黄河东岸韦州在宁夏府东南二百六十里西夏置韦州于此元废明置韦州千户所今废】

九月丙子朔日有食之

召秦紘总制三边

【紘自三年罢归寻以廷臣荐起南京户部尚书十一年引疾去至是言官劾史琳等丧师溺职召琳还起紘户部尚书兼副都御史总制三边紘至按行败所躬祭阵亡将士掩其骼奏録死事指挥朱鼎等五人劾治败将杨琳等四人罪更易守将练壮士兴七田申明号令军声大振初寇既徙出河套平凉开成皆内地无患自小王子诸部复往来驻牧开成当兵衢为平庆临巩门户而城隘民贫兵力单弱商贩不至紘乃拓治城郭招徠商贾改开成为固原州以州境迤北延袤千里间田数十万顷旷野近边无城堡可依议于花马池迤西至小塩池二百里每二十里筑一堡堡周四十八丈役军五百人固原迤北诸处亦各筑屯堡募人屯种每顷岁赋米五石可得五十万石规画已定而宁夏巡抚刘宪梗其议奏于朝诏责宪宪伏罪卒行紘策修筑诸边城堡一万四千余所垣堑六千四百余里固原屹为重镇在事三年寇知有备不敢大入四镇宴然前後经畧西陲者莫及云】质实【小塩池在宁夏府西池周二十六里自庆阳至宁夏此为中顿之地四镇谓固原绥德宁夏甘肃也刘宪益阳人】

冬十月以马文升为吏部尚书刘大夏为兵部尚书【吏部尚书倪岳卒乃以文升代之而召大夏为兵部尚书文升在班列中最为耆硕帝推心委仕特敬礼之尝召见煖阁议考察事以文升年高重聽呼告之及出命左右掖之下阶其他岁时赐赉诸大臣莫敢望也大夏时为两广总督召命至以疾固辞帝不允仍趣之入见既至帝问曰朕召卿卿数引疾何也大夏顿首言臣老且病窃见天下民穷财尽脱有不虞责在兵部度力不办故辞耳帝默然】

十一月振两畿山东河南饥

【水灾故也命刑部左侍郎何监大理寺丞吴一贯往振寻以辽东饥复命户部发帑金五万济之是年江西亦告水灾飭有司振济山西陕西被灾税粮并令蠲免之】质实【何监字

世光浙江新昌人吴一贯字道夫海阳人】

【壬戌】十五年春正月朱晖还

【先是和硕等出河套晖留精兵三千防御以参将杨玉领之遂引兵还都给事中屈伸疏劾晖等西讨无功班师命甫下将士已入国门不知奉何诏旨且此一役糜京帑及边储共一百六十余万而首功止三级是以五十余万易一无名之首也所上有功将士至万余人假使馘一渠魁如何硕或斩级至千百将竭天下财不足供费而报功又不知几万也晖等宜论罪置重典不聽】

发明【十四年冬盖尝以鞬鞞诸部出套召朱晖还矣第班师之命甫下而将士已入国门是晖之还固不因召而还也当晖率兵出红城之时小王子已逐水草北徙晖幸其既出辄藉词求还其为懦蒞实甚乃不责其擅还不咎其怯敌并不正其拥兵坐视不援宁夏开成之罪而反以首功三级谕为捣巢大捷嘉獎而重赉之言官所劾诚当竟置不聽何刑赏之无章耶】

二月免河南被灾税粮

【是年振京师贫民并免南畿湖广被灾秋粮】

夏五月诏羣臣言时政阙失

【以灾异修省也刘健请早朝以勤政日讲以视学节俭以省费刚断以决事纳之】

秋七月録刘基後裔世袭指挥使

【先是景泰中録基七世孙禄与顔孟二氏後并为翰林五經博士至是给事中吴仕伟言诚意伯乃功臣其後不当为博士乃命其九世孙瑜为处州卫指挥使予世袭】质实【处州卫在处州府治南明洪武中建今废】

王軾破米鲁斩之

【軾至师以便宜调广西湖广云南四川官军土兵八万人合贵州兵分八道进寻参将赵晟破其要害贼遁过盘江都指挥张泰等渡江追击指挥刘怀等遂进解安南卫围而总兵官曹恺致仕都督王通都指挥李政亦各破贼砦贼急反兵攻都御史陈金以云南兵御之贼遁归马尾笼砦金事王懋中土知府凤英追及之官军四面急攻米鲁突围出战英临阵格杀之余党平】质实【马尾笼在南笼府境城金字汝砺应城人王懋中安福人】

九月庚午朔日有食之

冬十月户部上天下会计之数

【户部尚书侣鍾言常入之贼以灾伤渐减常出之费以请乞渐增入不足当出正統以前军国费省小民输正赋而已自景泰至今用度日广额外科索河南山东边饷浙江云南广东杂办皆昔所无民已重用无可复增往时四方丰登边境无调发州县流移今太仓无储由府殫絀而冗食冗费日加于前愿陛下惕然省忧力加损节且敕廷臣共求所以足用之术帝乃下廷臣议议上十二事其罢传奉冗官汰内府滥败军匠清腾骧四卫勇士停寺观斋醮省内侍画工番僧供应禁王府及织造滥乞塩引令有司徵庄田租皆权幸所不便者疏留数月不下鍾乃复言他皆报可而事关权幸者终格不行】质实【腾骧四卫明史兵志永乐时以迤北逃回军卒供养马役给粮授室号曰勇士役多以进马者充而聽御马监官提调名隶羽林身不隶也军卒相冒支粮不可稽宣德六年乃专设羽林千户所统之凡三千一百余人寻改腾骧武骧左右卫军选本卫官四员为生营指挥督以太监别营开操称禁兵器?衣甲异他军横于輦下徒为中官占匿弘治末勇士万一千七百八十人旗军三万一百七十人岁支廩粟五十万】

十一月琼州黎乱讨平之

【前知府张桓贪财私歛继以余濬贼虐尤甚?人苦之符南蛇等遂聚衆为乱镇兵讨之不下户部主事冯顒上言琼州在大海中周三千里其五指山林等深密川泽险阻兵不可入黎衆聚散无常攻之则巢穴难穷置之则侵掠不已乞勾老熟知夷情者令各集土兵聽巡守官节制有能擒斩首恶者复其祖职此以夷攻夷数月间当见俘获不然师旅之兴无时已也帝是其言时右都御史番蕃总督两广檄副使胡富调狼土兵讨之而贼方攻围儋州富兴参议刘信往覘贼突至杀信富手斩剧贼一人贼乃退明年七月益兵进攻破贼巢千二百余所斩符南蛇贼平蕃在两广归善南海诸贼方蜂起土司岑濬岑猛相讐杀不已既斩符南蛇旋讨平归善贼古三仔唐大鬘等遂请兵勒岑濬岑濬者思恩土知府也性凶狡以兵力雄于诸土司先是田州土官岑溥为子獠所杀獠亦自杀次子猛幼头目黄骥李蛮构难督府命濬调衆护猛骥厚赂濬献以女且约分地与濬濬以兵属骥送猛至田州蛮初为猛守土无他念及见骥偕来惧其谋已拒不纳骥复以猛奔思恩幽之事觉总兵欧磐严责濬乃出猛袭知府濬从索分地不得怒攻刦田州杀掠万计城郭为圯又以兵二万?旧田州刦龙州印前制府屡抚不服于是蕃请剿之廷议未决而濬复掠上林武缘诸县死者不可胜计又攻破田州猛仅以身免据其家属五十人闻于朝兵部乃议调两广及湖广兵合剿是为斩符南蛇之明年又明年兵集蕃与太监韦经总兵毛銳将官军土兵十万八千余人分六哨各取道共抵巢砦贼分兵阻险拒敌官军缘崖进濬势蹙遁入旧城诸军围攻之濬自縊城中人献其首前後斩捕四千七百九十级俘男女八百人尽平其地奏设流官回军讨南海县贼祸元祖又平之两广自是少安】质实【五指山在琼州府安定县南五岑高大亦曰黎母山黎人环居山下外为熟黎内为生黎水亦分五流环绕郡境入于海归善晋柝博罗地置欣乐县陈曰归善明属惠州府今因之旧田州在今田州东南三十里上林唐置明属宾州今属思恩府武缘宋置明洪武初属南宁府神宗七年改属思恩军民府今属思恩府思恩旧城在今城西五里地名桥利其西北又有旧城明初思恩州治也正统七年岑瑛迁于桥利嘉靖七年王守仁奏徙治于荒田岑

濬遁入之旧城盖在桥利西北非即桥利也张桓浮梁人冯顥琼山人】

十二月大明会典成

【初英宗欲述洪武以来历朝旧制条其因革纂为一书事未克竟前五年春帝乃诏阁臣辑之以官战制度为纲事物名数仪文等级为目其有损益同异者据事系年彙列于後名曰大明会典至是书成凡一百八十卷大学士刘健等表上之】质实【明史艺文志明会典二百二十八卷乃万历中重修者健等初奉诏纂是书总裁为健与李东阳谢迁副总裁为吴宽傅瀚王鏊杨守址张元祯】

【癸亥】十六年春正月云南参议郭绪谕降孟养

【初孟密宣抚使之设也实割木邦宣慰司地既而孟密思揲复于界外侵木邦地二十七所屡谕之还不聽乃调孟养宣抚思禄兵胁之思揲始还所侵地然多杀孟养兵思禄讐之发兵越金沙江夺木邦故割孟密地十有三所两酋构怨不已巡抚陈金承诏遣绪与副使曹玉往谕旬余抵金齿参将卢和先统军距所?地二程而舍遣官驰驿往谕皆留不报和惧还军至干崖遇绪语故戒勿进绪不可玉以疾辞绪遂单骑从数人行旬日至南甸峻险不可骑乃斩棘徒步引继以登又旬日至一大泽土官以象舆来绪乘之往行毒雾中泥沙蹉蹕又旬日至孟赖去金沙江仅二舍手自为檄使特过江谕以朝廷招徕意蛮人相顾惊曰中国使竟至此乎发兵率象马数万夜渡江指长槩劲弩环之数重从行者惧请勿进绪拔刀叱曰明日必渡江敢阻者斩思禄既得檄见譬晓祸福甚备又闻至者才数人乃遣首长来聽令且致馈绪却之出敕谕宣示思禄亦继至绪先叙其劳次白其冤状然後责其叛诸酋闻威俛伏呼万岁请归侵地绪诘前所留使人乃尽出而归之和及玉闻报驰至则已归地纳款矣】质实【孟赖砦在今孟定土府东南郭绪字继业太康人】

二月改卜郊

【帝有疾自正月己巳朔至于是月辛丑始视朝乃改卜于十一日戊申大祀天地于南郊将郊赐大学士刘健李东阳谢迁蟒衣人一袭阁臣赐蟒自健等始】

夏四月起致仕金事章懋为南京国子祭酒

【廷议两京国学当用名儒起谢铎子北监及南监阙祭酒遂以懋补之懋自成化初改南京评事迁福建金事平泰宁沙尤贼条采矿事宜以社盗源建议番货互通贸易以裕商民政绩甚着满考致事归屏迹不入城市奉亲之暇读书讲学弟子执经者日益进贫无供具惟脱粟菜羹而已四方学士大夫高其风称为枫山先生中外交荐以亲老辞不赴既奉命方遭父忧不就时南监阙司业且二十年诏特以罗钦顺为之命南吏部侍郎杨守址摄祭酒而虚位以待懋盖异数也至是终制始莅任教诸生以有用之学上下论古今事若生其时履其地裁决其亏成五经问难若寸莛撞钟应手而应六馆士人人自以为得师】质实【泰宁宋昱明

属邵武府今因之罗钦顺字允升泰和人】

五月遣南京刑部右侍郎樊莹巡视云贵

【先是云南景东卫大疾卫指挥复报境内昼晦七日又陇川宣抚司两雷如手掌尽杀禾稼宜良地屡震暴风曲靖火灾毁房舍无?帝以云南灾变非常皆由官不得人上下攫取以致小民含冤上干天和命莹兼左佥都御史巡视莹至滇访文武吏不职者黜之知景东之变乃指挥吴勇侵官帑以灾异可幸寛政因云雾晦冥虚张其事即奏劾勇罪履行所部修城池厉兵马振贫穷抚流散威惠大行初莹尝巡按云南甚有声诸蛮皆帖服及是闻营至益震惧有诉土官夺其牛者莹还其牒曰汝第归彼今还汝牛矣已而果然且诣营服罪慰而遣之他土官聚兵仇杀久有司不能制以白莹曰吾在贼敢尔耶果尔当捣其巢举其族覆之声闻各敛兵退一时人心渐安明年召还为南京刑部尚书】质实【樊莹字廷璧常山人】

秋八月録故赠侍讲学士刘球裔

【帝悯球忠为王振所害景泰时尝赠官赐諡立祠于乡而劝忠之典宜有加焉访其曾孙祠録为通政司知事】

九月振两畿浙江山东河南湖广灾

【遣都御史王璟巡视浙江副使汪舜民于淮杨佥事阎玺于庐凤随宜振济北直隶山东河南湖广被灾州郡皆如例恤之又以庐凤二府滁和二州灾尤甚发南京户部兑余米给振时韩文为南京兵部尚书以米价翔涌请预发军饷三月户部难之文曰救荒如救灾有罪吾自当之乃发廩十六万石米价为平璟至浙陈荒政十事奏减杭嘉湖宁绍台六府税者杭湖粮三十余万石活饥民四十余万人舜民用便宜发粟活饥民百二十万人流民复业者八千余户玺亦多所全活明年春应天巡抚张缙以庐凤淮杨徐民困未苏更请留兑运粮十五万五千石备振期三年後偿官帝曰民困当速济之无令偿也】质实【王璟字廷棗沂州人汪舜民字从仁婺源人右副都御史奎之子阎玺太原人】

桃李华

诏户部核议盐法

【帝在位久益明习政事数召见大臣欲以次革烦苛除宿弊尝论及理财李东阳极言塩法弊壤由陈乞者衆因而私贩数倍刘健进曰太祖时茶法始行驸马欧阳伦以私贩坐死高皇后不能救如伦事孰敢为陛下言者帝曰非不敢言不肯言耳遂诏户部核利弊具议以闻是时健等三人竭诚尽虑知无不言初或有从有不从既乃益见信所奏请无不纳每进见帝辄屏左右左右不得闻从屏间窃听但闻帝数数称善】

【甲子】十七年春正月振应天饥

【帝恐阎玺等分振未周专敕南京工部右侍郎高铨振之铨陈荒政八事多报可是年免南畿湖广浙江被灾税粮】质实【高铨字宗选扬州人】

以道士崔志端为礼部尚书

【志端习步虚声音吐洪畅成化中传奉历官至太常少卿久之进卿及是擢礼部尚书仍掌寺事言官以志端羽流不宜清秩抗疏力争帝曰先朝有之既擢用矣不聽】质实【崔志端宛平人】

发明【明史叶绅传称太常卿崔志端推李广为教主因得传陞官职盖志端亦广之党也广以有罪自杀则其所引左道之人自当立予诛逐乃犹容之朝宁海掌秋宗虽言官諫阻而反以光朝有之为辞夫宪宗之宠任羽流岂可遵为成宪哉况孝宗初政如李孜省邓常恩辈既知其邪妄而罪之何以覆车之辙甫鉴于前复旋蹈于後而加以崇秩视孜省常恩且有过焉者则是宪宗一误而孝宗一误也亦可慨已】

二月诏每岁审録重囚毋限一日

【故事每年会官録囚率一日告竣兵部给事中潘铎言审録数多一日不能详定恐致冤滥太宗皇帝时刑部上大辟三百余人谕各官再讯迟十日不为害祖宗好生之仁万世所当遵也帝从之乃有是诏】质实【潘铎新乡人】

诏减光禄寺供奉

【帝曰岁饥民贫朕实痛焉其务节约毋滥费乃减光禄寺供奉十之二时刘大夏言被灾诸行省乞命抚按官蠲灭租役专务生养帝命大夏条具事当行者趣户部速议行之】

三月太皇太后周氏崩定祔庙制

【上尊諡曰考肃睿皇后先是慈懿钱太后崩虽合葬裕陵而异隧距英宗元堂数丈许窒之虚右圻以待隧独通至是帝御便殿出裕陵图示大学士曰陵有二隧一窒一通此皆光朝内臣所为未合礼昨见成化时商辂等章奏先朝大臣忠厚为国如此先帝亦甚不得已耳因与刘健等议欲通隧钦天监奏恐动地脉乃止後问祔庙礼健言汉以前一帝一后祔二后自唐始祔三后自宋始曩者定议慈懿太皇太后居左今大行太皇太后居右用唐宗故事帝曰事须师古末世不足效祖宗来惟一帝一后今若并祔是变礼从朕始也乃援孝穆纪太后别祭奉慈殿为言下廷臣议英国公张懋等言春秋考仲子之宫胡安国传云孟子入惠公之庙仲子无祭所以此观之祖庙无二配而周礼有祀先妣之文疏云姜嫄也唐宋推尊太后不配食者立别庙享之亦得闕宫之义宜仿故事于奉先殿外建庙奉祀为宜帝然之将建庙钦天

监奏年月不宜廷议暂祀太皇太后于奉慈殿正中徙孝穆居佐终明世皆用其制】质实【奉慈殿在崇仁门南】

夏四月葬孝肃皇后于裕陵

閏四月命诸司议革弊政

【帝曰庶政滋弊害于军民上千和气朕甚軫焉令所司详议以开先是给事中杨禔言两畿河南山东自春徂夏不雨黄河以北穷民画刦淮杨嘉湖仍岁灾荒乞敕百官修省从之越六日即有议革弊政之命时帝尽心荒政蠲租税裁冗食诏有司勘灾迟慢者罪如律故虽四方告灾而民赖以济焉】质实【杨禔武陵人】

五月罢南京苏杭织造中官

【前四年春以陕西方用兵罢织造絨蜀中官前年夏帝纳诸大臣言召还中官之监苏杭织造者中官邓瑭固请帝又许之以工部尚书曾监言减岁造三之一至是刘大夏复言当罢遂悉召还令镇巡官领之】质实【曾监字克明桂阳人以戍籍居京师】

六月雨雪

【是月四日癸亥也】

命两京五品以下官六年一考四品以上自陈着为今【故事方面官三年朝覲一考察两京堂上官不与至五品以下十年始一行居官率九载年劳转迁或服除改补多不及期给事中许天锡请京官六年一考察大僚令自陈简去之命从所请时天锡以内官冗滥并请考察以定去留其言尤切谓祖宗御内官恩不泛施法不轻贷二十四监局及在外管事者并有常员近年诸监局掌印佾事多至三四十人他管事者无数留都亦然凭陵奢暴蠹蚀民膏第宅连云田园遍野膏粱压于与台文绣被乎狗马凡若此类皆足召变乞敕司礼监会内阁考察严行澄汰此後或三年五年一行永为定制帝善之而不能行也】

召见兵部尚书刘大夏于便殿

【帝问大夏曰卿前言天下民穷财尽祖宗以来税歛有常何今日至此对曰正谓不尽有常耳如粤东西岁取香药木材固以万计他可知矣又问天下军若何对曰穷与民等帝曰居有月粮出有行粮何故穷对曰其帅侵剋且过半安得不穷帝太息曰朕临御久乃不知天下军民困何以为人主遂下诏严禁帝察知大夏方严委寄益重左都御史戴珊亦以材见知每有宣召或专及大夏或兼及珊诸大臣不能与也帝尝谕大夏曰临事辄思召卿又以非卿部事而止後有当行罢者具揭帖以进大夏顿首曰不敢帝问何故对曰事之可否外付府部内咨阁臣可也揭帖滋弊不可为後世法帝然之又尝问天下何时太平对曰求治亦未可太急】

但用人行政悉与大臣面议当而後行久之天下自治尝乘间言四方镇守中官之害帝问状对曰臣在两广见诸文武大吏供亿不能敌一镇守烦费可知帝曰然祖宗来设此已久安能遽革第自今必择其廉者而後用不然则已之大夏顿首称善一日大夏与戴珊同侍帝曰时当述职诸大臣皆杜门如二卿者虽日见客何害?出白金赆之曰少佐尔廉且属勿廷谢恐为他人忌也珊以老疾乞骸骨优诏慰留已大夏晏见复代珊请帝曰彼属卿言耶主人留客坚客且为强留珊独不能为朕留邪且朕以天下事付卿辈犹家人父子今太平未兆何忍言归大夏出以告珊珊感泣曰臣死是官矣】

和硕入大同指挥郑瑀战死

【是年春鞑靼上书请贡许之竟不至时入大同境杀掠墩军游击将军卫勇副总兵黄镇及都指挥尉景李敬等分护官军番上者事竣还会和硕方帅衆数百与瑀战于焦山卫勇等合兵援之敌衆五千余忽集持长刀四面回击迨暮敌骑益增至万余官军殊死战凡十数合般伤相当瑀战久力绌犹手刃数人敌共前支解之事闻于朝诏延绥及偏头关守臣急发兵应援恤瑀等死事如制帝召刘健李东阳谢迁至暖阁谕曰墩军我赤子被杀如此即日还京军一万征之健对曰陛下重念赤子宗社之福京军恐未可动东阳曰近鞑靼与朵颜相结潮河以北古北口甚可虑若彼声东击西而我军出大同未免顾彼失此遂罢议而中官苗逵力劝出师虽健等谏犹疑未决越三日召问刘大夏曰卿在广闻苗逵延绥捣巢功乎对曰臣围之俘妇稚十数耳赖朝廷威德全师以归不然未可知也帝默然良久问曰太宗频出塞今何不可对曰陛下神武固不後太宗而将令士马远不远且当时淇国公小违节制举数十万衆委沙漠奈何易言之度今上策惟守耳都御史戴珊亦从旁赞决帝遽曰微卿曹朕畿误由是师不果出命侍郎李燧大理少卿吴一贯通政司参议丛兰往经畧之】质实【焦上在大同府东一百八十里】

庐山鸣

【声如雷次日大风雨平地水丈余星子德安二县人溺死者无算】质实【庐山在九江府德化县南与南康府接境星子五代杨吴镇宋升县明属南康府德安唐蒲塘塲地五代吴置县曰德安明属九江府今并因之】

秋八月置东西卫军

【帝欲宿兵近地为左右辅刘大夏言保定设都司统五卫祖宋意当亦如此请遣操军万人为西卫纳京东兵密云蓟州为东卫报可中官监京营者患失兵揭飞语宫门帝以示大夏曰宫门岂外人能至必此曹不利失兵耳由是间不行】

九月复置起居注

【洪武间设起居注後废至是大仆少卿储巏言古者立史官记言记动典至重也臣见陛

下宣召羣臣多系帷幄造膝之言近臣不得与闻史官莫由纪录失今不图恐岁月绵远传闻各异事迹无以?其始末乞敕廷臣曾蒙召问者备录呈览宣付史馆庶几圣君言动与无所遗羣臣论说亦以附见报可】

冬十一月罢云南银场

【天顺中命中官监银场于时罗珪往云南骤增岁课重为民害帝即位後始减二万两十三年巡抚李士实言云南九银场四场矿脉久绝乞免其课报可及是从巡抚陈金言竟罢之】质实【李士实字若虚丰城人】

贬大理寺少卿吴一贯为嵩明州同知

【先是泰宁卫部十余骑射伤海西贡使故都指挥僉事张斌以罪废孙天祥入粟得祖官斌欲冒功起废使天祥出关掩杀他卫三十八人指为射贡使者巡抚张鼐奏捷巡按御史王献臣疑之方移牒驳勘会指挥张茂及子钦与天祥为却诈为前屯卫文书呈献臣具言天祥掩杀状献臣以闻未报而献臣尝令步卒导从游山为东厂所发被徵以余濂代帝命一贯偕锦衣指挥杨玉会濂勘之尽得其实论斌等死天祥弊于狱天祥叔父洪屡讼冤帝密令东厂廉其事还奏所勘皆诬帝信之欲尽反前狱出东厂揭帖示阁臣命尽逮一贯等会讯阙下刘健言东厂揭帖复争之帝再召见责健等健对曰卿士大夫言足信帝曰法司断狱不当身且不保言足信乎谢迁曰事当从众若一二人言安可信健等又言众证不可悉逮帝曰此大狱逮千人何恤苟功罪不明边臣孰肯効力者健等再四执争见帝色厉终不敢深言东厂非一贯等既至帝御午门亲鞫之欲抵一贯死珪进曰一贯推案不实罪当徒帝不允珪执如初帝怒命更拟珪终以原拟上谪一贯嵩明州同知献臣前已贬上杭丞再贬广东驿丞濂云南布政司照磨茂父子论死而斌免洪得论功帝厉精国治委任大臣中官势稍绌惟天祥天祥事发自东厂廷为所挠马】质实【前屯卫在今宁远州西南一百三十里本唐瑞州治地明洪武二十二年改置广宁前屯卫本朝康熙二年并入宁远州嵩明州元初为府後降州明属云南府今因之】

十二月户部奏是岁天下户口之数

【户凡一千五十万八千九百三十有五口凡六千一十万五千八百三十有五帝以生齿渐繁而户口日渐就耗损明日二月御奉天门谕部臣议弊政以闻于是户部言耗损之故有二有因灾伤斂重逼迫逃移者有因惧充军匠诸役贿里长匿报者若不加招抚之恩严稽察之法则逃移者永无复业之望匿报者别无清理之术如荆襄流民尤多宜简命大臣一人往理其他各行省敕抚按等官招抚简紫若逃避军匠等役扶同隐匿者许首报改正违者论罪继是以後岁一稽核仍令有司轻徭薄征以宽恤之帝从其议乃命刑部左侍郎何监抚荆襄流民】质实【王世贞弇山堂别集国家户口登耗有绝不可信者如弘治十七年口至六千一十万五千八百三十五十八年户至一千二百九十七万二千九百七十四而正德元年户仅九百一十五万一千七百七十三顿减三百八十二万一千二百一口仅四千六百八十万

二千五十減一千三百三十万三千七百八十五自是而刘六等乱中原蓝鄢等乱楚蜀江广无处不被兵而八年以後口却增至六千三百三十余万然则有司之造册与户科户部之稽查皆儿戏耳】

【乙丑】十八年春正月小王子入寇

【前年夏召秦紘还理部事紘以老辞去遂虚制府不命官镇巡官无统摄边备竟疏敌知之拥三万骑围灵州分道入花马池转掠韦州环县陷宁夏清水营帝谕兵部曰清水营堡乃西陲要害寇直入焚抄边弛甚矣其令户部侍郎顾佐往理陕西军饷巡按御史閱实以闻寻敌以攻灵州不克散掠内地指挥仇钺邀其归路与总兵官李祥击走之】质实【仇钺字廷威镇原人】

二月御经筵

【学士张元祜请讲太极周西铭等书帝索观之喜曰天生斯人以开朕也元祜清癯长不踰中人其充日讲帝特设低几聽之】

三月下户部主事李梦阳于锦衣卫狱即释之

【帝颇优礼外家皇后弟寿宁侯鹤龄建昌侯延龄并骄纵多犯法梦阳上书陈二病三害六渐累数千言末云壽宁侯鹤龄招纳无敕罔利贼民势如翼虎鹤龄奏辨摘疏中陛下厚张氏语诬梦阳讞母后为张氏罪当斩后母金夫人复泣诉帝帝不得已下梦阳锦衣狱帝问刘健曰梦阳言事何若健曰小臣狂妄帝默然谢迁曰亦心为国耳帝颔之寻即降中旨宥出仅夺俸三月金夫人愬不已帝不聽左右知帝护梦阳请无重罪而予杖以泄金夫人愤帝亦不许谓刘大夏曰若輩欲以杖毙梦阳耳朕宁杀直臣快左右心乎他日帝游南宫鹤龄兄弟入侍酒半皇后及金夫人起更衣因出游覽帝独召鹤龄语左右莫闻也遥见鹤龄免冠首触地自是稍敛迹】质实【王世贞史乘考误韩邦奇苑洛杂志言李梦阳劾张鹤龄有云陛下待张氏者厚矣帝震怒下锦衣狱越数日帝召刘健议事毕健从容请曰李梦阳不知何大罪陛下怒之甚也帝曰他无礼直呼皇后为张氏健顿首曰张氏犹言张家指鹤龄非谓皇后也帝意解即命复其官按李梦阳秘録帝出疏示之刘曰此狂妄小人耳帝默然秘録李所自记似应不妄李梦阳字献吉庆阳人按空同集二病一元气之病谓士气日衰一腹心之病谓内官日横二害一日兵害二曰民害三曰庄场饥民之害六渐一曰匱之渐二曰盜之渐三曰壤名器之渐四曰弛法令之渐五曰方术蛊惑之渐六曰贵戚骄恣之渐】

夏五月帝崩

【是月庚寅帝大渐名刘健李东阳谢迁至乾清宫曰朕承统十有八年今三十六岁遘疾殆不兴故召卿輩健等皆慰藉帝曰朕自知命也朕守祖宗法度不敢怠荒天下事重烦卿輩又曰东宫年十五矣未选婚可急令礼部行之皆应曰诺时司礼太监罗跪榻下帝曰授遗旨

命就榻前书之执健手曰卿辈辅导良苦朕备知之东宫年幼好逸乐卿辈当教之读书辅导成德健等欵戏受命翌日辛卯召太子谕以法祖用贤午刻崩】

太子厚照即位

【是为武宗】

赦

【以明年为正德元年】

小王子犯宣府总兵张俊败绩

【裨将张雄穆荣皆战殁命太监苗逵监督军务保国公朱晖为将军充总兵官右都御史史琳提督军务御之寻召晖等还冬小王子复犯甘肃关中皆震动】

秋八月尊皇太后为太皇太后皇后为皇太后

京师淫雨

【自六月雨至于是月时东宫旧竖刘瑾与马永成谷大用魏彬长永邱聚高凤罗祥等八人俱用事谓之八党亦谓之八虎日导帝游戏由是怠于政事遗诏中当兴罢者悉废格不行大学士刘健等乃上言陛下登极诏出中外欢呼相望太平今两月矣未闻汰冗员几何省冗废几何诏书所载徒为空文此阴阳所以失调雨阳所以不若也如监局仓库城门及四方守备内臣增置数倍朝廷养军匠费钜万计仅足供其役使宁可不汰文武臣旷职债事虚糜廩禄者宁可不黜画史工匠滥受官职者多至数百人宁可不罢内承运库累岁支银数百万初无文簿司钥库贮银数百万未知有无宁可不勾校至如放遣先朝宫人纵内苑珍禽奇兽皆新政所当先而陛下悉牵制不行无以慰四海之望帝虽温诏答之而左右宦竖日恣增益日益衆每帝出带刀被甲拥驾後内府诸监局金书多者至百数十人光禄日供骤益数倍健等极陈其弊请勤政讲学报闻而已】质实【司钥库在西安门裏十库之西刘瑾兴平人本谈氏子依中官刘姓以进冒其姓武宗即位掌钟鼓司张永保定新城人】

冬十月葬泰陵

【谥曰逵天明道纯诚中正圣文神武至仁大德敬皇帝庙号考宗】质实【泰陵在昌平州笔架山东南】

【明史赞曰明有天下传世十六太祖成祖而外可称者仁宗宣宗孝宗而已仁宣之际国势初张纲纪修立淳朴未漓至成化以来号为太平无事而晏安则易耽怠玩富盛则渐启骄

奢孝宗独能恭俭有制勤政爱民兢兢于保泰持盈之道用使朝序清宁民物康阜易曰无平不陂无往不复艰贞无咎知此道者其惟孝宗乎】

十一月命太监韦兴分守湖广

【兴自成化末得罪久废至是夤缘出守科道官言诏革天下镇守内官非旧额者墨犹未乾乃复遣兴无以示天下信尚书刘大夏等再三执争皆不聽】

御定资治通监纲目三编卷十七

卷十八

钦定四库全书

御定资治通监纲目三编卷十八

【起丙寅明武宗正德元年尽癸酉明武宗正德八年】凡八年

【丙寅】武宗毅皇帝正德元年春二月大学士刘健等乞罢不许

【吏户兵三部及都察院各有疏言事为宦官所挠传示帝意令阁臣调旨健等不奉命别拟以奏帝不听健等力谏谓奸商坏乱盐政武臣负罪玩法北征将士无功授官御用监书篆滥用匪人皆宜痛抑今陛下不信大臣而信羣小欲以一二人私恩坏百年旧制臣等岂敢苟从所拟四疏谨以原拟封进不报居数日又言比为盐法赏功诸事极陈利害拱俟数日未奉玉音若以臣等言是宜赐施行所言非邪亦当明加斥责乃留中不报视之若无政出多门咎归臣等宋儒朱熹有言一日立乎其位则一日业乎其官一日不得乎其官则一日不敢居乎其位伏乞圣明矜察特赐退休帝优旨慰留之疏仍不下又数日历数政令十失指斥贵戚近幸尤切因再申前请帝不得已始下前疏今所司详议健等知志终不行各上章乞骸骨帝不许既而所司议上一如健等指帝勉从之由是诸失利者咸切齿】

夏四月罢吏部尚书马文升以焦芳代之

【初文升承遗诏请汰传奉官七百六十三人命留太仆卿李纶等十七人余尽汰之既而中官王瑞复请用新汰者七人文升持不可给事中安奎刺得瑞纳贿状劾之瑞恚诬文升抗旨更下廷议皆是文升帝终不听文升因乞归不许是时朝政已移于中官文升日怀去志会两广缺总督推兵部侍郎熊绣可任绣不欲出外颇快快其同乡御史何天衢劾文升徇私文升连疏乞休去芳粗鄙无学识好嫚骂刘健谢迁诸正人皆恶之芳既积忤廷臣乃深结阉宦以干进帝初即位廷议以国用不足劝上节俭芳知左右有窃听者大言曰庶民家尚须用度何况县官谚云无钱拣故纸今天下多逋租匿税不是检索而但云损上何也帝闻大喜会文升去遂代为尚书】质实【焦芳泌阳人安奎赵州人熊绣字汝明道川人】

五月兵部尚书刘大夏罢

【先是孝宗遗命撤镇守中官非额设者大夏议撤二十四人又奏减皇城京城守视中官皆不纳顷之列上传奉武臣当汰者六百八十二人报可大汉将军薛福敬等四十八人亦当夺官福敬故不入侍以激帝怒帝遽命复之而责兵部对状欲加罪中官甯瑾顿首曰此先帝意陛下列之登极诏书不宜罪帝意乃解已复言镇守中官如江西董让蓟州刘琅陕西刘云山东朱云贪残尤甚乞按治帝不悦大夏自知言不见用遂连疏乞归许之给事中王珣张璠上章请留大夏吏部亦请如珣璠言不报】质实【明兵志府军前卫及旗手等十二卫各有

带刀官锦衣所隶将军初名天武後改称大漠将军凡千五百人王翊永平人张檉平谷人】

六月大风雨坏郊坛兽瓦

【帝谕羣臣修省刘健李东阳谢迁上言比来免朝太多奏事渐晚游戏渐广经筵日讲直命停止不知陛下宫中复有何事急于此者夫滥赏妄费非所以崇俭德弹射钓猎非所以养仁心鹰犬狐兔不可育于朝廷弓矢甲冑不可施于宫禁今圣学久旷正人不亲直言不闻下情不达而此数者杂交于前臣不胜忧惧疏入报闻】

秋七月彗星见

【是月二十三日庚子夜也前十一日己丑夜有星见紫微西蕃外如弹丸色苍白越数日有微芒见参井间渐长二尺如帚西北至文昌至是彗星亦见光流东南长三尺越三日长五尺许扫下台入太微垣时八党窃柄朝政日非而灾异迭见于是南京御史陆崑偕同官上疏极谏曰自古宦竖欲擅主权必先蛊其心志如赵高劝二世严刑肆志以极耳目之娱仇士良教其党以奢靡导君勿使亲近儒生知前代兴亡之故其君惑之卒皆受祸陛下嗣位以来天下颀然望治乃未几宠幸阉寺颠覆典刑太监马永成魏彬刘汉传兴罗祥谷大用辈共为蒙蔽日事宴游上干天和灾祲数告廷臣屡谏未蒙省纳若辈必谓宫中行乐何关治乱此正奸人蒙君之故术也陛下广殿细旃岂知小民穷檐蔀屋风雨之不庇锦衣玉食岂知小民祁寒暑雨冻馁之弗堪驰骋宴乐岂知小民疾首蹙额赴诉之无路日者雷震郊坛彗出紫微夏秋亢旱江南米价翔贵京城贼盗横行可恣情纵欲不一顾念乎伏望侧身修行屏求成辈以绝乱源委任大臣务学亲政以还至治疏入帝不省】质实【紫微西蕃紫宫垣十五星其西蕃七东蕃八参井西方参十星主斩刈又为天狱主杀伐又主权衡所以平理也南方东井八星天之南门黄道所经天之亭候主水衡事法令所取平也下台三台六星两两而居起文昌列抵太微西近文昌二星曰上台次二星曰中台东二星曰下台太微天子廷也五帝之座也十二诸侯府也具见晋书天文志陆崑字如玉归安人】

八月立皇后夏氏

【初帝将大婚诏取太仓银四十万御史赵佑言左右以婚礼为名将肆无厌之欲计臣惧祸而不敢阻阁臣避怨而不敢争用如泥沙坐致耗国不幸兴师遭饥馑将何以为计哉後户部尚书韩文亦以为言乃得减四之一】质实【武宗孝静皇后夏氏上元人赵佑字汝翼双流人】

九月命太监崔杲王璘监南京织造

【杲等乞盐万二千引所司执奏给事中陶谐御史杜旻邵清杨仪等先後谏健等亦言不可帝召健等至煖阁面议颇有所诘问健等皆以正对帝不能难最後正色曰天下事岂皆内官所坏朝臣坏事者十常六七先生辈亦知之因命盐引悉如杲请健等退再上章言不可帝

自愧失言乃俞健等所奏于是中外咸悦谓帝庶几改过矣】质实【陶谐字世和会稽人杜旻山阳人邵清字士连江宁人杨仪永壽人】

冬十月以刘瑾掌司礼监罢华盖殿大学士刘健武英殿大学士谢迁

【瑾以内官监兼督团营帝渐信用日与马永成等进鹰犬歌舞角觝之戏导帝佚游又劝帝令镇守内臣各进万金奏置皇庄增至二百余所畿内大扰健等谋去瑾永成诸人会给事中陶谐御史赵佑等交章论劾章下阁议健等持之甚力钦天监五官监侯杨源亦因星变陈言乞亲元老斥宠幸帝意颇动而不能断也先是户部尚书韩文以八党用事每朝退与僚属言辄泣下郎中李梦阳进曰公泣何为比谏官疏劾诸阉执政符甚力公诚乃此时率大臣固争去八人易易耳文毅然改容曰善纵事弗济吾年足死矣不死不足报国即令梦阳草疏既具文读而删之遂率诸大臣状关以上畧曰伏覩近日朝政益非号令失当中外皆言太监马永成谷大用张永罗祥魏彬邱聚刘瑾高凤等造作巧伪淫荡上心击球走马放鹰逐犬俳优杂剧错陈于前至导万乘輿外人交易押昵嫖褻无复礼体日游不足夜以继之劳耗精神亏损志德此辈细人惟知蛊惑君上以便己私而不思皇天眷命祖宗大业皆在陛下一身万一游宴损神起居失节虽齏粉若辈何补于事窃观前古阉宦误国为祸尤烈汉十常侍唐甘露之变其明验也令永成等罪恶既着若纵不治将来益无忌惮必患在社稷伏望陛下奋乾刚割私爱上告两宫下谕百僚明正典刑潜销祸乱之阶永保灵长之祚疏入帝惊泣不食乃遣司礼中官李荣王岳等至阁议一日三反欲安置之南京迁欲逆诛之以为处之未尽健推案哭曰先帝临崩执老臣手付以大事今陵土未乾使若辈败坏至此臣死何面目见先帝健迁声色俱厉惟李东阳语少缓王岳者素刚直嫉邪慨然曰阁议是具以健等言白帝明日忽有旨召诸大臣入至左顺门健迎谓曰事垂济公等第坚持尚书许进曰过激恐生变健不应有顷李荣手诸大臣疏曰有旨问诸先生诸先生言良是第奴侪事上久不忍即置理幸少寬之上自处耳衆相顾莫言韩文乃抗声数八人罪侍郎王鏊助之曰八人不去乱本不除荣曰上非不知第欲少寬之耳鏊直言曰设上不处奈何荣曰荣颈有铁里耳敢坏国事遂退健约文及诸九卿诘朝伏阙西争王岳从中应之因诛瑾等焦芳闻之驰告瑾瑾乃率永成等夜伏帝前环泣以首触地曰微上恩奴侪磔餒狗矣帝色动瑾进曰害奴侪者王岳也帝曰何故瑾曰岳结阁臣欲制上出入故先去所忌耳且鹰犬何损万几若司礼监得人左班官安敢如此帝大怒立收岳命瑾掌司礼监永成大用掌东西厰各分据要地及旦诸臣入朝将伏阙知事已中变于是健东阳迁俱上章求去瑾矫旨聽健迁归而独留东阳岳充南京净军追杀之于途于是中外大权悉归于瑾矣健迁濒行东阳祖饯泣下健正色曰何哭为使当日多出一语与我辈同去矣东阳喟然】质实【王鏊字济之吴县人】

以焦芳为文渊阁大学士吏部左侍郎王鏊兼翰林学士入内阁预机务

【初许进辈以年资推芳入吏部刘健不悦曰老夫不久归田此座即焦有恐诸公俱受其害耳及是果附刘瑾谋炳政而廷议独推鏊瑾迫公论令鏊与芳同入阁芳在阁裁阁章奏一阿瑾意鏊虽持正不能与抗事有不可与李东阳弥缝其间多所补救东阳虽为首辅尝委蛇避祸芳嫉其位在已上日夕构之于瑾会通监纂要成瑾以誉写不谨欲因是为东阳罪东阳

大窘芳为解乃止除誊録官数人名东阳得无事】质实【历代通监纂要凡九十二卷是书修于孝宗时芳未尝为总裁官至是命文华殿改誊芳遂列名其间及进呈书办官张骏等皆擢秩装潢匠役亦悉授官】

给事中刘?吕翀请留刘健谢迁不报寻杖?翀及南京给事中戴铣御史薄彦徽等于廷并斥之

【健迁既去位莅翀抗章请留言二臣不可聽去者有五孔子称孟庄子之孝以不改父之臣为难二臣皆先帝所简以遗陛下今陵土未乾无故罢遣何以慰在天之灵不可一也二臣虽以老疾辞实由言违计沮不得其职而去陛下听之亦以不善将顺非实有意优老也在二臣得去就之义在陛下有弃老成之嫌不可二也今民穷财殫府藏虚罄水旱盗贼星象草木之变迭见杂出万一祸生不测国无老成谁与共事不可三也自古刚正者难容柔顺者易合二臣既去则柔顺之人必进将一听陛下所为非国家之福不可四也书曰无遗寿考健等谄练有素非新进可侔今同日去国天下後世将谓陛下喜新进而厌旧人不可五也帝不听先是给事中艾洪劾中官高凤侄得林营掌锦衣卫诸疏传至南京为协同守备武靖伯赵承庆所得应天尹陆珩録以示诸僚兵部尚书林瀚闻而太息于是铣彦徽率诸科道官合疏言元老不可去宦?不可任刘瑾等激帝怒尽逮之并范翀洪俱予杖削籍词连承庆瀚珩亦皆得谴兵部主事王守仁论救铣等廷杖四十谪龙场驿丞时南京御史蒋钦与铣等同被罪出狱甫三日钦独具疏劾瑾言刘瑾小?子耳陛下亲以腹心寄以耳目待以股肱殊不知瑾为悖逆之徒蠹国之贼窃柄弄权万民失望愁叹之声动彻天地幸听臣言急诛瑾以谢天下然後杀臣以谢瑾疏入再杖三十系狱越三日复具疏请杀瑾且言陛下不杀此贼当先杀臣使臣得与龙逢比干同游地下臣诚不愿与此贼并生言尤激切既入复杖三十】质实【龙场驿在贵阳府修文县治今废刘?字惟馨涪人吕翀江西永丰人戴铣字宝之婺源人薄彦徽阳曲人艾洪滨州人陆珩归安人王守仁字伯安余姚人蒋钦字子修常熟人钦属草时灯下微闻鬼声钦念疏上必掇异祸此必先人之灵欲寢此奏因正衣冠立曰果先人盍厉声以告言未已声出壁间益凄怆钦叹曰业已委身义不得緘嘿负国为先人羞遂奋笔曰死即死此橐不可易也声遂止杖後三日卒于狱】

十一月削户部尚书韩文职

【刘瑾恨文甚日令人伺文遇不得及是有以伪银输内库者遂以为文罪诏降一级致仕给事中徐昂疏救中旨责其党护遂落文职并除昂名文出都门乘一骡宿野店而去瑾又憾李梦阳代文草疏矫旨谪山西布政司经历勒致仕既而瑾复据他事下梦阳狱将杀之赖康海救得免】质实【徐昂泰兴人康海字德涵武功人与李梦阳素以诗文相倡和梦阳在狱书片纸出曰对山救我对山者海别号也海与瑾同乡瑾前招致之海不肯往因梦阳故遂谒瑾瑾大喜为倒屣逆海因诡词说之梦阳遂得释後瑾败海坐党落职而梦阳起为江西提学副使复以与巡按御史江万实相讐奏罢官久之乃卒梦阳才思雄鸷言文必秦汉诗必盛唐与海及何景明徐祯卿边贡王九思王廷相号七才子皆以诗名当世迨嘉靖朝李攀龙王世贞出复奉以为宗天下推李何王李为四大家无不争效其体云江万实大竹人何景明字仲

默信阳人徐祯卿字昌谷吴县人边贡字廷实历城人王九思字敬夫鄠人王廷相字子衡仪封人李攀龙字于鳞历城人王世贞字元美太仓人】

十二月除曲阜孔氏田赋

罢工部尚书杨守随左都御史张敷华

【韩文等既逐守随愤甚乃上章极论之曰陛下嗣位以来左右近臣不能祇承德意尽取先朝良法而更张之尽诬先朝硕辅而剗汰之天下嗷嗷莫措手足内臣刘瑾等八人奸险佞巧诬罔恣肆而瑾尤甚日以荒纵导陛下禁内鼓钲震于远迩宫中火礮声彻书夜淆杂尊卑陵夷贵贱引车骑而供执鞭之役列市肆而亲商贾之为致陛下日高未朝漏尽不寝此数人者方且窃揽威权诈传诏旨放逐大臣刑诛台谏邀阻封章广纳货赂传奉冗员多至千百招募武勇收及孩童紫绶金貂尽予爪牙之士蟒衣玉带滥授心腹之人附已者进官忤意者褫职内外臣僚但知畏瑾不知畏陛下夫太阿之柄不可授人今陛下于兵刑财赋之区机务根本之地悉以委之或掌团营或主两厰或典司礼或督仓塲大权在手彼复何惮于是大行杀戮广肆诛求府库竭于上财力殫于下武勇疲于边上下胥谗神人共愤伏望大奋乾刚立寘此曹重典远鉴延熹之失母使臣蹈蕃武已覆之辙疏入瑾憾甚至除夕朝罢忽传旨与张敷华俱致仕敷华当廷臣请去瑾等时独抗疏论列语尤切至故瑾亦深衔之】质实【张敷华字公实安福人】

【丁卯】二年春正月乙亥朔日有食之

二月下御史王良臣王时中于狱

【良臣奉命清军江西闻戴铣等被逮驰疏救逮下镇抚司狱杖三十斥为民时中出按宣大所黜贪污者甚衆瑾闻之怒亦逮下狱荷重校于都察院门时中病甚其妻往者遇都御史刘宇哭且诟宇不得已言于瑾释之謫戍铁岭卫】质实【王良臣陈州人王时中字道夫黄县人初时中为鄢陵知县最有声尝出郊旋风拥马首时中曰冤气也迹得屍胔并乃妇与所私者杀之遂伏辜刘宇字至大钧州人也】

三月太监刘瑾矫诏榜奸党于朝堂

【刘健谢迁虽去瑾憾不已矫诏列健迁及尚书韩文扬守随林瀚都御史张敷华郎中李梦阳主事王守仁王纶孙磐黄昭检讨刘瑞给事中汤礼敬陈霆徐昂陶谐刘?艾洪吕翀任惠李光翰戴铣徐蕃牧相徐暹张良弼葛嵩赵士贤御史陈琳贡安甫史良佐曹闵王宏任诺李熙王蕃葛浩陆崑张鸣凤萧乾元姚学礼黄昭道蒋钦薄彦徽潘鏜王良臣赵佑何天衢徐珏杨璋熊卓朱廷声刘玉等五十三人为奸党榜示朝堂召羣臣跪金水桥南宣戒之先是鞫狱时独任诺王蕃抵不与知虽仍列五十三人之数识者耻道其名】质实【王纶开州人黄昭江陰人刘瑞内江人汤礼敬字仁甫丹徒人陈霆德清人任惠滦州人李光翰新乡人徐蕃泰

州人牧相余姚人徐暹张良弼皆历城人葛嵩字鍾甫无锡人赵士贤石首人陈琳字玉畴甫田人贡安甫字充仁史良佐字禹臣皆江陰人曹闵上海人王宏六合人任诺史未详其里籍明实録作任讷李熙上元人王蕃溧州人葛浩字天洪上虞人张鸣凤清平人萧乾元万安人姚学礼巴县人京师黄昭道平江人潘鏜字宗节六合人何天衢道州人徐珏字用砺江夏人杨璋孝感人熊卓丰城人朱廷声字克谐进贤人刘玉字咸栗万安人】

敕各镇守太监预刑名政事

【後刘瑾诛从兵部言乃令缴敕悉如旧制】

发明【纪纲法度自天子出百僚庶尹奉职宣化而已何预之可云而况乎中官且以内臣出而镇守即无诏諭亦断无干预刑名政事者此漏卮濫觴必至之势也今复宠之纶綍重以责成若輩更何所顾忌耶依古以来阉寺擅权乱政之事史不絶书然欲明目张胆尽许其揽与朝政而仍得藉口奉勅以恣行其私臆则未有至於此极者说者谓是时中旨皆出自刘瑾疑即瑾之欲其同类分擅天下之柄而乃有是敕武宗几若罔闻知者洵若是也亦可慨矣夫】

夏五月度僧道四万人

复宁王宸濠护卫

【初宁靖王奠培以私献惠二王官人逼内宫熊壁自尽华护卫再传至宸濠轻佻无威仪而善以文行自饰术士李自然李日芳妄言其有异表又谓城东南有天子气宸濠喜时时誚朝中事闻谤言辄喜或言帝明圣朝廷治即怒至是贿刘瑾请复所夺护卫竟许之】质实【宸濠宁献王权五世孙惠王盘斌曾孙】

六月逮前总制三边都御史杨一清下狱寻释之【先是一清巡抚陕西以秦紘後总制罢不设三边有警不相援患无所统掇请遣大臣兼领之刘大夏以一清才即奏任为总制一清乃建议修边言花马池至灵州地势平衍寇每从此毁墙入则固原庆阳平凉巩昌皆受患成化时宁夏巡抚徐廷璋筑边墙绵亘二百余里在延绥者余子俊修之甚固後边備疎墙塹日夷弘治末总制秦弦治塹七百里谓可无患不一二年寇复深入是紘所修不足扞敌臣以为防边之策大要有四修濬墙塹以固边防增设卫所以壮边兵经理灵夏以安内附整饰韦州以遏外侵因条其便宜以延绥安边营石滂池至定边营百六十三里平衍宜墙者百三十一里险崖峻阜可铲削者三十二里宜为墩台连接横城以北黄河南岸有墩三十六宜修复帝可其议为特发帑金数十万工方兴而瑾憾一清不附已一清遂引疾归其成者仅四十里至是瑾诬一清破冒边费逮下锦衣狱大学士李东阳王鏊论救乃得释已而瑾托言边仓刍粟多朽腐矫旨逮各省巡抚及管粮郎中下狱一清复坐是先後罚米六百石】质实【石滂池在今榆林卫西定边营在今榆林府西六百六十里横城堡在清水营西北八十里榆林志黄河自横城堡西折而北迳三受降城南至废东胜州西折而南入府谷县界杨一清字应宁安

宁州人徙居丹徒】

秋八月作豹房

【帝为羣阉蛊惑乃于西华门别构院籓筑宫殿而造密室于两厢勾连栊列谓之豹房初帝令内侍仿设肆身衣估人衣与贸易持簿筭喧詢不相下更令作市正调和之拥至廊下家廊下家者中官于永巷所张酒肆也坐当垆妇其中帝至杂出牵衣螽簇而入醉即宿其处杨守随疏所谓亲商贾之为者以此至是既作豹房朝夕处其中称之日新宅日召教坊乐工入新宅承应义之乐工愬言乐户在外府多有今独居京师者承应不均遂敕礼部檄取河间诸府乐户精技业者遣送教坊人日以百计于时羣小见幸者皆集于豹房矣】

冬十月太监刘瑾矫旨杖戍钦天监五官监候杨源道死

【源以霾雾时作言此衆邪之气陰冒于阳臣欺其君小人擅权下将叛上引譬甚切刘瑾怒矫旨杖三十释之源又言占得火星入太微垣帝座前或东或西往来不一乞收揽政柄思患豫防盖专指瑾也瑾大怒召而叱之曰若何官亦学为忠臣源厉声曰官大小异忠一也矫旨又杖六十谪戍肃州在道以创卒初源父宣在天顺初以忠諫名天下及是源以小臣抗节尤为士论所重云】质实【杨源字本清丰城人】

以杨廷和为户部尚书兼文渊阁大学士预机务【廷和先为詹事附经义指斥近幸刘瑾恶之传旨改南京吏部侍郎寻迁南京户部尚书及是帝问杨学士何在瑾以南京户部对乃召入阁】质实【杨廷和字介夫新都人】

【戊辰】三年春正月大计外吏太监刘瑾以中旨黜翰林学士吴俨御史杨南金

【俨家多赀瑾遣人求金陷以美官俨峻拒瑾怒南京素清鯁都御史刘宇恶其不阿已笞辱之南金愤甚告疾去宇谗于瑾瑾亦怒之时方考察朝覲官瑾忽批奏尾勒俨致仕黜南金为民初瑾每奏事必伺帝为戏弄时帝厌之即挥去曰吾用若何事乃溷我自此大小事瑾皆专决不复白帝及是奏出中外莫不骇异瑾不学批荅章奏皆持归私第与妹婿礼部司务孙总松江市倅张文冕相参决聪文冕不能文辞率鄙冗焦芳为润色之已而瑾威权日甚内外章奏先具红揭投瑾号红本然後上通政司号白本皆称刘太监而不名都察院奏谏误名瑾瑾怒甚屠瀟率属跪谢乃已公侯勲戚以下莫敢钧礼每私谒相率跪拜其熏灼如此】质实【吴俨字克温宜兴人杨南金邓川人】

夏四月前太子太保吏部尚书王恕卒

【恕敷历中外五十余年刚正清严始终一致所引荐耿裕彭韶何乔新周经李敏张悦倪岳刘大夏戴珊张懋等皆一时名臣他贤才久废草泽者拔擢之恐後弘治十八年间衆正盈朝职业修理号为极盛者恕力也帝嗣位遣行人齎敕存问賚羊酒益廩隶且谕以说论无隐

恕陈国家数事帝优诏报之至是卒年九十三讷闻辍朝赠特进左柱国太师諡端毅】

六月太监刘瑾执朝官三百余人下狱

【午朝退有遣匿名书于御道数瑾罪者瑾矫旨召百官跪奉天门下顷之令堂上官起瑾出立门左翰林跪白于瑾亦令起御史甯杲诉曰某等素知法度岂敢为此此或新进士所为瑾曰与新进士何预繇若辈坏朝廷事吾整治之遂怀怨望若辈岂未闻太祖法耶是日酷暑太监李荣乘瑾入以冰瓜?羣臣曰君等且起比瑾出荣曰来矣速就跪瑾瞥见之怒太监黄伟愤甚谓诸臣曰书所言皆为国为民事挺身自承虽死不失为好男子奈何枉累他人瑾怒曰匿名书罪已当死况寘之御道是何好男子耶即日逐伟南京勒荣闲住及日暮尽收下锦衣狱凡三百余人明日大学士李东阳等力救瑾亦廉知其同类所为衆获免而主事何玑等三人已喝死时瑾恣行凶暴尝以尚宝司卿崔璿副使姚祥郎中张玮违制乘肩輿荷重校几死亦赖东阳等申救始释而戍之其他庶官以荷校死者甚衆】质实【甯杲蓬萊人崔璿里贯无考按雷礼列卿记璿于正德元年任尚尚宝司卿姚祥归善人张玮字嘉玉苏州卫人】发明【瑾因匿名书数已罪敢于矫旨召百官长跪甚至有署甚喝死者瑾之横至此极矣向非廉知其同类所为则此下狱之三百余人遭其惨毒当更有不可言者观其书不出于外人而即出于其侪党益信衆怨所归人心不昧虽若辈亦知其为法所不容而武宗乃恣其所为而不之觉可谓好恶与人殊矣至翰林官怵于凶焰竟至跪白乞怜而甯杲身为御史脂韦其辞以诉且欲嫁祸于新进士尤为可鄙转不若黄伟数言犹能抗直何士气之委靡一至于此哉】

秋八月立内厰

【时东西厰缉事人四出江西南康民吴登显等端午竞渡造龙舟捕之籍其家偏州下邑因见华衣怒马作京师语者辄相惊告官司密赂之以求免祸道路惶惧人不贴席刘瑾意犹未逞复立内厰自领之尤酷烈中人以徽法无得全者凡所逮捕一家犯邻里皆坐或瞰河居者以河外居民坐之屡起大狱冤号相属矫旨悉逐京师客佣命寡妇尽嫁丧不葬者焚之于是辇下且?汹矣】

太监刘瑾创罚米法

【瑾憾前尚书韩文甚捃摭万端会户部偶遗故籍欲以为文罪属尚书顾佐上其事委咎于文佐不可夺佐俸三月听致仕去而逮文及侍郎张缙下锦衣狱数月始释調知文廉家素贫困创罚米法以困之罚文千石输大同缙五百石输宣府寻又假他故罚文米再家业荡然自是朝官忤瑾者悉诬以旧事罚米输边刻期完纳稍缓辄罪之时雍泰自操江擢南京户部尚书瑾怒泰与已同乡不通问擢任甫四日即令致仕谓吏部尚书许进私泰削其籍追斥前尚书马文升刘大夏及给事中赵士贤御史张津等为民其他罚米者五十余人皆尝荐泰者瑾日以朘削为事索巡盐官贿不当意责令补偿商课追论及前任者御史彭程尝于孝宗时巡两浙盐久物故家止遗一孙女罄产不足偿则并女鬻之行道皆为流涕】质实【雍泰字

世隆陕西咸宁人张津字广汉博罗人】

九月逮前兵部尚书刘大夏下狱戍肃州

【初孝宗时大夏在兵部刘宇为大同巡抚宇私市善焉赂遗权要大夏于宴见时为孝宗言之宇闻深憾大夏及是与焦芳潜于刘瑾曰籍大夏家可当边费十二遂假田州土官岑猛事逮系锦衣狱岑猛于孝宗时与思恩土官岑濬相仇杀濬寻伏诛大夏议以思恩田州俱设流官猛世济凶恶宜降千户徙之福建而猛逗遛不肯行及是纳贿于瑾求复故地瑾许之遂兴是狱欲坐大夏激变论死阁臣王鏊曰岑氏未叛何名激变都御史屠滂亦言刘尚书无死法瑾谩骂曰即不死可无戍耶瑾亦调大夏家实贫乃坐戍极边初拟广西芳曰是送之归也遂改肃州大夏年已七十三徒步荷戈至大明门下叩首而去观者叹息泣下大夏至戍所遇团操辄就伍所司固辞大夏曰军固当役也瑾犹摭事罚米输塞下者再後遇赦归及瑾诛复原官致仕】

冬十月振湖广河南饥

【遣南京工部右侍郎毕亨兼佥都御史往监振事是年南京凤阳府皆饥亦命振之】

【己巳】四年春二月黜前大学士刘健谢迁为民

【初健迁在内阁时诏天下举怀才抱德之士至是浙江大吏以余姚周礼徐子元许龙上虞徐文彪四人应诏刘瑾焦芳方日侦察健迁过无所得遂以礼等皆迁同乡而草诏由健欲用此为二人罪矫旨为天下至大岂无应诏者何余姚处士之多耶乃下礼等镇抚司狱属主者周内入健迁欲遂逮二人籍其家东阳力解芳从旁厉声曰纵轻贷亦当除名旨下果如芳言礼等咸戍边尚书刘宇复劾两司以下访举失实皆罚米输塞下且榜禁余姚人不得选京官是年十二月都给事中李宪复请夺健迁及尚书马文升刘大夏韩文许进署诰命诏并追还所赐玉带服物同时夺诰命者六百七十五人希瑾芳之旨也时芳附瑾势日逞私憾芳先以尹旻党被谪疑出彭华意衔江西人次骨寻有满刺加使臣亚刘本者故江西万安人本姓萧名明举逃罪至海外依满刺加与其国人端亚智等来朝既而谋入浞泥国索宝物且杀亚智等事闻方下所司劾奏芳即署其尾曰江西土俗故多玩法如李孜省彭华尹直等素被物议宜裁减解额十五名通籍者勿选京职着为令且言王安石祸宋吴澄仕元宜榜其罪使他日毋得滥用江西人杨廷和解之曰以一奸民波及一方既裁解额矣宋元人物亦欲并案耶乃止芳深恶南人虽论古人亦必诋南誉北尝作南人不可为相图进瑾其总裁孝宗实录若何乔新彭韶谢迁皆肆诬诋自喜曰今朝廷之上谁如我直者芳欲自私其乡人以刘瑾乃陕西人讽给事中赵铎奏言乡试额不均遂票旨增陕西额为百以媚瑾增其乡河南为九十五并及山东西俱增至九十其徇私变法类如此瑾芳败皆复旧制】质实【徐姚秦县元升州明复为县上虞秦县隋唐复置明与余姚并属绍兴府万安宋县明属吉安府今俱因之浞泥在西南海中自占城四十日可至初属爪哇後属暹罗周礼字德恭着有续纲目发明李宪岐山人赵铎曲沃人】

命给事中张瀚等勾稽天下钱粮

【先是诸司官朝觐至京畏瑾虐焰恐罹祸各斂金赂瑾每省至二万余往往贷于京师富豪复任後倍偿之名曰京债上下交征恬不为异瑾私人张练见瑾急贿天下怨刺骨因乘间说曰公亦知贿入所自乎非盗官帑即剥小民彼借公名自厚入公者未十一而怨悉归公何以谢天下瑾大然之乃分遣瀚等十四人盘察南北直隶各行省钱粮盖欲掩其迹也而御史胡节按山东还犹循故事厚遗瑾瑾发之捕节下狱少监李宣侍郎张鬻指挥同知张良醪白金二万为馈瑾纳金于官按三人罪其他因贿得罪者甚衆方瑾急贿时出使官皆索重贿给事中周钥勘事淮安与知府赵俊善俊许贷千金既而不与钥计无所出舟行至桃源自刎从者救之已不能言取纸书赵知府悞我遂卒事闻繫俊至京责钥死状竟坐俊罪至是索贿之风少衰然瀚等四出率务诛求有司争厚斂以补帑所在騷然已而遣使核各边屯田希瑾意者诡增田数搜括惨毒户部侍郎韩福尤峻急辽卒不能堪胁衆为乱守臣发帑抚慰之乃定给事中徐仁等劾福奉行过当瑾迫公议勒福致仕时瑾专事苛刻先後出使盘察者或不知迎合辄得谴给事中安奎潘希曾御史张彧刘子厉以无重劾下狱奎或荷校频死大学士李东阳疏救始释为民希曾子厉亦皆杖斥于是竟为?击给事中高滂劾沧州地所劾治六十一人滂父铨尝为巡抚保定沧州其所隶也滂至诬劾其父以媚瑾士论鄙之】质实【桃源金以宿迁县之桃园镇地置准滨县後省元复置桃园县後譌园为源明属淮安府今因之张绿安定人胡节零陵人周钥海阳人赵俊内江人韩福西安前卫人徐仁慈谿人潘希曾金华人张彧元氏人刘子厉安福人高滂江都人】

发明【朝觐官斂金赂瑾假贷京师富豪获倍称之息遂有京债之名又何异前代之称债帅者乎顾瑾惟知黷货而心计殊疎自张彩善为进说其取愈盈其术愈巧而孰知欲盖弥张乌能掩其恶哉至盘察之使四出核边之举日闻诛求搜括假厘剔之名济谿壑之欲然且馈遗得罪纳金入官务使人主深信其公忠而後得行其私计小人之工子固结主知如此观瑾得罪时武宗往籍其家亲见金银珠玉无?而後为之大恕则其平日之以术自卫者亦张彩之力居多耳】

夏四月罢大学士王鏊

【时中外大权悉归刘瑾鏊初开诚与言间听纳而焦芳专事嬖阿瑾横弥甚鏊不能救力求去疏三上许之家居十四年廷臣交荐竟不起 鏊博学有识鉴文章尔雅议论明畅晚着性善论一篇王守仁见之曰王公深造世未尽知也少善制举义後数典试程文冠一时取士尚经术险诡者一切屏去文体为一变明代举子业最擅名者前则鏊与唐顺之後则归有光胡友信也】质实【唐顺之字应德武进人归有光字熙甫崑山人胡友信字成之德清人】

五月改翰林官吴一鹏等于两京六部

【时孝宗实录成内阁援会典故事请序迁编纂诸臣刘瑾矫旨以刘健等前纂修会典多糜费皆追夺陞职大学士李东阳亦与马居数日乃以实录功复东阳职因附批调侍讲吴一

鹏于南京刑部侍读徐穆于南京礼部编修顾清于南京兵部汪俊于南京工部皆员外郎编修贾諫李廷相于兵部温仁和于户部刘龙于礼部翟銓董玘于刑部崔铣于南京吏部陆深于南京礼部检讨王九思于吏部汪伟穆孔暉于南京礼部易舒诰于南京户部皆主事始瑾恶翰林官不下已欲尽出之外为张彩劝沮及是又持前议彩复力沮而焦芳父子与检讨段灵辈谓可乘此以挤所不悦者乃疏名上之瑾怱怱成之谓之扩充政事然王九思实瑾党既改部甫踰年擢至郎中瑾败谪壽州同知寻复被劾致仕】质实【孝宗实禄二百二十四卷正德元年刘健谢迁等奉诏修健迁去位李东阳焦芳等续修吴一鹏字南夫长洲人徐穆吉水人顾清字士廉华亭人汪俊字抑之弋阳人贾諫字鸣和临颖人李廷相濮州人温仁和华阳人刘龙襄垣人翟銓字仲鸣诸城人董玘会稽人崔铣字子钟安阳人陆深字子渊上海人汪伟字器之俊弟也穆孔暉堂邑人易舒诰攸县人段灵阳曲人】

六月以吏部尚书刘宇兼文渊阁大学士预机务以张彩为吏部尚书宇旋罢

【初宇介焦芳以结瑾自宣大总督入为左都御史瑾好摧折台諫宇辄以小过笞御史瑾以为贤瑾始通贿望不过数百金宇首以万金贽瑾大喜曰刘先生何厚我遂转兵部尚书加太子太傅字子仁应殿试求一甲不得厚贿瑾内批授庶吉士踰年授编修时许进为吏部尚书宇谗于瑾遂代其位宇在兵部时贿赂狼籍及为吏部彩方仕选郎权势出宇上文吏赠遗又不若武弁尝悒悒叹曰兵部自佳何必吏部也至是瑾欲用彩代宇乃令宇入阁宇宴瑾阁中极驩明日将入阁任事瑾曰尔真欲相耶此地岂容再入宇不得已乞省墓去彩议论便利善伺权贵指初矫饰微声誉尚书马文升等皆爱之给事中刘瑾尝劾其颠倒选法数事文升悉为辨析彩即五疏移疾归及瑾用事焦芳以彩与瑾同乡力荐于瑾瑾欲致之因着令病过期不赴者斥为民彩乃就道既见瑾高冠鲜衣貌白皙修伟词辨泉涌瑾大敬爱执手移时曰子神人也我何以得遇子彩自是一意事瑾由郎署三迁遽长六卿每瑾出休沐公卿往候自辰至晡未得见彩故徐徐来直入瑾小阁欢饮而出始揖衆人衆以是益畏彩见彩如瑾礼彩与朝臣言呼瑾为老耆凡所言瑾无不从彩恣意变乱旧格贿赂肆行海内金帛奇货相望涂巷间性尤渔色抚州知府刘介其乡人也娶妾美彩特擢介太常少卿盛服往贺曰子何以报我介惶恐谢曰一身外皆公物彩曰命之矣即使人直入内牵其妾輿载而去又闻平阳府知府张恕妾美索之不得令御史张禴按致其罪拟戍恕献妾始得论减其横如此】质实【刘介清涧人张恕霸州人张禴平谷人】

秋闰九月小王子寇延绥

【围总兵官吴江于陇州城寻解去复入犯花马池总制尚书才寬率师御之颇有斩获扭胜深入敌?兵突出寬中流矢死总兵官曹雄拥兵不救佯引罪乞解兵柄令子謐齎奏诣京师瑾异謐貌妻以从女优诏褒雄令居职如故纠者反被责既而遣给事中郝夔核延绥战功濒行瑾有所属夔念从之则达国典不从则得祸竟自经死时瑾毒虐搢绅廷臣自经死者又有冯顥许天锡顥以事忤瑾为瑾所诬因自经天锡于前年春使安南还见朝事大变敢言者皆贬斥而瑾肆虐加甚天锡大愤奉命请核内库得瑾侵匿数十事知奏必罹祸乃夜具登闻鼓状将以尸諫令家僮于身後上之逆自经僮匿其状而遁或曰瑾侦知天錫将发其罪夜令人

缢杀之莫能明也会有旨令锦衣卫点閱六科给事中不至者劾之锦衣帅劾天錫三日不至讯之死矣闻者哀之】质实【才寬字汝栗迁安人曹雄西安左卫人郗夔平定人】

湖广江西四川盗起

【时连岁饥饉四方盗贼并起湖广则沔阳贼杨清邱仁等出没湖湘间江西则东乡贼王钰五徐仰三等姚源贼汪澄二王浩八等华林贼罗光权陈福一等各据山寨而赣州大?山贼何积钦等复蔓延福建广东之境四川则保宁贼蓝廷瑞自称顺天王鄢本恕自称刮地王廖惠自称扫地王各拥衆至数万官军讨之不能克羣盗遂日炽】质实【东乡本临川金谿及进贤余干安仁之遂鄱明正德八年置县属抚州府今因之姚源洞在万年县东里许深可十五里华林山在瑞州府西北七十五里山周百里大?山在长宁县南二百里山绵亘数百里界江西及福建广东三省之交】

【庚午】五年春二月以曹元为吏部尚书兼文渊阁大学士预机务

【元柔佞滑稽不修士行与刘瑾有连自瑾侍东宫即与相结及瑾得志遂夤缘躋位至兵部尚书兼督团营加太子少保将校迁除皆惟瑾命元所入亦不貲至是遂代刘字入阁琐琐无能在阁终日饮酒谐谑道里巷鄙语而已】质实【曹元字以贞大宁前卫人】

三月以刑部尚书洪钟总制川陕河南鄖阳军务【沔阳贼杨清邱仁等围岳州?临湘钟檄布政使陈镐副使蒋昇及都指挥潘勲柴奎击破之湖湘成宁钟遂移师入蜀蜀自眉州贼刘烈倡乱败而逃诸不逞假其名剽掠巡抚林俊绘形捕莫能得蓝廷瑞鄢本恕廖惠等继起势益张衆十万余伪署四十八总管延蔓陕西湖广之境廷瑞与惠谋据保宁本恕谋据汉中取鄖阳由荆襄东下俊方谋遏通江而惠已至攻陷其城杀参议黄瓚适官军自他郡还贼疑援兵至遁去俊发土兵蹙之龙滩河贼坠崖溺水死者无算逆擒惠廷瑞本恕奔陕西西乡越汉中至大巴山官军追及复大破之会钟至蜀与俊议不合军机牵制而泸州贼曹甫纠衆寇川南攻破江津僉事吴景典史张俊死之林俊闻乱自率兵驰救廷瑞等因乘间招集散亡遂于明年正月陷营山杀僉事王源势复炽钟乃檄陕西湖广河南兵分道进剿而林俊以元日夜半掩击甫营俘斩二千有奇甫衆溃解还兵与钟会未几湖广兵败贼于陕西之石泉廷瑞走汉中都指挥金冕围之陕西巡抚蓝章方驻汉中廷瑞遣其党何虎诣章乞还川就抚章以廷瑞本川贼恐急之必致死陕且受患遂令冕护之出境廷瑞既入川求降钟令至东乡听抚贼意在缓师迁延累月依山结营要求营山县地屯其衆且必欲得质方出见钟竟以汉中通判罗贤为质本恕廷瑞乃先後来谒约既定剽如故旋以官军杀其樵采为辞害罗贤欲遂脱走官军为七垒守之不得逸廷瑞乃以所掠女子诈为已女结婚于求顺土舍彭世麟冀得间逸去世麟密白钟钟授方畧使图之及期廷瑞本恕暨其党王金珠等二十八人咸来会伏发悉就擒惟廖麻子得脱其衆闻变惊溃渡河钟遣兵追击俘斩七百余人既而廖麻子与曹甫合掠营山蓬州甫党方四陷南川綦江等县攻江津薄重庆僉事马昊以土兵击四四败奔婺川忽与甫不合自相攻衆遂散四变姓名走为他将所获昊被獎进副使寻昊偕总兵官杨宏副使张敏何珊等击甫大败之贼势日蹙时林俊数与钟抵牾已乞休去钟乃议招抚甫方约降

而廖麻子忿甫背已杀之并其衆转掠川东官军不敢击潜蹶贼後馘良民为功士兵虐尤甚民间为之謡曰贼如梳军如篦士兵如髻论者咸咎钟之不能戢下云是时川陕皆苦兵州县残破守土官吏死贼者自吴景等外有扶风知县孙玺剑州判官罗明梁山主簿时植营山典史邓俊俊与王源同御贼被杀玺奉蓝章檄往城畧阳工未毕贼至县令严顺欲去玺拔刀斫坐几曰欲去者视此乃率寮属坚守数日城陷玺被执大骂不屈贼齎杀之顺逃去诬玺俱逃谓溺于江以他人屍敛玺子启视非是讼之朝勘得死节状赠光禄少卿赐祭予廕抵顺罪明以吏起家鄢本恕逼其城与子介拒守城陷父子皆骂贼死植死方四之难妻贾闻变即自缢女九岁赴火死明植皆赠恤如制植妻女表为贞烈又有士民冒死杀贼为赵趣徐敬之袁璋之属趣梁山诸生贼攻城同友人黄甲李凤何璟萧鋭徐宣杨茂寛赵采誓死拒守城陷皆死林俊嘉其义立祠祀之敬之亦梁山人衆推为部长以拒贼陷阵死璋江南人素以勇侠闻林俊委之剿贼所在有功後为贼执其子袭挺身救之连杀七贼亦被执俱死袭死三日两目犹瞠视其父林俊表其门曰父子忠节】质实【临湘宋县明属岳州府通江汉宕梁县地西魏分置渚水县唐改县曰通江明属保宁府今并因之龙滩河在昭化县南二里嘉陵江之所经也大巴山在四川南江县北二百里陕西汉中府西南一百九十里其山延绵深广南接小巴山泸州渠置元隶重庆路明直隶四川布政司江津汉江州地西魏改江阳县隋改江津明属重庆府今皆因之营山唐折相如县地置朗池县宋改营山明属蓬州今径属顺庆府石泉梁永县西魏改石泉明属兴安州东乡梁县元废明正德九年复置属达州蓬州後周置明属顺庆府今皆因之南川唐置綦江元置綦江长官司明玉珍据蜀置县明与南川并属重庆府今因之婺川隋置务川县唐改务川县为务州治元曰婺川明属思南府今属思州府剑州唐改始州置明初省入梓潼寻复置属保宁府今因之梁山西魏置元升州明复为县属夔州府今改属忠州陈镐会稽人蒋昇祁阳人黄瓚仪其人吴景南陵人王源五台人蓝章即墨人罗贤清源人彭世麟永顺宣慰使世麒之弟马昊本姓邹字宗大宣夏人张敏祁门人何珊六安人孙玺字廷信代州人时植字良材通许人】

给事中屈铨请颁行刘瑾新例为令

【铨请以六部为序编集成书颁布中外俾世为遵守诏下廷臣议行时瑾所创新例变乱成宪擅作威福天下侧目重足朝不谋夕而铨乃承望风旨助瑾为虐廷臣鄙之共欲缓其事国子祭酒王云凤复以为请将刊行而瑾败】质实【屈铨蒲城人】

发明【瑾以私智擅威福之权紊典章之旧其所施行一时已为侧目又岂可垂诸久远貽毒将来且令者人君所自操渙大号而昭示中外海宇共之子孙守之尤非阉宦所得假窃者屈铨恬不知耻请将瑾所创例编集颁行以献媚于逆璫可谓小人之尤者矣乃武宗亦竟诏下廷议廷臣虽明知其不可而亦竟议行但欲姑缓其事向令逆瑾不败则其事能终缓乎武宗之深信不疑若是诸臣之依违迁就又若是何怪乎王云凤之复请乎云凤在孝宗时尝以劾宦官得罪而一旦易节尽反所为儉人矫饰一时末节尽露良足晒矣】

夏四月安化王寘鐫反游击将军仇鉞讨平之

【真鐮素枉誕術者言其當大貴遂覬覦非分與其黨指揮周昂千戶何錦丁廣衛學生孫景文輩潛蓄逆謀適大理寺少卿周東度寧夏屯田以五十畝為一頃又畝斂銀為瑾賄敲扑慘酷戍將衛卒皆憤怨而巡撫安惟學素殘虐將士銜刺骨真鐮知衆怒令景文飲諸武臣酒以言激之多愿從真鐮者會有邊警鉞與副總兵楊英率兵出防禦總兵官姜漢簡銳卒六十人為牙兵令周昂領之昂遂與何錦為真鐮定計設宴抬鎮巡官飲于第惟學東不至錦昂率牙兵直入殺姜漢及太監李增鄧廣于坐分遣丁廣等殺惟學東于公署遂焚官府釋囚系撤黃河渡船于西岸以絕渡者即使人招楊英仇鉞降英衆潰單騎奔靈州鉞時駐玉泉營佯許之引兵入城真鐮奪其軍分隸羣賊出金帛犒將士偽署昂等官有差令孫景文作檄以討劉瑾為名檄至諸鎮皆畏瑾不敢以聞延綏巡撫黃珂封上之因陳便宜八事急令副總兵侯勛參將時源分兵扼河東陝西總兵官曹雄聞變遣指揮黃正駐靈州檄楊英督靈州兵防黃河而指揮韓斌亦以兵來會雄更遣靈州守備史鏞浮渡奪西岸船營河東焚大小二壩草賊大懼賊既奪鉞軍鉞歸卧家稱疾賊以鉞解兵柄信無他時時就聞計鉞亦謬輸心腹而陰結壯士伺問圖之會史鏞潛通鉞書約為內應鉞因給錦廣宜急出兵守渡口遏東岸官軍勿使渡河錦廣杲傾營出獨留昂守城真鐮以禡牙召鉞鉞稱病亟昂來視鉞方堅卧呻吟伏卒猝起捶殺昂鉞乃被甲橫刀提其首跃馬大呼壯士皆集徑馳詣真鐮第縛之傳真鐮令召錦廣還而密諭其部曲以擒真鐮狀衆遂大潰鉞啓城迎官軍入錦廣走賀蘭山為邏卒所獲賊平蓋真鐮叛十有九日而敗先是中朝聞變議以右都御史楊一清總制軍務太監張永督軍神英為總兵官鉞為副俄傳鉞降賊欲追敕還大學士楊廷和曰鉞必不從賊令知朝廷擢用志當益堅不然棄良將資敵人耳乃不追事果定已而一清永至寧夏檻送真鐮京師賜死黨皆誅鉞論功封咸寧伯丁廣之殺惟學也都指揮僉事楊忠在側罵曰賊狗敢犯上邪廣怒殺之迄死罵益厉忠同官李睿聞亂馳至真鐮所門閉不得入大罵為賊所殺百戶張欽不從逆走至雷福堡亦被殺皆贈官予廕表忠睿曰忠烈之門欽曰忠節之門】質實【黃河在寧夏東南四十里自中衛縣流入界過峽口而東至靈州北又折而東北出府界玉泉營在寧夏府西百三十里雷福堡在楊顯堡西北楊顯堡在府西南三十里真鐮慶靖王第四子安化王秩烜之孫仇鉞字廷威鎮原人周東阜城人安惟學臨汾人姜漢榆林衛人黃珂字鳴玉遂寧人楊忠寧夏人神英壽州人官右都督賂劉瑾封涇陽伯】

五月焦芳罷

【芳居內閣五年凡劉瑾濁亂朝政荼毒搢紳流惡海內皆芳導之每過瑾言必稱千歲自稱曰門下凡所可否與瑾出一口四方賂瑾者率先賂芳子黃中亦傲狠不學廷試必欲得第一李東陽王鏊為置二甲首芳不悅言于瑾徑授檢討俄進編修芳以黃中故時時置東陽瑾聞之曰黃中昨在我家試石榴詩甚拙顧恨李耶始芳荐張彩以悅瑾覬其為奸利比彩為尚書芳父子鬻爵荐人无虛日彩頗厭之遂有隙而段熲見瑾昵彩芳勢稍衰轉附彩盡發芳陰事于瑾瑾大怒數于衆中斥責芳芳不得已乃乞歸黃中勾閭廕以侍讀隨父還瑾敗言官交劾削其官黜黃中為民久之芳使黃中齎金寶遺權貴上章求湔雪復官為吏科所駁于是吏部覆奏請下黃中法司以彰天討黃中狼狽遁走芳居第宏麗治作勞數郡大盜趙鏐入泌陽火之發窖多得其藏金乃盡拙其先人塚墓雜燒以牛羊骨求芳父子不得取芳衣冠被廷樹拔樹斫其首使羣盜糜之】

六月前吏部尚书马文升卒

【文升归後瑾既以其尝荐雍泰坐朋党除名及是卒年八十五未几瑾诛复官赠特进光禄大夫太傅諡端肃 文升有文武才朝端大议往往待之决功在边镇外国皆闻其名】

帝自称大庆法王

【帝于佛经梵语无不通晓自称大庆法王西天觉道圆明自在大定慧佛命所司铸印以进番僧因乞因百顷为法王下院中旨下礼部称大庆法王与圣旨并尚书傅珪佯不知执奏孰为大庆法王敢与至尊并书大不敬诏勿问田亦竟止】质实【傅珪字邦瑞清苑人】

发明【梁武笃信释教设无遮大会舍身同泰寺贻讥史册为世非笑犹未尝以佛自名也武宗昵宵小事游佚本非潜心释典者其称大庆法王亦不过习见元明以来番僧封号心焉自喜遂不恤屈万乘之至尊袭缙流之崇奉其视天位直等之儿戏其视天下事无不可恣意为之者希名禅觉示现梵王犹其小焉者也】

秋八月太监刘瑾伏诛

【初瑾于八党中尤狡猾为七人所推及专政七人有所请瑾俱不应咸怨之又尝欲逐张永南京永知之直趋帝前诉瑾陷已帝召瑾与质方争辩永辄奋拳殴瑾帝令谷大用等置酒为解由是二人益不合永督军西征帝戎服送之东华门宠遇甚盛瑾愈忌之而帝方向永不能间也既至宁夏一清与永结纳相得甚欢知永与瑾有隙乘间扼腕言曰赖公力定反侧然此易除也如国家内患何遂促席画掌作瑾字永难之一清慷慨曰公亦上信臣讨贼不付他人而付公意可知今功成奏捷请问论军事因发瑾奸极陈海内愁怨恐变生心腹上英武必聽公诛瑾瑾诛公益柄用悉矫弊政安天下心吕强张承业暨公千载三人耳永曰脱不济奈何一清曰言出于公必济万一不信公顿首据地泣请死上前剖心以明不妄上必为公动苟得请即行事毋须臾缓永勃然起曰老奴何惜余年不以报主哉意遂决时瑾信术士俞曰明言谓其从孙二汉当大贵遂谋不轨会瑾兄都督同知景祥死将以八月十五日俟百官送葬因作乱及永捷疏至请以是日献俘瑾使缓其期欲事成并擒永或驰告永永先期入献俘毕帝置酒劳永瑾等皆侍及夜瑾退永密白瑾反状且出?中奏数其不法十七事帝已被酒俛首曰奴负我永曰此不可缓缓则奴辈当齧粉陛下安所归乎马永成等亦助之乃命执瑾夜啓东华门系瑾菜厰复分遣官校封瑾内外私第明日出永奏示内阁谪瑾奉御凤阳闻住帝犹未欲诛之已亲籍其家得金银数百万珠玉宝玩无数及衮衣玉带甲仗弓弩诸违禁物又所常持扇内藏利匕首二帝大怒曰奴果反趣付狱於是给事中谢纳御史贺泰等请亟赐诛戮帝是之命百官会鞠午门外瑾私人都给事中李宪至是亦劾瑾瑾闻之笑曰宪亦劾我耶鞫之日刑部尚书刘璟犹噤不敢发声瑾大言曰公卿多出我门谁敢问我者皆稍稍郤避驸马都尉蔡震曰我国戚得问汝即使人批瑾颊曰公卿皆朝廷用云何繇汝抑汝何藏甲也曰以卫上震曰何藏之私室瑾语塞狱具诏毋覆奏磔之市三日怨家争购其肉生噉之二汉及张文冕等俱伏诛张彩狱毙磔其屍二汉临刑曰吾死固当第吾家所为皆焦芳与张彩耳我处

极刑彩剉屍而芳独宴然岂非冤哉芳後竟良死】质实【谢讷襄阳人贺泰字志同吴县人刘璟鄢陵人蔡震尚英宗女淳安公主史称震行醇谨以鞠瑾狱知名】

曹元以罪免

【刘瑾败元即日上疏请罪词极哀诏许致仕言官交劾黜为民於是诸附瑾者前户部侍郎韩福戍固原前阁臣焦芳刘宇及户部尚书刘玘等六十余人黜降有差凡忤瑾谪戍诸臣皆释还福前奉使理湖广军饷馈瑾白金数十万两比籍瑾家犹封识宛然故论戍】

九月以吏部尚书刘忠梁储并兼文渊阁大学士预机务

【忠先与杨廷和同侍经筵为刘瑾所嫉出为南京礼部左侍郎寻进尚书就改吏部焦芳荐之召还瑾见忠颇负气岸甚悔乃传旨以吏部尚书兼翰林学士专典诰敕储为学士时尝与修会典及为吏部尚书瑾摘会典小疵降左侍郎复尚书调南京吏部至是瑾败二人遂同召入阁】质实【刘忠字司直陈留人梁储字叔厚广东顺德人】

封太监张永谷大用马永成魏彬兄弟及义子指挥同知朱德皆为伯

【帝以永救宁中外两建奇功赏止其身于典未称下兵部议尚书王敞请封其兄弟乃以永兄富为泰安伯弟容为定安伯越十五日又封义子德为永寿伯大用兄大寛为高平伯永成兄山为平京伯彬弟英为镇安伯已而谷大用陆闇冒平流贼功乞荫其弟侄视仇钺平寘鐫例封伯下兵部议部臣以仇钺独出奇谋削平僭乱故得封拜今羣贼殄灭非一人功不可以钺比况平贼诸将若刘晖郤永辈驰驱战阵出万死一生叙功不遇都督等官两中官子弟承廕反居诸将右无以服衆心帝不从令再议兵部请视钱宁例擢右都督又不从集廷臣议之皆请如兵部後议帝曰门庭凶寇累征不捷赖大用闇相总讨平其封大亮永清伯永镇平伯】质实【明恩泽侯表永壽伯朱德与泰安伯张富等并正德十六年革爵明实録德不知其所出初为裴监厮养冒裴姓能造西域食饵赐姓朱英非彬弟冒魏姓王敞字汉英应天人】

发明【张永督军西征实成仇钺已成之功其去刘瑾亦贪于杨一清所云瑾去公必柄用之一语有何奇勲而以为赏止其身于典未称乎前此宦官子弟封爵惟曹吉祥嗣子钦一人未几而即以谋反诛矣永兄弟并封其视吉祥尤为过之至谷大用辈既无军旅之劳而义子朱德且赐国姓一例推恩名器之滥一至于其後谷大用陆闇并援宁夏之例请封弟侄虽以部臣执奏而犹盛称其功必封之而始快读恩泽侯表武宗之视五等之庸真若无足重轻者也】

冬十月霸州盗起

【霸州文安人刘六名宠其弟七名宸并骁悍善骑射先是畿辅多盗驰马鸣箭号曰响马

有司患之召宠宸及其党杨虎齐彦名等协捕频有功会刘瑾家人梁洪徵贿于宠等不得诬为盗令捕之乃投大盗张茂茂素招纳亡命为逋逃主家与太监张忠邻结为兄弟夤缘马永成谷大用辈出入豹房侍帝蹴鞠而乘间为盗如故後数为河间参将袁彪所败茂窘求救于忠忠置酒私第招茂彪东西坐酒酣举觞属彪字茂曰彦实吾弟也自今毋相厄又举觞属茂曰袁公善尔尔慎毋犯河间彪畏忠唯唯而已既而茂为御史甯杲所擒斩宠等相率诣京师谋自首忠与永成为请于帝且曰必献万金乃赦宠宸不能应逃去及瑾诛有诏许自首宠等乃出诣官兵部奏赦之令捕他盗自効宠等惮要束未几复出劫掠部檄下有司缉捕安肃知县获齐彦名系之狱宠等率衆劫去遂叛旬日间号召至数千畿南大扰有赵疯子鏊者故文安诸生宠等乱起鏊挈家匿渚中贼驱之登陆将污其妻女鏊素骁健有膂力手格杀二贼贼聚执之遂入其党为渠魁明年贼势益横诏以惠安伯张伟右都御史马中锡帅京营军讨贼初出师间有斩获然贼方炽诸将率畏懦莫敢当其锋或反与之结参将桑玉尝遇贼文安村中宠宸窘蹙跳民家楼上欲自刭而玉素受贼赂故缓之有顷齐彦名持大刀至杀伤数十人大呼抵楼下宠宸知救至出射杀数人玉大败去参将宋振御贼枣强不发一矢城遂陷死者七千人是时贼分其衆为二宠宸等自畿辅犯山东河南南下湖广抵江西复自南而北直窥霸州杨虎等由河北入山西复东抵文安与宠等合纵横数千里残破州县以百数所过若无人中锡书生不习兵事伟亦统袴子见贼强诸将怯度不能破贼乃议招抚谓盗本良民由中官贪黷所激若推诚待之可不战降遂下令贼所在勿捕过勿邀击饥渴则食饮之降者待以不死贼闻欲就抚相戒毋焚掠犹豫未定寻朝议以京军弱徵调宣府延绥兵中锡欲战则兵未集欲无则贼时反覆终不得要领既建议主抚不能变会宠等闻边兵且至退屯德州桑园中锡輿入其营与酒食开诚慰谕之衆拜且泣送马为寿宠慷慨请降宸乃仰天咨嗟曰骑虎不得下今奄臣柄国马都堂能自主乎遂罢会径去复焚掠独至故城戒毋犯马都堂家由是言官交劾中锡谓其以家故纵贼下诏切责中锡犹持招抚之说以请兵部尚书何监谓贼诚解甲则贯死即不然毋为所诳而宠等终不降】质实【安肃汉为北新城县宋置安肃军兼置县金改州明仍为县属保定府枣强汉县明属冀州今皆因之德州桑园方輿纪要桑儿园在德州北七十里良店水驿置于此马中锡字天禄故城人张伟惠安伯昇之曾孙弘治七年袭爵】

【辛未】六年春二月起左都御史陈金总制江西军务【江西盗起连年官军屡失利金丁母忧在籍诏起复原官总制军务南畿浙江福建广东湖广文武将吏俱隶焉都指挥以下不用命者专刑戮是时东乡姚源华林大?山诸贼方炽金以属郡兵不足用奏调广西狼土兵久之兵至乃于明年二月先剿东乡贼遣参议徐蕃等分屯要害令副总兵张勇士官岑猛等各统官兵土兵进击屡败之擒徐仰三馘王钰五等俘斩万计余贼悉就抚旋移师姚源令参政董朴吴廷举分营余千安仁贵溪鄱阳乐平过贼亲统军捣其巢殷勇十重创死会张勇以土兵至毒弩射杀洪瑞七等俘斩五千余人贼大窘而南赣巡抚周南既平大?山贼亦以兵来会先是南徵集江西福建广东三省兵于金剿东乡之前一月督副使杨璋僉事凌相指挥孙堂义民林富等分道进讨金亦遣副使王秩等助之于是江西兵从安远入克其巢七擒斩贼渠何积钦罗得清王璘广东兵从程乡入克其巢九擒斩贼渠李四仔张番坛黄镛张玉黄枋保福建兵从武平入克其巢八擒斩贼渠谢得珠刘隆鍾章诸道斩获贼党无算大?山平遂与金共捣姚源贼渠王浩八乞降金许之金初檄副使周宪讨华林贼宪连破仙女鸡公岭诸砦

先後斩获千余人乘胜进攻北门三战贼稍卻与子干先登逼之贼下木石如雨宪中枪干前救力战堕崖死宪创重被执罵不絕口贼支解之宪军大溃南昌知府李承勋单骑入宪营衆乃复集金即檄承勋讨之贼党王奇听抚搜其哀刃释之置麾下奇感激誓死承勋遣奇密入砦说降其党约期为内应至期勋率銳卒五百人夜衔枚登山令奇前导历重险抵贼垒羣贼方酣寢奇拔栅率衆入五百人大呼奋击内应者起夹攻贼仓卒不知所为四奔山谷寻斩贼渠罗光权等华林亦平事在明年九月自金山兵剿东乡甫八閱月破剧赋几尽因即东乡立县并立万年县招降人居之然金虽屡破贼而所用土兵贪残嗜杀剽掠甚于贼有巨族数百口阖门罹害者所获妇女率指为贼属载数千艘去民间謡曰土贼犹可土兵杀我金亦知民患之方倚其力不为禁又不能持廉军资颇私入土民皆深怨焉】质实【余干汉为余汗县汗读若干刘宋改为余干元升州明仍为县安仁晋析余汗县地置晋兴陈改安仁明与余干并属饶州府贵溪唐析弋阳县地置明属广信府鄱阳秦为番县吴芮为番令称番君是也汉置御阳县明为抚州府治武平唐武平镇闽改为場宋升县明属汀州府今皆因之仙女鸡公岭方与纪要云华林山有李八百洞诸蹟正德中陈福一作乱结砦山中周宪攻贼于仙女砦拔之又克鸡公岭进薄华林深入败没万年明正德七年析鄱阳余干乐平贵溪四县地置属饶州府今因之董?麻城人吴廷举字献臣其先嘉鱼人祖戍梧州遂家焉周南字文化缙云人凌相南通州人林富莆田人王秩崑山人李承勋字立卿嘉鱼人】

夏四月罢大学士刘忠

【刘瑾既诛张永魏彬辈犹用事永尝遣廖鹏谒忠忠仆隶遇之又卻其馈永大恨是年忠典会试帝摘试録中舛误示李东阳忠知中官所齟乞省墓归忠抵家再上章乞致仕报许】

秋八月以兵部侍郎陆完督边兵讨贼

【先是参将桑玉屡败僉事许承芳乞济师尚书何监奏遣都督同知张俊为副总兵与参将王琮统京军千人助讨往来近畿亦不能破贼而马中锡驻德州张伟驻齐东久无功至是宣府延绥徵兵将集监乃请以完统之督边将许泰却求冯禎等剿贼是月二日己卯也越八日丙戌召伟中錫还下狱论死抵桑玉受贿纵贼罪完师行至涿州忽传贼犯固安且逼京师帝御左顺门召阁臣及监谕曰贼在东师乃西出恐缓不及事因命监召完入卫完遂还趋固安檄泰永等击贼霸州败之贼南走京师解严指挥贺勇等再败贼于信安副总兵冯禎复大败之阜城分兵进击贼东走围沧州贼渠刘宸中流矢乃解而南陷山东县二十杨虎兵亦北犯威县新河完频请济师益发辽东山西兵逐贼贼南围济宁焚运舟转寇曹州禎泰永斩二千余人获其魅朱谅捷闻中官谷大用张忠意贼旦暮平乃自请督师诏以大用总督军务伏羌伯毛銳充总兵官忠监神枪统京军五千人往与完会剿比出师知贼方炽驻临清不敢进时刘宠等纵横沂莒间而杨虎陷宿迁执淮安知府刘祥灵璧知县陈伯安连陷虹永城虞城夏邑及归德州边兵追及贼逼至小黄河渡口百户夏时设伏蹙之虎溺死余贼奔河南推刘惠为首大败副总兵白玉军攻陷沈邱杀都指挥王保执都指挥潘翀北陷鹿邑有陈翰者与甯龙谋奉惠为奉天征讨大元帅赵鏐副之翰自为侍谋军国重务兀帅府长史与龙立东西二厰治事分其军为二十八营以应列宿各置都督聚衆至十三万欲共出以牵制官军于是

惠鏊扰河南刘宠兄弟及齐彦名等扰山东党分为二已而宠复转而北永败之潍县还走霸州会明年正月帝将有事南郊贼遂谋以十二月朔伺帝省牲乘间犯驾监立奏闻急召完赴援即夜严设守备厥明帝召问监监请早出安人心遂成礼退贼知有备西掠保定诸州县以去完击破之文安贼南至汤陰完又督诸将追败之先後俘斩千人是时贼党虽衆然多胁从者精銳不过千余人自兵部下首功令官军追贼贼辄驱良民当之急则弃所掠逸去官军所杀皆良民故捷书屡奏而贼势不衰贼所过州县率闭城守或弃城遁或遗之刍粟弓马乞贼毋攻乐陵知县许逵慨然为战守计县初无城督民版筑不踰月城成令民屋外筑墙墙高踰檐啓圭窔才容人家选一壮者执刃伺窔内余皆入队伍日视旗为号违者军法从事又募死士伏巷中洞开城门贼果至旗举伏发窔中人皆出贼大惊扰斩获无遗後数犯数郤之遂相戒不敢近事闻进秩二等达之外知县能抗贼者益都则牛鸾郟城则唐龙汶上则左经濬则陈滯然所当贼少而逵屡御大贼有功遂与鸾俱超擢兵备僉事逵驻武定州州城圯濠平不能限牛马逵筑城凿池设楼櫓置巡卒寻杨虎妻崔氏曰杨寡妇者以千骑犯利津潍县指挥乔刚御之贼少郤逵追败之高苑令指挥张勋邀之沧州先後俘斩二百七十余人未几贼别部掠德平逵尽殲之威名大着】质实【齐东本邹平县地宋于县之赵岩口置齐东镇元改县明属济南府固安汉方城县地隋改置固安县元升州明复为县属顺天府今皆因之信安方輿纪要信安湾在天津西此即潜河曲拆处明正德中贺勇遏刘六等于此阜城汉县明属河间府威县汉广平国斥章县地元自升降县移威州治此明改县属广平府虹县汉夏邱县地唐置虹县明属凤阳府虞城汉虞县隋改虞城明属归德府今皆因之沈邱唐析项城县地置明洪武初废孝宗十年复置属陈州今属陈州府小黄河渡口在宿迁县东南十里睢水合於黄河谓之睢口今亦曰小河渡口鹿邑汉郸县地隋置鹿邑县明属归德府今因之潍县汉密县地隋唐尝置潍州寻废宋复置明洪武九年降县属平度州今属莱州府汤陰汉荡陰县东魏省入邳县隋置汤陰县明属彰德府今因之乐陵汉县明属武定州今属武定府郟城春秋郟国汉郟县唐省入下邳明洪武中复于故郟县地置郟城县属沂州今属沂州府濬县汉黎阳县地宋置濬州明降县属北直隶大名府今属河南卫辉府利津金始以渤海县之永利镇置利津县明属滨州今改属武定府高苑汉县明属青州府今因之德平汉平昌县五代唐改德平明属德州今属济南府陆完字全卿长州人许承芳阳曲人许泰都督僉事宁之子冯祜绥德卫人刘祥安福人陈伯安济宁人许逵字汝登固始人牛鸾字鸣世献县人唐龙字虞佐兰谿人左经耀州人】

冬十一月地震

【是月十二日戊午京畿皆震霸州尤甚三日中十有九震】

十二月以礼部尚书费宏兼文渊阁大学士预机务【前年秋宏自礼部侍郎进尚书帝耽于逸乐早朝日讲俱罢上疏切谏报闻及是刘忠致仕遂以宏代】质实【费宏字子克铅山人】

黄河清

【清河口至柳浦九十余里河清三日自是月十八日甲午始】质实【淮安黄河自徐州府宿迁县流入境内桃源县城北东南至清河县城南淮渎洪泽湖水自西南来会既会淮水折而东北流经府治山阳县西北之清江浦又东南经阜宁县北境至安东县城南又东北流经北沙镇北过云梯关旋折入于海清河口在今清河县治南泗水自山东鱼台县流入境至此合淮谓之淮泗口亦曰清口後黄河夺泗流以合淮遂为淮黄交会之冲方輿纪要柳浦湾在淮安府东北四十里明河臣潘季驯筑堤防河处也一统志作柳蒲湾】

【壬申】七年夏闰五月都御史彭泽威宁伯仇钺讨平河南贼

【是年春刘六等复突霸州京师戒严诏陆完及谷太用毛銳还御近畿贼乃西掠博野攻蠡县临城大用銳与遇于长垣大败銳身被伤亡将印会许泰援兵至仅免而刘惠赵鏊乱河南连陷鹿邑上蔡西平遂平舞阳叶纵掠南顿新蔡商水襄城复还驻西平于是廷议召大用銳还以畿辅山东贼委完命泽钺提督军务太监陆闇监军专讨河南贼时都督金事冯祜副总兵时源参将神周金辅方击败惠鏊于西平贼奔入城官军塞其门乘夜焚死千余人斩馘称是余贼溃而西巡抚邓璋等以为贼不足患朝崇王于汝宁宴饮连日贼招散亡乃复振陷鄢陵荥阳汜水巩围河南府三日诸军始集贼屯洛南觐官军饥疲迎战右哨金辅不敢渡洛祜及源周方阵而後哨参将姚信所部京军先驰失利遽遁阵乱贼乘之祜下马殊死鬪援絶死焉由是贼势益张泽至军引见诸将校责以畏缩当死诸将校股栗伏罪良久乃释遂下令鼓行薄贼贼始闻泽等将至遽奔汝州及闻官军分布扼要害乃走宝丰复由舞阳遂平转掠汝州东南败奔固始屯朱率镇永顺宣慰彭明辅等击之贼仓猝渡河溺死者二千人余衆走光山钺追及之命诸将神周姚信时源金辅左右夹击贼大败斩首千四百有奇湖广军亦破其别部贾勉兒于罗田贼沿途溃散自六安陷舒城复还光山至商城官军追之急贼复南攻六安将陷时源等涉河进败之七里冈贼趋庐州至定远西又败还至六安分其衆为二刘惠与赵鏊二弟鐸鎬帅万余人北走商城而鏊道遇其徒张通及杨虎遗党数千人掠凤阳陷泗宿睢宁定远泽乃与钺定计使神周追鏊时源金辅追惠姚信追勉兒勉兒鏊复合周信连败之宿州追奔至应山其衆畧尽鏊薙发怀度牒潜至江夏饭村店为军士赵成所执送京师伏诛贼专事淫掠鏊稍有智计劝其党毋妄杀移檄府县约官吏师儒毋走避迎者安堵以是横行中原势出刘六等上尝攻钧州五日以马文升方家居舍之去有司遣人齎招抚榜至鏊具疏附奏言今羣奸在朝舞弄神器浊乱海内诛戮諫臣屏弃元老举动若此未有不亡国者乞陛下睿谋独断梟羣奸之首以谢天下即梟臣首以谢羣奸其桀黠如此惠既失鏊益窘走南召指挥王谨追及之射中惠左目自縊死勉儿数为都指挥朱忠夏广所败获之项城丁村余党邢本道刘资及杨寡妇等先後皆被擒泽出师四月而河南贼悉平】质实【博野後汉置博陵县晋改曰博陆後魏改博野元世祖至元三年废三十一年复置明洪武初属祁州六年改属保定府蠡县汉蠡吾县北齐省入博野县明洪武八年复置蠡县属保定府临城汉房子县唐改临城明属赵州今皆因之长垣汉县旧治在县东北三十五里後迁徙不一明洪武中以河患迁于古蒲城属开州今属大名府上蔡秦县後魏徙县治于悬瓠城改故县为临汝县北齐废县隋开皇中於临汝故县置武津县大业初改後魏徙置之上蔡为汝阳复以武津为上蔡西平汉县遂平汉吴房县唐元和中改遂平明与上蔡西平并属汝宁府今皆因之舞阳汉县晋改北舞唐复为舞阳县叶县春秋楚地秦曰叶阳汉置叶县明与舞阳并属裕州今

属南阳府新蔡汉县元省入息州明洪武四年复置属汝宁府襄城汉县明属许州汝宁汉汝南郡後周改蔡州元升汝宁府今皆因之汜水汉成臯县隋改汜水明属郑州今属开封府宝丰唐析鲁山郟城二县地置武兴县寻改中兴又改龙兴宋熙宁五年废入鲁山元佑元年复置宣和二年改曰宝丰元省入渠县明成化十一年复置属汝州今因之朱臯镇在固始县东北六十里与江南颍州府接界明置巡司今裁光山刘宋置光城县隋改光山明属光州罗田本汉蕲春县地梁置罗田县明属黄州府今皆因之六安元置宋开宝初置六安县政和中为六安军治元兼置州明省县入州属庐州府今升直隶州舒城唐分合肥庐江二县地置舒城县明属庐州府商城汉云娄县地刘宋侨置苞信县隋改殷城宋建隆初以宣祖讳改商城至道三年省入固始明成化十一年复置属光州今皆因之七里冈在六安州西界睢寧金析宿迁县之古城置睢寧县明属邳州今改属徐州府应山隋县明洪武初省寻复置属随州今属德安府丁村集在项城县东三十里彭泽字济物兰州人神周壽州人泾阳伯英之子邓璋字礼方涿州人崇王明史诸王传崇简王见泽子靖王佑檣正德六年卒子恭王厚耀嗣】

秋八月陆完追贼于狼山平之

【完既专讨畿辅山东贼贼南犯滕县副总兵刘晖大败之贼遂奔登莱海套完师次平度檄郤永白玉与游击温恭三道进攻命副总兵张俊李鋹及许泰刘晖分军邀其奔逸贼走连战皆大败之贼乃变服易马走先後禽斩二千六百余人贼止三百人北走沿途招聚势复张剽香河宝坻玉田转攻武清游击王杲败歿畿辅复震动而贼转南至冠县晖袭败之指挥张勋又败之平原贼南奔邳州渡河抵固始走湖广夺舟夏口遇副都御史马炳然杀之复登陆焚汉口为指挥满弼等追及刘六中流矢与子仲淮赴水死刘七齐彦名率五百人舟行自黄州顺流抵镇江南京告急完疾趋而南时河南贼已平帝命彭泽仇钺会完军进剿大兵尽集江南北贼犹乘潮上下肆掠操江武靖伯赵洪泽都御史陈世良遇之败绩死者无算既而贼治舟孟渎完等至镇江留钺防守令温恭以骑兵驻江北完亲督诸将以舟师分道扼之贼惧奔通州飓风大作弃舟走保狼山完命同知罗玮夜导军蹙之山南彦名中枪死七中矢亦赴水死余贼尽平贼作乱凡二年中原郡邑多残破所在杀官吏其死难最着者畿内则枣强知县段豸大城知县张汝舟主簿李铨河南则阵亡指挥景瑞等三十三人守城被害为盐运使同知徐天英封御史朱纪西平知县王佐县丞毛绣上蔡知县霍恩典史梁逵叶县知县唐天恩永城知县王鼎裕州同知郁采都指挥詹济御史任贤固始丞曾基夏邑丞安宣沈邱丞杜斌息县主簿邢祥睢宁主簿金声邱绅西华知县李景教谕孔环山东则莱芜知县无驂主簿韩塘莱州卫指挥蔡显南畿则灵壁主簿蒋贤指挥同知梁文皆抗节死事闻赠官赐祭予廕立祠如制】质实【狼山方輿纪要在通州南十五里与塔山军山马鞍山力刃山相连属亦谓之狼五山相传有白狼居此或曰山形如狼高五十三丈周三百四十六丈胜槩甲于江北滕县周时滕薛小邾三国地汉置蕃县隋改滕县明初属济宁府洪武十八年改属兗州府平度汉县後汉改置胶东後齐改置长广隋曰胶水明洪武二十一年置平度州属莱州府香河辽置宝坻金置明并属顺天府今皆因之玉田唐置明属薊州今改属遵化州冠县隋冠氏县元升冠州明降县属东昌府今因之平原秦县明属德州令属济南府夏口春秋时为夏汭又曰夏州後汉末始谓之夏口建安十四年吴孙权筑城于此今武昌府西南为沙羡城夏口城在其南汉口在汉阳府城北二里汉水自沔阳州景陵县东流入府境经汉川县西流至此又

东与江会于大别山因名汉口孟渚在常州府治西三十里犇牛镇东南滙运河北流六十里入扬子江唐刺史孟简所开因名大城汉为东平舒县五代唐改置大城县明属霸州今属顺天府莱州卫在莱州府治南明洪武三年建本朝顺治十六年裁裕州金置明属南阳府今因之莱芜汉县明属泰安州今属泰安府段彖字世高泽州人由兵科给事中谪枣强知县贼至连战却之及城陷中四矢一枪瞋目大呼杀贼而死贼屠其城张汝舟官大城时与主簿李铨迎战皆被杀王佐字汝弼潞州人授西平知县手杀贼数十人矢毙其渠帅贼忿急攻三日佐力屈被执骂不絶口贼悬诸竿杀而支解之霍思字天锡易州人历知上蔡县与梁逵共守当贼至时语妻刘曰脱有急汝若何刘愿同死乃筑台靡後约曰见我下城即贼入矣及城陷恩拔刀下城刘台上见之即缢未絶以簪刺心死恩被执贼胁之跪骂曰吾此膝肯为贼屈乎贼日杀人以慑之骂益厉贼以刀挟其口支解之梁逵自经死唐天恩知叶县与父政等七人俱死王鼎知永城城陷系印于肘端坐待贼不屈死郁采字亮之浙江山陰人由主事谪教谕历迁裕州同知与詹济在贤共坚守斩获多城破被执悉骂不辍贼碎其辅颊而死济亦不屈死贤尝为御史母丧里居招邑子三千人拒守骂贼死一家死者十三人曾基为固安丞被执使馭马不从被害安宣授夏邑丞贼杨虎逼其境或劝母往宣兼程进抵任七日贼大至拒守有功城陷死之邢详已致仕城?骂贼死金声邱绅与义士朱用之迎战死孔环南宮人由岁贡生授来安知县为刘瑾党所?左迁西华教谕被执贼曰呼我王即释汝厉声曰我不得碎汝万段肯还求活耶遂被杀熊驂固始人为贼所执与主簿韩塘俱不屈死塘太谷人蔡显与三子淇英顺俱御贼力战死汝舟天恩鼎基诸人里贯无考马炳然内江人赵洪泽武靖侯辅之孙陈世良临海人】

九月召洪钟还以彭泽代之

【时蜀盗鄢本恕蓝廷瑞廖惠方四曹甫虽已平而廖麻子猖獗如故连陷州县又贼麻六儿者越百丈关以窥川东杀副使冯杰势甚张钟不能制巡按御史王纶纪功御史汪景芳劾钟乃召钟还以泽往代泽未至巡抚高崇熙恒怯主招抚麻子等阳受约崇熙遽请罢诸军令副使张敏徙临江市民空其地处之许给复三年为请于朝副使马昊力争谓临江市上達重叙下连湖湘地土饶衍奈何弃以资贼自遗患崇熙不从昊乃益治兵防变已而贼果执敏叛诏逮崇熙擢吴右佾都御史代之贼围中江将趋成都会泽已至先击平麻六儿遂与昊及总兵官时源连败廖麻子遣游击阎勲追斩之剑州余衆走推其党喻思俸为王总兵官陈珣逐之急贼伪降因北渡江袭杀都指挥姚震转入巴山故巢珣不敢前陕西兵与贼战溃贼遂越宁羌犯畧阳珣军鼓噪贼夜走越广元为官军所遏还趋通巴招余党诸将率称病不击贼诏逮珣且让昊昊乃与泽督诸师获思俸西乡山中泽遂移军汉中请班师未报而内江荣昌贼骆松祥范藻等复炽泽旋师讨平羣盗悉靖诏泽暂留保宁镇抚初廖麻子攻破绵竹等县西安卫指挥佾事毅辅战死麻六儿之冲百丈关嘉定州人雷应通父子七人倡义御贼被执皆死之】质实【百丈关方輿纪要在广元县东百六十里关傍有河深百丈亦曰百大关渡道出巴州临江市一名临江镇在忠州西一里有巡司戍守重叙谓重庆叙州也叙州汉犍为郡地梁置戍州宋改叙州元路明府今因之中江汉鄩县地三国汉析置伍城县隋改元武宋改中江明属潼川州今属潼川府宁羌明洪武分沔县地置寧羌卫成化二十二年升州属汉中府广元秦葭萌县地三国汉曰汉壽县晋改晋壽寻析置兴安县隋改縣谷为利州治元为广

元路治明洪武七年改府是年降州十四年降县属保宁府通巴谓通江县巴州也巴州梁置明洪武中降县正德九年复升为州属保宁府今并因之内江汉资中县地後周置中江隋改内江明属成都府今属贤州荣昌唐析内江县地置昌元县元省明洪武六年复置营昌属重庆府今因之西安卫明洪武中置隶陕西都司嘉定州後周置戎眉县为平羌郡治隋初郡废县属嘉州寻改县曰青衣又改龙游为眉山郡治唐为嘉州治南宋改嘉定州元路明洪武四年改府九年降州直隶四川布政司今升府冯杰见明史忠义传未详其里贯杰追击麻六儿于苍溪俘斩颇衆日晡移营铁山关贼乘夜冲突杰死之贈按察使諡恪愍高崇熙石州人】

賜义子一百二十七人国姓

【帝所悦中官奴卒輒收为义子亡虜亦与马并賜姓朱氏御史贺泰抗諫诸近幸激帝怒謫衢州推官】

冬十一月留宣府大同辽东兵于京营

【先是七月中兵部尚书何监以羣盜未尽请留边将刘晖戍山东时源戍河南郤永戍畿辅李鋹戍淮阳各假总兵之职俟事宁始罢仇钺言边军久劳风土不习人马俱病今贼已渐平请留三之一讨贼余悉遣还廷议二人言俱是请四将各千人镇压他将许泰神周金辅温恭等俱统所部还镇帝许之命延缓军径还辽东宣府大同军过关劳賜帝方好弄兵时有江彬者以大同游击隶总兵官张俊赴调过蓟州杀一家二十余人诬为贼得赏尝与贼战淮上被三矢其一着面镞出于耳拔之再战帝闻而壮之及还军过京师彬因钱宁得召见帝见其矢痕曰彬健乃尔邪彬狡黠强狠貌魁硕有力善骑射谈兵帝前帝大悦遂与宣府守将皆留不遣擢彬都督僉事出入豹房同卧起宠在宁上宁心忌之彬知宁不相容顾左右皆宁党欲藉边兵自固因盛称边军骁悍胜京军请五调操练言官交章諫大学士李东阳疏称十不便皆不聽于是边军入卫立东西两官厅禁中视团营东以太监张忠领之西以许泰领之已而神周坐罪謫賚缘得八豹房复官未几刘晖亦召侍设勇士营俾周晖分领与彬泰同賜国姓为义儿名四镇兵又名外四家兵以彬兼统帝别领羣阉善骑射者为一营号中军晨夕驰逐甲光照宫苑呼噪声达九门帝时临閱谓之过锦】质实【江彬宣府人钱宁不知所出或曰镇安人幼鬻太监钱能家为奴能嬖之冒钱姓】

十二月李东阳罢

【东阳以老病乞休前後章数上至是始许賜敕给廩隶如故事东阳立朝五十年清节不渝以文章领袖縉绅朝廷大著作多出于其手獎成後进推挽才彦学士大夫出其门者率粲然有所成就初与刘健谢迁请诛刘瑾及健迁去而东阳独留气节之士多非之侍郎罗圯上书劝其早退至请削门生籍东阳得书俛首长叹而已然方逆瑾肆虐时潜移嘿夺保全善类天下亦阴受其庇云致仕四年卒】

【癸酉】八年春正月召陈金还以俞諫代之

【初陈金击破东乡贼土兵纵弩射趨捷若飞贼大窘土兵邀赏千金金靳不予乃纵贼使逸桀黠者多不死尚数千人金急欲成功遂下令招抚及破姚源金喜谓功在旦夕与将吏置酒高会贼觐诸要害无守者乃悉所有赂土兵乘间遁去贼絶?已三日自分必死沿途弃稚弱散妇女抵贵溪始得一饱食遂转掠衢徽间金知失策亦下令招降贼首王浩八等故伪降以缓官兵攻剽如故卒不能尽贼纪功给事中黎奭及两京言官交章劾金乃召金还以俞谏代督江西浙江福建诸军讨之时浩八衆万余流劫弋阳上饶等州县寻掠婺源休宁屯浙江开化谏檄嘉兴同知伍文定与参将李隆都指挥江洪金事储珊击贼军华埠都指挥白宏与湖州知府黄襄别营马金贼党刘昌三被执宏官军大挫浩八突华埠洪文定击败之隆珊追至池淮破其巢而洪以奇共深入中贼诱与指挥张琳等皆被执文定等殿後得还贼亦遁归江西德兴以所执宏洪等为质求抚于按察使王秩秩受之为传送姚源浩八奔据贵溪裴源山余衆复集连营十里谏令秩与副使胡世宁参政吴廷举列屯要断其归路躬与都督李鋹乘夜冒雨潜进大破之俘斩数千人遂擒浩八其党溃走玉山谏与南赣巡抚周南江西巡抚任汉复击斩七百余入余贼奔姚源有贼渠胡浩三者降复叛廷举往谕为所留居三月尽得其要领诱其党使自携贰廷举遂得问还浩三果杀其兄浩二内乱谏督官兵乘之擒浩三谏惩金失一意用兵而任汉巽懦先为布政使尝赞金主抚虽亟上首功追贼缓余党复起先是金所抚束卿贼艾茹七等二百人隶世宁麾下号新兵率以击浩八所过纵掠执安仁官氏二女欲污之赴水死奭奏其事乃下令散遣寻惧罪复叛衆至二千余谏遣参将桂勇等分道讨擒之万年虽立县贼尚衆吏胥多贼党官府动息必知副使李情治峻急衆欲叛畏鋹在余干不敢发会鋹卒王垂七胡念二等遂作乱杀情及饶州通判陈達秦碧指挥邢世臣等焚廨舍谏发兵擒之乱乃定言官劾谏及汉南兵部请召汉还命谏兼领巡抚已复击临川贼斩其魁陈玖譚懿昌等而遣李隆击新淦贼贼踞万山中僭称王且八年隆等深入悉就擒俘斩千七百余入録功进谏右副都御史巡抚如故剧贼徐九龄者啸聚几三十年出没江湖黄州德安九江安庆池州太平咸被其害谏讨斩之羣盗悉平】质实【弋阳三国吴置葛阳县隋改弋阳明属广信府上饶汉鄱阳地三国吴析置上饶县明为广信府治婺源唐县元升州明复为县休宁三国吴置休阳後改海阳晋曰海宁隋改休宁明与婺源俱属徽州府开化宋县明属衢州府今皆因之华埠镇在开化县南三十里马金镇在开化县北三十五里以马金岭而名池淮溪名有二源一出歇岭一出明化县西百里大榕岭合流至县西三十里滕岩下之池淮畝曰池淮溪德兴唐德兴場南唐升县明属饶州府今因之裴源方輿纪要水名在万年县界按明寔録俞谏破贼于贵溪之裴源万年县东南至贵溪百五十里本贵溪之远鄙也临川後汉置临汝县隋改临川明为抚州府治今因之俞谏字良佐桐庐人黎奭京山人伍文定字时泰松滋人储珊颖州人胡世宁字永清仁和人李鋹大同右卫人任汉温江人李情灵宝人黄衷南海人陈達闽县人按明史忠义传有万琛者字廷显宣城人慷慨负气节举于乡知瑞金县孝宗十八年正月剧盗大至县人汹汹逃窜或劝琛急去琛斥之率民兵数十人迎敌杀贼二十余人相持至明日力屈被执骂不絶口贼攒刺之乃死赠光禄少卿赐祭葬子廕考明武宗寔録琛之死贼乃是年八月明史系之孝宗十八年正月者盖传闻之异】

夏六月河决黄陵冈

【先是河自北徙至沛县飞云桥俱入漕河南河故道淤塞水惟趋单丰之闲河窄水溢遂

连年决黄陵冈入贾鲁河汎溢横流直抵丰沛御史林茂逵以北决安平镇为虞请濬仪封考城上流引河南流以分其势然後塞决口筑故堤工部侍郎崔岩奉命修理久之无功以侍郎李堂代岩堂谓河流故道堙者不可复疏请筑堤以障河北徙工未竣而河南盗起召堂还京堤役由此罢至是河复决黄陵冈部议以其地界大名山东河南守土官事权不一请端遣重臣乃命管河副都御史刘恺兼理其事恺奏率衆祭告河神越二日河已南徙尚书李鏊因请祭河且赐恺羊酒恺于治河束手无策特归功于神曹单问被害日甚】质实【飞云桥在沛县城南汜水经其下入泗水为往来津要单县鲁单父邑汉为单父县唐光啓中置单州于此明洪武元年省县入州二年改州为县属兗州府今属曹州府丰县秦沛县之丰邑汉置县明属徐州今属徐州府曹县汉定陶县地隋析置济阴县为曹州治金徙州治乘氏故县明初徙安陵镇寻徙盘石镇改州为县属济宁府正统十一年复置曹州以县属焉今属曹州府林茂逵莆田人省岩字民瞻郴州人李堂字时升鄞县人刘恺直隶新安人】

秋八月土尔番据哈密

【初许进既复哈密阿哈玛特悔过送还善巴寻以王越言复善巴旧封自是哈密得安土尔番亦通贡如故有思克保喇者哈商弟也与善巴不相既当事患之令善巴娶哈商女与之结好善巴嗜酒掊克失衆心部下阿尔保喇等咸怨陰构于土尔番阿哈玛特之幼子曰展特穆尔亦哈商女所出遂迎之主哈密善巴惧絜家走苦峪时恩克保喇与回回都督舍音和珊在肃州边臣以二人为番衆所服令还辅善巴与百户董杰偕行杰有胆畧抵哈密阿尔保喇与其党五人约夜以兵来刼杰知之与恩克保喇等计事立斩之其下遂不敢叛乃令善巴还哈密展特穆尔还土尔番会阿哈玛特死葬苏尔嗣为苏勤坦与弟相仇毅展特穆尔惧不敢归以恩克保喇乃其母党愿留哈密依之边臣虑与善巴有隙居之甘州盖孝宗十七年也既而葬苏尔遣使求展特穆尔廷议持不可以甘州守臣言送之还即输边情于葬苏尔葬苏尔桀黠变诈踰于父素有吞哈密之志又得其弟合谋而阿哈玛特歿之明年善巴亦率子巴牙济袭忠顺王昏愚淫虐不得于其属部心忧部人害已葬苏尔因数以甘言诱之至是巴牙济竟弃其国奔土尔番葬苏尔夺其印遂遣和卓塔实鼎据守哈密】质实【恩克保喇旧作奄克孛刺阿尔保喇旧作阿孛刺展特穆尔旧作真帖木儿舍音和珊旧作写亦虎仙葬苏尔旧作满速儿巴雅济旧作拜牙即和卓塔实鼎旧作火者他只丁今改】

冬十二月江西饥

【遣南京刑部侍郎邓璋往振之】

御定资治通监纲目卷十八

卷十九

<史部,编年类,御定资治通监纲目三编>

钦定四库全书

御定资治通监纲目三编卷十九

【起甲戌明武宗正听九年尽辛巳明武宗正德十九年】凡八年

【甲戌】九年春正月乾清宫灾

【帝每岁张灯费将数万及是宸濠别无奇巧以献令所遣人入宫悬挂多着柱附壁以取新异帝复于庭□问依□设氈幙贮火药其中偶不戒遂延烧宫殿乾清以内皆烬火盛时帝往豹房临视回顾光焰烛天犹笑谓左右曰是一棚大烟火也杨廷和等以宫灾自幼请帝避正殿下诏罪已又疏请早朝宴罢躬九庙祭祀荣两宫孝养勤日讲复面奏开言路达下情还边兵革宫市罢皇店出西僧省工作减织造诸言官亦各上章极谏语皆切至帝不省】

二月帝始微行

【夜至教坊司观乐】

发明【人君出入警蹕清道後行体至尊仪至重也汉武帝始为微行成帝效之朱子於纲目皆谨书之以为复鑒而武宗乃狎于羣小日事佚游效富平公子之装忘柏谷主人之戒其轻宗庙褻神气为已甚矣况自此远踰关塞动辄经年其不至见困于豫且者亦天幸耳】

以礼部尚书靳贵兼文渊阁大学士预机务

【贵以宫僚旧恩故有是命在阁三年无所建白致仕归】质实【靳贵字充道丹徒人归後二年卒未葬武宗南巡过镇江亲临其丧命词臣撰文皆不称旨帝乃自为文祭之按王琼双溪杂记云内阁刘忠去位杨廷和欲引门生靳贵代之朝廷以礼部尚书费宏代贵憾之後谗斥罢宏仍以贵代宏然考明史武宗本纪及明实録宏以五月乙丑致仕在贵既入阁之後并非以贵代宏且宏之去位以却宁王护卫之请事见明史宏传亦非由贵谗构琼所纪者皆不得其实也】

夏四月复宁王护卫

【初宸濠贿刘瑾得复护卫瑾诛仍论夺会陆完为兵部尚书宸濠所素善也遂致书盛陈旧好欲复护卫及屯田完答书令以祖制为词宸濠乃遣人厚结叙坊臧贤属钱宁为内主比

奏下完即为覆请而以屯田属户部请付廷议内阁拟旨上竟予之举朝譁然六科给事中高滂十三道御史汪锡等力争章并下部久不覆南京礼科给事中徐文溥闻之上疏谏曰曩因宁藩不靖英庙革其护卫屯田及逆瑾乱政重贿谋复瑾既伏诛陛下又革之正欲制以义而安全之耳乃曰驱使乏人夫晏居深邃靡征讨之劳安享尊荣无居守之责何所用而乏人且王暴行大彰剥削商民挟制官吏招诱无赖广行刼掠至舟航断絶邑里萧条万民莫不切齿及今止之犹恐不逮顾可纵之加恣假翼于虎乎贡献本有定制乃无故驰骋飞骑出入都城伺察动静况今海内多故天变未息意外之虞实未易料宜裁以大义勿徇私情罪其献谋之人逐彼侦事之使宗社幸甚时宸濠奥援甚衆疏入人咸危之帝但责其妄言而已完迫于衆论乃请纳谏官言帝竟不听】质实【汪锡仁和人徐文溥字可大开化人】

五月费宏罢

【钱宁方宠于帝最用事宏不与通宁时有所关请馈宏以彩币珍玩峻却之宁慙且患宸濠之谋复护卫屯田辇白金钅万偏赂朝贵宁及陆完主之宏从弟编修案其妻与宸濠妃兄弟也知之以告宏宏入朝完迎谓曰宁王求护卫可复乎宏曰不知当日革之何故完曰今恐不能不予宏拂然曰公自任之中官齎奏至阁宏极言不当予既而竟俞所请于是宸濠与宁合而构宏宁数侦宏事无所得以御史徐珊尝劾宏当国案宜引避不得留翰林宁遂以此潜于帝责宏陈状宏自伏乞休命并案致仕宁遣骑伺宏後抵临清焚其舟资装尽毁宏归杜门絶客宸濠复求与通宏谢絶之益怒会宏族人与邑奸民李镇讼宸濠陰令镇贼宏镇遂据险作乱率衆攻费氏执所与讼者支解之发宏先人塚毁其家刼掠远近衆至三千人宏驰使愬于朝下巡抚孙燧按状始遣兵剿灭】质实【史乘考误宁庶人之复护卫内阁大臣独费鋁山持正不肯予而杨新都梁南海辈畏祸而莫敢主持新都为首辅其罪有不容辞者第不得以污名蔑之耳双溪杂记谓大璫乘廷试读卷日独请杨师傅入票旨其为讐口无疑第杨用修丹鉛杂録谓为新都丁忧以後事则又误之甚矣护卫之复乃正德九年四月丁酉而新都闻父春丧在十年三月丙申今欲他诿其可得乎余珊桐城人孙燧字德成余姚人】

遣右都御史彭泽提督甘肃军务经理哈密

【土尔番既据哈密复遣使赴甘肃言巴雅济不能守国故遣将代守乞犒赐总制邓璋甘肃巡抚赵监以闻请遣大臣经畧大学士杨廷和等交荐泽泽久在兵间厌之以家于兰州遂藉乡土为辞且引疾推璋及仇钺可任帝复优诏慰勉乃行泽未至贼遣兵分掠赤斤苦峪诸卫声言与我金帛数万即归城印泽抵甘州谓番人嗜利可因而款也遣通事马骥谕还侵地及王当予重赏葬肃尔为许之泽即使舍音和珊以币二千银酒枪一往赂未得报泽辄奏番酋悔过效顺事已平帝即召泽还巡按御史冯时雍言城未归泽不宜遽召不纳初兵部缺尚书廷臣共推泽而王琼得之且陰阻泽言官多劾琼由是有隙泽又使酒常凌琼复时时谩骂钱宁琼以语宁宁未信琼乃邀泽饮匿宁所亲屏间挑泽醉骂宁闻大怒遂与琼侦泽事欲共倾之舍音和珊者素桀黠虽为哈密臣居肃州陰通莽肃尔为之耳目据城夺印皆其谋泽不知而遣之及泽还巴雅济迄不得返和卓塔济迪音亦不肯退复要重赏始以城印来归而已雅济留如故会舍音和珊与莽肃尔忽有隙莽肃尔欲杀之大惧求和卓塔济迪音为解许赂

币千五百匹期至肃州界之且陷之入寇曰肃州可得也莽肃尔喜令其婿玛哈穆特等俱随入贡以覘虚实且徵賂时李昆代赵监为巡抚虑寇变羈其使甘州而驱舍音和珊出关惧弗去和卓塔济迪音有弟曰和卓繖哲尔亦充贡使偕来为所羈和卓塔济迪音闻之怒复夺哈密城请莽肃尔移居之分兵据沙州拥万骑寇嘉峪关游击芮宁与参将蒋存礼都指挥万荣王琮各统兵往御宁以七百人先遇寇寇悉衆围宁而分兵缀诸将宁军尽没遂薄肃州城副使陈九畴固守先絶其内应下舍音和珊于狱寇知事泄虑援兵至大掠而去朝廷初闻番衆入寇复命泽提督三边军务率师西征而寇还至瓜州为副总兵郑廉所败又与卫拉特相攻力不敌移书求款泽罢行寻乞骸骨归事在十二年五月泽既去琮追论嘉峪之败靖穷诘增币者主名钱宁从中下其事大学士梁储等持之乃已舍音和珊之以内应系狱其党实巴伊克被捶死及事平械舍音和珊赴京下狱实巴伊克子旋以入贡至京探知王琮欲倾泽遂讼父冤法司行甘肃讯报琮欲因此兴大狱奏遣科道二人往勘明年还报无所引琮怒劾泽诬妄辱国斥为民坐昆九畴激变逮下吏昆谪官九畴削籍泽材武知兵然性疏润负气其经畧哈密事颇不当琮与宁因交齟之乃得罪又明年舍音和珊减死夤缘宁入豹房与实巴伊克之子俱侍帝左右帝悦之赐国姓授锦衣指挥而莽肃尔自肃州败後屡求通贡不得十五年归先所掠将卒及巴雅济家属复求贡廷议许之而巴雅济终不还】质实【赵监字克正壽光人冯时雍交河人王琮守德华太原人李昆高密人陈九畴字禹学曹州人玛哈穆特旧作马黑木和卓繖哲尔旧作火者撒者儿实巴伊克旧作失拜烟客今并改】

六月诏自今言事黜谪者毋复用

【兵部员外郎韩邦靖言廷臣顷因灾变极陈阙失未见听纳前後以言获罪者未蒙召用乞开延揽采择之门以收人心帝怒下邦靖锦衣狱黜为民乃有是诏】质实【韩邦靖字汝度朝邑人】

秋七月小王子犯大同宣府

【先是鞬鞞别部额布勒与小王子仇杀额布勒窜西海阿尔托苏与合逼胁洮西属番屡入寇巡抚张翼总兵王勋不能制渐深入边人苦之寻拥衆来川遣使诣翼所乞边地驻牧修贡翼陷以金帛令远徙额布勒遂西掠乌斯藏据之自是洮岷松潘无宁岁小王子亦数入寇杀掠尤惨以五万骑攻大同趋朔州掠马邑帝命仇越统兵御之战于万全卫斩三级而所失亡十倍以捷闻时八年夏五月也至是敌连营数十寇宣大塞而别遣万骑掠怀安总制丛兰告急命太监张永督宣大延绥兵都督白壬为大将协兰守御京师戒严已而敌踰怀安趣蔚州兰等预置毒饭于田间如农家饷而设伏以待敌至中毒伏猝发多死者敌乃还】质实【西海方与纪要在西宁卫西三百余里亦曰海郿道元水经注古西之地亦曰青海亦曰鲜水海亦曰允谷盐池西海则其总名海方数百里案西宁卫今为西宁府洮西番属明一统志洮西在洮州卫三十里洮河至初冬水冻凝结俗呼为珠子凌河河西皆番人所居称洮州十八族怀安汉上谷郡地唐置怀安县属新州明改置卫今仍为县属宣化府张翼介休人额布勒旧作亦卜刺阿尔托苏旧作阿尔秃厮今并改】

八月辛卯朔日有食之

京师地震

【是月十五日乙巳也】

九月谪编修王思为三河驿丞

【帝常喜观抟虎一日虎迫帝江彬趋扑乃解帝戏曰吾自足办安用尔至是复以狎虎被伤踰月不视朝思疏言孝宗皇帝子惟陛下下一人当为天下万世自重近者虎逸于押惊及圣躬臣闻之且骇且惧陛下即位以来于兹九载朝宁不勤政太庙不亲享两宫旷于问安经筵倦于听讲揆厥所自盖有二端嗜酒而荒其志好勇而轻其身由是戒惧之心日忘纵恣之欲日进好恶由乎喜怒政令出于多门纪纲积弛国是不立上天示警日食地震宗社之忧凛若朝夕夫勇不可好陛下已薄有所惩矣至于荒志废业惟酒为甚陛下露处外宫日湏于酒廨养杂侍警卫不严即不幸变起仓卒何以备之此臣所大忧也疏入留中者数日忽传旨降远方杂职遂谪三河驿丞】质实【三河驿在潮州府大埔县西今有巡司为县臣镇王思字宜学太保直曾孙】

冬十一月废归善王洹为庶人当洹自杀

【初流贼攻兗州当洹帅家衆乘城取护卫弓弩射却贼降敕奨谕遂以武健闻数与卒袁质舍人赵岩校射质岩家东平武断为乡人所恶同里吏部主事梁谷少不检颇倚质等为助既贵厌苦之又与千户高乾有怨会有衔质岩者诳谷云质岩且为乱谷心动因并指乾等告变于杨一清兵部议以大兵驻济南伺变而当洹父鲁王阳铸入长史马魁潜言当洹结质岩欲反虞祸及奏于朝帝遣司礼太监温祥大理少卿王纯等往按问围当洹第索其兵械则前射贼弓弩半敝谿谷所指皆平人魁惧事败乃讽所厚陈环及术士李秀佐证之复以书及贿抵镇守太监毕真使逮二人诘问已而二人以实对书贿事亦为真所发于是御史李翰臣劾谷魁诬罔宜即讯近幸方欲邀功责翰臣为叛人掩饰下之狱谪德州判官而释谷等不问御史程啓充疏言谷魁鼓煽流言死不蔽罪纵首祸而谪言者非国体不报廷臣议当洹罪卒无所坐以藏护卫兵器违祖制废为庶人戍质等肃州所连逮多瘦死魁坐诬奏斩中官送当洹之高墙当洹大恸曰冤乎触墙死闻者伤之】质实【当洹鲁庄王阳铸幼子王纯字希大慈谿人李翰臣大同人程啓充字以道四川嘉定州人】

发明【赵岩袁质隶卒贱人耳而当洹与之善其武断乡曲亦未必不倚藩府为声势当洹岂得为无过然不过交游之滥诬以作乱初无实据而兵部张皇其事即议驻兵伺变遂至马魁挟怨而售谿鲁王惧祸以证子迨按问无状谿讯已明当洹卒无所坐之罪而以射贼既敝之弓弩摭拾以断斯狱在近幸贪功而乐祸固不足深责彼廷臣既正魁罪则已为当洹昭雪其诬而复废为庶人仍使含冤而死於非命岂得谓持谿之平哉】

十二月营乾清宫加天下赋百万

【工部奏营建宫室庀材鸠工计直白金百万两请均赋于民岁徵十之二恐徵输不及暂于内帑借其半以给用帝终不欲假用内帑乃于一岁中尽徵之于是催科旁午海内騷然矣】

【乙亥】十年春正月帝有事于南郊逮暮成礼

【是日漏下二鼓帝始还宫杨廷和等疏谏兵科给事中王良佐言尤切曰郊庙之祀天子必省牲必誓戒散斋致斋有常期有专所当祭之日夙驾而往行礼之祭无贰尔心期昭假也迺者正月初五日躬祀太庙薄暮方出行礼则登献夙戒之馐不将败恶与祭斂戢之容不寢懈怠者寡矣初十日郊祀初七日当誓戒臣等导驾与百官具朝服候至夜漏下忽见执驾之人一呼而散宿卫之士羣噪而奔臣等伫集左掖昏暗中传闻免朝不知旨从何出惶惧失措徘徊久之至初九日车驾当临斋宫百官莫不晨趋以俟乃薄暮方往仓猝至坛行礼行礼甫毕旋即下营臣愚不知陛下此行果事天耶抑游幸也及次日驾还复至夜分城门失启闭之常禁闕纵驰骋之乐一切非时与制矣又凡令节大朝贺每至昏暮而司晨之官尚报卯时传之四方所损非细乞自今祭祀朝贺之期经筵讲书之候起居寢兴之节务各及时遵制举行则事天事祖与百凡纲纪无不毕张天下幸甚不报】质实【王良佐夷陵州人】

民间讹言选女入宫

【御史张翰言旬日以来民间相传谓朝廷欲博选女子以充後宫凡有女之家未字者不择壻而配及笄者不备礼而成甚至藏於嫖娼之家致惟簿之议京师如此传之天下惊疑益甚上亏圣化下斲伦乞敕礼部榜谕以解万民之惑不报寻有无赖子数辈挟二媼为媒氏乘夜猝入李姓者家强舁其女以去次夕复强舁祁氏女不从相诟争为迹卒所获诘其名乃蔡明冯玉吴纲安亨也锦衣卫以闻诏悉以付狱仍令都察院禁约之人心始安】质实【张翰辽东广宁後屯卫人】

夏四月下江西副使胡世宁于狱

【时宸濠骄横有异志皆莫敢言世宁愤甚上疏曰江西之盗剿抚二说相持臣愚以为无难决也已抚者不诛叛者无赦初起者亟剿如是而已顾江西患非盗贼宁府威日张不逞之徒羣聚而导以非法上下诸司承奉太过数假火灾夺民地采辨扰旁郡蹂藉徧穷乡臣恐良民不安皆起为盗臣下畏祸多怀二心请于都御史俞谏任汉中专委一人或别选公忠大臣镇抚敕王止治其府毋挠有司以靖乱源销意外变章下兵部尚书陆完议专委谏计贼情剿抚之宜至所言违制扰民疑出伪托宜令王约束之报可宸濠闻大怒列世宁罪徧赂权幸必杀世宁章下都察院右都御史李士实宸濠党也与左都御史石玠等劾世宁狂率当治命未下宸濠奏复至指世宁为妖言乃命锦衣官校逮捕世宁已迁福建按察使闻之即间道走京师自系都察院复奏其畏避掩饰得旨下镇抚司拷掠于是御史徐文华言世宁之论宁府

非特为朝廷亦为宁王虑也安有所谓妖言诽谤离间懿亲者耶宁府隐蔽之事岂惟世宁知之痛之忧之中外之臣亦知之痛之忧之矣但人多顾忌而世宁则忠于谋国耳乃以忠获罪始令御史逮系复令官校捕解世宁恐惧间关赴诉其情盖有难于显白者夫人臣上为国家下为宗室?愤毕诚图画安危言适启其口而灾旋逮身亦可哀已比见宁王乞护卫则予护卫乞屯田则予屯田凡玺书之褒嘉恩礼之稠叠诸宗藩未能或之先也威势日以张大失今不戢容有纪极乎江西之臣畏其隐祸莫敢显言世宁一言及之寘之重法异日谁复敢为陛下言者臣以为杜天下之口夺忠鯁之气弱朝廷之势长宗藩之威招意外之虞皆自今日始可不为寒心哉乞履霜谨始曲赐优容庶远僭逼之嫌全治安之体不听世宁于狱中三上书言宸濠逆状卒不省繫岁余言官程启充等又交章救杨一清以危言动钱宁乃论谪戍居三年宸濠果反】质实【石玠字?秀藁城人徐文华字用光嘉定州人】

闰四月以吏部尚书杨一清兼武英殿大学士预机务【先是一清 推内阁不用及是杨廷和以忧去遂以一清代之】

冬十月遣太监刘允使乌斯藏

【左右言西域胡僧能知三世帝欣然欲见之考永宣间侯显入番故事命中官刘允乘传往迎阁臣梁储等言祖宗朝虽尝遣使西番盖因天下初定藉以化导愚顽镇抚?服非信其教而崇奉之也承平之後止因其来朝厚加赏赉未尝轻辱命使远涉其地今忽遣近侍往送幢幡朝野闻之莫不骇愕而允奏乞盐引至数万动拨快马船至百艘又许其便宜处置钱物势必?带私盐骚扰邮传为官民患今蜀中大盗初平疮痍未起在官已无余积必至苛敛军民铤而走险盗将复?况自天全六番出境涉数万之程道途絶无邮置人马安从供顿脱中途遇寇何以御之亏中国之体纳外番之侮无一可者所斋敕书臣等不敢撰拟帝不听礼部尚书毛纪都给事中叶相御史周伦徐文华等并切谏亦不听允行以珠琲为幢幡黄金为供具赐其僧金印犒赏以钜万计敕允往返以十年为期所携茶盐以数十万计允至临清漕艘为之阻截入峡江舟大难进易以 相连二百余里至成都日支官廩百石蔬菜银百两锦官驿不足取旁近数十驿供之治入番器物估直二十万守臣力争减至十三万工人杂造夜以继日居岁余始率将校十人土千人以行越两月入其地番僧恐中国诱害之匿不出见将士怒欲脇以威番人夜袭之夺宝货器械以去将校死者二人卒数百人伤者半之允乘善马疾走仅免】质实【天全六番唐宋时皆为羈縻之域隶于雅州元置碉门鱼通黎雅长河西寧远等处宣抚司属吐番等处宣慰司後改六番招讨司又分置天全招讨司明初合为天全六番招讨使司隶四川都司今改天全州属雅州府峡江方輿纪要由瞿唐而下谓之峡江峡江两岸重岩叠嶂蔽日隐天至于夏水长陵沼泝阻絶王命急宣有时朝?白帝暮到江陵其间千二百里虽乘犇遇风不能及也锦官驿在成都府城东毛纪字维之掖县人叶相江都人周伦崑山人】

?明【永乐中令侯显辈持节入番意在招徠异域顾中官奉使遐陬实有伤於国体乃武宗惑近习?诞之言转欲援为故事俾刘允远迓西僧岂非成祖作法于凉有以貽之口实耶然侯显之使番仅齎书币以往选壮士健马护行而已而允则供具不貲糜金无算甚至百艘并下

漕阻临清十驿难容邮增蜀道骚扰之害于兹极矣且乌斯藏距四川马湖府止千五百余里何遂往返以十年为期此必中官欲盛治资装故极称辽远以耸听卒之宝货器械适足启番人潜袭之谋耗中国以取侮外藩盖未有甚于此役者也】

十二月癸丑朔日有食之

【是日车驾当出视郊祀牲礼部请改次日因言视牲乃郊祀之始日食乃天变之微今大礼将举忽遭此变上天示戒亦昭然矣伏望顺承天意益加敬畏自兹以往皆郊祀之所有事起居必以其道出入必以其时一遵祖宗典训西慎行之至于朝贺燕享亦莫不然则天心感格灾变不足弭矣不纳】

下宁波知府翟唐于狱

【先是浙江市舶太监崔珪藉贡物扰民为唐所裁抑奸民附珪为恶唐执而笞之寻病死珪奏唐阻格贡献笞杀所遣人帝怒逮下镇抚司狱拷治巡按御史赵春等交章救之给事中范珣亦言唐被逮日军民遮道涕泣请宥令还任不听帝方宠任宦寺势甚恣中外官与抗者为所诬陷辄得罪时太监在浙者凡四人珪主市舶王堂为镇守晁进督织造张玉管营造爪牙四出民不聊生僉事韩邦奇疏请禁止堂亦奏邦奇阻格下狱有工部主事王銓出辖徐沛牐河织造中官吏宣过其地索挽夫千人沛县知县胡守约给其半宣怒自至县捕吏銓助守约与抗宣奏于朝逮系狱宣在凤阳列黄梃二于轺前号为赐棍每以杖人有至死者自都御史以下莫敢问御史张士隆劾奏之又劾太监廖堂侄铠奸利事其党见疏大恨遂合构以陷之御史张经出按宣府发镇守太监于喜贪肆状为喜所讦皆先後逮治于是给事中徐文溥言朝廷刑威所及乃在奄寺一言旗校络绎於道途搢绅骈首於狴犴远近震骇上下屏气向一瑾乱政於内今数瑾纵横於外乞治珪等诬罔罪帝终不省已而唐谪嵩明知州邦彦斥为民守约罢官銓输赎士隆谪晋州判官经谪安宁知州】质实【安宁州古滇国螳螂州地汉为益州郡之连然县唐武德初改置安宁县天实初陷于蛮後为蒙氏段氏所据元取其地立安宁千户所後改州明属云南府今因之翟唐字尧佐长垣人赵春巴县人范珣天台人韩邦奇字汝节朝邑人王銓字廷和大庾人张士隆字仲修安阳人张经兴州左卫人】

【丙子】十一年春正月朔帝御奉天殿受朝贺逮暮成礼【御史程启充言自古帝王勤惕匪懈所以畏天命收人心励臣工威蕃服也今正旦令节文武羣臣及外蕃之使待漏入贺迄酉而後礼成迨散朝则夜久矣枵腹之衆奔趋赴家前仆後蹶互相蹂践有将军赵朗者竟死禁门其他臣僚失簪笏毁衣裳至以得生相庆午门左右吏觅其官子呼其父仆求其主喧若市卫玩莫甚焉郊祀在迓驾出有期伏望屏弃宴游益崇敬畏以肃臣民观瞻不报】

三月以马昂为右都督

【昂初为延绥总兵官以骄横奸贪劾罢有女弟善歌能骑射嫁指挥毕春有娠矣昂因江彬夺归进于帝召入豹房大宠传陞昂右都督弟炆并赐蟒衣大璫皆呼为舅赐第太平仓东

熏灼动京师都给事中吕经等言陛下果为皇储之图自宜博选世族使备嫔御奈何溺卑污以自褻且闻昂及诸子弟出入宫禁肆无忌惮应对左右殊乏臣礼又树立徒党以为羽翼小人之情无厌失今不治後悔何及伏望将昂显示诛戮并斥所入孕妇庶几人言可息御史张淮徐文华等亦以为言未报都给事中石天柱上疏曰臣等请出孕妇未蒙进止窃疑陛下之意将遂立为已子秦以吕易嬴而嬴亡晋以牛易马而马灭彼二君者特出不知致堕奸计谓陛下亦为之耶天位至尊神明之胄尚不易负荷而况么麽之子借使以陛下威力成于一时异日诸王宗室肯坐视祖宗基业与他人乎内外大臣肯俯首立于其朝乎望急遣出以清宫禁消天下疑卒不报帝每从数骑过昂饮一日饮酣召昂妾昂以妾病辞帝怒而起昂惧复结太监张忠进其妾杜氏遂传陞灵都指挥?仪真守备昂喜过望又进美女四人谢恩然马氏宠後亦渐衰】质实【吕经字道夫陕西宁州人张淮南皮人石天柱字季瞻岳池人】

夏大旱

【命定国公徐光祚会昌侯孙铭新宁伯谭佑礼部尚书毛纪以祷两祭告天地社稷山川及城隍之神时四月丁巳也给事中徐文溥偕同官上疏曰顷者因灾早礼部奏请修省?读圣谕谓关朕躬者皆已知之臣惟兹一念之诚足以事上帝迓天休矣虽然知之非艰行之维艰陛下诚能经筵讲学早朝勤政布宽恤以安人心躬献享以重宗庙孝养慈闈敬事苍昊舍豹房而居大内远嬖幸而近儒臣禁中不为贸易皇店不以罔财还边兵于故伍斤番僧于外寺毋昵俳優尽屏义子马氏已醮之女弗留乎後宫马昂梟獍之族尽夺其兵柄停诸路之织造罢不急之土木太仓局门户之内官禁水陆舟车之进奉出留中奏牍以达下情省传奉冗员以慎名器则陛下所谓关朕躬者非徒知之且一一行之而不转祸为福者未之有也报闻】质实【徐光祚中山王达六世孙孙铭会昌侯继宗之子谭佑新宁伯裕之弟】

五月錄自宫男子三千四百人充海户

【月给米人三斗时自宫未錄者尚数千人复扣礼部门求錄用令逐归原籍 至京奏扰者罪之然卒不能禁絕也】

前兵部尚书刘大夏卒

【大夏忠勤恳笃遇知孝宗忘身殉国于权幸多所裁抑故深见嫉于小人既复官致仕清军御史王相广东右布政使吴延举请复廩隶中官用事者终嫌之不许大夏家居教子孙力田谋食稍羸散之故旧宗族预自为圻志曰无使人饰美俾怀愧地下也尝言居官以正己为先不独当戒利亦当远名又言人生盖棺论定一日未死即一日忧责未已及是卒年八十一赠太保諡忠宣 先是大夏为刘瑾陷被逮方鋤菜图中入室携数百钱跨小驴就道赦归有门下生为巡抚者枉百里谒之道遇扶犁者问孰为尚书家引之登堂即大夏也朝鲜使者在鸿胪寺馆遇大夏邑子张生因问起居曰吾国闻刘东山久矣安南使者入贡曰刘尚书戍边今安否其为外国所重如此】

秋八月大学士杨一清罢

【时义子钱宁用事一清以灾异陈时政中有狂夫惑圣听匹夫摇国是禁廷杂介胄之夫京师无藩篱之托语讥切近幸帝弗省宁与江彬辈闻之大怒使仇人于帝前为蜚语刺讥一清宁又噉武学生朱大周讦一清前任吏部考察不公吏科驳大周诬罔大周 上书丑诋一清吏部以其挠铨制伤国体乞下法司定治宁从中主之诘责吏部互相掩饰令陈状户科都给事中周金等上疏曰考察内外官皆吏部会同都察院奉命举行此累朝故事也问刑条例备载考察被劾之人不得挟忿摭拾大周前後具奏瀆乱宸聪开羣枉之门辟侥幸之路据其肆言无忌必有主使之舞乱国经未有若是之甚者请严鞫大周以为将来之戒御史陈轼等亦以为言皆不听一清乃力请骸骨归】质实【钱宁用事明佞幸传初宁曲事刘瑾得幸于帝性猥狡善射拓左右弓帝喜赐国姓为义子传陞锦衣千户瑾败以计免历指挥使掌南镇抚司累迁左都督掌锦衣卫事典诏狱言无不听其名刺自称皇庶子引乐工臧贤西域人于永及诸番僧以秘戏进请于禁内建豹房新寺恣声伎为乐复诱帝微行帝在豹房常醉枕宁卧百官候朝至晡莫得帝起居密伺宁宁来则知驾将出矣太监张锐领东厂缉事横甚而宁典诏狱势最炽中外称曰厂卫司务林华评事沈光大皆以杖系校尉为宁所奏逮下锦衣狱黜光大贬华一级锦衣千户王注与宁昵樵人至死员外郎刘秉监持其狱急宁匿注于家而属东厂发刑部他事尚书张子麟亟造谢宁立释注乃已厂卫校卒至部院白事称尚书子麟辈曰老尊长太仆少卿赵经初以工部郎督乾清宫工乾没帑金数十万经死宁佯遣校尉治丧迨经妻子扶衬出姬妾帑藏悉据有之中官廖堂镇河南其弟锦衣指挥鹏肆恶为巡抚邓庠所劾诏降级安置鹏惧使其嬖妾私事宁得留任宁子永安六岁为都督养子钱杰钱靖等俱冒国姓授锦衣卫官念富贵已极帝无子思结强藩自全遂党宁王宸濠遣人往宸濠所有异谋讽宸濠数进金银玩好于帝谋召其世子司香太庙为入嗣地又以玉带彩紵附其典宝万锐归诈称上赐凡宸濠所遣私人行贿京师皆主伶人臧贤家由宁以达帝左右周金字子庚武进人陈轼应城人】

以王守仁巡抚南赣汀漳

【南赣地连闽广山谷深阻盗贼易为巢穴陈金俞谏先後讨之稍戢不数年复啸聚作乱谢志山据横水左溪桶冈池仲容据浰头皆称王与大庾陈曰能乐昌高快马柳州龚福全等攻剽府县而大帽山贼詹师富等又起于是江西福建广东湖广之交千余里皆乱前巡抚文森称疾兵部尚书王琼劾罢森荐守仁谪遂自鸿臚卿擢右佥都御史以代之 初守仁既谪龙场驿丞地在万山中苗獠杂居守仁因俗化导夷人悦服相率伐木为屋以居之瑾诛後量移庐陵知县累迁鸿臚卿】质实【横水左溪方輿纪要南源水在南安府崇义县西南五十里出南源山东流北折合县东南六十里之西符水盖南源为横水西符为左溪一云左溪即汀水亦曰鄞江在汀州府长汀县东源出宁化下流至广东大埔县入海桶冈在崇义县西二百余里接湖广柳州界浰头山在惠州府和平县北六十里亦曰和平岗绵亘深远接江西龙南县境最北近龙南者为上浰在岑冈者为中浰最南者为下浰大庾汉南埜县地武帝遣将庾胜讨南越筑城于此有大庾城之名隋因置大庾镇唐升县明为南安府治乐昌汉曲江县地梁置梁化县隋改乐昌明属韶州府庐陵汉县後汉改西昌隋复曰庐陵明为吉安府治今皆

因之池仲容亦曰大髯文森衡山人】

南京地震

【是月十九日戊辰也】

以礼部尚书蒋冕兼文渊阁大学士预机务

【冕清谨有器识雅负时望及是入阁明年改武英殿兼太子太傅】

【丁丑】十二年春正月帝祀南郊遂猎于南海子

【初帝好佚游然犹虑外廷知至是从近幸言乃于月之戊寅召百官至左顺门明告以己丑郊竣将幸南海子观猎大学士梁储等暨廷臣极谏皆不听及期连藏祀事遂往畋文武大臣扈从者不许入既晡始令归候承天门夜半驾还宫御奉天殿行庆成礼以所获麋鹿处免赐府部大臣暨翰林科道官】

二月增设陕西织造中官

【给事中任忠言陕西地瘠早寒民多穴居衣皮舖藿无他生计沉沿边郡县屡遭寇掠耕牧旷废其腹里不被兵者又以调集士马挽运刍粮亦皆疲敝麋麦槁于春夏苗稼尽于雪霜逃窜流移十室而九近复遣中官往监织造费辄数万催督峻急民不堪命夫鸟穷则啄兽穷则攫臣不胜意外之忧民或啄以攫也疏入不报寻以两淮浙江四川河东盐课给陕西充织造之用】质实【任忠崑山人】

夏五月以礼部尚书毛纪兼东阁大学士预机务【纪前在礼部以帝遣使乌斯藏 疏切谏不报郊祀毕请勤朝讲又以储嗣未建乞早定大计亦不听寻改理诰勅掌詹事至是靳贵致仕去遂代入阁同列皆倚重之】

六月乙巳朔日有食之

秋八月帝微行至宣府

【江彬欲擅权数导帝远游使诸幸臣不得近因言宣府乐工多美妇人且可观边衅瞬息驰千里何鬱鬱居大内为廷臣所制帝然之遂将出关幸宣府巡关御史张钦上疏谏曰比者人言纷纷谓车驾欲度居庸远游边塞臣度陛下非漫游盖欲亲征北寇也不知北寇猖獗但可遣将徂征岂宜亲劳万乘英宗不听大臣言六师远驾遂成己巳之变夫匹夫犹不自轻奈何以宗庙社稷之身蹈不测之险况今内无储贰国家多事甘肃有土番之患江右有奉贼之扰淮南有漕运之艰巴蜀有采办之困京畿诸郡夏麦少收秋潦为沴而陛下不虞祸变欲纵

警长驱观兵絕塞臣窃危之已闻朝廷切谏皆不纳复疏言臣愚以为乘与不可出者有三人心摇动供亿浩繁一也远涉险阻两宫悬念二也北寇方张难与之角三也臣职居言路奉诏巡关分当效死不敢爱死以负陛下疏入不报至是帝急装微服出德胜门幸昌平传报出关甚急钦命指挥孙玺闭关纳门钥藏之分守中官刘嵩欲诣昌平朝谒钦止之曰车驾将出关是我与君今日死生之会也关不闻车驾不得出违天子命当死关闻车驾得出天下事不可知万一有如土木我与君亦死宁坐不开关死死且不朽顷之帝召玺玺曰御史在臣不敢擅离乃更召嵩嵩谓钦曰吾主上家奴也敢不赴钦因负敕印乎劒坐关门下曰敢言开关者斩夜草疏曰臣闻天子将有亲征之事必先期下诏廷臣集议其行也六军翼卫百官扈从而後有车驾之音羽旄之美令寂然一不闻辄云车驾即日过关此必有假陛下名出边勾贼者臣请捕其人明正典刑若陛下果欲出关必两宫用宝臣乃敢开不然万死不奉诏奏未达使者复来钦夫劒叱之曰此诈也使使者惧而返为帝言张御史几杀臣帝大怒顾钱宁为我速捕杀御史会梁储蒋冕毛纪追及于沙河请帝归京师帝徘徊未决而钦疏亦至廷臣又多谏者帝不得已乃自昌平还意殊怏怏又二十余日钦巡白羊口帝复微服自德胜门出夜宿羊房民舍遂疾驰出关数问御史安在钦闻追之已不及欲疏谏而帝使中官谷大用守关禁毋得出一人钦感愤西望痛哭帝至宣府彬先为帝建镇国府第悉辇豹房珍玩女御实其中彬从帝数夜入人家索妇女帝大乐之忌归称曰家里】质实【沙河昌平州志沙河北店距州二十五里南店距州二十七里羊房堡名在青边口西南张钦字敬之顺天通州人】

九月帝自称总督军务威武大将军总兵官

【时自宣府至阳和所驻蹕称军门凡有徵发概以威武大将军钧帖行之寻命户部发银一百万两输宣府以备赏劳尚书石玠持不可帝弗从乃输其半】

冬十月小王子入寇帝自将御之

【先是帝在阳和闻小王子帅五万骑驻边将入寇帝喜雄畧得自见遂命大同总兵官王勋副总兵张輓游击陈铨孙镇军大同城辽东参将萧滓军聚落堡宣府游击时春军天城副总兵陶杰参将杨玉延绥参将杭雄军阳和副总兵朱乐军平鲁游击周政军威远时九月戊戌也至是月辛丑寇分遁南下勋等率所部御之帝命春泽往援政峦及参将麻循高时绕敌役夹击又调宣府总兵官朱振参将左钦等俱会阳和参将江桓等为之策应越四日甲辰勋与敌遇督军步战寇南循应州而去明日勋等复遇敌於应州城北五里寨战数十合杀伤颇相当薄暮敌骑傍东山去既而分兵围勋等比晓天大雾围解勋等入应州城峦及都指挥徐辅兵至明日勋等出城大战时春泽等兵亦至寇复以别骑迎敌官军不得合帝乃率太监张永魏彬张忠都督江彬等兵自阳和来援衆殊死战敌稍却诸军乃得合日暮即其地为营乘輿止焉明日敌来攻帝复督诸将御之自辰迄酉战至百余合敌退引而西帝与诸将归敌後至朔州边会大风雾晦官军亦疲困遂还是役也斩首十六级官军死者五十二人重伤者五百六十三人乘輿几陷勋等以捷闻於朝】质实【聚落堡在大同府东六十里天顺三年筑城周三里天城卫在大同府东北百八十里东南至蔚州百五十里洪武三十一年置今改天镇县属大同府平鲁卫在大同府西二百五十里今改平鲁县属朔平府应州五代唐分云

州地置应州竝置金城为应州治洪武初省县入州属大同府今因之】

十一月召杨廷和复入阁

【先是十年三月廷和以父忧归及是服阕召之还朝既至疏请回銮不报复与蒋冕驰至居庸欲身出塞请谷大用扼关门不得出乃还】

【戊寅】十三年春正月朔帝在宣府

【文武羣臣於奉天门行遥贺礼】

振京畿饥

【给事中邵锡言自去年雨水为灾顺天保定河间被害尤甚真定大名等五府次之人民艰食饿殍盈路流移不止盗贼将起非细故也陛下轸念灾伤既发户部金及德州仓粮遣郎中二人振济窃恐待哺者衆所发不足供所需郎官权轻无以督率羣吏请别遣重臣增给银谷以往其税粮物料仍乞例外蠲免以苏民困帝可其奏乃遣佥都御史李钺督振而敕巡抚李瓚臧凤抚恤真定等府饥民乏耕种具者官为补助是年二月留庐凤淮扬徐州兑运粮五万五千石及折粮脚价银四万两淮浙盐价银各三万两分给庐凤等府县亦以水灾故也】质实【邵锡安州人李钺字?甫祥符人臧凤字瑞周曲阜人李瓚濮州人】

帝至自宣府

【帝将还京礼部具迎驾仪令京朝官各朝服迎候而传旨用曳撒大帽惊带且赐羣臣大红紵丝罗纱各一其彩绣一品斗牛二品飞鱼三品蟒四品麒麟五六七品虎彪翰林科道官不限品级皆与焉惟部曹以下不与言官论其非制不纳及是迎帝德胜门外羣臣具彩帐数十彩聯数千皆金织字序词惟称威武大将军不敢及尊号衆官列名于下亦不敢称臣各陈羊酒白金彩币手红梵夹候道左盖中官预传帝意如此时帝戎服乘赤马佩剑边骑簇拥遥见火球起戈矛间烟直上乃知驾至羣臣齐伏地叩首帝下马坐御幄大学士杨廷和奉觴梁储注酒蒋冕捧果楮毛纪擎金花二称贺帝曰朕在榆河亲斩敌首一级亦知之乎廷和等皆顿首称圣武帝遂驰马入东华门宿豹房是日太雨雪帝至时夜已久羣臣迎驾者仆马相失曳走泥淖中夜半得入城有几殆者】质实【明史五行志曳撒大帽行役所用非见君服皆服妖也輿服志洪武二十四年定公侯驸马伯服绣麒麟白泽文官一品仙鹤二品锦鸡三品孔雀四品云雁五品白鹏六品鹭鸶七品鸂鶒八品黄鹂九品鹌鹑杂职练鹄风宪官獬廌武官一品二品狮子三品四品虎豹五品熊黑六品七品彪八品羣牛九品海马时文臣服色亦以走兽而麒麟之服逮于四品尤异事也榆河即榆沟山西通志镇川堡十五墩北直榆沟门又西十九墩北直牛心山山左右胥榆沟也】

罢南郊致斋

【是月庚戌当南郊以初至不及致斋遂行礼先是帝在宣府既閱岁未还内外羣臣皆恐帝竟忘返不得亲郊南京礼部尚书吴俨上疏谏语极刘切畧言臣等初闻车驾出幸昌平曾具疏极论不蒙采纳既而又闻出居庸幸宣府大同宰辅不及知羣臣不及从六军之士不及卫护臣等战惧惊惶未测其故伏而思之是必因边圉告急陛下虑羣帅之不力悯边氓之被俘急于制御遂不暇咨谋而行耳然今在廷之臣文武如林宁无一人可委任者而陛下必欲自行耶方车驾之初出臣民引领北望皆谓回銮必在九月万壽节时则以天下之朝贺者毕至蕃服之贡献者在廷岂宜使之空行及九月既过人谓回銮必在长至令节时则以九庙有灌献两宫有庆贺岂宜遣人以代及长至既过又谓必在明年元旦时今过元旦又十日矣车驾还否远不可知万一未还则郊祀大礼尤非臣下所敢代者将遂缺而不举欵若谓寇尚在边则待寇灭而後还欵又万万无此理况近者内外人心摇动口语籍籍转相传播徐淮以南饥饉千里去冬雨雪为灾民无衣食至于父子流移兄弟离散畧不系念甚有自引决者民穷至此安保其不为盗臣恐所御之寇尚在藩篱而不虞之患或起肘腋此不可以不虑也时户部侍郎张津虑天府丞许延光给事中孙懋御史潘?先後驰疏请回銮皆不报帝既还京虽不失郊期而仓猝成礼仍猎南海子翌日始还宫御奉天门陈示应天所获刀械衣器令羣臣纵观】质实【潘?未详案是年正月辛丑朔武宗以丙午还京乃月之六日吴俨疏有过元旦十日语盖俨官南京尚未知武宗之已还也】

帝复如宣府

【帝以是月丙午还京居十四日复如宣府廷臣从者四人余以次追及杨廷和等 疏谏不听】

二月太皇太后王氏崩

【諡孝贞皇后】

帝还京师

【孝贞皇后崩于是月己卯帝闻赴告乃自宣府还壬午至京师发丧】

夏五月己亥朔日有食之

六月葬孝贞皇后

【先是帝以孝贞皇后将葬假启土为名欲复巡幸给事中石天柱念帝盘游无度廷臣虽谏帝意不回思所以感动之者乃刺血草疏畧曰臣窃自念生臣之身者臣之亲也成臣之身者累朝之恩也感成身之恩欲报之于陛下者臣之心也因刺臣血以写臣心明臣愚忠冀陛下怜察近者昊天不吊祸延太皇太后丧礼大事孙子所当自尽陛下于太皇太后未能尽孝则羣臣于陛下必不能尽忠不忠将无所不至猝有变故人心瓦解矣方今朝廷空城市空仓

廩空边鄙空大下皆知危亡之祸独陛下不知耳治乱安危在此行止此臣所痛心为陛下惜复昧死为陛下言也凡数千言当天柱刺血时恐为家人所阻避居密室虽妻子不知既上即易服侍罪闻者皆感怆而帝终不悟遂往幸昌平既视隧道幸密云时民间竞传欲括女子敛财物以充进奉所至遁匿永平知府毛思义下令以为大丧未毕车驾必不出此必奸徒矫诈自今非有府部抚按文书妄称驾至扰民者悉捕治之帝闻大怒执送锦衣狱降云南安宁知州帝复往喜峰口驻驿马招朵颜三卫人至关宴劳毕还幸河西务指挥黄勲以供应为名科扰侵盗巡按御史刘士元按之勲逃至行在因嬖幸潜士元闻驾至令民间尽嫁其女藏匿妇人遂命裸缚士元而讯之野次无杖取生柳杖四十几死因系于车驰入京下锦衣狱至是梓宫发京师帝戊服从至陵饮帐殿及升祔帝至暮乃入庙雷雨大作烛尽灭言官上疏请修省不报】质实【毛思义阳信人刘士元彭县人】

秋七月帝复如宣府

【帝从江彬言将徧游塞上托言边关多警特命总督军务威武大将军总兵官朱壽统六师往征令内阁草敕阁臣不可帝复集百官左顺门面谕衆皆泣谏而帝意不可回竟不听遂复北幸由东安门出羣臣知而送者五十二人寻驻驿宣府已又驻驿大同凡车驾所至近侍先掠良家女以充幸御至数十车在道日有死者左右不敢闻且令有司饩廩之别具女衣首饰为赏赍费远近騷动所经多逃亡帝不知也彬复导帝自大同渡黄河次榆林至绥德州幸总兵官戴钦第纳其女还由西安历偏头关抵太原大徵女乐晋府乐工杨腾妻刘氏善讴帝悦之载以俱归大见宠幸左右或触帝怒陰求之辄一笑而解彬与诸近幸皆母事之称刘娘娘云】质实【大同黄河水道提纲黄河自旧東胜州稍折而东南至湖滩河朔渡口遂南流百里入山西平鲁县边界案平鲁於明为卫在大同府西二百五十里府志云西界黄河以此本朝雍正三年改平鲁卫为县又於明大同右卫地置朔平府以领之故今大同府西距朔平不复以河为界】

王守仁平江西贼

【守仁既至赣州知左右多贼耳目呼老隶诘之隶不敢隐因贯其罪令緇贼贼动静无弗知于是檄福建广东会兵先讨大?山贼詹师富督副使胡璉等分道进指挥覃桓县丞纪鏞薄贼于险战死守仁亲率銳卒屯上杭佯退师出不意搗之连破四十余寨俘斩七千有奇指挥王铠等禽师富疏言权轻无以令将士请给旗牌提督军务得便宜从事尚书王琼奏从其请乃更兵制二十五人为伍伍有小甲二伍为队队有总甲四甲为哨哨有长協哨二佐之二哨为营营有官参谋二佐之三营为阵阵有偏将二阵为军军有副将皆临事委不命于朝副将以下得递相罚治部署既定乃进兵大庾讨陈曰能而横水贼谢志山乘间急攻南安知府季敷击败之副使杨璉等亦生紮曰能以归时十二年九月也遂于冬十月讨横水左溪令都指挥许清赣州知府邢珣等各一军会横水敦及守备郝丈等各一军会左溪又令吉安知府伍文定等遏其奔轶守仁自驻南康去横水三十里先遣四百人伏贼巢左右进军逼之贼方迎战两山举帜贼大惊谓官军已尽犁其巢遂溃乘胜克横水志山及其党萧贵模等皆走桶冈左溪亦破守仁以桶冈险固移营近地谕以祸福贼首蓝廷凤等方震恐见使至大喜期仲冬

朔降而珣文定已冒雨夺险入贼阻水阵珣直前战文定等自右出贼仓卒败走诸军遂破桶冈志山贵模廷凤面缚降凡破巢八十有四俘斩六千有奇时湖广巡抚秦金亦破龚福全其党千人突至诸将禽斩之乃设崇义县于横水控诸徭还至赣州议讨浰头贼初守仁之平师富也龙川贼卢珂郑志高陈英咸请降及征横水浰头贼将黄金巢亦以五百人降独池仲容未下横水破仲容始遣弟仲安来归而严为战守备诡言珂志高讐也将袭我故为备守仁佯杖系珂等而陰使珂弟集兵待遂下令散兵岁首大张灯乐仲容信且疑守仁赐以节物诱入谢仲容率九十三人营教场而自以数人入谒守仁呵之曰若皆吾民屯于外疑我乎悉引入厚饮食之贼大喜过望益自安守仁留仲容观灯乐正月三日大享伏甲士于门诸贼入以次悉擒戮之自将抵贼巢连破上中下三浰斩馘二千有奇余贼奔九连山山横亘数百里陡绝不可攻乃简壮士百人衣贼衣奔崖下贼招之上官军进攻内外合击禽斩无遗乃于下浰立和平县置戍而归自是境内大定初朝议贼势强发广东湖广兵合剿守仁上疏止之不及桶冈既灭湖广兵始至及平浰头广东尚未承檄守仁所将皆文吏及偏裨小校平数十年巨寇远近惊为神】质实【南安唐?州地宋淳化中置南安军元为路明改府崇义本上犹县横水地明正德十二年置县属南安府龙川秦县南汉为循州治明洪武初州废以县属惠州府今皆因之九连山在江西龙南县南广东连平州东高二千余丈周五六里东连龙川河源南连博罗增城龙门从化西连翁源英德北连龙南环通九县因名和平本龙川县之和平岗地是年置县属惠州府今皆因之胡璉沅阳人季敦瑞安人杨璉洛阳人邢珣当涂人秦金字国声无锡人】

九月帝自加镇国公

【帝欲自矜武功先尝令兵部议加公爵敕曰总督军务威武大将军总兵官朱壽亲统六师扫除边患神功圣武宜加显爵以报其劳杨廷和等言陛下躬膺天命所居者祖宗之位则所行者当遵祖宗之法以上顺天意下慰人心今奉前旨传之四方必将羣聚而议曰所谓威武大将军者果何时官制所谓总兵官某者果何人姓名且亲统六师之说惟陛下自任之何为又举而归之总兵官为总兵官者岂可曰统六师乎至于神功圣武之一言乃臣下褒颂君上之词今以之施于大将军至欲加以公爵公爵虽尊亦人臣而已岂可以当神圣之名乎事之不经名之不正言之不顺一至于此自古及今未之有也不知陛下何为而乐此乎迺者陛下久不亲政天下人心危疑忧惧若复闻此其为疑惧又当何如万一宗藩之中或有援引祖训指此为言不知陛下将何以应之或又以朝无正臣内有奸恶为名不知陛下之左右及臣等代言之臣又将何以自解臣等戮身亡家固不足恤但恐朝廷之上祸乱将从此始耳伏望追寝前旨庶几可释天下之疑弭未萌之祸不报至是帝在大同遂复降敕特加封镇国公岁支禄五千石令吏部如敕行会杨廷和蒋冕皆在告梁储毛纪闻之驰疏谏曰陛下谬自贬损既封国公则将授以告券追封三代祖宗在天之灵亦肯如陛下贬损否况铁券必有免死之文陛下壽福无疆何甘自菲薄蒙此不祥之辞臣等断不敢阿意苟从取他日戮身亡家之祸也廷臣皆相继极谏亦不报】

封右都督江彬左都督许泰为伯

【彬泰善伺帝意既诱帝巡边与敌遇幸不覆没帝自以为功欲张大之乃先後叙?陞赏者五万余人至是又假重二人亲为定爵名给事中刘济御史张景赐等言彬无所俘馘泰足迹未至应州赏不当功乞爱惜名器收回成命不纳】质实【刘清蓝田人张景阳浙江山陰人】

【己卯】十四年春正月帝在太原改卜郊

【初郊祀卜于是月甲辰而帝远游边塞将改岁未有还期礼部尚书毛澄等驰疏谏曰去岁正月以来銮舆数驾不遑宁居今兹之行又已半岁宗庙社稷享祀之礼并系摄行万壽正旦冬至朝贺之仪悉从简畧腊朔省牲阙而不行遂二年矣岁律将周郊禋已卜皇祖之训曰凡祀大地精诚则感格怠慢则祸生今六龙遐骋旋轸无日万一冰雪阻违道途梗塞元正上日不及躬执玉帛于上帝前陛下何以自安且边地荒寒隆冬尤甚臣等处重城食厚禄仰思圣体劳顿根本空虚遥望清尘忧心如醉伏祈趣驾速还躬亲裸享宗社臣民幸甚不报至是竟改卜郊】质实【毛澄字宪清崑山人】

二月帝还京师

【帝游幸边塞远历数千里乘马腰弓矢涉险阻冒风雪从者道多病帝无倦容至是自宣府还京师羣臣奉迎如前仪】

京师地震

【是月丁丑大祀天地于南郊帝拥百余骑驰入郊坛既郊猎南海子如故于时地震风霾翌日戊寅帝夜还宫风霾乃止】

帝自加太师敕谕巡行祈福三月郎中黄巩修撰舒芬等百四十六人先後疏谏悉杖之死者十一人

【帝降手勅谕吏部曰镇国公朱壽宜加太师又谕礼部曰威武大将军太师镇国公朱壽今往两畿山东祀神祈福复谕工部急修黄马快船备用阁臣及科道官皆切谏不报兵部郎中黄巩乃抗章进言陛下即位以来纪纲法度一坏于刘瑾 一坏于佞幸又 一坏于边帅盖荡然无余矣乱本已生祸变将起因陈最急者六事一崇正学二通言路三正名号四戒游幸五去小人六建储贰语甚剴挚时员外郎陆震草疏将谏见巩疏称叹因毁已橐与巩连署以进修撰舒芬亦邀其同官崔桐等七人上疏极谏曰古帝王所以巡狩者协律度同量衡访遗老问疾苦黜陟幽明式序在位是以诸侯畏焉百姓安焉若陛下之出不过如秦皇汉武侈心为乐而已非能行巡狩之礼者也博浪柏谷其祸亦可鑒矣近者西北 巡六师不摄四民告病哀痛之声上彻苍昊传播四方人心震动故一闻南幸诏书皆鸟惊兽散而有司方以迎奉为名微发严急江淮之间萧然烦实万一不逞之徒乘势倡乱为祸非细且陛下以镇国公自命苟至亲王国境或据勋臣礼以待陛下循名责实深求悖谬之端则左右宠幸无死所矣尚有

事堪痛哭不忍言者宗藩蓄刘溥之衅大臣怀冯道之心以禄位为故物以朝署为市?以陛下为奕棋以革除年间为故事特左右宠幸智术短浅无能以此言告陛下使陛下得开此言虽禁门之外亦将警蹕而出尚敢轻骑慢游哉疏入陆完迎谓曰上闻有谏者辄恚欲自引决诸君且休芬等不应而出吏部员外郎夏良胜及礼部主事万朝太常博士陈九川复连疏入于是吏部郎中张衍瑞等十四人刑部郎中陆俸等五十三人继之礼部郎中姜龙等十六人兵部郎中孙凤等十六人又继之而医士徐鏊亦以其术谏帝与诸幸臣皆大怒下巩震良胜潮九川鏊诏狱芬等百有七人罚跪午门外五日已而大理寺正周叙等十人行人司副余廷瓚等二十人工部主事林大辂等三人连名疏又相继上帝益怒并下诏狱俄令与巩震等俱跪阙下五日加桎梏焉至晚系岳诸臣晨入暮出累累若重囚凡道旁观者无不太息泣下廷臣自内阁及尚书石玠疏救外莫有言者诸嬖幸杨杨得意士民愤恨伺诸大臣出入争掷瓦砾詈骂之诸大臣皆恐入朝不敢待辨色请下诏禁言事者通政司遂格不受疏是时天连暝尽晦南海子水涌四尺余金吾卫指挥僉事张英曰此变徵也乃肉袒戟刃于胸时疏谏当蹕道跪哭即自刺其胸血流满地卫士夺其刃缚送诏狱诏杖之八十遂死诸臣跪既毕仍杖之于廷陆震余廷瓚及工部主事何遵刑部主事刘校照磨刘珏大理评事林公黼行人李绍贤孟阳詹轼刘槩李惠等十一人皆死鏊戍边余除名贬黜有差而车驾亦不复出矣】质实【黄马快船亦谓之快马船明世宗立杨廷和以其非制降遗旨停造博浪城在开封府阳武县东南五里一名博浪沙亭秦始皇二十九年东游至此韩人张良令力士操铁椎狙击始皇误中副车始皇惊求弗得令天下大索三日柏谷坞名在汝南府永宁县界汉武帝建元三年尝夜至柏谷逆旅主人疑为奸盗聚少年欲攻之主人姬奇帝状貌止其翁不听饮翁以酒醉而缚翁少年皆散走黄巩字伯固莆田人舒芬字国棠进贤人陆震字汝享兰谿人崔桐字来凤扬州人夏良胜字于中南城人万潮字汝信进贤人陈九川字惟濬临川人张衍瑞字元承汲县人陆俸吴县人姜龙字梦宾太仓人孙凤洛阳人徐鏊嘉定人本高氏子少依舅京师冒其姓周叙九谿卫人余廷瓚鄱阳人林大辂莆田人何遵字孟循江宁人刘校鄱城人刘珏汲县人林公黼长乐人李绍贤盱眙人孟阳泽州人詹轼玉山人刘槩安乐人李惠祥符人时与舒芬崔桐上疏者庶吉士江晖王廷陈汪应轸马汝骥曹嘉又有工部主事蒋山卿行人陶滋巴思明李锡顾可久邓显麒王翰熊荣杨秦王懋黄国用李俨潘锐刘黼张岳寺正金鼐寺副孟廷柯张士镐郝凤升傅尚文郭五常评事姚汝臯蔡时者俱被杖谪云】

夏六月宁王宸濠反巡抚江西副都御史孙燧按察司副使许逵死之

【宸濠久蓄异志交通肘腋因帝游幸不时人情危惧遂日夕觊觎与致仕都御史李士实举人刘养正等图不軌周仪阎顺知其谋间行诣阙上变嬖人钱宁臧贤庇之不问宸濠疑出承奉周仪所指使杀仪家及典仗查武等数百人孙燧疏上其事中道为所邀不得达燧念左右悉宸濠耳目陰察副使许逵忠勇可属大事与之谋乃托御他盗预为备先城进贤次城南康瑞州请复饶抚二州兵备不得复则请敕湖东分巡兼理之九江当湖冲最要害请重兵备道权兼摄南康宁州武宁瑞昌兴国及湖广通城以便控制广信横峯诸党地险人悍则请通判驻弋阳兼督旁县兵又恐宸濠劫兵器假讨贼名尽出之他所宸濠?燧图已使人贿近幸欲去燧而遗燧枣梨姜芥以示意燧笑却之逵劝燧先发後闻燧曰奈何予贼以名且需之会江西大水宸濠素所蓄贼凌十一吴十三闵念四等出沒鄱阳湖燧与逵谋捕之三贼走匿宸濠

祖暮间燧于是密疏白其状具言宸濠必反章七上皆为所邀阻然宸濠反状虽着犹以帝无储贰冀其子入嗣可得大统又不受悖逆名故蓄谋不发重赂钱宁求取中旨召其子司香太庙宁言于帝用异色龙笺加金报赐异色龙笺者故事所赐监国书笺也宸濠大喜列仗受贺复胁镇巡官及诸生父老奏阙下称其孝且勤时江彬与太监张忠欲倾宁贤乘间为帝言宁贤盛称宁王陛下以为何如帝曰荐文武百执事可任使也荐藩王何为者忠曰贤称宁王孝讥陛下不孝称宁王勤讥陛下不勤耳帝曰然下诏逐王府人毋留阙下宸濠益与士实养正谋遣奸人卢孔章等分布水陆孔道万里传报浹往返纵迹大露诸权奸多得宸濠金钱匿不以闻南昌人熊浹官给事中草奏尽列其状授御史萧淮上之疏下内阁杨廷和请如宣宗处赵府故事遣勲戚大臣宣谕帝乃命驸马崔元都御史颜颐寿等持谕往收其护卫宸濠阁元等且至遂决计反月之十三日为宸濠生辰宴诸守王官诘旦皆入谢宸濠命甲士环之大言曰孝宗为李广所悞抱民间子祖宗不血食者十四年今太后有诏令我起兵讨贼亦知之乎衆相顾愕眙燧直前曰安得此言请出诏示我宸濠曰毋多言我往南京汝当扈驾燧大怒曰汝速死耳天无二日吾岂从汝为逆哉宸濠怒叱燧燧益怒急起不得出宸濠入内殿易戎服出麾兵缚燧逵奋曰汝曹安得辱天子大臣因以身蔽燧贼并缚逵二人且缚且骂不絶口贼击燧折左臂与逵同曳出逵谓燧曰我劝公先发者知有今日故也燧逵同遇害惠民门外巡按御史王金主事马思聪金山参议黄宏许效廉布政使胡濂参政程杲刘棐僉事赖凤指挥许清白昂等并执下狱思聪宏不屈死布政使梁宸参政王纶李敷僉事潘鹏师夔按察使杨璋副使唐锦皆从逆宸濠遂以士实养正为左右丞相王纶为兵部尚书他各署伪职有差改元顺德集兵号十万释狱囚收库藏驰檄指斥朝廷首边其党娄伯徇进贤为知县刘源清所斩诏广信窑贼畏守吏不敢发而其承奉涂钦与羣盗闵念四等署九江南康皆陷贼势汹汹且将顺长江东下江左右皆震动】质实【孙燧许逵同遇害明史忠义传燧生有异质两目烁烁夜有光死之日天忽陰惨烈风骤起凡数日城中民夫恐走收燧逵两人屍屍未变黑云蔽之蝇蚋无近者守臣上其事于朝未报世宗即位赠燧礼部尚书谥忠烈逵副都御史谥忠节并祀南昌赐其名旌忠嘉靖元年改赠逵为礼部尚书初逵以文天祥集贻其友给事中张汉卿而无书汉卿语人曰宁邸必反汝登其为文山乎逵父家居闻江西有变杀都御史反副使即为位易服哭人怪问故曰副使必吾儿也宁州元县武宁唐县明属南昌府瑞昌南唐置明属九江府兴国宋置明属赣州府通城唐通城镇宋升县明属武昌府今皆因之横峯在兴安县治北县之镇山也诸山环匝周三十里有岩洞泉石之胜居民取土为陶冶因以名窑惠民门南昌府七门之一方輿纪要明太祖定洪都命都督朱文正改筑城西去江三十步建七门东曰永和东南曰顺化南曰进贤又南曰惠民西南曰广润西曰章江北曰德胜阎顺周仪查武史俱不详其里贯顺为宁王典宝副宸濠将反与典膳正陈宣内史刘良微言不可为典宝正涂钦所譖三人惧诛潜诣京师上变羣小庇宸濠下之狱掠掠备至宸濠闻三人赴都虑事泄诬奏其罪且噉羣小必杀之会已遣戍孝陵乃免世宗立复官按明史诸王传以顺为典仪与忠义传作典宝副者互异马思聪字懋闻莆田人系狱不屈絶食六日死黄宏字德裕鄞人被执愤怒以手梏向柱击项死贼义而棺敛之子绍文奔赴求得其棺以伪命治敛非父志亟易之扶归思聪赠光禄少卿宏赠太常少卿并配享旌忠祠忠义传又称宸濠之变江西士民受害者有万木郑山俱新建人集乡人结砦自固贼党谢重一驰入村二人执之积苇张睢阳庙前缚人马生焚之贼党不敢犯二人饮江上为盗凌十一所逼趣见宸濠烙而椎之皆骂贼死赵楠南昌诸生兄模尝捐粟佐振宸濠捕模索金楠代往胁之不屈被掠死同邑幸

增见迫抗节不从一家百口皆死诸生刘世伦儒士陈经官义士李广源皆被掠不屈死叶景恩者以侠闻族居吴城宸濠将作鸡捕景思胁降之不从死狱中宸濠兵过吴城景恩弟景允以三百人邀击贼贼分兵焚劫景?家其族景集景修等四十九人皆死熊浹字悦之萧淮桂林中卫人崔元代州人尚宪宗女永康公主颜颐寿字天和巴陵人王金临颖人明史诸王传谓金下狱孙燧传谓金从逆稽首呼万岁考王守仁集处置从逆官员疏云参政王纶胁受赞理僉事潘鹏师夔被胁招降无民情罪尤重知府郑嚧已经别案问结外参照布政梁宸参政刘棐程杲参议许效廉副使贺说僉事赖凤都指挥王玘或行咨抚守或盘库放粮势虽由于迫胁事已涉于顺从镇守太监王宏御史王金主事金山布政胡濂按察使杨璋副使唐锦僉事王畴都指挥马骥许清白昂郑文或被拘于城内或胁随于舟中事虽涉于顺从势实由于迫胁则金固始下狱而後胁从者也又胡濂程杲许清明史诸王传作胡廉陈杲许金误金山光泽人许效廉梁宸里贯无考胡濂定安人程杲祁门人刘棐安福人赖凤晋江人王纶陕西咸宁人潘鹏怀宁人师夔长安人唐锦上海人刘源清字汝澄东平人】

巡抚南赣都御史王守仁起兵讨宸濠秋七月复南昌【守仁方奉命勘福建叛军行至丰城而宸濠反遂急趋吉安与知府伍文定徵调兵食治器械舟楫传檄暴宸濠罪俾守令各率吏士勤王因集衆议曰贼若出长江顺流东下南都不保吾欲以计饶之少迟旬日无患矣乃多遣间谍檄府县言都督许泰郤永将边兵刘晖桂勇将京兵各四万南赣王守仁湖广秦金两广杨旦各率所部合十六万直捣南昌所至有司缺供者以军法论又为蜡书遗伪相李士实刘养正叙其归国之诚令怱怱早发兵东下而纵谍泄之宸濠果疑与士实养正谋则皆劝之疾趋南京即大位宸濠益大疑十余日詗知中外兵不至乃悟守仁给之七月壬辰朔留宜春王拱樛守城而刦其衆六万人出大江攻安庆都督僉事杨锐与知府张文锦指挥崔文等御之江上已收兵入城被围锐昼夜拒战守御甚固百计攻之终不能克宸濠慚愤谓其下曰安庆且不克安望金陵哉守仁闻贼兵尽锐东下南昌兵少则大喜趋樟树镇临江知府载德孺袁州知府徐璫赣州知府邢珣等各以兵来会合八万人或请救安庆守仁曰不然今九江南康已为贼守我趋南昌与相持江上二郡兵絶我後是腹背受敌也不如直捣南昌贼守备虚我军新集气锐攻必破贼闻南昌破必解围自救逆击之湖中蔑不胜矣泉曰善己酉次丰城以文定为前锋庚戌夜半兵抵广润门守兵骇散辛亥黎明诸军梯絙登城缚拱樛等宫人多焚死军士颇杀掠守仁戮犯令者十余人宥胁从安士民慰谕宗室人心大悦】质实【丰城三国吴析南昌县地置富城晋改丰城元升为富州明洪武初复为丰城属南昌府今因之樟树镇方輿纪要在临江府东北三十里又东北至丰城县七十里本名清江镇亦谓之鹿渚即故新淦县址也临江宋置临江军元路明府今因之杨思字晋初建安人宜春王拱樛案明史诸王表宁献王第三子盘烱宣德三年封宜春王拱樛其五世孙也正德二年袭封杨锐字进之萧县人张文锦安邱人戴德孺临海人徐璫朝邑人】

王守仁败宸濠于樵舍擒之

【守仁既下南昌居二日遣伍文定邢珣徐璫载德孺各将精兵分道进而使瑞州通判胡尧元等设伏以待宸濠果解安庆围崔文出城袭击破之宸濠恚甚杀知府宋以方祭江还救南昌遇于黄家渡文定当其前锋佯北贼趋利前珣绕出贼背贯其中文定及都指挥余恩乘

之璉德孺张两翼分贼势尧元等伏发贼大溃退保八字脑宸濠惧尽发南康九江兵复战官军却守仁斩先却者诸军殊死战贼复大败退保樵舍联舟为方阵尽出金实犒士明日宸濠方晨朝其羣臣官军奄至以小舟载薪乘风纵火焚其副舟妃娄氏以下皆技水死宸濠舟胶浅仓卒易舟遁万安知县王冕所部兵追执之士实养正及降贼按察使杨璋等皆就擒南康九江亦下凡三十五日而贼平】质实【方輿纪要樵舍驿在南昌府西北六十里黄家渡在南昌府三十里八字脑在饶州府西三十里宋以方字义卿靖州人瑞州知府瑞故无城郭以方虑宸濠必叛筑城缮守具募兵三千日夕训练宸濠深忌之有徵索又不遂迫镇守劾系南昌献宸濠反出以方胁之降不可械舟中至安庆兵败问地何名舟子云黄石矶江西人音则王失机也宸濠以为不祥斩以方祭江後贼平其子崇学求遗骸不得敛衣冠归葬嘉靖六年巡抚陈洪谟上其事诏赠光禄卿立祠瑞州妃娄氏上饶人娄谅之女宸濠谋逆娄氏尝泣諫及败叹曰紂以用妇言亡吾以不用妇言亡悔何及】

秋八月帝自将击宸濠

【初宸濠反状闻边将在豹房者各献擒宸濠之策帝亦欲假亲征南游遂传旨称宸濠悖逆天道谋为不法即令总督军务威武大将军镇国公朱壽统各镇兵征剿所下玺书改称军门檄江彬等皆随征杨廷和等諫不听至是驾发京师梁储蒋冕扈征次涿州王守仁捷奏至留之不下帝至保定宴于府堂与都御史伍符为藏阍戏符探得帝不悦饮符至醉乃大笑方帝之南发也刘姬疾不从约以玉簪召帝过芦沟桥驰马失簪索之不得及至临清遣使召姬姬以无信约不肯行帝乘单舸晨夜疾行至张家湾载与俱南内外从官无知者】质实【伍符字朝信安福人】

命太监张忠安边伯许泰率禁军往江西

【王守仁初上宸濠反书因请黜奸谀诸嬖幸皆恨宸濠既平相与媚功且惧发其罪竟言守仁先与通谋虑事不成乃起兵又欲令纵宸濠湖中待帝自擒守仁秉忠泰未至先俘宸濠发南昌忠泰以威武大将军檄邀之守仁不与间道趋玉山上书请献俘止帝南征帝不许至钱塘遇太监张永永提督军务在忠泰上而故与杨一清除刘瑾天下称之守仁夜见永颂其贤因极言江西困敝不堪六师之扰永深然之曰永此来为调护圣躬非邀功也公大勋永知之但不可径情耳守仁乃以宸濠付永而身至京口欲朝行在会帝命守仁巡抚江西守仁乃返南昌忠泰已先至恨失宸濠执伍文定缚之文定骂曰吾不恤九族为国家平大贼何罪汝天子腹心屈辱忠义为逆贼报讐法当斩忠益怒椎文定仆地文定求解任不报时忠泰必欲诬守仁与宸濠通诘责宸濠左右皆言无有严诘不已曰独尝遣弟子冀元亨诣宸濠论学忠等大喜掇元亨加以炮烙终不承械送京师诏献比守仁至故纵京军犯之或呼名嫚骂守仁不为动抚之愈厚病予药死予棺遭丧于道必停车慰问京军谓王都堂爱我无复犯者忠泰言宁府富厚甲天下今所蓄安在守仁曰宸濠异时尽以翰京师要人约内应籍可考也忠泰故纳宸濠贿者气慑不敢复言已轻守仁文士强之射徐起三发三中京军皆欢呼忠泰益沮会冬至守仁命居民巷祭已上塚哭时新丧乱悲号震野京军离家久闻之无不泣下思归张永後至复促忠泰偕还乃不得已班师】质实【京口今镇江府治城因京岷山为垒俯临江

津故曰京口冀元亨字惟乾武陵人笃信守仁学从于赣州守仁属以敕子宸濠怀不轨初外务名高贻书守仁问学守仁使元亨往讲西铭反覆君臣义甚悉宸濠亦服厚赠遣之元亨反其赠于官既系诏狱二年世宗嗣位言者交白其冤出狱五日卒按王守仁之平宸濠不特张忠许泰忌功排陷明武宗实录亦力加诬诋谓守仁勘事福建以宸濠生日将届趋道南昌贺之丰城知县顾佖以变告守仁大骇小艇遁还赣伍文定迓于峡江请留封贼守仁初不许又谓守仁将兵无纪律纵杀居民往往死于牀箠有阖门无噍类者至其叙刘养正始末则云守仁尤重之以为道学友守仁在南赣为宸濠所慕馈遣相属子迨逆濠既拜养正为军师日夕望守仁至实不虞守仁之见图也养正既擒後守仁畏其口逼令引决盖实录前後所载如此王世贞弇山堂别集辨之甚悉今采录其畧云逆濠以文成在上流拥精兵建大勋有才术甘言结纳或有之文成亦据抚臣往还之常礼为报耳使预其谋何以径归吉安伍公虽进言起义兵亦须文成有以自决夫进兵攻南昌不能无少杀掠而军令下则已定矣其後如郑端简晓薛应旗诸公皆履其地得其详始为之暴白而未有摘抉一时握管之心者盖实录之始任总裁者杨文忠廷和继之者费文宪宏而以副总裁专任者董文简玘也杨公与王恭襄琼郤甚着然恭襄虽陰譎能识文成面独任之以故于前後平贼及擒逆濠之疏皆归德兵部以为发踪指示之力而一字不及内阁其为杨公辈切齿非旦夕矣许泰张忠辈既耻大功为文成所先必肆加罗织之语而忌功之輩从而附和之文宪在文成抚绥之地中外屡荐起之而文成未有一疏相及费公亦不释然也董公最名忤毒既内忌文成之功而外欲以媚杨费作此诬史将谁欺乎】

冬十二月帝如南京

【自帝发京师江彬在途矫旨辄缚长吏至杨州即民居为提督府遍索寡妇处女导帝渔猎以刘姬谏稍止及是至南京又欲导帝幸苏州下浙江抵湖湘诸臣极谏会其党亦劝沮乃止彬率边兵数万跋扈甚成国公朱辅见彬即长跪魏围公徐鹏举及公卿大臣皆侧足事之惟参赞尚书乔宇应天府丞寇天叙挺身与抗彬气遂稍折】质实【朱辅成国公能曾孙徐鹏举中山王达七世孙乔宇字希大山西乐平人寇天叙字子□榆次人】

【庚辰】十五年春正月帝在南京改卜郊

【帝令羣臣议欲于南京行郊礼大学士梁储蒋冕计此议行则回銮益无日极陈不可疏三上始得请储又因郊期改卜乞还乘輿而帝殊无还意日挟刘姬纵游尝幸牛首山至夜不返左右忽失帝所在大扰诸卫军皆惊久之乃定传者或谓江彬欲为逆云】质实【牛首山在江宁府南三十里一名仙窟山以山後有石窟也本名牛头山有二峯东西相对晋元帝初作宫殿王导指双峯曰此天阙也故亦名天阙山周四十七里高百二十七丈】

夏四月淮扬大饥民相食

【敕所司賑之】

秋闰八月受江西俘

【初王守仁既以宸濠付太监张永永复械之至江西留数旬促张忠许泰同归忠泰见帝百端谗毁守仁独永时左右之忠泰屡矫旨召守仁守仁不赴忠扬言帝前曰守仁必反试召之必不至永遣急足先告守仁召者至守仁不退食即与偕行忠泰计沮不令见帝守仁乃入九华山日晏生僧寺帝觐知之曰守仁学道人闻召即至何谓反遗还镇令更上捷音守仁遂易前奏言奉威武大将军方畧讨平叛乱而尽入诸嬖幸名于是帝乃以为捷命设廉场戎服树大纛环以诸军释所俘宸濠等去桎梏伐鼓鸣金而擒之然後置械受俘】质实【九华山在池州府青阳县西南四十里旧名九子山山有九峯如莲华唐李白游此易令名高千仞周百八十里】

发明【人臣敌王所忤必归美于庙谟帝王创建殊勲虽秉自睿谋亦必曰将帅之力盖以专阃之寄出自朝廷臣下之功即天子之功也武宗间王守仁平宸濠之捷欲令纵之湖中候驾至擒获几若索俘献馘必待天子亲执疆场而後谓之奏凯者迨守仁更上捷音归功方畧又尽入诸佞幸名庶几如其所欲犹复令释桎梏伐鼓枌金而後擒之受俘之典几同游戏武宗素有童心深以是役之不出於己为歉而忠泰辈遂得乘机而怂恿之使非守仁先机达变委曲仰承其不至纵寇遗患者羲希矣】

帝发南京

【先是梁储蒋冕乞还乘輿疏八九上帝不省是秋有物若豕首堕帝前色碧又帝所御妇人室中满壁累累若悬人首状人情益惊储冕手疏跪泣行宫门外历未至酉帝遣人取疏入谕之起叩头言未奉谕旨不敢起帝许不日还京乃出会宸濠系江上舟中民间讹言将为变帝心疑欲归乃下诏班师丁酉发南京日夕祭龙江?蹕仪真次日至瓜洲避雨民家遂自瓜洲济江登金山复南渡幸大学士杨一清第制诗十章肠之还至扬州太监邱得索贿不得以铁絙系知府蒋瑶窘辱备至数日乃得释】质实【金山在镇江府西北七里大江中风涛环浇势欲飞动一名浮玉山蒋瑶字粹卿归安人方武宗驻蹕扬州江彬欲夺富民居为威武副将军府瑶执不可彬闭瑶空舍挫辱之胁以帝所赐铜爪不为慑会帝渔获一巨鱼戏言直五百金彬即界瑶责其直瑶怀其妻簪珥桂服以进曰库无钱臣所有惟此帝笑而遣之府故有琼花观诏取琼花瑶言自宋徽钦北狩此花已絶今无以献又传旨微异物瑶其对非扬产帝曰苙白布亦非杨产耶瑶不得已为献五百疋时权幸以扬素饶要求无所不至微瑶民且重困】

九月渔于积水池遂有疾

【帝至清江浦幸太监张扬第踰三日自泛小舟渔于积水池舟覆溺焉左右挟帝出自是遂不豫】质实【积水池在山阳县西】

冬十月至通州

【帝之北还每令宸濠舟与御舟卫尾而行意甚防之及抵通州谓左右曰吾必决此狱乃入召勲戚大臣议宸濠狱时帝久驻于外京师汹汹人情危惧大学士杨廷和毛纪等请帝还大内然後献俘诛宸濠不纳羣臣请如先年处置高煦寘鐫例祭告天地宗庙仍勅天下诸王议罪乃明正以法亦不听于是诏治交通宸濠者罪执吏部尚书陆完至通州嬖人钱宁及太监毕真刘琅刘璟都指挥廖鹏齐佐王準都督同知王瓛等皆先完就执方宸濠反书至京帝已心疑宁宁惧白帝收宸濠所遣卢孔章而归罪臧贤谪戍边使校尉杀之途以灭口又致孔章庾死冀得自全然卒中江彬计使董皇店役彬在道尽白其通逆状帝曰黠奴我固疑之乃羈之临清驰收其妻子家属下狱真先镇守江西与宸濠亲厚宸濠为出资夤缘改浙江真至即大赏诸卫官军费以万计亦宸濠资之也及叛密遣人驰报真真即倡言宁世子来取浙矣浙中大震会进圣壽节表三司及府卫诸官当集于镇守署前夕收城门钥令官军夜半皆甲以入将为乱衆官惧不起且严木备真不得发琅守备南京欲自托于宸濠陰遣弟璋事之宸濠以为南京有琅浙江有真下之如反掌耳琅闻宸濠举逆聚家丁百余携火药军器出城欲为宸濠应事泄乃已佐準皆宸濠壻璟瓛鹏皆与通贿赂既败分遣官校收捕之至是张永发完罪因命逮赴行在帝以完大臣宁素所信任顾反负恩通逆尤恨此二人欲寘之极典】质实【按明史诸王传帝闻宸濠反逮尚书陆完嬖人钱宁等籍其家江彬张忠怂恿帝亲征据此则完宁皆被收于亲征之前然考明武宗实录正德十四年八月癸未帝发京师传旨令钱宁量带官校从行十月辛未至临清留宁董皇店役十一月丁巳江彬发宁逆谋命羈管于临清十五年十一月庚申始执陆完至通州行在盖宁之被逮实在亲征後十日又後一年而完始败质之钱宁陆完本传皆合诸王传系之亲征前者乃承宪章錄之误】

十二月诛宸濠还京师

【时江彬欲治宸濠献竣劝帝复幸宣府乃上言臣奉镇国公朱壽指示方畧擒捕宸濠及其逆党十五人乞速典刑殛之帝下诏褒赐镇国公岁加彬禄米百石廕一子锦衣千户趣召廷和等至通州受事赐宸濠自尽仍焚弃其屍将遂北幸会帝体惫甚左右力请还朝越三日乃返京师大櫓军容俘诸逆者及家属数千人陈犂道东西陆完钱宁亦皆裸体反接掲白帜标其姓名死者梟于竿凡数里不絶帝戎服乘马立正阳门下閱视良久乃入後完竟得减死遣戍】质实【陆完减死遣戍明史陆完传完列凯旋前部以入将寘极刑值武宗崩世宗立法司覆奏完交外藩而遗金不却处护卫而执奏不坚当斩完复乞哀下廷臣覆讞以平贼功在八议之列遂得减死戍福建靖海卫母年九十余竟死狱中初完尝梦至戍山曰大武及抵戍所有山如其名叹曰吾戍已久定何所逃乎卒于戍所】

【辛巳】十六年春三月癸丑朔日有食之

帝崩于豹房

【先是帝以凯旋祀南郊呕血不能成礼与疾归及是益甚谓太监陈敬苏进曰朕疾殆不可为可以朕意达皇太后天下事与内阁辅臣议处之前此事皆由朕悞非汝輩所能预也丙寅遂崩于豹房太监谷大用张永等以皇太后命移殡大内】

皇太后以遗诏遣官迎兴世子厚熹入嗣皇帝位【方帝大渐司礼中官魏彬等以帝与皇嗣至阁言国医力竭矣请捐万金购之草泽杨廷和心知所谓不应而微以伦序之说讽之彬等唯唯及帝崩谷大用张永至阁议所当立廷和出祖训于袖中示之曰兄终弟及谁能瀆焉兴献王长子宪宗之孙孝宗之从子大行皇帝之从弟序当立梁储蒋冕毛纪咸赞之乃令中官入启皇太后廷和等候左顺门下吏部尚书王琼率九卿入左掖门厉声曰此岂小事我九卿长顾不与邪衆不答顷之中官奉遗诏及太后懿旨宣谕羣臣一如廷和请乃议遣官奉迎故事当以内阁一人与中贵勲戚礼官偕往廷和恐蒋冕去则已益孤而梁储老矣或憚往乃佯惜储惫阻其行储奋曰事孰有大于迎天子者乎敢以惫辞遂与定国公徐光祚等奉遗诏以行】质实【与世子厚熹献王佑杭子时献王薨厚熹以世子理国事】

罢威武团营

【先是帝不豫江彬犹矫旨改西官厅为威武团营自提督军务至是杨廷和请于皇太后传遗旨罢之各边军俱重赆散归镇革京城内外皇店纵遣豹房番僧少林僧及教坊司乐人又以遗诏放还四方进献女子停京师不急工务收宣府行宫珠宝归之内库中外大悦】

江彬等有罪下狱

【彬知天下恶已又见罢遣边兵益内疑其党都督佥事李琮劝彬速反不胜则北走塞外彬犹豫未决诡称疾不出陰布腹心衷甲观变令许泰诣内阁探意廷和慰以温言彬稍安乃出成服廷和遂密与蒋冕毛纪及太监温祥魏彬张永合谋捕之魏彬入白太后会坤宁宫安兽吻即命江彬与工部尚书李鐸入祭彬礼服入家人不得从祭毕张永留彬饭故缓之俄而太后下诏收彬彬觉亟走西安门门闭寻走北安门门者曰有旨留提督彬曰今日安所得旨门者拥之遂被执拔其须且尽有顷神周李琮亦缚至琮骂彬曰奴早听我岂为人擒遂并下锦衣卫狱籍彬家黄金七十柜白金二千二百柜他珍宝不可胜计彬既败张忠许泰等以次下狱】

夏四月兴世子至京师入即位

【世子自兴邸至京师止于郊外有议用天子礼奉迎者礼部尚书毛澄曰今即如此後何以加岂劝进辞让之礼当遂废乎乃具仪请如皇太子即位礼王世子顾长史袁宗臯曰遗诏以我嗣皇帝位非皇子也杨廷和请如礼臣所具仪由东安门入居文华殿择日登极不允会皇太后趣羣臣上牋劝进乃即郊外受牋是日日中入自大明门御奉天殿即位诏草言奉皇兄遗命入奉宗祧帝迟回久之始报可】质实【袁宗臯字仲德石首人】

诏赦天下除一切弊政

【以明年为嘉靖元年大赦帝之未至京师也杨廷和总朝政者三十七日中外倚以为安及帝即位廷和草登极诏恤録正德中言事罪废诸臣赐天下明年田租之半自正德十五年

以前通赋尽免之凡先朝蠹政厘抉且尽所革锦衣内监旗校工役凡十余万减漕粮百五十三万二千余石其中贵义子传陞乞陞一切恩幸得官者大半皆斥去朝野皆称新天子神圣且颂廷和功而诸失职之徒衔廷和刺骨廷和入朝有挟白刃伺輿傍者事闻诏以营卒百人卫出入】

遣使迎母妃蒋氏于安陆

质实【母妃蒋氏天兴人弘治五年册为兴王妃父敦嘉靖元年追封玉田伯】

召费宏入内阁

【宸濠既败言事者争请召宏于是起宏为少保入辅政并复其弟案编修】

诏议崇奉兴献王典礼

【时帝即位甫六日即诏议兴献王主祀及尊称礼部尚书毛澄请于杨廷和廷和出汉定陶王宋濮王事授之曰是足为据澄乃大会文武羣臣上议曰考汉成帝立定陶王为皇太子立楚孝皇孙景为定陶王奉共王祀共王者皇太子本生父也时大司空师丹以为恩义备至今陛下入承大统宜如定陶王故事以益王第二子崇仁王厚炫主後兴国又考宋英宗以濮安懿王之子入继仁宗司马光谓濮王宜尊以高官大爵称王伯而不名范镇亦言陛下既考仁宗若复以濮王为考于义未当乃立濮王圉庙以宗朴乔濮国公奉濮王祀程颐之言曰为人後者谓所後为父母而谓所生为伯叔父母此生人之大伦也然所生之义至尊至大宜别立殊称曰皇伯叔父某国大王则正统既明而所生亦尊崇极矣今兴献王于孝宗为弟于陛下为本生父与濮安懿王事正相等陛下宜称孝宗为皇考改称兴献王为皇叔父兴献大王妃为皇叔母兴献王妃凡祭告兴献王及上笺于妃俱自称侄皇帝某则正统私亲恩礼兼尽可以为万世法议上帝大愠曰父母可更易若是邪命 议是月二十四日乙亥澄复会廷臣上议曰礼为人後者为之子自天子至庶人一也兴献王子惟陛下一人既入继大统奉祀宗庙是以臣等前议欲令崇仁王厚炫主兴献王祀至於称号陛下宜称为皇叔父兴献大王自称侄皇帝名以宋程颐之说为可据也本朝之制皇帝于宗藩尊行止称伯父叔父自称皇帝而不名今称兴献王为皇叔父大王又自称名尊崇之典已至臣等不敢後有所议因録程颐代彭思永议濮王礼疏进覧帝不从命博考前代典礼再议以闻澄乃复会廷臣上议曰臣等会议者再请改称兴献王叔父者明大统之尊无二也然加皇字于叔父之上则凡为陛下伯叔诸父皆莫能与之齐矣加大字子王之上则天下诸王皆莫得而与之并矣兴献王称号既定则王妃称号亦随之天下王妃亦无以同其尊矣况陛下养以天下所以乐其心不违其志岂一家一国之养可同日语哉此孔子所谓事之以礼者其他推尊之说称亲之议似为非礼推尊之非莫详于魏明帝之诏称亲之非莫详于宋程颐之议至当之礼要不出此并録上魏明帝诏书时廷和蒋冕毛纪复上言三代以前圣莫如舜未闻追崇所生父瞽瞍三代以後贤莫若汉光武亦未闻追崇所生父南顿君惟陛下取法二君疏皆留中不下】质实【按程子濮议畧见宋史彭思永传曰濮王生陛下而仁宗以陛下为嗣是仁宗为皇考而濮王于属为

伯此天下大义生人大伦如乾坤定位不可得而变也陛下为仁庙子曰考曰亲乃仁庙也若更施於濮王则二亲矣使王与诸父等夷无有殊别则于大孝之心亦为难安臣以为当尊为濮国大王祭告之辞则曰侄嗣皇帝书名昭告于皇伯父大王则极尊崇而于仁庙亦无所嫌矣此万世之法也疏入英宗感其切至垂欲施行而中书持之甚力卒不果魏明帝之诏见太和三年曰礼王后无嗣择支子以继大宗则当纂正统而奉公议何得复顾私亲哉汉宣继昭帝後加悼考以皇号哀帝以外藩援立而董宏等以邪说惑误朝议遂尊恭皇立庙京师僭差无礼人神弗佑罪师丹忠正之谏致丁傅焚如之祸自是之後相踵行之其令公卿有司深以前世为戒後嗣万一有由诸侯入奉大统则当明为人後之义敢为邪佞导谀君上妄建非正之号谓考为皇称妣为后则股肱大臣诛之无赦其书之金策藏之宗庙】

五月梁储罢王琼以罪戍边

【给事中张九叙劾储结纳权奸持禄固宠储三疏求去赐敕驰传归琼在兵部厚事钱宁江彬等所诛赏多取中旨不关白内阁杨廷和弗能堪至是言官交章劾琼系都察院琼疑出廷和指力讦廷和帝愈不直琼下廷臣杂议坐交结近侍律论死琼疏辨乃减死戍边】质实【张九叙商河人】

以袁宗臯为礼部尚书兼文渊阁大学士预机务【宗臯由进士授兴府长史帝即位擢吏部侍郎寻入阁自是藩邸旧臣俱以扈从功不次録用宗臯以疾辞不允未几卒】

六月江彬伏诛

【与李琮神周钱宁等俱磔于市时京师久旱彬诛遂大雨舍音和珊寻亦伏诛惟张忠许泰夤缘贵近得减死徙边】

秋七月进士张璁上疏请尊崇所生立兴献王庙于京师

【璁时以进士观政见廷议追崇兴献王礼三上三?璁揣知帝意乃遂上疏曰陛下嗣登大宝即议追尊圣考以正其号奉迎圣母以致其养诚大孝也廷议执汉定陶王宋濮王故事欲考孝宗叔兴献王夫汉哀帝宋英宗皆预养宫中立为储嗣其为人後之义甚明今陛下以伦序当立循继统之义非为孝宗後也且迎养圣母称皇叔母则当以君臣礼见子可以臣母乎长子不得为人後兴献王子惟陛下一人利天下而为人後将母自絶其父母乎故谓陛下入继祖统则可谓为人後而自絶其亲则不可盖统与嗣不同非必夺此父子之亲建彼父子之号然後谓之继统令宜别立圣考庙于京师以隆尊亲之孝且使母以子贵尊与父同则圣考不失其为父圣母不失其为母矣帝方扼廷议得璁疏大喜曰此论出吾父子?全矣遂手诏杨廷和蒋冕毛纪欲尊父为兴献皇帝母为兴献皇后祖母为壽安皇太后廷和等持不可封还手诏于是给事中朱鸿汤史于光御史王溱卢琼交章劾璁帝不听】质实【张璁字秉用永嘉人初璁以举人入上会试始得第有胡铎者与璁同举于乡先璁举进士及大礼议起铎已官湖广参政在京师意亦主考兴献王与璁合璁要之同署铎曰主上天性固不可违天下人

情亦不可拂考献王不已则宗宗不已则入庙入庙则当有祧以藩封虚号之帝而夺君临治世之宗义固不可也入庙则有位将位武宗上乎武宗下乎生为之臣死不得跻于君然鲁尝跻僖公矣恐异日不乏夏父之徒也不肯署璽疏遂独上其後诸臣争以议礼干进称宗入庙果如铎言王溱直隶开州人卢琮字献卿浮梁人胡铎字时振余姚人】

宁津盗起德平知县龚谅死之

【盗转掠至德平谅率吏民御之力屈被杀赠济南通判恤其家】质实【宁津金置明属河间府今因之龚谅明史忠义传不详其里贯】

九月葬康陵

【谥曰承天达道英肃睿哲昭德显功弘文思孝毅皇帝庙号武宗】质实【康陵在昌平州金岭山东北】

【明史赞曰毅皇手除逆瑾躬御边寇奋然欲以武功自雄然耽乐嬉游昵近羣小至自署名号冠履之分荡然矣犹幸用人之柄躬自操持而乘钩诸臣补苴匡救其不底于危亡者藉以比夫】

冬十月追尊父兴献帝祖母宪宗贵妃邵氏为皇太后母妃蒋氏为兴献后

【帝屡谕阁臣早定大礼会母妃至通州闻朝议考孝宗恚曰安得以我子为他人子止通州不入帝闻而泣后慈壽太后愿避位归藩羣臣惶惧毛澄乃谋于内阁请称兴献王为兴献帝王妃蒋氏为兴献后而以皇太后懿旨行之帝不得已乃报可并尊宪宗贵妃邵氏为皇太后张璁知帝意向已又闻母妃止通州益大喜着大礼或问以上且曰非天子不议礼愿奋独断揭父子大伦明告中外章下礼部见者皆目为邪说惟兵部主事霍韬给事中熊浹揣璁言必用附和之未几浹外转佥事璁出为南京刑部主事韬自知为衆谕所齟引疾归】质实【邵太后宪宗妃兴献王母也兴王之藩妃不得从世宗入继大统妃已老目盲矣喜孙为皇帝摸世宗身自顶以至踵至是尊为皇太后霍韬字渭先南海人】

兴献后至京师

【先是礼官具仪后由正阳左门入大明东门帝不可乃自定义由中门入以太后仪谒奉先奉慈二殿不庙见】

十一月録平宸濠功封王守仁新建伯

【帝在兴邸深知守仁平逆功甫即位趣召入朝受封而杨廷和与王琮不相能守仁前後平贼率归功琮廷和不喜大臣亦多忌其功会有言国哀未毕不宜举宴行赏者因拜守仁南

京兵部尚书守仁以亲老请归省至是论功封特进光禄大夫柱国新建伯世袭岁禄一千石然不予铁券岁禄亦不给诸同事有功者惟吉安知府伍文定当上赏其他皆名示迁而陰绌之废斥无存者守仁愤甚时以丁父忧屡疏辞爵乞録诸臣之功咸报寝】

发明【宸濠之变江西全省宸动王守仁出奇制胜三十五日而奏荡平厥功伟矣张忠许泰辈忌功媒孽犹曰宵小伎俩之常独怪杨廷和称为一时名臣因与王琼不相能而并扼守仁之封大臣公忠体国固如是耶王琼时为兵部尚书使当日本兵故为齟齬事皆中制守仁又岂能迅奏肤公其归功于琼期于成事而已廷和不是之谅而辄存芥蒂至使同事诸臣陰遭废斥其何以鼓戎行劝将士哉世宗趣召受封而于其请録请臣亦皆报寝则所谓深知守仁平逆功者又安在欵】

御定资治通监纲目三编卷十九

卷二十

钦定四库全书

御定资治通鉴纲目三编卷二十

【起壬午明世宗嘉靖元年尽戊子明世宗嘉靖七年】凡七年

【壬午】世宗肃皇帝嘉靖元年春正月清宁宫後殿灾定皇考圣母本生父母称号

【先是尊崇兴献帝后议既定诏告天下越数日帝复手勅加兴献帝后以皇号杨廷和等上言汉宣帝继孝昭後追諡史皇孙王夫人曰悼考悼后而已光武上继元帝钜鹿君以上立庙章陵而已今与献加称帝后较之前代已极尊崇若加皇字与孝庙慈壽并是忘所後而重本生任私恩而弃大义臣等不得辞其责愿罢归尚书乔宇亦言正统大义惟赖皇字以明若加于本生之亲则正统混而无别非所以重宗庙正名分也帝曰慈壽皇太后懿旨朕不敢违廷和等复偕礼官执奏廷臣诤者百余人皆言称皇非是请斥张璁邪说俱不报及是清寧宫後三小殿灾廷和等因言兴献帝后加称列圣神灵容有未安今火灾示戒昭然可见给事中邓继曾亦言天有五行火实主礼人有五事火实主言名不正则言不顺言不顺则礼不兴今之火灾废礼失言之效也帝勉从衆议乃称孝宗曰皇考慈壽皇太后曰圣母兴献帝后止称本生不称皇】质实【邓继曾字士鲁资县人】

甘州军乱杀巡抚都御史许铭

【甘肃总兵李隆与铭不相能会支月粮喉部卒请增值铭不许遂围公廨毆杀铭焚其屍五卫军大乱诏擢陈九畴为佾都御史巡抚甘肃未至巡按御史喻茂隆按验铭事以闻乃诛隆及乱卒首事者九畴抵镇以甘肃军政废弛疏言额军七万余存者不及半且多老弱请令召募从之】质实【五卫谓甘州左右中前後卫也并明洪武中置属陕西行都司许铭字德新宛平籍莫县人】

三月上慈寿皇太后尊号曰昭圣慈寿皇太后武宗皇后曰庄肃皇后皇太后邵氏曰寿安皇太后兴献后曰兴国太后

【是月丁巳以上昭圣慈壽皇太后庄肃皇后尊号遣定国公徐光祚武定侯郭勋惠安伯张伟祭告天地宗庙社稷戊午上壽安皇太后兴国太后尊号仍命尤祚等祭告壬戌帝御奉天殿颁诏天下】

秋九月立皇后陈氏

【昭圣张太后为帝选婚台官言大名有佳气求得后迎入宫册为皇后】质实【皇后陈

民元城人】

冬十月振南畿湖广江西广西灾

【先是南畿及各布政司多以旱灾告者帝诏抚按官讲求荒政至是命所司祭仓给振免税粮有差时应天滁州饥尤甚南京兵部侍郎席书奉命振江北令州县十里一厰煮糜哺之全活无算】质实【席书字文同遂安人】

十一月寿安皇太后邵氏崩

【諡曰孝忠皇太后别祀奉慈殿七年七月改称太皇太后】

【癸未】二年春二月提督军务都御史俞谏讨河南山东贼平之

【青州矿盗王堂等起顔神镇流劫东昌兗州济南都指挥杨纪及指挥杨浩等击之浩战死纪仅以身免诏责山东将吏于是诸臣分道逐贼贼不复屯聚往来金乡鱼台间突至曹州欲渡河不得转掠考城循河而西至东明长垣河南及保定守臣咸告急贼党王友贤等流入祥符封邱南抵徐州廷议以诸道巡抚各顾其土事权不一请设总制大臣乃命谏与都督鲁纲提督两畿山东河南军务以便宜节制诸道兵讨之贼复流至考城官军欲击而河南降贼张进引三百骑驰至中都留守顾恺与俱前方战进忽三麾其旗先却贼乘之官军大溃将士死者八百余人谏等连营进贼始灭时有司多诬良民助贼谏审择之皆感泣而去】质实【顔神镇即今青州府博山县地以齐孝妇顔文姜居此故名 本朝雍正十二年始置县金乡东汉县明属兗州府今因之东明汉冤句宋宛亭金改东明明洪武初省入开州孝宗四年复置属开州今属大名府】

葬孝惠皇太后于茂陵

【先是太后崩帝欲祔葬茂陵数下廷议礼官不敢固争杨廷和等言祖陵不宜数兴工作惊动神灵帝不从及是卒祔葬焉】

礼部尚书毛澄罢

【帝欲推尊所生尝遣中官谕意至长跪稽首澄骇愕急扶之起其人曰上意也上言人孰无父母奈何使我不获伸必祈公易议因出囊金畀澄澄奋然曰老臣諄毫不能隳典礼独有一去不与议已耳抗疏引疾至五六上帝辄慰留不允及是疾甚复力请乃许之舟至兴济而卒帝深悼惜之赠少传諡文简 澄端亮有学行论事侃侃不挠帝雅敬澄虽数忤旨恩礼不衰】质实【兴济宋县明属河间府今省为镇隶属沧州】

岁星太白同昼见

夏四月旱

【两畿山东河南湖广江西及嘉兴大同成都皆旱赤地千里殍殣载道帝以灾异勅羣臣修省】

以宋儒朱熹裔孙墅为五经博士

【正德间给事中戴铣汪元锡御史王宛等相继言朱子继孔子者也孔子之後有曲阜西
安朱子之後亦有建安婺源今建安已置博士其子孙在婺源者宜如衢州孔庙例官其嫡长
一人以奉祀诏从之至是授墅翰林院五经博士寻以西安学训导席端言令其世袭】质实
【孔子之後有西安宋建炎中衍圣公端友扈跸南渡因家衢州高宗命以州学为家庙赐田
五顷以奉祭祀五传至洙元至元间命归曲阜袭封洙让爵曲阜之弟治明孝宗十八年衢州
知府沈杰奏言衢州圣庙自孔洙让爵之後衣冠礼仪猥同氓庶今访得洙之六世孙彦绳请
授以官俾主祀事报可正德元年授彦绳翰林院五经博士子孙世袭时以在曲阜者为孔氏
北宗在西安者为南宗云西安唐县明为衢州府治建安三国吴析东侯官县地置明为建宁
府治今皆因之朱墅朱子十一世孙汪元锡休宁人王完遂宁人】

诏举堪任府县者

【命两京三品以上及抚按官各举所知以闻】

闰四月帝始修醮于宫中

【帝用太监崔文言建醮宫中日夜不絕杨廷和力言不可引梁武宋徽为喻优旨报纳然
修醮如故给事中刘最复上章极谏且劾文耗帑金状而帝从文言命最自核侵耗数最言帑
金属内府虽计臣不得稽赢缩文乃欲假难行事逃已罪制言官疏入忤旨出为广德州判官
廷臣论救不纳文憾不已嗾其党芮景贤奏最在途仍故衔乘巨舫取夫役巡盐御史黄国用
复遣牌送之帝怒逮二人下诏狱国用谪极边杂职最戍邵武其後帝益好长生斋醮无虚日
命夏言为监礼使顾鼎臣等充导引官鼎臣进步虚词七章且列上坛中应行事帝优诏褒答
之自此词臣多以青词干进矣】质实【邵武晋县宋即县为邵武军治元路明府今因之刘
最字振廷崇仁人黄国用庐陵人夏言字公谨贵溪人顾鼎臣字九和崑山人】发明【史称
嘉靖嗣统之初能革除弊政其冲龄英敏似可有为乃莅政未几即惑於神仙之说寄心方外
日事祷祈甚至道号自称端居摄养若天位无所事事者虽秦皇汉武亦不至是而推原其始
不过一猥鄙之宦?为之发端实则由君心僻好於长生而蛊惑乃得夤缘而入所谓物先腐而
後虫生也若鼎臣以清华之选大雅著作雍容榆杨自可以结文章特达之知何遽承风希旨
摭拾羽士游谈以为供奉遂致词臣踵以青词为拜献先资要津捷径作俑之咎可胜责哉】

六月免嘉靖元年天下税粮之半

【以灾伤也是年辽东河南畿复命发粟賑之】

秋七月南畿大水

【江淮河水大溢漂没田庐人畜无算吏部侍郎何孟春奏恤灾八事曰禁奢靡曰慎赏罚曰减百官俸薪阜隶曰革冗费曰广听纳曰安抚江淮百姓曰邻近州县不许遏籴曰免来岁被灾州县税粮帝命文武官俸如故余悉从之】

刑部尚书林俊罢

【帝即位以俊耆德宿望诏起工部尚书改刑部时俊年已七十引疾力辞不许即抵京师会暑月辍讲举祖宗勤学故事以谏数为帝言勤圣学辨异端节财用朝有大政必侃侃陈论中外想望其风采中官葛景等奸利事觉为言官所纠诏下司礼监察讯俊言内臣犯法法司不得讯是宫府异体也乞下法司公讯以昭平明之治都督刘晖下狱俊当以交结朋党律言与许泰同罪请斩以谢天下廖鹏廖铠齐佐王瓛论死屡诏缓刑俊乞亟行诛又劾谷大用占民田万余顷皆不听中官崔文家人李阳凤索匠师宋珏贿不获噉文杖之几死下刑部治未决而中旨移镇抚司俊留不遣力争不纳明日又奏帝怒责陈状俊言祖宗以刑狱付法司以缉获奸盗付镇抚讯鞠既得犹必付法司拟罪未有夺取未定之囚反付推问者文本先朝漏奸罪不容诛兹复干内降臣不忍朝廷百五十年纪纲为若辈坏乱至此也俊每以持正屡见格遂乞致仕诏加太子太保给驿归及大礼议定得罪者或杖死俊闻之从病中上书言古者鞭朴之刑辱之而已非欲糜烂其体肤而致之死也又非所加于士大夫也咸化时廷杖率容厚棉底衣重氈叠裹然且沈卧久乃得痊正德朝逆瑾窃权始令去衣致末年多杖死臣又见化治时惟叛逆妖言刼盗下诏狱始命打问他犯但言送问而已今一槩打问亦非故事自去岁旧臣斥逐殆尽朝署为空乞圣明留念既去者礼致未去者慰留硕德重望如罗钦顺王守仁吕柟鲁铎辈宜列置左右臣衰病待尽无复他望敢效古人遗表之意敬布犬马之心帝但下所司而已】质实【吕柟字仲称高陵人】

八月封张鹤龄为昌国公

【时并封后父陈万言为秦和伯吏部尚书乔宇言累朝太后戚属无生封公者张昞亦歿後贈今柰何以父贈为子封万言封伯昞更驟非制愿陛下守典章以垂万世不听】质实【陈万言肃皇后父也起家诸生】

【甲申】三年春正月地震

【两畿河南山东陕西同时皆震】

南京刑部主事桂萼请改称孝宗皇伯考诏下廷臣议【孝宗兴献帝称号定已久尊崇议且寝萼在南京与张璁同官日夜私诋朝议而南京兵部侍郎席书员外郎方献夫初以大礼

未定各草疏请追崇所生意与璫合疏具闻中朝竞诋璫为邪说惧不敢上皆为尊所见尊揣帝虽勉从廷臣意终未慊遂上疏请改称号并録书献夫二疏以闻畧言礼官失考典章纳陛下于与为人後之非而灭武宗之统夺献帝之宗且使兴国太后压于慈壽太后礼莫之尽三纲顿废非常之变也乃自张璫等献议论者指为干进逆籍人口致达礼者不敢驳议窃念陛下侍兴国后慨兴献帝弗祀已三年矣拊心出涕不知其几愿速发明诏称孝宗曰皇伯考兴献帝曰皇考别立庙大内正兴国太后之礼定称圣母庶協事天事地之道至廷臣所执不遇宋濮议耳按范纯仁告英宗曰陛下受神宗诏为之子封爵悉用皇子故事与入继之主不同则宋臣之论亦自有别今陛下奉祖训入继大统未赏受孝宗诏为之子则陛下非为人後而为人继之主也明甚考兴献帝母兴国太后又何疑臣久欲以请乃者复得席书方献夫二疏伏望奋然裁断将臣与二臣疏并付礼官令臣等面质帝得疏心动手诏下廷臣集议于是礼部尚书汪俊会廷臣七十有三人议曰祖训兄终弟及指同产言今陛下为武宗亲弟自宜考孝宗孰谓与为人後而灭武宗之统也仪礼传曰为人後者孰後後大宗也汉宣起民间犹嗣孝昭光武中兴犹考孝元孰谓入继之主与为人後者异也宋范纯仁所言盖言恩意尤笃益当不顾私亲非以生前为子者乃为人後身後入继者不为人後也尊言礼官执者不过前宋濮议臣等愚昧实不出此盖程颐之议曰虽当专意於正统岂得尽絶于私恩故所继主于大义所生存乎至情至于名称统绪所系若其无别斯乱大伦殆为今日发也议上留中而特旨召璫尊及书于南京俊不得已乃及羣臣请加皇字以全徽称帝亦留十余日始报可】质实【席书方献夫二疏见明史本传书疏畧曰宋英宗入嗣在袞衣临御之时今上入继在宫车晏驾之後议者以陛下继统武宗仍为兴献帝之子别立庙祀张璫霍韬之议未为非也然尊无二帝陛下于武宗亲则兄弟分则君臣既奉孝宗为宗庙可复有他称乎宜称曰皇考兴献王此万世不刊之典礼官三四执奏未为失也然礼本人情陛下尊为天子慈圣设无尊称可乎故尊所生日帝后上慰慈闈此情之不能已也为今日议宜定号曰皇考兴献帝别立庙大内岁时祀太庙毕仍祭以天子之礼似或一道也盖别庙祀则大统正而昭穆不紊隆以殊称则至爱笃而本支不沦尊尊亲亲并行不悖至慈圣宜称皇母某后不可以兴献加之献谥也岂宜加于今日哉献夫疏畧曰先王制礼本缘人情君子论事当究名实窃见近日礼官所议有未合乎人情未当乎名实一则守礼经之言一则循宋儒之说也臣独以为不然据礼经丧服传曰何如而可以为人後支子可也又曰为人後者孰後後大宗也大宗者尊之统也不可以絶故族人以支子後大宗也适子不得後大宗为是礼者盖谓有支子而後可以为人後未有絶人之後以为人後者也今兴献帝止生陛下一人别无支庶乃使絶其後而後孝宗岂人情哉且为人後者父尝立之为子子尝事之为父故卒而服其服今孝宗尝有武宗矣未尝以陛下为子陛下于孝宗未尝服三年之服是实未尝後孝宗而强称之为考岂名实哉为是议者未见其合于礼经之言也又按程颐濮议谓英宗既以仁宗为父不当以濮王为亲此非宋儒之说不善寔今日之事不同盖仁宗尝育英宗于宫中其不同者一孝宗有武宗为子也仁宗未尝有子也其不同者二濮王别有子可以不絶兴献帝无别子也其不同者三岂得以濮王之事比今日之事哉为是议者未见其善述宋儒之说也若谓孝宗不可无後故必欲陛下为子此尤不达于大道者也推孝宗之心所以必欲有後者在不絶祖宗之祀不失天下社稷之重而已岂必拘拘父子之称而後为有後哉孝宗有武宗武宗有陛下是不絶祖宗之祀不失天下社稷之重矣是寔为有後也且武宗君天下十有六年不忍孝宗之无後独忍武宗之无後乎此尤不通之说也夫兴献帝当父也而不得父孝宗不当父也而强称为父武宗当继

也而不得继是一举而三失焉臣未见其可也且天下未有无父之国也瞽瞍杀人舜窃负而逃今使陛下舍其父而有天下陛下何以为心哉臣知陛下纯孝之心宁不有天下决不忍不父其父也说者以为兴献帝不当称帝此尤不达于大道者也孟子曰孝子之至莫大乎尊亲周公追王太王王季子思以为达孝岂有子为天子父不得称帝者乎今日之事臣尝为之说曰陛下之继二宗当继统而不继嗣兴献之异羣庙在称帝而不称宗夫帝王之体与士庶不同继统者天下之公三王之道也继嗣者一人之私後世之事也兴献之得称帝者以陛下为天子也不得称宗者以实未尝在位也伏乞宣示朝廷复称孝宗曰皇伯称兴献帝曰皇考别立庙祀之夫然後合于人情当乎名实非惟得先王制礼之义抑亦遂陛下纯孝之心矣桂萼字子实安仁人方献夫字叔贤南海人】

二月罢华盖殿大学士杨廷和

【自帝即位廷和以帝虽冲年性英敏自信可辅太平事事有所持诤及议大礼先後封还御批者四执奏凡三十疏帝常忽忽有所恨左右因乘间言廷和专恣无人臣礼帝意遂内移会帝遣内官提督苏杭织造工部及给事中御史皆以江左比岁不登请母遣不听趣内阁撰教廷和因极言苏杭诸府旱涝相继淮杨徐邳田庐漂没幼穉计斤而鬻母子赴水而死更重以继造恐激他变敕书必不敢革帝趣愈急戒母渎扰执拗廷和力争言臣等举朝大臣言官言之不听顾二三邪佞之言是听陛下能独与二三邪佞共治祖宗天下哉且陛下以织造为累朝旧例不知洪武以来何尝有之创自化治耳宪宗孝宗爱民节财美政非一陛下不取法独法其不美者何也即位一诏中官之幸路绌塞殆尽天下方传诵圣德今忽有此何以取信帝为谢不审俾飭所遣中官毋纵肆而已不能止也于是廷和累疏乞休及更议大礼不合疏语露不平帝遂听之去言官交章请留不报廷和既去乃议称孝宗为皇伯考矣】

三月罢礼部尚书汪俊以席书代之

【帝谕建室奉先殿侧祀献帝主俊上书争曰陛下入奉大宗不得祭小宗亦犹小宗之不得祭大宗也昔兴献帝奉藩安陆则不得祭宪宗今陛下入继大统亦不得祭兴献帝是皆以礼抑情者也然兴献帝不得迎养壽安皇太后于藩邸陛下得迎兴国太后于大内受天下之养而尊祀兴献帝以天子之礼乐则人子之情获自尽矣乃今圣心无穷臣等敢不将顺但于正统无嫌乃为合礼帝严旨切责趣立庙益急俊曰立庙大内有干正统臣实愚昧不敢奉诏帝令集廷臣大议俊等复上议曰谨按先朝奉慈别殿盖孝宗皇帝为孝穆皇太后祔葬初卑神主无荐享之所而设也当时议者皆据周制特祀姜嫄而言至为本生立庙大内则从古未闻惟汉哀帝为定陶恭王立庙京师师丹以为不可哀帝不听卒遗後世之讥陛下有可以为尧舜之资臣不敢导以衰世之事请于安陆特建献帝百世不迁之庙他日袭封兴王子孙世世荐享陛下岁时遣官持节奉祀亦足伸陛下无穷至情矣帝不纳仍命遵前旨再议俊再疏乞休帝怒责以肆慢允其去召席书代之书未至令侍郎吴一鹏署部事一鹏持议如俊言并请下璵萼等法司按治帝报曰朕起亲藩奉宗祀岂敢违越但本生皇考寝园远在安陆於尔等安乎命下再四尔等欺朕冲岁党同执违败父子之情伤君臣之义往且勿问其奉先殿西室可亟修葺尽朕岁时追远之情遂趣成之名曰观德殿而命一鹏偕京山侯崔元等迎主安

陆一鹏等复上言历考前史并无自寝围迎主入大内者且安陆为献帝后封之疆神灵所恋伏乞俯纳羣言改题神主奉安故宫为百世不迁之庙其观德殿中宜别设神位香几以慰孝思奏入不纳一鹏乃行及秋迎主至奉安于观德殿】质实【观德殿在奉先殿西嘉靖六年三月移建于左改称崇先殿】

賑淮扬饥

【时淮扬诸郡大饥父子相食道殣相望臭弥千里巡按御史朱衣勘其状以闻乃命发帑截漕賑之是月河南亦以灾告并命给賑】质实【朱衣武昌人】

两广贼平

【先是广西上思州贼黄鏐纠峒兵作乱既就捕系浔州狱鏐党伪为军门檄取以归遂复叛攻劫州县总督都御史张鼎讨禽之而广东贼蔡猛三等又起聚新宁恩平诸贼僭名号肆剽掠衆至数万嶺合兵三万余人分二哨进击破巢二百禽斩一万四千余人俘贼属五千九百余人猛三等皆授首寻程乡贼梁八尺等与福建上杭贼相应都指挥李皋等会福建官军夹击俘斩五百余人归善李文积聚奸宄流劫乡村官吏讨捕久不克嶺遣参政徐度剿之俘斩千余人境内恐平】质实【上思州唐置宋属邕州迁隆寨元属思明路明属南宁府新宁明孝宗十一年始析新会县置属广州府恩平唐县宋废明成化二年始析阳江及新兴新会三县地复置属肇庆府今皆因之张嶺字时俊萧山人徐度江陰县人】

夏四月追尊兴献帝曰本生皇考恭穆献皇帝上兴国太后尊号曰本生皇母章圣皇太后

【择日祭告郊庙大赦天下时编修邹守益疏言陛下推崇本生业已尊为帝后今复加称皇考去其始封之号直与正统无别不可以示後世又言历观前史如冷褒段犹之徒当时所谓忠爱後世所斥为邪媚也师丹司马光之徒当时所谓欺慢後世所仰为正直也臣恐後之视今犹今之视昔帝得疏大怒下诏狱拷掠谪广德州判官已而修撰吕柟亦言大礼未正御史段续陈相请正席书桂萼罪吏部员外郎薛蕙上为人後解鸿胪寺少卿胡侍言张璁等议礼之失俱下狱谪官夺俸有差】质实【邹守益字谦之安福人薛蕙字君采亳州人段续阳曲人陈相洛阳人胡侍宁夏人】

五月罢谨身殿大学士蒋冕以石瑄为吏部尚书兼文渊阁大学士预机务

【自杨廷和罢冕以首辅当国帝愈欲尊崇所生遂礼部尚书汪俊以忱冕而用席书代之且召张总桂萼物情甚沸冕乃抗疏极谏曰陛下嗣承丕基固因伦序素定然非圣母昭圣皇太后懿旨与武宗皇帝遗诏则将无所受命今既受命于武宗自当为武宗之後特兄弟之名不容紊故兄武宗考孝宗母昭圣而于孝庙武庙皆称嗣皇帝称臣称御名以示继统承祀之义今乃欲为本生父母立庙奉先殿侧臣虽至愚断断知其不可夫情既偏重于所生义必不专于所後将孝武二庙之灵安所托乎迺者复允汪俊之去趣张璁桂萼之来人心益骇方廷

臣议建庙之日天本晴明忽变陰晦至暮风雷大作天意如此陛下可不思变计哉因力求去帝得疏不悦犹以大臣故优诏答之冕再疏请罢建庙之议且乞休复以天变为言帝益不悦遂令驰传归瑤初为吏部尚书刚方谢请托时望大孚而杨廷和有所不悦遂改掌詹事典诰敕以夺其权帝知瑤不附廷和欲引以赞大礼乃命瑤代冕而瑤据礼力争大失帝意】质实【石瑤字邦彦藁城人】

六月以张璁桂萼为翰林学土方献夫为侍讲学士【是年春萼疏既上廷臣方具议璁复言今日之礼不在皇与不皇而在考与不考萼又具第二疏如璁指且言陛下承祖宗大统执政乃无故任已私为不道使陛下终身为无父人逆伦悖义若此犹可使与斯议哉二人疏同上帝大喜立召赴京初议礼诸臣无力诋执政者至萼遂斥为不道且欲不使輿议其言恣肆无忌朝士无疾之既而献帝已追尊本生皇考阁臣请停召命帝不得已从之二人已在道意大沮丧乃复合疏请与礼官而质且云本生对所後而言若不亟去此二字则虽称皇考寔与皇叔无异疏入帝复召二人比至都衆汹汹欲仿先朝马顺故事毙之于廷萼惧不敢出璁越数日始朝恐有伺者出东华门走匿武定侯郭勋家勋大喜纳为内助时给事中张翀等连劾璁萼及方献夫席书诸人章下所司翀彙送刑部尚书赵监即列璁等罪状上请私相语曰倘得俞旨便杀之帝廉知之特命璁萼为学士献夫为侍读学士切责翀监学士丰熙修撰舒芬杨慎张衍庆编修王思等皆不愿与璁萼同列乞罢归帝怒俱夺俸璁萼以议礼骤贵于是闲罢失职武夫小吏皆望风希旨抗论庙谟矣】质实【郭勋武定侯英六世孙张翀字习之潼川人丰熙字原学鄞人杨慎字用修廷和子张衍庆汲县人】

秋七月罢吏部尚书乔宇

【帝即位初求治甚銳以宇为选郎时有人伦鉴召之长吏部复起林俊于刑部彭泽于兵部孙交于户部皆海内重望四人者持正不阿遇事有不可辄谏帝初亦嘉纳之然帝性刚好自用俊既以争李阳凤狱不合去会御史史道补外疑出执政指遂诬讐杨廷和宇与泽劾道挟私泽诋斥道尤力于是言官交章攻泽泽不自安乞罢而交年已七十亦累疏请老两人同月致仕独宇在位所执渐不见听复累争大礼积忤帝及是张璁桂萼并为学士宇言内降恩泽先朝率施于佞幸小人士大夫一预其间即不为清议所齿况学士最清华而俾萼等居之谁复肯与同列哉帝怒切责宇遂乞休许之】质实【孙交字大同安陆人为人清慎恬慤素为兴献王所重尝割邸中阳春台东偏地益其宅後中官言孙尚书侵地世宗曰此先皇所赐吾敢夺耶】

诏章圣皇太后尊号去本生羣臣伏阙谏戍学士丰熙等于边杖员外郎马理等于廷

【帝召见羣臣于左顺门示以手勅言章圣皇太后命去本生字羣臣骇愕而张璁桂萼复列上礼官欺罔十三事且斥为朋党于是九卿詹事翰林给事御史六部大理行人诸司各上章争之皆留中不下尚书金献民少卿徐文华倡言曰诸疏留中必改称孝宗为伯考矣吏部右侍郎何孟春曰宪宗朝议慈懿太后葬礼姚夔率百官伏哭文华曰此我朝事也杨慎曰国家养士百五十年仗节死义正在今日编修王元正给事中张翀曰万世瞻仰在此一举有不

力争者击之于是九卿二十三人翰林二十三人六部二十一人御史三十人诸司郎官吏部十二人户部三十六人礼部十二人兵部二十人刑部二十七人工部十五人大理寺属十一人跪伏左顺门有大呼高皇帝孝宗皇帝者帝方齐居文华殿命中官谕之退不不听帝怒遣锦衣先执为首者丰熙张翀及御史余翱郎中余宽黄侍显陶滋相世芳大理寺正母德纯八人下狱杨慎等乃撼门大哭众皆哭声震阙廷帝益怒命尽录诸臣姓名时有不在列者其亲故以不预义举为嫌多为代书遂系马理等一百九十人于狱孟春等待罪越数日为首者戍边四品以上夺奉五品以下予杖编修王相等十有七人杖死自是衣冠丧气璵等势益张】质实【张璵列上十三事一曰三代以前无立后之礼二曰祖训不言立后三曰孔子射于矍相之国斥与为人后者四曰遗诏不言继嗣五曰礼轻本生父母六曰伯叔父名分有定七曰汉宣帝光武俱为父立皇考庙八曰朱子尝言定陶事为坏礼九曰古者迁国载主十曰祖训皇后治内凡外事无得干预不宜假昭圣懿旨十一曰皇上于大行寿安太后不得率天下终三年丧十二曰新颁诏宜改正十三曰台谏连名章疏势有所迫礼官欺妄罪不可追马理字伯循三原人金献民字舜举绵州人王元正字舜卿盩厔人余翱定远人余宽浙江宁海人黄侍显莆田人陶滋绛州人相世芳安邑人母德纯南充人王相字懋卿鄞人案明史何孟春传九卿二十三人尚书金献民秦金赵监赵璜俞琳侍郎何孟春朱希周刘玉都御史王时中张润寺卿汪举潘希曾张九欽吴祺通政张璜陈沾少卿徐文华张缙苏民金璜府丞张仲贤通政参议葛会寺丞袁宗儒翰林二十三人则掌詹事府侍郎贾咏学士丰熙侍讲张壁修撰舒芬杨维聪姚涑杨慎张衍庆编修王元正许成名刘栋张潮崔桐叶桂章王三锡余承勲陆武王相应良王思检讨金皋林时给事中二十一人则张翀刘济安磐张汉卿张原谢贵毛玉曹怀张嵩郑一鹏王瑄张廷羽黄重李锡赵汉陈时明郑自璧袭绍宗韩楷黄臣胡纳御史三十人则王时柯余翱叶奇郑本公杨枢刘颖祁杲杜民表杨瑞张英刘谦亨许中陈克宅谭缙刘翀张录郭希俞萧一中张恂倪宗岳王璜沈教鍾卿密胡琼张濂何鳌张曰韬蓝田张鹏翰林有孚吏部十二人则郎中余宽党承志刘天民员外郎马理徐一鸣刘勲主事应大猷李舜臣马冕彭泽张鵬司务洪伊户部三十六人则郎中黄侍显唐昇贾继之杨易杨淮胡宗明栗登党以平何岩马朝卿员外郎申良郑漳顾可久娄志德主事徐嵩张庠高奎安璽王尚志朱藻黄一道陈儒陈腾鸾高登程旦尹嗣忠郭日休李录周诏戴亢缪宗周邱其仁俎琚张希尹司务金中夫检校丁律礼部十二人则郎中余才汪必东张总张怀员外郎翁磐李文中张深主事张镗丰坊仵瑜丁汝夔臧应奎兵部二十人则郎中陶滋贺缙姚汝臯刘淑相万潮员外郎刘漳杨仪王德明主事汪濬黄嘉宾李春芳卢襄华钥郑晓刘一正郭持平余祜陈赏司务李可登刘从学刑部二十七人则郎中相世芳张戢詹潮胡珽范棣陈力张大轮叶应骢白辙许路员外郎戴钦张俭刘士奇主事祁勅赵廷松熊宇何鳌杨濂刘仕潇樟顾铎王国光汪嘉会殷承叙陆铨钱铎方一兰工部十五人则郎中赵儒叶宽张子衷汪登刘玘江珊员外郎金廷瑞范总龐淳主事伍余福张凤来张羽车纯蒋洪郑溜大理寺十一人则寺正母德纯蒋同仁寺副王暉刘道评事陈大纲鍾云瑞王光济张徽王天民郑重杜鸾廷臣受杖死者明时世宗本纪明实录以为十六人何孟春传以为十八人王思传以为十七人盖思与王相张原毛玉裴绍宗张曰韬胡琼杨淮胡珽申良张灏安玺仵瑜臧应奎余祜殷承叙李可登也按明实录不载张原故止十六人然考明史原传云原再被杖创重卒则王思传称十七人者为得其实云】

罢武英殿大学士毛纪

【纪请宥伏阙诸臣帝怒传旨责纪要结朋奸背君报私纪乃上言曰曩蒙圣谕国家政事商榷可否然後施行此诚内阁职业也臣愚不能仰副明命迺者大礼之议平台召对司礼传谕不知其几似乎商榷矣而皆断自圣心不蒙允纳何可否之有至於笞罚廷臣动至数百乃祖宗来所未有者亦皆出自中旨臣等不得与闻宣召徒勤扞格如故慰留虽切诘责随加臣虽有体国之心不能自尽夫要结朋奸背君报私正臣平日所痛愤而深疾者有一于此罪何止罢黜今陛下以之疑臣尚可一日面朝天宁间哉乞赐骸骨归乡里以全终始尤望陛下法祖典学任贤纳谏审是非辨忠邪以养和平之福帝衔纪亢直允其去】

八月大同军乱杀巡抚都御史张文锦

【初文锦以拒宸濠得重名既擢巡抚銳意整饬边政大同北四望平衍寇至无可御乃议于城北九十里外增筑五堡参将贾监督役严卒已怨及堡成欲徙镇二千五百家戍之衆憚行请募新丁僚吏咸以为言文锦怒曰如此则令不行矣镇亲兵先往孰敢後亲兵素游惰有室闻当发大恐文锦严趣之行监承风杖其队长诸边卒自甘州五卫杀巡抚许铭朝廷处之轻颇无忌至是卒郭监柳忠等乘衆愤遂倡乱杀贾监裂其屍走屯塞外文锦恐与外寇连令副将时陈等招之入城即索治首乱者郭监等大惧复聚为乱焚大同府门入行都司纵狱囚又焚都御史府门文锦踰垣走匿博野王府第乱卒欲燔王宫王惧出文锦郭锦等杀之亦裂其屍遂焚镇守总兵署出故总兵朱振于狱胁为帅事闻帝命侍郎李昆往曲赦乱卒擢蔡天佑为金都御史巡抚大同天佑从数骑驰入城谕军士献首恶衆心稍定会尚书金献民总兵官杭?出师甘肃道大同乱卒疑见讨复鼓噪天佑惧急请再赦兵部言元恶不除无以警後请特遣大臣总督宣大军务以制其变乃命户部侍郎胡瓚偕都督鲁纲统京军三千人以往瓚等未发而进士李枝齎饷银至乱卒曰此承密诏尽杀大同人为军犒也夜中火起围枝馆出牒示之乃解寻复杀知县王文昌围代王府胁王奏乞赦王急携二郡王走宣府巡按御史王官言乱卒方器大帅兵压境是趣之叛也请亟止禁军容臣密图乃命瓚驻兵宣府顷之天佑奏总兵官桂勇已捕五十四人请止京军勿遣帝责以阻挠令必获首恶郭监等既而瓚次阳和勇天佑令千户苗登擒斩监等十一人函首送瓚请班师甫二日监父郭疤子复纠徐彊儿等夜杀勇家人又炖苗登家瓚言非尽殲不可帝乃切让天佑召勇还京以故总兵朱振代之勅瓚仍驻宣府居无何天佑捕戮徐彊儿等瓚等遂班师明年正月李昆等上章言疤子潜逃塞外必为後患帝将遣使勘会瓚还京言逃卒无足患帝乃罢勘官勿遣疤子复潜入城夜焚振第明旦天佑闭城大索获疤子及其其党三十四人悉斩以殉尽有胁从衆乃大定】质实

【五堡曰水口宣宁只河柳沟桦沟地在今大同府北博野王景泰五年代隐王第三子成鏐始封传至其孙俊櫜孝宗十二年袭封二十八年薨无子除代王盖懿王俊杖也孝宗十二袭封嘉靖六年薨蔡天佑字成之睢州人胡瓚字伯珩永平人李枝扶沟人王官宁夏左屯卫人】

发明【张文锦以边政废弛銳意整饬不可谓非是惟御之无素持之太急且以二千五百家之镇卒仓猝远徙戍堡以致骄兵悍卒煽衆为乱耳然边卒之敢于倡乱寔狃于甘州之变

朝廷所以处五卫者太轻自非痛加惩戒创蔓实难图乃事闻于朝仍以曲赦为弭乱之策无怪乎反侧之徒益无所顾忌一再抚之而乱犹未定几与唐代藩镇之祸无异虽其後首恶就诛人心稍戢曾不数年总兵官李瑾督役浚渠竟为役卒所杀而抚顺广宁缚指挥囚辱巡抚者相继而起姑息养奸之害一至此欵】

以贾咏为礼部尚书兼文渊阁大学士预机务

【帝即位咏为礼部侍郎奉命诣承天上献皇帝尊号赐白金文绮寻改吏部掌詹事典诰敕及是晋礼部尚书入阁咏为人长者在政府无所建白充位而已】

九月更定大礼称孝宗为皇伯考昭圣皇太后为皇伯母献皇帝为皇考章圣皇太后为圣母

【尊称由是遂定大学士石琚复谏曰大礼一事已奉宸断无可言矣但臣反覆思之终有不安于心者心所不安而不以言言恐触忤而不敢尽则陛下将焉用臣臣亦何以仰报君父哉夫孝宗皇帝与昭圣皇太后乃陛下骨肉至亲今使疏贱谗佞小人辄行离间但知希合取宠不复为陛下体察兹孟冬时享在迓陛下登献对越如亲见之宁不少动于中乎夫事亡如事存陛下承列圣之统以总百神临万方焉得不加慎重顾听细人之说干不易之与哉帝得奏不悦戒勿复言】

土尔番寇肃州命尚书金献民都督杭雄往御之【土尔番比岁通贡朝廷待之如故亦不问巴雅济事至是莽肃尔忽以三万骑围肃州巡抚都御史陈九畴闻之即自甘州昼夜驰入城守御而告警于朝帝命献民总制军务充总兵官帅师西讨比至兰州九畴已击破贼斩塔济迪分掠甘州者亦为总兵官姜瓖所败贼遁走献民遂再上捷引还焉】质实【杭雄字世成世为绥德卫总旗遂为绥德人】

冬十二月起杨一清为兵部尚书总制三边

【故相行边自一清始一清自是凡三为总制温诏褒美比之郭子仪】

辽东贼作乱主事王冕死之

【冕初为万安知县与王守仁平宸濠守仁封新建伯冕未及叙坐他事落职既而録前功擢兵部主事巡视山海关会辽东妖贼陆雄李真等作乱突入关侍吏欲扶冕趋避冕不可曰吾奉命巡视且有亲在急趋母所执兵以卫贼至母被伤冕奋前救之被执胁以刃大骂遂见害诏赠光禄少卿有司祠祀】质实【王冕字服周洛阳人】

【乙酉】四年春三月仁壽宫灾

【昭圣太后宫也是年秋方命修建以岁灾民困欲止其役大学士费宏等言昭圣太后久处别殿意或不安以渐修复庶足彰陛下之孝帝曰皇伯母孝奉不可缺小民亦当受念未几召采木侍郎王輓还京工竟罢】质实【王輓江都人】

夏五月复传奉官

【帝即位尽斥先朝传奉官已太监邱福潘杰等死诏官其弟侄锦衣司礼太监张钦死以其家人李贤承廕兵部尚书金献民先後执奏帝皆不听然间有传奉犹不至累数十人锦衣千户王邦奇者初在武宗潮黄缘得官挟势构害甚衆既以冒濫汰去至是与其党孝全等诡词奏辨下兵部议献民言全邦奇等足不履行阵而坐论首功身不隶公家而躐跻显秩陛下登极汰去者三百余人人心称快万一幸端再启则前诏皆虚将来奏扰有何纪极帝竟授全等试百户献民复奏曰令出惟行弗惟反今以小人奏辨一旦复官九十余人徇左右私坏祖宗法窃为陛下惜之望仍斥全邦奇等以息人言卒不听】

作世庙

【初国子生何渊首请建世室廷臣恶之出为平凉主簿屡被上官撻笞求内改帝擢为光禄寺署丞于是复申前议请崇祀献皇帝太庙章下廷议席书率羣臣言天子七庙周文武并有功德故立文武世室于三昭三穆之上献皇帝追称帝号未为天子渊妄为谀词乞寢其奏敕令再议书等言将置主于武宗上则武宗君也以臣先君分不可僭置武宗下则献皇叔也以叔後侄神终未安在廷诸臣于称考称伯异同相半今祔庙之举无一人以为可者时张璁亦言孝子之心无穷分则有限别立祔庙礼之得为者也臣昧死劝陛下为之入于太庙礼之不得为者也臣昧死劝陛下勿为书复密疏劝止帝遣中官谕书曰朕绍膺大统即以皇考为百世之室何不可卿乃怯衆饰奸邪书知帝意不可回遂请于皇城内别立一庙前後寢如文华殿制出入不与太庙同门座位不与太庙相并祭用次日庙欲稍远庶以成祔庙独尊之体避两庙一统之嫌诏可亲定名曰世庙而世室之议乃寢】

秋八月南畿地震

【是岁天下地震凡六十有三】

田州指挥岑猛叛诏都御史姚镛讨诛之

【田州自洪武以来岑氏世为土知府孝宗时猛与思恩岑濬构兵濬攻田州猛遁走总督潘蕃讨诛濬朝议田州思恩但改设流官降猛千户徙福建正德初猛赂刘瑾以同知摄府事抚辑遗衆觊复祖职後从都御史陈金征江西流贼所至剽掠为民害寻以贼平论功进指挥同知非猛本意颇怨望又自恃兵力数侵夺邻境上思州之役总督张嶺徵其兵不至以状闻于是巡抚盛应期巡按谢汝仪调官军讨猛诏报可会应期以他事去命镛往代汝仪与镛郤乃诬镛之子涑纳猛万金力劝其父议抚且诡为涑家书献之镛惶恐遂克期进剿镛知猛妇

翁归顺知州岑璋以女失爱憾猛因令都指挥沈希仪结璋为内应大发永顺保靖兵以希仪及别将张经李璋张佑程鉴统之分道并入猛闻大兵至令其下母文兵裂帛书冤状自明不及陈军门乞怜察谏不听督战益急身与总兵官朱麟等连破其数砦猛子邦彦劲兵守险璋佯以兵千助邦彦比官军攻千人忽自溃大呼曰兵败矣邦彦兵亦溃官军大破之斩邦彦猛奔归顺璋诱而酖杀之以其首献田州平】质实【归顺元州明初废为归顺峒孝宗九年复置土州属镇安府嘉靖初改直隶州 本朝初属思恩府雍正七年改设流官仍属镇安府姚谔字英之慈溪人子涑字维东沈希仪字唐佐贵县人】

冬十二月大礼集议成颁示天下

【先是帝命席书辑大礼集议书言近题请刊布多系建言于三年以前若臣书及璫萼献夫韬所正取者不过五人礼科右给事中熊浹南京刑部郎中黄宗明都察院经历黄绶通政司经历金述监生陈云章儒士张少连及楚王枣阳王二宗室外所附取者不过六人有同时建议若监生何渊主事王国光同知马时中巡检房濬言或未纯义多未正亦在不取其他罢职投闲之夫建言于璫萼等召用後者皆望风希旨有所觊觎亦一切不录其锦衣百户聂能迁昌平致仕教谕王价建言三年二三月未经采入今二臣奏乞附名应如其请帝从之及是书成进书太子太保以璫萼为詹事献夫韬为少詹事诸与议者皆进秩因诏大礼已定自今有假言陈奏者必罪不宥】质实【楚王荣?楚昭王五世孙正德七年袭封枣阳王祁钰襄宪王第三子正统八年始封再传为荣肃王佑樞孝宗十六年袭封黄宗明字诚甫鄞人黄绶字宗贤黄岩人】

闰十二月乙卯朔日有食之

【丙戌】五年春二月赈京师饥

【命发郡县仓庾及太仓钱谷赈之是年八月赈湖广饥十月赈南畿浙江灾免税粮物料山西四川被灾税粮亦并蠲免】

三月定有司久任法

【吏部尚书廖纪言迺者守令迁转太频政多苟且宜遵旧制俟九年考沟有政绩者乃迁从之】质实【廖纪字时陈东光人】

夏五月召杨一清复入阁

【初大礼议起一清方家居见张璫疏寓书门人乔宇曰张生此议圣人不能易也乃劝席书早赴召以定大议故璫等皆喜一清而帝为世子时献王尝称刘大夏李东阳及一清为楚之三杰心识之既即位以边陲事重起一清为总制春未已也及书璫萼用事书弟检讨春故由御史改用武宗实录成大学士费宏议出春为佥事书遂与宏有隙璫萼骤贵至詹事举朝

恶其人宏每示裁抑璫萼大怨亦力排宏御史吉棠因请召还一清以消朋比帝以议礼故欲藉一清箝衆口遂命一清为吏部尚书武英殿大学士既入见加少师仍兼太子太傅恩礼甚渥】质实【明史席书传弟春由庶吉士授御史以兄为都御史改翰林检讨吉棠丹阳人】

秋九月章圣皇太后有事于太庙世庙

【世庙既成章圣太后欲谒见帝询张璫桂萼俱援庙见礼言宜先见太庙次谒世庙费宏杨一清等及礼部侍郎刘龙争之不得石瑄复上疏极谏言我朝家法后妃入宫未有无故复出者太庙尊严非时享祫祭天子亦不轻入况后妃乎璫萼辈所引庙见礼今奉先殿是也圣祖神宗行之百五十年已为定制中间纳后纳妃不知凡几未有敢议及者何至今日忽倡此议且陰阳有定位不可侵越陛下为天下百神之主致母后无故入太庙坤行乾事陰侵阳位不可之大者也帝不听】质实【刘龙襄垣人】

【丁亥】六年春二月小王子寇宣府

【鞑靼自榆林入寇後岁犯边然不敢大入前二年春其别部驻西海者以前骑寇甘肃总兵姜奭御之斩其魁乃引去至是两寇宣府参将王经开山先後战死及秋又以数万骑犯宁夏塞尚书王宪督总兵官郑卿等败之斩三百余级明年复三犯边时小王子控弦十余万多蓄货贝富强特雄于诸部矣】质实【王宪字维纲东平人】

罢大学士费宏石瑄

【张璫桂萼既与宏有隙日毁宏于帝宏上书乞休言璫萼挟私怨臣屡矣不与经筵讲官则怨不与修猷皇实录则怨不为两京乡试考官则怨不为教习则又怨璫萼疑内阁事属臣操纵抑知臣下采物望上稟圣裁非可专擅璫萼日攘袂搯腕觊觎臣位臣安能与小人相齟齬祈赐骸骨不允及璫居兵部宏欲用新宁伯谭纶掌奋武营璫遂劾宏刼制府部宏连疏乞休帝虽优诏慰留然终不以谴璫萼璫萼益恣日夜求逞私憾于是奸人承璫萼指构大臣锦衣百户王邦奇遂上书言边事初邦奇以遗诏裁革传陞官削千户怨杨廷和既复职为彭泽所抑则又怨泽乃言哈密失国土尔番内侵由泽赂番求和廷和杀舍音和珊所致请诛此两人廉哈密可复边境无虞下兵部勘状未报邦奇复言宏石瑄俱廷和奸党尝夜遇杨一清所欲为弥缝而廷和子兵部主事惇藏匿故牒令前後奏辞皆不得验又泽弟冲与廷和壻修撰余承勋乡人侍读叶桂章交关请嘱并当逮治奏入璫萼欲藉此兴大狱复内讧于帝帝信之斥廷和泽为民画置惇等于理给事中杨言抗章曰故辅廷和有社稷之勲阁臣宏瑄乃百僚之表邦奇心怀怨望文饰奸言诟辱大臣荧惑圣听若穷治不已株连益多臣窃为国家大体惜也帝得疏怒言为大臣游说并收系言亲鞫于午门备极五毒率无挠词既罢下五府九卿议镇远侯顾仕隆等覆奏邦奇言皆虚妄帝切责之然狱亦由是解而宏瑄愤为奸人诬蔑求去益力帝许宏驰驿归銜瑄素鯁直责其归怨朝廷失大臣谊一切恩典皆不予归装襍被车一辆而已都人叹异谓自来宰臣去国无若瑄者自瑄及杨廷和蒋冕毛纪相继以强谏罢政迄嘉靖季密勿大臣无进逆耳之言者矣】质实【谭纶新宁伯忠之曾孙嘉靖田年袭封余

承勋青神人叶桂章名山人杨言字帷化鄞人顾仕隆镇远伯成五世孙孝宗十七年袭封】

召谢迁复入阁

【费宏举迁自代杨一清见张璁日恣心弗善也不欲与之共事亦力举迁帝遣行人斋手敕即家起之命抚按官敦促上道迁不得已拜命】

三月前少保谨身殿大学士刘健卒

【健自刘瑾诛後复原官致仕闻武宗数事巡游辄涕泗不食曰吾负先帝帝登极屡赐存问比之司马光文彦博至是卒年九十有四赠太师谥文靖健器局峻整学问深远在阁时同列李东阳以诗文引後进海内士皆抵掌谈文健若不闻独教人治经穷理其事业光明俊伟明也辅臣鲜有比者】

以翟銓为吏部侍郎兼翰林学士入内阁预机务【帝意欲相张璁命廷臣举素有才望者再推而璁不与会中官多誉銓遂用之杨一清以銓望轻请用罗钦顺吴一鹏不听】

夏五月丁丑朔日有食之

以罗钦顺为吏部尚书辞不拜

【时张璁桂萼以议礼骤贵营私植党屏逐正人钦顺耻与同列屡召不起钦顺家居杜门潜心格物致知之学力排释氏谓释氏之明心见性与吾儒之尽心知性相似而寔不同释氏之学大抵有见于心无见于性今人明心之说混于禅学不知有千里毫厘之谬因着困知记六卷】

总制两广军务王守仁抚降田州蛮

【姚镔既诛岑猛平田州乃请改设流官留参议汪必东佥事申惠参将张经以兵万人镇其地而以知府王熊兆署府事会必东□皆移疾他驻惟经熊兆在府兵势分防守稍懈于是猛党卢苏王受等乃为伪印诳言猛不死且借交趾兵二十万以图兴复蛮民信之聚衆薄府城经出击兵少不敌欲引还而城中陰为内应呼噪四出官军腹背受攻力战不支突围渡江走贼逼其後争舟溺死者甚衆贼沿江置阑索伏药弩夹岸并起官军且战且行失士卒三四百人贼遂入据府城烧仓粟以万计巡按御史石金上其事劾镔失策罔上并论前抚盛应期生事召衅而给事中郑自璧因请仍檄湖广永顺保靖兵并力剿贼帝以四方兵数万方归休岂可复调命镔再计机宜以闻时卢苏虽据府叛犹声言就抚遣人迎署府事王熊兆而其党王受纠衆万余攻据思恩城执知府指挥等官已而释之亦投牒上官佯听抚镔以兵未集姑受之以缓其谋遣谍者檄诸土官勒兵自効且责失事守巡参将等官立功自赎复疏调湖广永顺保靖及江西赣州福建汀州兵具会于南宁并力进剿帝以蛮乱日久镇巡官受命大征

未及殄絕輒奏捷散兵使余孽复滋罪不容逭姑赦前过益图新功乃起兵部尚书王守仁总督军务同镇讨之镇以守仁才足办贼当专其事权自乞休去时苏受既入思恩封府库以贼兵守之自率衆攻武缘守巡官率兵至思恩思恩千夫长韦贵徐伍遣壮士由间道入城为内应夜引官兵夺门杀贼二十余人收府印及库藏因招抚城中未下者而苏受方攻武缘甚急参将张经坚壁拒守镇守头目许用与战斩其渠帅一人贼见援兵大集始遁去守仁至南寧道中见受等势盛度亦未可猝灭上疏极陈用兵之非且言田州邻交址深山絕谷悉獠獠盘据必仍设土官可藉其兵力为屏蔽若改土为流则边鄙之患我自当之後必有悔章下兵部与守仁议不合令再定计寻守仁抵浔州与石金及藩臬诸将领会议皆云抚之便乃悉散遣诸军留永顺保靖土兵数千解甲休息苏受初求抚不得比闻守仁至益惧至是则大喜遂遣使乞降守仁令诣军门二人窃议曰王公素多诈恐给我陈兵入见守仁数二人罪杖而释之亲入营抚其衆七万因上言岑氏世効边功宜存其祀请割田州地别立一州以岑猛次子邦相为吏目署州事分设巡检司以苏受等任之并受约束於流官报可田州以安】质实【汪必东崇阳人申惠吴江人石金黄梅人郑自璧字采东祥符人】

六月诏科道官互相纠劾

【时京察拾遗桂萼为御史所论乃上言杨廷和私党犹在言路昔宪宗初年命科道于拾遗後互相纠劾请举行如制吏部侍郎孟春言宪宗无此诏萼被论图报复不可信帝终用萼言趣速举孟春以御史储良材等四人名上帝独黜良材而特旨斥郑自璧等数人自璧素敢言权幸侧目或中以蜚语故被斥已而良材辨疏力诋廷和指孟春为奸党萼即奏复其官】质实【孟春泽州人储良材马平人】

秋八月下刑部尚书顔颐壽等四十六人于狱贾咏罢【初崞县人李福达坐妖贼王良李钺党戍山丹卫逃还更名午为清军御史所勾再戍山海卫复逃居洛川以弥勒教诱愚民邵进禄等为乱事觉进禄伏诛福达先还家得免更姓名曰张寅挟重货往来徐沟间输粟得太原卫指挥用黄白术干武定侯郭勋大信幸其仇薛良讼于巡按御史马録録问得实檄洛川父老杂辨之益信勋为移书祈免録不从偕巡抚江潮具狱以闲且劾勋庇奸乱法章下都察院覆如録奏诏责勋对状勋惧乞恩因为福达代辨帝置不问会给事中王科郑一鹏程辂常泰刘琦郑自璧赵廷瑞沈汉秦佑张達陈臯谟御史程启充卢琼邵幽高世魁任淳南京御史姚鸣凤潘壮戚雄王献评事杜鸾刑部郎中刘仕主事唐枢交章劾勋谓罪当连坐勋再自诉以议礼触衆怒为言帝心动勋复乞张璁桂萼为援璁萼素恶廷臣攻已亦欲借是舒宿愤乃合谋腾蜚语曰诸臣内外交结借端?勋将渐及诸议礼者帝深入其言而外廷不知攻勋益急帝愈疑命取福达等至京师下三法司讯既又命文武大臣更讯之皆无异词帝大怒将亲讯以杨一清言而止仍下廷鞫颐壽等不敢自坚改妖言律帝犹怒命法司俱戴罪辨事遣官往械録潮及前问官布政使孝璋按察使李珏事章纶都指挥马豸等时璋珏已迁都御史璋巡抚宁夏珏巡抚甘肃皆下狱廷讯乃反前狱抵良诬告罪帝以罪不及録怒甚命萼署刑部璁署都察院献夫署大理寺覆狱之乃尽下尚书颐壽侍郎刘玉王启左都御史聂贤副都御史刘文庄金都御张润大理卿汤沐少卿徐文华顾昺寺丞汪渊狱严刑推问遂挟録篋得大学士贾咏都御史张仲贤工部侍郎闽楷御史张英及寺丞渊慰问书帝责咏咏引罪致仕去

仲贤等亦下狱萼等上言给事中琦泰郎中仕声势相倚挟势弹事佐录杀人给事中科一鹏佑汉谿评事鸾御史鸣凤壮雄扶同妄奏助成奸恶给事中逵御史世魁方幸寅就死得诬勋谋逆党附连名同声嫁祸郎中司马相妄引事例诬上行私请大奋乾断以彰国法帝纳其言并下诸人狱先是廷臣会讯太仆卿汪元锡光禄少卿余才偶语曰此狱已得情何再鞠侦者告萼以闻亦逮问萼等遂肆榜掠录不胜刑自诬故入人罪璫萼等乃定爰书言寅非福达录等恨勋构成冤狱因列上诸臣罪名帝悉从其言谪戍极边遇赦不宥者五人璋珏纶多前山西副使少卿文革谪戍边卫者七人琦逵泰琮启充仕及知州胡伟为民者十一人贤科一鹏佑汉谿世魁淳鸣凤相鸾革职闲住者十七人颐壽玉启潮文庄沐泌渊元锡才偕仲贤润壮雄及前大理丞毛伯温其他下巡按逮问者副使周宣等五人录以故入人死未决当徒帝必欲寘重辟献夫曰张寅未死而录代之死恐天下不服杨一清复力争乃减死永戍烟瘴地缘及子孙过赦不宥薛良抵死衆证皆戍张寅还职帝以璫萼等平反有功赐二品服俸给三代诰命遂编欽明大狱录颁示天下方璫萼反福达之狱举朝虽不直璫萼而以寅福达姓名错互亦或疑之至四十五年正月四川大盗蔡伯贯就擒自言学妖术于山西李同所司檄山西捕同下狱同供李午之孙其父曰大礼世习白莲教惑衆倡乱与大狱录姓名无异由是福达狱始明】质实【崞汉县属代州今因之山丹卫元山丹州明洪武中置卫属陕西行都司今为山丹县属甘州府山海卫明因临榆故城改置今为临榆县属永平府洛川姚泰置明属鄜州徐沟金置明属太原府今皆因之太原卫明洪武中置属山西都司马录字君卿信阳人江湖贵谿人王科字进卿涉县人郑一鹏字九万莆田人程辂绩溪人常泰徐沟人刘琦字廷珍洛阳人赵廷瑞直隶开州人沈汉字宗海吴江人秦佑临清人张逵字茂登余姚人陈臯谟代州人邵黜东阳人高世魁闽县人任淳堂邑人姚鸣凤莆田人潘壮浙江山陰人成雄金华人王献咸阳人杜鸾字羽文陕西咸宁人刘仕中部人唐枢字惟中归安人李璋景宁人李珏直隶开州人章纶嘉兴人刘玉字咸栗万安人王启字景昭黄岩人聂贤字承之长壽人刘文庄华陰人张润字汝霖临汾人汤沐字新之江陰人顾泌吴县人汪渊上饶人张仲贤阳曲人阎楷任邱人张英三河人司马相会稽人汪元锡字天启婺源人余才内江人胡伟京山人毛伯温字汝厉吉水人周宣莆田人案是狱成凡前後所争福达事者悉被株连惟郑自璧赵廷瑞陈臯谟邵黜王献唐枢六人不与王科等同罪盖桂萼等指名劾言官十四人及郎中司马相未及自璧等故不入爰书且考明史自璧及唐枢传时自璧因科道共劾中旨降二级外调已谪江陰丞去而枢于上疏时即触怒帝斥为民枢疏最得是狱要领畧曰李福达之狱陛下驳勘再三诚古帝王钦恤盛心而诸臣负陛下欺蔽者肆其谗谄谀者濶其说固位者缄其口畏威者变其词访缉者淆其真故陛下惑滋甚而是非卒不能明于是哀矜而至于辟矣臣窃惟陛下之疑有六谓谋反罪重不宜轻加于所疑一也谓天下貌有相似二也谓薛良言弗可听三也谓李珏初牒已明四也谓臣下立党倾郭勋五也谓崞洛证佐皆讐人六也臣请一一辨之福达之出也始而王良李 从之其意何为继而惠庆邵进禄等师之其传何事李铁汉十月下旬之约其行何求我有天分数语其情何谋太上元天垂文秘书其辞何指刼库攻城张旗拜爵虽成于进禄等其原何自钺?诛于前进禄败露于後反状甚明故陕西之人曰可杀山西之人曰可杀京畿中无一人不曰可杀惟左右之人曰可不则不得而知也此不必疑一也且福达之刑最易辨议或取验头秃或证辨乡音如李二李俊李三是其族识之矣始认於杜文柱是其姻识之矣质证于韩良相李景全是其友识之矣一言于高尚节王宗美是鄜州主人识之矣再言于邵继美宗自成是洛川主人识之矣三言于石文举等是山陕道路人皆识

之矣此不必疑二也薛良怙恶诚非善人至所言张寅即福达即李午实有明据不得以人废言况福达踪迹谲密黠慧过人人咸堕其术中非良狡猾亦不能发彼陰私从来发摘告奸之事原不必出之敦良原朴之人此不当疑三也李珣因见薛良非善人又见李福达无龙虎形朱砂字又见五台县张子真户内实有张寅父子又见崞县左厢都无李伏答李午名遂苟且定案轻纵元凶殊不知五台自壽靖元年黄册始收寅父子忽从何来纳粟拜官其为素封必非一日之积前此何以隐漏崞县在城坊既有李伏答乃于左左厢都追察又以李午为真名求其贯址何可得耶则军籍之无考何足据也况福达既有妖术则龙虎形朱砂字安知非前此假之以惑衆後此去之以避罪亦不可尽谓薛良之诬矣此不当疑四也京师自四方来者不止一福达既改名张寅郭勋从而信之亦事所有其为妖贼余党固意料所不能及勋自有可居之过在陛下既宏议贵之恩诸臣纵有倾勋之心亦安能加之罪乎此不用疑五也鞫狱者曰诬必言所诬何因曰讐必言所讐何事若曰薛良讐也则一切证佐非讐也曰韩良相等讐也则高尚节石文举非讐也曰魏泰刘永振讐也则今布按府县官非讐也曰山陕人讐也则京师道路之人非讐也此不用疑六也望陛下六疑尽释明正福达之罪庶羣奸屏迹宗社幸甚其後定欽明大狱錄恶枢辞辨晰刪之不载云】

发明【李福达之狱衆证确凿本无可疑郭勋以畏罪而庇奸嘉靖亦未始不悉其故乃以议礼触衆怒一言中其所忌遂改命璫萼猷夫署三法司覆讞则不待爰书之定而早知是狱之必颠倒而反覆矣璫萼輩藉端报复鍛鍊株牵小人变乱黑白何所不至乃以君临天下者缘议礼积憾臣工借福达之狱而使璫萼得伸其志虽奸人漏网衆正负冤皆所不恤默且赏平反之功领欽明之錄必欲箝衆口而独行其是易曰讼元吉王弼谓处得尊位用其尊正以断枉直故讼元吉也中正之不用讼何由吉哉】

九月以桂萼为礼部尚书兼翰林学士

【故事尚书无兼学士者特自萼始甫踰月迁吏部赐银章二曰忠诚静慎曰绳愆匡达令密封言事與辅臣埒萼既得志日以报怨为事廷臣莫不畏其凶威】

下刑部郎中叶应聰等于狱

【先是给事中陈沈素无赖家居与知县宋元翰不相能令其子柱讐摭元翰謫戍元翰摭沈罪及帷薄事刊布之名辨冤录沈由是不齿于清议尚书乔宇出之为湖广佥事沈恚甚见张璫桂萼輩议礼骤显沈乃以旧官上疏言璫等议是宜急去本生之称因诋宇及文选郎夏良胜銓法不平帝即还沈职謫良胜于外沈恃议礼合帝旨輒遍劾大臣凡已所不悦者悉指为邪党璫萼大悦遂引以击异已于是御史张曰韜戴金蓝田特疏劾沈且封上元翰辨冤录都御史王时中靖罢沈听勘沈奏羣奸恨臣抗议大礼将令抚按杀臣请遣一锦衣往沈意锦衣可利诱也得旨遣应聰及锦衣千户李经应聰与焚香誓天乃往会御史熊兰涂相等杂治具上沈罪状至百七十二条除赦前及暧昧者勿论当论十三条罪恶极宜斩徇离异子桂绞沈惧亡詣阙申诉帝持应聰奏不下尚书赵监副都御史张润给事中解一贯御史郑本公等连章执奏帝不得已始命覆核郎中黄绂力持应聰议席书萼为居间不能得邀璫共奏谓沈

议礼臣为法官所中帝入其言命免罪为民大理卿汤沐及监一贯更争之不听未几大礼书成并原洗妻子应骢寻迁吉安知府母丧归至是璫萼益用事而萼方掌刑部廷臣马录等以劾郭勋下狱洗谓乘此故案可反也上书讦应骢等萼因讼洗冤遂逮应骢等于狱词连四百人九卿及锦衣卫廷讯应骢对曰某所持者王章耳必欲直洗惟诸公命刑部尚书胡世宁等心知洗罪重而惩前大狱不敢执会是日黄雾四塞狱弗竟次日又大风拔木诏停刑乃当应骢按事不实律斥为民洗复冠带犹憾应骢不已越数年又令人诬奏应骢勘狱时酷杀无辜二十余人按验无实帝特谪应骢戍辽东是狱始终八年凡攻洗及治洗狱者无不得罪逮捕至数百人天下益恶璫萼辈恣横羞言议礼臣矣】质实【叶应骢字肃卿鄞人陈洗潮阳人张曰韬字席珍莆田人戴金汉阳人蓝田即墨人熊兰涂相皆南昌人解一贯字曾唯交城人郑本公肃州卫人黄绾息人按同时有两黄绾一为黄岩人侍郎孔昭之孙历官礼部尚书初附张璫论大礼晚背璫附夏言人以倾狡目之一即息人力持叶应骢议者是也正德中为刑部主事谏南巡受杖历郎中出知绍兴府有惠政被徵时士民哭震野争致赆止取二钱至京下诏狱瘐死降庆初赠太常少卿张佑上蔡人】

冬十月以张璫为礼部尚书兼文渊阁大学士入内阁预机务

【璫自释褐至入阁仅六年时杨一清为首辅翟銓亦在阁帝持之不如璫尝谕璫朕有密谕毋泄朕与卿帖悉亲书璫因引仁宗赐杨士奇等银章事帝赐二章曰忠良贞一曰绳愆弼违因并及一清等璫初为学士诸翰林耻之不与并列璫深恨之会侍读汪佃讲洪范不称旨璫请自讲读以下量材外补于是改官及被黜者二十余人并罢选庶吉士翰苑为空】质实【汪佃弋阳人】

【戊子】七年春正月逮前御史陈九畴于狱谪戍极边削夺前尚书金献民彭泽职

【初正德中土尔番谋取肃州遣所亲信者充贡使入关为内应九畴时为副使諗知之捶杀其使者和卓繖哲尔械舍音和珊送京师番人知事泄斂兵去肃州得安帝即位杨廷和奏诛舍音和珊而用九畴为甘肃巡抚三年秋番人入寇九畴击斩塔济迪音寇败遁都指挥王辅言莽肃尔伊兰俱死礮下九畴喜元凶殄灭遂以闻寻二人上表求贡帝怪且疑献民至兰州寇已退再奏捷帝颇知其冒九畴功然皆未发也及王邦奇憾杨廷和彭泽假哈密事讦两人误国帝遣给事中锦衣至边勘状未还报而狱解会番酋伊兰复来求贡且腾蜚语谓九畴冤杀和卓繖哲尔等故犯边报怨吏部尚书桂萼以前狱未竟不得杀廷和泽知帝方疑边臣虚妄计可因九畴复兴大狱乃胁礼兵二部同上议曰番人上书者四辈皆委咎前吏虽词多矫饰亦事发有因宜严覆九畴等激变状大学士杨一清以事既前决请无追论帝不听下手诏数百言切责九畴而戒一清勿党庇遂遣官逮九畴献民及侍郎李昆以下坐累者四十余人至是九畴逮至下狱萼必欲杀之并株连廷和泽刑部尚书胡世宁言于朝曰世宁司刑而杀忠臣宁杀世宁乃上疏为九畴讼冤言番人变诈妄腾谤讟以诬害我谋臣夫其蓄谋内寇为日已久一旦拥兵深入诸番约为内应非九畴先几奋戮使彼败谋而退则肃州孤城岂能复保臣以为文臣有勇知兵忘身殉国者无如九畴宜番人深忌而欲杀也惟听部将妄报以莽肃尔等为己死则其罪有不免耳疏入帝意稍解乃减死戍极边献民泽等皆落职廷和得

免】

二月起王琼为兵部尚书总制三边

【琼在戍久桂萼等言琼前攻杨廷和故羣臣争起排之今边陲急人廷臣才实出琼下帝乃复琼官代王宪总制三边】

三月大学士谢迁罢

【迁之赴召年已七十有九居位数月即求去帝待之愈厚天寒免朝参除夕赐诗及以病在告则遣医赐药饵光禄致酒饩使者相望于道而边乞归益力乃允其致仕】

夏四月甘露降告于郊庙

【南赣巡抚汪鋐奏所部有甘露降为帝仁孝之感帝喜遂告郊庙是年春灵宝人言黄河清者五十里遣太常往祭告御史周相疏谏帝震怒下之狱于是告祥瑞者踵至矣】质实【灵宝唐县明属陕州今因之灵宝黄河自陕西华陰界潼关折而东流迳河南陕州阌乡县北又东迳灵宝县北又东迳陕州城西北三里又东入河南府澠池县界汪鋐字宣之婺源人周相鄆人】

六月颁明伦大典于天下削前华盖殿大学士杨廷和等籍

【初大礼集议成张璁请彙为全书桂萼请备书大臣进退百官譴謫志陛下之明断既得请璁复引疾求退以要帝言臣与举朝抗四五年举朝攻臣至百十疏今修大礼全书元恶寒心羣奸侧目故要畧方进谗谤繁兴使全书告成将诬?益甚帝优诏慰留之及是书成名曰明伦大典帝自制序弁其首命璁为後序刊布天下叙功加璁少传萼少保霍韬方献夫等皆进官而追论前议礼诸臣罪削廷和籍蒋冕毛纪毛登汪俊乔宇林俊皆夺职斥何孟春夏良胜为民】

云南叛蛮平

【初寻甸土知府安晟死兄弟争袭遂改置流官土舍安铨失职因作乱巡抚傅习檄守巡官讨之大败寻甸嵩明皆?知府马性善弃城走铨势方张而凤朝文复起朝文武定土舍也时武定土知府凤诏母子坐事留云南朝文给其衆言诏已戮官军将灭其部党诸蛮信之悉从为乳杀同知以下官举兵与铨合滇中大扰朝议以欧阳重代习既又命伍文定为兵部尚书提督云南四川贵州湖广军讨之适芒部土酋普奴亦叛并以属文定未至重督兵击败贼而遣诏母于还故地蛮民相顾错愕咸投诏降朝文计穷败奔东川为追兵所及磔死铨衆犹盛遁据寻甸故巢列砦数十官兵分哨夹攻之诸砦先後破乃并力攻拔其老巢铨窜入芒部为土舍禄庆所执贼平是役也生禽渠贼千余人斩首二千九百余级俘获男妇千二百余抚散

蛮党二万有奇夺器械牛马无算捷书既奏而文定至乃移师征普奴会有言芒部不当用兵者遂召还寻四川巡按御史戴金复上言叛酋称乱之初势尚可抚文定决意用兵一无顾惜飞刍挽粮糜数十万及有诏罢师尚不肯已臣愚以为文定可罪也尚书才献书李承勋因诋文定好大喜功伤财动衆乃令致仕文定忠义自许遇事敢为不与时俯仰芒部之役愤小丑数乱欲为国伸威为议者旁挠以故功不克就】质实【寻甸古滇园地獐刺蛮居之号仲剽溢源部後为乌蛮裔斯丁所夺号斯丁部蒙氏为寻甸至段氏改仁德部元初置仁德万户府後改府明为寻甸军民府今为寻甸州属曲靖府武定唐羁縻宋州地後没于蛮元初内附置武定路明洪武中为武定军民府今改武定州直隶云南省傳习进贤人欧阳重字子重庐陵人】

秋七月王守仁平断藤峡猺

【自韩雍去两广断藤峡猺复炽上连八寨下通仙台花相诸峒盘亘三百余里郡县罹害者数十年守仁平田州还两江父老遮道言状卢苏王受亦请立功自赎守仁乃留南宁罢遣诸兵示不再用伺贼不备潜军突进连破牛肠六寺等寨循横石江而下攻克仙台花相诸贼复令布政使林富率苏受捣平八寨于是藤峡复平始帝以苏受之抚遣行人奉玺书獎諭及奏断藤峡捷则以手诏问阁臣杨一清等谓守仁自夸大且訾及其生平学术一清等不知所对守仁之起由璉荐璉故不善守仁以璉强之後璉长吏部璉入内阁积不相下璉暴贵喜功名风守仁取交址守仁辞不应一清雅知守仁而黄绾尝上疏欲令守仁入辅毁一清一清亦不能无迁怒璉遂显诋守仁征抚交失赏格不行猷夫及霍韬不平上疏争之言诸猺为患积年初尝用兵数十万仅得一田州旋复召寇守仁片言驰諭思田稽首至八寨断藤峡贼阻深岩絶冈国初以来未有轻议剿者今一举荡平若拉枯朽议者乃言守仁受命征思田不受命征八寨夫大夫出疆有可以安国家利社稷专之可也况守仁固承诏得便宜从事者乎守仁讨平叛藩忌者诬以初同贼谋又诬其輦载金帛当时大臣杨廷和乔宇饰成其事至今未白夫忠如守仁有功如守仁一屈于江西再屈于两广臣恐劳臣灰心将士解体後此强圉有事谁复为陛下任之帝报闻而已】质实【八寨思吉周安古卯古蓬古鉢都者罗黑剌丁後又益龙哈唏咳为十寨今广西思恩府上林县北有周安镇明时为八寨之一帝仙台花相诸峒在浔州平南县北回环相属两江谓左右江也牛肠六寺等寨在藤峡迤西横石江亦曰横水江在浔州武宣县东南柳州右江上源诸水至此合流而东即大藤峡林富莆田人】

冬十月皇后陈氏崩

【谥悼灵皇后後改谥孝洁】

十一月立妃张氏为皇后

【初封顺妃至是册为皇后】质实【皇后张氏史不详其地望毛奇龄彤史拾遗记后父辑锦衣卫指挥僉事】

土尔番寇肃州王琮请令入贡诏许之遂弃哈密【初陈九畴在甘肃力言土尔番不可抚宣闭关絶贡专固边防帝可之因拘系其前後使者数十辈及九畴得罪琮督三边悉遣还所系且许通贡议已定番酋伊兰者本曲先人幼为番掠去长而黠使阿尔以妹妻之握兵用事久为西陲患是年夏以获罪其主率所部二千人降边臣处之内地莽肃尔怒遂引卫拉特犯肃州为游撃彭濬所败乃遁走复因赤斤使人持番文求贡愿以哈密城易伊兰词多悖慢琮希张璁桂萼等指必欲议抚因言番人且悔宜原情赦罪以罢兵息民章下部议时胡世寧改掌兵部上言番前变诈多瑞方许之朝贡而寇骑已至河西几危此开关与通贡利害较然今琮等既言寇薄我城堡缚我士卒声言大举以恐吓天朝而又言番方惧悔宜仍许通贡何自相抵牾愿无堕其术中弛我边备斯可矣伊兰本我属番为彼掠去束身来归事属反正宜即抚而用之招彼携贰益我藩篱至哈密三立三絶今其王已为番酋所困民尽流亡借使更立他族彼强则入寇弱则从番难保为不侵不叛之臣臣谓立之无益适令番酋挟为奸利耳乞赐琮玺书令诘莽肃尔入寇状如果事出卫拉特则缚其人以自赎否则羈其使臣发兵往讨庶威信并行寇知敛戢更敕琮为国忠谋无徇于通番入贡当以足食固圉为长久计封强幸甚帝深善其言命琮熟计详处琮再疏申前请张璁等皆主琮议遂从之而独留伊兰不遣自是土尔番通贡如故哈密城印及巴雅济存亡遂置不问莽肃尔桀傲愈甚朝廷不能罪然自伊兰既降其势渐孤河西稍获休息哈密後为沙布塔子穆尔玛哈穆特所有服属土尔番比岁一贡迄隆万朝不絶然非忠顺王苗裔矣】质实【曲先卫古西戎汉西羌唐吐番元设曲先荅林元帅府明洪武中置曲先卫地在今肃州西南穆尔玛哈穆特旧作米儿马黑木今改】

御定资治通监纲目三编卷二十

卷二十一

<史部,编年类,御定资治通监纲目三编>

钦定四库全书

御定资治通监纲目三编卷二十一

【起乙丑明世宗嘉靖八年尽乙未明世宗嘉靖十四年】凡七年

【己丑】八年春正月兵部尚书兼左都御史新建伯王守仁卒【守仁病笃乞骸骨举隕阳巡抚林富自代不俟命免归行至南安卒丧过江西军民无不缟素哭送者桂萼劾其擅离职守诏停世袭恤典俱不予隆庆初赠侯议文成守仁天姿英异幼时谒上饶娄谅与讲朱子格物大指还家日端坐读五经亦泛滥二氏学数年无所得及谪龙场穷荒无书居石椁中日夜译旧闻忽悟格物致知当返诸心不安求诸事物喟然曰適在是矣故其为教专以致良知为主从游弟子甚衆最着者余姚徐爱钱德洪山阴王畿学者称之】质实【按王守仁集所载年谱守仁生于成化八年九月三十日卒于嘉靖七年十一月二十九日年五十七明实録系之八年正月盖赴告至京之月也明史儒林传娄谅字克贞其学以收放心为居敬之门尝言才提起便是天理才放下便是人欲魏校亟称之徐爱字曰仁守仁女弟夫钱德洪名寛以字行王畿字汝中爱早卒德洪彻悟不如畿畿持循亦不如德洪泰州王艮则出入二氏矣】

二月以吏部尚书桂萼兼武英殿大学士预机务【萼素与张璁比後二人皆用事积不相下及同居政府遂至相失】

河南襄阳大饥

【巡按湖广御史张祿绘图以献帝悯之诏有司亟振时广东佥事林希元上言救荒有二难曰得人难审户难有三便曰极贫便振米次贫便振钱稍贫便转贷有六急曰垂死急饘粥疾病急医乐病起急汤米既死急斂瘞遗弃孩穉急收养轻重系囚急寛恤有三权曰借官钱以赈余兴上作以助振借牛种以通变有六禁曰禁侵渔禁攘盗禁遏余禁抑价禁宰牛禁度僧有三戒曰戒迟缓戒拘文戒遣使因辑为书以工诏有司举行是年正月振山西灾九月免两畿河南被灾税粮赈江西湖广饥十一月赈浙江灾】质实【张祿平原人林希元字懋贞晋江人】

三月葬悼灵皇后於祆儿峪

质实【祆儿峪在昌平州鹿马山北】

夏六月前少师华盖殿大学士杨廷和卒

【廷和卒後帝问李时太仓所积几何对曰可支数年由陛下初年诏书裁革冗员所致帝慨然曰此杨廷和功不可没也隆庆初复官赠太保諡文忠 廷和性沉静详审为文简畅有法好考究掌故民瘼边事及一切法家言鬱然负公辅望入阁後李东阳谓曰吾于文翰颇有一日之长若经济事须归介夫及武宗之终卒安社稷者廷和力也人以东阳为知言】质实【李时字宗易任邱人】

秋七月下刑部郎中魏应召于狱

【京邸民张福诉里人张桂杀其母东廠以闻刑部坐桂死不服福姊亦泣诉官谓母福自弑之其邻亦皆为柱声冤诏郎中魏应召复按实如福姊言具有方验乃改坐福东廠奏法司妄出人罪帝怒下应召狱都御史熊浹执法如初帝愈怒褫浹职给事中陆粲刘希简争之帝大怒并下两人岳侍郎许缵等遂抵柱死应召及邻人皆遣戍杖福姊百人以为冤时帝方深疾孝武两后家柱实武宗后家夏氏仆故帝必欲杀之】质实【魏应召吴县人陆粲字子余长洲人刘希简汉州人许缵字廷美灵宝人吏部尚书进第三子也】

发明【张福弑母以诬其里人虽其姊亦诣官泣欣与邻人同出一词夫何冤抑之有乃法司覆奏左证皆符而嘉靖以张柱为夏口家奴遂援东廠之言为据必右福而致柱于死夫外戚之家果其恃势恣行自当为之裁抑若缘夙憾后家之故遽以偏聽断斯疑狱廷臣举不足信衆证举不足凭竟致冤杀无辜而躬行弑母之人转得显逃大義天讨有罪之谓何君人者顾出此耶】

八月张璫桂萼罢九月召璫还杨一清罢

【先是璫萼既攻去费宏意一清必援已而一清请召谢迁璫萼心憾之迁未至璫已入内阁多所更建一清引故事稍裁抑之积不平锦衣聂能迁者故附璫议礼礼成不调怨璫讪其私浙江指挥张浩事下内阁璫欲寘之死一清仅成璫怒上疏阴诋一清又嗾黄绾排之甚力一清再疏引退微及璫隐事帝手诏慰留因极言璫恃宠不让良可叹息璫见帝忽暴其短顿愧沮衔一清愈甚及萼入内阁亦不相能给事中孙应奎乃请鉴别三臣贤否以定用舍其意特右璫而帝因其奏慰留一清戒谕璫萼然一清知璫萼终必倾已屡求退且言今持谕者尚纷更臣独主安静尚刻核臣独主寬平用是多齟齬愿避贤者路赐骸骨归帝不允顷之给事中王准劾璫萼引用私人时帝虽已厌萼顾眷璫不衰犹温旨慰谕準同官陆粲不胜愤上疏曰璫萼凶险之资乖僻之学曩自小臣贊大礼拔置近侍不三四年位至宰弼恩隆宠异振古未闻乃敢罔上逞私专权招贿擅作威福报复恩仇璫狠愎自用执拗多私萼外若寬迂中实深剑伎忍之毒一发于心如蝮蛇猛兽犯者必死臣请姑举数端言之萼受尚书王琼赂钅万连章力荐璫从中主之遂得起用昌化伯邵杰本邵氏养子萼纳重贿竟使奴隶小人滥袭伯爵萼所厚医官李梦鹤假托进言夤缘受职居室相邻中开便户往来常与萼家人吴从周等居间又引乡人周时望为选郎交通鬻爵时望既去胡森代之森与主事杨麟王激又辅臣乡里亲戚也铨司要地尽布私人典选仅踰年引用乡故不可忠数如致仕尚书刘麟其中表亲也侍郎严嵩其子之师也金都御史李如圭由按察使一转径入内台南京太仆少卿夏尚朴

由知府期月遂得清卿礼部员外郎张敬假历律而结知御史戴金承风搏击甘心鹰犬皆萼嫺党相与朋比为奸者也礼部尚书李时柔和善逢猾狡多智南京礼部尚书黄绾曲学阿世虚谈眩人谄德彭泽夤缘改秩躐玷清华皆阴厚于璫而阳附于萼者也璫等威权既盛党与复多天下畏恶莫敢讼言不亟去之凶人之性不移将来必为社稷患帝大感悟立罢璫萼列其罪状诏廷臣以掣准职纠弹不早发与萼所私李梦鹤等俱下法司梦鹤等皆首服于是璫党霍韬攘臂曰张桂行势且及我矣遂上疏力攻一清为璫萼辨雪谓陆掣之劾实一清嫉之臣与璫萼皆以议礼进璫萼去臣不得独留帝心动即召璫还贬准典史掣驛丞而法司治萼私人犹犹不解韬揣帝意已变狱可反攻一清益急诬法司承一清风指罗织成萼罪帝果怒令法司会廷臣杂议出刑部尚书周伦于南京以侍郎许缵代缵乃实韬言请削一清籍帝令一清自陈璫故三上密书引一清赞礼功乞赐归假实以坚帝意俾速去帝果允致仕寻法司言梦鹤等假托行私与萼无与诏削梦鹤等籍从周论罪萼复散官】质实【孙应奎字文宿洛阳人王準字子推世籍秦府仪卫司按明史孙应奎传嘉靖十一年大计天下庶官王準谪富民典史应奎言都御史汪鋐为璫萼修郤诬以不谨而黜之乞复準官吏部尚书王琼亦言準当黜乃谪应奎高平县丞是谓王准以大计谪典史不以劾璫萼也然考王掣陆準合传云璫萼罢準亦下吏谪庶民典史稍迁知县汪鋐希璫指以考察罢之则准实以劾璫萼谪官至十一年又以大讨论黜孙应奎传误合为一事耳昌化伯邵喜世宗大母邵太后弟世宗立封喜昌化伯明年卒子蕙嗣五年卒无子族人争嗣久不决寻以喜兄安之孙杰嗣伯明伦大典成命郭勋颁赐戚畹不及杰杰自请之帝诘勋勋録邵是争袭章奏讐杰实他姓请覆勘帝不聽寻革外戚世封夺袭周时望贵谿人胡森汤谿人王激永嘉人刘麟字元瑞安仁人严嵩字惟中分宜人李如奎澧州人夏尚朴江西永丰人彭泽南海人与兰州彭襄毅同姓名初为吏部尚书以浮躁被斥张璫言泽劝臣进大礼或问致招衆忌今请臣去泽将以次去臣等泽乃复留】

冬十月癸亥朔日有食之戍刑部员外郎邵经邦于边卫

【经邦疏言兹者正阳之月有日食之异质诸小雅十月之篇变象悬符说诗者谓阴壮之甚由不用善人而其咎专归皇父然则今之调和燮理者得无有皇父其人乎迺陛下纳陆掣言命张璫桂萼致仕寻以璫议礼功复召辅政人言籍籍陛下莫之恤也乃天变若此安可勿畏夫议礼与临政不同议礼贵当临政贵公正皇考之徽称以明父子之伦礼之当也虽排衆议任独见而不以为偏若夫用行政则当辨别忠邪审量才力与天下之人共用之乃为公耳今陛下以璫议礼有功不察其人不揆其功而加大任似私议礼之臣也私议礼之臣是不以所议者为公礼夫礼为至公乃可万世不易设近于私则固可守也亦可变也陛下果以尊亲之典为至当而欲子孙世世守之乎则莫若于诸臣之进退一付诸至公优其赉予全其终始以荅其议礼之功而博求海内硕德重望之贤以弼成正大光明之业则人心定天道顺俾万年之後庙号世宗子孙百世不迁顾不伟与如徒加以三公之任使之履盈蹈满犯天人之怒亦非璫等福也帝大怒立下镇抚司拷讯狱上请送法司拟罪帝曰此非常犯不必下法司遂谪戍福建镇海卫】质实【镇海卫明置今省故城在漳州府漳浦县东北邵经邦字仲德仁和人】

除外戚世封着为令

【时安昌伯钱维圻卒庶兄维垣请嗣爵吏部尚书方献夫言外戚之封不当世及历引汉唐宋事以证帝善其言下廷臣议由是外戚永絶世封】质实【安昌伯钱承宗睿皇后弟鍾孙成化十五年封弘治二年予世袭子维圻嘉靖五年袭封】

十一月复召桂萼入阁

【张璁既召还儒士蔡圻知帝必复用萼疏颂萼功请召之帝乃赐敕令抚按趣上道未至国子生钱潮等复请趣萼帝怒曰大臣进退么麼敢与闻耶并圻下吏明年四月萼还朝尽复所夺官仍参机务】

【庚寅】九年春三月皇后亲蚕于北郊

【都给事中夏言疏请皇后亲蚕以为古者天子亲耕南郊皇后亲蚕北郊礼本并行不宜偏废帝召礼官详考古制以闻大学士张璁等因请于安定门外建先蚕坛詹事霍韬以道远争之户部亦言安定门外近西之地水源不通无浴蚕所皇城之内苑中有太液琼岛之水考唐制在苑中宋亦于宫中宜仿行之帝谓唐人因陋就安不可法礼部议龙凤辇自元武门出卫军五千人围壇所五千人护行陈仪甚盛明年以北郊出入未便改筑先农坛于西苑後罢不行】质实【此郊在安定门外之北西苑先蚕坛在仁壽宫侧明史礼志先蚕坛方二丈六尺叠二级高二丈六寸四出陛东西北俱树桑柘内设蚕宫令署采桑台高一尺四寸方十倍三出陛銮驾库五间後盖织堂墙围方八十丈皇后亲蚕仪蚕将生钦天监择吉巳日以闻顺天府具蚕母名数送北郊工部以钩箔筐架诸器物给蚕母顺天府以蚕种及钩筐一进呈内官捧出还授之出元武右门置采舆中鼓乐送至蚕室蚕母受蚕种浴饲以待命妇文四品武三品以上俱陪祀携一侍女执钩筐皇后斋三日内执事并司蚕六尚等女官及应入坛者斋一日先一日太常寺具祝版祭物羊豕笱豆各六及黑帛送蚕宫令是日分授执事女官日未明宿卫陈兵备女乐司设监备仪仗及重翟车俱侯元武门外将明内侍诣坤寧宫奏请皇后服常服导引女官导皇后出宫门乘肩輿至元武门内侍奏请降輿升重翟车兵卫仪仗及女乐前导出北安门障以行帷至坛内壇东门内侍奏请降车乘肩与兵卫仪仗停东门内皇后入具服殿易礼服出至坛司赞奏就位宾主内外命妇各就拜位祭先蚕行三献礼女官执事如仪迎神四拜赐福胙二拜送神四拜凡拜跪兴公主内外命妇皆同礼毕皇后还具服殿更常服司宾引外命妇先诣采桑坛东陛下南北向尚仪奏请皇后诣采桑位东向公主以下位皇后位东亦南北向执钩者跪进钩执筐者跪奉筐受桑皇后采桑三条还至坛南仪门坐观命妇采桑三公命妇采五条列侯九卿命妇采九条讫各授女侍司宾引内命妇一人诣蚕室尚功率执钩筐者从尚功以桑授蚕母蚕母受桑缕切之以授内命妇内命食蚕洒一箔讫还尚仪奏礼毕皇后还坐具服殿司宾率蚕母等叩头讫司赞唱班齐外命妇序立定尚仪致辞云亲蚕既成礼当庆贺四拜毕赐宴命妇并赐蚕母酒食公主及内命妇于殿内外命妇文武二品以上于台上三品以下于丹墀尚食进膳教坊司女乐奏乐宴毕公主以下各就班四拜礼毕皇后还宫导从如前四月蚕事告成行治茧礼选蚕妇中善纴丝及职者各一人卜日皇

后出宫导从如常仪至织堂内命妇一人行三盆手礼布于织妇以缝其事蚕宫令送尚衣织染监局造祭服其祀先蚕止用乐不用舞乐女生冠服俱用黑既而行礼于内苑帝谓亲耕无贺此安得贺第行叩头礼女乐第供宴勿前导】

夏四月前华盖殿大学士杨一清卒

【一清故与太监张永善至是永家奴许永曾盗库金及歿永弟容多以馈一清求作墓志诏法司推问张璫从主之坐一清受赇夺职一清大恨曰老矣乃为孺子所卖疽发背卒遗疏言身被污蔑死且不瞑帝令释赃事不问後数年复故官久之赠太保諡文襄一清博学善权变尤晓畅边事羽书旁午一夕占十疏悉中机宜晚为璫萼所轧不获以恩礼终然其才一时无两或比之姚崇云】

五月作四郊

【帝既定明伦大典益覃思制作之事郊庙百神咸欲斟酌古法厘正旧章乃问大学士张璫书称燔柴祭天又曰类於上帝孝经曰郊祀后稷以配天宗祀文王於明堂以配上帝以形体主宰之异言也朱子谓祭之於坛谓之天祭之屋下谓之帝今大祀有殿是屋下之祭帝耳未见有祭天之礼也况上帝皇地只合祭一处亦非专祭上帝南北分郊庶侔古制又曰月照临其功甚大岁一从祀义所不安当并建东西郊与南北郊而四璫以祖制既定不敢决帝锐欲定郊制卜之奉先殿太祖前不吉乃问大学士翟銮銮具述因革以对复问礼部尚书李时请少需日月博选儒臣议复古制帝复卜之太祖不吉议且寝会夏言请举亲蚕礼帝以古者天子亲耕南郊皇后亲蚕北郊适与所议郊祀相表里因今璫谕言陈郊议言乃上疏言国家合祀天地及太祖太宗之并配诸坛之从祀举行不於长至而於孟春俱不应古典宜令羣臣博考诗书礼经所载郊祀之文及汉宋诸儒之定论以及太祖国初分祀之旧制陛下称制而裁定之此中兴大业也礼科给事中王汝梅等诋言说非是帝切责之乃教礼部令羣臣各陈所见且言汝梅等举召诰中郊用二牛谓明言合祭天地夫用二牛者一帝一配位非天地各一牛也又或谓天地合祀乃人子事父母之道拟之夫妇同牢此等言论?慢已甚又或谓郊为祀天社稷为祭地古无北郊夫社乃祭五土之只犹言五方帝耳非皇帝只也社之名不同自天子以下皆得随所在而祭之故礼有亲地之说非谓祭社即方泽祭地也璫因录上郊祀考议一册时詹事霍韬深非郊议且言分祀之说惟见周礼莽贼伪书不足引据於是言复上疏曰周礼一书於祭祀为详大宗伯以祀天神则有禋祀实柴燔燎之礼以祀地只则有血祭黼沈鬯辜之礼大司乐冬至日地上圜丘之制则曰礼天神夏至日泽中方丘之制则曰礼地只天地分祀从来久矣今议者既以大社为祭地则南郊自不当祭皇地只何又以分祭为不可也合祭之说实自莽始汉之前皆主分祭而汉之後亦间有之宋元丰一议元佑再议绍圣三议皆主合祭而卒不可移者以郊资之费每倾府藏故省约安简便耳亦未尝以分祭为非礼也今之议者往往以太祖之制为嫌为惧然知合祭乃太祖之定制为不可改而不知分祭固太祖之初制为可复知大祝文乃太祖之明训为不可背而不知存心录固太祖之着典为可遵且皆太祖之制也从其礼之是者而已敬天法祖无二道也周礼一书朱子以为周公辅导成王垂法後世用意最深切何可诬以莽之伪为邪且合祭以后配帝实自莽始莽既伪为

是书何不削去圜丘方丘之制天神地只之祭而自为一说耶於是礼部集上羣臣所议郊礼奏曰主分祭者都御史汪鋐等八十二人主分祭而以慎重成宪及时未可为言者大学士张璁等八十四人主分祭而以山川坛为方丘者尚书李瓚等二十六人主合祭而不以分祭为非者尚书方献夫等二百六人无可否者英国公张仑等一百九十八人臣等只奉敕谕折衷衆论分祀之义合於古礼但坛壝一建工役浩繁礼屋祭曰帝夫既称昊天上帝则当屋祭宜仍於大祀殿专祀上帝改山川坛为地坛以专祀皇地只既无创建之劳行礼亦便帝复谕当遵皇祖旧制露祭於坛分南北郊以二至日行事言乃奏曰南郊合祀循袭已久朱子所谓千五六百年无人整理而陛下独破千古之谬一旦举行诚可谓建诸天地而不悖者也已而命户礼工三部偕言等诣南郊相择礼臣欲於具服殿少南为圜丘言复奏曰圜丘祀天宜即高敞以展对越之敬大祀殿享帝宜即清閤以尽昭事之诚二祭时义不同则坛殿相去亦宜有所区别乞於具服殿稍南为大祀殿而圜丘更移於前体势峻极可与大祀殿等制曰可於是分建圜丘方丘於南北郊以二至日祭建朝日夕月坛於东西郊以春秋分祭而天地分祀之制遂定时言以郊祀既正配位亦当更议乃上疏言太祖太宗并配父子同列稽之经旨未能无疑臣谓周人郊祀后稷以配天我太祖足当之宗祀文王於明堂以配上帝我太宗足当之礼臣集议谓洪熙以来二祖配享百有余年不宜一旦轻改帝降敕谕欲於二至日奉太祖配南北郊孟春祈谷奉太宗配上帝於大祀殿阁臣以二祖分配於义未协寝其议言再疏乞依前敕旨章下礼部皆曰大祀殿乃太祖所创若不得侑享其中恐太宗未安请祀南北郊以太祖独配大祀殿仍并配如故遂依拟行帝又议建雩坛於孟夏行大雩礼议太社太稷以向龙后稷配议祀帝社帝稷於西苑议祀高禩之神於皇城东虽皆命下礼官多以独断决之】质实【大雩明初凡水旱灾伤及非常变异或躬祷或露告於宫中或遣官祭告郊庙陵寝及社稷山川无常仪至是从夏言请建崇雩坛於圜丘坛外泰元门之东为制一成岁旱则祷奉太祖配帝社帝稷始名西苑土谷坛帝谓土谷坛亦社稷耳何以别於太社稷采帝藉之义改为帝社帝稷以上戊明日祭後改次戊次戊在望後则仍用上已春告秋报为定制隆庆元年罢之高禩青州儒生李时扬请祠高禩以祷圣嗣礼官覆以闻帝曰高禩虽古礼今实难行遂寝其议已而定祀高禩礼设木台於皇城东永安门北震方台上奉皇天上帝南向騂犊苍璧献皇帝配西向牛羊豕各一高禩在坛下西向牲数如之礼三献皇帝位坛下北向后妃位南数十丈外北向用帷坛下陈弓矢弓韣如后妃嫔之数祭毕女官导后妃嫔至高禩前跪取弓矢授后妃嫔后妃嫔受而纳於弓韣王汝梅字济元华阳人张仑英国公懋之孙】

秋七月下兵部主事赵时春于狱

【时畿内河南湖广山东山西悉史岁大饑帝方诏羣臣修省而希旨者诡言祥瑞廷臣称贺时春乃上疏曰陛下以灾变求言已旬月大小臣工率浮词面谩盖自灵宝知县言河清受赏都御史汪鋐继进甘露今副都御史徐瓚训导范仲斌进瑞麦指挥张楫进嘉禾鋐及御史杨束又进盐华礼部尚书李时再请表贺仲斌等不足道鋐瓚司风纪时典三礼乃罔上欺君坏风伤政帝贵其妄言且令献谀言善策时春惶恐引咎未对帝趣之於是时春上言当今之务最大者有四最急者有三最大者曰崇治本君之喜怒赏罚所自出勿以逆心事为可怒则赏罚大公而天下治曰信号令无信一人之言必参诸公论毋徇一时之近必稽之永远苟利十而害一则利不必兴功百而费半则功不必举如是而天下享安静之福矣曰广延访宜仿

古人轮对及我朝宣召之制使大臣台谏侍从各得敷纳殿陛间羣吏则以其职事召问之曰励廉耻大臣宜待以礼取大节畧小过台谏言是者用之非者寛容之庶臣工自爱不敢不励其最急者曰惜人才凡得罪诸臣其才不当弃其过或可原宜霈然发命召还故秩且因南郊礼成除谪戍之罪与之更始曰固边圉败军之律宜严临阵而退者裨将得以戮士卒大将得以戮裨将总制官得以戮大将则人心震悚而所向用命曰正治教请复古冠婚丧祭之礼絶醮祭祷祀之术凡佛老之徒有假引符籙依托经懺幻化黄白飞昇遐景以冒宠禄者即赐遣斥则正道修明而民志定帝览之益怒下诏狱掠治黜为民】质实【赵时春字景仁平凉人徐瓚永康人杨东当涂人】

冬十一月更定孔庙祀典尊孔子曰至圣先师

【张璪言先师祀典有当更正者叔梁纥乃孔子之父颜路曾皙孔鲤乃颜曾子思之父三人配享庙庭纥及诸父从祀两庑原圣贤之心岂安请於大成殿後别立室祀叔梁纥而以颜路曾皙孔鲤配之帝以为然因言圣人尊天与尊亲同今笾豆十二牲用犊全用祀天仪亦非正礼其谥号章服悉宜改正命礼部会翰林诸臣议编修徐阶以为不可改帝怒謫阶官乃御制正孔子祀典说宣付史馆张璪因作正孔子□祀典或问奏之帝以为议论详正并令礼部集议御史黎贯等言太祖初正祀典天下岳渎诸神皆去其号惟先师孔子如故良有深意陛下疑孔子之祀上拟祀天之礼夫子之不可及也犹天之不可阶而升虽拟诸天亦不为过自唐尊孔子为文宣王已用天子礼乐宋儒皆无异词其辨孔子不当称王者止元吴澄一人而已?望博考羣言务求至当时贯疏中言其尊於天地亦莫尊於父师陛下敬天尊亲不应独疑孔子王号为僭帝因大怒疑贯借此以斥其追尊皇考之非诋为奸恶不法司会讯褫其职给事中王汝梅等亦极言不宜去王号帝皆斥为谬论於是礼部会诸臣议人以圣人为至圣人以孔子为至宋真宗称孔子为至圣其意已备今宜於孔子神位题至圣先师孔子去其王号及大成文宣之称改大成殿为先师庙大成门为庙门其四配称复圣颜子宗圣曾子述圣子思子亚圣孟子十哲以下凡及门弟子皆称先贤某子左邱明以下皆称先儒某子不复称公侯伯遵太祖首定南京国子监规制制木为神主其塑像即令屏撤春秋祭祀遵国初旧制十笾十豆天下各学八笾八豆乐舞止六佾至从祀之贤不可不考其得失申党即申枨厘未其一公伯寮秦冉顔何荀况戴圣刘向贾逵马融何休王肃王弼杜预吴澄罢祀林放蘧瑗卢植郑衆郑元服?范甯各祀於其乡后苍王通欧阳修胡瑗宜增入命悉如议行行人薛侃议进陆九渊从祀帝亦从之於时尔庠从祀凡九十一人而敕天下学官别建啓圣公祠春秋祭祀与文庙同日遂为定制】质实【孔子塑像始唐开元八年明史礼志洪武时宋濂请去像设主礼仪乐章多所更定太祖不允张璪之启用木主盖本濂说其去留从祀诸贤多用弘治元年程敏政张九功议按敏政疏云马融初应邓隲之召为秘书历官南郡太守以贪浊免官髡徙朔方自刺不殊又不拘儒者之节前授生徒後列女乐为梁冀草奏杀忠臣李固作西第颂以美冀为正直所羞即是观之则衆丑备於一身五经为之埽地後世乃以其空言目为经师使侑坐於孔子之庭不知其何说也刘向初以献赋进喜诵神仙方术尝上言黄金可成铸作不验下吏当死其兄阳城侯救之护免所着洪范五行传最为舛驳使箕子经世之微言流为陰阳术家之小技贾逵以献颂为郎不修小节附会图?以至贵显尽左道乱政之人也王弼与何宴倡为清谈所注易传祖庄而范甯追究晋室之乱以为王何之罪深於桀纣何休则止有春

秋解诂一书黜周王鲁又注风角等书班之孝经论语盖异端邪说之流也戴圣为九江太守治行多不法惧何武劾之而自免後为博士毁武於朝及子宾客为盗系狱而武平心决之得不死则又造谢不慙先儒谓圣礼家之宗而身为贼吏子为盗徒可为世鉴王肃在魏以女适司马昭当是时昭篡魏之势已成肃为世臣封兰陵侯官至中领军乃坐观成败及母邱俭文钦起兵讨贼肃又为司马师画策以济其恶若好人佞己乃其过之小者杜预所着亦止有左氏经传集解其大节益无可称如守襄阳则数馈遗洛中要人曰惧其为害耳非以求益也伐吴之际因斫廩之讥尽杀江陵之人以吏则不廉以将则不义凡此诸人其於名教得罪非小他如郑衆卢植郑元服?范甯五人其所行亦未能以窥圣门所着亦未能以发圣学若五人者得预从祀则汉唐以来当预者尚多乞将戴圣刘向贾逵马融何休王肃王弼杜预八人褫爵罢祀郑衆卢植郑元服?范甯五人各祀於其乡后苍在汉初说礼数万言号后氏曲台记戴圣等皆受其业盖今礼记之书非后氏则不复传於後矣乞加封爵与左邱明等一体从祀至孔子弟子见於家语自顔回而下七十六人家语之书出於孔氏当得其实而司马迁史记所载多公伯寮秦冉顔何多人文翁成都庙壁所尽又多蘧瑗林放申枨三人考宋邢昺论语注疏申枨孔子弟子在家语作申续史记作申党其实一人也今庙廷从祀申枨封文登侯在东庑申党封淄川侯在西庑重复无稽一至於此且公伯寮愬子路以沮孔子乃圣门之蠱騰而孔子称瑗为夫子决非及门之士林放虽尝问礼然家语史记邢昺注疏朱子集注俱不载诸弟子之列秦冉顔何疑亦为字画相近之误如申枨申党者但不可考耳窃以为申枨申党位号宜存其一公伯寮秦冉顔何蘧瑗林放五人既不载於家语七十子之数宜罢其祀若瑗放二人不可无祀则乞祀瑗於卫祀放於鲁或附祭於本处乡贤祠仍其旧爵以见优崇贤者之意又唐儒王通宋儒胡瑗两人之师道百世如新并祀学官最得礼意张九功则谓荀况马融王弼杨雄皆所当黜礼官周洪谟等言杨雄已黜於洪武时余皆有羽翼经传之功宜仍旧从祀而止至是璉竟采其说以更定祀典其进欧阳修则以濮议故也叔梁纥本祀殿西璉谓两庑以尊帝听其建庙虽当亦缘附会献皇庙而行之也两庑从祀九十一人先贤则澹台灭明必不齐原宪公冶长南宮适高柴漆雕开樊须司马耕公西赤有若琴张申枨陈亢巫马施梁鱣公皙哀商瞿冉孺顔辛伯?曹恤冉季公孙龙漆雕哆秦商漆雕徒父顔高商泽壤驪赤任不齐石作蜀公良孺公夏酋公肩定后处鄒单奚容藏罕父黑顔祖荣旗秦祖左人郢句井疆郇国公祖句兹原元县成廉洁燕仍叔仲吟顔之仆邽巽乐咳公西与如狄黑孔忠公西藏步叔乘施之常秦非顔吟六十二人先儒则左邱明公羊高谷梁赤伏胜高堂生孔安国毛萇董仲舒后苍壮子春王通韩愈胡瑗周敦颐程颢欧阳修邵雍张载司马光程颐扬时胡安国朱熹张拭陆九渊吕祖谦蔡沈真德秀许衡二十九人啓圣公祠中奉圣父叔梁纥题啓圣公孔氏神位以顔无繇曾点孔鲤孟孙氏配俱称先贤某氏从祀以程晌朱松蔡元定俱称先儒某氏黎贯字一卿从化人薛侃字尚谦揭阳人】

发明【自唐以後加孔子号为文宣王盖亦不免史迁作世家之见张璉谥更正祀典改称至圣先师其议颇当乃黎贯辈狃於闻见犹引祖制相争岂知孔子以布衣为万世师欲尊孔子固不系王号之追崇璉以议礼见宠恣睢政府伐异党同为世所诟病其人固不足取若更定孔庙祀典之议史册具在又岂可以人废言哉】

始祀昊天上帝于南郊

【礼成大赦天下】

【辛卯】十年春正月祈谷于大祀殿

【明初未行祈谷之典帝欲更定二祖分配礼因诸臣固请乃许於大祀殿祈谷奉二祖配至是始以上辛日举行礼毕帝心终以为未当谕张璁曰自古惟以祖配天今二祖并配决不可法後世嗣後大报与祈谷但奉太祖配寻亲制祝文更定仪注改用惊蛰节礼视大祀少杀帛减十之一不设从坛不燔柴着为定典】

更定庙祀迁德祖于祧庙

【初太祖定庙祀孟春特享羣庙各南向三时祭於德祖庙序用昭穆後罢时享四孟岁暮俱以昭穆序北京既建庙制一如南京及宪宗升祔则德懿熙仁四祖太祖太宗及仁宣英三宗九室已备用礼官议祧懿祖孝武继祔祧熙仁二祖独德祖以始祖不祧每时享太祖位犹东向帝欲更定之乃先於九年春复行特享礼令祠官於殿内设帷幄如九庙位皆南向各奠献如仪至是遂迁德祖主於祧庙奉太祖主於殿正中七宗以序进迁於是太祖始正南向位而德祖不复与时享矣】

桂萼罢

【萼初銳意功名不恤物议性猜狠好排异已凌虐同官议礼议狱构害不下数十百人及再召还气慑不敢复放恣居位数月屡引疾帝辄优旨慰留至是得请归未数月卒】

三月罢四川镇守太监

【帝习见正德时宦寺之祸即位後御近侍甚严有罪拏之至死或陈尸示戒张鲍佐麦福黄锦辈虽由兴邸旧人掌司礼监督东廠然皆谨饬不敢肆九年秋巡按御史毛凤韶言云南镇守太监滋扰边徼请勿设便报可及是四川抚按官劾镇守太监滋通贪肆复撤还已又从都给事中张润身言罢镇守之在浙闽湖广两广及独石万全永宁者於时内臣之势少杀云】质实【毛凤韶麻城人张润身成安人】

夏四月禘于太庙

【帝既正太祖位向欲复古禘祭侍读学士夏言献禘议以为三代而下欲如虞夏之禘黄帝商周之禘帝谱牒难考宜为虚位以祀庶曠典复行中允廖道南上言皇姓为颛顼之裔宜禘颛顼帝命廷臣集议成谓称虚位者茫无据据尊颛顼者世远难稽庙制既定高皇帝为始祖当禘德祖帝卒从言议乃於太庙设虚位以禘皇初祖南向奉太祖配西向行礼如南郊仪定以丙辛岁一行】质实【廖道南字鸣吾蒲圻人】

五月始祀皇地只于方泽

六月雷震午门

闰六月前少傅武英殿大学士谢迁卒

【年八十有三赠太傅谥文正】

秋七月遣侍郎叶相振陕西饥

【发帑金三十万命相往振之既而相有疾帝召大学士翟銓尚书李时书于西苑问谁可代相者时曰刘天和可銓曰徐瓚可帝曰唐龙何如皆频首曰善乃改龙兵部尚書兼副都御史总制三边俾理振事】质实【刘天和字养和麻城人唐龙字虞佐兰溪人】

张孚敬罢

【孚敬即璫以犯帝嫌名请改帝手书赐之夏言恃帝眷数以事忤孚敬街之日夜谋构陷会行人薛侃建议请留亲藩贤者以遵祖制畧言祖宗分封子弟必留一人京师司香宥事居守或代行祭飨列圣相承莫之或改至正德初逆瑾怀貳始令就封乞稽旧典择其贤者居京师慎选正人辅导以待他日皇嗣之生此宗社大计属稿定以示太常卿彭泽泽与侃及夏言皆同年生而泽素附孚敬知孚敬方欲倾言未得闲因默计帝方析嗣侃所言触帝讳必兴大狱诬言同谋可祸也给侃藁示孚敬因报侃曰张公甚称善此国家大事当从中赞之与为期趣之上孚敬乃先录侃藁以进谓出於言请勿先发以待疏至帝许之侃犹豫泽频趣之乃上帝果震怒下狱廷鞫文通主使者拷掠备至侃独自承累日狱不具泽挑使引言侃瞋目曰疏我自具趣我上者尔也尔谓张少傅许助之言何豫给事中孙应奎曹汴楫孚敬避孚敬怒应奎等疏闻诏竝下言应奎汴诏狱命郭勋翟銓及司礼中官会廷臣再鞫具得其实帝乃释言等出孚敬密疏二示廷臣斥其忤罔命致仕侃为民泽戍大同泽在朝专为邪媚及败天下快之】质实【曹汴巴县人】

发明【张孚敬深忤夏言欲中伤之而未得问彭泽甘心鹰犬揣知薛侃所陈必逢帝怒遂录其疏稿以示孚敬而外为给侃之辞内构诬言之狱其为计亦巧矣夫孚敬诡谋倾陷固属老奸而泽之杀人媚人居心尤不可问及至廷鞫事露虽以郭勋素党孚敬命之覆讯亦不能为之曲庇迨孚敬罢而泽戍大同则害人者适以自害小人险譎之技究何所施哉】

八月升安陆州为承天府

【先是尊崇礼定帝名献皇帝陵曰显陵锦衣百户随全等请迁显陵北葬天壽山工部尚书赵璜力斥其谬席书亦再集廷臣议已之至是光祿寺厨役王福等复以为言而巡检徐震奏於安陆建京师李时极言不可事乃寢遂改州为承天府设鍾祥县为府治】质实【显陵

在易州西鍾祥刘宋置茌壽县隋曰长壽明洪武初省入安陸州是年复制鍾祥县今为安陆府治赵璜字廷实安福人】

九月以礼部尚书李时兼文渊阁大学士预机务【自孚敬萼与费宏杨一清相倾轧讟器不已孚敬罢翟銓独秉政者两月时入两人皆逊顺无齟齬政府稍寧】

帝幸西苑

【先是西苑宫殿成宴羣臣以落之及是帝御无逸殿召李时坐讲无逸篇翟銓讲豳风七月诗武定侯郭勋及九卿翰林俱入侍讲毕帝退御豳风亭赐宴】质实【无逸殿豳风亭李默游西内记仁壽宫门外西南数十步筑神只坛直东为帝社坊凡驾临享特驻此坊东北为无逸殿殿南为豳风亭】

以夏言为礼部尚书

【时士大夫多恶张孚敬恃言抗之言既以开敏结主知又折节下士大得声誉朝廷制作一决於言至阁臣李时翟銓取充位而已】

冬十一月召张孚敬复入阁

【孚敬还朝夏言益用事孚敬亦不能专恣如曩时矣】

十二月戌监察御史喻希礼石金于边卫

【时方修醮祈嗣希礼言陛下祈嗣礼成瑞雪遂降臣以为招和致祥不尽於此往者大赦令岁免刑臣民尽沾惠泽独议礼议狱得罪诸臣远戍边徼乞量移近地或特赐赦免和气薰蒸前星自耀帝大怒曰谓朕罪诸臣致迟嗣续耶所司参议以闻议未上金亦言陛下一日万几经理劳瘁何若中涵太虚物来顺应凡人才之用舍政事之数施始以九卿之详度继以内阁之咨谋其弗協於中者付诸台諫之公论陛下恭点疑神挈其网领使精神内蘊根本统固则百斯男之庆自不期而至王守仁首平逆藩继靖巨寇乃因疑谤泯其前劳大礼大狱诸臣久膺流窜团郁既久物故已多望录守仁功寬诸臣罪则太和之气塞宇宙间矣帝不悦曰金欲朕勿御万几即古奸臣导其君不亲政之意其并察奏夏言等言二人无他肠帝益怒下二人诏狱而责言等陈状伏罪乃宥之二人并謫戍边卫】质实【喻希礼麻城人】

【壬辰】十一年春正月祈谷于圜丘命武定侯郭勋摄事【帝疾不能躬事乃命勋代给事中叶洪言祈谷大报祀名不同郊天一也祖宗无不亲郊成化弘治间或有故寧展至三月盖为郊祀礼重不宜摄以人臣请俟圣躬痊改卜吉日行礼疏入不听既而改行於大内之元极实殿不设配位遂为定制】质实【元极实殿沈德符野获编嘉靖十年於西苑隙地立帝社帝稷之坛盖天子私社稷也此古史册所未有自西苑肇兴桑建元极殿为拜天之所而君

臣上下朝真醺斗几三十年与帝社稷相终始叶洪余姚人】

夏四月复常遇春李文忠邓愈汤和世爵

【遇春後封怀远侯文忠後封临淮侯愈後封定远侯和後封灵璧侯於是开平岐阳寧河
东甌四王复延世绪寻又封刘基九世孙瑜为诚意伯】质实【按明史功臣表常遇春後为
八世孙元振李文忠後为七世孙性邓愈後为六世孙继坤汤和後为六世孙绍宗】

五月以前吏部尚书方献夫兼武英殿大学士预机务【先是献夫为吏部尚书羽林指挥
刘永昌屡劾大臣献夫请按冶之母令奸人以蜚语中善类帝不从献夫遂求退帝亦不允顷
之给事中薛甲言小人攻讦之风一开则下凌上替不知所止愿存廉远堂高之义章下吏部
献夫等议如甲言敕都察院严禁吏民不得譟张乱政并饬两京给事中御史及天下抚按官
论事先大体毋责小疵时帝方欲广耳目周知百僚情伪得献夫疏不怪报罢於是给事中饶
秀劾甲阿附大臣臧羣臣口帝心善其言下吏部再议甲具疏自明帝恶其不俟部奏命削二
官出之外部谓甲已处分不复更议帝责令置对停献夫俸一月郎官倍之献夫不自得两疏
引疾帝即报允然犹虚位以俟既而有诏召还献夫潜入西樵以疾固辞使命再至乃就道以
故官入阁】质实【西樵山在广州府南海县西南薛甲江陰人饶秀固始人】

秋八月彗星见东井

【芒长丈余扫太微垣及角宿天门凡一百十有五日乃灭编修杨名应诏上言帝喜怒失
中用舍不当语切直帝街之而答旨称其纳忠今无隐名乃复言吏部诸曹之首尚书百官之
表而汪鋐小人之尤也武定侯郭勋奸回险谲太常卿陈遁瀛金贇仁粗鄙酣淫数人者羣情
皆曰不当用而陛下用之是偏於喜也诸臣建言触忤者心实可原大学士李时以爱惜人才
为请即荷嘉纳而吏部不为题覆以虚文塞贵夫此得罪诸臣羣情以为当宥而陛下不终宥
是偏于怒也真人邵元节猥以末术过蒙采聽尝令设醮内府且命左右大臣奔走供事遂至
不肖之徒有昏夜乞哀出其门者书之史册後世其将谓何凡此皆圣心之少有所偏者故臣
敢抒其狂愚疏入帝震怒即执下诏狱拷讯鋐疏辨谓名乃杨廷和乡人妄恩报复故攻及臣
臣为上简用欲一振举朝廷之法而议者辄病臣操切且内阁大臣率务和同植党固位沽名
敢欺肆至此帝深入其言益怒命所司穷诘主使名数濒於死无所承言曾以疏草示同年生
程文德乃并文德下狱侍郎黄宗明等疏救之先後皆下狱法司再拟名罪皆不当上指特诏
謫戍边卫时南京御史冯恩亦上疏以张孚敬为根本之彗汪鋐为心腹之彗方献夫为门庭
之彗三彗不除庶政终不可理帝得疏大怒逮下狱论死比朝甯鋐当主笔东向坐恩独向阙
跪鋐令卒拽之向己恩起立不屈因与鋐互相诟詈夏言等解之乃止及出土民观者如堵皆
叹曰是御史非但口如铁其膝其胆其骨皆铁也因称四铁御史恩子行可年十三号呼乞救
无敢言者久之乃刺臂血书疏自缚阙下诸代父死词极哀帝览之惻然令法司再议恩遂遣
戍雷州】质实【晋书天文志东方角二星为天关其间天门也其内天庭故黄道经其中七
曜之所行也杨名字实卿遂宁人陈道瀛涑水人金贇仁大兴人邵元节贵溪人龙虎山上清
宫道士程文德永康人冯恩字子仁松亭人子行可以孝行旌寻举乡荐】

张孚敬罢

【帝以星变心疑大臣擅政孚敬因求罢犹慰留之给事中赵良弼劾孚敬专横窃威福致奸星示异亟宜罢黜孚敬疏辨言良弼以滥举京营官夺俸由臣拟旨挟私报复於是给事中秦鏊劾孚敬强辨饰奸言官论列辄文致其罪拟旨不密引以自归明示中外若天子权在其掌握帝是鏊言令孚敬自陈状许之致任李时请给廩隶敕书不许再请乃得驰传归】质实【魏良弼字师说新建人秦鏊字子元崑山人】

九月振陕西饥

【时山西亦饥寻飭所司振之是年两畿湖广山东诸郡县先後以灾告者并令蠲其税粮】

冬十一月巡抚四川都御史宋沧献白兔羣臣表贺【帝好交饰太平而慧星连月不?虽循故事敕羣臣言时政然实不乐闻说言杨名冯恩既以疏语切直下狱南京副都御史万鏊复应诏陈事劝帝黜虚文崇实政帝大怒黜为民沧乃希旨献白兔诡称祥瑞帝喜羣臣表贺明年河南巡抚吴山又以白鹿献自後诸瑞异踵至百僚表贺以为常】质实【宋沧钜野人万鏊字仕鸣进贤人吴山吴县人】

【癸巳】十二年春正月张孚敬复入阁

【帝复思孚敬遣鸿胪召还已而彗复见毕昴间孚敬乞避位不许】质实【晋书天文志毕八星主边兵主弋猎七星天之耳也主西方主狱事昴毕间为天街】

二月振云南饥

【是年辽东灾亦命振之浙江河南诸府县以灾告者并免其税粮】

三月帝诣国子监行释奠礼

【既释奠进诸生横经布讲祭酒林文俊进讲虞书益稷篇司业马汝骥讲易颐卦皆赐之坐讲毕帝谕诸生曰治平之道备在六经诸生宜讲求力行以资治化於是侍讲廖道南献临雍崇教颂优诏褒答之】质实【林文俊字法英莆田人马汝骥字仲房绥德州人】

秋八月辛未朔日有食之

赦

【以皇子生大赦天下惟大礼大狱得罪者及建言诸臣冯恩等皆不原】质实【明史诸

王传哀冲太子载基世宗第一子阎贵妃生生二月而殇】

冬十月大同兵乱杀总兵官李瑾

【小王子屯大同塞外瑾督後浚濠急役卒王福胜王保等数十人鼓噪焚报瑾因焚巡抚潘仿署仿奏瑾激变帝命刘源清同总兵郤永讨之源清榜令解散而榜言五堡变处之过宽五堡遗孽大惧师次阳和仿与佥事孙允中督饷郎中詹荣等密捕乱卒枚死十余人系贼酋王保等七十余人今允中诣源清所献之请旋师源清惩昔胡瓚事不欲已以囚属御史苏祐囚妄言前总兵朱振失职首乱且多引无辜源清遣参将赵纲入城大索贼党遂讹言城且屠复夜噪杀千户张钦会元中自源清所至论源清意抚慰之始定振前为乱卒所拥实不反诣源清自明不能白发愤自杀永兵围城欲尽得乱卒遗孽遂迎战杀游击曹安等数十人官军益攻城昼夜围击乱卒出前参将黄镇等於狱奉为帅死守仿与镇国将军俊 等登城止毋攻俊 出见永请缓兵皆不聽允中縋城出言将士妄杀状源清叱曰汝为贼游说耶欲囚之允中不敢归源清因多设逻卒遏王府及有司章疏而请益师五万帝命侍郎钱如京都督江桓统京军八千以往已忽悟罢弗遣专责源清永讨贼仿驰疏言将士妄杀激变速旋师乱可已源清亦诋仿媚贼张孚敬及廷议皆右源清侍郎顾鼎臣黄绾言用兵繆帝不能决城围久大困毁王府及诸廨舍供?兵部复下安抚令源清亦树帜招降叛卒稍稍自投酋恶黄镇等亦分日出见乞通樵采路永许诺翌日采薪者出永悉执之城中益惧乱卒复叛勾鞑靼为助永遇之大败而遁判卒遂引鞑靼十余骑入城指代府曰以此为诺延居诺延者华言大人也城中人闻之皆巷哭寻鞑靼攻东南二关叛卒与犄角官军殊死战互有杀伤鞑靼知叛卒不足赖倒戈击之大诟而归是时鞑靼游骑南掠至朔应源清请募九边兵增总制官御之已得一意攻城帝不许源清乃百道攻穴城为毒烟熏死者相藉复壅水灌之帝大不怿夺其职闲住以兵部侍郎张瓚代之瓚未至詹荣在城中密约都指挥纪振游击戴濂镇抚王寧同盟讨贼察叛卒马昇杨麟无逆志许宥其死俾自効昇麟遂结心腹擒首恶黄镇等九人戮之时巡抚樊继祖来代仿遂开城延继祖入复捕斩二十六人乱乃定及瓚至麾兵退二舍鼓吹入城大集文武将吏置酒高会赏有功而还已又命黄绾至大同勘功罪有为乱卒通问鞑靼者绾执戮之乱卒复相煽绾大集军民晓以祸福罹害者陈牒绾佯不问而密以牒授给振官按里核实一日捕首恶数十人乱卒尚钦杀一家三人惧不免鸣金倡乱无应者遂就擒绾後图形购首恶数人军民乃不复虞诬误还朝上疏极诋源清永给事中曾忬言宸濠乱源清有保障功当蒙八议之贷帝怒下忬等诏狱逮源清治之狱久不决绾忧去乃灭死斥为民】质实【潘仿洛阳人孙允中合肥人詹荣字仁甫山海卫籍龙溪人苏佑濮州人钱如京桐城人樊继祖郢城人张瓚字廷献沧州人居京师曾忬泰和人代王明史诸王□代简王七世孙为昭王充燿嘉靖九年袭封镇国将军俊?昭王从父行也 诺延旧作那颜今改】

下建昌侯张延龄于狱削昌国公张鹤龄

【初正德时日者曹祖告其子鼎为延龄奴兴延龄谋不轨武宗下之狱将集羣臣廷鞫之祖仰药死时顾以祖暴死疑延龄而狱无左证遂解指挥司聪者为延龄行钱负其五百金索之急遂与天文生董?子至谋讐祖前所首事胁延龄贿延龄执聪幽杀之令聪子昇焚其屍而

折所负券昇嚙不敢言常愤詈至至应事发乃抚聪前奏上之帝以昭圣皇太后遇其母蒋太后无加礼方冲张氏得至奏欲坐以谋逆族其家昭圣太后窘迫无所出欲为请帝谢不见使人请不许张孚敬言延龄守财虏耳何能反若坐谋逆恐伤皇太后心帝手敕曰天下者高皇帝之天下孝宗皇帝守高皇帝法卿虑伤伯母心岂不虑伤高孝二庙心邪孚敬复奏曰陛下嗣位时用臣言称伯母皇太后朝臣归过陛下至今未已兹者大小臣工默无一言诚幸太后不得令终以重陛下过耳夫叛逆之罪狱成当坐族诛昭圣独非张氏乎陛下何以处此法司逮延龄及诸奴杂治延龄尝买没官第宅造园池僭侈踰制又以私憾杀婢事并发觉坐達制杀人论死及明年秋尽虑囚帝又欲杀延龄孚敬复上言皇太后春秋高猝闻廷龄死万一不食有他故何以慰敬皇帝在天之灵帝恚以危语怵乎敬曰自古疆臣令主非一若今爱死囚今主矣当悔不从杨廷和事敬皇帝邪孚敬仍力争以故终昭圣太后世得长系鹤龄以延龄故削爵謫南京指挥】

【甲午】十三年春正月废皇后张氏立妃方氏为皇后【先是帝仿古礼为九嫔之选方后册名德嫔与郑氏王氏阎氏韦氏沈氏卢氏沈氏杜氏同受册帝以其行礼敬且升降有仪度悦之至是张后废遂立为后而封沈氏为宸妃阎氏为丽妃副之旧制立后只谒奉先殿帝谓天子立三宫以承宗庙礼经有庙见之文何以不谒庙下翰林礼部议金谓谒庙是及期命武定侯郭勋为正使大学士张孚敬为副使持节册立帝率后谒太庙及世庙越三日颁诏天下明日受命妇朝】质实【皇后方氏江寧人安平侯方锐女】

夏四月削给事中张选籍

【时帝久不亲祀事时享皆遣郭勋摄选上言宗庙之祭惟诚与敬孔子曰吾不与祭如不祭传曰神不歆非类孟春庙享遣官暂摄中外臣心知非得已兹孟夏祫享倘更不亲行则迹涉怠玩如或圣体初夏未任趋跲宜明诏礼官先期告庙陛下亦宜静处斋宫以通神祝帝大怒下之礼部尚书夏言等言代祭之文载之周官语曰子之所慎斋战疾疾当慎无异於祭选言非是但小臣无知惟陛下曲赦帝愈怒责言等党比命执选阙下杖八十帝出御文华殿聽之每一人行杖毕輒以数报杖折者三曳出已死帝怒犹未释是夕不入大内遶殿走制祭祀记一篇一夕钁成明旦分赐百官选出家人投良剂得苏帝竟削选籍】质实【张选字舜举无錫人】

方献夫罢

【献夫好饰恬退名而屡为言官所劾中恶虽执大政气厌厌不振又以帝恩威不测居职二载三疏引疾帝优诏许之初献夫缘议礼进以司马光与王莽同论为人所痛诋及与璵萼共事持论颇平恕以此人不甚恶之家居十年卒】

六月南京太庙灾

【帝方欲更营太庙命夏言等相度规制会南京太庙灾礼官请重建帝召言与羣臣集议

言等言国有二庙始於汉惠寔非礼制子孙之身乃祖宗所依圣子神孙既亲奉祀事於此则祖宗神灵自当陟降於此况京师宗庙行将复古而南京太庙遽罗回禄殆皇天列祖啓佑默相不可不灵承也今日正当专定庙议一以此地为根本南京原有奉先殿其朝夕香火宜合并供奉如常太庙遗址可仿古坛墀墼意高筑墉垣谨司啓闭以致尊严之意从之时帝虽循故事因庙灾求直言然实喜言等缘饰之词以灾为幸而南京兵部主事刘世龙竟应陈三事一杜谄諛以正风俗天下风俗之不正由於人心之坏患得患失使然也今天下刻薄相尚变诈相高谄媚相师阿比相倚仕者日坏於上学者日坏於下彼倡此和靡然成风惟陛下赫然矫正勿以诡随阿比者为贤勿以正直骨鯁者为不肖勿以私好有所赏勿以私恶有所罚虚心以防邪佞谦受以来忠谏更敕大小臣工協恭图治无权势相轧朋党相倾则风俗正矣二广容纳以开言路陛下临御之初犯顔敢谏之臣比先朝为盛所言或伤於激切而放遂既久悔悟日深当宥其既往以次录用死者则恤之仍令大小臣工直言时政以作忠义之气三慎举动以存大体立国者在敬大臣不遗故旧盖任之既重则礼之宜优今或忽然去之忽然召之甚至婴三木被箠楚何以励臣节哉臣愚以为陛下历试之余其人果无足取则黜退之可矣如素行无缺偶以一时喜怒辄从而颠倒之陛下固付之无心而天下有以窥陛下也至如张延龄凭宠为非法难容假侧闻长老之言孝宗时待之过厚遂酿今日之祸顾区区腐鼠何足深惜独念孝庙在天之灵太皇后垂老之景乃至不能自庇其骨肉於情忍乎恐陛下孝养两宫亦不能不为一动心也顷者兴作频仍四方凋敝正时绌举赢之会而南京太庙被灾工役之急当无过此其他可缓者宜暂赐停罢此皆应天以实之道也疏入帝震怒谓世龙讪上庇逆械系至京下诏狱拷掠狱具复廷杖八十斥为民】质实【刘世龙字元卿慈谿人】

【乙未】十四年春正月罢督理仓场中官

【初孙交为户部尚书以监督仓场中官为数太多请尽去之并临清淮徐诸仓一切勿遣帝罢撤其半余仍如故至是监督中官王奉季慎互以奸赃讐奏下法司按问给事中管怀理因言仓场钱谷皆户部事今参用内官惟肆贪黷於国计无补请悉撤回从之】质实【管怀理临邑人】

庄肃皇后夏氏崩

【礼臣上丧仪帝曰嫂叔无服且两宫在上朕当服青臣民如母后礼夏言曰皇上以嫂叔絶服则羣臣不敢素服见皇上请暂罢朝参许之寻议諡张孚敬曰大行皇后上嫂也与累朝元后异宜用二字或四字李时曰宜用八左都御史王廷相吏部侍郎霍韬等曰均帝后也何殊言集衆议因奏曰古人尚质諡法简称其行後人增加臣子情也生今世宜行今制大行皇后宜如列圣元后諡二四及八於礼无据帝不从命再议羣臣请如孚敬言帝曰用六合阴数焉於是上諡孝静庄惠安肃毅皇后既而帝觉孚敬言非是敕曰孝静皇后諡不备不称配武帝乃改諡孝静庄惠安肃温诚顺大偕圣毅皇后】

二月作九庙

【初洪武八年改建太庙为同堂异室之制成祖迁都建庙如南京及帝更定庙祀銳意復古諭閣臣曰宗庙之制父子兄弟同处一堂於礼非宜太宗以下宜皆立专庙南向尚书夏言奏太庙两傍隙地无几宗庙重事始谋宜慎未报中允廖道南言太宗以下宜各建特庙於两庑之地有都宫以统庙不必各为门垣有夹室以藏主不必更为寝庙第使列圣各得全其尊皇上躬行礼於太祖之庙余遣亲臣代献如古诸侯助祭之礼帝悦命会议言等言太庙地势有限恐不能容若小其规模又不合古礼且使各庙既成陛下徧历羣庙非独筋力不逮日力亦有不给古者宗伯代后献之文谓在一庙中代后亚献未闻以一人而代主一庙之祭者也且古诸侯多同姓之臣今陪祀执事者可拟古诸侯之助祭者乎先臣邱濬谓宜间日祭一庙历十四日而遍此盖无所处而强为之说耳若以九庙一堂嫌於混同请以木为黄屋如庙廷之制依庙数设之又设帷幄於其中庶得以展专尊之故议上亦不报时十年冬十一月也十一年春复命礼官会廷臣规度九庙之制议上未及行逮南京太庙既灾遂趣营新庙诸臣议於太庙南左为三昭庙与文祖世室而四右为三穆庙虚其上以待有功德之宗羣庙各深十六丈有奇而世室殿寝稍崇纵横深广与羣庙等列庙总门与太庙戟门相并列庙後垣与太庙祧庙後墙相并具图进帝以世室尚当隆异令再议言等请增拓世室前殿视羣庙崇四尺有奇深广半之寝殿视羣庙崇二尺有奇深广如之报可既又諭閣臣曰今拟建文祖庙为世室则皇考世庙字当避张孚敬言世庙着明伦大典颁诏四方不可改文世室宜称太宗庙其余羣庙不用宗字用本庙号他日递迁更牌额可也从之至是孟敬故庙改建之诸庙各为都宫庙各有殿有寝太祖庙寝後有祧庙奉祧主藏焉太庙门殿皆南向羣庙门东西向内门殿寝皆南向明年十二月新庙成乃奉安德懿熙仁四祖神主于祧庙太祖神主于太庙太宗以下神主列於孕庙廷臣称贺遂诏赦天下】

三月葬孝静皇后

【祔葬於康陵】

辽东军乱囚巡抚副都御史吕经

【故事辽东诸卫所每军一佐以余丁三每马一给牧地五十亩经损余丁之二编入均徭册尽收牧地还官衆已怨之至是经巡辽阳檄将吏增筑边墙将吏承经意督役严急诸军大噪羣拥詣经乞罢工及免牧地租都指挥刘尚德叱之不退经怒呼左右榜诉者衆益鬭争起毆尚德及指挥李绒经仓皇踰垣走匿乱卒遂毁府门火均徭册鸣钟鼓纠衆驱途人授之械刃尽闭诸城门出故游击将军高大恩於狱欲拥以为主搜得经尽裂其衣冠幽之都司署时按察御史曹铎按金复闻变急檄副总兵李监抚諭乱卒凡经所指置衆不便者悉罢之乱卒稍稍就约束城门始开高大恩自投于狱铎亦驰至辽阳分部诸乱卒今就伍劾尚德等希经指墩变而为乱卒乞原下郡察院议都御史王廷相言往年大同叛卒戕害主将罪在不宥抚臣辄为请赦盖一时苟且之计今辽阳反抗军令辱大臣竟置乱卒不问而尽劾诸将吏以娱之恐士气益骄无以惩梭诏下兵部再议皆是铎言乃召经还朝以韩邦奇代之经既得报还入广寧治装都指挥袁璘者素谄事经悍卒于蛮儿因声言璘将剋诸军草价为经饬装具复相煽作乱出狱囚囚有张孝儿者先以?恶为经谪发尤恨经率衆时挺突入署执经数之毁肤

拔髮裸而置之狱纵大𦰩公署刼军器库分其党为四部鸣钟鼓竟日夜寻又反接经璘揚白帜標其姓名环游城市孝儿且行且批其颊窘辱备至仍系之狱胁督饷郎中李钦昊发帑给衆又胁镇守太监王纯总兵刘淮疏劾经璘罪乞逮治於是礼部侍郎黄宗明言前辽阳之变固生於有激近重赋苛徭悉已厘正器然而起又谁激之法不宜复赦请令新抚臣韩邦奇勒兵压境扬声讨罪取其首恶用振国威帝不聽竟从纯淮请遣官校逮经璘止邦奇毋行以山西巡抚都御史任洛抚辽东而以邦奇代洛兵部寻遣大臣往勘帝命工部侍郎林庭?兼金都御史以行是时抚顺卒王经等亦突入指挥刘雄署掠其囊篋缚雄父子置诸空馆闭城钟鼓一如蛮儿等所为而官校逮经者至广宁诸乱卒疑其诈曰是伪为锦衣以脱经也并置诸狱总镇官论以祸福乃出官校以经付之铎具以其事闻然官校被系事疏中未之反也诏下庭?并勘大理寺丞林希元见朝廷专务姑息且知铎奏不尽实乃抗疏曰自大同之变处之遇寬故诸悍卒成有轻侮心一有触发则攘臂而起夫都御史天子重臣庸隶下卒敢执缚囚辱之是无朝廷也近闻所遣官校亦被囚系狂悖视大同尤甚本兵大臣因循不振致叛卒益无忌憚朝廷威今不行此不忠之大者也疏入上责希元妄言既而锦衣卫对状亦讳言囚系遂降希元外任然辽东乱卒虽得原闻度?且至将捕首恶赵勦儿者实倡乱遂自惧潜请广宁与蛮儿合谋为逆刘淮侦知之不得遽逞复结死凶王景等欲俟庭?至闭城门举兵反而铎已刺得二城反抚顺为恶者姓名密授诸将勦儿等数十人同曰捕获铎以闻乃名还庭?命铎勘实悉斩诸首恶悬首边城全辽大定擢铎大理寺丞经谪戍】质实【金复谓金州复州并注见前抚顺千户所明洪武二十一年置隶潘阳中卫今废地在承德县东北曾铎字重江江都人李钦吴东安人任洛钧州人林庭?字和瞻闽县人】

发明【嘉靖改元以来绕十有四年边卒之乱叠告朝廷屡为由赦而效尤者屡起姑息之不可以靖乱明矣曾铎抚之就伍不过一时权宜之策乃劾尚德等而置乱卒于不问犹是前此抚臣请赦之见何兵部竟是其言而不从王廷相之议乎迨经入广寧治装诸军复器然以起黄宗明谓不宜再赦请令新抚臣勒兵压境讨罪申威庶犹知所警惕而嘉靖反曲从纯淮之奏逮治经璘是适以长奸人之智而劝以效尤也抚顺之变所自来矣若林希元抗疏上言持论甚正而以妄言降谪则是庙堂之上意在模稜了事又何怪乎曾铎之奏不以贵哉】

夏四月张孚敬罢

【孚敬有病帝遣中官赐尊牢而与李时言颇及其执拗且不惜人材以丛怨孚敬闻之念前此三黜皆为帝所薄遂屡疏乞骸骨许之明年复遣官视疾趣入朝行至金华疾大作乃归】

召费宏复入阁

【帝与李时吉今内阁乏人复取费宏来何如时称善乃遣中官賁诏召宏凡还朝眷遇特厚数有咨问宏亦竭诚无隐承璫尊操切之後易以寬和朝士皆慕乐之】

秋八月诏九卿会推巡抚官

【帝惩辽东之变欲慎简抚臣费宏请会九卿推举如京堂例从之】

发明【国家推用人材用不能不资延访然会推流弊无穷总不及朝廷简用之公当况欲加之重任则必当验其政绩观所数陈深信不疑而後可委以封疆之责奈何托名推举竟使九卿实擅其权耶厥後严嵩当国部寺大僚莫不承其颐指转相推引于是直省巡抚如孟淮张雨之徒出嵩门下者比比皆是则植党营私之渐未必非此诏有以闻之耳】

冬十月华盖殿大学士费宏卒

【帝深嗟悼赙恤有加赠太保諡文宪
宏恭慎谦抑明习国家故事持重得大体三入政府以功名终】

御定资治通监纲目三编卷二十一

卷二十二

钦定四库全书

御定资治通监纲目三编卷二十二

【起丙申明世宗嘉靖十五年尽癸卯明世宗嘉靖二十二年】凡八年

【丙申】十五年春正月以刘天和为兵部左侍郎總制三边【先是济农居套中西抵贺兰山限以黄河不得渡用牛皮为浑脱渡入山後谕達亦自丰州入套相率为边患總制唐龙用總兵官王效燾震数败敌然蹂躪迄无寧岁及是召龙入为刑部尚书以天和为兵部左侍郎總制陕西三边军务天和赴镇修战具飭边格筑增城堡时兵车皆双轮用二十人遇险即因又行迟不适於用天和仿前總兵秦紘只轮车上置礮枪弩戟前树猱扰牌左右虎盾连二车蔽三四十人一人挽之推且翼者各二人战则护骑士其中敌远则施大?稍近发弓弩又近乃出短兵敌败则骑兵追复制随兵小帐令士不露宿又毒弩矢修边墙濠堑以为御敌之備济农十万衆屯贺兰山复遣别部寇凉州副将王辅逐夺其纛寇庄浪總兵官姜夷屡败之进天和右都御史寇复大集兵将入犯天和策寇驢西有备必东密檄延绥副将白爵宵行与参将吴瑛合寇果东至黑河墩遇伏大创而去既又入蒺?川爵尾击之寇多死寻又为爵瑛所败其分犯寧夏者亦为王效所破捷闻进天和左都御史已而济农犯河西大和复御却之进天和兵部尚书】

质实【黑河即古黑水在榆林府北晋书载记赫连勃於黑水之南营都城即此蒺?川在陕西榆林府葭州北三十里王效延绥人梁震新野人】

二月振湖广灾

【发湖广省事例银两及预备仓银谷相兼振济】

三月帝奉章圣皇太后诣天壽山谒陵

【免昌平今年税粮三之二赐高年粟帛帝至沙河见居民萧备顾谓大学士李将等曰七陵在此宜加守护时对曰昔邱濬建议京师当设四辅以临清为南昌平为北蓟州保定为东西各屯兵一二万今若於昌平增一總兵可南卫京师北护陵寢帝乃下廷臣勘议於沙河筑巩华城为置戍马】质实【巩华城在昌平州东南二十里地本名沙河店今有同知及都司驻此】

夏五月毀禁中佛殿

【禁中大善佛殿元时所造藏金银诸佛像及器物至是悉命毀之金银佛像凡一百六十

九座金银函物凡万三千余斤以其地置太后宫】

冬十月地震

【京师及顺天承平保定所属州县万全都司各卫所地震有声如雷诏修省】

更定世庙为献皇帝庙

【先是帝谕礼部尚书夏言曰前以皇考庙比世□之义名曰世庙今分建宗庙惟太宗世祭不迁而世之一字来世或用加宗号今加於考庙又不得世宗之称徒拥虚名不如别议可会议以闻言等议未上帝复谕曰皇考庙名如题曰献皇帝庙庶别宗称且见推尊之意於是吉等议庙以諡名既合周典又与列圣庙号同符请勅所司择言题额宣付史馆从之】

十一月设宣大總督

【时宣大延寧皆有警以御史徐九臯胡鰲言设宣大總制官更名为總督陕西三边總制亦更名總督】质实【徐九臯余姚人胡鰲沅陵人】

十二月以道士郡元节为礼部尚书

【元节自嘉靖三年居入京师於便殿大加宠信俾专司祷祠封真人總领道教班二品赠其父太常丞并官其孙及曾豫至是以皇储叠生嘉其祷祠功拜尚书赐一品服】

发明【皇祠叠生何兴祈禳乃归功元节数晋阶品遂掌秩宗夫寅清赞治典重明种岂黄冠羽流所得厕乎其列无论若辈得志清假而干政营私乃势所必至即俨然居尚书位复一品服更成何政体宋徽宗时林灵素有敕赐通真達灵之号网目犹且书之视此为何如耶】

闰月以礼部尚书夏言兼武英殿大学士预机务【言既以开敏结帝知又折节下士以是甚得公卿间声誉常制作礼乐多言为尚书时所议帝敏作诗辄赐言悉酬和勒石以进帝益喜奏对应制倚待立辨数召见谘政事善窥帝旨有所附会张孚敬方献夫在政府知帝眷言厚亦不敢与较言由是气遂骄言兴南京礼部尚书霍韬以事相攻许韬竟不胜郎中张云孝李遂与小忤即奏谪之皇子生帝赐言甚渥初加太子太保进少保兼太子太傅至是遂入参机务言入阁李时虽为首辅政多自言出马】质实【张元孝汝阳人李遂丰城人】

【丁酉】十六年春正月诏右都御史毛伯温讨安南

【先是正德中安南社堂烧香官陈嵩诡称前王陈氏後杀国王黎明而自立调臣莫登庸初附嵩後於黎氏大臣阮宏裕等起兵讨嵩嵩败走死立暕兄子譔为王登庸偃兵柄潜蓄异志黎氏旧臣郑綏以譔徒拥虚位别立其族子酉榜登庸破綏捕杀酉榜益恃功骄恣旋逐譔

諫奔清华登庸立庶弟憲已复杀憲篡其位不通朝贡者二十余年至是以皇子生当颁诏安南礼官夏言言黎諲黎憲均非黎暲庶立之嫡莫登庸陈嵩俱彼国篡逆之臣宜暂停使命而遣官按问求罪人主名帝以安南极逆昭然命言会兵部议征讨户部侍郎唐胄上疏力陈用兵七不可下兵部议会黎諲卒子宁遣使告难迄兴问罪师夏言等请克期徂征诏起伯温于家命参军务以都督僉事江禔牛桓督军计之兵部侍郎潘珍言安南不足置郡县其叛服无与中国用兵无计广东巡按御史余光亦言莫之篡黎犹黎之篡陈不足深校但当罪其不庭责以称臣修贡不必远征以庭中国帝怒祇珍职夺光俸已而伯温至京奏上方畧而帝意忽中变命暂缓师会云南巡抚汪文盛招纳黎民旧臣得其进兵地图并获登庸间谍及所撰伪大诰上之命仍遵前诏征讨至明年春文盛复以登庸降表至请宥罪许贡下廷议僉言不可许乃趣伯温启行制甫下两广总督侍郎张经以用兵方畧上具言须兵共三十万饷百六十万石钦州知州林希元则极言登庸易取状请即日出师兵部尚书张瓚不敢决复请廷议议上无成策帝不恠让瓚师复止初帝以用兵事重本无必讨意持欲威服之故命下而罢者再至十八年登庸屡表乞降意亦不欲因抚之再下廷臣议勒抚之宜瓚及廷臣请仍命伯温南征如登庸束手归命无异心则待以不死从之】质实【毛伯温字吉属吉水人陈嵩安南前後有两陈嵩一在宣德时黎利伪奉以降一即此黎暲一名滢自黎利後九传而至暲多行不义遂及於疑唐胄字平侯琼山人时上疏曰今日之事若欲其修贡而已兵不必用官亦无容遣若欲讨之则有不可者七安南不征着在祖训一也太宗既灭黎季犁求陈氏後不得始郡县之後兵连不解仁庙每以为帐章皇帝成先志弃而不守今日当率循二也外国分争中国之福安南自五代至元更八姓迭兴迭废而岭南外警遂希今分争正不当问柰何殃赤子以威小丑割心腹以补四肢无益有害三也若谓中国近境宜乘乱取之臣考马援南征深历浪泊士卒死亡几半所立铜柱为汉极界乃近在今思明府耳先朝虽尝平之然屡服屡叛中国士马物故者以数十万计竭二十余年之财力仅得数十郡县之虚名而止况又有征之不克如宋太宗神宗元宪宗世祖朝故事耳此可为殷鉴四也外邦入贡乃彼之利一则奉正朔以威其邻一则通贸易以足其国故今虽兵乱尚系僉奉表牋其方物欸阙求入守臣以姓名不符却之是彼欲贡不得非抗不贡也以此责词不顺五也兴师则需饷今四川有采木之役贵州有凯口之师而两广积储数十万万率耗於田州岑猛之役又大工频兴所在军储悉输将作兴师数十万何以给之六也然臣所忧又不止此唐之衰也自明皇南诏之役宋之衰也自神宗伐辽之役今北敌强据我何套边卒屡叛毁我藩篱北顾方殷更启南征之议脱有不则谁任其咎七也锦衣武人开於大体傥稍枉是非之实致彼不服反足损威即令按问得情伐之不可不伐不可进退无据何以为谋且今严兵待发之诏初下而征求騷扰之害已形是忧不在外而在邦域中请停遣勘官罢一切征调疏入下兵部议请从之诏待勘官还更议珍字玉卿黎源人余光江寧人汪文盛字希周宗阳人张经字是?侯官人初冒蔡姓久之乃复】

夏五月雷震谨身殿

【雷震谨身殿鵠吻帝谕辅臣曰修省之宜如何於是礼部奏言谨身殿即古露寝天子肃容之所也上天示变於此为戒甚明请求刑政之所以失者而改之以为消弭之实诏修省如例】

秋八月遣官振湖广灾民

【掌唐事府事礼部尚书顾鼎臣言今岁夏秋多而京城内外房舍倾圯军民多压死者又闻南北直隶山东河南陕西江浙各被水灾而湖广尤甚冲没城邑人多湮溺幸而存者家产荡尽势必聚而为盗请敕行优恤湖广灾沴重大仍宜遣大臣徧杞山川循行郡县振救安戢分遣有司掩骼埋眡诏从之寻诏顺天府亦命有司振济至是年冬巡抚顺天都御史党以平等言顺天永平二府灾重已动太仓银二万两及通仓米二万石振济户部议如所请从之】质实【党以平钧州人】

冬十一月故昌国公张鹤龄下狱死

【奸人班朔于云□告张延龄兄弟挟左通咒诅逮鹤龄下诏狱太后衣蔽襦席藁为请不得鹤龄瘦死狱中】

【戊戌】十七年夏四月振京城内外饥民

六月诏议明堂大飨礼下户部侍郎唐胄于狱

【初献皇帝庙止举时祀不祀太庙至是前扬州府周知丰坊上言孝莫大于严父严父莫大于配天宜建明堂尊皇考为宗以配上天又天下郡邑宜各立明堂岁时祝拜君上以尊朝廷勿寄位释宫?体统下礼部议尚书严嵩上言诸儒论礼不一臣惟明堂圜丘皆以事天地今大祀殿在圜丘之北正应古之方位明堂秋飨之礼即此可行不必更进至于值飨之礼传以为万物成形於秋故秋祀明堂以父配之自汉武迨唐宋诸君莫不皆然主亲亲也至于钱公辅司马光孙拚程朱诸贤所论主祖宗之功德今以功德则宜配文皇以亲则宜配献皇帝揆以严父之旨以皇考而不得配陛下庸有弗宁矣至于称宗之礼则未有称宗而不附太庙者臣不敢妄奏惟圣明裁择帝以示夏言言不敢议帝曰明堂秋飨宜於奉天殿行之其配享皇考称宗不为过情何在为不宜也复命集议户部侍郎唐胄疏争之曰三代之礼莫备於周孝经曰郊祀后稷以配天宗祀文王於明堂以配上帝又曰严父莫大乎配天则周公其人也说者谓周公有圣人德制作礼乐而文王适为其父故引以证圣人之孝答曾子之问而已非谓有天下者皆必以父配天然後为孝即周公归政之後未闻成王以严父之故废文王配天之祭而移于武王也及康继成亦未闻以严父之故废文王配天之祭而移於成王也後世祀明堂皆以配天此乃误识孝经之意而违先王之礼故有问於宋儒朱熹者曰周公之後当以文王配耶当以时王之父配耶熹曰祇当以文王为配又问继周者如何熹曰祇以有功之祖配之後来第为严父说所惑耳由此观之明堂之配不专於父明矣皇上嗣统之初廷臣执为人後之说於是力正大伦惟张孚敬席书衍诸臣及何渊有建庙之议陛下嘉答之臣亦云朕奉天法祖岂敢有干太庙今日乃惑於丰坊之说乎臣谓明堂之礼诚不可废惟当奉太宗配於礼为宜若献皇帝得圣人为之子不得称宗议配而专庙之享百世不迁矣疏入上大怒下胄锦衣狱黜为民尚书嵩乃上言考秋飨成物之旨严父配天之文皇考侑飨允合周道帝嘉纳之】质实【丰坊字存礼鄞人学士熙之子性狂诞熙既卒家居贫乏思效张桂等以片言取

通显待命久之无所进擢归家悒悒以死人咸恶其畔父云】

秋七月开河南云南银矿

【命开采云南大理等府河南宜阳等县矿银】质实【宜阳汉县後魏置宜阳郡金复改宜阳县今因之】

八月以礼部尚书顾鼎臣兼文渊阁大学士预机务【时李时为首辅夏言次之鼎臣又次之而言倚帝眷专甚鼎臣素柔媚不敢与抗惟充位而已】

九月尊献皇帝庙号曰睿宗祔於太庙

【先是帝命议称宗祔庙之礼集文武大臣於东阁严嵩与羣臣议沮之帝大不悦着明堂或问难嵩嵩惶恐尽改前说条尽礼乐甚备且言古者父子异昭穆兄弟同世次故殷有四君一世而同庙宋太祖太宗同居昭位前事可据今皇考与孝宗当同一庙奏上羣臣无敢异议至是帝谕礼臣曰文皇帝与高帝同创大业宜同称祖号献皇帝躬备大德延及朕躬宜荐宗称乃改太宗庙号为成祖尊献皇帝庙号为睿宗遂附睿宗主祔太庙跻武宗上复配享上帝於元极宝殿至隆庆初礼科给事中王治上言献皇帝虽贵为天子之父实未尝南临天下而今乃与诸宗并列虽亲为武宗之叔父然尝北面事武宗而今乃设位於武宗之右揆之古典终为未合故先帝於献皇帝祔庙之後世庙之享犹不忘设是先帝之心亦有不自安者臣以为献皇帝祔太庙千万岁後不免递迁若专祀世庙则亿世不改矣乞下廷臣议至求当以安献皇帝之灵章下所司格不行】质实【王治忻州人】

发明【春秋书跻僖公左氏曰逆祀也胡氏传申之曰兄弟之不先君臣礼也二传词异而义同以臣跻君大逆之道也然僖尝君临鲁邦矣若嘉靖以藩封继统而本生考追号称宗祔于太庙跻诸武宗之右则是以藩臣而加于天子之上悖乱不经又岂仅左氏所称逆祀而已乎嵩?明堂问难之威阿谀附会以成其谬徒使王治空言於隆庆之初吁亦可慨矣】

冬十一月上皇天上帝大号

【先是严嵩奏庆云见请受羣臣朝贺又为庆云赋及大礼告成颂上之帝悦命附史馆至是帝以献皇帝既称宗配帝乃躬诣南郊上皇天上帝大号?进册表礼成还诣太庙加上高皇帝高皇后尊号是日皇后助行亚献礼文武官命妇陪祀】

发明【易传曰帝者天之主宰盖其尊不可以名号求也自宋徽宗政和六年上玉帝徽号说者讥其不经何嘉靖复蹈其辙哉且天即理也人君苟励精出治宪天勤民则精诚上格何假崇饰徽称而嘉靖不务实政惟事虚无此崇号之举徒以供其青词焚拜之为而非敬天之实意也】

振武昌灾

【户部言湖广武昌府属灾伤请将京库折银停徵而以本年京库折米银及太和山香钱荆州佃分料银仓库银谷相兼振济从之】

十二月章圣皇太后蒋氏崩

【諡曰慈孝皇后先是帝营壽陵於太峪山及是太后崩擢奉献皇帝改葬焉命驸马都尉崔元尚书张瓚等为奉迎礼仪使己帝亲诣大峪相视复今议奉太后南诣合葬严嵩等言灵驾北来慈宫南诣共一举耳如初议使帝意终未决因止元等毋行而令指挥赵俊南往启视幽宫子是亲幸承天之议起】质实【大峪山在昌平州西北】

李时卒

【自张孚敬谢政後时遂独相性素寬平比居首揆益镇以安静虽无大匡救而议论恒本忠厚会夏言入辅时不与抗每事推让言言亦安之帝待时不如孚敬言然颇少责辱恩礼亦始终不替及是卒赠太傅諡文康】

【己亥】十八年春二月立子载𨮒为皇太子封载坫为裕王载圳为景王

质实【载𨮒帝第二子载坫帝第三子即穆宗载圳帝第四子後之藩安陆】

振辽东饥

【辽东饥户部请以本鎮采买银一万二千二百余两及旧振余银一万六千三百余两振之报可并诏辽东等卫官赐给衣服各折银有差】

起翟銓为兵部尚书行边

【先是銓以忧归阙久不召夏言顾鼎臣皆居政府銓与谋召已及是帝将南巡虑塞上有警议遣重臣巡视言等因荐銓充行边使改兵部尚书兼右都御史拊循九边文武将吏咸受节制齎帑金五十万犒边军】

以曾子裔孙质粹为世袭五经博士

【顾鼎臣言孝宗时曾録顔孟子孙各一人为五经博士以奉祀事惟曾孙之後阙焉疏下礼部议访得质粹授为世袭翰林院五经博士】质实【质粹字好古吉安永丰人曾子六十世孙其远祖据者曾子十四世孙也当新莽时不受伪命自武城徙庐陵吉阳乡质粹其裔孙也】

张孚敬卒

【孚敬刚明果敢不避嫌怨既遇主知亦时进谏言如张延龄之狱以孚敬力争终昭圣太后世延龄得长系暨清勲戚庄田罢天下镇守内城先後殆尽皆其力也持身特廉痛恶赃吏一时苞苴路絶而性狠愎报复相寻不护善类欲力破人臣私党而已先为党魁天礼大狱丛诟没世罢政凡五年乃卒】

帝如承天谒显陵夏四月还京师

【赵俊自承天还言显陵不吉帝欲亲诣承天周閱卜兆九卿大臣许瓚吕柟等谏帝曰朕岂空行哉为吾母耳乃命宣城伯卫鐔遂安伯陈鏊及顾鼎臣等辅太子居守遂如承天夏言严嵩等扈从三月至承天谒显陵命作新宫曰待合葬也越三日享上帝於龙飞殿奉睿宗配秋於国社国稷徧羣祀又三日御龙飞殿受贺诏赦天下给复承天三年免湖广明年田赋之之二畿内河南三之一归过尧母墓从臣请致祭帝曰帝尧父母异陵可徵合葬非古既至京复入大峪审视曰大峪不如纯德卒定南祔之议光是帝行次卫辉夜四鼓行宫火从官仓猝不知帝所在陆炳排闥负帝出帝自是爱幸炳炳母帝乳媪也及谒陵毕严嵩请表贺夏言请俟还京报罢帝大不怿嵩知帝指固以请帝乃曰礼乐自天子出可也令表贺帝自是不悦言】质实【尧母墓在望都县城南望都汉置县明曰庆都今仍改望都属保定府纯德本松林山在锤祥县东北以显陵所在故改名许瓚字廷美灵宝人进之子卫鐔华亭人颖之孙陈鏊巴人志三世孙也】

山西地震

【山西闻喜安邑平陆猗氏夏县各地震有声如雷越二日复震】质实【闻喜春秋时晋曲沃地汉武帝经此闻破南粤因置闻喜县明属解州今属绛州平陆春秋时虞国地後为晋地後周置河北县唐天宝初因开漕渎得古刀篆文曰干陆遂改今名明属解州今因之夏县後周置县明属蒲州今属蒲州府】

彗星见

【芒长三尺许光指东南扫轩辕北地八星旬日始出】

五月夏言罢寻谕留之

【翊国公郭勋得幸害言宠严嵩亦心妬言遂相与构之会帝自承天还复幸太峪山言进居守敕稍迟帝大怒责言怠慢不恭命还前赐银章并累所降手勅言惶惧谢罪免追银章手勅为子孙百世荣其词甚哀帝怒不已疑言毁损令礼部追取削言勲阶令致仕言乃以手勅四百余并银章上之居数日帝怒解命止行复谕入直言疏谢帝悦谕令勋初忠秉公持正免衆怨言心知所云衆怨者勋辈也再疏谓自处不敢後他人一志孤立为衆所忌帝复不悦诘

责之惶恐谢乃已未几以所追银章手勅还之】质实【命还前赐银章削勲阶按明史夏言传先是帝赐夏言银章一俾密封言事文曰学博才优及是追还之言以祇荐皇天上帝册表加少师特进光禄大夫上柱国明世人臣无有加上柱国者言所自拟也至是追削之也】

复以梁材为户部尚书

【材初长户部力祛宿弊以忤权贵失帝眷以右侍郎闲住及尚书李廷相罢帝念材廉廷臣亦多荐之者召复原官材三掌国计砥节守公如一日帝眷亦甚厚是秋考察京官特命监之又命兼掌刑部事帝尝曰尚书得如材者十二人无忧天下矣】质实【梁材字大用南京金吾右卫人】

六月雷震奉先殿

【雷震奉先殿左吻及东室门楣同时皇城北鼓楼毁诏诸司修省廷臣条时政得失都御史王廷相应诏自陈曰人事得而後天道顺大臣法而後小臣廉今廉隅不饬贿赂公行大小效尤内外征利每遇一官有缺必有数人竞争要路权门终日十至且都御史职在纠察百僚振肃风纪臣叨兹任不能正身格物使弊绝风清复不能抗疏论列乞赐罢黜以儆有位廷相疏意盖斥严嵩张璪辈也帝但谕留而已】

秋闰七月葬慈孝皇后于显陵

河南饥命户部侍郎王杲振之

【时河南灾甚巡抚胡纘宗奏乞遣大臣賫帑往振帝白地方灾重亟推素有才识者往彼设法振之乃命杲往杲上言救荒当如救焚今河南灾甚奏报死亡已十万有余其存者旦夕冀得开合以延残喘彼处仓库所贮钱谷未必足用待其查勘请发文移往返动淹累旬未免坐视民毙乞先发内帑银十万会同抚按官分行振济章下户部议而户科给事中郭鋈等亦已为言诏发临清仓粮价银五万两賫往杲至河南复奏言河南民饥甚所賫去银仅可支两月之用来春青黄未接势难坐视必复得银十五万两有奇乃可户部发德州仓银五万二千七百余两及河南布政司库解京银并开封府河道贼罚银八万两与之诏从之】质实【王杲字景和汶上人胡纘宗陕西恭安人郭鋈山西高平人】

【庚子】十九年春正月翟銓还京复入阁

【銓之行边也诸边文武大吏俱囊鞬郊迎惟恐不得当銓意馈遗不贲既事竣归装千辆用遗贵近遂命以原官入阁】

二月振河南湖广灾

【督理显陵工程工部右侍郎顾璘言河南湖广旱灾会显陵兴工饥民皆赴工就食至是工毕民失所不振将有啸聚之患请量留二省无灾府县兑运正粮济之户部议覆查所司贮库银两易本色以备振恤其兑运正粮许量折每石七钱湖广清军御史姚虞因上流民图言承天工所流民宜振恤诏璘民会同抚按等官设法振济务使流亡复业】质实【顾璘字华玉吴县人姚虞蒲田人】

夏五月诏勲戚子弟入监肄业

【司业王同祖言世禄之家鲜克由礼失教故也请敕两京公侯伯子弟凡未仕者悉入成均俟学有可观奏请叙?不率者纠治从之寻命已任事者亦送监肄业于是少年勲戚争以入学为荣矣】质实【王同祖字?武崑山人】

六月增设镇守江淮总兵官

【先是江洋盗发夏言为兵科给事中奏请专设镇守江淮总兵官督兵剿捕未几贼平兵部奏革以其重任仍归操江武臣如故凡浙江粮运自苏州常州裹河取道者由镇江京口闸抵仪真其闸土疎易淤府县必岁时修治然粮运无阻是年京口闸淤阻漕运咸多拨民船多为海口所掠甚至执戮官吏南京兵科给事中杨雷以其事闻下兵部以设官本末查覆因请设总兵官给以旗牌敕符俾驻劄镇江提督沿江上下兵防西自九江安庆东及淮扬苏常诸郡凡备倭守备卫所及有司巡捕官悉受节制从之已而金山仪真守备官各加以将领之号分令江南江北地方凡卫所掌印巡捕诸官悉令服属】质实【杨雷吴县人】

秋七月振江西灾

【江西南昌等府水灾诏以新建等县兑运正米内量改折色十一万石并留????剩南粮四万石以备振济】

八月杀太仆杨最

【时帝好神仙给事中顾存仁高金王纳言皆以直谏得罪会方士段朝用以所炼白金器百余因部勋以进云以盛饮食物供斋醮即神仙可致也帝立召与语大悦朝用言帝深居无与外人接则黄金可成不死药可得帝益悦谕廷臣今太子监国朕少暇一二年亲政如初举朝愕不敢言最抗疏谏曰陛下春秋方北乃圣谕及此不过欲服食求神仙耳大神仙乃山栖溧铢者所为岂有高居黄屋紫闼袞衣玉食而能白日翀举者臣虽至愚不敢奉诏帝大怒立下诏狱杖杀之监国议亦罢明年朝用伏诛隆庆中赠最副都御史諡忠节】质实【杨?字殿之射洪人顾存仁字伯纳太仓人高金石州人王纳言信阳人】

九月刘天和败济农於黑水苑斩其子锡沙王

【济农连年入寇边将御之屡被杀伤是年七月寇万全右卫總兵官白爵逆战再败之至是复入固原剽掠且压会淫潦弓矢尽胶无鬪志而诸将多畏缩天和斩指挥二人召故總兵官周尚文激今立功会陕西總兵官魏时督兵分道邀之至黑水苑尚文尽銳奋击之自己至申凡三胜负战未决济农子锡沙王骁果而轻率其劲卒三十余人驰冲营中坚尚文击斩之寇遁走寧夏巡抚杨守礼總兵任杰等复邀击于鉄柱泉败之进天和南京户部尚书以守礼總督军务尚文复都督同知】质实【万全右卫洪武二十六年置与左卫同城属山西行都司固原州本固原守御千户所弘治十五年置州属平凉府黑水苑在固原州西鉄柱泉在灵州花马池西南有泉百步明嘉靖十五年刘天和改筑旧堡设兵戍守周尚文字顔章西安後卫人杨守礼字秉节蒲州人】

冬十月顾鼎臣卒

【鼎臣居政府谨事夏言不能有为及是卒】

【辛丑】二十年春二月下监察御史杨爵于狱

【时帝经年不视朝日事斋醮工作烦兴岁频旱元日微雪夏言严嵩作颂称贺爵抚膺太息上疏曰今天下大势如人衰病已极腹心百骸莫不受患即欲拯之无措手地方且奔竞成俗赇赂公行遇灾变而不忧非祥瑞而称贺谄谀面谀流为欺罔士风人心颓坏极矣诤臣拂土日益远而快情恣意之事无敢齟齬于其间此天下大忧也去年自夏入秋恒阳不雨畿辅千里而无秋禾既而一冬无雪元日微雪即止民失所望忧旱之心远近相同此正撤乐减膳忧惧不宁之时而辅臣言等方以为符瑞而称颂之欺天欺人不已甚乎翊国公勋中外皆知为大奸大蠹陛下宠之使稔恶肆毒羣狡趋附善类退处此任用匪人足以失人心而致危乱者一也臣巡视南城一月中冻馁死八十人五城共计未知有几孰非陛下赤子欲延须臾之生而不能而土木之功十年未止工部属官增设至数十员又遣官远修雷坛以一方士之故腴民膏血而不知恤是岂不可以已乎况今频年灾沴上下交空尚可劳民糜费结怨天下哉此无作不已足以失人心而致危乱者二也陛下即位之初励精有为尝以敬一箴颂示天下矣乃数年以来朝御希简经筵旷废大小臣庶朝参辞谢未得一睹圣容敷冻复逆未得一聆天语恐人心日益怠惰中外日益涣散非隆古君臣都俞吁咈协恭图治之气象也此朝讲不亲足以失人心而致危乱者三也左道惑衆圣王必诛今异言异服列于朝苑金紫赤绂赏及方外夫保傅之职坐而论道今举而卑之奇邪之徒流品之乱莫以加矣陛下诚与公卿贤士曰论治道则心正身修天地鬼神莫不佑享安用此妖诞邪妄之术列诸清禁为圣躬累也臣闻上之所好下必有甚近者妖盗繁兴诛之不息风声所及人起异议貽四方之笑取百世之讪非细故也此信用方术足以失人心而致危乱者四也陛下临御之朞延访忠谋虚怀纳谏一时臣工言过激切多有获罪自此以来臣下震於天威怀危虑祸未闻复有犯顔直谏以为沃心助者往岁太仆卿杨最出言而身殒近日赞善罗洪先等皆以言罢斥国体治道所损甚多臣为最等惜也古今有国家者未有不以任德而兴拒谏而亡忠荅杜口则谗谀交进安危休戚无由得闻此阻隘言路足以失人心而致危乱者五也望陛下念祖宗创业之艰难思今日守成为不易览臣所奏赐之施行宗杜幸甚帝震怒立下诏狱擄掠血肉狼籍关以五木死

一夕後苏所司读送去司问罪帝不许命严锢之狱卒以帝意不测屏其家人不纳饮食屡滨於死处之泰然既而主事周天佐御史浦鋹俱以救爵先後箠死狱中自是无敢救者】质实【杨爵字伯珍富平人周天佐字子弼晋江人时上疏言国家置言官以言为职爵系狱数月圣怒弥甚一则曰小人二则曰罪人夫以尽言直谏为小人则为缄默逢迎之君子不难以秉直纳忠为罪人又执不能为容悦捋顺之功臣哉爵身非木石命且不测万一溘先朝露使诤士饮恨直士寒心损圣德不细帝览奏大怒杖之六十诏下狱天佐与爵无生平交入狱时第隔扉相讯而已比三日天佐不胜楚遂死屍出狱大兴民有祭而哭之恸者或问之曰吾哀其忠之至而死之酷也蒲鋹字汝器文登人时出按陕西上疏曰天下治乱在言路通塞言路通则忠谏进而化理成言路塞则奸谀恣而治道举御史爵以言事下狱幽囚已久臣行部富平皆言爵慤诚孚乡里孝友式风俗且爵本以论郭勋获罪令勋奸大露陛下业致之理则爵前言非妄望赐矜释疏入帝大怒趣才骑逮之秦氏远近奔送舍车下者常万人皆号哭曰愿还我使君鋹赴徵业已病既至下诏狱榜掠备至除日後杖之百枷以铁桎爵迎哭之鋹息已絕徐张日曰此吾职也子无然後数日卒隆?初天佐赠光禄卿鋹赠光禄少卿】

夏四月置安南都统使司

【先是咸寧候仇鸾兵部尚书毛伯温奉命议讨安南至广西徵集两广福建湖广狼土官兵并檄云南守臣及诸司集议分正兵为三哨分奇兵为二哨分鸟雷山等处兵为海哨又将云南别集之兵分三哨与黔国公沐朝辅安远侯柳旬提督军务侍郎张经巡抚都御史汪文盛等部署已定乃驰檄安南臣民论以朝廷兴灭继统意讨罪止于莫登庸父子有能举郡县来降者即以其郡县授之擒斩莫登庸父子来降者赏二万金官显秩申告再三又论登庸父子果能束身归罪尽籍其土地人民纳款聽命亦待以不死伯温等驻师近边登庸闻之惧遣使诣军门乞降词颇卑切伯温等承制许之时登庸子方瀛已死乃留孙福海守国登庸与侄文明并西首阮如桂等四十余人又镇南关各尺组系颈徒跣匍匐稽首上降表复诣军门再拜尽籍國中土地军民职官悉聽处分于是伯温等宣论朝廷威德暂令归国候命伯温乃与诸守臣会疏言安南畏威束身归罪其黎寧自称黎氏之後谱系不详无以为据乞宥纳登庸削故爵量授新秋疏闻帝大喜诏改安南国为安南都统使司授登庸都统使秩从二品银印旧所僭拟制度悉除去改其十三道为十三宣抚司各设宣抚同知副使僉事聽都统黜陟仍三岁一贡以为常并令核黎寧真伪如果黎氏後划所据四府俾奉其祀事否则已之伯温受命岁余不发一矢而安南定】质实【鸟雷山在广东钦州西南大海中为入安南要道唐置鸟雷县以山得名镇南关在广西太平府凭祥州西南左右石山高插云表设关建城为安南入贡之道沐朝辅西平侯英七世孙柳旬安远侯景之子】

九庙灾

【辛酉薄暮雨雹风霆大作入夜大从仁宗庙起延烧成祖庙及太庙羣庙一时俱烬惟睿宗庙独存成祖仁宗二庙帝后神主俱毀】

五月以兵部侍郎王以旗总理河漕

【时黄河南徙决野鷄冈由涡河经亳州入淮旧决口俱塞徐吕二洪竭漕舟胶总河郭持平久治不效乃命以旗督理以旗至上言国初漕河惟通诸泉及汶泗黄河势猛水浊迁徙不常故徐州贞白吊刘大夏力排之不资以济运也今幸黄河南徙诸闸复旧宜濬山东诸泉入野鸡冈新开河道以济徐吕而筑长堤沛县以南聚水如闸河制务利漕运而已明年春持平请濬孙继口等处使东由萧碭入徐济运其秋从以旗言于孙继口外别开一渠泄水以济徐吕几八月三口工成以旗持平皆被獎遂召以旗还】质实【野鸡冈在归德府睢州北孙继口在河南睢州考城县嘉靖十八年正月河道都御史胡纘宗疏言新口孙继口孙禄口各黄河支流一以分杀上源归睢二处水患一以淮下流徐吕二洪以济官漕请于孙继口至孙禄口另筑长堤可免冲决散漫之虞而黄河安流二洪顺受运道可无患矣从之碭山秦碭县後汉碭山明属徐州今属徐州府王以旗字士招江宁人郭持平字守衡万安人】

振辽东饥

【以辽东饥诏发太仓库银五万两往振】

六月振畿内山西饥

【以顺天用所属州县灾伤诏免税粮有差仍发太仓银二万两通仓米二万石及各州县预备仓粮银相兼振济复出太仓米一万石减价发粮以平米价又以永平大饥发太仓库银六千两通仓米六千石振之是时山西抚按官亦奏灾伤重大请发本省预备仓粮并贮库银钱振济仍乞蠲免夏税如例俱从之】

秋七月振山东灾

【以山东灾伤免济南等六府所属州县税粮有差复留德州临清二麦小麦各二万石于山东布政使及动支仓库钱粮相兼振济】

八月昭圣皇太后张氏崩

【諡孝康皇后】

夏言罢九月郭勋以罪下狱冬十月言复入阁

【言勋交恶日甚九庙灾言方以疾在告自陈乞罪不允昭圣太后崩诏问太子服制言报疏有譌字帝切责言言谢过且乞还家治疾帝益怒令致仕及将出都诣而苑齐宫叩首谢帝怜之俾还私第治疾俟後命时勋以给事中戚贤等劾其擅作威福网利虐民亦引疾狂告京山侯崔元新有宠直内苑忘勋容从容问元言勋皆朕股肱相妬何也元不对帝问言归时曰俟圣诞後乃敢请又问勋何?曰勋无疾言归即出耳帝颌之言官知帝眷言恶勋因共劾勋先是帝给勋勅与兵部尚书王廷相等同清军役勋久不领言官劾之勋疏辨有何必更劳赐勅

语帝怒责勋諄谩无人臣礼给事中高时因尽发勋贪纵不法之十数事遂下勋锦衣狱复诏言入直方言在告时阁事多取裁决及治勋狱排根批抵悉其指授朝士方恶勋不以咎言也勋下狱後帝念其曾赞大礼谕镇抚司勿加刑讯奏上勋罪斩决帝以奏当不明令法司复勘法司更当勋不轨罪斩没入妻孥田宅奏上留中不下帝意本欲寬勋屡示意指而廷臣恶勋谬为不喻指者更坐重辟久之勋竟死狱中】质实【戚贤字秀夫全椒人高时临安人】

賑山西灾

【以山西连被虏患诏复徭役二年仍发帑银六万两遣户部侍郎张汉往賑之】质实【张汉锤祥人】

十一月葬孝康皇后

【壬寅】二十一年夏六月谕达寇山西

【先是谕达遣使款大同诏却之谕达与济农遂分道入犯及是复遣使求贡大同巡抚龙大有诱缚之诡言用计擒获诏磔于市敌怒入掠朔州抵广武由太原南下欲犯平阳泽潞山西抚按官请发京兵赴援帝以京兵未可轻动下部议部言既下平阳则省城固已解严各路阻隔官兵亦随至矣请将见在主客官兵摘发二枝专守省城以固根本至于贼入平阳盖有三路中由灵石冷泉口趋霍州以入东由介休趋沁州经岳阳浮山以入西由石州趋隰吉石栖等处以入窃计灵石天险势难突至其中郭家沟韩信岭四三百里险甚分兵伺之虏可图也或由泽潞冲突太行越入怀庆北去临清真定仅数百里宜令诸路守臣伏兵堵截使虏不得过太行乃为与虞盖潞安黎城等处与河南武安接境一下武安则地旷难守河南山东北直隶一帝俱为可虑也或知有备不至又捋由隰州入石州趋偏头宁武亦宜备之诸赏格宜各榜谕以?人心会廷绥巡抚都御史万潮奏奏顷得降者言虏谋不独寇山西直欲趋卢沟桥以窥京师兵部言都城备豫久矣倘卢沟桥有警不得不调援宣蓟帝命宣蓟兵马除复援别镇外余即整搦以待兵部言虏见在山西势甚猖獗各镇守营官军因无总督大臣调度未免各分彼此不肯戮力往年辽东两广河套有变俱用总督专征戎事有赖近虽奉旨裁革但今日边事方殷事权不一乞勅吏部会同府部九卿科道推举在廷大臣忠诚有将畧者复令为總督则节制归一而虏患可无虞矣帝乃命翟鸾复任巡抚已而敌寇潞安大掠沁汾襄垣长子忻县等处参将张世忠等战死敌遂从忻崞而北出雁门故道而去未几济农死其子朗台吉等散处河西势分谕达独盛岁数扰边】质实【广武秦雁门郡明为代州属太原府今代州为直隶州灵石汉介休县地隋开皇中置灵石县明属霍州今因之冷泉镇名在县北四十里有泉北流入汾霍州春秋时霍国隋置霍山郡今置霍州明初以州治霍邑县省入属平阳府今为直隶州沁州秦汉皆上党郡地唐为沁州明为直隶州岳阳汉彘县隋为岳阳县明属平阳府浮山唐置县明属平阳府石州战国时赵离石邑後周改为石州明洪武中以州治离石县省入仍曰石州属太原府万历二十三年改为永寧州属汾州府今并因之隰州古蒲城隋置隰州明属平阳府今直隶吉州自古屈邑宋元佑初置吉乡军金改吉州明属平阳府石使汉西河郡地名隋置石楼县明属汾州府今并因之郭家沟在灵石县南二十五里而山高

峙中界深沟霍州志灵石与霍隔百里中有关曰天险即此韩信岭亦名高壁岭在灵石县东南二十五里此与雀鼠谷接最为险固黎城古黎侯国隋置黎城县明属潞安府武安汉县明属彰德府今并因之宁汉楼烦县地唐末置宁武军後废明景泰元年置宁武关孝宗十六年置宁府本朝雍正三年年升县为宁武府治襄垣奉县明属潞安府长子古长子邑汉置县明属潞安府祁县春秋时晋大夫祁奚邑汉置祁县明属太原府今并因之龙大有茶陵州人翟鹏字志南抚宁卫人郎台吉旧作狼台吉今改】

秋七月己酉朔日有食之

夏言罢八月以礼部尚书严嵩兼武英殿大学士预机务

【言与嵩同乡科第後于嵩称晚进以议礼骤贵嵩谨事务言不为下及言入阁援嵩白代以门客畜之嵩恨甚常置酒邀言躬诸其第言辞不见嵩布席展所具啓踞读言谓嵩实下已不疑也言既失帝意懽斥呼嵩与谋嵩已潜造陶仲文第谋齎言代其位言知甚愠囑所善者劫嵩时帝已心爱嵩攻益力帝怜之不听也两人遂大隙嵩因燕见頓首两泣愬言见凌状帝息使陈言罪嵩因振暴其短帝大怒手勅礼部历数言罪且曰郭勋已下狱犹千罗百织言官为朝廷耳目专听言主使朕不早朝言亦不入阁军国重事取裁私家王言要秘视为戏玩言官不一言徒欺谤君上致神鬼怒雨甚伤禾言大惧请罪居十余日乞骸骨语极哀疏留八日会七月朔日食既下手诏曰食过分正坐下慢上之咎其落言职开往先是言再罢宰相帝虽优礼然恩眷已不及初帝在西苑齐居许入直诸贵人得乘马言独用小腰与以乘帝恠之禾言会帝以奉道不御翼善冠而御香业冠命尚方仿之制沈水香为五冠以赐言及嵩等言以非人臣法服不奉诏帝怒甚嵩于召对曰故冠香叶而笼轻纱子外令上见之帝盖内亲嵩而欲去言嵩因倾之言既去醮祀青词非嵩无当帝意者遂代言入阁嵩时年六十有余不异少壮朝夕直西苑板房未尝一归洗沐帝谓其勤益信之嵩无他才畧惟一意媚上窃权罔利帝英察自信果刑戮颇护已短嵩以故得因事激帝怒戕害人以成其私诛斥者不可胜计云】质实【陶仲文方士初名典真黄冈人明史輿服志皇帝常服冠以乌纱冒之折角向上名翼善冠】

九月作雷坛镗工部员外郎刘魁于狱

【帝用陶仲文言建雷坛于太液池西所司希帝意务宏侈程工峻急魁欲谏度必得重祸先命家人鬻棺以侍遂上章顷营大享殿大高元殿诸工尚未告峻内帑所积几何岁入几何一投之费动至亿万土木衣文绣匠作班朱紫道流所居拟于宫禁国用已耗民力已竭而复为不经之事非所以示天下此後世帝震怒杖于廷镗之诏狱】质实【刘魁字焕吾泰和人】

冬十月宫婢杨金英等谋逆伏诛杀端妃曹氏

【帝宿端妃曹氏宫宫婢杨金英等同帝熟寝以组缢帝项误为死结得不絶有张金莲者

知事不就走告皇后后驰至解组帝得苏后命内监张佐等捕宫人杂治言王寧嫔寔首谋又言端妃亦与知时帝病悖不能言后传旨收端妃宁嫔及金英等同谋者不分首从悉于市仍剐屍梟示并收斩其族属十人余给付功臣家为奴时诸婢为谋已久帝几危中外震惶次日午始知帝无恙羣心乃定久之帝始知端妃冤】

【癸卯】二十二年春正月丙午朔日有食之

夏四月福建福州兴化泉州漳州四府地震

六月议冗员

【吏部以奉诏裁革冗员奏言各衙门官原系额设及随事添设各有职掌者俱应存留其添设官独户工二部钦天监太医院为多但今疆陲多事庙工甫兴户工二部难裁韦钦天监太医院当咨行礼部考选去留南京并在外应裁官员行南京吏部及各省抚按官会议具奏诏从之仍令查各衙门添注官现在员数以闻已而吏部查户工二部太常太仆鸿胪寺尚实寺中书科顺天府上林苑监制诰房文华殿武英殿办事各添注官员具名数疏以进帝曰各官既有添注每遇实缺仍乃不行填补却往往别推以致冗食者多自今内外官遇有实缺即以添注者补之违者即时纠举】

秋九月逮巡按山东御史叶经杖杀之

【严嵩与经有宿憾及是经按山东监乡试试录上嵩指发策语为诽谤激帝怒下礼部参论尚书张壁等阿旨请逮考试官周鏊等调布政使陈儒及经等并治嵩密言试事尽由御史帝乃降旨斥文中语为狂悖经杖八十为民创重卒镇儒等谪官嵩借事杀异己者自经始也先是嵩相甫踰月御史谢瑜即劾之比之四凶请急诛斥帝虽譙让瑜然未深罪嵩亦以得政未敢显为挤陷故瑜得居职如故及经杖死嵩益肆志报复其後以大计嵩嘱主者黜瑜遂除名于是给事中王鏊沈良材陈瓊御史俞时陈佑及山西巡抚童汉臣福建巡按何维栢等相继得罪皆并瑜劾嵩者也】质实【叶经字叔明上虞人由常州推官擢为御又嵩官礼部时以秦晋二藩宗人袭封事受重贿经指其事劾嵩嵩惧甚力弥?得免故恨经报复为隆庆初赠经光禄少卿张璧字崇象石首人陈儒崑山人谢瑜字如卿上虞人王鏊字韬孟金坛人沈良材泰州人陈 余姚人喻时光山人陈绍上虞人童汉臣钱塘人何维栢字乔仲南海人】发明【初经以秦晋二藩贿事劾嵩嵩疏辨遂付袭爵事于廷议而置嵩不问朝廷固已失刑矣越二年嵩遂得挟宿憾害经其为报复情迹显然乃嘉靖不知致嵩由此得以尽锄其异己之人残毒忠良实由经始妬之初六曰羸豕孚蹢躅程传谓羸弱之豕其中心在乎蹢躅虽陰微在下而有渐盛害阳之象焉嵩之杀经殆将尝试其蹢躅之技乎】

冬十月朵顏入寇

【攻围慕田峪杀守备陈舜副总兵王继祖等往援乃退】质实【慕田峪在昌平州北有

阙口】

十一月以严寒赈贫民

【御史何赞言京师苦寒小民冻馁枕藉乞多方赈救并行江北诸郡加惠以广德意帝曰
今岁严寒困穷可悯亟行一体振之】质实【何赞黄严人】

御定资治通监纲目三编卷二十二

卷二十三

<史部,编年类,御定资治通监纲目三编>

钦定四库全书

御定资治通监纲目三编卷二十三

【起甲辰明世宗嘉靖二十三年尽壬子明世宗嘉靖三十二年】凡九年

【甲辰】二十三年秋七月谕达犯大同总兵官周尚文败之【是春谕达犯黄崖口又犯大水谷龙门所及是犯大同总兵官周尚文战于黑山败之】质实【黄崖山在抚宁县东北五十里大水谷关在怀柔县东北三州里有城龙门守御千户所本元云州之东庄地明宣德六年筑城建所于此黑山在乎罗县北三百里贺兰山之尾也】

八月翟銓罢

【严嵩入阁銓以资地居其上嵩恶之会銓子汝俭汝孝与其师崔奇勋所亲焦清同举进士嵩遂属给事中王交等劾其有弊帝怒下吏部都察院銓疏辨帝益怒曰銓被劾待勘敢先瀆扰耶二子纵有才何至与其师并进勒銓父子奇勋清及分考官等皆为民】质实【王交慈谿人】

振江南灾

【户部言江南灾甚请以应天等十一府州今年各项续收事例银两与本处贙罚解边余银俱籴谷备振并议应天巡抚丁汝夔所条振荒事宜皆报可时户部又议言天下灾伤过半而太仓积贮粮米有余请将今年粮米四百万石徵本色七折色三分以苏民困其被灾之地行令抚按官动支赎罪银给振从之诏户部预发明年年例银六万两于大同镇以岁灾支用不给故也】质实【丁汝夔所条振荒事宜一应天诸府灾民饥甚请今有司委官于邻省平糶所过毋得阻遏钞关免纳钞及南京三十六仓见贮廩米量籴五万石以济灾民且免耗浥米价仍照前例买补一被灾州县境内富民愿出谷百石备振者请给与义官冠服百五十石者陰阳医官二百石者正九品三百石者正八品四百石者正七品俱散官免本身杂差出谷千五百石银五百两以上者除给冠服仍建坊表其门一各府州县起运先年南京户部未完钱粮折银钱解每米一石除折银五钱外其多余之银籴谷振贷及量补灾免粮石】

九月以吏部尚书许赞兼文渊阁大学士礼部尚书张璧兼东阁大学士并预机务

【时大权一归严嵩赞璧不得预票拟赞常叹曰何夺我吏部使我旁睨人因屡乞休】

振湖广灾

【时湖广旱甚户部请留云南借用支剩等项银共九万七千八百余两与预备仓谷相兼备振如不足则量准兑军粮米十万石拟照兑支运事例折银诏从之】

冬十月谕达入侵

【谕达自万全右卫毁墙入掠蔚州直抵完县京师戒严命兵部议防守事宜总督宣大兵部尚书翟鹏时在朔州闻警夜半至马邑调兵食复趋浑源遣诸将遏敌御史杨本深等劾鹏逗遛致震畿辅遂遣官械鹏而以兵部侍郎张汉代之巡抚蓟镇都御史朱方以建议撤诸路防秋兵致敌乘间入犯亦命逮系鹏坐永戍方杖死至十一月庚子京师乃解严】质实【谕达明史本纪作小王子翟鹏传作谕达今依鹏传完县本汉曲逆县金置完州明洪武二年改县属保定府浑源县省入明属大固府今并因之朱方字子大泗州人】

十一月加方士陶仲文少师

【帝自遭宫婢之变移居西内日求长生郊朝不亲朝讲尽废君臣不相接独陶仲文得时见见辄赐坐称之为师而不名于是小人顾可学盛端明朱隆禧辈皆缘以进陶仲文者初由吏员需次京师故与邵元节善元节年老宫中黑眚见治不效因荐仲文以符水嚶剑绝宫中妖被宠幸寻授少保礼部尚书未几加少傅至是大同获间谍帝归功上元加仲文少师仍兼傅保】质实【顾可学无锡人盛端明饶平人朱隆禧崑山人】

【乙巳】二十四年春二月诏抚流民

【令天下有司招抚流民复业给与牛具种子竣年底徵还有能开垦闲田者蠲赋十年从巡按山东御史刘廷仪请也】质实【刘廷仪慈谿人】

振顺天永平饥

【顺天永平府属饥发通州仓粳米万七百石太仓银二千两往振至三月保定诸府皆告饥复发临清广积仓银一千两振之已而应天等十一府州相继告饥勅有司以南京诸司及库贮银钱振济帝谕户工二部曰今岁以来天时少顺若有旱火之虑所应振恤诸务亟行抚按及各镇总兵官加意干理又诏曰近来水旱灾伤皆由官不得人甚或贪残殃民致干和气如有贪酷害民者抚按官具奏处治】

夏五月壬戌朔日有食之

六月重建太庙成

【先是以旧庙基隘命相度规制议三上不报久之仍命复周堂异室之旧庙制始定太祖居中左四序成宣宪睿右四序仁英孝武其後为祧庙以藏祧主】

谨身殿大学士毛纪卒

【纪历仕四朝守正不阿家居二十年卒赠太保諡文简】

秋八月张璧卒

【璧在位无所表见是年七月加太子太保寻病症不能视事遂卒年七十有一】

九月召夏言复入阁

【帝微觉严嵩贪横复召用言至复盛气陵嵩出其上凡所批答畧不顾嵩嚙不敢吐一语其所引用私人言多斥之亦不敢救衔次骨而言以废弃久务张权所遣逐亦不尽当御史陈其学以盐法事劾崔元及锦衣都督陆炳言拟旨令陈状皆造言请死炳行三千金求解不得长跪泣谢罪乃以二人与嵩比而构言言不悟】质实【陈其学宣城人】

楚世子英燿杀其父显榕伏诛

【英燿楚王显榕长子性淫恶烝楚王宫人又使卒刘金纳妓别馆王欲罪金金遂劝英燿谋逆会元夕张灯置酒飨王别宴武冈王显槐于西室酒半金等从座後以铜瓜击王脑立毙显槐惊救被伤得免英燿徙王屍宫中以中风报王从者抉门出告变抚按官以闻帝命驸马都尉鄮景和等往鞫得实及是诏逮入京告太庙磔于市焚尸扬灰逆党悉伏诛】质实【显槐显榕之弟鄮景和崑山人尚宗女永福公主】

冬十一月许赞罢

【赞求去帝责其忘君爱身落职闲住後三年赞卒】

【丙午】二十五年春正月谪御史周冕为通海县典史【时太子生十一年尚未出阁讲学冕极言豫教不可缓帝怒谪之】质实【通海县元置明属云南临安府今因之周冕资州人】

三月四川白草番乱遣何卿充总兵讨平之

【卿初镇松潘十七年威望素着会以北警召卿入卫至是番人乱复命卿往讨卿至将士咸喜乃会巡抚张时彻讨擒贼渠俘斩于计克四十余寨毁其碉房获马牛器械无算至明年四月贼尽平于是松潘威茂间行旅往来无剽夺患边境安堵】质实【白草寨名明史四川

土司传云东路生羌白草最强何卿成都卫人张时彻字惟静鄞人】

夏四月以兵部侍郎曾铣总督陕西三边军务

【是秋谕达以十万骑西入延安庆阳铣率兵数千驻塞门而遣前参将李珍捣巢于马梁山後敌始退】质实【塞门砦名在延安府安塞县北马梁山在榆林府北李珍陕西人坐事夺宫铣复加録用之】

秋七月以醴泉出承华殿停诸司封奏

【癸酉谕礼部今年夏末秋初醴泉出于承华虽不可恃以自怠亦不可不敬谢其自二十五日至于八月望诸司停常封奏事嗣後庆贺斋祀悉停封奏】质实【承华殿在西苑金海桥北】

发明【礼言地出醴泉疏谓德至渊泉则醴泉涌明嘉靖之时何时乎郊庙不亲朝讲尽废又任用权奸诛贬忠直三殿九庙灾异叠见乃复矫饰殊祥肆为庆贺度不过如白鹿仙桃附会长生之说而已且即使镇获上瑞亦更宜勤政恤民荷承嘉祝应天以实不以文固当如是乃不此之务而转尽停诸司封奏至于两旬之久其间岂无民瘼国计旦夕不可缓者遽因符瑞之陈致滋旷隔有是理乎尤可异者自後庆贺斋祀悉停封奏遂若着为成例而尚云不可恃以自怠岂竟以斋醮为凝承昭受之实耶】

八月天鼓鸣

冬十月故建昌侯张延龄弃市

【初延龄下狱後奸人刘东山发其手书内有君道赏罚不明之语因复以延龄讪上罪长系如故至是竟坐斩西市】

【丁未】二十六年夏四月谕达求贡拒之

【自龙大有诱执其使後谕达速岁犯边不已及是奉印信番文诣边陈款总督侍郎翁万达以闻时万达方修筑边墙因再疏言自冬涉春敌使屡至其词益恭似宜允许况今版筑方兴正当羈縻使无侵扰帝责其罔瀆不听万达在边帝深倚任所奏无不听纳尝议撤山西内关兵并力守御大同外边巡抚孙继鲁力陈不可帝纳万达言遂逮继鲁下狱死独议谕达贡事再被责让盖是时曾铣建言复套夏言主之故力绌贡议云铣素喜功名会敌居河套久为中国患铣上言敌据河套侵扰边鄙今将百年出套则侵宣大三关以震据畿辅入套则侵延宁甘固以扰关中深山大川势固在彼而不在我臣枕戈汗马切齿痛心窃尝计之秋高马肥弓劲矢利彼聚而攻我散而守则彼胜冬深水枯马无宿藁春寒陰雨壤无燥土彼势渐弱我乘其弊则中国胜臣请以銳卒六万益以山东枪手二千每岁春夏交携五十日饷水陆并进

直捣其巢材官驍发礮火雷击如是三举则彼不能支此一劳永逸之策也遂条八议以进帝壮其言命诸边臣议之俱以为难而万达尤以横挑强敌为非计帝方向铄议上不省】质实【内关雁门宁武偏头诸关也三关中为宁武雁门在东偏头居西西邻黄河逼近河套曾铄条上八议一曰定庙谟二曰立纲纪三曰审机宜四曰选将材五曰任贤能六曰足当饷七曰明赏罚八曰修长技下兵部议行其十二月铄偕巡抚谢兰张问行等奏延绥密与套敌为隣自定边营至黄甫川连年入侵率由是道所当急为修缮分地定工次第修举起自定边东至龙川堡计长四百四十余里为西段所当先筑自龙川堡东至双山堡计长四百九十余里为中段自双山堡东至黄甫川计长五百九十余里为下段岁修一段期以三年竣事乞发帑银如宣大山西故事疏下部议铄又言套敌不除中国之祸未可量也今日之计宜岁岁乘其无备每出益励彼势必折将遯而出套之恐後矣俟其远出然後因祖宗之故疆并河为塞修筑墩隍建置卫所处分戍卒讲求屯政以省全陕之转输壮中国之形势此中兴之大烈也夫臣方议筑边又议复套者以筑边不过数十年计耳复套则驱斥凶残临河作阵乃国家万年久远之计疏下兵部议谓筑边复套两俱不易相较则复套又难夫欲率数万之衆賫五十日之粮深入险远艰阻之域以驱数十年盘据之兵谈何容易故不若修墙筑边为计完而成功可期也但延绥一带地势延漫土杂沙鹺居民隔远最为荒凉若欲以一千五百里之地而责成于三年之功恐未易集纵使能成亦难为守宜仍行铄等计议以闻帝曰敌据河套为中国患久矣连岁关隘横被荼毒朕宵旰念之而边臣无分忧者今铄能倡复套之谋甚见壮猷本部乃久之始覆迄无定见何也其令铄更与诸边臣悉心图议务求长算若边境千里沙漠与宣大地异但可就要害修筑兵部其发银三千万两与铄听其修边饷兵造器便宜调度支用备明年防御计至二十六年夏五月总督曾铄出塞龙套部胜之初春时铄督兵出塞掩击败还不以闻至是复袭之敌觉铄搜选鋭卒督之战馘斩二十六人生擒一人毙死于矢石者甚衆获马牛橐驼九百有五十械器八百五十三以捷闻敌移帐渐北间以轻骑出掠铄复督诸军驱之遂远遁不敢近塞铄既以捷闻更列上诸臣功罪帝以套敌连年深入如蹈无人之境大损国威铄能率兵出塞擒斩有功命增俸赐白金紵弊有差十一月铄兰暨延绥巡抚杨守谦宁夏巡抚王邦瑞及三镇总兵议复套方畧乃条列十八事曰恢复河套修筑边墙选择将材选练士卒买补马羸进兵机宜转运粮饷申明赏罚兼备舟车多置火器招降用阬审度时势防守河套营田储蓄及明职事息讹言寛文法广孳畜又上营阵八图曰立营总图及遇敌驻战选锋车战骑兵迎战步兵搏战行营进攻变营长驱获功收兵各图帝览而嘉之奏下兵部尚书王以旗会廷臣集议言曾铄先後章疏俱可施行帝以铄前後所上方畧命廷臣定策以闻翁万达字仁夫揭阳人孙继鲁字道甫云南右卫人继鲁先知淮安府以忤中官被逮夏言救免之继鲁不谢言怒及是言不为地遂死狱中】

秋九月河决曹县

【水入城二尺漫金乡鱼台定陶城武冲谷亭总河都御史詹瀚请于赵皮寨诸口穿支河以分水势从之】质实【定陶秦县明属曹州府今因之城武本汉成武县为城武县属兗州府今属曹州府谷亭镇名在鱼台县东时为漕运往来要地隆庆後运河东徙镇遂废赵皮寨在开封府兰阳县北一名张录口詹瀚玉山人】

冬十一月大内火释杨爵等于狱

【初爵既下狱工部员外郎刘魁给事周怡并以言事同系三人屡濒死讲诵不辍爵于狱中着周易辨说中庸解忘其困历五年不释久之有神降于乩帝感其言立出三人未踰月尚书熊浹疏言乩仙之妄帝怒命东厂追执爵等复同系镇抚狱桎梏加严饮食屡绝至是大高元殿灾帝祷于露台空中若有闻遂传诏释之爵归後二年卒隆庆初赠光禄卿諡忠介】质实【周怡字顺之宁国太平人以劾严嵩廷杖锢狱】

发明【爵等抗言下狱既已频年乃以乩仙之言而立出诸狱复以熊浹之言追执之而其释归也仍以空中神语传云国将兴听于人将亡听于神扶鸾之术已为痴邪荧惑之端宪宗时李孜省曾假其说以推荐鄉人固为诬罔若空中神语尤属怪诞不经人君操赏罚之大权进退平反悉由乾断乃托诸虚无杳渺之说以行其黜陟耶且妖由人兴嘉靖惑于祈禳念释在兹遂致鬼物凭依言如在耳天听民听其谓之何哉】

皇后方氏崩

【谥孝烈皇后】

【戊申】二十七年春正月夏言罢

【言素慷慨以经济自许会曾铣议复河套欲倚以成大功因密荐铣谓羣臣无加铣忠者铣鸠兵缮塞辄破敌帝亦颇向之今言拟旨优獎者再铣喜益銳志出师条上方畧廷议一如铣言已而帝意中变谓辅臣曰今征遂河套不知出师果有名否兵食果有余成功可必否一铣何足言如生民荼毒何严嵩知帝意遂极言河套必不可复廷臣亦尽反前议如嵩说嵩乃力攻言谓向拟旨褒铣臣皆不与闻言始大惧谢罪且云嵩初未尝异议今胡乃尽诿于臣帝已入嵩谮怒不可解尽夺言官阶令言致仕初言与嵩同直西苑帝数使小内竖诣言所言负气岸奴视之其诣嵩嵩必延坐亲纳金钱袖中以故曰誉嵩而短言言进陈词取具而已往往失帝旨嵩愈精治其事由是嵩益被宠而言眷渐移及套议起嵩复从中陰诋之以激帝怒言遂败】

振陕西饥

【陕西巩昌汉中二府大饥凤翔府汧阳县为水所没巡抚谢兰以闻诏发太仓银五万两于巩昌汉中二府充振徙汧阳县治于城东三里外而割麟游县界白雪里属之且蠲冲决地租三年】质实【汧阳汉隃麋县後周置汧阳郡及县以在汧水之阳得名明凤翔府今因之汧阳故城在今县西十八里本西魏马牢城也麟游汉杜阳县隋义宁元年置麟游县明属凤翔府今因之谢兰字与德代州人】

三月杀总督侍郎曾铣

【兵部侍郎范鏊等劾铎罔上贪功擅开边衅逮下狱出兵部尚书王以旗代之先是咸寧侯仇鸾镇甘肃以贪纵为铎所劾遂逮问严嵩雅亲鸾至是代鸾狱中草奏诬夏言纳铎金苏纲者言继妻父也与铎同邑相善方铎建议复套时纲亟称之言益信铎为可办固力主其议故嵩代鸾诬奏铎克饷钜万属纲赂言交关为奸利决司承帝旨坐铎交结近待律斩西市妻子流二千里并逮言下吏出鸾于狱铎有瞻畧长于用兵性特廉既没家无余貲隆庆初赠尚书諡曰襄愍】质实【范鏊字平甫江西乐平人迁□阳仇鸾钺之子】

夏五月葬孝烈皇后于永陵

【诏曰皇后比救朕危奉天济难其以元后礼葬预名葬地曰永陵】质实【永陵在昌平州阳翠岭】

秋七月京师地震

【顺天保定二府各州县俱震八月京师复震及辽东广宁卫山东登州府同日皆震论羣臣修省九月京师复地震有声】

十月杀前华盖殿大学士夏言

【言抵通州闻曾铎所坐大惊堕车曰噫吾死矣上疏讼冤言鸾方就逮上降谕不两日鸾何以知盖严嵩与崔元辈诈为鸾疏以倾臣嵩静言庸违似共工谦恭下士似王莽奸巧弄权父子专政似司马懿臣生死系嵩掌握惟圣慈曲赐保全帝不省狱成论死法司援议贵议能条以上帝怒切责之犹及言前不戴香冠事会谄达侵居庸嵩谓夏言等议收河套故报复至此遂弃言市妻苏氏流广西从子主事克承从孙尚宝丞朝庆皆削籍言豪迈有俊才纵横辨博人莫能屈初被特眷日与议礼诸贵人抗及居政府与嵩共事嵩怀奸黷贿言独能裁抑之以是天下多称言然自大用後日蹇傲寢为帝所厌裁决机务颇专恣物议亦不悉协特因其为嵩诬陷以死人方?嵩故于言益深惜之隆庆初复官谥文愍】

【己酉】二十八年春二月以张治为礼部尚书兼文渊阁大学士李本为少詹事兼翰林院学士入内阁并预机务【自夏言得罪後严嵩独相且年余矣至是治本以疏远入阁益不敢预可否嘿嘿而已】质实【张治字文邦茶陵州人李本余姚人治时为南京吏部尚书本时为国子监祭酒】

谄达侵宣府大同总兵官周尚文击败之

【敌犯宣府滴水崖把总江瀚指挥董阳战死全军覆遂犯永宁尚文力战败之斩其魁尚文清约爱士善用间知敌中曲折故战辄有功初尚文僉後府严嵩子世蕃为府都事骄蹇不法将劾之嵩谢得免以故嵩父子憾尚文谋倾陷之帝方藉以抗强敌故谗不得入未几卒嵩格恤典不予给事中沈束以为言嵩激帝怒辄之诏狱】质实【滴水崖在宣化府赤城县东

南石崖滴水隆冬不冻崖之北有堡为戍守处沈束字宗安会稽人上疏言尚文为将忠义自许迺者敌骑深入闻命疾趋奋勇先登多所杀获此亦一时奇功也宜赠封爵延子孙又如董暘江瀚膺北敌之冲遏南奔之势援兵不至继之以死虽已庙祀宜赐祭以彰死事今当事之臣任意予夺冒滥者或幸蒙忠勤者反捐弃何以鼓士气激军心疏入下束狱束系久衣食屡绝维日读周易凡系狱十八年其妻张氏上书言臣夫家有老亲八十有九衰病侵夺朝不计夕往臣因束无子为置妾潘氏比至京师束已系狱潘矢志不他适乃相与寄居旅舍纺绩以供夫衣食岁月积深凄楚万状欲归奉舅则夫之饘粥无资欲留养夫则舅又旦暮待尽臣愿代夫系狱令夫得送父终年仍还赴系法司亦为请帝终不许帝深嫉言官长系以困之而曰令狱卒奏其语言食息谓之监帖或无所得虽谐语亦以闻一日鹊噪于还前束漫曰岂有喜及罪人耶卒以奏帝心动释束还家其父已前死矣隆庆初起故官不赴尚文追赠太傅谥武襄】

三月辛未朔日有食之

皇太子载壑卒

【谥曰庄敬】

秋七月倭寇浙东

【倭自永乐末贡使不至宣德中命琉球国王转谕之使复至倭性黠时载方物戎器出没海滨得间则张戎器而肆攻掠不得则陈方物而称朝贡是以倭虽通贡而濒海州县数被侵掠然利中国互市每贡所携私物逾贡数十倍旧制于浙江设市舶提举司驻宁波海舶至则平其直制驭之权在官及帝初年废市舶不设滨海奸人遂阑出中国财物与倭交易居宁波之双屿为之主屡负倭直倭使互市者往往留海滨不去内地诸奸民复为之囊橐巡按御史高节请严禁奸豪交通诏允行之自是严通番之禁遂移之贵官势家负直愈甚倭粮匱不得返大怨恨奸民勾之遂煽为乱朝议设重臣巡抚浙江兼统福建沿海诸府以都御史朱纨为之纨至严为申禁获交通者不俟命辄以便宜斩之由是浙闽大姓素为倭内主者失利而怨纨又数腾疏于朝显言大姓通倭状闽浙人咸恶之而闽尤甚巡按御史周亮闽人也上疏诋纨请改巡抚为巡视以杀其权其党在朝者左右之竟如其请御史陈九德复劾纨擅杀遣官按问罢纨职纨仰药死自是海禁复弛乱益滋甚时海上承平日久民不知兵闻倭至窜走一空终帝之世迄无宁岁矣】质实【双屿浙江通志宁波府海防设中营外洋汛辖洋面六有双屿山双屿港朱纨字子纯长洲人高节大兴左卫官籍永清人陈九德药城人】

命户部核出纳

【是时边供繁费加以土木祷祠之役月无虚日帑藏匱竭司农百计生财甚至变卖寺田收赎军罪犹不能给乃遣部使者括逋赋百姓嗷嗷海内骚动给事中张秉壶以为言于是户部覆议天下财赋每年实徵起存之例夏税秋粮马草屯田地租食盐钱钞税课盐课门摊之

类各有定数成化以前各边宁谧百费省约一岁出入沛然有余今则不然京通仓粮岁入三百七十万石嘉靖十年以前每岁军匠支米二百八十万石廩中常余八九年之积十年以後岁支加至五百三十七万石抵今所储仅余四年太仓银库岁入二百万两先年各边额用一年大约所出一百三十三万常余六十七万嘉靖八年以前内库积有四百余万外库积有一百余万近年来除进用修边给赏赈灾诸项外一年大约所出三百四十七万视之岁入常多一百四十七万及今不为之所年复一年将至不可措手矣且今生财之道既极计惟节用请勅中外诸臣就职论事专意清理务求节财助边仍令两京户部并工部太仆光禄及各直省司府卫所以及辽蓟宣大陕西诸边每岁终将一年出纳钱谷修咸会计録分为四目一曰岁徵如府库监局仓场额???钱谷几何一曰岁收如收过本年先年额徵钱粮完欠几何一曰岁支如本年用过各项钱粮于岁???额数增减相多几何一曰岁储如本年支剩存积钱粮几何务令简明以为通融撙节之计从之】质实【张秉壶莆田人】

【庚戌】二十九年春正月山东地震

【山东盖州等卫地震有声如雷二月乃止】质实【盖州卫秦汉时为盖牟城属辽东郡唐置盖州明洪武九年废州置卫今为盖平县属奉天府】

秋八月封方士陶仲文为恭诚伯

【时帝以灾异咨于仲文对言虑有冤狱得雨方解已而法司上胡纘宗等爰书悉从轻典果得雨乃以平狱功封仲文恭诚伯岁禄千二百石】质实【胡纘宗等爰书初帝幸承天河南巡抚胡纘宗尝以事笞阳武知县王联联寻为巡按御史陶钦夔劾罢联素凶狡尝欧其父良论死久之以良请出狱复坐杀人求解不得知帝喜告讐乃摭纘宗迎驾诗穆王八骏语为谤沮长至日令其子诳为常朝官阑入关门讼冤凡所不得若副都御史刘隅给事中鲍道明御史胡植冯章张洽参议朱鸿渐知府项乔贾应春等百十人悉构入之帝大怒立遣官捕纘宗等下狱已而刑部尚书刘劼会法司讯得其诬罔状乃坐联死】发明【仲文起筮库由邵元节荐代司醮事不二岁以少师兼少傅少保一人而领三孤终明之世惟仲文而已兹解冤得雨平狱有验封恭诚伯五等崇阶无故而加之方士实史册所罕见不惟滥行褒赏其箴祖名器亦至矣嘉靖自移居西内日求长生臣僚罕有接见者独仲文得时时召对称为师而不名是时四方奸人如段朝用龚可佩蓝田玉之属皆以烧炼符呪相继宠任然不久皆败惟仲文恩眷日隆久而弗替岂小人之炫惑君心固别有深结主知者乎】

谗达犯京师

【先是夏六月谗達犯大同潰墙入悉精兵伏沟壑中而以老弱百骑往来为饵使骑信之报总兵张达达意轻之兵未合遽率麾下驰击之伏发围达数匝马蹶遂见杀副帅林椿闻達被围不介马而驰救达不克亦死之达椿皆骁勇善战谗达得二将首辄引去事闻遽总督侍郎郭宗臯巡抚都御史陈耀下狱起复翁万达为总督赵锦为巡抚以仇鸾为宣大总兵万达家居未至命侍郎苏佑摄其事佑抵镇即上疏请益兵食未报而谗达复拥衆窥大同初仇鸾

坐废居京师以贿严世蕃得总兵宣大既受命惶惧无策其厮养时义侯荣者说鸾曰勿忧吾为主解之乃为鸾持重赂谄达令移逼他塞勿犯大同谄达受货币遣之箭纛以为信而与之盟遂东去谋者复白敌中语欲袭宣府东辽左西兵部尚书丁汝夔谓帝厌警报不悉以闻已而警报日甚乃发诸边兵万二千骑京营兵二万四千骑分布宣蓟诸关隘边兵取符验期会】

【未即至而京兵悉市井佣保子识者知其必败矣至是谄达帅部下至古北口以数千骑攻墙都御史王汝孝悉众出火礮矢石下攻之谄达乃阳督兵缀蓟师而别遣精骑从间道溃墙出师後汝孝师溃遂大掠怀栗围顺义长驱入内巡按顺天御史王忬闻报度兵弱无能御者夜草疏言潮河川有径道一日夜可达通州敌兵剽悍若风雨而古北口距京师仅七舍浸衍无卫戍了望神京陵寝万一荡摇事系非小请速集廷臣议战守策而身出驻通州召吏民给兵仗听约束收漕舟舫潞河西勿使为敌用甫毕而夜半敌兵果至通州营白河东二十里分兵剽昌平犯诸陵杀掠不可胜纪京师戒严诏大同总兵官仇鸾及河东山东兵入援分遣文武大臣各九人守京城九门急集诸营兵仅四五万是时禁军册籍皆虚数又半役内外提督大臣家不归伍在伍者半皆老弱涕泣不敢前从武库索甲仗主库阉人勒常例不时发久之不能军诏城中居民及四方入应武举者悉登陴守命都御史商大节率五城御史统之发帑金五千两便宜募壮士时寇已自通州渡河而西前锋七百骑驻安定门外教塲遂薄都城会大同总兵官仇鸾巡抚保定都御史杨守谦各以兵至帝拜鸾为平虏大将军节制诸路兵马守谦为兵部侍郎提督军务时勤王兵先後五六万人皆闻变即赴未齎糗粮制下犒师牛酒诸费皆不知所出户部文移往复越二三日军士始得数饼饵开庾发粟釜甑皆虚故士卒饥疲不任战帝久不视朝军事无由面白廷臣多以为言不许礼部尚书徐阶复固请乃许之羣臣昧爽入至日晡帝始御奉天殿不发一词但命皆奉敕谕切责百官而趣诸将战甚急兵部尚书丁汝夔以咨严嵩嵩曰塞上败可掩也失利輦下上无不知谁执其咎寇饱自扬去耳汝夔因不敢主战且承嵩意戒诸将勿轻举守谦以孤军薄谄达营而陈无後继亦不敢战于是皆坚壁不发一矢辄以汝夔及守谦为辞寇遂毁城外庐舍火光烛天亦莫能救城西北隅内臣园宅在焉环泣帝前曰将帅为文臣制故寇得至此帝怒守谦益甚寇纵横内地凡八日本无意攻城且所掠已过望乃整辎重将趋白羊口而去至昌平北猝与仇鸾兵遇鸾出不意仓卒几不能军敌纵骑蹂陈而入杀伤千余人几获鸾敌骑遂长驱至天壽山总兵官赵国忠列陈红门前不敢入夺道循潮河川由古北口故道出京师解严至九月辛卯朔敌悉众出塞诸将不敢逼徐尾其後至石匣城及张家古北等口外而还既而诸将收斩遗屍八十余级以捷闻帝优诏慰鸾加太保赐金币汝夔守谦弃市初帝将大行諫以惩後汝夔窘求救於嵩嵩曰我在必不令公死及见帝帝怒甚竟不敢言汝夔临死始知为嵩所卖守谦性迟重客有劝之战者应曰周亚夫何人乎客曰公误矣今日何得比汉法守谦不纳竟得罪方寇薄通州时诏副都御史王仪以兵二千往守遇按王忬奏其虐大同军大同军者仇鸾兵也及寇退帝立命逮仪斥为民而擢忬佥都御史代之於是仇鸾请驻师宣大间整饬兵甲俟冬月大举以纾国力乃班师入卫以备秋防帝嘉之已而鸾帅诸镇兵出宣大声言捣巢历久不击乃稍出近塞夜袭敌营斩老弱数级而还鸾自劾无功帝不问乃复请广集兵粮以明年大举北征命户部遣使尽括南都及各省布政司贮积且督历年逋赋时鸾恃宠作威福所上疏既自内批行

之不下兵部议会礼部尚书徐阶极言北事难以成功且後患有不可测议乃为稍寝】质实【顺义唐为顺州明置顺义县属昌平州今因之潞河在通州东石匣在密云县东北六十里有石如匣因名弘治十七年筑城周四里有奇自是增兵置守为要地张家口在万全右卫东三十五里郭宗臯字君弼福山人陈辉静海人赵锦字元朴余姚人王忬字民应太仓人商大节徐州人杨守谦字允亨徐州人徐阶字子升华亭人王仪字克敬文安人】

议谕达求贡事

【时谕达大举薄都城纵所掳内官杨增持书入城求贡帝召大学士严嵩李本礼部尚书徐阶于西苑帝曰今事势如此奈何嵩对曰此抢食技耳不足患阶曰今兵在城下杀人放火岂可言是抢食正须议所以御之之策帝顾阶曰卿言是因问彼之求贡书安在嵩出褚袖中帝曰此事当何以应之嵩曰此礼部事阶曰事虽在部然关系国体重大须皇上主张帝作色曰事须大家商量何得专推与朕阶曰今敌驻兵近郊而我战守之备一无所有此事宜权许以欸敌第恐将来要求无厌耳帝曰苟利社稷皮币珠玉非所爱阶曰止于皮币珠玉则可矣万一有不能从者则奈何帝悚然曰卿可谓远虑然则当如何阶请以计欸之言其书皆汉文朝廷疑而不信且无临城胁贡之理可退出大边外别遣使齎番文书因大同守臣为奏事乃可从如此往还之间四方援兵皆至我战守有备矣帝曰卿言是还出与百官议之于是徐阶集廷臣上谕达求贡议略言敌犯我郊畿蹂躏土地?刘人民揆之大义所当必诛今虽称臣求贡然信使不入表文不具且其文书皆汉字真伪不可知臣等以为求贡不可必许且遣通事齎勅谕之如果悔罪求贡则当敛兵出境具表欸塞听朝廷处分如驻兵境内要求远赏则惟有励将集兵以大义致讨必使匹马不返以泄神人之怒从之】

发明【自嘉靖二十一年後谕达无岁不求贡市朝廷既无定策以应之又不修明战守之实至於戎马环郊乃诏廷臣集议不几于城下之盟貽国大辱哉时嵩实秉国钧浸无区尽朝堂召对但云抢食技耳不足患是何异秦越人之视肥瘠况身为元辅当军书危急之时竟徒委其事於礼部则将焉用彼相矣阶请以计疑之虽得一时权宜之术然敌骑既退亦无善後良策卒至仇鸾开马市以坏边而所谓振威雪耻之举君若臣曾不系于念虑焉庙谟若此国欲无侮得乎】

谕德赵贞吉为荔波典史

【方谕达薄都城以谩书求贡诏百官集议国子监司业赵贞吉奋?大言曰城下之盟春秋耻之既许贡则必入城傥要索无已奈何徐阶曰君必有良策贞吉请追录周尚文功以励边帅出沈束于狱以开言路轻损军之令重赏功之格遣官谕诸将力战退敌时帝遣中使矚廷臣曰中莫有发一语者独闻贞吉言心壮之召入左顺门令手疏便宜立擢左谕德兼监察御史奉勅宣谕诸军给白金五万两听随宜劳赏严嵩心恶之会撰勅不令督战以轻其权且不予一卒护行时敌骑充斥贞吉驰入诸将营散金犒士宣谕德意明日即复命帝怒谓贞吉漫无区画徒为周尚文沈束游说下狱廷杖谪荔波典史】质实【赵贞吉字孟静内江人】

九月以仇鸾总督京营戎政

【吏部侍郎王邦瑞摄兵部事以营政久弛上言国初京营劲旅不减七八十万自三大营变为十二团营又变为两官廳虽寢不如初然额军尚三十八万有奇今武备积弛见籍至十四万而操练者不过五六万支粮则有调遣则无比敌骑深入战守俱困因此其弊不在逃亡而在占役不在军士而在将领盖提督以下诸官多世胄纨绔平时占役营军以空名支饷临操则集市人呼舞博笑而已乞遣官精核帝是其言於是悉罢团营两官厅复三大营旧制设戎政府以仇鸾统之邦瑞协理鸾方贵幸请选各边兵更番入卫分隶京营塞上有警主将不得徵集由是边事日坏】质实【王邦瑞字为贤宜阳人时以兵部左侍郎督营务复条上兴革六事言宦官典兵古今大患请尽撤提督监枪者帝报从之邦瑞又条上安边十二事仇鸾构邦瑞於帝帝眷渐移会鸾奏革蓟州总兵官李凤鸣大同总兵官徐珏任而荐京营副将成勲代凤鸣密云副将徐仁代珏邦瑞言朝廷易置将帅必采之公卿断自宸衷所以慎防杜渐示臣下不敢专也且京营大将与列镇不相统摄何缘京营乃黜陟各镇今曲徇仇鸾请臣恐九边将帅悉奔走托附非国之福也帝不悦下诏让鸾鸾又欲节制边将罢筑蓟镇边垣邦瑞皆以为不可鸾大憾益肆讒会邦瑞复陈安边大计遂被旨落职鸾死踰十年始复官】

废郑王厚烷为庶人

【帝修斋醮诸王争遣使进香厚烷独上居敬穷理克己存诚四箴演连珠十章以神仙土木为戒帝怒下其使者于狱已而故盟津王见瀋子佑橈讐厚烷谋不轨遣官往讯无左验帝下诏敷厚烷骄慢无礼废为庶人幽之凤阳厚烷世子载堦笃学有至性痛父非罪见系筑土室宫门外席藁独处者十九年隆庆初厚烷复爵载堦始入室】质实【厚烷懿王佑樞子见瀋佑樞之叔初见瀋以罪革为庶人至是佑樞求复郡王爵怨厚烷不为奏遂承帝怒抚厚烷四十罪以叛逆告】

冬十月张治卒

【入阁凡二十一月而卒年六十有三】

削刑部郎中徐学诗籍

【谕达既退诏廷臣陈制敌之策诸臣多掇细事以应学诗愤然曰大奸柄国乱之本也乱本不除能制外患哉即疏劾严嵩畧曰制外之要在于内治内治之要在于端本今大学士嵩辅政十载奸贪日甚内结勲贵外比羣下文武迁除悉要厚贿致此辈掊克军民酿成边患国事至此犹复敢谬引佳兵不祥之说以谩清问近因都城有警密输财贿南还大车数十乘楼船十余艘水陆载道骇人耳目又纳夺职总兵官李凤鸣二千金使镇蓟州受老废总兵官郭琮三千金使督漕运举朝莫不叹愤而无人敢言之者诚以内外盘结上下比周积久势成而其子世蕃又凶狡成性擅执父权凡诸司章奏必先关白然後上闻掩罪饰非乘机构隙故凡论之者虽不能显祸之于正言直指之时莫不假事因人陰祸之于迁除考察之际天下痛

心视为鬼蜮伏愿陛下罢嵩父子别简忠良则内治既清外患自宁矣帝览疏颇感动方士陶仲文密言嵩孤立尽忠学诗特为所私修隙耳帝於是发怒下学诗诏狱削其籍又都给事中厉汝进劾世蕃穷弄父权嗜贿张焰嵩上疏自理且求援中官以激帝廷杖汝进谪典史明年嵩假考察夺其职】质实【徐学诗字以言上虞人先劾嵩者叶经谢瑜陈绍与学诗皆同里时称上虞四谏厉汝进字子条涿州人】

发明【蔡京之回邪林灵素奉为左元仙伯严嵩之奸恶陶仲文称其孤立尽忠古今方士游词如出一辙而弄权窃位者必交结佞幸以内固亦前後若一人焉独怪嘉靖览学诗之疏亦既为之感动矣而一言荧听遽尔转移俾得以脱罪戾而肆其报复史称嘉靖英察自信何至黑白变乱是非颠倒竟堕其术而不知耶至嵩之求援中官诬陷憾已则又小人患失之常无所不至矣】

十一月祔仁宗祔孝烈皇后于太庙

【初睿宗入庙帝恐後世议桃遂欲当已世预祔仁宗以孝烈祔庙自为一世下礼部议尚书徐阶抗言女后无先入庙者帝大怒阶惶恐不敢守前议遂祔仁宗升祔孝烈皇后】

【辛亥】三十年春正月戊锦衣卫经历沈链于边

【初赵贞吉请勿许谄达求贡廷臣无敢是贞吉者链独大言以为是吏部尚书夏邦谟目之曰若何官链曰锦衣经历沈链也大臣不言故小吏言之链愤国无人致敌猖獗请以万骑护陵寝万?护通州军储合勤王师十余万击其惰归可大得志帝不省时严嵩用事边臣争致贿遗及失事惧罪益辇金贿嵩链时时扼腕一日从尚宝丞张逊业饮酒半及嵩因慷慨詈骂流涕交颐遂上疏曰昨岁谄达犯顺陛下欲乘时北伐此文武羣臣所共当勦力者也然制乘必先庙算庙算必先为天下除奸邪然後外患可平今大学士嵩当主忧臣辱之时不闻延访贤豪咨询方略惟与子世蕃规图自便忠谋则多方沮之谄谀则曲意引之要贿鬻官沽恩给客朝廷赏一人曰由我赏之罚一人曰由我罚之人皆伺严氏之爱恶而不知朝廷之恩威尚忍言哉姑举其罪之大者言之纳将帅之贿以启边陲之衅一也受诸王馈遗每事陰为之地二也揽御史之权虽州县小吏亦皆货取致官方大坏三也索抚按之岁例致有司逡相承奉而闾阎之财日削四也陰制谏官俾不敢直言五也妬贤嫉能一忤其意必致之死六也纵子受财敛怨天下七也运财还家月无虚日致道途驿騷八也久居政府擅宠害政九也不能協谋天讨上貽君父忧十也因并论邦谟谄谀黷货状请均罢斥以谢天下帝大怒榜之数十谪佃保安链既被谪中外慑嵩威益箝口南京御史王宗茂拜官甫三月即劾嵩负国十罪疏至通政司赵文华密以示嵩留数日始上由是嵩得预为地遂以宗茂诬诋大臣谪平阳县丞】质实【平阳五季吴越县明属温州府今因之沈链字纯甫会稽人夏邦谟涪州人王宗茂字时育京山人宗茂疏曰嵩本邪谄之徒寡廉鲜耻久持国柄作福作威薄海内外罔不怨恨如吏兵二部每选请属二十人人索贿数百金任自择善地至文武掎吏尽出其门此嵩负国之罪一也任私人万案为功考郎凡外官迁擢不察其行能不计其资历唯贿自问致端方之士不得为国家用此嵩负国之罪二也往岁遭人论劾潜输家资南返辇载珍宝不可数计金银

人物多高二三尺者下至溺器亦金银为之不知陛下宫中亦有此器否耶此嵩负国之罪三也广市良田遍于江西数郡又於府第之後积石为大坎实以金银珍玩为子孙百世计而国计民瘼漫不措怀此嵩负国之罪四也畜家奴五百余人往来京邸所至騷扰驿传虐害居民长吏皆怨怒而不敢言此嵩负国之罪五也陛下所食大官之饌不数品而嵩则穷极珍错殊方异产莫不畢致是九州万国之待嵩有甚於陛下此嵩负国之罪六也往岁敌迫京几正上下忧惧之日而嵩贪肆益甚致民俗歌謠遍于京师达於沙漠海内百姓莫不祝天以冀其早亡嵩尚恬不知止此嵩负国之罪七也募朝士为乾儿义子至三十余辈若尹耕梁绍儒早已败露此辈实衣冠之盜而皆为之爪牙助其虐焰致朝廷恩威不出於陛下此嵩负国之罪八也夫天下之所恃以为安者财也兵也不才之文吏以赂而出其门则必剥民之财民奈何不困不才之武将以赂而出其门则必克军之饷兵奈何不疲迹者四方地震其占为臣下专权试问今日之专权者宁有出于嵩右乎陛下之帑藏不足支诸边一年之费而嵩所畜积可贍儲数年与其开卖官鬻爵之令以助边盍去此蠹国害民之贼籍其家以纾患也】

三月开马市于大同宣府谪兵部主事杨继盛为狄道典史

【仇鸾驕怯畏敌密遣人持货币结谄达义子托克托使贡马互市谄达许之投译书于宣大总督苏佑佑以闻鸾与严嵩定议每岁春秋两市命侍郎史道领其事兵部车驾司署员外郎主事杨继盛以讐耻未雪示弱辱国乃奏言十不可五谬其畧曰互市者和亲之别名也谄达蹂躪我陵寢?刘我赤子大讐也今不惟不能声罪致讨而反与之为和议之事此忘天下之大讐一不可也下诏北伐日夜征繕兵食乃翻然有开马市之议则平日所以选将练兵者为何此失天下之信义二不可也堂堂中国而为此市易之事此损国家之重威三不可也海内豪杰磨砺待试今马市一开忘赤子之讐厌兵甲之用异日复欲号召谁肯兴起此隳豪杰效用之志四不可也使边镇将帅日弛封疆之防益滋偷安之气废弛既久一旦有急何以整顿此懈天下修武之心五不可也边卒私通境外例率裁禁今马市一开则彼之交通者乃王法所不禁将来勾引之祸可胜言乎此开边方私通之渐六不可也盜賊伏莽畏国家之威而不敢动也今马市一开则彼皆以为天下兵威已弱睥睨之变必开此起百姓不靖之渐七不可也谄达往岁深入乘我无备故也今备之一岁以互市终彼谓国有人乎此长敌人轻中国之心八不可也或谄达负约不至至矣或陰謀伏兵突入或今日市明日复寇或以下马索上直是我不能羈縻乎彼而彼反得愚弄夫我以此墮谄达狡詐之計九不可也以马与银数计之每年市马约数十万匹四五年间须得马数百万匹每年约用银数百万两四五年间须费银数千万年永久之计将安在乎此财与马两难相继十不可也议者曰吾外为市以羈縻之而内修我甲兵此一谬也夫敌欲无厌其以衅终明甚苟内修武备安事羈縻又曰吾因市以益吾马此二谬也夫和则不战马将安用且彼安肯以自乘之良马而市於我乎不过瘦弱不堪之物不服水草将不日俱毙而已又曰市不已彼且入贡此三谬也夫贡之赏不貲是名美而实大损也市马则获小利而无名开贡则虽有名而费大市马固不可许贡亦岂可哉又曰谄达利我市必无失信此四谬也吾之市能尽给其衆乎能信不给者之无入掠乎纵使少有羈縻不过暂保一二年无事耳不知二三年之後将何如处之哉又曰佳兵不祥此五谬也敌加已而应之何佳也人身四支皆痈疽毒日內攻而憚药石可乎此盖必有为陛下主其事者故公卿大夫知而莫为一言宜奋独断悉按诸言互市者疏入帝颇感动下鸾等会议鸾攘臂言

曰竖子目不睹敌宜其易之诸大臣遂言遣官已行势难中止帝尚犹豫鸾复进密疏乃下继盛锦衣狱敲拶一百贬狄道县典史】质实【杨继盛字仲芳容城人史道涿州人】

秋九月京师地震

【乙未京师地震有声】

【壬子】三十一年春二月振宣大饥

【宣大二镇大饥人相食兵部请量借军饷银振之帝切责本镇守臣不先入告令各自陈状命督饷侍郎马坤驰往经理振济事宜仍发库钱二十万给之坤临行奏请增给钱十万从之】

三月置内府营

【置于内教塲以练诸内侍】质实【内教塲在延景门西】

发明【明之末造营务尽领于中官而宿卫禁军之制渐就隳废史称内臣之势惟嘉靖时为少杀乃忽创为内府营以练诸内侍宝则愆于庚戌之变京兵不足御敌而为此苟且之计夫兵之怯弱由于将帅非人改弦而更张之岂无良法区区内侍即使简练有方又岂足以厚拱卫而备边警徒使阉侍习兵貽患来世厥後魏忠贤遂有内操之事盖实托昉于此作法于凉毙将若之何】

以礼部尚书徐阶兼东阁大学士预机务

【初阶由夏言荐严嵩忌之阶恐被中伤乃精治齐词迎帝意左右亦多为地者遂入阁】

秋七月以王忬巡抚浙江备倭

【自朱纨死浙江不设巡抚者四年中外不敢复言海禁事奸民汪直徐海陈束麻叶辈悉逸海岛为主谋倭悉听其指挥遂诱之入寇而海中巨盗皆袭倭服饰旗号分艘掠内地无不大利由是倭患日剧廷议复设巡抚以王忬任之然贼已蔓延不可扑灭初沿海要地建卫所设战船董以都司等官控制周密迨承平久船敝伍虚及遇警乃募渔船以资哨守兵非素练船非专业见寇舶至辄望风逃匿以故贼帆所指至是时无不残破明年春直勾诸倭大举入寇连船数百蔽海而至浙东西江南北濒海数千里同时告警破昌国卫陷上海城流刼乍浦金山太仓崇明常熟嘉定又明年掠苏州松江复趋江北薄通泰寻陷嘉善崇明入崇德县掠嘉兴还屯柘林纵横往来忬不能御乃移忬巡抚大同以李天宠代之】质实【昌国卫明置今裁故城在浙江宁波府象山县西南乍浦镇名在嘉兴府平湖县东南海口要地金山明卫今为县属松江府太仓明初立卫弘治中置州属苏州府本朝因之今升直隶州嘉善明县宣

德中置属嘉兴府今因之崇德五季吴越置县明属嘉与府今改名石门属嘉兴府柘林镇名在松江府华亭县东南有城李天宠孟津人】

八月仇鸾死诏戮其屍

【马市既开诸边日苦侵暴帝命鸾出镇大同鸾不得已出镇川堡遇伏败还至是病疽犹恋大将军印不肯上徐阶密疏发鸾罪兵部尚书赵锦亦言强敌压境而鸾病不能军万一敌衆长驱貽害君父不小帝命罢鸾以侍郎蒋应奎暂字戎政鸾大恚恨疽益剧遂死始鸾与嵩约为父子已而相恶嵩密疏毁鸾鸾亦陈嵩世蕃贪横状帝少疏嵩嵩因结锦衣都督陆炳共图鸾鸾既死炳尽发其通敌纳贿状帝大怒下诏暴鸾罪追戮之传首九边】质实【镇川堡在大同府东北五十里蒋应奎大同人】

九月河决徐州

【运道淤阻五十里总河都御史曾钧言刘伶台至赤晏庙凡八十里乃黄河下流疏濬宜先次则草湾老黄河口亦当更筑长堤并增筑高家堰长堤缮新庄等旧牖以遏横流从之】质实【刘伶台在淮安府山阳县东北淮水岸傍赤晏庙在安东县草湾在山阳县西北高家压堤在山阳县西南洪泽湖东後汉陈登建明陈瑄重筑新庄插在清河县济祠东明初建後废曾钧字廷和进贤人】

罢马市

【谕达以羸马索厚值弗于辄大譁大同市则掠宣府宣府市则寇大同甚者朝市暮寇并羸马掠去帝恶之诏罢马市】

十二月杀光禄寺少卿马从谦

【中官杜泰提督光禄寺乾没内帑岁钜万从谦奏发其罪并及宫中斋醮事命下诏狱杖杀之】质实【马从谦字益之漂阳人隆庆初恤先朝建言杖死诸臣中官追恨从谦沮之给事中王治御史龐尚鹏力争终不许】

御定资治通监纲目三编卷二十三

卷二十四

钦定四库全书

御定资治通监纲目三编卷二十四

【起癸丑明世宗嘉靖三十二年尽壬戌明世宗嘉靖四十一年】凡十年

【癸丑】三十二年春正月戊寅朔日有食之陰云不见【日食不见有顷大雪百官表贺因奏谢郊庙】

发明【史书日食陰云不见者多矣日食有常度而陰云遮蔽止于一方所谓不见者独京师不见耳宋绍兴三十一年正月朔太史奏日当食不食然当时犹以日食免朝读史者黷焉嘉靖惑于瑞应惟以粉饰治象为心一时诸臣迎合意旨纷纷讳饰具表称贺导谀贡媚相习成风几不可胜责至因表贺之故奏谢郊庙则是愚人而并以愚神其谁欺欺天乎】

遣侍郎吴鹏振淮徐水灾

【徐邳等十七州县连被水患饥民甚衆剽刼吏不能禁乃命河道都御史曾钧等濬刘伶台至赤晏庙八十里筑草湾老黄河口增高家堰长堤缮新庄等旧牐命发淮徐仓米麦四万石运司余盐银五万两遣刑部左侍郎吴鹏振之】质实【吴鹏字万里秀水人钧等疏畧曰刘伶台至赤晏庙凡八十里乃黄河下流顷为淤沙壅塞以致奔溃此其疏濬所最先者次则草湾老黄河口冲决淹没安东一县亦当急筑既成之後宜筑长堤矾嘴以备冲击又三里沟新河口比旧口水高六尺若开旧口虽有沙淤之患而有害稍轻若开新口未免淹没之虞而漕舟颇便宜将新口暂闭建置牐座及将高家堰增筑长堤原建新庄等牐加石修砌以遏横流鹏等疏畧曰比年淮徐水患议者谓海口积沙壅阏下流所致今臣亲历其地贩鬻之舟往来无滞乃知积沙之说出自传闻惟草湾老黄河口刘伶台宜挑濬筑塞使水复故道不致横溃三里沟新开河口迎纳泗水清流可以避黄河之冲宜建牐以时啓闭至六月南京科道祁清徐枋各奏言还因山东徐邳岁荒特遣重臣振恤第今天下被灾之地不独徐邳为然若南畿山西陕西暨北直顺德等府及湖广江浙所在凶歉或经岁恒阳赤地千里或大水腾溢畎亩草根木皮掘剥无余子女充殍道殣相望其归德滕沂诸处盗贼公行道途梗塞大江以南苏松滨海诸处则倭寇狂噬井邑为墟饥馑师旅交兴至非破格蠲振不足以苏民困而延国脉也乃京师之帑藏既虚各省之搜括已竭额外之征求未已军兴之供亿日烦司农櫛櫛朝不给夕百方谋画求所以生财者不得也则蠲振将安所取乎臣谓当汰冗费省繁文乞下所司议寻户部议言各处灾伤自奉命振贷外更勅抚按官多方振恤至于军国调度今京营正备兵及旗守等三卫新军及官校勇士数万皆仰给官食其他无用之兵无事之官无名之支无益之费不可胜纪总太仓赋课入少出多无可抵补而近来缮边抚敌修城濬河衣装赏赐皆出岁额会计之外又安有余裕以佐百姓急宜如清等议通行两京及各省抚按官令各条上冗费以缓征求庶民困可苏从之】

兵部员外郎杨继盛上疏劾严嵩下诏狱

【帝既诛仇鸾罢马市乃思继盛言自典史四迁至兵部员外郎时严嵩方用事恨鸾初凌已善继盛首攻鸾欲骤贵之复改兵部武选司而继盛恶嵩甚于鸾且念起谪藉思所以报国抵任甫一月即草奏劾嵩斋三日乃上奏曰臣孤直罪臣蒙天地恩超擢不次夙夜只惧思图报称盖未有急于请诛贼臣者也请以严嵩十大罪为陛下陈之祖宗罢丞相设阁臣备顾问视制草而已嵩乃俨然以丞相自居百官奔走请命直房如市无丞相名而有丞相权是坏祖宗之成法大罪一陛下用一人嵩曰我荐也斥一人曰此非我所亲陛下有一人嵩曰我救也罚一人曰此得罪于我伺陛下喜怒以恣威福是窃君上之大权大罪二陛下有善政嵩必令子世蕃告人曰主上不及此我议而成之欲天下以陛下之善尽归于嵩是掩君上之治功大罪三陛下令嵩票拟盖其职也嵩何取而令世蕃代之题疏方上天语已传故京师有大丞相小丞相之谣是纵奸子之僭窃大罪四严效忠严鹄乳臭子耳未尝一涉行伍皆以军功官锦衣两广将帅俱以私党躡府部是冒朝廷之军功大罪五逆鸾下狱贿世蕃三千金嵩即荐为大将已知陛下疑鸾乃互相排诋以泯前迹是引悖逆之奸臣大罪六谄逵深入击其惰归大机也嵩戒丁汝夔勿战是误国家之军机大罪七郎中徐学诗给事中厉汝进俱以劾嵩削籍内外之臣中伤者何可胜计是专黜陟之大柄大罪八文武迁擢但论金之多寡将弁惟贿嵩不得不朘削士卒有司惟贿嵩不得不掊克百姓毒流海内患起域中是失天下之人心大罪九自嵩用事风俗大变贿赂者荐及盗跖踈拙者黜逮夷齐守法度者为迂滞巧弥缝者为才能是敝天下之风俗大罪十嵩有是十罪而又济之以五奸以左右侍从之能察意旨也厚贿结纳得备闻言中言动是陛下之左右皆贼嵩之间谍以通政司之主出纳也以赵文华为使凡有疏至必先送嵩阅竟然後入御是陛下之喉舌乃贼嵩之鹰犬畏厥卫之缉访也即令子世蕃结为婚姻是陛下之爪牙皆贼嵩之瓜葛畏科道之多言也非其私属不得与台谏有所爱憎即授之论刺是陛下之耳目皆贼嵩之奴隶惧部寺之犹有人也择有才望者罗致门下联络盘结深根固蒂是陛下之臣工皆贼嵩之心膂陛下奈何爱一贼臣而使百万苍生?于涂炭哉愿陛下听臣之言察嵩之奸或召问二王或询诸阁臣重则置之宪典以正国法轻则谕令致仕以全国体疏入帝已怒嵩见召问二王语喜谓可指此为罪密构于帝帝益大怒下继盛诏狱诘何故引二王继盛曰非二王谁不慑嵩者狱上杖之百移刑部定罪侍郎王学益嵩党也欲坐继盛诈传亲王令旨绞郎中史朝宾持之嵩谪之外于是尚书何鳌竟如嵩指成狱时继盛下狱将杖或遗之蚺蛇胆却之曰椒山自有胆何蚺蛇为椒山继盛别号也及入狱创甚夜半而苏碎甃盥手割腐肉肉尽筋挂膜复手截去狱卒执灯颤欲坠继盛意气自若】质实【严效忠严鹄俱世蕃子是年二月工部尚书欧阳必进奏辨杨继盛所论严效忠冒功事诏兵部核覆子是武选司署郎中周冕言臣奉诏检嘉靖二十七年通政司状严效忠时年十六因武会试未第咨送两广军门听用未及年余总兵官陈圭都御史欧阳必进奏黎贼平遣效忠报捷授锦衣卫试所镇抚未踰月严鹄言兄效忠曾斩首七级并功加赏应得署副千户今效忠身抱痼疾鹄请代职臣心疑其伪方将核实以闻嵩子世蕃乃自创一稿属臣依违题覆臣观其稿率诞漫舛戾如效忠曾中武举何初无本籍起送文牒今又称民人而不言武举如效忠果鹄之兄世蕃之子则世蕃数子俱幼未有名效忠者如效忠果斩首七级则当时状称年止十六岂能赴战何军门诸将俱未闻斩获功独宰相一孙乃骁勇冠三军如曰效忠对敌胫臂受创计临阵及差委相去未一月何以万里军情即能驰报如曰效忠到京以创甚疾

故何以鹄代职之日止告不能受职如曰效忠镇抚当代则奏捷功止及身例无传袭如曰效忠功当并论例先奏请何止用通状而逼令司官奉行臣悉心廉访初未有名效忠者赴军门听用鹄亦非效忠亲弟其姓名乃诡设首级亦要买非有纖毫实迹必进既嵩乡曲圭又世蕃姻亲依阿朋比共为欺罔且累朝以来未闻有宰相之子孙送军门报效者乞特赐究正使天下晓然知朝廷有不可幸之功不可犯之法疏入下冕诏狱拷讯斥为民至三月巡按云南贵州御史赵锦疏言臣伏见曰食元旦变异非常又山东徐淮仍岁大水四方频地震灾不虚生昔太祖高皇帝罢丞相散其权于诸司为後世虑至深远今之内阁无宰相名而有其实非高皇帝本意今严嵩怙宠张威窃权纵欲事无巨细罔不自专又有违忤必中以祸百司望风惕息天下事未闻朝廷先以闻政府白事之官班候于其门请求之赂辐辏于其室铨司黜陟本兵用舍莫不承其意旨边臣失事率腴削军资纳赇嵩所无功可以受赏有罪可以追诛至宗藩勲戚之袭封文武大臣之赠谥其迟速予夺一视赂之厚薄以至希宠干进之徒妄自贬损称号不伦廉耻扫地有不忍言者自庚戌之後陛下尝募天下武勇以足兵竭天下财力以给饷搜天下遗逸以任将而封疆之臣卒未有为陛下寬宵旰忧者盖缘权臣行私将吏风靡以掊克为务以营竞为能致朝廷之上用者不贤贤者不用赏不当功罚不当罪财用已竭而外患未见底宁民困已极而内变又虞将作愿陛下立斥罢嵩以应天变会周冕以争冒功事下狱而锦疏适至帝震怒谓锦欺天谤君遣使逮锦下诏狱拷讯榜四十斤为民隆庆初起冕太仆少卿未任卒擢锦太常少卿巡抚贵州终刑部尚书始锦以忤严嵩得祸及之官贵州道出嵩里见嵩葬路旁惻然悯之属有司护视人以是称锦长者二王谓裕王载堉即穆宗及景王载圳也玉学益安福人史朝宾晋江人何鳌山陰人】

三月振陕西山东饥

【发陕西布政司仓库钱谷振济陕西发临清仓粟及泰山香钱振恤山东】

闰三月筑京师外城

【以边警故筑外城一十五里閱九月讫工】质实【京师内城九门筑自明初至嘉靖二十一年时边报日至都御史毛伯温等言古者有城必有郭宜筑外城下户工二部议以匱乏停止至是给事中朱伯辰复言高皇帝定鼎金陵于时即筑外城圣虑宏远盖为万年之计文皇帝移都北平密迩边塞顾有城无郭者则缔造方始未暇尽制耳臣窃见城外居民繁夥无虑数十万户且四方万国商旅货贿所集不宜无以圉之矧今边报屡警不可不及时图之臣尝履行四郊咸有土城故址环绕周规可百二十余里若仍其旧贯增卑培薄补缺续断即可事半功倍矣疏入命相度外城旧址周围共计七十余里以闰三月十九日兴工筑正南一面转抱东西角楼长二十八里凡七门正南曰永定南之左曰左安南之右曰右安东曰广渠东之北曰东便西曰广宁西之北曰西便】

倭寇浙江

【海贼汪直纠羣盜勾集各岛倭人大举入寇连舰百余艘蔽海而至自台宁嘉湖以及苏

松至于淮北滨海数千里同时告警贼屯据浙江昌国卫凡五日参将俞大猷以舟师攻之始去巡视浙江都御史王忬条上海防八事并以倭寇出境浮海东遁奏闻倭自闰三月登岸至六月留内地凡三月余若太仓海盐嘉定长洲诸县金山镇海诸卫所皆被焚掠上海县昌国卫南汇吴淞江乍浦诸所皆为所攻?崇明华亭青浦象山嘉兴平湖海宁临海黄岩慈谿山陰会稽余姚诸县乡镇焚荡畧尽】质实【海盐古武原乡秦置县元为海盐州明洪武中复为县属嘉兴府长洲本吴之长洲汉为吴县唐置长洲县明属苏州府今皆因之金山卫在松江府东南七十二里洪武二十年建以山而名卫南濒海与金山对峙有城周十二里南汇守御千户所在上海县东南八十里洪武二十年建所城周九里有奇吴淞江守御千户所在嘉定县东南四十里吴淞江北岸明洪武十九年建有城当吴淞江入海之口乍浦在嘉兴府平湖县东南二十里与海盐县接界明洪武中筑城以为备御华亭汉娄县地三国时吴封陆逊为华亭侯即此唐天宝中置华亭县明属松江府青浦明置县属松江府平湖明置县属嘉兴府今皆因之海宁汉海盐县元改曰海宁县明属杭州府今为海宁州仍属杭州府黄岩隋临海县地唐天授中改黄岩县明属台州府慈谿古句章县地唐开元中置慈谿县明属宁波府今皆因之王忬条上海防八事一禁近海豪民通倭以絶祸本二照各边例惟以奋勇血战为功不以损伤为罪三选调闽浙兵相兼操习以资防御四通行两广直隶巡抚操江官远行哨探分布兵船彼此夹攻五两省守巡兵备官照原定地方驻劄以专责成六寛禁令以开自新如胁从贼犯准令投首积年渠魁亦听归降七闽浙渔船量议收税及查理盐课事宜以助军饷八滨海顽民接济外寇及泄漏消息者处之极刑全家发边充军部议俱从之忬後复请筑嘉善崇德桐乡德清慈谿奉化象山诸县城而恤被寇诸府】

秋七月谿達大举入侵

【初叛人赵全邱富等以罪亡入敌招集亡命居丰州筑城自卫垦水田构宫殿号曰板升板升华言屋也谿達每入侵必置酒全所问计全等教以制鉤杆攻城堡之法谿達信用之是岁春两犯宣府至是复大举深入下浑源灵邱广昌急攻插箭浮图等峪游击陈凤朱玉力战郤之敌分兵东犯蔚而掠代繁峙已驻鄜延二十日屠掠延庆诸城几遍会久雨乃去未几复以万骑侵大同巡抚赵时春御之遇伏败绩总兵官李洙战死全军皆没明年春复犯宣大攻蓟镇墙百道并进警报日数十至京师戒严蓟辽总督杨博悉力拒守募死士夜斫其营敌惊扰乃遁】质实【插箭峪在今直隶易州广昌县东南浮图峪在广昌县东路出紫荆关繁峙汉县东魏改郡金为坚州明洪武二年复为县属代州延庆州秦属上谷郡元属奉圣州延佑三年改置龙庆州明隆庆初改延庆州今皆因之杨博字惟约蒲州人】

金星昼见

【自戊辰至辛未四日乃?】

九月柘城盗师尚诏作乱官军讨平之

【尚诏本盐徒以私贩作奸剽掠远近官府不能制巡抚谢存儒苟幸无事假以总保长令

总诸镇民捕盗尚诏肆为威虐守臣欲诛之遂反结剧盗数千薄归德城其党啓门纳之乃刼狱囚掠帑藏去官军分道击贼遇之鄢陵与战败绩复击之于霍山贼团官军无敢进者副使曹邦辅斩最俊者士卒竞进贼大溃擒斩六百余人已而追获尚诏于山东莘县诏即所在斩之贼起四十余日破府一州二县八屠戮十余万人三省皆震】质实【柘城隋县明属睢州今属归德府霍山汉灊县地隋为霍山县明属六安州莘县汉阳平县隋为莘县明属东昌府今皆因之谢存儒蒲州人曹邦辅字子忠定陶人】

冬十月振河南山东饥

【户部言河南山东岁饥盗起请发临清仓米七万石以三万石自卫河达卫辉振河南以四万石振山东仍敕抚按官出官银数万两于隣近州县采粟振民及立均采之法以平时值从之会吏部侍郎程文德上言今直隶河南山东徐邳淮扬等处方数千里水灾异常民不聊生流离载道言官陈振恤未见旦夕亟行臣闻救荒莫便乎近其人莫不便乎拘以常格请于两直隶二省各遣行人齎诏諭宣布德意慰拊颠殍令各州县自为振给聽其便宜处置凡官帑官廩赎纳劝借苟有以济民者一不限制又近日户部申明开纳事例亦暂许本地上纳随其所有粟黍麦菽之积可救饥者皆得输官计直视其合例者官为请部割而授之自抚按以下凡诸常事悉暂停辍一意振恤督责诸守令夙夜从事仍令造册登计全活之数定为等则以课殿最疏入下部议行】

【甲寅】三十三年春正月朔以贺表违式杖六科给事中于廷

【先是三十二年春正月朔以贺表语乖文体逮礼科给事中杨思忠于午门外杖之百罢为民六科官各夺俸一月以思忠初议孝烈皇后不祔庙帝心衔之也至是以贺表中失擡万壽字诏锦衣卫逮六科给事中张思静等各廷杖四十】

夏五月命张经总督军务讨倭

【南京兵部尚书张经等言洪武间以倭寇不靖遣信国公汤和经略海防凡闽浙滨海之区陆有城守水有战船故百余年寇不能为害其後法弛弊生军士有纳料放班之弊强富者散遣老弱者哨守战船损坏亦弃不修以致寇得而入请行各处巡抚严督所属预集兵船以守要害追捕纳料军士以寔行伍清理积岁料银以造战船从之朝议因以倭寇猖獗宜设总督大臣命经不解部务督江南北浙江山东福建湖广诸军便宜行事已而改经右都御史兼兵部侍郎专办讨贼时倭二万余据柘林川沙洼抄掠四出经至选将练兵为捣巢计以江浙山东兵屡败乃大徵两广狼土兵协力进剿】质实【柘林川沙洼在松江府上海县东南地连柘山嘉靖三十六年以巡抚赵忻等奏置川沙堡筑城周四里屯设官兵以备倭寇遂为巨镇海防考云堡南五十里为川沙漕】

秋七月诏勲戚大臣入直西内

【帝崇奉道教益笃特命驸马都尉鄢景和安平伯方承裕尚书李默王用宾左都督陆炳入直西内侍郎程文德闵如霖郭朴吴山供撰青词景和以不谙元理辞帝不悦罢其入直已而赉在直诸臣景和与焉景和辞免且言臣愿洗心涤虑效马革裹尸之报帝怒其怨谤熙为民】质实【方承裕锐之子李默字时言瓯宁人王用宾字元兴咸宁人陆炳平湖人以军籍隶锦衣卫闵如霖字师望乌程人郭朴字质大安阳人吴山字曰静高安人】

【乙卯】三十四年春二月遣赵文华督视海防

【文华谄事严嵩结为父子自通政使进工部侍郎东南倭患棘文华言七事首请遣官望祭海神帝用嵩言即命文华往兼督察军情文华恃宠恣睢百司震惧公私财赂填集江南为之困敝又牵制兵机颠倒功罪虽徵兵半天下而倭势愈炽时文华条陈备倭便宜七事首祭海神次令有司掩骼轻徭次增募水军次苏松常镇民田一夫过百亩者重科其赋且预徵官田税三年次募富人输财力自效事宁论功次遣重臣督师次招通番旧党并海塩徒易以忠义之名令使伺贼情因以为阉兵部尚书聂豹议行其五事惟增田赋遣重臣二事不行帝怒夺豹官】质实【聂豹字文蔚吉安永丰人】

夏五月张经败倭于王江泾诏逮经下狱

【赵文华颐指大吏是时张经方徵四方及狼土兵议大举经自以位在文华上独心轻之文华不悦与巡按御史胡宗宪比屡趣经进兵时诸路狼兵已集惟永顺保靖兵未至经欲待其至而後战文华再三言经守便宜且虑文华轻浅泄师期竟不以告文华怒疏劾经养寇失机疏方上而永保兵已至时柘林倭合新倭四千余人突犯嘉兴经分遣参将卢镗等督狼土兵水陆擊之保靖宣慰使彭荃臣与贼遇于石塘湾大战败之贼遂北走平望副总兵俞大猷以永顺宣慰司兵邀击之贼奔回王江泾保靖兵复急击其後贼遂大败诸军共擒斩首功一千九百八十有奇溺水及走死者甚衆余贼不及数百奔归柘林自有倭患以来东南用兵未有得志者此为军兴战功第一文华攘之以奏谓已与宗宪督师所致帝问严嵩嵩对如文华指且言狼兵初至经不许战至文华宗宪致捷遂冒以为功帝深入其言即下诏逮经经至疏言臣任总督半载前後俘斩五千乞赐原省不纳遂与巡抚李天宠俱论死系狱举朝知其冤莫敢奏】质实【石塘湾在今浙江嘉兴府石门县东北二十里亦曰石门塘出吴江之径道也平望镇名在江南苏州府吴江县南四十五里为控接嘉湖之要道嘉靖中倭寇尝屡犯此保靖宣慰使司明洪武中置永顺宣慰使司洪武二年为州六年置司皆属湖广行省王江泾在嘉兴府秀水县北相传以王江二姓居此而名今有镇为南北要冲胡宗宪字汝贞绩溪人俞大猷字志辅晋江人李天宠以文华谤除名至是复为宗宪所劾被逮时给事中李用敬閤望云等言今获首功以千计正倭夺气之时宜乘势捣柘林川沙洼之巢以殲丑类若复易帅恐惧机会帝大怒谓用敬等党奸阻法乃命锦衣逮用敬等各廷杖五十黜为民】

秋八月曹邦辅殲倭寇于浒墅关

【初倭自宜兴奔苏州会柘林洋贼遭风坏三舟余贼三百有奇登岸至陶宅镇据之邦辅

时巡抚应天虑二贼合为患也乃亲督副使王崇古会集各部兵扼其东路四面蹙之时金事董邦政把总娄宇督兵守陶宅邦辅计陶宅贼据险且衆未可进兵乃召邦政宇助剿合战斩首十九级贼始惧欲潜走太湖官军进及之尽殲其衆副将何卿师溃邦辅援之以火器破贼舟前後俘斩六百余人侍郎赵文华欲攘其功邦辅捷书先奏文华大恨既而与浙江巡按御史胡宗宪会邦辅攻陶宅贼诸营皆溃师退邦辅进攻之复败坐夺俸文华奏邦辅避难击易致师後期总督杨宜亦奏邦辅故违节制给事中夏梈孙濬争之得无罪文华奏言贼易灭以督抚非人致败乃逮系邦辅谪戍朔州】质实【陶宅镇在松江府华亭县青村所城东奉贤县之西北王崇古字学甫蒲州人】

冬十月杀张经李天宠遂及兵部员外郎杨继盛【继盛系狱三载帝犹无意杀之已而有为营救于嵩者其党胡植鄢懋卿怵之曰公不覩养虎者邪将自貽患嵩颌之会张经李天宠坐大辟嵩揣帝意必杀二人比秋审因附继盛名并奏得报继盛妻张氏伏阙上书请代夫死嵩屏不奏继盛遂与经天宠并弃西市杨继盛系狱每当朝审时观者塞衢见继盛囊三木辄愤叹曰柰何不以囊嵩而囊若耶或至泣下继盛临刑赋诗曰浩气还太虚丹心照千古平生未报恩留作忠魂补天下涕泣传诵之隆庆初恤直谏诸臣以继盛为首赠太常卿谥忠愍张经亦复官谥襄愍】质实【胡植南昌人鄢懋卿丰城人继盛妻张氏上书言臣夫继盛误闻市井之言尚狃书生之见遂发狂论圣明不即加戮俾从吏议两经奏瀝俱荷寬恩今忽阑入张经疏尾奉旨处决臣仰惟圣德昆虫草木皆欲得所岂惜一回宸顾下垂覆盆倘蒙末减不胜大幸若以罪重必不可赦愿即斩臣妾首以代夫诛夫虽远窜边隅必能效死疆场以报君父嵩不以闻】

十一月壬辰朔日有食之

十二月山西陕西河南地震

【三省同时地震声如雷鸡犬鸣吠陕西渭南华州朝邑三原及山西蒲州诸处尤甚或地裂泉涌中有鱼物或城郭庭舍?入地中或平地突成山阜河渭溢华岳终南山鸣河清数日官吏军民死者八十三万有奇】质实【渭南汉新丰县苻秦析置渭南县明属西安府今因之华州郑始封邑复属晋後魏为华山郡太和十一年兼置华州明属西安府今属同州府渭水在西安府北三十里华岳在华陰县南十里终南山在西安府南五十里】

【丙辰】三十五年春正月彗星见

【长尺许西南指渐长至三尺余扫太微垣东北行入紫微垣犯天牀至四月始灭】

二月振平阳延安灾

【以地震发银四万两振山西平阳府陕西延安府诸属县并蠲免秋粮有差时山西河南同日地震遣官祭告山川河洛并所在帝王寝庙】

以胡宗宪总督军务讨倭

【初张经被逮易以周琬未几又以杨宜代之自经逮後狼土兵皆愤恨无鬪志宜节制不行而赵文华威出宜上宜惟曲意奉之而已时倭聚柘林其党自绍兴窜转掠杭严徽宁国太平直犯南京出秣陵关刼溧阳宜兴抵无锡趋浒墅转鬪数千里杀伤几四千人历八十余日会文华欲夺应天巡抚曹邦辅之功而邦辅捷书已奏文华乃大集浙直兵与宗宪亲将之进营瓢桥倭悉銳来冲大败文华夺气乃定计招抚会川兵破贼周浦总兵俞大猷破贼海洋文华遂言水陆成功江南清晏请还朝许之比至言余倭无几盛毁杨宜而荐宗宪遂夺宜职而擢宗宪为兵部侍郎督诸军讨倭】质实【秣陵关在江宁县南今有镇周浦在奉贤县东南一名杜浦周琬应城人杨宜衡水人】

三月以赵文华为工部尚书

【文华归後东南败报踵至帝疑文华妄数诘严嵩嵩曲为解帝终不释会吏部尚书李默发策试选文中言汉武帝征讨而海内虚耗唐宗攻淮蔡而晚业不终文华劾其诽谤默坐死帝以是谓文华忠进尚书加太子太保初默为吏部尚书时严嵩柄政擅黜陟权默每持己意嵩衔之及大计羣吏默戒门下谢宾客嵩甚恨赵文华视师还默气折之至是巡按御史周如斗以倭事败状闻文华谋所以自解稔帝喜告讦遂劾默诽谤隆庆中复默官万历中諡文愍】

夏四月振陕西灾

【以陕西甘肃诸处地震诏发太仓银三万两于延绥一万两于宁夏五千两于甘肃一万两于固原協济民屯军饷仍令所司亟核被灾重者停免夏税并将先发帑银及备振贍罚事例茶马折谷银救贫民】

五月复遣赵文华视师

【倭警遽至部议再遣大臣督师已命兵部侍郎沈良才矣嵩令文华自请行且言江南人矫首望文华帝信之命兼右副都御史提督军务文华再出胡宗宪欲藉以通嵩諂奉无不至文华素不知兵亦倚宗宪两人交甚固已而宗宪俘陈东平徐海文华以大捷间归功上元帝大喜加文华少保宗宪右都御史】质实【俘陈东平徐海时宗宪遣指挥夏正?要海降且曰陈东已有约所虑独公耳海因疑东而东知海营有宗宪使者亦大惊由是有隙宗宪因谕海缚陈东麻叶许以世爵海果缚叶以献宗宪解其缚令以书致东图海而陰泄其书于海海怒海妾受宗宪赂亦说海于是海复行计缚东来献刻日请降忽率百余人先期猝至文华惧欲弗许宗宪强之海叩首伏罪宗宪慰之海自择沈庄屯其衆沈庄者东西各一以河为堑宗宪居海东庄以西庄处东党令东致书其党曰督府檄海夕擒若属矣东党惧乘夜攻海海走间道官军围之投水死海之未降也倭万余趋浙江皂林等处将军宗礼帅兵九百御之于崇德三里桥三战皆捷斩首三百余级海等辟易称为神兵会桥?军溃礼与镇抚侯槐何衡忠义官

霍贯道俱死之礼骁勇敢战所部箭手三十人皆壮士论者谓是役自兴兵以来用寡敌众血战第一功云礼虽败然海等亦病创夺气未几遂降】

采蓟州矿银

【蓟州玉旺峪进紫矿砂一百五十斤先是有诏采蓟州矿银礼部议遣司官一员往既行及是帝以天地之宝不可不重命追还原遣官更遣制勅房办事左通政王槐锦衣卫千户全天爵同内使一人采矿银于玉旺峪寻户部主事张芹进山东宝山诸矿砂二百十七两矿银二百两有奇帝以为少命从寔开取及严禁官民隐匿侵盗者其未取之所仍令奏闻取之】

夏五月冀州等处地震

【冀州高邑新河栢乡隆平广平等处一日三震声如雷】质实【高邑汉房子县北齐置高邑县明属赵州今因之】

秋九月徽王载堉有罪废为庶人自杀

【初载堉父厚燭善方士陶仲文仲文奏其忠敬奉道帝喜封为真人予金印及载堉嗣益以奉道媚帝命馆其父真人印南阳人梁高辅者自言能导引服食载堉用其术和药命高辅因仲文以进高辅被上宠不复亲载堉载堉衔之已而高辅为帝取药不得求载堉旧所蓄者载堉不与而与仲文高辅大恨乘间言载堉过失帝疑之夺真人印仲文知衅已成不敢言会有民耿安告载堉夺其女下按治有司因发其诸不法事诏废为庶人锢高墙载堉自缢死妻妾皆从之】质实【厚燭徽恭王见沛之孙】发明【载堉一宗藩也而忽有真人世及之封已足骇听伊谁所为方士仲文之力也俄而夺真人印而废为庶人伊谁所为方士高辅之力也载堉信有罪矣惩之以法亦复何枉奈何以取药不与为高辅所中伤遂致抵隙以申其罚使当日载堉悉以所蓄方药出付高辅则虽有告讐亦药中寝其事矣明法勅罚者固如是乎】

冬十月丙戌朔日有食之

金星昼见

【凡四日】

十一月陕西地震

【陕西山丹卫地一日三震声如雷关城多坏】

【丁巳】三十六年春三月山东大雨雹

【山东沂州雨雹大者如盂小者如鸡卵平地厚尺余径八十里伤人畜无算】质实【沂州後周置隋曰琅邪郡唐复曰沂州明属兗州府今为沂州府】

夏四月奉天华盖谨身三殿灾

【奉天殿灾延烧华盖谨身二殿及文武二楼奉天左顺右顺及午门并午门外左右廊尽毁越日乃熄帝下诏引咎修斋五日止诸司封事停刑五月】

秋九月赵文华有罪免其子恠思戍边

【三殿既灾帝急欲建正朝门楼文华猝不能办帝不恠且闻其视师江南黜货要功状思逐之严嵩言文华因触署南征疾尚未愈随令上章称疾帝手批令回籍休养制下举朝称贺嵩独不怡者累日帝怒无所泄会其子锦衣千户恠思以齎祀停封章日请假送父回籍帝大怒黜文华为民戍恠思边卫文华故病患及遭谴卧舟中意悒悒不自聊一夕手扞其腹腹裂脏腑出遂死】

杀前锦衣卫经历沈链

【链既至保安未有馆舍贾人某询知其得罪故空家舍授之里长老亦日致薪米遣子弟就学链语以忠义大节皆大喜塞外人素戇直又稔知严嵩恶争詈嵩以快链且缚草为人象李林甫秦桧及嵩醉则聚子弟攒射之或蹕骑居庸关口南向戟手詈嵩痛哭而归语稍稍闻京师嵩大恨其党路楷巡按宣府世蕃属与总督杨顺合图之两人日夜谋中链会蔚州获妖人阎浩词所连甚衆顺喜谓楷曰是足以报严公子矣窜链名其中上之遂斩宣府市戍子襄极边予顺一子锦衣千户楷待銓五品卿寺顺曰严公薄我赏意岂未愜乎并取链子袞袞杖杀之链隆庆初赠光禄少卿任一子官子襄乃上书言路楷杨顺杀人媚奸状给事中魏时亮陈纘亦相继论之遂下顺楷吏论死天啓初链谥忠愍】质实【路楷汶上人杨顺德州人】

冬十一月谕达子锡林阿围大同右卫

【锡林阿有妾曰托斯齐私部目惧罪来降杨顺自诩为奇功致之京师锡林阿来索不得寇应朔二州毁七十余堡纵掠大同围右卫数匝顺惧乃诡言敌欲以叛人赵全等来易托斯齐兵部尚书许论以为便乃遣托斯齐逸出塞给之西走陰告锡林阿锡林阿执而戮之狎知顺无能围右卫益急更分兵犯宣蓟西鄙震动严嵩意欲弃右卫帝不听诏诸臣分兵措饷而以兵部侍郎江东代顺时故将尚表以馈饷入围城悉力扞御时出兵突战获谕達孙及婿与其部将各一人会江东及巡抚杨选总兵张承勲等各严兵进围乃解】质实【大同右卫在大同府西二百里明初置万历三年增修城周九里今改右玉县为朔平府治许论字廷议进少子江东山东朝城人杨选字以公章邱人锡林阿旧作辛爱托斯齐旧作桃松塞今并改】

胡宗宪诱降海盗汪直诛之

【直据海岛挟倭为雄纠衆三千余入宁波大掠朝廷悬赏购之迄不能致既而内地有备倭亦多被剿戮有全岛无人归者往往怨直直不自安宗宪与直同乡里欲招致之释直母妻于狱錮之杭州资给甚厚遣宁波诸生蒋洲齎其家书往招直直知家属固无恙顾心动及是遂率贼目数十人来贡市泊舟山之岑港将吏以为入寇陈兵备直遣其养子王激入见宗宪曰我以好来何故陈兵相待宗宪解谕百方要一贵官为质宗宪立遣指挥夏正往直疑解乃来谒宗宪慰之甚至令谒巡按御史王本固于杭州本固下直于狱以闻宗宪疏请曲贷直以系番人心本固争之遂斩直其党大恨支解夏正焚舟登山阻岑港而守已移之柯梅造新舟以遁宗宪利其去不追贼遂扬帆而南流劫闽广】质实【舟山在宁波府定海县治东明设千户所于此今改名定海山岑港在定海县西北旧为戍守要地柯梅岭名在定海县海中过此即为外洋王本固邢台人】

发明【胡宗宪之计招汪直其本意未必非欲收岛倭乌合之衆以杀其势顾直之煽诱倭人肆其焚掠与陈东徐海厥罪维均诛之良是也王本固遽执下狱又何疏请曲贷为至诛直之後其党焚舟而遁是时宗宪兵力非不足以蹶踪追剿乃听其去而且利之是诚何心传称宗宪以赵文华为党援文华既败宗宪失所倚庇更借白鹿等物侈陈符瑞而且多其擒直之功足以固宠自立倭虽遁至他处若与已无伤者卒至蔓延数省荼毒海隅所谓以邻国为壑又岂人臣为国御侮之道哉】

十二月金星昼见

【戊午】三十七年春三月总督宣大侍郎杨顺以罪逮下狱【方锡林阿围大同杀掠吏民无算顺惧为路楷所奏贿以七千金楷悉为掩覆及是给事中吴时来抗章劾顺罪且发楷受金状帝方怒顺召祸立命逮顺及楷下狱严嵩不能救乃言楷受金当勘而令其党给事中郑茂往茂还事事为顺辨复言楷受金无左验顺楷俱薄谴于是时来即劾嵩朋党罔上会主事张翀董传策亦于是日劾嵩翀与时来皆徐阶门生传策则楷邑子时来先又官松江嵩疑阶主使乃密奏三人同日构?必有人主之帝下三人诏狱鞫讯久之无所得三人皆谴戍然自是帝亦稍厌嵩矣】质实【吴时来字惟修仙居人张翀字子仪柳州人董传策字原汉松江华亭人】

夏四月振辽东饥

【辽东大饥先已发银五万余两振之至是再发户兵工三部库银一万两命御史吉澄往振未几又以巡按御史周斯盛之奏复发银二万两趣澄疾驰至振给之】质实【吉澄直隶开州人周斯盛陕西宁州人】

秋八月寇围甘州

【济农犯永昌凉州进围甘州十四日始退土蛮亦数寇辽东】质实【济农旧作吉能即前济农子济农系蒙古王号故父子并袭其称旧分作吉囊吉能音译岐今俱改正】

冬十月礼部进瑞芝

【先是帝于秘殿扶乩言服芝可延年乃诏有司采芝五岳及诸名山至是礼部进一千八百六十本诏广求径尺以上者帝诏有司采诸名山五岳仍访之民间会宛平县民张巨佑得芝五本献之赉银币于是四方来献者接踵而至总督胡宗宪巡抚阮鹗御史路楷等相继上者不可胜计其芝皆积苑中内侍窃出市人复进之以邀赏凡得芝万本聚为一山号万岁芝山】

【己未】三十八年春二月锡林阿袭滦河

【锡林阿与娄巴图尔诸部谋大举入边屯会川声言东下薊辽总兵王忬不能察遽引兵而东号令数易敌乘间入潘家口渡滦河而西大掠遵化迁安薊州玉田驻内地五日京师大震御史王渐方轺交章劾忬遂逮忬下诏狱论死初王忬以才器见重所请无不从及为总督边将数以败闻渐失宠严嵩夙不悦忬而忬子世贞复以口语为嵩子世蕃所憾杨继盛之死世贞又经纪其丧嵩父子亦大恨滦河变闻遂得行其计隆庆初世贞伏阙讼冤复忬官予恤】质实【潘家口在遵化州东北四十里滦河臣等恭读御制滦河濡水源考滦河源出独石口外东北一百余里】

【已延屯图古尔山经西屯库尔奇勒河自北来滙之自此遂名滦河至石家地滦分支折而西南流至新桥口入于海玉田秦无终县唐万岁通天二年改为玉田县明属薊州今属遵化州 娄已图尔旧作老把都今改】

夏五月巡抚都御史李遂平江北倭

【倭数百艘寇海门遂令副使刘景韶游擊邱陞扼如臯而身驰泰州当其冲贼知如臯有备将犯泰州遂急檄景韶陞遏贼连战皆捷先是遂语诸将曰贼若由泰州出凤泗则陵寝惊若由黄桥逼瓜仪则运道梗若沿海而至庙湾则絶地及是贼果沿海东掠遂喜曰贼无能为矣令景韶尾其後而致之庙湾复虑贼突淮安乃夜半驰入城贼寻至遂督参将曹克新等御之姚家荡会通政唐顺之副总统兵刘显来援贼大败走保庙湾景韶亦败贼印庄庙湾贼据险不出攻之月余不克顺之显驰救三沙遂令景韶填塹夷木壑垒而陈以火焚其舟贼乘夜潜遁追奔至虾子港江北倭悉平帝玺书獎遂迁南京兵部侍郎以顺之代为巡抚顺之寻卒】质实【如臯汉海陵县地唐为如臯镇南唐复为县明属泰州今属江苏通州黄桥镇名在通州泰兴县北庙湾在淮安府山阳县东北射阳湖会诸水由此入海有城今设同知驻此为滨海冲要处亦曰庙湾场姚家荡在淮安府塩城县西北商贾辐辏为滨海巨鎮印庄镇名在泰兴县东虾子港在姚家荡东南有蛤蜊虾子等港李遂字邦良丰城人刘景韶湖广崇阳人唐顺之字应德武进人初举进士第一改庶吉士寻调主事遂引疾归读书阳羨山中凡天文乐律地理兵法弧矢勾股】

【壬奇禽乙英不究极原委会赵文华视师特疏荐顺之顺之高出处于罗洪先洪先曰向

已隶名仕籍此身非我有安得侔处士顺之遂出然顺之闻望颇由文华之荐而损刘显南昌人】

秋七月南京地震

八月振辽东饥

【巡抚辽东侯汝谅言辽左滨海水陆险阻往时虽罹灾害或止数城或仅数月未有全镇被灾三岁不登如今日者臣春初被命入境见其巷无炊烟野多暴骨萧条惨楚问之则云去年凶饑斗米至银八钱母弃生儿父食死子父老相传咸谓百年来未有之灾于时布种入土遗民盼盼方望有秋乃夏秋之交淫雨田虫交作今西成在候斗米犹至七钱冬春不至作何状矣乞大出内帑金钱以拯阡危疏入诏户部即发太仓银六万两差御史一员即往召采设法输运务济百姓之急岁终仍给发牛具银五万两以备来春布种】

【庚申】三十九年春二月南京兵乱杀总督粮储侍郎黄懋官

【先是南京设振武营募健儿御倭素骄悍懋官稍裁抑之旧制南军有妻者月粮米一石无者减其四春秋二仲米石折银五钱马坤掌南京户部奏减折色之一懋官又奏革募补者妻粮诸军以岁饥求复折色故额懋官不可给饷又复逾期诸军大怒遂以都肄日杀懋官裸尸于市守备太监何绶等遣吏持黄纸许给赏万金卒辄碎之许犒十万金乃稍定侍郎李遂托病闭阁给免死券以慰安之而密捕首恶二十五人系狱事闻追褫懋官官止诛叛卒三人而三人已前死兵自此益骄】质实【振武营南京兵部尚书张鳌以海警创设初议选各营精锐不足乃益以四方趨健然京卒怯脆中选者十不及一二多团集游手恶少充之故致此变黄懋官莆田人马坤字顺卿南通州人】

三月以鄢懋卿总理盐政

【旧制无一人总理四运司者至是懋卿以严嵩力总两浙两淮长芦河东塩政骤增塩课四十余万两所至市权纳贿势焰薰灼其按部常与妻偕行制五彩与令十二女子舁之道路倾骇淳安知县海瑞供帐简薄抗言贫邑不能容轩车慈谿知县霍与瑕亦清鯁不屈懋卿嗾巡塩御史袁淳劾之俱削籍】质实【淳安汉丹阳郡歙邑地唐改还淳县宋改淳安县明属严州府今因之鄢懋卿时为左副都御史户部以西浙两淮长芦河东塩政不举请遣大臣一人总理嵩遂用懋卿两淮余塩岁徵银六十万两及懋卿增至一百万两懋卿去巡塩御史徐爌极言其害乃复六十万之旧嵩败懋卿以贓戍边海瑞字汝贤琼山人霍与瑕韬之子】

秋七月大同总兵官刘汉袭谳達于丰州破之

【先是敌聚衆喜峯口规犯蓟镇汉乘其虚搗其帐于灰河至是汉复与参将王孟夏等分道出搗丰州擒斩百五十人焚板升畧尽时邱富已随敌帐他徙赵全亦遁免】质实【灰河

在山西宁武府西下流至马邑县入桑乾河当大同右卫边外由玉林旧城而经黑河二灰河一历三百余里即丰州之地刘汉大同人】

八月胡宗宪献白龟芝草

【自赵文华得罪宗宪失内援又见倭患方未已思自媚于上乃于一岁中再获白鹿以献帝喜天瑞频降告谢元极宝殿及太庙百官称贺晋宗宪秩兵部尚书兼节制巡抚及操江都御史如三边故事至是复献白龟二五色芝五帝益大悦赐名龟曰玉龟芝曰仙芝告谢如前赉宗宪加等】质实【宗宪献白鹿在三十七年宗宪性喜宾客东南才学士茅坤徐渭沈明臣辈皆招致幕府用是名日起其献白鹿也令渭草表帝称善宗宪以是益重渭渭知兵好奇计宗宪擒徐海诱汪直皆预谋焉後宗宪败渭佯狂自废茅坤字顺甫归安人徐渭字文长山陰人沈明臣字嘉则鄞人】

【辛酉】四十年春二月辛卯朔日有食之

景王载圳之国

【初庄敬太子薨廷臣言裕王次当立不报帝晚年信方士二王皆不得见载圳年少既与二王同出邸居处衣服无别左右颇怀觊觎至是之国德安居四年薨无子国除】

三月金星昼见

【丙子画见历二十四日而没】

秋九月己丑朔日有食之

九月振南畿灾

【时苏松常镇杭嘉湖七府大水平地深数尺累月不退因命停徵是岁秋粮仍改折起运改兑米有差七府事例贓罚银俱留充振又以灾伤免直隶扬州淮安凤阳庐州等府所属州县及两淮运司等官入覲】

冬十一月以袁炜为户部尚书兼武英殿大学士预机务

【先是二月朔日食微陰钦天监言日食不见即同不食严嵩以为天眷趣礼部急上贺炜亦以为言尚书吴山仰首视天曰日方亏将谁欺耶仍救护如常仪帝怒山引罪去遂以炜代山及七月朔又日食钦天监言食止一分五秒例免救护炜乃阿帝意上言陛下以父事天以兄事日是以太阳晶明氛祲销铄食止一分与不食等臣等不胜忻忭疏入帝大喜及是遂入阁炜本以青词进与李春芳严讷郭朴并号青词宰相】质实【袁炜字懋中慈谿人李春芳

字子寔扬州兴化人严讷字敏卿常熟人】

永壽宮災

【永壽宮在西苑成祖旧宮也帝自二十一年宮婢之變即徙居此是夜火作禁衛不及救乘輿服御及先世寶物盡毀乃暫御玉熙宮時公卿大臣皆欲帝歸大內而不敢請徐階因請以三殿大工之余木趣治永壽宮百日而工就帝即日徙居之命曰萬壽宮】質實【玉熙宮近西華門孔道列屋二層】發明【嘉靖不御大內公卿大臣皆知其非是意欲請而不敢言適當所居永壽火災之後正可藉辭請歸大內此嚴嵩與徐階同為職所當言之事也乃嵩既以徙居南城為對已為希合不居大內之指階復以三殿大工余材趣治尤屬巧于逢迎蓋是時嵩已為階所中故事事欲與相反以自表其才識即為爭權邀寵之圖于此已見一斑矣史謂階雖任智數要為不失其正此概論其生平耳若以此一事觀之豈惟智數是尚又寧得謂不诡于正哉】

【壬戌】四十一年春三月增設南贛副總兵官

【從總督浙江福建江西尚書胡宗憲請也於南贛設副總兵官以吉安守備屬之于建昌撫州設參將以鉛山守備屬之復設游擊于南昌而以鄱陽守備改為參將令專練舟師控制九江】質實【南贛謂南安贛州二府九江秦九江郡隋置江州大業初改為九江郡明為九江府今因之】

增設甘州茶馬司

【從巡撫都御史鮑承廕請也于甘州適中之地設茶馬司令招商茶易番馬仍以四川保寧茶課全徵本色助之】質實【明史職官志茶馬司大使一人正九品副使一人從九品掌市馬之事鮑承廕山西長治人】

夏五月嚴嵩以罪免其子世蕃下獄

【帝居西苑大臣希得進見惟嵩獨承顧問御札一日或數下雖同列不獲聞以故嵩得逞志徧引私人居要地士大夫奔走輻輳皆惴惴事嵩然攬權既久帝亦寢厭之而漸親徐階初帝所下手詔語多不可曉惟世蕃一覽了然答語无不中世蕃頗通國典曉暢時務嘗自負為天下才嵩既耄昏且旦夕直西內諸司白事輒曰以質東樓東樓者世蕃別號也及嵩妻歐陽氏死世蕃居喪不得入直所代票擬嵩受詔多不能答每遣人持問世蕃值其方縱淫樂不以時答中使相繼促嵩嵩不得已自為之往往失指所進青詞又多假他人手不能工以此積失帝歡會萬壽宮災嵩請徙南城離宮南城英宗為太上皇時所居也帝不悅而階營萬壽宮甚稱旨由是帝益向階顧問多不及嵩即及嵩祠祀而已未几方士藍道行以扶乩得幸故惡嵩帝問天下何以不治道行詐為乩語具道嵩父子弄權狀帝問上仙何不殛之答曰留待皇帝自殛帝心動欲逐嵩御史鄒應龍避雨內侍家偵知之因抗疏極論嵩父子不法帝遂罷嵩下

世蕃诏狱嵩为世蕃求释不听法司奏论世蕃及其子锦衣鹄鸿客罗龙文俱戍边诏从之特有鸿为民使侍嵩而锢其奴严年于狱擢应龙通政司参议侍郎魏谦吉等皆坐奸党黜谪有差】质实【邹应龙字云卿长安人应龙将具疏劾嵩夜梦出猎见一高山射之不中东有培塿其下甚壮一注天拉然觉而悟曰此小儿束縲之兆也遂专劾世蕃凭藉父势专利无厌私擅爵贵广致贿遗每一开选则视官之高下而低昂其值及遇陞迁则视缺之美恶而上下其价以致选法大坏市道公行羣丑竞趋索价转钜如刑部主事项治元以万二千金而转吏部举人潘鸿业以二千二百金而得知州至于交通赃贿为之关节者不下百十余人而伊子锦衣卫严鹄中书严鸿家奴严年中书罗龙文为甚即数人之中严年尤为点狡世蕃委以腹心诸所鬻官卖爵自世蕃所者年率十取其一不才士夫竟为媚奉呼曰鹤山先生不敢名也遇嵩生日年辄献万金为寿嵩父子原籍江西袁州乃广致良田宅于南京扬州等处无虑数十所而以恶仆严冬主之抑勒侵夺怙势肆虐所在民怨入骨尤有异者往岁世蕃适母丧陛下以嵩年老特留侍养令其子鹄代为扶衬南旋世蕃名虽居忧寔喜得计狎客曲宴拥侍姬妾屡舞高歌日以继夕至于鹄本豚鼠无知习闻赃贿视祖母丧有同奇货骚扰道路百计需索其往返所经诸司悉望风奉承郡邑为空今天下水旱频仍南北多警民穷财尽莫可措手者正由世蕃父子贪婪无度掊克日棘政以贿成官以赂授凡四方小吏莫不竭民脂膏偿已买官之费如此则民安得不贫国安得不竭天人灾警安得不迭至臣请斩世蕃首以示为人臣不忠不孝者戒其父嵩受国厚恩不思报而溺爱恶子弄权黷货亦宜亟令休退以清政本如臣言不寔乞斩臣首以谢嵩世蕃疏入帝乃罢嵩下世蕃于理时坐嵩世蕃党黜谪者前兵部右侍郎栢乡魏谦吉工部左侍郎南昌刘伯跃刑部右侍郎德安何迁右副都御史信阳董威金都御史万安张雨应天府尹祥符孟淮南京光禄卿南昌胡植南京光禄少卿武进白启常右谕德兰谿唐汝楫南京太常卿字国子监事新城王材太仆丞新喻张春及嵩婿广西副使袁应枢等数十人】

土默特攻辽东总兵官黑春战死

【土默特入抚顺复攻凤凰城春与把总田耕等力战三日夜死之事闻诏赠春都督同知廕子千户】质实【土默特即鞑靼小王子後嘉靖初徙幕东方抚顺城名在奉天府承德县东与盛兴京接界凤凰城在奉天府东南鸭绿江经此入朝鲜国土默特旧作土蛮今改】

秋八月加户部尚书高耀太子太保

【初大内灾宦官有密收龙涎香者至是帝索之急耀从禁中购得八两用圣寿建熙日献之大称旨赐银币寻加太子太保耀初贿严世蕃躡户部尚书以贪秽着及世蕃败知不为公论所容乃要结为固位计】质实【高耀清苑人】

发明【古未患得患失之夫其于夤缘幸进巧售计术盖无所不至而必有左右进幸之人为之导引而密示其机乃得以施其伎俩高耀之以龙涎进也何由而知大内之无此又何由而知索此之甚急即使知庆节建醮在所必需又何由而知宦寺中有密藏此者物以类感儉邪之声气自有默默相通者耀仍以其结世蕃之术结宦官故遂以其躡司农之伎躡少保而

嘉靖适颠倒于其局中而懵然罔觉耳】

九月三殿成

【更奉天殿曰皇极华盖殿曰中极谨身殿曰建极文楼曰文昭阁武楼曰武成阁左顺门曰会极右顺门曰归极奉天门曰皇极东角门曰弘政西角门曰宣治复改乾清宫右小阁曰道心旁左门曰仁荡右门曰义平】质实【文楼是时文楼藏永乐大典其帙甚钜帝初年好古礼文之事时取探讨凡有疑郤悉按韵索览几案间每有一二帙在焉及三殿灾帝闻变命左右趣登文楼出大典甲夜中传谕再三是书遂得不毁帝因欲重录其副贮之他所以备不虞至是谕大学士徐阶曰昨计重录永乐大典兹秋凉可理乃选各色善楷书人礼部儒士程南道等百余人就史馆分录命礼部左侍郎高拱右春坊右中允管国子监司业事张居正各解原务入馆校录拱仍以侍郎兼翰林院学士同左春坊左谕德兼侍读瞿景淳充总校官居正仍以中允兼翰林院编修同修撰林嫌丁士美徐时编修吕旻王希烈张四维陶大临检讨吴可行马自强充分校官】

冬十一月分遣御史求方书

【帝晚年求方术益急时江西丰城县方士熊显进法书六十六册诏留览赐显冠带银币是时陶仲文已死乃命御史姜儆王大任分行天下访求方士及符籙秘书閱二年还朝上所得法秘数千册荐方士唐秩刘文彬等数人儆大任俱擢侍讲学士秩等赐第京师时严嵩既罢蓝道行亦被遣宫中数见妖孽帝春秋高意邑邑不乐中官因设诈以娱之当夜坐庭中获一桃御幄後左右言自空中下帝喜曰天赐也修迎恩醮五日明日复获一桃是夜白兔生二子帝益喜谢元告庙未几壽鹿亦生二子廷臣表贺帝以奇祥三锡天眷非常手诏褒荅事在四十三年】质实【姜儆南昌人王大任陕西保安人】

御定资治通监纲目三编卷二十四

卷二十五

<史部,编年类,御定资治通监纲目三编>

钦定四库全书

御定资治通监纲目三编卷二十五

【起癸亥明世宗嘉靖四十二年尽壬申明穆宗隆庆六年】凡十年

【癸亥】四十二年夏四月总兵官俞大猷副总

倭于福建破之

【自倭去柯梅浙东江北渐宁而患尽移于福建泊泉州之浯屿掠回安惠安攻福宁宁德进围福州经月不解蔓延兴化奔突漳州迄无宁日闽人在朝者争劾胡宗宪嫁祸帝不问既而宗宪以罪被逮倭寻兴化府焚掠一空移据平海卫不去自倭躡东南破州县卫所以百数未有及府城者兴化故名郡最繁富既远近震动诏急徵大猷充总兵官继光为副合兵往讨时刘显自广东赴援以兵少壁城下不敢战大猷至亦不欲攻俟大军之集乃与显别邀贼于长乐殲之继光先已破倭于横屿还浙江矣至是继光以浙江兵来会巡抚谭纶令继光将中军显左大猷右合攻贼于平海继光先登左右军继之斩级二千二百有奇还被掠者三千人倭遁去遂复兴化其侵犯他州县者亦为诸将所破闽患少熄自倭起以来二十余载攻破城邑杀伤官吏军民不可胜纪转漕增饷天下骚然至是大创而去其後继光大猷复连败之东南始得安枕矣】质实【浯屿即金门在泉州府同安县东南海中广袤数十里同安五季闽县惠安宋县明俱属泉州府今因之平海卫明置今裁故城在兴化府莆田县东长乐唐县明属福州府今因之横屿在宁德县东南海中胡宗宪以罪被逮宗宪初因赵文华结欢严嵩父子文华死又因罗龙文以进赂及嵩败南京给事中陆凤仪劾其党严嵩及奸欺贪淫十大罪有诏逮问及宪宗至帝曰宗宪非嵩党朕拔用十九年人无言者自累猷祥瑞为羣邪所疾今若加罪後谁为我任事者释令闲住久之以万寿节猷秘术十四帝大悦将复用矣会御史汪汝正籍罗龙文家上宗宪手书乃被劾时自拟旨授龙文以達世蕃者遂逮下狱宗宪自叙平贼功以猷瑞得罪言官且许汝正受赃事帝终怜之并下汝正狱宗宪竟庾死汝正得释戚继光字元敬世袭登州卫指挥僉事谭纶字子理宜黄人】

金星昼见

【四月始伏】

冬十月锡林阿巴图尔入寇京师戒严

【虏数犯辽塞总督阳选囚繫三卫长托干令其子更迭为质托干者锡林阿妻父也冀以牵制锡林阿三卫皆怨至是锡林阿巴图尔等溃墙子岭入大掠顺义三河诸将赵溱孙膺战死京师戒严诏诸路兵入援虏驻内地八日大同总兵官姜应熊败之于密云乃退诏诛选初寇之入帝方祠厘兵部尚书杨博不敢奏谋之徐阶檄宣府总兵官马芳等入援会帝见东城火光知寇已逼大惊谕徐阶议逐寇而芳兵已至阶请亟偿之令专护京师及寇退帝怒博不早闻欲与杨选同论罪阶力为救解乃诛选而不罪博】质实【墙子岭关名在密云县东北七十五里古北口之东南城周一里有奇三河唐置县明属通州今属顺天府孙膺时官总兵赵溱官游击马芳字德馨蔚州人巴图尔旧作把都儿托干旧作通罕今并改】

【甲子】四十三年春二月伊王典模有罪废为庶人国除【典模贪而愎多持官吏短长不如指必构之去既去复折辱之御史行部过者模要笞之缙绅往来率纡途取他境经郭外者府中人辄追挽其车詈其不朝入朝者复辱以非礼府墙坏请更筑乃夺取民舍以广其宫郎中陈大壮与邸邻索其居不与使数十人从大壮卧起夺其饮食竟馁死所为宫崇台连城拟帝阙有锦衣官校之陟者经洛阳典模忽召官属迎诏鼓吹拥锦衣入捧一黄卷入宫衆请开读曰密诏也遂起锦衣去锦衣谓王厚待之不知所以其夜大张乐至曙府中人皆呼千岁诈谓天子特亲我也闭河南府城大选民间子女七百余留其姝丽者九十人不中选者以金赎都御史张永明等上言状再遣使往勘革禄三之二令坏所僭造宫城归民间女执羣小付有司典模不奉诏部牒促之布政使侍牒入见模曰牒何为者可用障棖耳抚按官以闻诏礼部会三法司议劾谓典模淫暴无藩臣礼宜禁锢高墙削除世封从之】质实【伊王典模伊厉王?之元孙?太祖之第二十五子也封国于洛阳张永明字锤诚乌程人】

倭犯仙游总兵官戚继光大败之福建倭平

【时闽中旧倭畧平余党复纠新倭万余攻仙游县城围之三日继光引兵驰赴之大战城下贼败趋同安继光麾兵追之斩首数百级坠崖谷死者无莫余者尚数千奔漳浦继光分其兵为五哨身自持短兵徒跣缘崖披荆棘而上迫贼垒贼伏发继光气愈厉督各哨兵入贼巢殊死战又俘斩数百人于是闽患悉平】质实【仙游县本莆田县地唐析置清源县属泉州天宝初改仙游县明属兴化府漳浦唐置县明属漳州府今皆因之】

夏五月壬辰朔日有食之

【乙丑】四十四年春三月袁炜免

【炜疾笃上疏乞归道卒炜贵倨鲜腆故出徐阶门直以气凌阶馆阁士出门下者斥辱尤不堪人皆畏而恶之】

严世蕃伏诛

【世蕃论戍雷州未至而归初嵩归至南昌值万寿节使道士蓝田玉为帝建醮铁柱宫田

玉善召鹤嵩取其符籙并已祈鹤文上之因乞移世蕃近地以便就养词甚哀帝不许而世蕃遽返罗龙文一诣戍所即逃还徽州数往来江西与世蕃计事世蕃大治园亭势焰不少衰其监工奴见袁州推官郭谏臣不为起会南京御史林润按视江防因与谏臣谋驰疏尽发其罪疏言臣巡视上江备访江洋羣盗悉窜入逃军罗龙文严世蕃家龙文卜筑深山乘轩衣蟒陰有不臣之心而世蕃日夜与龙文诽谤时政摇惑人心近假名治第招集勇士至四千余人道路汹汹咸谓变且不测乞早正刑章以絕祸本帝得疏大怒即诏润逮捕之世蕃子绍庭官锦衣闻命急报世蕃使诣戍所方二日润已驰至世蕃猝不及赴乃械以行龙文亦捕得于梧州既至京润因复上书数嵩世蕃罪畧曰世蕃罪恶积非一日任彭孔为主谋罗龙文为羽翼恶子严鹄严珍为爪牙占会城廩仓吞宗藩府第夺平民房而又改厘祝之宫以为家祠凿穿城之池以象西海直栏横檻峻宇雕墙巍然朝堂之规模也袁城之中列为五府南府居鹄西府居鸿东府居绍庆中府居绍庠而嵩与世蕃则居相府招四方之亡命为护卫之壮丁森然分封之仪度也总天下之货宝尽入其家世蕃已踰天府诸子各官东南虽豪仆严年谋客彭孔家资亦称亿万民穷盗起职此之由甚者畜养厮徒招纳叛卒数十百人明称官舍出没江广劫掠士民其家人壽二银一等陰养刺客昏夜杀人夺人子女金钱半岁之间事发二十有七而且包藏祸心陰结典模在朝则为宁贤居乡则为宸濠以一人之身而总羣奸之恶虽赤其族犹有余辜严嵩不顾子未赴伍朦朧请移近卫既奉明旨居然藏匿以国法为不足遵以公议为不足恤世蕃稔恶有司受词数千尽送父嵩嵩閱其词而处分之尚可诿于不知乎既知之又纵之又曲庇之此臣谓嵩不能无罪也疏入帝怒诏下法司讯状世蕃犹抵掌曰任他燎原火自有倒海水已而聚其党窃议自谓贿字自不可掩然非上所深恶惟聚衆通倭之说得讽言官使削去而故填杨沈下狱为词则上必激而怒上怒乃可脱也谋既定乃令其党扬言之刑部尚书黄光昇等亦以为然如其言具稿诣徐阶议之阶固已豫知姑问稿安在吏出怀中以进閱毕曰法家断案良佳延入内屏左右语曰诸君子谓严公子当死乎生乎曰死不足赎曰然则此案将杀之乎生之乎曰用杨沈正欲抵死徐阶曰别自有说杨沈事诚犯天下公恶然以计中上所讳取特旨沈暗入招中取泛旨上岂肯自引为过一入覽疑法司借严氏归过於上必震怒在事者皆不免严公子骑欵段出都门矣衆愕然请更议曰稍迟事且泄从中败事者必多事且变今当以原疏为主而阐发聚衆本谋乃出一稿于?中独按罗龙文与汪直交通贿世蕃求官世蕃用日者言以南昌仓地有王气取以治第制拟王者又结宗人典模陰伺非常多聚亡命南通倭北通虏共相响应即呼写本吏入局户令疾书即用印封识而世蕃不知也窃自喜计行谓龙文曰诸人欲以尔我偿杨沈命奈何龙文不应执其手耳语曰且畅饮不十日释縲紲善归上因此念吾父别有恩命未可知虽然先取徐阶首当无今日吾父养恶故至此今且归用前计未晚谁谓阿依智者龙文喜问故曰第俟之已而阶改疏上帝覽疏命法司鞫讯具实以闻阶因速具疏言事已勘实具有显证请亟正典刑帝从之命斩世蕃龙文于市二人闻相抱哭家人请写遗书谢其父不能成一字都人闻之大快各相约持酒至西市看行刑籍其家黄金可三万余两白金三百余万两他珍宝服玩所值又数百万嵩及诸孙皆为民後二年嵩老病寄食基舍以死】质实【铁柱宫在南昌城内中有铁柱相传许逊所铸以镇蛟螭之害明嘉靖改名妙济万壽宫郭谏臣长州人林润字若两莆田人黄光昇晋江人】

夏四月以吏部尚书严讷礼部尚书李春芳并兼武英殿大学士预机务

【袁炜去後徐阶当国屡请增?臣故有是命帝眷侍直诸臣厚凡迁除皆出特旨春芳自学士至柄国凡六迁未尝一由廷推】

六月建玉芝宫

【睿宗原庙前殿东柱产金色芝一本帝大悦告于太庙百官表贺因建玉芝宫十一月奉安献皇帝后神主于玉芝宫】

冬十一月严讷罢

【讷仍掌吏部晨理部事暮直西苑供奉青词积劳成疾遂罢归讷既归里父母皆在晨夕备物孝养人以为荣讷尝语人曰铨臣与辅臣必同心乃有济吾秉铨二年适华亭当国诸事无阻且所任选郎贤举无失人华亭谓徐阶选郎谓陆光祖也】质实【陆光祖字与绳平湖人】

【丙辰】四十五年春正月福建地震

【福州兴化泉州三府同日地震】

二月下户部主事海瑞于狱

【帝久不视朝深居西苑专意斋醮督抚大吏争上符瑞礼官辄表贺廷臣自杨最杨爵得罪後无敢言时政者至是瑞独上疏曰陛下即位初年敬一箴心冠履分辨天下欣然望治未久而妄念牵之谓遐举可得一意修真竭民脂膏滥兴土木二十余年不视朝法纪弛矣数年推广捐纳事例名器滥矣二王不相见人以为薄於父子以猜嫌诽谤戮辱臣下人以为薄於君臣乐西苑而不返人以为薄於夫妇吏贪官横民不聊生水旱无时盗贼滋炽陛下试思今日天下为何如乎古者人君有过赖臣工匡弼今于修斋建醮相率进香仙桃天药同辞表贺建宫筑室则将作竭力经营购香市宝则度支差求四出陛下误举之而诸臣误顺之无一人肯为陛下正言者谀之甚也且陛下之误多矣其大端在於斋醮斋醮所以求长生也自古圣贤垂训修身立命曰顺受其正矣未闻有所谓长生之说陛下受术於陶仲文以师称之仲文则既死矣彼不长生而陛下何独求之至於仙桃天药怪妄尤甚苦宋真宗得天书于乾佑山孙奭曰天何言哉岂有书也桃必采而後得药必制而後成今无故获此二物是有足而行耶曰天赐者有手执而付之耶此左右奸人造为妄诞以欺陛下误信之以为实然过矣陛下又将谓悬刑赏以督责臣下则分理有人天下无不可治而修真为无害己乎太甲曰有言逆于汝心必求诸道有言逊于汝志必求诸非道用人而必欲其唯言莫违此陛下之计左也即观严嵩有一不顺陛下者乎昔为同心今为戮首矣梁材守道守官陛下以为逆者也历任有声官户部者至今首称之然诸臣宁为嵩之顺不为材之逆得非有以窥陛下之微而潜为趋赴乎即陛下亦何利於是陛下诚知斋醮无益一旦翻然悔悟曰御正朝与宰相侍从讲求天下利害洗数十年之积误使诸臣亦得自洗数十年阿君之耻天下何忧不治万事何忧不理此

在陛下一振作间而已释此不为而切切於轻举度世敝精劳神以求之於系风捕影茫然不可知之域臣见劳苦终身而无成也帝得疏大怒抵之地顾左右曰趣执之无使得遁宦官黄锦在剑曰此人素有痴名闻其上疏时自知触忤当死市一棺诀妻子待罪於朝僮仆亦奔散无留者是不遁也帝默然少顷复取读之为感动太息留中者数月尝曰此人可方比干第朕非纣耳会帝有疾烦懣不乐召徐阶议内禅因曰海瑞言俱是朕今病久安能视事又曰朕不自谨惜致有此疾困使朕能御便殿岂受此人诟詈耶遂逮瑞下诏狱究主使者寻移刑部论死狱上阶力救奏遂留中】

发明【嘉靖朝诸大臣多以青词干进諂谀成风从未有以斋醮为非者海瑞疏陈痛切其忠君爱国之忱自然溢於楮墨视明代掠浮词而抗疏者大相迳庭矣乃嘉靖始闻之而怒继取读之感动太息且留中数月深然其言引咎愧悔以此切谕辅臣然终逮瑞下狱岂护疾忌医根于素性抑由当时臣工阿顺为习久未闻此逆耳之言也瑞疏云使诸臣亦得洗数十年阿君之耻置身于臯夔伊傅之列天下安得不治是瑞亦久见于此矣】

三月以吏部尚书郭朴兼武英殿大学士礼部尚书高拱兼文渊阁大学士并预机务

【朴拱皆由徐阶荐召入直庐至是同入阁】质实【高拱字肃卿新郑人】

夏四月壬戌朔日有食之

六月旱

【戊寅以久旱帝亲祷雨於凝道雷轩越三日雨羣臣表贺】

秋七月寇犯万全右卫总兵官马芳击败之

【锡林阿以十万骑入西路芳迎之马莲堡堡圯衆请塞之不可请登台亦不可开堡四门偃鼓寂若无人比暮野烧烛天器呼達旦芳卧日中不起敌骑窥者相属莫测所为明日芳蹶然起乘城指示衆曰彼军多反顾且走勒兵追击大破之】

冬十月振淮徐饥

【淮徐告饥命巡盐御史以修河银一万二千两振之】

闰十月谕達寇大同参将崔世荣战死

【时谕达屡犯东西诸塞及冬犯固原总兵官郭江败死又犯偏头关及大同世荣御之与其子大朝大宾俱力战死】

十一月帝有疾

【先是帝以久病忽欲南幸兴都取药徐阶力谏乃止既而服方士王金等所献丹药病遂甚时方士至者日衆帝知其妄无殊锡王金思所以动帝乃伪造诸品仙方与所制金石药同进其方诡秘药性燥非服食所宜帝御之稍稍火发病遂不能愈】

十二月帝崩

【庚子帝大渐自西苑还乾清宫是日崩除阶草遗诏召用建言得罪诸臣死者恤録方士付法司论罪一切斋醮工作及政令不便者悉罢之诏下朝野号恸感激时高拱郭朴以阶不与共谋不乐朴曰徐公谤先帝可斩也两人遂与阶有隙】

发明【大臣秉与国事当虚己和衷惟求其是所谓功不必自己出名不必自己成乃为得之此犹言其无事时也若当草写遗诏于哀痛呼抢之余商家国根本之务此何时也而可以嫌疑生分别者耶观徐阶所草诏犹能切中当时弊政为高拱郭朴者自当赞助其成何至以己未与之故而遂生忌嫉造谤媒蘖竟欲各分门户甚至数年後拱专国政一切尽反阶之所为而启其衅者实惟郭朴一言朴安得无罪哉】

裕王载坫即位

【是为穆宗以明年为隆庆元年赦天下免明年天下田赋之半及嘉靖四十三年以前逋赋】

释海瑞于狱

【先是瑞在狱犹未闻大行状提牢主事先知之以瑞且见用设酒饌款之瑞自疑当赴西市恣饮噉不顾主事因附耳语宫车适晏驾先生今即出大用矣瑞曰信然乎即大恸尽呕出所饮食陨絶于地终夜哭不絶声及是既释复故官俄再迁大理丞】

【丁卯】穆宗庄皇帝隆庆元年春正月罢睿宗明堂配享【时礼部奉诏会议郊社诸典礼及祔葬祔享诸制尚书高仪上言先帝肇祀明堂奉睿宗配享今陛下践祚睿宗已为皇祖若仍配享上帝似非周人宗祀文王之义请罢大享礼从之】质实【高仪字子象钱塘人】

增设江浙巡漕御史

【时漕政废弛有司怠缓军卫迁延重以运官科求旗甲侵费弊端百出以致漕运失期旧制江北粮米当十二月以内过淮远者不过次年之三月时有迟至次年六七月者山东粮米当四月运完远者不过七月时有迟至十一月者至是户科给事中何起鸣请於南直隶浙江杭嘉湖增设御史一员令专理漕运其济宁以南河道旧属两淮巡盐御史带管者并亦委之

监兑时则巡历淮安以南水盛时则巡历徐州以北庶河道漕运可兼摄而并举从之】质实【何起鸣内江人】

追尊母杜氏为孝恪皇太后

二月立皇后陈氏

【后通州人】

以陈以勤为礼部尚书兼文渊阁大学士张居正为吏部侍郎兼东阁大学士并预机务

【以勤居正俱侍裕邸讲读至是并参大政时徐阶以宿老居首辅与李春芳皆折节下士居正最後入独引相体倨见六卿无所延纳间出一语辄中肯人以是严惮之重於他相】质实【陈以勤字逸甫南充人张居正字叔大江陵人】

发明【徐阶以耆宿老成久居政府犹持谦牧之怀居正甫参大政辄尔倨见六卿妄自尊大宜为衆所訾议也盖居正自恃干济之才出诸臣右又以潜邸旧恩欲自异于他相因而罔恤人言倨傲日甚厥後秉政之专竟致威权震主百僚侧目骄吝之气盖已中於入阁之初虽云才美不足观已】

三月葬永陵

【谥曰钦天履道英毅圣神宣文广武洪仁大孝肃皇帝孝洁肃皇后孝恪皇太后同祔】质实【孝洁皇后陈氏世宗元配孝恪杜太后穆宗生母】

【明史赞曰世宗御极之初力除一切弊政天下翕然称治顾迭议大礼舆论沸腾幸臣假托寻兴大狱夫天性至情君亲大义追尊立庙礼亦宜之然升祔太庙而跻于武宗之上不已过乎若其时纷纭多故将疲于边贼诐于内而崇尚道教享祀弗经营建繁兴府藏告匱百余年富庶治平之业因以渐替虽剪剔权奸威柄在御要亦中材之主也矣】

夏四月御经筵

【徐阶等言自古帝王莫不以讲学为首务兹山陵事毕祔庙礼成经筵日讲正惟其时请特举行从之】

五月夏镇新河成

【初嘉靖七年河溢阻运总河都御史盛应期请于昭阳湖东别凿新渠以通漕开濬百四十余里尅期六月工未成会应期罢役中止至四十四年河大决沛县飞云桥分为十数股溃

入昭阳运道淤塞百余里督理河漕尚书朱衡循行应期旧亦请开南阳留城上下筑堤吕孟湖以防溃决总河都御史潘季驯以为濬旧渠便议与衡不合衡言是河直秦沟有所束隘伏秋黄河盛昭阳受之不为壑也乃决计开濬身自督工重惩不用命者至是河成西去旧河三十里旧河自留城以北经谷亭而至南阳新河亦自留城而北经夏镇而至南阳与旧河合谓之夏镇河凡百四十里有奇又引鮎鱼诸泉及薛河沙河注之筑马家桥堤遏黄水入秦沟使不东侵运道乃大通方工未成会河复决论者纷然谓衡故兴难成之役以幸功及工峻羣议乃息未几山水骤溢新河决壤漕艘数百给事中吴时来言新河受东兗以南费峰邹滕之水以一堤扞羣流岂能不溃宜分之以杀其势衡乃开支河四泄其水入赤山湖】质实【夏镇在徐州府沛县东北四十里南去留城四十四里昭阳湖在沛县东北八里有大小二湖相连南属沛北属山东滕县亦名山阳湖南阳镇名在兗州府鱼台县东北留城在沛县东南五十里故宋地秦置县汉张良封留侯即此地吕孟湖在沛县东南四十里秦沟在徐州府铜山县东北鮎鱼泉在滕县凡三十四泉薛河在滕县源出宝峯山汇诸泉而为渊西经薛山因名薛河沙河有二俱在滕县在县北者曰北沙河源出邹县峰山在县南者曰南沙河即古濬水源出县之述山下流俱入运河马家桥在沛县赤山湖在滕县西南与微山韩庄诸湖相连盛应期字思徵吴江人朱衡字士南万安人潘季驯字时良乌程人吴时来是时以遗诏复故官】

高拱罢

【初徐阶甚亲拱引入直及拱骤贵负气颇忤阶世宗居西苑阁臣直庐在苑中拱未有子移家近直庐时窃出一日帝不豫误传非常拱遽移直庐器用於其家给事中胡应嘉阶乡人也矚阶方与拱隙遂劾拱不守直庐移器用于外世宗病亟勿省也拱疑应嘉受阶指大憾之及帝即位阶虽为首辅而拱自以帝旧臣数与之抗郭朴复助之阶渐不能堪是时应嘉掌吏科佐部院考察事将竣忽有所论救帝责其抵牾下阁臣议罚朴奋然曰应嘉无人臣礼当编氓阶旁睨拱见拱方怒勉从之言路谓拱以私怨逐应嘉交章劾之给事中欧阳一敬劾拱尤力阶於拱辩疏拟旨慰留而不甚谴言者拱益怒相与忿诋阁中御史齐康为拱劾阶康坐黜於是言路论拱者无虚日拱不自安乞罢归】质实【胡应嘉沔阳人欧阳一敬字司直彭泽人齐康永平人】

六月霪雨伤稼

【帝素服修省避殿御皇极门视事】

秋七月遣使招抚山东河南被灾流民

【从刑科给事中王之垣请也流民失业者给复五年其粮长称收火耗夫马折乾廩给扣送诸弊一切厘革】质实【王之垣济南新城人】

八月帝视国子监

【朝鲜国贡臣乞留京师观礼许之是日帝行释奠礼毕御彝伦堂宣谕祭酒司业及诸生等仍赐衍圣公孔尚贤及三氏子孙并祭酒司业等宴于礼部】

九月谕達寇山西

【时邱富已死赵全在虜益用事尊谕達为帝治宫殿期日上栋忽大风栋坠伤数人谕達惧不敢居全乃为谕達言大同兵弱亭障稀可以逞因屡入犯山西至是复率衆数万分道入井坪朔州偏头关老营诸处边将不能御遂长驱破石州杀知州王亮采大掠孝义介休平遥文水交城太谷隰州间男女死者数万而三卫勾土默特同时入寇蓟镇昌黎抚宁乐亭卢龙皆被蹂躪游骑至滦河京师震动三日乃引去诸将追之敌出义院口会大雾迷失道堕崖中人马枕藉死者甚衆】质实【井坪在朔平府平鲁县南朔州西北明成化中建置守御千户所老营堡名在宁武府偏关县东亦成化中建孝义後魏置永安县唐改曰孝义明属汾州府文水汉大陵县隋改曰文水明属太原府交城隋置县明属太原府太谷汉阳阳县隋改曰太谷明属太原府今皆因之乐亭唐石城县金大定末置乐亭县明属滦州今属永平府义院口在抚宁县东北有关】

郭朴罢

【初言官劾高拱者多及朴拱归朴亦求去帝固留之御史龐尚鵬凌儒等攻不止遂乞归朴辅政凡二年至是以尚鵬等攻之三疏乞归家居二十余年卒赠太傅谥文简】质实【龐尚鵬字可南南海人凌儒泰州人】

总兵官李世忠与土默特战于抚宁京师戒严

【先是土默特寇蓟镇命总督刘焘总兵李世忠等率兵御之至是世忠引兵东援永平与敌遇於抚宁县南斩首五十级时谕達兵尚留石州间出精骑抄掠交汾等处山西騷动总督王之诰请增兵赴援诏发宣府游兵及保定巡抚曹亨河南巡抚刘应节延绥总兵赵岢各引兵分道救石州之诰马芳仍留本镇东防京师戒严诏五城御史诹察非常漕粮集河下者令巡仓御史督护入城敕羣臣条议京城防守事宜自是月乙亥至十月丙戌寇始退京师解严】

冬十月以王崇古总督三边

【时济农据河套为西邨诸部长别部并图驻牧大小松山南扰河湟番族环四镇皆寇乃擢崇古兵部侍郎兼右佥都御史总督陕西延宁甘肃军务崇古奏给四镇旗牌抚臣得用军法督战又指画地图分授诸大将赵岢雷龙等数有功崇古在陕七年先後获首功甚多】质实【大松山在凉州府平番县东北接兰州界小松山在其北为边邨要地并图旧作宾土今改】

【戊辰】二年春正月杖给事中石星于廷黜为民

【吏科给事中石星言天下之治不日进则日退人君之心不日强则日偷臣窃见陛下入春以来为鳌山之乐纵长夜之饮极声色之娱朝讲久废章奏遏抑一二内臣威福自恣肆无忌憚天下将不可救矣用是条上六事一曰养圣躬二曰讲圣学三曰勤视朝四曰速俞允五曰广聴纳六曰察谗譖疏入上怒以为恶言讪上命廷杖六十黜为民时中官滕祥者以造作奇巧得幸会监杖星大诟之详怒予重杖星絶而复苏其妻郑误闻星已死遽触柱死闻者哀之】质实【石星字拱辰东明人】

二月命廷臣举边才

【户部尚书马森等给事中王治御史王友贤等各奏荐边才现任大理寺卿邹应龙等四十五人聴用金都御史王轮等十八人凡六十三人吏部上其议因言五方之气虽笃於因材百中之能难拘於器使如往者辅臣杨一清以南人用之陕西尚书王骥以北人用之云南俱有声绩宜勿论南北资格斟酌推用务俾各当其才帝然之】

帝耕藉田

【以礼部言增上中下三等农夫各十人于耆老之後如弘治中例】

三月立子翊钧为皇太子

【帝之第三子即神宗也时方六岁是日诏赦天下】

京师地震

【永平府乐亭县辽东宁远卫遵化顺义等县及山东登州府同日地震宁远城崩礼部尚书高仪等请令百官修省】

夏五月以都督同知戚继光镇蓟州

【继光与俞大猷均称名将而继光屡摧大寇平浙闽倭又平江西贼名更出大猷上给事中吴时来以蓟门多警请召大猷继光专训边卒部议独用继光乃命以都督同知总理蓟州昌平保定三镇练兵事总兵官以下悉受节制寻以蓟州既有总兵官又设总理事权不一乃召还总兵官郭琥而以继光为总兵官镇守蓟州永平山海诸处自嘉靖以来边墙虽修墩台未建继光巡行塞上议建敌台畧言蓟镇边垣延袤二千里一瑕则百坚皆瑕比来岁修岁圯徒费无益请跨墙为台睥睨四達台高五丈虚中为三层台宿百人铠伏糗粮具备令戍卒画地受工先建千二百座然边卒木强律以军法将不堪请募浙人为一军用倡勇敢督抚上其议计之浙兵三千至陈郊外天大雨自朝至日昃植立不动边军大骇自是始知军令至五年

秋台功成精坚雄壮二千里声势联接继光乃议立车营每车一辆用四人推挽战则结方阵而马步军处其中又制拒马器排列寇骑冲突寇至火器先发稍近则步军持拒马器以遏而前间以长枪箠箠寇奔则骑军逐北又置輜重营随其後而以南兵为选锋入卫兵主策应本镇兵专戍守节制精明器械犀利蓟门军容遂为诸边冠】质实【箠箠兵器名一作狼箠箠苏典切箠帚也戚继光武艺篇狼箠用大毛竹上截连旁附枝节枒杈粗二尺长一丈六尺利刃在顶长一尺用为行伍藩篱】

秋七月徐阶罢

【帝即位以来阶所持诤多宫禁事伸者十八九中官多侧目会阶乞休而给事中张齐以私怨劾阶阶因请归帝意亦渐移许之赐驰驿举朝疏留报闻至万历初阶年八十卒时帝欲命中官分督团营阶力陈不可而止羣小璫毆御史于午门左都御史王庭将纠之阶曰不得主名劾何益且虑彼先诬我乃使人以好语诱大璫先录其主名庭疏上乃分别逮治有差】质实【张齐以私怨劾阶齐长安人前奉命犒军宣大纳盐商金因疏请恤边商革余盐为阶所格至是因上疏攻阶已而左都御史王庭遂发张齐受贿事下齐镇抚司狱王庭字子正南充人】

冬十月振淮徐饥

【江南北皆亢旱淮徐间洪水泛滥以都御史龐尚鵬言煮粥以食饥民又留起解之金以备缓急又以灾免凤阳淮安扬州徐州滁州秋粮子粒有差仍准存留商税备振】

辽王宪?有罪废为庶人国除

【宪?在嘉靖时以奉道被宠赐真人号至是巡按御史郅光劾其淫虐僭拟诸罪状遣侍郎洪朝选等往勘得实削爵为庶人禁锢高墙国除初张居正家荆州与宪?有隙及朝选往勘讽令坐以谋反朝选不从居正怒属巡抚劳堪罗织朝选死狱中】质实【明洪武中辽简王植始封於辽东永乐中改封荆州简王子贵燬嗣六传至宪?庄王致格子也郅光山西长治人洪朝选字舜臣同安人劳堪江西德化人】

十一月宣府总兵官马芳袭谳達于长水海子又败之鞍子山

【先是或为锡林阿谋以五万骑犯蔚州诱芳出而以五万骑袭宣府城可得志芳豫伐木环城寇至不可上遂解去顷之率参将刘谭等出独石塞外二百里袭其帐于长水海子还至塞追者及鞍子山芳迎战又大败之芳有胆智谳敌情所至先士卒一岁数出师捣巢或躬督战或遣裨将家畜健儿得其死力尝命三十人出塞四百里多所斩获寇大震芳乃帅师至大松林顿旧兴和卫登高四望耀兵而还】质实【长水海子一曰白海子在开平卫西南即察罕诺尔鞍子山亦曰马鞍山在独石口东北】

十二月限勲戚庄田

【户部议裁勲戚冒滥庄田勲臣传派五世者限田百顷至七十顷宗支已絕及失爵者夺之奸民影射者徵租入官巡按直隶御史刘世曾查奏田顷数目复下部会同屯田御史议定应减应留规则以闻诏如拟】

【己巳】三年夏四月以海瑞为佾都御史巡抚应天诸府【瑞威望素着属吏闻其至墨者多自免去有势家朱丹其门恐瑞见即黜之中人监织造者为减舆从瑞銳意兴革请濬吴淞白?通流入海民赖其利素疾大户兼并力摧豪强抚穷弱贫民田入於富室者率夺还之下令飚发凌厉所司惴惴奉行富家巨室或窜他郡以避瑞抚吴甫半岁再为言路所论遂改督南京粮储民间瑞当去号泣载道家绘像祀之】质实【尝熟白?港吴中诸水由此入江归海嘉靖间日益淤塞故瑞濬之】

秋七月振沿河州县灾

【河决沛县自考城虞城曹单丰沛抵徐州俱罹其害漂没田庐不可胜数漕舟二千余皆阻邳州不得进总理河道都御史翁大立以闻户部议请以淮扬商税及抚按赃赎备振仓粮振恤贫民仍敕河道诸臣疏濬支渠从之又发太仓银三万两选差司官往灾重处亟行振济其余被灾地方仍查灾伤分数酌量蠲免时大立又请漕艘後至者貯粟徐州仓平价出粜诏许以三万石赉民大立以民困之状帝未能周知乃绘图十二以献是时黄河既决淮水复涨湖堤往往崩坏人民多溺死大立奔走经营至四年六月疏濬河淮诸工乃次第告成】质实【单县古单父邑汉为单父县明改单县属兗州府今因之翁大立余姚人】

八月广东海贼曾一本伏诛

【一本初与大盗黄平聚衆数万剽掠惠潮间与倭相犄角已而总兵官俞大猷以次殲倭略尽平为副将汤克寛所败远窜去一本降而复叛突犯雷州执参将繆印又犯广州杀知县刘师顔寻复?碣石卫裨将周云翔参将耿宗先叛附于贼势益炽时大猷已改镇广西诏止勿赴今与广东福建总兵官李锡郭成同讨一本锡出海与大猷遇击贼三战皆捷会成亦败贼执周云翔率参将王诏等以师来会分三哨进一本驾大舟力战诸将连破之毀其舟诏生擒一本及其妻斩首七百余死水火者万计时广闽随在皆盜而一本最强既平患渐息】质实【碣石卫在惠州府海丰县东南明洪武中置今裁汤克寛邳州卫人李锡歙人郭成四川叙南卫人】

以礼部尚书赵贞吉兼文渊阁大学士预机务

【贞吉在嘉靖时由谪籍屡擢户部侍郎罢归帝即位复起礼部帝幸太学会祭酒胡杰论罢贞吉以礼部侍郎摄事讲大禹谟称旨命充日讲官贞吉年逾六十而议论侃直进止有仪帝深注意及是遂以尚书参机务贞吉入谢奏言朝纲边务一切废弛臣欲捐躯任事惟陛下

主之帝益大喜】

振南畿浙江山东灾

【南畿浙江山东皆被水灾户科给事中刘继文请发帑遣官分振并发临德二仓粟米振济礼科给事中黄才敏亦请发德州仓见积米二万石以振饥民户部议从之】质实【刘继文灵璧人黄才敏晋江人】

九月大阅

【帝戎服登坛分别将领及侯伯锦衣卫官中射等第赏罚有差百官称贺】

冬十一月京师地震

【地震有声诏百官修省三日时山西亦震】

十二月命廠卫刺部院事

【帝以灾异频仍由部院政事不平所致令廠卫密访以闻于是尚书毛恺侍郎万士和等皆自劾求去帝慰留给事中舒化等上言祖宗设廠卫令捕盗诘奸非以察百官也制驭百官乃天子之权而奏核诸司责在台谏今陛下委之廠卫廠卫必托之番校此辈贫残恐开罗织之门不可不慎帝不从已而事竟寢】质实【毛恺字達和江山人万士和字思节宜兴人舒化字汝德临川人】

发明【嘉靖时弊政极多而於宦官独无所假借数十年中稍为斂戢何以穆宗继体复欲用廠卫刺事耶部院政事不平诟无考核整饬之道乃以稽察之权寄之一二内竖岂部院不足信而廠卫转足信乎廠卫之所恃者番校耳此辈皆无赖之徒稍假之顏色委以事权则必倚势作威甚且譟张为幻廠卫一经偏聽则将曲为左袒抚拾迁就以证其捕风捉影之为英宪覆轍非遥顾复蹈之哉】

召高拱复入阁兼掌吏部

【拱性强直自遂颇快恩怨及再入阁尽反徐阶所为凡先朝得罪诸臣以遗诏录用赠恤者一切报罢且言明伦大典颁示已久今褒显议礼诸臣将使献皇在庙之灵何以为享先帝在天之灵何以为心而陛下岁时入庙何以对越二圣帝深然之法司坐方士王金等子杀父律拱复言人君不得正终名至不美今谓先帝为王金所害诬以不得正终天下後世视先帝为何如主乞下法司改议帝复然其言命减戍拱之再出专与阶修隙所论皆欲以中阶重其罪赖帝仁柔弗之竟也阶子弟颇横乡里拱以前知府蔡国熙为监司录其诸子皆编戍尽夺其田所以扼阶者无不至逮拱去位乃得解拱练习政体负经济才其在吏部欲遍识人才授

诸司以籍使署贤否志爵里姓氏月要而岁会之仓卒举用皆得其人又以时方忧边事请置兵部侍郎以储总督之选由侍郎而总督由总督而本兵中外更番以裕边材又以兵者专门之学当自兵部司属始宜慎选司属多得智谋才力晓畅军旅者久而任之勿迁他曹又奏请科贡与进士并用不循资格拱所经画多类此】

杖尚宝司丞郑履淳下狱

【履淳上言顷年以来万民失业四方多故天鸣地震灾害沴臻正陛下宵旰忧勤时也今最急莫如用贤陛下御极三年矣曾召问一大臣面质一讲官赏纳一谏士以共画思患豫防之策乎高亢睽孤乾坤否隔忠言重折檻之罚儒臣虚纳牖之巧宫闈违脱珥之规朝陛拂同舟之义回奏蒙谴补牍奚从内批径出封还何自纪纲因循风俗玩愒功罪罔核文案徒繁閤寺潜为厉阶善士渐以短气言涉宫府肆挠多端梗在私门坚持不破万衆惶惶皆谓羣小侮常明良疏隔自开辟以来未有若是而永安者伏愿奋英断以决大计勿为小故之所淆宏濬哲以任君子勿为嬖昵之所惑移美色奇珍之玩而保疮痍分昭阳细务之勤而和庶政拔用陆树声石星之流嘉纳殷士儋翁大立诸疏经史讲筵日亲无倦臣民章奏与所司面相可否万几之裁理渐熟人才之邪正自知察变谨微回天开泰计无踰此疏入帝大怒杖之百系刑部狱数月刑科给事中舒化等以为言乃释为民履淳父晓通经术明习典故为都御史御倭有功迁刑部尚书与严嵩不合罢归卒嵩败履淳讼于朝帝即位晓赐谥赠官至神宗初履淳复起光禄少卿寻卒】质实【郑履淳字叔初海盐人陆树声字兴吉松江华亭人殷士儋字正甫历城人】

【庚午】四年春正月己巳朔日有食之

【以正旦日食罢元会帝避殿减膳是月月复食总事中陈吾德疏言岁首日月并食天之灾大陛下宜屏斥一切玩好应天以实报闻】质实【陈吾德字懋修归善人】

罢京营总督分设三大将领之

【赵贞吉言旧制内外卫兵分隶五府永乐末年因聚府兵北伐旋师之後遂结营团操乃以三千神机二营附之因号为三大营其实皆五府之兵也夫五府之兵因调发而聚之为营既归即当散还各府矣所以久聚团操而不散者以当时常有戒严征伐之事故不暇耳然犹以五军名营实未变五府之旧制也沿至正统末年变为十团营矣弘治间又加为十二团营矣正德间又增置东西官厅矣然旧营之中尚存老甲军之籍则五营之号未泯而五府之意犹存也至嘉靖庚戌严嵩建议于五府之外特设戎政府括内外兵籍铸总督戎政之印而授之仇鸾于是祖制大坏而贼臣得肆觊觎之心向使鸾迟于伏诛则时事之危未可测也鸾诛而以镇远侯顾寰代之寰惟知退让自守以保勲名而营制则日弱矣臣窃谓分府设将之制未易卒复而分营统兵之法犹可遵行盖将才难得以一人统十万之衆非韩白不能以十万衆分委之数人则称职易耳请将见操官军分为左右中前後五营各择一将以分统之责令训练而以文臣巡核之加赏罚焉收戎政府印归之内府有事则领勅挂印而命将于阃外事

完则缴勅纳印而归将于营中如是则太阿之柄独持于上而輶轂之下常有数万精兵可战可守随所用而无不宣矣疏入诏下廷臣议尚书霍冀与贞吉不協不然其言廷臣亦多言强兵在择将不在变法冀等乃上议三大营宜如故惟以一人为总督权太重宜三营各设一大将而罢总督以文臣为总理报可于是三大营各设总兵一副将二其参佐等官互有增损各均为十人而五军营兵均配其营以侯伯充总兵官寻改提督又用三文臣亦称提督自设文武六提督後各持意见过事旬月不决给事中温纯言其弊乃罢仍设总理协理二臣贞吉不能争】质实【温纯字景文三原人】

夏四月京师地震

秋七月禁章奏浮词

【高拱言比宋章奏铺缀连牒言多意晦端绪难寻反可窜匿事情支调假饰是非人臣奏对之体请严加禁约从之】

发明【臣下入告之体贵乎核切情事而不以繁称博引为工明代奏牒往往陈义引古反覆不穷而其实于事情所系者不过数言而已拱奏请禁止浮词是矣然其後终明之世奏章仍多摭拾陈言者盖明人章疏多挟名求胜之心至于自炫鬻而牵引不休竟有累牒连篇皆不切之陈言者政体士风之坏由来非一日矣】

陈以勤罢

【初以勤入阁徐阶为首辅而高拱方向用朝士各有所附交相攻以勤中正无所比及拱再入与赵贞吉相轧张居正复中构之以勤与拱旧僚贞吉其乡人而居正则所举士也度不能解引疾乞休去以勤归六年卒赠太保谥文端】

八月宣大告警敕边备

【时李春芳虽为首辅而政皆自高拱出边警猝至拱请命侍郎曹邦辅王遴督师列陈以待以都御史栗永祿守昌平护陵寢起刘焘于天津守通州储命总督王崇古谭纶主进剿机宜戴才理粮饷边境得无事】质实【曹邦辅于帝即位初起谪籍屡进兵部侍郎王遴字继津霸州人】

罢户部尚书刘体乾

【时内供湊多数下户部取太仓银又趣市珍珠黄绿玉诸物先是御史詹仰庇谏市珠宝言宝石珠玑多藏中贵家何必求之於外已而仰庇巡视十库疏请严核内官监出纳岁数并节省一切无益浮费疏中有再照人主句内官摘出激帝怒以为大不敬杖之百斥为民并罢科道之巡视库藏者给事中陈吾德李己复上疏言比买玉市珠传帖数下人情惶惑内官崔

敏等献谄营私罪不可宥乞即斥谴以清左右帝震怒杖一百镬刑部狱斥吾德为民已久之始得释至是体乾复屡疏争之积忤帝意遂罢】质实【刘体乾字子元东安人詹仰庇字汝钦安溪人陈吾德字懋修归善人李己字子复磁州人】

九月振陕西灾

【以陕西大水命州县发仓廩振济并蠲税有差免临巩二府各州县正官朝覲】

河决邳州

【初新河既成南北诸支河悉并流秦沟河势益大涨三年七月决沛县漕艘不得进至是复决邳州自睢宁白浪浅至宿迁小河口淤百八十里漕道复阻河道侍郎翁大立言还来河患不在丰沛而在徐邳臣以为权宜之计在弃故道而就新冲经久之策在开泇河以避洪水帝命大立躬自相度条利害以闻已而大立以误漕削籍复以朱衡经理河道遂罢泇河议专事徐邳筑长堤自徐州至宿迁小河口三百七十里并缮丰沛大黄堤正河安流运道乃通】质实【白浪浅在睢宁县北黄河南岸小河口在宿迁县东南睢水至此合于黄河谓之贻口亦曰睢清口泇河有东西二泇东泇出沂州府西北箕山西泇出峰县东北抱犊山东南流至三合村与东泇合又南入泗谓之泇口】

以李成梁为辽东总兵官

【锡林阿入辽东总兵王治道战死擢成梁署都督佥事代之时谕达诸部屡窥塞下十年之间大将死者数人成梁乃大修戒备甄拔将校收召健儿给以厚饷用为选锋军声始振】质实【李成梁字汝契世铁岭卫指挥佥事】

冬十月谕达孙巴噶柰济内附诏授指挥使寻遣归【巴噶柰济者谕达第三子替克贝台吉子也幼孤育于谕达妻伊克哈屯所既长娶必济不相得复自聘鄂尔多斯女号三娘子即谕达外孙女也谕达见其美夺之巴噶柰济恚率属十余人来归大同巡抚方违时告总督王崇古曰机不可失也率五百骑往受之崇古上言巴噶柰济来归非拥众内附者比宜给官爵丰馆饷饰舆马以示谕达谕达急则令缚送板升诸叛人不听即胁诛巴噶柰济牵沮之又不然因而抚纳如汉置属国居乌桓故事使招其故部徙近塞谕达老且死鸿台吉立令巴噶柰济还与众与台吉抗拒我按兵助之此安边之良策也奏至朝议纷然高拱张居正力主崇古议诏授巴噶柰济指挥使谕达方西掠土番闻之急引还约诸部入寇崇古檄诸道严兵御之敌不得利伊克哈屯思其孙日夜哭谕达患之使来请命逢时遣译者鲍崇德往令缚送板升诸叛人以易巴噶柰济崇德入其营谕达胜气待之崇德曰朝廷待而孙甚厚今称兵是速之死也谕达疑巴噶柰济已死闻言心动使使调之崇古令巴噶柰济绯袍金带见使者谕达喜过望崇德因说之曰赵全等旦至巴噶柰济夕归谕达因屏人语曰我不为乱乱由全等天子若封我为王长北方诸部孰敢为患即死吾孙当袭封彼衣食中国忍背德乎遂遣使致书逢时而全方怱怱用兵谕达又惑之全尝投书逢时欲归中国逢时以示谕达始有执全意锡林

阿奄至大同逢时以巴噶奈济箭示之锡林阿执箭泣曰此吾弟替克贝台吉故物也我来求巴噶奈济巴噶奈济既受官当更计之会谙達召锡林阿还锡林阿引去谙達遂遣使与崇德来乞封请互市随执赵全等九人来献诏磔于市崇古亦以帝命遣巴噶奈济归】质实【方逢时字行之嘉鱼人王崇古于是年正月改督山西宣大巴噶奈济旧作把汉那吉替克贝台吉旧作铁背台吉伊克哈屯旧作一克哈屯必济旧作比吉鄂尔多斯旧作袄儿都司鸿台吉旧作黄台吉今并改】

十一月赵贞吉罢

【高拱掌吏部贞吉亦掌都察院拱以私憾考察科道欲去贞吉所厚者贞吉亦持拱所厚以解于是斥者二十七人而拱所恶者咸与拱犹以为憾喉门生给事中韩楫劾贞吉庸横贞吉疏辩言臣掌风宪目赌拱坏乱选法噤口不能一言有负任使真庸臣也若拱者斯可谓横也已臣放归之後幸仍还拱内阁母令久专吏部权广树衆党疏入帝竟允贞吉去而拱掌吏部如故贞吉好刚使气动与物忤人多怨之归十余年卒赠少保谥文肃】

以礼部尚书殷士儋兼文渊阁大学士预机务

【士儋本裕邸旧僚高拱恶其不亲已不为援士儋遂藉太监陈洪力取中旨入阁】

【辛未】五年春二月命廷臣及朝覲官谒皇太子于文华左门

【李春芳言先朝故事东宫未出阁时阁臣以朔望次日行谒见礼即今春和乞举行如例以慰天下臣民之心帝许之命二月二日谒见】

封皇子翊鏐为潞王

【帝第四子也後之藩卫辉】

三月封谙達为顺义王

【巴噶奈济既归谙達及其妻抚之泣遣使报谢誓不犯大同王崇古上言朝廷许谙達封贡诸边有数年之安可乘时修备设敌背盟吾以数年蓄养之力从事战守愈於终岁奔命自救不暇者矣复条封贡八事以请诏下廷臣议议各不同会帝御经筵阁臣面请外示羈縻内修守备乃封谙達顺义王名所居城曰归化昆都楞锡林阿等皆授都督同知等官有差封巴噶奈济昭勇将军指挥如故已而套部济农亦如约请命诏授官如昆都楞由是西塞诸部岁来贡市自宣大至甘肃边邮晏然不用兵革者二十余载】质实【昆都楞即娄巴噶谙達弟也王崇古条上八事一议锡封号一定贡额一议贡期一议立互市一议抚赏之费一议悬招赏之例一一审经权一戒狡饰经权者谓各镇练兵设险积饷之务仍宜预图狡饰者谓防敌人陰怀异志也疏入兵部议以崇古八议刊示廷臣会议已而兵部集府部科道诸臣廷议之或

以为封贡便互市不便或谓俟一二年不犯边徐议封爵或谓互市宜请令今岁暂一开市以观事机帝因令兵部更议於是兵部议言请如崇古议授谥達王号余各授职衔今岁贡期已过二月聽於三四月後一行从之昆都楞旧作昆都力娄巴噶旧作老巴都今并改】

夏五月李春芳罢

【初春芳代徐阶为首辅务以安静称帝意同列陈以勤故端谨张居正恃才凌物视春芳蔑如也方阶罢春芳叹曰徐公尚尔我安能久容旦夕乞身耳居正遽曰如此庶保令名春芳愕然三疏乞休不允既而赵贞吉入代以勤刚而负气及高拱再入直凌春芳出其上春芳不能与争自飭而已会拱逐贞吉势益张修阶故怨春芳常从容为阶解拱益不悦言官希拱意疏诋春芳乃罢归】

六月京师地震

【辛卯朔地震者三诏百官修省三日】

发明【天道变於上人事应於下古者君臣侧修以禳天灾此理之可信者若祥桑枯莢惑退史传之所载不过欲後之人遇灾而惧设诚而致行之意耳夫禳祲之故既昭着於上天下地乃欲责报于刻期揆之於理已为难信将欲虚词文饰则天岂可欺将谓有感必通何其效之神速若此且百官果以三日修省而效则三日之外其戏渝懈怠所以召灾而致异者更不知当何如矣亦何异一暴而十寒耶】

冬十月河南山东水

【以河南山东大水命工部饬管河官经理上流河防以备冲决】

十一月殷士儋罢

【御史赵应龙劾士儋进由内侍不堪大任给事中韩楫复扬言胁之】质实【赵应龙涇阳人】

【壬申】六年春闰三月帝有疾

【帝御皇极门疾作遽还宫】

夏四月以礼部尚书高仪兼文渊阁大学士预机务【初仪掌礼部秉礼循法居职甚称为言路所劾遂引疾归已用高拱荐以故官侍东宫讲读掌詹事府及是遂入阁】

五月帝崩

【帝疾稍平将视朝登陛忽眩仆亟召高拱张居正至帝执拱手歎语备至居正在旁帝弗顾也帝令拱扶掖还宫寻命宿乾清门拱与居正同止焉未几帝大渐召拱居正及高仪同受顾命遂崩】

六月乙卯朔日有食之

太子翊钧即位

【是为神宗以明年为万历元年诏赦天下】

诏祀建文朝尽节诸臣于乡有苗裔者恤録

【诏褒建文朝忠臣建表忠祠于南京以徐辉祖为首方孝孺次之】

罢中极殿大学士高拱

【始拱与张居正友善既而内离猜防日甚太监冯保次当掌司礼监拱荐陈洪及孟冲保以是怨拱而居正与保深相结穆宗疾再作居正处分十余事使小吏投保拱知而迹之吏已入拱恚甚面诘居正曰密封谓何天下事不以属我曹而属之内竖何也居正面发赤乾笑而已穆宗崩保矫遗诏与阁臣同受顾命及帝登极保升立御座旁不下举朝大骇保遂掌司礼监又督东厂总兼内外势益张拱以主上幼冲恣中官专政疏请诘司礼权又属言官合疏攻保而已从中拟旨逐之使人报居正居正阳诺之而私以语保保诉于太后谓拱擅权不可容太后颔之明日召廷臣入宣两宫及帝诏拱意必逐保也急趋入比宣诏则数拱罪而逐之拱伏地不能起居正掖之出拱急僦骡车出宣武门居正乃与高仪请留拱弗许请得乘传许之拱既去居正遂为首辅】质实【冯保深州人】

发明【高拱之负气凌人固有取斥之道即其他事亦多猜忌若此之裁抑冯保面诘居正则不可谓出於不正乃居正始则与保相结至为密封处事及拱欲逐保以告居正犹为直道而居正即以语保转与相谋逐拱此其立心之暧昧用术之巧诈致拱堕其计中而不觉而且为之请留为之请乘传欲以委过于保以掩饰一时之耳目此岂端人正士所为者而不知其陰谋委折肺肝早已如见也居正当国其干济非无可称然其得为首辅实由於结保而逐拱及其祸发身後亦因保事牵连得固於斯失亦于斯能不憬然悟耶】

高仪卒

【仪性简静寡嗜好入阁两月卒贫无以殓谥文端】

以礼部尚书吕调阳兼文渊阁大学士预机务

【高仪既卒张居正以调阳弱荐代之居正专决调阳不敢有所持诤然内不甚附之】质实【吕调阳字和卿广西临桂人】

秋七月尊皇后为仁圣皇太后贵妃李氏为慈圣皇太后

【旧制天子立尊皇后为皇太后若有生母称太后者则加徽号以别之是时冯保欲媚帝生母李贵妃风张居正以并尊居正不能违也慈圣移居乾清宫抚视帝内任保而大柄悉以委居正焉】质实【李氏泮县人帝生母】

帝御文华殿讲读

【张居正请定三六九日视朝余日御文华殿讲读】

九月葬穆宗庄皇帝于昭陵

【谥曰契天隆道渊懿宽仁显文光武纯德弘孝肃皇帝】质实【昭陵在昌平州大峪山东北明史赞曰穆宗在位六载端拱寡营躬行俭约尚食岁省巨万许俺答封贡减赋息民边鄙宁谧继体守文可称令主矣第柄臣相轧门户渐开而帝未能振肃乾纲矫除积习盖亦宽恕有余而刚明不足者与】

冬十月彗星见东北方

【至二年四月乃灭】

十二月振榆林延绥饥

御定资治通监纲目三编卷二十五

卷二十六

钦定四库全书

御定资治通鉴纲目三编卷二十六

【起癸酉明神宗万历元年尽辛巳明神宗万历九年】凡九年

【癸酉】神宗显皇帝元年春正月男子王大臣入乾清宫寻伏诛

【大臣浙中佣奴以浮荡入都伪为内侍服与宫中小豎交昵窃其牌?巾服入乾清宫为守者所执诏下东厰究问冯保欲缘此以?高拱令家人辛儒饮食之纳刃其袖中俾言拱怨望与太监陈洪谋大逆遂发纵骑驰械高氏奴围拱里第张居正亦请诘主使举朝汹汹谓且逮拱吏部尚书杨博左都御史葛守礼诣居正力解居正愤曰二公意我甘心高公耶奋入内取厰中揭帖投博曰是何与我揭帖有居正甯改四字曰历历有据守礼识居正手迹笑纳诸?居正觉曰彼法理不请我为易数字耳守礼曰回天非相公不能居正奏缓其狱博阴嘱锦衣怵大臣吐实又以拱仆杂称人中令大臣识别茫然莫辨也会帝命守礼偕锦衣都督朱希孝会鞠大臣疾呼曰许我富贵乃掳掠我耶且我何处识高阁老冯家仆教我希孝不敢鞠而罢保惧以生漆酒瘡大臣移付法司坐斩拱获免由是举朝皆恶保而不肖者多因之以进矣时上疏言深远之虑当谨于微九重邃深而王大臣历门抵宫寂无简察此岂细故其内宦及守卫员投应从究治报可】质实【葛守礼字与立德平人朱希孝成国公朱能五世孙】

二月御经筵

【从张居正等请也一日讲毕帝问建文果出亡否居正曰国史不载但故老相传披缁云游题诗于田州有流落江湖四十秋句帝太息命録诗进居正曰此亡国之事不足观也请録皇陵碑及高祖御制集以上见创业之艰圣谟之盛】

发明【建文出亡之事本属疑信相参金川门之变闔宫自焚明实録谓中使出其屍于火越七日备礼葬之而永乐时遣使四出以访张三丰为名踪迹建文则是成祖亦疑其或有出亡之事也至正统五年僧杨行祥诡称建文按问致罪而野史纷纭犹有老佛取入西内之说盖由成祖篡取大位致令建文失国亡身而又革除年号惨戮忠良人心不能无憾而宫中火起又不能实指其所终于是世俗相传遂谓披缁云游题诗所在是特不忍建文之亡国而不知其说之无据也惟是革除之事在成祖本属逆施後嗣自应更定神宗间流落江湖之句即为太息命録诗以进慨焉有动于中居正或即可因此为之表白幽潜续封加諡礼亦宜之且与恤録建文时死节诸臣之举正相承接乃仅以泛常规勉之词申保治思艰之大旨而姑置建文逸事于不答虽有王祖嫡等请复年号之虚文而一盃麦饭莫由下等齐民致使终明之世庙諡缺焉岂不大可惜哉】

三月诏举将才

【张居正进讲帝监图说至汉文帝劳军细柳事因奏曰古人言天下虽安忘战必危今承平日久武备废弛文吏箝制弁员不啻奴隶夫平日既不能养其锋锐之气临敌何以责其折冲之勇嗣後将帅忠勇可任者宜假以事权俾得展布庶几临敌号令严整士卒用命于是乃诏内外官各举将才】质实【帝监图说自尧舜以来有天下之居择其善可为法者八十一事恶可为戒者三十六事每事各绘一图後録传记本文附直解于後取唐太宗以古为监之义名曰帝监图说隆庆六年十二月张居正吕调阳所撰进也】

夏四月旱

【谕有官修省释重囚】

六月振淮安灾

【淮安大水发米六万石振之】

秋九月振荊州承天及济南灾

【以湖广荊州承天二府水灾异常山东济南府旱荒各行蠲折振济】

以方逢时总督宣大军务

【始逢时与王崇古共决贡市之议及崇古入理京营张居正荐逢时代之遂起逢时故官以兵部右侍郎总督宣大山西等处军务至则申明约信边境以安】

四川都掌蛮平

【成化初都掌蛮乱尚书程信襄城伯李瑾讨平之隆庆末复乱其酋阿大阿二方三等据九丝山僭称王剽远近其山修广而四隅峭反东北则鸡冠岭都都寨凌霄峯鼎峙相连峻壁皆数千仞有阿苟者居凌霄城为贼耳目威仪出入如王者时总兵官刘显被劾巡抚曾省吾奏留之属以军事又起故将郭成安大朝为之佐调诸土兵合官军凡十四万人往讨官军集叙州诱执阿苟攻拔凌霄进逼都都寨三酋遣其党阿墨固守官军顿匝月凿滩以通漕饷击斩阿墨拔其寨阿大自守鸡冠砦显令人诱以官而分兵为五哨尽壁九丝城下乘无备夜半腰絙上斩关入迟明诸将毕至阿二方三走保牡猪寨郭成破鸡冠获阿大诸军攻牡猪禽方三阿二走追获于贵州凡克寨六十余获贼魁三十六俘斩四千六百级拓地四百余里録功进显都督同知已而剿余孽复俘斩千五百有奇显复击西川番斩其首恶抚余衆而还西陲以宁】质实【九丝山在叙州府兴文县东南山箐峻深周围三十余里上有九岗四水极广可以播种下惟一径鸟道可通自宋元以来常为都掌蛮依阻之地至是据为巢穴贼既平遂

改九丝城为平蛮城置官兵戍守其相近有鸡冠砦又有石头大寨牡猪寨都都寨诸处都都寨地袤广为九丝左臂凌霄峰最高险有城为九丝门户贼平改凌霄曰拱极鸡冠曰金鸡曾省吾锺祥人郭成四川叙南卫人先以被劾罢归至是起用充为事官】

冬十一月立章奏考成法

【初诸司章奏部院覆行抚按勘者常稽不报至是张居正言近年来章奏繁多各衙门题覆无虚日然敷奏虽勤而实效盖鲜请申成宪先酌量道里远近事情缓急定程限立文簿月终注销抚按稽迟者部举之部院容隐欺蔽者六科举之六科容隐欺蔽者阁臣举之月有考岁有稽则名必中实事可责成从之自是政体为肃】

十二月振辽东灾

【以辽东广宁锦州义州海州诸处旱灾米价腾贵发太仓银三万两振济军士】

朵顏察克图犯塞总兵官戚继光击擒之

【自谕達款塞西鄙烽火寂然独土默特徙居察罕地控弦十余万常为蓟门忧泰宁朵顏诸部皆与交通时叛时服是年春朵顏部长董呼哩及兄子长安人犯喜峯口继光击败之董呼哩乃款关请贡至是董呼哩之弟察克图复入寇继光擒之于是董呼哩长安率部长亲族三百人叩关请死董呼哩服素衣叩头乞赦察克图继光遣将受降皆罗拜献还所掠边人攒刀设誓乃释察克图许通贡如故继光在镇十六年边备修饬蓟门守甚固敌无由入尽转而去之辽故李成梁独擅战功】质实【察罕今察哈尔明时日察罕在辽东口外本朝移其部聚于宣大近地分为八旗设佐领等官管辖察克图旧作长秃察罕旧作插汉董呼哩旧作董狐狸长安旧作长昂今并改】

【甲戌】二年春正月召见朝覲廉能官于皇极门

【张居正言太祖时每遇外官来京奏事常召见赐食访民间疾苦虽佐贰杂职有廉能爱民者亦特差行人齎勅獎谕或封内醪金币以赉之迨宣顺成弘间亦间举宴赏之典兹当考察之初宜敕礼部仿旧典具仪注以上于是帝乃御皇极门引见朝覲廉能官浙江左布政使谢鹏举等二十员面加獎勵并赐银币酒馔】质实【谢鹏举蒲圻人】

二月振四川被寇诸县

【巡抚曾省吾言高长筠珙诸县被都掌蛮荼毒最深请蠲免钱粮仍动支军前支剩米豆四万振济从之】质实【高县本夜郎地唐置高州明改县长宁汉犍为郡汉阳江阳二县地隋置泸川县唐置长宁州宋政和中为长宁军明为县筠连唐置筠连州明为县珙县唐置珙州明玉珍时改为珙州明为县四县明并属叙州府今皆因之】

福建地震

【长汀县夜地震至三更地裂成坑?没民屋四十余间】质实【长汀晋新罗县唐开元中析置长汀县宋治平中始迁于今县治明汀州府治今因之】

夏四月诏内外官行久任法

【吏科给事中张楚城言请诸司行久任法知县历俸六年乃陞取知府知州历俸六年乃陞迁间有才不宜于官官不宜于地者听抚按官量行更易其藩臬二司参政参议等官陞迁约以三年在京科道部曹陞司寺约以六年下吏部议张居正善而行之由是藩臬守令皆得自展】质实【张楚城江陵人】

秋七月淫雨昭陵地?

八月振山西灾

【山西应州朔州山阴马邑大同等县安东中屯山阴阳和高山等卫各报灾歉命蠲振有差】质实【大同辽置县明大同府治今因之安东中屯卫在应州东北山阴守御千户所在山阴县东阳和卫在大同府东北高山卫在大同府西】

淮扬徐河海并溢

【两淮运司所属吕四等场大旱之後恶风暴雨江海骤涨人畜淹没庐舍倾圯廩盐漂荡流离饥馑徐州扬州等处积雨海啸河溢各蠲振有差】质实【吕四场在高邮州东百二十里俗传以吕仙四至此而名其通海处曰新河亦曰新港】

冬十月决囚

【嘉靖季年崇奉元修又好祥瑞遇事辄停刑至是审録重囚至四百余人张居正言纵释有罪无以惩恶请如祖宗旧制每岁一决囚从之时承平久羣盗蝟起至入城市刦府库有司恒讳之居正严其禁匿弗举者虽循吏必黜得盗即斩决有司莫敢饰情盗贼为衰止】

【乙亥】三年春正月徙辽东六堡

【辽阳镇东二百余里旧有六堡其地不毛与辽阳声援不接李成梁请移建孤山堡于章齐哈刺甸险山堡于宽甸沿江新安等四堡于长甸长岭等处仍以孤山险山二参将戍之其地并据膏腴扼要害可拓境七八百里益收耕牧之利廷议从之于是抚顺以北清河以南皆遵约束】质实【孤山堡在辽东都指挥使司之东南险山堡亦在司东南并嘉靖二十五年置沿江堡在险山堡之南新安堡亦在司之东南皆设险处长甸亦在司东南有堡长岭在盖

平县东南章齐哈喇甸在辽阳东南亦曰新甸寬甸亦在辽阳东南长甸长岭又俱在寬甸南章齐哈喇旧作张其哈喇今改】

二月诏南京官不必备

【谕吏部南京职务清简官不必备先朝有人兼掌六部者以後员缺不系紧要不必一一推补】发明【周书称官不必备者盖以三公论道非其人莫能属非谓百司庶职皆可虚设名位而不必备其官也明之南京诸职事固为简约然既有部司之设即不可一日无官使果职无所掌官多冗滥廩禄既有虚糜则当量裁原额缺有其人俾足经理庶司斯可矣今概云不必一一推补则致设其官复虚其缺是将悬好爵以炫听闻矣岂核实官吏之道耶神宗初政已苟且如是宜其末年内外交吏或悬缺经时或人兼数职朝常阙畧政务废弛识者谓此诏实有以启之耳】

始命日讲官记起居注

【翰林院编修张位言前代皆有起居注而本朝独无臣备员纂修窃见先朝政事自非出于诏令形诸章疏悉湮没无考鸿猷茂烈鬱而未章徒使野史流传以伪乱真今史官充位无以自効宜日分数人入直凡诏旨起居朝端政务皆据见闻书之为他年实录之助于是大学士张居正议曰国初设起居注官日侍左右纪录言动实古者左史记事右史记言之制迨後定官制乃设翰林院修撰编修检讨等官盖以记载事重故设官加详原非有所罢废但自职名更定之後遂失朝夕记注之规以致累朝以来史文阙畧迹者纂修实录臣等祇事总裁凡所编辑不过总集诸司章奏稍加删润櫟括成编至于伏前柱下之语章疏所不及者即有见闻无凭增入与夫稗官野史之书海内所流传者欲事采录又恐失真是以嘉谟嘉猷实多所未备凡此皆由史臣之职废而不讲之所致也今宜申明史职以复旧制令日讲官日轮一员专记注起居兼录圣谕诏敕册文等项及内阁题稿其朝廷政事见于诸事章奏者俱选年深学优之史官六员专管纂修事分六曹以吏户礼兵刑工为次每人专纂一曹俱在馆供职不得别有差遣凡遇常朝御皇极门即轮记事官侍班居文武第一班之後近上便于观听即古螭头载笔之意也从之】质实【张位字明臣新建人】

夏四月己巳朔日有食之既

【帝感日食之变于宫中制牙牌手书十二事钁其上曰谨天戒任贤能亲贤臣远嬖佞明赏罚谨出入慎起居节饮食收放心存敬畏纳忠言节材用所至即悬座古以自警张居正因奏此数言者虽因天变自警其实修身治天下之道毕具于此终身行之可也因逐句发明其义且曰知之非艰行之惟艰自今上所行与所书有未合者许令左右得执牌以谏帝嘉纳之】

发明【感日食之变制牙牌书十二事以自警神宗是时年甫十三耳所书皆帝王修身为政当法当戒之事其于古人书屏铭座右义岂有殊即居正因事纳牖且许令左右执牌以谏未

始非将顺之道及考其初年委任居正中晚以後庶务日以隳废堂廉日以睽隔党援门户之习嚣然不靖明代纲纪之弛未有过于神宗朝者则是与牌书条件一一背驰几若反其道而用之将前之手书悬置座右者徒为粉饰务名之举矣又安知侵牌一事非居正当日条列以进俾博虚誉而美观听固宜其不克终也欤】

五月淮扬大水诏察有司贪酷老疾者

【先是元年二年间徐州淮扬等处数被水灾抚按官俱以蠲振请户部议令抚按官选委贤能官从公踏勘分别轻重以凭酌处又言淮扬等处蠲振所费钱粮总计应徵并发去者无虑五六十万国家经制各有正项非专一方虽缓急之势当知而无已之求难继且救荒无奇策求其策之善者全赖有司先之以俭静不扰次之以就地设法故有富弼则青州不为灾有苏轼则杭州不能困若无先事之备而徒仰给于内帑不惟缓不及事以天下之大尽内帑亦不足给矣帝乃下诏曰近来淮扬地方无岁不奏报灾伤无岁不蠲免振济若地方官平时着实经理民事加意撙节多方设备即有灾荒岂至束手无措今为官者本无实心爱民只虚文了事一遇水旱即委责于上事过依旧因循不理岂朝廷任官养民之意因令吏部查两府被災地方有司有贪酷害民及衰老无为者黜之】

六月浙江海溢

【杭州嘉兴宁波绍兴四府海潮沸溢涌高数丈人畜淹没大小战船击坏漂散者无算】

秋八月以张四维为礼部尚书兼东阁大学士预机务【张居正当国四维岁时馈问居正不絕居正请增置阁臣引荐四维遂入赞机务故事入内阁者曰同某人等办事至是诏曰随元辅等入阁办事随元辅三字帝亲批也于是四维恂恂若属吏然不敢以同僚自处随居正後拜赐进官而已】质实【张四维字子维蒲州人】

河决碭山

【南畿大水河决碭山而北淮决高家堰而东高邮洞亦决清水潭口淮城几没徐邳山阳南北漂荡千里河道淤浅阻漕者数年初孝宗时漕臣白昂以运舟经蠡社湖触岸辄坏乃开复河于高邮堤东以避其险长四十里名曰康济河至是湖水决漕臣吴桂芳改挑康济越河修复老堤河成名曰宏济遂为永利】质实【山阳汉射阳县地晋置县以境内有山阳津而名明属淮安府今因之高邮湖在高邮州西北天长以东之水俱滙此达于运河清水潭口在高邮州北三十里老堤洪武九年所筑湖堤即西堤也其康济河即故东堤孝宗时白昂于堤东越民田三里凿康济河通饷避湖谓之东堤其扞隔民田者为中堤至是修复老堤改挑越河于是废东堤筑中堤以便牵挽云吴桂芳字子实新建人】

九月礼部尚书万士和罢

【士和初官庶吉士以忤严嵩改部曹累任按察布政使并着清节及官尚书多所条奏时张居正欲越例赠朱希忠王爵冯保为方士求官士和俱力持不可又给事中余懋学以言事得罪士和言直臣不当斥由是积忤居正给事中朱南雍承风劾之遂谢病归至居正没起南京礼部尚书引年不赴卒諡文恭】质实【余懋学字行之婺源人言事得罪张居正进白燕白莲颂懋学以帝方忧旱下诏罪已与百官图修禳而居正顾献瑞非大臣?抗疏论之已而复陈崇惇大亲謇谔慎名器戒纷更防佞谀五事时居正方务综核以为风已遂斥为民居正死起懋学故官朱南雍浙江山阴人】

冬十月京师地震

【先是九月京师地震至是再震】

【丙子】四年春正月下巡按辽东御史刘台于狱除名为民【时御史在外每凌巡抚张居正欲痛抑之事小不合诘贵随下又饬其长加考察以故言路多不平会台奏辽东大捷居正以巡按不得报军功劾台违制妄奏引故事绳督之台遂抗章劾居正专擅威福如逐大学士高拱私赠成国公朱希忠王爵引用张瀚张四维为党斥逐言官余懋学傅应祯等罔上行私横黷无厌居正怒甚具疏辞政入见帝言言者谓臣擅威福而臣所行正威福也将巽顺以悦下邪则误国将竭忠以事上邪则无以逃专擅之讥因俯伏泣不能起帝为下御座以手掖居正曰先生起吾逮台竟其事遂下台诏狱命廷杖百远戍之居正阳具疏救乃除名为民久之复用他事戍浚州未几饮于戍主所归而暴卒台巡按辽东时与巡抚张学颜不相得至是学颜为户部诬台私赎醵居正属御史于应昌巡按辽东核之而令王宗载巡抚江西廉台里中事应昌宗载希居正意实其事以闻遂戍之後御史江东之颂台冤诏复官天启初追諡毅思】质实【刘台字子畏安福人引用张瀚瀚字子文仁和人先是吏部尚书杨博罢时廷推葛守礼次朱衡次瀚居正恶守礼戇厌衡骄乃拔用瀚瀚资望浅忽见擢举朝益趋事居正而瀚进退大臣率奉居正指舆论多不协黜逐傅应祯祯字公善安福人疏陈重君德苏民困开言路三事言迹者雷震端门兽吻京师及四方地震叠告曾未闻发诏修省岂真以天变不足畏邪真定抽分中使本非旧典正统间尝暂行之先帝纳李芳言已诏罢遣而陛下顾欲行失德之事岂真以祖宗不足法邪给事中朱东光奏陈保治初非折槛解衣者比乃竟留中不报岂真以人言不足恤邪此三不足者王安石以之误宋不可不深戒也陛下即位初自隆庆改元以前逋租悉赐蠲除四年以前免三徵七恩至渥也乃上轸恤已至而下延玩自如小民一岁之入仅足给一岁无遗力以偿负也近乃定输不及额者抚按听纠郡县听调诸臣畏谴督趣倍严致流离接踵怨咨愁叹上彻于天是岂陛下所乐闻者哉请下明诏自非官吏乾没并旷然除之民困既苏则灾沴自弭陛下登极初召用直臣石星李己臣工无不庆幸近则赵参鲁纠中涓而谪为典史余懋学陈时政而锢之终身他如胡致礼裴应章候於赵赵焕等封事累上一切置之如初政何臣请擢参鲁京职还懋学故官为人臣进言者劝疏入居正以疏中王安石语侵己大怒调旨切责下狱杖戍未几召还张学颜字子愚肥乡人江东之字长信歙人】

二月开草湾河

【督漕侍郎吴桂芳上言淮扬洪潦奔冲缘海汊港久湮入海止云梯关一径致海拥横沙河流泛滥而盐安高宝屡成巨浸国家转运惟知急漕而不暇急民故朝廷设官亦主治河而不知治海今黄河冲决駸駸欲夺安东以入海请于草湾低洼之地挑新口以迎大溜安东衆流滙围其势垂?不知委之以拯全淮廷议安东未可弃而命开草湾阅六月工竣水患稍平是时开草湾河至秋七月辛亥工竣其後通塞不时至十七年大河复由此分流夺正流十分之七凡六十里至安东县南赤晏庙仍合正河】质实【云梯关在山阳县东北二百里大河北岸盐安高实谓盐城安东高邮宝应也】

夏五月命司礼太监冯保同法司録囚

【帝谕保曰兹当五年差官録囚恐轻重或有冤抑其会同三法司堂上官审録保于是会同尚书王崇古等以情可矜疑者减释有差】

秋七月诏户部明年漕粮折收十之三

【从张居正请也先是漕舟以河决不时至已而漕运通居正以岁赋逾春发水横滥非决即涸乃采漕臣议督艘卒以孟春兑运及岁初毕发少罹水患行之久太仓粟充盈可支十年】

八月帝视国子监

【以雨免进讲赐张居正等扇银叶各有差】

河决崔镇

【是年二月以後江北旱河水断流至是徐丰沛睢宁金乡鱼台单曹八州县河又大决田庐漂没无算河流啗宿迁城吴桂芳请遣县治筑土城以避之明年复决而北清口淤垫全淮南徙弥漫山阳高宝间会河向桃源三义镇入老黄河故道淮水乘虚入清口老黄河复塞】质实【崔镇在桃源县西北三义镇在桃源县东旧名三汊镇明史河渠志黄河自桃源三义镇历清河县北至大河口会淮入海是为老黄河至嘉靖初三义镇口淤而黄河改趋清河县南与淮会于是大河口故道遂废】

冬十月振徐州灾

【从巡抚吴桂芳请也以河决徐州及丰沛睢宁金乡鱼台单曹七县皆被灾蠲免漕米并动库银振之】

【丁丑】五年春正月诏凤阳淮安营田

【凤阳淮安二府土广人稀加以水灾民半逃亡二千里皆成灌莽巡抚御史邵陞条上营田九事以为劳来安定之计从之】质实【邵陞余姚人营田九事一曰处财用欲于淮南岁掣盐引每引带盐十斤纳银五分增淮安诸关处所捆税二曰防欺隐谓开垦之弊百出在官预图卸责有捏未荒为久荒未逃为久逃者在民巧为干泽有抛熟以为荒暂避以为逃者甚或以民地为官以甲产为乙必先逐里逐户彼此交质将空闲官地人荒近荒民地见在人户久逃近逃人户分为六则俟流民之来归者按籍授田既佃之後原主不得告讦则奸弊无所容矣三曰广招徕谓凡因水旱迫而逃者一切许其归附原籍给以居室地土而官府之逋欠粮里之包赔债主之责偿仇家之讦告槩置不问四曰开沟洫谓凤阳淮安之民慵惰相习耕犁欹斜无复畛界撒种其中不幸水旱有束手枵腹而已须相度其地孰为水势入河之所而疏之以使其不积孰为衆水趋淮之区而瀦之以浸其下流大都百亩之地割为一区周遭为渠内开小沟而皆通于泽以入于河潦则委百亩之水于衆沟旱则运衆沟之水于百亩所谓天时不能使之害者此也五曰给牛种一夫授田五十亩两家给一犍牛一家给一犝若有生息责令报官以给後之招徕者种子每田一亩给粟一斗麦半之六曰备接济凡来归者皆令输力于官官予之食并量给其妻子至麦熟住支七曰缓征役凡招徕之民一年稔止取原种再稔乃还济粮四稔乃征税额五稔乃赋户徭而又定为新集之制另立招复一籍科派俱各从轻词讼量议宽贷候其生理渐兴而後乡社礼法次第可举八曰励司牧凡招垦有司岁终举劾六年被荐多破格超迁三年内经荐劾者非赃罪不革职成功一体陞擢九曰均责成僉事驻劄两郡之中不时巡行将招垦事蹟逐日登记年终缴查又择乡民之有心计者为农师以分理其事疏入诏抚按官督营田僉事着实举行三年之後遣官閱实以行赏罚】

二月振广西饥

【广西饥命留上年事例银振济】

广东罗旁叛猺平

【罗旁在德庆州上下江界东西两山间延袤七百里成化中韩雍经畧西山颇安辑惟东山猺阻深箐剽掠有司岁发卒戍守两广总督殷正茂建议大征会迁去侍郎凌云翼代至是云翼乃大集兵令总兵官张元勲李锡将之四閱月克巢五百六十俘斩招降四万二千八百有奇邻境猺獠皆惧求抚云翼奏改泷水县为罗定州设监司参将积患顿平】质实【罗旁梁置泷州隋开皇十八年改泷水县明初亦曰泷水县其南有废泷水镇旧为罗旁地猺人盘据于此至是乃改为直隶罗定州又设东安西宁二县今皆因之上下江者上江谓西江下江谓南江西江即鬱水南江即泷水也泷水在罗定州西飞瀑惊湍最为险厄东西两山者东山在肇庆府封川县东西山在罗定州东安县西南殷正茂字养实歙人凌云翼字洋山太仓州人张元勲字世臣浙江太平人】

夏四月兵部尚书谭纶卒

【纶沈毅知兵初守台州御倭有功累擢巡抚朝廷倚以辨贼遇警辄调居官无宁岁後督

师蓟辽集兵三万更徵浙兵三千专属戚继光训练相度边隘冲缓道里远近分蓟镇为十二路路置一将互为掎角边备大饬敌不敢入犯帝即位初进兵部尚书三疏乞归不允至是卒赠太子太保諡襄敏纶先抚福建次抚四川进抚两广前後积首功二万一千有奇尝战酣刃血溃腕累沃乃脱纶终始兵事垂三十年与戚继光共事齐名称谭戚】

秋闰八月乙酉朔日有食之阴云不见

九月张居正以父丧起复冬十月杖编修吴中行等谪戍有差

【居正父卒帝以手谕宣慰视粥止哭络绎道路又与三宫赙赠甚厚然亦无意留之而居正自以握权久恐一旦去他人且谋已会所善同年户部侍郎李幼孜欲媚居正首倡夺情议居正惑之冯保亦不欲居正去中旨令吏部尚书张瀚谕留居正居正乃阳上疏请守制而阴以牋风瀚覆旨瀚谬为不喻谓政府奔丧宜予殊典礼部事也何关吏部居正复令容说之不为动乃传旨责瀚久不奉诏无人臣礼勒致仕于是御史曾士楚吏科都给事中陈三谟倡疏请留和者相继编修吴中行独愤适彗出诏百官修省中行首上疏曰居正父子异地分睽音容不接者十有九年一旦长弃数千里外陛下不使匍匐星奔凭棺一恸必欲其违心抑情衔哀茹痛于庙堂之上而责以讪谟远猷调元熙载岂情也哉即云起复有故事亦未有一日不出国门而遽起视事者祖宗之制何如也事系万古纲常四方视听销变之道无踰此者疏既上以副封白居正居正愕然曰疏进耶中行曰未进不敢白也明日检讨赵用贤疏入已而员外郎父穆主事沈思孝亦合疏言居正贪位忘亲居正大怒谋于冯保欲廷杖之尚书马自强曲为营解居正跪而以一手抚须曰公饶我公饶我学士王锡爵造居正丧次为之解居正曰圣怒不可测锡爵曰即圣怒亦为公语未讫居正勃然下拜索刀作刎颈状曰尔杀我尔杀我径入不顾锡爵大惭趋出侍讲于慎行田一僞张位赵志臯修撰习孔教沈懋学皆疏救格不入遂杖中行等四人谪戍进士邹元标复上疏争亦坐杖戍五人者直声震天下南京御史朱鸿模驰疏救中行等五人并斥为民于是锡爵慎行一僞懋学先後移病归诏遣居正子编修嗣修与司礼太监魏朝驰传往代司丧礼部主事唐诰治祭工部主事徐应聘治丧居正请无造朝以青衣素服角带入阁治事许之】质实【吴中行字子道武进人隆庆五年进士居正其座主也李幼孜应城人张瀚先附居正得掌吏部见非於世至是忤之去士论乃皆重瀚赵用贤字汝师常熟人中行同年进士艾穆字和父平江人沈思孝字纯父嘉兴人王锡爵字元驭太仓人于慎行字无垢东阿人田一僞字德万大田人赵志臯字汝迈兰谿人习孔教庐陵人沈懋学字君兴宣城人是时中行等四人同日受杖毕校尉以布曳出长安门舁以板扉中行气息已絕中书舍人秦柱挟医至投药一匕乃苏刮去腐肉数十膺大者盈掌深至寸一寸遂空用贤体素肥肉溃落如掌其妻腊而藏之中行用贤即日驱出国门人不敢候视穆思孝复加镣钻且禁狱越三日始金解发戍许国方以庶子充曰讲镌玉杯一曰斑斑者何卞生泪英英者何藺生气追之琢之永成器以赠中行镌犀杯一曰文羊一角其理沉黜不惜剖心宁辞碎首黄流在中为君子壽以赠用贤邹元标字尔瞻吉水人时观政刑部愤甚视四人杖毕而疏上越三日受杖谪戍贵州都匀卫朱鸿模字文甫益都人居正死曾士楚当按苏松恍然曰吾何面目见吴赵二公遂引疾去陈三谟擢太常少卿寻与士楚俱被劾削籍】

彗星见

【从东南方起长亘天人情汹汹指目张居正至悬谤书通衢帝诏谕羣臣 及者诛无赦谤乃已】

兵部尚书王崇古罢

【初谮達诸部尝越甘肃掠西番既通款其从孙微辰台吉连岁盗番不得志求谮達西援崇古每作书止之是年谮達请赴西海迎佛崇古上言西行非谮達意且以迎佛为名不可沮宜飭边镇严守备而阴泄其谋於蕃族以示恩於是给事中刘铉尹瑾等交章劾崇古弛防徇敌崇古奏辩因乞休去崇古身历七镇勲着边陲封贡之初廷议纷呶有为危言以憾帝者阁臣力持之乃得成功自顺义归款後二十年崇古乃歿諡让毅】质实【刘铉鄱阳人尹瑾东莞人 彻辰台吉旧作切尽台吉今改】

十一月考察百官

【以星变命四品以上京堂官自陈庶官听部院考察张居正自夺情後知天下不与已思以威权劫之时因考察百官赵志臯张位习孔教相继迁谪南京金都御史张岳请令居正夺丧坐考察自陈贬秩礼部尚书何维柏亦以自陈免 维柏于嘉靖时以劾严嵩得罪隆庆初复官累迁尚书先是夺情议起诏吏部谕留尚书张瀚叩维柏维柏曰天经地义何可废也瀚从之而止居正怒取旨停维柏俸至是罢之】质实【张岳字汝宗余姚人】

【戊寅】六年春二月以潘季驯总理河漕

【先是总河傅希摯欲塞决口吴桂芳主开老黄河故道议未决有言宜多濬海口以分水势者会桂芳卒以季驯代之季驯乃上两河经畧疏曰水性就下以海为壑向因海壅河高以致决堤四溢运道民生胥受其病故今谈河患者皆以濬海为上策第海有潮汐茫无着足不得已而议他辟岂知海口视昔虽壅然自云梯关四套以下濶七八里至十余里深皆三四丈不等纵使欲另开凿必须深濶相类乃便注放则工力艰钜必不能成矧未至海口乾地犹可施功及将入海之处则潮汐往来亦与旧口等耳且旧口积沙人力虽不可濬水力自能冲刷乃若新辟之地则土壤坚实不特人力难措而水力亦不能冲故海无可濬之理惟当导河以归之海则以水治水即濬海之策也然河又非可以人力导也欲顺其性先惧其溢惟当缮治堤防俾无旁决则水由地中沙随水去即导河之策也顾频年以来无日不以缮堤为事亦无日不以决堤为患何哉卑薄而不能支迫近而不能容杂以浮沙而不能久堤之制未备耳是以黄决崔镇等口而水多北溃为无堤也淮决高家堰黄浦等口而水多东溃堤弗固也乃议者不咎制之未备而咎筑堤为下策岂得为通论哉又有所未尽者上流既溃堤旁决至於下流复或岐而分之其趋於云梯关正海口者譬犹强弩之末耳盖徒知分流以杀其怒而不知水势益分则其力益弱水力既弱又安望其能导积沙以注海乎故今日濬海之急务必先塞决以导河尤当固堤以杜决而欲堤之不决者必真土而勿杂浮沙高厚而勿惜钜费让远而

勿与争地斯堤可固也如徐邳桃清沿河各堤固矣崔镇等口塞矣则黄不旁决而冲漕力专高家堰筑矣朱家口塞矣则淮不旁决而会黄力专淮黄既合自有控海之势又惧其分之则力弱也则必暂塞清江浦河而严司启闭以防其内奔姑置草湾河而专复云梯以还其故道仍接筑淮安新城长堤以防其末流尽合黄淮全河之力涓滴悉趋於海则力强且专下流之积沙自去下流既顺上流之淤垫自通海不濬自开河不挑而深此所谓固堤即所以导河导河即所以濬海也治河者必先求河水自然之性而後可施其疏筑之功必先求古人已试之效而後可仿其平成之业黄水来自崑仑入徐济运历邳宿桃清至清口会河而东入於海此两河之故道即河水自然之性也昔元岁漕江南之粟由扬州直北出庙湾入海至永乐年间平江伯陈瑄始堤管家诸湖通淮河为运道然虑淮水涨溢东侵淮郡也故筑高家堰堤以扞之起武家墩经小大涧至阜宁湖而淮水无东侵之患矣又虑黄河涨溢南侵淮郡也故堤新城之北以扞之起清江浦沿鉢池山柳浦湾迤东而黄水无南侵之患矣尤虑河水自 冲入不免泥淤故严启闭之禁止许漕艘由牐出入匙钥掌之都漕五日发筹一放是以淮郡晏然漕渠永赖而陈平江之功至今未泯也後因剥蚀既久堤岸渐倾水从高家堰决入一郡遂为鱼鼈而当事者未考其故乃谓海口壅塞遂穿支渠以泄之盖欲急拯淮民之溺多方为疏导之计詎知旁支暂开水势陡趋正河遂至淤阻而新开支河濶仅二十余丈深仅丈许较之故道不及三十分之一耳岂能容受全河之水下流既壅上流自溃此崔镇诸口所由决也今新河寻复淤塞故河渐已通流虽深濶未及原河十分之一而两河全下沙随水刷欲其全後河身不难也河身既复面濶者七八里狭者亦不下三四百丈滔滔东下何水不容若犹以为不足而欲另寻他所别开一渠恐人力不至於此也以臣等度之非惟不必另凿一口即草湾亦须置之勿濬矣故为今之计惟有修复平江伯之故业高筑南北两堤以断两河之内灌而淮扬昏垫之苦可免坚塞桃源以下崔镇口诸决而全河之水可归故道淮黄二河并驱入海则沙随水刷海口自复而桃清浅阻又不足言矣此以水治水之法也若夫扒捞桃濬之说仅可施之於他河耳黄河河身广濶撈濬何期悍激湍流器具难下前人屡试无功徒费工料徐州以南之工如此而已因条上六议曰塞决口以挽正河曰筑堤防以杜溃决曰复牐坝以防外河曰创滚水坝以固堤岸曰止濬海工程以省糜费曰寝开老黄河之议以仍利涉帝悉从其请乃塞崔镇等决口百三十丈筑高家堰堤六十余里归仁集堤四十余里柳蒲湾堤东西七十余里自徐沛至淮扬间遥堤滚水减水坝牐无不修筑逾年工成自後数年河道乃无大患】质实【武家墩在山阳县西南鉢池山在山阳县北归仁集在徐州府宿迁县南傅希摯衡水人】

立皇后王氏

【先是帝大婚届期慈圣太后将归慈宁宫谕张居正曰吾不能视皇帝朝夕师保之责专恃先生寻以居正充纳采问名副使吉服从事给事中李涑言大婚重典而使居正变服从吉於观聽不宜乞别简用不聽】质实【后余姚人时以英国公张容充正使持节而居正捧制李涑字源甫雩都人以忤居正出为佾事】

三月以礼部尚书马自强兼文渊阁大学士吏部侍郎申时行兼东阁大学士并预机务

【张居正请增置阁臣令居正推择居正以自强有人望而时行又其所厚遂荐用之自强负抗直名素忤居正不自意得之颇德居正既入阁守位而已时居正将归葬父念阁臣在乡里者高拱与已有深隙殷士儋多援或乘间以出惟徐阶老易与拟荐之自代已遣使报阶既念阶前辈已还当位其下乃请增置阁臣】质实【马自强字体乾同州人申时行字汝默长洲人】

张居正葬父归夏六月还朝

【帝大婚後居正乞归葬父许之召见于平台居正奏言大婚之後宜撙节爱养留心万几因伏地而哭帝亦为哽咽堕泪乃赐帝赉忠良银章如杨士奇张孚敬例得密封言事帝及两宫赐赉慰谕有加礼遣司礼太监张宏供张饯郊外百僚班送勅吕调阳等有有大事勿专决驰驿之荆州聽居正处分会辽东报大捷帝复归功居正使使驰谕俾定爵赏居正为条列以闻既毕葬且还朝居正上言母老不能冒灾暑请俟秋凉就道帝遣锦衣指挥翟汝敬驰传往趣之而令中官护其母以秋日由水道行居正所过守臣率长跪抚按大吏越界迎送身为前驱道经襄阳王出候要居正宴故事虽公侯谒王执臣礼居正具宾主而出过南阳唐王亦如之及还京抵郊外诏遣司礼太监何进宴劳两宫亦各遣大璫御赐八宝金钉川扇御饈饼果醪醴百僚复班迎入朝帝慰劳恳笃予假十日而後入阁因引见两宫及秋中官奉居正母行仪从烜赫观者如堵比至帝与两宫复赐赉加等慰谕居正母子几用家人礼】

秋七月吕调阳罢

【调阳寔数寝疾不出小事四维代拟大事则驰报居正於江陵调阳内慚累疏乞休及居正还遂致仕】

诏选内竖三千五百人

【命司礼监差官会同礼部拣选内竖三千五百七十名应用於是礼科给事中李天植上疏言陛下纘服初年允收马安等三千二百五十人部覆永不为例今六载之中两收数千幸门日启覬泽者多傥得收回成命散此党与上也不然裁取其半次也疏入报闻】质实【李天植广德州人】

冬十二月高拱卒复其官

【拱家居数年及是卒张居正请复其官与祭葬如例冯保憾未释中旨给半葬祭文仍寓贬词初谥達封贡拱力主王崇古议边陲得以休息卒後久之廷议论拱功乃赠太师諡文襄】

封李成梁宁远伯

【土默特与从父哈斯坦弟大小韦徵从弟诺木图恭图子布延台珠尔从子欢台吉及泰宁部长博斯呼绰哈等频年入犯成梁屡击却之论功世廕恩赉稠叠至是博斯呼绰哈纠土默特欢台吉等以三万余骑壁辽河攻东昌堡深入耀州成梁遣诸将分屯要害以遏之而亲提锐卒出塞二百余里斩其长九人余首级八百四十捷闻帝告谢郊庙封成梁宁远伯】质实【东昌堡在海州卫东南海州卫即今奉天府海城县耀州辽置今废故城在海城县西南哈斯坦旧作黑石炭韦徵旧作委政诺木图旧作煖土?图旧作拱土布延台殊尔旧作卜言台周博斯呼旧作把速亥绰哈旧作炒花今并改】

户部奏是岁天下户口之数

【户一千六十二万一千四百三十六口六千六十九万二千八百五十六明食货志明代户口之数增减不一其可考者洪武二十六年弘治四年及是年而已明初兵燹之後户口顾极盛其後承平日久反不及焉所以减者周忱所谓或投倚於豪门或冒匠窜两京或冒引贾四方举家舟居莫可踪迹也故宣宗尝与羣臣论历代户口以为其盛也本於休养生息其衰也由土木兵戎云】

【己卯】七年春正月毁天下书院

【原任常州知府施观民以科歛民财私创书院坐罪革职闲住是时士大夫竞讲学张居正特恶之尽改各省书院为公廨凡先後毁应天等府书院六十四处】

二月遣使分閱边防

【分遣科道等官往各省察地方官有科歛及侈费者劾之】

夏四月张居正上雝肃殿箴

【帝渐备六宫多宣索太仓银购珠宝居正乃因户部进御览数目陈言谓每岁入额则减於旧所出则浮於前请量入为出罢节浮费因进雝肃殿箴帝嘉纳焉帝令工部铸钱给用居正以利不胜费止之言官请停修武英殿工及裁外戚迁官恩数帝多曲从之一日帝御文华殿居正侍讲读毕以给事中所上灾伤疏闻因请振济复奏曰上爱民如子而在外诸司营私背公剥民罔上宜痛钳以法而上亦当加意撙节於宫中一切用度服御赏赉布施裁省禁止帝首肯之】质实【雝肃殿箴时帝以雝肃殿围屏命辅臣撰词居正因撰进雝肃殿箴箴曰北宸紫宫惟皇宅中身为民表心与天通斯须不和则乖戾起斯须不敬则傲慢丛念常生於所忽祸乃基于无穷是以圣人事心天命是敕钦厥止日谨万几处深宫心周八极不以嗜慾滑和不以逸豫灭德无作好无作恶蔼蔼熙熙如春时煦无荒色无荒禽竞竞惕惕如渊斯临勿谓燕闲人莫子观一喜一怒作人燠寒弦急者絶气平者安优优和衷为君实难勿谓宥密人莫子弼一动一言恒为度律危惧则存骄泰则失昭昭神明相在尔室在昔成周宇内太和繇繇其在宫发琴瑟而不颇亦曰懿?小民怀保繇肃肃其在庙克对扬于祖考我皇濬哲是

谓智临匪高明之不足贵育德于静深我皇抚运是谓开泰匪丰亨之未臻惧此心之或汰药以平其情虽锤簏不设而若闻希声然後心和气和而天下平礼以饬其志虽升降未施而若持重器斯谓无逸乃逸而天下治故曰冲和者养威澹泊者养禄危厉者养安留劳者养乐以古为师于何不仪平平周道惟皇所之以心为监于何不见穆穆文王惟皇所究朽索在手勿谓无伤覆车在睫奈何弗防和不见流敬不可忘慎终如始万寿无疆】

秋七月振苏州灾

【苏州水灾抚按官请先行赈济随赐蠲免从之】

京师地震

【一日凡 震】

八月减均徭加派

【明初役法有里甲均徭杂泛三等以户计曰甲役以丁计曰徭役上命非时曰杂役皆有力役有雇役府州县验册丁口多寡事产厚薄以均适其力自嘉靖以来行一条鞭法一条鞭者总括一州县之赋役量地计丁丁粮毕输于官一岁之役官为金募力差则计其工食之费量为增减银差则计其交纳之费加以增耗凡额办派办京库岁需与存留供亿诸费以及土贡方物悉并为一条皆计亩徵银折办于官故谓之一条鞭其法无他科扰而民力亦不大绌顾称简便然诸役冗费名罢实存有司追徵如故百姓苦之至是诏减银一百三十万有奇】

【庚辰】八年春二月辛未朔日有食之

帝耕藉田

【以耕藉礼成赐公卿等银币有差】

三月帝奉两宫太后谒陵天壽山

【行春祭礼也张居正等扈行赐银币有差免所遏田租】

张居正乞罢诏慰留之

【居正扈帝谒陵归具疏乞休中云拜手稽首归政凡再上帝慰留恳切最後手书称慈圣口谕先生亲受先帝付托岂忍言去俟辅尔岁至三十而後商处先生母复兴此念居正乃出时帝顾居正益重赐札称元辅或称先生或又称元辅张少师先生待以师礼而居正奏谢亦俨然自负为帝者师初居正子敬修嗣修懋修先後领乡荐帝改元之二年敬修会试不第居

正怒因停是科馆选至五年嗣修遂以第二人及第至是年复届会试懋修敬修皆中式会居正方乞休遂特擢懋修第一人及第是时辅臣吕调阳张四维申时行之子亦皆先後成进士御史魏允贞疏陈时弊请自今辅臣子弟中式俟致政之後始许廷对庶幸门稍杜允贞因是谪官于外然自是辅臣居位其子无复登第者矣】

夏四月迤东都督王兀堂寇边李成梁击败之

【兀堂通市寬甸怨边将强抑市价数遣骑寇边犯薳阳及黄冈岭指挥王宗义战死遂入永甸堡成梁击走之追出塞斩首八百余级尽毁其营垒至秋复犯寬甸副将姚大节又破之兀堂由是不振】质实【薳阳堡在辽东都指挥司东南凤凰城北永甸堡在凤凰城东】

振两淮灾

【以两淮各竈场饥命抚按官賑济又以江北等处连次告饥命支银田营并各仓贮粟賑之户部言有司积谷賑荒先年立法俱止於州县不知各府为州县表率亦当照例存积以备賑济从之】

六月南畿大水

【先是凤阳等处雨涝淮溢水薄泗城且至祖陵墀中御史陈用宾以闻给事中王道成因疏言黄河未涨淮泗之间霖雨偶集而清河口已不能容泄宜令河臣设法疏导堵塞从之】质实【王道成巴县人】

秋七月後军都督府僉事俞大猷卒

【先是大猷以平古田獐功进世廕已为巡按御史所劾回籍听调久之复以都督僉事起僉书後府事领车营训谏三疏乞归卒赠左都督赐祭葬諡武襄武平崖州饶平皆为立祠大猷少好易尝以易推衍兵家奇正虚实之权谓兵家之数起五犹一人之身有五体虽将百万可使合为一人也初为汀漳守备洩武平作读易轩与诸生为文会一日教武士击劒及为大将持身廉驭下有恩馱历东南大小百十余战所向无不剿灭威名震南服其用兵先计後战不贪近功忠诚许圉老而弥笃谭纶尝与书曰节制精明公不如纶信赏必罚公不如戚精悍驰骋公不如刘然此皆小知而公则堪大受戚谓戚继光刘谓刘显也其为纶所推重如此】质实【饶平明成化十四年置县属潮州府今因之】

冬十月汰冗官

【協理京营兵部尚书杨兆以有诏令本部侍郎带管疏辞协理帝命其供职候裁仍勅吏部核两京大小九卿及各属有冗濫者裁之并核各省徭赋及诸司冒濫冗费皆从张居正请也已而吏部核议各部员外郎主事以下应裁者归并兼管令在任候裁户部核议凤阳营田

金事各员应裁者归并所辖州县後议裁革北直隶保定等府同知通判以下官五十五员应天福建仓大使等四十六员浙江布政使司都事等官二十员江西陕西延绥鄜阳等处司府州县佐贰杂职等官三十员南赣贵州司府县驿等官十员南京中左二府锦衣卫各金书大教场等营把总八员】

振苏松常镇四府饥

【四郡并灾命将漕粮仓粮屯粮各酌量改折常熟吴江长洲崑山四县被灾尤甚以余剩兵饷并发贙罚银分振之】

十一月度民田

【初建昌知府许孚远始为归户册以田从人法简而密後张居正议天下田亩通行丈量遂用开方法以径围乘除畸零截补於是豪猾不得欺隐里甲免赔累而小民无虚粮总计田七百一万三千九百七十六顷视孝宗时赢三百万顷居正颇以溢额为功有司短缩步弓以求田多或掊克见田以充虚额後遂按溢额增赋时户部议丈量田条为八款一明清丈之例谓额失者丈全则免一议应委之官以各右布政使总领之分守兵备分领之府州县官则专管本境一复坐派之额谓田有官民屯数等粮有上中下数则宜逐一查勘使不得诡混一复本徵之粮如民种屯地者即纳屯粮军种民地者即纳民粮一严欺隐之律有自首历年诡占及开垦未报者免罪首报不实者连坐豪右隐占者发遣重处一定清丈之期一行丈量磨算之法一处纸割供亿之费俱从之】质实【许孚远字孟中德清人】

发明【丈量田亩俾豪猾之欺隐者无以行其奸里甲综代输者不至滋其累未常非除弊之善政顾一有溢额为功之心则除弊者适以滋弊以居正之综核岂不知天下田亩自有定数何至自孝宗以来上下未百年间赢余竟至三百万顷之多是由居正务以溢额为心遂至不问其额之何以溢为有司者亦惟知迎合意旨而不及丈溢一时赋加永久之为累至有短缩步弓暗增浮额以快其多功之心者上下相蒙良法专为弊政昔王成伪增民户史传犹且讥之一郡且然况以遍于天下夫使田亩徒益虚名而民生致被实害又岂大臣为国之谊哉】

诏内官并自陈斥逐有差

【帝即位初慈圣太后遇帝严太监冯保倚太后势数挟持帝帝甚畏之时与小内?戏见保入辄正襟危坐曰大伴来矣所昵孙海客用为乾清宫管事牌子屡诱帝夜游别宫小衣窄袖走马持刀又数进奇巧之物帝深宠幸保白太后召帝切责帝长跪受教惶惧甚保属居正草帝罪已手诏颁示阁臣词过抑损帝年已十八覽之内慙然迫于太后不得不下居正乃上疏切谏又缘保意劾去司礼巨璫孙德秀温泰等而令诸内侍俱自陈凡保所不悦者斥退殆尽帝由是渐恶保并亦嫌居正矣保窃权肆横间亦时引大体内阁产白莲翰林院有双白燕居正以为瑞进之保使使语居正曰主上冲年不可以异物启其玩好保又颇能约束其子弟不

敢肆恶人亦以是称之然保性贪其私人锦衣指挥徐爵内官张大受恃势招权利居正使苍头游七兴爵结为兄弟交关语言凡有所谋皆缘以达焉先是上夜宴宫中为近侍孙海客用所惑杖二内使几毙慈圣皇太后闻之不乐训戒甚切上悔悟即谕内臣曰孙海客用凡事引诱朕无所不为令安置南京以後但有此等小人即同举名来奏仍命文书房官宣示阁臣张居正等谓降黜未尽其辜宜发充净军上从之次日居正等回奏曰自圣上临御以来讲学勤政圣德日新乃数月之间仰窥圣意所向稍不如前微闻宫中起居颇失常度但臣等身隔外庭未敢轻信而朝廷庶政未见有缺故不敢妄有所言然前者侍日讲亦曾举益者三乐损者三乐益者三友损者三友两章书语云树德务滋除恶务尽其各监等官俱令自陈老成廉慎者存之諂佞放恣者汰之且近日皇穹垂象彗芒扫宦者四星宜大行扫除以应天变臣又闻汉臣诸葛亮云宫中府中俱为一体陟罚臧否不宜异同臣等待罪辅弼宫中之事皆宜与闻此後不敢以外臣自限凡皇上起居与宫壶内侍但有所闻即竭忠敷奏及左右近习有奸佞不忠者亦不避嫌怨必举祖宗之法奏请处治皇上亦宜痛自改悔戒饮宴以重起居夺精神以广嗣续节赏赉以省浮费却玩好以定心志亲万几以明庶政勤讲学以资治理而已司礼监太监冯保自叙先朝知遇与受顾命之隆及今廕锡之厚欲以老病乞身不允】

发明【惩剏内官其名甚美第所劾逐之璫寺不过取冯保所不悦者而汰去之则此举适以阿保之好恶而已而其事皆赞成于居正尤可骇听居正身为首辅必与保相固结事事曲为迎合又使苍头与保私人结为兄弟以联声势作威窃柄罔恤人至一至如此况自陈之典本属具文大臣或偶循例避贤引退乃以行之宦竖而复济以私心为实为名义安所取观居正疏谏之语且谓不敢以外臣自限此正欲统擅内外之权以挟制其主然神宗亦因是见嫌而内官之心终无以服所谓惩创者亦复何益徒使积怨流毒遗患後來大臣怀私以事其上其凶于而家害于而国可胜道哉】

【辛巳】九年春正月勅边臣备警

【以新岁五日狂霾蔽天勅边臣加意警备御史范鸣谦言边防固宜饬内治尤当修加刑罚未当宜勅有司不许混拟久监赃罚贪墨未息宜勅新选官不许借贷豪门致赴任责收无措横肆诛求荒芜未垦宜勅淮安凤阳二府官员留心农事盗贼未殄宜勅有司不许欺蔽而大要尤在居心之修省起居以时嗜慾以节讲筵毋惮祥问大臣面赐咨询端好尚禁奢靡庶灾异潜消分徵協应疏入报闻】质实【范鸣谦江阴人】

命翰林官分番入直

【张居正言人主一心乃万化从出之原亦衆欲交攻之会必使常有所系然後纵欲之念不萌而引诱之奸不入窃见前代好文之主皆有文学之臣奉侍清燕或承诏登答或应制赓酬皆寓风劝箴规之益翰林撰述讨论为其职务如日讲诸臣皆文学优瞻其余翰林亦皆需次待用宜其分番入直每日轮四员同日讲诸臣在馆祇候万几之暇如披閱古文有所采録或鉴赏名笔有所题咏即属诸臣具草或不时面赐质问以观其才品高下从之】

二月命儒臣编实录分类成书

【时张居正请命翰林诸臣将累朝实录摘其切于君德治道者分类纂修成书名曰训录类编以日讲之期如先年进讲帝监图说故事讲解一二条以裨治政】质实【训录类编合宝训及实录分类编辑凡四十类曰创业艰难曰励精图治曰勤学曰敬天曰法祖曰保民曰谨祭祀曰崇孝敬曰端好尚曰慎起居曰戒游佚曰正宫闈曰教储贰曰睦宗藩曰亲贤臣曰去奸邪曰纳谏曰理财曰守法曰敬戒曰务实曰正纪纲曰审官曰久任曰重守令曰驭近习曰待外戚曰重农桑曰兴教化曰明赏罚曰信诏令曰谨名分曰却贡献曰慎赏赉曰敦节俭曰慎刑狱曰褒功德曰屏异端曰饬武备曰御寇盗】

三月大閱

【准隆庆三年事例行饬兵工二部重造盔甲限每年造千副五年通完】

夏四月戎政尚书方逢时罢

【逢时才畧明练处置边事悉协机宜至是以老病乞休去其功名与王崇古相亚世称方王逢时自万历五年以宣大总督召理戎政时议者争言贡市利害逢时疏言数年以来九边生齿日繁守备日固田野日辟商贾日通边民始知有生之乐北部输诚效贡莫敢渝约岁时请求随宜兴之辄稽首欢笑有掠人要赏者告谕逹讨治即俛首听命而异议者或曰敌使充斥为害或曰日益耗费彼欲终不可足或曰与寇益狎隐忧叵测此皆未观事机之论也夫使者之入多者八九人少者二三人朝至夕去守贡之使赏至即归何有充斥财货之贿有市本有抚赏计三镇岁费二十七万较之乡时户部客饷七十余万太仆马价十余万十才二三耳而民间耕获之入市贾之利不与焉所省甚多何有耗费乃若所忧则有之然非隐也方庚午以前三军暴骨万姓流离城郭邱垓刳粮耗竭边臣首领不保朝廷为之旰食七八年来幸无此事矣若使臣等处置乖方恠小费而亏大信使一旦肆行侵掠则前日之忧立见何隐之有哉所不可知者谕逹老矣诚恐数年之後此人既死诸部无所统一其中狡黠互相争构假托异辞遂行侵扰此则时变之或然而不可预料者在我处之亦惟罢贡絶市闭关固垒以待仍禁边将毋得轻举使曲常在彼而直常在我因机处置顾後人方畧何如耳夫封疆之事无定形亦无定机惟朝廷任用得人处置适宜何必拘拘焉贡市非而战守是哉因复奏上款贡图寻代王崇古为尚书累疏致仕归帝书尽忠字赐之二十四年卒】

土默特犯辽阳副总兵曹簠败绩

【先是土默特以二万余骑入攻锦州参将熊朝臣固守而遣步将出战皆殁敌乃分掠小凌河松山杏山会李成梁驰援始出境已而土默特复与诸酋聚兵塞下谋入广宁成梁率轻骑从大宁堡出塞四百余里击之敌大败走至是复入辽阳簠出御之遇伏失千总陈鹏以下三百十七人马死者四百六十匹土默特遂大掠人畜而去】质实【小凌河在锦州府锦县东亦名锦川松山在锦县南杏山在锦县西南大宁堡在锦州府义州东北】

京师旱南畿饥

【张居正上言淮安凤阳苏州松江四府连被灾伤徐州宿州间至以树皮充饥或聚为盗昔元末之乱亦起于此当破格振之陛下宜搏节宫中耗费嘉靖间用最造繁内库尚有余积今已增额犹称缺乏有限之财安能供无穷之用帝嘉纳之居正以江南富豪怙势及诸奸猾吏民善逋赋乃选大吏精悍者严行督责赋以时输国藏乃充裕】

山西地震

【蔚州地震有声如雷屋宇震裂同时大同镇堡各州县俱地震有声】

五月尽卖民间种马

【明初马有官牧有民牧官牧给边镇民牧给京军皆有孳生驹给草场以资刍牧後专牧于民视丁田授马始曰户马既曰种马按岁徵驹种马死孳生不及数辄赔补自豪右庄田占草场马户渐多逃窜穆宗从太仆少卿武金议卖种马之半至是以互市饶马尽卖之上马八两下至五两又折徵草场地租银以供团营买马及各边之请迨帝末年师役繁兴往往借支太仆银久之银与马两竭问政大坏】质实【武金疏一种马之设专为孳生备用备用马既别买则种马可省今备用马既足三万宜令每马折银三十两解太仆种马尽卖输兵部一马十两则直隶山东河南十二万匹可得银百二十万且收草豆银二十四万御史谢廷杰谓祖制所定关军机不可废兵部是廷杰言而是时内帑乏竭方分使括天下逋赋穆宗遂可金奏下部议请养卖各半从之】

秋八月辽东大雨雹

【辽东定辽等卫雨雹如鸡卵秋禾尽伤凡百余里】质实【定辽卫凡中左右前後五卫皆在辽东都指挥使司附郭】

扬州大水

【扬州泰兴海门如皋等处狂风大作屋瓦如飞骤雨如注陂塘圩埂尽决漂没官民屋舍凡数千间男妇死者无算】质实【泰兴唐置县明属扬州府之通州今属通州直隶州海门在通州东四十里後周置海门县明为海门乡属通州今为厅仍属通州】

冬十一月振真定顺德广平灾

【三府风灾从巡按御史范鸣谦之情分别蠲振夏税全徵者于秋粮抵免之】

御定资治通监纲目三编卷二十六

卷二十七

<史部,编年类,御定资治通监纲目三编>

钦定四库全书

御定资治通监纲目三编卷二十七

【起壬午明神宗万历十年尽辛卯明神宗万历十九年】凡十年

【壬午】十年春正月免天下逋赋

【张居正言百姓财力有限即年岁丰收一年所入仅足以供当年之数不幸荒歉则见年尚不能办岂复有余力完累岁之积逋乎有司规避罪责往往将见年所徵那作带徵名为完旧欠实则减新收也今岁之所减即为明年之拖欠见在之所欠又是将来之带徵诛求无已民何以堪况头绪繁多分混杂小民竭脂膏胥吏饱谿壑甚者不肖有司因而渔猎与其畋民以实奸贪之橐孰若尽减以施旷荡之恩今户部自隆庆元年至万历七年各省未完带徵钱粮一百余万而江南苏松两府至七十余万盖以彼处税粮原重故逋负独多昨应天巡按孙光佑具奏请蠲户部以干系国计未敢擅议窃谓德惠当出朝廷若今地方官请而得之则恩归於下怨归於上矣乞谕户部核万历七年以前积负悉行蠲免帝从之凡免一百余万有奇而是时帑藏充盈国最完富太仓之粟可以支十年】

三月杭州兵乱以兵部侍郎张佳允巡抚浙江讨定之【初杭州东西二大营兵每名月给饷银九钱巡抚都御史吴善言奉诏议减三之一各兵稍有怨言至是营兵马文英刘廷用等构其党拥诉於巡按御史张文熙且言春汛届期例应防海若搭铜钱不便携带文熙好慰遣之善言遽出示曰饷减已定不愿者听其归农次日兵遂大噪三司官往谕因围绕不放行文熙传谕始释而拥入抚廨缚善言以出痛殴之文熙率三司官吴宪及巡盐御史孙旬等多方戒谕始解散归善言文熙因劾善言抚驭乖方自貽威辱至于营卒应严惩首恶以定人心时朝议以佳允才令代善言为巡抚佳允甫入境而杭民以行保甲故亦乱佳允问告者曰乱兵与乱民合乎曰未也佳允喜曰速驱之尚可离而二也既至民剽益甚佳允从数卒佯问民所苦下令除之衆益张夜掠富室火光独天佳允召游击徐景星谕二营兵令讨乱民自赎擒百五十人斩其三之一乃佯召文英廷用予以冠带而密嘱景星捕七人并文英廷用斩之二乱悉定帝优诏褒美】质实【张佳允字肖甫铜梁人初知滑县剧盗高章者诈为缇骑直入官署刼佳允索帑金佳允色不变伪书券贷金悉署游徼名召入立擒贼由此知名由户部主事累迁宣大巡抚时青巴图已服其弟蒙固岱犹桀骜所部巴哩掠塞外总兵官麻锦擒之佳允命锦缚巴哩将斩而身驰赦之巴哩叩头誓不敢犯边因与总督郑洛以计服蒙固岱入为兵部右侍郎张居正以为才故今代善言善言成安人张文熙临桂人孙旬莱阳人】

发明【善言减饷激变办理固属未善然兵丁敢于鼓噪入廨缚殴巡抚则叛逆当诛此而

不立示重惩国法安在张文熙身为巡按御史仅以多方劝谕解散营卒曲示调停并未闻擒获一人置之重典转先纠劾巡抚神宗亦遂以此罢黜善言是适足以长乱兵之智矣杭民之乱未必非效尤而起设其时乱兵与乱民相合其患将不可收拾佳允权宜定变虽首恶伏诛而标兵习见巡抚之可以撼摇卒伍渐以纵骄民情因之不靖何怪乎乱萌之日长也】

博斯呼寇义州李成梁击斩之

【泰宁部博斯呼与弟绰哈子布延图入犯义州成梁设伏镇夷堡参将李平胡射中博斯呼胁坠马斩之寇大奔追馘百余级兆哈等恸哭去自是敌数入成梁等数败之辄斩其魁又时袭击之于塞外敌少戢】质实【镇夷堡在锦州府义州东北其东南有盘岭可以按伏】

夏四月京师旱疫

【是月戊子朔诏谕礼部今民及时农桑母事游惰及庚子以旱祈雨敕羣臣修省五日复以疫疠盛行死者甚衆勅太医院官广施药饵出太仓银振恤】

宁夏土军作乱旋讨平之

【宁夏灵州土军马景等作乱杀参将许汝继屠其家巡抚都御史晋应槐讨诛之时礼科给事中石应岳上言浙江既标兵毆辱抚臣灵州复士卒屠戮参将四月末旬彗星出于五车雨泽愆期风霾蔽日人民疫死农务无依天异人变叠见可谓警戒矣惟陛下抑左右之专恣斥侍从之谀佞损燕私过度之乐罢营缮不急之工疏入诏臣工修省】质实【石应岳龙岩人】

彗星见

【丙辰彗星见西北形如匹练尾指五车历二十余日始灭】

夏五月免先儒後裔丁粮

【从福建巡抚劳堪请也免先师孔子及宋儒朱熹李侗罗从彦蔡沈胡安国游酢真德秀刘子翥故大学士杨荣後裔各丁粮有差】

賑畿内饥

【户科给事中顾问言顺天等八府自万历八年雨阳愆期收成寡薄至九年十年恒阳禾稼枯槁是以民有菜色元气重伤生者逃移死者枕藉真定大名一带尤甚宜特加振恤并蠲免田租从之】质实【顾问湖广德化人】

六月丁亥朔日有食之

賑太原平阳潞安饥

【三郡大饥发库贮及商税银并仓谷相兼賑济】

加张居正太师以前礼部尚书潘晟兼武英殿大学士吏部侍郎余有丁兼文渊阁大学士并预机务晟寻罢【先是三月居正有疾求私宅票拟许之帝频颁敷谕问疾出金帛为医药资至是四閱月不愈百官并斋醮为之祈祷南都秦晋楚豫诸大吏无不建醮帝命张四维等理阁中细务大事即家令居正平章居正始自力後惫甚不能徧閱然尚不令四维等参之及病革乞归上复优诏慰留会辽东奏捷加居正太师初居正以十二载满加太傅明世文臣无真拜三公者有之自居正始已而居正自度不起乃荐晟及有丁自代晟素贪鄙不厌清议冯保素从受书强居正荐之时居正已昏甚不能自主矣命下甫五日晟为言者交章劾罢】质实【潘晟新昌人余有丁字丙仲鄞人】

张居正卒

【帝悼辍朝谕祭九坛视国公兼师傅者赠上柱国命四品京卿锦衣堂上官司礼太监护丧归葬諡文忠居正性深沈机警多智数为史官时尝潜求国家典故时务之切要者剖晰之遇人多所谘询及揽大政登首辅务尊主权译吏职信赏罚一号令帝亦悉心听纳用李成梁戚继光委以边事南蛮累世负固者次第遣将削平之力筹富国清邮传核地亩故神宗初政起衰振隳纲纪修明海内殷阜居正之力也然其褊□多忌刚愎自用初入政府即以私憾废辽王好谀成风六朝之长咸唯唯听命至章疏不敢斥名第称元辅士大夫始誉以伊周渐进以五臣继竟拟之舜禹居正亦恬然居之居正卒余威尚在言官奏事尚称先太师方夺情时威权震主帝虽虚己以听而内顾不堪身死未几遂遭削夺子孙并致祸败初帝在讲筵读论语色勃如也误读为背居正遽厉声曰当读作勃帝悚然惊起同列皆失色由此帝益心惮居正时比之霍氏骖乘云】

秋七月賑陕西饥

【陕西平凉庆阳延安三府属被灾最重临洮巩昌二府被灾次重命以全陕积贮仓粮委官分賑】

八月皇子常洛生

【恭妃王氏出也帝御殿受贺颁诏大赦妃初为慈宁宫宫人年长矣帝过慈宁私幸之有身故事宫中承宠必有赏赉文书房内阁即记年月及所赐以为验时帝讳之故左右无一言者一日侍慈圣宴语及之帝不应慈圣命取内起居注示帝且好语曰吾老矣犹未有孙果男者宗社福也母以子贵宁分差等耶是年四月封恭妃及是遂生皇长子即光宗也】

冬十月賑苏松诸府灾

【苏州松江诸府大水冲坏民居以千万计漂流田禾十余万顷死者二万人故有是賑并蠲免钱粮有差】

十二月太监冯保以罪謫为奉御安置南京

【初保内倚太后外倚张居正专擅威福帝有所赏罚非出保口无敢行者帝积不能堪然迫于太后居正不能去也及太后归政居正又卒保失所倚然犹肆横如故潘晟既罢保方病起诟曰我小恙遽无我邪皇长子生保欲封伯爵张四维以无故事难之拟廕弟侄一人都督僉事保怒曰尔由谁得今日尔负我御史郭惟贤请召用吴中行等保责其党护謫之吏部尚书王国光罢保辄用其乡人梁梦龙代之其私人锦衣指挥徐爵内官张大受等窃权如故然是时帝已积怒保东宫旧阉张鲸素害保宠谋去之其同事张诚向为保所恶斥于外至是复入两人乃伺间陈保过恶并发其与张居正交结状请今保闻住帝犹畏之曰若大伴上殿来朕奈何鲸曰既有旨安敢复入会御史江东之首劾保党徐爵帝下爵狱论死御史李植遂列保十二大罪帝震怒遂謫保奉御南京安置籍其家金银百余万珠宝瑰异称是保之发南京也太后问故帝曰老奴为张居正所惑无他过行且召还时潞王将婚所需珠宝未备太后闲以为言帝曰年来无耻臣僚尽货以献张冯二家其价骤贵也江东之并纠吏部尚书梁梦龙赂徐爵得官工部尚书曾省吾吏部侍郎王篆皆被论得罪去于是弹击居正者纷起矣】质实【郭维贤字哲卿晋江人王国光字汝观阳城人梁梦龙字乾吉真定人李植字汝培江都人曾起吾彭泽人王篆夷陵州人】

复建言诸臣职

【御史孙继先言人君欲建久安长治之功必重直言敢谏之士前日编修吴中行检讨赵用贤员外艾穆主事沈思孝进士邹元标各以张居正夺情一事建言得罪至廷杖遣戍陛下岂不知诸臣无罪但以为不如是不足以安居正之心顷因御史李植言斥冯保则诸臣赐环不可稽迟矣至于忤触居正如余懋学赵应元傅应祯朱鸿模孟一脉王用汲等亦当一体复用以开言路从之因并复郭维贤职】质实【孙继先字廕甫孟县人赵应元三原人孟一脉东阿人王用汲字明受晋江人】

以严清为吏部尚书

【清素着清望张居正当国清任刑部尚书不附丽居正及籍冯保家得廷臣饋遗録独无清名帝深重之会梁梦龙罢即以清代清日计故实辨官材自丞佐以下皆亲署无一幸进者中外师其廉俭书问几絶甫半岁得疾归】质实【严清字公直云南後卫人】

改薊镇总兵官戚继光于广东

【继光在蓟镇十六年当国大臣徐阶高拱张居正先後倚任之居正尤事与商榷动无掣肘故继光益发舒及是居正歿甫半岁给事中张鼎思言继光不宜於北阁臣拟旨遽调之广东继光悒悒不得志赴粤踰年即谢病归居三年卒继光更历南北并着声在南方战功持盛北则专主守边防修举继之者踵其成法数十年得无事所着纪效新书练兵实纪谈兵家遵用焉】质实【张鼎思长洲人明史艺文志戚继光纪效新书十四卷练兵实纪九卷】

【癸未】十一年春正月饬严边备

【京师风霾灵台奏主边兵因饬兵部令各边将慎加防备】

闰二月帝如天寿山谒陵

【免所过田租是秋九月复如天寿山谒陵】

三月追夺张居正官阶

【冯保既得罪新进者益务攻居正诏夺上柱国太师耳夺谥斥其子锦衣卫指挥张简修为民居正诸所引用者斥削殆尽吴中行赵用贤等迁官有差】

夏四月张四维罢

【初四维曲事张居正然心不善其所为居正卒四维始当国政知中外积苦居正欲大收人心因上疏言事请荡涤烦苛宏敷惠泽帝纳其言朝政为之稍变四维复引居正所沈抑者稍稍登用时望颇属至是以父丧归先是居正余党欲逐四维拥中时行为首辅四维愠语时行客曰夫首相者若天行有春必有夏何相迫为时行得疾在告及起不敢谢过默默而已四维乃与门生在言路者谋攻时行疏具将上会四维父讣至乃已四维归後服将阼而卒】

以许国为礼部尚书兼东阁大学士预机务

【张四维既去申时行为首辅国素与时行善由是政府无间】质实【许国字维禎歙县人】

致仕武英殿大学士徐阶卒

【阶里居後为高拱所厄及拱罢始得安帝之元年阶年已八十诏遣行又存问赐玺书金币至是卒赠太师諡文贞阶以恭勤结主知立朝有相度保全善类嘉隆之政多所匡救间有委蛇亦不失大节方严嵩初罢阶以三语榜于直庐曰以威福还主上以政务还诸司以用舍刑赏还公论由是票拟公之同列言路亦益发舒当时翕然称阶为名相】

五月我

太祖高皇帝起兵征尼堪外兰克图伦城

【初长白山之东有布库哩山山下有池曰布勒瑚哩相传有天女三长曰恩古伦次曰正古伦季曰佛库伦浴于池有神鹊衔朱果置季女衣取而吞之遂有身寻产一男生而能言体貌奇异及长母告以故命以爱新觉罗为姓名曰布库哩雍顺以小舫乘之令顺流而下至河步登岸端生其地有三姓方构兵或汲于河见而异之归语衆人往观询知所由来皆惊曰此天生圣人也遂迎舁至家三姓者议曰我等盍息争推此人为主以女百里妻之奉为贝勒其乱乃定于是布库哩雍顺居长白山东鄂谟辉之野鄂多理城国号曰满洲实为我朝开基之始数传後有名樊察者以国人弗靖遁于荒野追者将及之有神鹊止其首追者疑为枯木遂得免後传至】

【肇祖原皇帝兴祖直皇帝】

【景祖翼皇帝显祖宣皇帝相继嗣兴威服诸部】

【景祖居赫图阿拉地兄弟六人筑城分居号宁古塔贝勒时有望气者言满洲将有圣人出戡定衆乱统一诸国继而显祖嫡妃喜塔喇氏以明嘉靖三十八年己未岁诞生】

【太祖高皇帝天表非常勇畧盖世号为聪睿贝勒时诸部争夺不已】

【太祖恩威并用渐次削平会苏克素护河部图伦城有尼堪外兰者陰构明总兵李成梁引兵攻古呼城主阿泰

章京阿泰妻乃景祖长子礼敦巴图鲁之女】

【景祖闻警恐女孙被陷偕显祖往救先後入古呼城城中守御甚坚成梁不能克尼堪外兰诡往招抚城中人信其言杀阿泰以降成梁尽屠之遂并害】

【景祖显祖】

【太祖闻之赫然震怒往诘责明边吏明人寻归二祖丧至是】

【太祖年二十有五思复祖父讐乃】

【显祖遗甲十三副起兵征尼堪外兰于图伦城尼堪外兰遁于甲版遂克其城而归既而复进征甲版城尼堪外

兰乃逃于鄂勒欢地筑城以居太祖寻复进克鄂勒欢城尼堪外兰遁入边】

【太祖遣斋萨率四十人索之边吏执以畀斋萨遂斩之而归自此岁输银币通和好焉】
质实【长白山在吉林乌拉城东南山高二百余里横亘千余里山之上有一潭曰阔门周八十里源深流广鸭绿混同爱濛三江之水出焉东自宁古塔西至奉天府诸山皆发脉于此尼堪外兰筑鄂勒欢城在是年八月执斩尼堪外兰在丙戌年】

发明【臣等伏覩史牒所载自古帝王莫不以开创艰难勤劳締构而承】

【皇穹付畀奄受万方仁义兼施德威并济得天下之正从未有盛於我朝者也洪惟天造有邦】

【龙兴东夏灵源肇诞朱果开祥於是长白营居曼珠锡号神奇翔蹟实与生民元鸟同昭瑞应之符嗣世德重光遵时笃庆皇天眷顾始集大命于我】

【太祖高皇帝聪明智勇遐迩景从值明政不纲衅生疆吏因释憾於阿泰章京狡焉潜逞太祖高皇帝赫然震怒以一旅徂征罪人斯得而明人不思输平寻约尚复包藏祸心太祖高皇帝爰仗义执词底明之罪以七大恨告於上帝天助有德师克在和明人四路出兵扫如陨箨遂戡辽定浑光宅大东乃圣度同天犹不欲究我兵威贻书讲好以冀其悔悟迨我太宗文皇帝纘承鸿绪以明人罔有悛心亲御六军观兵畿甸前戈所指坚垒咸摧明人仅保都城势同累卵然且垂成弗取抑銳班师是则我之有造於明者甚大洎明社既屋祸起潢池复因吴三桂迎请】

【大兵入关扫清京輦剪戮鲸鲵为之报讐雪耻世祖章皇帝乃定鼎燕京追崇諡号守护陵园其加礼於胜国者至优极厚圣朝创业凡举动之光明正大允为夔絶前古而图伦一役义问昭宣实开亿万年兴王之祚谨依通鉴辑览之例特笔恭载自後】

【隆猷显烈与明纪相涉者无不次第备书用以阐释】

【神谟昭垂奕禩是不独非汉唐以来所克比拟万一即殷周嬗代慙德犹滋者又岂可相提而并论哉】六月賑湖广灾

【湖广承天汉阳郢阳襄阳四府各罹水患因命巡按御史等动支布政使司库钱粮并拨隣近府县所贮银与仓谷相兼分行賑恤】

冬十月賑河南灾

【河南商水等四十四州县水灾分别賑恤有差】

十一月己卯朔日有食之

十二月慈宁宫灾

【慈宁宫火太后移居於乾清宫命百官修省三日给事中万象春言保身节用二事御史丁此吕言慎举动宏听纳正典刑去幸位训近侍五事俱报闻】质实【万象春字仁甫无锡人丁此吕字右武新建人】

【甲申】十二年春二月京师地震

【丁卯京师地震有声至五月京师复地震】

释建文诸臣外亲之谪戍者

【御史屠叔方疏言成祖有练子宁若在朕犹当用之之语今既褒表忠魂建祠致祭其坟墓苗裔厚加恤録而姻党犹蔽覆盆如江西胡润一族赤矣内亲尽矣犹抄解外甥分戍若此者不一而足乞查前项姻戚有在戍者并有还乡部议愿回者放回不愿回者给与免帖诏自齐秦黄子澄外其坐方孝孺等连及者俱免之於是浙江江西福建四川广东得免者凡三千余人至光宗时并泰于澄戚属後裔亦俱放还】质实【屠叔方秀水籍平湖人】

夏四月籍张居正家

【御史羊可立复追论居正构陷辽王王妃因上疏讼冤言居正强占钦赐田产辽邸金宝万计悉入居正家帝命司礼监张诚及侍郎邱橐等往荆州籍居正家守今先期録人口錮其门子女饿死者十余辈诚等尽发其诸子兄弟藏得黄金可一万白金十余万长子礼部主事敬修不胜拷掠自缢死事闻申时行等与六卿大臣合疏请少缓之刑部尚书潘季驯复特疏言居正母年逾八旬旦暮莫必其命语尤激楚於是诏留空宅一所田十顷贍其母而尽削居正官夺玺书诏命以罪状示天下谓当剖棺戮屍而姑免之其弟都指挥居易子编修嗣修俱戍极边诸以忤居正罢黜者俱召还初言路为居正所抑至是争砺锋鋭搏击当路可立与李植江东之并荷帝宠三人更相结亦颇引吴中行赵用贤沈思孝为重执政恶之未几御史丁此吕劾侍郎高启愚主南京试以舜亦以命禹为题为居正劝进帝手疏示申时行时行言此吕以暧昧陷人大逆恐谗言踵至非清明之朝所宜有尚书杨巍因请出此吕于外植东之文章劾时行巍蔽塞言路帝为罪启愚留此吕时行巍求去余有丁言大臣国体所系今以羣言留此吕恐无以安时行巍心帝乃听巍出此吕于外许国尤不胜愤专疏求去言昔之专恣在权贵今乃在下僚昔颠倒是非在小人今乃在君子意气感激偶成一二事遂自负不世之节号召浮薄喜事之人党同伐异罔上行私其风渐不可长意盖指中行用贤等也自是言官与政府日相水火矣】质实【羊可立汝阳人高启愚铜梁人杨巍海丰人】

腾冲游击刘綎讨平陇川贼

【初緬酋莽瑞体以兵服诸蛮遣人招陇川宣抚多士宁士宁不从而记室岳凤方用事欲降緬遂诱士宁而酖之并杀其妻子夺金牌印符受瑞体伪命代士宁为宣抚既而瑞体死子应襄嗣凤导之入寇窥腾越永昌诸处已陷顺宁指挥吴继登等战死事闻诏以縋为腾冲游击邓子龙为永昌参将提兵往讨当是时迤西诸部皆叛以兵助緬进逼姚关势甚盛会縋子龙兵至诸土兵亦大集縋与子龙大破之攀枝花地乘胜追击先後斩首万余凤大惧乃令妻子及部曲来降縋责令献金牌符印及蛮莫孟密地而分兵趋沙木笼山先据其险自领大兵驰入陇川凤度无可脱遂诣军门降时诸部蛮视凤为向背緬亦依凤为心腹凤既降诸部俱杀緬使来归縋率兵进緬直抵阿瓦应里退走阿瓦酋猛匀诣縋降猛匀应里从父也遂班师献俘于朝凤伏诛 緬甸在云南西南嘉靖中孟养木邦酋攻杀緬酋莽纪岁分有其地纪岁子瑞体奔匿洞吾母家既长遂有其地洞吾之南有大古喇滨海与佛郎机隣古喇酋兄弟争立瑞体和解之因德瑞体争割地为献受其约束瑞体乃举衆絶古喇粮道杀其兄弟尽夺其地诸蛮皆畏服之遂复入緬陷凤密并孟养势益强於是木邦蛮莫诸部皆叛附之岳凤者江西人行贾陇川骁杰多智多士宁妻以妹使为记室凤媚士宁而夺其权至是遂诱杀之凤亦伏诛未几緬复炽进据孟养蛮莫官军战却之巡抚陈用宾筑八关于腾冲列兵戍守募人至暹罗约夹攻緬久之緬为暹罗所困势顿衰然近緬诸部仍服属之终明世不能复】质实【腾冲卫在腾越州城南本腾冲军民指挥使司明嘉靖二年改置腾冲卫顺宁本蒲蛮地元置府明仍为府以宝通等州县省入今因之姚关在甸湾土州北接顺宁界攀枝花地名在姚关南阿瓦城名为緬中五城之一】

冬十月余有丁卒

【有丁自七月以疾在告十月再以病乞休不允遂卒】

十二月以王锡爵为礼部尚书兼文渊阁大学士王家屏为吏部侍郎兼东阁大学士并预机务

【锡爵因救论夺情诸臣积忤张居正以礼部侍郎家居五年不出至是即家起之家屏前为日讲官敷奏剴摯帝敛容受之称为端士及是遂以吏部侍郎入阁去史官仅二年先是李植江东之与申时行相构以锡爵负时望且素恶居正当与时行贰故力推之比锡爵至乃与时行合弗善植等植由是大恨】质实【王家屏字忠伯大同山陰人】

以陈献章胡居仁王守仁从祀孔庙

【申时行等言守仁言致知出大学良知出孟子陈献章言主静沿宋儒周敦颐程颢且孝悌出处如献章文章功业如守仁纯心笃行如胡居仁并宜从祀从之终明世从祀文庙者薛瑄与守仁等四人 先是隆庆元年都御史徐枋等言王守仁陈献章宜从祀给事中赵思诚等言二人不宜从祀其後御史詹事讲上言明兴二百年来诸儒聿兴直肩斯道若薛瑄王守仁陈献章其最着者也今瑄已入祀而守仁献章格于议而不得与夫守仁之功烈文章献章之出处大节虽其言良知言主静若近于偏枯顾言知而未始废行言静而未尝离动合一之功

与宋大儒之论同归一致宜以守仁献章并从祀于是申时行等议上以居仁亦宜并祀诏以三人并从祀孔庙列于薛瑄之次】质实【胡居仁字叔心余干人居仁闻吴与弼讲学崇仁往从之游絕意仕进其学以主忠信为先求放心为要闇修自守布衣终其身】

【乙酉】十三年春二月旱大雩

【京师自去年八月不雨至于是月庚午大雩三月甲申复大雩】

三月山西地震

【先是二月南京地震至是山西山陰县地震旬有五日乃止】

李成梁袭巴图尔绰哈大破之

【巴图尔欲报父博斯呼之怨偕从父绰哈姑婿呼达纠西部伊勒敦等以数万骑入掠浑阳既退驻牧辽河欲犯开原铁岭成梁与巡抚李松潜为浮桥济师踰塞百五十里疾掩其帐寇已先觉整衆迎战成梁为叠阵亲督前障击而松以後阵继之斩首八百有奇五月敌犯浑阳伏积骑塞下诱官军游击韩元功追袭之败死至秋诸部长复犯蒲河而西部伊勒敦亦窥辽浑成梁命部将李平胡出塞三百五十里捣破伊勒敦营斩首一百八级诸部长闻之始引去】质实【铁岭辽银州明置铁岭卫今为铁岭县属奉天府蒲河在奉天府承德县西北明置千户所于此今废李松大城人巴图尔旧作巴土儿呼达旧作花大伊勒敦旧作以儿邓又作银灯今并改】

以尚宝少卿徐贞明领垦田使督治京畿水田

【初贞明为给事中尝请兴西北水利言神京雄据上游兵食宜取之畿内今皆仰给东南岂西北古称富强地而不足以实廩而练卒乎夫赋税所出括民脂膏而军船夫役之费常以数石致一石东南之力竭矣又河流多变运道多梗窃有隐忧闻陕西河南故渠废堰在在有之山东诸泉引之率可成田而畿辅诸郡或支河所经或润泉自出皆足以资灌溉北人未习水利惟若水害不知水害未除正由水利未兴也盖水聚之则为害散之则为利今顺天真定河间诸郡桑麻之区丰为沮洳由上流诸河之水惟泄于猫儿湾欲其不泛滥而壅塞势不能也今诚于上流疏渠濬沟引之灌田以杀水势下流多开支河以泄横流其淀之最下者留以瀦水稍高者皆如南人筑圩之制则水利兴水患亦除矣至于永平滦州抵沧州庆云地皆萑苇土实膏腴元虞集欲于京都滨海地筑塘扞水以成稻田若仿集意招徕南人俾之耕艺北起辽海南滨青济皆良田也宜特简宪臣假以事权毋阻浮议需以岁月不取近功或抚穷民而给其牛种或任富室而缓其科征或选择健卒分建屯营或招徕南人许其占籍俟有成绩次及河南山东陕西庶东南转漕可减西北储蓄常充国计永无绌矣疏入时以财匱不能举会御史傅应祯建言廷杖下狱贞明入狱视之坐贬太平府知事被谪南行次潞河着潞水客谈一书论水利当兴者十四事兵部尚书谭纶见之谓其必可行于是贞明召还为尚宝丞矣

工科给事中王敬民荐之会巡抚张国彦等方开水利于蓟州永平间有效遂加贞明尚宝司少卿兼监察御史领垦田使令遍历郊关与抚按等官讲求疏濬潴蓄之法贞明先诣永平募南人为倡及明年二月已垦三万九千余亩又遍历诸河周览水利分合将大行疏濬而阉人勋戚之占田者争言不便乃罢】质实【猫儿湾在雄县东滦州隋属平州辽分置滦州明亦曰滦州属永平府今因之庆云隋无棣县明永乐初避讳改曰庆云县属河间府之沧州今属天津府徐贞明字孺东贵溪人潞水客谈畧曰西北之地旱则赤地千里涝则洪流万顷惟雨阳时若庶几乐岁无饥此可常恃哉惟水利兴而後旱涝有备利一也中人治生必有常稔之田以国家之全盛独待哺于东南岂计之得哉水利兴则余粮栖亩皆仓庾之积利二也东南转输其费数倍若西北有一石之入则东南省数石之输久则蠲租之诏可下东南民力庶几稍苏利三也西北无沟洫故河水横流而民居多没修复水田则可分河流杀水患利四也西北地平旷寇骑得以长驱若沟洫尽举则田野皆金汤利五也游民轻去乡土易于为乱水利兴则农业者依田里而游民有所归利六也招南人以耕西北之田则民均而田亦均利七也东南多漏役之民西北罹重徭之苦以南赋繁而役简北赋省而徭重也使田垦而民聚则赋增而北徭可减利八也沿边诸镇有积贮转输不烦利九也天下浮户依富家为佃客者何限募之为农而简之为兵屯政无不举矣利十也塞上之卒土着者少屯政举则兵自足可以省远募之费苏班戍之劳停勾摄之苦利十一也宗禄浩繁势将难继今自中尉以下量禄之田使自食其土为长子孙计则宗禄可减利十二也修复水利则仿古井田可限民名田而自昔养民之政渐可举行利十三也民与地均可仿古比閭族党之制而教化渐兴风俗自美利十四也时户科给事中萧彦疏言水田之利其不可不成者有四而不可不审议者亦有四国家定鼎燕京转漕东南水利既兴昔取诸东南今取诸堂奥之外也不可不成者一也西北有水利则东南可以息肩而漕挽之费所省又多不可不成者二也敌利于骑不利于步沟洫有制是不墙而堵不兵而卫也不可不成者三也昔也旷莽今也蕃育生聚教训安边长利不可不成者四也然西北之不谙水田也旧矣驱而为之缓之则无济于事急之则有戾於民是人情之议也不可不审者一也垦田之夫每邑不下千人派之民邪以为厉矣徵之江南邪千里斋粮远赴田作有望而走耳是垦田之夫之议也不可不审者二也臣彦往閱边於宁夏古称塞北江南也又素有水田藉汉唐二渠不烦微力然往往就荒驱之领田如赴汤大又尝閱边於甘肃有先抚臣杨锦者为垦田之议而军不愿种乃分派各堡另垦卒无成功此边人之习也垦田百万法当给五万人若曰自领之而自垦之脱无领者将不垦之乎是领田之户之议也不可不审者三也沿边无种旷土军民利而私种之久矣垦而为田势必起科能欣然就邪至于广野有沙压之虞水滨有泛滥之虑但一相度可知己是起科之议也不可不审者四也王敬民河南西华籍应天句容人张国彦邯鄲人】

夏四月京师旱大雩

【帝步祷于南郊面谕大学士等曰天旱虽由朕不德亦天下有司贪婪剥害小民以致上千天和今後宜慎选有司乃诏中外理冤抑免天下被灾田租一岁先是李植等疏劾尚书潘季驯朋奸罔上诏削季驯籍擢植太仆少卿江东之光禄少卿羊可立尚宝少卿至是御史蔡系周以早上疏劾植且言陛下欲雪枉而刑部尚书之枉先得雪今日之旱盖实由植所称尚书谓季驯也于是东之抗疏求罢可立复代为植辩给事御史齐世臣吴定等交章劾之帝

报曰朕方忧旱诸臣何得纷争乃已】质实【蔡系周华容人齐世臣南昌人吴定安阳人】

秋七月雷震郊坛

【震郊坛广利门及齐宫门伤兽吻诏羣臣修省】

八月京师地震

九月彗星见

【彗星出羽林傍形如弹九尾长尺许指东北每夕移东行芒渐小】

闰九月赈凤阳淮安灾

【漕折银例不准留至是以二府重地留漕赈济】

帝诣大峪山閱壽宫

【先是十一年帝谒山陵用礼部尚书徐学谟言将卜壽宫于大峪时李植以巡按御史扈行閱视谓其地未善欲与江东之疏争不果既而帝于十二年再往临视遂作宫於是年八月既兴役矣植以壽宫有石申时行与学谟姻故主之可用是罪也乃与东之羊可立合疏上言地果吉则不宜有石有石则宜奏请改图乃学谟以私意主其议时行以亲故赞其成非大臣谋国之忠时行奏辩曰车驾初閱时植东之不言今已二年忽创此议其借事倾臣明甚帝责三人夺俸半岁未几复以王锡爵言贬三人官然犹以植言壽宫有石恐宝座将置于石上至是复亲诣閱之终谓大峪吉遂调三人于外】质实【徐学谟字叔明苏州府嘉定人】

冬十一月礼科给事中王三余请帝亲郊不从

【三余疏言郊祀必躬亲载之会典乃者秋七月雷震郊坛恭绎德音宣示臣工共图修省今岁似宜亲郊以答天戒代摄之举未可以为常疏入帝以其奏请丕早诘责之仍遣官代】质实【王三余安平人】

【丙戌】十四年春二月册郑氏为皇贵妃

质实【郑氏大典人帝初年入宫封贵妃至是进为皇贵妃】

三月禁部曹言事

【郑贵妃有殊宠生子常洵遂进封而王恭妃生皇长子已五岁不益封中外藉藉疑帝将

立爱户科给事中姜应麟言欲别嫌明微莫若册立元嗣为东宫以定天下之本帝怒贬应麟广昌典史吏部验封司员外郎沈璟亦疏请立储谪行人司司正大学士申时行率同列再请建储不听时帝以旱霾下诏求直言郎官刘复初李懋桧等显侵贵妃时行请帝下诏令诸曹建言止及所司职掌听其长择而献之不得专达帝甚悦之于是言者蠹起皆指斥宫闱攻击执政帝概置不问门户之祸大起】质实【姜应麟字泰符慈谿人沈璟吴江人刘复初高陵人李懋桧字克苍安溪人】

夏四月京师地震

【癸酉寅刻震有声申时行等奏曰恒阳不雨阳亢也地震弗宁陰纵也愿只天戒恤民艰慎起居修政事报闻】

六月松茂番平

【松茂诸番列砦四十八岁为吏民患王廷瞻抚蜀时尝遣将击破丢骨人荒没舌三砦诸酋乃降故事诸番岁有赏赉番要索无已其所索例有新班钱热衣钱架梁钱躡革钱放狗钱挂彩钱断酒钱等名廷瞻一切除之西陲稍靖仅六七年势复猖獗十三年夏杨柳番入犯金瓶堡杀守将巡抚雒遵遣总兵官李应祥讨定之番恃强剽如故会徐元泰代遵抚蜀使使檄谕番不应是年春复攻蒲江关守将出击贼稍解东南路始通元泰决计大征遣游击周于德边之垣总兵郭成参将朱文达等将诸路兵进计命应祥居中节制应祥令军中各树赤白帜一良民陷贼者徒手立赤帜下熟番不附贼者徒手立白帜下即免罪番虽多遇急不能相救官军连破河东河西诸贼巢擒贼渠三十余人焚碉房千六百有奇俘馘以千余计至是班师明年又计破建昌诸番及邛部属夷以其地置屏山县蜀中剧寇尽平应祥由是威名甚着是役也将士三路夹攻诸军得所积稞粟留十日尽焚其砦自是羣番震惊不敢为患边人树碑纪绩嘉靖初边之垣祖轮以指挥讨茹儿贼被杀漆其头为饮器及是六十年之垣乃得之以还葬焉】质实【松茂诸番惟丢骨人荒没舌三砦最强金瓶堡在四川龙安府松潘厅南蒲江关亦在松潘厅南今曰镇江关邛部汉越巂郡地後周置邛部郡元为邛部州明废州置卫隶行都司今宁远府越巂厅屏山蜀汉置马湖县明为马湖府治万历十七年置屏山县属马湖府今属叙州府王廷瞻字稚表黄冈人雒遵字道行涇阳人李应祥湖广九谿卫人徐元泰宣城人】

秋七月飭严保甲

【是夏振直隶河南陕西及广西浔柳平乐广东琼山等十二县饥是月賑江西灾时山西盜起河南淇县贼王安聚衆流劫寻剿平之勅户兵二部令各抚按官查灾重地方蠲賑招抚并申严保甲缉捕盜贼】质实【平乐汉荔浦县三国吴置平乐明属广西平乐府琼山唐置县属琼州府淇县汉朝歌县元置临淇县至元三年省临淇县为淇州明改曰淇县属卫辉府今并因之】

九月王家屏罢

【家屏遭继母忧诏赐银币驰传归】

冬十月杖礼部主事卢洪春於廷削其籍

【帝累诏称疾郊祀庙享多弗躬亲礼部主事卢洪春上言陛下连日以疾免朝享庙遣官恭代若真疾邪则当以宗社为重母务为豫乐以基祸若非疾也则当以诏旨为重母务为矫饰以起疑疏入帝大怒传谕内阁数百言贵洪春悖妄命拟旨治罪阁臣拟夺官不从廷杖六十斥为民给事御史先後申救夺俸有差】质实【卢洪春字思仁东阳人】

十一月祀南郊

【还御皇极殿受贺】

【丁亥】十五年春正月赈宗室

【宗室怀仁王府奉国将军充 奏各宗贫窘可悯状帝因命发帑赈给户部因请陕西河南山东山西岁大凶照怀仁府一体赈给】质实【明太祖第十三子桂封代桂第八子分封怀仁六传至充 】

三月诏彻哩克袭封顺义王

【初谙达死彻辰汗袭至是彻辰汗死子彻哩克袭其妻三娘子即谙达所夺之外孙女而为妇者也历配三王主兵柄为中国守边保塞诸部畏服之帝嘉其功封忠顺夫人】质实【彻哩克旧作怱力克彻辰汗即欢台吉改名旧作乞庆哈今并改】

夏四月旱

【命百官祈雨】

京师地震

【是夏五月代州振武卫雁门所太原阳曲徐沟交城同日俱地震】质实【振武卫在代州治东南明洪武中置在代州北四十里雁门守御千户所在雁门关明洪武七年置属振武卫今属代州治在州西二十里】

六月京师大雨

【京师灾荒叠见冰雹横击大雨如注官民墙屋所在倾颓溺压死者无算命顺天府赈恤】

秋七月江南水江北蝗山西陕西河南山东旱

【时所在告灾河北尤甚山西陕西河南山东并旱蠲赈有差户部右侍郎孙丕扬上言黄河以北饥民食草木陕西富平蒲城同官诸县至于食石石出三县山中臣得自目见谨取二斤伏候圣览今海内困加派宜宽贼节用损上益下以培苍生大命帝感其言颇有所减罢】质实【同官後周置县明属耀州今属西安府孙丕杨字叔孝富平人】

河决开封

【河南开封等府陕州灵宝等州县七月初十等日霪雨黄河泛涨冲决堤防漂没人畜工科给事中常居敬请敕河南山东凡有河道地方各令巡道督理卷埽筑坝补隙塞决明立赏罚昼夜并工务俾安澜毋貽漕患从之】质实【常居敬江夏人】

八月敕抚按官惩贪吏理冤狱

【以灾沴频仍有司贪墨刑狱多寃命各抚按官举察所属官吏】

九月丁亥朔日有食之陰云不见

山西地震

【蒲州安邑解州同日地震声如雷】质实【解州五代汉乾佑初置明属平阳府今为直隶州】

南京都察院右都御史海瑞卒

【初瑞自应天巡抚谢病归高拱张居正相继当国俱惮瑞峭直中外交荐卒不召及居正卒吏部始拟用累迁南京右都御史瑞力矫偷惰百司惴恐屡疏乞休不允至是卒金都御史王用汲入视之葛帟敝羸有寒士所不能堪者因泣下醵金为敛小民罢市丧出江上白衣冠送者夹岸酹而哭者百里不絕贈太子太保諡忠介瑞平生为学以刚为主自号刚峯天下识与不识咸称刚峯先生】

【戊子】十六年春三月诏改景泰实録去郕戾王号

【国子监司业王祖嫡言建文之革除未复景泰之附录未正今宜复建文位号修辑四年事蹟尽废野史不经之说其景泰宜自为一录削郕戾旧名疏下羣臣议於是申时行奏言建

文年号因成祖靖难之日诏今年仍以洪武三十五年为纪其建文年号相传以为革除及考靖难事蹟亦称少主称元年二年三年四年则是未尝革除也但不称建文耳英宗实录修于成化初年在景皇帝位号未复之先故仍称郕戾王而景泰七年事遂附英宗实录之内今景皇帝位号已复不过於实录内改正其理顺而事亦易於是乃诏改正景泰实录然是时上下偷惰诏敕多不奉行景泰实录终明世未尝改也】质实【王祖嫡德州人】

南畿浙江山西陕西河南大饥疫

起前尚书潘季驯为右都御史总督河道

【季驯前为李植所劾落职为民御史李栋上疏讼之曰隆庆间河决崔镇为运道梗数年以来民居既奠河水安流咸曰此潘尚书功也昔先臣宋礼治会通河至于今是赖季驯功不在礼下乃当身存之日使与编户齿宁不隳诸臣任事之心失朝廷报功之典其後论荐者不已遂起季驯右都御史总督河道自吴桂芳後河漕皆总理至是复设专官寻加季驯工部尚书】质实【李栋磁州涉县人】

夏四月賑大名开封诸府饥

【北直隶大名河南开封等府水旱相仍饿殍载道发归德米价银暨直隶存留银賑之又截留漕粮二万石发给凤阳淮安扬州滁州四府州平糶賑饥】

五月以军储仓火诏修省

【谕礼部雷火烧仓廩军粮草束乃国之至要者今天下灾伤重大民穷时艰上天示警宜痛加修省是时山陝河南江浙南直诸处并告灾困诸司抚辑賑救之疏日上而讫无奇策故有是命】

发明【神宗之朝灾异叠见史不胜纪而修省之诏亦时时屡下兹十六年各省灾伤之见於志传者不一书非第以军储仓火已也其因天警而饬修省亦未为非是第侧身修行之旨徒托诸空文几若尺一既颁而应天之事已旱至诸司抚辑賑救之疏交章以陈君若臣漫无良策惟恃此一诏以共鉴白於中外臣民则此意已足以致灾尚何修省之有】

六月京师地震

秋八月壬午朔日有食之

冬十二月杖给事中李沂于廷斥为民

【中官张鲸掌东廠横肆无憚御史何出光劾鲸专擅威福并及其党锦衣都督刘守有序

班邢尚智尚智论死守有除名鯨被切让而任职如故御史马象乾复劾鯨诋执政甚力帝下象乾诏狱申时行等力救且封还御批不报许国王锡爵复各申救乃寝前命而鯨竟不罪外议谓鯨以金宝献帝获免沂拜官甫一月上疏曰陛下往年罪冯保近日逐宋坤鯨恶百保而万坤奈何独濡忍不去若谓其侍奉多年则坏法亦多年谓痛加省改犹足供事则未闻可驯虎狼使守门户也流传鯨广献金宝多方请乞陛下犹豫未忍断决中外臣民初未肯信以为陛下富有四海岂爱金宝威如雷霆岂徇请乞及见明旨许鯨策励供事外议藉藉遂谓为真亏损圣德夫岂浅渺且鯨奸谋既遂而国家之祸将从此始臣所大惧也是日给事中唐尧钦亦具疏谏帝独手沂疏震怒谓沂欲为冯保张居正报讐立下诏狱严鞫时行乞宥不从献上海上疏廷杖六十斥为民御批至内阁时行等欲留御批中使不可持去帝特遣司礼张诚出监杖时行等上疏俱诣会极门候进止帝言沂置贪吏不言而独谓朕贪谤诬君父罪不可宥太常卿李尚智给事中薛三才等抗章论救俱不报国锡爵以言不见用引罪乞归锡爵言廷杖非正刑祖宗虽间一行之亦未有诏狱廷杖并加于一人者故事惟盗贼大逆则有打问之旨今岂可加之言官帝优诏慰锡爵卒不听其言初冯保获罪实鯨为之故帝云然或谓张诚与鯨交恶授意言者攻之其时周宏禴潘士藻皆以忤鯨得罪而沂祸为烈家居十八年未召而卒光宗嗣位赠光禄少卿】质实【李沂字景鲁嘉鱼人何出光扶沟人马象乾广东连州籍江西泰和人唐尧钦福建长泰人薛三才浙江定海人周宏禴字元孚麻城人官顺天府通判以劾张鯨谪代州判官潘士藻字去华婺源人由推官擢御史上言今天下之患莫大於君臣之意不通宜仿祖制及近时平台暖阁召对故事面议所当施罢撤大工以俟丰岁蠲织造以昭俭德免金花额外征以佐军食且时召讲读诸臣问以经史张鯨激帝怒谪为广东布政司照磨】

【己丑】十七年春正月己酉朔日有食之

【以日食免元旦朝贺嗣後每元旦皆不视朝矣】

三月免陞授官面谢

【自是临御遂简】

夏四月召王家屏复入阁

【先是家屏辅政秉正持法至是母忧服甫关诏进礼部尚书遣行人召还抵京师三月未得见家屏以为言帝遣中官慰家屏獎以忠爱家屏疏谢请帝视朝居数日帝为一御门延见自是益深居不出矣】

五月西宁卫地震

【是月辛亥西宁卫天鼓鸣地震越七日地复震】质实【西宁卫元西宁州属甘肃行省明置卫今为甘肃西宁府】

六月庐州镇江地震

賑南畿浙江饥

【南畿久旱太湖水涸浙江大风海溢既而亦旱发帑金八十万賑之】

秋七月福建浙江地震

【福建福州兴化二府浙江杭州绍兴温州三府地皆震】

【庚寅】十八年春正月召见申时行等于毓德宫斥大理评事雒于仁为民

【于仁疏上酒色财气四箴直攻帝失疏言臣备官岁余仅朝见陛下者三此外惟闻圣体违和一切传免郊祀庙享遣官代行政事不亲讲筵久辍臣知陛下之疾所以致之者有由也臣闻嗜酒则腐肠恋色则伐性贪财则丧志尚气则戕生陛下八珍在御觴酌是耽卜昼不足继以长夜此其病在嗜酒也宠十俊以启幸门溺郑妃靡言不听忠谋摈斥储位久虚此其病在恋色也传索帑金括取币帛甚且掠问宦官有献则已无则谴怒李沂之疮痍未平而张鲸之货贿复入此其病在贪财也今日榜宫女明日挟中官罪状未明立毙杖下又宿怨藏怒于直臣如范雎姜应麟孙如法辈皆一绌不申赐环无日此其病在尚气也四者之病胶绕身心岂药石所能治臣今敢以四箴献陛下肯用臣言即立诛臣身臣虽死犹生也疏入帝震怒将加严谴会岁暮留其疏十日及是元旦召见申时行等分析之时行请毋下其章而讽令于仁自引去遂斥为民自此章奏留中遂成故事是日帝宣皇长子出见时行请早定大计帝犹豫久之乃曰朕不喜激聒近閱诸臣所奏恶其离间父子故槩置之若诸臣不复奏扰当以後年册立否则俟皇长子十五岁举行时行因戒廷臣毋瀆扰】质实【雒于仁字少经涇阳人十俊时有十小阉被宠谓之十俊范雎字国士高安人以疏陈时政被斥孙如法字世行余姚人以諫郑贵妃进封贬官】

二月罢日讲

【帝每遇讲期多传免申时行请免讲日仍进讲章以备观览自後讲筵遂永罢】

顺德地震

【直隶顺德府地震星陨如火隐隐如鼓声】

三月以宋纁为吏部尚书

【纁前为户部五年值四方多灾酌盈虚筹缓急上下赖之及移吏部絕请托獎廉抑贪痛惩黠吏于政府一无所关白屡乞休不允卒于官謚忠敬 初石星代纁为户部语纁曰某郡有

羨余可济国用纁曰朝廷钱谷宁积久不用勿使搜括无余主上知物力充羨则侈心生矣星
恍然或有言漕粮宜改折者纁曰太仓之储宁红腐不可匱絀一旦不继何所措手乎中外陈
奏帝多不省或直言指斥辄曰此沽名耳亦不加罪于慎行称帝寛大纁愀然曰言官极论得
失要使人主动心纵罪及言官上意犹有所儆省檠置勿问则如痿痹不可疗矣】

直隶山东河南风霾

【直隶大名府诸处狂风自西北起白昼晦冥天色忽赤忽黑山东兖州府诸处黑风扬沙
坏城楼廨宇庐舍伤男妇五人河南开封彰德卫辉归德等处风霾亦自西北起拔木伤稼天
气黑赤刀枪上俱起火光坏城郭庐舍压溺死者三百六十余人】

代州星隕

【乙卯夜初更一星坠声如雨光如烛有顷天鼓声如雷庚申有火星自东南带火流于西
北】

夏六月青海酋浩尔齐犯边

【自谿达西掠诸番番人不支输款焉谿达遂数入番中至是套部章图哩等据水塘布色
图浩尔齐等据莽拉聂恭两川而浩尔齐尤黠桀数犯甘凉岷洮西宁间已而进围旧洮州副
将李聯芳战歿未几复大掠河州临洮渭源官军御之败绩西陲大震时彻哩克势衰亦为布
色图等所诱西行远边帝恶之诏停市赏】质实【水塘青海地名莽拉聂恭皆洮水支流随
地易名旧洮州即古洮阳城在洮州卫西南城临洮水李聯芳洵阳人浩尔齐旧作火落赤章
图哩旧作庄秃赖布色图旧作卜失土莽拉旧作莽刺聂恭旧作捏工今并改】

秋七月庚子朔日有食之

命兵部尚书郑雒经畧边防

【雒前督宣大军抚顺义王及忠顺夫人有恩故用之雒以洮河之难由纵敌入青海所致
乃驰诣甘肃下令曰北部自青海归巢者听假道自巢入青海者即勒兵拒之未几巴什图欲
趋青海雒设伏掩击之巴什图仅以身免章图哩後至闻之亦退去于是大布招番之令归附
者日衆乃进兵青海逐浩尔齐诸部而谕齐里克缚献首叛踰二年齐里克以史二等来献命
复其市赏】质实【郑雒字禹秀安肃人抚顺义王及忠顺夫人有恩初三娘子佐谿达主贡
市诸部皆受其约束及上海袭封年老且病欲妻三娘子三娘子不从率衆西走上海自追之
贡市久不至雒计三娘子别属则上海虽王无益乃使人语之曰夫人能归王不失恩宠否则
塞上一妇人耳三娘子听命上海更名车臣汗贡市惟谨雒以功加兵部尚书兼右副都御史
十四年车臣汗死子齐里克当袭三娘子以年长自练兵万人筑城别居雒恐贡市无主复谕
齐里克曰夫人三世归顺汝能与之匹则王不然封别有属也齐里克尽逐诸妾复妻三娘子

遂以明年嗣封并奏封三娘子忠顺夫人雒乃上疏请定马数宣府不得踰三万大同万四千山西六千而申飭将吏严备以防盗窃且无轻遏其部落驰猎帝嘉纳之青海初谙达建寺青海奏于朝赐名仰华至是齐里克以赴仰华为名西至青海诸部皆挟以为重史二中国叛人】

冬十月賑临洮军民

【以临洮被兵賑之】

【辛卯】十九年春三月彗星见

【见于西北长尺余历胃室壁长二尺至闰三月入娄】

夏四月朔享太庙

【是後庙祀皆遣代】

六月山西地震

【太原府五台交城县并地震】质实【五台汉虑虓县隋大业初改曰五台因山以名明属太原府代州今属代州直隶州】

王锡爵罢

【锡爵初还朝申时行为首辅许国锡爵次之三人皆南畿人锡爵又与时行同郡且同举进士政府相得甚然时行柔和而锡爵性刚负气十六年子衡举顺天试第一郎官高桂饶伸论之锡爵连章辩讦语过忿桂伸皆得罪以是积与廷臣忤时羣臣请建储者衆帝皆不听十八年锡爵疏请豫教元子録用言官姜应麟等不报遂因旱灾自陈乞罢帝优诏留之及浩尔齐犯边议者争请用兵锡爵与申时行主欸失帝意未几又偕同列请建储不得寻以母老连疏乞归许之】质实【饶伸字仰之进贤人论王衡举顺天试第一时庶子黄洪宪典顺天乡试时行壻李鸿亦预选桂?可疑者八人并及衡请俱覆试礼部侍郎于慎行列甲乙以上阁臣调旨尽留之衡字辰玉少有文名为举首才自称因被论遂不复会试至二十九年锡爵罢官已久始举会试第二人廷试亦第二授编修黄洪宪字懋忠嘉兴人】

秋畿内蝗

七月甘肃广西地震

西宁星陨

【西宁卫等处星陨天鼓鸣】

松江颶

【松江太仓等处颶风大作海啸坏屋害人】

九月申时行许国罢

【先是廷臣争请建储得旨于二十年春举行至是工部主事张有德预以仪注请帝怒夺有德俸时申时行方在告许国与王家屏虑事中变欲因而就之引前旨争首列时行名时行闻帝怒密疏言臣方在告实不与知给事中罗大紘劾时行阳附廷臣请立之议陰为自交官掖之谋歟人黄正宾者以货为中书舍人思立奇节自附清流见大紘疏亦抗章诋时行帝怒斥大紘正宾为民时行力求罢而国与家屏又以建储请帝责大臣不当与小臣比遂罢国未几时行亦罢国素与时行无嫌然性木强遇事辄发力诋言事诸臣士论颇不附浩尔齐犯边时行主款国独谓寇渝盟犯顺宜一大创之帝心然国言以时行方柄政不能夺会时行门生给事中任让论国庸鄙而国门生万国钦又论时行以图报复至是国与时行并罢论者谓国之去以争执差胜于时行之以被劾去也初张居正卒时行与张四维相继当国时行欲以宽大收人心召用老臣布列庶位朝论多称之然政令务承帝旨不能有所匡正又罢居正所行考成法一切务为简易由是上下恬熙法纪渐不振国在阁九年廉慎自守故累遭攻击不能被以污名】质实【张有德祥符人罗大紘字公廓吉水人万国钦字二愚新建人】

以赵志臯为礼部尚书张位为吏部侍郎并兼东阁大学士预机务

【申时行既谢政密荐志臯位自代遂用之吏部尚书陆光祖言旧制阁臣必由廷推若令一人密荐恐开植党之门志臯位因疏辞帝不允】

发明【申时行以被劾乞归或恐有媒蘖其後者因荐所知赵志臯张位自代考志臯与位既入阁後亦无卓然表见之勲业时行之密为引进固不无植党树援之意然谓必由廷推亦非确论明代用人特重此典部臣边将率皆由此擢选继乃辅赞机务亦皆附之公举以附于枚卜合同之义而伐异党同从此树立门户甚至各挟私人忿争朝宁弭谐亮功之谓何曷思进退人才当一秉诸乾断庶太阿之柄不至下移密荐廷推二者皆不能无流弊耳】

冬十一月辽东总兵官李成梁罢

【十七年以後土默特结西部数入寇将弁多战歿成梁又潜兵出塞袭敌遇伏死者千余人仍报首功增爵廕敌再入海州成梁不敢擊纵掠数日而去是年闰三月成梁乘给事中侯先春閱边谋邀搗巢功遣副将李宁袭破板升还师遇敌死者又数千为巡按御史胡克俭所劾及先春还朝尤力诋之遂罢成梁官以宁远伯奉朝请】质实【侯先春无锡人胡克俭光山人】

御定资治通监纲目三编卷二十七

卷二十八

钦定四库全书

御定资治通监纲目三编卷二十八

【起壬辰明神宗万历二十年尽辛丑明神宗万历二十九年】凡十年

【壬辰】二十年春正月杖给事中孟养浩除其名

【时礼科都给事中李献可偕六科诸臣疏请豫教言元子年十有一矣豫教之典当及首春举行倘谓内庭足可诵读近侍亦堪辅导则禁闼幽闲岂若外朝之清肃内臣忠敬何如师保之尊严疏入帝大怒摘疏中误书弘治年号责以违旨侮君贬一秩调外余夺俸半岁于是六科给事中锺羽正舒宏绪陈尚象丁懋逊张栋吴之佳杨其休叶初春及御史邹德泳各具疏救俱谴责有差而养浩疏有五不可之语帝愈怒谓养浩疑君惑众命锦衣卫杖之百削籍为民是时斥谏官十一人朝士莫不骇叹然言者卒未已礼部员外郎董嗣成御史贾名儒陈禹谟给事中李周策等先後论谏咸被谴责】质实【孟养浩疏曰献可甫跻礼垣骤议钜典一字之误本属无心乃遽蒙显斥臣愚以为有五不可元子天下本豫教之请实为宗社计陛下不惟不听且从而罚之是坐忍元子失学而敝帚宗社也不可者一长幼定序明旨森严天下臣民既晓然谅陛下之无他矣然豫教册立本非两事今日既迟回于豫教安知来岁不游移于册立是重啓天下之疑不可者二父子之恩根于天性豫教之请有益元子明甚而陛下罪之非所以示慈爱不可者三古者引裾折檻之事中主能容之陛下垒俸天地奈何言及宗社大计反震怒而摧折之天下万世谓陛下何如主不可者四献可等所论非二三言官之私言实天下臣民之公言也今加罪献可是所罪者一人而实失天下人之心不可者五祈陛下收还成命亟行豫教孟养浩字义甫湖广咸宁人李献可字尧俞同安人锺羽正字叔廉益都人舒洪绪通山人陈尚相都匀人张栋字伯任崑山人吴之佳长洲人杨其休青城人叶初春吴县人邹德泳字汝圣安福人董嗣成乌城人贾名儒真定人陈禹谟仁和人李周策吴江人】

三月布拜据宁夏反

【布拜西布人嘉靖中得罪其酋长父兄皆见杀布拜伏水草中得免来降屡立战功历陞都指挥至帝即位之十七年布拜老加副总兵致仕子承恩袭十九年洮河告警帝遣科臣巡九边尚宝丞周宏禴以御史往宁夏举成恩及指挥土文秀并布拜义子布延等布拜虽告老居恒多蓄苍头军声称报国会经畧郑洛檄夏镇调发巡抚党馨奉檄遣文秀率千骑西援布拜惊曰文秀虽经战陈恐不能独将乃诣洛辕门愿以所部三千人与子承恩从征洛壮而许之馨恶其自荐马羸者不与易有余马亦不给布拜怏怏去至金城见诸镇兵皆出其下贼平驰还取径塞外寇骑遇之皆辟易遂有轻中外心恚睢骄横党馨每裁抑之且欲核布拜冒粮罪而以承恩强娶民女为妾箠之二十布延文秀又以陞授事怨馨会镇戍请冬衣布花月粮

久勿给坐营江廷辅请给银以安衆心馨曰此有挟而求渐不可长彼不畏族乎军锋刘东阳拔抚署前鹿角作忿状布拜噉之曰若辈任为之遂羣哄不可制东阳者靖虏卫人素梟桀有异志于是纠党晨入帅府白事总兵张维忠素鲜威望为衆所轻见衆惊慑不能弹压衆露刃执副使石继芳拥入军门党馨急匿水洞索得刦至书院同继芳戮之遂纵火焚公署收符印释囚掠城中刦张维忠以侵粮激变报杀游击梁琦守备马承光维忠自缢死东阳遂自称总兵听布拜主谋据城刑牲而盟授承恩许朝左右副总兵土文秀布延左右参将挟庆王代请贯罪承恩乃勒兵分遣王虎何安等据城堡会总督尚书魏学曾行部花马池闻变遣标下张云郅宠谕降东阳曰必欲我降依我所自署授官世守宁夏不者与套骑驰潼关也承恩徇玉泉营游击传垣拒守千户陈继武执垣降徇中卫及广武参将熊国臣弃城匿河西望风靡惟土文秀徇平虏参将萧如薰坚守不下贼率兵渡河欲取灵州又賫金帛诱套部珠尔嗣等许以花马池一带听其驻牧势甚猖獗全陕震动】质实【宁夏中卫明洪武三十二年置隶陕西都司靖虏卫明正统二年置隶陕西都司後改隶固原镇平虏千户所在宁夏卫北百六十里明洪武中置所城周四里有奇今平罗县属宁夏府广武营在宁夏卫西南百七十里与中卫接界周宏禴字元孚麻城人党馨益都人庆王帅铎宪王伸域子时宪王妃方氏匿帅铎地窖中妃自经死府中人皆被杀贼平方氏建祠旌表魏学曾字惟贯涇阳人萧如薰字季馨延安卫人如薰妻杨氏总督尚书兆之女也谓如薰曰若为忠臣妾何难为忠臣妇尽出簪珥劳军士妻帅之守城贼攻围数月竟不能破布拜旧作哮拜布延旧作哮云珠尔图旧作着力?今并改】

王家屏罢

【李献可之谪家屏封还御批力谏帝怒家屏引疾乞罢帝责家屏希名托疾家屏复奏言名非臣所敢弃臣所希者陛下为尧舜之君臣为尧舜之臣则名垂千载没有余名若使臣不希名将身处高官家享厚禄主愆莫正政乱莫匡国家奚赖焉更使臣弃名不顾逢迎为悦阿諛取容许敬宗李林甫之奸佞无不可为矣帝益不悦遣内侍至其邸责之于是求去益力诏驰传归家屏柄政止半载以戇直去国朝野惜焉】

夏四月总督河道尚书潘季驯罢

【季驯四任治河前後二十七年习知地形水势以借水冲沙筑堤束水为河漕兼利之策下至木石桩埽综理纖悉以劳疾累疏乞休不允至是泗州大水与抚按议濬治不合得请归後三年卒】质实【泗州大水时城中水三尺惠及陵寝议者或欲开傅宁湖至六合入江或欲濬施家沟周家桥入高宝诸湖或欲开壽州瓦埠河以分淮水上流或欲弛张福堤以广泄淮之口季驯谓祖陵王气不宜轻泄而巡抚周案陈于陛巡按高举谓周家桥在祖陵後百里可疏濬议不合都给事中杨其休请允季驯去因得请归季驯于嘉靖四十四年总理河道与朱衡共开新河隆庆四年河决邳州睢宁再理河道塞决口万历六年河决崔镇复命季驯代吴桂芳治之十六年复起总理河道凡四任治河】

五月倭陷朝鲜

【倭酋平秀吉起人奴初随倭关白信长为信长画策夺二十余州会信长为其下所弑秀吉遂统其兵自号关白刼降六十余州窥朝鲜无备分遣行长清正等率舟师从对马岛逼釜山镇时朝鲜兵久不习战其王李昖又湎酒废弛岛夷猝至望风皆溃弃王城奔平壤令次子琿摄国事已复走义州七月倭遂入王京刼王子陪臣掠府库八道几尽没旦暮渡鸭绿江请援之使络绎于道廷议以朝鲜为国藩蔽所在必争遣行人谕昖以兴复大义扬言大兵且至而倭业抵平壤游击史儒等率师至战死副总兵祖承训援之仅以身免中朝震动乃诏兵部右侍郎宋应昌经畧备倭军务以救之八月倭入丰德等郡兵部尚书石星计无所出议遣人侦之于是嘉兴人沈惟敬应募惟敬者市中无赖也是时平秀吉次对马岛分其将行长等守要害惟敬至平壤执礼甚卑行长给曰天朝幸按兵不动我亦不久当还当以大同江为界平壤以西尽归朝鲜耳惟敬以闻廷议以倭诈难信趣应昌进兵而石星颇惑其言假惟敬游击赴军前且请金行问】质实【关白倭国官名犹言丞相对马岛方輿纪要日本国海曲部有伊岐对马多艺三岛为北境尽处釜山在朝鲜东莱县南滨大海与日本对马岛相望义州在平壤西北滨鸭绿江八道京畿江原黄海全罗庆尚忠清咸镜平安丰德郡在朝鲜国城南属京畿道大同江在平壤城东亦名大通江平秀吉萨摩州人宋应昌字桐冈仁和人】

秋七月免陕西逋赋

【时以宁夏贼未灭防患当预全陕钱粮自十四年至十八年一切旧欠带徵尽行蠲免】

八月诏天下督抚举将材

【令各省督抚官招选将材不必拘数务得真才济用无以虚文塞责仍严举主赏罚之令】

九月宁夏贼平

【先是三月副总兵李昫奉魏学曾檄摄总兵进剿统游击吴显趋灵州别遣游击赵武张奇扼贼南渡转战获贼于正等八人舟十八艘贼锋少挫昫乃分兵渡河先後收复营堡四十七惟宁夏镇城犹为贼据会套部齐里克图等控弦三千骑至贼益掠城中子女媚之奉以河东西地图套人声言已与布拜为一家布拜文秀并易服合兵攻玉泉急布彦引齐里克图攻平虏堡萧如薰伏兵南关佯败诱之入伏兵射布彦死套部遁出塞昫督六路兵抵镇城下贼东北二门各出精骑二千搏战步卒列火车为营官军冲锋夺火车百余辆追奔入河贼溺死者无算四月调麻贵为副总兵帝复用石星言赐学曾尚方剑督战御史梅国桢荐李如松忠勇可任遂令如松总宁夏兵国桢为监军又诏宁夏巡抚朱正色甘肃巡抚叶梦熊协力赴之正色渡河督战叶梦熊从甘州携神礮火器四百车至更约法益徵苗兵会浙江巡抚常居敬募浙兵千人自办糗粮诏嘉其忠调赴宁夏于是分为五军董一奎攻其南牛秉忠攻其东李昫攻其西刘承嗣攻其北而麻贵率游兵策应并逼城下布拜自北门出战意欲自往勾套部麻贵率参将马孔英先登赴敌逐布拜入城擒斩百十七人先是布拜与套部深相结日夜从齐里克图帐中商计调度至是入城不得出套部不得布拜亦不敢复渡河深入国桢如松统

辽东宣大山西兵燹集军声大振贼婴城自守国桢树受降旗于城南然贼势无降意六月癸丑官军用布袋三万盛土填集登城为礮石击却都司李如樟夜半以云梯上南城翼日游击龚子敬提苗兵攻南关如松乘势欲拥入城皆为礮箭击却是夜指挥赵承光葛臣戚钦武生张遐龄百户姚钦约为内间夜半四面烽火并举城下兵趋上而譙楼火蚤发南火弗起城中果鼓噪大呼杀贼钦使遐龄缒城召外兵行未中道钦复亟跳城下呼救而贼早觉已尽缚赵承光戚钦等殲之然自是城中粮且尽銳气益丧矣七月给事中许子伟劾总督尚书魏学曾惑于招抚罢秩被逮叶梦熊代之赐剑如故遂定议水攻宁夏城西北卑下且与金波三塔诸湖之水相近东南逼观音湖新渠红花渠形如釜底遂遶城筑堤长千七百丈决河以灌先是布拜遣养子克哱该出求援于齐里克图松詞知状追斩之并其从骑二十九级获符令箭已而套部仗图赖与巴什图合部落三万先犯定边小盐池别遣宰桑以万骑从花马池西沙湃口入为布拜声援麻贵等分击之游击龚子敬力战死然套部竟解散去赋援絕官军乃决大坝水八月朔城外水深八九尺东东西崩百余丈贼数出兵来扰多被斩获城中饥民拥贼求招安九月己未参将杨文将浙兵至苗兵庄浪兵俱至後五日水浸北关城崩南关薛永壽等约内应官军阳调舟筏击北关承恩许朝果趋北关鏖战李如松萧如薰潜以銳卒掩南关总兵牛秉忠年七十贾勇先登遂毕登梦熊入城劳苦百姓承恩等见南关下气尽夺乃急缒张杰下城恳贷死梦熊阳许诺益治攻具先遣王机密以蜡书行间时承恩虽求抚犹据其大城堽门断墅守益固有卖油李登者跛而眇负罍歌于市曰痛之不决而狃于痼危巢不覆而令梟止监军梅国桢闻之曰是可使也召登授三劄缚木渡东门见承恩曰监军以布拜有安塞功今与鼠辈骈首并诛深用惜之军中非乏所使以登残民不骇视有密计授将军将军幸有意听登则杀刘许自赎即不听愿死麾下承恩犹豫许之登趋而出间道诣东阳朝亦各致劄曰将军奈何与人婴祸且镇卒几何能当都督军此无异驱乳雀而鬪羣鹞所恃不过套援不记演武台上彼目中岂有将军哉所为贵智者以能审时度势转祸为福也东阳朝亦心动自此互相猜疑官军围愈迫东阳朝遂诱杀承恩党土文秀承恩亦与其党周国柱诱东阳朝杀之开门降于是李如松杨文先登萧如薰麻贵刘承嗣继之一城遂定北楼火起李如樟驰往搜获宁夏巡抚关防并征西将军印承恩方驰南门谒监军梅国桢出参将杨文执之李如松急提兵围布拜家布拜方与牛秉忠饭闻承恩擒秉忠趋出衆欲拒敌如松给箭令卸甲布拜仓皇缢阖室自焚李如樟部卒何世恩从火中斩布拜首生得布拜中子承宠等总督叶梦熊巡抚朱正色御史梅国桢随入城问慰宗室士庶宁夏平俘承恩等至京师磔于市学曾被逮不一月而贼平叙劳复其官致仕叶梦熊朱正色梅国桢各予世廕李如松萧如薰等加恩有差先是学曾欲招刘东阳许朝使杀布拜父子赎罪遣卒叶得新往学曾留固原十日以俟之得新旋被害帝责学曾玩寇时李昫渡河又稍迟官军再失利学曾前上疏请令监军无与兵事帝为飭国桢如其言国桢颇憾之及国桢至军劾诸将观望而颇以玩寇为学曾罪又言北寇数万断我粮道杀戮无算学曾匿不以闻帝遂怒逮学曾至京学曾被逮而水决城坏诸将毕登上捷奏梦熊正色国桢各廕世官如松功第一学曾任事劳勩灌城招降之策本其所谋及宣捷大学士赵志皋张位力为学曾解国桢亦上疏言学曾应变稍缓臣请责诸将以振士气而逮学曾之命发自臣疏窃自悔恨学曾不早雪臣将受万世讥如松亦言学曾被逮时三军雨泣梦熊亦推功学曾帝不听既而复官居家数年卒萧如薰时以功授世廕妻杨氏亦被旌如薰为将持重後更历七镇所在见称自隆庆後款市既成烽燧少警輦下视镇帅为外府山人杂流乞朝士尺牋往者无不餽所欲薊镇戚继光有能诗名尤好延文士倾貲结纳取足军

府如薰亦能诗士趋之若鹜宾座常满妻杨氏继妻南氏皆贵家女至脱簪珥供客犹不给军中悉苦之如薰莫能却也一时风会所尚诸边物力为耗识者叹焉】质实【金波湖在宁夏府北三塔湖在宁夏府东北三十里观音湖在宁夏府西北九十三里红花淥在宁夏府南五里沙湃口在宁夏府西北李刚堡在宁夏府平罗县南麻贵大同右卫人梅国桢字克生麻城人李如松字子茂成梁子朱正色南和人叶梦熊字男兆归善人许许子伟琼山人克呼该旧作克力盖今改】

冬十月以李如松提督蓟辽保定山东军务充防海御倭总兵官救朝鲜

【如松弟如栢如梅并率师援剿以十二月至军会沈惟敬自倭归复伸封贡之请如松叱惟敬儼邪欲斩之参谋李应试曰藉惟敬给倭封而阴袭之奇计也如松以为然乃置惟敬于营誓师渡江明年正月次肃宁馆行长以为封使至遣牙将来迎进次平壤行长犹未觉竚风月楼以待如松分布诸军抵平壤城诸将逡巡未入彤大露倭悉登陴拒守如松令诸军围之以倭素轻朝鲜军令祖承训诡为其装伏西南令游击吴惟忠攻迤北牡丹峰而如松亲提大军攻其东南军少却如松斩先退者以徇募死士援钩梯直上倭方轻南面军承训等忽卸装露甲倭大惊急分兵扞拒如松如栢等已分道并入如松马毙于礮易马跃堦而上麾兵益进遂克其城行长渡大同江遁已而如栢复开城所失四道并复官军既连胜有轻敌心朝鲜人有以敌已弃王京遁告者如松信之将轻骑趋碧蹄馆猝遇倭围之数重如松几不免官军丧失甚多乃退驻开城如松令诸将分据要害闻倭积粟数十万在龙山乃密遣死士焚之倭遂乏食然如松既败衄气大索应昌亦即欲休息于是沈惟敬封贡之议复行其年四月倭以粮尽弃王京如松与应昌入城将遣兵尾击之而倭步步为营官军不敢擊倭结营釜山为久留计时兵部尚书石星力主款议独留刘綎拒守如松乃班师】质实【肃宁馆在平壤西北开城属朝鲜京畿道碧蹄馆在朝鲜国城西龙山在朝鲜国城东南李如栢字子贞如梅字子清皆成梁子】

【癸巳】二十一年春正月召王锡爵复入阁

【锡爵至密请建储以践大信帝手诏欲待嫡子令元子与两弟且并封为王锡爵惧失上指立奉诏拟旨进又外虑公论因言汉明帝马后唐明皇王后宋真宗刘后皆养诸妃子为子请令皇后抚育元子而生母不必崇位号以上压皇贵妃亦拟旨进帝竟下前谕令有司具仪于是举朝大譁礼部尚书罗万化给事中史孟麟等诣锡爵力争廷臣諫者章日数上锡爵偕赵志皋张位请追还前诏帝不从既而諫者益衆岳元声顾允成等十余人遮锡爵于朝面争之锡爵请下廷议不许请面对亦不报因自劾求罢帝亦迫公议追寝前命命少俟二三年举行】质实【两弟谓神宗第三子常洵郑贵妃生第五子常浩周端妃生罗万化字一甫会稽人史孟麟字际明宜兴人兵元声字之初嘉兴人顾允成字季时无锡人】

夏六月诏天下每岁夏月録囚减释轻系

【刑部奏犯法愚民何处不有而冤民亦何处不有请子巡按每岁审録外再立澄清圉圉

之法师两京会审之规为抚按会疏之例方春时和每岁聽两直隶十三省各抚按官会行所属问刑衙问各审部内轻重囚犯按察司居省会即审省会之囚守巡道有分土即审各道之囚皆亲身巡行不得调审州县为诸囚累不得委审守令除情真罪当照旧监候其中有死罪矜疑军徒杖笞情可原宥者许各详抚按抚按会疏以请疏期勿过夏月轻罪径自发落重罪聽部覆务使岁岁力行处处清审庶天下郡县无一不结之囚从之】

秋七月吏部尚书孙鑴罢

【初张居正当国吏部权渐轻及宋纁陆光祖相继为尚书稍自振飭至鑴守益坚阁臣张位等欲夺其权建议大僚缺九卿各举一人类奏以听上裁鑴争之不能得自是吏部权又渐散之九卿矣会大计京朝官鑴与考功郎中赵南星力杜请谒员外郎吕允昌鑴甥也首斥之南星亦斥其姻给事中王三余一时公论所不予者贬斥殆尽而大学士赵志皋弟预焉王锡爵以首辅还朝欲有所庇比至而察疏已上庇者皆在黜中由是阁臣皆憾会言官论劾员外郎虞淳熙郎中杨于庭主事袁黄鑴议留淳熙于庭给事中刘道隆遂劾南星专权植党贬南星三秩鑴亦夺俸遂连疏乞休去左都御史李世达以己同掌察上疏为南星讼不听于是金都御史王汝训右通政魏允贞等交章论救而员外郎陈泰来言尤切帝怒斥南星为民泰来等皆被谪】质实【孙鑴字文仲燧之孙赵南星字梦白高邑人吕允昌余姚人虞淳熙杭州右卫人杨于庭全椒人袁黄嘉善人刘道隆潜江人李世达字子成泾阳人王汝训字古师聊城人魏允贞字懋忠南乐人陈泰来字伯符平湖人】

彗星见紫微

【七月三日乙卯彗星见东井二十三日乙亥逆行入紫微垣犯华盖星大学士王锡爵密奏臣连夜仰观乾象见彗星已入紫微垣臣闻古帝王禳彗之法或改张新政或更用新人一切以除秽布新为义若彗入紫微垣王者之宫则其咎乃在君身必非区区用人行政之间所能消弭窃惟天子之象曰帝星太子之象曰前星臣以为方今禳彗之第一义无过早行册立之典】

冬十一月召见王锡爵于煖阁

【皇太后生辰帝御门受贺毕独召锡爵煖阁劳之曰卿扶母来京诚忠孝两全锡爵叩头对曰臣今日正恐忠孝两亏因力请早定国本帝曰中宫有出奈何对曰此说在十年前犹可今元子已十三尚何待况自古至今岂有子弟十三岁犹不读书者帝颇感悟锡爵因复言外廷以固宠阴谋归之皇贵妃恐郑氏举族不安惟陛下深省帝心益动未几遂有出阁之命】

【甲午】二十二年春二月皇长子常洛出阁讲学

【时已十四岁帝手谕阁臣令议出阁讲学礼仪免御门受贺用辅臣侍班词臣六人侍讲读俱如东宫仪大学士王锡爵言皇长子出阁辅臣每日一员侍班此虽隆庆年新例但天顏

尚不得时覲而于皇长子进见频数似涉嫌疑请自初讲二日以後间十日轮侍从之锡爵又请帝时御讲筵俾皇长子随严父之後型范益亲啓沃自效矣不报】

遣使賑河南饥

【先是河南大雨五谷不升给事中杨东明绘饥民图以进帝览之惊惶忧惧传谕阁臣至是从部议蠲是岁田租并发银八万两令光禄寺丞鍾化民兼河南道御史前往賑济其山东江北灾伤重处分賑停徵有差】质实【杨东明虞城人鍾化民字维新仁和人】

吏部郎中顾宪成削籍

【先是羣臣争建储惟王家屏与言者意合申时行王锡爵皆宛转调护亦颇以言者为多事并封命下完成上疏力争又遗书锡爵反覆辩论议遂寝孙鑰赵南星主考察完成实左右之既迁郎中所推多与政府抵牾至是王锡爵将谢政会推阁臣完成举家屏忤帝意削籍归完成既废家居里故有东林书院为宋杨时讲道处完成与弟允成倡修之偕同志高攀龙钱一本薛敷教史孟麟于孔兼诸人讲学其中海内闻风景附完成尝言官辇轂志不在君父官封疆志不在民生居水边林下志不在世道君子无取故其讲习之余往往讽议时政裁量人物朝士慕之亦遥相应和由是东林名大着其後孙丕杨邹元标赵南星等相继讲学自负气节与政府相抗是为东林党议之始】质实【东林书院在无锡县常州知府欧阳东凤无锡知县林宰为之营构顾宪成字叔时无锡人高攀龙字存之无锡人钱一本字国瑞武进人薛敷教字以身武进人于孔兼字元时金坛人欧阳东凤字千仞潜江人林宰字德衡漳浦人】

三月诏修国史

【先是礼部尚书陈于陞请纂辑本朝正史下所司议至是勅大学士王锡爵等充总裁官编辑】质实【陈于陞字元忠以勤子总裁纂修官是时总裁官大学士王锡爵张位礼部尚书陈于陞南京礼部尚书沈一贯詹事刘虞夔少詹事冯琦副总裁官礼部尚书罗万化吏部右侍郎盛讷礼部左侍郎范谦右侍郎孙继皋少詹事曾朝节祭酒陆可教纂修官左庶子余继登右谕德萧良有洗马李廷机右中允刘应秋修撰唐文献焦竑编修郑德溥郭正域黄汝良全天叙吴道南黄辉庄天合董其昌检讨王图萧云举区大相周如砥林尧俞】

夏四月己酉朔日有食之

五月以礼部尚书陈于陞南京礼部尚书沈一贯兼东阁大学士预机务

【时王锡爵将谢政召二人同入阁】质实【沈一贯字肩吾鄞人】

王锡爵罢

【锡爵在阁时尝请罢江南织造停江西陶器减云南贡金力争不宜用廷杖为世所称特以阿并封旨被物议既而赵南星斥赵用贤放归论救者咸被谴责衆指锡爵为之因连章自明且申救人卒莫能谅也锡爵遂屡疏引疾乞休帝不欲其去为出内帑钱建醮祈愈锡爵力辞疏八上乃允之命改吏部尚书进建极殿大学士赐道里费乘传行人护归】

六月西华门灾

【己酉大雷雨火灾西华门楼】

秋八月以孙丕扬为吏部尚书

【丕扬掌吏部清正不挠百僚无敢干以私者独患中官请竭乃创为掣籤法大选急选悉听选人自掣请寄无所容铨政自是一变一时宫禁相传以为至公下逮闾巷莫不翕然称颂而议者谓其人材不分高下地方不论繁简而一凭籤注无异于掩镜索照或至作竹籤传籤之然自其法既行卒莫能改】质实【大选急选凡听选及考定陞降者归于双月谓之大选凡改授改降丁忧侯补归于单月谓之急选竹籤传常熟顾大韶作】

冬十月绰哈犯辽东总兵官董一元击败之

【初博斯呼为官军所杀其弟绰哈子巴图鲁益结土默特东西相倚数侵边一元遣部将孙守廉驰右屯御西部而自将大军匿镇武外为空营以待敌骑深入官军奋击破之逐北七十余里巴图鲁中矢走西部亦解去一元复以岁宴敌不设备率健卒踏兵渡河疾驰四百里抵寇巢斩二百余级获牛马甲仗无算巴图鲁旋死诸部悉远遁】质实【镇武堡在广宁卫东百五十里董一元宣府前卫人】

【乙未】二十三年春正月诏宗室得就试

【郑世子载堉请宗室皆得儒服就试母谕中外职中式者视才器使从之许奉国中尉以下入试辅国中尉以上爵尊不得与其後礼臣李廷机言封爵科目原自两途彼既愿从科目入仕应照士子出身资格铨除何拘原爵亦从之惟不得除京朝官】质实【载堉郑王厚烷子厚烷卒载堉让封乃以世子禄终其身尝上历算岁差之法及乐律考辨详确识者称之李廷机字尔张晋江人】

夏五月京师地震

秋九月青海酋永什卜犯甘肃参将達云击败之【永什卜者顺义王谕达从子也部衆强盛先尝授都督同知再进龙虎将军自以贡市在宣化守臣遇已厚不可逞乃随谕达西迎活佛留据青海岁为边患尝诱杀副将李魁边将不能报遂有轻中国心至是九月九日度将士必燕饮拥劲骑直入南川属番侦告总督三边李汶檄西宁参将达云游击白泽设兵要害令

番人遶出口外潜扼其背而云自提精卒二千夹击大败之云手馘其帅一人斩首六百八十余级其走峡外者又为番人所殲获驼马戎器无算为西陲战功第一云既胜度寇必复至厚集以待踰月寇果结浩尔齐诸部先围番寨以诱官军番不能支合于寇寇遂入犯西宁西宁军坚不可破寇始遁追奔数十里而还云乃招集番人初与寇合者七十余户皆复其业寻进云总兵官镇甘肃明年春季汶以劲兵三道出塞袭布色图营斩四百余级获马畜器械数千浩尔齐部衆复窥伺洮州汶遣参将周国柱等击之斩首三十六级】质实【李汶字宗齐任邱人達云凉州卫人 永什卜旧作永什布布色图旧作巴什图今并改】

复建文年号

【初礼部尚书沈鲤力赞司业王祖嫡之请帝不从至是礼科给事中杨天民复以为言始诏复建文年号附事蹟于太祖实录之末未几南京太常卿沈子木疏言建文帝御字五年顾不得一盃麦饭下同齐民于谊未忍请附食于?文太子之侧章下部议果不行】质实【沈鲤字仲化归德人杨天民字正甫山西太平人沈子木归安人】

淮水溢浸泗州祖陵

【总河杨一魁请分杀黄流以纵淮别疏海口以导黄盖以淮壅由于河身日高河高由于海口不深若上流既分则下流日减清河之口淮无黄遇则泗之积水自消而祖陵永保无虞议者以江北岁灾裨民力不堪大役欲先泄淮而徐议分黄工部谓导淮分黄势实相须不容偏废宜将导淮分黄疏濬海口等处工程命河臣逐一举行其一应工费酌议动支事完分别劝惩报可可】质实【杨一魁安邑人】

冬十月湖广饥

【湖广巡按徐兆魁以地方灾伤具四事上请一议改折一议缓徵一议蠲振一议振济户部议缓徵徒貽小民他日之累不若勘被灾轻重量为蠲振诏如部议】

【丙申】二十四年春三月乾清坤宁两宫灾

【三月八日乙亥戌刻火发坤宁宫延及乾清宫一时俱烬】

夏福建饥

【福建诸府所属被灾人民分别振恤】

六月彗星见

【见东北方芒西南指】

秋七月吏部尚书孙丕扬请发推补官员章疏不报【丕扬上言数月以来廷推阁矣行取停矣年例废矣诸臣中或以功高优叙或以资深量迁或服阙而除补或覆题而注授其生平素履原不在摈弃之列者乞体因政设官之意念国步多事之时将近日推补官员章疏简发间有注拟未当亦乞明示别推酌补疏入不报 是时地方官亦多缺不补御史王以时奏言地方缺官之害藩司臬司等官职掌各有攸司每遇员缺则抚按必择近便者一人使之摄理职钱谷而摄军屯职兵戎而摄盐马夙昔未能娴习旦夕岂能旁通颠末未暇究心畧判难于刊发聪明少有未遍宁免乘边才力稍有不同辄形愆谬舞文者乘此弄其机械玩法者藉以恣其侵渔文移之往来狱讼之听断近者数十里远者数百里又远者千有余里道路奔走岁月牵纏费用不支劳苦勿恤或鬻卖其妻子而事尚未完或转死于沟洫而冤莫可诉司道缺官废事病民其受害既如此至于郡县守令最为亲民民之倚命于守令不啻赤子于其乳母使郡县而可缺官则是赤子而可断乳也使守令而可使常署掇则是赤子而可终岁寄养也盖专官如桺匱之典守故任怨劳而不辞摄职若传舍之经过谁肯竭心力以从事乞行推补不报】

仁圣皇太后陈氏崩

遣中官开矿

【初畿辅奸民怱怱中官多言矿利大学士申时行力持不可至是承宁更朝鲜用兵之后国用大匮营建两宫计臣束手府库前卫副千户仲春请间矿助大工帝允之自是献矿峒者踵至首开畿内命中官领之嗣後则河南山西南京湖广浙江陕西四川辽东广东广西江西福建云南无地不开中使四出皆给以关防并偕原奏官往矿脉微细无所得勒民偿之而奸人假开采之名乘势横索民财有司稍忤意辄劾其阻挠逮治富家巨族则诬以盗矿良田美宅则指为下有矿脉卒役围捕辱及妇女其横暴如此羣臣屡谏帝皆不听其後又增设各省税使如天津店租广州珠监两淮余盐浙江福建广东布舶成都茶盐重庆名木湖口长江船税荆州店税实坻鱼苇及门摊商税等都邑关津中使碁布水陆行数十里即树旗建廐所至纳奸民为爪牙肆行杀夺又立土商名目穷乡僻坞米盐鸡豚皆令输税中人之家大半皆破由是民不聊生变乱蠭起 是年七月开矿汝南八月开矿夏邑并青沂等处仍编富民为矿头费县文登沂水蒙陰临朐诸矿同时开采二十六年六月命内监李敬采珠广东七月命内监李道督税湖口鲁保经理淮盐俱许节制有司十月于云南大理采石二十七年正月分遣内监樵京口仪真二月命内监刘成樵税浙江李凤采珠广州兼徵市舶司税课设福建市舶司又命内监杨荣开采云南陈奉徵荆州店税陈增徵山东店税孙隆徵苏杭等处税课鲁坤徵河南孙朝徵山西又命内监邱秉云徵税四川兼矿务梁永徵税陕西各以原奏千户翟应泰乐纲等往御马监潘相督理江西瓷廐辅臣沈一贯言中使衙门皆创设并无旧绪可因大抵中使一员其从可百人分遣官不下十人此十人又各须百人则千人矣此千人每家十口为率则万人矣万人日给千金岁须四十余万及所得才数万徒歛怨耳今分遣二十处岁糜八百万圣思偶未之及也乞尽撤之不报寻诸省皆并税于矿使其年三月内监王忠徵税密云马口徵临清陈增徵东昌十月南京守备大监郝隆刘朝用采寧国池州八月内监陈奉采兴国州矿洞丹砂二十八年二月内监暨禄徵凤阳安庆徵庐常镇税邢隆税沿江州田鲁坤间

彰德卫辉怀庆等矿洞又以锦衣百户王体仁奏命徵长江船税又以广洋卫镇抚戴君恩奏命徵广东遗盐及绒锦珠宝等土产八月内监邱秉云徵成都盐茶重庆名木十二月开矿谷城】

闰八月乙丑朔日有食之

九月葬孝安皇后

【梓宫发引帝托疾不送遣官代行吏部侍郎孙继皋员外郎王就学抗疏谏帝怒抵继皋疏于地而置就学疏不省已而诏吏部甄别郎官斥就学为民继皋亦罢去】质实【孙继皋字以德无锡人王就学字所敬无锡人】

河决单县

【时徐泗淮扬间无岁不苦水患总河杨一魁既议分疏黄淮于是後夫二十万开桃源黄河坝新河起黄家嘴至安东五港灌口长三百余里分泄黄水入海辟清口沙七里建武家墩高良礮周家桥石闸泄淮水三道入海且引其支流入江于是泗陵水患平而淮杨得无患然一魁专力桃源淮泗间而上流单县黄垆口之决如故後以黄垆口不塞致冲祖陵斥一魁为民】质实【黄家嘴在桃源县东北五港灌口在安东县东北高良礮在山阳县西南由清河涧沙阜桥西入于淮周家桥在山阳县西南高堰上黄垆口在曹州府单县南】

冬十月陈于陞卒

【于陞在阁与赵志皋张位沈一贯皆同年生遇事无齟齬而帝拒谏益甚上下否隔于陞忧形於色以不能补救在直庐数太息视日影至是以两宫灾请面对下报乞罢亦不许以积忧成疾卒赠少保谥文宪】

【丁酉】二十五年春三月以杨镐为金都御史经畧朝鲜军务

【征倭军既撤诏以顾养谦为经畧养谦亦主款奏言鬪白宜封为日本王二十二年冬倭遣小西飞入朝定封贡议命都指挥杨方亨等充贡使同沈惟敬往养谦荐侍郎孙鑛自代乞身去二十四年九月方亨等至日本关白怒朝鲜王子不来谢不肯撤兵所进表文又谩无臣礼是年二月方亨归委罪惟敬并呈石星前後手书帝怒逮星惟敬按问下狱谕死以尚书邢玠总督蓟辽改麻贵为备倭大将军而以镐为经畧未至先呈奏十事请今朝鲜官民输粟得赠秩授官赎罪及乡里丁夫等免役又以朝鲜君臣隐藏储蓄不饷军劾奏其罪由是朝鲜多怨当是时倭将行长清正等据南原全州犯全罗庆尚逼王京会沈惟敬就逮向道乃絶九月镐抵王京倭已退屯蔚山十二月镐会邢玠麻贵议进取分为三协合攻蔚山贼出战大败奔据岛山结三栅以自固游击陈寅连破其二第三栅已垂拔而镐素与李如梅善以如梅未至不欲寅功出如梅上遽鸣金收军再攻不克明年正月行长救至镐狼狈先奔诸军继之贼前

擊官兵死者无算輜重多喪失是役也傾海內全力合朝鮮通國之衆委棄于一旦舉朝嗟恨鎬既奔還王京與總督玠詭以捷聞贊畫主事丁應泰聞敗詣鎬鎬揚揚自詡功代應泰憤抗疏盡列敗狀乃罷鎬今听勘而以萬世德代之邢玠以前後無水兵故敗乃益募江南水兵謀海運為持久計分四路進兵麻貴為伏兵所敗中路將董一元亦潰迄無成功】質實【南原在朝鮮國城東南與全州相犄角為朝鮮要害全州在國城南全羅即朝鮮全羅道治全州其地南濱大海東接慶尚為朝鮮門戶慶尚即朝鮮慶尚道治慶州在國城東南濱海與日本相對為朝鮮屏蔽蔚山即朝鮮蔚山郡在慶州西北島山在蔚山郡城南楊鎬商邱人顧養謙字益鄉江南通州人孫鑛字文融鑛之弟邢玠青州益都人丁應泰武昌左衛人萬世德山西偏頭所人】

發明【命將出師必先量敵完勝成竹在胸而後可以刻期奏捷前此李如松等師出無功已有明驗乃當撤兵之後復命征倭而所任者一庸懦無能之楊鎬不量其事之能濟與否輕率前驅知彼知己之謂何觀鎬所陳奏事皆苟且覓若助兵供餉全有恃于朝鮮者以中國而征一倭必借助于外藩之衆即使克捷已傷國體況朝鮮兵不習戰素為倭所輕島山一敗師旅盡喪而茲役也以救朝鮮為名而實則驅朝鮮之衆盡化為沙蟲猿鶴耳失機辱國莫此為甚至于加募江南水軍為分路搗寇之計而卒以無成亦同歸于謀國之不減廟堂既無長策擇帥又非其人而欲懾威海嶠何可得耶】

夏六月三殿災

【六月十九日戊寅火起歸極門延至皇極中極建極三殿文昭武成二閣周圍廊房一時俱燬時帝銳意聚財多假殿工為名言者謂天以民困之故災三殿以示儆奈何復因天災以困民帝不納屢徵木于川廣今輸京師費數百萬卒被中官冒沒終帝世三殿實未嘗復建也至熹宗朝魏忠賢始成之】

罷修國史

【從大學士張位等請也以皇極門左右兩廊被災停止正史纂修事務】

秋七月赦

【以三殿災故也】質實【詔曰朕仰荷天庥恭膺寶命二十有五載于茲追惟嗣服之初養亦無時豫怠第緣歲積頗恃政成兼以多病相侵猶須深宮居攝郊廟闕躬承之禮朝講希臨御之時喜怒猶失其平用舍未歸于當章奏每滯官曹半虛忠言寡聞民隱莫達方隅多故兵食之徵調日繁營造又興开采之徵求四出加之旱乾水溢析民室家汚吏貪官朘民膏血从此人怨屢干天和乃于二十五年六月十九日皇極等殿皇極等門文昭武成二閣內外周回廊房一時被火夫寢宮煨燼曾幾何時正殿崇嚴又復罹此震驚烈聖憂戚慈闈踏地局天靡所容措況一人統御之地萬國衣冠所歸天意若斯朕實不德茲已?申吁禱痛加艾懲祓志改圖誓從今始嚴勅庶位各獻忠猷惟天视听在民惟民归依在德爰稽典制特布詔條庶藉

有衆之欢以回皇穹之眷消咎徵于已往迓福祉于将来】

播州宣慰使杨应龙叛

【初应龙数从征伐恃功骄蹇帝十八年贵州巡抚叶梦熊巡按陈效并疏应龙凶恶诸罪四川巡按李化龙以时方调播州兵防御松潘请暂免勘问由是川贵抚案议不合应龙性猜狠阻兵嗜杀所辖五司七姓悉叛离其妻叔张时照与所部何恩等上变告应龙反梦熊疏请发兵剿之而蜀中士大夫率谓蜀三面邻播属裔以十百数皆其弹压且兵骁勇数赴征调有功剪除未为长策以故蜀抚按并主抚朝议行两省会勘应龙愿赴蜀不赴黔二十年十二月逮应龙诣重庆对簿系论法当斩请以二万金赎会倭大入朝鲜羽檄徵天下兵应龙愿自将五千兵征倭报劾诏释之兵已启行寻报罢巡抚都御史王继光至严提勘结遂抗不复出而张时照等复议奏阙下继光乃一意主剿二十一年春继光驰至重庆与总兵刘承嗣参将郭成等议分三军各道并进时军至娄山等关屯白石口应龙阳令其党穆炤等约降而统苗兵据阙冲杀都司王之翰军覆杀伤大半会继光论罢即撤兵委弃輜重畧尽黔师协剿亦无功以谭希思为四川巡抚与总兵刘承嗣会同贵州撫镇相机征剿时继光既罢御史薛继茂乃旋主抚应龙亦上书自白御史吴礼嘉劾郭成等失律令戴罪立功寻承嗣以疾乞骸骨两省议久不决应龙遣其党携金入京行间执原奏何思诣纂江县二十二年以兵部侍郎邢玠总督贵州车驾郎中张国玺主事刘一相赞画军前二十三年正月玠至蜀察永宁酉阳等土司皆应龙姻媾而黄平白泥诸司久为仇讐计先剪其枝党以檄晓譬应龙谓应龙来当待以不死不者国家悬万金购而头若早为计吾不而欺也当是时七姓惟恐应龙出得除罪而四方亡命窜匿其间又幸龙反因以为利院道文移辄从中阻四月重庆知府王士琦奉玠檄诣纂江县趣应龙聽勘士琦属纂江令前往宣谕应龙使弟兆龙治邮传储粮郊迎叩头致铺资饩牵如礼曰应龙久缚渠魁待罪然不敢自来使君幸枉车骑临謁敬布腹心纂江令具言于士琦士琦即以五月八日单骑往应龙果面缚道旁泣请死罪膝行南前叩头流血请治公馆执罪人及罚金士琦因为请玠以遣国玺一相及道府诣之应龙囚服蒲伏郊迎缚献黄元阿羔阿苗等十二人案验遂抵应龙斩论赎输四万金助采木仍革职子朝栋以土舍受事次子可栋羈府追赎黄元等梟斩重庆市是时倭氛未靖兵部欲缓应龙专事东方帝亦以应龙向有积劳许之加邢玠右都御史还朝以王士琦以川东兵备使弹治之然应龙益怙终不悛而次子可栋寻死于重庆应龙促取屍棺以勘报未完不肯发趣其完赎应龙大言曰吾子活银即至矣拥兵驱千余僧招魂而去分遣土目置关据险立巡警搜戮军民刼剝屯堡殆无虚日厚抚诸苗用以摧锋名曰硬手州人稍殷富者没其家以养苗由是诸苗人愿为之出死力矣二十四年七月应龙掠劫余庆草塘二司徧及兴隆都匀各卫又遣其弟兆龙引兵围黄平戮重安司长官张熹家及是应龙遂劫江津县及南川寻至合江索其讐袁子升縋城下齧割之益统苗兵大掠贵州已又侵及湖广屯站阻塞驿路詞原奏讐民宋世臣父銓及罗承恩等大索城中得銓承恩及子女惨戮以狗掘墓焚屍灰飞蔽天势遂大炽】质实【五司谓黄平草塘二安抚司白泥余庆重安三长官司也黄平司洪武八年置万历二十八年改为州今属贵州平越府草塘司在遵义府东洪武中置今废余庆司元置州洪武中分置余庆白泥二司万历二十八年改置县今属平越府重安司在今黄平州西洪武八年置万历二十七年废娄山关今名太平关在遵义府北百里大娄山上白石口在娄山关南酉阳汉县宋为酉阳州洪武五

年置州八年改为宣抚司今酉阳州为直隶州陈效成都井研人李化龙字于田长垣人王继光登州人薛继茂山西芮城籍云南永昌卫人吴礼嘉鄞县人王士琦临海人】发明【杨应龙一土司耳其骄恣凶暴已非一日使地方大吏早能善为制驭俾不至于跷梁何有蠢然骚动之患若果罪恶昭着法所不容亦当明正其罪以威示远人而申明国典乃黔抚方劾奏罪状蜀抚即请免勘问纷纷持议两省自相矛盾及既已问罪兴师彼且抗拒顔行则更无有旋议主抚之理薛继茂辈畏慈无城但希苟且一时不顾养痍貽患谋之不藏其罪实无可追至于携金行间而遂执原奏者以泄贼愤此复成何政体迨其後名曰请降而实则仍肆侵掠所谓主抚者适以长其轻傲之心又焉怪其後之愈滋不靖乎且携金行间内臣必有为之主者以远方土司而潜与朝宁相结其为害于家国者甚大又岂特边吏之失策已哉】

八月京师地震

【辽阳开原广宁等卫俱震地裂涌水三日乃止宣抚薊镇等处俱震次日复震蒲州池塘无风生波涌溢三四尺山东潍县昌邑乐安即墨皆震临淄县不雨濠水忽涨南北相向而鬪又夏庄大湾忽见潮起随聚随开聚则文余开则见底乐安小清河水逆涌流临清砖板二闸无风起大浪】质实【昌邑宋建隆三年置县明属莱州府乐安金县明属青州府今皆因之】

冬十月以黎惟潭为安南都统使

【初莫登庸请封制下而登庸已死遂使其孙福海袭福海卒子宏瀾嗣宏瀾不能摄衆为黎宁臣郑检所逐宁死再传至惟潭渐强盛遂举兵攻杀宏瀾子茂洽复据安南款关求贡总督陈大科上言莫之篡黎其事逆黎之复讐其名正宜许其来归诏以惟潭为都统使自是安南复为黎氏所有而莫氏惟据高平一郡宗党多窜处海隅时出侵轶为边患】质实【陈大科北直通州人】

【戊戌】二十六年夏四月土默特犯辽东总兵官李如松出塞遇伏死

【初如松弃倭班师言路交章诋其和亲辱国帝置不问会辽东总兵董一元罢廷推如松代之如松感帝知气益奋倭哈纠土默特诸部连寇辽东杀掠无算如松率轻骑出塞捣巢遇伏兵力战死诏以其弟如梅代之踰年坐拥兵畏敌劾罢】

京师旱

【以祷雨黑龙潭加封黑龙潭龙王庙号勒碑纪之】

六月张位罢

【日本封事坏位力荐杨镐才请付以朝鲜军务镐遭父丧又请夺情视事帝皆从之会赞

画主事丁应泰劾镐丧师言位与镐密书往来朋党欺国镐拔擢由贿位得之帝怒下廷议位惶恐奏辩给事中赵完璧徐观澜复交章论之位窘亟奏羣言交攻孤忠可悯臣心无纤毫愧惟上矜察帝怒曰镐由卿密揭屡荐故夺哀授任今乃朋欺隐慝辱国损威犹云无愧遂夺职闲住】质实【赵完璧陕西人徐观澜泽州人】

秋八月京师地震

【丁丑夜四更地震】

冬十一月倭遁去官军分道追击败之朝鲜平

【初官军分道击倭不利会平秀吉死羣倭俱有归志其渠帅清正发舟先走总兵官麻贵遂入岛山西浦都督陈璘遣副将邓子龙督水军千人驾三巨舰为前锋邀之釜山南海战歿会副将陈蚕季金等军至邀击之倭无鬪意官军焚其舟贼大败其得脱登岸者又为陆兵所殲焚溺者万计时总兵刘綎方攻行长夺曳桥砦璘以舟师夹击复焚其舟百余行长党石蔓子引舟师来救璘邀之半洋击杀之于是诸倭扬帆尽去自倭乱朝鲜七载丧师数十万糜饷数百万中国与朝鲜迄无胜算至秀吉死祸始息是年六月命万世德代杨镐经畧朝鲜军务畏倭不敢前比闻倭退会同总督邢玠奏捷赞画主事丁应泰等劾诸臣贿倭卖国帝以将士久劳苦仍发金十万两犒师叙东征功首陈璘次刘綎擢都督同知又次麻贵加右都督邢玠万世德各予世廕董一元杨镐俱复原职】质实【曳桥砦在朝鲜庆州西南顺天城外陈璘字朝爵翁源人邓子龙丰城人素慷慨初起广东把总历麻阳永城参将擢总兵官所在立功时年踰七十意气弥厉欲得首功急携壮士三百人跃上朝鲜舟直前奋击贼死伤无算他舟误掷火器入子龙舟舟中火起贼乘之子龙死赠都尉金事庙祀朝鲜】

发明【以中国全力救朝鲜历七年之久迄无胜算岂真倭之强不可胜哉始则石星惑封贡之议继则杨镐挟忌功之私徒使老师海上糜饷中原向非倭酋自毙则朝鲜之事正未可知当时在事僨轍之辈并为一谈幸有赞画丁应泰者纠劾诸臣之贿倭卖国正可因以分别工罪申明国宪乃徒以将士久劳意存姑息专事懋叙行赏而畏缩不进之万世德亦得冒功予廕挟私败绩之杨镐并得原情复职刑章废弛军纪荡然是时边事日繁中国坐耗元气销铄之余又苦????盭就使师出以律犹虑得不偿失况复否臧之凶乎】

以刘东星为工部侍郎总理河漕

【初潘季驯议开黄河上流循商邱虞城而下历丁家道口出徐州小浮桥即元贾鲁所浚故道也朝廷以费鉅不果东星即其地开濬起曲里舖至三仙台抵小浮桥又濬漕渠自徐邳至宿迁凡五閱月工竣明年濬邵伯界首二湖又明年开泇河南通淮海引漕甚便】质实【丁家道口在归德府商邱县北小浮桥今名云集桥在铜山县旧城东北隅曲里舖在萧县西三仙台山名在萧县北邵伯湖在扬州府北四十五里界首在高邮州北六十里刘东星字子明沁水人】

总督李汶袭浩尔齐于松山走之复其地

【齐里克已东归而套寇浩尔齐巴什图等频年抄掠如故据三大巢曰河套曰海西曰松山声息交倚松在河西为羌番襟要地垂二千里总督三边李汶内联四镇外招番人袭破寇于松山复其地筑边垣四百里以蔽庄凉兰靖为内地而尽撤旧戍汶督陕凡四考进秩至少师李汶疏云兵动万余师劳旬日收幅员千里之封疆剪腹心数百年之巨害叶向高志汶大小百余战斩馘万九千有奇降万二千有奇遂空松幕云】

【己亥】二十七年春三月以李化龙总督川湖贵州军务讨杨应龙

【先是贵州巡抚江东之令都司杨国柱指挥李廷栋率部兵三千剿应龙应龙遣子朝栋弟兆龙何汉良等迎敌于飞练堡贼佯走天邦囤诱官军尽殲之国柱骂贼不屈与经历潘汝资等皆死东之罢以郭子章代而命化龙兼兵部侍郎节制川湖贵三省军事调东征诸将刘綎麻贵陈璘董一元南征六月应龙乘大兵未集遂勒兵犯綦江城中新募兵不满三千贼兵八万奄至围綦江城数匝参将房嘉宠误熟火砖反伤城上兵贼乘势登城嘉宠率师巷战蜀兵争噪走水上嘉宠乃杀其妻与游击张良贤俱死之应龙因刼县令纵囚焚掠出綦江库犒师依仓就食尽取赀财子女去老弱者杀之投屍蔽江而下水为赤寻退屯三溪以綦江之三溪毋渡南川之东乡坝立石为播界号宣慰官庄声言江津合江皆播故土益结九股生苗及红黑脚等苗负险弄兵为助是时贼犹未敢鼓行深入止言争界给葬并索奸民而化龙等以授师未集蜀人畏贼如虎时时移文诘责示无遽絶意计以缓贼贼果具文求抚不复西向时郭子章日夜徵调各汉土兵分守南川合江等处军声渐震应龙伪军师孙时泰请应龙直取重庆捣成都刼蜀王为质而应龙迁延不进尚冀曲省化龙至成都亦谬为好语糜之已而帝闻綦江破追褫两省巡抚谭希思江东之各为民赐化龙剑假便宜讨贼调各路兵大举十月化龙移驻重庆调度川贵湖广兵总兵官刘綎军亦至綎素有威名其家丁良马皆可决胜然夙与应龙昵人皆疑之于是化龙延綎入卧内输心腹且以危言激之引其父显九丝功为比綎大恟愿誓死报効化龙腾书于朝遂委綎专制军事益有次第矣已而应龙屯官坝声言窥蜀已遂焚东坡烂桥出掠兴隆镇远化龙议置劲兵万余据守要害通楚黔道益调诸路兵以俟大举】质实【飞练堡在平越府瓮安县东废草塘司北十里天邦囤在废草塘司西北三溪唐置县宋废故城在今重庆府綦江县南东乡坝在南川县西南官坝在遵义府城西北东坡在平越府黄平州东烂桥在镇远府施秉县南郭子章字相奎泰和人】

夏旱

【自去冬至是亢旱为灾河井乾竭二麦枯槁】

閏四月遣中官核天下积储

【以诸皇子婚诏取太仓银二千四百万两户部告匱乃命中官严核各省积储由是外帑日耗】

秋八月陝西山崩

【狄道县有山长二百余丈声如雷者十数夜遂陷为池山南平地涌山五高者二十余丈】

冬十月加四川湖广田赋

【以播州用兵故】

十一月賑畿辅饥

【发天津德州临清仓共三十万石以十万賑贷而以二十万平糶是月蠲免河南凤阳各府州县被灾处免徵改折有差】

十二月武昌汉阳民变击伤税使陈奉

【奉在湖广恣行威虐惨毒备至兴国州奸民漆有光讐居民徐鼐等掘唐相李林甫妻杨氏墓得黄金巨万奉奏之帝命奉括进内库奉因毒拷责偿且悉发境内诸墓巡按御史王立贤言所掘墓乃元吕文得妻非林甫妻奸人讐奏语多不实请罪不治而停他处开掘不报时巡抚支可大以下事奉唯诺惟谨独分巡佥事冯应京以法裁之至是有武昌汉阳诸生妻被辱诉上官市民从者万余哭声动地蠡拥入奉廨争投瓦石击奉奉被伤诸司驰救之乃免应京捕治其爪牙奉怒阳餉食而置金其中应京复暴之益恚恨寻置酒邀诸司以甲士千人自卫遂举火箭焚民居民羣拥奉门奉遣人击之多死碎其屍擲诸途可大噤不敢出声应京独抗疏列其九大罪奉亦诬应京挠命凌敕使帝怒命贬应京边方杂职给事中田大益御史李以唐等交章劾奉乞宥应京帝益怒除应京召是时襄阳通判邸宅推官何栋如枣阳知县王之翰亦忤奉被劾诏宅之翰为民栋如遣逮俄以都给事中杨应文论救遂并逮应京宅之翰三人顷之奉又诬劾武昌同知卞孔时抗拒孔时亦被逮緹骑抵武昌民知应京获重谴相率痛哭奉乃大书应京名列其罪榜之通衢士民益愤聚数万人围奉廨誓必杀奉奉逃匿楚王府衆乃投奉党十六人于江并伤緹骑以可大助虐焚其辕门可大不敢出日已晡犹纷乱应京囚服坐檻车晓以大义乃稍稍解散奉匿楚府逾月不敢出亟请还京大学沈一贯因极言奉罪请立代还言官亦争以为请帝未许会江西湖口税使李道奏奉水阻商舟陆截贩贾剥民病国帝乃召奉还隶其事於承天守备杜茂顷之东廠奏緹骑有死者帝怒甚手诏内阁欲究主谋一贯言民心宜静请急遣重臣代可大拊循因荐侍郎赵可怀帝乃褫可大官令可怀驰往未至可大已遣兵护奉行舟车相衔数里不絶可怀入境亦遣使护之奉得迺迁去应京之就逮也士民拥檻车号哭车不得行既去则家为位祀之父老相率詣阙诉冤帝不省系应京等诏狱拷讯久之至三十二年九月以星变修省廷臣多请释系囚于是应京及宅栋如获释之翰先瘐死而孔时系狱如故至四十一年始释归奉至湖广二年武昌凡再变继之汉口黄州荆州荆门襄阳宝应德安湘潭诸处变经十起几成大乱而是时山东临清民亦噪而逐税监马堂纵火焚堂署毙其党三十七人皆黥背诸偷也诏捕首恶株连甚衆有王朝佐者素

伏羲慨然曰首难者我也勿累无辜临刑神色不变临清民立祠以祀未几苏州亦民变杀税监孙隆党六人有司捕乱者民葛诚独承论死遇赦得释自矿税兴中使暴横所至踣藉有司谤书一闻驾帖立下二十四年则辽东参将梁心二十五年则山东福山知县韦国贤二十六年则山东益都知县吴宗尧二十七年则江西南康府知府吴实秀墨子知县吴一元山东临清守备王炆湖广荆州府推官华钰经历车任重二十八年则广东新会在籍通判吴应鸿举人劳养魁锤声朝梁斗辉云南寻甸知府蔡如川赵州知州甘学书陕西富平知县王正志二十九年则应京宅栋如之翰及武昌同知卞孔时江西饶州通判陈奇可三十年则凤阳临淮知县林錡三十四年则陕西咸阳知县陈时济三十五年则陕西咸宁知县满朝荐三十七年则辽东海防同知王邦才参将李获阳皆幽系诏狱久者至十余年炆应鸿志学获阳俱毙狱中其他削籍贬官者甚衆至士民囚系死亡者尤不可胜纪】质实【支可大崑山人冯应京字可大吁?人田大益四川定远人邸宅人姓名氏族志邸氏望出中山何栋如南京左卫籍无锡人王之翰绛州人吴宗尧字仁叔歙县人华钰字德夫丹徒人王志正祥符人满朝荐字震东麻城人】

发明【矿税为神宗时极弊之政乃复以奸民讐告敕使括金遂至悉发境内诸墓暴及枯骨因以凌辱士民之妻甚至举火焚毁民居碎屍擲诸途路明代任用内寺其弊百出误国丧师何所蔑有然未有横虐恣毒若此之无道者盖由神宗济以好货之私若辈乃敢肆其刼掠之术在武昌汉阳之民拥入奉廨争投瓦石愤冯应京之被逮聚哭者至万余人又复焚巡抚辕门民气可谓不靖以寻常无事时论之则当立惩首恶严究奸民以止其乱若此之剥民病国是所谓壅而必决者陈奉实有以致之岂尽民之无良?应京抗疏劾奉可谓直言而转檻车系讯阁臣台臣亦交章声言奉罪神宗仅仅召奉还京无一谴诃之语赏罚之不明不几拂人之性耶】

【庚子】二十八年春二月京师地震

【戊寅午时地动起自东北往西南连动二次】

夏六月李化龙帅师平播州

【杨应龙勒兵数万五道并出攻破龙泉司土官安民志率步卒五百拒守死之时化龙徵兵大集大会文武于重庆登坛誓师分八路进兵川师分四路总兵刘綎由綦江入总兵官马孔英由南川入总兵官吴广由合江入副将曹希彬受广节制由永宁入黔师分三路总兵官童元镇由乌江入参将朱鹤龄受元镇节制统宣慰使安疆臣由沙溪入总兵官李应祥由兴隆入楚师一路分两翼总兵官陈璘由偏桥入总兵官陈良珫受璘节制由龙泉入每路兵三万官兵三之土兵七之巡抚郭子章驻贵阳湖广巡抚支可大移沅州化龙自将中军策应部署既定化龙戒诸将以抵娄山等关为期且曰关外且战且招降多不可胜诛也关内急战勿受降师不可久老贼诈不可信也先是蜀玉垒山忽裂金谓昔年平九丝地数动殆播平先兆云刘綎进兵綦江连战破三峒綦江自东溪入播并峻岭密箐楠木山羊筒台三峒索号奇险贼首穆炤等盘据綎力战克之杨朝栋统苗兵数万分道迎敌锋甚锐官军夹击綎身自陷陈

苗大惊曰刘大刀至矣栋溃围走几被获贼胆落益为守御计诸军分道并捷南川则酉阳石砭二司兵先登遂连克桑木乌江河渡三关陈璘至副将陈寅击四牌贼各披靡遂夺天都三百落诸囤贼连败乃乘隙出奇兵突犯乌江诈称水西龙澄会哨永顺兵断桥溺死官军无算参将杨显守备陈云龙阮士奇白明達指挥杨续芝等死之事闻逮总兵童元镇下于理时有蜚语水西佐贼者化龙檄诘之水西不自安会贼杀其头目澄大眼复修好贿澄澄戮其使击斩伪将杨惟栋等安疆臣亦执贼二十余人以示不背时刘綎战九盘入娄山关关为贼前门万峯插天中通一线官军从间道攀藤鱼贯毁栅而入四月朔屯白石应龙率诸苗决死战阴令杨珠等抄後山夺关四面合围都司王芬中流矢死刘綎亲勒骑冲坚以游击周敦吉守备周以德分两翼夹击败之与南川永宁路合连破其龙爪海云诸险囤压海龙囤而垒海龙囤者贼所倚天险飞鸟腾猿不能踰者时偏沅巡抚都御史江铎已抵任视师陈璘帅师急攻破其青蛇囤安疆臣亦夺其落蒙关至大水田焚桃溪庄贼见势急父子相抱哭上囤死守每路投降文以缓官军化龙以贼诡降檄令斩使焚书毋为所给又虞綎与应龙有旧檄令无通贼綎械其人自明而吴广入崖门关营水牛塘与贼力战三日却之贼诡令妇人于囤上拜表痛哭云田氏且降复诈为应龙仰药死以报广已而覘知田氏诈降以缓攻而所云应龙死乃川兵攻囤以火礮击死所谓杨珠也珠骁勇善战既死贼痛如失左右手广觉诈益厉兵协攻絶贼樵汲八路大集海龙囤下遂筑长围更番迭攻贼大囤会化龙闻父丧诏以墨纁视师化龙跣而草檄益治军念贼前险不能越令马孔英勒兵攻其後时天久雨将士驰泥淖中苦战六月四日天忽开霁明日刘綎身先士卒进克土城应龙益迫散数千金募死士拒战诸苗皆骇散无应者起提刀自巡垒见四面火光烛天旁徨长叹泣谓其妻子曰吾不能复顾若矣诘朝官军遂登囤破其大城入应龙仓皇同爱妾二阖室缢且自焚吴广获其子朝栋及兆龙等百余人播贼平计出师至灭贼百十有四日化龙露布以闻刘綎为军功冠诏磔应龙屍戮朝栋兆龙等于市以其地置遵义平越二府分属四川贵州】质实【龙泉本龙泉坪长官司元为思州安抚司治明神宗二十九年改为龙泉县属贵州石阡府今因之乌江在遵义府南境上有关明洪武中置沙溪在遵义府城南偏桥明初置长官司今属镇远府玉垒在成都府灌县西北三十里岩石上有镌玉垒字桑木关在遵义府绥阳县东河渡关在乌江关东水西宣慰司在贵阳府西北三百里海龙囤在遵义府城北为应龙穴垒青蛇关在遵义府城东落蒙关在遵义府城西崖门关在遵义府西北遵义平越二府今皆属贵州吴广广东人童元镇桂林右卫人江铎仁和人田氏即七姓之一】

秋七月旱

【工科给事中王德完以祈祷雨泽奏言致旱有由纵其所以毒民者是也弭灾有法卫其所以保民者是也今出柙中之虎兕以吞餧羣黎逸圈内之豺狼以搏噬百姓怨愤无处得伸鬱结无时可解霖雨以天怒而屯肥 缘人妖而出如之何不旱亟改前弦将各省黥货之使一旦撤回则修省以实不以文何旱灾之不禳哉疏入不报】质实【王德完字子醇广安人】

冬十月下给事中王德完于狱廷杖除名

【时郑贵妃日有宠而王皇后多疾左右咸窃意后崩贵妃即正中宫位其子为太子中允黄辉皇长子讲官也从内侍微窥得其状谓德完曰此国家大事旦夕不测书之史册谓朝廷无人德完乃属具草及是上之疏入帝震怒立下诏狱拷讯尚书李戴御史周盘等连疏论救忤旨切责御史夺俸有差阁臣沈一贯方在告力疾草奏为德完解帝亦不恚命杖德完百除其名复传谕廷臣诸臣为皇长子耶为德完也如为皇长子慎无瀆扰必欲为德完则再迟册立一岁廷臣乃不复言】质实【黄辉字平倩南充人李戴字仁夫延津人周盘泽州人】

两畿盗起

【频年灾旱又苦矿税兵民多起为盗浙人赵一平以妖术倡乱窜徐州与其党孟化鲸等招集亡命自称宋後署伪官期明年二月诸方并起事觉伏诛时凤阳巡抚李三才再疏陈矿税之害言陛下爱珠玉民亦慕温饱陛下爱子孙民亦恋妻孥奈何崇聚财贿而使小民无朝夕之安又言近日奏章凡及矿税悉置不省此宗社存亡所关一旦衆畔土崩小民皆为敌国陛下即黄金盈箱明珠填屋谁为守之皆不报】质实【赵一平妖术倡乱明实录赵一平浙之山阴人素习邪术俶诡喜乱会丽水妖妇王氏假称佛号与义乌奸吏陈天宠传香淫聚煽惑浙东其夫死一平夤缘妻之造指南经妖书令其党分投两都省署同日布散簧鼓人心党获惧诛改姓名曰古元逃窜徐州结纳无赖猖狂大言已而流寓杭城诵经聚衆拒捕杀人变姓名亡命沧瀛间至宝坻为千户刘文所擒械京师即讯狱具一平王氏天宠皆戮西市梟首狗衆余党各论斩枷示遣戍有差李三才字道南顺天通州人】

【辛丑】二十九年春二月賑大同宣府饥

【蠲免二府本年应徵钱粮】

夏五月罢山西巡抚魏允贞

【中官张忠孙朝先後领山西矿税诛求百方允贞每事裁抑疏暴其罪朝怒劾允贞抗命阻挠帝留允贞疏不下而下朝疏于部院将加譴责吏部尚书李戴都御史温纯力争允贞贤请下允贞疏平议帝并留中山西军民数千人诣阙为允贞讼冤言官亦连章论救帝置不问允贞父年九十余乃乞归侍养廷议以税使害民非允贞不能制固留之允贞请益力听归】

旱

【畿辅山东河南赤地数千里吏部尚书李戴等条上旱灾封事言自去年六月不雨至今三辅嗷嗷民不聊主草木既尽剥及树皮夜窃成羣兼以昼劫道殣相望村空无烟据巡抚汪应蛟揭称坐而待賑者十八万人过此以往夏麦已枯秋种未布使百姓坐而待死更何忍言使百姓不肯坐而待死又何忍言加以频值外警连兴倾国之师车殆马烦行齎居送按丁增调践亩加租此时赋税之役比二十年以前不啻倍矣而矿税之议烦兴貂璫之使四出不论地有与无有包矿包税之苦不论民愿与否有派矿派税之苦指其屋而挟之曰彼有矿则家

立破矣彼漏税则橐立倾矣以无可查稽之数用无所顾畏之人行无天理王法之事大畧以十分为率入于内帑者一尅于中使者二瓜分于参随者三指骗于土棍者四而地方之供应岁时之馈遗驿递之骚扰与夫不才官吏指以为市者不与焉陛下但知利源易开中贵易信岂知彼剥害小民至于如此亦岂知今日苦矿苦税之民即是前日被灾被兵之民重累叠困咨嗟愁怨至于如此不报】

六月法司请热审不报

【嗣後数年每请皆不报狱囚久系多死】

秋八月复以李成梁镇辽东

【成梁去辽十年之间更易八帅边备益弛会总兵马林获罪沈一贯言成梁虽老尚堪将兵乃命再镇辽东年已七十六矣时土默特察?及巴图已死寇掠渐稀而开原广宁复设马木二市诸部耽市赏利争就欸以故成梁再镇八年辽左少事】质实【复设马木二市先是泰宁朵顔福余诸部屡犯边後朵顔小岱青悔祸欸塞请开木市于义州帝之二十三年辽东巡抚李化龙疏言其利廷议从之未几遂罢并罢马市小岱青复为寇至是成梁力请复之後以为常 察?旧作长昂巴图旧作把吐小岱青旧作小歹青今并改】

九月河决开封归德

【开封归德二府大水商邱等处黄河水发冲决萧家口一百余丈全河皆南注原行河身顷刻变为平沙商贾舟不暇解维尽涸平沙之上商邱虞城夏邑多被淹没】

赵志皋卒

【志皋为首辅年七十余耄矣柔弱为朝士所轻日本封贡议起石星力主之志皋亦冀无事相与应和及封事败劾星者必及志皋志皋每被言辄疏辩求退然志皋才气不如沈一贯张位而醇谨过之时帝益怠荒章疏沈阁官僚旷阙志皋亦颇论谏特以石星之故物议丛焉其乞休疏凡八十余上俱不许在告四年至是卒于邸舍】

賑贵州饥

【贵州巡抚郭子章言六月十八日贵阳府定番地震自酉至戌有声如雷黔东诸府卫及黄平五司自正月不雨至于六月思南府大雨婺川县大雨冰雹交作城内水深数尺去年苦兵今年苦饥黔东忧旱黔南忧水军民重困议将湖广四川二省协济拖欠钱粮如数徵解以賑全黔户部如议请报可】质实【定番州明成化中置程番府神宗时置州属贵阳府今因之如是】

以前礼部尚书沈鲤朱赓并兼东阁大学士预机务【鲤素鯁亮前在礼部持典礼多所建白申时行銜鲤不附已深忌之一日鲤请告时行遽拟旨放归帝曰沈尚书好官奈何使去传旨谕留帝有意大用鲤微言沈尚书不晓人意内?密告鲤鲤拒之曰禁中语非所敢闻卒引疾归赓充讲官时宫中方兴土木治苑囿赓因讲宋史极言花石纲之害帝为悚然累迁礼部尚书遭继母丧去至是赵志皋卒沈一贯请增置阁臣帝素虑大臣植党欲用林居及久废者遂诏鲤与赓以原官入阁参预机务】

冬十月立子常洛为皇太子

【时太子年二十羣臣屡请册立冠婚并行沈一贯草敕请下礼官具仪而廷议有欲先冠婚後册立者一贯不可曰不正名而苟成事是降储君为诸王也帝意亦悟命即日举行既而复令改期一贯封还谕旨力争乃立常洛为皇太子同日封诸子常洵福王常浩瑞王常润惠王常瀛桂王 初储位未定郑贵妃要帝至大高元殿谒神设密誓立其子为太子帝因书一纸缄玉合中赐妃为符契後廷臣争之强慈圣太后复坚持立长而妃又忽失懽于是皇长子遂得立为太子帝遣人取玉合封识宛然发合虫蚀书尽矣】质实【福王後之藩洛阳瑞王後之藩汉中惠王後之藩荆州桂王後之藩衢州常润常瀛并李贵妃生】

御定资治通监纲目三编卷二十八

卷二十九

钦定四库全书

御定资治通鉴纲目三编卷二十九

【起壬寅明神宗万历三十年尽壬子明神宗万历四十年】凡十一年

【壬寅】三十年春正月振湖广灾

【湖广潜江沔阳石首巴陵华容广济景陵平江荆门安乡大冶兴国等州县灾荒巡按御史王立贤请将改折缓徵钱粮蠲免振贷从之】质实【潜江汉竟陵县唐置潜江县明属安陆府石首晋置县以县北有石首山而名明属荆州府巴陵晋置县明为岳州府治华容汉未置安南县隋改曰华容县明属岳州府平江秦罗县後五代唐改平江明属岳州府今皆因之安乡晋置县明属岳州府之澧州今属澧州直隶州大冶唐为永兴县地置大冶场南唐为大冶县明属武昌府之兴国州今属武昌府王立贤山西仪卫司人】

二月振福建灾

【以福建晋江南安惠安同安莆田仙游诸县并告灾分蠲振】质实【晋江晋晋安县唐析置晋江县明为泉州府治南安三国吴置东安县晋改为南安县明属泉州府莆田隋置县仙游唐置县明并属兴化府今皆因之】

帝不豫召大学士沈一贯具诏除弊政翼日帝瘳寝前诏

【皇太子姻礼甫毕帝忽有疾急召诸大臣至仁德门俄独命一贯入啓祥宫後殿西煖阁皇太后南面立稍北帝稍东具冠服亦南面太子诸王跪于前一贯叩头起居毕帝命之前谕曰朕病笃矣矿税事朕因三殿二宫工未竣权宜采取今可与江南织造江西陶器俱止勿行所遣内监俱令还京法司释久系罪囚建言得罪诸臣咸复其官言已就卧一贯寻叩头出拟旨以进是夕阁臣九卿俱直宿朝房漏三鼓中使捧谕至具如帝语一贯者惟中加南京供应机房并旧制并苏杭织造内有御用及婚礼袍服俱着仍旧已采徵在官金银等件并织完絨疋烧完磁器还着原差内官押解进用如有奸恶截阻及驿递应付迟慢者指名参处数语诸大臣期即奉行翼日帝疾瘳悔之遣中使二十辈至阁追取前谕一贯不能持惶遽缴入时司礼太监王义方在帝前力争曰王言何可反汗帝怒欲手刃之义言愈力而中使已持前谕至後义见一贯唾曰相公稍持之矿税撤矣何怯也自是大臣言官疏请者日相继皆不听】

闰二月复河套诸部贡市

【先是套部市赏既罢者十有余年二十四年乞款进马诏许增其价後因各部侵轶不常

由是款议罢遂复松山筑边城诸部长恐至是济农巴尔章等输诚乞款两镇新旧抚臣皆言款便许之时济农巴尔章等乞款闻延绥巡抚王见宾将去恐後款事不成请益切在宁夏者曰珠苏尔亦请之巡抚杨时宁两镇交奏会孙维城代见宾时宁亦迁去以黄嘉善代之二人并申约束维城议上善後六事一市货务精委官协办并程以殿最一抚赏宣抚必谗识情形如波罗参将马应时口习番语应令兼管一选廉干文武官各一员专验马匹臚壮堪备骑操方听解道验烙一市赏须有定额军民不许私易将官不许贪功经劳官不许扣剋及以滥物搪塞一延镇应改创边墙筑围垣如城匝以深池庶缓急无虞一定市期并赴赏之例其进贡之马务择臚壮不得槩收嘉善议上善後七事一市银请自二十年以後每年照数听镇咨部题发一每岁之中一年无犯方准一次款市一市分冲缓守备通判等官按地分管便于责成一定抚赏之例如生事则议革一定易马之额如验堪骑操方许分给营堡一松山近始收复不可不加计防之如阳顺陰违即当出兵剿伐一每岁汇查将领有无失事报部处分兵部皆议复从之自是款事之议复坚】

河州黄河竭

【陕西河州黄河水乾见底至三月水突涨坏桥并墩房冲去陕西总督李汶巡抚贾待问疏言黄河上流水尽乾竭今岁火星失度日光如赭风霾黄雾种种变异然未有若此河之为变者河渚之行犹元气之周身而货财之流布於天下也今天下财力可谓匱绌问阎贫府库贫独矿税监使及参随土棍之家富耳神河天险源涸流徙此脉竭财匱之象也夫民匱则愁苦愁苦则思乱直须时耳伏望罢矿税撤中使人心既悦天意自回不报】

夏四月振顺天永平饥

【二府所属各州县告灾蠲振有差】

五月四川地震

【地大鸣如雷至六月复有声房屋俱动】

六月福建地震

【戊申兴化泉州二府同日震辛亥福州兴化泉州三府复同日震】

秋七月緬犯腾越

【初云南税监杨荣开采阿瓦猛密诸宝井云岁可得数十万既而所进不得什一又开采丽江土司地势益横番汉居民相率燔税厰杀委官至是緬人以税使贪暴为辞攻陷蛮莫宣抚使思正奔腾越緬贼追及之有司杀思正以谢贼始解】质实【猛密即孟密安抚司明神宗时改为宣抚司时又析孟密地置蛮莫安抚司】

九月大星见

【己未朔夜有大星见东南色血红大如椀忽化为五中一星最明久之会为一星大如簏辛巳夜流星大如鸡卵青白色尾有光又流星大如椀起自参入天苑又有大小星数百四面交错而行礼科给事中张问达以星变请罢矿税不报】质实【张问达字德充泾阳人】

冬十月振南直隶灾

【宿松望江二县重灾惟改折休宁祁门婺源等县以次振恤泗州虹县等十二州县蠲振有差】质实【宿松望江并隋置县明属安庆府祁门唐置县以县东北有峰名祁山其西南有两石对峙如门故名明属徽州府虹县唐置县明属凤阳府今皆因之】

十二月大学士沈一贯奏御史巡差缺员不报

【时天下御史巡行诸差务凡十有三处至是缺其九一贯等奏请遣御史分往受事庶监察有所责成而纲纪可振不报】

【癸卯】三十一年春正月营两宫

【复建乾清坤宁宫辅臣沈一贯等入视工程因亟言巡漕巡仓二差及河南陕西二巡抚缺应补授差遣】发明【神宗时南北卿曹半皆虚设司道郡守比岁缺员庶务之废弛百司之旷职无有甚于此者辅臣往往经年无入对之事虽有书思补袞之忱无由径达独于入视工作之地乃有画接从容赐茶问荅之候此沈一贯等所以乘召亟请也夫巡抚为封疆表率察吏安民一方之责綦重即漕仓巡察凡储备经理之宜亦将赖以考核责成此岂可申请再三而或留中不报补缺虚悬者若必待营建两宫而後得敷陈尽说无论股肱惰而万事堕日滋丛脞即此藉将作之临为纳牖之举顾可以垂诸史策哉】

诏户兵二部核军实

【时内府所供饩多户部困不能支九边军额八十六万有奇将弁率以空名支饷且多尅减边兵屡譁帝急命户工二部鈎考军实卒不能振刷也】

三月吏部奏天下郡守缺员不报

【时天下郡守缺者几十之五是时南北六卿正贰亦多缺不补】

沈一贯请发羣臣章疏不省

【一贯等言各衙门本章例应三日即下皇上初年始有留中之事至于今日有奏而不发

票者有栗上而不发行者在皇上盖出详慎不轻之意且昭操纵不测之权而人心自此怠弛政务从而壅滞且岁月滋久保无乘机壅蔽藉手作奸者乎况始于权宜後遂成例亦何可昭示万世请将各衙门章疏可行者即赐允行不可行者明示改正必期无一疏不报无一事不决疏入不省】

辽东火

【大福堡火焚毁房屋军器无算又火起地中大如车轮高三丈烟高三丈余】质实【大福堡在广宁左屯卫西大兴堡之东北】

夏四月丁亥朔日有食之

【是日当享太庙礼部侍郎郭正域言春秋书灾异莫大于日食故礼诸侯旅见天子入门不终礼者有四日食与焉当祭而日食牲至未杀则废况时惟四月又为正阳变异非细是日辰时食至巳时若救护後午刻祭享曾未踰时两兴大礼精禋不肃宜以朔旦救日诘朝享庙诏改享太庙于初五日】质实【郭正域字美命江夏人】

承天地震

【二十日丙午承天府鍾祥县地震自南方起至西北方屋宇皆震裂有声】

五月京师地震

【二十三日戊寅京师地震是日凤阳大雨雹毁皇陵殿脊】

六月黜楚中尉华越为庶人

【初楚恭王得废疾隆庆五年薨遗腹宫人胡氏孿生子华奎华璧或言华奎乃恭王妃兄王如言妾尤金梅子华璧乃妃族人王如綽奴王玉子内官郭纶取以养之仪宾汪若泉尝讦奏事下抚按王妃持甚坚得寢帝八年华奎嗣爵华璧亦封宣化王宗人华越者素强御忤王及是遣人讦华奎异姓子不当乱宗沈一贯纳华奎重贿属通政使格其疏不上月余华奎劾华越疏至乃上之事下礼部未几华越入都诉通政司邀截实封及华奎行贿状楚宗与名者凡二十九人通政司惧召华越令更易月日以上旨并下部署尚书事郭正域楚人也颇知假王事请勘虚实以定罪案一贯右华奎言亲王不当勘但宜体访正域以事关宗室不经勘问谁敢分割华奎惧奉百金为正域壽且属母竟楚事当酬万金正域严拒之已而抚按行勘皆言无左验而华越妻乃王如言女持伪王说甚坚廷议令覆勘诏公卿集议于西阙门议者三十七人各具一单言人人殊李廷机以礼部左侍郎代正域署部事正域欲尽録诸人议廷机以辞太繁先撮其要以上一贯喉御史康丕扬等劾礼部壅阂羣议不以实闻正域亦发一贯匿疏沮勘及华奎馈遗事中旨以楚王袭封已二十余年何至今始发且夫妻讦证不足凭据

遂坐华越等诬奏降庶人锢之凤阳明年华奎献万金助工经汉阳宗人疑其输贿遮夺之巡抚赵可怀属有司捕治宗人方恨可怀治楚狱不平持兵突入抚署击杀可怀于是逮捕诸宗人置重典者六人禁锢闲住者四十五人】质实【楚恭王名英?显榕次子康丕扬济南陵县人】

山东水

【泰安州大水溺死男妇八百余口屋宇倾圮千余间】

秋七月京师大雨雹

【时祁州安肃并大风雨水雹顷刻水深尺余拔树折禾苗稼尽伤祁州复大水田庐尽没城垣倾坏清苑蝗食禾聚如蚁】质实【祁州唐置州明属保定府清苑北齐乐乡县明为保定府治今并因之】

八月礼部侍郎郭正域罢

【初正域之入馆也沈一贯为教习师後服阙授编修不执弟子礼一贯不能无恨及一贯为首辅沈鲤次之正域与鲤善而心薄一贯楚王之狱正域右华越积忤一贯给事中钱梦皋遂希一贯指劾正域陷害亲藩杨应文又言正域父懋尝笞辱于恭王故正域因事陷之正域疏辨言恭王卒于隆庆时臣父方以举人任知州何由被笞留中不报因乞休去已而华奎亦奏劾正域略如应文言且讪其不法数事请褫正域官诏下部院集议李廷机谓正域已去可无苛求给事中张问达言藩王欲进退大臣不可训乃不罪正域而令巡按御史勘王所讪以闻皆无状】质实【钱梦皋富顺人杨应文无锡人】

冬十一月获妖书

【先是刑部侍郎吕坤尝撰闰范图说太监陈矩购入禁中帝以赐郑贵妃妃重刻之二十六年秋或撰闰范图说跋名曰忧危竑议其文托朱东吉为问答东吉者东朝也其名忧危以吕坤曾有忧危一疏因借其名以讽言坤书首载汉明德马后由宫人进位中宫意以重妃而妃之刊刻实藉此为夺嫡地妃兄国泰以给事中戴士衡尝纠坤全椒知县樊玉衡并纠贵妃疑出自二人手言于帝帝重谪二人事遂寝至是续忧危竑议复出朱赆于寓门外获之其词假郑福成为问答郑福成者谓郑氏子福王当成也大略言帝立东宫出于不得已他日必当更易其用朱赆为内阁者以赆更同音寓更易之意词极诡妄时人谓之妖书帝大怒勅有司大索奸人沈一贯以楚宗事衔郭正域又以沈鲤与已地相逼而正域罢欲因是陷之乃为帝言臣下有欲相倾者为之盖徵引其端以动帝意亡何锦衣卫都督王之祜等四人以妖书有名指其同官周嘉庆为之东厰又捕获妖人皦生光巡城御史康丕扬为生光讼冤言妖书楚事同一根抵请少缓其狱贼兄弟可授首阙下意指正域及其兄国子监丞正位帝怒以为庇反贼除其名一贯力救始免丕扬乃先後捕僧人达观医者沈令鸾等而同知胡化则告妖书

出教官阮明卿手未几厥卫又捕可疑者一人曰毛尚文数日间银铛旁午都城人人自危嘉庆等皆下诏狱嘉庆旋以治无验令革任回籍令誉故尝往来正域家达观亦时时游贵人门尝为正域所撈逐尚文则正域仆也一贯丕扬等欲自数人口引正域而化所讐明卿则钱梦皋壻梦皋大恚上疏显攻正域言妖书刊播不先不後适在楚王疏入之时盖正域乃沈鲤门徒而沈令誉者正域食客胡化又其同乡同年羣妖结为死党乞穷治根本定正域乱楚首恶之罪勒鲤闲住帝令正域还籍听勘急严讯所捕者达观拷死令誉亦几死皆不承法司迫化引正域及归德归德鲤邑名化大呼曰明卿我仇也故讐之正域举进士二十年不通问何由同作妖书我亦不知谁为归德者帝知化枉释之都督陈汝忠掠讯尚文遂发卒围正域舟于杨村尽捕媼婢及佣书者男女十五人与生光杂治终无所得拷生光妻妾及十岁儿以鍼刺指爪必欲引正域皆不应生光仰视梦皋丕扬大骂曰死则死耳奈何教我迎相公指妄引郭侍郎乎久之狱不能具会皇太子在东宫数语近侍曰何为欲杀我好讲官诸人闻之皆惧而陈矩提督东厰屡会法司拷讯心念狱无主名帝必怒甚恐辗转攀累无已遂与法司归狱生尤磔之释诸波及者正域始得归初沈鲤将入阁年七十一矣沈一贯以士心夙附鲤深忌之欲讽鲤辞召命乃貽书李三才曰归德公来必夺吾位将何以备之三才答书言鲤忠实无他肠劝一贯同心一贯由此并憾三才鲤既至即具陈道中所见矿税之害他日复与赆疏论之皆不纳楚假王被讐事起礼部侍郎郭正域请行勘鲤是之及奸人所撰续忧危竝议发一贯辈张皇其事令其党给事中钱梦皋直指为正域鲤所造并罗织鲤奸赃数事帝察其诬不问而一贯辈使逻卒日夜操兵围其居已而事解复谮鲤沮呪鲤尝置小屏阁中列书谨天戒恤民穷开言路发章奏用大僚补庶官起废弃举考选释冤狱撤税使十事而书其上曰天啓圣聪拨乱反治八字每入阁辄焚香拜祝之谗者遂指为沮呪帝深知鲤不之信也】质实【吕坤字叔简宁陵人陈矩安肃人戴士衡字章尹蒲田人樊玉衡字以斋黄冈人皦生光顺天生员性险贼多胁取人财又尝伪作富商包继志诗有郑主乘黄屋之句以胁郑国泰及继志金故锦衣卫疑而捕之】

发明【沈一贯以楚狱銜郭正域又因沈鲤名位逼已遂遽借妖书一事欲罗织二人于极典辅臣身秉国钧而居心狡险若此则是将朝廷纪纲法度悉以行其生杀爱恶之私国事尚可问乎尤可异者御史康丕扬等复曲意阿附执政直谓妖书楚狱同一根柢傳会株牵几成莫须有之大狱以杀人之事媚人乃至颠倒是非变乱黑白虽久之而狱未能具然一时輦轂之下人人自危矣厥後三案继起聚讼纷争流毒无已早于此阶之厉耳】

致仕东阁大学士王家屏卒

【家屏归後八年儲位始定遣官齎敕存问及是卒贈少保謚文端】

【甲辰】三十二年春正月阁臣请补司道郡守及遣巡方御史不报

【沈一贯拟各差御史敕上不省】

乾清宫成

【叙赏工部官】

夏四月辛巳朔日有食之

【时大同阳和等处流星大如斗先白後赤光芒烛地】

阁臣请补科道官缺不报

【沈一贯等上疏催补科道行取考选吴道行等四员熊鸣夏等三员散馆题授王元翰等八员不报】质实【吴道行宜兴人熊鸣夏江西丰城人王元翰云南宁州籍南直隶凤阳人】

开濬洳河成

【洳河界滕峰间南通淮海引漕甚便前总河侍郎翁大立首议开濬已都御史傅希摯复言之朝廷数遣官行勘迄无成画其後尚书舒应龙创凿韩庄以引微山湖之水刘东星又开良城侯庄以试行运时漕舟行洳河者十之三东星卒官役遂止至是总理河道工部右侍郎李化龙与淮扬巡抚李三才循东星旧迹修之由直河入洳口抵夏镇凡二百六十里避黄河吕梁之险会化龙忧去侍郎曹时聘终其事由是洳河遂为漕道永利】质实【洳有东西二河今运河上自山东滕县下至江南邳州统谓之洳河韩庄在峰县微山湖东今有闸良城在邳州北汉置良城县晋改良城唐省侯庄在韩庄东今为侯仙闸直河在邳州东蒙沂诸山之水所匯直河入洳口在邳州西北李化龙疏言河自开归而下合运入海其路有三由兰阳道考城至李吉口过坚城集入六座楼出茶城而向徐邳是名浊河为中路由曹单经丰沛出飞云桥泛昭阳湖入龙塘出秦沟而向徐邳是名银河为北路由藩家口过司家道口至河家堤经符离道睢宁入宿迁出小河口入运是名符离河为南路南路近陵北路近运惟中路既远於陵亦济於运前督臣排羣议以兴兹役竟以资用乏絶不得竣事然自坚城以至镇口河形尚尔宛然故为今之计惟循故迹开洳河其善有六其不必疑有二洳河开而运不借河有水无水听之善一以二百六十里之洳河避三百三十里之黄河善二运不借河则我为政得以熟察机宜而治之善三估费二十万金开二百六十里比朱尚书新河事半功倍善四开河必行召募春荒役兴麦熟人散富民不苦赔穷民得以养善五粮过洪必约春尽实畏河涨运入洳口朝暮无妨善六为陵扞患为民御灾无疑者一徐州城向苦洪水暴至洳河既闲徐民之为鱼者亦少无疑者二疏下户部议至四月庚戌工部尚书姚继可言洳河业有成绩洳成而漕可藉矣至于黄河冲徙鱼鼈丰沛若非因势利导何以振救元元总河议于坚城集以上开渠引河而下流多通复分六座楼苑家楼二路而水势多杀既可以移丰沛之患又不至沿碭山之城行所无事莫善于此自今开洳分黄两工并举并从之曹时聘获鹿人】

五月雷火焚长陵明楼

【帝以陵灾下诏咨实政大学士沈鲤请除矿税属沈一贯朱赓各为一疏俟时上之一日

大雨鲤曰可矣一贯等问故鲤曰帝恶言矿税事疏入多不视今吾辈冒雨素服诣文华奏之上讶而取视亦一机也一贯等从其言帝得疏疑必有急事啓视果为心动户部尚书赵世卿亦上疏力请帝优答之然不为罢】质实【赵世卿字象贤历城人疏言今日实政孰有切于罢矿税者古明王不贵异物今也取悖入之财敛苍生之怨节俭之谓何是为君德计不可不罢者一多取所以招尤慢藏必将海盗鹿台钜桥必致倒戈之祸是为宗社计不可不罢者二古者国家无事则预桑土之谋有事则议金汤之策安有凿四海之山樵三家之市操弓挟矢戕及良民毁室踰垣祸延鸡犬经十数年而不休者是为国体计不可不罢者三貂璫渔猎翼虎炁然毁掘冢墓则枯骨蒙殃奸虐子女而良家饮恨人与为怨讟噪屡闻是为民困计不可不罢者四国家财赋不在民则在官今尽括入奸人之室故督捕租而逋租绌稽关税而关税亏搜库藏而库藏絶课盐筴而盐筴薄徵赎鍰而赎鍰消外府一空司农若扫是为国课计不可不罢者五天子之令信如四时三载前尝曰朕心仁爱自有停止之时今年复一年更待何日天子有戏言王命委草莽是为诏令计不可不罢者六陛下试思服食宫室以至营造征讨上何事不取之民民何事不供之上嗟此赤子曾无负于国乃民方懽呼以供九重之欲而陛下不少遂其欲民方奔走以供九重之劳而陛下不少恤其劳民方竭蹶以赴九重之难而陛下不少恤其难反之于心必有不自安者今天譴频仍变不虚生故欲回天意在恤民心欲恤民心在罢矿税无烦再计而决也】

六月太白昼见

【沈一贯等以灾异叠见疏请罢矿税出繫囚补阙员发臣下章奏帝答以修省实政俟次第举行一贯等又言俟之为言有何底极臣等非不欲俟而天下危乱恐有不能俟者帝不省】

昌平大水坏长泰康昭四陵石梁

【并坏陵垣虫食长陵松柏叶尽】

秋七月大雨水

【京师大霪雨两月不止正阳崇文二门城墙中陷者七十余丈民居多坏发银十万两振被水居民时永平府属诸州县大水溺死男妇无算】

八月羣臣伏文华门疏请修举实政诏切责之

【文武大小九卿科道持公疏齐赴文华门奏请修实政诏切责其渎扰朝仪沈一贯言欲朝仪静肃当收天下之心欲收天下之心当恤天下之言近年天下久罹矿税之苦而又习闻停止之言跂望恩纶以日为岁诸臣千章万牋总出恳诚岂可罪之为激为渎乎】

闰九月陕西地震

【巩昌府礼县地震声如雷一日十余次城垣屋宇皆倾】质实【礼县元礼店明成化中置礼县属巩昌府之秦州今属秦州直隶州】

振畿南诸府饥

【畿南诸府州县水患异常诏以太仆寺振济余银分振寻命于顺天保定等处发通仓米平糶】

冬十月四川天鼓鸣

【四川华阳县天鼓大鸣似雷非雷】质实【华阳本成都县地唐乾元初改华阳县明为成都府治今因之】

【乙巳】三十三年夏五月京师大雨雹

【自四月至是京师再雨雹】

凤阳大风雨毁陵庙

【雨坏孝陵正殿宝座】

雷震郊坛

【雷火击毁南郊望灯高杆杆高十丈余碎上段三丈余为百数十片皆有火痕其下六丈余左右各有爪损痕】

广西地震

【广西陆川县地震声若颓山城垣屋宇多坏压死男女无算】质实【陆川唐置县明属梧州府郁林州今属郁林直隶州】

左都御史温纯罢

【纯清白奉公五主南北考察澄汰悉当妖书事起力为沈鲤郭正域辨诬又楚宗人杀抚臣纯言无反状积忤沈一贯时大计京朝官纯与吏部侍郎杨时乔主之一贯所欲庇者锺兆斗钱梦皋等皆在谪中一贯怒言于帝降旨切责纯察疏亦不下尽留被察科道官纯力求去梦皋等遂连章讦纯楚事诬以纳贿给事中陈嘉训极论梦皋兆斗朋比为奸请听纯归以全大臣之体帝予纯致仕梦皋兆斗亦罢归是时京察章疏一贯请留中主事刘元珍龔时雍御史朱吾弼等力争之谓二百年来计典疏无留者时南京察疏亦留中後迫衆议始下】质实

【杨时乔字宜迁上饶人锤兆斗海盐人陈嘉训鄱阳人刘元珍字伯先无锡人龐时雍汶上人朱吾弼字谐卿高安人】

秋七月泰州天有声如潮

【泰州天鸣有声如潮而怒起自南方转东而下数日不止镇江宜兴等处亦同时鸣而镇江西南山裂开二三尺巡按御史黄汝吉江防御史李云鹄各疏以闻并言南京兵部尚书与镇江道府诸官久关亟请推补不报】质实【宜兴元宜兴州明洪武二年改县属常州府今因之李云鹄内乡人】

九月昭和殿灾

【罚内官等下法司提问治罪有差】质实【昭和殿在西苑孙国敕燕都游览志云南台在太液池之南上有昭和殿北向】

京师地震

【丙申申刻自东北向西南连震二次】

冬十月濬朱旺口

【前年河决丰县单县口亦溃鱼台济宁间平地成湖河臣李化龙上言自洳河既成起直河至夏镇与黄河隔絕山东南直间河不能为运河害独朱旺口以上法单则单沼决曹则曹鱼及丰沛徐邳鱼砀皆命悬一线堤防宜急会化龙忧去曹时聘代至是时聘大濬朱旺口凡役夫五十万六閱月工竣自朱旺达小浮桥延袤百七十里渠广堤厚河归故道焉时河道总督曹时聘言旧河既疏决口已塞势必沛然东下新挑之河其深广仅半上源则放水之後行堤亟宜补筑即曹县之王家口曹家楼仪封之小宋集兰阳之铜瓦厢祥符之张家湾比之伏秋防守更宜加谨其最险要者王家大坝黄坝新堤皆汹溜经行之处令管河各官储料集夫时刻防备勿懈时工部又奏总河大挑之役业已奉旨兴工矣朱旺口二股原系黄河中路北股出浊河者再疏再壅南股出小浮桥者地形卑下可因就下之河形复已湮之故道其问义安之建坝徐州之砌堤正使水不旁溢滔滔东注弗蹈往者黄堨符离之故辙为泗滨忧盖济运护陵未始不两利而兼成耳今如前议疏浚引水东注或於南岸倍加封帮筑勿令侵溃仍将下流分水之说详求至当以底成功并从之】质实【朱旺口在砀山县西】

十一月皇长孙由校生

【选侍王氏所生】质实【皇长孙即熹宗选侍明制太子女侍有淑女选侍才人名号王氏顺天人】

十二月诏罢天下开矿以税务归有司中使仍留不撤【自矿税使设廷臣谏者不下百余悉寝不报自二十五年至是年诸璫所进矿银几三百万两金珠宝玩貂皮名马杂然进奉帝以为能会长至日沈一贯在告沈鲤朱赓谒贺仁德门帝赐食司礼监陈矩侍鲤因极陈矿税害民状且言矿使破坏天下名山大川灵气尽矣恐于圣躬不利矩乃具为帝道之帝悚然遣矩咨鲤所以补救者鲤言急停开凿则灵气自复帝为首肯一贯虑鲤独收其功急草疏上帝不恠复止踰月始下停矿之命以税务归有司岁输所入之半于内府半户工二部然中使不撤吏民尤苦之其害遂终帝世】

发明【自神宗三十年诏罢矿税并撤中使旋不果行至是又复数年其弊日甚一日中间廷臣吁请者踵相继而悉置不报幸沈鲤以危言入奏神宗方惕然悚惧此正转移之一机为阁臣者自宜和衷调济协力同心务使弊政速除庶为有裨乃一贯转虑鲤独收其功草疏触忌遂致停留踰月是惟知以争权弋誉为能全不从国是民瘼起见一贯前既以奉行不速致使反汗德音兹复以嫉善妬贤有乖将顺之义其罪实无可追矣至开矿虽停而中使依然不撤祸本犹在除恶务尽之谓何即沈鲤亦不能辞其咎也】

赦

【以皇长孙生诏赦天下】

【丙午】三十四年春二月大学士沈鲤朱赓请补六部大僚不报

【鲤赓奏言臣昨同文武百官齐赴文华门候驾见二品班内止户部尚书赵世卿一员其余尚书左右侍郎员缺甚多官联废阙一至於此政务丛脞谁为修明理乱所关良非细故乞於前後会推人数内亟赐点用以慰中外之望不省】

三月云南指挥贺世勲等杀税监杨荣

【云南孟密土司有宝井正德以後多以内臣掌之及荣领税使妄奏井多晴綠珍瑰之属可岁数十万帝特赐之专勅而荣所进不得什一会缅甸贼侵蛮莫其执词以奉税使令令杀宣抚思正以开道路正奔腾越缅甸人追之有司不得已杀正以谢贼乃退既而荣又请丽江土知府木增献地听闻采巡按御史宋兴祖言太祖令木氏世守兹土限石门以絕西域守铁桥以断土番奈何自撤藩蔽生远人心不报荣由是怙罢益横番汉居民恨入骨相率燔税厰杀委官荣犹弗悛恣行毒虐杖毙数千人至是以求马不获系指挥使贺瑞凤且言尽捕六卫官于是世勲等率冤民万人焚荣第杀之并杀其党二百余人事闻帝为不食者数日欲逮问守土官阁臣沈鲤揭争且密嘱太监陈矩剖陈帝乃止诛首凶世勲等时高淮徵税辽东时时出塞射猎发黄票龙旗走朝鲜索珠冠貂马数与边将争功山海关内外咸被其毒于是前屯卫军尽甲而譁誓食淮肉未几锦州松山军复变淮所遣承舍吴守政自刳死淮惧内奔阁臣朱赓言未踰月而辽境四乱皆淮所致饥军合叛者衆臣不知其所终矣不报】质实【铁桥在丽江府西北宋兴祖中江人】

发明【辽东为京师屏障尤非滇南可比而高淮竟敢出塞射猎与边将争功甚至擅发旗栗索贿外藩毫无法纪以至悍卒屡变边境骚然此较前时中官监税之剥民为害者情罪更不相侔乃高淮因军变辄以京师为逋逃藪而神宗亦竟听其内奔而不问迨朱赉进言仍付不报既不正淮误国之罪亦不究辽军合叛之由罪璫乱兵皆法所不宥而俱得脱然无事是朝廷直不以疆事为念矣又岂特纵一宦寺已哉】

真定顺德广平大名灾蠲振有差

【从直隶巡按御史钱桓请也】质实【钱桓太仓州人】

贵州巡抚郭子章讨诸苗平之

【先是贵州东西二路苗名曰仲家苗介於铜仁者曰山苗红苗之羽翼也窥黔自平播後财力殫弱有轻汉心经年剽劫无虚日子章请命于朝命总兵陈璘参政洪澄源率汉兵五千益以土兵五千监军布政使赵健率宣抚安疆臣领番兵万人使游击刘岳等督之两路并进九十余日而克之两路既平乃专责总兵陈璘率汉土兵五千进攻东路苗不一月克其六箐诸苗尽平】质实【铜仁元属思州军民安抚司明永乐中置铜仁府今因之洪澄源晋江人赵健泾县人】

夏六月几内蝗

【自春正月至夏不雨及是顺天文安永清三河宝坻诸县大蝗】

秋七月沈一贯沈鲤罢

【给事中陈嘉训御史孙居相交章诋一贯奸贪一贯愤求去帝为黜嘉训夺居相俸而允一贯归一贯数与沈鲤忤惧去後鲤为己忧因密倾之帝亦嫌鲤方鰲会鲤同时乞休并遂命致仕而一贯独得温旨焉鲤遇事秉正不挠压於一贯志不尽行而是时一贯数被论引疾杜门鲤乃得行阁事皇孙生诏赦天】

【下中官请徵茶蜡夙逋鲤以戾诏旨再执奏竟报寝帝乳母翊圣夫人金氏其夫官都督同知歿请以从子继鲤言都督非世官乃已真人张国祥谓皇孙诞生已有祝厘功乞三代诰命且世袭詹事主簿鲤力斥其谬乃赉以金币帝惑中官言将察核畿辅牧地论鲤撰勅鲤言近年以来百利之源尽笼於朝廷常恐势极生变况此牧地岂真有豪右隐占新垦未科者奸民所传未足深信遂止云南武弁杀税使杨荣帝怒甚将遣官逮治鲤具陈荣罪状请诛为首杀荣者而贷其余乃不果逮陕西税使梁永求领镇守事亦以鲤言罢辽东税使高淮假进贡名率所统练甲至国门鲤中夜密奏其不可诏责淮而止时一贯虽称疾杜门而章奏多即家拟旨鲤力言非故事是以一贯密倾之鲤既归至家疏谢犹极陈怠政之弊以明作进规年八十遣官存问赉银币鲤奏谢复陈时政要务又五年卒年八十五赠太师谥文端一贯辅政十

有三年当国者四年枝拄清议好同恶异与前後诸臣同治楚宗妖书京察三事独犯不韪之名论者丑之虽其党不能解免也一贯归言者追劾之不已其乡人亦多受世诋諆云】质实【孙居相字伯辅沁水人】

冬十二月弃六堡

【初六堡既筑生聚日繁至六万四千余户至是李成梁以地孤悬难守与总督蹇达巡抚赵楫建议弃之尽徙其居民於内地居民悬恋家室其有不从者则以大军迫之死者狼籍给事中宋一韩力言弃地非策御史熊廷弼亦以为言帝卒用成梁议自是辽左藩篱尽撤】质实【蹇达重庆人宋一韩陈州卫人熊廷弼字飞百江夏人】

【丁未】三十五年春正月给事中翁宪祥言抚按官不宜听其自去不报

【是时官方多滞抚按官候代或十余年不归部郎俸深多借差以出会有江西巡抚许宏纲之事宏纲以父艰告归荐陆长庚王佐自代不复候命解组而去於是吏科右给事中翁宪祥言抚按官解任宜候命不宜听其自去不省故事正郎不奉使抚按必俟代至是多反之时大僚多缺侍郎扬时乔杨道宾旬日间相继物故吏礼二部长贰遂无一人兵部止一尚书养痾不出户刑工三部暨都察院通政大理皆无见官宪祥言九卿俱旷大伤国体因陈补阙官起遗佚数事报闻】质实【翁宪祥字北隆常熟人】

夏四月伊勒登岱青犯凉州官军击破之

【时松山既复寇复据贺兰山结青海诸部寇钞不已伊勒登岱青尤桀骜三十三年连营入犯总兵官达云与副将柴国柱击之寇大败去未几青海寇复大入将士分道遮击生擒其将萨赖余败走至是伊勒登岱青复连兵犯凉州云与国柱及副总兵官秉忠搦战大破之寇屡被挫悉去】质实【柴国柱字寧卫人秉忠榆林卫人伊勒登岱青旧作银定歹成萨赖旧作沙赖今并改】

五月以于慎行李廷机叶向高俱为礼部尚书兼东阁大学士预机务

【时内阁惟朱赓在帝命增置阁臣廷推慎行廷机向高三人遂用之并召还王锡爵三辞不允时言官方厉锋气锡爵进密揭力诋中有上於章奏一概留中特鄙夷之如禽鸟之音等语言官闻之大愤交章论劾锡爵阖门养重竟辞不赴】质实【叶向高字进卿福清人】

六月湖广及徽宁太平严州大水

【湖广黄州府蕲州黄冈黄梅罗田等处大水漂没庐舍武昌承天鄖阳岳州常德等府先各亢旱入夏大雨至是民舍漂没几数千家南直徽寧太平等府山水大涌繁昌黟歙南陵等县溺死男妇无算浙江严州山水大涌建德桐庐淳安遂安分水五县漂没者数千户】质实

【黄冈唐置县明为黄州府治黄梅隋置县明属黄州府繁昌汉春谷县地东晋侨置繁昌县繁昌本汉颍州郡属县也隋并县入东涂南唐始复置繁昌县明属太平府黟县秦置县明属徽州府南陵梁置县明属寧国府建德汉富春县地三国时吴折置建德县明为严州府治桐庐汉为桐溪乡吴黄武中置桐庐县遂安晋置县分水唐置县明并属严州府今皆因之】

秋七月京师久雨

【沟洫皆壅阨昼夜如倾坏庐舍溺人民东华门内城垣及德胜门城垣皆圯礼科右给事中汪若霖疏言雨者陰气水者陰象陰盛则雨灾见其应在禁闱及臣下有邪谋今东宫五年不学诸臣悠悠莫以为意大臣比周私相植党诗云不令不寧百川沸腾其咎乃在皇甫卿士今日之事诚足寒心未可仅以齐祷为文而已户科给事中江灝亦陈郊庙朝御日讲及听言求人理财六事以为消弭之方皆不报】质实【汪若霖字时甫光州人江灝漳浦人】

八月振畿内饥

【先是命太仆寺发银十万两振救压伤穷民至是复命五城御史查勘灾荒先京城次及直隶各府划量重轻一体振恤并令各省各抚按官搜括库藏及预备义社等仓振济饥民】

彗星见

【自是月辛酉朔见于井度色苍白尾指西南约长二尺渐往西北至丁丑历于房兵科给事中宋一韩上言春秋二百四十二年彗见者一终纲目之世彗见十七今彗星复见东井其咎安在臣谨按星野东丹秦分彗尾指西南渐往西北又指秦地秦其急乎今套虏久留青海徬有陰谋必且波及内地又土官鲁光祖势重气骄锄之不动其心愈肆兵争之端必起于此且彗者扫除之象刑人之职也小人用之以扫除为职君子用之以除旧布新今李凤鲸噬於粤东潘相蝮螫於江右其他诸处内使其为扫除之役等耳宜因此变悉撤之因而一新旧令勤政讲学亲贤远奸复三朝之制补九列之班平积薪之叹沛赐环之诏作台諫之气决章疏之壅慎节钺之选惩僨帅之风出禁藏之储杜罔寺之借释诏狱之冤纾都民之困不报】

冬十月山东旱饥蠲振有差

【山东各属以旱灾告其被灾最重者禹城濮州临邑陵等二十六州县次重者南河平原邹平德平等二十三州县又次者沂州宁阳长清德州肥城等十二州县俱酌量振济】质实【禹城唐置县明属济南府今因之商河宋置县明属武定州今属武定府邹平後汉置县明属济南府长清隋置县明属济南府今皆因之肥城古肥子国汉置县明属济南府今属泰安州】

十一月于慎行卒

【初慎行由詹事迁礼部尚书明习典制诸大礼多所裁定先是嘉靖中孝烈后升祔祧仁宗及帝初元穆宗升祔复祧宣宗慎谓非礼作太庙祧迁考言古七庙之制三昭三穆与太祖之庙而七刘歆王肃并以高曾祖祢及六世五世为三昭三穆其兄弟相传则同堂异室不可为一世国朝成祖既为世室与太祖俱百世不迁则仁宗以下必实历六世而後三昭三穆始备孝宗与睿宗兄弟武宗与世宗兄弟昭穆同不当各为一世世宗升祔距仁宗止六世不当祧仁宗穆宗升祔当祧仁宗不当祧宣宗引晋唐宋故事为据其言辨而核事虽不行识者服其知礼又言南昌壽春等十六王世次既远宜别祭陵圉不宜祔享太庙亦寝不行十八年正月疏请早建东宫出阁讲读及冬又请帝怒再严旨诘责慎行不为慑明日复言册立臣部职掌臣等不言罪有所归幸速决大计放归田里帝亦不悦责以要君疑上淆乱国本及僚属皆夺俸山东乡试预传典试者名已而果然言官遂劾礼官皆停俸慎行引罪乞休章累上乃许之家居十余年中外屡荐率报寝三十三年始起掌詹事府疏辞复留不下居二年廷推阁臣七人首慎行诏加太子少保兼东阁大学士入参机务再辞不允乃就道时慎行已得疾及廷谢拜起不如仪上疏请罪归卧於家遂草遗疏请帝亲大臣録遗逸补言官数日卒慎行学有原委贯穿百家神宗时词馆中以慎行及冯琦文学为一时冠】质实【冯琦字用韞临朐人】

十二月蛮陷武定

【武定自洪武十四年以女土官商胜首先归附诏设土知府即以胜署府事至正德初武定阿英以贿通刘瑾得袭土知府改姓凤氏嘉靖中土舍凤朝文与寻向土舍安全合兵为乱官军讨诛之未几凤继祖复叛继祖本他姓子冒姓凤氏宗谋嗣职遂发兵围府刦掠州县屡败官军会镇抚官督诸道兵并进继祖走东川妇家贼帅者色斩之以献朝廷以武定屡叛乃改设流官投凤历子思尧为经历历以思尧不得知府怨望复谋作乱诛死凤氏土职尽絶至是凤继祖之孙阿克徙居金沙江有马头四十八人而郑举称首栗忤多力富于财知府陈典收禁之举以兼金置鱼腹中馈典获免已复收之如是者再四举恶其无厌乃诱阿克作乱陰结会川诸蛮攻陷武定大肆刦掠连破元谋罗次诸城索府印会知府携印会城不能得乃刦推官直抵会城请冠带印信镇抚以徵兵未集遣人以府印授之贼退入武定立阿克为知府】质实【元谋元县今属武定府罗次元州後改县今属云南府】

【戊申】三十六年春正月河南江北饥

【户部言山东河南及南直之淮安凤阳徐州扬州诸属水旱为灾请发帑振济不报】

二月京师地震

【昌平州亦震】

饬边备

【是时蒙古喀尔喀诸部悉归我大清蓟辽总督蹇达疏请为备廷臣亦请亟罢矿税以安人心不省寻命守臣饬边备】

夏六月南畿大水

【南京科道等官揭报霖雨连绵江潮泛涨自留京至苏松常镇诸郡皆被淹没盖二百年来未有之灾乞速行振济礼科都给事中胡忻言部院藩臬诸官悬缺不补人民愁怨召沴宜筹所以修省之实不报】质实【胡忻陕西秦州人】

李成梁罢

【成梁始镇辽东锐意封拜师出必捷威镇中外已而位望益隆子弟尽列崇阶仆隶无不荣显贵极而骄奢侈无度军费马价盐课市赏岁乾没不费全辽商民之利尽笼入已以是灌输权门结纳朝士中外要人无不饱其重赇为之左右其战功率在塞外易为缘饰若敌入内地则以坚壁清野为辞拥兵观望甚或掩败为功杀良民冒级阁部共为蒙蔽以故物议沸腾後中时行许国王锡爵相继谢政成梁失内主遂以去位其所藉健儿李平胡孙守廉辈皆富贵拥专城又转相掊克士马为之消耗及成梁再镇辽又议弃六堡为言者论劾帝素眷成梁不之罪及是罢久之卒】

秋七月京师地震

【丁酉京师震甲寅北直隶各府州县同时俱震】

八月振南畿及嘉兴湖州饥

【十二月再振南畿免税粮】

九月武定贼平

【凤阿克既自立为知府益结贼徒四出焚掠巡抚陈用宾总兵沐勲俱以失事下狱论死时寻向土目扬礼亦结火头色者及土妇海冲为乱攻破嵩明吏目韦宗孝学正龙旌死之官吏多为贼杀御史周想相急调沾益等处土兵击之屡战皆捷及是镇抚官分五路兵进剿郑举等方西破禄丰知县苏梦赐力战死闻诸路兵已大集举与阿克遂奔东川官军追及之土司禄哲缚阿克郑举以献而参政杨俊臣亦击败海冲副使罗希益复击斩杨礼于是武定及元谋罗次嵩明禄丰等州县皆复械阿克等至京师磔于市乃悉置流官】质实【禄丰元县明属云南府之安宁州今属云南府】

冬十一月朱赓卒

【賡醇谨无大过与沈一贯同乡相比时给事中陈治则姚文蔚等以故蒙诟病当一贯鲤去位时賡年七十有二独当国政时朝廷日弛中外解体賡疏揭月数十上十不获一下賡因力请帝更新庶政於增阁臣补大僚充言路三事语尤切帝优诏答之而不行賡乃素服诣文华门恳请终不得命賡以老屡乞引疾阁中空无人乃用于慎行李廷机叶向高而召王锡爵于家以为首辅给事中王元翰胡忻以廷机之用賡实主之疏诋廷机并侵賡賡疏辞帝为切责言者既而言路攻讦四起先後疏论者至五十余人是时賡已寝疾乞休疏二十余上言者虑其复起攻不已至是卒于官】质实【陈治则余姚人姚文蔚钱塘人】

十二月朶顏寇蓟州京师戒严

【朶顏察罕之子賚琿岱狡黠为边患与其从父莽吉勒潜入蓟镇大掠河流口参将马栋等不能御时援师所过居民望见火光惊为敌至逃入京师者日数万九门尽闭兵部尚书李化龙请以三十万金补蓟镇缺饷并修守备之具而度支告匱户部请暂借内库矿税银限以岁月补还帝难之命发太仆寺马价十万户部银十万畀之军情稍定敌以有备引去賚琿岱旧作赖晕歹莽吉勒旧作莽金今并改】发明【朶顏入寇居民见援师而惊为敌至逃奔京师此时正宜抚辑晓谕以安衆心何至仓皇失措九门尽闭一若强敌之临城下者则是时上下皆无定见而时事之失可知矣至度支告匱实由理财乏术而费用不经所致咎何足责乃户部请借内库矿税银而神宗犹复难之国家储蓄本为军国预筹乃以矿税所入守为私财虽兵饷守备之急尚不肯支发应用则向来中使四出岂专为内府厚藏计乎且太仆马价寧独非天子之财而于彼于此自生岐视真有莫能为解者耳】

【己酉】三十七年春正月永昌地震

【自元日至十日地震声如雷】

三月贡图陷大胜堡

【先是朶顏结鸿台吉谋犯喜峯口总兵官杜松受总督王象乾指潜捣欢台吉帐以牵蓟寇乃从宁远中左所夜驰贡图营掩杀百余人以大捷闻兵备副使马拯谓彼无故被剿必复仇事且叵测至是果以五千人攻大胜堡执守将耿尚文支解之杀掠几尽复深入小凌河二十二里官军御之大败时杜松驻大凌河不敢救辽人多咎松部议亦以衅由杜松令戴罪自効松恚甚言抚按诸臣附会马拯害其奇功令自提兵出塞将捣巢以雪前耻而所得止五级士马多陷没松益恚尽焚铠仗置兵事不问乃勒还籍】质实【大胜堡在锦州府锦县北大凌河在锦县东源出喀拉沁威苏图山下流至鮎鱼塘入海杜松字来清崑山人王象乾字子廓济南新城人鸿台吉旧作黄台吉贡图旧作拱兔今并改】

叶向高请发言官章疏不报

【时言路互相诋讦帝心厌之章悉留中御史郑继芳力攻给事中王元翰贪婪不法元翰

亦疏诋继芳左右二人者复相角不已向高请尽下诸疏勅部院大臣评曲直罪其论议颠倒者一二人以警其余不报诸臣既无所见曲直益树党相攻继芳劾元翰奸赃数十万即潜遣人围守元翰家元翰愤甚乃尽出筐篋畀置国门纵吏士简括恸哭辞朝而去吏部坐元翰擅离职守谪其官】质实【郑继芳盐山人】

夏五月福建大水

【建宁等府大水丁口失者殆十万】

六月甘肃地震

【军民压死者八百四十余人边墩摇坏者八百七十里东关地裂南山一带颓坏河流絶数日】

秋八月山西等省告灾

【山西宣府饥江西福建大水江南徐州以北及山东济南青州诸府蝗湖广四川河南陕西旱贵州大烈风白气亘天岁歉】

九月左都御史詹沂封印自去

【先是沂诣告已数年大学士叶向高以为言不报至是沂拜疏出城候旨向高等言目前最急者无如都察院刑部两官都察院有考察之事刑部有审录之事且以审录往例准之近已逾期矣不省】

冬十二月留畿内山东诸省税银三之一振饥民【时各省皆报灾伤重大至是诏户部借马价二十五万并工部税银十五万解给各镇支用其北直山东河南山西陕西福建四川常年徵在官听解内帑税银准留以二分解部充军饷一分振饥民】

【庚戌】三十八年春二月天鼓鸣

【山西阳曲县天鼓鸣又有流星大如斗坠落西北碎星不絶】

闰三月旱

【礼部以京师旱灾言今日旱灾皆政务废弛所召盖天下人情莫郁于此时郁气浮发必结为灾如储宫天下本也不令与诸臣相接讲明经术练习世务而久置之深宫使耳目聪明俱塞天下之人心郁乎不郁乎大僚为国家撑持裨干阙其大半按差为朝廷察吏安民久请不下甚至刑部衙门悬印半载讞决无人控吁无路咎气满狱天下之人心郁乎不郁乎内帑

山积而閭阎半菽不充父卖子夫鬻妻惨不忍闻而坐视其死亡天下之人心郁乎不郁乎逮系之臣如满朝荐卞孔时皆一时循吏为君上爱养百姓者以权璫罗織而使之累年淹禁见天无日天下之人心郁乎不郁乎废弃诸贤久锢銓曹日补牒以请而点用百不得一登进无期正气塞结天下之人心郁乎不郁乎四海同一郁积以故结成旱魃诚慨发德音将以上诸政一旦举行则甘霖徧宇内矣疏入不报】质实【逮系满朝荐卞孔时朝荐知咸宁县有廉能声税监梁永纵其下劫诸生橐朝荐捕治之永怒劾具擅刑税役诏镌一官会巡抚顾其志极论永贪残状乃复朝荐官无何永遣人蛊巡按御火余懋衡事觉朝荐捕获其人永惧率衆擐甲入县庭吏卒早为备无所掠而去城中数夜惊言永反或谓永宜自明永遂下教自白不反状然蓄甲者数百而朝荐助懋衡操之急诸恶党多亡去朝荐追之渭南颇有所格伤永惧使使繫书髮中入都讼朝荐劫上供物杀数人投屍河中帝大怒立遣逮治下诏狱掠掠遂长系中外论救百十疏不听孔时为武昌同知税监陈奉诬劾被逮长系廷臣救者数十疏皆不省至四十一年秋以叶向高言二人乃得释】

夏四月正阳门灾

【丁丑夜正阳门箭楼火至次日辰刻未熄给事中周曰庠上言正阳门楼与正殿门楼相对面午义取当阳正南面以临天下者也自万历二十年来深宫大内大小臣工莫能接见朝夕左右不过宦寺之流一念精明强为之心日斂月消而人材邪正政事得失皆置之膜外昔年宫殿灾业已示谴迄今十余年玩愒如初所谓恭已正南面者杳无时日则何取于正阳之名为哉天故火之庶几顾名思义耳愿稍加振刷勤庶政信百官亲百姓则天下事尚可为也疏入不报】质实【周曰庠临川人】

振畿内山东山西河南陕西福建四川饥

【各省告灾诏发银十万两振济仍发米三十万石给振畿辅灾民复留三十八年春夏税银给振四川福建】

冬十一月壬寅朔日有食之

【礼部右侍郎翁正春言前两岁食四月朔纯阳之月也今食十一月朔阳生之月也仲冬之月于律为黄钟于卦为复乃羣陰已极一阳初生之候而有此亏蚀其灾异尤甚君德象日宜照临宣布不宜闇汶闭藏自万历二十年後财货日斂聚人才日剥落一切请补大僚考选起废率皆不报六卿九列之地三五严星閭阖徒号天听愈杳天下不见阳和舒育之气如在穷陰沍寒之中是以上天谴告如此然日之食典更只在一时而皇上之寢与行只在一念诚翻然转移立见改辙将日中之治可保无疆矣疏入不省】质实【翁正春字兆震候官人】

【辛亥】三十九年春二月巡抚凤阳都御史李三才罢【三才在淮久以凌折税监得民心山东税监陈增兼领徐州数窘辱长吏独三才以气凌之裁抑其爪牙肆恶者常密令死囚引为党辄捕杀之增为夺气歎人程守训以贄官中书为增参随纵横自恣三才劾治之得贓

数十万增惧为己累亦收获守训违禁珍宝闻于朝论死远近大快屡加至户部尚书然颇通赂遗结纳遍海内辅臣缺建议者请参用外僚意在三才由是忌者日衆工部郎中邵辅忠劾其贪伪险横御史徐兆魁乔应甲给事中王绍徽等十余人继之胡怡曹于汴等交章论救朝端聚讼数月未已顾宪成方讲学东林三才与宪成深相结尝请增大僚选科道録遗佚因言诸臣只以议论意见一触当途遂永弃不收要之于陛下无忤今乃假天子威以锢诸臣复假忤主之名以文已过负国负君罪莫大于此意为宪成发也于是宪成贻书叶向高孙丕扬盛称三才廉直御史吴亮索善三才以宪成书附传邸报中由是议者益譁三才力请罢去疏至十五上不得命遂自引归帝亦不罪也三才才大而好用机权善笼络朝士其用财如流水尝宴顾宪成止蔬三四色厥明盛陈百味宪成讶而问之三才曰昨偶乏即寥寥今偶有故罗列宪成以此不疑其绮靡故盛誉之三才既家居忌者虑其复用御史刘光复劾其盗皇木营建私第至二十二万又侵夺官廩为园囿且言三才与于玉立遥执相权意所欲用铨部辄为推举三才疏辨请遣中官按问给事中刘文炳御史李徵仪等亦相继论劾三才愤甚请诸臣会勘乃诏徵仪偕给事中吴亮嗣往未几光复坐事下狱三才请释之而复力为东林辨白言东林者顾宪成讲学之所从之游者如高攀龙姜士昌钱一本刘元珍安希范岳元声薛敷教等并束身厉名行何负国家哉偶曰东林便成陷阱如邹元标赵南星等被以此名即力阻其进所朝上而夕下者惟史继偕诸人耳人才邪正实国祚攸关疏入衆益恨之亮嗣等既往勘久之无所得第如光复言还报遂落三才职为民方三才之罢攻之者邵辅忠徐兆魁乔应甲等後皆附魏忠贤名丽逆案而推轂三才若顾宪成邹元标赵南星辈皆表表为时名臣故世以三才为贤】质实【邵辅忠定海人乔应甲猗氏人王绍徽咸宁人曹于汴字自梁安邑人吴亮武进人中行子刘光复青阳人于玉立字中甫金坛人刘文炳宁晋人李徵仪广德州人吴亮嗣广济人姜士昌字仲文丹阳人安希范字小范无锡人史继偕晋江人】

三月大计京官祭酒汤宾尹等降黜有差

【时廷臣党势日甚宾尹与谕德顾天竣各牧召朋徒干预时政谓之宣崑党以宾尹宣城人天竣崑山人也自帝倦勤内外章奏悉留中不发惟言路一攻则其人自去以故台谏之势积重不返有齐楚浙三党齐则忝诗教周永春韩浚张延登为之魁而燕人赵兴邦辈附之楚则官应震吴亮嗣田生金为之魁而蜀人田一甲徐绍吉辈附之浙则姚宗文刘廷元为之魁而商周祚毛一鹭过庭训等附之与宾尹天竣声势相倚并以攻东林排异己为事创大东小东之说目东宫为大东东林为小东一人稍异议辄羣起逐之大僚非其党不得安于其位天下号为当关虎豹是年当大计京官恶东林者设词以惑吏部尚书孙丕扬令发单咨是非将陰为钩党计侍郎王图急言于丕扬止之羣小大恨图先典庚戌会试宾尹以庶子为分校官举人韩敬尝受业宾尹及会试敬卷为他考官所弃宾尹越房搜得之与各房互换闈卷凡十八人强图录敬为第一知贡举侍郎吴道南欲劾之未果至是宾尹己为祭酒而图方掌翰林院祭酒京察例由掌院注考宾尹恐被察属图乡人王绍徽为之请图竣拒之又御史金明时官居不职虑见斥会有为浙江巡按郑继芳伪书抵绍徽者书有云欲去福清先去富平欲去富平先去耀州兄弟又言秦脉斩断吾辈可以得志福清谓叶向高耀州兄弟谓图与其兄国富平即丕扬也国时巡抚保定图为侍郎与丕扬俱秦人故曰秦脉盖小人设为挑激语以害继芳辈而其言乃达之丕扬丕扬不为意明时廉得之疑书出选授御史徐缙芳等乃先上疏

力攻图并诋缙芳因及伪书事图与缙芳皆疏辨朝端闐然及注考丕扬与侍郎萧云举副都御史许宏纲领其事考功郎王宗贤都给事中曹于汴御史汤北京乔允升佐之北京谓明时倡言要挟逃察丕扬特疏劾之旨下议罪而明时辨疏复犯帝讳字帝怒视其职其党大譁谓明时未尝要挑北京只以劾图一疏为图报复于是主事秦聚奎力攻丕扬等结党欺君丕扬因发聚奎前为知县时贪虐状劾罢之而宾尹天峻御史刘国缙及前给事中鍾兆斗陈治则宋一韩姚文蔚御史康丕扬徐大化主事鍾振先张嘉言等咸被察又以年例出绍徽及其同官乔应甲于外时察疏未入党人咸谓丕扬果以伪书故斥绍徽国缙且二人尝攻李三才王元翰故为修隙议论汹汹礼部主事丁元荐甫入朝即抗章尽发宣崑构谋状于是党人姚宗文等争击元荐为金明时讼冤赖叶向高调护至五月察疏乃下由是诸失意者相继攻丕扬及图至秋图遂引去明年二月丕扬亦拜疏归初嘉隆以前士大夫廉耻自重以挂察典为终身之玷及帝之世阁臣有所徇庇间留一二以挠部权而羣臣水火之争莫甚于是年及丁巳党局既成互相报复至国亡乃已】质实【元诗教莱芜人周永春金乡人韩浚淄川人张延登邹平人赵兴邦高邑人官应震黄冈人田生金麻城人田一甲忠州人徐绍吉保宁卫人姚宗文慈谿人刘廷元平湖人商周祚会稽人毛一鹭遂安人过庭训平湖人王图字则之耀州人韩敬字求仲归安人吴道南字会甫崇仁人金明时德清人徐缙芳晋江人萧云举广西宣化人许宏纲东阳人王宗贤清源人汤北京字伯闕宜兴人秦聚奎汉阳人郑振先武进人张嘉言湘潭人丁元荐字长孺长兴人】

天鼓鸣

【又流星见大如椀赤色照地】

夏四月京师旱

六月大水

【先是五月广东广西大水至是南北两畿及湖广皆大水诸大吏请罢榷税以苏民命不省】

秋八月河南巡按曾用升以灾请蠲振不报

【河南海饥开封归德汝宁等府自春夏霪雨连旬平地水深丈尺飞蝗蔽野用升奏言中州钱粮自三十年迄今逋负三十九万有奇请罢免之并请留秋冬税银以振灾重州县不报】

冬十月户部尚书赵世卿上疏去位

【世卿饶心计在户部酌剂嬴缩军国赖焉福王成婚及公主下嫁凡额外宣索世卿俱力争楚王与宗人相讐世卿尝官楚府长史言王非伪与沈一贯合遂为廷臣所恶论劾相继世

卿上疏乞罢出城候命踰年不报乃乘柴车去】

发明【楚宗事至是几十年矣而廷臣犹以世卿右王之故相继论劾借端攻击报复相寻朝事已不可问至世卿乞罢或听或留不过一言而决乃迟之踰年竟付不报而世卿亦遂不待朝命怫然而去卒亦不闻以擅去为罪前此左都御史詹忻封印自去未几吏部尚书孙丕扬亦拜疏自去而阁臣李廷机亦以上疏不得命竟归一时大臣之去留朝廷若罔闻知者医书以手足痿痹为不仁大臣国之股肱而一至于于是其为痿痺不已甚哉】

【壬子】四十年春正月天鼓鸣

【时宣府怀来延庆皆地震又有星如盏起左摄提光烛地】

三月振京师流民

【顺天府以饥民流移皆集京师请给米煮粥振济从之】

夏五月甲午朔日有食之

【是月太白昼见又云南大理等府连次地大震】

秋八月以刑部尚书赵焕兼吏部尚书

【时帝怠荒益甚二十余年未尝一接见大臣曹署多空内阁止叶向高杜门已久六卿惟焕一人又兼署兵部至是改置吏部兵部尚书李化龙卒召王象乾未至亦不除侍郎户礼工三部止各一人都察院自温纯罢去八年无正官六科止数人十三道皆以一人领数职在外巡按十余年不得代督抚监司亦屡阙不补郡守缺什之五六文武大选急选官及四方教职积数千人以吏兵二科缺掌印不给牒久滞都下时攀执政与哀诉焕果疏乞除补始除侍郎数人既而考察命下补科道六十余人时称盛事云 焕素有清望于朝臣无所左右雅不善东林诸人及附东林者咸起攻之至明年秋罢归】质实【赵焕字文光掖县人】

河决徐州

【特黄河水决冲徐州缕堤长二百八十丈并遥堤诸口正河悉为平陆邳睢河水陡耗总河都御史刘士忠挑引河水复故道至明年塞之】

九月李廷机罢

【廷机性廉洁然颇刻深不谙大体其在礼部楚宗人华越以奏讦楚王既拟夺爵锢高墙廷机援祖训谋害亲王例议置之死言路势张政府暨铨曹畏之不敢出诸外年例几废主事

聂云翰论之廷机希言路意中云翰察典初入阁廷臣争论之廷机累疏乞休杜门不出待命踰年乃屏居荒庙人迹都絶言者犹政之不已至是疏已百二十余上不得命竟归廷机系阁籍六年秉政止九月无大过言路以其与申时行沈一贯密相比故交章逐之辅臣以齷齪受辱屏弃积年而後去前此未有也】

御定资治通监纲目三编卷二十九

卷三十

<史部,编年类,御定资治通监纲目三编>

钦定四库全书

御定资治通监纲目三编卷三十

【起癸丑明神宗万历四十一年尽丁巳明神宗万历四十五年】凡五年

【癸丑】四十一年春正月谕朝鲜练兵防倭

【前朝鲜奏言倭使频来要挟和款兵端渐露乞选将率兵督同本国训练修防帝以前留将士教习成法其在毋庸再遣命其使齎勅戒励及是海上有倭警巡按张五兴议用南兵教朝鲜水兵北兵教朝鲜陆兵兵部尚书王象乾谓出水陆兵寄食彼中馈饷不继惟以中国之事责中国以属国之事责朝鲜所以为属国谋者如是止耳因中谕朝鲜招募训练防倭简除戎器整備兵船务求实用以壮声援是年秋流言倭围釜山朝鲜畏服总兵官杨宗业以闻国王李瑋具疏辨诏慰解之】质实【李瑋旧为朝鲜光海君其国王昞于神宗三十六年卒瑋自称署国事遣陪臣来讞且请諡帝令其国臣民公议以闻十月封瑋为国王三十七年三月諡昞曰昭敬遣官赐瑋及妃柳氏诰命张五典沁水人】

天鼓鸣

【是月庚子真定天鼓鸣流星昼陨有光】

三月加淮扬田赋

【江上驻兵防倭需饷急以凤阳巡抚陈荐言加派银十四万六千两有奇俟地方无事从实题裁时巡按直隶御史顏思忠言淮扬东隣日本如廖角嘴为倭奴首犯登岸之地犯嘴之南则通海等州受敌犯嘴之北则庙湾等处直捣诚苏松之肩背淮扬之门户国初于此嘴设廖角大河二塞拨官兵统领驻防後移驻吕場大河营尚有官军廖角塞则全虚矣今当于淮安大营调兵六百名分守廖角嘴等营仍委千百户三员统领以复国初之旧从之是时倭寇连延闽浙出没无常福建巡抚丁继嗣疏陈防海七事一择用水将必曾历海上或长海滨人地相宜者就近迁转以专责成一督造战舰冬春两汛前各轮流备造应用一调守要区松山为自浙入福门户宜挑选精兵汛守此山贼必不能飞渡一移防险塞三江口系闽中要地而刘澳去三江不远一扼此要则三江之扞卫益严兴化之门庭永固一改设客兵海澄界在漳泉往来通番之地往往有岛夷巨寇窃发旧设团练皆系上着而豪右因有挂名糜饷者宜改土易流浙饷故厚宜以浙之饷例给之宁减兵勿增饷饷不议加而兵有实用一因造器药物料须精宜专委都司一员逐项简察府道不时亲勘一建复土堡泉州安溪等处居民自筑土

堡无事可以储蓄有警可以扞蔽宜谕令多置彼此相援真闽海久长计也从之】质实【廖角嘴在扬州府北淮安府南嘴形突入海中三江口在莆田县东与崎头镇湾港相接刘澳在莆田县东南海澄嘉靖四十四年割龙溪及漳浦县也置县属漳州府今因之安溪宋县元明及今因之】

夏五月 减廷臣母植党妄言

【三十九年以京察故吏部尚书孙丕扬侍郎王国先後引去四十年阁臣李廷机被言路攻诘归近左都御史孙瑋亦以勘熊廷弼事引疾求退因谕吏部都察院年来议论混淆朝廷优容不问遂益妄言排陷致大臣疑畏皆欲求去甚伤国体自今仍有结党乱政颠倒是非诬诋要誉者罪不宥】

发明【听德惟听日月之明容光必照以是临下则奸邪蛊惑党援攻讦之私自无所施其伎俩神宗内鲜知人之明外无听言之察致台谏慢无忌惮以私意交章妄劾而为大臣者又欲藉被劾以引退鸣高几若予夺褒讥朝廷莫能操其进退时当齐楚浙三党横议之时阿比倾轧颠倒是非已成不可救药之象而徒以空口申诚欲挽狂澜于既倒之余虽日谕部院诸臣又安所惩创耶】

六月 诏布色图袭封顺义王

【三十五年顺义王齐里克死孙布色图应嗣求婚于忠顺夫人忠顺拒之其所部萨囊台吉乌鲁木齐台吉额森台吉等各不相下封号未定至是布色图始婚于忠顺东西诸部长皆具状为请封忠顺夫人旋卒诏封布色图为顺义王然势益衰不复能制诸部萨囊乌鲁木齐额森诸台吉其力皆与顺义埒朝廷因宣大总督涂宗濬言各陞赏如例】质实【涂宗濬南昌人萨囊旧作素囊乌鲁木齐旧作五路额森旧作兀慎今俱改】

复开广东珠池

【初广东珠池自帝三十二年停采至是金吾右卫指挥倪英上言请开从之刑科给事中郭尚宾论开采之害不报】

秋七月 兵部尚书掌都察院事孙玮罢

【都御史自温纯去後八年不置代至四十年十二月外计期迫始命玮以兵部尚书掌左都御史事玮素负时望方欲振风纪而是时朋党势成言路大横会进士邹之麟分校顺天乡试所取童学顔有私御史孙居相给事中孙振基并发汤宾尹为会试分校时越房取其私人韩敬事旨下部院议顾不及宾尹事振基疏请并议未得命礼部侍郎翁正春议黜学顔谪之麟亦不及宾尹等振基谓议者庇之上疏论劾帝再下廷臣议正春乃坐敬不谨落职于是党人忮诗教等交章论列并劾正春纷呶不已而南畿巡按御史荆养乔与提学御史熊廷弼复

以宾尹乡人事相讦廷弼以宾尹故杖杀诸生芮永缙养乔劾廷弼杀人媚人玮议养乔镌秩廷弼解职听勘廷弼党官应震吴亮嗣遂连章攻玮而振基及诸给事御史劾应震等植党背公南北台谏各有左右帝竟如玮言令廷弼解职吏部尚书赵焕以年例出振基及御史王时熙魏云中于外不关都察院玮以失职求去疏十余上及是始予归】质实【孙玮字纯玉渭南人邹之麟武进人孙振基字肖冈潼关卫人荆养乔临晋人宾尹乡人事宾尹家居尝谋夺生员施天德妻为妾讦讼氏投池死诸生冯应祥芮永缙等告于官为建祠以愧宾尹後永缙又发诸生梅振祚宣祚朋奸事廷弼素交欢宾尹判牒云此施汤故智会有司报永缙及应祥行劣廷弼杖之永缙寻毙养乔夙与廷弼抵牾遂劾廷弼疏上径自引归廷弼亦上疏辨王时熙南昌人魏云中武乡人】

宣府大雨雹

【杀禾稼】

天鼓鸣

【是月宁夏镇十一月山西定襄县皆鸣】质实【定襄唐县属忻州宋熙宁五年省入秀容元佑初复置仍属忻州金元明及今因之】

大水

【六月通惠河决七月两畿江西河南八月山东湖广广西九月辽东俱大水折徵南直隶兑军米及屯粮蠲长松等处积通停徵黄梅长沙湘阴善化等县兵工部逋兑并议振贷】质实【长沙隋县属长沙府唐以後及今俱因之善化宋县明属长沙府湘阴五代宋县明属长沙府今俱因之】

九月以方从哲吴道南为礼部尚书兼东阁大学士预机务

【自朱赆卒李廷机罢叶向高遂独相尝卧病即家拟旨请增置阁臣章百余上至是始有是命从哲初以国子祭酒请告家居久不出中旨起为吏部左侍郎及是与道南并命道南方在籍居忧服阕即家拜命三辞不允踰年始至故事廷臣受官先面谢始?任帝久不视朝道南至不获见不敢入直从哲为言帝令先?任视事】质实【方从哲字忠涵其先德清人隶籍锦衣卫向高初请起为礼部右侍郎不报及中旨起吏部侍郎时为给事中李成名所劾求罢不允】

吏部尚书赵焕罢

【是时中朝朋党已成议论角立焕素有清望顾雅不善东林惟同乡元诗教言是听诸党人攻东林者乘间入之凡所举措多弗协清议先後为御史李若星给事中孙振基所劾遂乞

归优诏慰留已而兵部主事卜履吉为尚书孙玮所论焕以履吉罪轻拟夺俸给事中赵兴邦劾焕徇私焕疏辨再乞罢叶向高言今国事艰难人才日寡在野者既赐环无期在朝者复晨星无几乃大小臣工日寻水火甚非国家福也臣愿自今以後共捐成心忧国事议论听之言官主张听之当事使大臣得展布而毋苦言官之掣肘言官德发舒而毋患当事之摧残天下事尚可为也因请谕焕起视事焕乃出既而御史汤北京以振基出外不移咨都察院守故事力争不得投劾径归其同官季邦华周起元孙居相及户部郎中贺琅交章劾焕擅权请还振基帝夺诸臣俸贬琅官以慰焕焕请去益力遂叩首阙门出城待命帝犹谕留给事中李成名复劾焕伐异党同焕遂称疾坚不起踰月乃许乘传归】质实【李若星字紫垣息县人由县令擢御史视库卜履吉吴江人江宁籍李邦华字孟阁吉水人周起元字仲先海澄人贺琅丹阳人李成名太原前卫人黄克缵字绍夫晋江人】

十二月以宋儒罗从彦李侗从祀孔庙

【甲寅】四十二年春正月总兵官刘綎讨建昌叛蛮平之【先是四十年四川建昌猺乱命綎为总兵官讨之偕参政王之机分八道督攻而已居中节制次第克桐槽沈渣阿都厦卜越北诸砦大小五十六战斩馘三千三百有奇俘九百七十五名口牛马羊二千八百四十有奇甲仗无算诸猺巢穴一空及是以捷闻】质实【建昌猺建昌本邛都地汉武帝置越嶲郡隋唐皆为嶲州至德初没于土蕃贞元中收复懿宗时为蒙诏所据改建昌府以乌白二蛮实之元至元间置建昌路又立罗罗斯宣慰司以统之洪武五年罗罗斯宣慰安定来朝而建昌尚未归附十四年乃降十五年置建昌卫所辖四驿曰禄马阿用白水泸波各百里有差其属有源山拖郎桐槽热水沈渣阿都厦卜赴北诸砦罗罗即猺译音之异也】

二月以郑继之为吏部尚书

【赵焕罢以继之有清望召使代焕继之楚人年八十余一听楚党意指定制科道外转必会都察院吏科协议继之寻赵焕轍先後倚任文选郎王大智胡来朝院科皆不令与间御史孙居相张五典周起元等引故事为言给事中李瑾尤先後抗章力争来朝不能难乃嗾其党羣起攻之各三疏往复来朝词屈因言旧例协议实秉国者调停之见非可为制乞改前令从事帝亦无所处分】质实【郑继之字孝伯襄阳人王大智玉田人胡来朝赞皇人】

慈圣皇太后李氏崩

【太后性严明帝涖政初委任张居正综核名实太后保护之力居多光宗未立时给事中姜应麟疏请建储被谪太后闻之弗善也一日帝入侍太后问故帝曰彼都人子也太后怒曰尔亦都人子帝惶恐伏地不敢起盖内廷呼宫人为都人太后亦由宫人进故云光宗由是得立福王之藩期屡易郑贵妃欲迟之明年以祝太后诞辰为辞太后曰吾潞王亦可来上壽乎贵妃不敢留期始定御史曹学程以建言论死太后怜其母老言于帝释之太后父伟封武清伯家人常有过命中使出数之而抵其家人于法素好佛京师内外多建梵刹动费钜万帝亦助施无算及是崩諡孝定】质实【曹学程字希明全州人督畿辅屯田时上疏言朝鲜不可

封状并劾兵部尚书石星封使杨方亨表里应和不足倚信帝谓其暗嘱关节逮下锦衣卫拷掠无所得移刑部坐逆臣失节罪论死其母年九十余哭子待毙羣臣论救不听子正儒刺血书奏乞代父死亦不省太后言于帝适朱赧亦请宥乃改谪李伟字世奇溧县人神宗立封武清伯再进武清侯伟有遇太后尝召入宫切责不以父故骖祖宗法以是伟益小心畏慎有贤声卒赠安国公諡庄简】

振畿内饥

【从户部给事中官应震请也】

三月封原任兵部员外郎赠太常寺少卿杨继盛墓【礼部言原任兵部员外郎赠太常寺少卿杨继盛浩气凌霄丹心贯日前知远识芟仇鸾之奸于未然正色危辞禡严嵩之炎于方炽风波九死惟矢忠义之心热血一腔长洒英雄之泪先皇帝嘉其忠贞锡之赠諡建祠表里廕及後人盖三旌之宠洵加已慰忠魂于九地乃一坏之封犹缺未泽枯骨于重泉此感往不无永怀而盛典尚宜请补也乃准封其墓修石麟华表诸制】质实【杨继盛墓在保定府定兴县西南八里】

福王常洵之国

【初福王婚费三十万营洛阳邸第至二十八里十倍常制又设官店以供福邸及府第成廷臣请王之藩者数十百奏不报四十一年春复交章请叶向高孙慎行争尤力帝始以明春为期已复传旨庄田非四万顷不可向高因言会典载亲王禄米万石养贍名目已是添设岂可过多各直省田土之数惟大郡方有四万顷少者止一二万顷自祖宗以来封国不少使亲王各割一大郡则天下土地已尽今日非但百姓无田即朝廷亦无田矣况圣子神孙源源未已乎列圣相传遵守家法岂无爱子欲加厚以祖制不敢踰越必如是而後万世可常行耳福王所陈不过引景府潞府事例夫潞府就封时废府田地尚多未尝括及民间今田地已尽而租银之入已过潞府何更求多乎至景府久不之国皇考在裕邸常怀危疑其後皇祖断然遣之人心始安景府屡请楚地几至激变当时皆讥皇祖过宠非以爱之亦前事之鉴也臣愚谓祖制当遵吉典当举王方建维城之固与国同休不当以土田小事滋天下之口又言使福王庄田必足四万顷则之国无日王疏以祖制为言试思亲王四万顷之庄田祖训会典累朝功令有之乎臣不知王所引祖制何指也自景府以前无出数千顷外者惟景府以宠爱踰分致坏祖制王奈何尤而效之乎况今河南山东抚按官搜括已尽恐有奸徒以投献为名者挟讐报怨中州齐楚间稍有土地者不安其生天下从此多事矣帝报曰庄田自有成例今皇太子与福王大分已定何猜向高又言皇考时名位虽未正然讲读不辍情意自通今东宫辍讲八年且不奉天顔者久而福王一日两见以故不能无疑惟坚明春之国期无以庄田籍口庶天下疑自释也会锦衣百户王曰乾以私事与孔学赵宗舜赵圣等相告讐刑官讞未竟曰乾入皇城放礮上疏讐郑贵妃内侍姜严山与孔学王三诏等用厌胜术诅皇太后皇太子欲拥立福王帝震怒向高请帝以静处之曰乾疏不宜发而别谕法司治诸奸人罪速定福王之国期以息羣喙帝纳其言寻贵妃请留福王庆太后壽节又谕改期向高封还手勅太后亦谕止之

始令之国历年税使矿使所进珍美悉以资之押运刘李自虞城至洛阳到处挟索横逞杀人抚臣梁祖龄按臣张至发以闻置不问庄田初谕给四万顷羣臣屡请减帝谕以王意奏辞减半给二万顷中州腴土不足以山东湖广田益之王复乞故大学士张居正所没产及江都至太平沿江荻洲杂税并四川盐井榷茶银以自益伴读承奉等官假履亩为名乘传出河南北齐楚间所至骚动山东河南湖广抚按臣各疏言王府赐地应照会典之例令地方官每亩徵银三分王府遣人关领不便自行勘丈管业并中使阎时冯进忠张佃梁进等不法状俱不报後湖广田复不足王又奏减一千顷实给田一万九千顷】质实【设官店福府承奉谢文铨言设官店于崇文门外以供福邸户部尚书赵世卿疏争不听沿江荻洲杂税芦洲按亩起科以大江南北之分作芦洲肥瘠之辨徵派有定例督理有专官神宗二十七年勘出丹徒丹阳崇明武进江都通州如皋泰兴诸处田滩二万六千七十亩令佃户纳价三万七千五百七十两又每岁徵租银四千五百四十余两上江如上元江宁句容江浦六合青阳怀宁桐城宿松望江县无为州和州诸处经五年清文比旧额多银三千三百余两岁共徵银七千三百两有奇每岁春夏间由内守备收解南京户部核实奏闻四川盐井辖盐课十七洪武时岁办盐一千一十二万七千余斤弘治时办二千一十七万六千余斤神宗时九百八十六万一千余斤盐行四川之成都叙州顺庆保宁夔州五府潼川嘉定广安雅广元五州县岁解陕西镇盐课银七万一千余两四川榷茶银洪武四年户部言四川巴茶三百十五顷茶二百三十八万余株定令每十株官取其一无主茶园令军士薅采十取其一以易番马诸产茶地设茶课司四川定税额一百万斤设茶课司自河雅诸州及碉门黎雅抵朶甘乌斯藏行茶之地五千余里洪武末置武都重庆保宁播州茶仓四所令商人纳粟中茶成化中茶百斤折银五钱商课折色自此始丹徒汉县丹阳唐县明俱属镇江府今皆因之青阳唐县明属池州府怀宁晋县明属安庆府桐城唐县明属安庆府今皆因之张祖龄温江人张至发淄州人】

常洵开洛阳市

【常洵请淮盐千三百引设店洛阳与民市中使至淮扬支盐乾没要求辄数倍中州旧食河东盐以改食淮扬故非王肆所出不得鬻河东引遏不行边饷由此绌叶向高言以藩国之尊下侵商贾之事于体甚褻况差官支取或滋夹带之奸定价贸易终无两平之理户科给事中姚宗文言方今盐法壅滞盐课不登今王府公行货卖则狐鼠羣奸必至公然夹带两淮正额引盐必壅河东行盐之地自有成法一旦阻絶则行盐地少盐地必亏河南境内民肆向有堆卖官盐价值一定若王府售卖昂值专利势必腾涌民何以堪大学士方从哲及诸廷臣亦先後请停丈田开市二事俱不报】

发明【藩封开市渔利滞商已为万万不可行之事乃神宗于常洵初就封时即曲徇其请实为溺爱之私其于民瘼国是漠不关心于此亦可概见至盐英为国家要务定地分引民食既有所仰需而商贾亦自便其售鬻中州之必食盐于河东地使然也顾忽有设店洛阳之举在淮扬既苦累于中使之乾没要求必不能源源以济坐使中州价涌而河东引遏边饷之绌亦随之所谓行一事而害且百端此也自是河南凋瘵日甚一日史称神宗耗天下以肥王祸乱之萌岂一朝一夕之故哉】

夏五月大雨雹

【是月乙卯夜京师大雨雹是年浙江江西两广福建俱水】

释楚宗幽禁诸人

【时皇太后遗命赦天下诏楚府宗室先因诬诋楚王毆杀巡抚已将情罪深重者正法其余发高墙闲宅者禁锢日久惩创亦深准与释放仍听楚王钤束初禁宗之狱廷臣互有左右历数年不得白御史潘之祥上疏请释英燾蘊钤等不报至是礼部侍郎孙慎行言楚宗杀巡抚赵可怀不得为叛乃称太后遗诏释之】质实【神宗三十三年捕治楚宗人斩二人勒四人自尽幽英燾等二十四人于高墙禁蘊钤等二十二人于闻宅】

福建税使高案私通倭市

【案私置通倭双挖海艘航货数十万入海货直不以予民间閤嗟怨激变案怒麾兵杀人放火箭毀民房突入巡抚署露刃胁制要盟有司官于私署巡抚袁一驥巡按徐鑑以闻大学士叶向高方从哲给事中姚永济郭尚宾先後论劾帝置不问时陵璫杜茂杖杀留守陆万垓兵科给事中吴亮嗣疏劾亦留中】质实【袁一驥江阴人徐鑑丰城人姚永济上海人郭尚宾南海人】

发明【私通倭市事关边禁此犹彰明较着者乃高案竟自置双舵海艘取其便于乘驶风涛渔猎专利货则剥掠自民直则敛肥于己其激而生变也固在意中顾转以此生怒杀人毀屋恣其荼毒甚且刃制巡抚要盟有司罔上行私若此即在明季纪纲不振之时亦所罕有所可异者中外相继论劾均置不问同时更有璫豎杖死留守言官疏发其事亦复留中不报宜效尤肆恶者之终无已时欲边境之宁得乎】

雷震军台毀

【是月甲寅密云杨洼军台为雷火震毀层楼礮轰发火器火药俱被焚击死南兵一名庚午复震永平属石火墩军台雷从台东门入击死南兵一名伤北兵二名台房及垛口火器尽毀】

六月葬孝定皇后于昭陵

【合葬昭陵别祀崇先殿】

秋八月礼部侍郎孙慎行罢

【慎行素讲学东林为党人所忌及在礼部遇事皆切諫韩敬科场事久不定慎行特拟黜

敬党人袒敬者追论汤宾尹越房取卷时各分考俱效之因欲十七人并罪藉以寛敬慎行集廷臣议卒坐敬关节为十七人昭雪党人益大恨会吏部缺侍郎廷议改右侍郎李志于左而以慎行为右命俱未下御史过庭训因言志末履位何复推慎行忝诗教和之慎行遂连疏引归後丁巳京察以趣福王之国谓慎行邀功列拾遗疏中帝知其无罪置不问】

大学士叶向高罢

【向高以宿望居相位每事执争效忠如东宫讲筵瑞王请婚福王之国补缺官罢矿税再三陈请其言多格不用所救正十二三而已自独相後请增置阁臣尤极恳切尝疏言今天下必乱必危之道盖有数端而灾伤寇盗物怪人妖不兴焉廊庙空虚一也上下否隔二也士大夫好胜喜争三也多藏厚积必有悖出之衅四也风声习气日趋日下不可挽回五也非陛下奋然振作简任老成布列朝署取积年废弛政事一举新之恐宗社之忧不在敌国外患而在庙堂之上也帝不能用向高又言今天下灾伤死亡畿辅中州齐鲁流移载道中外空虚人才俱尽人才俱尽罪不在他人臣何可不去且陛下欲用臣则当行臣言今章奏不发大僚不捕起废不行留臣何益又言今陛下兴羣臣隔絶帷幄不得关其忠六曹不得举其职举天下无一可信之人而自以为神明之妙用恐圣帝明王无此法也所言皆切中时弊帝俱不省尝因卧疾阁中无人就其家拟旨向高自以为非体坚乞去位帝仍慰留命主癸丑会试向高以入闱不便票拟力辞卒不允亦不命他相至是乞休疏已六十余上词极哀始允其去】质实【矿税矿务始于洪武末年采福建银屏山银场局浙江温州处水平阳等县亦有场局岁课皆二千余两後福建课额至四万余浙江亦至九万余英宗下诏封坑民赖苏息而岁额未除宣宗朝特遣侍郎御史官为之督理景帝时始命中官戴细保提督税务天顺四年命中官罗永之浙罗珪之云南冯让之福建何能之四川课额浙闽大畧如旧云南十万有奇四川万三千有奇成化中开湖广金场武陵等十二县凡二十一场岁役民夫五十五万死者无算所得金仅五十三两于是复开弘治後开闭不常迨神宗朝奸民废并献矿峒者日至开采之端亦日启于是中使四出昌平则王忠真保蓟永房山蔚州则王虎昌黎则田进河南之开封彰德卫辉怀庆叶县信阳则鲁坤山东之济南青州济宁沂州滕费蓬莱福山栖霞招远文登则陈增山西之太原平阳潞安则张忠南直之宁国池州则郝隆刘朝用湖广之德安则陈奉浙江之杭严金衢孝丰诸暨则曹金後代以刘忠陕西之西安则赵鉴赵钦四川则邱乘云辽东则高淮广东则李敬广西则沈永壽江西则潘相福建则高案云南则杨荣皆给以关防并皆原奏官往矿脉细徵无所得勒民偿之而奸人假开采之名横索民财陵辄州县有司恤民者罪以阻挠逮奉罢黜时中官多横暴富家巨族则诬以盗矿良田美宅则指以为下有矿脉率役围捕辱及妇人甚至断人手足投之江其酷虐如此廷臣屡请罢向高言之尤力武陵唐县明属常德府今因之房山元县明属涿州今属顺天府西路同知信阳元置川属汝宁府明降县後复为州今因之蓬莱唐县明洪武初省入登州九年复置县今因之并属登州府福山金天会二年刘豫析蓬莱县地置县属登州明属登州府招远金天会二年刘豫析掖县地置县属莱州明属登州府今俱因之孝丰明成化二十三年析吉安县地置县後属安吉州今属湖州府】

九月地震

【是月庚午山西河南同日俱震】

【乙卯】四十三年春正月徐州决河工成

【先是四十年九月河决徐州三山冲缕堤二百八十丈遥堤百七十余丈黎林舖以下二十里正河悉为平陆邳睢河水耗竭总河都御史刘士忠开韩家坝外小渠引水坝以东得通舟楫及是工始成】质实【三山在铜山县东南十余里上有三峰故名山腰有洞又名南洞山其下为三山堤黎林舖在铜山县东南韩家坝在铜山县北茶城下刘士忠华州人】

三月丁未朔日有食之

星陨声如雷

【是月戊午星陨于清丰之东流村有声如雷壬子天津卫地震有声】质实【清丰唐县明属大名府今因之天津卫明永乐初置属河间府今为天津府】

夏四月雨豆

【是月戊寅石首县雨豆大小不一色杂如黑】

五月畿内山东旱

【京师自三月至六月皆不雨七月山东复蝗】

贍贫宗

【山西巡抚吴士度言国家建藩颁爵自亲王郡王至将军中尉俱有定禄年来宗支繁衍间有无禄极贫或以擅婚私滥妾之子不敢请名者或以幼而无父不能请名者或已请名而家贫不能封者与孀妇身无所依者每名月给米一石折银一钱於各府正项粮银内支給从之】质实【亲王郡王将军中尉明制皇子封亲王岁禄万石亲王嫡长子年及十岁立为王世子长孙立为世孙冠服视一品诸子年十岁封为郡王嫡长子为郡王世子嫡长孙则授长孙冠服视二品诸子授镇国将军孙辅国将军曾孙奉国将军四世孙镇国中尉五世孙辅国中尉六世以下皆奉国中尉其生也请名其长也请婚禄之终身丧葬予费】

男张差持梃入慈庆宫

【太子居慈庆宫有不知姓名男子持枣木梃入宫门击伤守门内侍李监至殿前檐下被执皇太子奏闻帝命法司案问巡视皇城御史刘廷元鞫奏犯民张差蓟州井儿峪人按其迹若涉风癫稽其貌实系黠猾请下法司严讯时东宫虽久定帝待之薄中外方疑郑贵妃与弟

国泰谋危太子及差被执举朝惊骇廷元既以风癲奏刑部郎中胡士相等复讯一如廷元指言差收积薪草为人所烧气愤赴朝声冤行至东华门遇一人谓持挺入可当冤状遂误入东宫按律当斩加等立决奏定未上会提牢主事王之案私诘差言由内侍引导得口词甚悉之案备揭其语因侍郎张问达以闻且言差不癲不狂有心有胆乞传凶犯勅九卿科道三法司会问疏入未下廷臣连帝趣之而郎中陆大受疏有奸戚字帝恶之与之案疏俱不报御史过庭训言祸生肘腋宜即剪除大学士方从哲吴道南斥之案言谬请帝从容详审于是庭训遂移文蓟州踪迹之知州戚延龄具言其致癲始末与原勘畧相符遂以风癲为定案越数日问達以员外郎陆梦龙言令十三司会鞠衆咸噉嚙梦龙独详讯之谓系内监龐保刘成主使刑部乃行蓟州道提差所供马三道等疏请法司提龐保刘成对质保成皆贵妃内侍中外籍籍语侵国泰国泰惧出揭自白给事中何士晋直攻国泰且侵贵妃疏入帝大怒】质实【慈庆宫在东华门内端敬殿之东後为端本宫皇太子原居大内鍾粹宫在坤宁宫之左既长移居于此胡士相平湖人王之案字心一朝邑人诘差口词之案诘差初不承已云不敢说之案麾左右出留二吏扶问之始言小名张五儿有马三舅李外父命随不知姓名一老公说事成与汝地几亩比至京入不知街道大宅子一老公饭我云汝先冲一遭遇人辄打死乃畀我枣木棍导我由厚载门到宫击门者墮地老公多遂被执老公内侍通称也陆大受字凝远武进人戚延龄言致癲始末贵妃遣璫建佛寺璫置陶造壁居民多鬻薪获利者差卖田负薪往市于璫土人忌之焚其薪差讼于璫被责差产破薪焚不胜愤故持挺入都叩阍陆梦龙字君启会稽人梦龙讯差梦龙见差长身骈胁睨视傲语絶无风癲状因呼纸笔命画所从入路须臾图成具供马三舅名三道李外父名守才不知姓名老公乃修铁瓦殿之龐保不知街道宅子乃住朝外大宅之刘成且言二人与我金银壶各一綦我已三年令我打上宫门打得小爷吃有着有小爷者内监所称皇太子也又言有姊夫孔道同谋凡五人何士晋字武莪宜兴人士晋疏言国泰若欲释人疑惟明告贵妃力求陛下速令保成下吏考讯如果国泰主谋是大逆罪人非但贵妃不能庇即皇上亦不能庇设与国泰无干请令国泰自任凡皇太子皇长孙一切起居悉属国秦保护稍获疎虞罪即坐之则臣与廷臣亦愿陛下保全国泰无替恩礼若国泰畏有连引预荧惑圣聪久稽廷讯或潜散党与使之远遁或隆毙张差以冀灭口则国泰罪不容诛矣】

严皇城门禁

【御史刘廷元请禁内市以消隐祸御史牟志夔请飭皇城以内四门内臣出入必稽启闭以时毋挠巡视之权因谕门禁本宜严密令该部及巡城科道官通飭严加盘诘仍着廠卫巡捕衙门及守门官员密切体访擒拏奸宄至内地每月三市相沿年久以济需用事不可缺但不许持挟铜铁锋利弓矢等物入市违者必惩】质实【皇城内四门午门东华门西华门元武门内市在禁城之左过光禄寺入内门自御马监以至西海子一带皆是每月初四十四二十四日俱设場贸易此三日旧例令禁内贱役輦秽出宫弃之故各门俱启因之陈列器械借以博易焉年志夔南溪人】

召见大学士方从哲等于慈宁宫下御史刘光复狱【初奸人王曰乾上变言巫蛊事辞连刘成至是复涉成帝心动谕贵妃善为计贵妃窘乞哀皇太子自明无他帝令太子白之廷臣

太子亦以事连贵妃大惧请帝速具狱毋株连帝乃于慈宁宫召大学士方从哲吴道南及文武诸臣入见因执太子手谓诸臣曰此儿极孝朕极爱使朕有别意何不早更置外臣何意辄以浮言间朕父子耶因命内侍引三皇孙至石级上令诸臣熟视曰朕诸孙俱已长成更何说顾问太子有何语与诸臣悉言无隐太子其言疯癫之人宜速决并责诸臣言我父子何等亲爱而外廷议论纷如尔等为无君之臣使我为不孝之子帝复谓诸臣曰尔等听皇太子语否申谕再三诸臣始叩首出初从哲等进见时御史刘光复跪班後大言曰皇上极慈爱太子甚仁孝帝不甚悉问为谁中使以御史刘光复对光复又前跪大言申奏帝谓地近皇太后几筵大言非敬且越班进对失人臣礼令中使缚之下刑部重拟罪方从哲及廷臣力救不允宗人中尉充 驸马王昺疏救光复以词激充 幽禁曷褫冠带闭住帝不见廷臣已二十五年矣御史翟凤翀因言陛下召对廷臣天日开霁千载一时辅臣宜举朝端大政乘便缕陈乃一切緘默不言徒致光复以失仪获罪光复一日不释恐辅臣一日未安也帝降旨切责寻以凤翀疏论中官吕贵等谪外】质实【刘光福青阳人翟凤翀字凌元益都人疏论中官吕贵等凤翀以中使吕贵假奸民奏留督浙江织造冉登提督九门诬奏市民毆門卒邢洪辱御史凌汉翀于朝帝释洪不问汉翀为凌应登所毆洪复曲庇应登凤翀疏论贵登洪三人罪且曰大臣造膝无从小臣叩阁无路宦寺寢用政令多违实开羣小假借之端将成太阿倒持之势帝大怒谪山西按察使经历是时郭尚宾亦以直諫忤旨被谪江西布政使检校时称二諫】

张差伏诛

【帝谕三法司张差以疯癫奸徒闯入东宫持梃伤人罪在不赦因命决差于市内宫隴保刘成严提审明拟罪马三道等应属诬攀斟酌拟议此外不许波及无辜寻命司礼监随同九卿三法司于文华门会勘隴保刘成榜掠死马三道等拟流时帝意在调护贵妃太子念事似有迹故于诸言者亦不遽罪也未几何土晋调外王之案削籍陆大受夺官而陆梦龙独免光复寻亦见释】

六月免浒墅芜湖关税三分之一

【先是李太后遗诏免近京畸零杂税因允台臣所请罢卢沟税应天巡抚王应麟言两京并重而陪京尤为根本乞罢两关额税故有是命】

勅修省

【以京师三月至六月久旱故也】

秋七月振畿内饥

【畿辅久旱通州三河等处饥民乏食刼掠者衆薊镇总督薛三才以蠲振请命发通州仓米七万石振济临清德州仓米十万石平糶并发本属备荒谷及收买隣近丰收地方裸粮以资之九月以顺天府尹李长庚言京师五城分廩煮粥平糶十一月巡按直隶御史过庭训请

通州三河县全徵折色宝坻密云二县准折十分之三 谷县折十分之五停顺天府属驿传待支车辆等银各属应给边镇米豆等银永平等卫逋欠屯银从之】质实【平谷元县明属蓟州今属顺天府李长庚字酉卿麻城人】

閏八月重建三殿

【时工部奏修乾清宫庀屋帝以三殿久未鼎建谕吉宜于本年命定期启工俟明岁皇太后升祔陵庙礼成後从容构造】

振山东湖广饥

【时山东自三月至六月久旱盗起贫民乏食巡抚钱士完请发帑振济帝命以布政使库贮解部税银六万六千两有奇本年临清应解税银四万两留东备振又以临清德州仓米六万石振济四万石平棗湖广水旱频仍巡抚梁见孟奏请灾重者漕粮并折稍轻者折一徵二其无漕南二粮处所酌量加振从之】质实【山东盗蒙陰盗竖旗称王杀官兵沂州盗七百余乘马弯弓抢刼粮畜昌乐县盗三百余啸聚焚刼费县济阳亦多白昼抢刼者蒙县元县明因之属莒州今属沂州府昌乐宋县元省入北海明初复置属青州府今因之钱士完归安人梁见孟安肃人保定右卫籍】

河套诸部犯延绥官军御之败绩

【前年套寇犯保宁总兵官官秉忠参将杜文焕败之一月再捷嗣後蒙克锡里等以挟赏不遂数沿边寇掠秉忠随所向以劲旅遮击屡破之寇遂遁去巴什图子济农者土马雄诸部为套中之主及是见巴什图袭顺义王于是挟求封王且请市赏边臣不许会他部塔类以痘疮死妄言为边吏所害而沙津盗边又被抢去遂合套中诸部大举入寇东道高家大柏油神木柏林中道波罗西道砖井宁塞诸城堡尽被蹂躪副将孙洪谟御之大柏油遇伏被执士卒死伤过半秉忠闻寇入急遣游击张榜潜刼其营又败死四百余人会故帅杜松宁夏总兵杜文焕援军至共击之寇始退然犹驻塞下时钞掠秉忠被劾罢方候代沙津从双山入犯秉忠设伏待之遂大败去斩首二百有奇】质实【高家在葭州北大柏油在神木县西柏林在神木县西南波罗在榆林府怀远县东北砖井在延安府定边县东宁塞在延安府靖边县西双山在榆林县东南杜文焕字 武松之侄蒙克锡里旧作猛克什里沙津旧作沙计塔类旧作铁雷今并改】

冬十月京师地震

【是年二月扬州地震狼山寺殿坏塔倾江神庙碑崩裂乙亥楚?地震声如雷人民惊殒十月京师地震二次密云县湖河川等处同时震有声】质实【狼山寺在通州南十八里五山连属山有广教寺旧名慈航院唐天宝间改名江神庙在狼山上今名江海神祠楚?明洪武中以威楚县地改置楚?县属楚?府今因之】

【丙辰】四十四年春正月我

太祖高皇帝建元天命元年

【我太祖高皇帝自诛尼堪外兰之後国日隆盛辛卯年叶赫等】

【九部来侵大破之己亥年哈达贝勒孟格布禄为叶赫所诱将害我助防哈达之兵征克其城获之以归丁未年辉发贝勒拜音达里亦贰於叶赫数背盟约率兵灭之抚定其国乌喇贝勒布占泰尝战败被俘释遣归国申以姻好布占泰复谋背叛屡屡不悛癸丑年大举伐之布占泰势穷奔叶赫其国遂灭】

【太祖既削平诸国德威遐播又制国书定旗制规模宏远帝业已成于是诸贝勒大臣等咸奉表劝进以正月壬

申朔尊太祖为覆育列国英明皇帝以是年为天命元年】质实【国书巴克】

【什额尔德尼噶盖初以蒙古字合国语联缀成句创立满州文颁行传布旗制初削平诸国设有四旗旗纯色为别曰黄曰红曰蓝曰白寻添设四旗参用其色镶之共为八旗分左右翼】

发明【臣等谨按史家纪元系统必据实以徵文我】

【国家龙兴东土受命发祥当故明神宗时奄有蒙古喀尔喀诸部王业所基鸿猷炳烁爰允臣民所请建国纪年自应大书立纲用着圣朝创建大一统之始谨于神宗四十四年正月特书天命元年而于岁首则仍存明之纪年嗣凡恭遇列祖建元之初均繫月特书如通鉴辑览之例庶史法允归据实而於首出肇基积】

【德累功之统绪弥昭公正云】

盗击御史凌汉翀于端门

【汉翀与革任督捕凌应登同籍长洲与通谱及为御史以击击豪猾自任心恶应登所为不法先是应登缘事吓取奸民王好贤四千金汉翀廉得发其状应登亦讦汉翀为福清令贪黷及以贿得御史列款上图报复疏俱留中元日百官行礼毕至端门应登潜率其党伏门侧持铁钩突击汉翀败面裂衣同官力护得不死巡视皇城给事中忬诗教以闻下九卿会勘互讦情事礼科给事中余懋孳言互讦并议非法之平上以为党比夺懋孳俸寻议汉翀交游不慎冠带闲住应登发云南澜沧卫充军】质实【端门在承天门北午门南福清明洪武中以福清州地改置县属福州府今因之凌汉翀凌应登俱长洲人余懋孳婺源人】

发明【春秋昭公二十年书盗杀卫侯兄縶左氏以为齐豹先儒以为宗鲁若齐豹则有位於朝若宗鲁则身为骖乘圣人均以盗书聂政刺韩相侠累司马迁着之列传矜为任侠而紫阳亦以特笔书盗今凌应登贪诈不法为汉鞫举发因而挟嫌诬讐并突肆暴横例以齐豹宗鲁聂政之为即引经传以断斯狱其罪已无可逃况以森严禁地纠党逞凶回无法纪至于此极乃应登仅予流窜而汉鞫并致罢免刑政亦岂云平允耶】

雨三色雪

【是月雨红黑黄三色雪屋上多巨人迹】

天鼓鸣

【是月丁丑易州及紫荆关皆鸣戊戌陕西洮州复鸣】

遣御史过庭训振山东饥

【帝以东省饥民数多刼掠可虞命借太仆寺马价银临清仓米设法给济于是户部议发帑金十六万两及分振米六万石平糶米六万石从之遣御史过庭训往董其事仍勅速行以慰东人仰望之心时青州举人张其猷上东人大饥指掌图各系以诗有母食死儿夫割死妻之语见者酸鼻流离入江淮间遂成人市寻庭训及巡抚钱士完以救荒事宜十二条上一定振规二广振地三劝倡义助振四留漕米十五万平糶五开事例量减银两自春至夏止六酌赎罪七搜帑藏八清驿递九寛禁约钱法盐法权宜便民十通水利十一普振米十二酌蠲停从之十一月命蠲本年存留夏税折徵临清德州二仓米】

二月振畿内山东及淮徐河南饥

【初淮徐不登以巡抚唐世济言改折漕粮蠲免未完带徵米麦及是发淮安府贮库税项溢额银八千七百两有奇并借支正项溢额银八千两易粟煮粥以贍饥民河南亦留税银四万二千余两余谷振之】

三月辛未朔日有食之

益黔中饷

【黔师自平播後销兵太多营哨非旧各种夷贼生齿日繁贵州上六卫平定铜仁大江小江等处无日不报苗誓而苗仲杀虏职官焚劫屯堡延袤数百里受祸尤惨诸苗南抵滇西抵蜀东南抵西粤种类实繁皆属土官管辖多桀点不能制且纵使刼掠陰利其货不欲翦除苗仲孤已羽翼也黔抚张鹤鸣以为不大创之则黔旦夕难保而黔兵不满千且事关三省非黔所能独举乃与各道臣募兵一万调土司兵二万四千余先剿平定後及两江然後分兵十

路截仲贼之後而洗其巢计一年可收廓清之效而粮饷不继恐募兵涣散请发帑金十万两兵部议以马价银六万两予之】质实【平定长官司在麻哈州西北明洪武二十二年置属平越卫三十年属清平卫弘治七年改属麻哈州铜仁大江小江铜仁长官司旧属思南宣慰司永乐十二年置府治于此神宗二十六年改县西南有铜仁大江西北有铜仁小江合流注于沅江苗仲苗名仲家者踞贵笼平新之间为诸苗渠帅】

夏四月河南盗起

【舞阳泌阳西平遂平等县盗贼数百人白昼啸聚抚臣以闻帝以羣盗结聚日久地方有司隐匿不报降旨切责仍谕文武各官防御剿抚务期扑灭以遏乱萌至七月乃靖】质实【泌阳明洪武初以比阳县地改置泌阳县属南阳府今因之】

六月套寇犯延绥总兵官杜文焕破降之

【前年延绥被寇文焕赴救大破之代官秉忠镇延绥寇屡钞边文焕连败之于保宁长乐斩首三百有奇西路酋浩尔齐布延泰等惧相率降惟东路济农沙津等犹恃地险驻高家堡柏林仍要请封王补赏文焕复集兵袭破其营斩首二百五十敌皆披靡而西路乞盟益亟浩尔齐诸部相与攢刀立誓献罚九九而退已沙津又设伏兵诱杀都指挥王国安纠蒙克锡里连犯双山波罗二堡文焕击破之追奔二十余里斩首四十一级而还济农等惧又知西部已和势孤弱亦乞和献罚九九者二当是时寇衆号十万分四十二枝多者二三千少亦千骑及屡不得志始次第归歛延绥遂少事】质实【九九部落中罚驼马牛羊之数布延泰旧作卜言太今改】

河决开封

【先是五月河决徐州狼矢沟由蛤蟆周柳诸湖入洧河出直口复与黄会及是复决开封陶家店张家湾由会城大堤下陈留入亳州涡河陈杞睢等州咸受其害是年巡漕御史朱堦请修复泉湖言宋礼筑坝戴村夺二汶入海之路灌以成河复导洙泗洗沂诸水以佐之汶虽率衆流出全力以奉漕然行远而竭已自难支至南旺又分其四以南迎淮六以北赴卫力分益薄况此水夏秋则涨冬春而涸无雨即夏秋亦涸礼逆虑其不可恃乃於沿河昭阳南旺马踏蜀山安山诸湖设立斗门名曰水柜漕河水涨则潴其溢水於湖水消则决而注之漕积泄有法盗决有罪故旱涝恃以无恐及岁久禁弛湖浅可耕多为势豪所占昭阳一湖已作藩田比来山东半年不雨泉欲断流按图而索水柜茫无知者乞勅河臣清核亟筑堤坝斗门以广蓄储帝从其请方议濬泉湖而河决运船迎溜艰险督漕侍郎陈荐开武河等口泄水溜乃平】质实【狼矢沟在铜山县东二十里涡河源出鹿邑县经亳州北又东经蒙城县北入凤阳府怀远县界】

秋七月地震

【大同浑源州同时震八月戊辰延庆州地震】

流星入贯索

【是月壬午西北有流星行入贯索二星随之给事中熊明遇疏言入春以来天鼓两鸣于晋地流星昼陨于清丰地震二十八天火九石首雨菽河内女妖辽东兵端吐火雷毁内监楼居即春秋二百四十年间未有稠於今日者且山东大祲人相食黄河水稽天兼以太白经天辅星湛没荧惑袭月金水愆行或日光无芒日月同晕为恒风为枯旱天谴愈深而陛下所行皆诬天拂经之事此诚禽息碎首贾生痛哭时也敢以八忧五渐三无之说进内库太实外库太虚可忧一饷臣乏饷边臣开边可忧二套部图王察部觊赏可忧三黄河泛滥运河胶淤可忧四齐苦荒天楚苦索地可忧五鼎铉不备棟梁常挠可忧六羣譁盈衢讹言载道可忧七吴民喜乱冠履倒置可忧八八忧未已五渐继之太阿之柄渐付中涓魁垒之人渐如陨箨制科之法渐成奸黷武库之器渐至销亡商旅之途渐成梗塞五渐未已三无继之匹夫可荧惑天子小校可滥邀丝纶是朝廷无纲纪滇黔之守令皆穷途扬粤之监司多规避是远方无吏治谗构之口甚于戈戟倾危之祸惨于苏张是士大夫无人心天下事可不寒心哉帝不省】

中旨修咸安宫

【时遣内使至工部侍郎林如楚私寓宣勅旨以奉御汪良德奏准修理咸安宫也辅臣言明旨传宣定例必由内阁下科臣然後发抄若不由内阁不由科发不经会极门不由接本官突以二竖传宣於部臣之私寓则从来未有之事向来建议诸臣以旨从中出犹且虑之况臣等竟不与闻乎工科徐绍吉等亦疏谏不省】质实【咸安宫明时在英华殿西咸和右门之北先名咸熙宫会极门嘉靖四十一年二殿成改左顺门曰会极门凡京官上下接本俱在此南入为内阁辅臣票本处也徐绍吉平江人保宁卫籍】发明【传旨必由由阁科道此固本於左史记言之意而实亦以杜近侍假托之私至令内使宣谕於部臣之私第宰执皆不得与闻此为创见况修缮大内宫室苟非侈穷土木原国家经费所宜及何妨明降谕旨俾将作司其事耶神宗徒以事由奉御奏请恐为廷臣所阻聊以权宜集事俾速鸠工不但定制沦胥并此传宣矫伪之风必将变本加厉虽当时建议诸臣未尝不深以旨从中出为虑而概置不问其奈之何】

南直隶河南江西广东灾

【是年应天溧阳等处水江宁广德常镇淮扬等处蝗河南旱蝗捕斗蝗者官给斗谷谷尽蝗愈繁有阖户自经者土鼠千万成羣夜衔尾渡江南络绎不絶一月方止江西水大涨民居荡析浮屍蔽江广东南韶等处淫雨匝月田禾尽溃】

八月备孝陵祝帛

【南京太常寺少卿桂有根言孝陵元旦清明长至三大祭文物俱备中元孟冬两忌辰及

万壽节五祭向止陈设酒果应加用牲帛祭文从之】

日中有黑子

【是月戊辰日也是年三月月犯轩辕大星七月壬午西北有流星入贯索二星随之十一月丙戌月犯轩辕左角甲午月掩房宿南第二星十二月丙午火星逆行入翼宿初度】

陕西巡抚龙遇奇请免包税不报

【遇奇言秦民包税其苦有三一日包赔无着之苦天下税课例属商贾若秦则三面临边商贾罕至向来税额皆派之丁亩及津梁陶穴筑佣之辈今凶荒死徙村里为墟即向来琐科无从矣一曰税额独多之苦秦边地也瘠土也远在江南腹襄者勿问即与秦连界者东则山西西则四川税皆万许即大藩如河南亦六万余秦肥瘠视三省迥殊而税额多至十万即蒙恩减而已减之额尚浮于三省未减之额矣一曰牵误边饷之苦民止此财官司既督以赔税自不能并力以输边计秦民十八年已输过税额一百五十万两而坐逋边饷则已二百四万足此误彼明验不爽此包税所以不可不罢也疏入不报】质实【龙遇奇永宁人】

皇太子出阁讲学

【皇太子辍讲已十有二年羣臣諫疏凡数百上及是始命举行以詹事府詹事刘一燝少詹事韩爌为侍班官右庶子张邦纪赵师圣左谕德公鼐右谕德龚三益薛三省杨守勤为讲读官皇太子进执事诸臣及赐酒饌皆称先生进对进仿敏妙合法中外大悦然一讲而辍後不复更举矣】质实【皇太子出阁讲学仪太祖初于大本堂後于文华後殿天顺二年定仪注是日早执事官于文华後殿行四拜礼鸿胪官请皇太子陞殿师保等官于丹陛下四拜各官退出内侍导皇太子至後殿陞座以书案进侍班侍读讲官入分班东西立内侍展书侍读讲官以次进读讲叩头退其每日讲读於早朝退後出阁陞座惟侍读讲官入行叩头礼内侍展书先读四书则东班侍读官前伴读退复班次读经或史则西班伴读亦如之读毕各官退已时各官入内侍展书侍讲官次第侍讲早所读书如侍读仪讲毕侍书官侍习字毕各官叩头退凡书三日一温背温之日不授新书凡书字春夏秋百字冬日五十字朔望节假大风雨雪隆寒盛暑暂停弘治十一年更定三师三少并官僚於丹陛四拜毕从殿左右门入东西立候读讲毕叩头退隆庆六年改设座于文华殿东厢正中西向每日读讲官先诣文华门外东西向序立候帝御日讲经筵毕皇太子出阁陞座凡东宫初讲阁臣连侍五日後每月三八日一至先拜出然後各官入刘一燝字季晦南昌人韩爌字象云蒲州人张邦纪宜兴人燕山左卫军籍赵师圣南丰人公鼐字孝与蒙阴人龚三益武进人薛三省定海人杨守勤慈谿人】

九月山东盗犬起

【东省饥民啸聚所在攻劫御史过庭训以闻帝令相机捕除首恶余设法解散时剧盗张国柱引衆五百人以绦帛抹首入安邱令惧而逸贼坐正厅事指挥其党劫库藏破械出狱囚

有县民王?者以死罪系狱乃诈降贼标旗为顺号予之俾巡视?密戒诸囚无动者死矣阴结县令为擒贼计约城外张军声以撼贼入而宣言於贼曰官军至矣何不去贼踉跄出城未及半?阖扉坚守手刃一贼持其首号召吏民令乡兵各去其?曰抹首而绦者贼也复立斫渠魁十余人于是城中人并狱囚并起逐贼尽歼之?搜获贼所刼库物还之官事既定束身入狱巡抚李长庚言?一罪囚耳而仓卒成定乱之功其佯为从贼智也戮力歼贼勇也事平就狱口不言功忠也虽杀人者死国有常刑而会典亦有犯斩立奇功准赎之例乞宽一面开义士自効之门帝命释之嗣有盗渠周尧德张计绪张文朗等各立头目于泰山历城章邱莱芜等处出没行刼称尧德为红竿大王後改称平师王所至焚毁掳掠支解事主截杀官兵长庚等遣兵先後剿捕擒斩至四十五年正月余党始散】质实【章邱隋县宋以後属济南府今因之】

兵部请治兵不报

【前以孝定太后丧停操三年至是兵部上言大礼久竣当新戎垒以应秋气不省】

冬十月益九边饷

【时九边需饷所在告缺阁臣日请发帑帝以二王婚礼不敷为辞兵科给事中赵兴邦言今日之一二百万抚之而有余他日之几千万安之而不足也寻括内府银三十万两户兵工部银八十万两济之】发明【当时筹边饷者不计耕屯不因敌粮下惟请发内帑上则指借诸司以国家大征缮宗社安危所寄而为彼此委藉之局已属非体况部寺各执经费为辞支左绌右于事何补寻至加徵直省正赋至再至三民穷膏竭盗贼滋起以肢体之患溃及腹心人谋之不臧果孰貽其咎耶】

十一月隆德殿灾

【前月甲子烈风坏正阳桥坊是月己巳夜殿灾大学士方从哲等言禁城离照之地而桥坊隕于暴风宸居严闕之区而殿宇飞为烈焰旬日之内奇变叠呈此岂可以寻常视之苟且应之决非青衣角带之故事所能挽回亦非减膳撤乐之弥文所能消弭惟陛下以恐惧之真心行修省之实政破因循之积习振明作之治功时事之壅滞者尽为举行羣情之郁结者悉令舒畅庶几人心可得天变可回】质实【隆德殿在嘉德右门南即元极宝殿隆庆元年更名】

【丁巳】四十五年春二月勅修省

【帝以去冬无雷入春不雨京师农事可忧宫中露祷祭郊坛因勅羣臣实心修省是月二十一日雨雪降大学士方从哲吴道南言君之尊犹天也臣之有所祈於君犹之祈天也其为齎心而祝披悃而陈者视三农之望雨不啻过之而心力徒勤挽回莫効甚至疾呼痛哭而上若不闻累牍连章而上如不见是常人之所可必於天者臣不能得於君岂天可问而九重之

内不可问乎因择切要时事求次第举行不省至五月再勅修省】

镇抚司缺官狱囚久系多死

【大学士方从哲吴道南言今早入朝有百余人羣聚长安门外环跪号诉询为镇抚司监犯家属言本司理刑缺官无人问断监禁日久死亡相继是有罪者不得速正厥法无辜者不得早雪其冤乞即简补问官以便审录不省是年五月阁臣有司循例请热审亦不报】质实

【镇抚司锦衣卫初设镇抚司掌本卫刑名兼理军匠洪武二十年以锦衣卫多非法乃焚刑具出系囚送刑部审录诏内外狱咸归三法司罢锦衣狱成祖时复置寻增北镇抚司治诏狱成化间刻印界之狱成得专达不关白锦衣而以旧所设为南镇抚司专理军匠】

封福王常洵庶子由松为德昌王

【由松为常洵长子系帝孙仪仗全给】质实【神宗十年定郡王初封系帝孙仪仗全给系王孙者免盖宗室分封渐多势难遍给也】

三月振江西饥

【江西水灾留二监税额银二万两振济从巡按御史陈于廷请也是年两畿山东河南山西陕西湖广福建广东相继告灾廷臣有司请振率寝不报】

夏五月凤阳地震天鼓鸣

【甲戌乙亥两日同】

六月以先贤周惇颐後周汝忠袭翰林院五经博士【汝忠惇颐十七代孙】

秋七月癸亥朔日有食之

【是月戊辰夜云阴雷电网雹大如栗自西南来狂风骤起屋瓦俱震坏社稷坛门及东中门五凤楼东华门楼并毁】质实【东中门在中极殿东五凤楼即午门楼东曰左掖门西曰西掖门再东曰东华门】

贵州苗作乱巡抚张鹤鸣讨平之

【先是鹤鸣奏知府孙崇先守备孙开祚等擒斩逆苗于平洪边十二马头计一千二百名颗俘获六百余人及是复奏猺坪 朋?之捷黄土寨贼首老蜡鷄以八十房踞猺坪勾约集石头等寨贼首阿寅等各数十房推老蜡鷄为王贯鷺等为军门总兵等官凭险负固内监军安平道谢参政集诸营兵及都司张鹤翀等三路并进分夺三关贼据本?猖悍如故复令土舍王

国奇者用间招降仲罗童等设伏擒斩三百余人老蜡鷄死獠坪始靖】质实【张鹤鸣颍川人平洪边十二马头在洪舟江西岸属洪舟泊里长官司獠坪即捞坪峯攢如削上有仰天窝窝有九井平地可容数千人 朋?在獠坪南?後负河环山叠通三路路各有关】

吴道南罢

【道南遇事有操执通达政体颇负时望前年典会试举子有以代倩获第者汤宾尹嗾其党交章论之给事中刘文炳御史张至发攻尤力肆口诋譏道南不能堪言台諫劾阁臣职也二百年来有纠阁臣之言官无詈阁臣之言官臣辱国已甚请立罢黜帝为谪文炳于外言官疏救文炳复诋道南道南益求去杜门踰年疏至二十七上帝犹慰留会母丧乃归居二年卒】

御定资治通监纲目三编卷三十

卷三十一

钦定四库全书

御定资治通监纲目三编卷三十一

【起戊午明神宗万历四十六年尽庚申明光宗泰昌元年】凡三年

【戊午】四十六年春二月振广东饥

【以上年灾坎也】

三月振陕西饥

【四十五年陕西西安南寧等州县俱被灾以应解税监正耗银二万二千两延西管粮衙门赃罚银三千两并留筏税银一年分别振济】

夏四月京城壕水赤

【自正阳门外至宣武门约三里余河水尽赤朵如溃血经月乃止】质实【正阳门京城南曰正阳门元至元四年建曰丽正门明初因之正统四年改今名宣武门京城南之右曰宣武门元至元四年建曰顺承门明初因之正统四年改今名】

大清兵克抚顺

【时我太祖高皇帝亲率少骑兵二万进发临行书七大恨告】

【天其词曰我之祖父未尝损明边一草寸土无端启衅边陲害我祖父恨一也明虽启衅我尚欲修好设碑勒誓彼此毋越疆园越者见即诛之见而故縱殃及纵者明复渝誓言逞兵越界衔助叶赫恨二也明人於清河以南江岸以北每岁窃喻疆场肆其攘夺我遵誓行诛明负前盟贵我擅杀拘我广寧使臣纲古里方吉纳扶取十人杀之边境恨三也明越境以兵助叶赫俾我已聘之女改适蒙古恨四也柴河三岔抚安三路我累世分守疆土之衆耕田艺穀明不容刈获遣兵逐恨五也边外叶赫获毕于天明乃偏信其言特边使臣遗书诟詈肆行凌侮恨六也昔哈违劲叶赫二次来役我自报之天既授我哈违之人矣明又党之挟我以还其国已而哈建报被叶赫侵掠初呼伦诸国合兵侵我故天厌呼伦启衅惟我是眷今明助】

【天弃之叶赫抗天意倒置是非罔为剖断恨七也因此七大恨是以征之随告诸贝勒大臣凡俘获之人勿去衣服勿淫妇女勿离异其匹配拒战而死者听其死归顺者勿加诛戮严谕毕遂趋抚顺以四月甲辰昧熹围其城执一人追书谕道击李永芳降永若得书冠带立城

南门上言纳款事又今军士备守具我兵见之树云梯不移时登陴永芳遂出城降诚勿杀城中人并抚辑之於是抚顺东州玛根丹三城及台堡举共五百条悉下抚顺守城千总王命印死之乃徙城中人口归广宁总兵张承廕率师以万人往援分兵为三据险立誓以待】

【大军乘风奋击大破其营承廕及辽阳副将颇廷相海州参将蒲世芳游击梁汝贵皆战死士卒逃归者十无一二诸堡皆?时察罕胡土克闻及西部阿护妻璊达勒皆拥衆入边乘机邀赏羽书日数十至中外戒严帝初颇忧惧章奏时下不数月泄泄如故矣】质实【清河在闲元县东三十里源出三万卫东此分水岭南流经城东南十五里合小清河柴河在铁岭县北二里有堡在县东北六十里三岔堡名在】

【龙门卫东抚安堡名在钱岭县东南四十里抚顺城在承德县东南今与京接界城周三里门一东州在承德县东南一百十里周四里余玛根丹在盛京城东一百三十里王命印乾隆四十一年追谥节愍张承廕榆林卫人都督臣于乾隆四十一年追谥忠烈颇廷相蒲世芳梁汝贵俱乾隆四十一年追谥烈愍】

闰四月起杨镐为兵部左侍郎兼佥都御史经畧辽东【初征倭事竣三十八年起镐抚辽东袭兆给於镇安破之田生金劾其开衅时辽左多事镐力荐李如梅指复用为大将为给事中麻僖御史扬州鹤所劾镐疏辨乞休旋引去及是以辽警廷议谓镐熟谙边事起兵部侍郎往经畧时辽左之饷及兵以武政尚书薛三才言调登州兵一千五百名南京水陆二营兵三千名赴援并发内库银十万两饷军寻户科给事中官应震言所发内库十万两内五万九千两或黑如漆或脆如土盖为不用朽蠹之象当今边事孔棘多特发连成大捷则化无用为有用又金花银每岁一百二十万有奇正统前虽属左藏然会典载各边缓急取足其中嘉靖改肆太仓专以济边不许别项郡用皇上初年移入大内遂致太仓缺额兵饷日亏若使在内者槩从损发在外者槩引归还庶干边事有济疏入不报】质实【镇安堡名成化八年置在云州堡东金花银见正统元年扬州鹤濬县人】

日中有黑子

【是月丙戌至戊子三日有黑气出入日中摩尽经久不散】

五月贵州苗作乱巡抚张鹤鸣讨平之

【时贵州诸苗不靖在定广咸平则有阿县蒲三王安老寡整等在洪边则有王应科罗文戴廷鸾等在匀哈平越则有王三王汝臣王守武吴惟正吴起龙王维翰等在安笼一带则有即豹郎厥狠等俱招亡亡纳叛刼杀官民截留京饷道路阻絶鹤鸣俱命官遣将以次讨平之】质实【定广咸平定元程番武胜军安抚司地万历四年置州廉顺州本金筑长官司地万历十年置州今俱属贵阳府咸清卫洪武二十三年置今为镇宁州平坝卫洪武二十三年置今为平安县俱属安顺府洪边米氏洪边十二马坝地叶祜四年置闻州今属贵阳府安笼洪武二十三年置安笼守御千户所属寻安卫今属南笼府】

命杨镐以经畧兼巡抚辽东事寻以周永春代之【先是辽东巡抚李维翰於万历四十四年受任无岁不用兵当税使高淮朶削十余年军民方困雄翰庸才玩愒辽事大坏及趣总兵官张承廕往援抚顺败歿命维翰曰籍聽勘以镐兼巡抚事寻以太常少卿周永春擢右佥都御史为辽东巡抚时值丧败之後永春佐经畧调度军食拮据劳瘁越二年罢归】质实【李维翰睢州人】

赠故辽东总兵官李如松少保宁远伯

【如松为总兵时以土登寇辽东率轻骑远出捣巢中伏力战死帝痛悼令具衣冠归葬赠少保宁远伯立祠谥忠烈以其弟如梅代为总兵官授长子世忠锦衣卫指挥使掌南镇抚司仍充宁远伯勲卫复廕一子本卫指挥使世袭恤典优渥皆出特恩云】

六月京师地震

【先是闰四月山西地震历死五十余人及是月京师地震七月九月复震山西州县十有七及紫荆关偏头神池同日震甘肃红崖堡震声如雷辽东宽甸海盖间亦震】质实【神池堡名嘉靖十八年建今为神池县属宁武府红崖堡亦名仁功堡神宗二十七年建在今兰州北三百三十里】

筹辽饷

【户部奏辽饷会议三百万两今由帑已发一百万两南京户兵工部五十万两罔寺水衡八十万两共止二百三十万两此中未解者向多而数月未调兵安家诸费已及五十三万有奇前科臣条议役秀输贐则东省救荒曾行之裁衙役工食之半往岁征倭亦一行之乞允行帝即从其议】

复以赵焕为吏部尚书

【先是丁巳京察郑继之与署都察院尚书李志主其事考功郎赵士谔给事中徐绍吉御史韩浚佐之所去留悉出绍吉等意继之志受成而已齐人元诗教为大学士方从哲门生势尤张一时清流与党人异趣者斥逐殆尽即在籍亦不免大僚则中以拾遗善类为空至是继之以老去位元诗教以焕为乡人老而易制力引代继之焕年七十有七矣比至一县诗教指挥由是素望益损与继之并为时议所讥】质实【赵士谔吴江人】

秋七月

大清兵克清河堡

【是月丙午我大兵由鸦鹊关入围清河城守城副将邹储贤参将张】

【柿以兵万人固寺城上巨礮矢石俱发大军树云梯以登不避锋刃遂克之储贤旆皆战死其一堵墙礮场二城官民皆弃城遁乃毁二城尽迁其粮杀而还清河在四山之中东距宽甸南距□阳北距潘阳清河既失全远震动先是檄调山海明保定铁岭大同广宁开原诸路兵赴援尚未出关特赐镐尚方劔得斩总兵以下官镐乃斩清河逃将陈大道高炫徇於军至冬四方援兵始集】质实【鸦鹘关在清河东南关之东有喜昌口一堵墙在凤凰城北三百二十里城周三里有奇礮场在盖州卫西四十里今属盖平县邹储贤张旆乾隆四十一年追谥烈愍】

八月海运饷辽东

【时议行登莱海运军饷至辽山东巡抚李长庚言自登州望铁山西北口至羊头凹历中岛长行岛抵北信口又历兔儿岛至深井违盖州剥运一百二十里抵娘娘莒陆行至广宁一百八十里至辽阳一百六十里每石费一金部议以为便道行之及明年二月特设户部侍郎一人兼金都御史出督辽饷驻天津即以长庚为之奏行造淮船通津路议牛车酌海道截帮运议钱法设按臣开事例严海防九事时议岁运米百八十万石豆九十万石草二千一百六十万束银三百二十四万两长庚请留金花行改拆偕税课言臣考会计银每岁本色折色通计千四百六十一万有奇入内府者六百余万入太仓者自本色外折色四百余万内府六百万自金花好粒外皆丝绵布帛蜡茶颜料之类岁久皆朽败若改折一半无损于上有益于下他若陕西羊绒江浙织造亦当稍停一年济军国计帝报言金花籽粒本祖宗旧制内供正额及军官月俸所费不貲安得偕留其以天津通州江西四川广西一年税银尽充军费】质实【铁山在凤凰城西南二百二十里由登州新海口至金州铁山旃顺口五百五十里北信口复州卫西四十里有白沙州南为南信口北为北信口兔儿岛在盖州西南七十五里今在盖平县西南深井在盖州西南四十里今在盖平县西南】

九月加天下田赋

【户部以辽饷缺乏援征倭征播例请加派邑省正赋惟贵州地饶有苗变不派其浙江十二省南北直隶照会计录所定田亩七百余万顷每亩权加三厘五毫实共派额银二百万三十一两有奇军务竣时即行停止从之】质实【浙江派银一十六万三千四百三十九两四钱三分八厘江西派银一十四万四百二两九钱四分四厘湖广派银三十三万三千四百二十两九钱一分一厘福建派银四万六千九百七十八两七钱五分二厘山东派银二十一万七钱四分五厘山西派银一十二万八千八百一十三两七钱四分五厘河南派银二十五万九千五百五十二两八钱三分一厘陕西派银一十万三千五百二十三两四分七厘四川派银四万七千一百八十九两六钱八分五厘广东派银八万九千九百一两七钱八分七厘广西派银三万二千九百两二钱六分一厘云南派银六千二百九十七两七钱五分五厘南直隶派银二十五万九千六百二十四两四钱四厘七毫北直隶派银十七万二千二百九十二两六钱五分八厘七毫五县】

茂陵灾

【宪宗陵也是年闰四月丁丑夜殷家庄堡平顶山堡台杆八同时火甲申顺阁敬膳房俱火】质实【殷家庄堡在开原平顶山在今海城县西南十里暖阁廐膳房在御马监之南西向】

冬十月星隕化为石

【是月辛酉昏有星如斗隕于南京安德门外声如霹雳化为石重三十一斤景善乡亦坠星石二重一百三十筋】质实【安德门应天府外城周一百八十里西南六门曰夹江双桥凤台驯象大安德小安德景善乡在江宁县南】

彗星见于氐

【星长丈余捐东南浙移西北埽犯太阳守星入亢度埽北斗璿玑文星五车逼紫微垣右凡三十四日乃?又先是长白星见东南濶尺余长二丈余东至轸西至翼十九日而?与彗星为二】

飭修省

【大学士方从哲言皇上遇灾而惧欲与臣工共图修者以冀挽四古帝王克谨天戒亦不过是但青衣角带停刑禁屠皆文也必如臣所请郊庙临御补阙部台臣举废宥黜罢黜停织批发如液方为修省实政臣近窥皇上留心涖事加意用人其机已动但能扩而充之由一事以至事事由一人以至人人太平之治可致何但灾变足弭哉】

【己未】四十七年春正月彗星见

【见东南长数百丈光芒下射末曲而銳或曰蚩尤旗时方议进师识者以为兵败之徵】

二月杨镐誓师于辽阳分道出塞

【帝以四方援辽兵大集恐师老财匱下廷议方从哲与兵部尚书黄嘉善兵科给事中赵兴邦等发红旗日趣镐进兵镐乃分兵四道令总兵官马林出开原攻北督兵四万金事潘宗顔监其军而叶赫兵分路并进别监以都司窦永澄令总兵官杜松出抚顺攻西以总兵王宣赵梦麟为佐督兵六万兵备副使张铨监其军令总兵官李如栢出鸦鹘关趋清河攻南督兵六万兵备参议间鸣秦监其军令总兵官刘綎出寬甸攻东督兵四万以兵备副使康应乾监其军而朝鲜兵分路并进别监以都司乔一琦镐率各总兵官誓神明宣军令斩抚顺阵逃之指挥自云龙示衆为例于是月二十一日後分道出塞期三月一日会二道关并进】质实【二道关在今 与京城西黄嘉善即墨人马林蔚州人芳之子潘宗顔字士潜保安卫人王宣榆林人赵梦麟榆林人张铨字字衡沁水人乔一琦字伯珪上海人】

三月杨镐师败绩总兵杜松刘綎王宣赵梦麟皆战死【时天大而雪镐兵不前师期泄松欲立首功先渡浑浑河连克二小砦遂乘势趋萨尔浒谷口时我】

【太祖高皇帝在兴京西南两路侦卒以明兵逼境告太祖高皇帝曰明使伐先见南路有兵者诱我兵而南也其由抚顺西来者必大兵急宜拒战乃率衆贝勒大臣统城中兵出大贝勒前行侦卒又以明兵出清河路来告大贝勒曰清河路反兵未能骤至宜先往抚顺以遂敌兵遂与达尔汉侍卫呼尔汉集以待时我】

【太宗文皇帝称四贝勒以祀事後至谓大贝勒曰我筑城夫役在界藩山倘明兵奋力攻之奈何宜急进于是令军士擐甲趋至太兰冈大贝勒与扈尔汉欲驻兵僻地】

【太宗文皇帝曰正宜耀兵示敌壮我士卒夫役之胆何以僻为遂督兵赴界藩先是以精骑四百护筑城夫之在界藩山者闻私等将至伏萨尔浒谷口以待及松兵过半尾击之至渡口与筑城夫役合据界藩之吉林崖时松结营于萨尔浒山而自引兵围吉林崖我兵下击一战而斩百人及衆贝勒兵至益千人登山助击而以右翼四旗自下夹攻别以左翼四旗攻松别将于萨尔浒山上】

【太祖高皇帝至令以右二旗益左翼合六旗兵进攻萨尔浒军大战破之死者相藉所遣助吉林崖者自山驰下击松军二旗兵亦纵横夹击松与宣梦麟皆死全军尽覆积屍蔽浑河而下如流漸焉时马林率开原兵出三岔口闻松军败恐甚止尚间崖结营自固濬壕三匝外列火器以骑兵环卫其监军潘宗顏别以万人营斐芬山距尚间崖三里许而松之後队游击袭念遂李希泌统步骑万人驾大车持坚楯别营于翰琿鄂谟地大清兵先以五百人步乘之研其车輶继引骑士冲击明兵大溃念遂希泌歿于阵时我太祖高皇帝知林军营尚间崖迅往会大贝勒明兵方布阵我军将据山巔而林营内兵已与壕外兵合我兵即下马少战大贝勒以怒马斫阵二贝勒三贝勒与诸台吉各奋勇兢进遂败明兵斩获无算明副将麻岩及大小将士皆阵歿林仅以身免】

【太祖高皇帝复集大军驰攻双芬山宗顏与游击窦永澄守备江万春通判董尔励及所部健丁冲突鏖战自晨午力竭不支全军尽陷叶赫贝勒锦台什布扬古约助明与宗顏合至开原十固城闻明兵败大惊遁去时刘綎李如栢两军先後近逼兴京于是留兵四千待如栢军】

【太宗文皇帝偕大贝勒三贝勒进御刘綎甫出瓦尔喀什窃集而綎率精銳二万至过深河克三砦时大清兵守棟鄂地闻綎军至逆战綎犹不知松林军覆整衆进将登阿布达哩冈大清兵麾衆先登而别以一军趣綎西冈上军自高驰下奋击綎军趋綎西者复从旁夹击已乃张松旗帜被其衣甲以给綎既入营中大乱太宗文皇帝乘胜追击与綎遇綎力战死綎养子刘招孙突围手格杀数人亦死两营兵万余皆殲綎监军康应乾与乔一琦所统朝鲜兵营于富察察之野甲仗坚銳】

【太宗文皇帝同衆贝勒至督兵进攻明兵朝鲜兵竞发火器忽风大作扬沙石烟尘返扑敌营大清兵乘之发矢如雨又大破其衆殲二万人应乾遁去一琦奔朝鲜我兵逐之朝鲜元帅姜功烈诣营降一琦自縊死杨镐闻三路兵败急檄李如栢军还如栢等乃自呼兰路遁归我哨兵二十人见而鸣螺呼噪击杀四十人明兵夺路走相蹂践死者复千余是役也明文武将吏前後死三百一十余亡夹马驼甲仗无算败书闻京师大震】质实【浑河即古小辽水自边外流入经今 興京东北境西流至奉天府承德县南入太子河太蘭岡在今盛京城东百九十里界藩山即铁背山在今 兴京西北上有界藩城萨尔浒山在今 兴京西北二十里吉林崖在今奉天府海澄县西明置三岔关今废尚关崖在今盛京城东一百五十五里斐芬山在今 盛京城东一百六十里斡琿鄂谟在今盛京城东百三十里瓦尔喀什窝集在今 盛京城东三百八十里深河寬甸东北由镇江路二百五十里为深河子皆小径流林棟鄂在今 盛京城东南三百八十里阿布达哩岡在今 盛京城东四百三十里呼兰路在今盛京城东二百五十里刘綎历平九彩蛮缅甸罗雄朝鲜倭播建昌诸寇大小数百战威名甚着所用】

【鑌铁刀百二十筋天下称为刘大刀乾隆四十一年追諡忠壮松在都督杜桐弟奋勇敢战历着辽功与龚念遂李希泌乔一琦均于乾隆四十一年追諡忠烈赵梦麟王宣乾隆四十一年追諡烈愍潘宗顏熟】

【天文兵法为诸生即究心时事有筹边赋反韬畧十二对癸丑进士後户部主事条具辽事芹仪时论黷之遂往督辽饷会开原道缺补用立法严密四境龙然阴知马林不可共事未出师前遗书杨镐言林庸懦不可当一面乞易别帅而以林遥为後应庶有济否不惟悞国恐身亦难保至是果如其料战歿之日骨糜肢裂其状尤惨帝为赐祭葬立祠諡节愍赠光禄寺卿廕子兆环锦衣卫世袭百户乾隆四十一年复与实永澄董尔励张万春同追諡节愍萨尔浒旧作撒尔湖今改】

发明【明当师老财匱之时忽徵四方援兵号称四十七万之衆以兴大举宗社臣庶子孙安危之机在此一役而乃委之败绩诡功之杨镐可谓倚任非人矣迹其誓师发令分为四路以出意在铺张行阵而曾弗预筹战守之方以致师期先泄纪律不明宿将殲于行间全军覆于原野固人谋之不臧而实】

【天心之厌夫明祚也恭惟太祖高皇帝神武布昭】

【睿枢默运仰承昊綽祇迓】

【鵷麻盖上苍之眷顾我】

【大清者至此时而积庆弥笃况夫圣嗣贤臣同心一德天人協应佑启无强故于斯役也步代止齐决策制胜之宜莫不妙合韬铃适符机要五日之间克成亘古以来未有之伟绩至令读史者辑胜国之遗缩益欽祖烈神功垂谟永永而我】

【皇朝亿万载之丕基王业实肇造於此云】

夏四月饬楚蜀黔三省协防苗患

【兵部尚尽黄嘉善言楚蜀黔三省俱邻苗亢然楚蜀辖苗虽多各有土司为之领袖不能侵入其势犹缓若黔则界于二省苗夷之中辖苗虽少逼近巢穴以故掠堡焚屯罹祸为甚及其三省失事又互相推诿竟未有擒缉以靖匪茹者是黔以一省而独受三省红苗之害也今黔抚张鹤鸣议三省各照所辖苗寨要隘委官拨兵严加防守分辖属以专责成究出劫以惩横暴至不得已而用兵三省亦各照苗寨多寡???出兵饷则合各省之力自成一鼓之功应今湖北道行永保二宣慰司四川川东道行西平邑石四土司贵州即令铜仁镇可抚则同抚可守则同守可征剿则同征剿防守视失事之有无功罪视地方之安否三省毋得岐视推诿从之】质实【永顺宣慰司洪武二年置今为永顺府平茶洞长官司洪武八年置属酉阳宣慰司十七年直隶布政司邑梅洞长官司属酉阳宣慰司石碛宣慰司洪武八年为宣抚司天启元年陞宣慰司】

京师水复赤

【宣武门响闸至东御河水俱赤】

福建盗起巡抚王士昌讨平之

【漳州府奸民李新僭号洪武结海寇袁八老等率其党千余人流劫焚毁势甚猖獗巡抚王士昌檄副将纪元宪沈有容等率官兵讨平之】

五月盔甲厰灾

【是月癸酉日事也时边事日急马匹盔甲器械不敷兵士恤家行粮诸需均缺兵部尚书黄嘉善议各直省絶军变产银缺官柴马银拖欠太常寺马价银皆宜全解臣部又各直省税契银布政司吏承纳班银各州县仓谷平糴一半折价银各运司积余盐课银又如中州之河工节省银兑军买米樽节银王府宗藩勲臣土司议助银内外各官捐俸银皆半兵部为恤家买马之用现在暂偕太仆寺银十万两南京兵部银十万两南京户部银十万两南京工部银十万两早购马匹以济急需其应造盔甲器械听工部议动项连造务祈兵到即给以便训练从之】质实【盔甲厰在明照坊炮作河东後为灵官庙】

六月我

大清兵克开原

【时我太祖高皇帝亲率兵四万取开原军行三日天雨河涨乃遣兵百人阳使趋攻济阳

潜侦开原路无雨不泞遂进军旦溥开原城明总兵马林副将于化龙权道事推官郑之范参将高贞游击于守志守备何想官等婴城守城上列兵少许余皆陈四门外】

【大清兵设楯梯进攻而以偏师掩击东门外所陈兵败之明兵争入城阨拥于门大清兵夺门搏战而攻城之兵云梯未布即登跃上城城上兵皆溃城外三门兵见城破大鸾奔窜四围悉遇堵御不得渡尽殲之郑之范先遁得脱林化龙贞守志懋官皆战歿时】

【太祖高皇帝登开原城楼侦者以铁岭卫有兵三千来援驰告诸贝勒率兵迎战明兵望尘奔却追斩四十余人而还驻军开原三日】质实【马林先谪充为事官令仍守开原乾隆四十一年追諡忠烈子然熠俱随】

【父殉节于化龙高贞于守志何懋官乾隆四十一年俱追諡烈愍】

以熊廷弼为兵部侍郎兼右佥都御史经畧辽东【廷弼前按辽赵揖李成梁议弃六堡宋一韩论之下廷弼覆勘其得弃地驱民状劾两人罪及先任按臣何尔健康丕扬党庇疏竟不下时有诏兴屯廷弼言辽多旷土岁于额军人万中以三分屯种可得粟三十万石帝优诏褒美命推行于诸边边将好轻师启衅廷弼言防边以守为上缮垣建堡有十五利奏行之在辽数年杜馈遗核军实按劾将吏不事姑息风纪大振及杨镐既丧师起廷弼为大理寺丞兼河南道监察御史赴辽宣慰军民廷弼方家居闻命昼夜驰二百余里赴阙候勅书关防不即给上疏言辽东军民及调来蓟保宣大甘延川浙援辽官军皆皇上守辽御敌良民赤子也无辜而驱死于一年之内者十余万人或全城死或全营死或全寨死或全家死军散之日辽渰余民放声大哭魂魄虽收头颅犹寄人有百死而无一生有千愁而无一乐家家抱怨在在思逃皇上忍不为惻惻心动乎皇上此时即不下罪已之诏悔制御之失策痛自刻责以上回天心下挽人意而亟付尺幅之纸畀臣宣谕吊死问伤拊循慰恤以见皇上之念辽救辽而不肯忘辽弃辽也则念辽之父老子弟与援辽之官兵人等谁不感激泣下拭泪而相告曰吾君哀吾侪之死有如此吾君怜吾侪之死有如此吾君之念辽不忘辽救辽而不弃辽也有如此又谁不忠义感慨捐糜围报愿出身以投伍出赀以佐军出死力以制敌而顾乃悠悠忽忽汉不关意一至于此臣恐辽人之灰心解体溃不可收于一旦也皇上亦可憐此半通之纶方寸之符不早属臣以慰此一方之人耶是行也君恩为重臣命为轻洒一腔之血于朝廷付七尺之躯于边塞惟愿早给出关刻期报命俾辽人感激成知德意时廷议以廷弼尝按辽熟辽事令代镐为经畧未出京我】

【大清兵已克开原马林败歿廷弼上言辽左京师肩背河东辽镇腹心开原又河东根本开原今已破则北关难保朝鲜亦不足恃辽渰何可守也乞速遣将备刍粮修器械毋窘臣用毋缓臣期毋中格以阻臣气毋旁挠以掣臣肘毋独迫臣以艰危以致误臣误辽兼误国也疏上报允赐上方剑以重其权廷弼乃行】质实【北关在奉天府叶赫城西北赵楫山陰人大与籍宋一韩陈州卫人何尔健曹州人】

秋七月我

大清兵克铁岭

【是月丙午大清兵攻围城岭城城外各堡兵俱退入城不得入者悉溃散因进攻城之北隅明游击喻成名文凤鸣李克泰督兵拒守枪礮矢石交下乃登云梯毁陴堞摧锋突入城上兵惊溃成名凤鸣克泰阵歿余衆尽殲时总兵李如桢守铁岭铁岭故李氏宗族坟墓所在会其兄如栢辽京其族党部曲高赀者悉随之西城中为空如桢以孤城难守还屯浑阳及铁岭被国如桢拥兵不救城遂失】质实【喻成名史凤鸣李克泰乾隆四十一年俱追諡烈愍李如桢成果第三子由父廕为指挥使屡加至右都督并任锦衣掌南北镇抚司列环卫者四十年及兄如栢以呼蘭关败革总兵任辽人谓李氏世镇辽东非再用李氏不可巡抚周永春以为言兵部尚书黄嘉善以如桢名上遂接镇辽东如桢籍父兄势又以锦衣近官不居人下未出关即遣使与总督压可受讲钧礼朝议譁然既抵辽守铁岭城失後言官交章论劾经畧熊廷弼亦论如桢十不堪乃罢任天启初言者复力攻下狱论死崇祯四年特免死充军】

经畧熊廷弼安辑辽阳

【廷弼甫出关铁岭复失浑阳及诸臣堡军民一时尽窜辽阳汹汹廷弼兼程进遇逃者谕令归斩逃将刘遇节等三人以祭死节之士诛贪将陈伦劾罢总兵李如桢督军士造战车治火器濬濠缮城为守御计法严今行数月守备大固又请集兵十八万分布靉阳清河抚顺柴河镇江诸要口使首尾相应小警自为堵御大敌互为应援更选精悍者为游徼乘间掠零骑扰耕牧徐议相机用兵帝从之廷弼初抵辽即躬自遍历自虎皮驿抵浑阳後乘雪夜赴抚顺时兵燹後数百里无人迹廷弼祭诸死事者耀兵奉集相度形势而还所至招流移缮守具分置士马由是人心始安】质实【柴河堡名在今奉天府铁岭县东北以近柴河名镇江堡名在今奉天府凤凰城东南为朝鲜分界处虎皮驿一作十里河站在今奉天府承德县南与辽阳州接界奉集辽县後废今为堡在今奉天府承德县东南】

廷臣伏文华门请发章奏

【大学士方从哲率大小臣工于文华门合词叩乞下营总协蓟辽总兵及閱视科臣增兵发饷等章奏大奋乾断立赐批行不报】

八月

大清兵灭叶赫

【时叶赫贝勒锦台吉居北关东城布扬古居西城我大清以萨尔浒之役叶赫助明故定计攻讨遣一军图】

【布扬古而以大兵围锦台吉士卒冒牛皮蔽矢石奋击破其城锦台吉就执布扬古无援亦穷蹙出降於是叶赫属城俱下】

杨镐有罪逮下狱

【初四路总兵之败御史杨鹤劾镐失机帝不问无何开原铁岭相继失言官交章劾镐乃逮下诏狱论死至崇祯二年伏法】

九月廷臣再伏文华门请帝视朝发章奏

【时边警日至方从哲请帝出御文华殿召见羣臣面商战守方畧吏部尚书赵焕率廷臣诣文华门固请帝临朝议政抵暮遣中官谕之退而诸军机要务废阁如故焕等复上疏趣之且作危语曰他日蓟门蹂躏铁骑临郊陛下能高枕深宫称疾却之乎帝深嗟焉】

遣给事中姚宗文閱辽兵

【初宗文丁忧归还朝欲补官而吏部题请诸疏率数年不下宗文患之假招徠西部名属当事荐已疏屡上不得命宗文计穷致书熊廷弼令其代请廷弼不从宗文怨之後夤缘复吏科及是命閱视辽东土马】

徵土司援辽

【经畧熊廷弼以川兵精整可用请今湖广宣慰司兵八千四川永宁宣抚司兵五千酉阳宣抚司兵四千石砭宣抚司兵三千令各帅亲率而以夙将为大帅统之向来土司止于附近省分调遣故官无加衔之例兵无安家之例今自西南极于东北道远疲苦体恤当周土司正官应加衔以示优异并给安家银两以示鼓舞从之】

发明【廷弼经畧蓟辽时辽事已败壤不可复振其初意在姑为存抚以养兵息民尚为能识时务乃为援辽起见忽徵蜀黔楚三省土司则殊少算矣考是年四月黄嘉善以黔省界连楚蜀苗穴奏令防协是土司自顾且不暇焉能望以万里征调之余出死力以效疆场而供防戍厥後奢崇明酿乱衆噪于中途全蜀几为震动患滋数载此实有以启之虽石砭一军驰驱久効而欲以西南弱旅支大厦于将倾亦可谓愚而不知量者哉】

冬十二月再加天下田赋

【姚宗文请于旧加之外以明年一年为限再于直省田地接亩加派于是复加三厘五毫增二百万有奇】

镇江寬甸巖阳清河新募援兵溃

【辽阳人刘国缙先为御史坐大计谪官辽事起廷议用辽人遂以兵部主事赞重军务国缙主募辽人为兵所募一万七千四百余人分置镇江寬甸巖阳清河等处及是清河兵全伍

散去镇江寬甸霰阳亦逃亡过半廷弼闻于朝帝切责国縉今廷弼设法查拿处置由是国縉益怨廷弼】质实【刘国縉泰和人】

【庚申】四十八年春正月朝鲜乞援

【先是朝鲜以兵助杨镐战为我大清兵所败兵将或降或降歿国王李瑋告急诏加优恤朝鲜贡道添兵防守诏镇江等处设兵将今经畧熊廷弼调委及是时我】

【大清兵既破叶赫降蒙古宰桑等进攻朝鲜瑋上疏乞救畧言开已设兵毛牛寨万遮岭欲畧寬甸镇江等处寬甸镇江与小邦之昌城义州诸堡隔水相望孤危非常若从霰阳境上鸦鹘国取路遶出凤凰城竟镇昌城俱莫自保内而辽左八站外而东江一城声援阻絶望速调兵共相犄角以固边防时辽镇塘报传称朝鲜已归歟大清朝议遂谓瑋阳卫陰顺宜遣官宣谕或命将监护其说纷拏瑋疏辨二百年忠诚事大死生一节词极摯礼兵二部乞降勅晓谕以安其心帝是其议然勅令陪臣齐往不遣官也】质实【朝鲜贡道初由定辽毋涉海从天启元年改自海至登州直辽京师成化十七年朝鲜使臣归国道经凤凰山下遇掠奏乞於旧路朝别开一路以便往来因筑凤凰城周三百八十步】

二月日暈

【是月癸丑午时日生交暈如连环下生背气一道黄白色左右生戟气青赤色白虹弥天良久始散大学士方从哲言日生交暈背气戟气并见占者谓戈戟相伤之象人心皇皇皆以边事为忧皇上宜如何恐惧修省乃屡蒙传示圣躬不安见在调摄若惟恐臣下有所祈请者不思臣下之奏请即可少缓朝廷之机务岂容久停边方之警报岂容暂止惟望即日召见羣臣讲求边畧简发吏部推官各本大僚巡抚利道各官及都察院题差尽赐允用庶人心可慰天变可田不报】

地震

【是月庚戌云南及肇庆惠州荆州襄阳承天沔阳京山皆震】质实【京山隋县明属承天府今属安陆府】

三月复加天下田赋

【时经畧熊廷弼言四十七年十二月赴户部领饷二十万两十二月领饷十万两四十八年正月领饷十五万两俱与发给现时库银仅二万余两止足正月未领粮料支用各仓粮革止数于石尚不敷补支去年十二月未领之数岂军到今日尚不饿焉到今日尚不瘦不死而边事到今日尚不急耶军兵无粮如何不卖袄裤什物如何不夺民间粮塔如何不夺马料养自己性命马匹如何不瘦不死而户部犹漠然不动念得无销兵太连酿祸太剧耶疏入下户部等衙门议令各直省田地每亩再加派二厘以敷兵工二部之用从之通前二次加派共

增九厘赋五百二十万遂为岁额所不加者畿内八府及贵州而已】

禁白莲无为诸邪教

【前年礼部左侍郎何宗彦去位署印无人大学士方从哲屡以右侍郎孙如游诸及是始得命部事丛积如游遣决无滞时白莲无为诸教盛行宗彦尝疏请严禁如游复申其说帝从之】

夏四月皇后王氏崩

【后性端善事孝定太后光宗在东宫危疑者数矣调护备至郑贵妃额罢后不较也正位中宫者四十二年以慈孝称及是崩諡孝端大学士力从哲诣思善门哭临毕召见弘德殿跪语良久从哲请补阁臣用大僚下台谏命帝许之从哲叩头出复如故】质实【弘德殿即乾清之西煖阁】

石砮女土官秦良玉请益兵援辽

【良玉饶胆智善骑射兼通词翰仪度嫺雅而驭下严峻每行军发令从伍肃然所部号白杆兵为远近所惮尝从征播州有功辽事急徵良玉兵良玉因遣兄邦屏弟民屏以数千人先行朝命赐良玉三品服授邦屏都司民屏守备良玉奏言所将之兵止三千余恐军声不振欲调在川土兵三千五百余名成一臂之力再乞假给战车火器半马半步奇正相兼庶臣志可展报可】质实【秦良王忠州人嫁宣抚司马千乘千乘死代领其衆】

秋七月李如桢有罪免

【河南总兵李如桢自铁岭失事後仍许戴罪立功熊廷弼劾其将懈士离请罢如桢以李怀信代且云开原道金事韩原善初至辽阳即欲请兵三万往复开原臣壮其志而无兵可遣请令驻劄浑阳属以专任一面督同诸将共图浑阳战守事宜一面招抚逃亡收拾军马器械等项为恢复之备从之】

帝崩

【先是帝寝疾不食者半月皇太子未得见给事中杨涟偕诸给事中御史走谒方从哲御史左光斗趣从哲问安从哲曰帝讳疾即问左右不敢传涟曰昔文潞公问朱仁宗疾内侍不肯言潞公曰天子起居汝曹不令宰相知将毋有他志速下中书行法公诚曰三问不必见亦不必上知第令宫中知廷臣在事自济公更当宿阁中从哲曰无故事涟曰潞公不诿史志听乎此何时尚问故事耶越二日从哲始率羣臣入问及帝疾亟太子尚踌躇宫门外涟与光斗遣人语东宫伴读王安曰帝疾甚不召太子非帝意当力请入侍尝药视膳薄暮始还太子深纳之至是大浙召英国公张惟贤大学士方从哲尚书周嘉谟李汝华张问达黄克缙黄嘉善

侍郎孙如游等于弘德殿勉诸臣勤职辅理嗣君越二日崩年五十有八】质实【扬涟字文孺应山人左光斗字遗直桐城人张惟贤辅七世孙周嘉谟字明卿汉川人李汝华字茂夫睢州人王安雄县人初隶冯保名下神宗二十二年陈矩荐为皇太子伴读】

以遗诏发帑金百万充边赏罢矿税榷税及监税中官越三日再发帑金百万犒边

【辽左缺饷羣臣请发内帑帝频以不足为辞自四十四年发三十万後四十七年三月後令搜括太后宫累年积蓄备赏银三十六万两给边矿税榷税屡经廷臣请罢不允惟四十二年二月减各省税课三分之一及是太子奉遗诏均及之朝野盛动】

【庚申】光宗贞皇帝泰昌元年【是年八月以前为神宗四十八年八月以後为光宗泰昌元年从当时廷议据实分叙以存光宗之统与前例一年两系者不同】

秋八月丙午太子常洛即位

【大赦蠲直省大灾租赋礼部侍郎孙如游请建东宫帝纳之寻以皇太子体弱谕缓册期】

太白犯太微垣

【是月丙午朔帝即位日也二日丁未白气夜见如匹练穿牛女虚危历轸至翼良久乃散五日庚戌东方有流星大如盖青白色起螣蛇东入奎宿二小星随之六日辛亥荧惑犯太微古将八日癸丑填星犯井】

起南京吏部郎中邹元标为大理寺卿

【初元标以吏部员外郎调南京三年移疾归久之起本部不赴旋遭母忧里居讲学从游日衆名高天下中外所荐遗侠凡数十百上莫不以元标为首卒不用家食垂三十年光宗立召拜大理卿未至进刑部侍郎吏部尚书周嘉谟奏列建言得罪诸臣王德完等三十三人於是王德完孟养浩鍾羽正满朝荐等悉起部寺诸官】

以史继偕沈?为礼部尚书兼东阁大学士预机务【神宗末方从哲独当国诸补阁臣疏十上始命廷推?与从哲同里相善给事中忬诗教等缘从哲意以?及继偕名上疏未发至是始召用之时二人俱在籍?于明年六月至继偕明年十月始至?官翰林时尝授内侍书刘朝魏进忠皆其弟子既入阁密结二人奏言辽左用兵臣尝募东阳义乌诸邑及扬州淮安材官勇士二百余请以勇士隶锦衣卫而量授材官职进忠朝方举内操得?奏大喜诏锦衣官训练募士授材官王应于等游击以下官有差?又奏募兵後至者复二百余人请发辽东四川军前亦从之】质实【义乌汉乌伤县唐改名明属金华府今因之沈?字铭缜乌程人魏进忠河间肃宁人即忠贤】

辽东旱

【巡抚周永春言辽地瘠遇旱援兵驻处柴买维艰请旌劝本镇输助官民凡输粮二百以上至千石输银一百两至五百两及牛马车辆革来之价称是者分别进级录叙若输粮五千石银一千五百两以上者官为建坊表异从之】

起用前御史刘光复为光禄寺丞

【先是于神宗朝永不叙用兹以特旨起之】

台州兵噪

【浙江兵以征调旁午饷精不继五年之中譁者再至是以水陆营把总哨官单道亨杨思勲等贪渔腾谤备倭把总陈泰阶听谗淫刑各兵羣噪而起入泰阶署毁公座良久乃散】

帝有疾

【初郑贵妃侍神宗疾留居乾清宫及帝嗣位犹未移惧帝以福王事衔已进珠玉及美姬八人瞰帝知选侍李氏最得帝宠因请立为皇后选侍亦为贵妃求封皇太后乙卯帝不豫召医官陈玺等舛视丁巳帝力疾御门以神宗遗命趣举封后礼方从哲即以命礼部礼部侍郎孙如游疏言以配而后者乃敌体之经以妃而后者则从子之义故累朝非无抱衾之爱终引割席之嫌者以例所不载也皇贵妃事先帝有年不闻倡议于生前而顾遗诏于逝後岂先帝弥留之际遂不及致详耶且王贵妃诞育殿下岂非先帝所留意者乃恩典尚尔有待而欲令不属毛雒里者得母其子恐九原亦不无怨恫也郑贵妃贤而习于礼处以非分必非其心之所乐书之史册传之後禩将为盛代典礼之累且昭先帝之失言非所以为孝也中庸称达孝为善继善述义可行则以遵命为孝义不可行则以遵礼为孝臣不敢奉命议乃寝己未内侍崔文昇进泄药一昼夜三四十起都下纷言为贵妃所使帝由是委顿羣情疑驳外家王郭二戚晚遍谓朝士泣愬宫禁危急状言郑李文固甚包藏祸心于是给事中杨涟御史左光斗昌言于朝与吏部尚书周嘉谟以大义贵贵妃兄子郑养性趣贵妃移宫贵妃恐即移居慈宁养性亦请封还皇贵妃封后成命从之涟遂劾文昇用药无状畧曰贼臣崔文昇不知医不宜以宗社神人托重之身妄为尝试如其知医则医家有余者泄不足者补皇上哀毁之余一日万几于法正宜清补文昇反投伐剂然则流言藉藉所谓兴居之无节侍御之蛊惑必文昇藉口以盖其误药之奸冀捧外庭攻摘也如文昇者既益圣躬之疾又损圣明之名文昇之肉其足食乎臣闻文昇调护府第有言不闻用药谬误皇上一用文昇倒置若此有心则藿粉不足偿无心则一误岂容再误皇上奈何置贼臣子肘腋间哉刑部主事孙朝肃徐仪世御史郑宗周上书方从哲责以用药乖方请调护圣躬速建储贰从哲候安因言用药宜慎帝褒答之】质实【选侍李氏时宫中有二李选侍人称东西李此为西李其东李尝抚视信王後为容魏所间害愤郁而卒王郭二戚晚谓帝生母王氏皇后郭氏家也崔文昇郑贵妃宫中内侍光宗立陞司礼监秉笔掌御药房孙朝肃常熟人徐仪世宜兴人郑宗周文水人】

以何宗彦刘一燝韩爌朱国祚并为礼部尚书兼东阁大学士预机务召叶向高复入阁

【时内阁止方从哲一人史继偕沈?尚未至帝遂复有宗彦等命而宗彦国祚向高亦俱在籍惟一燝爌入直明年六月宗彦国祚至十月向高至复为首辅】质实【何宗彦字君美随州人朱国祚字兆隆秀水人】

召对英国公张维贤大学士方从哲等于乾清宫命皇长子出见

【帝疾甚召英国公张维贤大学士方从哲刘一燝韩爌吏部尚书周嘉谟户部尚书李汝华礼部侍郎孙如游刑部尚书黄克缙左都御史张问逵给事中范济世杨涟御史顾慥等至乾清宫东煖阁先是命锦衣卫宣杨涟廷臣疑涟且得罪及是帝御东煖阁见羣臣倚榻凭几注视涟久之时皇长子侍立帝命诸臣前连谕之曰朕见卿等甚慰从哲等请慎医药帝曰不服药十余日矣因谕册封李选侍为皇贵妃选侍挽皇长子入复推之出告帝曰欲封后帝不应羣臣愕然旋叩首退】质实【顾慥山阳人】

再召对张维贤方从哲等于乾清宫李可灼进红丸九月朔帝崩

【甲戌再召诸臣于乾清宫仍谕册立皇贵妃从哲等以册储原旨期宜改近早竣吉典以慰圣怀帝因顾皇太子谕曰卿等辅佐为尧舜又语及寿宫辅臣以皇考山陵对帝曰是朕寿宫诸臣言圣寿无疆何遽及此帝问有鸿胪寺官进祭者安在从哲奏鸿胪寺丞李可灼自云仙方臣等未敢轻信帝即命中使宣可灼至胗视具言病源及治法帝喜命进药诸臣出乃令可灼与御医及诸臣商榷未决辅臣一燝言其乡两人同服一益一损非万全药礼臣如游言此大关系未可轻投时复有旨趣进诸臣复入可灼调药进帝饮汤辄喘药进乃受所谓红丸者也帝称忠臣者再诸臣出宫门外候少顷中旨传圣体安善日晡可灼后进一丸出明日昧爽帝崩先是可灼来阁门言有仙丹欲具本进时辅臣方揭请慎药已谕之去而可灼夙从诸御医往来思善门与中使熟因已闻于帝从哲等弗能禁时选侍据乾清宫与心腹阉魏进忠谋挟皇太子自重羣臣入临为羣阉所格涟厉声责之得入临如礼一燝诘皇长子所在羣阉不应一燝大言谁敢匿新天子者东宫伴读王安入白选侍给曰第出即返遂扶皇长子趋出及门中官数辈追及挽衣请还涟呵退之一燝与惟贤遂掖皇长子升辇至文华殿羣臣叩头呼万岁还居慈庆宫择日登极时衆议未定有改请初三日有请於即日午时者涟曰今海宇清晏内无嫡庶之嫌父死之谓何含斂未毕冠冕临朝非礼也或言登极则人心安涟曰安与不安不在登极早暮处之得宜即朝委裘何害议定出过文华殿太仆寺少卿徐养量御史左光斗至责涟误大事唾其面曰事脱不济汝肉足食乎涟为悚然因语锦衣卫严缙骑内外防护时中外藉藉以李可灼误下刼剂为疑而方从哲拟旨赏可灼银五十两卫史王安舜首争之疏曰医不三世不服其药先帝之胙雄壮浮大此三焦火动宜清不宜助明矣红铅乃妇人经水陰中之阳纯火之精也投于虚火燥热之症不速之逝乎以中外危疑之日而敢以无方无制之药驾言金丹轻亦当治以庸医杀人之条而蒙殿下颁以赏格是不过借此一举塞外廷议论也疏入乃改票罚俸一年而议者蠭起矣御史郑宗周言往岁张差之变操椎禁门几酿不测祇以皇祖优容未尽厥罪故文昇尤而效之请寸斩文昇以谢九庙从哲拟旨下文昇

司礼监于是御史郭如楚冯三元焦源溥给事中魏应嘉太常卿曹珣光禄少卿高攀龙主事吕维祺等交章论崔文昇李可灼给事中惠世扬并劾方从哲有无君当诛者三封后之举满朝倡议执争从哲依违其间一也受刘逊李进忠盗藏美珠夜半密约任李选侍占居乾清二也曲庇崔文昇李可灼三也南京太常寺少卿曹珍亦请究医药奸党】质实【焦源溥字涵一三原人冯三元三河人魏应嘉兴化人曹珣字用韦益都人徐养量应城人郭如楚晋江人吕维祺字介孺新安人惠世扬清涧人】

选侍李氏移居啾鸾宫

【选侍欲专大权必欲与皇长子同居廷臣笺奏令先进乾清然後进慈庆皇长子还居慈庆宫时一爆奏言今乾清宫未净殿下请暂居此嘉谟曰今日殿下之身是社稷神人托重之身不可轻易即诣乾清宫哭临须臣等到乃发皇长子首肯涟语中官曰外事缓急在诸大臣调护圣躬在诸内臣贵有所归王安等踊跃称诺丙子尚书周嘉谟等合疏请选侍移宫左光斗上言内廷之有乾清宫犹外廷之有皇极殿也惟皇上御天居之惟皇后配天得共居之其余嫔妃虽以次进御遇有大故即当移居别殿非但避嫌亦以别尊卑也今大行皇帝宾天选侍既非嫡母又非生母俨然居正宫而殿下乃居慈庆不得守几筵行大礼名分倒置臣窃惑之且殿下春秋十六龄矣内辅以忠直老成外辅以公孤卿贰何虑乏人尚须乳哺而襁负之哉倘及今不早断借无养之名行专制之实武后之祸将见於今选侍得光斗疏大怒将加严谴数使宣召光斗光斗曰我天子法官也非天子召不赴若辈何为者选侍益怒邀皇长子议之皇长子深以光斗言为善趣择日移宫而首辅方从哲徘徊其问顾欲缓之刘一爆曰本朝故事仁圣嫡母也移慈庆慈圣生母也移慈宁今何日可姑缓耶至登极前一日杨涟复抗言选侍阳托保护之名隐图专擅之实今登极已在明日岂有天子偏处东宫之礼先帝圣明同符尧舜徒以郑贵妃保护之故致病体沈痼医药乱投人言藉藉至今抱痛安得不为寒心此移宫一事臣言之在今日殿下行之亦必在今日阁部大臣从中赞决毋容泄泄以负先帝凭几辅殿下之托亦在今日疏上涟复往趣从哲从哲曰待初九十二亦未晚涟曰天子无复往返东宫理选侍今不移亦未有移之曰此不可顷刻缓者内侍曰独不念先帝旧宠乎涟曰国家事大岂容姑息且汝辈何敢如是声彻大内于是一爆熿邀从哲请即日降旨竚立宫门以待选侍不得已乃移啾鸾宫皇长子复还乾清是时宫府危疑人情汹惧光斗与涟协心建议宸极获正朝野称为扬左】质实【啾鸾宫在仁寿宫门内傍有啾凤宫皆宫妃养老之处】

皇长子由校即位

【时廷议改元或议削泰昌弗纪或议去万历四十八年即以今年为泰昌或议明年为泰昌後年为天啓元年左右光斗请以今年八月以前为万历以後为泰昌明年为天啓从之初光宗在东宫时郑贵妃谋立己子数使人陰摭其过内侍王安善为调护贵妃无所得挺击事起安为属草下令旨释羣臣疑以安贵妃神宗大悦光宗即位尝劝行诸善政发帑金济边起用直言邹元标王德元等中外翕然称贤及是刘一爆韩熿周嘉谟等念内廷惟安足恃引与共事安亦倾心向之凡内阁吏部所奏请无不从发内帑抑近幸搜拔贤才中外欣然望治】

赐太监魏进忠世廕封乳母客氏为奉圣夫人

【初进忠隶司礼监掌东厰太监孙暹帝为皇大孙进忠谨事之孝和皇后帝生母也时为王才人进忠夤入宫典膳因魏朝以结王安朝先与帝乳媪客氏私即所谓对食者及进忠入亦通焉客氏遂薄朝而爱进忠两人深相结帝嗣位进忠客氏并有宠封客氏奉圣夫人廕其子侯国兴弟客光及进忠兄钊并锦衣千户寻自惜薪司迁司礼监秉笔太监先是进忠直东宫有道士歌于市曰委鬼当头立茄花满地红委鬼谓魏茄则折其字为客也及是客魏始用事盖已有先兆云】质实【客氏定兴民侯二妻】

谕内阁暴选侍李氏罪

【选侍移宫虽迫侍养甚备会宫奴刘朝田诏等于移宫时盗内府秘藏过乾清门仆金宝坠地帝怒下法司案治诸阉惧构蜚语谓选侍投环皇八妹入井荧惑朝士御史贾继春信之即上书内阁言新君御极之时不当导以违忤先帝逼逐庶母俾先帝玉体未寒不能保其姬女于是左光斗上言选侍既移宫後当存大体捐小过若使宫闱不安便于国体有选伏乞选召各部九卿科道面谕以当日避宫何故今日调御何方不得凭中使传旨正刘逊李进何法其余槩从宽典疏入传谕内阁朕劫冲时选侍气凌圣母成疾崩逝使朕抱终天之恨皇考病笃选侍威挟朕躬要封皇后朕暂居慈庆复遣李进忠刘逊等命每日章奏先奏选侍方与朕覽朕令奉养选侍于哱惊宫仰遵皇考遗爱无不体悉其田诏等盗库首犯事干宪典原非株连可传示遵行辅臣方从哲读谕惊愕具揭封进言皇上既仰体先帝遗爱不宜暴其过恶传之外廷帝不允】质实【贾继春新乡人】

冬十月哱鸾宫火

【帝谕选侍皇妹俱无恙寻给事中周朝瑞以继春前揭为生事致继春再揭有伶仃之皇八妹入井谁怜嫺寡之未亡人雉经莫诉之语杨连恐继春说遂滋亦上疏具陈移宫始末且言选侍自裁皇八妹入井蜚语何自恐酿今日之疑端流为他年之实事臣安敢无语帝优诏褒涟复申谕羣臣数选侍之过言前因殿崩圣母自度有罪每使宫人窃伺不今朕与圣母旧侍言有辄捕去朕之苦衷外廷岂能尽悉因责继春妄生谤议且言朕今停选侍封号以慰圣母在天之灵厚养选侍及皇八妹以遵皇考之意尔诸臣可以仰体朕心矣时帝深恶继春将加严谴刘一燝力救乃止】质实【周朝瑞南城人】

葬定陵

【諡曰范天合道哲肃敦简光文章武安仁止孝显皇帝庙号神宗孝端皇后祔】质实【定陵在昌平明北大路山距昭陵北一里自昭陵五空桥东二百步分北为定陵】

【明史赞曰神宗冲龄践阼江陵秉政国势几于富强继乃因循牵制晏处深宫纲纪废弛君臣否隔于是小人好权趋利者与名节之士为仇讐门户纷然邪党滋蔓在廷正类无深识

远处以折其机牙而不膳愤激交相攻讦以致人主蓄疑贤奸杂用溃败决裂不可振救论者谓明之王实亡於神宗岂不谅欤】

罢辽东经畧熊廷弼以袁应泰代之

【廷弼有胆畧知兵自按辽即持守边议至是主守御益坚然性刚好谩骂物情不甚附给事中姚宗文向与廷弼同在言路意气相得後以廷弼不荐己已怨及出閱边宗文持内府体自尊廷弼心易之甫开燕幕吏传外警廷弼介而驰命属吏歎宗文宗文色动未几廷弼还笑曰老掌科无恐此边关常事耳燕罢宗文侦外实无警意廷弼戏之恨甚主事刘国缙向亦与廷弼同官以京察被谪及赞画军前以故旧意望廷弼廷弼不能如前国缙怒遂与宗文比而倾廷弼是年三月我】

【大清兵畧地花岭六月畧王大人屯八月畧蒲河将士亡失七百余人诸将亦有斩获功适宗文还朝疏陈辽士日蹙诋廷弼废羣莱雄独智军马不训练将领不部署人心不亲附复鼓其同类攻击必欲去之御史顾慥首劾廷弼出关踰年漫无定画蒲河失守匿不上开荷戈之士徒供挑濬上方之剑逞志作威御史冯三元劾廷弼无谋者八欺君者三下廷议廷弼愤甚抗疏极辨且求罢而御史张修德给事中魏应嘉复劾之廷弼再疏自明缴上方劒力求罢斥朝议允廷弼去以袁应泰代廷弼乃上疏求勘言辽师覆没臣始驱羸卒数千踉跄出关至杏山而铁岭又失廷臣以为辽必亡而今且地方安堵举朝帖靡此非不操谏不部署者所能致也若谓拥兵十万不能搴旗决胜诚臣之罪然求此于今日亦岂易言令箭催而张帅殒命马上催而三路丧师臣何敢复蹈前轨三元应嘉修德复连章极论廷弼即请三人往勘帝从之御史吴应奇给事中杨涟等力言不可乃改命兵科给事中朱童业往廷弼复上疏曰今庙堂议论全不知兵冬春之际敌以冰雪稍缓閔然言师财匱匱马上催战及军败始愀然不敢复言比臣收拾甫定而愀然者又复閔然责战然自有辽难以来用武臣用文吏何非台省所建白何尝有一效疆场事当聽疆场吏自为之何用拾帖括语徒乱人意一不从辄怫然怒哉及童蒙还奏备陈廷弼功状末言臣入辽时士民垂泣而道谓数十万生灵皆廷弼一人所留其罪何可轻议独是廷弼受知最深蒲河之役敌攻浑阳策马趋救何其壮也及见官兵弩弱遽尔乞体以归将置君恩何地廷弼功在存辽微劳虽有可纪罪在负君大义实无所逃此则罪浮于功者矣疏入帝方知廷弼足用应泰历官精明强毅用兵非其所长其初受事为经畧也刑白马祀神誓以身委辽疏言臣愿与辽相终始更愿文武诸臣与臣相终始帝优诏褒答赐上方劒戮贪将何光先汰大将李光荣以下十余人遂谋进取抚顺议用兵十八万大将十人上陈方畧初廷弼在边持法严部伍整肃应泰以寛矫之多更易而是时蒙古诸部大饥多入塞乞食应泰下令招降归者日衆处之辽浦二城优其月廩与民杂居议者言收降过多恐致不测後应泰卒以此败】质实【花岭在抚顺城西玛根丹城西南十里王大屯在浑河南岸奉集堡东三十里袁应泰字大来凤翔人朱童蒙莱芜人张修德太原人】

以孙如游为礼部尚书兼东阁大学士预机务

【帝即位如游以帝为皇长孙时未就外传即请问讲筵报可至是遂入阁】

十二月许都给事中杨涟归里

【涟疏曰垂帘之秘事未明入井之烦言嘖起臣不过发明移宫始末而旋荷纶綍之褒过邀忠直之誉使臣区区之苦心反为夸诩臣节之左券臣之不安一也当时首请御文华殿受嵩呼者周嘉谟等也初出乾清宫捧皇上左右手者张惟贤刘一燝也臣乃以愤争之故独受忠直之名俯慙卑末岂可掩人于朝仰藉清平岂可贪天之力臣之不安二也宫禁自就肃清社稷有何机隍而圣谕以志安社稷为言君幸有子不忧杞国之天臣独何人敢捧虞渊之日臣之不安三也臣无病不敢以病请皇上未罪臣不敢以罪请惟有明微薄之心迹乞浩荡之恩波放臣为急流勇退之人而已诏许之】

方从哲罢

【从哲性柔懦不能任大事凡所疏论以有内援名争而已实将顺帝意无所匡正向高秉政时党论鼎沸铨部斥逐清流赖向高维持及从哲当国丁巳京察斥东林殆尽且及林下从哲昵羣小而帝怠荒亦益甚四十七年杨镐丧师礼部主事夏嘉遇谓辽事之败由兴邦红旗督战及从哲庇李维翰所致两疏劾之从哲求罢不敢入内阁于朝房视事帝优旨慰留乃後入而反擢兴邦为太常少卿御史张新诏劾从哲诸所疏揭委罪君父诳言欺人祖宗二百年金既壤于从哲手御史萧毅中刘蔚周方监杨春茂王尊德左光斗山西参政徐如翰亦交章击之帝皆不问帝自以海宇承平官不必备有意减损及辽左军兴又不欲矫前失从哲复荐姚宗文閱边齟经畧熊廷弼去论者谓明之亡神宗基之而从哲其罪首也及光宗崩复以纵庇可灼文昇为台諫所折摘从哲不自安力求去疏六上命进中极殿大学士赉银币蟒衣允其致仕】质实【夏嘉遇华亭人张新诏掖县人王尊德泗州人徐如翰上虞人】

御定资治通监纲目三编卷三十一

卷三十二

钦定四库全书

御定资治通鉴纲目三编卷三十二

【起辛酉明熹宗天启元年尽癸亥明熹宗天启三年】凡三年

熹宗哲皇帝天启元年春二月辽阳有数日并出【甲午日日交晕左右有珥白虹弥天】

闰二月孙如游罢

【如游入阁言者诋其不由廷推交章论列如游亦屡乞去帝辄勉留及是复上疏言祖宗任用阁臣多由特简远者无论在世庙则有张璁桂萼方献夫夏言徐阶袁炜严讷李春芳在穆宗则有陈以勤张居正赵贞吉在神庙则有许国赵志皋张位即皇考之用朱国祚亦特简也今陛下冲龄臣材品又非诸臣比有累至尊知人之明乞速赐骸骨归田里十四疏乃加太子太保文渊阁大学士遣护归】

三月我

大清兵取浑阳总兵贺世贤尤世功等死之

【袁应泰议三路出师复清河抚顺未行大清兵已簿浑阳总兵贺世贤尤世功等分兵乘城】

【大兵营城东七里世贤等于城外凿掘壕塹树栅筑墙环列枪礮以拒复登埤坚守大兵进攻绕城掩击世贤出战且却抵西门身被十四矢城中闻世贤败各鸟兽窜或劝世贤走违阳曰吾为大将不能存城何面目见袁经略乎挥铁鞭驰突围中中矢坠马而死世功引兵援亦战死城外兵七万人皆溃参将夏国卿知州段展同知陈栢皆死于阵遂树云梯拔浑阳城时总兵陈策统四川步兵二万营黄山渡浑河来援大兵分路以进】

【太祖高皇帝复勅後军往助冲击策兵大败追击至浑河兵尽溺策及参将张名世死之总兵李秉城朱万良姜弼领骑兵三万来援太祖命雅逊率护军二百往侦援兵□进雅逊退援兵遥蹶其後太祖闻之怒欲自往击】

【太宗文皇帝请行领军疾驰迎战援兵之蹶雅逊者溃奔掩击至白塔铺遇秉城等方布阵太宗不待後军至即率百骑追击秉城万良弼惊遁大贝勒代善台吉岳托军亦至同追击四十里斩首三千级而还太祖复击浑河以南步兵破其营副将董仲贵等战死衆尽】

【歼游击周敦吉副将戚金参将吴文杰都司袁见龙邓起龙守备雷安民云南都司张名世石砮都司秦邦屏等皆死】质实【白塔铺在承德县南二十里有河源出老堂峪西流入潭河贺世贤榆林卫人战歿後或疑其叛降故恤典不及 本朝乾隆四十一年追諡忠烈尤世功榆林卫人官左都督赠少保世廕三级再廕指挥僉事世袭赐祭葬建祠曰愍忠乾隆四十一年追諡烈愍夏国卿陈栢里系无考段展涇阳人乾隆四十二年俱追諡节愍张名世山陰人陈策李秉诚朱万良姜弼里系无考乾隆四十一年俱追諡烈愍董仲贵一作仲揆南京人万历末擢副总兵督川兵援辽及浑阳战死赠都督同知世廕三级祠祭乾隆四十一年追諡烈愍周敦吉戚金吴文杰袁见龙邓起龙雷安民里系无考秦邦屏忠州人乾隆四十一年俱追諡烈愍】

大清兵取辽阳经略袁应泰巡按御史张铨等死之【时我太祖高皇帝既得浑阳集贝勒诸臣议以浑阳已拔宜乘势长驱遂进兵规取辽阳袁应泰方撤奉集威寧诸军并力守御开太子河引水注濠沿濠列火器四面守御甚严大兵至城总兵李怀信等率兵五万出城五里结营】

【太祖命左四旗兵击其左太宗文皇帝请留二红旗兵于城傍觐视而自引军冲击其营会左四旗兵亦至夹攻之怀信兵大乱奔溃太宗乘胜追击六十里方接战时辽阳兵自西关出援留後之二红旗兵见而邀击驱令奔回辽阳兵争入出蹂践死者枕籍翌日】

【大兵掘城西闸以泄濠水分兵塞城东进水口太祖亲率右翼兵布楯车堵列城隅以卫衆军辽阳步骑三万出东门列营相拒右翼诸将遣人驰告曰掘插口不若夺桥易也】

【太祖即谕令往夺果得之会雍遏水口将溷右四旗前队军渡濠大呼掩击东门外营方鏖战大兵红甲二百白旗兵千并进辽阳骑兵遂败各贝勒部下白甲精锐护军复大呼奋射而入辽阳步兵亦败望城奔窜大兵乘胜纵击至东门外辽阳兵死者濠堑皆满水尽赤时左四旗兵夺武靖门桥分击守濠者城上下发火器抵拒】

【大兵奋勇冲突梯登城遂夺西城城中惊扰大乱日将夕左四旗大兵已登城是夜城中举火列炬拒战达旦守城官牛维驪高出等及衆军民多乘乱縋城而遁翌日复立楯火战义败又四旗大兵复登城遂克辽阳总兵朱万良副将梁仲善参将】

【王豸房承勲游击李尚义张绳武都司徐国全王宗盛守备李廷干等皆战死先是攻城时袁应泰居城北镇远楼知事不济叹息谓巡按御史张铨曰吾当死於此公无守城责宜急去退保河西图後举铨曰不可应泰遂佩剑印自縊死妇弟姚居秀从之仆唐世明凭屍大恸纵火焚楼死铨被执不肯降】

【太祖命赐死以遂其志太宗惜铨欲生之婉谕数四终不可夺不得已縊而葬之分守道何廷魁怀印绶率其妾高氏金氏投井死婢仆从者六人僉事崔儒修戎服自经于都司署】

【太祖入辽阳城百姓皆呼万岁太祖命皇子台吉德格类侄台吉寨桑古八大臣率引兵千人安抚居民至海州城中官吏及富殷之家张鼓乐肩舆迎二台吉揽辔传令禁军士扰害不得夺民财物二台吉宿公廨中军士俱屯城上禁勿入民家辽阳既下辽东之三河等五十寨及河东大小七十余城尽望风降】质实【太子河在辽阳州北十五里即古大梁水又名东梁河源出萨穆禅山自苇子峪东入西南流至州西北合浑河又西至海城县西北入辽河河西时以辽河之东为河东辽河之西为河西袁应泰 本朝乾隆四十一年追諡忠节牛维曜商州人高出莱阳人梁仲善里系无考乾隆四十一年追諡烈愍王豸房承勲李尚义王宗盛李廷千里系无考张绳武本姓陈一作神武新建人乾隆四十一年追諡烈愍徐国全里系无考何廷魁字汝谦大同人崔儒秀字倬初陕州人乾隆四十一年追諡节愍】

援辽都司毛文龙集兵皮岛

【时沿海居民以河东失事皆航海走山东不能达者栖止各岛间文龙率援师至皮岛岛在登莱大海谓】

【之江东地广衍有险可恃文龙乃招集逃民为兵分布哨船联接登州为犄角计朝议是之授文龙参将】质实【毛文龙仁和人】

夏四月延绥孤山城?

【是月癸丑城陷三十五丈入地二丈七尺】

贾继春削籍

【御史贾继春初以移宫事具揭奉旨切责复上言自明劾忠规勤之意吏部尚书周嘉模及九卿科道等恳请优容帝意不回遂削籍去】

五月壬申朔日有食之

以王化贞巡抚广宁

【化贞前以参议守广宁朱童蒙勘事还极言化贞得西部心勿轻调化贞亦言辽事将壤惟发帑金百万亟欸西部会沈阳相继失廷议将起廷弼御史方震儒请加化贞秩便宜从事令与薛国用同守河西乃进化贞右佥都御史巡抚广宁广宁城在山隈登山可俯瞰城内恃三岔河为阻又水浅可涉广宁止孱卒千化贞招集散亡复得万余人激励士民联结西部人心稍安中朝谓其才足恃悉以河西事付之化贞又以登莱天津兵可不设诸镇入卫兵可止当事益信其才所奏请辄报可时金复卫军民及东山矿徒多结砦自固以待官军其逃入朝鲜者亦不下二万化贞请鼓舞诸人优以爵禄俾自奋於功名并请招谕朝鲜帝从之】质实【金复卫金州卫在明辽东都司城南六百里今宁海县境复州卫在明辽东都司城南四百

二十里今复州界俱属奉天府薛国用洛阳人历官山东右参政分守辽海道以右佥都御史代应泰巡抚辽东应泰死代为经略】

立皇后张氏

【后祥符人时大学士刘一燝及御史毕佐周刘兰请遣客氏出外帝恋不忍舍曰皇后幼赖媼保护俟皇祖大葬後议之又以大婚礼成廕魏忠贤侄二人给事中程沆周之纲奏祖制非军功不袭国典不当滋予不听】

太监魏忠贤矫诏杀司礼太监王安

【帝命安掌司礼监安以故事辞客氏劝帝从其请与忠贤谋杀之忠贤犹豫未忍客氏曰尔我孰若西李而欲遗患耶忠贤意乃决噉给事中霍维华论安降充南海子净军而以刘朝为南海子提督使杀安朝故李选侍私阉以移宫盗库下狱宥出者既至絶安饮食取篱落中芦菔啗之三日犹不死乃扑杀之】质实【王安于庄烈帝时赐祠额曰昭忠霍维华东光人】

魏忠贤閱章奏

【忠贤不知书颇强记猜忍陰毒好谀帝深任信用司礼监王体乾及李永贞石元雅涂文辅等为腹心凡章奏永贞等先閱视鈐识欸要白忠贤议可否然後行帝性机巧好亲斧锯椎凿髹泰之事每引绳削墨忠贤辄奏事帝厌之謬曰朕已悉矣汝輩好为之忠贤因得擅威福】

六月广东地出血

【庚寅日启庆王民骸积家中庭喷血如跑突泉】

起熊廷弼经略辽东

【初廷弼虽龙帝念其守辽功仍议起用渾阳破廷臣复思廷弼给事中郭巩力诋之及辽阳继失河西军民尽奔自塔山至闾阳二百余里烟大断絶京师大震刘一燝曰使廷弼在辽当不至此御史江秉谦追言廷弼守辽功且以排挤劳臣为巩罪帝乃治前劾廷弼者贬马三元张修德魏应嘉郭巩等秩除姚宗文名御史刘廷寅救之亦被斥乃诏起廷弼于家及是廷弼入朝请免言官贬谪帝不可乃建三方布置策广寧用马步兵列叠三岔河上天津登莱各置舟师设登莱巡抚如天津而山海特设经略节制三方以一事权遂命廷弼以兵部尚书兼右副都御史驻山海关经略辽东军务赐上方剑请调兵二十余万以兵马弓糗器械之属资成户兵工三部廷弼因奏请复监军道高出胡嘉栋督饷郎中传国等官令其任事又议用辽人故赞画主事刘国缙为登莱招练副使夔州同知佟卜年为登莱监军佥事故临洮推官

共敷教为职方王事军前赞画收拾辽人心并报允七月廷弼因特阳麒麟服一彩币四宴之郊外令文武大臣陪饯异数也先是袁应泰死薛国用代为经略病不任事化贞乃部署诸将沿河设六营营置参将一守备二分守诸要害各设戍防议既上廷弼疏言河窄难恃堡小难容今日但宜固守广宁若驻兵河上兵分则力弱倘轻骑前渡直攻一营力必不支一营溃则诸营俱溃西平诸戍不能守河上止宜置游击兵更番出入示以不测不宜屯聚一处为人所乘自河抵广宁止宜多置烽堠西平诸处止宜稍置戍兵为传烽哨探之用而大兵悉聚广宁于城外犄角立营深垒高栅以俟盖辽阳去广宁三百六十里非飞骑一日所能到有声息我必豫知断不宜分兵防河充为自弱之计疏入优旨褒答会御史方震儒亦言防河不足恃议乃寝化贞以计不行愠甚尽委军事于廷弼廷弼请申谕化贞不得藉口节制坐失事机先是四方援辽之师化贞忠改为平辽辽人多不悦廷弼言辽人未叛乞改平辽名以安其心自是化贞与廷弼有隙而经抚不和】质实【塔山在承德县东南四十里山上有城间阳城名在锦州府广宁县西南五十里里今为驿江秉谦字兆豫钦人郭巩迁安人方震儒字孩未桐城人高出莱阳人胡嘉栋西华人】

以张鹤鸣为兵部尚书

【初鹤鸣巡抚贵州威名甚着迁兵部右侍郎总督陕西三边军务寻转左侍郎佐理部事时兵事亟兵部增设二侍郎而鹤鸣与祁伯裕王在晋并卧家园不赴及是右侍郎张继世督援师出关部中遂无侍郎言官请趣鹤鸣章数十上乃克期令兵部马上督催始履任至则论前平苗功进本部尚书视侍郎事尚书出象乾出督蓟辽军务遂代其位给事中韦蕃请留象乾出鹤鸣督师忤旨谪外鹤鸣与经略熊定弼相失论事多齟齬独喜巡抚王化贞化贞本庸才好大言鹤鸣主之所奏请无不从令无受廷弼节度中外皆知经抚不和必误封疆而鹤鸣信化贞愈笃卒致疆事大壤】

秋七月顺天蝗

八月以毛文龙为总兵官驻师镇江城

【时廷弼奏言三方建置须联络朝鲜请遣使往劳俾尽发兵漣营江上助我声势再诏恤辽人之避难朝鲜者招集团练别为一军与朝鲜军合執使臣即权驻义州控制联络与登莱声息相通更发银六万两分犒朝鲜及辽人乞给空名劄付百道东山矿徒能结聚千人者即署都司五百人者署守备一二万劲兵可立致也因荐监军副使梁之垣充命使帝从之方与所司议兵饷而毛文龙适以岛山兵袭取镇江时我大兵镇江守将陈良策潜通于文龙故文龙引兵取其城王化贞遽以大捷奏举朝皆喜化贞遂请授文龙总兵官设军镇皮岛廷议亟发天津登莱水师二万授文龙化贞督广宁军四万进据河上合诸蒙古军乘机进取张鹤鸣以为然奏言时不可失促进师廷弼言三方兵力未集文龙发之太早乱三方并进之谋误属国联络之计朝士方以镇江为奇捷闻其言多不服廷弼又显诋鹤鸣谓臣既任经略四方援兵宜聽臣调遣乃鹤鸣竟自发戍不令臣知臣洛部问调军之数亦不答臣有经略名而无其实辽左事惟枢臣抚臣共为之鹤鸣益恨化贞又言西部兵四十万且至请速济师廷弼言

抚臣恃西部欲以不战为战计臣未敢以为可也臣初三方布置必兵马器械舟车刍茭无一不备而後尅期齐举进足战退亦足守令临事中乱虽枢臣主谋于中抚臣决策于外而臣犹有万一不必为之虑也】质实【义州在锦州府北九十里辽置宜州崇义军金改置义州属北京路元属大宁明置义州卫属辽东都指挥使司今为义州属锦州府梁之垣登州人】

王化贞渡河进师无功而还

【化贞既渡河廷弼不得已出关次右屯而驰奏海州取易守难不宜轻举化贞为人驽而愎素不习兵妄意降将李永芳为内应又信西部言谓助兵四十万遂欲以不战取全胜一切士马甲仗糗粮营垒俱置不问务为大言以图中朝谓仲秋之月可高枕而听捷音尚书鹤鸣深信之以故廷弼不得行其志及是西部兵不至化贞亦不敢进後十月河水合广宁人谓大清兵必渡竟谋窜逸化贞乃与震孺计分兵守镇武西平闾阳镇宁诸城堡而以重师守广宁鹤鸣亦以广宁可虑请勅廷弼出关策应廷弼上言枢臣第知经略一出足镇人心不知徒手之经略一出其动摇人心更甚且臣驻广宁化贞驻何地鹤鸣责经抚协心同力而枢臣与经臣独不当协心同力乎为今日计惟枢部俯同于臣臣始得为陛下任东方事也既而廷弼复出关至右屯议以广宁内护广寧外扼镇武闾阳乃令刘渠以二万人守镇武祈秉忠以万人守闾阳罗一贯以三千人守西平部署甫定化贞又信牒者言遽发兵袭海州旋亦引还】质实【西平堡名在广宁县之东刘渠保定人祁秉忠西宁世袭土司罗一贯甘州卫人本朝乾隆四十一年追諡烈愍】

九月葬庆陵

【諡曰崇天契道英睿恭纯宪文景武渊仁懿孝贞皇帝庙号光宗】质实【庆陵在昌平州天寿山西峯之右】

【明史赞曰光宗潜德久彰海内属望而天不假年措施未展三案争构党祸益炽可哀也夫】

赐客氏香火田

【帝以客氏保护功命户部择田二十顷以为香火之用魏忠贤以陵工告成録叙御史王心一疏言梓宫未殡先规客氏之香火陵工既成强入忠贤之勤劳于礼为不顺于事为失宜忠臣爱君必防其斩帝怒责之】质实【王一心吴县人】

四川永宁土司奢崇明反

【永宁奢氏猱种也洪武中归附世为宣抚司传至奢崇周无子崇明以疎属袭外恭内陰鸷其子寅尤骁杰好乱时朝廷方遣官募川兵援辽崇明父子请行先遣土目樊龙张彤等以兵诣重庆巡抚徐可求议汰其老弱发饷饘复弗继龙等遂鼓衆反杀可求及道府总兵等官

二十余人时土兵数千列江岸相应遂据重庆分兵攻合江纳溪破泸州陷遵义时遵义道臣李仙品参将万金督兵援辽俱赴重庆城中守备空虚通判袁任先期委城遁贼攻合州江军知州翁登彦知县周礼嘉悉力扞御不能破贼陷兴文知县张振德不屈率妻子赴火死崇明统所部与徼外诸蛮凡数万播州遗孽及诸亡命奸人蠭起附全川震动崇明乘势向成都官兵出拒者多败冬十月崇明进围成都伪号大梁设丞相以下官时城中仅镇远营兵七百余人左布政使朱爕元将入覲蜀王以乱留治军事爕元急趋近道兵赴援偕右布政使周着按察使林宰等分埤固守贼薄城爕元屡以火器却之至暮贼拥钩梯千数攀城欲上爕元戒士卒第放礮礮石毋譁迟明贼积死满城下时濠水方个贼率降民持箠束薪载濠石垒如山下架蓬辈以避铙石伏弩仰射城中爕元夜缒壮士持刑涂膏杀守者纵火火举山隕贼大阻爕元又遣人决都江堰水至濠濠满城因治桥得少息寻斩入城为内应者二百人悬首埤上贼又于城四而立望楼高与城齐爕元曰贼设了望必四出摽掠其中虚遂命死士五百人突出击之贼果无备斩三贼帅焚其楼贼少慑已而援兵渐集石砮女土官秦良王先遣其弟民屏发兵四千倍道潜度重庆自统精兵鼓行而西复新都他路援兵亦连胜贼然贼亦日增相持百余日有俘民脱归者言贼造旱船决胜负一日贼数千自林中大噪出视之有物如舟高丈余长五百只楼数重簟葦左右板如平地一人披髮仗剑上载羽旗中数百人各挟机弩毒矢牛数百头运石穀竹旁翼两云楼如左右广俯视城中城中人皆哭爕元曰此吕公车也破之非礮石不可乃用巨木为机关转索发礮飞千钧石击之又以大礮击牛牛返走贼大败去会裨将刘养鲲言有诸生范祖文邹尉陷贼中遣孔之谭来约贼将罗乾象欲自拔効用爕元即遣之谭复往至则与乾象俱来爕元方卧戍楼呼与饮乾象裹甲佩刀爕元不之疑就榻呼同卧酣寝违且乾象感激誓以死报许之缒而出後贼营举动悉知踰数日乾象诱崇明至城下伏起崇明跳免乾象纵火焚营贼兵乱崇明父子仓皇走泸州乾象以衆来归成都围解时二年正月也事闻以爕元为四川建抚帅师追崇明乘執复州县卫所四十余惟樊龙扼重庆不下爕元督良玉等夺二郎关据其险佛图关亦为总兵杜文焕所破诸将逼重庆而军城中乏食爕元以计擒樊龙杀之张彤亦为乱兵所戮遂复重庆泸州寻亦复按当时重庆被害者道臣孙好古骆日升李继周知府章文炳同知王世科熊嗣先推官王三宅知县段高选总兵黄守魁王守忠参将万金王高爵其入城杀贼遇死者原任巩昌同知董尽伦贼薄成都时陷阵死者有指挥冉世法雷安世瞿英其遇贼不战降者有指挥周邦泰遇贼走免者有指挥张愷焉】质实【合州隋涪州宋属潼川府元属重庆路明属重庆府今因之二郎关在重庆府巴县西北六十里佛图关在巴县西十里即李殿欲凿通汶涪二江处为重庆要津津上有石佛寺故名徐可求衢州西安人张振德字季修崑山人朱爕元字懋和浙江山陰人周着南昌人林宰漳浦人】

谪给事中侯震阳于外

【初客氏已出宫复召入震阳奏曰皇上于客氏始而徘徊眷注稍遂其出犹可言也出而再入不可言也奸璫羣小睥睨其侧内外鈎连借丛煬竈有不忍言者公麼里妇何堪数昵至尊哉上怒责之时倪思辉朱钦相王心一相继疏劾皆降谪吏部尚书周嘉谟贝疏论救亦不报】质实【侯震阳字得一嘉定人倪思辉祁门人朱钦相临川人】

十二月罢吏部尚书周嘉谟

【神宗末齐楚浙三党为政黜陟之权吏部不能举及嘉谟为尚书大起废籍向称三党之魁者渐自引去恶霍维华倾狡出之外魏忠贤怒嗾给事中孙杰劾嘉谟受刘一燝属为王安报仇嘉谟遂罢归】质实【孙杰钱塘人】

【壬戌】二年春正月我

大清兵取西平堡副将罗一贯死之

【先是化贞凡五出师辄引还李永芳不应西部亦不至廷弼乞勅化贞慎重举止化贞上言愿请兵六万一举荡平因请便宜行事时叶向高当国化贞座主也颇右之廷臣惟太仆少卿何乔远御史江秉谦周宗建等与廷弼合余皆右化贞令毋受廷弼节制廷弼抗疏言臣以东西南北所欲杀之人适遭事机难处之会诸臣能为封疆容则容之不能为门户容则去之何必内借阁臣外借抚道以相困又言经抚不和恃有言官言官交攻恃有枢部枢部佐鬪恃有阁臣今无望矣帝令羣臣议两人去留时中外俱知经抚不和必误封疆大事而张鹤鸣笃信化贞请撤廷弼他用帝不从责再议议未上而】

【大清已渡辽河时我太祖高皇帝命兵守辽阳】

【亲率贝勒大臣及衆兵进攻由东昌堡遂渡辽河防河兵率见大清兵势不可当俱遁走大军前队精锐追击二十里外遂至西平堡全军继至围攻之招副将罗一贯降不从布梯楯攻城四而兵皆溃克之新一贯】质实【东昌西平两堡俱辽河上在广宁县东】

王化贞弃广宁与熊廷弼走入关

【化贞遣游击孙得功参将祖大寿合总兵析秉忠赴援廷弼亦檄总兵刘渠会师前进与】

【大清兵遇乘櫂急战大兵不暇布阵即飞驰突入奋射卫击所向披靡得功呼曰兵败矣遂与参将鲍承先等先夺大兵乘胜追击五十里斩杀无算至平阳桥祁秉忠及副将刘徽参将黑云鹤等皆死之全军尽没大寿走觉华岛得功请降得功素为化贞心腹及是欲生缚化贞以为功时大清兵屯沙岭未进得功扬言兵已薄城居民惊窜参政高邦佐叶之不能止化贞方阖署理军书不知也参将江朝栋排闥入大呼曰事急矣请公速去化贞莫知所为朝栋掖之出上马仆二人徒步从遂弃广宁跟抢西走得功偕守备黄进千总郎绍贞陞国志等降于我大清远近四十余城守御官皆率属降先是廷弼离右屯次闾阳驿闻败参议邢慎言请驰救为佥事韩初命所阻遂退还及化贞弃城走廷弼遇之大凌河化】

【贞哭廷弼微笑曰六万衆一举荡平竟如何贞慙议守寧远及前屯廷弼曰嘻已晚惟护

难民入闔可耳乃以己所将五千人授化贞为殿尽焚积聚与副使高出胡嘉栋等先後入关独邦佐至杏山驿自经死我大军至锦州驻营大贝勒与太宗文皇帝引兵至义州克之而还败闻至京师鹤鸣惧罪因自请视师给事中侯震阳少卿冯从吾董應举请并逮化贞廷弼以申国法狱具二人并论死鹤鸣寻亦罢归】质实【觉华岛在明宁远卫东南二十里海中岛上有海云龙宫二寺沙岭在广宁县东右明都司都西五百四十里前屯明都司城西九百六十里洪武时以元瑞州置广宁前屯卫今屯俱废故城在宁远州西南大凌河源出大宁经广寧界入海杏山驿在锦县西南四十里刘徵黑云鹤里系无考】

【本朝乾隆四十一年俱追谥烈愍高邦佐字以道襄阳人邢慎言益都人冯从吉字仲好长长人董应举字崇相闽人】

二月贵州水西土目安邦彦反

【邦彦水西宣慰使安尧臣族子尧臣死妻奢社辉抚幼子安位袭职邦彦挟之反社辉即崇明女弟也尝与崇明予寅争地相饶而邦彦素素异志与崇明合及崇明反或传其已陷成都邦彦遂挟位以叛为崇明声援自称罗甸大王率兵首袭毕节陷之时诸部头目安邦俊安若山陈其愚陈万典等蠭起为助乃分兵西破安顺沾益东下瓮安偏桥而邦彦自纪水西军渡陆广河直趋贵阳百计攻城当是时永宁未平水西又起贵阳城中藩臬守令咸入覲巡抚李標方受代闻变与巡按御史史永安提学僉事刘锡元悉力拒守学官及诸生亦督民兵分堞以守贼不能陷时乌撒卫已破指挥管良相死之镇将张永芳将】

【兵二万赴援隔龙里不得进诸将马一龙白身强皆战没外援遂絕城中粮尽先食糠粃草木败革遂食死人肉後乃食尘人至亲属相噉里居参政潘润民一女被食知县周思稷自杀以飡军其存者卒誓死守不遗余力中朝方亟辽事不能顾久之新抚王三善大会将士议曰省城不能待矣外援不至吾辈死法死敌等死耳尚何俟邪遂分兵三路进衔枚疾走进不许退前部斩贼首一人贼衆披靡遂夺龙里城乘势急击安邦俊被銃死邦彦骇走遂直抵贵阳下先以五骑传呼曰新抚至矣举城欢呼更生贵阳陂围十余月城中户十余万至是仅存二百人而贵城卒全皆標及永安锡元功也时议与朱燮元之守城都并称焉】质实【安顺元州明为府今因之瓮安明县今属贵州平越府陆广河在贵阳府修文县境其上源出安顺府曰滴澄河下流入遵义府为乌江乌撒卫旧乌蛮地明洪武十五年建卫隶乌撒卫民府东距贵州界二百五十里李標字长孺鄞人史永安武定人刘锡元长洲人王三善字彭伯永城人】

以孙承宗为兵部尚书兼东阁大学士预机务

【初廷臣以承宗知兵推为兵部添设侍郎主东事帝不欲承宗离讲筵不许既擢礼部右侍郎协理詹事府会广寧既失东事益急遂拜承宗为兵部尚书兼东阁大学士又从御史左光斗请命承宗以阁臣理部事承宗上疏曰迩年兵多不练饷多不覆以将用兵而以文官招练以将临阵而以文官指发以武略备边而日增置文官于幕以边任经抚而日问战守于朝

此极弊也今天下当重将权择沉雄有气略者授之节钺得自辟置偏裨以下勿使文吏用小见沾沾凌其上边事小胜小败皆不足问要使守关无関入而徐为恢复计因列上抚西部恤边民减京军增永平大将隆蓟镇亭障开衷京屯田数策帝嘉纳焉承宗又请下廷弼于理与化贞并谏用正朝士党护又请逮给事中明时举御史李达以惩四川之招兵致寇者又请诘责辽东巡按方震孺登莱将军梁之垣以警在位之骖馵者诸人以次获谴朝右亦耸然侧目矣】质实【孙承宗字雅绳高阳人明时举南充人李达安居人】

三月刘一燝罢

【初陵工成忠贤欲以为功一燝援故事内臣非司礼掌印及提督陵工不得滥荫止拟加恩诸言官论客氏被谪者一燝皆疏救有请出客氏于外及言官交章论沈?疑一燝主之与忠贤比而齟一燝一燝持大体不徇言路魏客用事一燝執孤既而霍维华外转其同官孙杰疑一燝属周嘉谟为之上疏力攻一燝一燝疏辨求罢忠贤从中构之帝始慰留既允其去业向高言客氏既出复入一燝顾命大臣乃不得比保姆致使人揣摩于寘窆不可知之地其渐当防不听】

举内操

【魏忠贤劝帝选武阉链火器又日引帝为倡优声伎狗马射猎给事中惠世扬周朝瑞御史江秉谦等劾沈?交通阉人弄兵大内中旨切责侯震阳黄尊素等先後疏谏皆不听迨後内操增至万人衷甲出入钲礮喧震内外】质实【黄尊素字真长余姚人】

夏四月礼部尚书孙慎行追论前辅方从哲进红丸罪【初光宗大渐鸿胪寺丞李可灼以红铅丸药进俄帝崩羣臣交章劾之大学士方从哲拟旨令引疾归赉以金币至是慎行以召还朝即追劾红丸事斥从哲为弑逆上疏曰先帝骤崩虽云夙疾实缘医人用药不审閱邸报知李可灼红丸乃首辅方从哲所进夫可灼官非太医红丸不知何药乃敢突然以进昔许悼公饮世子药而卒世子即自杀春秋犹书之为弑然则从哲宜何居速引剑自裁以谢先帝义之上也合门席藁以待司寇义之次也乃悍然不顾至举朝共攻可灼仅令回籍岂以已实荐之恐与同罪坎臣以为从哲纵无弑之心却有弑之事欲辞弑之名难免弑之实百口不龙为天下万世解也後此则有选侍垂帘听政事刘逊李进忠么麼小豎何遂大膽扬言说者二竖早以金宝轮从哲家若非九卿台諫力请移宫选侍一日得志陛下几无驻足闻尔时从哲濡迟不进科臣保之则云迟数日无害任妇寺之纵横忍君父之机?为大臣者宜尔乎陛下宜急讨此贼雪不共之仇毋询近习近习皆从哲所攀援也毋拘忌讳忌讳即从哲所布置也并请即诛可灼以泄神人之愤时朝野方恶从哲慎行论虽过刻皆争韪其言顾近习多为从哲地帝乃报曰旧辅素慎事系传闻下廷臣集议都御史邹元标主慎行疏从哲奏辨自请削官阶投四裔帝慰论之给事中魏大中以九卿议久稽趣之时议者一百十有余人纷纷俱罪从哲刑部尚书黄克缙及给事中汪庆百等等数人右之希内廷意也慎行扬疏折之且言克缙之谬于是大学士韩爌述进药始末尚书张问逮等合奏言慎行论可灼进红丸事可灼先见内阁臣等未知及先帝召见乾清宫辅臣与臣等俱慎重未听决及宣臣等入宫先帝问可灼安

在可灼至进红丸少顷复进一丸先帝服药微汗身温热就寝臣等所共见闻辅臣视先帝疾急迫仓皇弑逆二字何忍言但可灼非医官且非知医脉者以药尝试先帝龙驭即上升非但从哲未能止臣等亦未能止均有罪焉乃从哲反赉可灼及御史王安舜有言先止罚俸织令养疾失之太轻何以慰皇考服中外宜如从哲请削其官阶为法任咎至可灼罪不容诛而崔文昇当皇考哀感时妄进大黄凉药罪又在可灼上法皆宜显戮以泄公愤议上可灼遣戍文昇放南京而从哲置不问】质实【魏大中字孔时嘉善人黄克缙字绍夫晋江人】

大雨雹

【累月不雨陰风怒号雹如鸡子大着屋瓦磳俱碎草木禾稼毁折不可胜纪御史周宗建谓陰盛阳衰之徵疏陈四事一攻大学士沈?一请寬建言废黜诸臣一言熊廷弼已有成狱不当因此罗织朝士一专诋魏忠贤言忠贤目不识丁陰贼险狠陛下用人行收一切墮于其术恐离间之渐将起於蝇营谗构之衅必生于长舌忠贤见疏恨刺骨】

五月日中月星并见

【孙慎行以为大异上疏请修省】

山东白莲贼徐鸿儒作乱

【初蓟州人王森尝敕一妖狐狐断尾令藏之招人人闻异香多归附遂倡白莲教自称闻香教主其徒有大小传头及会主诸号蔓延畿辅山东山西河南及陕西四川後森为有司所掇毙于狱其子好贤与武邑于宏志钜野徐鸿儒辈踵其教徒党益衆躡扰山东几二十年至是好贤见辽东尽失四方奸民思逞与鸿儒等约是年中秋并起兵会谋泄鸿儒先反自号中兴福烈帝称大成兴胜元年用红巾为识遂陷郅城曹濮骚动四川妖贼又助之俄复陷邹滕峰三县邹县五经博士孟承光被执不屈死滕县知县姬文允视事甫三日城破登堂自經死以印畀小吏魏显照及家僮李守务贼掠显照索印显照潜授其父而与守务并骂贼死时山东郡县无守备亦不置重兵巡抚赵彦练民兵增诸要地请留京操班军及广东援辽兵以备征调荐起故大同总兵官杨肇基统山东军计贼乘肇基未至袭兗州为滋阳知县杨柄及都司杨国栋所败已而犯夏镇韩庄刼掠漕艘官军连破之军道始进贼又攻曲阜领马步万余拥至城下知县孔闻礼率民兵力御贼不能克引去时贼精銳聚邹滕间彦欲攻邹县副使徐从治曰攻邹滕难下不如捣其中坚两城可图也彦乃与肇基令游兵缀贼邹城而以大军擊贼精銳蹙而殲之峰山遂围邹大小数十战城未下乃令天津僉事来斯行及国栋乘间复滕县国栋又大破贼于沙河乃筑长围困之贼食尽其党皆出降鸿儒单骑走擒之送京师磔于市鸿儒临刑叹曰我与王好贤父子经营二十年徒党不下二百万事不成天也鸿儒举事凡七月而灭方鸿儒之未灭也于宏志亦起兵武邑应之杀人祭旗声言取景州焚掠四十余里官兵邹捕于宏志立马仗弓飞舞而迎官兵斩之于马下余贼遂凹散王好贤见鸿儒败挈家南走至扬州事露就擒时论平贼功赵彦加兵部尚书余进秩有差复以言官请修复孟庙命官致祭且恤孟氏子孙】质实【孟承光字永观亚圣裔姬文允字士昌华州人赵彦肤施

人徐从治字仲华海盐人来斯行萧山人】

发明【徐鸿儒等以邪教聚衆作乱至僭号改元攻破州县此非寻常盗贼窃发者可比观鸿儒自称经营二十年徒党不下二百万岂当时文臣武臣皆毫无所闻见而养痍貽患至此即鸿儒被报之後余党正多当时磔鸿儒而外不闻搜捕根治使余孽尽除而惟以宽纵了事夫平民从贼问有出于刼胁者然其中岂无为贼腹心爪牙之人乃以其党出降悉置不问独不念攻城破邑害官杀民荼毒之罪有不容轻宥者乎平时既浸无觉察事起则又一于玩弛此贼盗所以日盛而肆无畏忌驯至流贼炽而犹以议抚为事涓涓不息将成江河姑息之为害不其甚欤】

六月以毛文龙为平辽总兵官

【先是文龙袭取镇江报巡抚王化贞而不及经略熊廷弼两人隙始开时用事者方主化贞遂授文龙总兵官加至左都督挂将军印赐尚方剑设军镇皮岛如内地皮岛亦谓之东江在登莱大海中绵亘八十里不生草木远南岸近北岸北岸海面八十里即抵大清界其东北海则朝鲜也岛上兵本河东民自天启元年河东失民多逃岛中文龙笼络其民为兵分布哨船联接登州以为犄角计中朝是之顾文龙所居东江形势虽足牵制其人本无大略往往衄败岁糜饷无算且惟务广招商贾贩易禁物无事则鬻参贩布为业有事亦罕得其用焉】

秋七月沈?罢

【刑部尚书王纪初因劾主事徐大化语隐及?至是再疏直攻?比之蔡京?亦劾纪庇熊廷弼狱诏两解之未几纪削籍去业向高言纪?交攻俱失大臣体独斥纪如公论何?不自安乃引去自?首进募兵之策结交阉寺遂开内操朝议恶之及是罢归後逾年卒】质实【沈?劾王纪庇熊廷弼狱事按廷弼荐辽阳佟卜年为监军僉事张鹤鸣行边以卜年尝通李永芳谋叛欲以甚廷弼罪镇抚司狱其移刑部纪与员外郎顾大章辨其诬改轻比故?劾之王纪字维理芮城人顾大章字伯钦常熟人】

八月以孙承宗经略蓟辽

【初王化贞既失广寧关外五城七十二堡悉为喀喇沁诸部所据声言助边实怀窥伺经略王在晋与蓟辽总督王象乾请给月粮岁费百万又请筑重关于八里舖设守兵四万人宁前兵备僉事袁崇焕以为非策白之叶向高向高不能决承宗请身往定之乃诣关门相度还奏筑重城不若筑宁远要害与觉华岛相犄角因言在晋不足任自请督师帝许之赐尚方剑御门临遣以宠其行承宗既至关定军制申明职守以马世龙为总兵官令游击祖大壽等守觉华岛副将赵率教守前屯前後筑城堡数十练兵十一万造铠仗数百万开屯田五千顷我大清兵不深入而承宗防守严亦不致败衄军声颇振方承宗之督师也辟职方主事鹿善继为赞画荐监军副使阎鸣奏为辽东巡抚帝皆从之及至关命善继治军储而以鸣泰无实略军事多不预议鸣泰快快求去承宗旋亦引疾帝乃罢鸣泰论留承宗以张凤翼为巡抚凤翼

怯力主守关议承宗不可乃复出关抵寧远集将吏议所守衆多如凤翼指独崇焕善继请守宁远承宗然之义乃定命大寿兴工崇焕及满桂守之承宗将图大举请饷二十四万帝即命所司给之兵工二部相与谋曰饷足渠即妄为故用文移往复缓之师竟不果出】质实【八里舖在山海关外袁崇焕字元素东莞人马世龙字苍元宁夏人赵率教陕西人本朝乾隆四十一年追諡忠烈鹿善继定兴人满桂蒙古人喀喇沁旧作哈喇慎今改】

九月增田赋

【时增州县兵御史冯英请计亩加饷从之】质实【冯英赵州宁晋人】

封弟由检为信王【即庄烈帝】

【上谕册封信王于二十三日皇极门外东庑百官行礼】

给事中甄淑疏请文武一例殿试

【疏言武举中式一百六十人以本等巾服谢恩职方会同科道查明年貌勇力伎艺才德注本人名下十月上旬过堂令各陈所能先期演试十月望日皇上临轩策问阁臣与兵部尚书侍班皇上钦定一甲三名授都司僉事二甲三十名授守备三甲百余名以次各授出身职方司遇缺便补定限三年内选完】质实【按成化中太监汪直请武举设科乡试会试殿试悉如进士例不果行至是甄淑疏请之甄淑黄冈人】

地震

【先是二月济南东昌河南海宁地震三月济南东昌属县八连震三日至是平凉隆德诸县及诸堡所地震如翻壤城垣七千九百余文屋宇万一千八百余区压死男妇万二千余口後十一月陕西又震】

冬十月左都御史邹元标副都御史冯从吾罢

【初神宗时元标从吾以建言削籍里居讲学垂数十年泰昌初两人始召用已而同官都察院乃共建首善书院于京师御史周宗建董其事大学士叶向高为之记朝暇与同事高攀龙等讲学其中名望日重而诸不附东林者咸忌之会明年当京察给事中朱童蒙郭允厚郭兴治虑为元标所黜童蒙乃首劾之以讲学为门户元标疏辨求去帝已慰留允厚复继劾语尤妄诞而魏忠贤方窃政传旨谓宋室之亡由于讲学将加严谴从吾言宋之不竟以禁讲学故非以讲学故也叶向高亦力为解且乞同去乃得温旨而兴治复力攻比元标于山东妖贼元标从吾遂并引归先是书院方建御史黄遵素谓元标曰都门非讲学地徐文贞已丛议于前矣谓徐阶也元标不能用至是尊素言果验元标从吾既归羣小击碎其碑暴于门外先师木主委弃路隅经史典籍尽被焚而院独存後崇祯中礼部尚书徐光啓率西洋人汤若望等

借院修历署曰历局】质实【郭允修曹州人郭兴治东光人徐光启字子先上海人】

【癸亥】三年春正月以顾秉谦朱延禧朱国祯魏广微并为尚书兼东阁大学士预机务

【廷推阁臣首列孙慎行盛以宏皆不用时魏忠贤用事因言官周宗建等首劾之忠贤于是谋结外廷诸臣秉谦广微率先谄附霍维华孙杰之徒从而和之忠贤乃援秉谦广微偕延禧国祯入阁时阁中已有业向高韩爌何宗彦朱国祚史继偕又骤增四人直房几不容坐秉谦广微庸劣无耻忠贤得为羽翼势益张而二人曲奉忠贤俨如奴役】质实【顾秉谦崑山人朱延禧聊城人朱国祯字文宁乌程人魏广彻南乐人允贞子】

红毛番据澎湖

【红毛番即和兰地近佛郎机在西南海中其人深目长鼻髮眉须皆赤足长尺有二寸顾伟倍常万历中福建商人岁给引往贩吕宋诸国和兰人就而转贩未敢窥中国也自佛郎机市香山据吕宋和兰甚慕之二十九年驾大舰携巨礮直薄吕宋吕宋人力拒之则转薄香山澳澳中人诘问言欲通市贡不敢为寇当事难之召其酋入城游处一月不敢闻于朝乃遣还有海澄人李锦及奸商潘秀郭震贩久与和兰人习语及中国事锦曰若欲通贡市无若漳州者漳南有澎湖屿去海远诚夺而守之贡市不难成也锦乃代为书移守臣即俾秀震齎书当事大骇系秀于狱震不敢入初秀与酋约有成议乃闻而酋不及待即驾舰抵澎湖锦往侦被获亦下狱已而议遣二人谕其酋还国且拘震与俱酋观望不肯去时税使高案者嗜贿甚隐遣心腹周之范诣酋说以三万金馈案即许贡市酋喜盟有日矣会总兵施养政令都司沈有容将兵往谕有容负胆智大声谕说酋心折乃悔悟令之范还所赠金止有哆罗噠玻璃器及番刀番酒馈案乞代奏通市案不敢应而抚按严禁奸民下海犯者必诛由是接济路穷番人乏食始扬帆去然是时佛郎机横海上红毛与争雄复泛舟东来侵夺台湾地筑室耕田久留不去已又出据澎湖筑城设守渐为求市计守臣惧祸说以毁城徙去即许互市至是果毁其城然据台湾自若及互市不成复筑澎湖寻犯厦门官军却之滨海郡邑为之戒严既而巡抚南居益请于朝发兵出击持数月寇又不退乃大发兵诸军齐进寇势窘运米入舟而去独渠帅高文伟等十二人据高楼自守诸将破擒之澎湖之警始息其据台湾者如故】质实【和兰明史外国传和兰本国去中国絶远笔人未尝至其所恃惟巨舟大礮舟长三十丈广六丈厚二尺余树五桅後为三层楼旁设小牕置铜礮桅下盟二丈巨铁礮发之可洞裂石城震数十里世称红夷礮即其制也舵後置照海镜大径数尺能照数百里云佛郎机近满喇加正德中据其地逐其王遣使臣贡方物请封始知名吕宋在南海中去漳州甚近澎湖岛名在今泉州府东海中与金门所相对宋史泉州东有海岛曰澎湖烟火相望即其地也台湾在福建泉州南海中古曰东番今为府属福建布政使厦门在泉州府同安县西南海中嘉禾屿有城今设提督总兵官驻之分巡道及府同知亦驻此沈有容字士宏宣城人南居益字思受渭南人後闯贼入关不屈死本朝乾隆四十一年追谥忠烈】

发明【和兰僻在海岛素不知名并非佛郎机吕宋诸国可比其薄香山澳求通贡市当事既已难之则当秦闻于朝严拒其实乃招其酋入城游处匝月使彼得窥中国所有益生艳恋

而不肯去而奸商辈遂得肆其邪谋为之导诱皆始谋不臧蒙蔽养奸有以致之也至高案贪黷嗜贿通问始交令番酋生心轻视中国澎湖台湾之警历时不熄则尤此事罪魁时锦秀等谕死戍边而独不闻治高案黷贿之罪是朝廷于致患之由固未周知亦不欲深究失刑漏网又岂独高案一人已哉】

遣中官刺边事

【帝好察边情常遣中官诣阙门具事状奏报名曰较事及魏忠贤窃柄遣其党刘朝等四十五人齎甲仗弓矢白金文绮先俊至山海关颁赉将士实觐军也孙承宗疏言中使观兵自古有戒当水旱荒疲之後将领罢边筹而事违迎士卒释戈甲而供使役俱属未便且山海关城知中使将出将吏忧惧即令命使已行无容追议恐後此创为事例不可不慎也帝不省】

三月太白昼见

【二月丙戌昼见至是月丁巳又见】

夏四月京师地震

【震日庚申朔也十月乙亥复震】

朱国祚罢

【国祚在阁素行谨慎事持大体十三疏乞休遂许之未几史继偕亦致仕先是刑部尚书王纪为魏忠贤所逐国祚疏救复具揭争之纪为礼部侍郎尝以事忤国祚者也人以是称国祚长者】

五月四川总督朱燮元克永宁奢崇明走龙场

【先是川兵既克重庆贵州兵亦复遵义已而遵义再为贼所陷推官马凤雏被杀朝议加燮元兵部侍郎为四川总督讨贼至是燮元谋直取永宁集将佐曰我久不得志于贼者我以分贼以合也乃尽撤诸军会长宁连破贼砦与秦良玉合兵搏战贼大败遂入青岗平抵城下拔之降贼二万副总兵秦衍祚等亦克遵义崇明父子逃入旧兰州城寻为参将罗乾象所攻克贼势益蹙乃率余众走水西龙场借兵安邦彦邦彦遣二军窥遵义永宁燮元又败走之诸将乘胜蹙入龙场生擒崇明妻宋氏及其弟崇挥斩获万计崇明父子窜深箐得免时燮元以永宁既拔蜀中已靖遂不穷追而贵州巡抚王三善以崇明窜入水西会师六万进讨屡战皆捷遂渡渭河直抵大方入居安位第位与其母社辉走火灼安邦彦匿织金皆不敢出三善既连破贼有轻敌心谓贼不足平驻大方久之会粮尽不得已退师乃焚大方庐舍而东贼蹶之副总兵秦民屏参将王建中战歿三善遂为降贼陈其愚所害其愚者贼腹心先诈降三善信之令随行遇贼其愚冲三善堕马三善知有变急解印绶付家人欲拔刀自刎羣贼拥之去骂

不屈遂遇害监军付使岳具仰同知梁思泰主事田景猷等四十人皆死之于是贼势又炽】质实【龙场在四川叙永厅永宁县东南与贵州大定府毕节县接界今为营有守备驻此考此又一龙场非王守仁所谪之龙场驿也长宁随卢州地唐长寧州宋为军明县今因之青岗坪在叙永西亦曰青岗关兰州城唐置州宋废故城在今叙永厅东渭河在大定府黔西北州东南流会于陆广河大方即今大定府治旧为安氏据为巢穴火灼城名在黔西州北织金亦城名在黔西州西北地最深阻王三善崇祯初赠兵部尚书世廕锦衣衾事後又赠太子太保岳具仰延安人赠光禄卿田景猷贵州思南人赠大常卿并録其一子】

客氏魏忠贤杀光宗选侍赵氏幽裕妃张氏于别宫杀之

【客魏肆恶虑妃嫔白其罪矫旨赐赵选侍自尽选侍出光宗赐物列于庭西向礼佛痛哭自经幽裕妃别宫絶其饮食天两妃匍匐承担溜饮之而死皇后张氏素精明客魏憚之后又数于帝前刺客魏过失是年后有娠客氏密布心腹宫人以计隋之帝用此乏嗣又于帝郊祀日掩杀帝所罢冯贵妃左右无敢言者范慧妃以谗失宠李成妃为之乞怜客魏知之亦幽成妃别宫成妃故鉴裕妃饥死预备食物壁间半月不死斥为宫人】

发明【从来阉寺擅权必结宫闈以自固其间有害及宫闈者亦必藉宠盛之宫闈以肆其毒至客魏肆恶已稔虑妃嫔白其罪竟敢矫旨杀先朝选侍浸假而幽裕妃浸假而堕后胎杀贵妃幽成妃宫中生杀惟所欲为并不必有所凭藉此实前代所希闻者熹宗虽童骏至于不能保有妃嫔且不能保其子而不之觉殊出情理之外奸璫之怀朝政而害忠良莫甚于有明一代而若此之恣害宫闈作威擅杀即明季亦所未有杨涟一疏所为擢髮数之而痛哭流涕者此也】

冬十月以赵南星为吏部尚书

【先是南星为左都御史慨然以整齐天下为己任与吏部尚书张问达掌京察故给事中忝诗教赵兴邦官应震吴亮嗣先朝结党乱政议黜之吏科都给事中魏应嘉力持不可南星特着四凶论卒澄汰之天下快甚又巡方者有提荐人材之例南星已奏止之而踵竹如故南星复劾奏巡方者始知畏法至是问达罢南星代为吏部銳意澄清独行己志政府及中贵憚其刚严不敢有所干请魏忠贤雅重南星名遣其甥传应星谒见拒不纳遇忠贤于朝正色语曰主上冲龄我辈内外臣子宜各努力为善忠贤嘿然怒形于色大学士魏广微南星友允贞子也素以通家子畜之广微入内闻三至南星门谢弗见又尝叹曰见泉无子见泉允贞别号也广微恨刺骨与忠贤比而齟南星然当是时东林势盛叶向高韩圻方辅政南星掌铨李腾芳陈于廷佐之高攀龙杨涟左光斗秉宪魏大中袁化中掌科道郑三俊李邦华孙居相饶伸王之案辈悉居卿贰而郎官邹维琯夏嘉遇张光前任国祥刘廷谏等亦皆民誉衆正盈廷激扬风议忠贤颇憚之子外事未敢大肆】质实【李腾芳字子实湘潭人陈于廷字孟谔宜兴人袁化中字民谐武定人郑三俊字用章池州建德人邹维琯字德耀瑞州新昌人张光前字尔荷泽州人程国祥字仲若上元人刘廷谏顺天通州人】

十二月封李倬为朝鲜国王

【先是朝鲜国王李昖奏立其次子珪为嗣礼部执立长之议不许万历三十六年昖卒珪自称署国事遣陪臣来讞且请諡帝恶其擅不允三十七年十月始封珪为国王从其臣民之请也諡昖曰昭敬天启三年四月国人废珪而立其侄倬阳言倬以昭敬王妃之命权国事移文督抚转奏毛文龙为之揭报登州巡抚袁可立上言珪果不道宜听太妃具奏以待中国更立疏留中八月皇妃疏请封倬礼部尚书林尧俞请遣信臣会同文龙公集臣民询访勘辨十二月文龙申送到彼国公结乞令倬统理国事再遣重臣往正封兴至是遂封倬为国王】

地震

【两京凤阳苏松淮扬泗滁同日俱震】

魏忠贤提督东厂

【初神宗末刑罚弛纵而厂卫缉事亦渐稀简诏狱至生青草及是忠贤以司礼秉笔领东厂事车马仪卫僭拟乘舆已而任用田尔耕掌卫事许显纯为镇抚理刑罗织无辽鍛链残酷厂卫之毒于斯而极矣】质实【田尔耕任邱人许显纯定兴人】

括天下库藏输京师

【叶向高言郡邑库藏已竭藩库稍余倘尽括之猝有如山东白莲教之乱将何以应帝不纳】

御定资治通监纲目三编卷三十二

卷三十三

<史部,编年类,御定资治通监纲目三编>

钦定四库全书

御定资治通监纲目三编卷三十三

【起甲子明熹宗天启四年尽丁卯明熹宗天启七年】凡四年

【甲子】四年春正月何宗彦卒

【宗彦清修有执携尚书事六年遇事侃侃数奏时望甚隆会推阁臣廷臣多首宗彦独吏科给事中张延发不署名遂不获预宗彦旋乞假去神宗末齐党势盛非同类即排去之宗彦独无所附丽故终不安其位光宗立即家拜礼部尚书兼东阁大学士天启元年夏巡朝屡加吏部尚书建极殿大学士及是卒於官】

日赤无光有黑

【是日癸未日赤无光有黑子二三荡于旁渐多至百许】

二月京师地震

【宫殿动摇有声铜缸之水腾波震荡帝遂不豫至三月始愈地复屡震】

夏六月左副都御史杨涟劾魏忠贤二十四大罪中旨切责涟

【忠贤肆恶日甚涟抗疏列其大罪二十有四其畧曰高皇帝定令内官不许干预外事违者法无赦乃有肆无忌惮浊乱朝常如东厰太监魏忠贤者敢列其罪状言之忠贤本市井无赖中年净身夤入内地初犹谬为小忠小信以幸恩继乃敢为大奸大恶以乱政祖制以拟旨专责阁臣自忠贤擅权多出传奉或径自内批坏祖宗二百余年之政体大罪一刘一燝周嘉模顾命大臣也忠贤令孙杰论去急于翦己之忌不容陛下不改父之臣大罪二先帝宾天实有隐恨孙慎行邹元标以公义发愤忠贤悉排去之顾于党护选侍之沈?曲意绸缪终加蟒玉亲乱贼而讎忠义大罪三王纪锺羽正先年功在国本及纪为司寇执法如山羽正为司空清修如鹤忠贤构党斥逐必不容盛时有正色立朝之直臣大罪四国家最重无如枚卜忠贤一手握定力阻首推之孙慎行盛以宏更为他辞以锢其出岂真欲门生宰相乎大罪五爵人于朝莫重廷推去岁南太宰北少宰皆用陪推致一时名贤不安其位颠倒铨政掉弄机权大罪六圣政初新正资忠直乃满朝荐文震孟熊德阳江秉谦徐大相毛士龙侯震阳等抗论稍忤立行贬黜屡经恩典竟阻赐环长安谓天子之怒易解忠贤之怒难调大罪七然犹曰外廷臣

子也去岁南郊之日传闻宫中有一贵人以德性贞静荷上宠注忠贤恐其露己骄横托言急病置之死地是陛下不能保其贵幸矣大罪八犹曰无名封也裕妃以有娠传封中外方为庆幸忠贤恶其不附己矫旨勒令自尽是陛下不能保其妃嫔矣大罪九犹曰在妃嫔也中宫有庆已经成男乃忽焉告陨传闻忠贤与奉圣夫人实有谋马是陛下且不能保其子矣大罪十先帝青宫四十年所与护持孤危者惟王安耳即陛下仓卒受命拥卫防维安亦不可谓无劳忠贤以私忿矫旨杀于南苑是不但仇王安而实敢仇先帝之老奴况其他内臣无罪而擅杀擅逐者又不知几千百也大罪十一今日獎赏明日祠额要挟无穷王言屡褻近又于河间毁人居室起建牌坊镂凤雕龙干云插汉又不止莹地僭拟陵寝而已大罪十二今日廕中书明日廕锦衣金吾之堂口皆乳臭诰敕之馆目不识丁如魏良弼魏良材魏良卿魏希孔及其甥傅应星等滥袭恩廕褻越朝常大罪十三用立枷之法戚畹家人骈首毕命意欲诬?国戚动摇中宫若非阁臣力持言官纠正椒房之戚又兴大狱矣大罪十四良乡生员章士魁以争煤窑伤忠贤坟脉托言开矿而致之死赵高鹿可为马忠贤煤可为矿大罪十五王思敬等牧地细事责在有司忠贤乃幽置檻阱恣意撈掠视士命如草菅大罪十六给事中周士朴执纠织监忠贤竟停其陞迁使吏部不得专铨除言官不敢施封驳大罪十七北镇抚刘侨不肯杀人媚人忠贤以不善鍛链遂致削籍示大明之律令可以不守而忠贤之律令不敢不遵大罪十八给事中魏大中遵旨莅任忽传旨诘责及大中回奏台省交章又再?王言毋论玩言官于股掌而煌煌天语朝夕纷更大罪十九东廠之设原以缉奸自忠贤受事日以快私讐行倾?为事投匭设阱日夜未已片语稍违驾帖立下势必兴同文馆狱而後已大罪二十边警未息京师内外戒严东廠缉访何事前奸细韩宗功潜入长安侦探虚实实主忠贤司房之邸事露始去假令天不悔祸宗功事成未知九庙生灵安顿何地大罪二十一祖制不蓄内兵原有深意忠贤与奸相沈?创立内操薮匿奸宄安知无大盗刺客潜入其中一旦变生肘腋可为深虑大罪二十二忠贤进香涿州警蹕传呼清尘垫道人以为大驾出幸及其归也改驾驷马羽幢青盖夹护环遮则俨然乘輿矣其间入幕劾诛叩马献策者实繁有徒忠贤自视为何如人哉大罪二十三夫宠极则骄恩多成怨闻今春忠贤走马御前陛下射杀其马贷以不死忠贤不自伏罪进有傲色退有怨言朝夕堤防介介不释从来乱臣贼子只争一念放肆遂至不可收拾奈何养虎兕於肘腋间乎此又寸禽忠贤不足蔽其辜者大罪二十四凡此逆迹昭然在人耳目乃内廷畏祸而不敢言外廷结舌而莫敢奏间或奸状败露又有奉圣夫人为弥缝更相表里迭为呼应?望陛下大奋雷霆集文武勲戚敕刑部严讯以正国法并出奉圣夫人于外用消隐忧臣死且不朽疏上忠贤惧甚求解于韩爌爌不应遂趋帝前泣诉且辞东廠而客氏从旁为之剖析王体乾等赞之帝懵然不辨也遂温谕留忠贤而于次日下涟疏严旨切责先是涟疏就欲早朝面奏值次日免朝恐再宿泄机遂于会极门上之忠贤乃得为计涟愈愤拟对仗复劾之忠贤諗知遏帝不御朝者三日及帝出羣阉数百人衷甲夹陛立敕左班官不得奏事涟乃止当时中书舍人吴怀贤读涟疏击节称叹注其旁曰宜如韩魏公治任守忠故事即时遣戍其奴告之忠贤即逮怀贤下狱拷掠死籍其家】质实【吴怀贤休宁籍吴县人】

大雨雹

【是日为丙申】

秋七月杖杀工部郎中万燬

【自杨涟上疏被责廷臣益愤交章论忠贤不法给事中则魏大中许誉卿等御史则刘叶杨玉珂等京卿则太常卿胡世赏祭酒蔡毅中等勲戚则抚宁侯朱国弼南京列卿则兵部尚书陈道亨侍郎岳元声等凡七十余人先後申奏或专或合无不危悚激切大学士叶向高及礼部尚书翁正春请遣忠贤归私第以塞谤帝不许燬愤抗章极论畧言人主有政权有利权不可委臣下况刑余寺人哉忠贤性狡而贪胆粗而大口衙天宪手握王爵所好生羽毛所恶成疮痍廕子弟则一世再世赀廩养则千金万金毒痛士庶威加缙绅一切生杀予夺之权尽为忠贤所窃且忠贤固供事先帝者也陛下宠忠贤亦以此乃于先帝陵工畧不厝念间过香山碧云寺见忠贤自营坟墓规制宏敞拟于陵寝前列生祠又建佛宇璇题耀日珠网悬星费金钱几百万为己坟墓如此为先帝陵寝则如彼可胜诛哉忠贤窃陛下权内外止知有忠贤不知有陛下岂可一日尚留左右疏入忠贤大怒当是时忠贤方恶廷臣交章劾已无所发愤思借燬立威乃矫旨廷杖一百令羣阉先至燬邸摔而毆之比至阙下气息才属杖已絶而复苏羣阉更肆蹴踏越四日即卒御史黄尊素上言律例非叛逆十恶无死法今以批肝沥胆之忠臣竟殒于磨牙砺齿之凶?千载下史笔书之岂不上累圣德乞复其故官破格赐恤时禁中方失火李应昇复言部郎之杖血方腥祝融之烈焰旋作天谴甚明?冀矜恤俱不报是年检讨丁乾学兴江西乡试发策刺忠贤忠贤怒矫旨除其名使人诈为校尉往逮挫辱之乾学愤郁而卒扬州知府刘铎愤忠贤乱政书扇赠游僧有陰霾国是非句实欧阳暉诗也逕者得之遂逮治事既白会铎家人夜醺都督张体乾诬以咒诅竟斩西市他若御史夏之令以劾毛文龙御史吴裕中以熊廷弼嫺考功郎苏继欧以杨涟党後军都督府经历张汶以被酒诋忠贤或下狱或杖死皆继燬被害】质实【万燬字闇夫南昌人兵部侍郎恭之孙崇祯初赠光禄卿官一子许誉卿松江华亭人蔡毅中字宏甫光山人陈道亨字孟起新建人丁乾学字天行浙江山陰人寄籍京师刘铎庐陵人夏之令光山人吴裕中江夏人苏继欧许州人张汶邯鄲人尚书国彦曾孙】

叶向高罢

【杨涟劾忠贤疏既上向高谓事且决裂廷臣相继抗章至数十上或劝向高下其事可决胜也向高念忠贤未易除阁臣从中挽回犹冀无大祸乃具奏称忠贤勤劳朝廷待厚盛满难居宜解事权听归私第保全终始忠贤不悦矫帝旨叙己功累百余言向高骇曰此非阉人所能必有代为草者探之则徐大化也忠贤虽愤犹以外廷势盛未敢加害有导以兴大狱者忠贤意乃决万燬廷杖向高力救不从无何御史林汝翥向高甥也方巡城有二豎争夺人财物鬪于涂汝翥笞之忠贤怒矫旨命杖汝翥如燬汝翥惧逃之城外羣阉疑匿向高第聚而围之大肆诟辱向高上言国家二百年来无中使围阁臣第者臣今不去何面目见士大夫帝优旨慰留尽收回中使汝翥寻出受杖幸不死向高以时事不可为乞归已二十余疏至是请益力命行人护归向高既去韩爌朱国桢相继为首辅未久亦罢忠贤恣意戮辱清流朝中善类一空云向高为人光明忠厚有德量好扶植善类自再入相辅冲主阉人逞炆竈计时事日非向高亦利方为图然数有匡救老成持重为清流所倚赖帷幄门生王化贞不能决议致坏封疆事为时所咎焉】

河决徐州

【决魁山堤城中水深丈余迁州治于云龙山而治河事无言及者】质实【魁山即奎山在铜山县东南云龙山在铜山县南常有云气蜿蜒如龙故名】

封光宗选侍李氏为康妃

【初帝即位降敕暴选侍凌毆圣母及妄覬垂帘状且云停选侍封号以慰圣母之灵厚养选侍以敬遵皇考之意至是忠贤乱政请加选侍封号帝从之旨与前移宫谕相背时谓前谕出自王安後旨出自忠贤故彼此抵牾帝实不辨也】

发明【奸阉为选侍请封非专欲尊崇选侍也徒以当日请即位请移宫皆出自杨左主张王安调护今安已杀矣而杨左诸人忠贤又将兴大狱以置之死地故先以请封选侍为反案之始奸邪陰鷲其伎俩固无所不至而熹宗懵焉不察以前此明谕中外之事一任奸阉之颠倒播弄致使前後诏旨互相悖驰又何怪他日之骈戮诸臣而置若罔闻耶】

冬十月罢吏部尚书赵南星左都御史高攀龙

【御史崔呈秀按淮扬贓私狼籍霍邱知县郑延祚贪将劾之以千金贿免延祚知其易与再行千金即荐之其行事类如此比还朝攀龙循故事考察尽发其贪污状南星议戍之诏革职候勘呈秀寤夜走魏忠贤所叩头乞哀言攀龙南星皆东林挟私排?复叩头涕泣愿为养子当是时忠贤愤廷臣交攻方思得外廷助涿州人冯铨者少年官侍从家居与熊廷弼有隙遗书魏良卿劝兴大狱忠贤冀假事端倾?诸害己者得呈秀相见恨晚呈秀又言不去南星攀龙等吾辈未知死所忠贤大以为然遂与定谋会山西缺巡抚南星以太常卿谢应祥有清望首列以请既得旨而御史陈九畴受魏广微旨言应祥尝知嘉善魏大中出其门大中以师故谋於选郎夏嘉遇而用之徇私当斥大中嘉遇疏辨南星攀龙极言应祥以人望推举大中嘉遇无私九畴妄言不可聽忠贤大怒矫旨黜大中嘉遇并黜九畴而责南星等朋谋结党南星遽引罪去忠贤复矫旨切责放之归明日攀龙亦引去南星里居时名曰高海内仰慕与顾宪成邹元标并称三君及召起为吏部忤忠贤忠贤与其党恨不已每矫敕谕必目为元凶云】质实【崔呈秀蓟州人谢应祥安福人陈九畴历城人】

十一月削吏部侍郎陈于廷副都御史杨涟劾都御史左光斗籍

【先是万燝杖死黄尊素语涟曰可以去矣涟曰苟济国死生以之卒不去至是廷推吏部尚书涟注籍不预于廷等推乔允升冯从吾汪应蛟上之中旨谓此次会推仍是赵南星私人显是于廷涟光斗有意徇私更责涟怙恶不悛注籍躲闪前者勘陈九畴事俱属涟等主张朋比不公着并削籍且追涟光斗诰命】质实【乔允升字吉甫洛阳人汪应蛟字潜夫婺源人】

以徐兆魁为吏部侍郎乔应甲为副都御史王绍徽为佥都御史

【兆魁应甲绍徽皆素为南星所摈而绍徽尤党于忠贤善类既斥三人擢用由是天下大权一归忠贤矣】

韩爌罢

【初叶向高当国爌次之及杨涟劾忠贤二十四大罪忠贤颇惧求援於爌不应忠贤深衔之既向高罢爌为首辅每事持正为善类所倚然向高有智术笼络羣奄爌惟廉直自持势不能敌而同官魏广微又深结忠贤偏引邪党忠贤假会推事逐赵南星高攀龙爌急率朱国桢等上言陛下一日去两大臣臣民失望且中旨径宣不复到阁而攀龙一疏经臣等拟上者又复更易大骇听闻有伤国体忠贤益不悦传旨切责未几又逐杨涟左光斗陈于廷朝政大变忠贤势益张故事阁中乘笔止首辅一人广微欲分其柄嘱忠贤传旨谕爌同寅协恭而责次辅无伴食爌惶惧即抗疏乞休畧言臣备位纶扉咎愆日积如诘戎宜先营卫而观兵禁掖无能纾宵旰忧忠直尚稽召还而撈掠朝堂无能回震霆怒後先诸臣之罢斥谕旨中出之纷更不能先时深念有调剂之方又不能临事执持为封还之戇皆臣罪之大者皇上释此不问责臣以协恭责同官以协赞同官奉诏以从事臣欲补过无由矣乞急褫臣官为佐理溺职之戒中旨责爌归非于上悻悻求去听还籍诸辅臣请如故事加以体貌不报 爌罢时上疏谢有左右前後务近端良重纶綍以重仕途肃纪纲以肃朝宁语忠贤及其党益恨爌五年七月逆党李鲁生劾爌削籍除名又假他事坐贓二千毙其家人于狱爌鬻田宅贷亲故以偿而栖止于先墓】质实【李鲁生沾化人】

起崔景荣为吏部尚书

【初景荣为兵部尚书数为言官所论御史方震孺请罢景荣以孙承宗代之遂引疾归至是特起为吏部尚书时忠贤盗国柄羣小相倚附逐尚书赵南星欲起景荣为助比至忠贤饰大宅以待景荣不赴锦衣帅田尔耕来谒又辞不见帝幸太学忠贤欲先一日聽祭酒讲议裁诸聽讲大臣赐坐赐茶礼又议减考选员额汰京堂添注官景荣皆力持不可浸忤忠贤指而不安其位矣】质实【崔景荣字自强长垣人忤忠贤寻削籍崇祯改元复原官】

十二月逮内阁中书汪文言下镇抚司狱

【文言初以布衣任侠有智术神宗末游京师输贄为监生用计破齐楚浙三党先是三党诸魁交甚密後齐与浙渐相貳文言习知本末多方设奇间之诸人果相疑而浙党邹之麟以求吏部不得见恶齐党亦交鬪其间于是齐浙之党大离文言又交结东宫伴读王安与谈当时流品安悦之光宗初立外廷倚刘一燝而安居中以次行诸善政文言交关力为多及魏忠贤杀安文言亦下吏得末减益游公卿间叶向高用为内阁中书韩爌赵南星杨涟左光斗魏大中俱与往来会给事中阮大铖与光斗大中有隙嘱其同官傅樾劾文言与光斗大中交通为奸利旨下文言诏狱叶向高以举用文言引罪求去忠贤终惮向高旧臣不深究而御史黄

尊素语镇抚刘侨曰文言不足惜不可使祸延缙绅侨颔之狱上止坐文言廷杖除名无株及者方忠贤得樾疏喜甚欲借是罗织东林而狱遽解志不逞乃以刘侨不任事削其籍而用许显纯代欲再伺衅而动至是御史梁梦环知忠贤恨未已复劾文言诏立逮之下北镇抚司狱即命显纯鞫治而大理丞徐大化亦希忠贤指劾涟光斗党同伐异招权纳贿于是东林之祸遂作】质实【汪文言歙人阮大铖怀宁人居桐城梁梦环广东顺德人】

朱国桢罢

【叶向高罢韩爌为首辅韩爌罢国桢继为首辅魏广微与忠贤表里为奸视之蔑如给事中李蕃三疏劾国桢遂引疾求去忠贤语其党曰此老亦邪人但不作恶可令善去乃加少傅赐银币廕子中书舍人遣行人护归】

南京地震

【是日癸卯震声如雷】

【乙丑】五年春正月我

大清兵取旅顺

【大兵攻旅顺破之守将朱国昌等战死】质实【旅顺有关在宁海县南一百二十里明时海运舟达金州卫者至此登岸】

复聽勘御史崔呈秀官

【魏忠贤既得呈秀恨相见晚遂用为腹心日与计画至是给事中李恒茂为呈秀讼冤忠贤即以中旨复其官寻督三殿工忠贤以閱工故日至外朝呈秀必屏人密语移时先是顾秉谦魏广微以己意点缙绅便览一册若叶向高韩爌赵南星高攀龙杨涟左光斗等百余人目为邪党而以黄克缙王永光徐大化贾继春霍维华等为正人进之忠贤俾据是为黜陟已而王绍徽编东林一百八人繫以宋时淮南盗宋江等诸名目为点将录令忠贤按名除退及是呈秀复进同志诸银皆东林党人又进天鉴錄皆不附东林者由是羣小无不登用善类一空云时中旨频出朝端以为忧给事中李鲁生独上言执中者帝用中者王旨不中出而谁出举朝大骇呈秀既比忠贤不二岁晋兵部尚书兼左都御史出入烜赫势倾朝野于时忠贤门下文臣则呈秀田吉吴淳夫李夔龙倪文焕主谋议号五虎武臣则田尔耕许显纯孙云鹤杨寰崔应元主杀戮号五彪他若尚书周应秋太仆少卿曹钦程等号十狗此外又有十孩儿四十孙之号而呈秀尤为之魁暮夜乞怜者莫不缘之以进蝇集蚁附其门如市或不附己及势位相抗者辄令其党排去诸所倾?不可悉数虽其党亦畏之也】质实【李恒茂邢台人王永光长垣人田吉故城人吴淳夫晋江人李夔龙福建南安人倪文焕江都人孙云鹤霸州人杨寰吴县人崔应元大兴人周应秋金坛人曹钦程江西德化人】

三月我

大清建都沈阳

【先是太祖高皇帝既得辽阳集贝勒诸臣议曰】

【天既眷我授以辽阳今将移居此城耶抑仍还我国耶衆俱以还国对太祖曰国之所重在土地人民今还师则辽阳一城敌且复至据守舍已得之疆土而还後必复烦征讨非计之得也且此地乃明及朝鲜蒙古接壤要区天既与我即宜居之衆皆曰善遂定议迁都乃于天命七年三月筑城于辽阳城东五里太子河边创建宫室名曰东京至是阅三年为天命十年三月】

【太祖欲自东京迁都沈阳与贝勒诸臣议皆曰迺者筑城东京宫室既建而民之庐舍尚未完缮今复迁移又兴大役恐频劳我国太祖谕曰沈阳形胜之地西征明路直且近北征蒙古二三日可至南征朝鲜可由清河路以进汝等宁不计及耶于是自东京至沈阳定宫殿庙社之制是为】

【盛京】

发明【臣等谨按自古建都立国皆以形胜为先而非常之原必由圣人定断沈阳之境东尽挹娄北接扶余南近沃海实为神皋奥区而抚定征讨则明及蒙古朝鲜悉指顾可及】

【天眷与宅为我大清肇基辟宇之始】

【太祖高皇帝力排羣议定以独断规度形势筑宫阙定庙社巩基于亿万世古称高山天作何以过焉】以朱燮元总督云贵川湖广西军务

【先是贵州官军屡为安邦彦所败自王三善被害後贼势益炽廷议以川师不协助宜令一人统之乃晋燮元兵部尚书总五省军驻遵义明年赂贼党诱杀奢寅崇明年老无能为邦彦亦乞抚燮元闻于朝许之未几以父丧去贼又炽崇禎初起故官合诸道兵蹙之崇明邦彦俱授首】

夏四月太白昼见

【是月癸未日也】

重修光宗实録

【御史杨维垣首翻三案给事中霍维华继之痛诋刘一燝韩爌孙慎行张问达周嘉模王

之案杨涟左光斗而誉范济世王志道等请改光宗实录中旨允之免李可灼戍擢济世巡抚志道等京卿时魏忠贤特恨东林诸人数论其罪实於三案及京察封疆事无与也羣小欲借忠贤力为报仇凡异己者概指为东林党而去之清流之祸遂不可解】质实【给事中霍维华疏畧曰挺击红丸移宫三案迄无定论臣吕为选侍之请封也请封妃也妃尚未封而况于后请之不得而况于自后不妃不后而况于垂帘前此宫不难移也王安等故难之也难之者所以重选侍之罪而张翊戴之功也神祖册立东宫稍迟而笃爱先帝始终不渝果有废立之谋则九阍邃密乃藉一风癲之张差乎神祖升遐先帝哀毁遽发夙疾而悠悠之口致疑宫掖岂臣子所忍言孙慎行借题红丸诬先帝为受鸩加从哲以弑逆邹元标锺羽正从而】

【和之两人立名非真晚节不振委身门户败坏平生伏乞严谕纂修诸臣以存信史杨维垣文登人范济世济源人王志道漳浦人】

六月朱延禧罢

【中旨令阁票称魏忠贤为元臣延禧执不可御史田新阿忠贤意攻去之】

逮前副都御史杨涟僉都御史左光斗给事中魏大中御史袁化中太仆少卿周朝瑞陕西副使顾大章下诏狱寻毙之削前吏部尚书赵南星等籍

【先是漣汪文言狱词连赵南星李三才及涟光斗等二十余人许显纯坐涟等以移宫罪徐大化献策于魏忠贤曰但坐移宫则无贓可指若坐纳杨镐熊廷弼贿则封疆事重杀之更有名忠贤以为然乃令许显纯复鞫文言五毒备至使引涟等纳廷弼贿文言仰天大呼曰世岂有贪贓杨大洪哉至死不承大洪者涟别字也显纯乃手作文言供状文言复张目谓曰尔莫妄书异时吾当与面质显纯遂即毙之而具狱辞以上涟光斗各作二万大中三千化中六千朝瑞一万大章四万余复多所牵引中旨涟光斗六人逮下诏狱南星三才等俱削籍下所在抚按追赃涟光斗等先後逮至显纯非法拷掠血肉狼籍贓不肯承光斗私计曰彼杀我有二法因我不承而酷刑以毙之一也夜半令狱卒潜杀之二也承则当下法司庶有见天之日诸人然其言俱自诬服忠贤乃矫旨仍令显纯五日一追比下下法司诸人始悔失计至七月涟光斗大中同夕为狱卒所毙涟之死土囊压身铁钉贯耳最为惨毒光斗大中亦皆体无完肤越数日始报三人死屍俱已溃败不可识又踰月化中朝瑞亦毙惟大章未死羣小谓请人潜毙无以厌人心宜移付法司定罪明诏天下乃移大章刑部狱比对簿大章词气不挠而刑部一如镇抚原词以移宫事牵合封疆坐六人大辟爰书既上忠贤大喜矫诏布告四方仍移大章镇抚司大章曰吾安可再入此狱呼酒与其弟大韶诀趣和药饮之不死乃投缳而卒初涟等被逮秘狱中忽生黄芝光彩远映及六人毕入适成六瓣或以为祥大章叹曰芝瑞物也而辱于此吾辈庸有幸乎已而果然时以六人为六君子初汪文言之再下诏狱也鍛链两月余不屈有旨杖之百其甥哭失声文言叱曰孺子真不才死岂负我哉而效儿女子相泣耶迨惨酷备加最後不能堪始仰视许显纯曰吾口终不似汝心任汝巧为之我承焉可也显纯诬杨左魏周诸人以贓文言蹶起曰天乎冤哉以此蔑清廉之士有死不承杨涟之被逮也士民数万拥道攀号所历邨市悉焚香建醮祈佑生还既死产入官不及千金母妻止宿谯楼二子

至乞食以养微贓令急乡人竞出赀助之至卖菜佣亦为输助光斗前兴畿辅水利寻督学政士民德之容城孙奇逢者节侠士也与定兴鹿正倡义醵金诸生争应之得金数千谋代输缓狱而光斗已前毙正即善继父世所谓鹿太公者也光斗死而贓未竟抚按严追兄光霁坐累死母以哭子死都御史周应秋犹以所司承追不力疏趣之由是家族尽破後忠贤定三朝典要移宫一案以涟光斗为罪魁议开棺戮屍有解之者乃免大中长子学洧以父被逮号恸欲随行大中止之乃微服间行探刺起居既抵都逻卒四布变姓名匿旅舍昼伏夜出称贷以完父贓未竟而火中毙学洧恸哭几絕扶柩归晨夕号泣水浆不入口遂死化中前佐高攀龙发崔呈秀贓私呈秀恨之又继涟疏劾忠贤有忠贤铤而走险其横逞之毒将不在缙绅而即在陛下等语忠贤益大恨因窜名狱中朝瑞尝请宥廷弼戴罪令守山海徐大化与之相讐大章在刑部时谏廷弼狱援议能议劳例从寬遣戍杨维垣劾其受贿故二人并坐而大章贓尤多也】

秋七月削李三才顾宪成籍

【三才才大而好用机权抚淮十三年结交遍天下若顾宪成邹元标赵南星刘宗周皆推轂三才官加至户部尚书以谤议故落职天启初辽阳失欲起用不果後起南京户部尚书未赴卒至是御史石三畏追论京察事诏削籍宪成官吏部郎亦以京察事忤神宗意黜去宪成既废益讲学研究名益高中外推荐无虑百十疏乃起南京光禄少卿力辞不就未几卒天启初赠太常卿亦以三畏追论与三才并削夺】质实【石三畏交河人忠贤门下十孩儿之一也】

八月毀天下书院

【御史张讷上疏力诋邹元标孙慎行冯从吾余懋衡等请毀其讲学书院于是元标慎行从善懋衡俱削夺东林关中江右徽州及天下一切书院皆毀讷为忠贤鹰犬最效力忠贤深德之书院既毀未几逆祠建矣】质实【时元标已前卒追论夺官崇祯初赠尚书谥忠介慎行寻以红丸事遣戍从吾以病卒崇祯初复官谥恭定懋衡字国持婺源人亦于崇祯初复官张讷阆中人】

以周如磐丁绍轼黄立极为礼部尚书冯铨为礼部侍郎并兼东阁大学士预机务

【辅臣缺诏推老成干济者礼部尚书周如磐以年老推用侍郎黄立极与忠贤同乡故援之熊廷弼之狱绍轼与铨谋居多绍轼素憾廷弼以御史吴裕中为廷弼姻言于忠贤而杖杀之铨亦与廷弼有隙家居时会遗书魏良卿劝兴大狱及侍讲筵出市刊辽东传譖于帝曰此廷弼所作希脱罪耳帝大怒於是廷弼死遂决至是推阁臣铨资浅年未及四十忠贤党李鲁生上言成即为老而非必老乎年干乃称济而即有济于国铨遂柄用如磐閱三月即罢归绍轼未踰年亦卒】质实【周如磐莆田人丁绍轼贵池人黄立极字中五元成人冯铨涿州人】

魏广微罢

【杨左之狱广微实预谋顾秉谦调严旨五日一追比吏部尚书崔景荣惧其立毙杖下亟请广微谏止广微不自安疏言涟等在今日诚为有罪之人在前日实为卿寺之佐纵使贓私果真亦当转付法司据律论罪岂可逐日严刑令镇抚追贓乎身非木石重刑之下就死直须臾耳以理刑之职使之追贓官守安在勿论伤好生之仁抑且违祖宗之制疏入大忤忠贤意广微惧急出景荣手书自明而忠贤怒已不可解乃具疏乞休不许居两月广微丐秉谦为解忠贤意少释然卒不自安复三疏乞休许之既而景荣亦罢】

杀前辽东经畧熊廷弼传首九边

【先是法司论廷弼狱与王化贞俱论死已而杨左诸人俱坐贓毙狱会遼者获市人蒋应阳谓与廷弼子出入禁狱陰謀叵测忠贤遂欲速杀廷弼其党门克新石三畏等复希旨趣之及是遂弃市传首九边化贞竟不诛御史梁梦环谓廷弼侵盜军资十七万御史刘徽谓廷弼家资百万宜籍以佐军中旨从之罄资不足偿姻族家俱破江夏知县王尔玉责廷弼子貂裘珍玩不获将挞之其长子兆珪自刎死珪母称冤尔玉去其两婢衣挞之四十远近莫不嗟愤时太仓人孙文彖顾同寅作诗諫廷弼为遼者所得二人坐诽谤俱斩连及其同郡编修陈仁锡修撰文震孟并削籍】质实【陈仁锡字明卿长州人门克新汝阳人刘徽清苑人】

九月赐魏忠贤及客氏印

【赐忠贤印文曰顾命元臣客氏印文曰钦赐奉圣夫人】

发明【明代如蹇夏三杨輩曾各授印章许其密封言事故其文多有用绳愆纠缪者为一时优异之典顾朝廷之上所言公公言之嘉谟入告虽以责望老臣而赐印秘陈苟非其人即不免开告讐之渐而况可施之妇寺乎且是时逆阉窥窃大权中外爵位黜陟一任煬竈者之主持更有何人壅遏之而不使上闻者其不欲上闻之事固未尝不可矫旨从中出而又何待乎赐印不过习见前朝最异之数欲毕致于其身而後快又安顾其名义之不可居也哉】

冬十月罢孙承宗以高第代为经畧

【初魏忠贤以承宗功高欲亲附之会帝遣内官王应坤犒边赐承宗蟒玉忠贤即令应坤申意承宗不与交一言忠贤由是大憾会忠贤逐赵南星高攀龙等承宗方西巡薊辽念抗疏帝弗省往在讲筵每奏对间有入乃请以贺圣壽入朝面奏机宜欲因是论其罪魏广微闻之奔告忠贤曰承宗拥兵数万将清君侧公立齏粉矣忠贤悸甚绕御牀哭帝亦为心动令内阁拟旨顾秉谦奋笔曰无旨离迅地非祖宗之法违者不宥夜启禁门召兵部尚书入令发三道飞骑止之又矫旨谕九门守阇承宗若至齐化门反接以入承宗抵通州闻命而返忠贤遣人侦之一襍被置輿中後车鹿善继而已忠贤意渐解而其党李蕃崔呈秀徐大化等连疏诋之至比之王敦李怀光承宗遂累疏求罢不许给事中郭兴治请令廷臣议去留论冒饷者复踵

至遂下廷臣杂议吏部尚书崔景荣持之乃下诏勉留而以简将汰兵清饷三事责承宗会马世龙有柳河之败死者四百余人于是台省劾世龙并及承宗章疏数十上承宗求去益力遂许之以兵部尚书高第代为经畧第素恒怯以关外必不可守欲尽撤锦右诸城守御移关内袁崇焕力争谓兵法有进无退锦右摇动则宁前震惊关内亦失保障第愿坚且欲并撤宁前二城崇焕曰我宁前道也官此当死此我必不去第不能夺乃撤锦州右屯大小凌河及松山杏山塔山守具尽驱入关委弃米粟十余万军民死亡载涂哭声震野民怨而军益不振】质实【马世龙柳河之败世龙以孙承宗荐为山海总兵领中部俾南北二部俱受节制世龙定计守城颇尽力至是有降人刘伯强自耀州来言城内虚可袭世龙从之遣副将鲁之甲等率师往檄水军游击金冠以舟济师冠违令不至师次柳河不得渡军?泥淖中逐败歿柳河亦曰杨柳河在海城县南一里西北流入三岔河锦右锦即锦州右即广宁右卫故屯也塔山堡名在锦县西南高第字登之滦州人鲁之甲里系无考 本朝乾隆四十一年追谥烈愍】

十二月榜东林党人姓名示天下

【御史卢承钦上言东林自顾宪成李三才赵南星而外如王图高攀龙等谓之副帅曹于汴汤兆京史记事魏大中袁化中等谓之先锋丁元荐沈正宗李朴贺烺等谓之敢死军人孙丕扬邹元标等谓之土木魔神宜一切榜示海内俾奸慝无所容忠贤大喜悉刊党人名示天下】质实【卢承钦余姚人】

【丙寅】六年春正月作三朝要典

【先是给事中杨所修请集挺擊红丸移宫三案章疏仿明伦大典编辑为书颁示天下霍维华亦以为言至是作三朝要典以顾秉谦黄立极冯铨为总裁施凤来杨景辰孟绍虞曾楚卿副之极意诋譏东林暴扬罪恶其论挺擊以王之案开衅骨月为诬皇祖负先帝论红丸以孙慎行创不尝药之说妄疑先帝不得正其终更附不讨贼之论轻诋皇上不得正其始为罔上不道论移宫以杨涟等内结王安故重选侍之罪以张翊戴之功于是遂以之案慎行涟为三案罪首时方修光宗实录凡事関三案命即据要典以改及书成忠贤令顾秉谦拟御制序文冠其首刊布中外】质实【杨所修商城人施凤来平湖人杨景辰晋江人】

二月高第罢以王之臣代为经畧袁崇焕巡抚辽东【先是我大清兵围宁远高第与总兵杨麒拥兵不救宁前参政袁崇焕集将士誓死守尽焚城外民居攜守具入城檄前屯及山海关凡将士逃至者悉斩人心始固】

【大军戴楯穴城矢石不能退崇焕令闽卒罗立发西洋巨礮围遂解时督屯通判金启倬以燃礮死事闻擢崇焕佾都御史削高第杨麒职以王之臣代第以前屯总兵赵率教代麒镇关门寻命崇焕巡抚辽东驻宁远】质实【王之臣潼关卫人金启倬起小吏时为督屯通判死赠光禄少卿世廕锦衣试百户】

逮前左都御史高攀龙吏部员外郎周顺昌苏松巡抚周起元谕德缪昌期御史李应昇周

宗建黄尊素攀龙自沉于池顺昌等俱下狱死

【攀龙虽削籍崔呈秀恨不已亟言于魏忠贤必欲杀之顺昌家居魏大中被逮过吴顺昌出钱与同起卧者三日许以女聘大中孙旗尉屡趣行顺昌瞋目曰若不知世间有不畏死男子周顺昌耶因戟手呼忠贤名骂不绝口旗尉归以告忠贤大怒倪文焕即希指劾顺昌与罪人婚削籍昌期典湖广乡试程文论中引赵高仇士良寓言讽忠贤嫌之杨涟劾忠贤二十四罪疏或言昌期代草而高赵诸人去国昌期率送之郊外执手太息忠贤益大恨昌期知势不可留具疏乞假有小璫至阁曰此人尚可留之送客耶遂传旨落职宗建首劾忠贤目不识丁应昇尊素皆继涟抗疏力攻忠贤应昇疏有云忠贤之罪千真万真无可复辨千罪万罪又不胜辨臣为陛下计莫若听忠贤急自引退以全旦夕之命为忠贤计又莫若早自引决以乞帷盖之恩不然恶稔贯盈欲保首领而不可得末又切责阁臣谓君侧不清焉用彼相一时宠利有尽千秋青史难欺不欲为刘健谢迁者恐并不能为李东阳倘投策求欢不几与焦芳同传耶时魏广微方深结忠贤知应昇讥已调旨切责而尊素尤有智虑为羣小所深忌曹钦程希指劾宗建应昇尊素皆东林护法皆削籍会吴中讹言尊素欲效杨一清诛刘瑾用苏杭织造李实为张永授以秘计忠贤大惧遣刺事者至吴凡数辈侍郎乌程沈演家居记忠贤日事有迹矣于是忠贤益遣使谯诃实知实与前巡抚起元素有隙盖起元抚吴时公廉爱民丝粟无所取实素贪横妄增定额恣诛求又恶同知杨姜不屈已具疏诬劾起元为姜辨冤并劾实不法数事实以此斂威而衔起元不置至是忠贤乃索取实空印白疏令李永贞伪为实奏诬劾起元为巡抚时乾没帑金十余万日与攀龙辈往来讲学因窜入顺昌等名矫旨并逮之攀龙闻旗尉将至谒道南祠为文以告归与二门生一弟饮后园池上及暮书遗表乞具衣冠自沈于池表云臣虽削夺旧为大臣大臣受辱则辱国谨向北叩头从屈平之遗则远近闻其死莫不伤之顺昌故有德于乡士民闻其被逮愤怒号冤开读日不期而集者数万咸执香为周吏部请命旗尉厉声骂曰东厂逮人众辈敢尔大呼囚安在手掷银铛于地声琅然众益愤曰吾始以为天子命乃东厂魏太监耶遂蠡拥上势如山崩旗尉东西窜众纵横殴击立毙一人余负重伤踰垣走巡抚毛一鹭不能发一语知府寇慎吴县知县陈文瑞素得民曲为解谕众始散顺昌乃自诣吏是日旗尉往浙江逮尊素者泊舟胥门外市人知城中有变击其舟而沈之旗校泅水以遁失驾帖不敢往尊素闻即囚服自投诏狱顺昌既就逮一鹭飞章告变东厂刺事者言吴人谋断水道刼漕舟忠贤大惧已而一鹭言缚得倡乱者颜佩韦杨念如周文元马杰沈扬乱已定忠贤乃安然自是缇骑不敢复出国门矣方诸臣之被逮也顾秉谦忽持正请付法司论罪忠贤不从已而昌期先至慷慨对簿词气不挠坐臧三千备受五毒不胜酷刑时四月晦日橐籥中传出片纸自此遂毙至五月二日狱卒以死报终莫知为何日其殁也十指堕落掬置两袖中盖以其为涟代草故云顺昌宗建应昇尊素继至许显纯各坐臧数千宗建至一万三千五日一酷掠顺昌辄大骂忠贤显纯椎落其齿顺昌嚙血唾显纯面骂益厉遂于夜中潜毙之时六月十七日及领埋已越三日皮肉皆腐仅存须髮宗建为显纯酷讯偃卧不能出声显纯骂曰尚能骂魏公一丁不识否以沙囊压之而死时六月十八日尊素知狱卒将害已叩首谢君父赋诗一章时独应昇尚在尊素隔墙呼之曰仲達我先行矣遂死时为闰六月朔日明日应昇亦死起元道远至则顺昌等已俱死显纯酷加拷掠竟如疏悬赃十万罄货不足亲故多为破家及九月亦毙之狱中时以顺昌等惨死诏狱与前杨左诸人先後畧同遂与高攀龙并称为後七君子以配杨左等共十有三人为逆阉时死节之最着者云攀龙学本

濂洛操履笃实涵养邃密粹然为一代大儒既死呈秀憾犹未释矫旨下其子世儒吏刑部坐世儒不能防闲其父谪为徒顺昌就逮时诸生朱文祖间行诣都为纳饘粥汤药及徵贓令急奔走称贷诸公间顺昌棹归文祖哀恸发病死其所捕顏佩韦等五人比临刑语知府寇慎曰公好官知我等好义非为乱也延颈就刃而死後吴人合葬之虎邱傍题曰五人之墓昌期应昇至常州开读知府曾櫻咸助之貲应昇师吴鍾峦诣府署与应昇语竟日谓应昇曰昔蔡元定窜道州晦翁饒之萧寺微视元定不异平时何图今日亲见此景真一夕千古已而忽闻署外有数千人鬨声皆言忠臣何故被逮櫻素有惠政得民力为劝谕始解散而诸校方怖苏州事有越垣而仆者适卖蔗童子过之曰我恨极惜不能杀汝即取削蔗刀割片肉而去宗建死後所亲蒋英代为输贓亦坐削籍尊素家尤贫坐贓虽不及三千同年门旧及乡人咸助之始得完赵元方抚吴罢归顺昌为文送之指斥无所讳议者谓起元顺昌之祸已伏于此及两人死吴中士民无不垂涕者】质实【道南祠即杨龟山祠周茂兰字子佩顺昌长子曾櫻字仲含峡江人

本朝乾隆四十一年追谥忠节吴鍾峦字峦稚武进人蒋英嘉善人沈演即?之弟】

兵科给事中罗尚忠疏陈漏餉剥军弊

【尚忠言各边解银往领银回者或各卫钻求情分委放军粮或将领转委偏裨遽相抽扣而将官遇有司餉之权者虽品位过之亦甘卑礼厚币甚至星相游人当事荐往者亦????扣各军礼而归之又甚有将官放债倍扣利息者及管库司官以情面浅深币交厚薄为各边发粮之先後乞飭各督抚委各边道将查明军数军若干餉若干刻成册各送计部计部总计九边额兵若干岁餉若干彙册进览一送该部一送各司俾奸书无所去其籍得旨所言给餉情弊甚悉其应裁应禁速议寻不果行】

三月设各边镇监军内官

【时各边镇增设内臣监军太监刘应坤镇守山海关大学士丁绍轼兵部尚书王永光等屡谏不聽】发明【熹宗之时边事已不可为经抚不和疆场日蹙朝廷即力加整饬尚恐不能有济而乃复设内官监军以益其弊是犹抱薪而救火也往时内官典兵如曹吉祥郭敬辈覆辙俱在惟嘉靖力抑宦侍其锋稍挫神宗时虽监税肆出而典兵者尚少至是魏阉乱政一切魁柄皆欲归其同类始则借犒军以刺事閔庭供役士卒愁苦继乃各设监军牵制边将稍一拂逆戮辱随之疆事如此国事又如此岌岌殆哉其能久乎】

夏四月搜括应天各府贮库银

【命南京守备内臣搜应天各府贮库银充殿工及兵餉】

五月王恭廠灾

【王恭廠火药局也是日雷震火药自焚地中霹雳声不絕烟尘障空白昼晦冥军民昏仆

死者无算未几朝天宫又灾】

六月地震

【先是五月蓟州密云连震三日及是京师天津宣大山东河南皆震】

闰月建魏忠贤生祠

【忠贤生祠之建始于潘汝楨汝楨巡抚浙江疏请建忠贤生祠于西湖织造太监李实请令杭州卫百户守祠诏赐祠额曰普德勒石记功德阁臣撰文书丹自是诸方效尤几遍天下蓟辽总兵阎鸣泰部内建祠七所费数十万其颂忠贤有民心依归即天心向顺语开封毁民舍二千余间创宫殿九楹仪如帝者巡抚朱童蒙建祠延綏用琉璃瓦刘诏建祠蓟州金像冕旒其诸祠务极工作之巧像皆以沉香木为之眼耳口鼻宛转如生人腹中腸肺俱以金玉珠宝为之髻空穴其一以胥四时香花一祠木像头梢大小竖上冠不能容匠人恐急削而小之以称冠小竖抱头痛哭责匠人凡疏辞揄扬一如颂圣称以尧天舜德至圣至神阁臣辄用骈语褒答督饷尚书黄运泰迎忠贤像五拜五稽首称九千岁都城内外祠宇相望有建于东华门外者工部郎中叶宪祖曰此天子临辟雍道也土偶能起立乎忠贤闻之即削其籍初汝楨请建祠巡按御史刘之待会稿迟一日即削籍而蓟州道胡士容以不具建祠文遵化道耿如杞以入祠不拜皆下狱论死时海内望风献媚自督抚巡按而外宗室若楚王华炆勲戚若武清侯李诚铭保定侯梁世勲等廷臣若尚书邵辅忠词臣若庶吉士李若琳部郎若郎中鲁国桢诸司若通政司经历孙如洌上林监丞张永祚等亦皆建祠恐後下及武夫贾竖诸无赖子莫不攘臂争先汹汹若不及最後巡抚杨邦宪建祠南昌至毁周程三贤祠益其地鬻澹台灭明祠曳其像碎之比疏至熹宗已崩庄烈帝且閱且笑忠贤觉其意具疏伪辞辄报允无何忠贤诛诸祠悉废凡建祠者概入逆案云】质实【潘汝楨桐城人刘诏杞县人黄运泰永城人叶宪祖字美度余姚人刘之待兴国州人胡士容黄州广济人耿如杞字楚材馆陶人李诚铭慈圣太后侄梁世勲瑤之後邵辅忠定海人李若琳大兴人鲁国桢临川人】

冯铨罢

【铨以媚事魏忠贤登宰辅素与崔呈秀昵呈秀欲入阁其党孙杰霍维华嗾赃方郎中吴淳夫力攻罢铨又虑王绍徽为吏部不肯推呈秀令御史袁鲸攻罢绍徽而杰等虑忠贤意变复以计沮之自是羣小携贰】质实【袁鲸湖广龙阳人】

京师大水江北山东旱蝗

秋七月以施凤来张瑞图李国 俱为礼部尚书兼东阁大学士预机务

【凤来素无节概及在阁惟以和柔自媚于世瑞图于诸事迎合魏忠贤意忠贤建祠碑文多出其手书诏旨褒美忠贤词极骈丽皆瑞图笔也国 去释褐才十四年忠贤以同乡故援

之】质实【张瑞图晋江人李国 高阳人】

九月庚午朔我

太宗文皇帝嗣位以明年为天聪元年

【八月我太祖高皇帝崩大贝勒代善于诸子中为最长而我】

【太宗文皇帝时称四贝勒功德隆茂为衆望所属代善因作议书言绍承大统得圣君始能戡乱致治以成一统自顾德薄愿共推戴】

【四贝勒嗣位入朝遍示诸贝勒大臣衆皆喜太宗辞让再三代善意益恳切乃从之是年冬遣使遗袁崇焕书曰尔停息干戈遣李喇嘛等来吊丧并贺新君即位尔循聘问之常我亦岂有他意既以礼来当以礼往故遣官致谢至两国和好之前皇考往宁远时曾致玺书与尔令尔转達至今尚未回答汝】

【主如答前书欲两国和好我当览书词以复之两国通好诚信为先尔须实吐衷情勿事文饰也】顾秉谦罢

【自秉谦为首辅凡魏忠贤倾害忠良皆属其票拟三朝要典之作秉谦为总裁是非舛谬特甚及是羣小各有所左右同党中如魏广微冯铨辈日夜交轨秉谦不自安遂乞归 秉谦于崇祯初削籍寻入逆案论徙家居又为乡党所恶聚衆戮辱之屋室货财焚掠殆尽秉谦窜渔舟得免久之寄居他县以死】冬十月进魏忠贤爵上公从子良卿宁国公【先是皇极殿成帝御殿受贺忽有声如怒涛自殿中出羣臣班乱至是三殿告成太监李永楨奏魏忠贤功吏部尚书周应秋亦奏如永楨言忠贤遂进上公加恩三等良卿前已封肃宁伯进侯至是复进封公已而诸边筑隘口成南京孝陵工竣甘肃奏捷法司捕盗并言忠贤区画方畧诏书褒美阁臣皆拟九锡文半岁中廕锦衣指挥使十七人同知三人僉事一人擢其族孙希孟希孔等世袭都督同知甥傅之琮冯继先俱都督僉事章奏无巨细辄颂忠贤称厯臣不名山东奏产麒麟大学士黄立极等票旨言厯臣】

【修德故仁兽至其诬罔若此故事内官为司礼秉笔非公事不得出忠贤每岁必数历畿甸坐文轩驾四马笙鼓铙吹之声轰隐黄埃中锦衣玉带鞞袴而握刀者夹车左右而驰自厨传优伶蹴鞠輿皂随者动以万数尝自琉璃河祭水还历西山碧云寺士大夫皆遮道拜伏凡有章奏其党遣急足驰请然後下客氏既朝夕侍帝所而每数日必出至私第輿过乾清宫前竟不下客氏盛服倩粧俨同妃后侍卫赫奕照耀衢路至宅则老祖太太千岁之声喧呼震地犒赆银币无算或数日不返忠贤促之始入凡忠贤浊乱朝政毒痛海内皆客氏为内主也】

十二月南京地震

【先是宁夏地大震至是南京地亦震】

【丁卯】七年春正月以太监崔文昇总督漕运河道

【文昇先侍光宗药为廷臣所论已放南京魏忠贤作三朝要典遂召还至是命兼督河漕文昇之任即多参劾忠贤矫旨称其能力挽漕运尽心国储深体廨臣筹边至意嘉之被参者削籍治罪】

二月召王之臣还

【光是袁崇焕与满桂不协请移之他镇乃召桂还王之臣代高第为经畧又奏留桂崇焕又与不协中朝虑僨事命之臣专督关内以关外属崇焕画関而守崇焕虑廷臣忌已上言陛下以关内外分责二臣用辽人守辽土且守且战且筑且屯屯种所入可渐减海运其大要坚壁清野以为体乘间抵隙以为用战虽不足守则有余守既有余战无不足顾奋迅立功衆人必忌任劳则必召怨蒙罪始可有功怨不深则劳不着罪不大则功不成谤书盈篋毁言日至从古已然惟圣朝与廷臣始终之朝议以崇焕之臣不相能召之臣还罢经畧不设以关内外尽属崇焕并便宜从事】

大清兵征朝鲜

【崇焕与赵率教巡历锦州大小凌河议大兴屯田渐复高第所弃旧土会】

【大清兵方讨朝鲜渡鸭緑江崇焕乘间遣将缮锦州中左大凌三城未毕朝鲜及毛文龙同告急朝命崇焕发兵往援崇焕以水师援文龙又遣率教等九将将精卒逼三岔河为牵制之势而朝鲜已为】

【大清所服诸将遂引还】

勒太康伯张国纪回籍

【国纪皇后父也后性严明见魏忠贤及客氏乱政数于上前言之客魏交恨一日帝至后宫后方读书帝问何书对曰赵高传也帝嘿然而出忠贤闻之益恨曾有张匿名榜于厚载门者列忠贤反状及其党七十余人忠贤疑国纪为之邵辅忠孙杰欲因此兴大狱借国纪以摇中宫事成则立魏良卿女为后草一疏募人上之诸人虑祸不敢承顺天府丞刘志选年老而嗜进无厌惑家人言谓己老必先忠贤死也竟上之疏中极论国纪罪末言毋令人訾及丹山之穴蓝田之种盖忠贤尝诬后非国纪女故云疏上事叵测帝无所问但令国纪自新而已忠贤意大沮梁梦环侦知之复深论志选疏且故诘丹山蓝田二语忠贤将从中究其事故大学士李国 及王体乾交沮之事乃止而国纪竟勒归故郡】

遣瑞王常浩及惠王常润桂王常瀛之藩

【三王皆帝叔父魏忠贤潜蓄逆谋不利其在内御史张讷希旨即疏趣之藩于是三王以次就国仪物礼数刻意贬损羣小反盛称忠贤节费为国帝即下诏褒美】质实【瑞王常浩神宗第五子初太子未立有三王并封之旨谓光宗福王及常浩也寻以羣臣争遂寝二十九年东宫立与福惠桂三王同日封常洵以长先之藩至是常浩之藩汉中惠王常润神宗第六子至是之藩荆州桂王常瀛神宗第七子至是之藩衡州】

夏四月逮前刑部侍郎王之案下狱死

【刘志选疏颂要典言命德讨罪无微不彰即尧舜之放四凶举元恺何以加焉且云慷慨忧时力障狂澜于既倒者魏广微也当还之揆席以继五臣之盛事赤忠报国弼成巨典于不刊者厥臣也当增入简端以扬一德之休风又言王之案宜正典刑孙慎行宜加遣戍忠贤矫旨逮之案下诏狱坐以赃八千竟瘦死慎行亦遣戍宁夏知府曾樱故缓之未行而忠贤败王之案于天启初上复仇疏中言梃击之谋变而为用药之术盖梃不中而药促之是文昇之药惨于张差之梃孙慎行辨析红丸有曰由前则过信可灼有轻进之罪由後则曲庇可灼有不讨贼之罪两者皆无可逃其言峻直故羣小俱恨之刺骨】发明【逆阉乱政流毒缙绅一时呈身献媚之徒借其力以翻三案遂至颠倒是非刊为要典而刘志选者乃复劾逮之案瘐死圜扉煽焰推波莫兹为甚顾志选毫惛嗜进揣风烛之将残冀冰山之可恃卒之十罪朝弹元凶暮窜曾不踰年而身膺显戮为逆案之罪魁所谓孽不可追者其志选之流乎】

五月监生陆万龄请祠魏忠贤于国子监

【万龄请以忠贤配孔子忠贤父配启圣公其疏曰孔子作春秋厥臣作要典孔子诛少正卯厥臣诛东林党人礼宜并尊持疏诣司业林钆钆援笔涂抹即夕挂冠棣星门去司业朱之俊为奏请从之钆坐削籍同时又有一张生者欲上疏以忠贤与孔子并尊入国学自称见子路击之遽殒】质实【林钆字实】

【甫同安人】

秋七月遣魏良卿享南北郊祭太庙

【上不豫以锦州之捷遣良卿告南郊北郊及大庙代行礼于是天下皆知忠贤欲窃神器矣】发明【国家郊庙重典必躬必亲昭其敬也嘉靖时祈谷明堂尝遣武定侯郭勋代识者已讥其非礼乃良卿以魏忠贤之孽俨然摄行大祀对越于两郊九庙之间其僭妄孰甚焉且宁远锦州之役满桂仅以身免盈庭藉藉方争劾袁崇焕之不能救援顾在督师则明斥为罪在内竖则诡冒为功甚至晋秩太师良卿倍邀优叙马鹿混淆谬以捷告岂果谓天祖之可欺耶盖是时忠贤怀奸莫测特欲假托边功令其兄子得因代祭以干帝制逆志之萌于前具见又何待传呼呈秀私语密谋而後觉其有觊觎神器之心耶】

罢袁崇焕以王之臣代之

【时我太宗文皇帝亲督兵至大凌河守城士卒皆遁遂进围锦州】

【太监纪用总督赵率教遣使请和我大清遣书责之袁崇焕令祖大寿等统精兵四千绕出】

【大清兵後别遣水师东出相牵制大寿等未至大清已分兵抵宁远城下崇焕督将士登陣列营濠内用礮拒擊而满桂亦率尤世威以兵来赴我大兵疾驰进擊大败之追至城下尸填壕堑皆满寻解宁远围复益兵攻锦州以潯署不能克毁大小凌河二城而还魏忠贤使其党劾崇焕不救锦州崇焕乞休去以王之臣代之及论守宁锦功文武冒滥增秩赐廕者数百人崇焕止增一秩先是尚书霍维华尝进仙方灵露饮于帝帝饮而甘之已渐厌及得疾体肿忠贤以咎维华维华惧甚虑帝不测有後患欲先自貳于忠贤会宁锦叙廕维华请以让崇焕魏忠贤觉其意降旨颇厉】

封魏忠贤从孙鹏翼为安平伯加少师从子良栋安东侯加太子太保良卿加太师

【良栋鹏翼尚在襁褓鹏翼以宁锦奏捷封良栋以殿工封从吏部尚书周应秋请也】

八月帝崩遗诏皇五弟信王嗣位

【帝疾大渐召阁部科道诸臣于乾清宫谕以魏忠贤王体乾皆恪谨忠贞可计大事黄立极对曰陛下任贤勿貳诸臣敢不仰体及崩遗诏以弟信王嗣位王即夕入居宫中羣臣于比明始至方入临内使十余人转呼崔尚书甚急呈秀入与忠贤密谋久之语秘不得闻或云忠贤欲篡位呈秀以时未可止之也】质实【信王讳由检光宗第五子天启二年封信王】

信王由检即位赦

【是为庄烈帝以明年为崇祯元年】

九月追諡母贤妃刘氏为孝纯皇太后

【初入宫为淑女万历三十八年十二月生庄烈帝已失光宗意被譴薨光宗中悔恐神宗知之戒掖庭勿言葬于西山及庄烈帝长封信王追进贤妃往者庄烈帝问近侍曰西山有刘娘娘坟乎曰有每密付金钱往祭及即位上尊諡曰孝纯皇太后】质实【刘大后海州人後籍宛平】

立皇后周氏

【天启中后选入信邸时神宗刘昭妃摄太后实宫中之政悉禀成于熹宗张皇后故事宫
中选大婚一后以二贵人陪中选则皇太后幕以青纱帕取金五跳脱繫其臂不中即以年日
帖子纳淑女袖侑以银弊遣还张后疑后弱昭妃曰今虽弱後必长大因册为信王妃帝即位
立为皇后】质实【周皇后苏州人徙居大兴生员奎之女奎後封嘉定伯】

赐李庄妃弟成栋田

【庄妃李氏即所称东李者也仁慈寡言笑位居西李前而宠不及庄烈帝幼失母育于西
李既而西李生女光宗改命东李抚视天启元年二月封庄妃客魏用事恶妃持正宫中礼数
多被裁损愤郁而觉至是帝立诏赐妃弟成栋田产念抚育恩也】

冬十月南京地震

【震自西北迄东南隆隆有声】

十一月放魏忠贤于凤阳道死诏磔其屍

【帝素稔忠贤恶深自儆备及即位其党自危杨所修扬维垣先劾崔呈秀用以尝帝时呈
秀丁母忧夺情视事不用縗纆所修请令呈秀守制维垣继攻之呈秀罢归于是主事钱元愬
遂劾忠贤上言忠贤本梟獍之资先帝假以事权羣小蚁附称功颂德布满天下如王莽之妄
引符命列爵三等畀及乳臭如梁冀之一门五侯徧植奸党分置要津如王衍之狡兔三窟輿
珍辇实藏聚肃宁如董卓之郿坞自固广开告讐诛锄士类如曹节王甫之钩党株连陈养死
士陈兵自卫如桓温之壁後置人皇上待以不死宜勒归私第魏良卿等有玷茅土并宜褫革
员外史躬盛主事陆澄源亦交章谕之而嘉兴贡生钱嘉徵更劾忠贤十大罪一曰并帝内外
封章必先关白称功颂德上配先帝及奏俞旨必曰朕与厥臣自古未闻有此奏体二曰蔑后
皇亲张国纪于御前面折逆奸遂遭罗织欲置之死赖先帝神明只膺薄惩不然皇亲危则中
宫危矣三曰弄兵祖宗朝不闻内操忠贤外胁臣工内逼宫闈操兵禁中深可寒心四曰无二
祖列宗高皇帝垂训中涓不许干预朝政乃忠贤一手障天流毒缙绅凡边腹重地漕运咽喉
多置腹心意欲何为五曰剋削藩封三王之国庄田赐赉甚薄也而忠贤封公侯伯之土田膏
腴万顷六曰无圣先师为万世名教主忠贤何人敢祠太学之侧七曰滥爵古制非军功不侯
忠贤竭天下之物力佐成三殿居然袭上公之爵膺不知省八曰掩边功辽左用兵以来堕名
城杀大将而冒侯封伯九曰伤民财郡县请祠遍天下一祠所费不下五万金敲骨剥髓孰非
国家之脂膏十曰褻名器崔呈秀之子铎目不识丁贤书遂登前列疏上帝召忠贤使内侍读
之忠贤震恐丧魄急以重宝信邸太监徐应元求解应元故忠贤博徒也帝知之斥应元安置
忠贤于凤阳榜其罪示天下寻谕曰逆恶魏忠贤擅窃国柄诬忠良罪当死姑从轻发凤阳乃
不思自惩素蓄亡命之徒环拥随护势若叛然令锦衣卫逮治忠贤行至阜城闻之与其党李
朝钦偕缢死乃磔其屍悬首河间呈秀闻忠贤死亦自缢明年追戮其屍时言者劾呈秀为五
虎之首宜肆市朝有诏逮治籍其家呈秀闻之列姬妾罗珍实呼酒痛饮尽一卮即掷坏之饮
已自缢诏开棺追戮其屍其子铎覆试仅得二义削籍】质实【钱元愬归安人史躬戒乌程

人陆澄源平湖人戍边】

罢诸边镇守中官

【天启六年三月各边俱增设内官镇守至是帝谕兵部先朝于宣大蓟辽东江之地分遣内臣协镇一柄两操甚为无谓且宦官观兵自古有戒其槩罢之】

免天启时逮死诸臣赃释其家属

黄立极罢

【山陰监生胡焕猷上疏论黄立极施凤来张瑞图李国 等身居揆席一意媚阉并宜斥罢立极等疏辨帝犹优诏报之及是立极终不自安乞休去时杨维垣等交章论焕猷疑东林指使请按问乃诏除焕猷名】

发明【黄立极等以逆阉党人夤缘政府逢奸肆恶靡所不为逆阉既诛其党自应罢斥乃大臣不为举发言官不闻论奏而纠劾之疏且出自一山陰监生则诸臣平日封章交论相与水火者徒知争门户之私而于国家进贤退不肖之义曾不涉其胸臆也庄烈帝深知立极辈之附奸特不欲骤斥衆臣故为除焕猷召以安其意而杨维垣等乃疑其为东林指使疏请按问是时逆阉虽诛逆案未定故犹以东林为罪恶之归小人变乱黑白何所不至乃鼎象已昭而魑魅犹不自觉亦可哀也夫】

十二月以钱龙锡李标来宗道杨景辰黄道登刘鸿训并为礼部尚书兼东阁大学士预机务

【帝以施凤来辈皆忠贤所用不足倚诏廷推阁臣仿古枚卜典召九卿科道入乾清宫贮名金瓯焚香肃拜以次探之得龙锡标宗道景辰辅臣以天下多故请益一二人复得道登鸿训并命入阁】质实【钱龙锡字稚文松江华亭人李标字汝立高邑人来宗道萧山人黄道登吴江人刘鸿训字默成长山人】

追复熹宗成妃李氏裕妃张氏封号

【客魏肆恶日幽成妃别宫不死斥为宫人裕妃幽别宫絶饮食而死至是俱追复封号】

客氏及魏良卿侯国兴等伏诛

【先是熹宗崩客氏将出外宅氏于五更赴梓宫前出一小函用黄色龙袱包裹皆熹宗胎发痘痂及累年落齿剃髮痛哭焚化而去及是诏赴浣衣局掠死籍其家良卿国兴与客光先等皆弃市家属无少长皆斩婴孩赴市有眈睡未醒者人以为惨毒之报莫不快之方客氏之

籍也于其家得宫女妊身者八人盖将效吕不韦所为帝大怒命悉笞杀之】

御定资治通监纲目三编卷三十三

卷三十四

钦定四库全书

御定资治通鉴纲目三编卷三十四

【起戊辰明庄烈崇祯元年尽庚午明庄烈崇祯三年】凡三年

【戊辰】庄烈帝崇祯元年春正月诏中官非奉命不得出禁门

【帝惩魏忠贤祸乃有是诏寻又申廷臣交结内侍之禁颁谕谆戒之】

尊熹宗皇后为懿安皇后

三月葬德陵

【谥曰尧天阐道敦孝笃友章文襄武靖穆庄勤愍皇帝庙号熹宗】质实【德陵在昌平州双锁山擅子峪西南距永陵一里明史赞曰明自嘉靖而後纲纪日已陵夷神宗末废坏极矣虽有刚明英武之君已难复振而重以帝之昏庸妇寺窃柄滥赏淫刑忠良惨祸亿兆离心虽欲不亡何可得哉】

天赤如血

【是月辛巳昧爽也占者云是主大旱且兵徵】

施凤来张瑞图罢

【凤来素无节概以和柔自媚於世瑞图务迎合魏忠贤会试发策言古之用人者初不设君子小人之名分别起於孔子其谬妄如此忠贤生祠碑文多出其手书诏旨褒美忠贤词极骈丽皆瑞图笔也至是御史罗元宾疏劾凤来等畧论给紼之重任总归阉宦之权衡欲尚公则尚公欲封爵则封爵欲建祠则建祠欲诛杀削夺则诛杀削夺情面多而担当少爵禄重而谋国轻遂使黄扉为置邮之所辅臣若执簿之官悞国徇私莫此为甚帝是其言凤来瑞图遂俱乞罢】质实【罗元宾会稽人】

赠恤冤陷诸臣

【诸忤忠贤致死若杨涟左光斗魏大中周朝瑞袁化中顾大章周起元繆昌期周顺昌周宗建黄尊素李应昇万燝皆赠官录一子王之寀复官丁乾学吴裕中刘铎吴怀贤苏继欧张汝汶亦获赠恤诏死祸尤烈者并予諡而是时姚希孟以词臣持物论雅不善光斗宗建力尼之

遂多不获諡给事中瞿式耜讼诸臣冤称涟大中顺昌为清中之清忠中之忠乃諡涟忠烈大中忠节顺昌忠介既而赵南星邹元标高攀龙冯从吉并赠官赐諡】质实【杨涟赠太子太保兵部尚书左光斗赠右都御史魏大忠周顺昌赠太常卿周朝瑞赠大理卿周起元赠兵部右侍郎缪昌期赠詹事兼侍读学士袁化中顾大章周宗建黄尊素李应昇赠太仆卿万燝赠光禄卿福王时追諡光斗朝瑞宗建应昇忠毅化中忠愍大章裕愍起元忠惠昌期文贞尊素忠端燝忠贞丁乾学赠侍读学士刘绎赠太仆少卿吴怀贤赠工部主事苏继欧赠太常卿吴裕中张汶赠恤有差赵南星赠太子太保諡忠毅邹元标赠太子太保吏部尚书諡忠介高攀龙赠太子少保兵部尚书諡忠宪冯从吾赠太子太保谥?定瞿式耜字起由常熟人明挂王时殉节 本朝乾隆四十一年追諡忠宣】

夏四月以袁崇焕督师蓟辽

【初崇焕以忤忠贤去忠贤既伏诛廷臣争请召崇焕至是进兵部尚书督师蓟辽兼督登莱天津军务所司敦迫上道比至都帝召见平台咨以方畧对曰臣受陛下特眷愿假便宜计五年全辽可复帝退少憩时廷臣咸在给事中许誉卿叩以五年之畧崇焕言圣心焦劳聊以相慰耳誉卿曰上英明安可漫对异日按期接效奈何崇焕抚然自失顷之帝出即奏言东事本不易竣陛下既委臣臣安敢辞难但五年内户部转军饷工部给器械吏部用人兵部调兵选将须中外事事相应方克有济帝为飭四部臣如其言崇焕又言以臣之力守金辽有余调衆口不足一出国门便成万里忌能妬功夫岂无人即不以权力掣臣肘亦能以意见乱臣谋帝起立倾听谕之曰卿勿疑虑朕自有主持大学士刘鸿训等复请赐崇焕尚方剑假之便宜帝悉从之崇焕又以前此熊廷弼孙承宗皆为人所排构不得竟其志乃上言恢复之计不外臣昔年以辽人守辽土以辽土养辽人守为止着战为奇着和为旁着之说法在渐不在骤在实不在虚此臣与诸臣所能为至用人之人与为人用之人皆至尊司其钥何以任而勿贰信而勿疑盖驭边臣与廷臣异军中可惊可疑者殊多但当论成败之大局不必摘一言一行之微瑕事任既重为怨实多诸有利于封疆者皆不利于此身者也是以为边臣甚难臣非过虑但中有所危不得不告帝优诏答之】质实【许誉卿字公实松江华亭人】

五月李国 罢

【国 与魏忠贤同乡然每持正论刘志选梁梦环劾张国纪以撼中宫赖国 调护之国纪得免罪王化贞之弃广宁列城皆走惟巡按御史方震孺保前屯无动而忠贤素衔震孺嗾其党诬劾之坐赃拟绞寻扬州知府刘绎呪诅之狱起又诬震孺与交通坐大辟系狱国 力为保全帝初即位以登极恩进左柱国少师兼太子太师吏部尚书中极殿大学士国子监生胡焕猷以劾国 等褫衣冠国 荐复之时人称为长者至是乞归荐韩爌孙承宗自代卒於家赠太保谥文敏】

毀三朝要典

【魏忠贤既诛其党杨维垣等护持旧局上疏力诋东林与崔魏并信为邪党编修倪元璐

再疏攻驳柄国者两解之元璐寻上言请毁三朝要典畧曰挺击红丸移宫三义關於清流而三朝要典一书成於逆?其议可兼行其书必当连毁盖当时起事兴议盈廷互讼主挺击者力护东宫争挺击者计安神祖主红丸者伏羲之言争红丸者原情之论主移宫者弭变於机先争移宫者持平於事後数者各有其是不可偏非总在逆璫未用之先虽甚水火不害坝箴此一局也既而杨涟二十四罪之疏发魏广微此辈门户之说兴於是逆璫杀人则借三案羣小求富贵则借三案经此二借而三案面目全非矣故凡推辞归孝于先皇正其颂德称功于义父此又一局也网自密而犹疑有遗鳞势已成而或忧其翻局崔魏诸奸始创立私编标题要典以之批根今日则衆正之党碑以之免死他年即上公之铁券又一局也由此观之三案者天下之公议要典者魏氏之私书三案是三案要典自要典今为金石不刊之论者诚未深思臣谓翻即纷囂改亦多事唯有毁之而已夫以阉?之权而役史臣之笔亘古未闻当毁一未易代而有编年不直书而加论断若曰彷彿明伦规模大典则是魏忠贤欲与肃皇帝争圣崔呈秀可与张孚敬比贤悖逆非伦当毁二矫诬先帝伪撰宸篇既不可比司马光资治通鉴之书亦不得援宋神宗手制序文之例假窃诬妄当毁三况史局将开馆抄具备七载非难稽之世实録有本等之书何事留此骈枝供人唾骂当毁四疏上帝从之遂焚其书侍讲孙之獬忠贤党也闻之诣阁大哭天下笑之】质实【倪元璐字玉汝上虞人孙之獬淄川人】

六月来宗道杨景辰罢

【宗道代李国 为首辅事多诡随编修倪元璐屡言时事宗道笑曰渠何事多言词林故事止香茗耳时谓宗道为清客宰相景辰先与宗道为要典副总裁一徇奸党指及朝局已变乃请毁要典言官交章劾之遂与宗道同罢】

秋七月浙江海溢

【是月壬午杭嘉绍三府海啸坏民居数万间溺数万人海宁萧山尤甚】

海寇郑芝龙降

【芝龙少与弟芝虎从海盗顔振泉为寇振泉死衆盗无所统约共祷於神植剑米斛中递拜之剑动者推为长芝龙预藏磁石袖间甫拱手剑跃出遂雄长海上以已泉人不寇泉令其党刘香寇之泉州官吏招芝龙降芝龙来受命芝虎不从噪而去猖獗如故然芝龙长败官军不追获将士释不杀当事知芝龙终可抚复遣使谕之竟偕芝虎降而其党李魁奇鍾斌旋叛去与香仍为盗熊文灿巡抚福建善遇芝龙颇得其力魁奇屡抗官军守备莫兆爌战歿芝龙击擒之又败斌於泉州斌投海死香连犯闽广沿海邑广州都司许当辰剿香歿于阵文灿议招抚贼佯许之文灿遽遣参政洪云蒸等入贼舟宣谕被执文灿惧委罪云蒸言官劾之帝勅文灿戴罪自劾乃令芝龙以游击为先锋合广东兵击香海上大败之香胁云蒸止兵云蒸大呼曰贼穷矣急击勿失遂遇害香自焚其舟以死 按明史施邦曜传盗刘香李魁奇横海上邦曜絜香母诱之香就擒魁奇援郑芝龙事请抚邦曜言於巡抚邹维琯讨平之与熊文灿传所载互殊盖传闻异辞也】质实【郑芝龙泉州南安人熊文灿贵州永宁卫人莫兆爌同安人】

许当辰余杭人洪云蒸长沙人 本朝乾隆四十一年追諡兆熾云蒸烈愍当辰节愍】

革广宁及蓟镇塞外诸部岁赏

【故事广宁塞外兆哈诺穆图固英及蓟镇喀尔沁三十六家岁授抚赏至是尽革去之会岁饥诸部请粟复不许遂归诚于我大清】

宁夏兵变

【四川湖广兵戎宁远者以缺饷四月大噪余十三营起应之缚巡抚毕自肃总兵官朱梅通判张世荣推官苏涵淳于樵楼上兵备副使郭广初至括二万金以散不厌贷商民足五万乃解自肃疏引罪走中左所自经死袁崇焕以八月抵关闻变驰与广密谋宥首恶张正朝张思顺令捕十五人戮之市斩知谋中军吴国琦责参将彭簪古黜都司左良玉等四人发正朝思顺前锋立功世荣?淳以贪虐致变亦斥之独都司程大乐一营不从变特为奖励一方乃靖先是关外止设总兵官一人崔呈秀欲用其私党增设三四人故权势相衡臂指不运寻定设二人而掣肘如故朱梅将解任崇焕请合宁锦为一镇仍以总兵官祖大壽驻锦州加中军副将何可纲都督僉事代梅驻宁远而移蓟镇赵率教于关门关内外止设二大将因极称三人才谓臣自期五年专藉此三人当与臣相终始届期不效臣手戮三人而身归死于司败帝可之崇焕遂留镇宁远又请罢宁远及登莱巡抚不设帝亦报可时度支大绌锦州蓟镇兵相继譁户部尚书毕自严言一岁之出浮于所入一百一十三万有奇而内供召买不与焉帝命廷臣各陈所见自严择其可者列上增盐引议鼓铸括杂税核隐田税寺产诸事皆珣屑权宜之计民以重困】质实【毕自肃自严皆淄川人自严字景曾左良玉字崑山临清人祖大壽何可纲皆辽东人】

九月京师地震

冬十月大学士刘鸿训免寻遣戍

【先是忠贤虽败其党犹满朝满路新进者羣抨击之诸执政尝与忠贤共事不敢显为别白鸿训至阁毅然主持斥杨维垣李恒茂杨所修由景新孙之獬阮大铖徐绍吉张纳李旧贾继春霍维华等人情大快而御史袁鸿勋史?高捷本由维垣辈进思合谋攻去鸿训则党人可安也鸿郅乃言所修继春维垣夹攻表里之奸有功无罪而诛锄自三臣始又诋鸿训使朝鲜满载貂参而归锦衣僉事张道濬亦奸攻鸿训鸿训奏辩给事中顏继祖言鸿训朝鲜之役舟败仅以身免乞谕鸿训入直共筹安攘之策至鸿勋之借题倾人道濬之出位乱政非重创未有已也帝是之给事中邓英乃尽发鸿勋赃私且言鸿勋以千金贄维垣得御史帝怒落鸿勋职候勘已而高捷上疏言鸿训斥击奸之维垣所修继春大铖而不纳孙之獬流涕忠言谬主焚毁要典以便私党孙慎行进用帝责以忘言停其俸史?复佐捷攻之言路多不直两人两人遂罢去时帝数召见廷臣鸿训应对独敏谓民困由吏失职请帝久任责成以尚书毕自严善治赋王在晋善治兵请帝加倚信帝初甚向之关内兵以缺向鼓噪帝意责户部而鸿训请发

帑三十万示不测思由是失帝指未几而有改敕书之事旧例督京营者不辖巡军惠安伯张庆余总督京营敕内有兼辖捕营语提督郑其心以侵职论之命核中书行贿改之故下舍人田嘉璧狱给事中李觉斯言藁其兵部送辅臣裁定乃令中书缮写写讫复审视进呈兵部及辅臣皆当问帝心疑其事乃御便殿问诸阁臣皆谢不知帝怒给事中张鼎延御史王道直咸言庆臻行贿有迹不知谁主使御史吴玉言主使者鸿训也庆臻曰改敕乃中书事臣实不预知且增辖捕卒取利几何乃行重贿帝叱之阅兵部揭有鸿训批西司房语嘉璧亦诬伏受鸿恩指事遂不可解而侍郎张凤翔诋之尤力阁臣李标钱龙锡言鸿训不能有此请更察访帝曰事已大着何更访为促令拟旨标等逡巡未上礼部尚书何如宠为鸿训立辩帝意卒不可回乃拟旨鸿训庆臻并革职候勘无何御史田时震劾鸿训用田仰巡抚四川纳贿二千金给事中阎可陞劾副都御史贾毓祥由贿鸿训擢用鸿训数被劾连章力辩因言都中神奸狄姓者诡诬庆臻千金致臣无辜受祸帝不听下廷臣议罪明年正月吏部尚书王永光等言鸿训庆臻罪无可辞而律有议贵条请宽贷兵部尚书王在晋职方郎中苗思顺赃证未确难悬坐帝不许鸿训谪戍代州在晋思顺并削籍庆臻以世臣停禄三年觉斯鼎延道直玉时震以直言增秩一级鸿训居政府锐意枉事帝有所不可退而曰主上毕竟是冲主帝闻深衔之欲置之死赖诸大臣力救乃得稍宽后鸿训竟卒戍所福王时复官】质实【刘鸿训使朝鲜按鸿训传神光二宗相继崩鸿训方官编修充使颁诏朝鲜甫入境辽阳失守朝鲜为造二洋舶从海道还沿途收难民舶重而坏跳浅入小舟飘泊三日夜仅达登州报命徐绍吉四川保宁人袁鸿勋慈溪人史?清苑人高捷宁晋人张道濬沁水人巡按辽东御史铨之子颜继祖龙溪人邓英安福人王左晋字明初太仓人张庆臻惠安伯伟曾孙李觉斯东莞人张鼎延河南永宁人王道直汉川人吴玉寿阳人张凤翔堂邑人何如宠字康侯桐城人田时震富平人田仰庐陵人阎可陞韩城人贾毓祥平度人苗时顺宁陵人】

发明【刘鸿训力斥阉党为诸党人所嫉袁鸿勋等思合谋攻去之以安其党庄烈既已知其曲直为之罪鸿勋罢史?高捷矣乃未几而以改敕之事悬坐鸿训加之遣戍夫敕书之改写阁臣固不得谗以不知然毫无佐证遽凭诋讦之言定为主使断以行贿在鸿训退有冲主之言岂得云无咎而庄烈以此深衔必欲置之死地且未久而袁鸿勋等皆仍以言官倚任不几于代党人为报复耶鸿训之才虽非卓犖其锐意任事亦有足取当国事艰难之际人材既不易得而又举措听荧何怪十七年中阁臣至至五十人之多哉】

十一月召对廷臣于文华殿礼部侍郎钱谦益以罪削职都给事中章允儒等降有差

【诏会推阁臣廷臣列吏部侍郎成基命及谦益等名以上时同推者郑以伟李腾芳孙慎行何如宠薛三省盛以宏罗喻义王永光曹于汴凡十一人礼部尚书温体仁侍郎周延儒以无素望不与延儒性警敏善伺意指方锦州兵譁袁崇焕请给饷帝召问诸大臣皆请发内帑延儒独进曰关门昔防敌今且防兵宁远譁饷之锦州譁复饷之各边效尤帑将安给帝曰卿谓如何延儒曰事迫不得不发但当求经久之策帝悦曰卿言是也降旨责羣臣越数日复召问延儒曰饷莫如粟山海积粟不缺也缺银耳何故譁安知非骄升构煽以胁崇焕邪帝方疑边将要挟闻延儒言复悦曰卿言是由此属意延儒而会推弗及体仁揣帝意必疑遂上疏讦谦益为考官时关节受贿不当与阁臣选先是谦益典试浙江有奸人金保元徐时敏伪作关

节用俚俗诗一朝平步上青天句分置七义结尾授举子钱千秋遂中式千秋本能文同考官荐拟第二谦益改置第四千秋知为保元时敏所卖与之鬩事传京师为给事中顾其仁所发谦益大骇即具疏劾二奸及千秋俱下吏论戍谦益亦夺俸二奸寻毙千秋遇赦释还事已七年矣至是体仁复理其事帝果心动次日召对阁部科道诸臣于文华殿命体仁谦益皆至谦益不虞体仁之劾已也辞颇屈而体仁盛气诋谦益言如泉涌因进曰臣职非言官不可言会推不与宜避嫌不言但枚卜大典宗社安危所系谦益结党受贿举朝无一人言者臣不忍见陛下孤立于上是以不得不言帝久疑廷臣植党闻体仁言辄称善而执政皆言谦益无罪吏部都给事中章允儒争尤力且言体仁热中觖望如谦益当纠何俟今日体仁曰前此谦益皆闲曹今者纠之正为朝廷慎用人耳如允儒言乃真党也允儒曰党之说小人以陷君子天后朝可鉴帝怒命礼部进千秋卷责谦益谦益引罪帝叹曰朕几误遂叱允儒下诏狱并切责诸大臣时大臣无助体仁者独延儒奏曰会推名虽公主持之止一二人余皆不敢言即言徒取祸耳且千秋自有成案不必复问诸臣帝乃即日罢谦益官命议罪坐杖论赎允儒及给事中瞿式耜御史房可壮等皆坐谦益党降谪有差千秋复被逮荷校死】质实【钱谦益字受之常熟人章允儒南昌人成基命字靖之大名人郑以伟字子器上饶人薛三省字鲁叔定海人罗喻义字湘中益阳人温体仁字长卿乌程人周延儒字玉绳宜兴人顾其仁华阳人房可壮益都人】

十二月韩爌复入阁

【帝登极後言者争请召爌为逆党杨维垣所扼但赐敕存问是年五月始遣行人召之及是还朝会帝以钱谦益事悉署廷臣推者不用遂命爌复为首辅帝文华後殿閱章奏召爌等谕以拟旨务消异同开诚和衷期於至当爌等顿首谢退言所谕甚善而密勿政机诸臣参互议拟不必显言分合至臣等晨夕入直势不能报谢宾客商政事者宜相见於朝房而一切禁私邸交际帝即谕百寮遵行刘鸿训方被重谴爌至即具疏申救不听会御史毛九华劾温体仁居家时以抑买商人木为商人所诉赂崔呈秀以免又因杭州建逆祠作诗颂魏忠贤帝下浙江巡抚核实未报御史任赞化复劾体仁娶娼受金夺人产诸不法事体仁揣已为清议所斥因力求去以要帝且言臣以奸罢钱谦益故其党排讦臣者百出而无一左袒臣臣孤立可见再召内阁九卿质之体仁与九华赞化诘辩良久言二人皆谦益死党帝心以为然秉烛召爌等于内殿谓进言者不忧国而植党自名东林於国事何补当重绳以法爌请寛言官以安体仁既退具揭言人臣不可以党事君人君亦不可以党疑臣但当论其才品臧否职业修废而黜陟之若戈矛妄起於朝堂畛域横分於官府非国之福也不纳】质实【毛九华掖县人任赞化间喜人】

陕西饥流贼大起

【先是阉党乔应甲巡抚陕西朱童蒙巡抚延绥皆贪黷虐民民多起为盗有刼官吏署者应甲置盗不问反胁官吏责重贿盗乃日横而被盗者莫敢告至是连岁大祲有司不恤下白水王二者鳩衆墨其面突入澄城杀知县张耀采由是府谷贼王嘉允宜川贼王左挂等一时并起遂攻城堡杀官吏安塞贼高迎祥与饥民王大梁复聚衆应之迎祥自称闯王大梁自称

大梁王寻固原兵以无饷譁亦叛去为盗大吏恶闻贼曰此饥氓徐自定耳明年帝从给事中刘懋议裁驿站冗卒山陕游民仰驿糈者无所得食皆从贼】质实【白水汉栗邑晋废後魏复置白水县澄城後魏置明并属同州以隶于西安府今升同州为府二县仍属焉府谷五代後唐置明属葭州以隶于延安府今属榆林府宜川西魏义川宋改宜川安塞宋堡元升县明并属延安府今因之刘懋临潼人】

发明【衅薪不沃而火燎于原门莠不除而蔓延于野方朱童蒙乔应甲之时草窃奸宄渐起萑蒲捕而戮之一长吏力也失此不治驯至宜川白水啸聚为羣然弄兵潢池特乌合之衆耳陕西分建五镇宿将劲兵雄於天下使乘窃发之初厚集官军尅期进剿俘厥渠魁翦其枝党不数日间定矣而乃藉口饥氓曲为盗讳遂使疥癬之疾酿毒成痈狐鼠之羣假威作虎揭竿响应蹂躪中原而国随以亡灭是果谁之咎哉】

【己巳】二年春正月周道登罢

【道登尝召对帝问宰相须用读书人何解对曰容臣至阁中检閱回奏帝有愠色又问章奏内多有情面二字何也对曰情面者情之谓左右皆匿笑道登前在礼部颇有所争执及柄政後排正人庇私交屡为言路所劾帝悉下其章廷议尚书王永兆等言所劾俱有实迹遂放归】

定逆案

【诏定魏忠贤逆案阁臣韩爌等不欲广搜树怨仅以四五十人上帝少之令再议又以数十人上帝不恚令以赞道拥戴颂美谄附为目因曰忠贤一内?耳苟非外廷助虐何遽至此且内廷同恶者亦当入爌等以不知内侍为对帝曰岂皆不知特畏任怨耳阅曰召入便殿案有布囊盛章奏甚夥指之曰此皆奸党颂疏可案名悉入爌等知帝意不可回乃曰臣等职在调旨三尺法非所习帝召吏部尚书王永光问之以不习刑名为对乃诏刑部尚书乔允升左都御史曹于汴同番定案所罗列几无脱遗至是上之帝亲加裁定自魏忠贤客氏依谋反大逆律磔死外以六等定罪曰首逆同谋崔呈秀及魏良卿侯国兴太监李永贞李朝钦刘若遇六人俱立斩曰交结近侍刘志选梁梦环倪文焕田吉刘诏薛贞吴淳夫李夔龙曹钦程许志吉孙如洌陆万龄李承祚田尔耕崔应元杨环孙云鹤许显纯张体乾十九人俱斩秋後处决曰交结近侍次等魏广微周应秋阎鸣秦霍维华徐大化潘汝祯李鲁生杨维垣张纳郭钦李之才十一人及逆孽魏志德等三十五人俱充军曰交结近侍又次等顾秉谦冯铨张瑞图来宗道王诏徽等一百二十九人俱坐徒三年赎为民曰交结近侍减等黄立极等四十四人俱革职间住又于诸人姓名下各注所犯刊布中外知之方案初定张瑞图来宗道及贾继春皆不与帝召见阁臣及允升于汴于平台诘之阁臣等以瑞图宗道无实状对帝曰瑞图善书为忠贤所爱宗道为崔呈秀父请恤典中有在天之灵语非实状耶又问继春对曰继春虽反覆然持论亦有可取帝曰唯反覆故为真小人三人遂俱论徒】

三月以杨鹤总督三边军务捕流贼

【鹤初官金都御史忤忠贤罢去帝即位复官进左副都御史鹤见帝求治太急乃上言图治之要在培元气自大兵大疫加派频仍小民之元气伤辽左黔蜀丧师失律封疆之元气伤缙绅构党彼此相倾逆阉乘之诛锄善类士大夫之元气伤譬如重病初起百脉未调风邪易入急当培养而陛下事事励精临轩面质或问之而未必尽知事下六曹或呼之而未必立应致于圣怒数取谴诃窃以为遇矣今一切民生国计吏治边防宜取祖宗成法委任责成严为之程宽为之地图之以渐镇之以静何虑不臻太平哉疏入报闻寻三边总督武之望卒官而是时关中寇炽廷臣莫肯往羣推鹤帝召鹤问方略对曰清慎自持抚恤将卒而已遂拜鹤兵部右侍郎代之望总督军务讨贼先是流寇王大梁由畧阳逼汉中余贼望洛川淳化三水等十余州县游击高从龙战没固原逃兵周大旺等复掠泾阳富平势甚张及鹤至参政刘应遇已先击斩王二于白水追殲大梁于汉南副将贺虎臣亦捕斩大旺等贼渠畧尽而继起者益衆延安榆林间所在皆贼鹤素有清望然不知兵庙堂遽用之竟莫能剿贼後遂一意主抚以致败】质实【淳化宋以云阳县之黎国镇置明属邠州以隶于西安府三木汉县元废明正统中复置亦属邠州以隶于西安府 本朝雍正三年升邠州为直隶州二县仍属南阳鹤字修龄武陵人武之望临潼人贺虎臣保定人】

夏五月乙酉朔日有食之

【先是大统历推食三分二十四秒回回历推食五分五十二秒礼部侍郎徐光启依西法预推顺天府食二分有奇历天食六分有奇琼州食既大宁以北不食至是光启法验大统回回历皆疏帝切责监官于是五官正戈丰年等言大统乃洪武时所定实即郭守敬授时历也自至元十年造历越十八年为大德三年八月已当食不食六年六月又食而夫推是时守敬方知院事已不能无乖错况斤斤守法者哉今若循旧向後不能无差光启亦言岁差环转岁实参差天有纬度地有经度列宿有本行月五星有本轮月有真会视会皆古所未闻惟西法有之宜取以参互考订与大统法会同归一寻上历法修正十事因荐太仆少卿李之藻西洋人龙华民邓玉函善推步报可遂开历局以光启为监督未几华民卒更徵西洋人汤若望罗雅谷译书演算光启加本部尚书仍督修历法西法之行自此始初西法与回回历相同周天三百六十度度六十分分六十秒一日十二时时八刻刻十五分有闰日无闰月迨入中国又通融中法始复置闰月穷推详测益加精密而授时大统之说渐绌】质实【大统历吴元年十一月乙未冬太史院使刘基率其属高翼上戊申大统历洪武十七年漏刻博士元统以大统积分犹踵授时之数非所以重始敬正乃擢统为监令取授时法去其岁实消长之说析其条例得四卷以洪武十七年甲子为历元命曰大统历法通轨二十六年监副李德芳言当复用消长之法自是大统历元以洪武甲子而推算仍依时法云回回历出西域元置回回司天台与授时法并行明洪武三年设科隶钦天监亦参用之历法修正十事其一议岁差每岁东行渐长渐短之数以正古来百年五十年六十年多寡互异之说其二议岁实小余昔多今少渐次改易及日景长短岁岁不同之因以定冬至以正气朔其三每日测验日行经度以定盈缩加减真率东西南北高下之差以步日躔其四夜测月行经纬度数以定交转迟疾真率东西南北高下之差以定月离其五密测列宿经纬行度以定七政盈缩迟疾顺逆违离远近之数其六密测五星经纬行度以定小轮行度迟疾留逆伏见之数东西南北高下之差以推步凌犯其七推算黄道赤道广挟度数密测二道距度及月五星各道与黄道相距之度以定交

转其八议日月去交远近及真会视会之因以定距午时差之真率以正交食其九测日行考知二极出入地度数以定周天纬度以齐七正因月食考知东西相距地轮经度以定交食时刻其十依唐元法随地测验二极出入地度数地轮经纬以求昼夜晨昏承短以正交食有无先後多寡之数西法明神宗万历中有大西洋人利玛窦者进贡土物与其国人龐迪弢熊三拔及龙华民邓玉函汤若望等先後至俱精究天文携有彼国历书多中国典籍所未备者于时徐光启李之藻皆宗之是为西法徐光启字子先上海人】

六月袁崇焕杀总兵官毛文龙于双岛

【文龙镇东江岁糜饷无算所往辄败衄诡称捷冒功又纵下恣淫掠骄蹇不乐受节制崇焕始受事即欲诛文龙大学士钱龙锡以崇焕召对时有五年复辽语因造寓询方畧崇焕曰恢复当自东江始文龙可用则用之不可用则处之易易耳比崇焕莅镇疏请遣部臣理东江饷文龙恶文臣监制抗疏驳之崇焕不悦寻文龙来谒接以宾礼文龙不让崇焕谋益决至是以閱兵为名泛海抵双岛文龙来会崇焕与相燕饮每至夜分文龙不觉也崇焕易更营制设监司文龙怫然崇焕以归鄉动之文龙曰向有此意但惟我知东事东事毕朝鲜衰弱可袭而有也崇焕滋不怍遂以六月五日邀文龙观将士射先设幄山上令参将谢尚政等伏甲士幄外文龙至其部卒不得入崇焕曰予诘朝行公当海外重寄受予一拜交拜毕登山因诘文龙违令数事文龙抗辩崇焕厉声叱之命去冠带縶缚文龙犹倔强崇焕曰尔有十二斩罪知之乎祖制大将在外必命文臣监尔专制一方军马钱粮不受核一当斩人臣之罪莫大欺君尔奏报尽欺君杀濒海难民冒功二当斩人臣无将将则必诛尔奏称牧马登州取南京如反掌大逆不道三当斩每岁饷银数十万不以给兵月止散米三斗有半侵盗军饷四当斩擅开马市于皮岛私通海外诸国五当斩部将数千人悉冒己姓副将以下滥给割付千走卒舆夫尽金帛六当斩自宁远剽掠商船自为盗贼七当斩强取民间子女不知纪极部下效尤人不安室八当斩驱难民远窃人参不从则幽之岛上僵饿死者白骨如莽九当斩犖金京师拜魏忠贤为父塑冕旒象于岛中十当斩铁山之败丧军无算掩败为功十一当斩开镇八年拥兵观望不能恢复寸土十二当斩数毕文龙噤不能置辩但叩头乞免崇焕召谕其从官曰文龙罪重当斩否皆惶怖唯唯中有称文龙数年劳苦者崇焕叱退之乃顿首请旨出尚方劔斩文龙于帐前然後出谕其部卒曰诛止文龙余无罪皆不敢动分其兵为四协以文龙子承祚及副将陈继盛等领之犒军士檄抚诸岛尽除文龙虐政还镇以其状上闻末言文龙大将非臣得擅诛谨席藁待罪帝骤闻意殊骇既念文龙已死方任崇焕乃优旨褒答崇焕又上言文龙一匹夫不法至此以海外易为乱也其衆合老稚四万七千妄称十万且民多兵不能二万妄设将领千今不宜更置帅即以副将继威摄之于计便又虑部下为变请增饷饷至十八万帝皆报可时文龙专阬海外有跋扈声崇焕一旦除之自谓可弭後患然东江屹然臣镇文龙死势日衰弱且岛弁失主帅心渐携益不可用其後致有判去者】质实【双岛在今奉天府寧海县西南海中陈继盛辽东人】

秋八月总督云南川湖广西军务朱燮元平水西蛮【先是燮元督五路师讨永宁奢崇明及水西安邦彦以计赂贼党杀崇明子寅寅既死崇明年老无能为邦彦势孤因乞抚燮元闻于朝许之乃遣参将杨明辉往抚变元旋以父丧归偏沅巡抚闵梦得来代梦得策用兵当自

永宁始疏陈方畧未报寻召还代以尚书张鹤鸣议遂寝鹤鸣未至明辉奉制书仅招抚邦彦兄子位不云赦邦彦邦彦怒杀明辉抚议由此絶鹤鸣视师年余未尝一战贼得养其鋭崇祯元年六月复起爨元故官兼巡抚贵州遂用梦得前议檄云南兵下乌撒四川兵出永寧下毕节而亲率大军驻陆广逼大方总兵官许成名参政郑朝栋由永宁复赤水时邦彦自称四裔大长老号崇明大梁王势张甚闻官军四路并进乃分其部衆据守陆广鸭池三岔诸要害别以一军取遵义自以兵十余万先犯赤水爨元授计成名令诱贼至永宁而潜遣总兵官林兆鼎从三岔入副将王国祯从陆广入刘义鯤从遵义入合倾其巢邦彦与成名战于赤水成名佯北邦彦悉力进会四川总兵官侯良柱副师刘可训方出永宁与贼遇遂接战小却成名还师来援贼乃据五峯山桃红坝官军仰攻不得上越数月良柱侦贼不备与副将邓玘等侵早雾迫之成名闻山上呼噪声亦出助战贼奔鹅颈岭径长而愜人马不能容良柱玘乘胜逐之贼复败寻又败之红土川死者数万人邦彦崇明皆授首捷闻帝大喜以成名与良柱争功赏久不行而乌撒土司安效良者邦彦党也效良前为滇抚闵洪学所破既败死其妻招故沾益土酋安远弟边为夫负固不服爨元乘兵威胁走边遂复乌撒爨元以境内贼畧尽不欲穷兵乃檄招安位位不决爨元集将吏议曰水师地险多箐篁蛮烟燹雨莫辨昼夜深入难出今当扼其要害四面迭攻贼乏食将自毙于是攻之百余日斩级万余义鯤复遣人入大方烧其室庐位大恐明年春遣使乞降爨元受之积年巨寇皆平方崇明邦彦之授首也川中诸将功为多而黔将争之爨元颇右黔将屡奏于朝为四川巡抚御史马如蛟所劾爨元力求罢帝慰留之爨元以巨寇虽平而云贵诸苗犹出没为患檄副使朱家名与成名等讨平定番镇宁诸苗乃通威清等上六卫及平越清平偏桥镇远四卫道路凡千六百余里缮亭障设游徼剿平洪边土官宋嗣殷就其地置开州复置故施秉县招流民实之寻又抚定阿迷土司普名声之乱苗患乃渐息初官军讨邦彦久无功御史毛羽健言贼巢在大方黔其前门蜀遵永其後户由黔进兵必渡陆广奇险七昼夜抵大方一夫当关千人自废此官军所以屡败也遵义距大方三日程而毕节止百余里道平衍从此进兵何患不克因画上足兵措饷方畧并荐爨元可任及是平贼皆如其议云】质实【普名声之乱名声者阿迷州土官普维藩子初以从征有功授土知州崇祯五年御史赵洪范按部名声不境迎及出戈甲旗帜列数里洪范大怒谋之巡抚王伉请讨之官军进围州城名声恐使人约降而陰以重贿求援于元谋土官吾必奎必奎奉调从征与名声战兵始合佯败走官军望见遂大溃布政使周士昌副总兵秦拱明通判由大勲战死僉事王信游击范应华同知杨于陞被执皆骂贼死朝廷以起衅罪伉建治而名声旋亦就抚巡抚偏沅地方赞礼军务一员明万历二十七年以征播暂设寻罢天启二年後或置或罢崇祯二年定设赤水九永宁路地明洪武二十二年始分永宁置卫距四川布政司六百二十里 本朝康熙二十六年省入毕节县鸭池河在清镇县西北一百里与水西为界五峯山桃红坝鹅颈岭并在四川叙州厅东南与贵州毕节县为界红土川毕节县废赤水卫西镇宁汉唐宋为牂柯罗甸地元始置镇宁州明洪武十四年属普定府寻改属四川普定卫正统三年改属贵州布政司嘉靖十二年迁州治于安庄卫城万历三十年改属安顺府今因之威清上六卫盖威清安庄平坝安南毕节赤水六卫也明洪武中以元贵州宣慰司及普安永宁镇宁地置 本朝康熙十一年改安庄卫为镇宁州治二十六年改威清卫为清镇县治坝卫为安平县治毕节卫为毕节县治安南卫为安南县治省赤水卫入毕节县平越清平偏桥镇远四围明洪武十四年以元平月长官司地置平越卫 本朝康熙十一年改县为平治府治明洪武十四年以元麻峡县地置清平堡寻改卫弘治八年于卫城增署清平县 本朝康熙七年省

县入麻哈州十一年复置县以卫省入属都匀府偏桥注见前镇远废卫在镇远府城西南?水西岸五老山之?明洪武二十二年置湖广镇远卫指挥使司 本朝康熙二十二年割属贵州寻并入镇远县施秉元为施秉前江等处蛮夷军民长官司明洪武五年改为施秉蛮夷长官司正统九年改县天启元年省崇祯四年复置属镇远府阿迷汉益州地元初为阿甯万户府阿甯古蛮名後譌为阿迷明洪武十五年改为阿迷州属云南临安府今皆因之闵梦得乌程人林兆鼎福建人侯良柱字朝石永宁卫人刘可训澧州人邓玘四川人闵鸿学乌程人马如蛟字腾仲和州人朱家名曲靖人毛羽健公安人赵洪范嘉定人秦拱明忠州人游大勲婺源人王信宜宾人范应华建水州人杨于陞劔州人
本朝乾隆四十一年追谥秦拱明烈愍周士昌游大勲王信范应华杨于陞节愍】

冬十一月我

大清兵下遵化遂薄燕京

【我太宗文皇帝以七大恨未雪乃于是年十月】

【亲统大军进讨次老河分兵三路命济尔哈朗等率右四旗及右翼蒙古兵攻大安口阿巴泰等率左四旗及左翼蒙古兵攻龙井关我太宗亲督大军以蒙古哈喇沁台吉布尔噶都为乡导攻洪口克之至是抵遵化两翼兵来会距城五里而营山海关总兵官赵率教闻我】

【大军入近畿疾驰三昼夜赴援抵三屯营总兵官朱国彦不令入率教遂策马而西与大兵遇悉力拒战中流矢阵亡一军尽歿我大兵四面树云梯攻城正白旗小卒萨木哈图先登大军相继上守陴兵溃参将李檀游击彭文炳战死巡抚王元雅及保定推官李献明永平推官何天球知县徐泽前知县武起潜皆死之太宗嘉元雅忠命赐棺殓】

【亲酌金卮劳萨木哈图并予优录而三屯营及马兰镇亦为我别将所下副总兵张拱微战歿国彦具衣冠西面稽首偕妻张氏投缢死于是我大清兵越蓟州而西徇三河临顺义城大同总兵官满桂宣府总兵官侯世禄各率所部勤王战于城下俱败奔京师城遂降进至通州渡河驻营城北我】

【太宗传谕各城曰尔国庇叶赫而戕害我大恨有七我知终不相容告天兴师天直我国赐我河东地我】

【太祖皇帝犹愿和好尔国不从天又赐我河西地我复屡次愿和而尔主频加欺凌故今日兴师而来顺者抚逆者诛天运循环得天者兴人岂能为非我恃强逞兵也】

【谕既徧薄京城营于城北土城关之东太宗率诸贝勒及护军环闕燕京城招男女之逃窜者纵之入城乃进兵距关厢二里而营时桂世禄俱屯德胜门】

【大兵至世禄军溃桂独进战协理戎政尚书李邦华督兵守城令城上发大礮佐桂误伤桂军桂亦负伤帝遣中官劳以羊酒令入休瓮城旋与廷臣及督师袁崇焕等召见平台桂解衣示创帝深嘉叹咨廷臣方畧侍郎周延儒言本兵备御疎忽调度乖张检讨项煜继之且曰世宗斩一丁汝夔将士震悚强敌宥遁帝颌之遂下兵部尚书王洽狱邦华亦以误伤桂军为言官劾罢时】

【大清兵驻郊圻久城中汹汹狱囚刘仲金等百七十人破械出欲踰城被获帝震怒下刑部尚书乔允升侍郎胡世赏提牢主事教继荣于狱坐允升绞以年老减死与继荣俱戍边世赏赎罪为民】质实【老河在哈喇沁右翼南一百九十里源出明安山东北流会诸小水经敖汉北翁牛特左翼南又经奈曼哈尔哈二部之北流五百里许与潢河合大安口在遵化州西北三十里鮎鱼关东龙津井关在迁安县西北一百九十里西接遵化之洪山口陡峙边外洪山口在遵化州北少东五十里白枣峪东三屯营在遵化州东六十里马兰关在遵化州西北七十里堡城在关南十里瓮城明嘉靖四十一年添筑永定等七门瓮城至四十三年六月城始成赵率教与满桂为时良将庄烈帝闻其败歿赐恤典立祠奉祀 本朝乾隆四十一年追谥忠烈同时战歿之千户蔡国勲入祠张拱微神木人李櫟大同人彭文炳吉水人王元雅大原人李献明字思皇寿光人以察核官库至遵化或谓君官保定此邑非所辖去无罪献明正色曰莫非王土敢见危辟难请守东门城破死何日球增城人徐泽字兑若襄阳人莅任甫七日死武起潜字用潜进贤人罍误解官候代遂同殉节後孙承宗请恤死事诸臣乃赠献明天球光禄少卿泽光禄丞俱廕一子元雅以大吏失城赠恤不及乾隆四十一年追谥张拱微李櫟烈愍王元雅李献明何天球徐泽武起潜朱国彦彭文炳节愍侯世禄绥德州人项煜字水心吴县人王洽临邑人雅负时望而应变非所长帝方恶廷臣玩愒故于洽不少贷未几瘦死】

以成基命为礼部尚书兼东阁大学士预机务召孙承宗复为兵部尚书兼中极殿大学士视师通州

【先是遵化失守帝闻报召见廷臣于平台基命请召还故辅承宗任以兵事帝然之乃命基命入阁而立召承宗至入对具陈方畧帝称善曰卿不须往通州其为朕总督京城内外守御事务仍参帷幄趣首辅韩爌草敕下所司铸关防承宗出漏下二十刻矣即周閱都城五鼓而毕复出閱重城明日夜半忽传旨仍守通州时烽火徧近郊承宗从二十七骑出东便门道亡其三疾驰抵通州门者几不纳既入城与保定巡抚解经传御史方大任总兵杨国栋登阵固守旋闻】

【大清兵已薄都城乃急遣游击尤岱以骑卒三千赴援复遣副将刘国柱督军三千与岱合而发密云兵三千营东直门保定兵五千营广宁门以其间遣将复马兰三屯二城】质实【东便门在外城之东北隅北向解经传韩城人方大任桐城人杨国栋山海卫人尤岱榆林人】

十二月下督师袁崇焕于狱总兵官祖大壽拥兵奔锦州

【初崇焕建议请和欲籍此缓师以修理故疆我大清方有事朝鲜亦欲假是以阻其兵因得一意东讨乃遣使以书相往来已而崇焕闻于朝奉旨戒谕言路亦以为非计崇焕复以书询钱龙锡龙锡亦阻之事寻止及大清兵入龙井关诸隘口崇焕闻即督祖大寿何可纲等率师入卫以十一月十日辛丑抵蓟州所遇抚宁永平迁安丰润玉田诸城皆留兵以守帝闻其至甚喜温旨褒勉发帑金犒将士令尽统诸道援军俄闻大清兵下遵化越蓟州而西崇焕惧即引兵入护京师与满桂等同召见慰劳备至谕以战守策赐御饌及貂裘崇焕以士马疲敝请入休城中不许请屯兵外城亦不许大清兵所入隘口乃蓟辽总理刘策所辖而崇焕未奉勤王诏即千里赴援自谓有功无罪然都人骤遭兵怨谤纷起谓崇焕拥兵坐视朝士因前和议诬其招兵胁和将为城下之盟帝颇闻之不能无惑崇焕营广梁门外伏兵隘口我】

【大军分道夹击败之崇焕复移营城东南隅竖立栅木大军列阵逼之而营】

【太宗文皇帝率诸贝勒轻骑往视曰此败残之余何足劳我军遂不战还先是大军获宦官二人令副将高鸿中等守之因授密计鸿中等于二宦官前故作耳语云今日撤兵乃】

【上计倾见敌有二人来见上语良久乃去意袁巡抚有密约事可立就矣时杨太监者佯卧窃闻其言纵之归以所闻告于帝帝遂信之不疑再召见崇焕及大寿于平台诘崇焕以杀毛文龙之故责其援兵逗遛缚付诏狱成基命叩头请慎重者再帝曰慎重即因循何益基命复叩头曰兵临城下非他时比帝不省大寿在旁股栗惧并诛即出与何可纲拥众东走毁山海关出远近大震大寿先尝有罪孙承宗欲杀之爱其才密令崇焕救解故大寿德崇焕基命知之言于帝就狱中取崇焕手书急遣都司贾登科齎谕大寿孙承宗亦令游击石柱国驰抚诸军大寿见登科言麾下卒赴援冀効劳绩而城】

【上人羣詈为贼投石击死数人所遣逻卒指为间谍而杀之劳而见罪是以奔还柱国追及诸军其将士持弓相向皆垂涕言督师既下狱又将以大礮击毙我军故至此柱国复前追大寿去已远乃返承宗奏言大寿危疑已甚又不肯受满桂节制因譌言激众东奔非部下尽欲叛也当大开生路曲收众心辽将多马世龙旧部曲臣谨用便宜遣世龙驰谕其将士必解甲归大寿不足虑也帝喜从之承宗密札谕大寿急上章自列且立功赎督师罪已当代为剖白大寿诺之具列东奔之故悉如将士言帝优诏报之命承宗移镇关门诸将闻承宗世龙至多自拔来归者大寿妻左氏亦以大义责其夫大寿乃歛兵待命】质实【抚宁唐始分卢龙县置明属永平府今因之丰润金始分玉田县置明属蓟州以隶于顺天府今属遵化州广渠外城七门之东门也刘策字范重武定人明年正月论死弃市】

发明【袁崇焕在边臣中尚有胆畧其率兵勤王实属有功无罪庄烈始则甚喜其至倚若长城一闻杨大监之言不审虚实即下崇焕于狱寻至磔死是直不知用间愚敌为兵家作用古今来被给而僨厥事者指不胜屈未有若庄愍此举之甚者至祖大寿拥众东走追而不返且出怨言甚至将士以弓刀相向此其叛迹显然向非孙承宗调度有方岂能歛兵待命而转以优诏报之崇焕非叛而坐以大逆大寿实叛而褒以玺书刑章颠倒国法何存岂惟不知将将之道抑亦大失御下之方矣】

武经畧满桂帅师出战败绩桂及前总兵官孙祖壽等

死之

【我大清兵既围燕京诸贝勒大臣等咸请进攻】

【太宗文皇帝曰攻城固可必得倘坚城之下失我一二良将虽得百城亦不足喜乃止弗攻屡遣使齎书议和遂自得胜门移营循海子而南且猎且行趋良乡克其城知县党还醇与教谕安上达训导李廷表典史史之栋驿丞杨其礼皆死焉大兵复分道攻固安亦下之还军至卢沟桥副總兵申甫者故僧也好谈兵私制战车火器庶吉士金声荐之帝立召见取其车入览即擢副总兵给资令募新军改声御史监之甫仓猝募数千人皆市井游手大学士成基命閱其军极言不可用帝不听甫所需军装戒器又不能时给出城战辄败及是结车营于卢沟桥以拒】

【大清兵遶出其後御车者皆惶惧不能转殲戮殆尽甫亦阵亡遂南薄永定门时以袁崇焕下狱特设文武两经畧以尚书梁廷栋及满桂为之屯西直安定两门帝趣桂出师桂言衆寡势殊未可轻战中使趣之急不得已乃督孙祖壽黑云龙麻登云等移营永定门外二里许列栅以待明昧爽】

【大清兵以精骑四面蹙之诸将不能支桂祖寿及参将周镇战死云龙登云被执帝闻震悼遣礼部侍郎徐光启致祭赠桂少师世廕锦衣衾事袭陞三级赐祭葬有司建祠寻追諡毅愍祖寿亦赠恤如制帝以诸路兵皆败忧甚不视朝传旨办布囊八百中官竞献马骡又令百官进马顺天府尹刘宗周曰是必有以迁幸动上者乃疏言国势强弱视人心安危迄延见百僚谕以固守外无他计俯伏待报自晨迄暮得请乃退羣议由此息】质实【孙祖寿字必之昌平人历官薊镇总兵既罢官家居散家财招旧部曲赴】

【援遂歿于阵党还醇字于贞三原人】

【大清兵薄城督吏乘城拒守或言县小无兵盍避去还醇毅然曰吾守土吏也去将安之救兵不至力屈城破死事定父老覓还醇屍得之革间赤身面缚体被数枪羣哭而殮之安上达贵州安顺人闔门死难事闻赠还醇光禄卿于祭葬有司建祠官其一子上达等亦赠恤给驿归其丧已而吏科上言还醇城亡与亡之死靡贰犹曰有守土责也安上达史之栋等微员末职亦能致命遂志有死无陨宜破格褒崇以为世劝朝廷必不惜今日之虚名作将来之忠义乃仅赠国学教职良乡主簿于圣主优恤之典谓何帝感其言下部更议乃赠上达廷表五经博士与史之栋杨其礼及千户萧如龙何秉忠百户李荫皆配祀还醇祠同时殉节武举陈蠡测诸生梅支松等十五人烈妇朱氏等十七人并建坊旌表顺天府尹刘宗周以上达得死难之正请赠翰林官坊不报申甫云南人金声字正希休寧人明唐王时殉节周镇遵义人本朝乾隆四十一年追諡祖寿忠烈还醇甫镇烈愍声忠节上达廷表之栋其礼等与同时殉节之】

【千户萧如龙何秉忠百户李廕武举陈鑫测生员梅友松并入祠梁廷栋鄱陵人刘宗周字起浙江山陰人】

罢大学士钱龙锡

【御史高捷史?本阁党王永光引用之颇为龙锡所扼两人因是大恨方袁崇焕之段毛文龙也报疏有辅臣龙锡为此一事低徊过臣寓语而崇焕欲成和议又尝以书商于龙锡反是崇焕已下狱捷?遂上言议和杀将皆龙锡发踪指示宜与崇焕并罪帝以龙锡忠慎戒无过求龙锡抗章申辨捷?再疏力攻词益危切帝意颇动龙锡再辨引疾乃放归时兵事方棘未暇竟也】

山西援兵溃于良乡

【先是宣大总督及宣府保定河南山东山西巡抚闻京师戒严皆奏请帅师入卫并诏徵应天凤阳陕西浙江各巡抚及抚治郟阳都御史统部卒勤王至是山西巡抚耿如杞偕总兵官张鸿功以勅卒五千人赴援军令卒至之明日汎地既定而後给饷如杞兵既至兵部令守通州明日调昌平又明日调良乡汎地累更军三日不得饷乃噪而大掠帝闻之震怒逮如杞鸿功下狱时四方援兵先後集以缺饷故多肆剽掠独河南巡抚范景文驭军有纪律所将八千人饷皆自齎秋毫无所犯移驻东门再驻昌平远近恃以少安明年春陕西诸路总兵官吴自勉率师勤王所部延绥兵亦溃巡抚张梦鲸恚死而甘肃巡抚梅之焕奉诏入卫将行西路乘虚入犯之焕止留遣兵伏贺兰山後邀其归路再战再败之乃引军东俄悍卒王进才杀参将孙怀忠等以叛走兰州之焕西定其变复整军东比抵京师以後时矣遂落职罢去耿如杞既下狱论死後二年斩西市如杞初为职方郎与主事鹿善继党张鹤鸣排熊廷弼而庇王化贞封疆由是大坏议者罪之】质实【范景文字梦章吴桥人张梦鲸绦县人梅之焕字彬文麻城人】发明【明代军律不严将骄卒惰承平之日索饷而譁者已不可更仆数而况赴援远涉顾可三日无粮耶且夫将士千里勤王分守要地尤当预为部署使屯驻有一定之所乃今日通州明日良乡檄调纷更漫无定策谁秉中枢误国若此卒之镇巡就逮骈首服刑而本兵置之不问即乱卒之溃而西者亦未尝设法捕御竟听其出飞狐越井陘悍然无忌以合于贼宜延绥甘肃之相继而溃也】

以周延儒何如宠钱象坤并为礼部尚书兼东阁大学士预机务

【延儒性机警善伺意旨以会推不预与温体仁比数为言者所劾帝不听特命入閤时都人桀黠者请以私财聚衆助官军如宠力言其叵测会帝得侦事者报与如宠言合由是受知象坤奉命守城祁寒不懈帝覘知之遂并命入阁】质实【钱象坤字宏裁会稽人】

【庚午】三年春正月韩爌罢

【中书舍人原抱奇以爌为袁崇焕座主遂劾爌主和误国宜与钱龙锡并罢帝重去爌贬

抱奇秩无何庶子丁进以迁擢愆期怨爌亦劾之而工部主事李逢申劾疏复继上爌三疏引疾归爌先後作相老成慎重引正人抑邪党天下称其贤初熊廷弼既死传首九边屍不得归葬後其子诣阙疏请爌言于帝曰廷弼之死由逆阉欲杀杨涟左光斗诬以行贿因尽杀涟等复悬坐廷弼赃银刑及妻孥此冤之甚者帝乃许收葬爌遇事持平多类此】质实【原抱奇由输贄进里贯未详丁进上虞人李逢申海人皆爌主会试所举士爌罢後十四年李自成陷蒲州迫爌出见不从贼执其孙以胁爌爌止一孙乃出见孙得释爌归愤鬱而卒年八十矣】

兵部侍郎刘之纶帅师战于遵化败绩死之

【初金声之荐申甫也并荐之纶知兵可大任帝即召之奏对称旨遂自庶吉士起擢兵部右侍郎副尚书闵梦得协理京营戎政之纶未受任时与申甫两人皆好谈兵私贷金制单轮火车偏厢车兽车剡木为西洋大小礮銳欲以军绩自效既贰枢部意气感激以甫与满桂等相繼败歿杀然请行乞京营兵为己部不许乞关外川兵又不许乃召募万人勒为八营以副总兵八人分将之廷臣见之纶骤贵受命视师皆不允中允文震孟使人讽之纶谓当辞侍郎而易科衔以行不听听雨雷誓师行至通州守者拒不纳天大雨雷宿右庙中言官劾其逗遛之纶愤上疏曰小人意忌有事则委卸无事则议论止从一侍郎起见耳乞削臣今官赐骸骨不许遂越通州而东大清兵亦已由通州而渡克香河以月之四日甲申拔永平戊子拔迁安下滦州越十三日庚子驻三屯营分兵守濮儿庄方起行而之纶遂出薊州遣别将吴应龙等从问道规取罗文峪关自率八营兵抵遵化列屯城外我守城兵出击之破其二营之纶军犹不退我大军闻报乃自三屯营整兵而西麾精骑三万突阵礮矢并发之纶军大溃获其裨将一人讯之曰营娘娘庙山者之纶也】

【太宗文皇帝谕我军曰可生缚之纶来于是大贝勒代善以兵围山招之降不从纵兵击之纶发礮礮炸军营自乱左右请结阵徐退之纶叱曰毋多言吾受国重恩吾死耳严鼓再战流矢四集之纶解所佩印付家人令持归报朝廷走遁入石岩中我总兵官楞额礼子穆成格射杀之八营兵前後覆其七一军夜遁去益是月二十二日壬寅也败书闻帝嘉之纶忠从优恤赠兵部尚书震孟止之曰死纶分也侍郎非不尊遂不予赠赐一祭半葬仕一子先是之纶次薊州与总兵官马世龙吴自勉令由薊趋永平拒我】

【大军世龙自勉不赴约独之纶前进已败吴应龙亦败于罗文峪副总兵金日观驻马兰闻应龙败遣将驰援皆败没大清兵乘胜进攻马兰城甚急日观坚守亲燃大礮焚】

【头目手足意气不衰乞援于世龙世龙令参将王世选等赴救兵乃退已复以二千骑来攻日观偕世选等死守不下时京东列城多失守守城将吏死事者香河则知县任光裕永平则副使郑国昌知府张凤奇推官卢成功卢龙教谕赵允殖副总兵焦延庆参将吕鸣云指挥张国翰守备程应琦城守中军房应祥千总石可玩梁壮威胡承祚卜小峯张学闵仇耀先牛星耀把总杨开泰百户杨廷栋里居中书舍人廖汝钦武举唐之俊诸生韩洞原周祚新冯维京弟聯京胡起鸣胡登龙子光奎罗世杰弟竣琛圻李光春丁应抡李文灿刘可廷田种玉子福元侄士?张汝恭王元辅武生张鸿鸾义民李应阳张俊郭重光张宗仁张礼李大敬张尚义

傅守望等滦州则知州杨濂汉儿庄则副总兵叶应武而山海北路副总兵官惟贤亦以袭遵化败死方大清兵下滦州之明日分兵自抚宁向山海离关三十里列三营惟贤与参将陈维翰等设两营以拒大清兵乃还攻抚宁昌黎既而惟贤奉世龙檄率维翰及游击张奇化等往袭遵化至城西波罗湾城中兵出击先锋殊死战】

【大清兵收入城後队乘势进攻城上矢石如雨寻复遣兵出战惟贤陷阵中箭死士卒杀伤者三百余人奇化亦败歿】质实【昌黎辽广宁县金改曰昌黎明属永平府今因之罗文峪关在遵化州北十八里山寨堡东马兰峪东第十四关口也娘娘庙山在遵化州西八里波罗湾亦在州城西刘之纶字元诚宜宾人既败死屍还矢饮于颇不可拔金声以齿啮之出以授其家人之纶母老二子幼贫不能返柩靖于朝给驿还久之赠尚书金日观浦江人任光裕霍州人郑国昌邠州人以按察副使治兵永平迁山西右布政使上官奏留之城破与守备程应琦自缢死应琦妻奔告国昌妻与之偕死应琦山陰人张凤奇阳曲人国昌凤奇阖门并殉节卢成功高要人赵允殖辽阳人焦延庆卢龙人官三屯营副总兵罢归分守南门阵亡吕鸣云山海卫人张国翰东胜卫人杨爌铜仁人胡光奎父登龙冯维京弟聯京田种玉子福元侄士儁俱死事闻赠国昌太常卿凤奇光禄卿光裕光禄丞爌光禄少卿并赐祭葬廕一子成功等赠恤有差叶应武龙游人按甘肃通志有宁夏人郑感民者时官督师军前监纪永平推官亦阖门殉节 本朝乾隆四十一年追谥刘之纶忠烈郑国昌张凤奇杨爌官维贤张奇化烈愍任光裕卢成功焦延庆吕鸣云张国翰程应琦廖汝钦叶应武郑感民节愍赵允殖等并入祠】

发明【明末国是日非其亡悬于呼吸虽百之纶亦无益然慷慨誓师诚心为国而衆忌其骤贵而挠之乞兵不与致自募驯至于败及临阵捐躯庄烈欲优恤以励其余宜也文震孟又从而沮之惟任私意而罔顾公义天良渐灭尽矣震孟立朝风节在当日颇有可观而亦复出此殆不免为习气之所移耶】

二月立子慈烺为皇太子

【慈烺以二年二月生至是立为太子】质实【慈烺庄烈帝第一子周皇后生】

三月李标罢

【初与标相者六人来宗道杨景辰以附璫斥刘鸿训以增勅戍周道登钱龙锡被攻去独标在阁稍久颇能随事匡益然时方争门户帝亦深疑廷臣有党遂连疏乞休去】

夏五月我

大清兵东归

【先是大清兵次燕京我】

【太宗文皇帝欲息兵安民六致书议和皆未报太宗曰彼以城下之盟为耻耳遂引兵东既下永平迁安滦州京师道梗总理马世龙统四方援兵壁于蓟门督师孙承宗镇山海关东西相隔絶承宗募死士沿海達京师始知关城尚无恙关西南三县曰抚宁昌黎乐亭西北三城曰石门台头燕河六城东护关门西绕永平皆近关要地承宗饬诸城严备御而遣将戍开平守建昌声援始接我大清复遣书议和极言师旅频兴生民罹祸上天好生之德我两国当共体之至是遂旋师取道冷口而归承宗先後复滦州迁安永平遵化四城】质实【石门路在抚宁县东北九十里山海关西北四十里亦曰石门砦台头营在抚宁县北三十里燕河路在卢龙县东北五十里建昌路在迁安县东北四十里冷口关在迁安县东北七十里】

六月流贼陷府谷

【是年春流贼王左挂等攻宜川为知县成材所却转攻韩城总督杨鹤命参政洪承畴御之俘斩三百余人围解贼走清涧鹤以陕西五镇劲兵皆入援关中无帅连疏请遣诸将还镇不果起前总兵官杜文焕督绥绥固原兵而以承畴代张梦鲸为巡抚便宜讨贼会延安知府张辇都司艾穆蹙贼延川降其魁王子顺张述圣姬三儿于是王左挂及其党苗顺等亦乞降独王嘉允不受抚肆掠延安庆阳鹤匿不以闻是时秦地加派之赋曰新饷曰均输曰问架其目目增吏因缘为奸民大困多往从贼而山西甘肃延绥】

【勤王兵之溃而西者复走与贼合贼愈不可究诘有别贼横天一字王者自神木渡河陷山西之蒲县分道东犯赵城洪洞汾霍西掠石楼永和吉隰全晋震动鹤办贼关中恇怯莫知为计力持抚议遣官持牌四出招贼贼渠王虎小红狼一丈青掠地虎混江龙等皆给以免死牒安置延绥和曲问贼淫掠如故有司不敢问而嘉允已袭破皇甫川清水木瓜三堡遂于是月癸丑攻陷府谷米脂贼张献忠起应之势甚炽张献忠者延安卫柳树涧人也初隶延绥镇为军犯法当斩主将陈洪范奇其状貌为请于总兵官王威释之乃逃去後叛兵神一元领红旗为先锋及是?有米脂诸寨自号八大王与嘉允互为声援总兵官尤世禄怯不能御承畴文焕闻之驰救府谷击败嘉允嘉允佯乞降仍夺路走皇甫川勾西人入犯承畴文焕大破之贼奔溃军还击张献忠于清涧大破之盖是年十月丙寅也降贼王左挂谋以绥德叛承畴与巡按李应期计诛左挂等乱乃定承畴有干畧足办贼顾流贼所在蜂起神一元不沾泥可天飞郝临庵红军支点灯子混天猴独行狼等或西掠秦或东入晋屠陷城堡官军东西奔击旋灭旋炽迄莫能尽也张献忠败于清涧之月嘉允复拥衆陷清水营杀游击李显宗府谷再陷其党李老柴又啸衆三千人攻合水鹤檄宁夏总兵官贺虎臣往剿俘馘六百有奇捷方报制府而山西总兵官王国梁追嘉允于河曲败绩贼入据其城廷议设大将兼统山陕军协讨仍诏文焕为提督偕延绥副总兵曹文诏驰至河曲絶饷道以困之未几神一元攻陷宁塞柳树涧等城文焕家宁塞遂令西还援剿而留文诏讨河曲贼】质实【延川隋改文安县置明属延安府今因之蒲县汉蒲子县地後周改置蒲县金升州元仍降县明属平阳府今属隰州洪洞赵城汾西皆隋置明并属平阳府今悉因之永和後周临河隋改永和明属隰州以隶于平阳府本朝雍正二年升隰州为直隶州永和仍属焉皇甫川堡在府谷县东北七十里清水堡在府谷县东北六十里木瓜堡在府谷县北五十里柳树涧在定边县东一百四十里宁塞堡在靖边县西四十里洪承畴泉州南安人尤世禄府谷人曹文诏大同人李显宗籍贯无考

本朝乾隆四十一年追諡烈愍】

以礼部尚书温体仁吴宗达并兼东阁大学士预机务【体仁为人外曲谨而中猛鸷机深刺骨言官屡劾其奸邪帝谓体仁孤立益向之周延儒复刀为之援遂与吴宗达并入阁体仁既得辅政势益张宗达徒充位而已踰年吏部尚书王永光罢体仁以其乡人闵洪学代凡异己者率以部议论罢而体仁陰主持之又用御史史?高捷等为腹心日以倾正人庇宵小为事所欲推荐陰使人发端已承其後欲排陷故为寬解中上所忌激使自怒帝往往为之移初未尝有迹于是职方员外郎华允诚愤体仁等乱政疏陈三大可惜四大可忧畧言当事借陛下刚严而佐以舞文击断之术倚陛下综核而骋其讼逋握算之能遂使和恒之世竞尚刑名清明之躬寢成丛脞以圣主图治之盛心为诸臣鬪智之捷径可惜一率属大僚惊魂于回奏认罪封驳衆臣奔命于接本守科遂使直指风裁徒徵事件长吏考课惟问钱粮以多士靖共之精神为案牒钩校之能事可惜二庙堂不以人心为忧政府不以人才为重四方渐成土崩瓦解之形诸臣但有角户分门之念意见互觭议论滋扰遂使剿抚等于筑舍用舍有若举碁以兴邦启圣之岁时为即聋从昧之举动可惜三人主所以总一天下者法令也王化贞杨镐之丧师误国厥罪惟均陛下申明三尺肆镐市朝以惩封疆大吏化贞恃有奥援独稽显戮遂使刑罚不中鈇钺无威一可忧也国家所恃以为元气者公论也直言敢谏之士一鸣辄斥指佞荐贤之章目为奸党不惟不用其言并锢其人又加之罪遂使喑默求容是非共蔽二可忧也国家所赖以防维者廉耻也近者中使一遣妄自尊大羣僚趋走惟恐後时陛下不以近臣可倚而不知幸竇已开以操纵惟吾而不知屈辱士大夫已甚遂使阿諛成风羞恶尽丧三可忧也国家所藉以进贤退不肖者铨衡也我朝罢丞相以用人之权归之吏部阁臣不得侵焉今次辅体仁与冢臣洪学同邑朋比惟异己之驱除阁臣兼操吏部之权吏部惟阿阁臣之意造门请命夜以为常黜陟大柄祇供报复之私甚至庇同乡则逆党公然保举而白简及为罪案排正类则讲官借题遇逐而荐剌遂作爰书欺莫大于此矣擅英专于此矣党莫固于此矣遂使威福下移举措倒置四可忧也疏入帝诘其别有指使允诚而列上洪学徇私数事且曰体仁生平紵臂涂顔廉隅扫地陛下排衆议而用之以其幸直寡谐岂知包藏祸心陰肆其毒又有如洪学者为之羽翼遍植私人戕尽善类无一人敢犯其锋者臣复受何人指使帝以体仁纯忠亮节摘疏中语再令陈状允诚复上言二人朋比举朝共知温育仁不识一丁而得首拔罗喻义进讲章以左右非人一语而部议削职此非事之彰明较着者乎帝亦悟两人同里有私乃夺允诚俸半年而洪学亦旋罢去】质实【吴宗达武进人中行从子华允诚字汝立无锡人温育仁乌程人体仁弟也杨镐以崇祯二年弃市六年王化贞始伏诛】

秋八月杀前督师尚书袁崇焕逮前文渊阁大学士钱龙锡下狱寻遣戍

【史?疏言龙锡主张崇焕斩帅致兵倡为和议以信五年成功之说卖国欺君莫此为甚其出都时以崇焕所畀重贿数万转寄嫖家巧为营干致国法不伸帝怒敕刑官五日内具狱讞上帝召诸臣于平台论崇焕谋叛当寘极典责龙锡私结边臣蒙隐不举令廷臣议罪是日羣议於府中谓斩帅虽龙锡启端而两书有处置慎重语意不在擅杀至议和倡自崇焕龙锡亦未之许然军国大事私有商度不抗疏发奸何所逃罪遂遣使逮龙锡而磔崇焕于市兄弟妻子流三十里籍其家无余貲天下冤之十二月龙锡逮至下狱复疏辩悉封上崇焕原书及所

答书帝不省时羣小丽名逆案者方日为翻案计?等以龙锡为东林所推欲借崇焕以及龙锡因龙锡以及诸异己者指崇焕为逸首龙锡等为逆党更立一逆案于前案相抵谋既定温体仁王永光主之欲发自兵部尚书梁国栋恠帝英明不敢任而止乃议龙锡大辟决不待时且用夏言故事设厰西市以待帝以龙锡无逆谋令长系明年中允黄道周复上疏申救忤旨贬秩调外而帝意寢解寻诏所司再减死戍定海卫龙锡在戍十二年两赦不原其子请输粟赎罪会周延儒再当国尼不行福王时复龙锡官归里未几卒】质实【定海五代时吴越析鄞县地置望海时宋改定海明属宁波府于县置卫属浙江都司以隶于左军都督府 本朝康熙二十六年别置定海县于舟山改故定海县为镇海县仍属宁波府卫废黄道周字幼平漳浦人唐王时殉节 本朝乾隆四十一年追谥忠烈】

冬十二月增田赋

【户部尚书毕身严既以度支大绌奏行增盐引诸事已又列十二事曰增关税捐公费鬻生祠酌市税汰沉役核虚冒加抵赎班军折银吏胥纳班括河滨滩荡之租核京东水田之赋开殿工官带之例帝悉允行而兵食犹不足至是兵部尚书梁廷栋复言今日闾左虽穷然不穷于辽饷一岁之中阴为加派者不知其数如朝覲考满行取推陞少者费五六千金合汉内计之国家选一番守令天下加派数百万巡抚查盘缉访馈遗谢荐多者至二三万金合海内计之国家遣一番巡方天下加派百余万而曰民穷于辽饷何也臣考九边额设兵饷兵不过五十余万饷不过千五百三十余万何忧不足故今口民穷之故惟在官贪使贪风一息即再加派民亦懽然帝俞其言下户部协议自严阿廷栋意即言今月之策无踰加赋请亩加九厘之外再增三厘于是增百六十五万有奇合旧所增凡六百八十余万天下益耗矣】

御定资治通监纲目三编卷三十四

卷三十五

钦定四库全书

御定资治通鉴纲目三编卷三十五

【起辛未明庄烈崇祯四年尽癸酉明庄烈崇祯六年】凡三年

【辛未】四年春正月延绥饥

【延绥连岁大?于是职方郎中李继贞请发帑金余米输军前且令四方赈援及捐纳事例者输粟于边以抚饥民又言兵法抚剿并用非抚贼也抚饥民之从贼者耳今斗米四钱已从贼者犹少未从贼而势必从贼者无穷请如神宗时特遣御史振济故事赍三十万石以往安辑饥民使不为贼以孤贼势帝感其言遣御史吴甦以十万金往振继贞少之帝不听甦至延绥用西安推官史可法主振事因谕散贼党帝闻即命甦还按陕西】质实【李继贞字徵尹太仓州人吴甦字鹿友兴化人史可法字宪之大兴籍祥符人】

三月杨鹤招抚流贼于宁州寻复叛

【神一元闻杜文焕军且至遂弃宁塞陷保安延安告急巡抚练国事檄贺虎臣及副将李卑援剿虎臣等进围保安贼引河套数千骑挫虎臣军会定边副将张应昌以兵至破斩一元贼众弃城去复推一元弟一魁为渠帅转攻庆阳分兵陷合水知县蒋应昌被执张应昌偕杜文焕趋战庆阳围解时杨鹤移驻宁州一魁求抚归所执蒋应昌别贼拓先龄金翅鹏过天星田近仁独头虎上天龙等亦先後降鹤设御座于城楼贼跪拜呼万岁因宣圣谕令设誓或归伍或归农贼佯许之立赦其罪鹤以一魁最强致其壻帐中同卧起一魁果至数以十罪一魁伏谢即宣诏赦之昇以官处其众四千余人于宁塞文焕闻之叹曰宁塞之役贼畏我而逃今者贼伪降杨公信之借名城为盗资吾尚可家于此乎遂以其族行未几鹤移驻耀州别贼攻破金锁関杀都司王廉李老柴独行狼复攻陷中部降贼田近庵以六百人据马栏山应之而一魁之党茹成名者尤桀骜鹤令一魁诱杀之于耀州贼党猜惧挟一魁以叛势复炽一魁後为张应昌部将所得诛死或曰官兵攻之急其党黄友中斩一魁献于军门】质实【定边副总兵嘉靖四十一年设分守安定镇静等处提调大墙及墙口等处宁州北魏定安县唐为寧州治元省县入州明属庆阳府保安宋保安军金改县寻陞州元仍降县明属延安府今并因之耀州唐置明属西安府今陞直隶州金锁关在同官县北三十里神水峡明嘉靖三十年筑关城马栏山亦在同官县北三十里或谓即晋隋之马兰山误晋郡尉张光所戍及隋地理志所谓马兰山者别在今白水县西北练国事字君豫永城人李卑字待平榆林人张应昌辽东总兵官承蔭之子王廉本朝乾隆四十一年追谥节愍】

皮岛参将刘兴治作乱

【先是毛文龙死袁崇焕分其兵二万八千为四协命文龙子承祚副将陈继盛参将徐敷奏游击刘兴祚主之後改为两协继盛领东协擢兴祚弟兴治为参将摄西协兴治凶狡好乱与继盛不相能会其兄兴祚阵亡继盛误听谍报谓未死兴治愤择日为兴祚治丧诸将咸往吊继盛至伏兵执之并执理饷经历杨应鹤等十一人袖出一书宣于衆诡言此继盛诬兴祚诈死及以谋叛陷己者遂杀继盛及应鹤等又伪为岛中商民奏一通请优恤兴祚而今兴治理东江举朝大骇以海外未遑诘也兴治与诸弟兄放舟长山岛大肆杀掠登莱巡抚孙元化请弭变乞以都督佥事黄龙为总兵官往定兴治乱龙莅皮岛受事兴治犹桀骜如故至是遂拥衆作乱突入参将沈世魁家尽戮其孥世魁走免夜率所部袭之杀兴治乱乃定而其党都司耿仲裕复相继作乱仲裕者登州游击仲明弟也仲明所善裨将李梅以通洋事觉龙系之狱仲裕在龙军仲明在元化军仲裕受仲明指激其部卒假索饷名围龙署拥至演武场割其耳鼻将杀之诸将为救免未几捕斩仲裕疏请正仲明罪元化庇仲明劾龙尅饷致兵譁帝命龙戴罪视事而饰抚按官核仲明主使状】质实【长山岛在登州东四十里孙元化字初阳嘉定县人黄龙耿仲明刘兴治皆辽东人】

夏四月旱

【敕羣臣修省极言时政得失于是给事中魏呈润疏言驿站所裁才六十万未足充军饷十一而邮传益疲孰必再编里甲是犹剜肉医疮疮未瘳而肉先溃関外旧兵十八万额饷七百余万今兵止十万七千合蓟门援卒非溢原数加派七百九十万外新增又百四十余万犹忧不足可不为稽核乎边事日棘非臣子言功之时而诡捷冒功躐加峻秩门客厮养窜名戎籍不阶而升悉糜俸料臣惧其难继也江淮旱灾五湖之间海岸为谷旧谷不登新丝未熟上供织造宜且暂停铨法坏于事例正途日壅不可不疏通抚按诸臣捐貲助饷大抵索之民间顾奉急公之褒上蒙而下削不可不禁飭又条陈数策请大修北方水政帝皆纳其言卒不果行】质实【魏呈润字中严龙溪人】

副总兵曹文诏败贼于河曲

【山西自河曲至蒲津千五百里与陕西接壤河最狭贼渡河往来无定王嘉允既击败王国梁于河曲遂久据其城文诏围之六月嘉允乃弃城走复自岳阳突犯泽潞转掠至阳城南山文诏追及之其下斩以降文诏以功擢临洮总兵官会巡抚练国事副将张全昌连破点灯子于合阳韩城败窜入山西文诏追之及于稷山谕降七百人点灯子遁去于是秦贼之流入晋者畧定自秦贼初起延绥以北为逃军为边盗延绥以南为土寇为饥民边盗则王嘉允土寇则王左挂为羣贼魁至是左挂嘉允相继殄灭洪承畴张应昌败不沾泥于葭州王承恩破王虎金翅鹏于宜川陕西都司曹变蛟殲宁塞遗贼于唐毛山连战皆捷混天猴等谋袭靖边应昌邀击之真水川承畴复追蹙之甘泉杨鹤兴承恩剿上天龙等于鄜州又皆败之贼败则求抚既抚则旋逸去故秦中贼迄未平而嘉允余党复推王自用为贼渠即所称紫金梁者是也自用结羣贼老回回曹操八金刚埽地王射塌天阎正虎满天星破甲锥邢红狼显道神混世王黑煞神等及高迎祥张献忠皆聚于晋过天星诸贼亦自秦来会共三十六营衆二十余万闯将李自成乃自此起矣自成为迎祥甥世居米脂怀远堡与张献忠同岁生幼牧羊长充

银川驿卒善骑射鬪狠无赖里中人苦之谬推为里长数犯法知县宴子宾将寘诸死脱去为屠寻杀人偕兄子过亡命投甘督所部将王国为卒会国奉调过金县兵譁自成忽起缚县官索饷国止之并杀国走依于迎祥迎祥拥闯将八队一眼钱儿二点灯子三李晋王四蝎子块五老张飞六乱世王七夜不收寘自成于其末犹未有名】质实【蒲津关在永济县黄河西岸一名临晋关跨陕西地又有蒲津桥在县西门外唐六典曰造舟之梁四蒲津其一也阳城唐置明属泽州今属泽州府稷山隋置明属绛州以隶于平阳府今升绛州为直隶州县仍属焉合阳汉县明属同州以隶于西安府今属同州府唐毛山在保安县西北近靖边县元塞堡靖边宋为西夏地明置靖边营 本朝雍正九年置县属榆林府真水川在甘泉县东西魏置真川县于此隋大业废入临真县故又谓之临真镇甘泉唐初置伏鹿县天宝时改甘泉明属延安府今因之怀远堡元为米脂县地明天顺中置怀远堡 本朝雍正九年改县属榆林府银川驿在米脂县西一百步明洪武初置张全昌辽东总兵官承廕次子曹变蛟文诏兄子】

六月钱象坤罢

【象坤温体仁门生也体仁入遂让而居其下然无所附和及是御史水佳允劾兵部尚书梁廷栋廷栋不待旨即奏辨廷栋故出象坤门佳允疑象坤泄之语侵象坤周延儒恶廷栋并恶象坤象坤遂引疾归廷栋落职】质实【水佳允鄞县人】

秋八月我

大清兵围大凌城

【辽东巡抚邱禾嘉议筑广宁义州右屯三城孙承宗谓广宁道远当先据右屯筑城大凌河以渐而进兵部尚书梁廷栋力主之遂以七月兴工命总兵官祖大壽副将何可纲以兵四千据其地发班军万四千人筑之护以石砮土兵万人工垂成廷栋罢去廷议大凌荒远不当城撤班军赴蓟责镇抚矫举令回奏禾嘉惧尽撤防兵留班军万人以守时我大清以方吉纳等议和方欲遣使定约闻大壽等兴城工为拒守计乃于是月丁未发兵薄大凌城掘濠树栅四面围合别遣一军截锦州大道城外墩台皆下城中兵出悉败还承宗禾嘉闻之驰至锦州禾嘉亲率师与总兵官吴襄宋伟合军赴援离松山三十里与大清兵遇大战长山小凌河间禾嘉等败收军还锦州我大军追击至城下禾嘉军堕濠死者甚衆太仆少卿张春复监襄伟军过小凌河五里筑垒列车营为大凌河声援进次长山距城十五里】

【大清兵以二万骑逆战火器竞发声震天地我右翼军冲入春营春军败襄及参将桑噶尔寨等先遁春收溃衆立营时风起黑云见春乘风纵火火甚炽天忽雨反风春部率多焚死少顷雨霁两军复鏖战伟力不支亦走春及诸将张鸿谟杨华徵薛大湖等三十三人俱被执副将张吉甫满库王之敬战没部卒死者无等祖大壽坚守不敢出城援自此絶至冬大凌粮尽食人马我】

【大清屡谕招大壽大壽及诸将皆欲降何可纲不从大壽令二人掖可纲出城外杀之遂

与副将张存仁等降于我大清大壽言妻子在锦州请归设计诱降守者遂纵归大壽入锦州未得间而禾嘉知其纳款状具奏闻于朝帝于大壽欲羈縻之置不问张春既见执谕之降春曰忠臣不事二君礼也我若贪生亦安用我遂不食屢】

【赐以酒饌春仍不食守者恳劝感太宗文皇帝恩始一食令薙髮不从居古庙衣旧日中服迄不失臣节而死朝廷闻春守志遥迁右副都御史恤其家春妻翟闻之恸哭六日不食自縊死春未死时我大清有议和意春为言之于朝朝中譁然诋春诚意伯刘孔昭劾春败降不忠请削其所授宪职朝议虽不从而有司系其二子死于狱】质实【大凌城在】

【锦县东四十里周三里有奇门一长山在锦县东南十八里峰峦绵亘四山错列因名邱禾嘉新添卫人吴襄辽东中後所人张春字泰宇同州人何可纲廉勇善抚士卒被害时顔色不变亦不出一言含笑而死本朝乾隆四十一年追諡春可纲忠节张吉甫满库王之敬烈愍刘孔昭诚意伯基十二世孙】

何如宠罢

【如宠官礼部时贫宗婚嫁格于有司者千余人用如宠言获婚嫁者千余帝欲族袁崇焕以如宠言得免及入阁为周延儒温体仁所扼连疏乞罢归】

九月复遣太监王应朝等监视诸边军饷张彝宪总理户工二部

【帝初即位时鉴魏忠贤祸败尽撤诸镇守中官委任大臣既而廷臣竞门户兵败饷绌不能赞一策乃思复用近侍至是遂遣王应朝监军关宁王坤刘文忠刘允中监视宣大山西军马又遣张国元往蓟镇东协王之心协邵希韶西协而以彝宪有心计令鈎校户工二部如涂文辅故事为之建署名曰户工总理其权视外总督内团营提督焉给事中宋可久冯元颺等十余人论谏不纳吏部尚书闵洪学率朝臣具公疏争帝曰苟羣臣殫心为国朕何事乎内臣衆莫敢对彝宪遂按行两部踞尚书上命郎中以下谒见工部侍郎高鸿图不为下抗疏乞归削籍去工部主事金铉戒同官无私谒彝宪愠甚假他事诬劾之落铉职彝宪日益骄纵故勒边镇军器不发管盔甲主事孙肇兴恐稽滞军事因劾其误国帝命回奏罪至遣戍南京御史李曰辅礼部主事周鑣皆先後以谏被斥彝宪遂希旨上言天下逋赋至一千七百余万请遣官督徵给事中范淑泰疏争不听于是催徵酷急民益起从盗时中璫势复大振王坤至宣府甫踰月即劾巡按御史胡良机帝落良机职命坤按治给事中魏呈润争之亦谪外坤性狂躁败言朝中大吏有欲倚之相倾挤者于是抗疏劾修撰陈于泰谓其盗窃科名语侵周延儒给事中传朝佑言坤妄干弹劾之权且其文词练达机锋排激必有陰邪儉人主之其意指温体仁帝置不问左副都御史王志道言近者内臣举动几于手握皇纲而辅臣终不敢一问至于身被弹击犹忍辱不言何以副明主之知皆备责延儒欲以动帝帝怒削其籍帝方一意用内臣故言者多得罪至八年八月始下诏撤还监视总理然其後卒用高起潜辈典兵监镇以迄于亡】质实【宋可久胶州人冯元颺字尔慈溪人高鸿图字研文胶州人金铉字伯玉武进人李曰辅字元卿南昌人周鑣字仲驭金坛人范淑泰字通也滋阳人胡良机字省之南

昌人陈于泰宜兴人傅朝佑字右君临川人王志道漳浦人】

发明【庄烈手诛逆阉尽撤镇守中官一反天啓间浊乱之政可谓举错得其正矣乃是时将骄卒惰疆事日隳而在廷诸臣惟知门户纷纠无复殚心国事致使若辈复得逞志诸臣之罪自无可逭然使庄烈振作有方贤奸有别廷臣党援之习岂难破除即诸臣之中亦岂无可委任顾计无所出遂思复用宦官是明知覆辙之在前而甘心蹈之後车之覆不待明者而知之矣及朝臣疏争复以此面加诘责岂竟以任用内竖谓足以破朝党乎卒之奸阉肆横国是愈非自速其亡而不之悟又谁之咎也夫】

杨鹤有罪下狱以洪承畴总督三边军务

【李老柴独行狼既陷中部巡抚练国事总兵官王承恩攻之数月未下庆阳贼郝临庵等复往援之总兵官贺虎臣击斩其魁刘六会文诏西旋与榆林参政张福臻合剿馘老柴及其党一条龙余党突围走副将张鸿业游击李明辅战死先是朝廷得鹤报言庆阳贼就抚散遣俱尽旋闻中部陷久不下御史谢三宾因劾鹤欺罔谓中部之贼宁自天降疏下巡按御史吴牲覆奏牲奏鹤主抚误国帝怒逮鹤下狱戍袁州诏承畴代为总督承畴既奉命檄文诏与游击左光先崔宗允李国奇分剿绥德宜君清涧米脂贼先後四战皆大捷埽地王授首而延安贼赵四儿者自稷山败遁潜窜山谷中比闻文诏还陕乘间纠合余党势复振都司王世虎守备姚进忠败歿四儿遂拥衆六千余人屯石楼山中西距河三十里绥德知州周士奇守备孙守法侦其不备东渡河袭之贼四走承畴乃以陕西贼委承恩而自率兵追贼于山西贼且走且掠沁水县东北有窰庄前巡按辽东御史张铨里居也铨父五典度海内将乱筑所居窰庄为堡坚甚及是流贼至五典已歿铨子道濬以锦衣佾事官京师独铨妻霍氏在衆请避之曰避贼而出家不保出而遇贼身更不保等死耳盍死于家乃率童仆坚守贼环攻四昼夜不克而去副使王肇生名其堡曰夫人城乡人避贼者多赖以免承畴既入晋逐贼追及之大战贼连败擒斩赵四儿赵四儿者即贼中所称点灯子也承恩亦以计斩陕贼谭雄于是张献忠罗汝才皆惧诣承畴降承畴遂还陕而击走不沾泥张存孟于安定秦晋贼少戢未几献忠汝才复叛入山西偕羣贼焚掠如故而陕西降贼混天猴勾贼陷甘泉杀知县郭永固参政张允登督饷至其地力御不敌死踰月陷宜君又陷葭州佾事郭景嵩死之是时总兵官孙显祖击贼山西数败之万泉河津闻喜六战皆捷而承畴闻甘泉之变与承恩往来关中奔击日不暇给矣】质实【宜君东晋时苻秦置宜君护军後魏置县明属鄜州以隶于延安府今陞鄜州为直隶州县仍属焉沁水隋置明属泽州今属泽州府窰庄在沁水县东北万泉唐县明属蒲州以隶于平阳府今属蒲州府郭永固绛州人张允登汉州人本朝乾隆四十一年追謚允登及王世虎姚进忠烈愍永固及张鸿业李明辅郭景嵩节愍】

冬十月辛丑日有食之

十一月罢大学士孙承宗

【长山之败廷臣交章论承宗禾嘉筑城起衅承宗连疏引病归禾嘉先已调南京太仆卿

遂还京亦引病归已而言者追论承宗丧师辱国竟夺官承宗复列上边计十六事帝报闻而已】

闰十一月登州游击孔有德等反

【有德与耿仲明李九成皆毛文龙部曲文龙死走入登州登莱巡抚孙元化官辽久孙承宗袁崇焕俱辟为赞画以宁前兵备推巡抚素言辽人可用乃用有德仲明为游击九成为偏裨且多收辽人为牙兵大凌围急部檄元化发劲卒泛海趋耀州为声援有德诡言风逆改从陆赴宁远十月晦有德及九成子千总应元统千余人以行经月抵吴桥天大雨雪众无所得食新城邑绅王象春者有庄在吴桥有德兵屯其地卒或攫鸡犬以食王氏子怒诉之有德有德答卒以狗众大譁九成先齎银市马塞上用尽无以偿适至闻众怨遂与应元谋劫有德为乱有德从之还兵大掠陷陵县临邑商河残齐东围德平既而舍去陷青城新城而新城受祸尤酷知县秦三辅训导王协中举人王与夔张俨然并死难以衅由王氏焚杀甚惨巡按御史王道纯闻变移书山东巡抚余大成令讨捕大成不信再促之遂托疾请告不得已遣兵往御则皆败而走大成恐遂定抚议而元化军亦至兴大成皆力主抚檄贼所过州县无邀击总兵官张可大率兵赴剿元化檄止之不听次莱州遇元化复为所阻乃偕还登州岁将晏有德暮薄城可大请击之元化持抚议不许可大陈利害甚切元化期明岁元日发兵合击至期元化兵不发明日始发兵合可大兵击贼战城东可大兵屡胜元化部卒皆辽人亲党多无鬪志其将张焘先走可大兵亦败中军管维城游击陈良谟守备盛洛姚士良皆战死焘兵半降贼贼遣归为内应元化开门纳之可大谏不听时仲明领元化中军方以弟仲裕作乱皮岛朝廷将治其主使罪日怀叛志夜半贼至城仲明与都司陈尤福等举火导贼自东门入城遂陷可大守水城抚膺大恸解所佩印付部卒间道走济南上之还署辞母令弟可度子鹿徵奉母航海趋天津以佩剑杀其妾陈氏遂自缢元化自刎不殊与同城僚属乡官张瑶悉被执惟参将马骢及瑶不屈死有德乃推九成为主已次之仲明又次之用巡抚关防檄州县取兵饷令元化移书大成求抚曰畀以登州一郡即解大成闻于朝道纯愤抗疏力争帝革元化大成职候勘而以谢琏徐从治代即命道纯监其军元化寻为贼纵航海归与大成俱下狱大成论元化论死首辅周延儒谋脱其死不得则援其师徐光启入阁共图之卒不得与张焘同弃市】质实【吴桥金析将陵县吴川地置明属景州以隶于河间府今径属河间府新城元析长山县驿台地置明属济南府今因之青城元以邹平之青平镇置明属济南府今属武定府秦三辅三原人余大成江宁人张可大字观甫应天人事闻赠特进荣禄大夫太子少傅谥庄节赐祭葬予世廕建祠曰旌忠马骢会稽人本朝乾隆四十一年追谥张瑶忠节张可大马骢节愍管维城陈良谟盛洛姚士良烈愍王协中等并入祠】

【壬申】五年夏五月以礼部尚书郑以伟徐光启并兼东阁大学士预机务

【以伟读书过目不忘而不能票拟章疏有何况二字误以为人名也拟旨提问帝驳改始悟自是词臣为帝所轻遂谕馆员须历外僚而阁臣自是不专用翰林先启雅负经济才有志用世及入阁年已老周延儒温体仁专政不能有所建白】

六月京师大雨水

【时淫雨损山陵昌平地动给事中李世祺上言日者辅理调燮无闻精神为固宠之用统军衡才无术缓急无可恃之人中枢决策掩耳盗铃主计持筹医疮剜肉州县迫功令鞭策不前六曹窘簿书救过不赡簪笔执简之臣接迹圉圉考盘薏轴之士抗声鸿举一人议疑及衆人一事訾疑及衆事黄衣之使颀颀卿贰之堂貂蝉之座雄踞节钺之上低眉则气折强项则衅问各边监视之遣已将期月初虽间有摘发寻亦同归模棱效不效可概见伏愿撤回各使以明陰不干阳之分然後采公论以进退大臣酌事情以衡量小臣释疑忌之根开功名之路庶天变可回时艰可济帝以借端瀆奏切责之】质实【李世祺字壽生青浦人】

秋七月以太监曹化淳提督京营戎政

【初帝遣中官张彝宪总理户工二部即命唐文征提督京营戎政至是以化淳代之後李自成犯阙化淳开广宁门纳之京师遂陷】

八月总兵官曹文诏等连败贼于平京庆阳

【降贼混天猴既勾可天飞等连陷甘泉宜君葭州率衆夜突至鄜州兵备副使郭应响登北关集士卒守御手杀三贼力不支遂死洪承畴王承恩分道剿贼贼闻官军至辄奔窜甫退旋出剽掠延安庆阳诸属邑多残破而别贼红军友李都司杜三杨老柴者神一魁余党也屯镇原将犯平凉巡抚练国事檄甘肃总兵官杨嘉谟副将王性善扼之贼走庆阳文诏从鄜州间道至与嘉谟性善合大战西濠斩千级生擒杜三杨老柴余党纠他贼破华亭攻庄浪文诏嘉谟掩击之贼走盘龙山游击曹变蛟冯举刘成功平安等噪而上贼溃走性善及甘肃副将李鸿嗣参将莫与京等复以兵至共击斩五百二十余级嘉谟变蛟蹙贼後夹击又屡败之贼余衆数千欲奔汉南为游击赵光远所遏乃由长寧驿走张家川其逸出清水者副将蒋一阳遇之败都司李宫用被执文诏计剪其渠魁则羣贼可以次扑灭乃纵反间给其党杀红军友遂蹙败之水落城追至静宁州贼奔据唐毛山变蛟先登殄其衆时混天猴可天飞郝临庵刘道江为承恩所败亦溃而西独行狼李都司等走与合势复振连兵围合水文诏往救贼匿精锐以千骑逆战诱抵南原伏大起城上人惊相告曰曹将军歿矣而文诏持矛左右突匹马营万衆中诸军望见皆出击贼大败僵屍蔽野余衆走铜川桥文诏率变蛟嘉谟及参将方茂功等追及之大战陷阵贼复大败参将李卑马科又破之延水关斩首六百二十余级其地东限黄河贼溺死者无算科部卒斩混天猴以献寻文诏与宁夏总兵官贺虎臣固原总兵官杨麒破贼虎兕凹麒穷追数百里所俘获甚衆会洪承畴击斩可天飞李都司于平凉降其魁白广恩余贼分窜者文诏追蹙之锥子山其党杀独行狼郝临庵以降承畴戮四百人余皆散遣李卑击贼固原复斩其魁薛仁贵等关中巨寇畧尽文诏在陕大小数十战巡抚范复粹论奏首功第一而洪承畴抑不叙巡按御史吴甡上疏推獎甚至兵部又抑之卒不得叙】质实【镇原汉高平县地後魏置原州元改镇原州明降县属平凉府今因之西濠砦在镇原县北华亭後魏镇隋改县明属平凉府今因之盘龙县在庄浪县南四十里长宁驿在兴平县西四十里与武功县接界张家川在秦州清水县境清水汉县明属秦州以隶于巩昌府今陞秦州为直

隶州县仍属焉水落城在静宁州西南百里亦谓之水落亭水经注水落亭在陇山之西近畧阳界是也静宁州金德顺州元改静宁州明属平凉府今因之铜川桥在庆阳府安化县西延水关一名永宁关在延川县东南七十里虎兕凹在甘泉县境锥子山耀州西北有箭干山北为魏王楼楼东为锥子山郭应响福清人殉节後赠光禄少卿諡忠烈予祭葬廕子入监读书本朝乾隆四十一年追谥忠烈范复粹黄县人】

九月流贼连陷山西州县

【先是流贼紫金梁高迎祥等拥衆聚山西其党罗汝才张献忠降未久复叛归与之合分道四出连陷大宁隰州时边兵宿将皆萃关中剿庆阳诸贼而山西备御空虚无大帅前锦衣事张道藩者巡按辽东御史銓子也方得罪里居巡抚宋统殷以其家多蓄壮丁善御贼遂檄至军前赞画歙人吴开先寓晋以骁勇闻监司王肇生亦以便宜署开先为将使共剿贼贼自隰犯泽州开先击之战城西贼败去转犯沁水宁武守备猛忠战死道藩遣游击张璘驰援贼乃退东掠阳城开先闻之西渡沁河逆战击斩数百人礮尽无援一军尽歿贼乃再犯沁水乡官张光奎与兄守备光奎千总刘自安等率衆固守八日援兵不至城陷并死泽大州遽为贼破贼乘胜又陷壽阳远近震动未几紫金梁老回回八金刚等以三万衆围沁水之窰庄谋执道藩以胁统殷往道藩官京师时其母霍氏尝筑城御贼至是道藩复屡败之贼少却会关中贼渠次第殲戮其余党东走附山西贼于是贼势甚炽廷议命秦将率师协剿贼侦知秦师且至欲因道藩求抚紫金梁请见免胄前曰我王自用也误从王佳允至此又一人踞致词曰我宜川廩生韩廷宪不幸为佳允所获久陷于贼请誓死奉约束道藩劳遣之陰使人陷廷宪图贼廷宪日基紫金梁就欸未决阳和兵袭之贼怒尤廷宪遂败约分其衆南踰太行突济源陷温县廷宪知紫金梁疑已思刼之归并约道藩伏兵沁河以待道藩遣所部刘伟佐之是夕贼攻邑诸生盖汝璋楼掘地深丈余楼不毁贼怒誓必拔之乃还营廷宪不得间知事且泄偕伟仓猝奔贼追之及河起杀追者滚山虎等六人皆贼腹心也贼临沁河索廷宪窰庄东面河道藩潜渡上流绕贼後大噪贼骇遁去贼党复南犯临县据其城破修武杀知县刘凤翔焚掠武陟辉县遂围怀庆帝以藩封重地切责巡抚樊尚燝杀贼自赎命副将左良玉以昌平兵往援贼既尽向河北统殷肇生率军次陵川扼贼北归贼遇官军殊死鬪乘夜争险对营两山顶贼缘崖刼官军营官军乱统殷肇生皆走与诸军相失宣大总督张宗衡率游击猛如虎等将兵来援统殷肇生收溃卒以会击贼于高平大破之贼还走沁水朝廷以统殷不能办贼诏许鼎臣来代宗衡乃以八千人驻平阳鼎臣以七千人驻汾州分扼要害已又合兵逐贼临县县城倚黄云山榆林河水出焉入于黄河城三面峭壁西阻水贼复与土寇田福田科等相倚久不拔寻李卑贺人龙艾万年将关中兵至鼎臣檄以自从宗衡怒复檄之为己部三将莫之适从贼乘间入据磨盘山分其衆为三阎正虎据交城窥太原邢红狼上天龙据吴城窥汾州紫金梁张献忠突沁州武乡陷辽州辽州知州李呈章郷官杨于楷张友程举人赵一亨侯标并死难既而紫金梁与乱世王有隙廷宪知之纵谋遣书间之乱世王果疑遣其弟混世王就道藩乞降道藩知鼎臣方主剿权词难之曰斩紫金梁以来乃得请混世王快快去贼衆遂分部掠诸郡县】质实【大宁後周置明属隰州以隶于平阳府今升隰州为直隶州县仍属焉寧武汉楼烦县地唐置寧武军明设宁武所今升县为寧武府治壽阳晋置明属太原府今属平定州济源隋析軹县置温县汉置明并属怀庆府临县唐临泉明属汾州府修武武陟皆唐置

明并属怀庆府辉县唐辉州明降县属卫辉府今悉因之陵川隋置高平後魏置明并属泽州今属泽州府黄云山在临县东北三里磨盘山在临县东七十里又名连枝山吴城在孝义县西南七十八里战国时魏吴起为西河守筑此以拒秦因名武乡唐置明属沁州今因之张宗衡临清人猛如虎榆林人许鼎臣武进人李呈章信阳州人贺人龙艾万年皆米脂人本朝乾隆四十一年追谥猛忠吴开先李呈章烈愍张光奎光玺杨于楷张友程等节愍刘自安等并入祠】

【癸酉】六年春正月命曹文诏节制山西诸将讨贼

【关中贼畧尽悉走入山西土贼王刚王之臣通天柱复起应之势大炽御史张宸极言文诏威名夙着今秦贼灭且尽宜勅令入晋协剿帝从之遂有是命文诏东渡河抵霍州败贼汾河孟县追及于寿阳巡抚许鼎臣遣谋士张率先大军尝贼贼惊溃文诏追击之斩混世王余党走五台游击猛如虎败之黑山覆贼渠姬问锁军贼还走寿阳遇文诏兵于方山复败五台孟定襄寿阳贼尽平鼎臣令文诏军平府备太原东张应昌军汾州备太原西文诏连败贼太谷范村榆社太原贼尽而应昌选悞逗挠务与贼相避总督张宗衡五檄之不至奏于朝乃限文诏应昌三月平贼文诏侦贼从河内上太行邀击之泽州贼大败走潞安文诏至阳城遇贼不战自沁水潜师还击斩首千余贼循阳城而北张道濬设伏隘口贼至伏尽起擒贼渠满天星等贼乃退结屯自固其他部陷平顺杀知县徐明扬文诏至贼走夜半袭破贼屯斩千五百级紫金梁老回回过天星分道走文诏击之榆社武乡黎城屡战皆捷应昌迤避贼不敢进杀良民冒功为巡按御史所劾帝时遣中官孙茂霖等为文诏应昌内中军时文诏所节制诸将艾万年李卑刘光祚猛如虎虎大威颇希收与其兄子变蛟皆骁敢善杀贼贼渠多先後俘馘王刚王之臣通天柱等亦惧乞降军声大震而贼尤畏文诏次则道濬道濬自督家衆倡乡人筑堡五十四扞贼沁水沁水当贼冲去来无时前後凡五犯皆却走文诏复率兵至沁水大贼之擒其魁大虎贼避文诏锋流入河北帝命文诏移师往讨道濬執乃孤贼旋陷和顺乡官乐济衆死之复陷乐平永和遂陷沁水道濬率壮丁三百人驰赴贼退徙十五里道濬收散亡捕贼党倾家困以饷军副使王肇生列状上道濬功道濬故以贿败当遣戍冀用军功自湔祓而言者劾其离伍冒功乃更戍海宁卫文诏道濬既相继去流贼显道神等据岢岚四出剽掠山西盗迄不得平】质实【汾河源出宁武县西南六十里管涔山下绕忻州静乐县南流阳曲县界凡经太原汾州平阳三府折而西至蒲州府荣河县北入河与孟县相近者则阳曲之汾河孟西距阳曲界计一百二十里孟县隋置金陞州明降县属太原府今因之黑山関在五台县东南九十里接直隶平山县界方山在寿阳县东北四十里接孟县界壁立千仞顶方一里平定州宋平定军金改军为州明属太原府今直隶山西省范村寨在绛县东十五里今筑为堡榆社隋置明属辽州河内隋置明为怀庆府治今并因之平顺明嘉靖八年分潞城县之青羊里及壶关黎城二县地置属潞安府本朝乾隆二十九年省入潞城县和顺隋置明属辽州今因之海宁卫陈于塩官县置海宁郡寻废元升塩官县为州已又改海宁州明降县属杭州府于县置海宁卫属浙江都司以隶于左军都督府本朝乾隆四十年升县为州仍属杭州府卫久废张宸极河津人徐明扬浮梁人贼来犯设策御贼城破不屈死乐济衆官昌平副使里居遇难投井死本朝乾隆四十一年追谥明杨烈愍济衆节愍】

二月流贼犯畿南河北

【初贼之围怀庆也帝既命左良玉以昌平兵赴援未至围已解其寇修武清化者亦还走平阳因今良玉驻泽州扼豫晋咽喉与曹文诏同讨贼有急则秦兵东豫兵西良玉从中击为四面援兵是年正月贼陷阳城举人吴之秀贾煜张庆云贡生张茂贞及弟茂恂死之遂乘势趋河北良玉击败之涉县西陂贼窜林县山中饥民争附之参将杨遇春往逐贼中伏死而别贼复流入赵州武举李调兴弟让率乡勇御贼力竭阵亡贼乃据临城之西山纵掠顺德真定间参议寇从化檄守备李定王国玺击之大败内邱知县王世泰与弟世宁扼贼于隘口亦败歿畿南皆震副使卢象昇偕总兵官梁甫力却贼从化亦以兵来会战屡捷游击董维坤被围象昇驰援维坤已战死象昇设伏石城南大破贼斩其魁十一人象昇每临阵身先士卒与贼格鬪刃及鞍弗顾失马即步战逐贼危崖一贼自巔射中象昇额又一矢仆夫毙马下象昇提刀战益疾贼骇走相戒曰卢廉使遇即死不可犯遂自邢台摩天岭西下抵武安林县贼走与合败良玉军守备曹鸣鶚战死主簿吴应科以民兵助战亦死于是河北贼大炽寻转入河内良玉整兵自辉县逐之贼奔修武破游击越效忠军于清化镇效忠战歿参将陶希谦坠马死贼复走武安良玉邀击之万善驿连败贼贼乃西扼于文诏又溃而南时良玉专剿河北贼而豫兵额止七千数被贼折亡殆尽良玉将昌平兵二千余人前後与贼战虽胜负畧相当势孤甚不足制贼贼出没彰德卫辉怀庆三府焚掠殆徧】质实【清化镇在河内县东北四十里涉县晋置明属磁州以隶于彰德府今径属彰德府内邱汉中邱後赵石虎改曰赵安隋改内邱明属顺德府邢台宋置明为顺德府治今并因之摩天岭在武安县西北接山西辽州界万善镇在河内县北二十里旧有驿今废王世秦辽东人卢象昇字建斗宜兴人董维坤岢县人曹鸣鶚大兴人吴应科萧山人 本朝乾隆四十一年追諡王世秦董维坤越效忠曹鸣鶚烈愍杨遇春陶希谦节愍吴应科吴之秀等并入祠】

官军复登州

【先是朝廷闻登州陷兵部尚书熊明遇请以副将吴安邦代张可大为总兵官屯宁海规取登州以通州副将杨御蕃署总兵官尽将山东兵与保定总兵刘国柱天津总兵王洪兼程进遇贼新城洪先走御蕃拒之二日不胜突围出遂入莱城与徐从治谢璉并驻莱以图剿贼贼既据登州遣人招岛中诸将旅顺副将陈有时广鹿副将毛承祿皆往从之贼党益衆乘势攻黄县县丞张国辅参将张奇功守备熊奋渭力战死城破知县吴世扬典史吴兹明被执皆骂贼不屈死进攻莱州从治璉偕御蕃登陴固守贼以莱城坚先分兵平度知州陈所闻自经死贼还益发兵攻莱輦西洋大礮置城下日穴城城多颓从治等投火灌水穴城者死无算使死士时出掩击之毁其礮台斩获多而明遇卒惑抚议命主事张国臣为赞昼入贼营抚之国臣为贼致书从治等曰毋出兵坏抚局从治等知其诈遣间使三上疏言贼不可抚语极切至未报时外围日急国柱洪及山东援军顿昌邑不敢进两抚臣皆困城中廷议更设总督一人以兵部右侍郎刘宇烈任之诏总兵官邓玘将薊门四川兵副将牟文绶将密云兵监以右布政使杨作楫从宇烈往援莱比抵山东与巡按御史王道纯副将刘泽清参将刘永昌朱延祿等并集昌邑所统马步军二万五千势甚盛而宇烈无筹畧诸帅巽懦进次沙河日十辈往议抚纵还所获贼陈文才于是尽得官军虚实益以抚愚之而潜兵绕其後焚輜重殆尽宇烈惧

走青州撤三将兵就食玘等夜半拔营贼乘之大败国柱洪走青潍玘走昌邑泽清接战于莱城伤二指亦败走平度惟作楫能军三将既败举朝譁然明遇见官军不可用抚议益坚安邦尤怯钝方自宁海率兵至登州闻耿仲明将就抚遽撤兵离城二十五里而营中军徐树声薄城被擒安邦走还宁海登既不能下而莱城被围久琯从治御蕃日坚守待救不至贼发西洋礮轰城从治中礮死莱人大临守陴者皆哭山东士大夫官南京者合疏攻宇烈请益兵乃调昌平兵三千以总兵陈洪范统之洪范亦辽人明遇日跂望曰往哉其可抚也天津旧将孙应龙者大言于衆曰仲明兄弟与我善我能令其缚孔有德李九成来当事信之予兵三千从海道往仲明伪函他死人头给应龙曰此有德也应龙率舟师抵水城延之入猝缚斩之无一人脱者贼得巨舰势益张遂破招远围莱阳知县梁衡固守贼败去守烈复自青州至昌邑洪范文绶等亦抵莱州推官屈宜阳请入贼营议抚贼佯礼之宇烈益信贼可抚为请于朝帝手诏谕九成等令解围贼邀宇烈读诏宇烈惧不往营将严正中舁龙亭及河贼拥之去贼且曰必莱州文武官出城开读围即解御蕃不可琯曰围且六月既已无可奈何姑从之遂偕知府朱万年出有德等叩头扶伏涕泣交颐琯慰谕久之而还既又请琯御蕃同出御蕃曰我将家子知杀贼何知抚事琯等遂出有德执之猝攻城胁万年呼守者降万年呼曰吾死矣尔等宜固守且呼御蕃急以礮击贼遂遇害贼送琯至登囚之正中宜阳皆死事闻举朝悲愤逮宇烈下狱尚书明遇时亦致仕去遂絶抚议罢总督及登莱巡抚不设以朱大典代从治督主客兵数万及関中劲旅四千八百余人专任剿贼总兵官金国奇副将靳国臣刘邦域参将祖大弼祖寛张韬游击柏永福及前总兵官吴襄襄子三桂等皆属焉而以中官高起潜监护军饷抵德州贼复犯平度副将牟文绶何维忠等敕之杀贼魁陈有时维忠亦被杀寻国奇等至昌邑分为三路国奇擢関外兵为先锋邓玘率步兵继之从中路进昌平总兵陈洪范刘泽清及副将方登化从南路进参将王之富王文纬等从北路进檄游击徐元亨等率莱阳师来会以牟文绶守新河诸军皆携三日粮尽抵新河东乱流以济至沙河有德迎战祖寛先进稍却靳国臣继之贼大败诸军乘势追至城下贼夜半东遁围始解守者疑贼诱礮拒之起潜遣中使入谕阖城相庆既而南路兵亦至国奇等遂击贼黄县斩首一万三千俘八百逃散及坠死者数万贼窜归登州官军筑长围以困之城三面距山一面距海墙三十里而遥东西俱抵海分番戍贼不能出发大礮击官军多死伤者李九成遂出城搏战官军合击之馘于阵贼乃晓夜哭贼渠魁五九成有德有时仲明承禄也及是杀其二气大沮有德欲弃登州走入海岛帅黄龙遣副将龚正祥率舟师四千拒之海口飓风破舟正祥陷贼中谋为内应事露被杀有德亦不果行会国奇卒以襄代之攻围益急贼粮絶恃水城可走故不降及王之富祖寛夺其水门外护墙贼大惧有德先遁载子女财帛出海仲明以水城委副将王秉忠已以单舸遁官军攻水城未下游击刘良佐献轰城策穴城置火药发之城崩将士涌入辄为贼击退副将王来聘复先登中伤死官军乘之入贼退保蓬莱阁大典招降始释甲俘千余人护秉忠及伪将七十五人自缢及投海死者不可胜计贼尽平有德等走旅顺黄龙邀击之斩九成子应元生擒承禄陈光福苏有功等有德仲明逸去乃献承禄等于朝磔之有德仲明俱降于我】

【大清】质实【宁海唐置金州明改卫领中左千户所 本朝初隶海城康熙三年改隶盖平二十年设城守章京雍正五年设金州迺检属复州通判十二年置宁海县属奉天府旅顺口関在奉天府宁海县南一百二十里明时海运达金州卫者至此登岸有南北二城俱明初建设中左千户所今废广鹿岛在奉天府海宁县西北海中黄县秦置唐省入蓬莱县寻复置

明属登州府今因之沙河有二一在掖县东四十里源出黄山一在即墨县南四十里源出大劳山其下流俱入海新河自胶州东南三十里麻湾海口北流合沽河又西北经平度州西南合胶水又北至掖县海仓口入海元至元十七年从莱人姚演议开凿谓之胶莱新河水城在登州府城北本名备倭城南与府城接北即新开海口为海道要会之区域周三里许门一北砌水门以抵海涛引海水入城中泊船明设立备倭指挥于此蓬莱阁在登州府城北崖山下临海岸宋治平中建熊明遇字良孺进贤人杨御蕃蓟镇西协总兵肇基之子谢琏字君实监利人张奇功真定人吴世扬洛阳人陈所闻文安人张国臣辽东人刘宇烈绵竹人朱大典字延之金华人明唐王时殉节祖寬辽东人刘泽清曹州人朱万年黎平人王来聘大兴人崇祯四年中武会试庄烈帝銳意重武举子运百筋大力者止来聘及徐彦琦二人而彦琦不兴选遂下考官及监试御史狱悉贬兵部郎二十二人遣词臣倪元璐等覆阅取百人视文榜例分三甲传胪锡宴以前三十卷进呈钦定一甲三人来聘居首即授副总兵武榜有状元自来聘始也来聘既拜命泫然流涕曰上重武若此不捐躯赴难何以报上恩至是遂死难事闻赠从治兵部尚书琏兵部侍郎万年太常卿世杨光禄少卿所闻太仆少卿并赐祭葬建祠子来聘国辅奇功亦赠恤有差 本朝乾隆四十一年追諡徐从治朱万年熊奋渭张奇功朱大典王来聘烈愍谢琏吴世扬屈宜阳严正中何维忠陈所闻节愍张国辅吴兹明入祠按浙江通志有署登州都司徐应泰者浙江西安人与诸帅合攻有德败死海中今亦諡节愍山东通志有百户刘师古者福山人率鄉勇拒有德于莱州战死今入祠】

夏五月套寇犯宁夏总兵官贺虎臣死之

【察哈尔合套寇五万骑自清水横城分道入守备姚之夔等不能御副将史开先参将张问政守备赵访皆溃逃寇遂进薄灵州虎臣急领千骑入守旋尽勒城中兵出击寇突至虎臣兵不及布阵且衆寡不敌战歿指挥韩加爵被执支解死虎臣子讚侠五十骑突重围出察哈尔闻】

【大清兵将往征之亦遂解去尽驱其部衆渡河远遁时蒙古诸部先後归附于我

大清明年 大清兵遂大会诸部颁军律焉】质实【虎臣死事後赠都督僉事赐祭葬世?指挥僉事韩加爵宁夏人 本朝乾隆四十一年追谥虎臣忠烈加爵烈愍】

六月周延儒罢

【延儒为首辅温体仁欲夺其位务为柔佞取悦于帝帝渐向之复曲谨以媚延儒而陰伺其隙延儒不知也体仁与王永光欲起逆案王之臣吕纯如帝以之臣问延儒对曰用之臣亦可雪崔呈秀矣帝悟而止体仁益大恨会延儒子弟家人暴邑中邑中民熱其庐所荐巡抚孙元化复陷登州于是言路交章劾延儒并谓其受巨盗神一魁贿帝意颇动体仁复噤给事中陈赞化劾延儒昵武弁李元功招摇罔利且谓延儒至称陛下为羲皇上人语悖逆帝大怒下元功诏狱穷治延儒觊体仁为援体仁不应延儒大窘引疾归体仁遂为首辅廷臣恶体仁当国劝帝复诏何如宠如宠固辞而给事中黄绍杰言君子小人不并立如宠贍顾不前体仁宜

思自处帝怒绍杰几获谴而如宠卒辞不入】质实【陈赞化朝城人黄绍杰万安人】

秋七月我

大清兵取旅顺总兵官黄龙死之

【孔有德耿仲明怒龙邀击必欲报之会鸭绿江有警龙遣水师往援有德等侦知旅顺空虚遂导】

【大清兵袭其城龙数战皆败火药矢石俱尽遂自刎游击李惟鸾知事不支自焚其家属力战死部将项祚临樊化龙张大禄尚可义俱死焉广鹿岛副将尚可喜故与龙相犄角龙既死亦降于】

【大清】质实【龙死事後贈左都督予世廕建祠曰显忠惟鸾等附祀本朝乾隆四十一年追諡龙忠烈惟鸾烈愍项祚临等并入祠】

改总兵官曹文诏镇大同山西巡抚许鼎臣请留文诏

剿贼不许

【文诏既奉命讨河北贼比移师至贼已败邓玘于林县时玘新立功莱州廷议以左良玉军孤命玘将川兵益以石砮土司马凤仪兵与良玉共角贼玘至济源射杀贼首紫金梁屡却贼贼走林县玘部将杨遇春邀贼中伏死贼用其旗并诱杀他将玘军遂大败文诏帅五营军驰救乘夜袭破贼而潞王闻玘军败上书告急乞济师帝命倪宠王朴为总兵官将京营兵六千赴援以中官杨应朝卢九德监其军而别遣中官监良玉玘军未几复命延绥副将李卑昌平副将汤九州援剿诸军尽壁河北战数有功然羣帅势相轧且中官监军意弗善也彼此观望托山深道岐以自解莫利先入故贼无所惮独惮文诏而文诏竟为御史刘令誉诬劾以去初文诏在洪洞时令誉方家居夙与忤及是令誉按河南而马凤仪军覆赖文诏击退贼甫解甲与令誉相见语复相失文诏拂衣起面叱之令誉怒遂以凤仪之败为文诏罪部议文诏恬胜而骄调之大同以李卑代署其事鼎臣上章留之不许文诏方出师逐贼败老回回于济源又大败之怀庆馘其魁滚地龙誓必欲殄贼既闻命以军事付卑遂与兄子变蛟俱西】质实【潞王名常潞简王翊鏐子王朴榆林卫人汤九州石埭人马凤仪忠州人本朝乾隆四十一年马凤仪与杨遇春并追諡节愍】

九月以钱士升为礼部尚书兼东阁大学士预机务【士升故出钱龙锡门下龙锡出狱周延儒诣之极言上怒甚挽救殊艰龙锡深德延儒未几温体仁至龙锡述延儒语且谢曰非公等安得生体仁佯曰上固不甚怒也闻者直体仁而恶延儒士升以座主故因归心体仁体仁亦以士升乡人遂引与共政】质实【钱士升字抑之嘉善人】

冬十一月以王应熊何吾驄并为礼部尚书兼东阁大学士预机务

【应熊熟谙典故而性谿刻强狠官吏部时以贪污为给事中冯元飏所发帝不省及是廷推阁臣以望轻不与温体仁力援之遂与吾驄同入阁命下朝野胥骇给事中章正宸劾之曰应熊狠愎自张纵横为习小才足覆短小辩足济贪今大用必且芟除异己报复恩讐混淆毁誉况狼籍封靡沦于市行愿收还成命别选忠良疏入帝大怒下正宸诏狱削籍归应熊益得志日与体仁及尚书张捷比力引逆党吕纯如等屡为言官所攻帝皆不问】质实【王应熊字非熊巴县人何吾驄香山人章正宸字羽侯会稽人】

贼渡河陷澠池诸县分掠南阳汝宁遂犯湖广

【贼尽集河北高迎祥李自成张献忠罗汝才等俱至左良玉汤九州等扼其前京营兵蹙其後贼连战皆败欲逸阻于河大困乃诡词乞降监军内臣杨进朝信之为入奏诸将俟朝命不出战会天寒河水合贼从毛家寨径渡河南军无扼之者遂陷澠池教谕罗世济督民兵力战被执不屈死之贼乘势攻破伊阳复犯卢氏中州承平久不误备骤闻贼至吏民惶骇知县金会嘉弃城遁贼入城乡官李中正勒家衆及里中壮士奋击衆寡不敌力战歿贼纵掠城中执举人靳谦书使跪不屈大骂而死贼既入河南自是屡陷名城杀将士无算绅士亦多被难其尤着者卢氏则生员常省身常嘉元孙孕秀閩鄉则在籍济南教授高第贡生閩思聰偃师则生员裴君合又宜阳马足轻灵宝许輝新安刘君培马山李登英陕州张我正张我德嵩县傅世济李佩玉孟津孙挺生上蔡刘时宠辈则先後以布衣抗节时巡抚元默闻贼南犯率良玉九州及李卑邓玘兵御之境上贼乃窜卢氏山中由间道入内鄉大掠南阳汝宁直走湖广所在告急贼始起陕西高迎祥最强李自成属焉及渡河自成始别为一军】质实【澠池汉县明属河南府今因之毛家寨在澠池县西北閩乡隋置明属陕州以隶于河南府今升陕州为直隶州县仍属焉偃师汉县新安亦汉置明并属河南府今因之罗世济平利人子得鸿练兵守平利杀贼甚多城破妻子俱死事在明年李忠正官兵部车驾司主事崇禎初谢病归里常省身据险与贼战两昼夜力不支令妻子缢死拔剑自刎常嘉元孙孕秀俱骂贼死高第投崖死閩思聰率衆攻贼营不克死裴君合事寡母至孝贼至招鄉人保沙岸塞十昼夜说之降大骂不从寨破磔死马足轻性孝友闻贼渡河挈家避之石龙崖三女皆殊色虑贼污悉投崖死足轻被执厉声大骂贼怒并三子杀之家衆皆遇害惟存次子骏一人後登鄉荐许輝为县陰阳官为贼所执大骂见杀刘君培有义行?子及从孙避难道遇贼欲杀其从孙君培曰我尚有男此子乃遗孤幸舍之而杀我贼如其言三子获免马山性刚直土寇于大中乘贼乱陷新安获山使负米叱曰我天朝百姓肯为贼负米耶大骂而死李登英亦以骂贼死张我正率衆御贼贼爱其勇欲生致之我正杀贼力竭大誓自刎张我德一门一十七人皆登楼自焚傅世济兴兄世舟俱被执将杀之世济争死夺贼刀自杀贼释其兄李佩玉结壮丁扞鄉井往往夺贼輜重後隣村被围佩玉往救力战死孙挺生避贼居河渚为贼所得与妻梁氏俱骂贼死本朝乾隆四十一年追谥李中正烈愍罗世济等并入祠元默字中象静海人】

御定资治通监纲目三编卷三十五

卷三十六

<史部,编年类,御定资治通监纲目三编>

钦定四库全书

御定资治通监纲目三编卷三十六

【起甲戌明庄烈崇祯七年尽两子明庄烈崇祯九年】凡三年

【甲戌】七年春正月以陈奇瑜总督河南山陕川湖军务讨流贼

【初流贼既自秦入晋掠河北畿南关中寇患少纾奇瑜时为延绥巡抚复分遣文武将吏擒斩贼渠截山虎等百七十七人他贼多解散独钻天哨开山斧据永寧关前阻山险下临黄河员固数年不下奇瑜谓是不可以力取乃陰简銳士阳言总制机檄发兵令贺人龙将之而西身为後劲直抵延川俄策马东曰视吾马首所向潜师疾走入山贼不虞大兵至惊溃焚其巢斩首千六百有奇二贼俱馘分兵击斩贼首一座城等获首级五百五十延水羣盗尽平奇瑜威名著关陕至是贼南渡河躡湖广窥四川廷议诸镇抚事权不一宜设大臣统之多推荐洪承畴以承畴方督三边不可易乃擢奇瑜兵部侍郎兼右佥都御史总督五省军务专办流贼】质实【永寧关即延水关注见前陈奇瑜字玉铉保德州人】

贼自郧阳渡汉遂入四川二月陷夔州

【先是贼既渡河张应昌追败之灵宝汤九州李卑又败之嵩县内乡及入湖广卑又败之光化贼闻官军至辄以老弱委之而精銳多前走故诸将动称捷报功贼势弥炽郧阳诸属邑皆先後陷房县知县贡从贵保康知县方国儒竹溪训导王绍正死之贼遂自郧阳渡汉薄谷城犯襄阳羣贼毕会分陷紫阳平利而拥衆南攻兴山破其城杀知县刘定国纵掠归州巴东夷陵突入四川攻夔州城中仓猝无备通判推官悉遁同知何承光摄府事率吏民固守力竭城陷承光整衣冠危坐贼入杀之投屍于江又陷大寧杀知县高日临训导高锡巡检陈国俊其他部连陷巫山通江巡检郭纘化指挥王永年力战死自贼起陕西转寇山西畿辅河南北及湖广四川陷州县以数十计未有破大郡者夔州地称天险及是失守远近震动会秦良玉自石砭赴援川北副将张令复以兵扼诸要害贼不敢进乃析其党为二一走还楚一自通江走广元冲百丈关杀守备郭震展指挥田实由七盘阳平关入秦以抵巩昌总督洪承畴御之秦州贼遂越两当袭破凤县主簿吉永昌教谕李之蔚乡官魏炳皆遇害贼又析其党为二一由凤县奔实维汧阳一向汉中取间道犯城固洋县东下石泉汉险投乡官杨呈秀会于汉中兴安以窥商雒商州防守阇调化剿贼于雒被执不屈死而张献忠亦自应山西奔商雒以十三营流入汉南】质实【光化宋析谷城县地置乾德寻改光化谷城隋置明并属襄阳府今因之紫阳明正德八年于金川地立紫阳堡寻升县属兴安州以隶于汉中府今升兴安为直隶州县仍属马归州唐置明洪武元年废寻复置以秭归县省入隶荊州府 本朝雍正六年升

直隶州十三年改属宜昌府巴东隋置明初属夷陵州隆庆四年改属归州今属宜昌府夷陵汉县北周为硤州隋唐宋为夷陵郡治元为硤州路治明初为硤州府治洪武九年降夷陵州属荆州府本朝雍正十三年改设东湖县为宜昌府治七盘关在广元县北一百六十里七盘岭上两当後魏置明属徽州以隶于巩昌府本朝雍正七年改属秦州凤县西魏凤州明降县属汉中府今因之城固汉县洋县唐洋州明降县与城固并属汉中府今因之石泉西魏置元省明复置并属兴安州以隶于汉中府今属兴安直隶州贡从贵元城人方国儒字道醇歙人事母以孝闻贼大入湖广将吏率望风先奔保康邑小素无兵贼至国儒率乡兵出御力不支城陷被执骂贼中七刃死何承光镇远人死事後赠夔州知府高日临字俨若鄱阳人贼攻大寧见势弱不能御啗指书牒乞援上官率衆扞贼北门兵败被执大骂不屈贼碎其体焚之高锡之妻女陈国俊之妻亦皆遇害吉永祚挥县人凤县主簿谢事将归会贼至知县弃城遁永祚倡义拒守城破北面再拜曰臣虽小吏尝食禄于朝不敢以谢事逃责子士枢士模皆死事闻赠汉中府经历同死难之李芝蔚魏炳赠恤有差杨呈秀官顺庆知府大计罢归贼至佐有司守御力战被执大骂贼磔之其弟呈芳单骑入贼营斩贼数十重创死阎调化商州人以武进士署商州防守事六年冬奉檄入雒剿贼至是殉节本朝乾隆四十一年追諡方国儒吉永祚高日临王永年郭震辰田实杨呈秀烈愍贡从贵何承光阎调化节愍王绍正等并入祠】

三月丁亥朔日有食之

夏四月山西陕西大饥

【山西赤地数千里大饥人相食给事中吴甘来疏请发粟以赈且言山西总兵张应昌等多杀难民冒功中州诸郡畏官军甚于贼陛下生之而不能武臣杀之而不顾臣实痛之又言赏罚者将将大机权也陛下加意边陲赏无延格乃闽海猷捷黔蜀争功待勘累年急则用其死绥缓则东以文法况封疆之罚武与文二内与外二士卒与将帅二受命建牙或逮或逐而跋扈将帅罪状已暴止于戴罪偏裨不能令士卒将帅不能令偏裨督抚不能令将帅将听贼自来自去谁为陛下翦其凶逆者疏入诏发帑赈饥而军政无章如故】

五月大旱

【帝因旱求言给事中黄绍杰乃疏论温体仁畧言汉世灾异策免三公宰执亦因罪以求罢今者久旱陛下修明政治纳谏言可谓应天以实矣而雨泽不降何哉天有所甚怒而不解也次辅温体仁者秉政数载上千天和无岁不旱?无日不风霾无处不盗贼无人不愁怨秉政既久窥?益工中外趋承益巧一人当用则曰体仁意未遽尔也一事当行则曰体仁闻恐不乐也覆一疏建一议又曰虑体仁有他属不然则体仁忌讳无撓其凶锋也凡此召变之尤愿陛下罢体仁以回天意体仁罢而甘霖不降杀臣以正欺君之罪帝方眷体仁贬绍杰一秩体仁疏辨且诋其别有指授绍杰言廷臣言事指及乘輿犹荷优容一字涉体仁必遭贬黜谁不自爱为人指授耶因列其罪状且曰臣所仰祝圣明洞烛体仁奸欺者其说则有两端下惟朋党一语可以箝言官之口挑善类之祸上惟票拟一语可以激圣明之怒盖僨悞之愆体仁犹辨

且以明党为言绍杰遂言体仁受铜商王诚金体仁长子俨受巡抚沈桀及两淮巡盐高钦顺等金皆万计体仁用门客王治东南之利皆其转输体仁私邸两被盗失黄金宝玉无算匿不敢言帝怒调为上林苑署丞迁行人司副】

六月陈奇瑜围贼于车箱峡贼伪降奇瑜纵遣之贼遂叛?所过州县

【先是奇瑜檄诸将会兵陕州图进剿而廷议以郧阳属邑皆陷逮抚治将元仪擢大名副使卢象昇代之助奇瑜剿贼会贼之自蜀还楚者张应昌击之五岭山败绩身中一矢退还贼遂大入又分其党为三一犯均州往河南一犯郧阳往淅川一渡河犯商南奇瑜乃驰至均州檄陕西巡抚练国事驻商南遏其西北河南巡抚元默驻卢氏遏其东北湖广巡抚唐晖驻南漳遏其东南奇瑜偕象昇由竹谿至平利之乌林关十余战大破之总兵官邓玘及别将杨化麟杨世恩周任凤杨正芳等分道击贼复连胜副将刘迁等搜竹溪平利贼先後斩馘三千有奇擒其魁十余人参将贺人龙等逐贼八昼夜至紫阳贼死者万余人奇瑜以湖广贼多鼓行而西谓贼不足平乃遣游击唐通防汉中以护藩封参将贺人龙刘迁夏镐扼畧阳沔县防贼西遁副将杨正芳余世任扼褒城防贼北遁自督副将杨化麟柳国镇等驻洋县防贼东遁又檄练国事卢象昇元默各守要害截贼奔逸贼见官军四集大惧悉遁兴安之车箱峡诸渠魁高迎祥李自成张献忠等咸在焉峡四面巉立中亘四十里易入难出贼误入其中山上居民下石击或投以炬火且累石塞其口路絶无所得食困甚又大雨二旬弓矢尽脱马乏刍死者过半自成窘甚用其党顾君恩谋以重宝赂奇瑜左右及将帅伪请降奇瑜意轻贼有骄色遽许之悉籍其名劳遣归农每百人以一安抚官护之檄所过州县具糗粮传送诸将无邀击以挠抚事贼既出栈道即大噪叛尽杀安抚五十余人屠所过七州县署麟游知县董时和死之而贼之屯汉兴者亦自略阳来会关中大震奇瑜悔失计因委罪他人以自解贼初叛猝至凤翔诱开城守者知其诈给以縋城上杀其先登者三十六人余噪而去其犯宝鸡者亦为知县李嘉彦所挫奇瑜遂劾嘉彦又凤翔乡官孙鹏等挠抚局帝怒遣嘉彦鹏及士民五十三人奇瑜又委罪练国事国事上言汉南贼尽入栈道奇瑜檄止兵臣未知所抚实数及见奇瑜疏八大王部万三千余人蠡子块部万五伯余人张妙手部九千一百余人八大王又一部八千三百余人臣不觉仰天长叹夫一月内抚强寇四万余尽从栈道入内地食饮何自出安得无剽掠且官军防护一大帅止将三千人而一贼魁反拥万余衆安能受纪律耶贼皆藉口归藉然延安州县骤增四万余人安集何所合诸征剿兵不满二万而降贼踰四万岂内地兵力所能支宜其连陷名城而不可救也若咎臣不堵剿则先有止兵檄矣若云贼已受抚因误杀使人致然则未误杀之先何为破麟游永壽为今之计惟急调大将致讨若仍以愿回原籍禁兵勿剿三秦之梟安所终极哉疏入事已不可为遂逮国事下狱】质实【车箱峡在兴安州界五岭山在均州界均州战国时为均陵隋置均州明属襄阳府今因之淅州後魏置後周省入中乡县五代梁复置淅水金省入内乡明成化时复置属邓州以隶于南阳府今径属南阳府乌林关在平利县东南二百七十里一名武陵关襄城汉褒中隋改褒城明属汉中府今因之永壽唐析新平县地置明属乾州以隶于西安府今升乾州为直隶州县仍属焉唐晖歙人董时和阳武人以扶风县丞署麟游县事城陷遇害时麟游生员赵应璧随母避贼贼至母投崖死应璧从之本朝乾隆四十一年追諡时和节愍应璧入祠】

发明【车箱峡之役实为流贼殄灭之一机时李自成张献忠同困峡中进退不可刍粮俱尽已成束手待毙之势而陈奇瑜遣将分防截其遁逸於兵法亦握胜算一旦举而殲之易如反掌积年巨寇得以扫荡芟夷天时地利未有若斯之宜者何乃为左右所愚寻杨鹤之覆辙而纵之使逝至令困兽出柙反噬益甚厥後盗氛日张毒流海宇延祸无穷史称流贼之肆毒始于杨鹤而成于陈奇瑜信矣庄烈不早烛受降之失计至连陷名城犹听其饰词卸过转逮御寇之孙鹏李嘉彦以为流贼报仇及练国事之疏叙奇瑜失策之罪极为透悉复以事不可为而逮国事下狱政刑颠倒坐失事机明之亡岂尽天为之哉】

秋七月我

大清兵入上方堡至宣府京师戒严

【先是宣府巡抚沈槃遣使乞和于大清与我阿什违尔汉达雅齐龙什卫塞桑等刑白马乌牛定议寻二哨卒出边被获大清以约既定即遣还之有三人私入边者斩一人界上鞭二人百贯其耳还所取物于边吏我大兵征察哈尔道出宣府边城多颓坏我】

【太宗文皇帝谕军士无或蹂躪而廷议责槃专擅尚书熊明遇曲为槃解帝不悦逮槃下吏明遇亦为言官劾罢于是辽东诸将间出边扰我属部戕害二十余人张家口守臣复多匿逋逃】

【大清屡谕责之怙不悛及察哈尔既下林丹汗走死其宰桑巴图鲁噶尔马济农等率衆降独卜内额尔等携察哈尔汗之二妻一妹及其部衆奔榆林西宣大寧锦诸边吏欲冒为功争招纳之】

【大清兵由察哈尔凯旋因入边问罪四路并进自宣府趋应州畧大同下得胜堡参将李全自缢进攻保安知州阎生斗集吏民拒守城破被执死之守备徐国泰判官李师圣吏目王本立训导张文魁生员姚时中张师戟亦同死旋入灵邱知县蒋秉采募兵坚守力屈衆溃投缢死合门殉之守备于世奇把总陈彦武马如豸典史张标教谕路登甫并战死又守备张修身常汝忠亦先後殉节死沿边城堡多失守远近】

【震懼特诏总兵陈洪范守居庸保定巡抚丁魁楚守紫荆雁门总兵尤世威吴襄等援边而以宣大总督张宗衡节制各镇援兵宗衡暨总兵曹文诏张全昌等皆不敢战代王母杨太妃命宗衡等求和我】

【六清亦布告以申讨之意既下万全左卫遂班师宗衡文诏全昌及巡抚胡沾恩等并遣戍山西巡抚吴甦请留文诏全昌剿晋贼自赎帝可之兵部议令文诏驰剿河南贼甦复抗疏争请先平晋贼後入豫帝不许而文诏以甦有恩意取道太原为甦所留时山西降盗王刚王之臣通天柱等已为前巡抚戴君恩所斩独贺宗汉刘浩然王加计犹拥衆自恣剽掠城邑垣曲典史秦宗恩黎城布衣李养裕先後以督乡勇扞贼死甦阳为招抚密令参将猛如虎虎大

威刘光祚等图之山西盗尽平明年凤阳告陷文诏遂整兵南】质实【得胜堡在大同县北八十里东至边墙三里北至边墙三里明嘉靖十八年筑城今日得胜路灵邱汉县明属蔚州以隶于大同府今径属大同府垣曲汉垣县宋改垣曲明属绛州以隶于平阳府今升绛州为直隶州县仍属焉阎生斗汾西人徐国泰上虞人妻薛氏妾王氏阖门十三人皆殉节李师圣隆谷人薛秉采全州人秦忠文武阳人 本朝乾隆四十一年追諡徐国泰烈愍李全阎生斗蒋秉采于世奇张修身常汝忠节愍李师胜秦宗文李养裕等并入祠丁魁楚永城人代王传?代简王桂十一世孙崇祯间袭封】

冬十一月陈奇瑜有罪下狱以洪承畴代之

【给事中顾国宝御史傅永淳交章劾奇瑜受贿纵贼诏锦衣官逮讯而以洪承畴代时贼已蔓延不可扑灭大学士温体仁谓山西巡抚吴甡曰流贼癣疥疾不足忧也奇瑜罪当死有庇之者未几谪戍边】质实【顾国宝南通州人傅永淳灵寿人】

贼自陕西出犯河南

【贼既轶出车箱峡大掠所过州县拥众而西陷澄城围合阳比洪承畴兵至解围去转寇平凉邠州进攻隆德破其城杀知县费彦芳乡官杨秦初生员杨泰运皆殉节死遂薄静海州固原参政陆梦龙率游击贺奇勲都司石崇德御之贼初不满千已而大炽梦龙所将止三百余人被围数重贼矢石如雨突围不得出二将抱梦龙泣梦龙挥之曰何作此妇孺态大呼奋击手馘数人与二将俱战死未几复围陇州贺人龙驰救之贼悉众环攻李自成以人龙同里閤遣其将高杰遗书招之令反人龙不报固守两月左光先救至围始解廷议以贼聚陕西诏河南兵入潼华湖广兵入商雒四川兵由兴汉山西兵出蒲州韩城共讨贼而湖广一军寻覆于雒南副总兵杨正芳及裨将张上达皆死之当是时贼二十余万往来关中连营辄百余里别贼万余屯雒南阌乡蹂躏郡邑数十诸将先後以死事着者有总兵殷体信游击丁孔应指挥孝学牧守备史大勲昌平镇将凌元机胡良翰花马池营千总蔡应昌而甘泉知县蒲来举崇信知县龐瑜山阳知县董三谟珍州知州娄琇麟游知县吕鸣世则皆以长吏殉城死其士民仗义者泾阳布衣王祚以扞贼死耀州生员宋绪汤以詈贼死贼氛方日炽闻承畴将合诸路兵进剿贼渠高迎祥李自成遂窜入终南会西寧兵变杀将领承畴还军定乱贼又出终南分陷关陇及承畴自甘肃引兵而东贼乃悉众东奔陷陈州灵宝汜水荥阳河南复震贼每营数万兵更番进皆因粮宿饱官军寡备馈饷或不继贼介马驰一日夜数百里官军步多骑少行数十里辄疲乏以故多畏贼时左良玉扼新安浍池陈治邦驻汝州陈永福扼南阳皆坐甲自保良玉前在怀庆与督抚议不合因是生心缓追养寇多收降者以自重督抚檄调不时应命渐有跋扈端实无意杀贼而贼传良玉且至移壁梅山溱水间】质实【邠州西魏置豳州唐改豳曰邠明属西安府 本朝雍正三年直隶陕西省隆德金升德顺州之龙德寨为县明属静寧州以隶于平凉府今径属平凉府崇信唐于原州地筑崇信城宋始置县泾州唐置明并属平凉府今因之梅山在郑州西南三十五里与新郑县接界费彦芳崇德人按崇德明属嘉兴府 本朝康熙元年改石门杨泰初官松江通判方里居贼陷城与子生员善俱赴井死杨泰运为贼所执骂不絶口断舌死陆梦龙浙江山陰人赠太仆卿殷体信朔州人战歿于阵丁孔

寧夏人被执不屈遇害李学牧亦寧夏人陷贼中与王风木等谋举义事泄北面再拜受刃史大勲长安人率兵逐贼马蹶被执为所杀凌元机胡良翰皆汤九州部将贼屯阌乡九州遣元机良翰搜山败歿蔡应昌寧夏中卫人赴剿血战死蒲来举蓬溪人贼犯甘泉守备孙守发拥兵不救城陷来举手刃数贼死之赠光禄少卿龐瑜字坚白公安人崇信故无城遭兵荒县止贫户百余瑜知贼必至集士民筑土垣以守流涕誓死职会天大雨土垣尽圯贼大至瑜急解印遣家人齎送上官端坐堂上贼猝令跪瑜骂曰贼奴敢辱官长拔刀胁之骂益厉贼掠城中无所有执至野外剖心裂腹而死赠固原知州董三谟黎平人与父嗣成弟三元俱殉难妻李氏亦携子女偕死赠光禄丞委琇湘陰人知涇州城陷死赠太僕少卿吕鸣世福建人麟游屡被贼鸣世抚居民有恩城陷贼不忍加害自絕食六日卒按湖广通志有知府简而可者遂安人亦于是年殉节死 本朝乾隆四十一年追諡陆梦龙忠烈费彦芳贺奇勲石崇德杨正芳张上达殷体信蒲来举龐瑜委琇烈愍杨泰初凌元机胡良翰丁孔应李学牧史大勲董三谟吕鸣世简而可节愍杨泰运蔡应昌等并入祠】

【乙亥】八年春正月诏洪承畴出潼关讨贼

【帝以河南贼炽命承畴出潼关与山东巡抚朱大典协剿时贼方屯梅山溱水乘间陷上蔡固始诸县闻承畴将出关遂大会羣贼于荥阳老回回曹操革里眼左金王改世王射塌天横天王混十万过天星九条龙顺天王及高迎祥张献忠共十三家七十二营议敌官军未决李自成进曰匹夫犹奋况十万衆乎官兵无能为也宜分定所向利钝听之天皆曰善乃议革里眼左金王当川湖兵横天王混十万当陕兵过天星扼河上缀河南兵迎祥献忠及自成畧东方老回回九条龙往来策应陕兵銳益以射塌天改世王所破城邑子女玉帛惟均衆如自成言始迎祥与献忠并起比肩而自成乃迎祥支党不敢与献忠偶及是遂相颺颺与俱东掠自固壽抵霍邱陷其城县丞张有俊教谕倪可大训导何炳若乡官戴廷对田既庭举人王毓贞张灿恒死焉遂燔壽州攻颍州知州尹梦鳌通判赵士寬方谒上官于凤阳骤闻贼至立驰还贼已抵城下率民壮固守城北有高楼可瞰城中诸生刘廷传请先据之梦鳌以为然而廷传所统皆市人不可用贼遂据楼以攻且凿城颓数丈城上人皆走止之不可梦鳌持大刀独当城壤处杀贼十余人身被数刃贼衆毕登遂投城下乌龙潭死城既陷士寬率衆巷战力竭亦赴水死颍川卫左州治西北隅贼分攻卫指挥李从师王廷俊千户孙升田三震百户罗元庆田得民王之麟前所百户汪檀俱乘城战死卫经历胡士定及廷传以骂贼死致仕尚书张鹤鸣暨其弟参政鹤腾子大同阖门皆遇害中书舍人田之颖光禄寺署正李生白署丞李元白黄岩知县刘道远会寧知县杨南同殉节死其他官绅士庶死难者共一百三人城中妇人殉节者二十七人烈女八人一时忠烈称独盛城破後亦无一人向贼乞怜者贼怒遂屠之】质实【霍邱隋置明属壽州以隶于凤阳府 本朝雍正二年改属颍州十三年升颍州为府县仍属焉颍州卫明洪武初置隶河南都司以属于右军都督府今废倪可大仪徵人贼犯霍邱知县逸去可大督民壮逆战以奇策斩贼首数百分守城中贼以礮攻陷南门被执啗指血喷贼被磔死妻女皆自缢仆倪表亦死何炳若河南人戴廷对官福州通判田既庭官淮安教授尹梦鳌云南太和人弟侄七人皆从死赵士官字汝良掖县人官凤阳通判驻颍州妻李氏携三女登楼自焚仆王丹亦骂贼死胡士定广济人刘廷传故布政使九光从子九光子廷石分守西城中贼刃未殊口授友人方畧令缮书上当事旋卒张鹤腾官云南参政行谊醇笃誉过

其兄鹤鸣贼执鹤鸣兄弟倒悬鹤鸣于树皆骂不絕口死後给事中林正亨录上其状赠梦鳌光禄少卿士寬光禄丞余赠恤有差 本朝乾隆四十一年追諡尹梦鳌忠节倪可大张鹤腾烈愍戴廷对赵士寬李从师王廷俊田之颖李生白李元白刘道远杨南节愍胡炳若孙升胡士定刘廷传廷石等及死难官绅士庶各见史乘者为夔州府训导丁嘉遇侯选经历汪邦弼举人白精忠郭三杰贡生李茂丛杨得坤甯俭生员韩光祖檀之槐李维纪王致志张维黄刘大济田大生闻于阶弟于邦王国泰元凤翔下文斗王乾亨丁嘉运刘栻姚克智丁崇先郭之英姚同寅尚日暄陈纯李孕生王致和申华郭之豪田之萃郭玮马负图钱人玮卢元贞马来国马柱国韩仲佐杨于世王启昌邢元锡熊协梦王维新李汝珽卢传世喻天锡杨士贞郭之产郭獬贺嘉贞闻慎言监生王文焕田之蔚田之茂田之尹武举尚日跻李承训医官张济民礼生孔道隆儒士田之蕙于振先布衣鹿劲元中元严克长王尚廉元旋祁标王公枋张肃范王之干赵谦祁瀛潘守仁汪茂椿张思明王国王九成王印王聘汝陈继信并入祠韩光祖母李氏妻武氏偕一妹二女赴井死妾李氏方有娠被剖腹死次子定策孙日曦皆骂贼死檀之槐护母柩不去被磔死李维纪妻赵氏及子女十八人投井死王致志妻唐氏同殉节】

贼陷凤阳留守朱国相等死之

【先是南京兵部尚书吕维祺惧贼南下请防护凤阳陵寝不报给事中孙晋亦以为忧言于兵部尚书张凤翼凤翼曰贼起西北不食稻米贼马不饲江南草公南人何忧贼遂不设备贼渐逼江北凤翼乃请敕漕运都御史杨一鹏移镇凤阳温体仁格其议凤翼亦不能再请事益急给事中许誉卿请速调五千人守凤阳而贼已自壽州分部来犯凤阳故无城国相率指挥袁瑞徵吕承?郭希圣张鹏翼周时望李郁岳光祚千户陈宏祖陈其忠金龙化等以兵三千逆战上窑颇有斩获顷之贼数万至矢集如蝟官军败国相自刎死余皆阵歿一鹏在淮安远不及敕贼遂燔皇陵大肆杀掠千户陈永龄百户盛可学卫经历胡尚彩府照磨萧懋烈等四十余人推官万文英子元亨及举人蒋思宸布衣陈自修等六十余人皆殉节死公私邸舍被焚者二万余间光烛百里贼渠张帜自称古元真龙皇帝合乐大饮自成从献忠求皇陵小阉善鼓吹者献忠不与自成怒偕迎祥西趋归德复谋入关献忠独东攻卢州州民乘墉扞贼有张四哲者偕弟四美四奇奋力迎战败死州城坚贼百计攻不克去攻舒城知县章可试塞三门开西门诱】

【贼入陷于坑奔溃死者千人遂走围卢江士民具财帛求免贼伪许之俄袭陷其城里居参政卢谦举人张受毕伊周死之连陷无为巢潜山太湖宿松屠其城太和霍山六安亳州悉被残破其别部复分陷罗田徐州及虞城商邱汝寧真阳新蔡是时诸州邑殉难死者无为则知州张化枢巢县则知县严觉潜山则知县赵士彦太和则知县金应元守备赵?赵继春训导扈永寧宿松则生员刘之暄袁师率万民望柴维焕布衣陈昌言夏时行石思行太和则生员秦培笃秦思允霍山则教谕龚元祥训导姚允恭六安州生员梅国秀亳州则布衣李心惟李如龙李犹龙罗田则知县梁志仁教谕吴凤来训导罗大受典史单思仁徐州则知州陈桂栋商邱则举人贾遂李明开武举史懋明虞城则生员宋鼎延真阳则知县王信汝寧则江陵生员刘楷贼既蹂躪江北流扰蕲黄汝寧归德之间围桐城者数月应天巡抚张国维率副将许自强东西奔击解桐城围遣守备朱士允趋潜山把总张其威趋太湖士允战死自强遇贼宿

松杀伤相当安庆山民磔石以投贼贼多死乃越英霍走麻城以去变闻于朝帝以皇陵毁素服避殿逮一鸣下狱弃市以朱大典代之誉卿等愤体仁凤翼玩寇速祸疏言流寇发难已久枢臣因东南震邻始有淮抚操江移镇之请识者已恨淇晚而阁臣票拟则曰不必移镇臣观各地稍有兵力贼即不敢轻犯凤阳何地使巡抚早移岂有今日今枢臣以曾请移镇藉口抚臣以不必移镇为词则辅臣欲辞玩寇之罪其可得哉帝以誉卿苛论妄言切责之】质实【上窑镇在怀远县南五十里宋史李谷传周显德三年谷败吴军数千于来远又破千余人于山口镇进攻上窑即此卢江汉初置舒县文帝十六年建庐江国治此後为庐江郡治隋废郡改县曰庐江明属庐州府今因之巢县夏商时南巢地汉置居巢县唐改巢县明属无为州以隶于庐州府今径属庐州府潜山元析怀宁县置太湖汉皖县地刘宋以豫部蛮民立太湖县明并属安庆府今因之商邱汉睢阳明洪武初省嘉靖中置商邱为归德府治真阳汉慎阳隋真阳明属汝宁府今改县曰正阳仍属汝宁府凤阳卫在凤阳县东南十三里今废英山春秋时英氏地宋初为蕲州罗田县地咸淳时分置英山县明属六安州以隶于庐州府今属六安直隶州麻城隋置明属黄州府今因之朱国相榆林卫人吕维祺字介孺新安人孙晋桐城人杨一鹏临湘人胡尚彩淳安人贼犯凤阳卫城独击却之後贼复至被执不屈死萧懋归化人万文英南昌人方卧病贼索之子元享年十六泣语父曰儿不得复事亲矣出门呼曰若索官何为我即官也贼紮之极口大骂断脰死文英获免蒋思宸投缳死陈自修绕父柩哀鸣被害灵谦字吉甫官山西右参政引疾归庐江陷谦服命服危坐中门贼至欲屈之骂曰吾朝廷宪臣肯为贼屈邪鼠辈灭在即安敢无礼贼怒杀之投屍于池池水尽赤张化枢云南永平人严觉归安人一门皆尽节金应元会稽人流贼至据城东大濠奸人导贼渡濠为所执斫未殊自经死赵?吴江人贼袭营被执不屈死赵继春与猷贼战于洪家岭无援死之扈永宁霍邱人刘之暄代父死贼释其父万民望代母死贼释其母袁师臯见贼欲杀其母力与相持受数刃死柴维焕与三子同遇害秦培笃与妻王氏俱死秦思允被贼执挟之攻城呼告城上曰贼以牛皮冒车避矢石所惧惟火耳贼杀之城上投薪焚贼车城得全龚元祥长洲人贼犯霍山知县先遁元祥督民固守城破与子炳衡俱被杀事闻赠国子助教建祠曰忠孝以其子配之姚允恭盱眙人李心维李犹龙皆以守亲柩遇害心维子果从死如龙犹龙从弟贼执其母奋刀击贼为所杀梁志仁南京人保定侯铭之裔也罗田界湖广江北之交志仁日夕儆备罗汝才以其长者不忍加兵会邑豪江犹龙与贼通志仁捕下狱犹龙知必死潜遣人导汝才别校来攻城陷志仁持长矛巷战杀六贼力屈被紮骂贼支解死妻唐氏亦被杀典史单思仁等并死汝才在英山闻之驰至以擅害长者斩其别校吴凤东福建人卢大受宝庆人诏赠志仁知州思仁主簿凤来助教大受学录陈桂栋邻水人王信陕西宁州人出抚土寇会流贼猝至被执胁之赚城信大骂不从断头剖腹而死赠光禄卿建祠奉祀时又有一王信官新蔡知县亦于是年殉节刘楷江陵人常率义勇解荆州围贼犯汝宁从参将王某以三千人赴援战死张国维字玉笥东阳人鲁王时殉节本朝乾隆四十一年追諡张国维忠敏真阳知县王信忠烈朱国相袁瑞徵吕承荫郭希圣张鹏翼周时望李郁岳光祚陈永龄卢谦严觉赵士彦金应元龚元祥梁志仁新蔡知县王信朱士允烈愍陈桂栋张化枢赵?赵继春节愍陈宏祖等并入祠】

发明【是时寇贼蔓延所在充斥乘势南下事所必有凤阳陵寝重地自宜预为防护张凤翼身任本兵不知早为筹画乃以贼起西北不食稻米贼马不饲南草竟不设备此与儿童之见何异谬妄甚矣及贼逼江北始请淮推操江移镇已为援不及时而温体仁复格阻之至使

祖陵燔毀原庙震惊二臣之罪上通于天矣庄烈倚任奸辅转以许誉卿为苛论妄言然则玩寇速祸谁实致之沦胥以亡有由来矣】

夏五月吴宗达罢

【温体仁专政宗违能为之下在阁六年交驩无间至是以衰老乞归】

六月贼复走陕西总兵官曹文诏剿贼于真寧死之【初洪承畴出关至信阳诸将毕会贼见河南兵贼复分路奔还陕西张献忠亦由麻城入陕以会高迎祥李自成承畴侦贼尽入关中议还顾根本乃会师汝州命邓玘尤翟文张应昌许成名戍樊城防汉江左良玉汤九州控吴村瓦屋尤世威陈永福徐来朝分驻永寧卢氏山中以扼雒南朱阳之险亲统大军俟曹文诏至偕入关进剿时文诏击贼随州未至也邓玘抵樊城其部将王允成以克饷鼓噪杀其二仆玘惧登楼越墙堕地死承畴闻变急檄秦羽明代统玘军以奏限六月平贼期且迫遂率贺人龙张全昌等西行约文诏会商州比次灵宝文诏至承畴以贼党屯商雒闻官兵大集必先走汉中而大军由潼关入反在其後乃令文诏由阌乡取山路至雒南商州直捣贼巢复从山阳镇安洵阳驰入汉中遏其奔轶曰此行也道路回远将军甚劳苦吾集关中兵以待将军拊其背而遣之文诏跃马去既至商州贼去城三十里而营文诏夜半率从子变蛟等击败贼深林中贼退据险以千骑逆战变蛟大呼?阵诸军并进贼败走已而迎祥献忠诸贼犯凤翔趋汧阳陇州文诏自汉中驰赴贼尽向静寧泰安清水秦州间衆且二十万承畴以文诏所部合张全昌张外嘉军止六千衆寡不敌告急于朝未得命而官军遇贼乱马川前锋刘鸿烈被执死之俄副将艾万年柳国镇等战歿于襄乐文诏闻之瞋目大骂急诣承畴请行承畴喜曰非将军不能灭此贼顾吾兵已分无可策应者将军行吾将由泾阳趋淳化为後劲文诏乃以三千人自寧州进遇贼真寧之湫头镇从子变蛟先登斩首五百追三十里交诏率步兵击之贼伏数万骑合围矢蝟集贼不知为文诏也有小卒缚急大呼曰将军救我贼中叛卒识之悉贼曰此曹总兵也贼喜围益急文诏左右跳荡手击杀数十人转鬪数里力不支拔刃自刎死游击平安以下死者二十余人贼乘胜掠地火照西安城中承畴力遮之泾阳三原间贼不得过文诏忠勇冠时称良将第一其死也贼中为之相庆】质实【樊城在襄阳县北南临汉水与襄阳城对峙吴村一统志作胡村在淅川县西北九十里瓦屋在内乡县西南春秋时诸侯参盟于瓦屋即此永寧後周始置熊耳县隋改曰永寧明属河南府今因之朱阳关在卢氏县西南五十里随州汉随县唐为随州治明洪武初降县寻复置州以随县省入属德安府今因之襄乐城在庆阳府寧州东六十里汉曰襄洛县後汉废後魏置县曰襄洛元废真寧唐置明属寧州以隶于庆阳府今改曰正寧径属庆阳府湫头镇一名显圣镇在真寧州东文诏死节後庄烈帝闻之震悼赐祭葬世廕指挥僉事有司建祠春秋致祭本朝乾隆四十一年追諡文诏忠果艾万年忠烈柳国镇平安烈愍刘鸿烈节愍】

秋七月以文震孟张至发并为礼部侍郎兼东阁大学士预机务

【震孟在讲筵每因事规谏帝数逮系大臣震孟讲鲁论君使臣以礼反复陈说帝为出尚书乔允升侍郎胡世赏于狱帝尝足加于膝适讲五子之歌至为人上者奈何不敬以目视帝

足帝即袖掩之徐为引下贼焚凤阳陵寝震孟历陈致乱之源谓当事诸臣不能忧国奉公一统之朝强分畛域又言陛下宜行抚绥实政先收人心以遏寇盗徐议濬财之源毋徒竭泽而渔语多切中时弊至是帝将增置阁臣以翰林不习时务思用他官参之召廷臣数十人各授一疏令票拟震孟引疾不与至发所拟独当帝意特命至发与震孟并入阁至发以县令起家累擢居政府盖异数也越二年至发代体仁为首辅一切守其所为而才智机变稍不及时人比之传衣鉢云】

贼复东犯总兵官尤世威败绩

【贼为洪承畴所遮张献忠将由蓝田走卢氏复扼于世威仍入商雒山中参将徐来朝所部三千人不肯入山大噪贼至来朝逃一军尽疫世威军暴露久大疫与贼战失利败走贼遂哭出朱阳关杀裨将徐来臣分十三营东犯惟高迎祥李自成留陕西】质实【蓝田秦县故城在县西後周移治于此明属西安府今因之徐来臣朱阳关守将本朝乾隆四十一年追諡烈愍】

八月以卢象昇总理江北河南湖广四川军务讨流贼【廷议以贼势益张洪承畴一人不能顾乃擢象并总理承畴督关中兵办西北象昇督关外兵办东南寻进象昇兵部侍郎加总督山西陕西赐尚方劔】

九月洪承畴破贼于渭南

【时迎祥自成在关中分道出犯迎祥畧武功扶风以西自成畧富平三原以东承畴遣将追自成小捷至醴泉贼将高杰通于自成妻邢氏惧事泄被害挟之来降承畴复身追自成大战渭南临潼自成大败东走迎祥亦屡败东逾华陰南原絶岭偕自成出朱阳关与献忠合】质实【武功汉县明属乾州以隶于西安府今升乾州为直隶州县仍属焉】

王应熊罢

【应熊为杨一鹏所取士初一鹏奏凤阳失事应熊恐帝震怒留其疏未上及报恢复同奏之遂拟旨令一鹏戴罪而帝以皇陵遭毁非寻常失事乃逮一鹏论死于是给事中范淑泰等争刻应熊朋比误国言一鹏恢复疏以正月二十七日核察失事情形疏以正月二十八日天下有未失事先恢复者哉应熊改填日月欺诳之罪难辞且劾其他受贿事帝眷应熊厚不听应熊亦屡疏辩谓座主门生谊不容薄不敢辞朋比之名票拟实臣起草不敢辞误国之罪言官益愤给事中何楷屡疏纠之最後复疏言故事奏章非发钞外人无由闻非奉旨邸报不许钞传臣疏六月初十日上十四日始奉明旨应熊乃于十三日奏辩旨尚未下应熊何由知臣不解者一旦旨下必由六科钞发臣疏十四日下而百户赵光修先送锦衣堂上官则疏可不由科钞矣臣不解者二应熊始惧具疏引罪帝下其家人及直日中书于狱狱具家人戍边中书贬二秩应熊乃屡疏乞休去乘传赐道里费行人护行帝亦知应熊不协人望特已所拔擢不欲以人言去也】质实【何楷字元子漳州镇海卫人】

总兵官张全昌败绩于沈邱被执

【先是全昌从洪承畴西入关与祖大弼贺人龙屡败贼未几都司田应龙张应龙战死而艾万年曹文诏已相继歿官军益衰贼尽趋西安承畴急檄全昌曹变蛟先赴渭华格其前亲督军尾其後击却之贼奔南承畴又命全昌及赵光远率兵三千截潼关大谷部卒大譁阑入荥泽劫杀人河南巡抚元默请急救卢氏不听光远擅归关中全昌迤至颍州至是追蝎子块於沈邱战败被执贼挟之攻靳黄全昌因代贼求抚总理卢象昇不许责全昌丧师辱国曰贼果欲降可灭其党示信贼不听命久之全昌脱归】质实【大谷关在阌乡县西南秦山谷张应龙与田应龙御贼清水县之张家川中伏战死本朝乾隆四十一年并追諡忠烈】

冬十月贼陷陕州攻洛阳

【贼拥衆三十余万自潼关出犯阌乡灵宝尘埃涨天络绎百里左良玉祖寬御之不能支贼遂分部薄陕州知州史记言募敢死士出击之斩数十级生擒三十余人老回回愤率数万人攻城不克乘雪夜来袭所募土方调他郡城遂破记言纵火自焚或掖之出曰死此何以自明乃越女墙下贼追获之令降叱曰有死知州无降知州也遂被杀指挥李君赐杀数贼而死训导王诚心里居教谕张敏行姚良弼指挥杨道泰阮我疆镇抚陈三元百户明完璧亦不屈死陕州既陷贼乃进攻洛阳巡抚陈必谦率良玉寬赴援献忠走嵩县迎祥自成走偃师良玉寬分逐之迎祥等由巩县畧鲁山叶县陷光州会卢象昇自湖广帅师至合寬等击败之于确山贼南奔复流入江北围滁州再陷巢县乘势掠含山袭和州知州黎鸿业与乡官马如蛟麾壮士出击两战皆捷贼将奔适风雪大作不辨人色守者皆溃贼遂入城如蛟急下令能击贼者予百金须臾得百余人巷战贼多伤力屈遂战死鸿业系印于肘跪告其母李氏曰儿不肖贪微官以累母奈何母泣谕曰汝勿以我为意事至此有死而已遂自縊妻杨氏妾李氏及女四人继之鸿业北而痛哭再拜自刎未殊濡颈血大书曰为臣尽忠为子尽孝何惜一死贼入伤数刃而死州判钱大用偕妻妾子妇俱死吏目景一高被创死学正康正諫偕妻汪氏子妇章氏赴水死训导赵世选不屈死如蛟兄如蚪如虹家属十四人亦死乡官鲁一惠张元祜贡生鲁一璠生员陶应陶廖赵世光鲁可为张宏门姚承壽王鼐臣王梦阳雷乡祚布衣王良翰杨凤墀宋龄成建中李寅阳郝万秋马文举王之节□唐□美皆遇害是年贼自江北而楚而豫而秦又自秦突出关迤而南以至江北蔓延几半天下其死难之可纪者陕西则陇州知州胡尔纯永壽知县薄匡宇咸阳知县赵跻昌延长知县万代芳教谕谭恩驿丞罗文魁扶风知县王国训主簿夏尚忠典史陈绍南教谕张宏纲训导陈繻生员王守祥守德澄城主簿李可受乡官王廷宾阶州学正孙仲嗣乡官赵明盛孟宗孔寧羌卫镇抚曹云梯凤翔生员屈学曾临潼生员张国桢韩城生员梁民泰河南则卢氏知县白楹济源知县杨于堦荥阳典史周崇礼湖广则鄖西知县曹同署上津知县龚懋泽广济教谕曾发祥黄冈生员业道暹江北则临淮都司陈保山而四川总兵杨玉振以赴雒剿贼兵溃遇害】质实【鲁山汉鲁阳刘宋省隋复置鲁县唐曰鲁山明属汝州确山宋置明属汝寧府含山唐置明属和州延长西魏析肤施县置明属延安府今并因之寧羌卫在寧羌州治北本沔阳县地名羊鹿坪明洪武二十九年羌民田九成作乱讨平之三十年于此置寧羌卫成化二十二年巡抚郑时以地僻山险流民聚集奏设州治于卫治南本朝顺治十六年裁卫史记言字司直当涂人赠光禄少卿黎鸿

业字孟扩顺德人赠太仆少卿马如蛟原官浙江山陰县知县赠太仆少卿康正諫祁门人赠国子监丞赵世选赠国子监学录马如科候选盐司判官马如虬州学生员鲁一惠原官把总与妻王氏赴水死张元桢原官鸿胪寺序班陶应陶廖同母兄弟母鲁氏九十一龄闻难赴水死应廖从之赵世光姚承壽亦从母赴水死承壽家人死者十余人陈问世以身卫母被杀鲁可为一忠子张宏门元桢子王良翰骂贼死妻鲁氏弟妇耿氏及妹女四媳皆自焚死杨凤墀阖门自焚死胡尔纯山东人贼犯陇州固守五十余日城陷自缢死赵跻昌解州人万代芳辽东人妻刘氏妾梁氏俱从死王国训解州人贼犯扶风扞贼两月余援絕城破骂贼死王廷宾官永城知县有治行里居城陷不屈死孙仲嗣肤施人当事委以城守贼至悉力御守比陷与妻子十余人同死赵明盛原官太原府照磨孟宗孔原官汉阳教谕屈学曾督乡勇杀贼陷阵死白楹莘县人已被劾将去官贼陷城率民巷战力竭自刎杨于塔保德人周崇礼浙江山陰人贼犯荥阳守小西门比陷巷战被执骂贼死曹同巢县人城破贼索印大骂不与贼击之骨肉糜烂以死龚懋泽闽县人以湖广都司经历署上津州事极力御贼以死鲁发祥锺祥人易道暹好学着书尚气节贼至被执遇害子为珪殉之为瑚于崇祯十六年奉母避贼被执骂贼死陈保山与贼战于隆平寺败歿 本朝乾隆四十一年追諡史记言忠烈黎鸿业马如蛟忠节李君赐杨道泰阮我疆陈保山烈愍胡尔纯薄匡宇赵跻昌万代芳王国训王廷宾杨于塔曹同龚懋泽杨玉振节愍钱大用等并入祠】

十一月罢大学士何吾驺文震孟

【震孟既入阁体仁每拟旨必商之有所改必从喜谓人曰温公虚怀何云奸也吾驺曰此人机深讎可轻信未几体仁窥其疎所拟不当己意辄令改不从则径抹去震孟大愠以诸疏掷体仁前体仁亦不顾给事中许誉卿者故劾忠贤有声震孟及吾驺欲用为南京太常卿体仁忌誉卿伉直讽其私人诬劾誉卿为福建布政使申绍芳营求美官体仁拟以贬谪度帝欲重拟必发改已而果然遂拟斥誉卿为民绍芳提问震孟争之不得拂然曰科道被诬见斥是天下极荣事赖公玉成也体仁遽以闻帝果怒责吾驺震孟徇私挠乱吾驺罢震孟落职间住震孟刚方贞介有古大臣风惜三月而斥未竟其用】质实【申绍芳大学士时行之孙】

下庶吉士郑鄮于狱

【初鄮忤魏忠贤削籍帝即位起故官丁内外艰未赴服除应召温体仁重鄮名见于朝从容问曰君自南来闻济议谓何鄮曰谓有君无臣耳体仁鄂然曰天下事已不可为咎岂在吾辈鄮曰推贤任能练兵选将何为不可体仁怫然起曰君与湛持任此吾久欲归矣湛持大学士文震孟字也体仁方欲倾震孟而鄮与震孟同年友善又面诋体仁过体仁憾甚震孟既罢去憾未释摭鄮事无所得遂诬劾鄮假乱仙判词通父振先杖母言出其从母舅旧辅吴宗達时宗達谢政归已七閱月矣帝震怒下鄮刑部狱部臣言蔑伦大罪不可以风闻坐乞飭鄮同乡官覆奏帝责其瞻徇移鄮诏狱事迄无左证久不决体仁乃募诸生许曦证之曰汝证成鄮狱以中书舍人报汝曦因附会杖母事杂以帷薄褻语编书布中外谓之放郑小史而腾章极论鄮愿与鄮共对簿曰此实鄮二十五年前事鄮诘曦曰尔年几何曰年二十四鄮大呼曰冤乎奈何以二十四岁人而证二十五年前事乎曦语塞狱亦未竟而曦果擢舍人鄮从父振元

上揭讼冤侍郎刘宗周谕德黄道周先後论救锦衣吴孟明覆讞抗疏申辨之帝深入体仁言皆不听竟磔鄆西市】质实【郑鄆字谦止武进人】

发明【郑鄆杖母之狱法司不敢承锦衣不敢决而徒以风闻一语遽定爰书是何信体仁之深也夫体仁之据以劾鄆者谓其言出吴宗达耳立召宗达而面质之尚恐其依阿權辅首鼠两端乃并置宗达于不问而转任年不及事之人挺身对簿荒诞为已甚矣书曰惟察惟法其审克之庄烈偏听生奸虽治蔑伦大狱犹不察不审如此则其时庶戮之不辜者可胜道哉】

【丙子】九年春正月卢象昇败贼于滁州

【贼既袭陷和州益分部南犯巡抚张国维遣游击陈于王守六合守备蒋若来守江浦贼方攻江浦浦口守御姚九畴陷闾死若来急入城与知县李维樾固守贼登城若来拒却之缒下击贼矢着其颊左臂伤里血还战贼乃退六合无城若来与于王特角扞贼贼亦寻解去合部衆数十万西犯滁州环山为营包络原隰知州刘太巩南京太仆寺卿李觉斯登陴固守贼云梯冲輶百道环攻城上火轮巨礮相续发出贼不意投火燔其云梯纵死士出击贼贼衄者衆敛兵稍退夜复进攻掘为支河泄濠以涸之薄城益急而象昇自凤阳会诸路师来援总兵官祖寬将边军为前锋游击罗岱以火器三营为後劲躬率麾下三百骑居中督战昧爽抵城下贼空营出攻城麾起大军至贼不虞也祖寬跃马进奋击大呼诸军无不一当百战至晡罗岱阵斩贼渠摇天动夺其骏马连营皆溃自城东五里桥逐北三十里至朱龙桥积屍填委滁水为之不流象昇初受命时官军屡败诸将率畏惧不前象昇每慷慨洒泣激以忠义军中尝絶三日饷象昇亦水浆不入口以故得将士心战辄有功方其会师凤阳以前此议兵筹饷多未得机要乃上疏曰贼横而後调兵贼多而後增兵是为後局兵至而後议饷兵集而後请兵是为危形况请饷未敷兵将从贼为寇是八年前所请之兵皆贼党所用之饷皆盗粮也又言总督总理宜有专兵专饷请调咸寧甘固之兵属总督薊辽关寧之兵属总理又言各直省抚臣俱有封疆重任毋得一有贼警即求援求调不应则秦越也分应之何以支持又言台諫者臣不问难易不顾死生专一求全贵备虽有长材从何展布臣与督臣有剿法无堵法有战法无守法其言皆切中时宜而朝廷不能尽用也】质实【六合汉尉氏县隋改六合明洪武三年属扬州府十一年改属应天府今属江寧府朱龙桥一统志作朱龙桥镇在滁州西北三十里滁水自庐州府合肥县界东流入经全椒县三十里又东北经州东南六十里又东入江寧府六合县界亦名天河陈于王字丹衷吴县人姚九畴江寧人 本朝乾隆四十一年入祠】

以前礼部侍郎林钤兼东阁大学士预机务

【初钤以忤魏忠贤去忠贤诛起官至礼部侍郎谢病归至是与刘宗周同召见帝问人才兵食及流寇状宗周言陛下求治太急用法太严布令太烦进退天下士太轻故有人而无人之用又问兵事宗周言御外以治内为本愿陛下以尧舜之心行尧舜之政则天下自平矣帝迂其言命钤以原官入阁】

二月山西饥人相食

【时河南南阳亦饥有母烹其女者唐王聿键闻于朝乃命赈南阳饥蠲山西被灾州县新旧二饷】质实【聿键唐定王桢八世孙崇祯五年嗣封】

前副总兵官汤九州击贼于嵩县败绩死之

【先是滁州溃贼北趋凤阳漕臣朱大典遣总兵官杨御蕃以重兵御之贼不敢犯转攻寿州故御史方震孺督乡勇坚守乃走颍霍陷萧县生员梁宏道戴奋翼纵四通朱道光郭复性郭复初李荷春布衣王基贞任如龙郝维聪死之复突碭山灵璧虹窥曹单总兵刘泽清拒于河贼掠考城仪封而西其东奔者为别将刘良佐所扼西走池河取间道出南冈守御刘光辉以五百人格鬪力竭赴水死一军尽歿贼袭其甲帜渡河守者不觉也既毕渡夺路走总兵杜宏域自浦口驰追之不及遂折入归德祖大乐邀击之贼乃北向开封陈永寿败之朱仙镇贼走登封与伊嵩贼合汤九州期左良玉夹剿良玉半道归九州以孤军千二百人由嵩县深入贼屡败穷追四十余里悞入深崖遇贼数万据险攻围九州势不敌夜移营为贼所乘遂战歿灵象昇开九州军覆贼已分趋裕州南阳乃合祖宽祖大乐罗岱兵驰击贼于七顶山殲李自成精骑殆尽次师南阳令大乐备汝宁宽备邓州而躬率诸军蹙贼遣使告湖广巡抚王梦尹郧阳抚治宋祖舜曰贼疲矣东西邀击前阻汉江可一战殲也两人竟不能御贼遂自光化潜渡汉入郧象昇遣总兵秦翼明副将雷时声由南漳谷城入山击贼宽等骑军不利阻隘副将王进忠军譁罗岱刘肇基兵多逃追之则弯弓内向象昇乃调川兵搜捕均州贼是时楚豫贼及迎祥等俱在秦楚蜀之交万山中象昇自南阳趋襄阳进兵贼多兵少而河南大饥饷乏适兵益汹汹洪承畴及象昇议关中平旷利骑兵移祖宽兵入陕而襄阳均州宜城谷城上津南漳环山皆贼象昇渡浙河而南追贼至郧西贼分窜山谷迄不能平】质实【碭山秦碭县後汉碭山明属徐州本朝雍正十一年升徐州为府县仍属西池河在贵池县西五里一名贵池亦曰杜坞河北流过镇山入江登封唐改嵩阳县置明属河南府今因之七顶山亦曰七峯山在裕州北宜城汉县明属襄阳府今因之汤九州官昌平副总兵崇祯八年春被劾褫官从军自劾既战歿从孙文琼伏阙三上书请恤不报刘肇基字鼎维辽东籍赣榆人本朝乾隆四十一年追諡九州忠烈梁宏道等并入祠】

寧夏兵乱杀巡抚王楫

【寧夏兵苦饥楫不能措饷兵噪而杀之副使丁启睿捕斩首恶六人乱乃定】质实【王楫泰安人丁启睿永城人】

以武举陈启新为给事中

【启新上书言天下有三大病士子作文高谈孝弟仁义及服官恣行奸慝此科目之病也国初典史授都御史秀才授尚书嘉靖时犹三途并用今惟一途一举进士横行放诞此资格之病也旧制给事御史教官得为之今惟用进士知县监司郡守承奉不暇此行取考选之病

也请停科目罢行取考选以除积弊蠲灾伤田赋以苏民困专拜大将以便宜行事帝大悦擢吏科给事中朝士深恶之纷然谕劾帝皆不听後启新以受赃匿丧削籍下抚按追赃竟逃去】质实【陈启新淮安人】

三月延绥总兵官俞冲霄击李自成于安定败绩死之【贼既潜渡汉江留其党屯郾襄山谷间而高迎祥李自成分道再入陕迎祥趋兴安汉中自成突商雒走延绥犯巩昌北境诸将左光先曹变蛟破之自成奔还县未几官军败于罗家山尽亡士马器仗贼南出安定俞冲霄纵兵击之战竟日斩获多乘胜逐北贼伏起冲霄持矛冲哭贼来益衆围之数重援兵絶遂残于阵自成势复振进围绥德欲东渡河山西兵遏之复西掠米脂呼知县边大绶曰此吾故乡也勿虐我父老将袭榆林为贺人龙所败河水骤长贼淹死甚衆乃改道从韩城而西】质实【罗家山在庆阳府正宁县东罗川水出焉隋时名县曰罗川以此俞冲霄靖边卫人边大绶任邱人本朝乾隆四十一

年追諡冲霄忠烈】

夏四月我

太宗文皇帝建国号曰大清改元崇德元年

【我太宗文皇帝纘承丕绪励精图治规模宏远伐叛抚降人心】

【向附于是诸贝勒大臣外藩蒙古贝勒台吉及满洲蒙古汉人文武各官捧表上】

【皇上承天眷佑应运而兴爱育羣黎辑寧诸国逆者以兵威之顺者以德抚之征服朝鲜混一蒙古更获玉玺符命昭然请上尊号曰】

【寬温仁圣皇帝太宗初未允从臣工固请再三始】

【俞所请乃于是月十一日祭告天地】

【太庙筑坛于德盛门外即皇帝位建国号曰大清改元为崇德元年时制度大备营

建天坛】

【太庙悉如典礼复定宫殿名正殿为崇政殿後为清寧宫东为翔凤楼西为飞凤阁大殿为笃恭殿建制壮丽百司官舍以次备列】质实【元代传国玺初元顺帝北迁携玺至应昌寻失之越二百余年有牧羊于山冈下者见一山羊三日不啮草时以蹄触地牧者发之遂得玺归于元裔博硕克图汗後复归于林丹汗及林丹汗西奔图白忒其子孔果尔额哲自托里图来降额哲母乃以玺献璠璣为质交龙为钮文曰制诰之宝盖汉篆也德盛门

盛京城周九里三百三十二步门八南之左曰德盛南之右曰天裕北之】

【东曰福胜北之西曰地载东之南曰抚近东之北曰内治西之南曰怀远西之北曰外攘】

【天坛在德盛门外四周一百一十丈南面三门东西北三面各一门太庙在抚近门外门南向东西广三十五丈南北袤四十丈大门三楹东西角门二前殿三楹正殿五楹後寝

六楹】

罢大学士钱士升削御史詹尔选籍

【时体仁以刻核导帝上下嚣然士升因撰四箴以献大指谓寛以御衆简以临下虚以宅心平以出政其言深中时病帝优旨报闻而意不恠有武生李璉者请括江南富户令报名输官行首寔籍没之法士升恶之拟旨下刑部逮问帝不许体仁遂改轻拟士升曰此乱本也当以去就争之乃疏言自陈启新言事擢置省闕比来借端幸进者实繁有徒然未有诞肆如璉者也其曰缙绅豪右之家大者千百万中者百十万以万计者不能枚举臣不知其所指何也就江南论之富者数亩以对百计者什六七千计者什三四万计者千百中一二耳江南如此何况他省且郡邑有富家固贫民衣食之源也地方水旱有司令出钱粟均赈济饥一遇寇警令助城保守御富家未尝无益于国周礼荒政十二保富居一今秦晋楚豫已无寧宇独江南数郡稍安此议一倡无赖亡命相率而与富家为难不驱天下之民胥为流寇不止报曰即欲沽名前疏已足致之母庸汲汲前疏谓四箴也士升惶惧引罪乞休帝即许之于是御史詹尔选上疏曰辅臣因咎求黜遂奉回籍之谕夫人臣所以不肯言者其源在不肯去尔辅臣肯言肯去臣寔荣之独不能不为朝廷惜此一举也璉以非法导主上其端一开大乱将至辅臣忧心如焚忽奉改拟之命遂】

【尔执奏陛下方嘉许不暇顾以沽名责之人主不以名誉鼓天下使其臣尸位保宠亦非必国家利况今日所行一切皆苟且之政当局者或拊心愧恨旁观或对衆歔歔辅臣不过偶因一事代天下发愤耳而竟鬱鬱以去恐後之大臣无复有敢言者矣大臣不敢言而小臣愈难望其言矣所曰与陛下言者惟苛细刻薄不识大体之徒似忠似直如狂如痴售则挺身招摇败则潜形遁窜骇心志而燭耳目毁成法而酿隐忧天下事尚忍言哉疏入帝震怒召见武英殿诘之曰辅臣之去前旨甚明汝安得为此言对曰陛下大开言路辅臣乃以言去国恐後來大臣以言为戒非求言意帝曰建言乃谏官事大臣何建言对曰大臣虽在格心然非言亦无由格大臣止言其大者决无不言之理大臣不言谁当言者帝曰汝言一切苟且之政何者为苟且对曰加派帝曰加派因贼未平贼平何难停汝尚有言乎对曰搜括抽扣亦是帝曰此供军国之用非输之内帑汝更何言对曰即捐助亦是帝曰本令?捐者听何尝强人时帝声色俱厉左右皆震慑而尔选词气不挠帝命锦衣提下尔选叩头曰臣死不足惜陛下听臣事尚可为即不听亦可留为他日思帝愈怒罪且不测诸大臣力救乃命繫于直庐下都察院议罪止论停俸复令吏部同议请镌五级以褫职用复不许乃削籍归自後言者屡荐皆不听】质

实【詹尔选字思吉抚安人】

六月林钐卒以孔贞运贺逢圣黄土俊并为礼部尚书兼东阁大学士预机务

【逢圣性廉静初官翰林湖广建魏忠贤生祠或传上梁文出逢圣手忠贤诣谢逢圣曰无之借衔陋习耳翌日遂削籍帝即位召还至是与贞运黄土俊俱入阁三人皆不能有所匡益】质实【孔贞运句容人至圣六十三代孙也贺逢圣字克繇江夏人黄土俊广东顺德人】

秋七月

大清兵入塞

【大清兵入喜峯口巡关御史王肇坤拒战败还保昌平与总兵官巢丕昌户部主事王一桂赵悦摄知州事保定通判王禹佐分门守城破肇坤被四矢两刃而死丕昌出降一桂悦禹佐及判官胡惟忠吏目郭永学正解怀亮训导常时光守备咸贞吉皆死之禹佐佐子亦从父死一桂妻妾子女暨家衆二十七人悉赴井死未几大清兵攻顺义知县上官荇与游击冶国器都指挥苏时雨等拒守城既下荇自经国器时雨及训导陈所蘊皆死寻下宝坻知县赵国鼎主簿樊枢典史张六师训导赵士秀皆死下定兴教谕熊嘉志在籍太常少卿鹿善继知州薛一鶚殉节死下安肃知县郑延任与妻同殉教谕耿三麟亦死之下大城知县武维周中流矢死下雄县安州知州崔维崱巷战触阶死妻牟氏子妇陈氏自缢雄县布衣唐中颢依八旬父弗去亦死时都城戒严诏徵诸镇入援给事中王家彦以陵寝震惊劾兵部尚书张凤翼坐视凤翼惧自请督师命与中官罗维寧宣大总督梁廷栋相犄角然皆不敢战言官交章论凤翼廷栋两人益惧度解严後必罹重谴日服大黄药祈死而已】质实【定兴金析范阳黄村地置安州宋顺安军金置葛城县为安州治明洪武初省县入州寻改州为县十四年复为州与定兴并属保定府今因之王肇坤字亦资兰谿人赠大理卿王一桂黄冈人与赵悦并赠太仆少卿王禹佐萧山人胡维忠徽州人上官荇曲沃人治县廉执有声赵国鼎山西乐平人熊嘉志滦州】

【人鹿善继字百顺家于定兴县之江村父正苦节自砺远近称鹿太公善继入扞城以死家人奔告太公太公曰吾儿素以身许国今果然何憾事闻赠大理卿諡忠节勅有司建祠薛一鶚字百当原官兰州知州郑延任临清人耿三麟灵壽人武维周太谷人崔维崱平度州人本朝乾隆四十一年追諡王肇坤王一桂忠烈赵悦王禹佐咸贞吉上官荇冶国器苏时雨赵国鼎薛一鶚郑延任武维周崔维崱节愍胡维忠等并入祠】

陕西巡抚孙傅庭击高迎祥于盩厔擒之送京师伏诛【先是关中贼过天星九条龙等屡为总兵官柳绍宗左光先所败穷蹙乞降陕西巡抚甘学濶受之寘其衆数万人于延安寻出劫掠如故秦之士大夫譁于朝乃推边才用傅庭以是年三月受代傅庭沈毅多筹畧既蒞秦严微发期会一从军兴法贼首整齐王据商雒诸将不敢攻檄副将罗尚文击斩之以迎祥于贼中最强躬督贺人龙等剿之盩厔大破其衆于黑水峪迎祥就擒并缚其伪领哨黄龙总管

刘哲等献俘阙下磔死关中贼稍慑而贼党之窜郿襄者常乘间突入豫犯荥阳杀知县王恒言总兵官解进忠抚之浙川被杀然亦屡挫衄及罗象昇既北去苗胙土巡抚湖广不习兵张献忠乃约马守应诸贼以二十万衆自均州新安唐县分道犯襄阳总兵秦翼明兵寡不能御贼部四出剽掠而应城旋告陷方贼之攻应城也知县张绍登及教谕李之经训导张国勋乡官饶可久徐晤可悉力御之国勋曰贼不一创城不易守率壮士出冲击力战一日夜斩获甚衆贼去邑有侍郎王城子权结怨于族党怨家潜导贼复来攻国郎佐绍登力守乞援于上官副将邓祖禹赴救守西南国勋守东北绍登往来策应会贼射书索权权惧斩北关以出贼乘间登南城绍登还署端坐堂上贼至奋拳击之羣贼大至被杀纵火焚文庙投国勋烈焰中祖禹之经可久晤可皆不屈死侍郎城亦被磔是时湖广震动献忠欲乘势窥仪淮遂合守应等沿江南下而关中贼复推李自成闯王连犯阶徽汧陇凤翔于是自成献忠分寇西南各相雄长矣】质实【黑水峪一名芒谷在盩厔县东南应城刘宋析安陆县置明洪武初省入云梦寻复置属德安府今因之孙傅庭字伯雅代州振武卫人王恒言慈谿人治邑有惠政贼逼境城守援絶胁降不屈死张绍登字振夫南城人赠尚宝少卿李之经永兴人张国勋黄陂人赠国子监学正饶可久初知大兴县後历知府艰归贼入语妻程氏曰臣死忠妇死节分也妻女相对自经可久被执不屈死徐晤可官锦衣百户邓祖禹蕲水人本朝乾隆四十一年追諡邓祖禹忠烈张绍登王城烈愍解进忠王恒言饶可久节愍李之经等及固始布衣朱曜麟游贡生杨世谦生员杨四可入祠曜率乡勇杀贼手馘数十人陷伏被执骂贼死四谦四可以父被贼执兄弟争代死皆遇害事并在是年】

谕廷臣助饷

【未几又括勋戚文武诸臣马开银铁铜铅诸矿】

八月唐王聿键起兵勤王废为庶人锢之

【先是流贼起王鐸金筑南阳城又援潞藩例乞增兵三千人不许至是京师戒严王倡义勤王将抵开封诸大吏惴恐集议曰留之不听行守上者且得罪杞县知县申佳允曰惟周王可留之衆称善用其议聿键乃止不行寻下诏切责勒还国事定下部议废为庶人幽之凤阳】质实【周王恭?定王櫓十世孙万历十七年封世子既而袭封申佳允字孔嘉永年人】

发明【明制亲藩不掌兵士卒莅王府者不过备护卫而已然此谓国家无事之日若京师戒严倡义勤王正与国同休戚之义特恐蕞尔之区兵力微弱无益于事耳顾大吏惟以守土者得罪为恐宛转议留悉出私意朝廷复下诏切责勒使归国率下部议且以举兵为罪废黜幽系举措不几倒置乎揆厥所由大抵监宗藩擅兵虑其乘间为非耳夫既分封世土欲其屏藩王室而一举动间防闲备至虽以勤王为国而犹必加之罪然则封建之无益于人国信矣夫】

我

大清兵东归

九月以卢象昇总督宣大山西军务

【象昇举诏入卫至已解严会梁廷棟卒命代为总督宣大素苦缺饷象昇乃大兴屯利行二年积谷至二十万帝谕九边奉以为式】

冬十月削前工部侍郎刘宗周籍

【宗周既还朝擢工部右侍郎上痛愤时艰疏畧言陛下銳意求治而二帝三王治天下之道未暇讲求施为次第犹多未得要领者首属意于边功既而袁崇焕遂以五年恢复之说进是为祸胎己巳之役谋国无良朝廷始积轻士大夫之心自此耳目参于近侍腹心寄于干城治术尚刑名政体归丛脞天下事日坏而不可救廩卫司讥察而告讐之风炽诏狱及士绅而堂廉之等夷人人救过不给而欺罔之习转甚】

【事事忤成独断而谄谀之风日长三尺法不伸于司寇而犯者日衆诏旨杂治五刑岁躬断狱以数千而好生之德意泯刀笔治丝纶而王言褻诛求及琐屑而政体伤参罚在钱谷而官愈贪吏愈横赋愈逋敲扑繁而民生瘁严刑重斂交困而盗贼日起总理任而臣下之功能薄监视遣而封疆之责任轻督抚无权而将日懦武弁废法而兵日骄将懦兵骄而威令并穷于督抚朝廷勒限平贼而行间日杀良民报功生灵益涂炭一旦天牖圣衷撤总监之任重守令之选下弓旌之招收酷吏之威布维新之化方与二三臣工洗心涤虑以联泰交而不意君臣相遇之难也得一文震孟而以单辞报罢使大臣失和衷之谊得一陈子壮而以过戇坐辜使朝宁无吁咈之风此关于国体人心非浅陛下必体上天生物之心以敬天而不徒倚风雷必念祖宗监古之制以率祖而不轻改作以简要出政令以寬大养人才以忠厚培国脉发政施仁收天下泮涣之人心而且还内廷扫除之役正儒帅失律之诛慎天潢改授之途遣廷臣齎内帑巡行州县为招抚使赦其无罪而流亡者陈师险阻以诛贼梁则寇患可消天下幸甚疏入帝怒甚谕阁臣拟严旨再四每拟上帝辄手其疏复閱起行数周已而音解降旨诘问谓大臣论事宜体国度时不当效小臣归过朝廷为名高且獎其清直焉时太仆缺马价有诏愿捐者听体仁等皆有捐助又议罢明年朝覲宗周以输貲免覲为大辱国帝虽不悦心善其忠益欲大用体仁患之募山陰人许瑚疏论之谓宗周道学有余才謂不足帝以瑚同邑知之宜真遂已不用宗周三疏请告去至天津闻畿辅被兵遂留养疾事稍定乃上疏曰自己巳之变小人以门户修怨异己者槩坐以袁崇焕党日造蜚语次第去之于是小人进而君子退中官用事而外廷浸疏文法日繁欺罔日甚朝制日隳边防日坏今日之祸实己巳以来酿成之也且以张凤翼溺职中樞也而俾之专征何以服王洽之死以丁魁楚等之失事于边也而仅责之戴罪何以服刘策之死诸镇勤王之师争先入卫者几人不闻以逗遛蒙诘责何以服耿如杞之死廷臣之累累若若可幸无罪者亦何以谢韩爌李邦华诸臣之或戍或去岂昔为异己驱除今不难以同己相容隐乎臣以是知小人之祸人国无已时也昔唐德宗谓羣臣曰人言庐杞奸邪朕殊不觉羣臣对曰此乃杞之所以为奸邪也臣每三覆斯言为万世辨奸之要故曰大奸似忠大佞似信频年以来陛下恶私交而臣下多以告讐进陛下録清节而臣下多以

曲谨容陛下崇励精而臣下奔走承顺以为恭陛下尚综核而臣下琐屑吹求以示察凡若此者正似忠似信之类究其用心无往不出于身家利禄陛下不察而用之则聚天下之小人立于朝有所不免矣天下即乏才何至尽出中官下而陛下每当缓急必委以大任三协有遣通津临德有遣又重其体统等之总督置总督于何地总督无权置抚按于何地是以封疆尝试也且小人每比周小人以相引重君子独岸然自异故自古有用小人之君子终无党比小人之君子陛下诚欲进君子退小人决理乱消长之机犹复用中官参制之此明示以左右袒也有明治理者起而争之陛下即不用其言何至并逐其人而御史金光辰竟以此逐若惟恐伤中官心者尤非所以示天下也至今日刑政之最舛者成德介吏也而以赃戍何以肃惩贪之令申绍芳十余年监司也而以莫须有之鑽刺戍何以昭抑竞之典郑鄮之狱或以诬告坐何以示敦伦之化此数事者皆为故辅文震孟引绳批根即向日驱除异己之故智而廷臣无敢言陛下亦无从知之也八年之间谁秉国成而至于臣不能为首揆温体仁解矣语曰谁生厉阶至今为梗体仁之谓也疏奏帝大怒体仁又上章力诋遂斥为民】质实【陈子庄字集生南海人累官礼部侍郎庄烈帝以海内多故思广罗贤才下诏援祖训郡王子孙文武堪任用者得考验授职子壮虑为民患极言不可会唐王聿健上疏历引前代故事诋子壮遂除名下狱坐赎徒归明永明王由榔立于肇庆授子壮东合大学士兼兵部尚书】

【大兵下高明子壮被执受戮死明永明王赠子壮番禺侯諡文忠 本朝乾隆四十一年追諡忠简金光辰字居垣全?人时庄烈帝遣中官总监通津临德等处兵马粮饷而意颇讳言之光辰疏请罢遣帝怒召对平台风雨骤至侍臣立雨中至以袖障溜帝责光辰光辰对曰皇上以文武诸臣无实心任事委任内臣臣愚以任内臣诸臣益弛卸不任帝大怒声色俱厉将重谴光辰而迅雷直震御座风雨声大作光辰因言臣往在河南见皇上撤内臣而喜语未终帝沈吟即云汝言毋复尔然意亦稍解翼日诏光辰镌三级调外人谓光辰有天幸云成德字允升霍州人以进士除滋阳知县性刚介清操絶俗疾恶若讐尝语刺温体仁体仁闻而恨之兖州知府增饷额德固争又尝捕治其牙爪吏知府怒谗于御史禹好善好善体仁客也诬德贪虐逮入京滋阳民诣阙讼冤阁臣文震孟亦为之称枉德道中具疏极论体仁罪而震孟已被体仁排挤去好善再劾德言其疏出震孟手帝不之究德母张氏伺体仁长安街绕舆大骂拾瓦砾掷之体仁恚疏闻于朝诏五城御史驱逐移德镇抚狱掠治杖六十午门外戍边坐贼六千有奇而给体仁校尉五十人以护出入】

发明【温体仁当国既久劾者章不胜计而刘宗周之疏尤为深切着明庄烈素知宗周清直前此痛愤时艰一疏虽怒甚旋即竟解何以一劾体仁即至立予削藉体仁素患宗周之见用急欲使之去位而宗周复屡以戇直见忤于是乘上之怒而媒孽之观其甫被宗周之劾而即上章力诋盖惟恐其君之一悟而去之不速也小人嫉贤以自固其宠何所不至独惜庄烈忧勤治理慨然思得非常之材而举措听荧贞邪易位有一宗周而不能用任一体仁而不知悟转移颠倒以抵于亡其果谁之咎欤】

御定资治通监纲目三编卷三十六

卷三十七

钦定四库全书

御定资治通鉴纲目三编卷三十七

【起丁丑明庄烈崇祯十年尽己卯明庄烈崇祯十二年】凡三年

【丁丑】十年春正月辛丑朔日有食之

贼犯安庆

【张献忠既纠罗汝才诸贼自襄阳顺流东下烽火达淮扬南京兵部尚书范景文操江都御史王道直总兵官杨御蕃分泛固守安池道副使史可法驰驻太湖扼贼冲贼从间道突安庆石牌口连营百里巡抚张国维告警诏左良玉马爌刘良佐合兵援之贼转犯桐城掠四境知县陈尔铭婴城守贼走庐江犯潜山可法与左良玉败之枫香驿三战皆捷马爌刘良佐亦屡败贼于桐城庐州六安贼窜入潜山之天堂寨国维檄良玉搜山良玉不应放兵掠妇女屯舒城月余竟北去贼乃复出太湖副将潘可大程龙守备陈于玉等率兵四千余御之酆家店贼先犯可大营龙等至夹击之贼多死夜复至中伏亦败去寻贼众数万大至围数重诸将突击颇有杀伤可法偕副将许自强驰救扼于贼发大礮遥为声援诸将亦呼噪突围会天雨甲重不得出贼四面冲入营将士短兵接战可大战死龙引火自焚于王手执大刀左右杀贼伤重力竭北面叩头自刎守备詹兆鹏莫是骅詹世龙千户王定远百户薛自昌王鸿猷武举陆天猷等皆遇害士卒晚者仅千余人贼遂分屯其众于桐城之练潭石井陶冲总兵官牟文绶刘良佐击败之挂车镇贼乃四走献忠入湖广是时江北震动与可大等先後殉节者有罗田守将郭金城龙江都司王寅泗州守备陈正亨苏州卫指挥同知包文逵天堂寨巡检吴畅春潜山乡官江襟楚生员陈贞申义民张清雅陈廷选江之璞萧县乡官任之豪桐城生员尹秋桐吴晋昭左旋左光灿义民姚孙极王夷吾赵之艺陈力均儒士笪光宏等贼党分扰楚豫随州知州王焘邓州知州孙泽盛同知薛应龄上津知县屠绍皋守备寇士元郢西知县刘元伯澠池知县李遇林广济典史魏时光皆以守城死参将范志骠裨将李春贵以扞贼开封死攸县举人陈来学蕲水武举程为常偕邑人徐至兰蔡巨人胡方壶徐用极沈邱义民王继东以御贼死上蔡生员张址曹震南赵应选李思选周爽彭凌碧葛祥生等并以被执骂贼死】质实【石牌口在怀宁县西百里上达潜太宿望四县即宋樊若水试舟处也枫香驿在宿松县北五十里天堂寨在潜山县西北一百里天堂山酆家店一名酆坂在宿松县西三十里练潭镇在怀宁县北接桐城县界石井山在桐城县西二十里陶冲驿在桐城县西南四十里挂车镇在桐城县西三十里挂车山下攸县汉置元升州明洪武初复为县属长沙府蕲水刘宋置唐移治于浠水县明属黄州府今并因之潘可大江宁人程龙歙县人詹兆鹏婺源人莫是骅詹世龙皆苏州人王定达镇江人薛自昌武进人王鸿猷为贼所执锯齿断足骂不绝声死陆王猷宿松人杀贼过当贼裔分其肉死郭金城四川人贼犯罗田率所部五百人战斩级百余追至英山贼大集困三日突围不得出被执胁降不从见杀王寅钱塘人调守泗州陵贼将来

犯寅曰贼衆我寡及其未集可破也卷甲疾趋至吁?斩其前锋一人战自午至申贼来衆与陈正等?阵死包文达苏州人击贼宿松陷伏死吴畅春汉阳人贼犯潜山练乡兵御贼斩获甚多屡却贼贼再至死守力竭被执不屈自刎死江襟楚官琼州通判罢归贼轨之不屈死张清雅据父棺哀泣贼断其手子超艺年十六求代贼复斫之俱死仆云济不食死陈廷选负母谢氏避草间为贼所执请代母死贼杀之而拾其母妻亦殉之任之豪官苏州府教授罢归贼?萧县殉节死尹秋桐见贼杀其母奋身击贼被害吴晋昭聚乡兵扞贼相持十日格鬪死子先璘先子妇李氏许氏同死王焘字清仲崑山人由教谕历随州知州州经羣盗焚掠户不满千焘训民兵缮守具土寇李良乔为乱殲滅之及流贼奄至焘且守且战击斩三百余人贼攻益力相持二十余日天大风雪守者多散焘知必败入署整衣冠自经则焚其署火独不及焘死所屍直立不仆贼望见骇走已覓州印得之焘所立尺土下事闻赠太常少卿明福王时赐谥烈愍建双忠祠与同邑蔡懋德并祠孙泽盛掖县人薛应龄福清人贼?邓州同战死屠绍臯宁国人寇土元上津人有膂力由诸生荐授守备与绍臯守城城陷力战死李迈林完县人魏时光南昌人善舞双刀崇祯九年夏为广济典史邑遭残破长史设排兵三百人委之教练其冬贼据蕲州河口惮时光不敢渡时光益募死士夜袭具营手杀数贼贼不敢逼及是贼大至步卒皆散时光单骑据高坡又杀贼数人贼环统之鞫断被执不屈死其兄陈于上官却不奏兄愤发病死友人收殮之哭尽哀曰弟为国死兄为弟亡吾独不能表暴之乎具牒力陈乃奏闻赠广济主簿予恤典范志驃虞城人流贼攻开封奉调督剿战败被执不屈死本朝乾隆四十一年追谥濬大可忠烈程龙陈于王詹兆鹏莫是骅詹世龙薛自昌王鸿猷郭金城王寅陈正亨包文达吴畅春范志驃魏时光李春贵烈愍江襟楚王焘孙泽盛屠绍臯冠士元刘元伯李迈林节愍王定远等并入祠】

二月我

大清下朝鲜

【先是我大清往征朝鲜攻克义州安州进薄平壤国王李倬遣其弟觉求和许之既而朝鲜复屡背约陰持两端我太宗文皇帝既受尊号】

【宣谕羣臣皆行三跪九叩礼惟朝鲜使臣罗德宪李廊不拜太宗谕曰朝鲜使臣无礼是皆其国主有意构怨欲朕先后衅端戮使臣耳救之勿问寻倬申诚边臣有弃好修

备语为我使臣所得以闻因颁书诘责倬且】

【谕其使臣曰尔王若自知悔罪当送子弟为质不然朕即举大军以临尔境虽悔何及倬卒负固不悛我太宗亲统大军征之先遣大臣马福塔等率兵三百为贾人装往围其国都倬遣将以精兵拒战悉斩之倬惧率其长子?及官吏遁南汉山城而令次子湔三子?携眷属窜江华岛我】

【大军径渡汉江直抵南汉城西驻营太宗环视山城形势遣户部承政英固尔岱等齎敕

往谕倥倥请和未决其国八道兵卷甲赴援皆击败之时我军礮车复至将渡临津水已解忽陰翳雨雪交作寒甚水复合遂坦然径渡太宗曰此】

【天意也谕书往复再四倥称臣乞降】

【太宗怜而许之倥犹逡巡不敢出及我偏师以飞船八十攻克江华岛王妃暨溴?等皆就获复以敕往谕之倥知妻子被执援兵皆败南汉旦夕且破乃率羣臣献上敕印筑坛于汉江东岸三田渡太宗亲临受降宥倥前罪赐宴遣归国留其子?溟为质遂班师国人感悦立碑三田渡纪思德焉方朝鲜之告急也登莱总兵官陈洪范督各镇舟师往救方出海朝鲜已下大清遣孔有德耿仲明尚可喜等攻铁山皮岛山东巡抚顔继祖闻于朝请急救洪范及总兵沈世魁坚守皮岛世魁旋战败洪范遁入石城岛副将金日观偕诸将楚继功等相持七昼夜力不支阵歿世魁亦授首皮岛遂下副将白登庸降于】

【大清有沈志科者世魁从子也索世魁敕印于监军副使黄孙茂不与志科怒杀之并杀理饷通判邵启于时石城诸岛虽有残卒不能成军朝廷亦不置大师以登莱总兵遥领之而已明年夏兵部尚书杨嗣昌决策尽徙其兵民于寧锦而诸岛一空】质实【朝鲜三田渡碑其铭曰天降霜露载肃载育惟】

【帝则之并布威德皇帝东征十万其师殷殷轰轰如虎如貔西番穷发暨失北貉执殳前驱厥灵赫濯皇帝孔仁诞降恩言十行昭回既严且温始迷不知伊戚自貽帝有明德如寐觉之我后只服相率而归匪惟畏威惟德之依皇帝嘉之泽洽礼优载色载笑爰束干矛何以锡之骏马轻裘都人士女乃歌乃讴我后言旋皇帝之赐】

【皇帝班师治我赤子哀我荡析劝我穡事金瓯依旧翠坛维新枯骨再肉寒荻复春有石巍然大江之头万载三韩皇帝之庥安州在嘉山郡之东亦属平安道南汉山城在熊津江南江华岛任开州城南海中汉江一名熊津江在国城南十里源出金刚五台二山合流入海临津一名杨花渡在汉江之滨朝鲜各道馈饷皆聚于此八道京畿江源黄海全罗庆尚忠清咸镜平安也】

【三田渡在汉江上游石城岛在宁海县东一百八十里沈世魁本市倅其女有殊色为毛文龙小妻倚势横行岛中冒功至副总兵崇祯六年黄龙殉节遂代为总兵官金日观浦江人以前守马兰峪功加都督同知旋进左都督移莱州副总兵殉节後赠特进光禄大夫太子太师世廕锦衣副千户建祠黄孙茂广昌人杨嗣昌字文弱陕西总督鹤之子本朝乾隆四十一年追谥金日观楚继功烈愍黄孙茂节愍】

三月起杨嗣昌为兵部尚书

【嗣昌初以兵部侍郎总督宣大山西军务请开金银铜锡矿以解散贼党屡疏陈边事规画称旨帝异其才旋丁父忧复遭继母丧在藉会尚书张凤翼卒帝顾廷臣无可任者乃起嗣

昌为之嗣昌博涉文史多识先朝故事有口才至是抵京召对帝以为能所奏请无不从曰恨用卿晚嗣昌议大举平贼以陕西河南湖广江北官军为四正责其分剿专防延绥山西山东江南江西四川为六隅责其分防协剿谓之十面之纲总督总理二臣随贼所向征讨因议增兵十二万增饷二百八十万措饷之策有四曰因粮因旧额量加亩输六合石折银八钱伤地不与岁得银百九十二万九千有奇曰溢地土田溢原额者核实输赋岁得银四十万六千有奇曰事例富民输贖为监生曰驿递前此邮驿裁省之银以二十万充饷议上帝下诏有暂累吾民一年除此腹心大患语改因粮为均输布告天下寻以贼攻浙川左良玉拥兵不救山西总兵官王忠援河南称疾不进兵噪而归嗣昌请还戮失事诸帅以肃军令遂逮忠及故总兵官张金昌府法司并谪戍惟左良玉以枫香驿破贼功戴罪自赎】

夏四月以熊文灿为兵部尚书兼都察院右副都御史总理南畿河南山西陕西湖广四川军务

【文灿官闽广久积赀无算厚以珍宝结中外权要谋久镇岭南帝未识其为人因遣中使假广西采办名往覘之既至文灿甚有赠遣留饮十日中使喜话及中原寇乱文灿方中酒击案骂曰诸臣误国耳若文灿往诘令鼠辈至是中使起立曰吾非往广西采办也街上命覘公公信有当世才非公不足办贼吾今还公旦夕且召文灿出不意悔失言随言有五难四不可中使曰吾见上自请之若上无所吝即公不得辞矣文灿词穷应曰诺中使还朝果言于帝初文灿自贵州徙家薪水与邑人姚明恭为婣妮明恭官詹事与杨嗣昌相善嗣昌握兵柄得帝眷以帝急欲平贼冀得一人自助明恭因荐文灿且曰此有内援可引也嗣昌遂荐之时侍郎王家桢代卢象昇讨贼已半载矣贼尽锐趋江北留都震惊家桢未尝一出中州又不能战下家丁鼓噪至纵火烧开封西门家桢夜自外归慰谕犒赏诘旦发往南阳讨土寇杨四以去言官争劾家桢恇怯帝亦以家丁之变心轻之遂命家桢专抚河南而以文灿代家桢为总理文灿拜命即请左良玉所将六千人为己军而大募粤人及乌蛮精火器者一二千人以自护弓刀甲冑甚整比抵安庆良玉桀骜不受节制其下与粤军不和大诟文灿不得已遣还南兵然良玉军实不为用嗣昌言于帝乃以边将冯举苗有才兵五千人隶焉当是时嗣昌建四正六隅之策增兵饷大半期灭贼贼颇惧文灿顾决计招抚刊檄徧悬通都曰心示诸家贼待以不死帝闻之怒严旨譴责嗣昌乃曲为之解曰网张十面必以河南陕西为杀贼之地然陕有李自成惠登相诸剧贼未能剿绝法当驱关东贼不使合而使陕抚扼商雒郢抚扼鄢襄安抚扼英六凤抚扼亳颍应抚之军出灵陕保抚之军度延津然後总理率边兵孙文元等车禁旅豫抚率陈永思诸军并力合剿若关中贼逸出关东则秦督率曹变蛟等出关协击巡抚不用命立解其兵柄简一监司代之总兵不用命立夺其帅印简一副将代之监司副将以下悉以上方鉏从事则人人効力何贼不平乃克期三月平贼帝可其奏嗣昌复言于帝曰熊文灿甫任事洪承畴七年不效论者绳文灿急而承畴纵寇莫为言帝知嗣昌有意左右之变色曰督理二臣但责成及时平贼奈何以久近藉口嗣昌乃不敢言文灿既持抚议所加饷悉捐以抚贼帝不复诘廷臣亦不敢言之已而灭贼踰期帝令嗣昌察行间功罪嗣昌请削承畴官保尚书以侍郎行事总兵曹变蛟左光北贬五秩与祖大弼期五月平贼终右文灿置不议而文灿实不知兵谓抚必可恃嗣昌亦陰主之所请无不曲遂不复言十面张网之策矣】质实【王家桢长垣人扬四舞阳剧盗也初四与其党郭三海侯驭民降于河南巡抚陈必谦寻复叛後南

阳同知万年策与监纪推官汤开达诸将左良玉牟文绶等连破四四焚死其党亦为请将所擒诛云】

六月温体仁罢

【体仁在阁八年流寇躡畿辅扰中原民生日困未尝建一策惟日与善类为仇其所引与同列者皆庸材苟以充位且藉形已长固上宠帝每访兵饷事辄逊谢曰臣夙以文章待罪禁林上不知其弩下擢至此位盗贼日益衆诚万死不足塞责顾臣无知但票拟勿欺耳至於兵食之事惟圣明裁决有诋其窥帝旨者体仁言臣票拟多未中窾要每经御笔批改顾服将顺不暇詎能窥上旨帝以为朴忠愈亲信之官至少师兼太子太师吏部尚书中极殿大学士阶左柱国兼支尚书俸恩礼优渥无与比而体仁专务刻核迎合帝意前二年春帝以凤阳陵寝之变下诏寛恤在狱诸臣吏部以百余人名上体仁靳之言于帝仅释十余人秋决论囚帝再三诘问体仁畧无平反陕西华亭知县徐兆麟泣任甫七日以城陷论死帝颇疑之体仁不为救竟弃市帝忧兵饷急体仁惟倡衆助马修城而已所上密揭率报可体仁自念排挤者衆恐怨归已倡言密勿之地不宜宣泄凡阁揭皆不发并不存录阁中冀以灭迹以故所中伤人廷臣不能尽知当国久先後论劾者不可胜计布衣杨光先上书极论其罪至輿櫟待命帝皆不省愈以为孤立斥责言者或张采等倡为复社与东林相应和太仓人陆文声者输贄为监生求入社不许会体仁亦憾溥方募人劾溥文声遂诣阙言风俗之弊皆原于士子溥采倡复社乱天下体仁欲兴大狱拟严旨治以提学御史倪元珙副使冯元扬不承风旨皆降谪之苏州推官周之夔坐不谨罢去私计撼复社逢执政意可冀幸复官因溥等把持计典罢职实其所为章下巡抚张国维言之夔去官无与溥事体仁拟旨譙让国维株连不已者且七年于是奸人张汉儒窥体仁衔东林甚夤缘入其门下相与定密谋乃抗章讦钱谦益瞿式耜居乡不法体仁从中主持之逮二人下诏狱严讯国维及巡按路振飞交章白其冤不听谦益危甚求解于司礼大监曹化淳化淳故与王安善德谦谥尝为安作碑文颇为营解汉儒侦知之告体仁体仁密奏帝请并坐化淳罪帝以示化淳化淳惧自请案治乃尽得汉儒等奸状及体仁密谋狱上帝始悟体仁有党命汉儒等立枷死体仁佯引疾意帝必慰留及得旨竟放归体仁方食失匕箸天下闻其去皆快之然体仁虽罢其所推荐张至发薛国观之徒皆效法体仁蔽贤植党国事日坏以至於亡】质实【杨光先歙人张溥字天如张采字受先皆太仓人倪元珙上虞人冯元扬字尔赓慈谿人周之夔闽人路振飞字见白曲周人薛国观韩城人】

两畿山西江西大杆秋七月山东河南蝗大饥

【时四方灾祲踵告浙江亦大饥至父子兄弟夫妻相食给事中李汝灿言流贼冯陵以来天下财赋之区已空其半而又遇此亢旱吴楚齐豫之间赤地数千里是所未尽空者殆将尽空矣臣谓歛怨干和皆财用为之也国朝军屯之制千古称善自军额虚而议兵民始不得安其身自屯田废而议饷农始不得有其食有兵不练兵增则饷益匱有饷不核饷多则兵愈冒比者核实之使四出而掊克屡闻侵渔如故可谓有政事乎若夫辅成君道尤在相臣今乃此瞻彼顾结党徇私八九年来召灾酿变始于端揆积于四海水旱盗贼频见叠出势将未已何怪其然帝下汝璨狱】质实【李汝璨字用章南昌人】

以史可法为右佥都御史巡抚安庆庐州太平池州【总理熊文燦专主抚贼贼益狂逞盘互江北应天巡抚张国维见贼势日炽请于朝割安庆庐州太平池州四府别设巡抚遂擢可法任之令兼辖河南之光州光山固始罗田湖广之蕲州广济黄梅江西之德化湖口诸县提督军务设额兵万人安庆之设巡抚自此始也可法甫拜命贼已东陷和州含山定远六合天长分掠瓜州仪真乘势犯盱眙县故无城知县蒋佳徵豫策贼必至训民为兵设伏要害亲率兵往诱贼殲甚衆贼怒环攻之力战死母闻之亦投繯死在良玉闻江北警顿兵不肯救令河南士大夫合疏留已帝知出良玉意不能夺而贼亦遂自盱眙转趋河南时河南被贼害者三年矣夹河千里无炊烟关府市集皆虚残黎伏丰草深林采野穗以食田陇间乱木槎故皆成拱把虎狼千百为羣行道路以故贼无所向则南走郢襄?东还寇江北可法遣部将汪云凤败贼潜山佥事汤开远监安庐二郡军善击贼从可法东西驰御贼稍稍避其锋】质实【德化五代时杨行密置湖口唐镇南唐升县明并属九江府今因之蒋佳徵灌阳人殉节後部议赠尚宝少卿巡抚御史言佳徵母子忠义宜从优典以植伦常乃建表忠祠并母奉祀汤开远字仲开主事显祖子也 本朝乾隆四十一年追谥佳徵忠愍】

八月以刘宇亮傅冠为礼部尚书薛国观为礼部侍郎兼东阁大学士预机务

【国观为人陰鷲谿刻不学少文温体仁因其素讐东林密荐于帝遂与字亮冠同入阁冠性简易字亮短小精悍善击劒居翰林常与家僮角逐为乐素不嗜书館中纂修直讲诸事皆不与座主钱士升在阁时力援之竟驯至柄用】质实【刘宇亮縣竹人傅冠字元甫进贤人】

冬十月李自成犯四川

【先是自成在陕偕其党过天星蝎子块寇三原官军不敢出会孙传庭督曹变蛟诸军来救连战七日皆克蝎子块降自成与过天星奔秦州时传庭与洪承畴共矢灭贼承畴战关以西传庭战关以东连破贼先後降其渠一条龙镇世王上山虎等拓养坤圣世王一翹飞诸贼皆授首小红狼围汉中承畴击走之关中贼势渐衰而自成窥四川备御单弱乘间?宁羌知州周应泰卫指挥徐大行死之遂越七盘关以十万衆分三道入蜀总兵官侯良柱御之于縣州衆寡不敌战歿广元昭化劔州梓潼江油黎雅青神皆失守劔州知州徐尚卿吏目李英俊举人杨于鼎昭化知县王时化郫县主簿张应奇金堂典史潘梦科皆死巡抚王维章方守保宁反在外不能御贼贼进攻成都七日不克乃解去分?三十余州县承畴率变蛟及贺人龙等由沔县出朝天关驰援山高道狭士马饥疲?暮抵广元贼已走还秦变蛟等还军邀击斩首五百余级贼渠号六队者与大天王混天王争管王四部连营东犯过天王混天星二部伏阶文间独自成以明年三月自洮州出番地承畴令变蛟人龙追之连战皆捷斩首六千七百有奇番地乏食贼多死变蛟人龙转战千里身不解甲者二十七昼夜余贼溃入塞祖大弼驻洮州扼战不力贼乃走入岷州及西和礼县山中】质实【昭化宋置明属保宁府今因之梓潼汉县明属劔州以隶于保宁府今改属縣州青神西魏青衣後周改青神明属眉州金堂唐置明属成都府西和宋置西和州治长道县元省县入州明洪武初改州为西和县属巩昌府今皆因之周应泰麻城人徐尚卿南平人知劔州料贼必至集士民泣曰城必不能守若輩速去吾死

此衆泣请偕去尚卿不可偕吏目李英俊举人杨于鼎分陲守闕二日城?尚卿投环死英俊从之于鼎巷战杀贼为贼支解死子令青亦同死王时化江陵人张应奇义乌人时士人以殉节闻者于鼎之外有成都贡生顾鼎弦被执不屈死

本朝乾隆四十一年追諡侯良柱忠烈徐大行烈愍周应泰徐尚卿王时化节愍余并入祠】

以太监曹化淳提督京营

【时有工部员外骆方玺者窥帝意方任中官上言陛下即位遂寘魏忠贤于大戮岂溺情阉竖者不过以外廷无一诸臣可用而借才及之况人臣感激思遇苟知邱报何论外内廷臣处地悬絶自不若宫廷?御効忠倍易凡此内臣邀兹旷典孰不欲弃捐顶踵以酬陛下疏入给事中何楷驳其通内呈身吏部请削方玺籍帝固不欲罪方玺以楷言直不可夺改从薄谪不数月即有化淳提督京营之命复以李明哲提督五军营杜勲提督神枢营阎思印提督神机营郑良辅总理京城巡抚于是中官皆布置要地矣】质实【骆方玺诸暨人】

发明【王振横而徐曦折节汪直恣而戴缙称功刘瑾专而张彩焦芳奔走逢迎之恐後迨至魏阉乱政五虎十狗之徒贄导拥戴者尤不可更仆数庄烈手翦忠贤定逆案以扫除阉党可谓卓矣无何以廷臣不职猥欲参用中官夫天下纵乏才亦何至尽出中官下而方玺乘瑕抵隙遂因此为借才之说以希风旨而贡媚貂璫是即向者徐曦戴缙之故智也何楷纠其呈身通内洵为洞烛奸邪乃不立予严惩而反改从薄墮甚至提督京营之任不旋踵而畀之化淳岂诚有感于方玺之言邪厥後甲申之变化淳实开关延贼以底灭亡所谓目不见其睫者殆庄烈之谓矣】

十二月黄士俊罢

【士俊在阁甫余一载累加少傅予告归】

【戊寅】十一年春正月裁南京冗官

【凡裁八十九员以给廩不足故也】

二月改河南巡按御史张任学为总兵官

【任学按河南见羣盗从横诸将缩胸不敢进慨然曰事不辞难臣职也贼势如此我辈可雍容坐镇邪遂上疏极诋诸将请易武阶亲执干戈为国平贼帝壮之下吏兵二部及都察院议诸臣以文史无改武职者请仍以监军御史兼总兵事帝不从命授都督佥事为河南总兵官河南旧无总兵左良玉陈永福并以客兵备援剿至是大将特设而麾下无兵兵部乃拨署镇许定国兵授之使参将罗岱为中军岱健将屡着战功任学倚以自强然所隶兵不能当贼之什一贼渠罗汝才马进忠李万庆等蹂躪中原民人据坞壁自保者数十贼悉摧破之踞息县光州磔人投汝水水为赤任学虽矢志击贼亦不能大创也】质实【张任学安岳人】

御经筵

【尚书杨嗣昌方庇熊文灿主招抚因于讲筵诵孟子善战服上刑潜帝拂然诘之曰今天下一统非战国兵争比羣盗弄兵潢池不能即扑灭奈何为是言嗣昌渐不能对乃召翰詹诸臣顾锡畴等二十余人问保举考选孰为得人庶子黄景昉言保举多私近日考选亦不公推官成勇朱天麟廉能素着乃不能与清华选少詹事黄道周言树人如树木须养之数十年近来人才远不如古况摧残之後必深加培养既复班又询之对曰立朝之才存乎心术督师之才存乎形势先年督抚未谙形势随流贼奔走事既不效辄谓兵饷不足其实戚给饷已踰十万果无冒滥无侵渔可用兵四十万何烦别筹增兵饷邪时尚书郑三俊方下吏景昉因请宥三俊帝曰三俊虽清廉何济又命诸臣各陈所见帝曰言须可行如故讲官姚希孟竟欲折漕一年误矣道周聼未审谓帝将宽三俊念希孟也遂言故辅臣文震孟一生謇直未蒙惟盖恩天下士生如三俊歿如震孟希孟求其形似未可多得帝以所对失实令回奏再奏再诘凡周道所建白未常得一俞旨然帝自经筵召对後颇知考选未当天麟得改官而三俊以孔贞运揭救旋得释】质实【顾锡畴字九畴崑山人明唐王时殉节 本朝乾隆四十一年追谥节愍黄景昉字太穉晋江人成勇字仁有安乐人以进士历饶州开封归德推官流贼攻归击走之行取入京时变考选例优者得翰林公论首勇及朱天麟而吏部尚书田唯嘉抑之勇得南京吏部主事以去庄烈帝以景昉言亲试诸臣天麟得翰林编修而勇以赴南京不与寻用御史涂必泓言授南京御史朱天麟字游初崑山人亦以进士为饶州推官有惠政贫不能行赂考选已授部曹及临轩发策乃改官郑三俊时官刑部尚书会工部钱局有盗穴垣命按主者罪三俊拟轻典庄烈帝大怒褫其官下狱三俊为人端严清亮正色立朝故其下吏也时人多惜之】

三月贺逢圣罢

【逢圣为人廉静东修砥行而议论矫僻尝诋高攀龙左光斗为言官所劾又与同官张至发交善会太子出阁择讲官至发摈黄道周不与杨廷麟等在选中心不平上章推让道周至发欲草疏辨谋于逢圣逢圣曰往者道周辞论德疏有文章义气不如郑鄮语可籍为口实也遂代为属藁言鄮杖母明旨煌煌道周自谓不如安可为元良辅疏出时论譁然逢圣亦不自安遂致政去】质实【杨廷麟字伯祥清江人明唐王时殉节 本朝乾隆四十一年进谥忠节】

夏四月张献忠伪降总理军务熊文灿受之

【先是帝以中原盗炽命京营副总兵孙应元黄得功周遇吉将劲卒万人讨贼颇骁敢善战甫抵豫大破贼郑州再破之密县先後斩首千七百级贼大惧开熊文灿下招降令多欲就之降刘国能者贼中所号闯瑁天者与张献忠有隙虑为所并又数败衄遂率先乞抚于随州顿首文灿前曰愚民?不义且十载赖公湔洗更生愿悉衆入军籍身隶麾下尽死力文灿大喜慰谕之署为守备国能受约束无异志而张献忠方伪为官军旗帜欲给南阳城屯于南关左良玉陈洪范败贼郢西旋师过其境疑而急召之献忠仓皇走官军追急发两矢中其肩良玉

复挥刀击之面流血几被获马驰以免会京营又大破贼于舞阳光山固始四日奏三捷斩首二千九百有奇降其渠马士秀杜应金于信阳城下献忠势孤因袭据谷城以求抚陈洪范隶文灿为总兵遣间齎重币献洪范曰献忠蒙公大恩得不死公岂恶之邪愿率所部降以自効洪范喜为告文灿文灿狃于国能之抚竟受其降巡按御史林鸣球分巡副使王瑞栴与良玉知其伪俟献忠至而执之文灿不可曲殉献忠请处其衆数万于谷城之郊居民汹汹欲窜知县阮之钿莅任尽心调剂民稍安策献忠必反以告文灿时献忠遣贼将孙可望重赂文灿径寸之珠十碧王长尺余者二名妹八文灿重昵献忠恶闻之钿语之钿乃疏于朝言献忠虎踞邑城其谋叵测所要求屯住之地实兵饷取道咽喉秦蜀交会胍络令皆为所据奸民甘心効用善良悉为迫胁臣守土牧民之官至无土可守无民可牧库藏殫虐民产被夺无贼可徵名虽县令实赘员尔乃庙堂之上专主抚议臣愚妄谓抚剿二策可合言未可分言致损国威而挫士气时不能用献忠遂益怒乞十万人饷于文灿文灿不能决贼衆浙出野外行刼之钿执之以告其营将稍寘之法及再告皆不应曰官司不给饷耳得饷自止由是村民徙亡殆尽遂掠及阡闾稍拒辄挺刃相向日有死者一城大嚣监军金事张大经奉文灿令来镇抚亦不能禁】质实【密县汉置明属禹州以隶于开封府今径属开封府林铭球广东海丰人王瑞栴字圣木永嘉人明唐王时殉节

本朝乾隆四十一年追谥忠烈阮之钿字实甫桐城人诸生以保举授谷城知县】

张至发罢

【至发尝诋黄道周颂温体仁屡为言者所攻内阁中书黄应恩悍戾至发倚任之恃势恣横颇招权道贿至发终庇应恩会复故总督杨鹤官许给诰命应恩当撰文因其子嗣昌得君力为沈雪忤旨将加罪至发拟公疏揭救同官孔贞运傅冠曰曩许士柔事吾辈未尝救独救应恩何也至发拂然曰公等不救我自救之连上三揭帝不聴恃降谕削应恩籍嗣昌疏救亦不聴无何应恩赇请事败词连至发至发愤甚连疏请勘帝虽优旨褒答卒下应恩狱至发乃自谓当去者三而未尝引疾忽得旨回籍调理时人传笑以为遵旨患病云至发为府丞时以清强称及入内阁一切劾法体仁与黄道周诸正人为难时论非之又起家外僚诸翰林多不服帝亦以其望轻故因其乞休即勒之去至发既归捐资改建淄城赐敕优獎十四年夏帝思用旧臣特敕召周延儒贺逢圣及至发独至发四疏辞十五年四月卒于家】质实【许士柔事士柔字仲嘉常 人崇祯元年高攀龙赠官士柔官翰林草诏辞送内阁未给攀龙家故事赠官诰敕乃中书职掌而褒恤诸忠臣者翰林或为之中书以为侵官不悦及攀龙家请给士柔已官南京祭酒距草制时十年矣主者仍以士柔前撰文进黄应恩以诰语违禁白张至发盖崇祯三年有诰文骈俪之禁也至发素憾士柔还劾之降二级调用司业周凤翔抗疏为士柔辩言诰敕用宝岁有常期未有十年後用宝进星而转以崇祯三年申饬之禁追咎元年草制之史官者疏入不报】

五月荧惑逆行

【帝素服减膳敕羣臣言事兵部尚书杨嗣昌应诏上书历引汉元帝建武二十三年明帝永平二年唐宪宗元和七年宋太宗太平兴国三年事应谓月食五星史不絶书然灾祲感召

不一其致且言永平火星之变其时明帝图画功臣于云台马援以椒房不与事耀青简今陛下修德治内亦必有灾而不害者疏出都给事中何楷驳之言古人谓月变修刑又言礼亏则罚见荧惑诚欲措刑莫如右礼诚欲右礼莫先省刑今爰书之蹟极矣部司议宥止于重辟数人而未折之狱先後累累莫过而问嗣昌不体陛下修省之意而徵古诬今引建武款塞事以申通市之说引元和田兴归正事以申招抚之说引太平兴国连年兵败事以申不可用兵之说徒巧傅会耳至所述永平时事更不知其意之所指南京御史林兰友亦相继论劾帝方眷嗣昌置不问时诏书恳执有哀吁上帝语而羣臣多以谀词相解户部主事李凤鸣至谓火星逆行常而非变亦为给事中解学尹所驳独中书舍人陈龙正以东厰缉事宛濫上 养和好生疏语中时弊略曰回天在好生好生无遇减死阜陶赞舜曰罪疑惟轻良以狱情至隐人命至重故不贵专信而取兼疑臣居家所见闲四方罪犯无甚穷凶奇谋者及来京师此等乃无虚月且罪案一成立就诛磔亦宜有所惩戒何犯者若此累累臣愿陛下怀帝舜之疑寧使圣主有过仁之举臣下获不经之愆盖阴指东厰事也越数日帝果严谕提督中官王之心不得轻视人命云】质实【林兰友字翰荃仙游人李凤鸣歙人解学尹扬州兴化人陈龙正字惕龙嘉善人】

发明【星象之变虚而难凭政治之失实而可据方明之季朋党角于朝寇盗炽于野中官之权复盛百姓之困日深此即无荧惑逆行垂亡之势巴属不可救乐杨嗣昌妄引前史以为灾而不害其欲曲申行事之无失以为导谀信有如何楷所驳诘者观庄烈诏书亦知哀吁于帝而不予用人行政之大端深求其悔过弥灾之道诸臣复多以谀词相解是君臣上下之间一无应天之实又岂独嗣昌之矫诬为足责也哉】

六月孔贞运罢

【初温体仁当国欲重治复社值其在告贞运从宽结之体仁怒语人曰句容亦聽人提索矣句容贞运所居邑也自是不敢有所建白及张至发去位贞运代为首辅会帝御门召考选诸臣问兵食计卷下辅臣再阅贞运及薛国观颇有所更及命下阁拟悉不从帝自择十八卷拔曾就义第一下部议行适新御史羣谒朝房贞运言诸卷说多难行新御史郭景昌遂劾之贞运即引归贞运既罢崇祯十七年五月庄烈帝哀诏至贞运哭临恸絕不能起遽得疾卒】质实【曾就义以知县应考选对策言百姓之困皆由吏之不廉使守令俱廉即加派以济军需未为不可语独称旨故得首拔郭景昌洛阳人】

以杨嗣昌程国祥方逢年蔡国用为礼部尚书范复粹郎并兼东阁大学士预机务嗣昌仍掌兵部

【初国祥官户部尚书嗣昌议增饷国祥不敢违度支益匱四方奏报灾伤者相继国祥多方区画亦时有所蠲减最後建议借都城赁舍一季租可得五十万勋戚奄竖悉隐匿不奏所得仅十三万而怨声载逆然帝以此眷国祥至是帝将增置阁臣出御中极殿召廷臣七十余人亲试之发策言年来天灾频仍今夏旱益甚金星昼见五旬山西四月犹大雪朝廷腹心耳目臣务避嫌怨有司举劾情贿关其心剋期平贼无功而剿兵难撤边饷日绌民贫甚正供犹

难有司侵削百方如火益热若何处置得宜禁戢有法卿等悉心以对会天大雨诸臣面对後漏已深终考者止三十七人顾帝意已前定特假是为名耳居数月改国祥礼部尚书与嗣昌逢年国用复粹俱兼东阁大学士入参机务时刘宇亮为首辅傅冠薛国观次之骤增国祥等五人惟逢年起自翰林余皆外僚也国用前以中书舍人历工部侍郎督修都城需石甚急不克办国用建议用牙石为之牙石者旧列索文宣武二街备驾出除道者也帝閱城嘉其功因大用之复粹尝为巡按陕西御史陈治标治本之策以任将飭防留饷为治标广屯蠲赋招抚为治本帝深褒纳遂历大理左少卿超擢入阁尤属异数盖帝欲阁臣通知六部事故每部任一人首辅刘宇亮由吏部国祥以户逢年以礼嗣昌以兵国用以工刑部无人复粹以大理代之然皆委蛇其间独嗣昌兼掌兵部最用事又以夺情居政府时论譁然】质实【程国祥字仲若上元人方逢年遂安人蔡国用金谿人范复粹黄县人】

两畿山东河南大旱蝗

【帝以灾祲屡见又寇氛日炽避正殿斋居断庖割后周氏见帝体日瘁具饌将进帝方得徐夫人奏言夜梦孝纯太后归语及帝瘁而哭且曰我为语帝食母过苦徐夫人者孝纯太后母也帝特奏入宫后适进饌惊询曰汝何以为此岂亦有所闻耶对无有曰外人有导之者耶对无有因追念孝纯且感后意出奏示后再拜举筋相向哭泪溢盘楬】质实【徐夫人宛平刘应元妻生女入宫即明庄烈帝生母孝纯皇太后也应元早卒崇祯十三年追赠应元瀛国公封徐氏瀛国太夫人】

秋七月谪少詹事黄道周官

【初迁安郭巩以逆案谪戍其乡人为讼冤杨嗣昌时巡抚永平闻于朝为科臣所驳自是与东林郤及夺情入阁又起复逆案陈新甲代卢象昇为宣大山西总督于是给事中何楷御史林兰友修撰刘同升编修赵士春相继论之道周上三疏一劾嗣昌夺情一劾新甲走邪径一劾辽东巡抚方一藻主和议会廷推阁臣道周名在列帝不用用嗣昌等帝疑道周怨望嗣昌复上言郑鄆杖母飞走不如今道周又不如鄆何用谈纲帝为且其意欲庇凶徒饰前言之谬立心可知因自乞罢免帝优旨慰之及是召内阁暨诸大臣于平台并及道周帝与诸臣语所司事久之问道周曰凡无所为而为者谓之天理有所为而为者谓之人欲尔三疏适当廷推不用时果无所为乎道周对曰臣三疏皆为国家纲常自信无所为帝曰先时何不言对曰先时犹可不言至简後用不言更无当言之日帝曰清固美德但不可傲物遂非且惟伯夷为圣中之清若小廉曲谨是廉非清也时道周所对不称旨帝屡驳诘道周复进曰惟孝弟之人始能经谕天下发育万物不孝不弟根本既无又安有枝叶嗣昌出奏曰臣不生空桑岂不知父母顾念君为臣纲父为子纲君臣固在父子前况古为列国之君臣可去此适彼今则一统之君臣无所逃于天地之间仁不遗亲义不後君难以偏重臣四疏力辞意词臣中有如刘定之罗伦者抗疏为臣代请得遂臣志及抵都门闻道周学术人品为人宗师乃不如郑鄆帝曰然朕正拟问之乃问道周曰孟子欲正人心息邪说古之邪说别为一教今则直附于圣贤经传中系世道人心更大尔言不如郑鄆何也对曰匡章见弃通国孟子不失礼貌帝曰章子不得于父岂鄆杖母者比尔言不如岂非朋比道周曰衆恶必察帝曰陈新甲何以走邪径托捷

足道周对曰人心邪则行径皆邪又曰夺情在疆外则可朝中则不可帝曰人既可用何分内外道周曰我朝自罗伦论夺情前後五十余人多在边疆故嗣昌在边疆则可在中枢则不可在中枢犹可在政府则不可止嗣昌一人犹可又呼朋引类竟成一夺情世界益不可帝又诘问久之曰少正卯当时亦称闻人心逆而险行僻而坚言伪而辨顺非而泽记丑而博不免圣人之诛今人多类此道周曰少正卯心术不正臣心正无一毫私帝怒有间命出候旨道周曰臣今日不尽言臣负陛下陛下今日杀臣陛下负臣帝曰尔一生学问止成佞耳叱之退道周叩头起复跪奏臣敢将忠佞二字剖析言之夫人在君父前独立敢言为佞岂在君父前谗谀面谀为忠耶忠佞不别邪正淆矣何以致治帝曰固也非朕漫加尔以佞但所问在此所答在彼非佞而何再叱之退顾嗣昌曰甚矣人心偷薄也道周恣肆如此其能无正乎乃召文武诸臣咸聆戒谕而退是时帝忧兵事谓可属大事者惟嗣昌破格用之道周守经矢帝意及奏对又戇直帝怒甚欲加以重罪念其名高传谕数百言戒廷臣毋为道周劫持相朋党乃贬道周六秩为江西按察司照磨同升士春皆谪外已而南京御史成勇兵部尚书范景文等疏论嗣昌夺情随亦获谴】质实【陈新甲长壽人刘同开吉水人赵士养常熟人方一藻歙县人】

八月傳冠罢

【时有章奏发自御前者冠以为揭贴援笔判其上既知误惶恐引罪帝即放归】

九月我

大清兵入边燕京戒严

【先是大清兵将进讨睿亲王多尔袞移檄诸边曰我】

【皇上轸念尔国军民涂炭屡遣书议和而尔国君臣欲寻干戈膜视尔军民而不知恤故我奉命西讨乃与多罗贝勒杜度等将两翼兵分道入墙子?青山口蓟辽总督吴阿衡总兵鲁宗文败死监视中官邓希诏遁走遂深入驻牛栏山时宣大山西总督卢象昇遭父丧候陈新甲受代未行诏督总兵杨国柱王朴虎大威诸军入卫冬十月象昇至三赐尚方剑命与中官高起潜分督援军枢辅杨嗣昌及起潜陰主和议有瞽而卖卜者曰周元忠尝往来于辽遣之奉书议和象昇闻而心非之召对平台帝咨以方畧对曰臣主战帝色变良久曰和乃外廷议耳象昇因奏备御形势甚悉帝壮之而戒象昇持重令与嗣昌起潜议当是时帝心知大清兵銳甚力不能敌而耻言和故委廷议以答象昇象昇出与两人议不合即日陛辞嗣昌送之屏左君欲有言久而不能出口第丁宁毋轻战而已帝先後以四万金犒军象昇念帝意颇銳决策议战而事多为起潜挠愤甚疏请分兵嗣昌议以宣大山西三帅属象昇关宁诸路属起潜象昇名督天下兵实不及二万越数日嗣昌至军象昇责以阻师且曰公等坚主和议独不思城下之盟春秋所耻长安口舌如锋恐袁崇焕之祸立见嗣昌曰公直以上方剑加我矣象昇曰既不奔丧又不能战齿剑者我也安得加入嗣昌曰公毋以长安蜚语?人象昇曰周元忠赴边讲和往来非一日事始于蓟镇监督受成于本兵通国闻之谁可讳也嗣昌语塞而去又数日会起潜安定】

【门象昇大言非血战无以尽臣职起潜曰恐野战非我所长耳两人始终各持一议会新甲亦至复分兵与之而我大兵已会于通州河西由卢沟桥趋良乡涿州分兵南下】质实【吴阿衡裕州人鲁宗文长清人四川总兵钦子本朝乾隆四十一年追谥阿衡节愍宗文烈愍】

冬十月洪承畴大败李自成于潼关

【承畴既令总兵官曹变蛟等逐自成于番地自成败入岷州甯山中变蛟引兵还剿自成伏不敢出惟其党号六队三队者及大天王争管王混天王仁义王过天星混天星等势犹张大天王犯庆阳宝鸡陕抚孙传庭方扼商雒还军战合水破走之获其二子追擊之延安过天星混天星等从徽秦趋凤翔逼澄城传庭分五道击破之斩二千余级大天王知二子不杀遂降余贼引而北犯延安传庭策鄜州西合水束三四百里荒山邃谷贼入当自毙乃率标兵自中部过其东檄变蛟自庆阳扼其西伏兵三水淳化间贼饥出掠食则大张旗帜鸣鼓角以邀之一日夜驰二百五十里贼大惊西奔遇伏兵而败复走宝鸡取栈道再中伏大败折而走陇州关山道又为伏兵所挫三败贼死者无算过天星混天星并降总兵官左光先蹶贼于秦州六队总管王复走成县阶州为变蛟所扼三队仁义王混天星降于光先六队还与自成合自成以秦兵统偕六队及其党祁总兵避走入蜀副将马科贺人龙邀擊之还走阶文及西乡憚变蛟乃走汉中又为光先所扼六队祁总管皆降惟自成东遁承畴令变蛟穷追之而设三伏于潼关之南原变蛟追及大呼斫贼伏尽起奋矛掩杀贼屍相枕藉先後降者数十万甲仗委如山村民用大棒擊逃者自成妻女俱失从十八骑遁去十八骑者刘宗敏田见秀李锦谷可成张世杰高一功张鼐李过李双喜任继荣任继先田虎刘汝魁其五骑则长械儿也自成创甚匿商洛山中及承畴传庭入援京师总理熊文灿力主抚谍者?报自成死文灿益不以自成为意自成得乘间收其衆衆复大集】质实【关山在陇州西八十里其山高峻盘折而登凡五十里始至絶顶有分水岭为秦要害之地成县西魏曰成州五代梁开平初改文州贞明初地入于蜀後唐同光初复曰成州明洪武二年降县属巩昌府 本朝雍正七年改属阶州】

十一月

大清兵克高阳前大学士孙承宗死之

【先是我大清兵自涿州勒统两翼军为八部分三郡深入一由涿水出易州一由新城出雄县一由定新出安肃遂以十一月九日攻高阳城承宗率家人拒守】

【大清兵将引去绕城而呼者三守者亦应之三曰此城笑也于法当破围复合明日城?被执望阙叩头投繯而死年七十有六子举人鈐尚宝丞钥官生铄生员鎔鎬从子练及孙中书舍人之沆之滂之滢尚宝丞之浩之灏从子之澈之汉之泳之泽之涣之瀚皆战死督师中官高起潜以闲帝嗟悼命所司优恤当国者杨嗣昌薛国观巩阴扼之但复故官予祭葬而已是冬】

【大清兵循下畿辅列城长吏多望风先遁其以死事闲者有深州知州孙士美赵州王端冕知县有任邱白慧元庆都黄承宗灵寿冯登鳌文安王钥蠡县王采新河崔贤钜鹿郭司南盐山陈志故城王九鼎青县】

【张文焕兴济钱珍庆云陈斌安平孔闻俊等教官有钜鹿教谕唐一中盐山教谕孙璜深州训导吴恂蠡县训导冯大纬吴桥训导刘廷训临城训导张纯儒文安训导郭养性等佐贰官有文安主簿安衡典史汤国纪等乡官有乔若雯李贞宁李崇德马从聘弟从龙子士伟耿荫楼周甘雨弟霖雨时雨等士人有举人董祚檀光闾生员桑开基武生田兴国等而高阳里居知县魏克家则与承宗同时死】质实【高阳汉县明属安州以隶于保定府今径属保定府涿水隋置明属易州以隶于保定府今升易州为直隶州县仍属焉新城唐置元改新秦州寻复为新城县明洪武初属雄州六年改属保定府今因之深州汉为下博县後周于县置静安军宋时废移深州治此明属真定府今升直隶州钜鹿汉县明属顺德府今因之盐山汉高城明改盐山属汉县以隶于河间府今改属天津府故城元始以故城镇置明属沧州以隶于河间府今径属河间府安平汉县明属晋州以隶于真定府今改属深州孙士美青浦人守深州城三日既失守自刎于角楼父讷亦自缢一家死者十三人赠太仆少卿讷亦被旌王端冕江陵人白慧元青涧人为中书官所诬劾被逮未行新令李廉仲缁城遁慧元躬擐甲胄防御甚力及城破一门俱死赠佥事黄承宗威海卫人城破与子朝鎡俱力战中流矢死妻刘氏自缢冯登鳌肤施人王钥武功人王采泽州人崔贤戈州人郭司南安塞人仆张尔璋同殉王九鼎潜山人张文焕掖县人陈斌清流人唐一中全州人孙璜三原人吴恂安平人冯大纬登鳌从父刘廷训顺天通州人以岁贡生为吴桥训导知县李綦隆欲遁廷训止之与共守外围将合綦隆缁城走廷训急趋城上语守者曰守死逃亦死盍死于守为忠义鬼乎衆泣诺乃坚拒三昼夜廷训中流矢束胸力战又中六矢乃死张纯儒新安人率诸生共守城城破死之乔若雯临城人由吏部员外出充州府知府剔除积弊豪猾饮手以疾归士民遮道泣送及城?若雯端坐按剑以待遂被杀赠太常少卿李贞宁任邱人官山西按察司罢归佐白慧元拒守城破率家衆格鬪身中数槊而死一门从死者数人李崇德青县人官户部员外郎马从聘字起莘灵寿人官延绥巡抚引疾归城破从聘年八十二谓其三子曰吾得死所矣自缢死三子长士伟官知州次官生士懋次生员士通皆自缢事闻赠从聘兵部尚书缙介敏从龙官扬州府经历与子士禄同死节耿阴楼字旋极从聘同邑人官吏部员外郎乞假归与子参同死节周甘雨行唐人官倒马关参将霖雨关淮安同知时雨官潼川州同知兄弟坚守城破皆死之董祚隆平人檀光闾任县人桑开基玉田人田兴国深州人魏克家官邹平知县有惠政 本朝乾隆四十一年追谥孙承宗忠定乔若雯李贞宁忠烈孙士美刘廷训周甘雨烈愍孙澹孙之沆孙之浩王端冕白慧元黄承宗冯登鳌王钥王采崔贤郭司南陈志王九鼎张文焕钱珍陈斌孔闻俊李崇德马士伟耿荫楼周霖雨魏克家节愍孙鈗唐一中安衡董祚等并入祠】

罗汝才伪降总理军务熊文灿受之

【先是文灿在洛州罗汝才马进忠诸贼聚南阳文灿下令杀贼者偿死贼不肯从则賫金帛酒牢犒之名曰求贼帝词得状曰文灿大言无实文灿恐然终拥兵不战谓张献忠已就抚他贼可无虑而汝才进忠等遂驱宛雒之衆箕张而西以窥潼关时陕抚孙传庭方大破关中

贼引军东出关遥望贼营联结数十里拊髀叹曰天下大寇尽在此矣我击其西总理击其东贼不降则灭此贼平天下无贼矣献忠即狙伏无能为也乃纵兵击贼大战于阆乡灵宝间贯其营而东复自东以西贼窘甚以文灿招降手谕为辞曰旦夕且降傅庭曰尔曹日就熊公言抚而日攻堡屠寨不已是伪也降即解甲来稍迁延即非真降吾明日进兵矣明日擐甲而出得文灿檄于途中曰母妒吾抚功又进得枢辅杨嗣昌止兵手书传庭快快还贼迄不就抚移瞰商雒文灿悔期传庭夹击传庭遣将吏三战三败之贼奔内乡淅川而去寻复南走郧襄分锯诸险隘势张甚文灿不得已出师次襄阳诸将请战文灿议分兵进中官卢九德曰兵分则力弱一失利全军摇矣莫若厚集其力而合击之衆曰善乃合左良玉陈洪范龙在田军战于双沟大破之斩首二千余级汝才等率九营走均州其党李万庆等率三营走光固会京师戒严召洪承畴及传庭合兵五万入卫汝才等以讨已也惧而叩太和宫提督中官诡辞求抚于文灿许之汝才犹豫文灿令房县知县郝景春单骑入其营偕汝才等歃血盟汝才乃率九营诣军门降文灿分处汝才及一文青小秦王一条龙四营于郧县惠登相王国宁常德安杨友贤王光恩五营于均州上疏请贷汝才等罪令诸将宴汝才于迎恩官署署以为游击将军供亿甚备汝才自言不愿署官亦不愿食饷愿为百姓耕田房竹间文灿一切羁縻之檄汝才解散其党简骁壮从征立功汝才不聽因据郧均诸邑夺民地错坏而处与谷城张献忠遥为声援是年安抚史可法连败贼于英山六合顺天王乞就抚未几死于是陕西河北湖广诸贼或降或窜势大衰城邑罕闻者独紫阳宗孔商南典史贾汝秀贾儒以殉贼难闻】质实【双沟在襄阳县东北七十里明置巡捡司于此本朝因之太和宫在均州武当山龙在田石屏上官舍人郝景春字和满江都人何宗孔直隶通州人本朝乾隆四十一年追谥何宗孔秀并入祠】

冬十二月方逢年罢

【是年夏荧惑之变刑部尚书刘之凤请修刑言自今狱情大者一月奏断小者半月至近年?贼无可追比者祈悉宥免全生生之仁帝虽可其奏而心恶之凤欲罪之及是刑科奏摘参未完疏逢年以追赃既久人亡产绝瓜蔓戚属遂轻议以上帝怒责逢年疎忽逢年引罪及罢归而之凤寻亦下吏】质实【刘之凤字鹺鸣中牟人以修刑疏不称旨每上狱词庄烈帝必严驳之惧甚诸司呈稿迟疑不敢遽发屡疏谢病不许会范景文劾南京给事中荆可栋贪汙下部讯之凤与轻比遂下之凤于吏坐绞给事中李清言于例未合同官葛枢复论救镌枢级调外之凤竟瘐死】

督师侍郎卢象昇兵败于钜鹿死之

【大清兵既分道南下象昇闲之从涿州进据保定遣将出御大战于庆都犹未败衄而一时列城多失守编修杨廷麟劾枢辅杨嗣昌误国嗣昌大怒奏改廷麟兵部主事赞昼行营夺象昇尚书衔以侍郎任事象昇擢自兵备副使与流贼角贼虽强皆乌合之衆一败即散走故所向摧破及是】

【大军在前又为嗣昌所扼饷不时给将士饥甚自知必死晨出帐四面拜曰吾与将士同

受国恩患不得死不患不得生衆皆泣莫能仰视遂率所部以行宿于野次畿南三郡父老闻之咸叩军门请曰明公出万死不顾一生之计为天下先乃奸臣在内孤忠见嫉栖迟絶野一饱无时明公诚从愚计移军广顺召集义师三郡子弟喜公之来同心戮力一呼而裹粮从者可十万孰与只臂无援立而就死哉象昇泫然流涕谓父老曰感父老意虽然自予与流贼角经数十百战未尝衄今者分疲卒五千劲旅西冲援师东隔事由中制食尽力穷旦夕死矣无徒累父老为也衆号泣雷动各携斗粟饷军或貽枣一升曰公煮为粮是月十一日进师至钜鹿贾庄起潜拥兵寧关在鸡泽距贾庄五十里而近象昇遣廷麟往乞援因与诀曰死西市何如死疆場吾以一死报君犹为薄耳廷麟诣起潜起潜不应象昇行至蒿水桥与】

【大清兵遇总兵王仆先引兵逃去独虎大威杨国柱从象昇率麾下卒居中大威帅左国柱帅右战移时勒兵还营夜半角声四起明日骑数万夫至环之三匝象昇麾兵战呼声动天自辰迄未霰尽矢穷大威请溃围出象昇不许奋身鬪後骑皆进手格杀数十人身中四矢三刃遂仆掌牧杨陆凯惧衆之残其屍而伏其上背伏二十四矢以死仆顾显者亦殉一军尽歿惟大威国柱得脱起潜闻败仓皇遁嗣昌既夙恶象昇而起潜惧坐诛讳象昇死状嗣昌疑不死诏验视廷麟得其屍战場麻衣犹被体一卒遥见即号泣曰此吾卢公也三郡之民闻之哭失声竟立祠祝之顺德知府于颖核其状以上事始白嗣昌故靳之踰两月而後殮明年象昇妻王氏请恤又明年其弟象晋象观又请不许久之嗣昌败廷臣多为言者乃赠太子少师兵部尚书赐祭葬世廕锦衣千户方象昇之战歿也嗣昌遣三逻卒察其死状其一人俞振龙者归言象昇实死嗣昌怒鞭之三日夜且死张目曰天道神明无枉忠臣于是天下闻之莫不鄙歔并悲嗣昌矣】质实【贾庄蒿水桥并在钜鹿县南于颖金坛人按山西通志有宣府参军张岩者阳和人从象昇战歿于阵本朝乾隆四十一年追谥象昇忠肃张岩烈愍杨陆凯俞振龙并入祠】

【己卯】十二年春正月己未朔却廷臣朝贺

【时事多艰故也军书旁午帝每省治达旦以岁朝谒刘太妃于慈宁宫朝毕就坐俄假寐太妃戒勿惊命尚衣者覆以帔左右皆植立屏息以俟有顷帝觉摄衣起谢曰神祖时天下少事宫中皆晏安太妃所亲见也今苦多难两夜省文书未尝交睫自谓年甫踰壮尚可磨耗不谓蚤困劣在太妃前惛然不自持至此太妃之泣下】为质实【刘太妃明神宗妃也万历六年册为昭妃天启崇祯时尝居慈宁宫掌太后玺庄烈帝礼事之如大母】

大清兵下济南德王由枢被执巡按御史宋学朱布政使张秉文死之

【先是大清兵自畿辅而西抵山西界复南下临清渡会通河徇下山东诸州县临邑知县宋希尧博平知县张列宿茌平知县黄廷极邱县知县高重光武城知县李承芳皆死之时枢辅杨嗣昌以德州为南北孔道檄山东巡抚顔继祖率标下兵三千扼之于是济南空虚止乡兵五百莱州援兵七百势弱不足守巡抚御史宋学朱行部章邱急驰与布政使张秉文副使周之训翁鸿业参议邓谦盐运使唐世熊等议守城连章告急于朝嗣昌无应督师中官高起潜兵方移驻临清拥重兵不敕总兵官祖寬倪宠等亦观望大清兵遂临济南秉文等分门拒

守昼夜不解甲援兵竟无至者是年正月二日城溃秉文擐甲巷战已被箭力不能支死之妻方氏妾陈氏并投大明湖死学朱之训鸿业谦世熊及济南知府苟好善推官陆灿同知陈虞允通判熊列献马嗣煜历城知县韩承宣布政使理问姜道元举人刘元化及子汉仪皆死焉德王由枢亦被执】质实【茌平汉县故城在县西茌山下金时刘豫移今治明属东昌府今因邱县汉平恩县金省入曲周县元置邱县明属临清以隶于东昌府本朝顺治初改属东昌府乾隆四十一年升临清州为直隶州仍以县属之大明湖在历城】

【县西北隅周十余里宋希尧长治人黄廷极武功人高重光字秀恒清苑人宋学朱字用晦长洲人张秉文字含之桐城人周之训黄冈人与妻刘氏偕死阖门殉之翁鸿业钱塘人邓谦孝感人战于城上与季父有正偕死母莫氏匿民间不食死族戚僉从死者四十余人唐世熊灌阳人分守西门被杀苟好善醴泉人陈虞允上元人熊烈献黄陂人城破与二子俱死马嗣煜同州人韩承宣大学士燠孙与妻妾同死姜道元余姚人妻来氏子廷梁殉节死由枢德庄王见潋六世孙时有郡王一人奉国将军一人同就执又有郡王五人辅国将军一人镇国将军一人奉国将军四人被杀史逸其名陆灿平湖人有刘大年者江西广昌人官兵部主事奉使南京还朝道历城城破抗节死又恩县乡官李应荐天启时官御史以附魏忠贤丽名逆案至是捐貲募士佐有司守城城破身被数刃死事闻张秉文赠太常卿周之训赠光卿卿韩承宣刘大年光禄少卿建祠祝之余赠恤有差学朱死不得屍格不予明福王时赠大理卿本朝乾隆四十一年追谥宋学朱忠烈张秉文忠节邓谦烈愆周之训翁鸿叶唐世熊苟好善陆灿陈虞允熊列献马嗣煜韩承宣姜道元宋希尧张列宿黄廷极高重光李承芳刘大年节愍刘元化及子汉仪并入祠】

以洪承畴总督蓟辽军务孙传庭总督保定山东河北军务寻下传庭于狱

【帝从杨嗣昌议移承畴蓟辽尽留秦兵之入援者属承畴东守传庭言于嗣昌曰秦兵不可留也秦中贼未灭留则贼势且张是代贼撤兵也况秦兵妻子俱在秦久留于边必譁而逃归以合于贼是驱官军使从贼也安危之机不可不察嗣昌不聽传庭疏争之帝亦不能用不胜鬱鬱耳忽聒初传庭入卫卢象昇方战殁命代统诸镇援军传庭以强事决裂由计画差谬即请召对决大计而嗣昌及高起潜与传庭不协从中沮之竟不得入朝至是有总督保定山东河北之命复疏请陛见嗣昌大惊谓传庭将领已饬来役賫疏还之传庭愤甚耳益聒不能听机事遂乞休嗣昌又劾其托疾帝大怒斥为民下巡抚杨一儒覆真伪一儒奏言传庭实聒非托疾并下一儒狱传庭长系待决举朝知其冤莫敢言】质实【杨一儒隣水人】

乔宇亮罢

【初燕京戒严帝忧甚宇亮自请督察军情帝喜即革总督卢象昇任命宇亮往代宇亮请督察而帝忽改为总督大惧与薛国观杨嗣昌谋具疏自言乃留言象昇而宇亮仍往督察各镇勤王兵皆属马甫抵保定象昇已战殁侦者报大清兵将至相顾无人色急趋晋州避之知州陈宏绪闭门不纳士民亦?血誓不延一兵宇亮大怒传令箭即纳师否则军法从事宏绪亦传语曰督师之来将以进战也奈何歛兵退处城中刍粮不继责在有司欲入城不敢闻命宇

亮驰疏劾之有旨逮治州民诣阙讼冤愿以身代者千计宏绪得镌级调用帝自是疑宇亮不任事徒扰民矣是年正月闻】

【大清兵悉锐趋山东乃敢移师次天津恐解严後重得罪疏论诸将退缩为卸责地因及总兵刘光祚延遛状诏斩光祚军前宇亮以兵事未解方倚诸军自卫遽杀大将恐生变乃系光祚于狱具疏乞宥以为报武清之捷帝责以前後矛盾下九卿科道议金谓宇亮玩弄国宪大不敬宇亮疏辨部议落职闲柱给事中陈启新等复重劾之乃削籍去国观代为首辅】

三月我

大清兵出青山口

【是役也我大清兵深入二千里三十三战皆捷下畿辅州县城四十有三曰赵州深州文安庆都博野蠡高阳任邱青兴济宁津吴桥东光故城南皮盐山庆云获鹿元氏灵寿乐城无极行唐南宮新河安平饶阳隆平高邑临城宁晋沙河南和任内邱唐山平乡钜鹿广宗鸡泽威清河魏下山东府州县城十八曰济南府高唐州长山济阳禹城临邑陵平原海丰商河博平茌平莘清平邱恩夏津武城俘获人口四十六万有奇乃自青山口旋师事既定给事中李希沆言陛下御极以来京师戒严者三己巳失事之罪未核致有丙子丙子失事之罪未核致有今日语侵枢辅杨嗣昌御史王志举亦劾嗣昌误国请用丁汝夔袁宗焕故事帝怒希沆贬秩志举夺官命嗣昌议文武诸臣失事罪分五等曰守边失机曰残破城邑曰失藩封曰失亡主帅曰拥兵观望于是蓟镇总监中官邓希诏分监巾官孙茂霖顺天巡抚陈祖苞保定巡抚张其平山东巡抚颜继祖蓟镇总兵吴国俊陈国威山东总兵倪宠援剿总兵祖宽李重镇及他副将以下至州县有司凡三十六人同论死而嗣昌贬削不及】质实【东光汉县明属景州以隶于河间府今径属河间府南皮汉县明属沧州以隶于河间府 本朝雍正九年置天津府以县属之获鹿汉石邑唐分置鹿泉县寻改曰获鹿宋以石邑省入明属真定府元汉县乐城东汉县唐改乐氏宋仍曰乐城无极汉母极唐改母曰无明并属真定府今悉因之南宮汉县明属冀州以隶于真定府 本朝顺治初径属真定府雍正二年升冀州为直隶州仍以县属之沙河】

【隋分龙冈县地置南和汉县任县汉县唐山唐尧山金又改唐山平乡汉县广宗元以洛水县之武道镇置明与沙河南和任唐山平乡广宗并属顺德府今悉因之鸡泽汉广平隋改鸡泽清和汉东武隋改曰清河明并属广平府今因之魏汉县明属大名府本朝乾隆二十三年省入大名县长山隋置明属济南府今因之海丰隋无棣县元初割县之半置东无棣县明永乐中改海丰属乐安州以隶于济南府宣德元年改乐安为武定州 本朝雍正十二年升武定州为府县仍属焉恩县隋析武城县地置历亭金为恩州治明洪武二年降州为县属高居州以隶于东昌府今改属临清州李希沆安化人王志举山东新城人陈祖苞海宁人系狱饮鸩卒帝怒祖苞漏刑锢其子编修之遴永不叙张其平偃师人与颜继祖等骈死西市】

夏四月总兵官左良玉败贼于南阳

【初贼渠马士秀杜应金就抚良玉处其衆于许州之郊外许大州也良玉诸将寄孥与贿焉会河南巡抚常道立檄良玉剿他贼于陕州久征不归士秀应金在文灿军中托事请归许假良玉军号给入城夜半纵火烧城南楼劫库杀官吏殲良玉家挈其赀投李万庆万庆者贼魁射塌天也良玉闻变将施军讨之适奉勤王诏遂率降将刘国能北行未抵京诏还讨河南贼以国能反正後颇効用特擢副总兵曰张献忠能立功视此于是良玉国能南旋击马进忠于镇平关大破之进忠降是时河南总兵张任学亦以入卫却还率部将宋怀志孔道典王应龙尤之龙协剿楚豫诸贼连败贼于陈州于襄阳于叶县于裕州贼渠贺一龙蔺养成伏深山不敢出惠登相远走秦蜀顺天王已前死万庆及马光玉许可变在豫势益孤熊文灿徵良玉剿万庆于唐县分三营击贼逐入山中裨将王修政趋利战死文灿收二营卒令良玉蹙之内乡而任学亦以兵来会万庆乃依山结垒遣贼将至军请降良玉虑其诈谋之文灿益调诸将陈永福罗岱等兵进剿副将国能亦至遂分道击万庆及先玉可变万庆等败大奔良玉令国能以二十骑往侦且谕万庆降万庆驰见输情于国能遂执许州叛党于汝虎以降处其衆四千入于内乡城下士秀应金见进忠万庆降而惧复来归有刘喜才者夜取顺义王首以献光玉等走浙川自是贼势少衰文灿遂上言臣兵威震懾降者接踵惟马光玉等尚稽天讨可旦夕平也帝优诏报之文灿益自喜而湖广诸僚吏颇以为忧巡抚余应桂贻书文灿言羣贼虽相继降张献忠必反可先未发图之其书为献忠逡者所得献忠腾牒布告曰余抚军欲杀我文灿闻之纠应桂挠抚事应桂疏辨帝不听方进忠万庆之未降也应桂以文灿抚剿乖方上书极诋之其缕陈文灿之舛尤悉畧言文灿初抚刘国能其党李万庆等诸大贼尽走?阳枣阳时文灿良玉并在德安臣以为兵势方盛宜乘此追剿而文灿调良玉诸军尽赴信阳剿马进忠臣谓进忠於诸贼中最弱惟强者当急剿弱者可徐图文灿不听自此机一失贼走西而文灿东致万庆等收合余烬势复振而豫楚之患遂自文灿之愎諫贻之矣迨贼西溃之後遮饰上闻妄报斩级其自恃其所长惟火礮凡经过州县用舁夫八百死亡载道未见其一试也且文灿办贼之策曰先抚後剿乃檄诸军会剿于茶山不效于麻城又不效第见招抚之旗络绎于道一遣使招贺一龙而使被杀再遣使招李万庆与之通市贼反因此大纵焚掠天下有如是抚法乎其一切军需悉取于所过有司名曰借辨致城市空虚子遗尽絶文灿军至麻城民不堪淫掠欲焚其署始踉跄而走及次蕲水其兵杀乡民报捷民家环哭竟不敢治一兵是以捷报日张寇势愈炽十三家之贼蹂躪南阳汝宁如履无人之境文灿驻宛汝已久调度不闻天下有如是剿法乎献忠在谷城招纳亡命买马置器人人知其叵测文灿顾欲借之为前茅遣官调之非惟不应复留解饷之官求为湖广总兵今已造浮桥跨汉水矣文灿前既夸张而叙功後复掩匿而不报可不谓之欺君乎以总理之大柄畀之颠蹶之耄夫臣不知其可也而文灿谓茶山失贼罪实由应桂嗣昌衔应桂尝劾其父鹤奏逮之应桂自辨虽力帝不纳竟下之狱未几献忠果叛独国能进忠万庆三人者帖然无异志万庆寻亦授副总兵官】质实

【镇平关在南阳府西七十里镇平县界枣阳本汉蔡阳县地後周置广昌隋改枣阳明属襄阳府今因之常道立三原人余应桂字二矶都昌人明桂王时殉节本朝乾隆四十一年追谥忠节王修政入祠】

程国祥罢

【国祥为人廉谨既入阁布衣蔬食不改儒素然短于才同官薛国观杨嗣昌方用事国祥

旅进退自守而已至是召对国祥无一言帝传谕责其缄默大负委任于是国祥遂乞休去】

五月以姚明恭张四知魏照乘并为礼部尚书兼东阁大学士预机务

【三人皆庸劣四知尤甚尝以贪污为言官所纠四知力辨于帝前言已孤立帝意颇动薛国观力援之遂与明恭照乘同入阁】质实【张四知费县人魏照乘滑县人】

张献忠罗汝才复叛

【先是总兵张任学入卫道谒文灿言献忠狼子野心终为国患我以勤王为名出其不意可立缚也文灿往复恶镇巡官屡以献忠为言屏其谋不用及献忠反形日露谷城知县阮之钿忧甚往说之曰将军始所为甚悖今幸得为王臣当从军立功垂名竹帛且不见刘将军国能乎朝廷手诏进官厚赉金帛此赤诚交也将军若虑有他之钿请以百口保何嫌何疑而复怀异志献忠素衔之钿遂恶言及骂之之钿忧愤成病题数言于壁自誓以死至是献忠果约罗汝才反劫库纵囚毁其城之钿仰药未绝献忠遣使索印坚不与贼杀之旋纵火焚公署骸骨为烬贼竟挟金事张大经以去遂攻房县招汝才当是时郧阳诸属邑久罹寇患城郭为墟独房县知县郝景春善拊循粗可守而汝才等四营杂处于郊居民日惴惴景春乃偕主簿朱邦闻守备杨道选修守且辑诸营闻献忠反谷城与汝才有约景春子鸣銮诸生也力敌万夫】

【诸父曰吾城当贼冲而羸卒止二百城何以守乃擐甲诣汝才曰若不念前日盟乎慎毋乱汝才洋诺鸣銮觉其伪归与道选授兵登陴而献忠所遣前锋已至击斩其将一人遣使缁城乞援于文灿凡十四往不报已而贼大至献忠兵张白帜汝才兵张赤帜俄二帜相杂环城力攻贼党白贵黑云祥策马呼曰以城让我保无他也献忠又以张大经檄谕降景春骂碎之鸣銮且守且战阅五日颇有所杀伤贼乃为负板穴城城将崩鸣銮熬油灌之又击伤献忠左足用间入贼垒阴识献忠所卧帐将袭擒之而指挥张三锡启北门揖汝才入道选巷战死部将张见炫被执亦死大经使汝才说景春降怒不答门库藏储蓄安在叱曰库藏若有储蓄城岂为汝?贼怒杀一典史一守备恐之卒不屈与鸣銮俱被杀仆陈宜殉之邦闻及其家人亦不屈死于是贼势大张郧西保康皆?知县王元会杨镜死之惠登相等五营在均州惧见讨相与歃血拒献忠无何亦叛去文灿闻变惊愕无所措急请敕楚抚方孔炤防荆门当阳郧抚王鳌永防江陵远安陕抚丁启睿蜀抚邵捷春各严兵待于镜上而陕督郑崇俭主提兵合击议不决孔炤乃请率所部扼德安黄州守承天护猷陵江汉以南专责鳌永防御时孔炤预策献忠等必叛阴厉士马备战守故贼畏孔炤乃不敢东阮之钿郝景春并以死事赠尚宝少卿杨道选等亦赠恤有差後庄烈帝召见阁臣贺逢圣备述景春死事状改赠太仆少卿张三锡寻为官军所获磔死张大经?于贼不能死明年张献忠败于玛瑶山偕贼将曹威等归于军门士论耻之】质实【远安晋高安後周远安明属夷陵州以隶于径州府令径属径州府王元会盖州人杨镜四川人方孔炤字潜夫桐城人王鳌永淄川人郑崇俭字大章寧乡人本朝乾隆四十一年追谥郝景春忠烈阮之钿忠节杨道选烈愍王元会杨镜节愍朱邦闻张见炫等并入祠】

六月畿内山东河南山西旱蝗

【时灾荒四告流寇日炽缘墨吏朘民民益走为盗盗日多民生日蹙给事中王家彦乃上疏曰臣见秦晋之间饥民相煽千百为羣其始率自一乡一邑守令早为之所民何至接踵万盗盗何遂溃裂至此论者谓功令使然催科急者书上考督贵严者号循良不肖而墨者以东湿济其饕餐一二贤明吏未于文法晨布莫由惟稍宽文网台令抚绥盗之聚者可散散者可不复聚又旧制捕蝗令史部歲九月颁勘合于有司请实意举行帝皆纳之】质实【王家彦字开美莆田人】

加徵练饷

【廷臣多请练边兵枢辅杨嗣昌定议宣府大同山西三镇兵十七万八千八百有奇三总兵各练一万总督练三万以二万驻怀来一万驻阳和东西策应余授镇监巡抚以下分练延绥宁夏甘肃因原临洮五镇兵十五万五千七百有奇五总兵各练一万总督练三万以二万驻固原一万驻延安东西策应余授巡抚副将以下分练辽东蓟镇兵二十四万有奇五总兵各练一万总督练五万外自锦州内抵居庸东西策应余授镇监巡抚以下分练汰通州昌平督治二侍郎设保定一总督合畿辅山东河北兵得十五万七千有奇四总兵各练二万总督练三万北自昌平南抵河北闻警策应余授巡抚以下分练又以畿辅重地议增监司四人以一人兼辖大名广平顺德三人分驻镇定保定河间蓟辽总督下增监军三人议上帝悉报可嗣昌所议兵凡七十三万有奇然民流饷绌未尝有实也帝又采副将杨德政议府汰通判设练备秩次守备州汰判官县汰主簿设练总秩次把总并授辖于正官专练民兵府千州七百余县五百扞乡土不他调嗣昌以势有缓急请先行畿辅山东河南山西从之于是有练饷之议初嗣昌增剿饷期一年而止後饷尽而贼未平诏徵其率至是督饷侍郎张伯鲸请全徵帝虑失信嗣昌曰无伤也加赋出于土田土田尽归有力家百亩增银三四钱稍抑兼并耳薛国观力赞之乃于剿饷外复增练饷七百三十万言者谓九边自有额饷槩予新饷则旧者安归边兵多虚显今指为实数饷尽虚糜而练数仍不足况兵以分防不能常聚故有抽练之议抽练而其余遂不问又所谓抽练者仍属虚文边防愈益弱至州县民兵益无实徒糜厚饷以嗣昌主之卒不可夺御史卫周嗣郝晋相继劾嗣昌流毒天下民怨何极帝不纳】质实【张伯鲸字绳海江都人卫周嗣曲沃人郝晋栖霞人】

发明【明季百姓之困至是极矣流寇蔓延生民涂炭不思所以附循安辑之而日议增饷往时嗣昌十面张纲之策增剿饷至二百八十万至是有练饷之议复增七百三十万而向之剿饷期于一年而止者期满而复全徵不思寇盗之盛由於贫民附盗盗未平而惟议加赋贼加而民不聊生民不聊生而益起为盗是加赋不惟不能平盗而适以驱之归盗也至九边二饷既有常数不核边兵之虚糜而徒增抽练之新额卒之练兵而兵不加精增饷而饷不充用且剿饷藉以平贼而文灿用以资抚练饷名以养兵而边防日以益弱国家无补疮之益而小民被剝肉之苦史称自万历至此先後增赋至千六百万盗贼充斥土田荒芜赋从何出而嗣昌犹谓土田尽归有力加赋稍抑兼并呜呼安得此亡国之言而庄烈信之而不可夺明祚虽欲稍延得乎哉】

秋七月总兵官左良玉讨张献忠于罗 山败绩【献忠合罗汝才自房县西走总兵官张任学遣其中军罗岱偕良玉追之良玉令岱为前锋已随其後逾房县八十里至罗 山军乏食贼伏兵要害岱与副将刘元捷鼓勇直上伏四起岱马足絙于藤抽刀断之蹙而复进乃弃马步鬪贼围急矢尽被执不屈死良玉军後至亦大败奔还军符印信尽失弃军资千万余士卒死者万人事闻良玉以轻进贬三秩任学坐褫职时贼渠马光玉屯淅川之吴村伪乞抚规渡汉江应献忠淅川知县郭守邦说降其党许可变胡可受可变即贼中所号改世王可受则安世王也可变夜至淅川城下守邦处之东关可受为光玉所持约未定会总兵官孙应元黄得功方率京军过南阳虑光玉合于献忠则贼势益炽乃趋内乡掩击其背令副将周遇吉等分道击可受遇吉偕参将马文豸等力战可受拜呼曰始与许可变约降者我也今归命遇吉驻马受之应元得功益进兵攻光玉光玉党分营南北两山用木石塞道应元率文豸战其南得功率副将林报园战其北文灿所遣陈洪范亦至以所步兵过其东贼大溃光玉遁走遂不得与献忠合献忠既败官军于罗 山谋入陕陕督郑崇俭牵贺人龙李国奇军御之兴安献忠乃还走兴山太平据楚蜀之交以屯其衆】质实【罗 山一名罗?山在房县西八十里太平明正德十年割东郷县置属达州以隶于夔州府
本朝初径属夔州府雍正六年升达州为直隶州县仍属焉
本朝乾隆四十一年追諡罗岱节愍】

熊文灿有罪削籍寻逮下狱

【帝闻谷城之变大惊削文灿官令戴罪视事及闻左良玉败绩大怒遣使逮文灿下狱生大辟所亲姚明?柄国而不能救也初文灿受命为总理自广东之安庆道出庐山谒所善僧空隐僧迎谓曰公误矣文灿屏人问故僧曰公自度所将兵卒制贼死命乎曰不能曰诸将有可属大事当一面不烦指挥而定者乎曰未知何如也曰二者既不能当贼上特以名使公厚望一不效诛矣文灿却立良久曰抚之何如僧曰吾判公必抚然流寇非海寇比公其慎之文灿乃辞去至是竟以抚致败】

八月命杨嗣昌督师讨贼

【嗣昌举傅宗龙自代方解兵部事专治阁务而罗 山败书闻嗣昌疏引罪帝特旨令督师再疏辞不允赐尚方剑统制诸方兵马总督以下并听节制副将以下先斩後闻九月朔召见于平台慰劳备至命吏部用人户部措饷兵部调度俱内外协应嗣昌曰臣闻君言不宿于家臣朝受命夕当启行顾军资甲仗未备望敕所司遄发帝悦曰卿能如此朕更何忧初四日复召见密有所谕左右莫得闻出御制赠司诗一章嗣昌跪诵拜且泣命赐宴越二日陞辞复赐缮以二十九日抵襄阳即上疏为熊文灿辨四廷臣以文灿不能剿贼诬其无才不能用兵诬其无算文灿特过持重耳且流寇数十百万不可胜诛必抚剿兼施方可解散文灿任事两年功已十成六七独献忠再叛诸营动摇今以一眚废置并所用之人訾之非公论盖文灿之罢由河南巡抚高名衡劾之及嗣昌檄召知府万年策僉事孔贞会劾用军前名衡又劾二人以抚愚文灿不可用嗣昌以此发愤且曲庇文灿而帝卒重罪之不用嗣昌议也嗣昌既受代以十月朔大誓三军湖广巡抚方孔炤总兵官左良玉陈洪范等毕会以良玉有将才请拜为

平贼将军报可是月贼贺一龙等掠叶围沈邱焚项城之郭寇光山副将张琮刁明忠率京军踰山五十里及其巢射杀绯袍贼二人斩首千七百有奇嗣昌称诏颁赐十一月贼渠王国寧复以衆十人来归国宁自号兴世王与惠登相等同叛者也嗣昌受之于襄阳处其妻子樊城良玉既佩将军印志益骄遣使以书谢嗣昌嗣昌不悦会贺人龙大败贼兴安嗣昌请进秩赐獎欲渐贵之以抗良玉良玉知之甚恨初献忠及罗汝才惠登相等屯郧阳兴安山间闻嗣昌以宰相督师大军并集颇惧虽时掠南漳谷城房竹山竹溪势未甚炽诸将推锋急击宜可?而嗣昌始至即有养銳之说诸将遂无鬪志且积骄玩嗣昌令刁明忠自承天赴荆門乃自随至襄阳嗣昌将戮之诸将力救仅擄百而已监军金事殷太白两违军令请于朝斩之其下始畏然嗣昌虽数遣将但遥相遇未尝督令合击又去贼远而侦探时不实朝士皆忧之傳宗龙尅十二月平贼数趣分道进兵嗣昌不听迁延至岁暮未一战张琮贺人龙之捷本非嗣昌功尝檄巡抚方孔炤遣杨世恩罗安邦剿罗汝才惠登相深入全军皆覆他将战黄麻又败嗣昌劾孔炤且自劾孔炤被逮嗣昌亦戴罪立功】质实【高名衡字什平沂州人孔贞会句容人杨世恩官湖广副总兵罗安邦官荆門守备 本朝乾隆四十一年追諡世恩烈愍安邦节愍按河南通志有信阳团练守备刘煜者仪封人于是年御贼战死山西通志有真定副总兵王震仲者蒲州人亦于是年击贼将任国奇力战歿于阵今并追諡烈愍】

冬十月我

大清兵攻寧远总兵官金国凤死之

【先是国凤以副总兵守松山大清兵攻其南门寻复环城发礮台堞俱摧城中人负扉以行国凤以木石整补多方拒守终不下围解帝大喜立擢署都督金事为宁远团练总管官再论功署都督同知廕锦衣卫千户至是大清兵复攻寧远国凤愤将士恒怯率亲丁数十人出御廕战移时矢尽力竭与二子俱死总督洪承畴上言国凤素怀忠勇前守松山兵不满三千乃能力保孤城非其才力优也以事权重号令一而人心肃也迨擢任大将兵近万人反致陨命非其才力短也由营伍纷纭号令难施而人心不一也乞自今设连营节制之法战守惟总兵官令是听庶军心齐肃所系于封疆甚大帝即允行之方松山被团巡抚方一藻议遣兵救援诸将莫敢应独副将杨振请行至中道遇伏一军尽覆振被执令往松山说降未至里许踞地南向坐语从官李禄曰为我告城中人坚守援军】

【即日至矣禄诣城下致振语城中守益坚振禄皆殉节死】质实【金国凤宣府人死事状闻于朝庄烈帝痛悼赠特进荣禄大夫左都督赐祭葬有司建祠增世职三级及国凤父子柩归复念其忠命所遇有司给以舟车且加二祭其妻张氏援刘綎例乞加官保部议格不行而请于世职增级外再?本卫试百户以劝忠臣从之杨振义州卫人以殉难从优恤本朝乾隆四十一年追諡金国凤忠烈杨振烈愍李禄入祠】

十二月下兵部尚书傳宗龙于狱

【初宗龙巡按贵州讨定叛苗威名大着历薊辽总督罢官归前二年冬流寇大入四川陷

三十余州县帝拊髀而恩宗龙曰使宗龙抚蜀贼安至是哉趋即家起宗龙代王维章与总兵罗尚文御却贼是年夏以杨嗣昌荐召为兵部尚书秋八月至京召见宗龙为人抗直任气不能从谀承帝意愤中枢失职嗣昌以权诡得主知宗龙朴忠初入见即言民穷财尽帝颇然之顾言之不已遂佛然曰卿当整理兵事尔既退语嗣昌曰何哉宗龙善策黔而所言卑卑皆他人唾余何也自是所奏请多中格熊文灿既罢宗龙乃言向者贼流突东西嗣昌故建分剿之策今则流突者各止其所臣请收势险节短之效總理止辖楚豫秦督兼辖四川凤督兼辖安庆各率所属协剿期十二月成功荐湖广巡抚方孔炤堪代文灿帝不用嗣昌督师嗣昌既至军上章请兵食宗龙按例予之不尽如所请嗣昌劾中枢不任职宗龙亦劾督师徒耗敝国家不能报効以气凌廷臣会蓟辽总督洪承畴请用刘肇基为团练总兵官中官高起潜又揭肇基恇怯宗龙不即覆帝遂怒责以抗旨命对状奏上复以戏视封疆下吏法司拟戍边不许欲寘之死】

御定资治通监纲目三编卷三十七

卷三十八

钦定四库全书

御定资治通鉴纲目三编卷三十八

【起庚辰明庄烈崇祯十三年尽壬午明庄烈崇祯十五年】凡三年

【庚辰】十三年春二月官军大败张献忠于太平

【时李自成潜伏陕右贺一龙贺锦等跳梁汉东势差缓罗汝才虽败杨世恩罗安邦兵闻官军大集惧讨与其党整十万黑云祥混世王武自强小秦王白贵关索王承恩遣使乞抚杨嗣昌欲专剿献忠佯许之献忠屡败于兴安其党托天王常国安金翅鹏刘希原来降即令国安随左良玉进剿良玉大合诸军击贼于枸平关献宗败走良玉请从汉阳西乡入蜀追之嗣昌谋以陕督郑崇俭率贺人龙李国奇从西乡入蜀而令良玉驻兴安平利别遣偏将追剿良玉不从嗣昌檄良玉曰贼势必不能入川仍当走死秦界耳将军从汉阳西乡入蜀万一贼从旧路疾趋平利仍入竹房将何以御否则走宁昌入归巫与罗汝才合我以大将尾追促贼反楚非莫也良玉报曰蜀地肥衍贼渡险任其奔轶後难制且贼入川则有粮可因返郢则无地可掠其不复窜楚境明矣夫兵合则强分则弱今已留刘国能李万庆守郢若再分三千人入蜀即驻兴平兵力已薄贼来能遏之乎今当出其不意疾攻之一大创自然瓦解纵折回房竹间人迹断绝彼从何得食况郢兵扼之于前秦抚在紫兴扼之于右势必不得逞若宁昌归巫险且远汝才献忠不相下倘穷而归汝才必内相吞其亡立见良王已于二月朔入蜀界矣嗣昌得报不能夺比玉良驻渔溪渡崇俭旋引兵来会献忠营太平县之大竹河方移军九滚坪见玛瑙山峻险据之良玉抵山下贼已踞山巅乘高鼓噪良玉下马周览者久之曰吾知所以破贼矣分所进道为三已当其二秦兵当其一令曰闻鼓声而上两军夹击贼阵坚不可动鏖战久之贼大溃坠崖涧者无算俘馘渠十六人斩首千三百余级献忠妻妾皆被获湖广将张应元汪之凤追之数十里复败之献忠收余众南走扼于川将张令方国安又大败令时年七十余马上用五石弩中必洞胸军中号神弩将献忠转入深箐入险结营垒令分其军为五鼓勇薄贼而国安自他道逸去令独深入被围居绝坂屡射贼应弦毙者甚众水远士渴赖天雨以济围终不解襄阳监军佥事张克俭言于崇俭曰张令健将奈何弃之急令人龙应元之凤分道往援应元等先至令方与贼鬪呼声动容应元等应之内外夹击贼败去人龙亦至复与国奇等逐献忠连奏捷先後斩首千五百级败渠顺天王一条龙一只龙皆降当是时献忠窜走兴归山中秦楚师俱集诸将协心穷搜千余残寇可尽殲而崇俭以年衰乞骸骨诏令还关中留人龙国奇偕良玉讨贼良玉等连营百里憚山险围而不攻献忠因得与山民市盐刍米酪收溃散以自保】质实【竹房谓竹山房县宁昌谓大宁大昌归巫谓归州巫山并注见前枸平关亦曰东南关在兴安州西南四百里渔溪渡在西乡县东南三百六十里接四川界大竹河亦曰大竹渡在太平县北八十里九滚坪玛瑙山并在太平县北张克俭字禹型屯留人】

三月大风霾

【帝布服齐居祷之不正给事中左懋第言去秋星变朝停刑而夕即灭今者不然岂陛下有其文未修其实乎臣伏忍练饷之加原非得已乃明旨减兵以省饷天下共知之而徵饷者犹未省请自今因兵微饷预使天下知应加之数官吏无所逞其奸以信陛下之明诏而审决刑狱则以睿虑之疑信定诸因之生死凡疑于心与疑信者宜悉从轻典岂停刑可止彗解网不可以返风乎且陛下屡沛大恩四方死者犹枕藉盗贼未见衰止何也由蠲停者止一二存留之逋赋有司迫考成催徵未敢缓是以莫救于凶荒请于极荒州县下诏速停有司息讼专以救荒为务帝曰然于是上灾七十五州县新旧练三饷并停中灾六十八州县止徵练饷下灾二十八州县俟秋成督徵】质实【左懋第字萝石莱阳人】

夏四月逮江西巡抚解学龙及黄道周下狱寻遣戍【道周既贬江西按察司照磨学龙荐所部官推獎道周备至故事但下所司帝不覆閱大学士魏照乘者恶道周拟旨责学龙滥荐帝遂发怒立削二人籍逮下刑部狱责以党邪乱政并廷杖八十究党与欲寘之死词连编修黄文焕吏部主事陈大定工部司务董养河中书舍人文震亨并系狱监生涂仲吉上书讼救之通政使施邦曜不为封进而大署其副封曰书不必上论不可不存仲吉劾邦曜以副封上帝见其署语怒下仲吉狱而夺邦曜官尚书李觉斯以学龙道周无大罪予轻比严旨切责拟谪戍烟瘴帝犹以为失出除觉斯名移狱镇抚掠治者四乃复还刑部逾年尚书刘泽深等言二人罪至永戍止矣过此则论死论死非封疆则贪酷未有以建言者道周无封疆贪酷之罪而有建言蒙戮之名于道周得矣非我圣主覆载之量也夫陛下所疑者党耳党者见诸行事道周抗疏祇托空言一二知交相从罢斥乌睹所谓党而烦朝廷大法乎且陛下岂有积恨于道周万一圣意转圜而臣已定论悔之何及仍以原拟请乃谪戍广西】质实【解学龙字正帆扬州兴化人黄文焕永福人陈大定龙溪人董养河闽县人文震亨吴县人涂仲吉漳浦人施邦曜字尔韬余姚人刘泽深扶沟人】

以谢陞为礼部尚书陈演为礼部左侍郎并兼东阁大学士预机务

【陞以十二年秋 召为吏部尚书甫半载改礼部与演同入阁演庸才寡学工结纳初入館即与内侍通帝简命阁臣每亲发策观所条对覘能否中官探得帝所欲问数事密授演条对独称旨遂自礼部右侍郎转左擢居政府】

五月石砮女土司秦良玉败罗汝才于夔州

【初罗汝才惠登相求抚未决遂自南漳远安走大寧大昌官军扼于巫山复转犯夔州良玉驰救贼解去合官军邀击连败之斩千余级夺汝才大纛擒其渠东山虎副塌天等汝才走大宁督师杨嗣昌本楚人意欲瓠贼入蜀使楚地无贼乃创议以楚地广衍贼难制蜀险阻贼不得逞蹙之可全胜又虑蜀重兵扼险贼将毒楚调蜀精銳为己用蜀中卒自是益罢弱不足支巡抚邵节春愤曰令甲失一城巡抚坐令以蜀委贼是督师杀我也争之不能得于是贼皆窥蜀捷春驻重庆部下兵二万皆羸弱不可用所倚惟良玉张令二军遂檄良玉令退保重庆

良玉每对人叹息曰邵公不知兵吾一妇人受国恩谊应死独恨与邵公同死耳督师以蜀为壑无愚智知之邵公不以此时争山夺隘令贼无敢即我而坐以设防移我与令自近去所驻重庆仅数十里殊失地利贼据归巫巔俯瞰我营铁骑建瓴下张令营当其冲必先破令破及我我败尚能救重庆急乎闻者深然之】

发明【杨嗣昌督师剿贼当张献忠罗汝才屡衄之时不思遏其奔轶大会诸军而殄灭之而反驱之入蜀夫蜀号称天险贼入则险且为贼据乌在其能逐贼乎论者为嗣昌楚人欲纾楚患而因以蜀为壑其设心尚可问乎秦良玉一溪峒妇人顾能感激恩义提兵裹粮崎岖转鬬使邵捷春果从其争山夺隘之计巫峡夔门重关足恃何竟昧于地利坐以设防遂使贼骑建瓴下而莫之能制嗣昌之罪固不客诛若捷春者亦愧于妇人多矣】

姚明恭罢

【明恭出赵兴邦之门公论素不予柄用後乡人诣阙讼之明恭不自安请告归遂罢】

六月蔡国用卒

【国用入阁三载碌碌无所见是月庚午卒于官遣行人陈际泰护其丧归】质实【陈际泰字大士临川人与同邑章世纯罗万藻东乡艾南英以时文名天下其为文敏甚一日可二三十首先後所作至万首经生举业之富无若际泰者崇祯七年成进士年六十八矣又三年除行人至是护国用丧南行卒于道】

薛国观以罪免

【国观柄致一踵体仁所为导帝以深刻而才智弥不及操守亦弗如帝始颇信向之尝燕见国观语及朝士贪婪国观对曰使厰卫得人安敢如是东厰太监王德化方侍侧汗流沾背于是专察其陰私而国观匿史?金事乃发史?者为御史无行善结纳中官巡按淮扬尝掇巡盐事先後乾没赃罚银及盐课三十余万既擢少卿家居而侵盗迹颇露检讨杨士聪劾之得旨令?自陈遂讐士聪诬已请敕淮扬监督中官杨显名核奏寻给事中张焜芳复劾?侵盗事实又尝勒富人于承祖万金事发後遣家人齎重贄谋于扬州黠吏睢承吾改窜旧籍帝乃怒褫?职急携数万金入都至国观邸求解出疏攻焜芳谓已尝劾刘鸿训钱龙锡其遗党日谋报遂相构?又言焜芳弟炳芳官内阁中书向来诏旨漏泄皆炳芳为之阁臣多徇?拟严旨帝不听止夺焜芳官候讯及显名核奏上力为?解而不能讳者六万金?下狱会有兵事狱久不结瘦死?所携贄尽入国观橐为?家人所首告事大着国观请借助言在外羣僚臣等任之在内戚畹非独断不可因以武清侯李国瑞为言国瑞者孝定太后兄孙帝曾祖母家也国瑞薄庶兄国臣国臣愤诡言父贄四十万臣当得其半今请助国为军贄帝始未允因国观言欲尽借所言四十万者不应则勒期严追或教国瑞匿贄勿献折毁居第陈什器通衢鬻之示无所有嘉定伯周奎与有连代为请帝怒夺国瑞爵国瑞悸死有司追不已戚畹皆自危因皇五子病交通宦官宫妾诡云孝定太后已为九莲菩萨降神言帝簿外家诸皇子尽当殀俄皇五子卒

帝大怒急封国瑞七岁儿存善为侯尽还所纳金而追恨国观待隙而发国观素恶行人吴昌时及考选昌时虞国观抑已因其门人以求见国观伪与交驩拟第一当得吏科迨命下乃得礼部主事昌时大恨以为卖己与所善东厰理刑吴道正谋发丁忧侍郎蔡奕琛行贿国观事帝闻之益疑至是督师杨嗣昌有所陈奏帝令拟谕国观乃拟旨以进帝遂大怒下五府九卿科道议奏颇从轻议帝度科道必言之独给事中袁恺会议不署名且疏论吏部尚书传永淳徇私庇国观而微诋国观藐肆妒嫉帝不怪抵疏于地曰成何纠疏遂夺国观职放之归怒犹未已国观出都重车累累侦事者复以闻而东厰所遣伺国观邸者值中书舍人王陞彦至执之陞彦夙与国观交通为奸利一鞠尽得其状词所连及甚衆永淳奕琛皆与焉命下陞彦狱穷治恺再疏尽发国观纳贿诸事国观连疏力辨诋恺受昌时指使帝不纳至十月陞彦狱未成帝以行贿有据即命弃市而遣使逮国观国观迁延久不赴明年七月入都令待命外邸不以属吏国观自揣必不死八月初八日夕监刑者至门犹鼾睡及闻诏使皆绯衣蹶然曰吾死矣仓皇覓小?不得取苍头帽覆之宣诏毕顿首不能出声但言吴昌时杀我乃就缢】质实【杨士聪济宁人张焜芳会稽人李国瑞溧县人周奎苏州人庄烈帝周皇后父也吴昌时吴江人蔡奕琛德清人传永淳灵寿人袁恺聊城人王陞彦上海人昌时甥也】

秋七月总兵官孙应元等大破罗汝才于兴山汝才走巫山与张献忠合

【先是汝才在大寧前阻江为蜀将刘等所扼不得渡而献忠既败于玛瑙山窜走兴归山中左良玉追且及献忠遣其党马元利操重宝?良玉曰公所部多杀掠杨阁部猜且专无献忠即公?不久矣良玉心动纵之去乃潜走白羊山由汝才入宁昌故道折而西与汝才合献忠虽累败气益盛立马江岸有不前者辄斩之贼殊死鬪贵等战皆却贼毕渡屯万顷山归巫大震督师杨嗣昌乃上夷陵而檄蜀抚郡捷春扼夔门蜀大宁大昌界楚竹溪房县有三十二隘口嗣昌欲厚集兵力专守夔弃宁昌瞰贼捷春曰弃隘口不守是延贼入户也乃遣杨茂选覃思岱等出关分守二将不相得思岱潜杀茂选捷春令兼统其衆其衆相率去之降贼入隘守者溃贼夜斩夔关将士皆惊走新宁大竹旋?而汝才及惠登相越巴雾河攻开县为参将贺人龙等所破登相窜开县西汝才乃与小秦王混世王东奔人龙李国奇追之汝才等遁还兴山应元与副将王允成王之纶监军佥事孔贞会击之丰邑坪大破之斩首二千三百生擒五百有奇会嗣昌下招降令小秦王混世王皆降时称荆楚第一功惟汝才率其衆逸去仍与献忠合于是二贼渠复萃蜀中】质实【白羊山在兴山县西八十里万顷山在达州太平县东万顷池之西南接大寧界夔围在夔州府城南大竹唐分宕渠县东界置宋景佑三年废入流江县绍兴二年复置元至元中移治隣山县明属广安州以隶于顺庆府今径属顺庆府巴雾河在开县西丰邑坪在兴山县西北】

九月李自成走郧均遂入河南

【初自成潜伏关中间张献忠反谷城大喜将大集其衆以应献忠陕督郑崇俭团之令曰围师必缺自成乃乘间走往依献忠献忠欲杀之为罗汝才所解与自成羸五十焉五十妇人十令去自成谢曰以身相依足矣安用是也旋遁去收残衆稍稍自保时督师杨嗣昌驻夷陵檄令降自成出谩语官军围之鱼复山中自成大困欲自裁以养子双喜?而止贼将多出降刘

宗敏者蓝田鍛工也最骁勇亦欲降自成知之兴步入丛祠顾而叹曰人言我当成大事盍卜之神不吉若断我头以降宗敏诺三卜三吉宗敏还杀其两妻谓自成曰吾死从若矣贼党散去者闻之亦多杀妻子归自成自成乃尽焚辎重轻骑由郾均走河南河南大旱斛谷万钱饥民从自成者数万遂自南阳出攻宜阳杀知县唐启泰转犯永寧知县武大烈兴里居四川巡抚张论协力扞御论末子吏部郎中鼎延及从父治中赞继之有狱囚勾贼入都司马有义弃城走大烈鼎延等固守三日贼夜半登城执大烈自成以同乡欲活之大烈不屈索印不与乃燔灼以死鼎延匿智井免赞及子国学祚延死之主簿魏国辅教论任维清守备王正已百户孙世英并不屈死万安王采 亦被害贼移攻偃师一日而陷知县徐日泰大骂不屈为贼裔割死诸生张毓粹武同芳刘芳名刘芳世蕙之粹乔于昆蕙完醖王光显乔国屏王邦纪蕙相裔张一鹭张一鹏牛一元皆抗节死既又陷宝丰知县朱由械死之陷密县知县朱毓汀及里居太朴乡魏持衡举人马体健死之敏汀妾张氏及一女一孙臧获数人俱殉焉自成性猜忍日杀人斫足剖心为戏所过民皆保坞堡不下杞县人李信者故尚书李精白子也信以父丽名逆案思湔其丑尝出粟千石活饥民饥民德之称李公子会绳妓红娘子反携信去强委身焉信乘间逃归首于官官囚之红娘子来救饥民之德信者同时起曰李公子活我今有急乃其刼狱杀知县反挟信归自成因改其名曰岩而卢氏牛金星者亦举人也以磨勘被斥介医生尚网见自成喜其辩与谋议帐中潜归自泄坐斩已得末减仍往奔自成遂荐所善卜者宋献策长三尺上?记曰十八子主神器自成大悦岩因说曰取天下以人心为本请勿杀人收天下心自成从之屠戮稍减散所掠财物饷饥民民受饷者不辨岩自成杂呼曰李公子活我岩复造谣词曰迎闯王不纳粮使儿童?之以相煽动民方被剿饷练饷之害从自成者日衆矣】质实【鱼复汉县故城在奉节县东北因山为城周回七里一百四十步东高二百丈西北高一千丈南基连白帝山盖公孙述所造以城倚赤岬山亦谓之赤岬城唐啓秦掖县人武大烈临潼人任维清绛县人采 伊王支属袭封万安郡王居永寧徐日泰金谿人朱由械益府镇国将军常澈子敏汀亦明宗室张毓粹二子佐知县徐日泰固守城陷大骂俱被杀妻蕙氏与三女二孙赴井死武同芳见贼杀母喷血大骂支解死刘芳名妻张氏蕙完醖妻张氏王邦纪妻高氏并从死张一鹭之父亦骂贼死 本朝乾隆四十一年追谥武大烈忠烈徐日泰朱由械朱敏汀烈愍唐启泰张赞王正已魏持持节愍魏国辅任维清孙世英马体健等并皆入祠】

张献忠犯大昌总兵官张令死之遂陷四川诸州县【贼渠混天王等既就抚惠登相王光恩及整十万亦相继降督师杨嗣昌以湖广贼且尽而献忠在四川势渐炽遂以八月帅师而西时监军评事万元吉先入蜀令蜀将守巴巫诸隘秦将贺人龙李国奇楚将张应元汪之凤张奏凯专任追击及应元军击贼于夔州据土地岭而营人龙逗留不会师献忠侦应元部卒多新募悉衆乘攻应元之夙力战应元突围出之夙败走山中道渴饮斗水卧血凝臆死献忠势益张闻督师将自东至与汝才急趋观音岩守将邵仲光不能御遂陷大昌张令急扼之竹菌坪贼大至令力战中流矢死令为蜀中名将既败殁诸军皆夺气秦良玉与令相犄角趋救不及转鬪复败所部三万人畧尽军骑见蜀抚邵捷春曰事急矣尽发吾溪峒卒可得二万我自廩其半半饷之官犹足办贼捷春以仓无见粮谢其计不用良玉叹息归而捷春闻贼且至通江率兵守梁山贼以梁山河深不能渡自开县西走达州捷春退保县州扼涪江贼疾走陷剑州趋保宁将由间道入汉中秦将赵光远贺人龙扼之阳平百丈关贼不得过复突巴州应元诸军邀击之梓潼战小利既而岷蜀将曹志耀等力战却之降将张一州张载福陷阵死涪

江师遂溃贼方縣州成都告警捷春已为嗣昌所劾就远去抵重庆贼方攻罗江不克走縣州转掠至汉州去中江百里守将方国安避之去贼纵掠什邡县竹安县杀仁壽知县刘三策蹂躪德阳金堂间所至空城而遁全蜀大震贼循水道以犯简州资阳嗣昌由顺庆至果州徵诸将合击皆退缩徵左良玉兵使者九往返不至遂陷荣昌永川寻陷泸州分巡川南副使黄諫卿知州苏琮卫指挥王万春乡官韩洪鼎被执皆不屈死自成再入川诸将无一邀击者嗣昌虽屡檄令不行其在重庆也下令赦汝才罪降则授官惟献忠不赦擒斩者赉万金爵侯翌日自堂皇至庖湍遍题斩督师献者赉白金三钱嗣昌駭愕疑左右皆贼勒三日进兵会雨雪道断复戒期三檄人龙亦不至初嗣昌恶良玉骄亢私许人龙代为平贼将军既而良玉有玛瑙山之奏捷嗣昌难之顾为贺将军需後命人龙愠以情告良玉良玉亦愠于是两人俱跋扈不肯尽力嗣昌虽有才然好自用躬亲簿书过于繁碎军行必自裁进止千里待报坐失机会郅抚王鳌永諫之不纳乃上书于朝曰嗣昌用师经年荡平未奏此非谋虑之不长正由操心之太苦天下事总挈大纲则易独周万目则难况贼情瞬息更变今举数千里征伐机宜尽出嗣昌一人文牒往返动踰旬月号令与事机相左无怪乎挠败之屡闻也一年以来所矜为奇捷者惟玛瑙一役若株守督师节制左良玉当退保兴安无此捷矣然良玉不用命而反奏奇功则诸将必且有积轻督师之心所系于军政甚大臣以为嗣昌之驭诸将不必人人授以机宜但覆其机宜之当否执要以御繁决奇以制胜何至久延岁月老师糜饷哉帝令中枢申饬嗣昌亦不能从也】质实【土地岭在巫山县大昌故城西大昌之上中下马渡水浅地平以观音岩为第一隘竹茵坪在巫山县北涪江在縣州东自龙安府彰明县流入又东南入潼川府界亦谓之内水罗江本汉涪县晋置万安县唐改罗江明属縣州以隶于成都府 本朝顺治十六年并入德阳县雍正五年复置寻仍省什邡汉县明属汉州以隶于成都府今径属成都府仁壽西魏析武阳县西城戍地置普宁县隋改仁壽明属成都府

本朝雍正五年升资县为州以县属之德阳唐置明属汉州以隶于成都府 本朝改属縣州雍正五年升縣州为直隶州县仍属焉简州汉牛?县西魏改阳安隋于县置简州元省阳安入州明洪武六年降县正德八年复升州属成都府今因之资阳汉资中县後周改资阳元省入简州明成化二年复置属简州以隶于成都府 本朝初径属成都府雍正五年改属资州永川唐析璧山县地置元省入大足县明洪武初复置属重庆府今因之万元吉字吉人南昌人刘三策鄱阳人誓死守城比陷巷战被执骂贼支解死黄諫卿莆田人苏琮石埭人贼攻城悉力守御城陷正衣冠向阙拜泣坐堂上贼至被害阖署多殉节琮死既久无斂者杨嗣昌军割其首以充级闻者益切齿嗣昌韩洪鼎官彰州知州致仕家居父子骂贼死字按四川通志有縣州贡生杨可贤者为贼所执其子国柱方纠衆守州城贼因挟可贤诱降可贤临城呼其子曰汝慎固守毋念我贼杀之其後国柱亦战死又泸州生员方旭方伯元曾荐祚皆骂贼不屈死僧曦容者居泸州之七宝寺贼攻豹子峒曦容率乡勇杀贼千余相持久卒战死 本朝乾隆四十一年追諡张令苏琮忠烈刘三策黄諫卿王万春烈愍汪之凤韩洪鼎节愍杨可贤子国柱及方旭方伯元曾荐祚僧曦容并入祠】

冬十月彗星见

【十二月秋彗星见参分至星复见】

熊文灿伏诛

【先是文灿惧诛犹哓哓自辨以剿饷六十万不至为辞帝贬督饷侍郎张伯鲸秩卒寘文灿于法议者谓李自成之出车箱峡张献忠之反谷城皆坐失事机以致亡国而陈奇瑜与文灿主抚纵贼实罪首也然帝虽诛文灿颇不谓抚议误方杨嗣昌出督师御史张肯堂言从古戡乱之法初起则解散势成则翦除未有专任抚者今辅臣膺新命而出贼必仍用故技摇尾乞怜而失事诸臣冀掩从前败局必多方荧惑仍进抚议请特申一令专务剿除有进招抚说者立寘重典帝以偏执臆见责之于是嗣昌至军不数月复下招抚令为输帖万纸散贼中诸将益无鬪志遂蹈文灿覆辙云】质实【张肯堂字载宁松江华亭人】

十一月南京地震

十二月两畿山东河南山西陕西饥人相食

【是年帝尝发帑振京畿山东江北饥免河北三府逋赋又以畿内蝗发帑振被蝗州县并敕两畿山东河南山陕所在有司设法振济招徕流徙抚按躬行州县定殿最以闻而灾荒仍告剿饷之徵如故致饥民皆濒于死所练兵又不足用山西巡按御史陈纯德请恤部民冻馁因极陈抽练之弊言兵抽则人失故居无父母妻子之依田园邱壠之恋思归则逃逢敌则溃抽余者既以饷薄而安于无用抽去者又以远调而不乐为用伍虚而饷仍在不归主帅则归偏裨乐其逃而利其饷凡籍以营求迁秩皆是物也精神不以束伍而以侵饷厚饷不以养士而以求官伍虚则无人安望其练饷糜则愈缺安望其充此今日行间大弊也意欲讽帝除练饷苏民困帝不能用】质实【陈纯德字静生零陵人】

增天下关税

【崇祯初关税银每两增钱通崇文门河西务临清九江浒墅扬州北新淮安八关增五万两未几复增二钱惟临清仅半而崇文门河西务俱如旧户部尚书毕自严议增南京宣课司税额一万为三万南京户部尚书郑三俊以宣课所收落地税无几请税芜湖以当增数自严遂议税芜湖三万两而宣课仍增一万三俊悔疏争不能已及是以度支日绌增关税二十万两而商民益困矣】

【辛巳】十四年春正月官军败绩于开县张献忠复东走【先以监军评事万元吉大飡将士于保宁以诸军进止不一言于督师杨嗣昌攫前总兵官猛如虎为正总统张应元副之率军趋絳州分遣诸将屯要害而元吉自间道走射洪振蓬溪以待贼贼分屯安岳界使官军且至宵遁抵内江如虎简骑骁追之元吉应元营安岳城下以扼其归路及张献忠既陷泸州其地三面阻江惟立石站可北走元吉以贼居绝地将遣大兵南捣其营而伏兵玉蟾山蹙贼北窜永川逆而击之可尽殄永川知县已先遁城中止丞簿一二人如虎覓向道不可得夜宿西关空舍及抵立石贼已先渡南溪返走秦将贺人龙军隔水不击贼遂越成都走汉川德阳絳州劔州昭化至广元又走巴州嗣昌亲统舟师下云阳令诸将陆追贼诸将皆疲敝惟如虎

蹶其後所將止六百骑余皆良玉部兵骄悍不可制所过肆焚掠从良玉时多优闲不战改隶如虎驰逐山谷风雪中咸怨望謠曰想杀我左镇跑杀我猛镇时人龙兵已大噪西归所恃止如虎元吉深忧之贼自巴州转入开县官军追之遇诸黄陵城日晡雨作诸将请诘朝战参将刘士杰者素勇敢善战独前奋曰四旬逐贼今始及之舍弗击我不能也执戈先如虎檄诸军继之士杰所当辄摧陷献忠登高望官军见无後继密抽壮骑潜行箐谷中乘高大呼驰下良玉部兵先溃士杰及游击郭开如虎子先捷并战死如虎率亲兵力战部将挟上马溃围出旗纛军符等尽失乃收残卒往从嗣昌军方贼之窜南溪也元吉知贼必东犯请从间道出梓潼扼贼归路嗣昌不听檄诸军蹶贼疾追不得距贼远令他逸诸将力尽从泸州逐贼後尘贼折而东返归路尽空不可复遏嗣昌仓猝莫知为计顿足曰悔不用万监军言而贼已疾卷出夔门抵兴山攻当阳犯荆门嗣昌至夷陵檄良玉兵使十九返良玉撤兴房兵趋汉中若相避然贼所至烧驿舍杀塘卒东西消息中断】质实【射淇汉鄆县及广汉县地西魏置射洪县周改射洪蓬溪唐析方义县地置唐兴寻改蓬溪明并属潼川州

本朝雍正十二年升潼川为府射淇蓬溪仍属焉安岳後周置明属潼川州 本朝康熙元年省入遂宁县十年改入乐至县雍正七年复置属潼川州十二年属潼川府立石站在泸州治北明置立市驿于此玉蟾山在泸州治北六十里南溪即澄溪在泸州南门外源自宝山下入大江云阳汉朐忍县後周改安元升云阳州明洪武七年降县属于夔州府今因之黄陵城在开县东五里当阳汉县明洪武初属荆州府嘉靖中改属荆门州以隶于承天府 本朝改承天府为安陆府以县属之猛先捷榆林人本朝乾隆四十一年追谥先捷及刘士杰郭开烈愍】

李自成陷河南杀福王常洵

【初河南大旱蝗人相食民间籍籍谓先帝耗天下以肥王洛阳富于大内援兵过洛者喧言王府金钱山积而令吾辈枵腹死贼手南京兵部尚书吕维祺方侨居洛阳闻之惧以利害告常洵力劝其散财饷士不从维祺乃尽出私财设局振济及李自成连陷永宁宜阳参政王昌率衆至洛阳警备总兵王绍禹副将刘见义罗泰各引兵至而贼已抵城下常洵始出千金募勇士出城击贼贼稍却夜半绍禹亲军从城上呼贼相笑语寻作乱缚昌绍禹驰谕之不听挥刀杀守堞者烧城楼开北门纳贼维祺方分守北城遂被执有识之者曰子非振饥吕尚书乎我能活尔维祺不应乃反接之去常洵絶城出匿迎恩寺贼迹而执之遇维祺于道维祺呼曰王纲常至重等死耳毋屈膝于贼常洵瞠不语见贼渠于周公庙按维祺项使跪不屈延颈就刃死贼杀常洵勺其血杂鹿肉以食曰福祿酒两承奉伏常洵尸哭贼掙之去承奉呼曰王死某不愿生乞一棺收王骨齏粉无所恨矣贼义而许之桐棺一寸载以断车两人即其旁自缢死昌及知府亢孟桧乡官刘芳奕常克念郭显星韩金声王明扬萃举人来秉衡荀良翰皆抗节死通判白守文堕城死诸生黄调鼎负世子由崧以逃王妃邹氏亦得脱俱走怀庆贼发王邸金振济民火其宫三日不絶事闻帝震悼辍朝三日令河南有司改殡福王赐谥曰逮绍禹至京磔之贼乘胜围开封巡抚李仙风方在河北巡抚御史高名衡集衆登陴周王梈发库金百万两募死士杀贼烝米屑执梈以饷军凡七昼夜仙风驰逐开封副将陈永福背城而战斩首二千游击高谦夹击复斩首七百贼去屑密县时保定总督杨文岳遣总兵虎大威副将张德昌先率五千人救开封比渡河围已解乃会仙风于偃师以兵少未敢击贼待文岳军至与贼战鸣臯镇大破之贼东走寻攻南阳剧贼百余人冒雨薄城知府顔日愉击杀之几尽余贼

乃退城获全日愉手中一矢头项被二刃死城上贼既不得志去遂纵掠旁近州县会罗汝才不合于张献忠走内乡淅川与自成合拥其衆犯邓州文岳率大威击之战三捷斩首七百余级馘其渠二人贼遁去】质实【迎恩寺在河南府城西周公庙在河南府城西关鸣皋镇在嵩县东北六十里吕维祺殉节时年五十有五赠太子少保祭葬廕子如制维祺家子新安在河南府西七十里十六年新安陷家亦破弟乐平知县维祐字泰孺解职家居亦抗节死赠接察僉事王?昌吴桥人亢孟桧临汾人刘芳奕慷慨负智畧为昌乐知县解官归岁大歉人相食倾橐济之贼渐逼河南集为千城社佐有司保障及城陷缢死西城戍楼当此常克念为平阳推官有政声郭显星官翰林待诏韩金声官邯战知县王明官行人杨萃官辰州知府来秉衡荀良翰皆未仕秉衡为贼将刘宗敏所执令易服欲官之不可羈南郊民舍顾见其友谓之曰贼勒我以官我义不受辱恨母老子幼死不瞑目尔贼闻烧铁索加其颈终不从遂被杀并其母刘氏妾吴氏及幼子俱杀之黄调鼎字盐梅由崧元妃黄氏其姊也调鼎护由崧匿安国寺夜半乘间夺门出贼追之仓皇伏民家豕牢中侦贼遇乃出由崧体肥硕不能行调鼎负之北走抵苗家沟贼追且及调鼎方力惫不及忽闻马嘶声趋视之则由崧素所乘也遂扶掖上马疾趋渡河以免李仙凤高陵人周王?梏定王櫟十世孙杨文岳字斗望南充人顔日愉字华阳上虞人 本朝乾隆四十一年追谥吕维祺忠敬顔日愉忠烈王?昌亢孟桧刘芳奕常克念韩金声王明杨萃吕维祐白守文节愍郭显星来秉衡并入祠】

发明【常洵当危亡急遽之际金钱山积尚不从散财饷士之言坐令援兵怨詈城陷身亡其愚昧固不足责惟是明代分封遍天下始未尝不欲多建宗支屏藩王室及乎扰攘之时初不闻有扞御一方为国効臂指之助徒使盗贼临城惨遭屠戮一时诸王不惟不能裨于国且致不能庇其身封建之不足恃非其彰明大着者哉至福王分藩神宗耗天下之力以恣其请方谓带砺山河长享富厚而岂知益以结怨人民为盗贼所藉口爱之适以害之其流毒至于此极耶】

二月张献忠陷襄阳杀襄王翊铭

【杨嗣昌以襄阳为军府贮饷金甲器各数十万仞深沟方洫而三环之造飞梁设横柵陈利兵而饥河出入必以符验然是时河南北大饥流民就食襄汉者日数万又所招降诸贼既得免死牌莫肯散自择便地连营数百里监军僉事张克歛深忧之上书嗣昌曰襄阳自古要区今筦钥猷陵眎昔尤重近两河饥民云集及新旧降丁逼处其间一夫叫呼即足致乱嗣昌恃城壕之固不以为意报曰监军何怯耶及献忠出川郧抚袁继威统所部邀击献忠不得逞乃留罗汝才缀郧兵自率轻骑一日夜驰三百里杀督师使者于道取军符夜叩襄阳城门克俭不能辨贼二十八骑遂入夜半从中起焚襄王府居民皇见火以为满城皆贼夺门出城溃克俭仓皇奔救为贼所执大骂死推官邝曰广摄县事李大觉游击黎民安死焉初献忠败于玛瑙山其妻妾敖氏高氏被获他将搜山又获其军师潘独鳌皆系襄阳狱知府王承曾年少而佻每夕托问贼中情形与二氏相笑语狱吏又多纳贼金禁防尽弛独鳌脱桎梏恣饮嗣昌移牒戒之承曾笑曰贼岂能飞至耶至是贼争毁户挈二氏与独鳌出承曾乘夜走迟明贼大至索知府不得执襄王翊铭于南城楼属卮酒曰吾欲借王头使嗣昌以陷藩伏法王其努力尽此酒遂与贵阳王常法同遇害火城楼焚其屍贼去仅拾颅骨数寸妃妾辈死者四十三

人福清王常澄进贤王常淦走免事闻帝震悼命所司备襄王丧礼谥曰忠贼既陷襄阳连陷樊城当阳破郢县杀知县邵可灼诸生王敬臣佐有司杀贼力竭赴井死子裔昌从之贼复招汝才东下合兵入光州攻商城知县盛以恒与乡官杨所修淇允衡马刚中段增辉乘墉固守适雨雪守者冻馁不能战以恒督家衆射贼十七人坠马贼怒并力攻矢中以恒右额犹裹创御贼贼破北门入家衆巷战死且尽乃被执骂贼不屈为贼支解其孙觉殉之典史吕维显教谕曹维政及所修允衡刚中段增辉诸生卢绍德黄焯陈廷对陈廷璋郑光启刘泽长杨泽长皆死贼遂疾驰犯信阳城陷知县高孝志训导李逢旭程所闻里居静海知县张映宿布衣张士杰等死之又陷光山典史魏光亦死之于时罗山息县固始皆残破贼复分兵犯茶山应城随州随尝被贼居民索然知州徐世淳预知贼必复至集士民誓以死守会岁大祲士多就食粥廩叹曰可使士以绥失礼乎分粟振之溃兵过随索饷世淳单骑入见军帅曰军食不供有司罪也杀我足矣请械我以见督师帅不能夺歛衆去比贼来犯世淳寝食南城醺楼晓夜固守告急于巡抚宋一鹤一鹤遣兵来援为监司承天者邀去守月余援絶力穷贼急攻南城而潜兵堕北城以入世淳命子肇梁埋印廨後勒马巷战矢贯頤耳鼻横断坠马乱刃所死肇梁奔赴且哭且骂贼将杀之呼州人告以埋印所乃死既而贼伪张左良玉帜入泌阳知县王自昌骂贼死再攻应山不克去攻郢阳按察使高斗枢遣游击王光恩及弟光兴分扼之战频捷贼不敢犯光恩者均州降渠小秦王也斗枢察其诚招入郡共城守斗枢善谋光恩善战郢城危而复全】质实【郢县汉置後省北魏复置龙山县隋改郢城元复为郢县明属汝州今因之襄王翊馆襄宪王贍善六世孙张克俭长治人是年正月河南陷巡抚李仙凤与巡按高名衡互相许廷议逮治仙凤擢克俭代之未开命及于南邗曰广番禺人妻子女俱遇害死李大觉字觉之金谿人知谷城县兼署襄阳县闻变繫印于肘缢死堂上黎民安大觉同县人城中火起率所部千余人搏战矢尽被缚大骂死王承曾忧邑人贵阳王常法兰阳王翊镐第三子福清王常澄襄王翊铭第二子进贤王常淦兰阳王翊镐第四子邵可灼建德人盛以恒潼关卫人迁开封同知将行商城士民闻贼且至留之守御遂殉节杨所修故魏忠贤党也历左副都御史入逆案赎徒为民至是骂贼死淇允衡官阳和兵备副使分守商城北门力战死马刚中字九如除大同知县行取授检讨乞假归贼入大骂被磔死段增辉字含素为诸生以学行称朝廷下保举令被荐不乐为吏拟除教授未谒选归遇变骂贼死高孝志江都人张士杰年十八贼欲杀其父求以身代贼杀之而舍其父徐世淳字中明嘉兴人南京兵部侍郎必达子妾赵氏王氏及臧获十八人皆从死王自昌南宁人高斗枢字象先鄞县人本朝乾隆四十一年追谥马刚中忠烈张克俭忠节盛以恒邗曰广黎民安洪允衡高孝志徐世淳王自昌烈愍邵可灼李大觉张映宿节愍王敬臣王裔昌段增辉吕维显曹维政卢绍德黄焯陈廷对陈廷璋郑光启刘泽长杨士琦李逢旭程所闻张士杰魏光远并入祠】

三月杨嗣昌有罪自杀

【嗣昌在夷陵闻襄陵陷警悸上疏请死至荆州朝于惠王谢不见谒者传语曰先生惠顾寡人愿先之襄阳谓襄阳之破罪在嗣昌也嗣昌慙且恚复闻洛阳已于正月被陷福王遇害益忧惧遂不食以卒时御史张肯堂以嗣昌督师无状上言流寇隳城破邑往来纵横如入无人之境此嗣昌受事前所未有目前大计在释嗣昌之权疏入而嗣昌已死矣河南巡抚袁继咸巡按高名衡以自裁闻帝甚伤悼之顾以廷臣方交章论列不得已下九乡议罪侍郎蒋德

璟曰嗣昌倡聚歛之议加剿饷练饷致天下民穷财尽胥走为盗又匿失事饰首功宜按仇鸾事追正其罪乃会诸大臣上议请坐失陷城寨律斩当戮屍帝传制曰故辅嗣昌奉命督剿无城守专责以陷城罪督辅非通论且临戎二载屡奏捷功尽瘁殒身勤劳难泯特命昭雪嗣昌罪赐祭归其丧于夷陵给事中熊汝霖疏争之言杨嗣昌不罪卢象昇未褒殊挫忠义气且言为嗣昌画策练饷驱中原万姓为盗者给事中沈迅也为嗣昌运筹以三千人驻襄阳城破辄走者监纪主事余爵也为嗣昌援引遭襄藩之陷重赂陈新甲嫁祸郧抚袁继咸者今解任候代之宋一鹤也皆悞国之臣宜罪不听帝始终眷嗣昌因憾前陕西总督郑崇俭剿贼四川甫奉还関中诏即撤兵不与嗣昌犄角平贼逮至立弃市而以丁启睿为督师启睿者嗣昌所荐为陕西总督代崇俭者也本庸才不知兵为督抚时奉督师期会无功过及督师任重即莫知为计受命出潼关将由承天赴荆州湖广巡按汪承诏言大寇俱集河南荆襄幸息警无烦大军尽匿汉津船启睿至五日不得渡折而向邓州州人闭门诟过内乡长吏惧其扰亦不纳军行荒山间割焉羸燎以野草土啗不饱启睿闻李自成方围开封有衆七十万憚不敢援张献忠在光山固始间少弱乃谋于诸将曰上命我剿豫贼此亦豫贼也遂檄左良玉破之於麻城斩首千三百开封日告急则曰我方有事于献忠不赴矣】质实【惠王常润明神宗第六子天启七年就藩荆州熊汝霖字雨殷余姚人沈迅莱阳人余爵禹州人丁启睿永城人汪承诏宁国人】

发明【李自成张献忠屡经大败盜衆散亡而脱身一呼从者即至数万是流賊之不可灭由于饥民从賊朝夕可以啸聚而饥民之从賊实由於民穷财尽胥徒为盜耳蒋德璟归罪于剿饷练饷之议可谓探本之论杨嗣昌惧罪自裁得逃显戮庄烈即不与仇鸾同论亦何至诏旨昭雪赐祭以宠荣之耶且谓督师无城守责其说尤不经若陷城失地均非其罪则督师之任竟何事哉郑崇俭当玛瑙山之役军威方振不以此时协力殄賊而遽告年衰欲图委卸洵不得为无罪然当时既不深斥其乞罢之非翻令帅师归陕泊乎一年之後失地?藩相随属乃始追憾撤兵移嗣昌之罪以诛崇俭藉以塞言者之口且自文其始终眷许嗣昌之意亦可谓拂人之性也已】

我

大清兵围锦州

【十三年秋我大清兵攻锦州克其城西九台小凌河西岸二台乃勒兵为两翼逼城而营城中兵谋龙我镶蓝旗营侦卒以告贝子罗托公吞齐等击败之总兵祖大壽益困守不敢出未几总督洪承畴率总兵曹变蛟左光先马科吴三桂刘肇基以马步兵五万驰援我军迎击于黄土台及松山杏山承畴大败遁去大清兵遂还屯义州承畴以变蛟光先科兵新挫衄遣入关休养留三桂肇基兵驻关外请解肇基任代以王廷臣遣光先西归代以白广恩部议咸从之承畴又请调旁近边军合关内外见卒十五万人备战守且言师行粮从必刍粮足支一岁然後可以益兵帝然之敕所司速措给徵宣府总兵杨国柱大同总兵王朴各拣劲卒赴承畴军调用及是睿郡王多尔袞肃郡王豪格复率兵围锦州毁堑填濠声援断絶有卒逸出传大壽语乞援戒援兵毋轻战结车营以拒承】

【畴乃偕变蛟科广恩朴通先後出关合三桂廷臣凡八大将兵十三万马四万并驻宁远仰转饷未发帝忧之召兵部尚书陈新甲及阁臣问策持议两端莫敢决乃遣职方郎中张若麒就承畴行营计议】质实【张若麒胶州人】

夏五月范复粹罢

【薛国观既罢复粹代为首辅帝召见廷臣语及福王泣下复粹曰此乃天数帝曰虽气数亦赖人事挽回复粹不能对寻致仕去】

六月两畿山东河南浙江湖广旱蝗山东盗起

【两畿及各直省连岁告炎土贼蠭起给事中詹兆恒言燕齐二千里间寇盗纵横行旅阻绝四方饷金滞中途者至数百万请急发京兵剿灭楚豫之疆尽青磷白骨新徵旧道断无从出乞多方蠲贷帝并采纳给事中左懋第督催漕运道中驰疏言臣自静海抵临清见人民饥死者三疫死者三为盗者四米石银二十四两人死取以食臣自渔台至南阳流寇杀戮村市为墟其他疾疫死者屍积水涯河为不流振捄安可不速臣有事河干一载每进父老问疾苦皆言练饷之害三年来农怨于野商叹于途如此重????所练何兵其效安在奈何使衆心瓦解一至此极乎又言臣抵宿迁见督漕臣史可法言及所在谷直翔贵河南石米至百五十两漕储多逋朝议不收折色需本色今淮凤间麦大熟如收两地折色易麦转输于漕运大使帝即命议行而是时山东盗李青山方炽运道为梗乃改总河张国维为兵部侍郎兼督淮徐临通四镇兵护漕运李青山者本屠猪儿拥衆数万据梁山泺遣其党分扼韩庄等八闸寻旧辅周延儒赴京青山谒之言率衆护漕非乱也延儒许言于朝授以职而青山竟截漕舟大焚掠迫临清国维统所部兵击之会京营总兵官黄得功副将周遇吉破贼凤阳旋师遇山东合击之于壽张追至东平歼灭几尽青山遂降献俘于朝磔诸市】质实【梁山泺在壽张县东南梁山山下即古大野泽之下流汶水自东北来与济水会于梁山之东北回合而成泺宋时决河滙入其中其水益大故政和中剧贼宋江结砦于此其後河徙而南泺亦渐淤迨元开会通河引汶绝济明筑戴村坝遏汶南流岁久填淤遂成平陆今州境积水诸湖即其余流也韩庄牐在峰县东南运河上自沛县界之夏镇牐而南七十里为韩庄牐又二十里为德胜牐又二十里为张庄牐又八里为万年牐又十里为丁庙牐又六里为顿牐又二十里为侯迁牐又八里为台庄牐此峰县境内之八牐为卫漕要地詹兆恒字月如广信永丰人】

秋七月洪承畴援锦州次于松山

【我大清兵围锦州久环城列礮城中屡出兵皆败还洪承畴集八大将之师驻于宁远未敢进尚书陈新甲请分四道进兵承畴以兵分力弱意主持重帝以为然而新甲坚执前议及职方郎中张若麒至军素狂躁见诸军大集谓围可立解密奏上闻新甲复贻书趣承畴承畴激于新甲言又奉密敕不敢持前议若麒益趣战承畴乃偕辽东巡抚邱民仰东协总兵曹变蛟等统兵救锦州是月二十八日壬寅次松山越三日甲辰宣府总兵杨国柱先进】

【大清兵四面呼降国柱太息语其下曰此吾兄子振昔年殉难处也吾独为降将军乎奋勇格鬪中矢卒承畴以山西总兵李辅明代之令与山海关总兵马科等分营松山东西北三面变蛟营松山之北乳峰山之西间列七营环以长濠而自率兵据松山城为久拒计睿郡王多尔袞肃郡王豪格以闻】

【太宗文皇帝即亲统大军往征之时】

【患鼻衄因行急衄益甚三日方止诸王贝勒奏请徐太宗行】

【谕曰行军制胜利在神速朕恐承畴等闻朕亲至将潜遁如不逃破之如纵犬逐兽易于拾取何可徐行于是昼夜遄程自盛京疾驰而进六日抵松山盖八月二十日壬戌也遂陈师于松山杏山之间】

【谕衆曰如承畴兵来犯近则击之倘尚远而先往迎战致累于衆与败阵无异变蛟等见我太宗环松山而营大惧欲战则力不支欲守则饷道已絶谋突围走翌日癸亥变蛟等八大将率兵犯我前锋汎我军击败之乘胜追至塔山而还获其笔架山积粟遂濬濠断松山杏山路是夜变蛟撤其七营近松山城而营甲子马科等犯我镶红旗汎我军击却之既还营科等分兵击我後】

【太宗复令转战张黄等率数人往来指挥科等兵望见皆披靡太宗谕诸将曰今夜科等兵必遁命护军统领鳌拜等率左翼四旗护军列于右翼汎地右翼四旗护军及骑兵前锋蒙古兵鳞次布列抵于海滨见科等兵遁者百人则以百人追之千人则以千人追之如遁者衆多则蹶後追击直抵塔山又命蒙古固山额直库鲁克达尔罕阿海等设伏杏山睿郡王多尔袞等兵往锦州至塔山大路横击之是夜大同总兵王朴先遁科辅明及宁远总兵吴三桂密云总兵唐通辽东总兵白广恩相继走科等兵大溃我军垒出邀击翌日乙丑我】

【太宗命镇国将军巴布海等往截塔山路武英郡王阿济格亦往塔山截击之倘溃卒欲越塔山即率衆自宁远直抵连山追击命贝子博罗扼桑噶尔寨保固山额真谭泰驻师小凌河直抵海滨絶其归路蒙古固山额真伊拜等屯杏山城四面击败兵之奔入城者副都统多济里蒙古固山额真恩格图等分击诸路溃卒都察院承政阿什克達尔等往杏山相视驻营形势察核俘馘多寡巴布海等既受命以次进发科等兵方穷窜为我军所邀激横屍遍野朴三桂引残卒奔据杏山变蛟及王廷臣闻败驰至松山与承畴固守寻】

【太宗移营松山濬濠围之变蛟乘夜屡突围不得出遂败入城太宗知朴三桂必窜必由高桥及桑噶尔寨堡命内大臣锡罕等及四子部落都尔本各率精兵二百五十伏其地朴三桂部卒千人果自杏山遁出遇锡罕等伏兵败之多所斩获比还】

【太宗率亲军至高桥东指示贝勒多托令设伏以待朴三桂败奔至高桥伏四起尽殲其衆朴三桂仅以身免是役也承畴所统士卒十三万先後斩馘五万三千七百余入自杏山迤

南至塔山赴海死者无算我军伤止八人余无挫衄者自是锦州围益急而松山被围应援俱绝矣】质实【乳峰山在锦州东南十六里笔架山有二小笔架山在锦县西南五十五里峙海中状如笔架潮退有石如桥广三尺长里许上有广元寺大笔架山在锦县西南五十八里与小笔山俱峙海中潮退有石如桥广八丈长四里许桑噶尔塞堡即大兴堡也在锦县西南五十里以桑噶尔塞尝居此故名高桥在锦县西五十里邱民仰字长白渭南人杨国柱死事状闻赠恤如制国柱二子俱歿妻何氏以所遗甲冑弓矢及战马五十匹献于朝庄烈帝深嘉叹命授一品夫人有司月给米石饩之终身 本朝乾隆四十一年追谥国柱烈愍】

临清运河涸京师大疫

【帝命设局给医药以辽病者时运道自枣林插溯师家庄频年患淤浅遭岁大旱东平平阴肥城诸泉渐塞南望湖淤临清河遂涸总督侍郎张国维言南旺水本地脊惟藉泰安新泰莱芜宁阳汶上东平平阴肥城八州县泉源由汶入运故运河得通今东平平阴肥城淤沙中断请亟濬之报可】质实【枣林插在鱼台县东北四十里师家庄济宁州天井插东南五十四里为鲁桥插师家庄插在鲁桥北八里平阴隋析卢县地置榆山县寻改平阴明属东平州以隶于兖州府 本朝雍正十三年改属泰安府新泰三国魏置明属泰安州本朝雍正十三年升泰安为府县仍属焉】

八月左良玉败张献忠于信阳

【献忠既克郧阳不克去拔郧西羣盗附者万计遂东肆掠献忠自玛瑙山之败心畏良玉及是屡破郡县虽小挫于麻城未衄遂有骄色再攻信阳良玉蹶及之大战斩其渠沙甲夺马万余匹降贼数万献忠伤股乘夜东奔良玉急追之会大雨五昼夜江溢道绝官军不能追献忠走免已复出商城将向英山又为副将王允成所破衆散且尽所从止数十万时罗汝才已先与自成合献忠遂投自成自成欲以部遇之献忠不从自成欲杀之汝才曰不如留之使扰汉南分官军兵力阴与献忠五百骑曰急东走此非若所当留也因遁去道纠土贼斗谷瓦罐子等势复盛】

九月陕西总督傅宗龙溃于新蔡死之

【先是杨嗣昌死尚书陈新甲荐宗龙才帝未有以应也良久曰朴忠吾以夙负用之宜尽死力遂释之出狱以兵部右侍郎兼右佥都御史代丁启睿总督陕西三边军务是时启睿督师讨贼方畏避李自成不敢击闻宗龙为秦督遂乞改敕书令宗龙专剿自成宗龙既至陕与陕抚汪乔年议括关中兵饷以出然属郡旱蝗已不能应宗龙握乔年手歔歔而别以是月四日率川陕兵二万出关次新蔡与保督杨文岳会贺人龙李国奇将秦兵虎大威将保兵共结浮桥东渡汝合兵趋项城自成罗汝才亦结浮桥于上流将趋汝宁硯两督兵至尽伏精锐于林中阳驱诸贼自浮桥西渡人龙使後骑觇贼还报曰贼向汝矣结浮桥将渡矣宗龙文岳会诸将并进中道一骑驰而告曰贼毕渡矣复进一驰骑而告曰贼半渡矣三分渡其二分矣宗龙文兵曰驱之走三十里至孟家庄人龙大威曰马力乏矣诘朝而战止兵为营诸军弛马甲

植戈鏖散行垆落求刍牧贼觐之尘起于林中伏甲并出搏官军人龙有马千骑不出国奇麾下兵迎击之不胜秦兵保兵俱溃人龙大威奔沈邱国奇从之三帅师溃宗龙文岳合兵聚粮屯火烧店贼以步兵攻其营诸军燃大炮震死贼百余贼引去宗龙军西北文岳军东南尽堑而守文岳兵霄溃其部将挟又岳骑而驰夜驻项城旋又奔陈州宗龙复分秦兵立营于东南诸将分壁当贼垒寻檄人龙国奇还兵救二帅不应宗龙曰彼避死宜不来吾岂避死哉语其麾下曰宗龙老矣今日陷贼中当与诸军决一死战不能效他人卷甲走也召裨校李本实穿堑筑垒以拒贼贼亦穿濠二重以围之未几食尽宗龙杀马羸以饷军马羸尽杀贼取其屍分噉之守八日矢石俱尽宗龙简士卒夷伤之余有衆六千夜半潜勒诸军突贼营杀千余人溃围出诸军星散宗龙徒步率诸军战且走未至项城八里贼追及之执宗龙呼于门曰启门纳秦督宗龙大呼曰我秦督也不幸堕贼手左右皆贼耳贼唾宗龙宗龙骂贼曰我大臣也杀则杀耳岂能为贼赚城以缓死哉贼抽刀击宗龙中其脑而仆斫其耳鼻死城下人龙国奇兵溃归陕贼遂屠项城分兵屠商水挟沟遂攻叶县副将刘国能方守叶国能为盗时与自成汝才等约为兄弟及国能归正自成等深恨之围其城四面力攻国能不能支城遂陷被执贼犹好谓之曰若我故人也何不降国能瞋目骂曰我初与若为贼今则王臣也何故降贼遂杀之知县张我翼亦死帝闻项城叶诸县相继陷宗龙败歿叹曰若宗龙可谓朴忠矣予谥忠壮赠兵部尚书加太子太保廕子锦衣世百户赐祭葬国能亦赠恤如制而擢乔年兵部右侍郎代宗龙总督部檄踵至趣出关讨贼关中精锐尽歿于项城矣乔年曰兵疲饷乏方张之寇我出如以肉餵虎耳然不可不一出以持中原心乃收散亡调边卒得马步三万人率人龙等出关】质实【孟家庄在新蔡县火烧店在项城县南汪乔年字岁星遂安人张我翼涇阳人本朝乾隆四十一年追谥刘国能烈愍张我翼节愍】

封子慈烜为王

【先是帝谕礼臣曰朕第三子慈烜年已十龄敬遵祖制宜加王号但既受册封必具冕服而会典开载年二十五始行冠礼十龄受封加冠二礼可并行乎于是礼臣历考典故参稽经传以奏乃册封为定王选新进士为检讨国子助教等官为待诏充讲读官以中书舍人充侍书至十二岁行官礼明年三月封第四子慈烜为永王又二年流贼陷京师二王皆不知所终】质实【慈烜周皇后生慈烜田贵妃生】

召周延儒贺逢圣复入阁

【初延儒里居颇从东林游善姚希孟罗喻义既陷钱谦益遂讐东林及主会议所取士张溥马世奇等又皆东林也归後失势心内慙而体仁益横比体仁去後张至发薛国观相继当国与杨嗣昌等并以媚嫉称一时正人若刘宗周郑三俊黄道周等皆得罪溥等忧之说延儒曰公若再相易前辙可重得贤声延儒以为然溥友吴昌时为交关近侍逆案中旧辅冯铨复助为谋会帝亦颇思旧臣而国观适败因与贺逢圣复召入阁溥等要以数事延儒慨然曰吾当銳意行之以谢诸公既入朝悉反体仁辈弊政首请释漕粮白糟欠户蠲民间积逋凡遭兵荒诸州县减见年两税苏松常嘉湖诸府大水许以明年夏麦代漕粮召还言事迁谪诸臣李清等帝皆忻然从其请尊礼之特重明年岁旦朝会帝进延儒等而揖之曰朕以天下听先生

然延儒实庸弩无材畧且性贪门下客盛顺董廷献因缘为奸利给事中章正宸因言陛下隆礼阁臣愿阁臣积诚以格君心毋缘中官母修恩怨母以宠利居成功母以爵禄私亲昵语皆风刺延儒不悦】质实【马世奇字君常无锡人李清字暎碧大学士春芳五世孙】

冬十月癸卯朔日有食之

十一月李自成陷南阳杀唐王聿錡总兵官猛如虎死之

【初如虎随杨嗣昌下荆州诏移驻南阳南阳于二月中尝被贼为参议艾毓初知府顔日愉所却至是自成用宋献策计欲取南阳以图关中复率大衆来寇敏初如虎等坚守贼攻入南门会总督杨文岳援军至贼引退文岳去贼复攻之如虎凭城战杀贼数千食尽援絶城乃陷如虎犹短兵大呼冲击血盈袍袖北面叩头谢自称力竭遂遇害唐王聿錡被杀毓初题语城楼自缢死知县姚运熙主簿门迎恩教谕李献吉训导杨气开亦死之贼遂纵兵覆所属州县攻陷邓州知州刘振世吏目李国玺千户涂承廕李锡镇平知县董其硕典史杜日泰南召知县尚用光内乡知县龚新新野知县韩醇主簿江朝瀛典史惠永贞泌阳知县姚昌祚主簿熊天伦典史雷晋暹武职王衍范钱继功海成舞阳知县潘宏俱死难其诸生死者有邓州丁一统张五美王钟王子章海寛传彦唐县许曰琮内乡许宣及二弟案宫舞阳诸生陈预抱及二弟豫养豫怀为最着贼乘胜将复窥开封连陷其所属许州禹州陈留通许尉氏洧川鄢陵临颖长葛新郑汜水十余城于是许州知州王应翼都司张守正举人魏完真诸生李光间李文鹏王应鹏陈留典史邵大济训导杨道升乡官刘文耀通许知县费曾谋尉氏知县杨一鹏洧川知县柴荐禪鄢陵知刘振之典史杜邦举临颖千总贾荫序长葛教谕欧阳植典史杜复春举人隶千绪诸生张范孔新郑知县刘孔辉汜水举人张治载马德茂等亦死难禹州故有徽王府嘉靖时王载埭有罪爵絶其支属延津郡王等皆在禹金事李乘云分驻马乘云誓死扞贼贼多毙于炮俄以十万衆攀堞登执乘云使跪乘云怒叱贼贼梓而杖之大骂不絶声缚诸树攒射之骂不已断其舌乱刃交下而死延津郡王等同被害而商水至是再陷前後知县王化行姚文衡乡官张质皆死之巡抚高名衡总兵陈永福驻兵开封不能救开封周邸图书文物之盛甲他藩士大夫殷富蓄积充牣自成必欲得而甘心焉乃大集其衆再围开封名衡等力拒之永福射自成中目礮殪其渠数人自成益怒自成每攻城不用古梯冲法专取翎觔得一甌即归营卧後者必斩取甌已即穿穴穴成初仆容一人渐至百十人次第传土以出过三五步留一土柱击以巨絙穿毕万人曳絙一呼而柱折城崩矣名衡于城上凿横道听其下有声用毒秽灌之多死贼乃即城坏处用火攻法实药瓮中火燃药发当者辄糜碎名曰放迸攻久之城半圯贼用放迸法以攻铁骑数千驰噪伺城颓即拥入城城故宋汴都金南迁时所重筑也厚数丈土坚火外击贼骑多殲自成骇而去当是时自成蹂躪河南张献忠自四川突湖广寻亦扰河南穷窜而之江北江北贼贺一龙左金王等据英霍二山暑入秋出以为常河南北土贼李际遇袁时中陕西土贼窦开远等亦复大炽所在官民被害者甚衆其可纪者应天则援剿副将戴国柱参将张宝山古道行英山知县高在仑潜山知县李孕嘉典史沈所安徐州乡官滕九茺沛县布衣张凤世霍山布衣宋贞及吴时道张大翼胡怀信时际顺河南则汝州知州钱祚徵指挥钱继美吏目朱任卿百户梁翰成诸生王阳布衣朱续川鲁山举人袁象斗陈州指挥孙绍武登封知县鄙廷海灵宝知县朱挺指挥许佳允伊阳训导任中蛟陕

西则淳化诸生葛竹溪环县诸生曹天心四川则巴州同知张连曜德阳知县龚之安垫江知县荆伟成都乡官周敏中等湖广则随州判官余塙兴山典史张達益阳贡生潘若洙弟若鸿诸生温昆来锺鸣谦等并先後殉节而总兵贺人龙子大明击贼灵宝山中石阡推官余士泰上计次襄阳亦皆死于贼】质实【镇平汉安衆县後废为穰县北乡元置镇平县明属南阳府今因之新野汉县唐省入穰县元复置明属邓州以隶于南阳府今径属南阳府洧川金析尉氏县置明属开封府今因之长葛隋析长社县置明属许州以隶于开封府今升许州为直隶州县仍属焉垫江西魏析临江县地置明属忠州以隶于重处府今升忠州为直隶州县仍属焉益阳汉县元升州明洪武初复为县属长沙府石阡蛮地元置石阡长官司明永乐十一年置石阡府隶贵州省今皆因之聿模唐王聿键弟艾毓初来脂人门迎恩辽州人李猷吉宝丰人杨气开虞城人刘振世丰润人李国玺丰县人锺其硕成县人尚用光平庆州人龚新南昌人韩醇四川人江怀瀛歙县人惠永贞朝邑人姚昌祚临晋人前令王自昌为贼所害昌祚代之城再?手斩数贼力不支死子在绅兄子在钧同殉节熊天伦顺天人被执不屈全家死雷晋暹与知县姚昌祚同战死潘宏字若樾淮安山阳人贼将攻舞阳宏谕士民共守诸生虑贼屠城请委曲纾祸宏叱之去贼薄城发礮击之多毙有小校善射屡却贼诸生潜遣人约降贼复至宏作告先圣文自誓诸生潜开门缚宏以献贼索印宏不予且胁降怒骂不屈乃支解之子澄润痛愤大哭赴井死许曰琮早丧父母歿庐墓三年城破遁居南山贼徵之不出胁以死鏹其背曰誓不从贼遂呕血而死许宣及二弟案宫慷慨好义贼?邓州宣兄弟约里中壮士直入其城擒伪官家于内乡之野结许家寨以御贼贼怒攻破之案从母常氏先投井死宣宫皆冒贼被杀宫妻锺氏案妻陈氏并自经其妹亦骂贼被杀时称许氏七烈陈豫抱母段氏早寡抚豫抱及其弟豫养豫怀皆为请生力田好学善承母志贼?舞阳母先赴井三子从之豫抱妻黄氏携其子默通豫养妻马氏携默恒默言俱从之三世九人同一井死王应翼京山人子国同死节邵大济陕西人杨道升安阳人刘文耀由宝丰训导擢巩县教谕未仕以事赴开封道于陈留遂还家遇贼骂不屈死子福穎从之费曾谋铅山人少师宏裔孙知通许甫四旬贼猝至抱印投井死杨一鹏河津人知尉氏数月政声四起城破骂贼死柴荐禋江山人刘振之字而强慈溪人有奸人素通贼倡言鄢陵城小宜速降振之怒遂叱退之典史杜拜举曰城存与存亡与亡人臣大义公言是振之乃与集吏民共守贼大至城?振之秉笏坐堂上贼索印不与缚置雪中三日夜骂不絶口乱刃交下乃死杜邦举富平人士民守者或遁走邦举捕得斩以徇及城?自成欲降之邦举骂曰朝廷臣子岂为贼用贼抉其舌含血喷之遂遇害欧阳植襄城人刘孔晖邵阳人载瑜徽庄王见沛曾孙嘉靖三十五年有民耿安者奏载瑜夺其女下所司按治狱成降为庶人锢高墙载瑜自缢死延津郡王徽恭王原燭第九子载坝嘉靖三十三年始封至常浪为贼所害李乘云高阳人王化行河西人姚文衡锺祥人戴国柱慈谿人率兵援淮徐与贼战于徐州力不支死张宝山四川人守桐城战辄有功击贼于鲁珙山?伏死古道行江都人击袁时中于于睢寧之双沟没于阵高在仑成都人贼袭英山冒矢石杀贼贼来益衆被执不屈死李孕嘉沈邱人滕九茝官顺天京卫经历家居遇寇死钱祚徵掖县人朱任卿徽州人孙绍武陈州卫人奉檄守沈邱与子璉俱死鄢廷海永福人任中蛟洛阳人张连曜建德人龚之安澧州人荆伟丹阳人周敏中官清流知县家居为贼所执不屈死余塙铜陵人知州徐世淳殉节死塙摄州事城再?骂贼死余士泰昆明人 本朝乾隆四十一年追諡猛如虎潘宏刘振之李乘云忠烈艾毓初忠节锺其硕柴荐禋杜邦举刘孔晖戴国柱张宝山古道行高在仑李孕嘉烈愍姚运熙刘振世尚用光龚新韩醇姚昌祚王应翼张守正费曾谋杨一鹏王

化行姚文衡张质龚之安荆伟周敏中钱祚徵钱继美孙绍武鄢廷海朱挺许佳允余塙余士秦节愍门迎恩等并入祠】

【壬午】十五年春二月陕西总督汪乔年军溃于襄城死之【先是保定总督杨文岳驰援开封贼已解围去攻襄城杀知县曹思正训导张信典史赵凤豸寄輜重焉复攻西华知县刘伯骅登陴死守贼驱其下为十覆迭攻之城伯骅怀印投井死会贼遣其党据临颖总兵左良玉破而屠之自成怒转攻良玉良玉退保鄢城贼围之文岳会督师丁启睿及总兵虎大威之师往救相持十昼夜未决而乔年率总兵贺人龙郑家棟牛成虎出潼关与诸将议所向曰鄢城危在旦夕吾趋鄢城贼方锐难与争锋襄城距鄢四舍贼老砦咸在吾舍鄢而以精锐攻其必应贼必还兵救则偃城解矣诸将皆曰善乃留步兵火器于洛阳简精骑万人兼程进次郑县襄城诸生张永祺等导乔年入城贼闻之即解鄢城围以数十万众来攻乔年亟勒兵驻城外人龙等三师未阵而奔副将马名廉战歿军大溃乔年叹曰此吾死所也率步卒千余入城守贼穴城实火药轰城城裂乔年穿阱随贼所凿以长矛刺之贼死甚众阅五昼夜守具皆尽望良玉来援竟不至贼礮击乔年坐熏雉堞尽碎左右环泣请避之乔年怒以足蹴其首曰汝畏死我不畏死也守益固及城巷战手刃三贼自刳不殊为贼所执大骂贼割其舌磔杀之襄城人建祠以祀副将张国钦张一贯党威李万庆及监纪西安同知孙兆禄材官李可从皆从乔年死自成怒永祺开城迎乔年索之不得屠其族剗诸生刘汉臣等百九十人初乔年抚陕西属米脂知县边大绶发自成先塚大绶调得其族人为县吏者榜治之言去县二百里为李氏村在乱山中十六塚环而葬中其始祖也相传圻中有铁灯檠铁灯不灭李氏兴如其言发之蝼蚁数石火光荧荧然斲棺骨青黑黄毛被体脑後一穴大如钱中盘赤蛇长三四寸有角见日而飞高丈许咋咋吞日光者六七反而伏乔年函颅骨腊蛇以闻焚其余杂以秽弃之自成闻之嚙齿大恨曰吾必致死于乔年至是既杀乔年由西华攻陈州金事关永杰与知州侯君擢乡官崔泌之举人王受爵率士民分堞守贼遣使说降斩其头悬之城上贼怒攻破之永杰格鬪不支中乱刃死君擢泌之受爵及守备张鹰扬皆殉难有龚作梅者年十七父母俱亡殡于舍贼火民居作梅跪柩前焚死贼遂自陈州分部犯睢州州缺正官通政使李梦辰方家居即乘城御贼无何贼从他门入拥梦辰见罗汝才汝才问所欲曰我大臣但欲死尔汝才遣其客说降且进之酒梦辰覆杯于地大息起扼吭而卒妻王氏方病闻之不肯食死里居太平知府杜时髦亦死寻太康寧陵考城皆陷太康知县魏令望里居金都御史张维世富平知县冯正吉死之贼乃悉众攻归德推官王世琇迁工部主事将行僚属邀共守慨然曰久官于此临难而去之非谊也遂与副使蔡凤金事吴汝琦同知顔则孔经历徐一源商邱知县梁以樟教谕夏世英里居尚书周士朴誓众坚守贼攻围七日总督侯恂家商邱其子方夏率家众斩关出伤守者众遂乱贼乘之入凤汝琦世琇则孔及指挥贾之琯并遇害则孔女闻之即自缢一源分守北门杀贼多城巷战死之以樟中贼刃久而复苏妻张氏及子女仆从皆死以樟竟获免世英持刀骂贼死于明伦堂妻石氏亦自刎尚书士朴及工部郎中沈试主事朱国庆中书侯忻光禄署丞侯执中广西知府沈仔威县知县张儒及举人徐作霖吴伯允周士美官生沈泌侯峻贡生侯恒沈诚周士贵国学生侯惊沈调诸生吴伯裔张渭刘伯愚等皆死是时贼纵兵四出有自亳州南走流扰霍邱灵璧盱眙者亳州知州何变霍邱知县左相申巡检吴某灵璧知县唐良锐盱眙主簿胡渊皆殉节势且蔓江北江北贼又方炽连陷含山和州南京戒严而自成精锐聚河南隰名城不胜计河南凡八郡三在河北自六年蹂躪後患少纾其南

五郡十一州七十三县屡岁被贼靡不残破有再破三破者城郭邱墟人民百不存一朝廷亦不复设官间有设官者不敢至其地遥寄治他所其殉于治所者南阳则知府邱懋素郑州则知州鲁世任新安则知县陈显元登封则知县刘禔鹿邑则知县纪懋勋虞城则署县事主簿孔亮上蔡则知县许永禧西平则知县高斗垣遂平则知县刘英鲁山则知县杨呈季郟县则知县李贞佐及汝州吏目顾王家教谕当振杨宝丰则知县张人龙署县事洛阳丞周之德伊阳则知县孔贞璞而陕州乡官梁可栋范大成赵良栋息县乡官王多福西平乡官杨士英郟县乡官陈心学周卜历南阳举人张凤翔王明物洛阳举人张民表永城举人夏云醇商城举人余容善光州举人王者琯光山举人胡植嵩县举人王翼明宝丰举人李得笥亦皆死难】质实【鄆城汉鄆县隋鄆城明属许州以隶于开封府今升许州为直隶州县仍属焉太康秦阳夏隋太康明属开封府今改属陈州府寧陵汉县明属归德府今因之曹思正岷州卫人刘伯骞河间人张信辉县人赵凤豸绛县人马名廉榆林卫人党威神木人李万庆即降将射塌天也孙兆禄盐山人李可从盩厔人关永杰字人孟巩昌卫人侯君擢字际明成安人崔泌之鹿邑人张鹰杨曲周人杜时髦字观生冯正吉与妻任氏投井死子昌辰亦殉之魏令望武乡人张维世累官金都御史代陈新甲巡抚宣府视事旬日坐失防削籍遣戍已而释还城陷抗节死妻李氏子正谊孙昱俱殉节王世琇字崑良清苑人蔡凤武进人吴汝琦徐州人顔则孔忻州人妻女皆殉之贾之琯汝宁人妻许氏抱二女投井死徐一源海盐人夏世英祥符人沈试大学士鲤之孙徐作霖吴伯允伯裔张渭刘伯愚皆郡中名士何变晋江人居民逃窜城空不能守为贼执欲降之不屈断足剖胷而死悬首市上三日耳目犹动左相申夷陵人唐良銳全州人胡渊永年人邱懋素贵州新添卫人贼再陷南阳全家被害鲁世任安邑人贼薄城竭力扞御战败被执自刎死陈显元蕲县人城经摧颓率民人保关门寨守月余力竭骂贼支解死刘禔中部人纪懋勋胶州人孔亮兴平人许永禧曲沃人高斗垣繁峙人刘英贵州人杨呈秀山海卫人李贞佐字无欲安邑人以学行着训民有方练乡勇守城城陷骂贼断舌支解死母乔氏亦死顾王家会稽人子国亦以击贼被害雷振扬山西人贞佐遇难後振扬摄县事城再陷死之张人龙遵化人周之德山东陵县人张人龙遇难後之德摄县事城再陷死之孔贞璞曲阜人悉力守城贼不能克既去以事至汝州道遇害梁可栋官平定州知州万大成官淮安同知赵良栋官蓬萊教谕王多福官项城训导杨士英官怀仁知县子妇王氏亦骂贼为所杀陈心学授知县不谒选而归贼欲官之不从被杀周卜历官内黄知县以父丧归贼迫使执郟县令以代其死骂贼被害 本朝乾隆四十一年追諡汪乔年党威关永杰魏令望陈显元李贞佐忠烈李梦辰张维世周士朴鲁世任忠节马名廉张国钦张一贯李万庆孙兆禄侯君擢崔泌之冯正吉徐一源何变胡渊邱懋素许永禧刘英顾王家梁可栋杨士英周卜历烈愍曹思正刘伯骞张鹰扬杜时髦蔡凤吴汝琦王世琇顔则孔贾之琯沈试朱国庆侯忻侯执中沈仔张儒左相申唐良銳刘禔纪懋勋孔亮高斗垣杨呈秀张人龙万大成陈心学节愍张信等并入祠】

我

大清兵克松山巡抚邱民仰等死洪承畴降遂下锦州

【松山围既久帝命杨绳武督师救承畴继又代以范志完皆歛兵不敢出副将焦埏赴援

甫出山海关即败没转饷路俱絕围城食尽副将夏成德因遣子为质约日献城】

【大清兵如期攻之城遂下民仰及总兵曹变蛟王廷臣兵备道张斗姚恭王之祜副将江翥饶勲朱文德等死之承畴祖大乐就执职方郎中张若麒逃从海上荡渔舟而还寧远关门劲旅尽丧锦州城中粮亦尽人相食祖大壽战守计穷又闻松山已失乃遣人至郑亲王济尔哈郎睿郡王多尔袞军门乞降二王据以入告越数日大壽复遣人至军门求盟誓二王怒曰尔欲降即降不降则已此城可旦夕拔尚与尔盟誓乎大壽惧遂率所部以城降杏山塔山皆下败书闻或传承畴已死帝惊悼甚设坛都城赐承畴祭十六民仰六寻命建祠都城外承畴民仰并列将亲临祭闻承畴降乃止以王朴先逃下法司会鞫朴罪而吴三桂加提督衔镇山海如故御史郝晋言六镇罪同皆宜死三桂实辽左主将不战而逃奈何反加提督兵部尚书陈新甲覆议请独斩逃勒马科军令状再失机即斩决三桂失地应斩念守寧远功与李辅明白广恩唐通贬秩充为事官时诸将多拥厚货赂权要故朴以外皆获宥】质实【杨绳武云南弥勒人崇祯十一年冬用杨嗣昌荐召见吐言如流庄烈帝伟之遂自御史超擢右佥都御史巡抚顺天十四年擢蓟辽总督寻以范志完代之而令绳武总督辽东寧远诸军出关救松杏加衔督师未几卒遂进志完兵部左侍郎督师出关如绳武焦埏大同後卫人朱文德义州卫人 本朝乾隆四十一年追諡曹变蛟忠烈邱民仰王廷臣忠节焦埏朱文德烈愍张斗姚恭王之祜江翥饶勲节愍】

三月魏照乘罢

【照乘在内阁四年庸碌无所见御史徐殿臣劾其昵妾弃妻纵壻为奸诸丑迹照乘力辨之御史刘之勃谓大臣不当争辨帝责其妄议然照乘内不自安遂引疾去】质实【徐殿臣鄞人刘之勃字安侯凤翔人】夏四月谢陞罢

【初我太宗文皇帝屡遗书议和兵部尚书陈新甲以国内困敝亦请主和以纾患私言于傅宗龙出都以语陞语陞陞後见疆事大坏述宗龙之言于帝帝召新甲诘责新甲叩头谢罪陞进曰倘肯议和和亦可恃帝默然寻谕新甲密图之乃遣职方郎中马绍愉等奉书乞和我太宗宴劳有加礼仍报书曰大清国】

【皇帝致书于明国皇帝予纘承皇考太祖皇帝之业嗣位以来蒙】

【天眷佑远通臣服诸王等合辞劝进乃昭告天地受号称尊国号大清改元崇德通来我军每入尔境辄克城陷阵乘胜长驱若图进取亦复何难然予仍愿和好者特为亿兆生灵计耳盖嗜杀者殃好生者祥感应之理昭然不爽若两国各能审度祸福矜全亿兆而诚心和好则自兹以後宿怨尽释彼此不必复言矣至我两国尊卑之分又何必较哉古云情通则明情蔽则暗若尔国使臣来予令面见予国使往尔亦令面见如此则情不蔽而和事可久若使臣不得面见情词无由通达则和事终败徒贻国家之忧矣夫岂扼絕使臣进见遂足以示尊耶至两国有吉凶大事则当遣使交相庆吊每岁贵国馈兼金万两白金百万我国馈人参十斤貂皮千张若我国满洲蒙古汉人及朝鲜人等有逃至贵国者当遣还我国贵国人有逃叛至

我国者亦遣还贵国以宁远双树堡中间土岭为贵国界以塔山为我国界以连山为适中之地两国俱于此互市自宁远双树堡土?界北至宁远北台直抵山海关长城一带若我国人有越入及贵国人有越出者俱加稽察按律处死或两国人有乘船捕鱼海中往来者尔国自宁远双树堡中间土?沿海至黄城岛以西为界我国于黄城岛以东为界若两国有越境妄行亦俱察出处死倘愿如书中所言以成和好则我两人或亲誓天地或大臣代誓尔速遣使齎和书及誓书以来予亦遣使齎和书及誓书以往若不愿和好再勿遣使致书其亿兆死亡之孽于予无与矣于是以书授绍愉遣人护送抵连山绍愉未至而陞昌言于朝房谓给事中方士亮倪仁祜等曰议和事诸君不必言上祈籤奉先殿意已决又言人主以不用聪明为高上太用聪明致天下尽坏士亮等退谓陞诈谤君父泄禁中语仁祜及同官廖国遴等交章论之斥陞大不道无人臣礼士亮复继言之疏数十上帝大怒削陞籍】质实【双树堡在寧远州东十八里方士亮歙人倪仁祜浦江人廖国遴长沙人】

五月张献忠陷庐州起马士英总督庐凤军务【先是贺一龙贺锦诸贼在江北欲西合献忠以湖广官兵沮不得达及开封围急督师丁启睿及左良玉奉诏往援皆移军驻开封附近地献忠得乘间走英霍山中与一龙等相见皆大喜遂以是年三月攻舒城舒城令以忧去乡官胡守恒与游擊孔廷训督兵民共守廷训纵所部淫掠士民乃叛降贼城将降悍卒杀守恒被数十创以死献忠遂入舒城改为得胜州据之遣其党分掠旁邑游骑直抵庐州城下知府郑履祥通判赵兴基经历郑元绶合肥知县潘登贵指挥同知赵之璞里居参政程楷分门守监司蔡如衡贪戾民不附贼谍满城中不能知会提学御史徐之垣以试士至献忠遣其徒伪为诸生袭儒冠以入夜举礮城中大扰之垣如衡履祥登贵并縋城走兴基时守水西门闻变挺刃下戍楼与鬪斩数人被创死元绶楷守南薰门并殉难之璞守东门巷战死贼乘势连?含山巢县庐江无为六安拒臣舰数百习】

【水师将窥南京太监卢九德以京营兵往剿京营将孙应元黄得功者素善战是年春应元追贼罗山已败歿得功乃与别将刘良佐击献忠于峡山再战败绩得功退屯定远江南大震诏逮凤阳总督高斗光起马士英代之士英初巡抚宣府取公帑馈朝贵坐遣戍寻流寓南京与逆案光禄卿阮大铖相结甚欢周延儒之再召也大铖辈金钱要之维扬求湔濯延儒曰吾此行谬为东林所推子名在逆案可乎大铖沈吟久之曰瑶草何如瑶草士英别字延儒许诺至是礼部侍郎王锡袞荐士英知兵延儒力赞之竟得起用士英未至军贼势张甚悉衆攻桐城挟营将廖应登至城下诱降得功良佐合兵击之于鲍家岭贼败遁退至潜山擒斩贼将闯世王马武三鵠子王兴国三鵠子者献忠养子号骁勇者也得功箭伤面愈自奋与贼转战十余日所杀伤独多贼大衄于是一龙等弃献忠去北投自成而河南贼袁时中方寇颍州官军闻警即移兵剿时中献忠收余衆袭陷太湖参将邱壮猷战死知县杨春芳典史陈之训教谕沈鸿起训导娄懋履并死马献忠势复振】质实【南薰门庐州府城千七百有六丈门七跨金斗河立水关二後汉末建元末重修南薰门其南门也峡山在桐城县北四十里即古夹石鲍家岭在桐城县西马士英贵阳人胡守恒官编修赠少詹事谥文节赵兴基云南太和人郑元绶浙江人赵之璞程楷皆合肥人楷初为平湖知县有政声历官云南参政致养归徐之垣鄞人高斗光繁峙人王锡袞禄丰人邱壮猷六安人杨春芳靖州人按一统志太湖知县死於贼者又有榆林李盛英贼掠境与守备徐际相御之许家寨力战死本朝乾隆四十一年追

谥孙应元忠烈赵兴基赵之璞程楷邱壮猷李盛英徐际相烈愍杨春芳节愍郑元绶等并入祠】

六月贺逢圣张四知罢

【逢圣与周延儒再召帝待之不如延儒及是月戊申予告归宴饯便殿逢圣感激大哭伏地不能起帝亦丸澜动容焉越六日张四知亦致仕去】

以蒋德璟黄景昉吴甦并为礼部尚书兼东阁大学士预机务

【先是帝命会推阁臣吏部尚书李日宣等以德璟景昉倪元璐刘宗周及甦诸人名上帝令再推数人而副都御史房可壮工部右侍郎宋玫大理寺卿张三谟与焉大僚不获推者为流言入内帝深惑之召日宣及与推诸臣入中左门偕辅臣赐食已出御中极殿召诸臣奏对玫陈九边形势甚辨帝恶其干进叱之乃命德璟景昉甦入阁甦之柄用周延儒与有力焉延儒再相逆案辅臣冯铨颇助为谋延儒许复其冠带铨果以捐资振饥属抚按题叙延儒拟优旨下户部公议大沸延儒患之兵部侍郎冯元飏与甦善因说延儒援甦共为铨地甦既入阁延儒语铨事甦唯唯退召户部主议者告以逆案不可翻寝其疏不覆延儒始悟为甦给两人遂有隙】质实【李日宣字晦伯吉水人宋玫字文玉莱阳人张三谟大原人】

下吏部尚书李日宣等于狱

【帝以会推不当责日宣等回奏奏上帝怒不解复御中左门召日宣对状次召吏科都给事中章正宸河南道御史张煊及房可壮宋玫张三谟帝诘日宣曰汝尝言秉公执法今何事不私正宸奏日宣多游移臣等当劾之会推事实无所徇日宣复为玫等三人解帝命锦衣官逮下日宣等六人并褫冠带就执时日宣所举蒋德璟等多采人望中外翕然称公然周延儒颇有所参预玫之得与再推延儒实主之延儒客盛顺者尝为浙江巡抚熊奋渭营内召果推南京户部侍郎玫父继登官浙江右参政知其事遂深信顺顺为玫营推举于延儒甚力而日宣不知也帝入蜚语恶日宣特甚诘责声甚厉侍臣皆股栗失色德璟与黄景昉叩头辞新命言臣等并在会推中若诸臣有罪臣等岂能安延儒亦乞帝优容之皆不许遂下刑部狱廷臣交章申救不纳帝疑日宣未就狱责刑部臣克期三日定讞侍郎惠世扬徐石麒拟予轻比帝大怒革世扬职镌石麒二秩郎中以下罪有差御史王汉言枚卜一案日宣等无私陛下欲重其罪刑部莫知所执不听狱上日宣正宸煊戍边可壮玫三谟等削籍】质实【张煊介休人熊奋渭商城人惠世扬清涧人徐石麒字宝摩嘉兴人後家居大兵下嘉兴石麒自缢死王汉字子房掖县人本朝乾隆四十一年追谥石麒忠懿】

秋七月左良玉兵溃于朱仙镇诸镇皆溃

【是年夏四月李自成再围开封良玉以兵往救战不利监军主事余爵被执良玉遂引兵去开封围久不解廷议以良玉军无鬪志故尚书侯恂尝遇良玉有恩乃诏释恂子狱代杨文

岳为总督合督师丁启睿之兵驰援开封发帑金十五万犒良玉营以激厉之并飭山西军刻期渡河会恂等急击而总兵许定国以山西军次沁水一夕溃去宁武兵亦溃于怀庆竟不赴会文岳未受代仍统所部会启睿于朱仙镇良玉及虎大威杨德政方国安四镇军毕集良玉见贼势盛欲拔营遁乘夜纵其军突诸营诸营惊溃良玉军掠诸营马羸以去于是诸营悉奔启睿文岳走汝宁独副将姜名武一军坚壁不动侵晨自成拥众大至名武督麾下血战杀数百人力竭被执大骂为贼磔死贼乃往追良玉军自成戒其众毋疾追绕出良玉前傍溪谷穿堑深广各二寻环百里以阻良玉良玉幸追者缓整众以前行八十里扼于堑不得进方下马欲渡贼追者噪而至良玉兵大乱自相蹂践仆溪谷者无算弃马羸万匹监军僉事任栋殁于陈良玉走襄阳帝闻援军屡溃怒甚褫启睿文岳职逮治定国诛德政诏恂拒河图贼而令良玉以兵会恂良玉畏自成迁延不至帝终不能罪良玉也】质实【姜名武字我扬保德州人任栋永寿人余爵被执骂贼死侄敦华同遇害本朝乾隆四十一年追谥姜名武忠烈任栋余爵烈愍】

发明【六镇兵溃于松山而诛止王朴四镇兵溃于朱仙镇而诛止杨德政军律之失平甚矣方吴三桂诸人之幸而获宥犹可解曰朴先溃也良玉则岂非先溃者而竟置罪魁于不问特以其强悍不易制耳夫贺人龙强悍不减良玉孙传庭一旦入关中缚之麾下数其罪而戮之三军皆洒然动色谁谓跋扈之将不可以威制哉厥后良玉出樊城奔武昌纵兵大掠火光照江中而漫无顾忌其亦姑息之政有以酿成之也】

八月陈新甲下狱寻弃市

【先是松山锦州相继失职方郎中张若麒自宁远遁还言官劾若麒者悉及新甲新甲屡乞罢皆不从新甲雅有才晓边事然不能持廉所用多债帅深结中贵为援与司礼王德化尤昵故言路攻之不能入当是时闯贼蹂躏河南开封屡被围他郡县失亡相踵总督傅宗龙汪乔年出关讨贼先后殁贼势愈张言官劾新甲者章至数十新甲请罪章亦十余上辄慰留之至是帝特恶其泄机事乃下之狱帝初以和议委新甲手诏往返者数十皆戒以勿泄外廷渐知之故屡疏争然不得左验一日所遣职方郎中马绍愉以密语报新甲会新甲视事去置其书几上家僮悞以为塘报也付之钞传于是言路譁然给事中方士亮首论之帝愠甚留疏不下已降严旨切责令新甲自陈新甲不引罪反自诩其功帝益怒言官复相继劾之遂逮付刑部狱而和议亦中罢新甲从狱中上书乞宥不许新甲知不免徧行金内外给事中廖国遴等营救于刑部侍郎徐石麒拒不听大学士周延儒陈演亦于帝前力救且曰国法兵不薄城不杀大司马帝曰他且勿论戮辱我亲藩不甚于薄城耶遂斩新甲于市新甲为杨嗣昌引用其才品心术相似军书旁午裁答无滞帝颇倚之后给事中沈迅力诋其失帝曰令尔作新甲恐更不如迅惭而退】

九月李自成决河灌开封城陷

【诸援军既溃于朱仙镇帝乃诏山东总兵官刘泽清救开封时城中食尽巡抚高名衡总兵陈永福等守益固泽清兵抵河北朱家寨将士不敢进泽清曰我以兵五千南渡依河而营

引水环之以次结八营直连大堤筑甬道输河北之粟以饷城中贼兵已老可一战走也皆曰善乃分兵先渡立营贼攻之战三昼夜後军无继者甬道不就泽清拔营去贼围开封者三所损伤多积愤誓必拔之围半年师老粮匱欲引黄河水灌之以城中子女货宝犹豫不决闻秦督孙傅庭已率兵出关恐诸镇兵夹击欲变计会有献计请决河以灌贼者名衡以为然周王柊募民筑羊马墙坚厚如高岸贼营直传大堤河决贼可尽城中无虞方凿朱家寨口贼已知之移营高阜具艨艟巨筏亦驱掠民夫数万决河灌城会天大雨连旬黄流骤涨口遂决丁夫荷锺者随堤漂没十数万贼亦沈万人河入自北门贯东南门以出奔声如雷名衡永福乘小舟至城头周王率其宫眷及寧阳诸郡王避水栖城楼坐雨絶食者七日後得舟乃从城上泛舟出同知苏茂灼通判彭士奇久饿不能起并溺死贼浮舰入城遗民俱尽拔营而西城初围时百万户後饥疫死者十二三汴梁佳丽甲中州羣盗心艳之至是尽没于水得脱者不及二万人帝闻痛悼犹念诸臣拒守劳命叙功加名衡兵部右侍郎名衡辞以疾即擢监军御史王汉为右金都御史以代名衡】质实【朱家寨口在开封府城西北十七里寧阳郡王恭禧周端王肃溱第九子万历四十九年封苏茂灼晋江人彭士奇高要人本朝乾隆四十一年追諡茂灼士奇节愍】

冬十月孙傅庭败绩于郟县

【是年春兵部尚书陈新甲荐傅庭知兵遂释傅庭于狱以为兵部右侍郎帝御文华殿问剿贼安民之策傅庭侃侃言帝嗟叹久之宴劳赏赉甚渥寻总兵贺人龙军溃秦督汪乔年败没于襄城帝即命傅庭往代且授意诛人龙傅庭以人龙家米脂其宗族多在贼中未可轻发在道佯上疏曰人龙臣旧将愿贯其罪俾从臣自效帝亦佯许之及至陕大集诸将出不意缚人龙坐之麾下数而斩之谓其开封噪且猛如虎以孤军失利而张献忠罗汝才出于柙也又谓其遇敌先溃新蔡襄城连丧二督也诸将莫不洒然动色傅庭既已诛人龙威讐三边日夜治军为平贼计而贼遂已再围开封屡诏趣傅庭出关傅庭上言兵新募不堪用帝不听傅庭不得已出师抵潼关大雨连旬自成决河灌开封开封已?傅庭趋南阳自成西行逆秦师傅庭设三覆以待贼牛成虎将前军左勣将左郑嘉栋将右高杰将中军成虎阳北以诱贼贼奔入伏中成虎还兵而鬪高杰等突起翼之左勣郑家栋左右横击之贼溃东走斩首千余级追三十里至郟县贼弃甲伏军资于道秦兵趋利贼觐官兵器反兵乘之兵大溃副将孙枝秀跃马以追贼击杀数十骑贼因围之驰突不得出马蹶被执植立不挠以刃临之瞠目不答一人曰此孙副将也遂杀之参将黑尚仁亦被执不屈见杀覆军数千材官小将之殁者张映奎李栖凤任光裕戴友仁以下七十有八人傅庭走巩县退入关是役也天大雨粮不至士卒采青柿以食冻且馁故大败豫人所谓柿园之败也】质实【左勣总兵官光先之子本朝乾隆四十一年追諡孙枝秀黑尚仁烈愍张映奎等并入祠】

十一月总兵官刘超据永城反

【超初以偏裨从贵抚王三善讨安邦彦积劳迁四川遵义总兵练国事丁魁楚丁启睿为督抚皆尝檄超赴军前讨贼超忽上书陈功簿意颇鞅鞅遂坐怨望夺职数求复官不得李自成围开封超请招降土寇协击之起超保定总兵令率兵赴救超惮不敢行同县御史魏景琦

方家居见超日与土寇相往来未尝与自成一战诋超为通贼超怒愬之举人乔明楷明楷复诮之超乃大愤杀景琦一家三十余人并杀明楷而反巡抚王汉谋执超扬言招抚分兵伏城下而独与军将数琦入超先发杀汉参将陈治邦游击连光耀父子鬪格死有马魁者负汉屍夺路以出闻于朝命凤督马士英太监卢九德总兵陈永福讨之超据永城守时永城以御贼故先屯粮积刍制火礮尽为超有官军连战贼屡挫筑长围困之超官贵州时与士英相识缘旧好贻书士英曰今文臣軫结成势锢不可拔为守令则驱民反为督抚则驱兵反为台省则驱将反天下反者何一非公等驱之超非侗愚岂愿弃功名捐首踵蒙不韪之名蹈污败之行为天下笑哉势激之使然也士英得书因劝之降超出见不肯去佩刀士英笑曰若既归朝安用此已潜去其亲信献俘于朝磔死】质实【刘超山西人其父为永城估遂家永城王汉初为内乡知县屡建破贼功降旨优叙是年春行取入都以试御史监军与督臣侯恂南援汴寻诏汉巡抚河南贼灌开封汉自柳园夜半渡河逐贼战小却守备李日舒歿于阵诸军殊死鬪败追至朱仙镇连战皆捷遂代高名衡抚河南陈治邦临漳人李日舒栖霞人本朝乾隆四十一年追諡王汉陈治邦连光耀李日舒烈愍】

我

大清兵入蓟州连下畿南山东州县鲁王以派自杀【时关内外并建二督又分设二督于昌平保定千里之内有四督臣又有寧远永平顺天密云天津保定六巡抚寧远山海中协西协昌平通州天津保定八总兵星罗棋置无地不防而事权反不一蓟督张福臻尤昏庸给事中方士亮劾之因言移督师关内则蓟督可裁福臻可罢于是召还臻令辽督范志完兼制关内移驻关门志完辞不许求去不许上疏言不能兼蓟请仍设蓟督始以赵光拊任之而】

【大清兵已自墙子岭入蓟州分道南向乃急徵诸镇入援援军至者甚衆皆观望志完光拊畏怯不敢战河间以南多失守大兵乘胜抵山东下临清诸州县攻兗州知府邓藩锡走告鲁王以派曰郡有吏国有王犹同舟也列城失守皆由贵家惜金钱而令黎民饿夫列陣扞御夫城郭者我之命也财贿者人之命也我不能畀彼以命而望彼畀我以命乎王诚散储财以鼓士气城犹可存不然大事一去悔无及矣以派不能从藩锡与监军参议王维新同知谭丝曾文蔚通判阎鼎推官李】

【昌期滋阳知县郝芳声副将丁文明长史俞起蛟给事中范淑泰等分门死守力不支城破文明战死维新犹奋力格鬪被二十一创乃死以派自縊乐陵阳信东原安邱诸郡王皆死藩锡丝文蔚鼎昌期芳声起蛟淑泰举人罗于宁并殉节时十二月八日也我大清兵遂长驱南下直抵海州贛榆沭阳丰沛凡克府州县城八十八所至将吏多望风遁或献金帛迎降其死于战守及绅士之殉节者畿辅则蓟州兵备僉事张世管蓟镇粮储户部主事马嗣杰霸州兵备副使赵燁知州丁师羲里居参政李时茺河间参议赵珽督守给事中周而淳知府顏孕绍同知姚汝明知县陈三接里居襄阳知县贾太初训导冯运隆顺德知府吉孔嘉里居台州知府傅梅中书舍人孟鲁鉢张凤鸣定州知州唐炫赵州知州王端冕教谕陈广心训导王一统永清知县高维岱典史李自正教谕邱养性乡官刘维蕙阜城知县吕大成武邑知县郑集命沙河知县项易任县守备牛文科深州训导刘名言吏目熊国俊平乡教谕潘希明训导李

愈芬阎慎行清丰教谕曹一贞训导董调元里居吏部郎李其纪黄州推官倡鹤举富阳知县杜斗愚永平里居山东副使申为宪新河里居淮安通判刘文蔚韩城县赵懋诚生员宗文丽南乐监生郑献书山东则山东兵备僉事樊吉人登莱兵备僉事邢国玺兖西兵备僉事李恪临清总兵官刘源清参将柳毓融榷关主事陈兴言同知路如瀛判官徐应芳吏目陈翔龙里居兵部侍郎张宗衡太常少卿张振秀户部员外郎邢泰吉临汾知县尹任滨州知州王道隆莒州知州景淑范贡生何燧邹平知县朱迴添莱芜知县冯守礼阳信知县张予卿滕县知县吴良能前知县瞿騫里居车驾郎中刘鸿绪东阿知县吴汝宗武城知县任万民生员商醇儒商大儒徐行泗徐士雅王国俊吴文光临淄知县文昌时训导申周辅高苑知县周启元壽光知县李耿里居桐柏县知县丁茂桂莱阳知县陈显际里居工部侍郎宋玫稽勲郎中宋应亨中书舍人赵士骧齐东教谕张日新沂州里居河南巡抚高名衡壽张里居太仆少卿王大年曹州里居户部主事楚烟长清里居训导张肇祚昌邑举人李治躬宋明佐生员宋奇英宋奇士诸城举人丁大穀新城武举马骥贡生王与朋生员王与斌王与玖王与才王与荇王与献王与璧王与纓王与满王士驹王士奇王士瞻毕申毕卓耿廷梓张嗣说徐淳如张炅然张炳然张茆然张冲然泰安州生员张遇留平度州生员窦启光武城生员刘珣堂邑生员孙发祖夏津生员刘以楷戴章甫朝城生员岳尔高即墨生员王基招远生员单经翰应天则丰县知县刘光先生员王道充与子宾布衣皇甫世民沭阳知县刘士璟等而南京给事中张焜芳天津参将贺秉钺寧波生员马之騊马之駟道出临清职方主事刘大年道出历城亦皆殉节死】质实【贛榆汉县东魏于县西别置怀仁县高齐废贛榆县金大定七年改怀仁曰贛榆明属海州以隶于淮安府 本朝雍正二年升海州为直隶州县仍属焉沭阳东魏建沭阳郡兼置怀文县後周改县曰沭阳明属淮安府 本朝雍正二年改属海州南乐五代唐改昌乐置明亦属大明府今因之滨州五代周就渤海县置州明洪武初省县入州属济南府 本朝雍正二年升直隶州十二年升武定州为府以州属之临淄壽光皆汉县明并属青州府莱阳汉昌阳五代唐改莱阳明属登州府今悉因之鲁王以派荒王檀十世孙赵光拚字彦清九江德化人邓藩锡字晋伯金坛人王维新广宗人曾文蔚泗州人阎鼎临汾人李昌期永年人郝芳声忻州人丁文明义乌人俞起蛟钱塘人范淑泰典浙江试事竣还家遂与藩锡等同死乐陵鲁靖王肇輝第五子泰举于宣德二年始封乐陵郡王至是为泰举八世孙以泛阳信鲁庄王阳铸第七子当?于成化十四年封阳信郡王至是为当渚七世孙宏福东原鲁端王观?第二子颐埏于嘉靖三十六年始封东原郡王至是为颐埏曾孙以源安邱鲁靖王肇輝第四子泰圻于宣德十年始封安邱郡王至是为泰圻九世孙宏檀张名世马邑人子启元同死马嗣杰同州人母薛氏同死赵輝字黄如河津人子琬同死丁师羲字象先楚雄人赵珽慈谿人一門十四人同死周而淳掖县人顏孕绍字賡明曲阜人复圣六十五代孙也闔室自焚死姚汝明夏县人妾任氏同死陈三接文水人巷战死妻武氏殉之吉孔嘉洋县人妻张氏长子惠迪次子妇王氏同死傅梅邢台人唐铉字节玉睢州人王端冕字服先江陵人陈广心元城人王一统成安人高维岱昌邑人邸养性东胜卫人吕大成莱芜人郑集命延长人项易禹州人牛文科任县人刘名言唐县人曹一贞宛平人董调元安肃人樊吉人元城人邢国玺长葛人李恪安邑人刘源清济寧人泽清弟柳毓融博兴人陈兴言漳浦人路如瀛陵川人徐应芳临川人陈翔龙萧山人张宗衡以兵部侍郎为宣大总督罢归佐有司守城援不至城破死王道隆江都人景淑范蒲州人朱迴添沛阳王支属由宗学贡生为知县冯守礼猗氏人与二子摠抱摠奇并自杀张予卿武进人吴良能辽东盖州人城将破尽杀家属拜母出力战死瞿騫上海人解任未

行与良能协守城破亦死吴汝宗寧洋籍龙岩人任万民曲阳人文昌时全州人阖门自焚死申周辅屯留人周启元黄岡人李耿江陰人陈显际真定人宋应亨侍郎玫族叔也应亨以城北庫薄出千金建瓮城浹旬而毕玫及邑人赵士驥亦出貲治具与显际固守二月余城破皆死之张日新浙江建德人招降土寇安守夏共登陴拒守力不支与子光裔及守夏皆死妻方氏自刎高名衡以巡抚守开封既陷以病归夫妇同死节王大年历官御史加太仆少卿以附魏忠贤挂名逆案至是亦死楚烟与子凤苞妻赵氏俱死刘光先广东人刘士璟复州人张焜芳纠太仆少卿史??私为所讦罢官归会稽以事北上与刘之騊之駟俱就执遂死其妻妾闻之赴井死贺秉钺泰宁左卫人以扶父柩至临清巷战终日力尽就执死刘大年广昌人使南京还朝过历城适城破遂死 本朝乾隆四十一年追諡范淑泰顏孕绍吴良能忠烈邓藩锡吉孔嘉宋玫高名衡张焜芳忠节王维新丁文明张名世赵珽陈三接高维岱牛文科李其纪樊吉人柳毓融陈兴言文昌时贺秉钺烈愍谭丝曾文蔚李昌期郝彦声俞起蛟马嗣杰赵輝丁师羲李时茺周而淳姚汝明贾太初傅梅孟鲁鉢张凤鸣唐铉王端冕吕大成郑集命项易侶鹤举杜斗愚申为宪刘文蔚邢国玺李恪刘源清张宗衡张振秀邢泰吉尹任王道隆景淑范朱回添冯守礼张予卿瞿騫刘鸿绪吴汝宗任万民周啓元李耿丁茂桂陈显际宋应亨赵士驥楚烟刘光先刘士璟刘大年节愍罗于宁等并入祠】

闰十一月李自成陷汝宁前保定总督杨文岳死之【文岳与虎大威等既自朱仙镇奔汝宁诏褫文岳官候勘以寇患方棘犹治军事未行至是贼以数万衆来犯汝宁老回回马守应革里眼贺一龙左金王贺锦争世王刘希光乱世王蔺养成时已归自成引兵毕会压城五里而军监军金事孔贞会以川兵屯城东文岳以保兵屯城西贼兵进攻相持一昼夜川兵溃杀伤数百贼夺其马羸悉衆攻文岳军文岳部将甄奇杰者称骁勇前从击贼已战死所恃惟大威俄大威中礮死守备蔡浩父子指挥熊应吕梅振英张鸿光俱歿于阵文岳益不支金事王世琮知府傅汝为通判朱国宝縋将士入城副将贾悌参将冯名圣亦掖文岳贞会登城贼四面环攻戴扉以障矢石云梯堵墙而立城上矢礮撞石雨集贼死伤山积而攻不休一鼓百道并登执文岳及世琮国宝悌名圣杀汝阳知县文师颐于城上游击朱崇祖指挥张国正千户刘懋勲杨绍祖袁永基同子世廕百户叶荣?张承德李衍壽阎宗国奋力巷战死汝为闻变投水死岁贡士林景阳国学生赵得庚杨道临等诸生赵重明费明栋杨应祯李士谔等皆死贼拥文岳见自成大骂贼怒缚之城南三里舖大礮击之洞胷糜骨死士民屠戮数万焚公私廨舍殆尽贞会执去不知所终崇王由积崇世子诸郡王皆掳以行贼遂走确山信阳泌阳遣其党贺一龙掠地上蔡知县官篆出御之与乡勇马天祥李和中王维新曾耀俱陷阵死】质实【崇王由积简王见泽七世孙王琮世字仲发达州人先为汝宁推官讨土寇流矢贯耳不为动时号王铁耳者也傅汝为字于宣江陵人朱国宝成都人文师颐全州人莅任甫三日朱崇祖汝阳人妻孙氏自焚死张国正六安人袁永基妻王氏亦殉节官篆胶州人 本朝乾隆四十一年追谥杨文岳虎大盛王世琮忠烈甄奇杰蔡浩熊应吕梅振英张鸿光贾悌冯名圣文师颐朱崇祖张国正烈愍傅汝为朱国宝官篆节愍刘懋勲等并入祠】

下给事中姜埰行人司副熊开元于锦衣卫狱寻遣戍【周延儒之再相也颇力矫其前所为广引清流于是郑三俊长吏部刘宗周掌都察院范景文长工部倪元璐佐兵部多起自废籍其他李邦华张国维徐石麒等皆布满九列又请释黄道周于戍所复其官言路亦得发舒

论事忌者乃造二十四气之说以指朝士二十四人直达御前帝适下诏戒谕百官责言路尤至堦疑帝已入其说乃上言陛下视言官重故责之严如圣谕云代人规卸为人出缺者臣敢谓尽无其事然陛下何所见而云然倘如二十四气蜚语腾播清禁此必大奸巨慝恐言者不利已而思以中之激至尊之怒箝言官之口人皆喑然缄默谁与陛下言天下事者是时帝方忧劳天下默告上帝戴罪省愆所颁戒谕词旨哀痛读者感伤堦顾反覆诘难深疑于帝者帝遂大怒曰堦敢诘问诏旨藐玩特甚立下诏狱考讯掌镇抚梁清宏以狱词上帝曰堦情罪特重且二十四气之说类匿名文书见即当毁何故屡腾奏牒其速按实以闻而同时有熊开元者亦奉诏下锦衣卫狱开元初以给事中左降淹久不迁颇觖望诣延儒诉已困顿状延儒适以他事辄命驾出开元大愠会京师戒严帝下诏求言凡官民陈事者即日召对开元欲论延儒屡请召对及入见延儒在不敢言一日帝御德政殿秉烛生开元从辅臣入奏言易称君不密则失臣臣不密则失身请辅臣暂退延儒等引退者再帝不许开元遂言陛下求治十五年天下日以乱必有其故帝曰其故安在对曰今所谋画惟兵食贼寇不揣其本而末是图虽终日夜不寝食求天下治无益也陛下临御以来辅臣数十人皆庸人相继为奸人祸天殃迄无衰止迨言官发其罪状诛之斥之已败坏不可复救矣帝与诘问久之疑开元有所为曰尔有人欲用乎开元辨无有且奏且频目延儒延儒跪谢帝曰天下不治皆朕过于卿何与开元言陛下令大小臣工不时面奏而辅臣在左右谁敢为异同之论以速祸且昔日辅臣繁刑厚斂屏弃忠良贤人君子攻之今辅臣奉行德意释累囚蠲逋赋起废籍贤人君子皆其所引用偶有不平私慨叹而已帝责开元有私开元辨延儒等亦前为辩解帝命之退延儒等请令补牒从之开元本欲尽发延儒罪以其在侧不敢言而延儒虑其补牒陰令吴昌时等沮之及奏上止述奏辞不更及延儒他事帝大怒令锦衣逮治卫帅骆养性开元乡人也素怨延儒令尽发延儒之隐以闻帝益怒密旨下养性令潜毙堦及开元于狱养性惧以语同官同官曰不见田尔耕许显纯事乎养性乃不敢奉命已而语泄有奏之帝者请并诛养性养性大惧帝亦不欲杀諫臣疏竟留中会镇抚再上堦狱言掠者再供无异词养性亦封还密旨乃命移刑官定罪尚书徐石麒等拟堦戍开元赎徒帝责以徇情骫法令对状夺石麒官而逮堦开元至午门并杖一百堦已死弟垓口溺灌之乃复苏仍系刑部狱已皆遣戍】质实【姜堦字如农莱阳人熊开元字鱼山嘉平人】

十二月削左都御史刘宗周籍

【宗周甫起废籍为左都御史既至官召见文华殿帝问都察院职掌何在对曰在正已以正百寮必存诸中者上可见君父下可质天下士大夫而後百寮则而象之大臣法小臣廉纪纲振肃职掌在是而责成巡方其首务也巡方得人则吏治清民遂帝曰卿力行以副朕望宗周以败书屡闻请旌事卢象昇追戮误国奸臣杨嗣昌逮跋扈总兵左良玉俾督师大帅皆知惩劝帝不能从闰月晦日召见廷臣于中左门时姜堦熊开元以言事下诏狱宗周约九卿共救入朝闻密旨置二人死宗周愕然谓衆曰今日当空署争必改发刑部始已及对有荐西洋人汤若望乃善火器者请召试宗周曰边臣不讲战守屯戍之法专恃火器近来陷城破邑岂无火器然我用之制人人得之亦可制我不见河间反为火器所破乎国家大计以法纪为主大帅跋扈援师逗遛奈何反姑息为此纷纷无益之举耶因议督抚去留则请先去督师范志成且日十五年以来陛下处分未当致有今日败局不追祸始更弦易辙欲以一旦苟且之政

补目前罅漏非长治之道也帝变色曰前不可追善後安在宗周日在陛下开诚布公公天下为好恶合国人为用舍进贤才开言路次第与天下更始帝曰目下烽火逼畿甸且国家败坏已极当如何宗周日武备必先练兵练兵必先选将选将必先择贤督抚择贤督抚必先吏兵二部得人宋臣曰文官不爱钱武官不惜死则天下太平斯言今日鍼砭也论者但论才望不问操守未有操守不谨而遇事敢前军士畏威者若徒以议论捷给举动恢张称曰才望取爵位则有余责事功则不足何益成败哉帝曰济变之时先才後守宗周日前人败坏皆由贪纵使然故以济变言愈当兼重操守帝曰大帅别有才局非徒操守可望成功宗周日他不具论如范志完操守不谨大将偏裨无不由贿进所以三军解体由此观之操守为重帝色解曰朕已知之命宗周起于是宗周出奏曰陛下方下诏求贤姜燠熊开元二臣遽以言得罪下锦衣狱陛下度量卓越妄如臣宗周慙直如臣黄道周尚蒙使过之典二臣何不幸不邀法外恩帝曰道周有学有守非二臣比宗周日二臣诚不及道周然朝廷待言官有体言可用用之不可置之即有应得之罪亦当付法司今遽下锦衣狱终於国体有伤帝怒甚曰法司锦衣皆刑官何公何私且罪一二言官何遽伤国体有如贪赃坏法欺君罔上皆不可问乎宗周日锦衣膏粱子弟何知礼义听寺人役使即陛下问贪赃坏法欺君罔上之臣亦不可不付法司也帝大怒曰如此偏党岂堪宪职有间曰开元此疏必有主使疑即宗周金光辰争之帝叱光辰并命议处翌日光辰贬三秩调用宗周革职下刑部议罪阁臣特不发捧原旨御前恳救乃免斥为民】

李自成犯襄阳遂犯荆州焚献陵

【自成由汝宁引兵而西谋拔襄阳为根本时左良玉壁樊城大造战舰驱襄阳一郡人以实军诸降贼附之有衆二十万然亲军爱将大半死而降人不奉约束良玉亦渐衰多病不复能与自成角自成乘胜攻良玉良玉退兵南岸结水寨相持以万人扼浅洲贼兵十万争渡不能遏良玉乃宵遁引其舟帅左步右骑而下至武昌从楚王乞二十万饷曰我为王保境王不应纵兵大掠火光照江中宗室士室奔窜至山谷多为土寇所害驿传道副使王扬基夺门出良玉兵掠其赀并及其子女人畏良玉兵甚于贼贼既得渡长驱犯襄阳官吏皆先遁贼入城乡官蔡思绳宋大勋殉节死贼分兵冠宜城知县陈美固守八昼夜城陷抗骂不已为贼磔死训导田世福亦死之寇枣阳知县郭裕发礮石击伤多贼愤攻益力城陷身被数槊大骂贼支解之阖门遇害寇光化甫簿城知县万敬宗遂自尽贼义之城获全乡官韩应龙自缢死寇谷城知县周建中亦殉节寇均州知州胡承熙被执不屈与其子尔英俱死承熙有能声迁刑部员外郎未行遇难寇郧阳同知刘璇死之寇保康知县万惟坛与妻李氏死之寇荆门掇州事承天府同知卢学古誓死守学正张郊芳训导程之奇亦盟诸生于大成殿佐城守贼环攻四日无援城陷学古骂贼不絶口剖腹而死郊芳之奇亦不屈死州同知沈方一门十八人皆遇害贼既陷荆门遂合兵向荆州巡抚陈睿谟急渡江入城奉惠王常润南奔监司以下皆奔士民遂开门迎贼湘阴王俨铲遇害训导撤君锡正衣冠坐明伦堂贼至欲屈之诟骂死贼大索缙绅故相张居正子尚宝丞允修不食死户部员外郎李友兰不屈死诸生王维藩率妻朱氏及二女避难为贼所掠令妻女赴井死遂见杀诸生王图南被执骂死夷陵乡官李云以城陷不屈执至江陵乃絶食死归州千户吕调元率部卒格鬪陷重围中招之降大骂乱刃下贼势大炽所至辄摧破前巡抚宋一鹤乃急趋承天护献陵栅木为城贼忽大至积薪烧之烟罩纯

德山城穿一鼓而登尽毁裡殿守陵巡按御史李振声总兵官钱中选皆降自成欲发猷陵陵中有声振山谷惧而止】质实【王扬基潜山人蔡思纯官罗平知县宋大勋官福建通判陈美字在中新建人田世福阳城人郭裕清江人万敬宗南昌人韩应龙官长芦盐运使周建中秦州人胡承熙歙县人刘璇永平人万惟坛曹县人卢学古夏县人张郊芳黄县人程之奇黄冈人沈方桐乡人陈睿谟武进人湘阴王俨铲辽简王植第十一子贵熠于永乐二十二年始封湘陰俨铲其八世孙也撤君锡字宾王绛县人李云官颍州知州有惠政州人建祠祀之谢事归大书名义至重鬼神难欺二语于牖以自警竟殉节如其志 本朝乾隆四十一年追諡陈美忠烈卢学古烈愍蔡思绳宋大勲万敬宗韩应龙周宗建胡承熙刘璇万惟坛沈方张允修李友兰李云节愍田世福等并入祠】

御定资治通监纲目三编卷三十八

卷三十九

<史部,编年类,御定资治通监纲目三编>

钦定四库全书

御定资治通监纲目三编卷三十九

【起癸未明庄烈帝崇祯十六年尽甲申明庄烈帝崇祯十七年】凡二年

【癸未】十六年春正月李自成陷承天前巡抚金都御史宋六鹤等死之

【一鹤既趋承天与前留守沈壽崇鍾祥知县萧汉登陴御守五昼夜闻贼燔猷陵汉突围出救贼骑环之汉太呼锺祥今在谁敢惊陵寝者贼挟之去不杀说降不听城中人有通於贼者开门延之入城遂陷一鹤掌□及乡官从所尚皆死分巡副使张凤翥走入山中贼拘汉僧寺谨视之求死不得乘守者懈乃自刳贼分兵旁掠潜江京山云梦黄陂孝感等县皆陷云梦知县谌吉臣署黄陂知县夏统春潜江乡官欧阳燧孝感乡官程道壽死之贼前锋逼汉阳转攻郧阳按察使高斗枢游击王光恩力守乃解去自成遂据承天自号奉天倡义大元帅号罗汝才代天抚民威德大将军分其衆曰标营领兵百队曰先後左古营各领兵三十余队五营以序直昼夜次第休息巡徼严密逃者谓之落草磔之收男子十五以上四十以下者为兵凡精兵一人从以主刳掌械执爨者十人军令不得藏白金过城邑不得室处妻子外不得携他妇人寝与悉用单布幕绵甲厚百层矢礮不能入一兵倅马三四匹冬则以茵褥籍其蹄剖人腹为马槽以饲马马见人辄锯牙思噬若虎豹军止即出较骑射曰站队夜四鼓蓐食以听令所过崇冈峻坂腾马直上水惟憚黄河若淮泗泾渭则万衆翹足马背或抱鬣缘尾呼风而渡马蹄所壅阙水为不流临阵阵列马三万名三堵墙前者反顾後者杀之战久不胜马兵佯败诱官兵步卒长枪三万擊刺如飞马兵回击无不大胜攻城迎降者不杀守一日杀十之三二日杀十之七三日屠之凡杀人东屍为燎谓之打亮城陷步兵万人环堞下马兵巡徼无一人幸得免张献忠虽至残忍不逮也诸营较所获马羸者上赏弓矢铅銃者次之币帛又次之珠玉为下自成不好酒色脱粟粗粝与其下共甘苦汝才妻妾数十被服纨绮帐下女乐数部厚自奉养自成尝嗤鄙之汝才衆数十万用山西举人吉珪为谋主自成善攻汝才善战两人相须若左右手自成下宛叶克梁宋兵强衆附有专制心顾独忌汝才乃召汝才所善贺一龙饮缚而杀之晨以十二骑斩汝才于帐中悉兼其衆自成在中州所掠城辄焚毁之及渡汉江谋以荆襄为根本改襄阳曰襄京修襄王宫殿居之改禹州曰均平府承天府曰扬武州他府县多所更易又以牛金星言设官爵名号以田见秀刘宗敏为权将军李富贺锦刘希尧等为制将军张鼐党守素等为威武将军谷可成任维荣等为果毅将军置五营二十二将上相左辅右弼六政府侍郎郎中从事等官要地设防御使府曰尹州曰牧县曰令封崇王由櫝及郡王被执者俱为伯官吏降者并受伪职伪侍郎喻上猷荐所知李开先陈万策贤可用具书币徵之开先触墙死万策自经自成既杀汝才一龙寻又袭杀蔺养成夺马守应兵于是十三家七十二营诸大贼降死殆尽而自成献忠独存】质实【云梦西魏析安陆县置明属德安府今

因之孝感後唐置明属德安府今改属汉阳府黄陂高齐置明属黄州府今改属汉阳府宋一鹤先以襄阳陷夺职戴罪一鹤连疏引疾下所司核实许解官候代未行及于难沈壽崇宣城人都督有容子忤巡按劾罢亦未行萧汉字云涛南昌人从所尚鍾祥人官刑部主事与子士默士熊皆不屈死谥吉臣南昌人夏统春桐城人为黄陂县丞摄县事迁麻城县知县未赴贼攻城督衆拒守凡十五昼夜贼忽解去统春度贼必至而衆已度甚休于家閱五日贼果突至城遂陷统春巷战力竭被执欲屈之统春指贼魁大骂贼怒断其右手复以左手指贼骂又断之骂不已乃割其舌目怒视皆欲裂又剜其目犹以头触贼遂支解之欧阳璲官盱眙知县归里贼陷潜江被执与妻廖氏同殉节程道壽尝为来安知县贼陷孝感置掌旅守之道壽结里中壮士击杀掌旅贼复至杖之系狱令为书招程良筹道壽曰我不能助良筹灭汝肯助汝耶遂见杀程良筹字持卿孝感人工部尚书注子也与同邑参政夏时亨筑垒于县境之白云山以御贼贼使说降良筹毁其书贼怒设长围攻之相持四十余日解去既而汉阳武昌为张献忠所陷四面皆贼独白云孤处其间贼颇患之良筹复号召左右诸寨与官兵犄角进兵恢复孝感云梦进薄德安兵收退保白莲寨寨中人素通贼为内应良筹遂被执说降不屈羈之密室寻左良玉遣将攻德安贼惧拥良筹令止外兵不从逼良筹偕行又不从遂被杀崇王由櫝胁授伪职为襄阳伯令谕降州县之未陷者不从杀之于泌阳城喻上猷石首人尝为御史李开先陈万策皆陵举人本朝乾隆四十一年追諡萧汉忠烈宋一鹤沈壽崇谥吉臣夏统春烈愍从所尚欧阳璲程道壽程良筹】

【节愍李开先陈万策入祠其时绅士遇贼被害者又有汝宁照磨张大道云梦生员袁启观安乐生廖应元并予入祠张大道宜都人居流贼据宜都大道团练义兵二千余人攻城为贼所袭父子五人俱力战死袁启观廖应元皆结寨御贼贼攻破之应元以骂贼射死启观磔死】

二月乙丑朔日有食之

贼陷武冈州杀岷王企

【贼党马守应陷澧州窥常德土寇甘明扬等应之攻破武冈州纵掠岷邸岷王企 遂遇害生员袁承孟率子梦麟督乡兵剿之为贼所蹙投潭水死梦麟战歿先是湖南土寇有飞天王江长子洪老殼者横行湘乡安化益阳宁乡间犯湘潭长沙总兵尹先民合兵剿之战桃花江阵斩飞天王俘江长子洪老殼溺死贼悉定而临武刘新宇监山李荆楚复大炽谓之临蓝贼据山寨纳亡命同出犯常德衡州围桂阳州先民率裨将贡王猷土师谭仰庭来援围始解寻以二百余艘由衡湘犯长沙攻十余日不克乃引去转攻袁州直逼永州将由东安水道阑入广西于是合湖广广东广西福建兵会剿沅抚陈睿谟檄先民将主客兵万五千人讨刘新宇败贼铜梁桥用计缚新宇诛之余贼推新宇弟秀宇为主要险阻以拒官军官军四路夺隘入直抵其巢擒秀宇广东广西福建兵分道入蓝山藤本轆轤不得进遂纵火焚之乘烟而上先後杀贼首曾戒奴郭子奴等李荆楚就缚临蓝贼平而诸盗时窃发患不得息及是竟陷岷藩势张甚巡按御史刘熙祚驰击甘明扬于常德破其衆斩明扬方还兵长沙而张献忠已临江欲渡湖南大震矣是时流贼弄兵十五六年蹂躪半天下独浙江江西福建广东广而未罹

其患顾常患土寇江西有九连山贼攻掠赣州之龙南定南惠州之和平潮州之平远广东有罗冈贼张惟元流扰程乡及福建之上杭武平清流僭号永兴称为王而浙江则有许都之乱许都者东阳诸生副使达道之孙家富任侠好施陰以兵法部勒宾客于弟思得一官绍兴推官陈子龙常荐诸上官不用会有义乌奸人假中官名招兵者都无与也束阳知县姚逊木利都所有文致都求赂不应都葬母山中会者万人逊木告监司曰都】

【反矣遣役收捕之送葬者大噪遂里帛反号白头兵旬日间聚衆数万连陷束阳义乌浦江遂逼金华既而引去巡按御史左光先命子龙为监军往讨稍有俘获都退屯山中官军仰攻不能下监司欲抚之语子龙曰贼聚粮据险非旷日不克我兵万人止五日粮柰何子龙曰都旧识也请往察之乃单骑入都营责数其罪谕令归降待以不死遂挟都走山中散遣其衆而以二百人降光先乃斩都等六十余人于江浒自是一二年间浙东土寇蠡起皆称白头兵盖自都始】质实【湘乡东汉圻湘南县地置安化宋析益阳县地置宁乡宋析长沙县地置明并属长沙府湘潭秦湘南萧梁改湘潭元升州明复为县亦属长沙府今悉因之桃花江在益阳县西南六十里源出梓梁岩西北流迳浮邱山北又北流四十里入资江临武汉县五代晋省入平阳宋复置蓝山县汉南平隋改蓝山明并属桂阳州以隶于衡州府今迳属桂阳州桂阳唐置宋升为军元改路明降州属衡州府本朝雍正十年升直隶州东安宋以零陵县之东安塲置明属永州府今因之铜梁桥在嘉禾县东南三十里蓝山在桂阳州西百里按临武蓝山二县界苍翠浮空如蓝定南明隆庆二年析能南安远信丰三县地置属赣州府今因之平远明嘉靖四十三年析兴宁程乡二县地置属潮州府今改属嘉应州罗冈山在兴宁县北八十里清流宋析长汀宁化二县地置明属汀州府东阳唐析义乌县地置明属金华府今皆因之岷王企 庄王梗九世孙刘熙祚字仲缉武进人陈子龙字卧子松江华亭人左光先桐城人光斗弟也 本朝乾隆四十一年袁承孟及子梦麟并入祠】

三月左良玉军作乱南京戒严

【良玉既纵掠武昌居二十余日李自成前锋逼汉阳乃避之东去居人登蛇山以望叫呼更生曰左兵过矣良玉所部多降兵叛卒桀悍不驯裨将王允成为乱首摊兵十余万自九江而下破建德劫池阳去芜湖四十里泊舟三山荻港漕艘盐舶尽夺以载兵声言饷乏欲寄孥于南京文武大吏相顾愕眙陈师江上为守御士民一夕数徙商旅不行都御史李邦华被召道湖口叹曰中原安静土东南一角耳身为大臣忍坐视决裂袖手而去耶草檄告良玉以危词动之良玉气乃沮邦华用便宜发九江库银十五万饷之而身入其军开诚慰劳一军稍安邦华入见帝论良玉溃兵之罪请归罪于王允成帝乃令良玉诛允成而獎其能定变良玉卒留允成于军中不诛也良玉以贼萃湖北不敢婴其锋遂留安庆久之徐溯九江而上当是时官军所至辄肆攻剽凤阳总督马士英遣使者李章玉徵贵州兵讨贼于道掠江西为乐平吏民所拒击比抵徽州境复大掠民遂以为贼羣起破走之章玉讳言激变谓徽民抗拒官军实在籍御史金声及推官吴翔凤所主使士英以闻声两疏陈辨帝察其无罪不问】质实【蛇山在武昌府城内东隅一名高冠山即黄鹄山支阜建德汉石城县地唐初为秋浦县地至德二载始分置至德县五代杨行密改建德明属池州府今因之池阳谓贵池青阳也贵池隋秋浦县杨行密改贵池明为池州府治今因之三山在繁昌县东北三十五里山之东为三山矶

荻港在繁昌县西五十里吴凤翔大兴籍南昌人】

发明【左良玉骁勇善战屡殲巨盗一时威名出诸将右乃以骄亢生心缓追养寇督师檄调而不前将士败亡而不救跋扈极矣甚且纵兵淫掠破邑攻城致令居人畏左军甚于畏盗兵是平盗者又增一盗矣溃兵之变向使无邦华之檄告权宜戢乱其势必有一不可言者朝议但归罪于偏裨而转獎其能定变可谓舍豺狼而问狐狸而良玉乃竟匿允成而不诛此其意中宁复有朝廷哉而当时尚欲倚以办贼是但知其材任攻战而不知其行已同于盗贼矣】

夏四月我

大清兵北还

【大清兵自山东还至近畿诸路援军亦随而北终未敢一战给事中熊汝霖因言兵入墙子岭以来南北往返诸军谨随于後如厮隶之于贵官负弩前驱望尘靡及何名为将何名为督师帝深然之汝霖复言外县难民纷纷入都不云被兵而云避援军兵破霸州未尝杀戮百姓援军继至遂无子遗朝廷岁费数百万金钱以养兵岂欲毒我赤子帝?其语激谪为福建按察使照磨而近畿烽火日亟帝忧甚大学士吴甡方奉命办流寇周延儒不得已自请视师帝大喜降手勅獎以召虎裴度赐章服白金文绮上驷给金帛赏军延儒驻通州亦不敢战惟与幕下客饮酒娱乐而日腾章奏捷及】

【大清兵北旋至怀柔赵光拚合唐通白广恩等八镇兵邀战于螺山皆溃总兵张登科和应荐败歿延儒侦大清兵已还乃言兵退请下兵部议将吏功罪遂归京师时援军多畏缩观望其以死事闻者有大同参将吴希稷守备张尔埜与登科等先後战死是冬大清兵攻宁远前屯總兵李辅明驰救歿于阵而宁远总兵王定宸及别将李鸣凤罗文耀陶宗仪杨伦皆与城殉】质实【螺山在怀柔县北吴希稷连城人张尔埜大同人王定宸李鸣凤罗文耀杨伦皆辽东人陶宗仪密云人 本朝乾隆四十一年追諡张】

【登科和应荐吴希稷张尔埜李辅明杨伦烈愍王定宸李鸣凤罗文耀陶宗仪节愍】

五月以魏藻德为少詹事兼东阁大学士预机务【藻德以十三年举进士既殿试帝恩得异才复召四十八人于文华殿问方畧藻德口才捷给自叙十一年佐有司守通州功帝善之擢置第一授修撰及都城戒严疏陈兵事又召对称旨帝意其有抱负擢礼部右侍郎兼东阁大学士入阁辅政藻德力辞部衔乃改少詹事正统末年兵事孔棘彭时以殿试第一人踰年即入阁然以原官预机务未有超拜大学士者陈演见帝遇之厚曲相比附八月补行会试引为副总裁越蒋德璟黄景昉而用之藻德居位一年无所建白但偶议令百官捐助而已】质实【魏藻德顺天通州人】

吴甡罢

【帝以襄阳荆州承天连陷召对廷臣陨涕谓甝曰卿向历岩疆可往督湖广师甝其疏请得精兵三万自金陵趋武昌扼贼南下帝方念湖北览疏不悦留中甝请面对帝以所需兵多猝难集南京隔远不必退守甝奏言左良玉跋扈甚前督师杨嗣昌九檄徵兵一旅不发臣不如嗣昌而良玉踞江汉甚于曩时臣节制不行徒损威重南京从襄阳顺流而下窥伺甚易宜兼顾非退守也大学士陈演言督师出则督抚兵皆其兵甝言臣请兵正谓督抚无兵耳使臣束手待贼事机一失有不忍言者帝乃令兵部速议发兵尚书张国维请以总兵唐通马科及京营兵共一万界甝又言此兵方北行俟撤备後始可调帝命姑俟之甝屡请帝曰徐之撤备则兵自集卿独往何益踰月周延儒出督师朝受命夕启行蒋德璟谓倪元璐曰上欲吴公速往缓言相慰者试之耳观首辅疾趋可见甝卒迟回不官行部所拨唐通兵演又以关门不可无备请留之甝不得已以是月辞朝先一日出劳从骑帝犹命中官赐银牌给赏越宿忽下诏责其逗遛命辄行入直甝惶恐两疏引罪遂许致仕既行演与锦衣骆养性交构之帝益怒及周延儒以贿败帝作色曰两辅臣负朕朕待延儒厚乃纳贿行私罔知国法命甝督师百方延缓为委卸地延儒被纠甝何独无既而曰朕虽言终必无纠者锦衣卫可宣甝候旨甝入都敕法司议罪遣戍金齿南京兵部尚书史可法驰疏救不从】

周延儒罢

【延儒自通州还朝缴上督师敕帝即令藏贮以识勲劳论功加太师廕于中书舍人赐银币蟒服延儒辞太师许之居数日掌锦衣卫事骆养性及中官尽发所刺军中事帝乃大怒责延儒蒙蔽推诿下廷臣察议陈演等公偈救之延儒席藁待罪自请戍边帝犹降温旨言卿报国尽忱终始勿替许驰驿归赐路费百金以彰保全优礼之意及廷臣议上帝复谕延儒功多过少令免议延儒遂归】

以倪元璐为户部尚书

【祖制浙人不得官户部元璐辞不许帝眷元璐甚五日三赐对元璐言陛下诚用臣臣请得参兵部谋帝曰已谕枢臣令与卿协计时冯元飏为兵部尚书与元璐同志鈎考兵食中外想望治平惟帝亦以用两人晚元璐以新制遣科臣出督四方租赋徒优民无益督饷侍郎忧为盗劫远避之长沙衡州饷终不克办并乞罢之仍责成督抚按臣无烦朝使自军兴以来正供之外有边饷有新饷有练饷欸目繁多黠吏为奸当合为一帝皆报可而时事益不可为左支右绌灾伤捐免颇多漕运时为土寇所泣于是言国计者纷起崇明人沈延揚献海运策元璐请以海艘六试行之月余运已至帝大喜遂命漕运与海运兼行未几有蒋臣者请行钞法帝即擢为户部司务元璐亦力赞之终不可行而止帝又尝以御史王燮言收销旧钱但行新钱新钱弥恶簿杂铅沙大半粹掷破碎百不盈寸而古钱销毁顿尽益自隋世尽销古钱至是凡再见寻又敕铸当五钱不及铸而国亡】质实【蒋臣桐城人王燮商邱人】

张献忠陷武昌沉楚王华奎于江前大学士贺逢圣等死之

【先是左良玉避自成东下尽撤湖广兵自从献忠闻之乘虚袭陷黄梅广济生员张开熙

李化龙孙仍卢如鼎殉焉进薄蕲州知州许文岐擢督粮参政当行叹曰吾为天子守孤城三载矣分当死封疆虽危急奈何弃之檄参将毛文富出屯近郊为固守计文富却关厢扬去荆王府将校郝承忠者潜通献忠导其众悉力来攻文岐发礮毙贼颇多夜将半雪盈尺贼破西门入文岐巷战雪愈甚礮不得发与指挥岳璧用被执献忠欲胁两人降璧属声曰我世臣也城亡与亡岂降贼贼乃杀璧而羁文岐于後营尽屠州民卯官饶京张邦翼李树初李挺李新量一化皆死文岐与举人奚鼎铉等数十人同系文岐密谓曰观贼老营多乌合凡此数万贼皆被掠良民若告以大义同心协力贼可殲也陰相结剋期举事谋泄遇害贼大衆入黄州同知朱统鏘御之歿于阵黄民有弃家逃乃驱妇女铲城寻杀之以填堑黄冈知县孙自一县丞吴文燮卫指挥郭以重乡官樊维城举人於斯行武举王子监生员冯云路史之见汪廷陞义民余秀负曹上谟曹大震不屈死贼分兵攻黄陂麻城黄陂知县赵元有主簿薛闻礼生员傅可知俱先後死难湖南将马人龙援麻城战歿有大姓奴汤志者杀诸生六十人以城降置县事教谕萧颂圣死之献忠乃改麻城为州是时黄州属邑皆陷蕲水县丞吴文奕教谕孙玮训导童天申罗田守将郭金城生员王邦衡与子鲤并殉节献忠引兵西犯汉阳武昌震惧前巡抚宋一鹤既死代者久不至武昌知府江夏知县并以朝覲行楚府左长史徐学顔摄县事急修守具然武昌素不宿重兵城空虚或议撤江上兵以守参将崔文荣曰守城不如守江江中鸭蛋洲浅不及马腹纵之飞渡而坐守孤城非策也当事不从贼已渡江陷武昌县杀知县邹逢吉县无人贼出营樊口文华军洪山寺扼之既斂兵入城以他将代守贼全军由鸭蛋洲军渡抵洪山守将亦退入城文荣偕逢圣固守贼攻之不能下监军参政王揚基时已擢右佥都御史巡抚承天德安二郡未闻命尚驻武昌见势急与推官傅上瑞诡言有事汉阳开门遁去人情益汹汹先是逢圣诣楚府乞发帑募土楚王出太祖所分金裹交椅一于庭曰惟此可作军需耳他何有逢圣哭而出及寇警日急始出赏募兵应募者率蕲黄溃卒及贼间谍反闭门纳贼文荣方出门还阖城扉不及跃马大呼杀三人贼攒槊刺之洞胸死学顔格门断左臂大骂不屈为贼支解死逢圣被执叱曰我朝廷大臣若曹敢无礼贼麾使去投水死武昌通判李毓英教谕王会篇卫经历汪文熙江夏巡检戴良瑄乡官吴思温舒显应贡其志保举知县傅如珪张鸣锦举人谢淳培贡生何应轸生员熊霄明睿皆不屈死都司徐至美守黄鹤楼重创死贼乃缚楚王华奎笼而沉诸江尽杀楚宗室録男子二十以下十五以上为兵余皆杀之由鹦鹉洲至道士袱浮觜被江月余人脂厚累寸鱼鼈不可食献忠遂僭号改武昌曰天授府江夏曰上江县据楚王第铸西王之宝伪设尚书都督巡抚等官开科取士下令发楚邸金振饥民蕲黄等二十二州县悉附】质实【鸭蛋洲一作鸭弹洲在江夏县东北江中樊口在武昌县西北五里洪山寺一名宝通寺在江夏县东十五里洪山下黄鹤楼在江夏县西鹦鹉洲在江夏县西南二里道士袱在大冶县东九十里古名土袱镇贺逢圣当城陷时载家人以？出墩子湖凿其？艚妻危氏子覲明光明子妇曾氏陈氏孙三人皆溺死初贼连陷蕲黄逼江夏有大冶人尹如翁逢圣门生也走三百里持一僧帽一袈裟来貽逢圣逢圣反其衣曰子第去无夏我如翁去贼陷大冶死之逢圣既殉节越百有七十日屍出浮水上面如生以冬十一月壬子殮大吏葬之江夏县之南纸坊许文岐字我西仁和人岳璧蕲州人世为卫指挥饶京官监察御史张邦翼官江西布政使李树初官山西按察副使李挺官遵化兵备副使李新官陕西佥事举家被执贼欲屈之新叱曰我昔官秦中尔辈方为厮养今日肯屈膝厮养耶贼怒新抱父屍就刃董一化官印江知县朱统鏘新建人孙自一光州人吴文燮闽人郭以重黄州人世为卫指挥闻城陷自他所来赴难其妻欲止之叱曰朝家畀我十三叶金紫不能易一死哉

吾将光杀汝妻乃不敢言既至遇贼欲胁之去坚不从露刃慑之乃好谓贼曰从汝非难但抱呱呱儿者吾妻也汝为我杀之吾无累矣贼如其言以重即夺贼刀击斩一贼羣贼拥至遂投水死樊维城官福建兵备副使赵元有晋江人守城战死冯云路字渐卿从贺逢圣讲学贼将渡江云路贻书逢圣曰在内以宁湖为止水在外以汉江为汨罗宁湖者云路谈经处也城既陷乘桴入宁湖贼遣使来聘投湖死薛闻礼武进人岁歉民逋漕粟闻礼贷于所知得千金以代民逋贼陷黄陂爱其才挟与俱去暮即亡归杀贼所置伪官令士民远避挺身任之遂被杀传可知以孝称贼执之怜其年既老不杀令饲马骂贼被害马人龙镇算人萧颂圣定远人童天申施州人徐学顔字君复永康人一家二十余人皆殉节崔文荣海宁卫人傅上瑞武定人李毓英固安人王会篇汉阳人吴思温官广西市政使舒显应官凤翔知府贡其志官霍山知县傅如珪保举知县未任张鸣锦官指挥千户谢淳培何应轸皆江夏人熊霄字渭公黄冈人移居武昌喜邵子皇极书颇言未来事城破前一日贻书其友人曰明日当覓我基树下及期行树傍贼追至跃入河池以死明睿江夏人城破贼独不入其门睿慨然曰安有父母之邦沦覆而偷生苟活者欵妻及二子二女诸婢以次投井死时人号为明井徐至美上虞人有朱士鼎者为巡江都司城陷被执贼喜其勇敢欲大用之戟手大骂贼断其右手乃以左手染血洒贼贼又断之不死贼退令人缚笔于臂能作楷字招集旧卒训练如常 本朝乾隆四十一年追諡贺逢圣忠愍许文岐李新崔文荣忠节岳璧郭以重樊维城薛闻礼徐学顔徐至美烈愍饶京张邦翼李树初李挺董一化朱统𦏧孙自一赵元有马人龙萧颂圣郭金城李毓英吴思温舒显应贡其志傅如珪张鸣锦节愍张闻熙等及尹如翁并入祠】

六月范志完有罪下狱

【先是志完为督师逗遛不进次山东纵兵淫掠为兵备僉事雷演祚所劾帝令演祚再陈志完者首辅周延儒门生也演祚意有所忌久不奏及延儒下廷议演祚乃奏言志完两载僉事骤陟督师非有大党何以至是方德州被攻不下转攻临清又五日志完始至闻後部破景州则大惧欲避入德州城漏三下邀臣议臣告以督师非入城官蓟州失事由援兵内溃志完不恠而去若夫座主当朝罔利曲庇只手有燎原之勢片语操生死之权称功颂德偏于班聯臣不忍见陛下以周召待大臣而大臣以严嵩薛国观自待也臣外藩小吏乙榜孤踪不言不敢尽言不敢感陛下虚怀俯纳故不避首辅延儒与举国媚附时局畧进一言帝益心动下志完狱召演祚入对亲鞫志完于中左门质其逗遛淫掠状皆实帝问演祚称功颂德者谁对曰延儒招椎纳贿如起废清狱蠲租皆自居为功考选台谏尽收门下凡求总兵巡抚者必先贿幕客董廷献帝怒逮廷献论志完死已又日志完与赵光拚皆逗遛河间独罪志完诎服其心乎遂并逮光拚光拚尝荐总兵白广恩广恩抗不赴召帝以是益?光拚卒与志完同日斩西市】质实【雷演祚太湖人】

雷震奉先殿

【遣官告太庙敕羣臣修省】

秋七月京师大疫

【自二月至是月死者无算诏发帑疗治瘞五城暴骸且命释轻系】

八月张献忠陷湖南诸府

【献忠既僭号武昌李自成在承天闻之忌且怒貽之书曰老回回已降曹操辈诛死行及汝矣左良玉兵复西上伪官吏多被擒杀献忠惧悉衆趣湖南岳州大震承天巡抚王杨基率所部千人自岳州奔长沙推官蔡道宪请还驻岳州曰岳与长沙唇齿也并力守岳则长沙可保而衡永亦与虞扬基曰岳非我属也道宪曰弃北守南犹不失为楚地若南北俱弃所属地安在扬基语塞乃赴岳州及贼入蒲圻扬基即遁去湖广巡抚王聚奎远驻袁州惮贼不敢进道宪亦请移岳州聚奎不得已至岳数日即徙长沙道宪曰贼去岳远可缮城以守彼犯岳犹惮长沙援若弃岳长沙安能独全聚奎不从贼果逼岳州沅抚李乾德摠兵孔希贵御贼于城陵矶三战三克殲其前部献忠怒百道并进乾德不支皆走岳州陷献忠欲渡洞庭湖卜于神不吉投筊而詢将渡风大作献忠聯巨舟千艘载妇女焚之火光烛水夜如昼遂易骑以犯长沙巡按御史刘熙祚先令道宪募壮丁五千与总兵官尹先民等扼罗塘河聚奎闻贼至大惧急撤兵还城自卫道宪曰去长沙六十里有险可栅以守毋使贼踰此又不从贼薄城士民尽窜聚奎诡出战遽率所部走湘潭会惠王避地至长沙与吉王谋出奔熙祚奉以奔衡州独道宪登陴御守贼遶城呼曰军中久知蔡推官名速降无自苦道宪命守卒射之毙寻先民出战败还贼夺门入先民降道宪被执贼唱以官嚼齿大骂贼曰汝不降将尽杀百姓道宪大哭曰愿速杀我毋害百姓时有健卒林国俊李师孔陈贤刘士凤等随道宪不去贼令说道宪降国俊曰吾主畏死去矣不至今日贼曰尔主不降尔辈亦不得活同俊曰我辈畏死亦去矣不至今日贼知道宪终不可夺磔之其心血直溅贼面贼将并杀国俊四人四人愤然曰愿瘞主屍而死贼许之乃解衣裹道宪骸瘞之南郊醴陵坡皆自刎贼乃以给事中史可镜为伪巡抚俾守长沙引兵进薄衡州聚奎兵自湘潭先至衡大焚掠桂王及吉惠二王登舟避乱熙祚单骑赴永州为城守计聚奎复避贼走祁阳衡州又陷献忠拆桂府材载至长沙造伪殿而自率兵追三王三王奔至永州聚奎率所部相继至刼库金去永州士民空城逃熙祚乃令其中军护王王走广西已留永州死守城陷见杀又陷宝庆常德发故督师杨嗣昌祖墓斩其屍见血攻道州守备沈至绪战歿其女再战夺父屍还城获全当是时岳州长沙常德衡永宝庆郴州之属多为献忠所破而自成窃据承天遣其党高一功冯雄据襄阳任继光据荆州蔺养成牛万才据夷陵白旺据安陆萧云据荆门谢应龙据汉川贼伪官徧诸郡县诸郡县将吏之殉于城守及乡官士庶不屈死者湖北则援剿都司张应礼均州知州胡承熙布衣李友竹嘉鱼知县王良监蒲圻知县曾栻安陆知县濮有容江陵知县袁问科诸生谢劭安随州吏目沈元监归州千户吕调元京山典史张自新诸生李哲夷陵卿官李云应山举人刘申锡沔阳诸生朱日荐鍾祥诸生刘振孙云梦诸生柳宗旦张用晦施尔奇柳列奎李善昌左璞李聯孝感诸生熊延祚湖南则衡州知府张任宝庆知府李振珽通判何三杰常德同知朱国治长沙通判周二南岳州通判刘璧临湘知县林不息湘陰知县杨开诸生黄凤德醴陵知县万赖擢诸生文昌拱宁乡知县莫可及安化知县袁继登衡阳知县张鹏翼衡山知县董我前教谕彭允中桂东知县母崇正浏阳大围山守备王元封署武陵县衡州教授时道亨乡官杨鹭诸生周笏柳之彦益阳教谕赖大雅乡官陆有光诸生易应远巴陵教谕欧阳显宇邵阳教谕王绂诸生刘源澄曾士选刘养生布衣刘人俨陈邦基长沙县丞共士义武生萧键善化举人冯一第诸生李

有斐东安举人唐德明湘潭诸生谭景悦萧赞黄文炳子甲谭孔昭谭思猷子清远耒阳诸生谢如珂皆死贼难于是湖南北十五府者十三辰州以土司塞辰龙关鄢阳以按察使高名衡游击王光恩百计扞御独得存然鄢阳四面皆贼中朝谓其已不复设抚治是年夏斗枢上请兵疏始知鄢存衆议即任斗枢为抚治陈演与之有隙乃擢知府徐启元右佥都御史任之加斗枢太仆少卿路阻亦不能达也而武昌诸生程天一孝感布衣易道三集乡勇讨贼监军道王瓚沔阳知州章旷起兵应之蕲黄汉阳三府旋反正良玉亦入武昌立军府驻其师闻献忠已入江西遣副将吴学礼往拔巡抚郭都贤其淫掠归之自募土人戍守未几吉安袁州建昌抚州俱告陷吉安通判邵梦河安福举人王之爵诸生周国柱分宜贡生张兆兰峡江诸生胡若坦吉水布衣徐士骧并以殉节着广东南韶大震属城尽逃副使王孙兰求救不应连城守将先据城叛愤而自经兵部侍郎吕大器方代侯恂为揔督无兵不能救良玉以恂解任中道逮下狱知其为已心怏怏与大器齟齬亦不援其部将马进忠马士秀连复岳州袁州已而进忠与贼战嘉鱼再失利良玉军遂不振顾献忠终憚良玉不敢南行有献计取吴越者谢不用决策入川中】质实【蒲圻晋置旧在嘉鱼西南隋移今治明属武昌府今因之城陵矶在巴陵县北十五里蜀江西来洞庭南注合流于此为一郡水口罗塘河在长沙县北醴陵坡在善化县东南祁阳三国吴析泉陵县置旧治在县东唐移今治明属永州府汉川唐析汉阳县地置汉川县宋改义川寻曰汉川明属汉阳府嘉鱼隋于沙美县地置鮎洑镇唐改嘉鱼县明属武昌府醴陵东汉置元升州明复为县属长沙府桂东宋析桂阳县地置明属郴州浏阳三国吴析长沙县地置明属长沙府今悉因之大围山在浏阳东北一百五十里一名首裨山东接江西瑞州府新昌县界北接江西南昌府宁州界邵阳汉昭陵县晋改邵陵隋改邵阳明为宝庆府治耒阳汉县元升州明复为县属衡州府今并因之辰龙阙在沅陵县东安福汉安城唐改安福元升州明复为县属吉安府今因之蔡道宪字元白晋江人王聚奎郿县人李乾德西充人吉王慈烱简王见浚八世孙史可镜长沙人以丁艰归降贼入四川李乾德覆还长沙执可镜掠械送南京伏法张应礼遂宁人胡承熙歙人迁刑部员外郎未行贼陷均州与子尔英俱殉节王良监霍山人曾栻临川人濮有容分水人一门十九人皆死难袁问科珙县人贼陷城避之镇雄贼索得阖家遇害沈元监金坛人吕调元归川人贼至招降不屈率义勇战死张自新分宜人统民兵剿贼战死于罗汉岭李云官颍州知州有惠政谢归城陷被执至江陵绝粒死张任三水籍三原人与贼战舟中合家被害李振斑鄞人城陷赴湘水死弟振斑仆李六凤周科徐彩俱殉何三杰定州人朱国治云南临安人周二南字汝为云南人与蔡道宪深相得道宪死二南力请于上官获奏闻赠恤寻擢岳州知府士民固留仍视长沙通判李自成遣其党自兴国间道入境二南督兵出御于浏阳之官渡歿于阵刘璧确山人擢汉阳知府未行奋力坚守粮尽城陷不屈死子泰时年十四又死之林不息莆田人莫可及宜兴人为长沙照磨摄宁乡县事于若鼎若钰俱殉节袁继登长垣人擢刑部主事未行城陷被焚死张鹏翼西充人贼胁使降不屈缚而投诸江妻子赴水死董我前富顺人彭元中分宜人母崇正四川人王元封建德人贼犯境单骑入贼营酣战马仆犹步门杀数人而死时道亨永明人杨鹭官上林苑监正赖大雅贛州人陆有光尝为推官以艰归贼陷长沙母被执不得已至贼营释其母扼吭死欧阳显宇桂阳州人骂贼支解死王绂贵州人吴士义归安人贼陷城举刀相向百姓号哭为请命士义骂贼不绝口死之冯一第走湘乡乞师贼执其母与兄招之至长沙就缚骂贼死母兄获免徐启元辽东人郭都贤益阳人邵梦河电白人以吉安通判署安福县事城陷死王孙兰字晚仲无锡人吕大器字俨若遂宁人本朝乾隆四十一年追諡蔡道宪刘

熙祚忠烈王良监曾栻濮有容袁问科张任李振珽林不息王元封时道亨欧阳显宇烈愍张应礼胡承熙李云何三杰朱国治周二南刘璧莫可及袁维登张鹏翼董叔前母崇正杨鹭陆有元吴士义邵梦河王孙兰烈愍林国俊等并入祠】

九月黄景昉罢

【操江故有文武二臣帝欲裁去文臣专任诚意伯刘孔昭召惠世扬为副都御史久不至帝命削其籍景昉上疏争帝不恚遂引归】

冬十月李自成寇潼关督师孙传庭死之

【自成既据承天僭号新顺王集牛金星等议兵所向金星请先取河北直走京师杨永裕请下金陵断燕都粮道从事顾君恩曰金陵居下流事虽济失之缓直走京师不胜退安所归失之急关中山河百二宜先取之建立基业然後旁畧三边资其兵力攻取山西後向京师庶几进战退守万全无失自成从之初传庭之败于柿关而归陕也力主固守潼关控扼上游益募勇士使白广恩高杰将之屯田缮器积粟三家出壮丁一制火车三万辆俟贼间而击之会开中频岁饥苦征缮秦之士大夫以传庭用法严不乐其在秦相与譁于朝曰秦督玩寇矣咸上章催战独兵部冯元飏持议与传庭合谓官军新募未经行阵宜致贼而不宜致于贼乃于帝前争之曰请先下臣狱俟一战而胜斩臣谢之人贻书传庭戒毋轻战白高两将不可任而廷议趣战益急帝加传庭督师命速出关传庭顿足叹曰柰何乎吾固知往而不返也然大丈夫岂能再对狱吏乎不得已遂再议出师以摠兵牛成帑将前锋高杰将中军王定官抚民将延宁兵为後劲白广恩统火军营自新安来会檄左良玉赴汝宁夹击陈永福将河南兵秦翼明将川兵为犄角是时自成已自楚至豫尽发荆襄兵令于汜水荥泽伐竹结筏人佩三葫芦将谋渡河传庭分兵防御以八月十日率师出潼关师次汝州伪都尉四天王李养纯降养纯言贼虚实诸贼老营在唐县伪将吏屯宝丰自成精锐尽聚于襄城遂破贼宝丰斩伪州牧陈可新等进捣唐县破之杀贼家口殆尽贼满营哭转战至郟县擒伪果杀将军谢君友斫贼坐纛尾自成几获贼奔襄城大军遂进逼襄城贼惧谋降自成曰无畏我杀王焚陵罪大矣姑决一死战不胜则杀我而降未晚也而官军时皆露宿与贼持久雨道泞粮车不能前士饥攻郟破之获马羸噉之立尽雨七日夜不止後军譁于汝州不得已退军迎粮留陈永福为後拒前军既移後军乱永福斩之不能止贼追及之南阳传庭令反饗还战贼阵五重饥民处外次步卒次马军人次骁骑老营家口处内官军力鬪破其三重传庭复麾之进贼骁骑殊死战官军阵稍动广恩军将火车者呼曰师败矣脱挽辂而奔车倾塞道马絀于衡不得前贼鉄骑凌而腾之步贼手白梃遮擊中者首兜凿俱碎参将赵希魁战歿广恩走汝州杰随传庭走河北自成空壁追蹶一日夜官兵狂奔四百里至于孟津死者四万余失亡兵器輜重数十万方传庭退兵迎粮伪侍郎邱之陶者大学士瑜子也以蜡九书贻传庭曰督师当还兵战吾诡言左镇兵大至摇其心彼必返顾督师擊其後吾从中起贼可灭也传庭大喜报书如其言为贼逻者所得之陶被害传庭恃内应连营前进遂至败传庭由山西渡河转趋潼关广恩已先至杰欲弃潼关径入西安凭坚城固守传庭曰贼一入关则全秦糜沸秦人尚为我用乎已而自成攻关广恩力战杰以宝丰之败广恩先走不救已衔之人憾传庭不用其言拥衆不肯救广恩

战败传庭登陴固守贼分兵从山後遶出其背关城遂陷传庭跃马挥刀大呼冲入贼阵与监军副使乔迁高同战死卫指挥张尔猷盛视之李继祖千户袁化龙潼关教授许嗣复皆殉节帝闻潼关陷召问诸大臣大学士陈演言贼入关中必恋子女玉帛犹虎入陷阱兵部侍郎余应桂曰壮士健马咸出关西贼得之必长驱横行大臣安得面谩演股栗失色帝旋命应桂总督三边收边兵剿贼应桂以无兵无饷入见帝而泣帝但遣京军千人护行时贼已充斥关中应桂亦不能进也】质实【孙传庭出师时自分必死顾语妻张氏曰尔若何曰丈夫报国耳母忧我後西安破张氏率二女三妾沉于井挥其八岁儿世宁亟避贼去之儿踰墙堕民舍中一老翁收养之长子世瑞闻之自代州重趲入秦得夫人屍井中面如生老翁归其弟世宁相扶携还道路见者知与不知皆泣下传庭死不得其屍或有言传庭未死者竟不予赠廕邱之陶宜贼人贼陷宜城其祖民忠骂贼死之陶被执陷贼中欲得间以杀贼谋泄贼怒其为孙传庭内应支解之赵希魁渭南人乔迁高定襄人妻史氏子象观闻变缢死张尔猷盛昶之李继祖袁化龙并潼关卫人许嗣复井陘人分守关城之上南门城陷被执骂贼死妻女殉之本朝乾隆四十一年追諡孙传庭忠靖赵希魁乔迁高张尔猷烈愍盛昶之李继祖节愍邱之陶袁化龙许嗣复并入祠】

李自成陷西安巡抚右佥都御史冯师孔等死之秦王存枢降于贼

【自成长驱入关中遂连陷华州渭南临潼分遣右营十万人从南阳攻陷商州华州乡官郭宗振李承灿薛国蕙渭南知县杨暄教谕张馥训导蔡其城乡官南企仲南居益南居业邦君爱临潼乡官王佩珂商雒道参议黄世清商州诸生邵公坤雷堂李本健吕元声孙纘文布衣杨名道周扬实等并殉难贼遂进攻西安师孔厉兵御守裨将王根子潜通贼城陷副将刘光先战不支沉河死师孔及按察使黄綱长安知县吴从义秦府长史章尚綱指挥崔尔达苑马寺监正游之云按察经历扬于邦乡官祝万龄陶尔德周培忠窦光仪徐芳声徐方敬徐应魁举人朱谊眾席增光贡生孙孕奉弟孕芳诸生李光信王召俊陈瑞布衣朱恩等死之自成执秦王存枢以为权将军水壽王存朶为制将军布政使陆之祺里居吏部郎中宋企郊提学佥事巩焞等俱降自成大掠三日改西安曰长安称西京赐顾君恩女乐一日实入阍策也大发民修长安城开驰道自成每三日亲赴教塲校射百姓望见黄龙纛咸伏地呼万岁诸将白广恩高汝利左光先梁甫先後降陈永福以先射中自成目保山颠不敢下自成析箭为誓招之亦降独高杰以窃自成妻走延安为李过所追折而东渡宜川絕蒲津以守自成兵所至无不克西安诸属城及延安所部州县多望风降贼官吏以□守死者惟蒲城知县朱一统延安副将解文英县丞姚启崇白水知县朱回澆教谕魏岁典史刘进中部知县朱新鏢数人而蓋屋乡官袁养和高陵乡官李乔昆富平乡官田时震朱崇德三原乡官焦源清焦源溥常道立乔巍□陰乡官陈嗣虞蒲城乡官王道纯魏国柱耀州乡官宋师襄同州诸生刘长庚鄜州诸生齐大成肤施诸生揚绣徵并以不屈死自成既尽有西安延安之地乃诣米脂祭墓向为官军所发焚弃遗趾筑土封之求其宗人赠金封爵以去改延安府曰天保府米脂曰天保县清涧曰天波府复以五百骑西掠凤翔守将诱而殲之自成怒火发兵往攻典史董尚质间门迎贼知府唐时明被执至兴平乘间自缢死属州县亦叛降自陇州同知薛应珍实鸡知县唐梦鯤游擊曾榮耀裨将陈奇杰袁明岐山乡官牛养杰之外无死事者于是贼益恣甚且欽以伪檄定诸边矣初自成剽掠十余年未尝有大志及席卷湖广河南始萌窃据之意然地四达皆

战场所得郡县官军旋复之至是既入秦秦藩富甲天下府库货千万皆为所取又据河山百二之险遂不可制】质实【临潼秦栌阳县汉为新丰唐为昭应宋改临潼整屋高陵皆汉县明并属西安府今因之华陰秦为秦宁县汉改华陰明属华州以隶于西安府今改属同州府肤施汉县三国魏废隋复置明为延安府治岐山隋置明属凤朔府今并因之秦王存枢愍王棧十一世孙存枢既降贼其妃刘氏死之冯师孔字景鲁原武人郭宗振官四川恤刑郎中有政声李承灿官山海阙游擊薛国兼官宁夏守备偕弟诸生国华同擊贼死杨暄高平人擢兵部主事未行贼至誓死守举人王命诰间门迎贼暄被执索印不与骂贼死张馥壽光人蔡其城与杨暄分陴固守城陷死南企仲官南京吏部尚书致仕居益企仲族子官工部尚书削职归居业企仲子官礼部祠祭司主事贼陷渭南责南氏饷百六十万企仲年八十三矣遇害诱降居益居业皆不从遣兵拥之去加炮烙二人终不屈絕食七日死郑君爱官衡州推官王佩珂官商邱教谕黄世清字澄海膝县人贼至世清凭城守有奸民投贼至城下说降世清佯与语发礮毙之悬其首城上曰怀二心者视此士民皆效死礮矢尽继以石石尽妇人掘街砌继之城陷世清坐堂上麾其仆朱化凤去化凤愿同死一家十三人皆遇害邵公坤与弟公巽公佐公齐公量同死一家死者十八人李本健与弟本深及本深之子同死吕元声与母妻同死刘光先榆林人妻王氏投井死一家死难者五十余人黄綱字季侯光州人崇祯七年贼陷光州子彝如督家僮巷战骂贼死綱时以淮海兵备副使丁忧归里方省墓获免至是綱与妻王氏皆赴井死吴从义浙江山阴人章尚綱会稽人游之云广济人杨于印保安州人祝万龄咸宁人官河南右参政陶尔德咸宁人官川北道参议周培忠咸宁人官隰州知州一门殉节窦光仪长安人官怀庆通判徐芳声咸宁人官芮城知县徐芳敬长安人官仪封知县徐应魁长安人为秦府右护卫旗官朱谊眾明宗室席增光南郑人孙启泰李光信王召俊陈瑞皆咸宁人光信妻熊氏召俊妻雷氏并殉节瑞率二女孙沈紫潭湖死朱恩长安人与弟斗环侄语投井死承壽王存桑怀简王尚烜十世孙也尚烜乃秦愍王棧第五子永乐初分封永壽陆之祺平湖人宋企郊乾州人巩煊真宁人解文英宁夏人朱一统平定人由举人为蒲城知县贼至以死自誓或言他州县甲榜者皆已纳款一统曰此事宁论资格即寻衙兵叛夺印趣迎降一统赴井死朱回澆明渰王支属由宗贡生为白水知县贼潜入城犹乎弓射贼魏岁沁州人朱新鏢明宗室贼使人持伪檄招降新鏢碎之叹曰城小无兵不能守计惟自靖耳令妻妾子女尽缢乃投繯死袁养和官云南知县李乔崑官霸州道参政田时震官山西参政朱崇德字淳庵山东巡抚国栋父也赠右副都御史焦源清字湛一官宣府巡抚焦源溥源清从弟字涵一官大同巡抚常道立官河南巡抚乔巍官冀宁道参政与外弟王伯达仆王崇德同死陈嗣虞官高邮知州王道纯官巡按山东御史魏国柱官睢州知州宋师襄官太常卿唐时明字尔极固始人薛应珍武进人时摄州事勒兵守城城陷骂贼死唐梦鯤番禺人曾荣耀陈奇杰袁明与贼战宝鸡之贾村歿于阵 本朝乾隆四十一年追諡南居益黄世清焦源溥忠烈冯师孔南企仲祝万龄田时震焦源清常道立王道纯忠节薛国蕙杨暄南居业刘光先周培忠解文英朱一统朱迴澆烈愍郭宗振李承灿郑君爱黄綱吴从义章尚綱崔尔达陶尔德窦光仪徐号声徐方敬朱新鏢袁养和李乔崑乔巍陈嗣虞魏国柱节愍张馥等并入祠】

发明【明季诸藩拥货自殖不以佐国计而以齎盗粮一旦寇至束手就戮者何可胜道至于由櫝存枢甘污伪职而宗社之辱为已极矣然由櫝卒死泌阳其天良犹有未尽泯者特恨偷息须臾死非其所耳而存枢腆然人面且与晋王求桂从贼北行及其縋城欲上王家彦沮

之曰二王降贼即贼也贼安得上夫岂非明太祖之支流苗裔而家彦顾叱之为贼亦可谓一字之诛严于斧钺哉】

十一月李自成陷榆林兵备副使都任前总兵官尤世威等死之

【先是总兵王定从孙传庭出关大败奔还榆林远近震恐自成传伪檄招降定惧谎言讨套部率麾下兵遁去巡抚张凤翼甫受命未至城中士马单弱人心汹汹任亟集督饷员外郎王家録副将惠显参将刘廷杰等与里居将帅尤世威等议城守衆推世威为主帅与延安绥德相继陷复遣使说降廷杰大呼曰长安虽破三边如故贼皆中州子弟杀其父光而驱之战必非所愿榆林天下劲兵一战夺其气然後约宁夏固原为三师迭进贼可平也衆然其言乃歃血誓师简卒乘缮甲伏各出私财佐军守具未备贼将李过已引兵十万抵城下廷杰募死士乞师套部师将至贼分兵劫之攻城甚力官军力战杀贼无算贼益衆来攻起飞楼逼城中矢石交至世威等战益厉守七昼夜贼乃穴城置大礮轰之城遂破世威等犹督衆巷战妇人竖子亦发屋瓦击贼屍相枕藉既而力不支任家録死之故总兵侯世禄侯拱极王学书董学书及副摠兵潘国俊参将王荣不屈死一时同死者乡官张云鶚柳芳彭卿赵彬亦不屈死指挥崔重观自焚死傅佑与妻杜氏自缢死中军刘光佑骂贼死材官李耀善射矢尽自刎死李光裕趣家人死亦自刎张天叙焚其积贮自缢死千户贺世魁偕妻柳氏自缢死参将马鸣节聚妻子室中自焚死尤岱自杀于水西门李淮令妻女自缢率子杀贼自刎指挥鍾茂先杀妻子而自杀其以力战死者里居则摠兵杨明副摠兵张发尤翟文王永祚参将李应孝在官则游击傅德潘国臣李国奇晏维新陈二典刘芳馨文侯国都司吴继武中军杨正鞞柳永年马应举守备尤勉惠渐贺大雷杨以伟指挥李文焜李文灿黄廷政千户黄廷困百户黄廷弼裨将文经国而副将常怀李登龙游擊孙责尤养鯤守备白慎衡李宗叙亦以守材堡遇害诸生陈义昌沈濬沈演白拱极白含章骂贼死张连元连捷李可柱胡一奎李廕祥自缢死贼怒廷杰勾套部磔之至死骂不絶口世威反故摠兵王世钦王世国李昌龄并被执缚至西安自成坐秦王府欲降之四人不屈自成曰诸公贵名将助我平天下取封侯可乎衆骂曰汝驿卒敢大言侮我自成笑前解其缚世钦唾曰驿卒母近前污将军衣自成怒皆杀之世威弟世禄亦死惠显及都司郭遇吉同被执遇吉骂贼死贼惜显勇系至神本服毒死一贼之中妇人死义者数千人井中屍满贼遂屠其城榆林为天下雄镇兵最精将才最多然其地最瘠饷又最乏士常不宿饱乃慕义殉忠志不少挫无一屈身贼庭其忠烈又为天下最事闻帝嗟悼将大行褒恤国亡不果】质实【都任字宏若祥符人尤世威以崇祯八年与贼战卢氏失利解任寻赴卢象昇军自效象昇战歿自免归十五年以廷臣荐命与弟世禄赴京候调召对中左门复告归世禄前任宁夏摠兵官张凤翼堂邑人王家録黄冈人擢关南僉事未行惠显清涧人刘廷杰绥德州人弟廷夔收兄残骸瘞之亦自投阁死侯世禄以崇祯二年勤王兵溃坐遣戍後率子弟从军叙功免戍还籍侯拱极世禄子前任山海摠兵官王学书前任天津防海摠兵官董学书都督一元子前任宣州摠兵官王荣前任彰德参将子师易亦殉难张云鶚前任户部主事柳芳前任隰州知州彭卿前任真安知县赵彬前任湖广监纪马鸣节前任安边参将尤岱前任山海铁骑营参将李淮前任西安参将鍾茂先官绥德卫指挥杨明前任山海关总兵官张发云鶚子前任定边副总兵尤翟文世成从弟前任靖边副摠兵王永祚前任孤山副总兵李应孝前任西安参将妻女皆自缢死陈二典官榆林左营游击刘芳馨官右营游击吴继

武稷山人杨正鞞官奇兵营游击为樵标中军柳永年官榆林兵备副使中军马应举官靖边指挥与刘光佑柳永年同理副使中军事惠渐清涧人官抚边守备黄廷政世袭榆林卫指挥中礮死廷用廷弼其弟也文经国西宁人掌旗鼓督清街道王世钦前任山海左部总兵官王世国前任宣府柳沟总兵官李昌龄字玉川镇番卫人为延绥总兵官数有功以刚直罢徙居榆林郭遇吉官大器营都司 本朝乾隆四十一年追諡尤世威忠刚都任惠显刘廷杰侯世禄王世钦李昌龄忠烈董学书忠节侯拱极王学书王荣马鸣节尤岱李淮锤茂先杨明张发尤翟文王永祚李应孝傅德潘国臣李国奇晏维新陈二典刘芳馨文侯间吴继武杨正鞞马应举尤勉惠渐贺大雷杨以伟李文鯤李文灿黄廷政常怀李登龙孙贵尤养焜白慎衡李宗叙王世国尤世禄郭遇吉烈愍王家録潘国俊张云鄂柳芳彭卿赵彬崔重观傅佑节愍刘光裕等并入祠】

以吏部侍郎李建泰副都御史方岳贡并兼东阁大学士预机务

【建泰先官祭酒颇着辈望寻擢吏部侍郎及是命与岳贡以本官入直岳贡历郡守监司并以廉能称召对称旨超擢副都御史未几有是命故事阁臣无冠都御史衔者岳贡一人而已】质实【李建泰曲沃人方岳贡字四长谷城人】

十二月周延儒有罪赐死

【延儒当国时荐用侯恂范志完督师皆债事又任文选郎中吴昌时交通内侍把持朝局延儒既去山东金事雷演祚纠范志完御史蒋拱宸劾吴昌时贼私钜万词皆连延儒而中言昌时通中官李端王裕民泄漏机密重贿入手辄预拟温旨告人事颇有迹帝怒甚御中左门亲鞫昌时折其胫无所承怒不解拱宸面讦其通内帝察之皆实乃下狱论死始有意诛延儒初薛国观赐死人皆谓昌时致之其门人魏藻德新入闈有宠恨昌时甚因与陈演共排延儒锦衣骆养性复腾蜚语帝遂命尽削延儒职遣緹骑逮入京师时旧辅王应熊被召延儒知帝怒甚宿留道中俟应熊先入冀为请帝知之应熊既抵京命之归延儒至安置正阳门外古庙上疏乞哀不许法司以戍请同官申救皆不许及是昌时弃市勒延儒自尽籍其家】质实【蒋拱宸井徒人】

李自成陷甘州巡抚金都御史林日瑞总兵马爌等死之

【先是贼据西安分兵四出宁夏镇兵遂战杀贼数千贼乃去平凉甫闻警韩王及监司以下谋遁去知府简仁瑞谒韩王曰殿下轻弃三百年宗社欲何之纵贼压境甘凉诸镇军足相援必不能支同死社稷亦不辱二祖列宗王不从一夕其护卫卒大噪挟王及诸郡王宗室斩关出胁仁瑞行仁瑞曰吾平凉守也吾去谁与守韩王遂奔庆阳官吏皆走未几贼掠城下士民数人革降书乞金名署印仁瑞怒叱责之正衣冠自经堂上义民朱杰轩孟尚池仰药死平凉既陷属城皆降独华亭教谕邹邦荣训导何相刘率诸生共守城城陷死节时自成已大发兵攻陷榆林愤宁夏之败悉銳薄其城总兵官官抚民以城降中後卫城悉陷乡官雍缔闔家自焚死指挥彭凌云百户邓德宁与义民王风木纠衆讨贼谋泄死贼东胜犯庆阳围数匝参

议散复兴集衆守发礮石杀贼积屍满濠久之势不支拜辞其母聚妻妾子女于楼寘薪其上复乘城督战城陷趣归火其楼母亦投火死乃持鉄鞭走北门击杀数贼遂自刎同时死难者推官靳圣居安化知县袁继发都司周家彦乡官麻僖诸生石瑄李彝其属城则宁州知州董琬环县乡官朱国祯张宏远亦殉难韩王亶堦被执以去将趋汉中扼于官军不得入覆其所属城固县知县司五教训导窰汝器乡官张凤翮方振寰贡生岳中衡遇害遂遣前锋渡河入山西而其党贺锦田见秀等徧掠三秦郡县巩昌之安定会宁秦安皆先後陷杀其知县应昌士王垣朱呈瓘郷官刘跃龙贡生张国統载天诸生王保民唐维新李洲杨毓秀陈周瑞杨中葵刘翹名杨九仪王玺薛三戒杨道泰高朝凤张大才监生陈周鼎张大韶移兵逼兰州兰州人开门迎贼贼渡河凉州庄浪二卫降即进犯甘州日瑞闻贼至急结西羌严兵以待而自率副将郭天吉等扼诸河干适严冬河冰合贼踏冰过直抵甘州城下日瑞入城战且守大雪深丈许树尽介角干折手足皴瘃守者咸怨贼乘夜坎雪而登城陷执日瑞诱以官不从磔于市天吉及摠兵官马爌副摠兵张举欧阳袞刘国栋游击杨威赵宗礼万峘抚标中军哈维新都司姚世儒姜宏基高登科监纪同知蓝台里居总兵官罗国杰赵宦游击李如璋指挥赵宗祝李栖鵠姚天宠张洪勲王嘉官赵案知县段自宏教谕童志道千总刘灿贡生张之衡保献书诸生张名礼张圣翼康国新童士楷丁伦康万秋祁士英医士费圉兴吏员梁进法义民朱文选马腾锦郭世洁并死之居民犹汹汹欲杀贼贼乃阖城扉杀其民四万七千人三边皆陷列城望风降惟西宁卫固守不克留贼将贺锦围之贼已无复後顾忧竟长驱而东】质实【秦安宋纳甲城金置秦安县明属秦州以隶于巩昌府今升秦州为直隶州县仍属焉林日瑞字浴元诏安人马爌蔚州人简仁瑞字季麟荣县人韩王亶堦宪王松十二世孙朱杰轩孟尚池皆平凉县人杰轩阁门殉节时有平凉马夫者佚其姓名随驿使杀贼被执寸磔死何相刘乾州人邹邦荣援曾子居武城义欲避去相刘曰吾辈委质为臣安可以宾师自待邦荣乃与相刘同死雍缔宁夏中卫人官怀仁知县在籍彭凌云邓德宁王风木皆宁夏卫人段复兴字仲方阳谷人靳圣居字淑化长垣人擢刑部主事未行袁继登应天人周家彦靖边卫人率衆巷战杀贼数百人自刎死麻僖庆阳卫人官太常少卿在籍石瑄李彝安化人董琬开州人朱国祯官照磨张宏远官武邑典史并在籍司五教内黄人斩诸生为贼内应者以誓死守城陷为贼所磔窰汝器富平人张凤翮官江西巡抚方振寰官福山知县并在籍应昌士仙居人贼陷安定不屈死妻周氏亦遇害王垣四川人以安定知县摄会宁县事为贼所执胁令说後任令应昌士降及登垣勗以死守被害刘跃龙安定人官开封同知在籍张国統戴天王保民康维新李洲杨毓秀陈周瑞杨中葵刘翹名杨九仪王玺薛三戒杨道泰高朝凤张大才陈周鼎张大韶皆安化人保民尤保泰弟保贞从孙宏毅周瑞弟周哲亦以扞贼被杀郭天吉榆林卫人张举安邱人力战死一家俱殉欧阳袞刘国栋杨威赵宗礼万峘姜宏基高登科皆甘州卫人袞焚其妻子巷战死国栋阖门自焚死威为贼断侯絶脰死宗礼将火其家仆负其子金刚保以逃宗礼手刃之家无一人脱者峘从林日瑞杀贼为贼所执磔死蓝台光州人罗俊杰副总兵一贯子弟俊士亦殉节李如璋同子起凤祥凤集凤射贼皆被杀赵宗祝与子案自刎妻妾亦投缢死李栖鵠张洪勲王嘉官皆巷战力竭自刎姚天宠迎战被杀家人皆自焚死段自宏官太湖知县在籍捐貲饷士城陷自刎童志道官靖远卫教谕在籍刘灿副摠兵国栋子本朝乾隆四十一年追諡林日瑞马爌段复兴郭天吉忠烈雍缔彭凌云靳圣居周家彦司五教刘跃龙张攀欧阳袞刘国栋杨威赵宗礼万峘哈维新姚世】

【儒姜宏基高登科罗俊杰赵宦赵宗祝李栖鵬姚天宠张洪勲王嘉官段自宏烈愍简仁瑞袁继登董琬方振寰应昌士王垣蓝台李如璋节愍朱杰轩等及平凉马夫并入祠】

【甲申】崇祯十七年【是年三月流贼陷京师五月福王由崧称帝于南京】我

大清

世祖章皇帝顺治元年

【臣等谨按前代史家书法体例攸殊每於历朝嬗代之际各存私见意有偏向转至失实如续纲目於元顺帝至正二十七年即分注明年元主北奔而系以元亡去二十八年为洪武元年且顺帝十五年明祖起兵後于元之政事即别书元以表异欽惟我】

【皇上折衷至义悉準大公於编纂通监辑览时特谕馆臣以进退予夺关系万世公论必斟酌持平权衡始协明崇祯十七年明统犹存仍当大书纪岁即福王偏立江左尚可比于宋代建炎之例年号仍从分注而提纲则书明字以别之直至芜湖被执始大书明亡仰见】

【圣人笔削必辨统存实祛史家之私议揭持世之闕纲以视春秋谨严古今一揆兹臣等奉命订纲目三编敬遵御旨排纂义例昭然我】

【皇上垂法万世之微意信可悬诸日月而不朽矣】

春正月朔李自成僭号于西安

【自成久觊尊号惧张献忠为患既入秦通好献忠献忠厚币逊词以报之自成喜遂僭称王改名自晟国号大顺改元永昌追尊其曾祖以下加諡号以李继迁为太祖设天佑殿大学士以牛金星为之增置六政府尚书等伪官以宋企郊为吏政尚书陆之祺为户政尚书巩焞为礼政尚书张麟然为兵政尚书复五等爵大封功臣侯刘宗敏以下九人伯刘体纯以下七十三人子三十人男五十五人定军制有一马僂行列者斩之马腾入田苗者斩之籍步兵四十万马兵六十万令宏文馆学士李化鳞等草檄驰谕远近指斥乘輿有云君非甚暗孤立而煬竈恒多臣尽行私比党而公忠絕少又云狱囚累累士无报礼之心征叙重重民有偕亡之痛见者无不扼腕是日大雨霾黄雾四塞有邱从周者都司吏也长不满三尺素怀义愤伺自成出乘醉直至其前戟手骂曰若一贫贱细民今妄据王府僭称伪号逆天背理吾见汝屍之万段也自成大怒立斫杀之】质实【张麟然归安人李化鳞韩城人】

李建泰自请督师剿贼许之

【自成初逼山西建泰虑鄉邦被祸家富于貲可籍佐军毅然有灭贼志常与同官言之会帝闻自成僭号大惊且叹曰朕非亡国之君事事皆亡国之象祖宗栉风沐雨之天下一朝失

之何面目见于地下朕愿督师亲决一战身死沙场无恨但死不瞑目耳语毕痛哭陈演蒋德璟诸辅臣请代俱不许建泰顿首曰臣家曲沃愿出私财饷军不烦官帑请提师以西帝大喜慰劳再三曰卿若行朕当仿古推轂礼遂加建泰兵部尚书赐尚方劔便宜从事行遣将礼以特牲告太庙帝御正阳门楼卫士东西列自午门抵城外旌旗甲仗甚盛内阁五府六部都察院掌印官及京营文武大臣俱侍立鸿胪赞礼御史纠仪赐之宴御席居中诸臣陪侍酒七行帝手金卮亲酌建泰者三乃出手勅曰代朕亲征建泰顿首谢且辞行帝目送之行数里所乘肩輿忽折衆以为不祥建泰以宰辅督师兵食并绌所携止五百人甫出都闻曲沃已破家赀尽没惊悸称病日行三十里士卒多道亡至定兴城门闭不纳留三日攻破之笞其长吏抵保定贼锋已逼知府何复同知邵宗元方守城建泰叩城求入宗元等不许建泰以尚方劔恐之或曰金御史毓峒监军亟推出视信乃纳之遂屯城中】质实【何复字见元平度人邵宗元字景康碭山人金毓峒保定卫人

本朝乾隆四十一年何复追諡烈愍邵宗元金毓峒俱追諡忠烈】

南京地震

【是月庚寅凤阳地震至是乙卯南京地又震】

以工部尚书范景文礼部侍郎邱瑜并兼东阁大学士预机务

【先是景文擢兵部添注左侍郎练兵通州通镇初设兵皆召募景文综核有法治军精严尝请有司实行一条鞭法徭役归之官民稍助其费供应平买不立官价名帝令永着为例继拜兵部尚书以事削籍後起用改工部至是李建泰出督师景文遂以本官与瑜同入阁辅政帝曰朕知卿久今急而用卿恨晚卿尚勉之景文请释系狱张国维等帝立从其言李自成渐逼京师有请帝南幸者命集议阁中景文言固结人心坚守待援而已此外非臣所知帝是其言】质实【请释系狱张国维等崇祯十六年我】

【大清兵入几辅张国维檄赵光拚拒礮山八总兵之师皆溃言者诋国维乃解职下狱至是范景文请释之】张献忠入四川

【献忠自荆州趋蜀陷夔州石柱土官秦良玉驰援兵寡败归献忠至万州水涨留屯三月已破涪州进陷佛图关时四川巡抚陈士奇已谢事驻重庆或劝之去士奇不可与副使陈纁知府王行俭知县王锡等竭力拒守贼抵城下擊以滚礮贼死者无数黑夜密云四布贼穴地轰城城遂陷士奇等皆被执士奇大骂贼缚于教场时瑞王常浩避闯贼自汉申来奔亦与焉指挥顾景泣告献忠曰宁杀吾无害帝子贼怒遂害王并杀景天忽无云而雷者三贼有震者献忠仰天诉曰我杀人何与天事用大礮向天丛击俄晴霁遂肆惨戮士奇等骂不絶口而死】质实【按秦良玉夔州败归慷慨语其衆曰吾兄弟二人皆死王事吾以一孱妇人蒙国恩二十年今不幸至此其敢以余生事逆贼哉悉召所部将曰有从贼者族无赦乃分兵守四境後贼招土司独无敢至石柱者瑞王常浩神宗第五子天启七年之藩汉中及寇逼将吏不能救乞师于蜀遂奔重庆陇西士大夫俱挈家以从张献忠?重庆被执遇害从死者甚衆陈士奇

字平人漳浦人陈纁鍾祥人王行俭字质行宜兴人王锡新建人顾景里系无考
本朝乾隆四十一年追諡陈士奇王行俭王锡忠烈陈纁节愍顾景烈愍】

二月李自成陷太原别遣将犯畿南陷真定

【自成渡河连破蒲州汾州知府侯君招知汾阳县刘必达俱死之遂攻太原先是蔡懋德出师平阳以疲兵三千当百万狂寇而太原汹汹晋王又手檄趣懋德还省懋德于十六年十二月十八日遂去平阳二十日贼抵河津副将陈尚智失守奔还平阳二十二日贼拔平阳尚智出走二十八日懋德还太原至是山西巡按御史汪宗友上言曰晋河二千里平阳居其半抚臣懋德不待春融冰泮遽尔平阳返旆贼即于明日报渡矣随行马步千人即宜倍道西向召集陈尚志叛卒移檄各路防兵援剿乃不发一矢终岁至省匝月余郡皆失是谁之过欤有诏夺官候勘时陈尚志叛降于贼于是懋德誓师于太原官吏军民咸在懋德哭衆皆哭罢官命适至或请出城候代懋德不可曰吾已辨一死遂调兵坚守贼薄城下遣部将牛勇朱孔训王永魁等出战死之懋德草遗表调部将张雄守大南门雄已缢城降贼语其党曰城东南角楼火器火药皆在我下即焚楼夜中火起风转烈守者皆散贼遂登城懋德北面再拜出遗表付人间道达京师即自刎麾下持之时中军副摠兵应时盛请下城巷战顾懋德曰上马懋德上马时盛持矛突杀贼数十人既而贼骑充斥时盛呼曰出西门懋德遽下马曰我当死封疆诸君自去衆复拥懋德至水西门懋德叱曰欲陷我不忠耶复下马据地坐时盛已出城杀妻子还顾不见复斫门入语懋德曰请与公俱死懋德就缢未絶时盛释甲加其肩乃絶时盛取弓弦自经死其同时自刎者为牛勇朱孔训王永魁等其余官吏则有布政使赵建极骂贼死副使毛文炳被执不屈死其妻赵氏妾李氏陈氏俱投井死参议蔺刚中僉事毕拱辰知府孙康周同知李一清长史范志泰副将惠光祚俱不屈死都同张宏业自缢死其妻赵氏子凝秀俱殉死指挥韩似雍千户王德新晋府典仗官樊子英等皆城陷殉节死贼入城胁晋王求桂执之遂连陷黎城临晋潞安执潞世子进攻代州总兵周遇吉力拒食尽退守宁武贼遂抵故关分兵趋真定檄总督徐标降标斩其使率衆拒守真定知府邱茂华与中军谢加福害之以城降贼贼乃攻彰德赵王常?亦降】质实【临晋晋桑泉地隋置桑泉县唐分置温泉县後改临晋县宋金仍旧元以虞乡县省入明属平阳府今属蒲州府故关在井陘县西界接山西平定州晋王求桂晋?王櫏十世孙贼胁入北京後不知所终潞世子潞简王模後简王封潞故潞府在潞安赵王常?赵王高燧後万历时穆王常清薨世子由松前卒弟壽光王由桂子慈 嗣薨无子又以穆王弟常?嗣侯君招商州人刘必达陕西山阳人蔡懋德字公虞崑山人应时盛辽东人牛勇朱孔训王永魁里系无考赵建极河南永宁人毛文炳郑州人蔺简中字坦生陵州人毕拱辰字星伯掖州人孙康周字晋侯安邱人范志泰虞城人张宏业忻州人徐标字準明济宁州人本朝乾隆四十一年追諡蔡懋德忠恪应时盛忠烈刘必达赵建极毕拱辰孙康周等俱烈愍侯君招毛文炳蔺刚中范志泰张宏业韩似雍等俱节愍徐标忠节牛勇朱孔训王永魁王德新樊子英等俱入祠】

下诏罪已

【诏畧曰朕嗣守鸿绪十有七年深念上帝陟降之威祖宗付托之重宵旦兢惕罔敢怠荒

乃者灾害频仍流氛日炽赦之益骄抚而辄叛甚有受其煽惑顿忘敌忾者朕为民父母不得卵翼之民万朕赤子不得怀保之罪非朕躬谁任其责所以使民罹锋镝蹈水火殒量以壑骸积成邱者皆朕之过也使民输刍挽粟居送行齎加贼多无艺之征预支有称贷之苦考又朕之过也使民室如悬磬田卒污莱望烟火而无门号冷风而绝命者又朕之过也使民日月告凶旱潦荐至师旅所处疫疠为殃上干天地之和下丛室家之怨者又朕之过也至于用大臣而不法用小臣而不廉言官植党而清议不闻武将骄懦而军功不奏皆由朕抚驭失道诚感未孚中夜此心局蹐无地朕自今痛加创艾深省夙愆要在惜人才以培元气守旧制以息烦嚣行不忍之政以收人心蠲额外之科以养民力其罪废诸臣有公忠正直廉洁干才尚堪用者不拘文武吏兵二部确核推用草泽豪杰之士有恢复一郡一邑者授官世袭即陷没脇从之流能舍逆反正率众来归许赦罪立功能擒闯献二贼仍予封侯之赏忠君爱国人有同心雪耻除凶谁无公愤尚怀祖宗之厚泽助成底定之大勋思克厥愆历告朕意于是发帑金五千治守具左都御史李邦华密请南迁及太子抚军江南皆不报邦华又请定永二王分封太平宁国二府拱护两京帝得疏意动绕殿行且读且叹将行其言会帝召对羣臣中允李明睿疏言南迁便给事中光时亨以倡言泄密纠之帝曰国君死社稷正也朕志定矣遂罢邦华策不议及贼势急复遣内臣高起潜杜勲等分监边镇及畿辅要害】质实【李明睿南昌人光时亨桐城人】

发明【明事至此存亡在于呼吸矣而犹遣内臣监边镇守畿辅一切要地昇之宵小于是若辈专守城事百官皆不敢问虽有忠义之士且为掣肘而莫可如何卒之卖国售奸如杜勲杜之秩等即以所守关城降贼而曹化淳旋复开门迎贼观勲劝求禅位及我辈富贵固在之言可胜痛恨哉夫有明蠹政莫甚于信用内臣监军镇守覆辙累累庄烈际危急之秋尚不惜躬蹈其败可谓至死不悟者矣欧阳修五代史传谕有云自古宦者之祸深矣明者未形而知惧暗者患及而犹安焉至於乱亡而不可悔也信夫】

陈演罢

【演与魏藻德排去周延儒演遂为首辅帝倚信演台省附延儒者尽趋演门当是时国家累卵中外举知其不支演庸才寡学一无筹画顾以贿闻及李自成陷陕西逼山西廷议撤宁远总兵吴三桂兵入守山海关策应京师帝意亦然之演持不可後帝决计行之三桂始用海船渡辽民入关往返者再而自成已陷宣大矣演惧不自安引疾求罢诏许之赐道里费五十金彩币四表里乘传行演既谢事蓟辽总督王永吉上疏力抵其罪请置之典刑演入辞自言佐理无状帝怒曰汝一死不足蔽辜叱之去演赀多不能遽行遂留京师】

李自成陷宁武关总兵官周遇吉力战死之

【初遇吉驻代州凭城固守而潜出兵击贼连数日杀贼无算会食尽援绝退保宁武贼亦踵至大呼五日不降者屠其城遇吉四面发大礮杀贼万人火药且尽外围转急或请甘言给之遇吉怒曰若辈何怯耶今能胜一军皆忠义即不支缚我予贼于是设伏城内出弱卒诱贼入城急下闸杀数千人贼用礮攻城圯复完者再伤其四骁将自成惧欲退其将曰我众百倍

于彼但用十攻一更番进蔑不胜矣自成从之前队死後复继官军力尽城遂陷遇吉巷战马蹶徒步跳荡尚格杀数十人身被矢如蝟竟为贼执大骂不屈贼悬之高竿丛射杀之遇吉妻刘氏素勇健率妇女数十人据山巔公廨登屋而射每一矢毙一贼贼不敢逼纵火焚之阖家尽死城中士女无降者自成集衆计曰此去历大同阳和宣府居庸皆有重兵倘尽如宁武奈何不如且还俟再举而大同总兵姜镶宣府总兵王承允降表相继至自成大喜遂长驱而东】质实【周遇吉 本朝乾隆四十一年追諡忠武】

三月大同总兵官姜镶宣府监视太监杜勲俱降于李自成

【自成至大同巡抚卫景瑗不知镶已降贼歃血要与共守镶布讹言谓卫巡抚秦人将应贼代王果疑之不见景瑗会景瑗有足疾不时出兵事镶主之镶兄瑄故昌平总兵也劝镶降贼镶虑其下不从人犒之银言励守城将士代王信之诸郡王分门守镶每门遣卒二百人助守至三月朔贼抵城下镶即开门迎贼入给景瑗计事景瑗乘马出始知其变也自坠马下贼执之见自成自成欲官之景瑗据地坐大呼皇帝而哭贼义之曰忠臣也不杀景瑗猝起以头触阶石血淋漓贼引出顾见镶骂曰反贼与我盟而叛神其赦汝耶贼使景瑗母劝之降景瑗曰母年八十余矣当自为计儿国大臣不可以不死母出景瑗谓人曰我不骂贼者以全母也自缢于僧寺贼叹曰忠臣移其妻子空舍戒毋犯杀代王传?及其宗室殆尽分巡副使朱家仕尽驱妻妾子女入井而已从之死者十有六人督储郎中徐有声山陰知县李倬亦死之诸生李若蔡亦自经死贼至宣府巡抚朱之冯集将吏于城楼歃血誓死守悬赏格励将士而人心已散监视中官杜勲且与总兵王承允争先纳款矣见之冯请以城下贼之冯大骂曰勲尔帝所倚信特遣尔以封疆属尔尔至即通贼何面目见帝勲不答笑而去俄贼且至勲蟒袍鸣驲郊迎三十里外将士皆散之冯登城太息见大礮语左右为我发之默无应者自起爇火则礮孔丁塞或从後掣其肘之冯抚膺叹曰不意人心至此仰天大哭贼至城下承允开门纳之讹言贼不杀人且免徭贼则举城譁然皆喜结彩焚香以迎左右欲拥之冯出走之冯叱之乃南向叩头草遗表劝帝收人心厉士节自缢而死贼弃屍濠中濠旁犬日食人屍独之冯无损也同日死者督粮通判朱敏泰诸生姚时中副将甯龙及系狱总兵官董用文副将刘九卿及里居知县申以孝其他妇女死义者又十余人】质实【代王传?简王桂十世孙卫景瑗字仲玉韩城人朱家仕河州人徐有声金坛人李倬陕西人李若蔡山陰人朱之冯字乐三大兴人朱敏泰太原人姚时中保安人甯龙董用文刘九卿里系无考申以孝宣府人 本朝乾隆四十一年追諡卫景瑗朱之冯忠节徐有声烈愍朱家仕李倬李敏秦甯龙董用文刘九卿申以孝俱节愍李若蔡姚时中入祠】

蒋德璟罢

【延儒为相各树门户德璟无所比性颇直黄道周召用刘宗周免罪德璟之力居多开封久被围自请驰督诸将战优诏不允尝进御览备边册凡九边十六镇新旧兵食之数及屯盐引运漕粮马价悉志焉已进诸边抚赏册及御览简明册帝深嘉之诸边士马报户部者浮兵部过半耗粮居多而屯田盐引民运每镇至数十百万一听之边臣天津海道输蓟辽岁豆米三百万惟仓场督臣及天津抚臣出入部中皆不稽核德璟语部臣合部运津运各边民运屯

盐通为计尽饷额可足而加派之饷可裁因复条十事以责部臣然卒不能尽厘也一日召对帝语及练兵德璟曰会典高皇帝教练军士一以弓弩刀枪行赏罚此练军法卫所总小旗补役以枪胜负为升降凡武弁比试必骑射精娴方准袭替此练将法岂至今方设兵帝为悚然又言祖制各边养军止屯盐民运三者原无京运银自正统时始有数万迄万历末亦止三百余万今则辽饷练饷并旧饷计二千余万而兵反少于往时耗蠹乃如此又言文皇帝设京卫七十二计军四十万畿内八府军二十八万又有中部大宁山东河南班军十六万春秋入京操演深得居重驭轻之势今皆虚冒且自来征讨皆用卫所官军嘉靖末始募兵遂置军不用至加派日增军民两困愿宪章二祖修复旧制帝是之而不果行户部主事蒋臣请行钞法言岁造三千万贯一贯价一两岁可得银三千万两帝特设内宝钞局昼夜督造募商发卖无一人应者德璟言百姓虽愚谁肯以一金买一纸帝不听又因局官言贵取桑穰二百万斤于畿辅山东河南浙江德璟力争获免先以军储不足岁金畿辅山东河南富户给值令买米豆输天津多至百万民大扰德璟因召对面陈其害帝即令拟谕罢之至是贼氛渐逼李建泰自保定疏请南迁帝召廷臣于平台谕曰国君死社稷朕将焉往德璟与少詹事项煜请命太子往江南帝不答给事中光时亨追论练饷之害德璟拟旨向来聚敛小人倡为练饷致民穷祸结误国良深帝不悦诘曰聚敛小人为谁且曰朕非聚敛但欲练兵耳德璟曰陛下岂肯聚敛然既有旧饷五百万新饷九百余万复增练饷七百三十六万臣部实难辞责且所练兵马安在蓟督练四万五千今止二万五千保督练三万今止二千五百保镇一万今止二百若山永兵七万八千蓟密兵十万昌平兵四万宣大山西及陕西三边各二十余万一经抽练原额兵马俱不问并所抽亦未练徒增饷七百余万为民累耳帝曰今已并三饷为一何必多言德璟曰户部虽并为一州县追比仍是三饷帝震怒责以朋比德璟力辩诸辅臣为申救尚书倪元璐以钞饷乃户部职自引咎帝意稍解明日德璟具疏引罢帝虽旋罢练饷而德璟竟去位德璟闻山西陷未敢行辞朝复即移寓外城无何都城陷得逸去而李建泰在保定贼亦寻至其部下为贼内应城遂陷知府何复同知邵宗元御史金毓峒及中官方正化乡官张罗俊等皆不屈死建泰竟降贼】质实【张罗俊字子仲清苑人本朝乾隆四十一年追谥烈愍余见前】

封总兵官吴三桂唐通左良玉黄得功俱为伯

【诏封三桂平西伯通定西伯良玉宁南伯得功靖南伯并徵诸镇兵俱入援】

李自成犯居庸守将唐通太监杜之秩以关降

【通先以兵入卫命与杜之秩同守居庸已而自成至通与之秩俱降贼遂入关陷昌平焚十二陵总兵官李守鐸力战死始自成欲知京师虚实往往遣其徒輶重货贾贩都市又令充部院掾吏探刺机密朝廷有谋议千里立驰报及是昌平已陷兵部发骑侦探辄被勾去无一还者贼游骑至平则门都人犹未知也帝召问羣臣莫对有泣者顷之贼还攻九门门外先设三大营贼至悉降守陴者寥寥益以内侍内侍专守城事百司皆不敢问十八日丙午自成设座彰义门外降贼太监杜勲侍呼城上人请入城见帝监视太监曹化淳等縋之入内勲盛称贼势请帝自为计帝怒叱之出手书亲征诏召驸马都尉巩永固以家丁护太子南行永固叩头曰亲臣不藏甲臣安知有家丁相向涕泣而已】质实【平则门辍耕録元京师城十一门

其正西曰和义西之右曰肃清西之左曰平则按明犹称阜成门为平则门仍元旧也九门明正统十年定九门南曰正阳南之左曰崇文右曰宣武北之东曰安定西曰德胜东之北曰东直南曰朝阳西之北曰西直南曰阜成彰义门金之正西门新城筑于明嘉靖中其西门曰广宁而都人至今以彰义呼之李守鐸里系无考本朝乾隆四十一年追諡烈愍】

京师陷帝崩

【杜勲既叱出曹化淳等复缢之下城勲顾谓曰吾辈富贵固在也及日晡化淳遂启彰义门贼尽入帝出宫登煤山望见烽火彻天叹息曰苦我民耳徘徊久之还宫命分永太子永定二王于周奎田宏遇第以劒斫长平公主叹曰汝何故生我家趣皇后自尽后即承旨自经又斫杀妃嫔数人十九日丁未昧爽内城亦陷鸣钟集百官无至者帝乃复登煤山书衣襟为遗诏曰朕凉德藐躬上干天咎致逆贼直逼京师皆诸臣误朕朕死无面目见祖宗自去冠冕以髮覆面任贼分裂无伤百姓一人以帛自缢于山亭遂崩太监王承恩缢于侧李自成羶笠缥衣乘乌骏马入承天门伪太学士牛金星伪尚书宋企郊等骑而从登皇极殿下令大索帝后期百官三日朝见已知帝后崩自成命以宫扉载出盛柳棺置东华门外百姓遇者皆掩泣寻迁殡昌平州州之士民率出钱募夫葬之田妃墓内斩蓬蒿而封之一切简率时临危殉难者文武诸臣则有大学士范景文尚书倪元璐左都御史李邦华协理京营兵部右侍郎王家彦刑部右侍郎孟兆祥右副都御史施邦曜大理寺卿凌义渠太常少卿吴麟徵右庶子周凤翔左谕德马世奇左中允刘理极检讨汪伟太常寺丞中佳允给事中吴甘来御史王章陈良谟兵部郎中成德吏部员外郎许直兵部员外郎金铉御史赵譔以及指挥同知刘宗嗣都督佥事贺讚工部员外郎王锺彦镇抚司佥事李若璉削籍吏部尚书李遇知兵部侍郎王家祯家居按察副使顾国缙工部尚书何应瑞都指挥佥事魏师贞参将高鏗工科给事中尹洗郎中周之茂通判张维纲守备杨儒秀张大同莱州推官张力指挥同知许达允顺天通判张疑和御史俞志虞陈纯德员外郎甯承烈范方中书宋天显光禄寺署丞于腾云都督方履泰千户李国祿指挥同知李若珪濮州知州马象乾大同总兵朱三乐密云副总兵吕应蛟保定左卫指挥文运昌刘洪恩戴世爵刘元靖吕九璋李一照李一广光禄寺少卿张罗彦邠州知州韩东明南宫知县彭士宏中书王永隆指挥使萧偲郎中菖凝秀寇可教主事杨会英沈邱知县李昌龄太医院吏目杨元真定督标游击陈三捷虎贲左卫参军李正光右都督刘继祖指挥马国城郎中张桎芳员外张三杰指挥张养所高甲虎贲右卫指挥使刘一松张国维主事陈贞达都指挥梁德宏荣阳知县徐兆任乐亭知县施溥博乐知县徐有度平凉同知郭寅兵马司指挥姚成等共八十余人布衣殉难者汤文琮最着而慕义蹈死不下百余人勲戚则宣城伯卫时春惠安伯张庆臻彰武伯杨崇猷宁远伯李尊祖彭城伯张光祖定远侯邓文明镇远侯顾肇迹西宁侯宋裕德清平侯吴遵周阳武侯薛濂恭顺侯吴汝徵新城侯王国兴新乐侯刘文炳驸马都尉巩永固左都督刘岱皆同时死又宫人魏氏费氏亦殉难死贼既入城污殿庭越三日己酉昧爽成国公朱纯臣大学士魏藻德陈演率文武百官入贺皆素服坐殿前自成不出羣贼争戏侮为椎背脱帽或举足加颈上相笑乐百官慑伏不敢动陈演劝进不许封太子为宋王放刑部锦衣卫系囚自成自居西安时建置官吏至是益尽改官制六部曰六政府同官曰从事六科曰谏议十三道曰直指使翰林院曰宏文馆太仆寺曰验马寺巡抚曰节度使兵备曰防御使知府州县曰尹曰牧曰令召见朝官自成南向坐金星宗敏企郊等左右

杂坐以次呼名分三等授职自四品以下少詹事梁绍阳杨观光等无不污伪命三品以上独用故侍郎侯恂其余勲戚文武诸臣奎纯臣演藻德等共八百余人送宗敏等营中拷掠责赂至灼肉折脛备诸惨毒藻德遇马世奇家人泣曰吾不能为若主今求死不得贼又编排甲令五家养一贼大纵淫掠民不胜毒缢死相望徵诸勲戚大臣金金足辄杀之焚太庙神主时贼党?保定李建泰降畿内府县悉附山东河南编设官吏所至无违者自成谓真得天命金星率贼衆三表劝进乃从之令撰登极仪诹吉日及自成升御座忽见神人长数丈手劒怒视座下龙爪鬣俱动自成恐亟下铸金玺及永昌钱皆不就闻山海关總兵吴三桂起兵乃谋归陕西】质实【臣等谨按明史李自成传有迁明太祖神主于帝王崩一事考自成于甲申三月入京大纵剽掠即焚明太庙神主肆为毒虐安知有迁主之礼四月我】

【大清兵至山海关自成出拒败溃奔还京师始僭号次日即西走更无暇及此是特稗野所载明史采用之不足据信且恭查我世祖章皇帝实录五月睿亲王定燕京六月遣大学士冯铨祭故明太祖及诸帝且为文祭告以明太祖神牌入帝王庙是移主之事至睿亲王定燕京後乃行之仰见我圣朝优礼胜国虽屋社之余犹念其曾有天下特遣官祀告移置以礼俾得崇祀千秋如天之度超轶前代而传闻之不足信亦于此可见矣煤山北上门之南】

【曰壽皇殿殿之东曰永壽殿曰观德殿殿之南则万岁山俗所云煤山也田宏遇陕西人田贵妃父贵妃先卒葬于鹿马山长平公主年十六帝选周显尚主将婚以寇警暂停及城陷帝入壽宁宫主牵帝衣哭帝曰汝何故生我家以剑挥斫之断左臂又所昭仁公主于昭仁殿越五日长平主复苏本朝顺治二年上书言九死臣妾局踣高天愿髡緇空王稍申罔极诏不许令显复尚故主土田邸第金钱车马锡予有加主涕泣踰年卒范景文当城陷趋至宫门知驾出就道旁庙草遗疏复大书曰身为大臣不能灭贼雪耻死有余恨遂至演象所拜辞阙墓赴?塔寺旁古井死景文死时犹谓帝南幸也其妾闻之即自经死福王时赠太傅 本朝顺治九年追諡文忠倪元璐字玉汝上虞人元璐闻难整衣冠拜阙大书几上曰南都尚可为死吾分也勿以衣衾殓暴我屍聊志吾痛遂南向坐取帛自缢而死一门殉节者十三人福王时赠少保吏部尚书 本朝顺治九年追諡文正李邦华时率诸御史登城羣奄拒之不得上外城陷走宿文信国祠及内城复陷乃揖信国曰邦华死国难请从先生于九京作絶命词投缢而死福王时赠太保吏部尚书 本朝顺治九年追諡忠肃王家彦字开美莆田人时廷臣分门守家彦守安定门帝手勅兵部尚书张縉彦登城察视家彦从中官固拒示之手勅问杜勲安在曰去矣秦晋二王欲上城家彦曰二王降贼即贼也贼安得上顿足哭偕縉彦诣宫门请见不得入黎明城陷家彦投城下不死自缢于民舍遭贼焚残一臂仆收其余体焉福王时赠太子太保兵部尚书 本朝顺治九年追諡忠毅孟兆祥字允吉交河人兆祥奉命分守正阳门城陷兆祥曰社稷已覆吾将安之自经门下子章明字纲宜甫成进士兆祥挥之曰我死汝可去对曰君亡父死我何生为乃投缢于父侧兆祥妻吕氏章明妻王氏同日并缢福王时赠兆祥刑部尚书章明河南道御史 本朝顺治九年追諡兆祥忠靖章明贞孝施邦曜当贼薄近郊邦曜语兵部尚书张縉彦檄天下兵勤王弗省邦曜太息去城陷趋长安门闻帝崩恸哭曰君殉社稷臣子可偷生哉即解带自经仆救之复苏恨曰是儿误我贼满衢巷不得还邸舍望门求缢辄为居民所麾乃命仆市信石杂烧酒即途中服之血迸裂而卒福王时赠太子少保左都御史 本朝顺治九年追諡忠愍凌义渠得帝崩问负墙哀号以首触柱流血被面门生劝无死义渠

厉声曰当以道义相勗何姑息为挥使去据几端坐乃取平生所好书尽焚之曰无被贼手污也服绯正笏向阙拜复南向稽首作书辞父自系奋身绝吭而死福王时赠刑部尚书本朝顺治九年追谥忠介吴麟徵字圣生海盐人麟徵奉命守西直门门当贼冲贼诈为勤王兵求入中官欲纳麟徵不可以土石塞其门募死士缒城袭击多斩获及城陷入道旁祠作书诀家人令殓用角巾青衫覆以单衾以志哀痛自经死方贼陷山西时蓟辽总督王永吉请撤宁远吴三桂兵守关门即京师警旦夕可援天子下其议麟徵深以为然独疏奏数百言不省及烽火彻大内帝始悔不用麟徵言城破时八门齐启独西直门坚塞不能通後发掘乃开福王时赠兵部右侍郎本朝顺治九年追谥贞肃周凤翔字仪伯山阴人都城陷或有传帝南幸者凤翔趋入朝见魏藻德陈演等羣入而自成方据御座凤翔至殿前大哭急从左掖门出贼亦不问归至邸作书辞二亲题诗壁间自经死福王时赠礼部右侍郎本朝顺治九年追谥文忠马世奇当城陷世奇方早食投箸起问帝安在东宫二王安在或言帝已出城或言崩或又言东宫二王被执世奇曰吾不死安之其仆曰如太夫人何世奇曰正恐辱太夫人耳作书别母肃衣冠捧所署司经局印望阙再拜自经妾李氏朱氏并先缢死福王时赠礼部右侍郎本朝顺治九年追谥文肃刘理顺字复礼杞县人畿辅告警理顺疏陈作士气矜穷民简良吏定师期信赏罚招胁从六事及贼犯京师急守卒缺饷理顺诣朝房语诸执政急请帑衆唯唯理顺太息归捐家赀犒守城卒僚友问进退正色曰存亡视国尚须商酌耶城陷理顺与妻万氏妾李氏子孝廉并婢仆数人阖门缢死羣盗多中州人闻其死入唁曰此吾乡之刘状元也居乡多厚德何遽死罗拜号泣而去福王时赠詹事本朝顺治九年追谥文烈汪伟字叔度休宁人城陷伟语继妻耿氏善抚幼子耿泣曰我独不能从公死乎因以幼子属其弟衣新衣上下缝引刀自刎不殊复投缯而死伟欣然曰是成吾志移其屍于堂援笔书于壁曰日讲官翰林院检讨汪伟同继妻耿氏死节处乃自经福王时赠少詹事本朝顺治九年追谥文毅申佳允字孔嘉永年人佳允出近畿闾马闻李自成破居庸关流涕曰京师必不守矣貽子涵光书曰吾受国恩当以死报城陷冠带辞母策马至王恭廐将投井从者持之下马旁见灌畦巨井急跃入仆呼号欲出之佳允亦呼曰告太夫人有子作忠臣勿遇伤也遂死福王时赠太仆少卿本朝顺治九年追谥端愍吴甘来字受和江西新昌人帝尝诘户部饷额甘来曰臣科与户曹表里饷可按籍稽也臣所虑者兵闻贼而逃民见贼而喜恐非无饷之患而无民之患宜急轻贼税收人心帝颌之及闻变疾走皇城不得入返作绝命词尽取疏草焚之曰贼寇纵横徒扬议论无益毫末留之罪弥大正衣冠北向拜投缯死福王时赠太当卿本朝顺治九年追谥庄介王章字汉臣武进人章与给事中光时亨守阜成门贼入城时亨要章走章厉声曰事至此犹惜死耶时亨曰死此与士卒何别入朝访上所在不获则死死未晚也章从之与时亨并马行俄贼哭至疾呼下马时亨仓皇下跪乞降章扬鞭不顾叱曰吾视军御史也谁敢犯贼刺章股堕章骂贼不绝口贼怒攢槊刺杀章而去抵暮其仆覓屍犹一手据地坐张口怒目如叱贼状福王时赠大理寺卿本朝顺治九年追谥节愍陈良谟字士亮鄞人良谟母老己未有子而妾时氏方娠乃谓之曰吾且死汝幸妊身急归父母家时泣曰公殉国妾不当殉公耶倘不幸有他不如无子良谟曰能如是乎时乃先就缢时京师人年十八侍良谟才百日耳时既死良谟望阙拜亦自缢福王时赠太仆卿本朝顺治九年追谥恭洁成德字元升霍州人城破不知帝所在旁皇厅事既超至午门见兵部尚书张缙彦自贼所出德以头触缙彦胷且詈之俄间帝崩痛哭持鸡酒奔奠梓宫前触地流血贼露刃胁之不为动奠毕归家有妹年方二十余因家难未嫁德顾之曰我死汝何依妹请先死德称善哭而视其缢继室霍氏请继之德痛不及视入

别其母哭尽哀出而自缢母见子女及子妇皆死亦投缢死阖门死难福王时赠光禄卿 本朝顺治九年追諡介愍许直字鲁若如臯人贼薄都城约同官出赀糗士为死守计及城陷帝南狩直将往从见贼骑塞道辄返曰四方兵戈驾将焉往已知帝崩一恸几绝客以七十老父为解直曰不死辱及所生乃作书寄父赋绝命诗六章阖户自经死福王时赠太仆卿 本朝顺治九年追諡忠愍金铉字伯玉武进人铉初闻大同陷疏曰宣大京师北门大同陷则宣府危宣府危则大事去请急撤回中官杜勲专任巡抚朱之冯勲二心伺事而冯忠恳可属大事不报及京城破恸哭急趋入朝见宫人狂奔出知帝已崩解牙牌北向四拜投金水河从者力挽之铉怒奋臂跃入死母章妻王弟錞并殉难死福王时赠太仆少卿 本朝顺治九年追諡忠洁卫时春颉六世孙掌後府京师陷怀铁卷阖门十七人皆赴井死本朝顺治九年追諡忠穆张庆臻骐之後掌都督府京师陷召亲党尽散赀财阖家自焚死 本朝顺】

【治九年追諡忠毅巩永固字洪图宛平人尚乐安公主都城陷时公主已毙未葬永固以黄绳缚子女五人系柩旁曰此帝甥不可污贼手举劒自刎阖家焚死 本朝顺治九年追諡忠烈刘文炳字洪筠宛平人以孝纯皇太后弟子嗣封侯太后帝生母也文炳素与太学生申湛然布衣黄尼麓讲明忠义贼攻西直门势益急尼麓踉跄告文炳宜自为计时太后母瀛国太夫人尚在文炳与其母杜氏计太夫人笃老不可俱烬请匿之湛然家杜氏曰太夫人得所我与若妻妹俱死耳外城陷文炳驰至崇之门杀贼数十人驰归第母妻及其妹已俱缢死家人共焚楼火烈不得入至後园与叔继祖俱投井死弟文耀守外城城破奔还覓文炳死所大书版井旁曰左都督刘文耀同兄文炳毕命报国处亦投井死阖门死者四十二人而湛然以匿瀛国太夫人为贼拷掠终不言体糜烂以死 本朝顺治九年追諡文炳忠恪乾隆四十一年追諡文耀烈愍黄尼麓申湛然亦俱宛平人赵譔云南人巡视中城城陷骂贼被杀 本朝乾隆四年追諡忠愍刘宗嗣清苑人分守东城力不支先缢杀妻毛氏媳王氏及妹女城陷被执骂贼夺刀杀二贼为贼支解死 本朝乾隆四十一年追諡忠烈贺讚保定人总兵虎臣子贼薄京城迎撃为乱箭射死王锤彦华亭人贼至守广宁门守将开门纳贼被执不屈死李若璉新城人分守崇文门城陷自缢死李遇知洋县人城陷方自缢被贼执不屈死王家祯长垣人解职居家城陷贼兵据长垣家自经死子元玠从死顾国缙上海人间城陷不食死何应瑞曹州人闻城陷不食死 本朝乾隆四十一年俱追諡忠节魏师贞魏县人城陷服命服拜阙自焚死高鐔榆林人城陷阖门焚死尹洗安肃人守西城骂贼死周之茂字如松麻城人需次都下贼搜得之迫使跪不屈折其臂而死张维纲清苑人守保定城及陷被执不屈死杨儒秀里系无考守城力战死妻杜氏投水死张大同里系无考守城力战死子之垣同死张力东明人里居闻城陷偕邑人杀所遣伪官为贼将所执不屈骂贼死 本朝乾隆四十一年俱追諡烈愍许达允灵宝人尚书进五代孙城陷骂贼不屈死张凝和忻州人贼薄城分守北门及陷死节俞志虞新昌人城陷不食坐露地梓宫出东华门志虞往哭自缢于新昌会馆陈纯德零陵人巡抚山西力陈抽练弊城陷恸哭自经死甯承烈字养纯大兴人管太仓银库城陷自经于官廨范方同安人城陷被系不屈死宋天显华亭人城陷为贼所执逼书伪诏骂贼触阶死于腾云大兴人贼至语其妻曰我为朝臣汝亦命妇不可贼污并服命服自缢死方履泰全椒人南和伯一元子城陷自刎死李国祿丰城人城陷自缢李若珪顺天人作绝命词自经死马象乾顺天人罢居里城陷率妻及子女五人死朱三乐贼陷大同死之吕应蛟保定右卫人守保定城城陷杀贼死文运昌刘洪恩戴世爵刘元靖吕九章吕一照俱保定人李一广峰县人皆守保定城战

死张罗彦清苑人随邵宗元守城城陷缢死韩东明安肃人守保定城城陷投井死彭士宏庐陵人城陷骂贼死王永隆遇变不食死萧偁延安人以父?袭指挥职城陷死节葛疑秀平定人城陷北向哭投缢死寇可教应城人骂贼死杨会英宁乡人城陷被执引颈就刃死李昌龄咸宁人被诬下狱贼入城日释之不食死杨元大兴人城陷兴妻同缢死陈三捷临清人贼逼真定徐标被害三捷投缢死李正光龙游人城陷阖门尽节刘继祖海州人文炳之叔分守东安门城陷投井死马国城灵寿人城陷殉节张桎芳通州人城陷不屈死张三杰魏县人被执不屈死张养所定兴人世袭顺天卫官城陷不屈死高甲顺天人城陷同妻许氏媳王氏女高氏弟妇刘氏侄女高氏同缢死刘一松宛平人城陷与妻王氏自经死张国维湖口人被执不屈死陈贞达宜兴人城陷骂贼死梁清宏顺天人城陷不屈死徐兆任大兴居家城陷与妻张氏及幼子同缢死施溥华亭人由顺天经历升任未行城陷仰药死徐有度平湖人城陷骂贼遇害郭寅同安人城陷不屈与二子皆死

本朝乾隆四十一年俱追諡节愍姚成字孝成余姚人城陷自缢妻袁氏子逢元俱殉死

本朝乾隆四十一年追 予入祠汤文琼字兆鳌石埭人闻变恸哭自杀书衣带曰位非文丞相之位心则文丞相之心贼徒见者皆叹其忠後自成将其衣带语以责陈演斩陈演于市其布衣尽节者又有范箴听杨铉李梦禧张世禧以下共一百四十余人福王时赠文琼中书舍人本朝乾隆四十一年追 予文琼等俱入祠杨崇猷六合人信之後城陷自缢死 本朝乾隆四十一年追諡忠节李尊祖铁岭卫人成梁之孙城陷遇难张光祖永城人麟十四世孙城陷殉节邓文明虹县人宁河王愈十一世孙城陷殉节顾肇迹江都人夏国公成十一世孙城陷殉节宋裕德定远人郅国公瑛九世孙城陷殉节吴遵周辽阳人梁国公成八世孙城陷殉节薛濂胶州人鄆国公禄九世孙城陷死节吴汝徵凉州人邠国公允成七世孙城陷自缢

本朝乾隆四十一年俱追諡节愍王国兴东平人熹宗母孝和太后弟昇之子

本朝乾隆四十一年追諡忠节刘岱陕州人以外戚世袭左都督城陷全家焚死 本朝乾隆四十一年追諡烈愍宫人魏氏城陷临御河大呼曰有志者当自为计遂投河死顷刻间从死者一二百人宫人费氏自投罾井中贼钩出见其容争夺之费给曰我长公主也羣贼不敢逼拥见自成自成命中官审视非是以赏部将罗某费复给罗曰我实天潢义难苟合将军宜择吉成礼罗喜置酒极欢费怀利刃俟罗醉断其喉立死因自呼曰我一弱女子段一贼帅亦足矣遂自刎自成闻大惊命收葬之】

发明【明末甲申之变临危授命捐躯殉难者实不乏人载在明史列传及忠义传彰彰可考其时迎降闯贼之徒贼且以其委蛇误国用者少而不用者多非予囚繫即加榜掠而诸君子成仁取义视死如归即丧节者亦美其得所福王时从逆以六等治罪而文武臣殉难亦间与諡入祠然而去取未公进退失实未足以风厉臣节如当时给事中顾鉉彭瑄御史冯垣登兵部员外郎郑逢兰行人谢于宣等皆为贼拷掠死或逼令缢死乃一例赠官而垣登于宣且至諡以忠节既以南北阻絶无由核实而荒残苟且转致淆混忠贞惟我世祖章皇帝定鼎之初于大学士范景文以下二十人及卫时春张庆臻巩永固刘文炳等俱邀恩锡諡軫恤遗忠实为亘古曠典我】

【皇上绍述前徽广扬义烈凡闯猷祸延甲申社覆俱核实 甄録即我朝天戈燹伐抗我顏行者亦悯其忠于所事概许褒旌恭读御制萨尔浒书事一篇我太祖高皇帝】

【太宗文皇帝统劲旅数千破明兵二十万明将如刘綎杜松等亦悯其陷阵之孤忠至夫明室将倾如蔡懋德周遇吉卫景瑗朱之冯等俱嘉其奋身殉难致命慷慨】

【特命儒臣按事核真分别定论卿尹光易名之典士庶邀俎豆之馨示彰瘝于胜朝植纲常于万古褒节昭忠为从来所未有谨于庄烈帝死社稷之日类书殉节诸人庶知当时腴颜降附者徒貽诟无穷而惟此义烈可嘉且邀阐扬于身後益以钦圣人褒贬之大公所以昭褒钺于天下万世者远也】

夏四月我

大清兵破李自成于山海关自成奔还京师僭帝号遂奔山西

【初吴三桂奉诏入援至山海关闻京师陷犹豫不进自成执其父襄令作书招之三桂欲降至滦州闻爱姬陈沅被刘宗敏掠去愤甚疾归山海袭破贼将自成怒亲部贼十余万执吴襄于军东攻山海关以别将从一片石越关外三桂惧乞降于我大清求共讨贼遣将致书我睿亲王其畧曰三桂以蚊负之身荷辽东重任今以宁远右偏孤立之故令三桂弃宁远而镇山海思欲坚守东陲而巩固京师也不意流寇逆天犯关以彼狗偷乌合何能成事但京师人心不固奸党开门纳款先帝不幸九庙灰烬今贼首僭称尊号掳掠妇女财物罪恶已极天人共愤三桂受国厚恩欲兴师问罪以慰人心柰京东地小兵力未集特泣血求助乞念亡国孤臣之言速选精兵三桂自率所部合兵以抵都门灭流寇于宫廷示大义于中国乞王转奏时睿亲王统兵次翁後得三桂书即遣使报之大畧言闻流寇攻陷京师明主惨亡不胜髮指用是率仁义之师沉舟破釜誓不返旌期必灭贼出民水火伯遣使致书深为喜悦遂统兵前进伯虽向守辽东与我为敌今亦毋因前故尚复怀疑若率衆来归必封以故土晋为藩王国仇可报身家可保三桂复请速进兵遂疾驰至沙河三桂报贼已出边立寨栅】

【大军迎击之败贼将唐通于一片石至山海关三桂开关出迎我大清令三桂兵系白布为识使之先驱遂入关时贼兵二十万皆多历战阵殊剽悍阵于关内自北山亘海大军布阵不能横及海岸乃令军士鳞次布列对贼阵尾伺其气衰奋击之且戒勿越伍躁进违节制阵既列三桂居右翼之末先悉其衆搏战围开复合战良久】

【大军从三桂阵右突出冲贼中坚万马奔腾飞矢雨堕天大风沙石飞走击贼如电自成方登高冈观战知为大清兵急荣马下冈走贼衆大溃自相残踏死者无算僵尸遍野沟水尽赤自成奔永平大军追之三桂先驱至永平自成杀吴襄走还京师时伪大学士牛金星为贼守京城诸降人往谒执门生礼甚恭金星曰讹言方起诸君宜简出由是降者始惧多窜伏矣自成至悉熔所拷索金及宫中帑藏器皿铸为饼每饼千金约数万饼骡车载归西安二十九日丙戌自成僭帝号于武英殿追尊七代皆为帝后立妻高氏为皇后自成被冠冕列仗受朝金星代行郊天礼是夕焚宫殿及九门城楼诘旦挟太子二王西走而使伪将军左光先谷可成为後卫自成勒诸璫悉取其金玉珠宝及出宫令羣贼各执守城白杨杖逐之不分贵贱皆号泣徒跣败面流血走出京城门外】质实【一片石在永平府抚宁县东北山海关北七十

里有关城城东为九门水口有水分九道南下合为一流因名沙河在永平府迁安县东三十五里即古小沮水】

五月我

大清兵定京师

【自成既西奔我大军所至谕以定乱安民共享太平之意百姓窜匿山】

【谷者悉还乡里迎降恐後睿亲王遂整兵入京师故明诸臣迎于五里外下令安辑百姓民间安堵如故命以礼改葬崇祯帝后建碑亭殿庑悉如典制并葬帝妃袁氏及公主并熹宗后张氏神宗妃刘氏皆如礼令民服丧三日寻议加諡曰庄烈愍皇帝陵曰思陵】质实【思陵在田贵妃寝园内庄烈帝与后同葬公主一即长平公主一为昭仁公主帝斫死于昭仁殿熹宗后张氏祥符人庄烈帝上号曰懿安皇后至是自缢神宗妃刘氏初封昭妃天启崇祯时尝居慈宁宫掌太后玺庄烈帝事之如大母先薨明史赞曰帝承神熹之後慨然有为即位之初沈机独断刈除奸逆天下想望治平惜乎大势已倾积习难挽在廷则门户纠纷疆场则将骄卒惰兵荒四告流寇蔓延遂至溃烂而莫可救可谓不幸也已然在位十有七年不迓声色忧勤惕厉殚心治理临朝浩叹慨然思得非常之材而用匪其人益以僨事乃复信任宦官布列要地举措失当制置乖方祚运移身罹祸变岂非气数使然哉迨至大命有归妖氛尽扫而帝得加諡建陵典礼优厚是则】

【圣朝盛德度越千古亦可以知帝之蒙难而不辱其身为亡国之义烈矣】

御定资治通鉴纲目三编卷三十九

卷四十

钦定四库全书

御定资治通鉴纲目三编卷四十

【甲五月明福王由崧立于南京申是年福王仍称崇祯十七年】

【臣等谨按甲申三月庄烈殉国明社已墟福王偏立江宁逾岁就灭一线苟延愆淫无度前恭纂辑览时特奉谕旨用分注之例存其纪年兹辑三编于甲申五月後附福王事一遵圣训所指以冀有合笔削谨严之至意云】

我

大清

世祖章皇帝顺治元年

五月明兵部尚书史可法等奉福王由崧监国于南京【北都既?庄烈帝殉社稷四月己巳报至南京人心惶惧时参赞机务兵部尚书史可法方督师勤王渡江抵浦口闻北都陷缟衣发丧南京文武大臣议立君讨贼而福王由崧潞王常芳俱以避贼至淮安伦序当属福王诸臣虑福王立或追怨妖书及挺击移宫等案潞王立则无後患且可邀功陰主之者废籍礼部侍郎钱谦益力持其议者兵部侍郎吕大器而右都御史张慎言詹事妻曰广皆然之其间往来游说者前山东按察使僉事雷演祚礼部员外郎周鏊慎言曰广等且移牒可法曰福王伦序当立而有七不可贪淫酗酒不孝虐下不读书干预有司也潞王为神宗侄贤明当立可法亦以为然由浦口遂还南】

【京而凤阳总督马士英利福王昏庸欲立之潜与阮大铖计议主立福王又密与操江诚意伯刘孔昭总兵高杰刘泽清黄得功刘良佐等结而公致书于史可法可法以七不可告之意未决甲申守备南京魏国公徐宏基等户部尚书高宏图等南京守备太监韩赞周等集议于朝大器署礼兵二部印不肯下者吏科给事中李沾操士英旨厉声言今日有异议守死之孔昭亦面斥大器而士英握重兵于外与诸将送福王至仪真连营江北势甚张诸大臣乃不敢言可法亦不得已乃定立福王时文武官俱集内官宅韩赞周令各署名籍姜曰广曰无忽遽请祭告奉先殿而後行越日至奉先殿以福王名告诸勲臣语侵史可法曰广呵之于是羣小咸目慑曰广乙酉迎王于江浦丁亥百官迎见于龙江関王素服角带哭五月戊子朔王谒孝陵奉先殿出居於内守备府羣臣入朝王色报欲避可法曰王无避宜正受既朝议战守可法曰王宜素服郊次发师北征示天下以必报讐之义王唯唯明日再朝出议监国事张慎言曰国虚无人可遂即大位可法曰太子存亡未卜倘南来若何刘孔昭曰今日既定谁敢复更可法曰徐之乃退又明日王监国】质实【浦口在江浦县东三十里由江北渡江南处龙江

関在江宁县西仪凤门外福王名由崧神宗孙福恭王常洵长子初封德昌王崇祯十六年嗣封福王潞王名常淂穆宗孙潞简王翊鏐之子翊鏐薨常淂嗣封吕大器後拥桂王监国卒于军张慎言字金铭阳城人後乞休以山西陷无家可归流寓芜湖宣城间国亡後疽发背死姜曰广字居之新建人本朝乾隆四十一年追諡忠确雷演祚周鏞以异议为朱统?所劾赐自尽刘孔昭基十二世孙徐宏基达十世孙高宏图字研文胶州人後乞归寓会稽南京破逃野寺中絶粒死本朝乾隆四十一年追諡忠直李沾松江华亭人】

明福王以史可法高宏图姜曰广王铎并为东阁大学士入阁办事马士英为东阁大学士仍总督凤阳等处军务

【时廷推阁臣衆举史可法高宏图姜曰广而刘孔昭攘臂欲并列衆以勲臣无入阁例折之孔昭勃然曰即我不可马士英何不可乃进士英东阁大学士兼兵部尚书都察院副都御史又议起废竞举郑三俊刘宗周徐石麒孔昭举阮大铖可法曰先帝钦定逆案无复言越二日拜可法礼部尚书兼东阁大学士与士英宏图并命可法仍掌兵部事士英仍督师凤阳姜曰广先以曾有异议不用及再推辞臣乃以曰广及王铎等名上遂与铎并命又以张慎言为吏部尚书慎言上中兴十议曰节镇曰亲藩曰开屯曰叛逆曰伪命曰褒恤曰功赏曰起废曰惩贪曰漕税皆纳之起刘宗周为左都御史徐石麒为右都御史寻改吏部尚书时宗周闻京师陷方召募义旅讨贼及召以大仇未报不敢受职自称草莽孤臣疏陈时政言今日大计舍讨贼复讐无以表陛下渡江之心非毅然决策亲征无以作天下忠义之气一曰据形胜以规进取江左非偏安之业请进图江北凤阳号中都东扼徐淮北控豫州西顾荆襄而南去金陵不远请以驻亲征之师大小铨除暂称行在少存臣子负罪引慝之心从此渐进秦晋燕齐必有响应而起者一曰重藩屏以资弹压淮扬数百里设两节钺不能御乱争先南下致江北一块土拱手授于流贼督漕路振飞坐守淮城久以家属浮舟远地是倡之逃也于是镇臣刘泽清高杰遂有家属寄江南之说军法临阵脱逃者斩臣谓一抚二镇皆可斩也一曰慎爵赏以肃军情请分别各帅封赏孰当孰滥轻则收侯爵重则收伯爵夫以左帅之恢复而封高刘之败逃亦封又谁不当封者武臣既滥文臣随之外臣既滥中璫随之恐天下闻而解体也一曰核旧官以立臣纪燕京既破有受伪官而叛者有受伪官而逃者有在封守而逃者有奉使命而逃者法皆不赦亟宜分别定罪为戒将来至于伪命南下徘徊顺逆之间实繁有徒必且倡为曲说以惑人心尤宜诛絶又言当贼入秦流晋渐过畿南远近汹汹独大江南北晏然而二三督抚不闻遣一骑以壮声援流贼遂得长驱犯阙坐视君父之危亡而不救则封疆诸臣之当诛者一凶问已确诸臣奋戈而起决一战以赎前愆自当不俟朝食方且仰声息于南中争言固圉之策却兵权于阌外首图定策之功则封疆诸臣之当诛者又一新朝既立之後谓宜不俟终日首遣北伐之师不然则亟驰一介间道北进檄燕中父老起塞上名王哭九庙厝梓宫访诸王更不然则起闰帅郑芝龙以海师下直沽九边督镇合谋共奋事或可为而诸臣计不出此则举朝谋国不忠之当诛者又一罢废诸臣量从昭雪自应援先帝遗诏及之今乃槩用新恩诛阉定案前後诏书鹕突執必彪虎之类尽从平反而後已则举朝谋国不忠之当诛者又一臣谓今日问罪当自中外诸臣不职者始诏纳其言宣付史馆中外为悚动而石麒亦陈奏七事曰省庶官慎破格行久任重名器严起废明保举交堂廉所言皆切时政又起黄道周为吏部左侍郎令兵部尚书张国维以原官回任协理京营戎政先是庄烈帝令国维赴江

浙督饷出都十日而城陷至是召还余皆迁擢有差】质实【郑三俊初为吏部尚书庄烈帝下诏求贤三俊举李邦华刘宗周自代且荐黄道周史可法冯元扬陈士奇四人姜燾熊开元言事下狱及宗周获严谴三俊皆恳救先後奏罢不职司官数人铨曹悉廩廩大僚缺官三俊数引荐贤士之废斥者多复用徐石麒获罪率同官合疏乞留後以兴吴昌时谋出言官事为言官所诋三俊乞休致仕国亡後家居十年卒刘宗周初为左都御史以奏姜燾熊开元不当下锦衣卫狱当付法司帝怒其偏党削职至是福王立起用後南都亡杭州亦失守宗周赴水不死絶食卒 本朝乾隆四十一年追諡忠介徐石麒初为刑部侍郎以奏斩陈新甲失误军机为新甲党所衔怒及擢本部尚书以中官王裕民坐刘元斌党帝欲杀裕民石麒祇议戍帝怒其失出及宗周救姜燾熊开元夺职石麒疏留不纳下刑部定罪石麒又据原词拟开元赎徒燾谪戍不复鞫讯帝怒遂落职至是福王立起用寻又罢归後】

【大兵定嘉兴石麒自经死妻孙氏赴水死 本朝乾隆四十一年追諡忠懿黄道周崇祯中劾杨嗣昌等召对平台反覆抗论坐谪戍南都亡见唐王请募兵江西得义旅九千人出徽州遇】

【大兵战败被执不屈死 本朝乾隆四十一年追諡忠端张国维巡抚应天总督河道有御患治河功南都破请鲁王监国绍兴後江上师溃还守东阳国维知势不支作絶命词赴水死 本朝乾隆四十一年追諡忠敏】

明福王称帝于南京以史可法督师江北召马士英入阁办事

【史可法定京营制如北都故事侍卫及锦衣卫诸军悉入伍操练锦衣东西两司房及南北两鎮抚司官不备设以社密告安人心时马士英旦夕冀入相及督师风阳命下大怒以可法所与士英七不可书奏之王且令高杰刘泽清疏趣可法视师而自拥兵入覲拜表即行可法遂请督师出镇淮扬于是加可法太子太保改兵部尚书武英殿大学士命便宜行事各镇并听节制十五日壬寅王称帝于南京仍称崇祯十七年以明年为弘先元年癸卯士英即入阁佐理仍掌兵部尚书事乙巳可法陛辞请以总兵刘肇基于永绥李栖凤卜从善金声桓等随征从之可法起行即遣使访崇祯帝后梓宫及太子二王所在复奉命祭告泗凤二陵祭毕上疏曰陛下践祚初只谒孝陵哭泣尽哀道路感勲若躬谒二陵亲见凤泗蒿菜满目鸡犬无声当益悲愤愿慎终如始处深宫广厦则思东北诸陵魂魄之未安享玉食大庖则思东北诸陵麦饭之无展膺图受籙则念先帝之集木馭朽何以忽遭危亡早朝晏罢则念先帝之克俭克勤何以卒隳大业战兢惕厉无时怠荒二祖列宗将默佑中兴若晏处东南不思远畧贤奸无辨威断不灵老成投簪豪杰裹足祖宗怨恫天命潜移东南一隅未可保也王嘉荅之时李自成弃京师西走青州诸郡县并杀伪官据城自保未知南都拥立之事可法请速颁监国登极二诏慰山东河北军民心开礼贤馆招四方才智下僚有才被弃者亦悉举任用之以监纪推官应廷吉领其事幕府称得人】质实【金声桓字虎夫辽东卫人】

明分淮扬凤庐为四镇以黄得功刘良佐刘泽清高杰领之

【时议分江北为四镇刘泽清辖淮海驻淮北经理山东一路高杰辖徐泗驻泗水经理开归一路刘良佐辖凤阳驻临淮经理陈杞一路黄得功辖滁和驻卢州经理光固一路仍进得功靖南侯封杰兴平伯泽清东平伯良佐广昌伯时得功泽清杰争欲驻扬州杰先至固欲入城扬州民畏杰不纳杰攻城急日掠村廂妇女民恶之知府马鸣騄推官汤来贺坚守月余进士郑元勲家城中身诣杰营责以大义杰颇感悟为敛兵五里外城西北得暂啓门以通薪而守城者负约数以矢石中杰兵杰兵复进扬人竞疑元勲通杰遂遇害既而杰知不可攻意稍怠而泽清亦大掠淮上临淮不纳良佐军亦被攻王命可法往解得功良佐泽清皆听命乃诣杰杰素惮可法夜掘坎十百埋暴骸旦日谒可法帐中词色俱变汗浹背可法坦怀待之接偏裨以温语杰大喜过望然杰亦自是易可法用己甲士防卫又檄必取视而後行可法夷然为具疏屯其衆瓜州杰又大喜可法乃开府扬州时职方主事万元吉请奉诏宣慰四镇且发万金犒杰令保江淮乃渡江诣诸将营约共獎王室诸将嫌渐解廷议以元吉能辑诸将擢太仆少卿监视江北军务时分四镇各加封边将多不平袁继咸自九江镇所入朝奏曰封爵以劝有功无功而封有功者不劝跋扈而封跋扈者愈多王曰事已行奈何继咸曰马士英引杰渡江宜令往辑王曰彼不欲往辅臣史可法愿往继咸曰陛下嗣位固以恩泽收人心尤宜以纪纲肃衆志乞振精神申法纪冬春间淮上未必无事臣虽弩愿奉六龙为澶渊之举王有难色因诣榻前密奏曰左良玉虽无异图然所部多降将非孝子顺孙陛下初登大宝人心危疑意外不可不虑臣当星驰回镇许之熊汝霖自福建召还亦上疏曰臣自丹阳来知浙兵为边兵所击火民居十余里边帅有言四镇以杀掠获封爵我何惮不为臣意四镇必毅然北征一雪此耻今恋恋淮扬何也况一镇之饷多至六十万孰必不能供即仿古藩镇法亦当在大河以北开屯设府曾奥突之内而遽以藩篱视之】质实【黄得功开原卫人其先合肥人马鸣騄褒城人汤来贺南丰人郑元勲歙县人

本朝乾隆四十一年入祠万元吉後为兵部尚书守贛州城城陷投水死

本朝乾隆四十一年追諡忠节袁继咸字季通宜春人熊汝霖後从鲁王至海外投水死

本朝乾隆四十一年追諡忠节】

明进封左良玉为宁南侯

【先是庄烈帝诏封良玉宁南伯畀其子梦庚平贼将军印功成世守武昌命给事中左懋第便道督战良玉乃条月日进兵状以闻疏入未奉旨而京师?福王立诏至其部下有异议不欲开读巡抚何腾蛟急诣良玉所争之而良玉已从正纪卢鼎言开读如礼诸将尚汹汹以江南自立君欲引兵东下良玉恸哭不许尽出所藏金银彩物散之诸将曰此皆先帝赐也受国厚恩褐变至此良玉何心独有之乎于是诸将噉然皆哭副将马士秀奋曰有不奉公令复言东下者吾击之以巨槛置礮断江衆乃定会王命进良玉爵为侯廕一子锦衣千户以上流之事专委良玉制书到楚而良玉贺表亦至时李自成败于关门良玉得以其间稍复楚西境之荆州德安承天而腾蛟及总督袁继咸居江西皆与良玉善南都倚为屏蔽时良玉兵八十万号百万前五营为亲军後五营为降军每春秋肄兵武昌诸山一山帜一色山谷为满军法用两人夹马驰曰过对马足动地殷如雷声闻数里诸镇兵惟高杰最强不及良玉远甚然良玉自朱仙镇之败精锐畧尽其後归者多乌合军容虽壮法令不复相掇而是时良玉亦老且病无出兵意矣】质实【朱仙镇之败开封围急良玉赴援次朱仙镇见贼势盛一夕拔营走襄

阳诸军皆溃事见庄烈帝十五年七月正纪良玉所置官名何腾蛟字云从黎平人】

明分置应天苏松巡抚

【以左懋第为应天安徽巡抚祁彪佳为苏松巡抚时苏州诸生檄讨其乡官从贼者奸民和之少詹事项煜及大理寺正钱位坤通政司参议宋学显礼部员外郎汤有庆之家皆被焚劫常熟又焚给事中时敏家毁其三代四棺彪佳请议从逆诸臣罪而治焚掠之徒以加等从之时高杰驻瓜州跋扈甚彪佳尅期往会至期风大作杰意彪佳未必来彪佳携数卒冲风渡杰大骇异尽撤兵卫会彪佳于大观楼彪佳披肝膈勉以忠义共獎王室杰感叹曰杰阅人多矣如公杰甘为死公一日在吴杰一日遵公约矣共饭而别】质实【祁彪佳字宏吉浙江山陰人後杭州破给家人先寢投水死本朝乾隆四十一年追諡忠惠宋学顯吴县人汤有庆长洲人】

明以忻城伯赵之龙总督京营戎政

【之龙与士英比令督京营戎政】质实【赵之龙永乐功臣彝八世孙】

明淮扬巡抚路振飞击贼党董学礼于宿迁走之【振飞初授御史陈时事十大弊曰务苛细而忘政体丧廉耻而坏官方民愈穷而贼愈亟有事急而无事缓知顯患而忘隐忧求治事而鲜治人责外重而责内轻严于小而寬于大臣日偷而主日疑有诏旨而无奉行疏入诏付所司继擢右佥都御史总督漕运巡抚淮扬贼陷山西振飞遣将金声桓等十七人分道防河由徐泗宿迁至安东沭阳且团练鄉兵犒以牛酒得两淮间劲卒数万福周潞崇四王避贼同日抵淮大将刘泽清高杰等亦弃汛地南下振飞悉接之至是河南副使吕弼周为贼节度使进逼淮上进士武愷为贼防御使招抚徐沛而贼所遣伪制将军董学礼等据宿迁振飞击擒弼周愷走学礼竿弼周法场命军士人射三矢乃解磔之缚愷狗诸市鞭八十檻车送南京诛之会马士英欲用所亲田仰为淮阳巡抚乃罢振飞振飞亦遭母丧无家可归遂流寓苏州振飞在淮安与巡按御史王燮颇号召义士同心戮力自振飞既去王燮亦陞右佥都御史巡抚山东而刘泽清来居淮城威福自擅散遣义士其桀驁者籍之部下刼掠村落一空又大兴土木造宅壮丽僭拟皇居与田仰日肆欢饮士民愤怨时山东郡县

已归我

大清王燮亦不能往但逡巡河上而已】质实【吕弼周邹平人武愷泾阳人田仰卢陵人】

六月明追上崇祯帝后諡号

【命諡崇祯帝曰烈皇帝庙号思宗周后曰孝节皇后又追諡其祖母郑贵妃曰孝宁太后考福恭王曰恭皇帝上嫡母邹氏尊号曰恪贞仁壽皇太后时太仆少卿万元吉请修建文实录复其尊称并还懿文追尊故号祀之寝园以建文配而速褒建文死事诸臣以作忠义之气从之乃追复懿文太子庙号并追諡建文帝曰惠宗让皇帝复封其弟允熈等为王并上景帝

庙号曰代宗改諡孝宗张后曰孝成皇后方孝孺等皆为贈諡立嗣又闻崇祯太子及永定二王皆为李自成所害乃追諡太子曰献愍定王曰哀永王曰悼时朝廷大议多出高宏图手赵之龙欲倾高宏图以思非美諡上疏纠驳寻改曰毅宗又寻改恭皇帝为孝皇帝尊其墓曰熙陵别立专庙】

明召阮大铖陛见

【大铖名挂逆案失职久废郁郁不得志流寇福皖大铖避居南京颇招纳游侠为谈兵说剑觊以边才召顾杲杨廷枢沈士柱黄宗义万泰等皆复社中名士方聚讲南京恶大铖甚作留都防乱揭逐之大铖惧乃闭门谢客独与士英深相结周延儒内召大铖尝要之维杨且以士英属延儒许之会凤阳总督高斗光以失城逮治礼部侍郎王锡袞荐士英才延儒从中主之遂起兵部右侍郎总督庐凤等处军务及福王立士英秉政招权罔利日事报复时高宏图姜广曰张慎言等皆以宿德在位将以次引海内人望而士英必欲起大铖因荐大铖知兵初大铖在南京与守备太监韩赞周昵及北都既陷中官悉南奔大铖因赞周遍结之为羣奄言东林当日所以为贵妃福王者俾备言于王以潜倾史可法等羣奄便极口称大铖才士英亦言大铖从山中致书与定策谋为白其附璫赞导无实迹遂命大铖冠带陛见大铖乃上守江策曰聯絡日控扼曰进取曰策应且自白孤忠被陷痛诋孙慎行魏大中左光斗又指大中为大逆于是大学士姜曰广疏言臣前见文武纷竞既惭无术调和今见钦案掀翻又愧无能预寝遂使先帝十七年之定力顿付逝波陛下数日前之明诏竟成故帟梓宫未冷增龙驭之怨恫制墨未乾骇四方之观听惜哉维新乃有此举臣所守者朝廷之典章所畏者千秋之公议而已侍郎吕大器疏言先帝骨肉未寒爰书俨若日星而士英悍然不顾视陛下何如主士英为大铖奏辨力攻曰广大器益募宗室统?建安王统縷等连疏交攻而以大学士高宏图为御史时尝诋东林必当右已乃言宏图素知臣者宏图则言先帝钦定逆案一书不可擅改给事中罗万象疏言辅臣荐用大铖或以愧世之不知兵者然大铖实未知兵伏望许其陛见以慰辅臣延揽之意禁其复用以杜邪人觊觎之端应天府丞郭维经疏言逆案先帝手定今将修实录若此案不书恐在天英灵必有遗憾若书之而今日起用大铖与前案违异非陛下所以待先帝并非辅臣所以待陛下也大理寺丞詹兆恒疏言逆案诸臣久图翻局幸先帝神明内断确不可移陛下驻蹕龙江时痛先帝异变对羣臣哭百姓闻之莫不洒泣捶胸愿雪国耻近闻山东河南士绅皆白衣白冠呼吁先帝驱杀伪官各守险阻以拒闯献余党此诚先帝德泽在人也今梓宫抔土未乾太子二王安在国讐未报而忽召见大铖还以冠带岂不上伤先帝灵下短忠义气哉怀远侯常延龄太仆寺少卿万元吉等亦各疏谏乃命取逆案进览兆恒即上进而士英亦以是日进三朝要典于是切责万象等宏图复请下九卿会议亦不听】质实

【顧杲无錫人杨廷枢吴县人沈士柱芜湖人黄宗义余姚人万泰鄞县人郭维经字六修江西龙泉人詹兆恒广信永丰人常延龄开平王遇春十一世孙朱统?新建人】

明吏部尚书张慎言罢

【时大起废籍慎言荐前大学士吴甡尚书郑三俊以王命召甡陛见一日朝罢诚意伯刘孔昭忻城伯赵芝龙羣诟于廷指慎言及甡为奸邪叱咤彻殿陛给事中罗万象言慎言平生

具在甡素有清望安得指为奸邪孔昭等伏地痛哭谓慎言举用文臣不及武臣器争不已孔昭至欲手刃慎言韩赞周呵之乃止既退又疏劾慎言极诋三俊且谓慎言当迎立时阻难怀二心乞寝甡陛见命且议慎言欺蔽罪慎言疏辨因乞休时两解之万象又言首膺封爵者四镇也新改京营又加二镇衙何尝不用武年来封疆之法先帝多宽武臣武臣报先帝者安在祖制以票拟归阁臣参驳归言官不闻委勲臣以纠劾也使勲臣得兼纠劾文臣可胜逐哉史可法奏慎言疏荐无不当诸臣恸哭喧呼灭绝法纪恐骄弁悍卒益轻朝廷御史王孙蕃言用人吏部职掌奈何廷辱冢宰宏图等亦以不能辑和文武各疏请罢俱不允而吴甡亦竟不复召慎言乃再疏乞休遂许其请且谕之曰晋疆未复卿亦无家可归沿途侨寓需召慎言遂流寓芜湖宣城间至国亡後疽发于背戒勿药卒】

明总兵刘泽清入朝于南京吏部侍郎吕大器罢【先是诸臣议拥立时大器主钱谦益雷演祚言欲立潞王及马士英等推戴福王因迁大器吏部左侍郎大器以异议绌自危乃上疏劾士英言其拥兵入朝腴留政地翻先皇手定逆案欲跻阮大铖中枢其子以铜臭为都督女弟夫未履行阵授总戎嫫嫫越其本田仰扬文骢先朝罪人尽登膺仕乱名器夫吴甡郑三後臣不谓无一事失而端方谅直终为海内正人之归士英大铖臣不谓无一技长而奸回邪慝终为社稷无穷之祸至是泽清入朝疏纠大器演祚怀异图而荐逆案张捷邹之麟张孙振等大器遂乞休去以手书监国告庙文送内阁明无他士英憾未已令大常少卿李沾劾之遂削大器籍复命法司逮治之寻以蜀地尽失无可踪迹而止大器既去沾得超擢左都御史而谦益亦以附士英大铖得为礼部尚书协理詹事府事时武臣各占分地贼入不以上供恣其所用置封疆兵事一切不问与廷臣互分党援干预朝政挤排异己奏牍纷如纪纲尽裂而泽清所言尤狂悖拥立之初即援靖康故事请以五月改元又请宥故辅周延儒助饷赃银又请禁巡按不得挈访追赃又请法司严缉故总督侯恂及其子方域时皆曲意从之及是入朝复阿士英指力纠大器等本朝顺治二年四月扬州告急命泽清等往援而泽清已潜谋输款矣我大清恶其反覆磔诛之泽清颇涉文艺好吟咏尝召客饮酒倡和幕中蓄两猿以名呼之即至一日宴其故人子酌酒金瓠中瓠可容三升许呼猿捧酒跪送客猿猱猱甚客战掉逡巡不敢取泽清笑曰君怖耶取囚扑死阶下剗其脑及心肝置瓠中和酒付猿捧之前饮嚼颜色自若其凶忍多类此】质实【杨文骢字龙友贵阳人张捷丹阳人邹之麟武进人张孙振霍山人】

明镇江兵乱

【时史可法部将于永綬等四人驻京口浙江入卫都司黄之奎亦部水陆兵四千戍其地之奎御军严永綬等四将兵恣横刃伤民浙江兵缚而投之江遂有隙已而守备李大开统浙江兵又击伤镇江兵马镇江兵与相门射杀大开乱兵大焚掠死者四百人会巡抚祁彪佳至永綬等遁去彪佳劾治四将罪调恤被难家民大悦】

明马士英乞罢慰留之

【士英当国畏东林倚左良玉为难谩语修好而陰忌之良玉不自安属承天守备太监何

志孔巡按御史黄澍入贺陰伺朝廷动静澍挟良玉執当陛见面数士英奸贪不法且言尝受张献忠伪官周文江重贿为题授参将罪当斩志孔亦论士英罔上行私诸罪司礼太监韩赞周叱志孔退士英跪乞处分澍举笏直击其背曰愿与奸臣同死士英大号呼赞周即执志孔候命时有内谕赞周欲令士英避位士英佯引疾请罢而赂福邸旧奄田成张执中等泣懇曰上非马公不得立逐马公天下将议上负恩矣且马公在阁诸事不劳主上马公去谁念上者明日即慰留士英士英亦畏良玉请释志孔而命澍速还湖广未几复以他事夺澍官寻以朱盛浓言逮澍澍与良玉谋陰讽将士大譁欲下南京索饷因保救澍袁继咸为留江漕十万石十三万金给之且代澍申理以良玉依仗澍为言士英不得已乃免逮澍遂匿良玉军中良玉与士英由此有隙】质实【以他事夺澍官故督都掌锦衣卫刘侨者尝遣戍由周文江贿张献忠受伪命为锦衣指挥使及良玉复蕲黄侨削发逃去澍持之急而士英纳侨贿令讐澍遂复侨官削澍职寻以朱盛浓言澍当逮遂逮澍周文江麻城人朱盛浓楚府中尉】

明封福府千户常应俊为襄卫伯

【应俊本革工福王值寇出亡时应俊常负行以免于难王初立即授左都督至是封襄卫伯世袭太监韩赞周卢九德及福府内臣屈尚忠田成张执中等亦以翊戴功各廕其弟侄有差】

明命鲁王以海居处州

【时山东残破以海弃藩南奔泊舟京口命暂驻处州明年南京破兵部尚书张国维等迎以海居于绍兴号鲁监国 本朝顺治三年六月大兵克绍兴以海遁入海图维及礼部尚书余煌侍郎陈函辉等皆死六年吏部尚书张肯堂复迎鲁王居方山八年】

【大兵袭舟山以海复航海肯堂自经死兵部尚书张煌言初奉表迎鲁王至绍兴复从入海大兵获于舟山後执至杭州谕降不从死郑芝龙子郑成功奉以海居金門礼待颇恭既而懈以海不能平将往南澳成功使人沉之海中时顺治十一年也其时同殉节者兵部尚书李向中礼部尚书吴鍾峦吏部侍郎朱永佑安洋将军刘世勋左都督张名扬又有通政使郑遵俭兵科给事中董志宁兵部郎中朱养时户部主事林瑛江用楫礼部主事董元兵部主事朱万年顾珍李开国工部主事顾宗尧中书舍人苏兆人工部所正戴仲明定西侯参谋顾明楫诸生林世英锦衣卫指挥王朝相内官监太监刘朝等亦不下数十人 以海监国起庶子余煌礼部右侍郎再起户部尚书皆不就明年王以武将横甚拜煌兵部尚书始受命时诸臣竞营高爵请乞无厌煌上言今国勢垂危朝政愈纷尺土未复战守无资诸臣请祭则当思先帝蒸尝未备请葬则当思先帝山陵未营请封则当思先帝宗庙未享请廕则当思先帝子孙未保请諡则当思先帝光烈未昭时以为至言及大兵过江王航海煌赴水死陈函辉当北都陷誓衆倡义会福王立不许草泽勤王乃已寻起职方主事监军江北事败归鲁王擢为礼部右侍郎从王航海已而相失哭入云峯山作絕命 投水死张肯堂初从唐王王败死肯堂飘泊海外後至舟山鲁王用为东阁大学士王航海肯堂赋诗自经死】质实【鲁王以海荒王檀九世孙方山在福建福州府南七十里南澳在广东潮州府饶平县东南海中距府一百二十里

澳有三延袤三百里为闽粤门户今设南澳镇总兵驻此张肯堂字载宁松江华亭人 本朝乾隆四十一年追諡忠穆余煌字武贞会稽人陈函辉字上叔临海人李向中锺祥人董志宁鄞县人 本朝乾隆四十一年俱追諡忠节张煌言鄞县人吴鍾峦字峦稚武进人 本朝乾隆四十一年俱追諡忠烈朱永佑字爰啓上海人刘世勋上元人张名扬江宁人王朝相里系无考 本朝乾隆四十一年俱追諡烈愍郑遵俭会稽人朱养时江陰人林瑛福建人江用楫苏州人董元会稽人朱万年福建人顾珍长州人李开国临山卫人倾宗尧长洲人苏兆人苏州人戴仲明鄞县人 本朝乾隆四十一年俱追諡节愍顾明楫顺天人林世英福建人 本朝乾隆四十一年俱追予入祠】

秋七月明遣兵部侍郎左懋第等求成于我

大清

【我大清兵连破李自成河北郡县亦相继归附时议遣使通好而难其人懋第母陈歿于燕欲因是返柩葬请行乃拜懋第兵部右侍郎兼右佥都御史与右都督陈洪范太仆少卿马绍愉偕而令懋第经理河北聯絡阁东诸军务马绍愉者故兵部郎官也尝为陈新甲通使新甲既诛绍愉以督战致衄为懋第劾罢及是绍愉已起官郎中乃进为少卿副懋第懋第请罢绍愉勿遣畧言臣此行致祭先帝后梓宫访东宫二王踪迹臣既充使執不能兼理封疆且绍愉臣所劾罢不当复与臣共事必用臣经理则乞命洪范同绍愉出使而假臣一旅偕山东抚臣收拾山东以待不敢复言北行如用臣与洪范北行则去臣经理但衔命北行而勿遣绍愉阁部议止绍愉改遣原任薊督王永吉命仍遵前谕懋第濒行言臣此行死生未卜请以辞阁之身效一言愿陛下以先帝讐耻为心贍高皇之弓剑则思成祖列圣之陵寢何存抚江上之残黎则念河北山东之赤子谁恤更望时时整顿士马必能渡河而战始能扼河而守必能扼河而守始能画江而安衆聽其言时令齎白金十万两币帛数万匹以兵三千人护行时永吉总督山东军务命永吉暂驻河上料理战守候北使回时史可法銳意进兵河南以懋第等方行兵不宜继进谕止之懋第等以十月朔至张家湾我】

【大清令以百人从行入都馆之鸿胪寺懋第请祭告诸陵及崇禎帝不许乃陈太牢旅所哭而奠之旋以是月二十八日遣还出都陈洪范于途次陈密啓请身往江南招诸将刘泽清等降附而留懋第等勿遣于是自沧州追还懋第改馆太医院而纵洪范南归至明年五月南京破懋第闻之恸哭其从弟懋奉先为吏部郎降贼後归我大清授官矣来谒懋第懋第曰此非吾弟也叱出之寻与从行兵部司务陈用极游击王一斌都司张良佐刘统王廷佐俱死之惟马绍愉降】质实【王永吉高邮州人左懋第 本朝乾隆四十一年追諡忠贞陈用极崑山人 本朝乾隆四十一年追諡忠节王一斌宁国人张良佐刘统王廷佐俱上元人 本朝乾隆四十一年俱追諡节愍】

李自成遁归西安

【初自成西走至定州我大清兵追败之斩贼党谷可成自成西走真定益悉衆迎战大兵复击之贼不能走渐却自成中流矢创甚西踰故関入山西会大兵东返自成乃得鳩合潰散走平阳以谗杀其党李岩岩故劝自成以不杀收人心及陷京师保护懿安皇后令自尽又独于士大夫无所拷掠牛金星等大忌之定州之败河南州县多杀伪官自保岩请帅兵往金星陰告自成曰岩雄武有大畧非能久下人者河南岩故乡假以大兵必不可制因譖其欲反自成令金星与岩饮杀之贼衆俱解体至是自成复遁归西安遣别贼陷汉中降总兵赵光远进掠保宁张献忠以兵拒之乃还自成既屡败益强狠自用伪尚书张第元耿始然皆以小忤死制铜谶官民坐赅即谶斩民盗一鸡者死西人大警惧】质实【张第元汾阳人耿始然猗氏人】

明以张有誉为户部尚书

【内批特用部侍郎张有誉为尚书高宏图封还力諫不听盖有誉素有清望马士英欲借以开转陞幸门为阮大铖地也未几又以张捷为吏部侍郎捷因荐逆案吕纯如得罪公论士英方欲用大铖故亦以中旨起之】质实【张有誉江陰人】

明释高墙罪宗为庶人

【前唐王聿键等三百余人俱释为庶人礼臣请复聿键王爵不许寻命徙居广西平乐府明年南京破聿键方行次杭州遇总兵郑鸿逵户部主事苏观生奉之入闽总兵郑芝龙巡抚都御史张肯堂与礼部尚书黄道周等定议奉聿键监国闰六月遂自立于福州号隆武改福州为天兴府以天兴建宁延平兴化四府为上游汀州邵武漳州泉州四府为下游各设抚按进芝龙鸿逵为侯郑芝豹郑彩为伯观生道周俱大学士肯堂为兵部尚书余拜官有差时权在郑氏聿键不能有所为芝龙议简战守兵二十余万计饷不支其半请预借两税一年令羣下捐俸劝绅士输助徵府县银谷未解者官吏督迫闾里骚然聿键屡促芝龙出兵辄以饷拙辞久之芝龙知衆论不平乃请以鸿逵出浙东彩出江西各拥兵数千号数万既行托候饷皆行百里而还先是黄道周知芝龙无意出师自请行从广信出衢州进至婺源遇我】

【大清兵战败执至江宁不屈死时李自成兵败走死其兄子李锦帅衆降于湖广总督何腾蛟一时增兵十余万侍郎杨廷麟起兵复吉安临江于是廷麟等请聿键出江右腾蛟请出湖南原任知州金堡言腾蛟可恃芝龙不可恃宜弃闽就楚聿键大喜授堡给事中遣观生先行募兵先是靖江王嘉享僭称监国不奉聿键命为巡抚瞿式耜等所擒以捷闻而鲁王以海又称监国于绍兴拒聿键使者故聿键决意出江西湖广十二月发福州驻建宁广东布政汤来贺运饷十万由海道至明年二月驻延平时我】

【大清遣洪承畴黄熙允招抚江南福建芝龙密遣使输款会都督陈谦奉鲁王使命至称皇叔父不称陛下聿键怒下谦于狱芝龙与谦有旧疏救不听竟杀谦芝龙遂怀去志三月我】

【大清兵取吉安抚州围杨廷麟于赣州尚书郭维经出闽募兵援赣是月鲁王遣使来聘聿键报以书畧言吾无子王为皇太侄同心戮力共拜孝陵取浙东所用职官尽列朝籍何分彼此又遣都御史陆清原齎饷银十万两犒劳浙东军士至江上方国安纵兵尽夺其饷杀清原且出檄文数聿键罪聿键益蹙六月我大兵克绍兴鲁王以海遁入海闽中大震芝龙假言海寇至撤兵回安平镇航海去守闽将士皆随之仙霞岭空无一人七月我】

【大兵抵闽関守蒲城御史郑为虹给事中黄大鹏延平知府王士和死焉进克兴化副使知府事刘永祚仰药死八月聿键出走数日方至汀州大兵继至从官奔散与妃曾氏俱就执妃至九洑投于水聿键死于福州给事中熊纬尚书曹学佺通政使马思礼等俱死时顺治三年也其前後殉节者又有巡抚邱祖德推官温璜都督蒋若来总兵周之藩尚书总理军务郭维经兵部左侍郎詹兆恒罢居大学士傅冠巡抚金声推官吴应箕都御史王瑞柟职方司主事王之栻大学士杨廷麟巡抚杨文荐提督陈泰来给事中杨廷枢大学士朱大典总兵张鹏翼监军道副使孙临推官江天一中书夏完淳等皆捐躯自尽】质实【仙霞岭在浙江衢州府江山县南福建福宁府浦城县北即古泉山之巔为浙闽通衢九洑即九龙滩在清流县南险峻为七闽最苏观生字宇霖东莞人金堡仁和人陈谦武进人殉节者郑为虹字天玉江都人邱祖德成都人罢官流寓宁国举兵应金声兵败执之不降死温璜乌程人练徽州民兵为保障计城破刃妻茅氏及女自刎死蒋若来长洲人守金华援絶巷战经日力尽自刎死周之藩井研人卫主巷战矢集身而死郭维经里系详前率师援赣州城破入寺自焚死詹兆恒里系详前唐王命佐黄道周守广信寻攻开化兵败死于阵傅冠进贤人崇祯时入阁罢职归唐王时起用督师江西寻致仕大兵下福建执之不降死本朝乾隆四十一年俱追諡忠烈曹学佺字能始侯官人金声南都破保徽州通表唐王为】

【大兵间道执至江宁不降死吴应箕贵池人举兵应金声屯师泥湾谕降不从死王璃楫永嘉人福王时极陈有司虐政唐王召入闽後归温州城破自经死陆清原平湖人唐王命犒军江上】

【大兵渡江投江死王之栻武进人唐王命宣谕江上遇大兵执之不降死杨廷麟清江人唐王命督师赣州援絶粮尽投水死杨文荐京山人守赣州城破执之送南昌絶粒死陈泰来新昌人战抚州兵败死杨廷枢里系详前国亡隐山中久之为大兵所执杀之泗州寺本朝乾隆四十一年俱追諡忠节黄大鹏字文若建阳人熊纬字文江南昌人朱大典金华人福王命督江上军福王就执走杭州守金华城破阖门死张鹏翼诸暨人守衢州城破执之不屈死本朝乾隆四十一年俱追諡烈愍王士和字万育金谿人刘永祚字叔远武进人马思礼福建长乐人孙临桐城人监杨文驄军兵败执之不降死江天一歙县人金声门人与声举兵执之不降死夏完淳华亭人允彝字亦执送江宁不屈死本朝乾隆四十一年俱追諡节愍】

明募兵云南

【遣使往云南募兵时广西巡抚方振孺松江知府陈亨等各措饷募兵入卫建阳县知县蒋芬造火器募勇士勤王疏言倘邀天幸迅扫流氛指日奏凯社稷之福否则断脰决腹瞑目

地下以报国家三百年养士之恩以无负臣三十年读书之志识者壮之】

明起章正宸为吏科都给事中

【正宸出周延儒门不肯阿附初以救李日暄谪戍至是复召正宸痛举朝无复讐心上疏曰两月以来大吏秉枢矣不闻献俘武臣私门矣不闻公战老成引遁矣不闻劝驾诸生卷堂矣不闻请纓如此而曰兴朝气象臣虽愚知其未也臣以进取为第一义进取不銳则守御必不坚比者河北山左忠义响应各结营寨多杀伪官为朝廷効死力不及今电掣星驰倡义进讨是剿天下之气而坐失事机也宜急檄江北四镇分渡河淮聯絡诸路齐心协力互为声援使两京血脉通而後塞井陘絶孟津据武関以攻陇右陛下又何不縞素亲率六师驻蹕淮上岂必冒矢石履行阵哉声灵震动人切同仇勇愤百倍矣陛下欲赫然为中兴令主严飭大臣速简尔车徒备尔刍糗选尔将帅修尔戈矛缮尔城堑进寸则寸进尺则尺扼险处要以规中原天下大矣不患无人应运而出也时起用张捷邹之麟张孙振阮大铖辈正宸并疏諫不纳寻改大理寺丞正宸请假归後鲁主监国署旧官事败弃家为僧】质实【正宸字羽侯会稽人】

明以陈子龙为兵科给事中

【子龙上言中兴之主莫不身先士卒故能光复旧物今入国门两月矣人情泄沓无异昇平清歌漏舟之中痛饮焚屋之内臣不知所终也其始皆起于姑息一二武臣以至凡百政令莫不因循臣甚为之寒心也疏入不听明年二月子龙乞终养去兴同邑夏允彝皆负重名允彝死子龙念祖母年九十不忍割遁为僧寻受鲁王部院职衔结太湖兵欲举事事露被获乘间投水死】质实【夏允彝字彝仲南都失旁徨山泽间闻友人侯峒鲁黄淳耀徐研等皆死乃贼絶命词自投深渊以死侯峒鲁字预瞻嘉定人黄淳耀字蘊生嘉定人与弟渊耀同缢死徐汧长洲人投虎邱塘下死
本朝乾隆四十一年追諡陈子龙忠裕夏允彝侯峒曾黄淳耀渊耀徐汧俱忠节】

八月明设廠卫缉事官寻罢之

【刑科给事中袁彭年疏言高皇帝时不闻有廠文皇帝十八年始立东廠内官主之嗣後一盛于成化东廠西廠之设已不得称纯治再盛于正德谷大用等皆倚逆瑾煽虐天下骚然三盛于天啓逆璫魏忠贤几危社稷廠卫之盛衰関世道之治乱故当时无不营而得之官中外有不脛而走之贿逃纲之方即在密纲之地作奸之事明系发奸之人前鉴不远所宜深戒也疏入责以狂悖沽名谪浙江按察司照磨苏州巡抚祁彪佳亦上疏极论其弊畧曰洪武初官民有犯或收系锦衣卫高皇帝见非法凌虐焚其刑具送囚刑部是祖治原无诏狱也後乃以罗织为事虽曰朝廷爪牙实为权奸鷹狗举朝尽知其枉而法司无敢昭雪惨酷等来周平反无徐杜此诏狱之始也洪武十五年改仪銮司为锦衣卫专掌直驾侍卫等事未尝令缉事也永乐间设立东廠始开密告门飞诬及于善良招承出于私拷欲絶苞苴而苞苴弥甚欲清奸宄而奸宄愈多此缉事之弊也古者刑不上大夫逆瑾用事始去衣受杖本无可杀之罪乃

蒙必死之刑朝廷受懷諫之名天下反歸忠直之譽此廷杖之弊也大學士姜曰廣擬俞旨羣奄共撓之曰廣曰緝事不除宗社且不可知何厰衛之有乃改命五城御史體訪而罷緝事官不設】質實【袁彭年公安人】

發明【當時福邸舊奄漸皆用事大鍼之復召羣奄實贊之士英之慰留羣奄又贊之田成張執中輩隱欲把持朝政至厰衛緝事之設是顯然大肆奸邪矣明代當全盛之日瑾與忠賢濟惡岌岌乎已傾社稷況此南都殘局而復踵其故轍是不啻危卵而又累之以石也當日諸臣疏諫固不因除此一事有救于將亡之勢然非法慘刑差幸免其殘毒非有力爭者而煽虐又可勝道哉】

張獻忠陷成都明蜀王至澍及巡撫都御史龍文光巡按御史劉之勃等死之

【初成都間賊急蜀王至澍謀遷于滇劉之勃持不可內江王至沂與之力爭王將行而守門卒汹汹亂輜重有被掠者事遂寢已而新撫龍文光總兵劉佳引率兵三千從川北來謀設守諸王大姓逸去者半華陽知縣沈云祚謁蜀王陳守御策不應聞太平王至淥賢往說之曰成都危在旦夕而王府財貨山積不及今募士殺賊疆場淪喪誰為王守至淥言于王亦不聽至是賊逼成都文光等分陴拒守佳引出戰而敗賊穴城實以火藥又剝大木長數丈者合之纏以帛貯藥向城樓之勃厲衆奮擊賊却二三里皆喜以為將去也初九日黎明火發北樓陷木石飛蔽天守陴者皆散賊遂入城蜀王率妃妾自沈于井之勃文光等皆被執賊以之勃同鄉欲用之之勃大罵賊攢箭射殺之復盡驅文武將吏及軍民男婦于東門之外將戮之忽有龍尾下垂賊以為瑞遂停刑文光佳引卒不屈文光見殺于濯錦橋佳引自投于浣花溪副使張繼孟陳其赤金事劉士斗張孔教蜀府左長史鄭安民成都同知方堯相華陽知縣沈云祚等皆死之士斗被執見劉之勃與張獻忠語大呼曰此賊也公不可少屈獻忠怒命摔以上士斗返顧語如前遂闔門被殺其赤投百花潭死堯相死于萬里橋下賊幽云祚于大慈寺遣其黨饋食以刃脇降不從遇害後獻忠復欲用諸人備百官繼孟等不為屈遂并見殺】質實【濯錦橋在華陽縣南浣花溪在成都西郭外又名花潭萬里橋在成都府南吳般錄諸葛孔明送費禕使吳曰萬里之行始此故名蜀王蜀獻王椿九世孫龍文光雒容人本朝乾隆四十一年追諡忠節劉之勃寶雞人沈云祚字子凌太倉人本朝乾隆四十一年俱追諡忠烈張繼孟字伯功扶風人陳其赤字石文崇仁人鄭安民浙江人方堯相字紹虞黃岡人本朝乾隆四十一年俱追諡節愍劉士斗字瞻甫南海人張孔教字魯生會稽人本朝乾隆四十一年俱追諡烈愍】

明南京修興寧宮慈禧殿

【先是洛陽之陷福王母妃與王相失居于河南人郭守義家王既立始遣總兵王之綱奉迎及是至南京命于三日搜括萬金以充賞賜又諭工部以行宮湫隘亟修興寧宮慈禧殿尅期告成以居母妃尋又封母妃弟鄒存義為大興伯時土木并興賜予無節御用監內官請給工料銀置龍鳳几捐諸器物及宮殿陳設金玉諸寶計費數十萬工部侍郎高倬奏請裁省光祿寺辦御用器至萬五千七百有奇倬又以為言皆不納】質實【高倬字枝樓忠州人】

明以前大学士王应熊为兵部尚书督师专讨蜀寇起前宁夏巡抚樊一蘅为兵部侍郎总督川陕军务【时张献忠已据全蜀惟遵义保境自守应熊与一蘅避其地命应熊督师一蘅总督军务讨之又遣御史米壽图巡按四川命吏部简堪任监司守令者从壽图西行应熊等乃縋索誓师开幕府传檄诸郡旧将会师大举令巡抚马乾复重庆副将朱化龙等复龙安茂州一蘅乃起旧将甘良臣为总统合参将杨展等所携溃卒得三万人寻复叙州而副将曾英连败贼军声大震亦受一蘅节制其他据城奉征调者洪雅则曹勋范文光松茂则詹天顏夔万则谭宏谭诣一蘅遂移驻纳溪与应熊会泸州檄诸路尅期并进献忠颇惧事皆在明年至本朝顺治三年我】

【大清兵入蜀诛献忠余贼南奔至重庆曾英战歿应熊避之毕节卫寻卒会大兵北旋一蘅复驻江上为收复计时蜀中大乱诸将各据地自擅一蘅令不行顺治八年大清兵南征一蘅遁山中遘疾卒蜀中将士俱尽而壽图出奔沅州至顺治十一年城破亦死】质实【樊一蘅字君带宜宾人米壽图宛平人马乾昆明人曾英福建人范文光内江人曹勋黎州参军詹天顏龙岩人本朝乾隆四十一年俱追諡忠节】

明以越其杰为右佥都御史巡抚河南

【时河南诸将各结寨自固其最大者开封汝宁间则刘洪起南阳则萧应训洛阳则李际遇诸帅中独洪起勇而好义数杀贼有功常与巡按御史陈潜夫大破贼将陈德于柳园潜夫因请予挂印为将军马士英不听前佥事越其杰本坐赃遣戍赦居南京以士英姻娅特起为河南巡抚老惫不知兵潜夫所建白皆不用诸镇兵无至者会其杰以事谮潜夫于士英竟调潜夫还而以凌駟代之】质实【以事谮潜夫时萧应训复南阳及泌阳舞阳桐柏遣子三杰献捷潜夫授告身饮之酒鼓吹前导出三杰喜过望往谒其杰其杰觐其贿故为尊严厉词诘责诋为贼三杰泣而出萌异心潜夫过诸寨皆饶吹迎送其杰间过之诸寨皆闭门不出其杰恚故谮潜夫陈潜夫钱塘人後事鲁王募兵江上绍兴破偕妻孟氏妾孟氏投水死本朝乾隆四十一年追諡忠节凌駟歙县人】

明选淑女

【时以母妃命选淑女羣奄借端肆扰隐匿者至邻里连坐兵科给事中陈子龙言中使出搜巷凡有女之家黄纸贴额持之而去闻井骚然明旨未经有司中使私自搜采甚非法纪御史朱国昌亦以为言乃命禁讹传诳惑者寻复使中使李国辅等分诣苏杭采访民间嫁娶一空】质实【朱国昌临安卫人】

明赐北京死节诸臣赠諡

【北京文武臣殉难者并予赠諡世廕立庙于鸡鸣山赠额曰旌忠其列于正祀者文武二十四人武臣七人内臣一人妇人九人附祀者文臣七人武臣十五人内臣六人命有司春秋致祭然顧鉉彭瑄輩特为贼拷死皆濫与其列而郎中周之茂等并以不屈死顧未邀赠恤他

如御史冯垣登员外郎郑逢兰行人谢于宣皆拷掠死郎中李逢申知县邹逢吉等亦皆拷掠或逼令缢死与鉉琯辈并获赠諡时南北阻絕多未能核实也又予前大学士孙承宗太常少卿鹿善继祠祀又湖广殉难巡按御史刘熙祚参政许文岐推官蔡道宪并予赠諡礼部尚书顾锡畴又言温体仁得君行政最专且久其负先帝罪大且深乞削其文忠之諡而补文震孟罗喻义姚希孟吕维祺诸臣諡庶天下有所劝惩王亦从之】质实【正祀文臣二十四人范景文赠太傅諡文贞倪元璐赠少保吏部尚书諡文正李邦华赠太保吏部尚书諡忠文王家彦赠太子太保兵部尚书諡忠端孟兆祥赠刑部尚书諡忠贞施邦曜赠太子少保左都御史諡忠介凌义渠赠刑部尚书諡忠清吴麟徵赠兵部右侍郎諡忠节周凤翔赠礼部右侍郎諡文节马世奇赠礼部右侍郎諡文忠刘理顺赠詹事諡文正汪伟赠少詹事諡文烈申佳胤赠太仆寺少卿諡节愍吴甘来赠太常寺卿諡忠节王章赠大理寺卿諡忠烈陈纯德赠太仆寺卿諡恭节陈良谟赠太仆寺卿諡恭愍成德赠光禄寺卿諡忠毅许直赠太仆寺卿諡忠节金鉉赠太仆寺少卿諡忠节及大同巡抚卫景瑗諡忠毅宣府巡抚朱之冯諡忠庄布衣汤文琼赠中书舍人诸生许琰赠五经博士按范景文事异前许琰字五仲吴县人闻京师破趋古庙自缢为人所解及哀诏至竟不食死武臣七人新乐侯刘文炳諡忠庄惠安伯张庆臻諡忠武襄城伯李国祯諡贞武驸马都尉巩永固諡贞愍左都督刘文耀諡忠果山西总兵官周遇吉諡忠武辽东总兵官吴襄諡忠庄内臣一人王承恩事具前諡忠愍妇人九人成德母张氏金鉉母章氏汪伟妻耿氏刘理顺妻万氏妾李氏马世奇妾朱氏李氏陈良谟妾时氏吴襄妻祖氏各建坊旌表附祀文臣七人进士孟章明郎中徐有声给事中顾鉉彭琯御史俞志虞总督徐标副使朱廷焕按孟章明徐有声俞志虞徐标朱廷焕事具前顾鉉成都人彭琯永昌人武臣十五人成国公朱纯臣镇远侯顾肇迹定远侯邓文明武定侯郭培民阳武侯薛濂永康侯徐锡登西宁侯宋裕德怀宁侯孙维藩彰武伯杨崇猷宣城伯卫时春清平伯吴遵周新建伯王先通安乡伯张光灿右都督方履泰锦衣卫千户李国祿按朱纯臣顾肇迹邓文明薛濂杨崇猷卫时春吴遵周方履奏事具前郭培民营国公英九世孙徐锡登蔡国公忠十世孙宋裕德晟十世孙孙帷藩鎰八世孙王先通守仁曾孙张光灿兴六世孙内臣六人李凤翔王之心高时明褚宪章方正化张国元按方正化事具前李凤翔司礼秉笔太监高时明故司礼掌印太监褚宪章张国元皆提督诸监局太监并殉难而王之心家最富降贼拷掠死凡附祠者赠官赐諡各有差冯垣登新昌人谢于宣鄞县人諡忠节郑逢兰李逢申俱赠太仆少卿邹逢吉湖口人赠太仆寺丞孙承宗高阳人諡文忠刘熙祚武进人諡忠毅许文岐字我西仁和人蕪州陷被执贼系之後营文岐陰与同系举人奚鼎铉等数十人相结图贼谋泄被害蔡道宪为长沙推官城陷被执贼以官嚼齿大骂贼磔之健卒林国俊等九人殉焉文震孟諡文肃罗喻义諡文介姚希孟諡文毅吕维祺諡忠节】

发明【明福王于北都殉难诸臣槩予赠諡其意未尝不欲表扬忠烈以激励人心顾当扰乱荒迷之际考核无凭一时为贼拷死者皆得濫厠恤典而实能临危授命者转有未及即其予应諡之人品隲亦多不允协名实未符詎足传信我朝定鼎之初范景文诸人既加美諡近复奉】

【命于胜国殉节诸臣详为蒐辑核实旌扬义烈无不阐之幽奸污消溢膺之典夫而後尊名壹惠卓卓不刊书之史册炳焉与日月争光其福王所諡掎摭既畧褒贬未公时附錄于此

以纪其事而于各质实下皆削而不载用以昭千秋论定之公祛一时虚诬之议云尔】

明封郑芝龙为南安伯

【寻命为总兵官镇守福建复令其弟鸿逵帅舟师驻镇江防守】质实【郑芝龙泉州南安人初为海盗降明为游击後陞参将署总兵弟鸿逵为副总兵时以海利交通朝贵寢得大顯至是封南安伯我】

【大清兵南下芝龙降】

明以阮大铖为兵部侍郎巡阅江防

【大铖之召大学士高宏图以去就争马士英意稍折迟四月余至是复用安远侯柳祚昌荐起大铖兵部添注右侍郎仍禁廷臣不得把持阻谏左都御史刘宗周疏言大铖昔争吏垣不得致魏大中死诏狱杀大中者魏璫大铖其主使也即才果足用臣虑党邪害正之才终病世道且祖宗故事九列必用廷推乃者中旨频降司农之後继之少宰未几而大铖司马又继之其为墨敕斜封之渐有不待问者大铖进退实系江左兴亡乞寢成命给事中熊汝霖亦言大铖以知兵擢当置有用之地若止优游司马则枢府已优为之何必增置命切责宗周而格汝霖疏不听寻命大铖兼右佥都御史巡阅江防】质实【司农之後继之少宰谓张有誉少宰谓张捷也柳祚昌升八世孙】

明免府州县试

【马士英奏童生捐免府州县考上户纳银六两中户四两下户三两竞赴院试从之】

九月明黄得功趋扬州高杰以兵袭仪真不克

【初史可法置得功仪真与杰陰相牵制及是登莱总兵黄蜚将之任蜚与得功同姓称兄弟移书请兵备非常得功率骑三百由扬州往高邮迎之杰素忌得功又疑图已乃伏精卒道中邀击之得功行至土桥方作食伏起出不意上马举铁鞭飞矢两集马踣腾他骑驰有骁骑舞槊直前得功大呼反门挟其槊而扶之人马皆麋复杀数十人跳入颓垣中哮声如雷追者不敢进遂疾驰至其军得免方门时杰潜师捣仪真得功兵颇伤而所俱行三百骑皆歿遂诉于南京愿与杰决死战命太监卢九德及可法遣监军万元吉和解之不可会得功有母丧可法往吊语之曰土桥之役无智愚皆知杰不义今将军以国故盛怒而归曲于高是将军收大名于天下也得功色稍和终以所杀亡多为恨可法令杰偿其马复出千金为母贖得功不得已听之】

明大学士姜曰广罢

【曰广兴高宏图协心辅政而马士英挟拥戴功内结勲臣朱国弼刘孔昭赵之龙外连诸鎮刘泽清刘良佐等谋擅朝权深忌二人及阻阮大铖进用益为所疾曰广遂抗疏乞休大畧言先帝善政虽多而频出口宣职为乱阶所得阁臣则贪淫巧猾之周延儒等所得部臣则陰邪贪狡之王永尤等所得勲臣则力阻南迁尽撤守御狂釋之李国祯等所得大将则紈袴支离之倪宠王朴等所得言官则贪横无赖之史葬陈啓新等後效亦可觀矣今又创一秘方但求面对立谈取官同登场之戏剧下殿得意同羸胜之贩夫决廉耻之大防长便佞之恶习此岂可为训哉臣待罪纶扉半壁东南有同螻蛄愧死无地终夜抚膺愿乞骸归鄉里疏入慰留士英大铖滋不悦国弼孔昭遂以诽谤先帝诬蔑忠臣李国祯为言交章攻之曰广又兴士英面诋曰广言上以亲以序自应立汝何功士英厉声曰臣无功汝輩欲立潞藩故成臣功耳争辨久之宗室朱统?素无行士英?以官使讐曰广疏不由通政司为礼科所驳通政司刘士桢亦劾其违制俱不问刘泽清复假诸鎮疏攻曰广以三案旧事及迎立异议为词请执下法司正谋危君父之罪顷之铨?复劾曰广五大罪一引用东林死党把持朝政二交聯江湖大侠曰窥南都声息非谋劫迁则谋别戴三庇从贼诸臣四纳贿五奸媳曰广既连被诬蔑屡疏乞休至是始得请曰广入辞诸大臣咸在列曰广言微臣触忤权奸自分万死上恩寬大犹许归田但臣归後当还以国事为重士英勃然曰吾权奸汝且老而贼也因叩头言臣从满朝异议中拥戴陛下愿以犬马余生归老贵阳如陛下留臣臣亦但多一死曰广叱之曰拥戴是人臣居功地耶士英曰汝谋立潞王功安在争论久之王亦不能断但諭以叔父贤明当立二先生无伤国体也既出复于朝堂相詬詈而罢曰广遂还江西其後故将金声桓者初在史可法麾下後隶左良玉良玉死声桓降于我】

【大清为南昌副总兵既而复叛附桂王由榔迎曰广以资号召声桓败曰广投僊家池死】质实【僊家池在新建县西北僊家楼下朱国弼保国公永五世孙刘士桢万安人】

明左都御史刘宗周罢

【宗周初闻召命自称草莽孤臣即痛陈时政而马士英高杰刘泽清等深恨之滋欲杀宗周宗周请告不许遂抗疏劾士英大畧言陛下龙飞淮甸天实予之乃以扈蹕微劳晏然入内阁进中枢者非士英乎于是李沾刘孔昭等譁然聚讼而羣陰且翩翩起矣高杰一逃将而奉若骄子刘黄诸将各有旧汛地而置若奕棊京营自祖宗以来皆勲臣为之陛下立国伊始即有内臣卢九德之命士英不得辞其责惟陛下首辨陰阳消长之机出土英仍督凤阳聯絡诸鎮史可法即不还中枢亦当自淮而北历河以南别立幕府与士英相犄角京营提督独断寝之书之史册为第一美政优旨荅之而促其速入士英大怒即日具疏辞位且扬言曰刘公自称草莽孤臣不书新命明示不臣天子也其私人朱统?遂劾宗周疏请移蹕凤阳高墙所在欲以罪宗处皇上而兴史可法拥立潞王其兵已伏丹阳当急备而泽清杰日夜谋所以杀宗周不得乃遣客十輩往刺之宗周时在丹阳终日危坐未尝有惰容客前後至者皆不忍加害而去会京口军乱士英以统?言为信亦震恐于是泽清疏劾宗周陰挠恢复欲诛臣等激变士心刘良佐亦言宗周力持三案为门户主盟倡义亲征图晁错之自为居守疏未下泽清复草一疏畧杰良佐及黄得功名上之言宗周劝上亲征谋危君父陰结死党迫劫乘輿如宗周入都臣等即渡江赴阙正春秋讨贼之义疏入举国大骇传諭和衷集事初泽清疏出遣人録示杰

杰曰我?武人乃预朝事耶得功则疏辨臣不与闻士英寝不奏可法不平遣使徧诘诸镇咸曰不知遂据以入告泽清辈由是气阻时宗周不得已以七月十八日至南京会阮大铖方进用宗周复诣告王许其乘传归里将行复疏陈五事一日修圣政毋以近娱忽远猷国家不幸遭此大变今纷纷制作似不复有中原志者土木崇矣珍奇集矣俳优杂剧陈矣内竖充庭金吾满座戚畹骈闐矣谗夫昌言路扼官常乱矣所谓狃近娱而忽远猷也一日振王纲无以主恩伤臣纪自陛下即位中外臣工不曰从龙则曰佐命一推恩近侍则左右因而秉权再推恩大臣则阁部可以兼柄三推恩勲旧则陈乞至今未已四推恩武弁则疆场视同儿戏表里呼应动有藐视朝廷之心彼此雄长即为犯上无等之习礼乐征伐渐不出自天子所谓褻主恩而伤臣纪也一日明国是无以邪锋危正气朋党之说小人以加君子酿国家空虚之祸先帝未造可监也今更为一二元恶称冤至诸君子後先死于党死于殉国者若有余戮揆厥所由止以一人进用动引三朝故事排抑旧人私交重君父轻身自树党而坐他人以党所谓长邪锋而危正气也一日端治术无以刑名先教化先帝颇尚刑名而杀机先动于温体仁杀运日开怨毒满天下近如贪吏之诛不经提问遽科罪名未科罪名先追赃罚又职方戎政之奸弊道路嘖有烦言虽卫臣有不敢问者则厰卫之设何为徒令人主亏至德伤治体所谓急刑名而忘教化也一日固邦本无以外衅酿内忧前者淮扬告变未几而高黄二镇治兵相攻四镇额兵各三万不以杀贼而自相屠毒又日烦朝廷讲和何为者夫以十二万不杀敌之兵索十二万不杀敌之饷必穷之术耳不稍裁抑惟加派横征蓄一二苍鹰乳虎之有司以天下狗之已矣所谓积外衅而酿内忧也疏入亦但优旨报闻而已】

明史可法遣诸将分守要地高杰移驻徐州

【初可法出巡淮安阅刘泽清士马返扬州请饷为进取资马士英靳不发可法疏趣之因言今日事势更非昔比必专主讨贼复讐舍筹兵筹饷无议论舍治兵治饷无人才优旨褒荅而不能行至是可法议分布诸将奏请以总兵李成栋镇徐州贺大成镇扬州王之纲镇河南李本身胡茂桢隶高杰麾下为前锋而令刘肇基驻高家集李楼凤驻睢宁以防河用张天禄为阁标前锋驻瓜州高杰故跋扈可法日以君臣大义晓示杰感其忠奉约束可法因与谋恢复议调黄得功刘泽清二镇赴邳宿防河杰自提兵直趋开归且瞰宛洛荆襄以为根本杰遂具疏上之曰得功与臣介介前事臣知报君雪耻而已安能与同列较短长哉然得功终不欲为杰後劲而泽清尤狡横难任可法不得已乃移得功庐州以防桐皖调刘良佐赴邳徐进复黄汝与杰相声援杰遂帅兵移镇徐州以左中允卫允文兼兵科给事中监其军徐州土贼程继孔崇祯末被擒至京乘乱逃归杰至徐州擒斩之】质实【卫允文字祥祉韩城人】

明逮前浙江巡按御史左光先下狱

【阮大铖既得志专务报复既排去刘宗周等于是尽召逆案杨维垣虞廷陛吴孔嘉等十余人及所善蔡奕琛唐世济张孙振袁宏勲等布列要路浙江巡按御史左光先者光斗之弟故与大铖世讐又尝首劾士英大铖益恨刺骨光先在浙尝平许都乱按士英荐大铖时光先争不可大铖得志逮光先乱亟道阻光先间行走徽岭缙骑索不得乃止】质实【虞廷陛嘉兴人吴孔嘉歙县人唐世济乌程人袁宏勲慈谿人】

明吏部尚书徐石麒罢

【石麒初入朝上疏陈七事褒纳之时当考选石麒与都御史刘宗周矢公甄别拟庄元辰等十三人为科道马士英庇其私人更易殆半御史黄耳鼎给事中陆朗有物议石麒以年例出之朗贿奄人内传留用耳鼎寻亦复官石麒发其罪朗恚疏诋石麒耳鼎亦两疏劾石麒并言其枉杀陈新甲石麒疏辨求去益力士英拟严旨令驰驿归石麒刚方清介值权奸用事郁郁不得志士英挟定策功将图封石麒议格之中贵田成辈请嘱石麒拒不应由是中外皆怨构之去明年南京破】

【大军至浙江石麒方在城外曰吾大臣也城亡与亡复入居城中朝服自缢死】质实【徐石麒本朝乾隆四十一年追諡忠懿庄元辰鄞县人黄耳鼎薪水人陆朗上元人】

冬十月明以前兵部尚书张缙彦总督北直山西河南军务

【时马士英掌中枢絕不銳厉恢复日以锄正人引凶党为务初举朝以逆案攻阮大铖大铖憾甚及见北都从逆诸臣颇多附会清流者因倡言曰彼攻逆案吾作顺案相对以李自成伪号曰顺也士英因疏纠光时亨陈名夏周鍾项煜等以诸人皆附东林故重劾之其他大僚降贼者反不之及贿入辄复其官缙彦以本兵首先开门从贼自成败走缙彦窜归河南至是自言集义勇擒伪官收复列城士英主之即授原官总督军务许便宜行事给事中李维祺言缙彦闇?失机寸斩莫赎逆贼入宫青衣候点贼败窜归安能复收河北总督何官顾畀贼臣士英等竟勿恤时北都降贼诸臣多以贼败南还史可法言北都之变臣子皆当有罪若在北者始应从死岂在南者独非人臣即臣可法谬典南枢臣士英叨任凤督未能疾趋北援镇臣泽清杰以兵力不支折而南走是首应重论者臣等罪也乃鉞钺未加且恩荣叠被独于在北诸臣毛举而繫绳之岂散秩闲曹转重于南枢凤督哉宜摘其罪状顕着者重惩示儆若伪命未污当置不问其逃避後至者许戴罪讨贼赴臣军前酌用时亦不能尽从也】质实【光时亨桐城人陈名夏溧阳人周鍾鑣从弟】

明大学士高宏图罢

【初阮大铖入见以宏图不附东林引为证宏图颇力言逆案不可翻大铖及马士英并怒一日阁中言及故庶吉士张溥士英曰吾故人也死酹而哭之姜曰广笑曰公哭东林亦东林耶士英曰我非畔东林东林拒我耳宏图因怱怱之士英意解会刘宗周劾疏上大铖宣言曰广实使之于是士英怒不可止力荐张捷谢陞朝端益水火矣宏图因乞休召还还史可法皆不许至是凡四疏乞休乃许之宏图既致仕无家可归流寓会稽及南都破逃野寺中絕粒而死】质实【高宏图 本朝乾隆四十一年追諡忠直】

明凤阳地震

【凤阳祖陵一日三震】

明遣太监孙元德督赋浙江

【先是命太监王肇基督催浙闽金花银以给事中罗万象执奏而止至是复遣司礼太监孙元德往浙督催内库及户工二部钱粮寻以高起潜请饷又于浙闽增派二十万令元德催解军前时户科给事中吴适疏言国耻未雪陵寝成墟豫东之收复无期楚蜀之残弥甚旧都草创一事未举万孔千疮忧危丛集伏惟陛下始终兢惕兼仿祖制早午晚三朝勤御经筵而咨朝政亲近儒臣朝期勿更传免而躬崇俭约省工作以宽民力慎爵赏以重名器无艺之征一槩报罢被灾之地酌量蠲赈根本之计莫急于此疏入不省】质实【吴适长洲人王肇基即王坤崇祯时镇守宣府发马士英檄取公帑罪状者也】

明以张捷为吏部尚书杨维垣为通政使

【马士英独握国柄一听阮大铖计朝政错乱贿赂公行时徐石麒既去士英欲用张国维掌吏部而大铖结内奄取中旨特授张捷士英眈眈良久杨维垣力谋起官礼部尚书钱谦益因上疏荐维垣及蔡奕琛且颂士英功而尽雪逆案贾继春等维垣遂得授通政使未几进左副都御史而奕琛亦授吏部侍郎】

我

大清兵西讨李自成成分兵下江南

【先是我睿亲王多尔袞令南来副将韩拱薇参将陈万春等齎书致史可法书曰予向在浚阳即知燕京物望咸推司马後入関破贼得与都人士相结识介弟于清班曾托其手泐平安拳致衷绪未审以何时得达比闻道路纷纷多谓金陵有自立者夫君父之讐不共戴天春秋之义有贼不讨则故君不得书葬新君不得书即位所以防乱臣贼子法至严也闯贼李自成称兵犯阙手毒君亲中国臣民不闻加遗一矢平西王吴三桂介在东陲独效包胥之哭朝廷感其忠义念累世之宿好弃近日之小嫌爰整貔貅驱除狗鼠入京之日首崇怀宗帝后諡号卜葬山陵悉如典礼亲郡王将军以下一仍故封不加改削勲戚文武诸臣咸在朝列恩礼有加耕市不惊秋毫无忧方拟秋高气爽遣将西征传檄江南聯兵河朔陈师鞠旅戮力同心报乃君国之讐彰我朝廷之德岂意南州诸君子苟安旦夕弗审事机聊慕虚名顿忘实害予甚惑之国家之抚定燕都乃得之于闯贼非取之于明朝也贼毁明朝之庙主辱及先人我国家不憚征缮之劳悉索敝赋代为雪耻孝子仁人当如何感恩图报兹乃乘逆寇稽诛王师暂息遂欲雄据江南坐享渔人之利揆诸情理岂可谓平将以为天堑不能飞渡投鞭不足断流耶夫闯贼但为明朝崇耳未尝得罪于我】

【国家也徒以薄海同讐特申大义今若拥号称尊便是天有二日俨为勍敌予将简西行之銳转旆东征且拟释彼重诛命为前导夫以中华全力受制潢池而欲以江左一隅兼支大国胜负之数无待蓍龟矣予闻君子之爱人也以德细人则以姑息诸君子果识时知命笃念故主厚爱贤王宜劝令削号归藩永绥福祿朝廷当待以虞宾统承礼物带砺山河位在诸王

侯上庶不负朝廷伸义讨贼兴灭继絶之初心至南州羣彦翩然来仪则尔公尔侯列爵分土有平西之典例在惟执事实图利之挽近士大夫好高树名义而不顾国家之急每有大事辄同筑舍昔宋人议论未定兵已渡河可为殷鉴先生领袖名流主持至计必能深维终始宁忍随俗浮沉取舍从违应早审定兵行在即可西可东南国安危在此一举愿诸君子同以讨贼为心毋贪一身瞬息之荣而重故国无穷之祸为乱臣贼子所笑予实有厚望焉记有之惟善人能受尽言敬布腹心伫闻明教江天在望延跂为劳书不尽意可法旋遣人荅书书曰南中向接好音法随遣使问讯吴大将军未敢遽通左右非委隆诣于草莽也诚以大夫无私交春秋之义今倥偬之际忽捧琬琰之章真不啻从天而降也循读再三殷殷致意若以逆贼尚稽天讨烦】

【贵国忧法且感且愧惧左右不察谓南中臣民偷安江左竟忘君父之怨敬为贵国一详陈之我大行皇帝敬天法祖勤政爱臣真尧舜之主也以庸臣误国致有三月十九日之事法待罪南枢救援无及师次淮上凶问遂来地坼天崩山枯海泣嗟乎人孰无君虽肆法于市朝以为泄泄者之戒亦奚足谢先皇帝于地下哉尔时南中臣民哀恸如丧考妣无不抚膺切齿欲悉东南之甲立剪凶讐而二三老臣谓国破君亡宗社为重相与迎立今上以系中外之心今上非他神宗之孙光宗犹子而大行皇帝之兄也名正言顺天与人归五月朔日驾临南都万姓夹道欢呼声闻数里羣臣劝进今上悲不自胜让再让三仅允监国迨臣民伏阙屡请始以十五日正位南都从前凤集河清瑞应非一即告庙之日紫云如盖祝文升霄万目共瞻欣传盛事大江涌出桡梓数十万章助修宫殿岂非天意也哉越数日遂命法视师江北刻日西征忽传我大将军吴三桂借兵】

【贵国破走逆成为我先皇帝后发丧成礼扫清宫阙抚辑羣黎且罢薙髮之令示不忘本朝此等举动振古铄今凡为大明臣子无不长跽北向顶礼加额岂但如明谕所云感恩图报已乎谨于八月薄治筐篚遣使犒师兼欲请命鸿裁连兵西讨是以王师既发复次江淮乃辱明诲引春秋大义来相诘责善哉乎推言之然此文为列国君薨世子应立有贼未讨不忍死其君者立说耳若夫天下共主身殉社稷青宫皇子惨变非常而犹拘牵不即位之文坐昧大一统之义中原鼎沸仓猝出师将何以维系人心号召忠义紫阳纲目踵事春秋其间特书如莽移汉鼎先武中兴丕废山阳昭烈践祚怀愍亡国晋元嗣基徽钦蒙尘宋高缙统是皆于国讐未剪之日亟正位号纲目未尝斥为自立卒以正统与之甚至如元宗幸蜀太子即位灵武议者疵之亦未尝不许以行权幸其光复旧物也本朝传世十六正统相承自治冠带之族继絶存亡仁恩遐被贵国昔在先朝夙膺封号载在盟府宁不闻乎今痛心本朝之难驱除乱逆可谓大义复着于春秋矣昔契丹和宋止岁输以金缯回纥助唐原不利其土地况】

【贵国笃念世好兵以义动万代瞻仰在此一举若乃乘我蒙难弃好崇讐规此幅 为德不卒是以义始而以利终为贼人所窃笑也贵国岂其然往先帝軫念潢池不忍尽戮剿抚互用貽误至今今上天纵英明刻刻以复讐为念庙堂之上和衷体国介冑之士饮泣枕戈忠义民兵愿为国死窃以为天亡逆闯当不越于斯时矣语曰树德务滋除恶务尽今逆成未服天诛谍知卷土西秦方图报复此不独本朝不共戴天之恨抑亦贵国除恶未尽之忧伏乞坚同讐之谊全始终之德合师进讨问罪秦中共梟逆贼之头以泄敷天之愤则贵国义问炤耀千

秋本朝图报惟力是视从此两国世通盟好传之无穷不亦休乎至于牛耳之盟则本朝使臣久已在道不日抵燕奉盘盂从事矣法北望陵庙无涕可挥身蹈大戮罪应万死所以不即从先帝者实为社稷之故传曰竭股肱之力继之以忠贞法处今日鞠躬致命克尽臣节所以报也惟殿下实昭鉴之至是山西山东郡县已次第抚定我】

【大清乃命英亲王阿济格为靖远大将军帅师西讨李自成豫亲王多铎为定国大将军帅师下江南我】

【世祖章皇帝特赐勅王朕以福王及南方文武诸臣当明国崇祯帝遭流寇之难陵阙炖宗社覆不遣一兵不发一矢如鼠藏穴其罪一也及我兵进剿流贼西奔南方诸臣不行请命擅立福王其罪二也不思灭贼复讐而诸将各自拥兵扰害良民自生反侧以起兵端其罪三也惟此三罪天人共愤因命王充定国大】

【将军统师声罪讨江南王今承命一切机宜当与诸将同心协谋而行毋谓自智不听人言毋恃兵强轻视敌众仍严侦探勿致疎虞如有抗拒不服者戮之倾心归顺者附之严禁兵将凡系归顺地方不许肆行抢掠务使人知朕以仁义定天下之意其行间将领功罪察实纪明彙奏如系小过即当处分至于护军以下无论大小罪过俱兴诸将商酌径行处分王受兹重任当益殚忠猷用张挞伐立奏荡平】

明定诸镇兵额

【江北都抚四镇额兵三万楚抚额兵一万京营额兵一万五千时九江总督袁继咸为马士英等所恶因汰其军饷六万军中有怨言继咸争之不听又以江上兵寡议造战舰檄九江僉事叶士彦于江流截买材木士彦家芜湖与诸商昵封还其檄继咸以令不行疏劾士彦同年御史黄耳鼎亦劾继咸言继咸有心腹将校劝左良玉立他宗而良玉不从良玉闻之疑惧因疏明与继咸无隙耳鼎受指使而言由是南京籍籍益谓继咸与良玉倡和胁制朝廷矣】质实【叶士彦巢县人】

十一月明凤阳陵灾

【先是庙门告灾至是陵灾松柏皆烬】

张献忠僭号于成都

【时王应熊督川湖军事兵力弱不能讨贼献忠既陷全蜀遂僭号大西国王伪称大顺元年修蜀王府居之名成都曰西京设丞相尚书五军都督府等官用汪兆麟严锡命为左右丞相王国麟汪鼎镇龚完敬为尚书养子孙可望艾能奇刘文秀李定国等皆为将军赐姓张氏鼎镇完敬寻以小过封剔死胁川中士大夫受伪职前布政使尹伸给事中吴宇英皆不屈死遣诸伪将分屠各府州县名草杀诡开科取士集于青羊宫尽杀之笔墨成邱塚坑成都民于

中国杀各卫集军九十八万伪官朝会呼契数十下殿契齾看引出斩之名天杀又创生剥人法皮未去而先絶者刑者抵死将卒以杀人多少叙功共杀男女六万万有奇贼将有不忍至缢死者伪都督张君用王明等数十人皆坐杀人少剥皮死并屠其家又用法移锦江涸而辟之深数大埋金宝亿万计然後决堤放流名水藏曰无为後人有也当是时诸郡义兵并起献忠愤怒诛杀益毒川中人迹殆絶列城内至杂树成拱云後二年献忠尽焚成都宫室铲其城率衆出川北又欲尽杀川兵伪将刘进忠率川兵一军尽逃会我】

【大清肃亲王豪格统军追剿献忠兵至汉中进忠降乞为乡导至塩亭界大雾献忠晓行猝遇大兵中矢坠马匍伏积薪下擒出斩之】质实【塩亭魏县今属四川潼川府尹伸宣州人吴宇英广元人

本朝乾隆四十一年俱追諡忠节】

明史可法帅师进次清江浦

【可法闻李自成败还陕西决策北行高杰既赴徐州可法遂帅师进次清江浦遣官屯田开封为经略中原计时诸将各分汛地择使利者自王家营而北至宿迁最冲要诸镇不敢任可法自任之令幕下文武筑垒缘河南岸可法以自成未灭上疏请颁讨贼诏书大畧言偏安者恢复之退步未有志在偏安而遽能自立者也大变之初黔黎洒泣绅士悲哀犹有朝气今则兵骄饷绌文恬武嬉顿成暮气矣河上之防百未经理人心不肃威令不行复讐之师不闻及関陕讨贼之诏不闻达燕齐君父之讐置之膜外忆臣等迎驾时陛下言及先帝则泣下沾襟恭谒孝陵则泪满袖皇天后土实式鉴临曾几何时顿忘斯志先皇帝死于贼恭皇帝亦死于贼此千古未有之痛国家变出非常在北诸臣死节者无多在南诸臣讨贼者复少此千古未有之耻夫庶民之家父兄被杀尚思穴胸断脰得而甘心况在朝廷顾可漠置臣恐恢复无期即偏安亦未可保也今宜速发讨贼之诏责臣与诸镇悉简精锐直指秦関庶海内忠臣义士闻而感愤且陛下嗣登大宝原与先朝不同诸臣但有罪当诛曾无功足录臣于登极诏稿特将加恩一欸删除不意後來仍复开载致貽笑天下今恩外加恩纷纷未已武臣腰玉名器滥觞自後尤宜慎重专待有功庶猛将武夫有所激励至行兵讨贼最苦无粮搜括不可行劝输亦难继请将不急之工程可已之繁费一切罢罢朝夕之燕冲左右之进献一切谢絶即事関典礼万不容已者亦槩从节省盖贼一日未灭即有深宫曲房岂能安处锦衣玉食岂能安享必刻意在雪耻报讐振举朝精神萃万方物力尽并于选将练兵一事庶人心可鼓天意可回疏奏不省时诸镇位秩已崇咸逡巡无进师意可法悔之语其客欲斩已及马士英高宏图姜曰广四人头为任事不忠之戒因上疏请责成诸镇进战可法每缮疏循环讽谏声泪俱下闻者莫不感泣士英第取优旨报之而已】质实【王家营在清河县东北黄河北岸】发明【当时偷安江左士英所恃者徒以有四镇耳乃诸镇位秩既崇逡巡江上而可法以一人枕戈泣血号召同讐即其慷慨激烈之心诸镇或冀其声援得助彼士英者当请饷不给当告警不省飞章以优旨报闻徒令将士束手夫以当日之势即中外同心戮力尚难救已倾之社而乃意外掣肘别有肺肠其罪何可擢髮数可法纵孤忠独抱而一木岂能支危厦哉】

我

大清兵入宿迁

【我大清兵取海州遂取宿迁史可法舟次鹤镇闻报遣总兵刘肇基往援复其城越数日大清兵围邳州军城北肇基援之军城南相持半月而】

【解复分兵拔赣榆丰沛等县皆降可法飞章报闻马士英大笑不止坐客杨士聪问故士英曰君以为诚有是事耶此史公妙用也岁将暮防河将吏应叙功耗费军资应稽筭此特为叙功稽筭地耳时高杰亦抵徐州与刘泽清书曰近日河南抚镇接踵告警一夕数至开封上下北岸俱是兵衆问渡甚急惟恐一越渡则天堑失恃长江迤北尽为战场时事到此令人应接不暇惟有殚心竭力直前无二于万难之中求其可济以报国恩而已泽清以闻时王铎乃请视师江北不许】质实【杨士聪济宁人】

明榷酒税

【士英请榷酒助饷下部议从之又奏开助工等例暴敛益甚民间因有扫尽江南金填塞马家口之謡】

明逮治前昌平巡抚何谦等

【御史沈宸荃初疏陈时事皆切利病已论羣臣丑正党邪请王卧薪尝胆为雪耻报讐之计至是又言经畧山东河南者王永吉张缙彦也永吉失机先帝拔为总督拥兵近甸不救国危缙彦官部曹先帝骤擢典中枢乃率先从贼即加二人极刑不为过陛下屈法用之而永吉观望逗遛缙彦狼狈南窜死何以对先帝生何以对陛下昌平巡抚何谦失陷诸陵罪亦当案都城既陷守土臣宜皆厉兵秣马以报国讐乃贼尘未扬辄先去以为民望如河道总督黄希宪山东巡抚邱祖德尚可容偃卧家园乎疏入永吉缙彦释勿问逮谦祖德等付法司治之时朝政大乱宸荃独持正要人多疾之明年以年例出为苏松兵备僉事未赴南都破宸荃举兵邑中鲁王监国擢右僉都御史已而事败宸荃弃家从王海外王次长垣连擢至大学士从王于舟山又从泛海抵厦门金門後舣舟南日山遭风没于海】质实【沈宸荃慈谿人本朝乾隆四十一年追諡忠节何谦崑山人邱祖德字念修成都人】

明桂王常瀛卒于梧州

【常瀛初封衡州张献忠陷湖南常瀛走广西遂居梧州至是以忧悸成疾卒常瀛世子先卒次子安仁王由 未几亦卒次由榔初封永明王至顺治三年八月大兵下汀州执唐王聿键于是两广总督丁魁楚广西巡抚瞿式耜等迎由榔以十月十日监国十一月自立于肇庆以肇庆府署为行宫遂号永历以瞿式耜为东阁大学士兼吏兵两部尚书吕大器亦至并命吕大器丁魁楚为大学士魁楚兼戎政大器兼中枢及我大兵克广州式耜请驻军峡口太監

王坤不从奉由榔西走梧州至顺治四年正月我大兵破肇庆攻梧州魁楚大器等俱弃去止式耜同吴炳吴贞毓等由榔乃复走桂林我大兵又薄桂林式耜急令参将焦琏拒战初由榔就执琏率众攀城破械出之负王以行王德之用为参将至是战守琏功最多式耜身立矢石中与士卒同甘苦援兵索饷式耜括库不足妻邵氏捐簪珥佐之后城几破会陈邦彦等攻广州】

【大兵引而东桂林获全由榔封式耜临林伯璉新兴伯後武冈破王由靖州走柳州继仍还桂林是年由榔以严起恒为礼部尚书兼东阁大学士时朝政坏于五虎起恒不能匡救徒植党相抵牾顺治五年南昌总兵金声桓等叛降于由榔由榔时驻肇庆永州衡州并复式耜以机会可乘请王再还桂林图出处之计不纳顺治六年大兵下湘潭总督何腾蛟守湘潭城遣将徐勇引军入勇故腾蛟部将率众罗拜劝腾蛟降腾蛟大叱勇遂拥之去不食七日乃杀之顺治七年由榔又奔梧州九月全州破开国公赵印选居桂林卫国公胡一青守榕江与宁远伯王永祚皆惧不出十月一青永祚入桂林分饷榕江无戍兵大兵益深入十一月式耜檄印选出不肯行再趣之则尽室逃一青等亦逃去永祚迎降城中无一兵式耜端坐府中家人亦散部将请式耜上马速去式耜叱退之俄总督张同敞至誓偕死是夕两人秉烛危坐黎明数骑拥去谕之降不听幽于民舍日赋诗倡和後就刑与敞同死式耜死由榔大惧自梧州奔南宁时孙可望已据滇黔受封为秦王顺治八年可望遣兵至南宁袭杀其大学士严起恒等顺治九年可望迁由榔于安隆所改曰安龙府日益穷促闻李定国与可望有隙遣使密召定国以兵来迎可望侦知之遣人至安隆杀其大学士吴贞毓等数人顺治十三年定国至乃奉由榔走云南由榔封定国晋王顺治十四年孙可望自置内阁六部等官以文安之为东阁大学士初安之念川中诸镇兵尚强欲结之勤王乃自请督师加诸镇封爵由榔许其请可望闻而恶之遣兵邀安之至是以为大学士安之不为用走川东可望举兵与定国战大败挈其妻子降于我】

【大清顺治十六年我大清遣安远大将军信郡王多尼征南将军卓布泰同吴三桂议三路分兵进取云南多尼自贵阳入三桂自遵义入卓布泰自都匀入俱会师云南省城多尼兵至盘江由榔遣将焚铁锁桥遁去我大军作浮桥以济进击大败之三桂兵至七星关有兵屯守险乃从水西问道渡关遂直趋乌撒卓布泰至盘江渡口由榔遣屯兵扼险沉船乃从下流十里取所沉船乘夜潜师乃济屯兵仓惶逃溃大败之时定国令师据双河口山顶卓布泰遣兵登山夺其形胜定国以象阵来争山大兵又大败之于是三路兵俱入云南省城定国乃与白文选拥由榔走永昌既而大兵遣前锋进剿文选先拔营遁追及复迎战随击败之我大兵克永昌由榔及定国等又走腾越于是渡潞江追之分八队冲击定国败克腾越由榔走南甸遂入缅甸以四舟迎由榔随行者六百余人缅人于赭陞置茅屋居由榔遣兵防之顺治十七年定国等与缅战索其主连败缅兵缅终不肯出由榔时平西大将军吴三桂以由榔尚在请进兵缅甸以靖根株为一劳永逸之计我】

【大清命定西将军爱星阿率师会之三桂遂传檄缅甸谕以擒献由榔顺治十八年正月三桂遣二土官至缅示师期三月师至猛卯会瘴发撤兵而缅甸莽猛白屡得三桂檄欲生致由榔乃蜜使人防守诱其从官沐天波等渡河盟尽杀之惟存由榔与其属二十五人九月三

桂及爱星阿帅师自南甸陇川猛卯进别遣兵取道姚关镇康孟定十一月会于木邦时定国与文选不睦定国先奔文选尚凭江倚险欲分兵拒我大兵自木邦昼夜行三百余里临江造筏将渡文选乃奔茶山我定西将军爱星阿别令偏师追之自领大军直趋緬十二月次旧挽坡去緬城六十里緬使人请兵百人进兰鸠江滨为扞卫遂执由榔及其亲属送军前偏师追及文选于猛养文选亦降明年四月由榔死于云南时先後同尽节者吏部尚书李若星总督揭重熙贵州布政使张燿巡按云南御史罗国瓛经畧兵部尚书李乾德大学士杨畏知兵部尚书傅作霖金都御史范文光詹天顔大学士郭之彦兵部尚书杨鼎和总兵曹大镐兵部侍郎余应桂监军御史周震巡抚张孝起马乾龙之虬耿庭籙总督洪涪鳌吏部侍郎王锡衮监军御史麦而炫户部郎中朱宝莲太仆少卿霍子衡兵部主事韩如璜指挥白常灿湘南道副使陈象明镇西将军朱旻如守备孟秦吏部主事侯伟如虎贲将军王兴沅江土知府那嵩云南参将徐日舜总兵萧旷兵科给事中刘尧珍吴霖御史张载述刑科给事中张镌兵科给事中林青阳都督郑允元大理寺丞林鍾太仆少卿赵賡禹翰林检讨蒋乾昌李元开吏科给事中徐极御史周允吉朱议?胡士端兵部郎中蔡演主事易士佳员外郎任斗据御史李如月晋宁知府冷阳春师宗知州徐道兴僉事胡恒户部郎中谭先哲巡按御史朱奉 户部主事郑廷爵永宁知州曾异撰兴宁知县吴子麒天全碉门招讨使杨之明大理卫指挥陈祜楚雄卫指挥王承宪大理卫守备陈海澜沧卫指挥李君植思恩知府董邦昌崑山知县杨永言临安通判刘之兰其余迁徙流离终于殉难者尚有总督林佳鼎临安教授谭三谟等而士民效死亦所在多有焉】质实【朝政坏于五虎本朝顺治四年明桂王拜严起恒礼部尚书兼东阁大学士时朝政决于李元允元允者惠国公成栋子也初为锦衣指挥使进封南阳伯握大权而都御史袁彭年少詹事刘湘客给事中丁时魁金堡蒙正发五人附之揽权植党人目为五虎起恒居其间不能有所救正然遇事持平与文安侯马吉翔司礼中官龐天壽共患难久无所忤而五虎积憾起恒王在梧州尚书吴贞毓等合疏攻五虎下狱将置之死起恒顾謁王舟力救贞毓等恶之乃合攻起恒起恒力求罢王留之不得竟去後手敕召还仍为首辅五虎狱不解惟彭年以反正功免议堡与时魁并谪戍湘客正发赎配追赃方狱之初起也金堡尝劾庆国公陈邦传十可斩并及马吉翔龐天壽及邦传统兵入卫修旧怨贞毓等主之遂合疏五虎误国罪下锦衣卫而堡受刑尤酷有吕尔璵者吉翔门下士入台班堡劾之曰臣何人尔璵何人昌宗之宠方新仁杰之表何在言甚不伦御史程源在王舟侧大言两语罪该万死盖为飞语以触时忌于是都督张凤鸣受密旨陈刑具用廠卫故事严鞫之拷掠惨酷瞿式耜以国势危犹起党祸七疏救不听论谪金齿後改清浪卫堡移居桂林桂林破薙髮为僧按堡初称五虎横行害政後又遁迹緇流腴顔苟活垂二十年其进退无据更不足齿于人兵孙可望封秦王可望初从张献忠为盜後归正时据滇黔乞封王起恒持不可後胡执恭矫诏封为秦王可望知其伪遣使求真封起恒又持不可可望大怒乘王播迁遣其将贺九仪张胜等帅劲卒五千迎王至南宁直上起恒舟怒目攘臂问王封是秦非秦起恒曰君远迎主上功甚伟朝廷自有隆恩若专问此事是挟封非迎主上也九仪怒格杀之遂投屍于江此顺治八年事也衡州唐江南道宋荆湖路元衡州路明为府全州汉洮阳晋全州元全宁府明为全州府後改州属桂林府今皆因之安隆所元普安路明设守御所今为贵州南笼府贵阳宋龙番元金筑明设程番府隶贵州後改名贵阳遵义宋为播州安抚司明初为宣慰司後改遵义府今皆因之双河在云南曲靖府南宁县北三十里姚关在永昌府保山县东南一百七十里明万历十一年湾甸导緇寇姚关十三年添守备驻之今省镇康明置鎮康土州在永南府南三百八十里

今因之瞿式耜字起田常熟人 本朝乾隆四十一年追諡忠宣吴炳宜兴人奔靖州时令炳从王太子走为大兵所执送衡州自尽于湘山寺吴贞毓字元馨宜兴人以谋召李定国为孙可望所杀 本朝乾隆四十一年俱追諡忠节焦璉字瑞亭宣府人南宁练兵後自刎死 本朝乾隆四十一年追諡烈愍陈邦彦顺德人复广州不克入清远及城破不降死 本朝乾隆四十一年追諡忠烈何腾蛟 本朝乾隆四十一年追諡忠诚张同敞江陵人居正孙桂林败执之就刃颜色不变而死 本朝乾隆四十一年追諡忠烈严起恒山陰人沐天波定远人英十二世孙从由榔入缅甸人刼之不屈受极刑死母陈氏妻焦氏先焚死至是妾夏氏亦缢死 本朝乾隆四十一年俱追諡忠节李若星息县人 为御史讨贵州有功桂王时召为尚书武罔破自刎死揭重熙临川人屡率兵攻抚州邵武不克为大兵袭执送建宁受戮张耀三原人孙可望攻贵州耀至定番州乘城拒守城陷不屈死并家属十三人同死罗国瓚嘉定州人孙可望攻曲靖城陷自焚死本朝乾隆四十一年俱追諡忠烈李乾德西充人经畧川湖云贵等处孙可望陷嘉定乾德驱家人及弟赴水死杨畏知宝鸡人为孙可望所执以帉击可望为所杀傅作霖武陵人监军至武冈城破不降同妾郑氏投水死郭之奇揭阳人孙可望杀严起恒集鄉勇起义不克後执至广西不屈死杨鼎和江安人以阻封议孙可望追杀之曹大镐贵池人江西破招亡卒往来广信邵武明事败不屈死余应桂都昌人以事夺职家居久之起兵败于江右遂自尽周震全州人大兵至诸将谋降不从为所杀张孝起吴江人初为广州推官举兵谋恢复不克後居龙门岛大兵破岛不食死龙之虬永新人柳州城陷不屈死妻朱氏亦死耿廷籙临安河西人孙可望陷河西赴水死洪涪鳌晋江人】

【大兵下荆湘不屈死 本朝乾隆四十一年俱追諡忠节王锡衮禄丰人沙定州之乱起义兵兵败不屈死麦而炫高明人大兵克高明执之不降死朱宝连南海人与麦而炫复高明大兵至战死霍子衡南海人广州破赴井死韩如璜博罗人起兵攻东莞遇大兵战死白常璫清远人迎陈邦彦守城战死陈象明东莞人徽饷至梧州遇大兵战死朱旻如临桂人坚守平乐城破自刎死孟泰全州人大兵至全州守将降泰仰药死侯伟如公安人从吴文炳遇大兵至不降死王兴漳州人】

【大兵平粤兴自焚死那嵩沅江人大兵至登楼自焚死徐日舜西安人为云南参将城破不屈死萧旷武昌人大兵破黎平战死刘尧珍镇雄府人吴霖歙县人张载述泾县人俱以阻封为孙可望所杀张鏐宁国人林青阳新宁人郑允元歙县人林鍾湖广人赵赓禹袁州人蒋乾昌晋江人李元开善化人徐极江西人周允吉钱塘人朱议?南昌人胡士端进贤人蔡演九江人易士佳庐陵人任斗墟鄞县人俱事桂王奉命图孙可望事泄见杀李如月东莞人劾孙可望被杀冷阳春石阡人孙可望遣李定国陷晋宁拒战死徐道兴滁州人孙可望遣李定国陷曲靖被胁死胡恒竟陵州人孙可望?邛州不屈死谭先哲平坝卫人孙可望陷安顺与妻刘氏同死朱奉 华阳人御孙可望于雅州兵败死郑延爵内江人拒孙可望于雅州陷阵死曾异撰荣昌人孙可望寇永宁城陷自焚死吴子骥贵阳人孙可望攻贵州战败死杨之明里系无考拒孙可望于飞仙關兵败死陈祜大理卫人沙贼陷城巷战死王承宪楚雄卫人沙贼之乱中流矢死陈海大理人李君植永昌人俱死于沙贼之乱董邦昌杨永言俱昆明人刘之兰平越人俱殉节于滇本朝乾隆四十一年俱追諡烈愍林佳鼎莆田人迎桂王率兵战海口不

胜死又彭耀等七十余人本朝乾隆四十一年俱追諡节愍谭三谟昆阳人殉节云南又李兆旗等四十人本朝乾隆四十一年俱入祠】

发明【明福王偏立江左使能勉支岁月犹可比宋高宗之南渡若唐王朱聿键桂王朱由榔遁迹闽滇不复成国正如宋帝昺帝昴流离瘴海残喘苟延景炎祥兴之不得书年律以春秋之例二王亦如是矣乾隆四十年特奉谕旨以二王自不等于福王故辑览未经载入但二王为明室宗支其始末虽无足道而称尊擅号首尾十有余年事迹多有可考与其听不知者私相传述又何如约举大凡俾知边隅偷息不过若是之穷蹙无成更可正传闻之讹异至如各为其主守节不屈殉难捐躯者与宋文天祥陆秀夫相仿佛则又当嘉其忠事之义】

【谕将二王本末撮叙梗槩并将死事诸臣亦为附载仰见我皇上大公至正虽胜国余分尚与核实不遗臣等谨依随文附见之例于二王事既以类詮次而当时殉

节者并得登录亦惟仰遵圣训冀以传信闾幽云尔】

十二月我

大清兵克河南府

【高杰至徐州沿河筑墙专力备御且遣人通好许定国为络聯河南计张縉彦亦奏定诸将分地王之纲自永城至宁陵许定国自宁陵至兰阳刘洪起自祥符至汜水会】

【大清兵至孟津先遣精兵渡河沿河十五寨堡俱望风归附大兵入河南府总兵李际遇迎降縉彦等并走沈邱河南抚镇飞章告急命杰率兵进屯归德为备已而大兵别由济宁南下至夏镇复自洛阳围邓州可法杰及刘泽清等各具疏告警马士英言北兵虽在河上然闯贼尚张不无後虑岂遂投鞭问渡乎况强弱何常赤壁三万淝水八千惟在诸将策励之而已卒不应】

明命马士英阅兵

【将大阅京军适有疾不出因命士英代之时工费无度荒酒渔色奄人田成等擅宠士英辈亦因之窃权固位政以贿成识者皆知其不堪旦夕阮大铖尝以乌丝阑写已作燕子笺杂剧进之时岁将暮福王一日居兴宁宫恍然不乐韩赞周请其故王曰黎园殊少佳者赞周泣曰奴以陛下或思皇考乃作此想耶】

明重颁三朝要典追恤逆案诸臣

【杨维垣追论三朝党局力诋王之案杨涟等而为刘廷元霍维华等讼冤乃命将三朝要典宣付史馆寻复令删定刊行吏部尚书张捷力称维华等忠请表章三案诸臣因尽追赐恤

典贈廕祭葬諡全者維華等六人贈廕祭葬不予諡者徐大化等三人贈祭葬者徐楊先等三人復官不賜恤者王紹徽等三人他若王德完黃克纘王永光章光岳等雖名不兩于逆案而為清論所不予者亦贈恤有差袁宏勲復請追論焚要典諸臣罪左良玉力言要典治亂所關勿聽邪言致興大獄袁繼咸疏言要典已經先帝焚毀何必復理其說未進宜寢之已進宜毀之不听】質實【徐揚先江寧人章光岳臨川人】

發明【馬士英之進三朝要典也時為用阮大鍼地耳時姜曰廣呂大器高宏图等極力疏諫不啻痛哭流涕言之而福王全不知省迨馬阮弄權遂借是為報復翻十七年之定案而復興大獄其追恤諸逆臣非恤諸臣也欲黨邪害正而逞其毒也幕巢余景尚晏然自以為安从容為盅惑傾諛之舉以快其私諸臣固不足深責顧福王拥殘局以偷安速滅亡而罔覺犹听傾倒于權奸之手抑

又何耶】

明妖僧自称齐王伏诛

【有狂僧大悲自称齐王又称潞王为赵之龙所捕下镇抚司勘讯阮大鍼与张孙振谋欲假以诛东林及素所不合者令大悲引诸臣拥潞王可一网尽也因造十八罗汉五十三参之目书史可法高宏图等名一时人望无不备列纳大悲袖中钱谦益先已上疏颂士英且为大鍼讼冤修好矣大鍼憾不释亦列焉将穷治其事狱词诡秘廷臣皆自危而士英不欲兴大狱乃第当大悲妖言立斩而止】

明进练国事兵部尚书

【初国事戍广西久之赦还福王立召为户部左侍郎寻改兵部至是加尚书仍莅侍郎事明福王由崧弘光元年是年五月我】

【大清兵下江南明福王就执于芜湖明亡】

我

大清

世祖章皇帝顺治二年

春正月明以南京宫殿成推恩诸臣有差

【加史可法太保马士英少师王铎少保子廕仍以士英掌文渊阁印充首辅办事可法力辞太保许之可法为督师行不张盖食不重味夏不簟冬不裘寝不解衣年四十余无子其妻

欲置妾太息曰王事方殷】

【敢为儿女计乎在军中絶饮除夕遣文牒至夜半倦索酒殽肉分给将士已尽乃取塩?下之思先帝泫然泪下凭几卧比明将士集辕门外门不啓左右遥语其故知府任民清曰相公此夕卧不易得也令鼓人仍击四鼓可法寤怒曰谁犯吾令左右述民清意乃免】质实【任民清字时泽济宁人】

明定北都从逆诸臣罪削刑部尚书解学龙籍

【先是命治从贼诸臣岳仿唐制六等定罪学龙定议为爱书分别上之其一等应磔者吏部员外郎宋企郊举人牛金星平阳知府张嶙然太仆少卿曹钦程御史李振声喻上猷山西提学参议黎志陞陝西布政使陆之祺给事中高翔汉潼関道金事杨王休检讨刘世芳十一人也其二等应斩秋决者刑科给事中光时亨河南提学金事巩焞庶吉士周鍾兵部主事方允昌四人也其三等应绞拟赎者翰林院修撰兼户兵二科都给事中陈名夏户科给事中杨枝起廖国遴襄阳知府王承曾天津兵备副使原毓宗庶吉士何孕光少詹事项煜七人也其四等应戍拟赎者礼部主事王孙蕙翰林院检讨梁兆阳大理寺正钱位坤总督侍郎侯恂山西副使王秉监御史陈羽白裴希度张懋爵礼部郎中刘大巩吏部员外郎郭万象给事中申芝芳金汝砺举人吴达修撰杨廷监及黄继祖十五人也五等应徒拟赎者通政司参议宋学颀谕德方拱乾工部主事缪沅给事中吕兆龙傅振铎进士吴刚恩检讨方以智傅鼎铨庶吉士张家玉及沈元龙十人也六等应杖拟赎者工部员外郎潘同春礼部员外郎吴泰来主事张琦行人王于曜行取知县周壽明进士徐家麟及向列星李綱八人也其留北俟候定夺者少詹事何瑞徵杨观光太仆少卿张若麒副使方大猷户部侍郎党崇雅吏部侍郎熊文举太仆卿叶初春给事中龚鼎孳戴明说孙承泽刘昌御史涂必泓张鸣骏司业薛所蘊通政参议赵京仕编修高尔俨户部郎中卫周祚及黄纪孙襄十九人也其另存再议者给事中翁元益郭充庶吉士鲁?吴尔坝史可程王自超白孕谦梁清标杨栖鸛张元琳吕崇烈李化麟朱积赵頔刘廷宗吏部郎中侯佐员外郎左懋泰礼部郎中吴之琦兵部员外郎邹明魁行人许作梅进士胡颀太常博士龚懋熙及王之牧王臯梅鸛姬琨朱国壽吴嵩孕二十八人也其已奉旨录用者兵部尚书张縉彦给事中时敏谕德卫孕文韩四维御史苏京行取知县黄国琦施凤仪兵部郎中张正声内阁中书舍人顾大成姜荃林等十人也奏入谕以周鍾等不当缓决陈名夏等未蔽厥辜宋学颀潘同春等拟罪未合令再议惟方拱乾名在五等以结纳马阮特免其罪至是学龙更拟周鍾光时亨等各加一等潘同春诸臣皆候补小臣受伪无据仍执前律时马阮急欲杀周鍾学龙欲缓其死谋之王铎乘士英注籍上之且请停刑铎即拟俞旨褒以详慎平允士英大怒然事已无及大铖暨张捷杨维垣等声言欲劾学龙学龙引疾命未下保国公朱国弼御史张孙振等诋其曲庇行私遂削籍 後周鍾光时亨仍同周鑣雷演祚并杀大铖等即传旨二等罪斩者谪云南金齿军三等罪绞者充广西边卫军四等以下俱为民永不叙用然学龙所定案亦多漏网而所拟一等诸犯皆随贼西行实未尝正刑辟也】质实【李振声米脂人喻上猷石首人黎志陞华容人刘世芳肤施人方允昌浙江人廖国遴长沙人原毓宗蒲城人王孙蕙无锡人梁兆阳番禺人王秉监扶风人陈羽白南靖人申芝芳嘉定人金汝砺仁和人方拱乾桐城人缪沅钱塘人吕兆龙金坛人傅振铎金谿人方以智桐城人傅鼎

銓臨川人張家玉東莞人潘同春余姚人吳泰來新昌人張琦無錫人徐家麟鄞縣人何瑞徵
信陽人黨崇雅寶雞人熊文舉新建人葉初春湖口人龔鼎孳合肥人涂必泓南昌人薛所蘊
孟縣人衛周祚曲沃人翁元益上海人魯?山陰人史可程順天人王自超會稽人白孕謙涇縣
人朱積華亭人吳之琦晉江人胡顯井研人朱國壽丹陽人時敏常熟人韓四維嵩縣人黃國
琦南昌人施鳳儀嘉定人姜荃林鄱陽人】

明總兵許定國誘殺高杰於睢州

【杰帥兵進次歸德定國方駐睢州定國嘗上書詆杰為賊故杰素銜定國而定國亦已遣
使納款于我】

【大清且送其二子渡河為質乞濟師往援杰微聞之招定國相會不應杰復邀巡撫越其
杰巡按陳潛夫同往睢州定國始郊迎毀其軍而以羸見且故為屈服狀杰心輕定國遂欲入
城其杰止之不聽十一日定國置酒享杰杰飲酣為定國刻行期且微及送子事定國益疑无
離睢意杰固促之行定國怒夜?兵傳礮大呼其杰等急遁走杰醉卧未起衆拥至定國所杀之
先是杰以定國將去睢盡發兵戍開封所留親卒數十人而已定國偽恭順多選妓侍杰而以
二妓偶一卒寢卒盡醉及聞礮欲起為二妓所掣不得脱皆死明日杰部將回軍攻城自東門
入老弱无子遺定國遂走降于】

【大清軍杰為人淫毒楊民聞其死皆相賀然是行也進取意甚銳故時有惜之者黃得功
聞杰死復引兵襲揚州將盡杀其妻子以報城中大惧史可法急命同知曲從直諭解之乃引
兵去】 質實【曲從直字完初遼東人】

明以吏部侍郎蔡奕琛兼東閣大學士入閣辦事

【尋復以唐世濟為右都御史皆阮大鍼援之也】

明以衛允文為兵部侍郎總督開歸軍務

【高杰既死部下兵將大亂互為雄長睢州旁近二百里杀戮无遺史可法聞之流涕曰中
原不可為矣遂馳至徐州以總兵李本身乃杰甥請用為提督代統其衆又令杰子元爵撫定
其軍黃得功劉澤清良佐聞可法欲以本身將杰軍連章劾之而監軍衛允文希馬士英指亦
論可法督師為贅士英喜即擢允文兵部右侍郎總督興平標下兵馬經畧開歸軍務以分其
權可法益不得展布矣尋撤杰兵回揚州改命劉良佐防歸德】 質實【衛允文杰同鄉陷賊
南還杰請為已監軍】

我

大清兵克西安李自成走襄陽

【我大兵至潼関贼将刘芳亮迎战奋击败之俘斩无算自成亲率马步兵至复大破之遂克潼関伪伯马世耀以七千人来降斩之进克西安自成已焚宫室由龙驹寨走武冈入襄阳复走武昌我大兵两道追蹙蹙之于邓州承天德安武昌等处穷追至贼巢连破走之当是时左良玉东下武昌虚无人自成屯五十余日贼衆尚五十余万改江夏曰瑞符县寻为我兵所迫部衆多降或逃散自成走延宁蒲圻至通城窜于九宫山既而自成留李过守寨自率二十骑畧食山中为村民所困不能脱遂缢死或曰村民方筑堡见贼少争前击之人马俱陷泥淖中自成脑中鉏死剥其衣得龙衣金印眇一目村民乃大惊谓为自成也我兵遣识自成者验其屍朽莫辨获】

【自成两从父伪赵侯伪襄南侯及自成二妾金印一又获伪汝侯刘宗敏伪总兵左光先伪军师宋献策于是斩自成从父及宗敏于军牛金星宋企郊等皆遁亡自成兄子过改名锦偕诸贼帅奉自成妻高氏降于总督何腾蛟时唐王立于闽赐锦名赤心封高氏忠义夫人号其军曰忠贞营隶腾蛟麾下永明王时赤心封兴国侯寻死】

二月明以阮大铖为兵部尚书

【命大铖以尚书协理部事仍巡閱江防大铖虽长中枢置一切兵事不问顾时时挠六部权任刘应宾为文选浊乱铨政再举考擢其私人二十余人给事御史尝欲罢抚按纠荐令纳金于官纠者免荐者予其谬诞如此中书舍人林翘善星术以尝决士英必大用半岁间遂躡授左都督衔蟒服趋事总督袁继咸请以陈麟邓林奇为总兵大铖索贿始给勅印诸白丁隶役输重赂立跻大帅时人为之语曰职方贱如狗都督满路走】质实【刘应宾沂水人林翘江浦人】

三月明人有自称崇祯太子者下狱治之

【北都之变李自成刼太子慈烺西走不知所终或传其已遇害至是有自北来称太子者召勲臣朱国弼等阁臣马士英等翰林刘正宗等入见武英殿面谕府部九卿科道辨验真伪日午羣臣奏系故驸马都尉王昺侄孙王之明曾侍卫东宫家破南奔鸿胪少卿高梦箕家丁穆虎敦之诈称太子乃下之明中城兵马司狱越四日复逮梦箕穆虎鞫于午门皆具服亦下刑部狱时都下士民皆以太子为真衆论籍籍谓士英等朋奸导上灭絶伦理黄得功抗疏争之疏畧曰东宫未必假冒先帝子即上子未有了无证明混然雷同者臣恐在廷诸臣谄徇者多抗顔者少即明白识认亦不败抗论取祸矣命三法司覆讯王之明等遂令毁得功原疏以絶奸谋又传谕穆虎若非奸人岂敢挟王之明冒认东宫主使附逆实繁有徒着法司穷治盖士英意在姜曰广輩也左良玉亦疏请保全东宫以安臣民之心谓东宫之来实有符验满朝诸臣但知逢君不惜大体明知穷究并无别情必欲辗转诛求遂使陛下忘屋乌之德臣下絶委裘之义普天同怨陛下独与二三奸臣保守天下无是理也亲亲而仁民愿陛下省之江督袁继咸亦疏言太子真伪非臣所能悬揣真则望行良玉言伪则不妨从容审处多召东宫旧臣辨识以解中外之疑湖抚何腾蛟亦力奏北来太子不可杀谓太子到南何人奏闻何人物色取召至京马士英何以独知其伪既是王昺侄孙何人举发内官公侯多北来之人何无一

人确认此事関天下万世是非不可不慎时以王之明自供甚明命法司将审明节畧各谕之而已】质实【刘正宗安邱人王曷高阳人尚穆宗女延庆公主高梦箕河间人】

明河南妇人有自称王妃者下狱治之

【河南有妇人童氏自称藩邸王妃刘良佐信之巡抚越其杰具仪从送至京以为假冒下童氏锦衣卫狱以前巡抚御史陈潜夫尝于途次称臣朝谒亦逮治之中外譁然良佐因言王之明童氏两案未协舆论恳求曲全两朝彝伦毋貽天下口实命将狱词刊布以息羣疑】质实【童氏福王为郡王时娶妃黄氏卒及为世子娶妃李氏以洛阳陷遇害童氏周府宫人逃难至尉氏县依福王于旅邸生一子已六岁福王南奔各不相顾太妃与童氏亦各逃散太妃自河南来陈潜夫奏妃尚在福王不召至是自越其杰所诣宫弗纳刘良佐言童氏非假冒马士英亦言苟非至情所関岂敢自诣宜迎入宫密谕河南抚按护宋皇子来京不聽下童氏锦衣卫狱狱中细书相遇月日及睢州情事甚悉付掌卫冯可宗呈览弃不视可宗辞审福王命屈尚忠严刑拷掠毙之狱中】

我

大清兵定河南

【我大军既定関陝复移师下江南出虎牢関口分兵自龙门関及南阳三路同趋归德克偃城上蔡诸县所过城邑皆望风歛附遂进取归德巡按御史凌駟及其从子润生死之南阳副将李好降河南悉定】质实【虎牢関开封府汜水县西龙门関河南府伊水北即伊阙】

明左良玉举兵反

【良玉既与马士英有隙士英谋筑板矶城为西防良玉叹曰今西何所防殆防我耳而黄澍匿其军中与诸将日以清君侧为请良玉踌躇弗应会王之明事起良玉争不听心甚不平澍欲借此激衆以报己怨召三十六营大将与之盟良玉亦以士英裁其饷益大憾反意遂决乃传檄远近以讨士英为名复上疏请诛之疏言窃见逆贼马士英无日不闻其罪状无人不恨其奸邪先帝皇太子至京道路汹传陛下屡发矜慈士英以真为假必欲置之死而後快其谋臣自此义不与奸贼共天日矣臣已提师在途将士眦目指髮人人必欲快食其肉臣恐百万之衆发而难收震惊宫阙且声其罪状正告陛下仰祈刚断与天下共】

【弃之自先帝之变人人号泣士英利灾擅权事事与先帝为难钦案先帝手定者士英首翻之要典先帝手焚者士英复修之罪不容于死者一也国家提衡文武全恃名器自贼臣窃柄以来卖官鬻爵殆无虚刻都門有职方贱如狗都督满街走之謡如越其杰以贪罪遣戍不一年而立陞部堂张孙振以贼污绞犯不数月而夤缘仆少袁洪勲与张道藩皆诏狱论罪者也借起废例复原官凡此之类直以千计罄竹难书罪不容于死者二也阁臣司票拟政事归六部至于兵柄尤不得兼握士英已为首辅犹复掌枢是弁髦太祖法度且又引其腹心阮大

铖为添设尚书各操重柄以为呼应罪不容于死者三也陛下选立中宫典礼攸闕士英居为奇货先择其尤者以充下陈罪通于天而又私买妓女寄养阮大铖家希图进选计乱中宫陰謀叵测罪不容于死者五也陛下即位之初恭俭神明士英百计诳惑进优童艳女损伤盛德每对人言恶则归君罪不容于死者五也国家遭此大难须寬仁慈爱以收人心士英自引用阮大铖以来睚眦杀人如雷演祚周鑣等煅链周内株连蔓引尤其甚者借题三案深埋陷阱将生平不快意之人一网打尽令天下士民裹足解体罪不容于死者六也九重秘密岂臣子所敢言士英遍布私人凡陛下一言一动无不窥视又募死士窜伏皇城诡名禁军以观陛下动静曰废立由我罪不容于死者七也率士碎心号痛者先帝殉难皇子犹存授受分明臣前疏已悉士英乃与阮大铖一手掣定不畏天道神明不畏二祖列宗不畏天下公议不畏万古纲常忍以先帝已立七年之嗣君为四海讴歌讼狱所归者付之幽囚天昏地惨神人共愤凡有血气皆欲寸磔士英大铖等以谢先帝此非臣之私言诸将士之言也非独臣标将士之言天下忠臣义士愚夫愚妇之公言也伏乞陛下立将士英等肆诸市朝传首四方用抒公愤臣等东兵计划以待不禁大声疾呼激切以闻疏上遂引兵而东自汉口达蕪州列舟三百余里士英大惧急命阮大铖刘孔昭率兵会黄得功趋上江堵御袁继咸请赦太子以遏止之不听良玉之发武昌邀总督何腾蛟偕行不可则尽杀城中人刼之腾蛟解印付家人令速走将自刳良玉部将拥去置之别舟乘间跃入江漂十余里渔舟救之起则汉前将军関侯庙前也家人怀印亦至相视大惊覓渔舟忽不见人谓腾蛟忠诚得神佑云】

夏四月明周鍾光时亨伏诛遂杀前礼部郎中周鑣山东按察司僉事雷演祚

【先是马士英以鑣演祚尝立主潞王议指为姜曰广私党令朱统𣪠劾奏逮治及周鍾光时亨降贼贼败鍾时亨窜归南京逮下狱士英复言二人从逆罪应族诛请以鍾从兄鑣从坐阮大铖亦与鑣有夙憾于是御史罗万爵王懷等连疏诋鑣演祚至比演祚为成济请亟正西市至是左良玉称兵人情汹汹而良玉檄中复斥其构陷鑣演祚状士英等益怒因谓鑣实召良玉兵遂戮鍾及时亨而赐鑣演祚自尽】质实【罗万爵芜湖人】

明微刘良佐等将兵入援

【左兵将至马士英急调良佐等入卫刘泽清亦以勤王为名太掠而东时史可法以】

【大清兵将及淮南连疏告警福王谓上游急则赴上游北兵急则赴北兵可法以为上游不过除君侧之恶原不敢为难若大清兵一至则南都不保乃移书士英恳其选将添兵而士英惟以左兵为急时大理寺卿姚思孝御史乔可聘成友谦亦请毋撤江北兵亟守淮扬士英厉声曰若輩东林犹藉口防江欲纵左逆入犯耶北兵至犹可议欵左逆至则若輩高官我君臣独死耳力排思孝等议淮扬备御益弱】质实【姚思孝歙县人乔可聘宝应人成友谦南通州人】

明左良玉死于九江

【良玉至九江邀袁继咸入舟中语及太子下狱事大哭因袖出密谕邀诸将盟继咸正色曰先帝旧德不可忘今上新恩亦不可负良玉色变乃改檄为疏驻军候旨继咸归方谋拒守而部将郝效忠陰纳良玉兵入城杀掠纵火残其城而去而良玉已疾笃望城中火光太息曰吾负临侯呕血数升遂死其子梦庚秘不发丧诸将共推为帅留七日而东兵势尚盛自彭泽以下皆陷黄得功方驻军荻港进拒梦庚于铜陵破之解其围阮大铖等日虚张捷音以邀爵赏得功寻复败其衆于板子矶乃封得功靖国公命移家太平一意防御良玉後营总兵惠登相本降寇过天星感良玉恩有忠实心方诸将自九江东下连陷郡县独池州不破贻书言留待後军登相大诟曰若此则反不如我前为流贼时矣如先帅未命何撤其军返梦庚索轻舸追之相见大恸登相以梦庚不足事遂引兵絶江去诸将乃议还军而】

【大清兵已至 北梦庚遂执袁继咸及安庆巡抚张亮偕黄澍率衆归附亮乘间赴水死继咸北行亦不屈死】质实【袁继咸字季通临侯其别号也
本朝乾隆四十一年追諡忠毅张亮内江人 本 乾隆四十一年追諡忠节】

我

大清兵克泗州

【我定国大将军豫亲王多铎等领军自归德府起行颍州太和悉下兵未至泗州二十里遣将先夺泗北淮河桥守将焚桥遁走我大兵遂夜渡淮翌日追五十余里不及我豫亲王遣将率师至扬州城北获船百余艘是日大兵拒扬州城二十里列营又至扬州城南获舡二百余艘于是大兵遂薄扬州城下】

我

大清兵克扬州明督师兵部尚书兼大学士史可法等死之

【可法初闻大兵日南下将移军泗州防护祖陵輜重已发而左良玉称兵召之入援渡江抵燕子矶黄得功已破良玉军可法乃趋天长檄诸将救盱眙俄闻盱眙已降】

【大清泗州援将侯方岩败歿可法一日夜奔还扬州讹传许定国兵将至殲高氏部曲城中人悉斩関出舟楫一空可法檄各镇兵无一至者独总兵刘肇基自白洋河趋赴请背城一战可法持不许先是我】

【大清兵屯斑竹园招谕可法及卫允文等降不从总兵李栖凤监军副使高岐凤拔营出降城中執益单诸文武分陴拒守旧城西门险要可法自守之作书寄母妻且曰死葬我高皇帝陵侧及我】

【大清兵薄城下用巨礮击城西北隅城遂破可法自刎不殊一参将拥可法出小东门既

就执可法大呼曰我史督师也乃杀之刘肇基分守北门发礮伤围者及城破率所部四百人巷战格杀数百人後骑来益衆力不支与副将乙邦才马应魁庄子固汪思诚等皆死卫允文及在籍侍郎张伯鲸运使扬振熙知府任民育同知曲从直王纘爵知县周志畏罗伏龙吴道正县丞王志端副总兵楼挺汪应龙李豫参将陶国祚许谨冯国用陈光玉李隆徐纯仁游击李大中孙开忠都司姚怀龙解学曾及幕客卢渭归昭等皆死之员外郎何刚庶吉士吴尔勲皆参可法军事城破亦投井死其他诸生高孝纘王士琇王纘王绩王绩又有武生戴之藩医者陈天拔画士陆愉义兵张有德市民冯应昌舟子徐某及妇女死节者不可胜纪时福王命刘泽清往援扬州而泽清已潜谋输欵我】

【大清恶其反覆磔诛之 史可法死覓其遗骸天暑蒸变不可识踰年家人以袍笏招魂葬于扬州郭外之梅花岭】质实【梅花岭在扬州府新城广储门外一名土山白洋河在桃源县西白洋镇即潼水之下流也史可法 本朝乾隆四十一年追諡忠正并为修墓葺祠】

【御题其画像诗刻石祠中刘肇基赣榆人侯方岩里系无考乙邦才青州人战败自刎死马应魁字守卿贵池人巷战死庄子固字宪伯辽东人屯徐州闻扬州城被围驰救城破欲拥史可法出城格门死汪思诚城破殉节死卫允文赴水死张伯鲸江都人与当事分守城城破自缢死扬振熙临海人城破殉节死任民育城破着绯衣安坐堂上就杀阖门赴井死曲从直兴其子守东门城破不屈死王纘爵鄞县人城破殉节死周志畏城破阖门俱死罗伏龙新喻人代周志畏城破殉节死吴道正余姚人王志端孝丰人城破俱殉节死楼挺汪应龙李豫陶国祚许谨冯国用陈光玉李隆徐纯仁李大中孙开忠姚怀龙解学曾里系俱无考诸人从史可法守城城破巷战死卢渭字渭生长洲人在史可法幕投水死归昭崑山人在可法幕守西门城破亦殉节死何刚字慤人上海人吴尔壎崇德人俱投井死高孝纘王士琇王纘王绩戴之藩俱扬州人城破殉节死陈天拔陆愉张有德冯应昌徐某俱扬州人城破殉节死 本朝乾隆四十一年追諡刘肇基忠烈张伯鲸任民育何刚俱忠节乙邦才马应魁庄子固曲从直周志畏楼挺江应龙李豫陶国祚许谨冯国用陈光玉李隆徐纯仁李大忠孙开忠姚怀龙解学曾俱烈愍罗伏龙吴道正王志端扬振熙汪思诚侯方岩王纘爵俱节愍卢渭归昭高孝纘王士琇王纘王绩王续戴之藩陈天拔陆愉张有德冯应昌徐某俱入祠】

五月我

大清兵渡江

【是月丙戌日我大清兵临江总兵郑鸿逵郑彩以水师守瓜州副使杨文骢驻金山扼大江而守会王擢文骢常镇巡抚兼督沿海诸军文骢乃还驻京口合鸿逵等兵南岸与】

【大清兵隔江相持大清兵编大筏置灯火夜放之中流南岸军发礮石以为获胜也日奏捷己丑夜我大清兵乘雾潜济陆续引渡又留舟师北岸敌至则以礮夹攻之及迫南岸明诸军始知仓皇列阵甘露寺铁骑蹙之悉溃苏松巡抚霍达及文骢俱走苏州鸿逵等纵兵大掠遁还闽中】质实【霍达长安人】

明福王出奔太平

【京口败走奔还南京大震福王犹酣宴至夜半跨马自通济门出走遂奔太平刘孔昭斩関遁马士英以黔兵四百人为卫挟福王母妃走浙江乱兵入狱拥王之明立之时黄得功方收兵屯芜湖福王潜入其营得功惊泣曰陛下死守京城臣等犹可尽力奈何听奸人言仓卒至此且臣方出战安能扈驾王曰非卿无可仗者得功泣曰愿效死 马士英走浙江道广德知州赵景和闭门拒守士英攻破执景和杀之大掠而去走杭州守臣以总兵府为母妃行宫未几阮大铖亦自上江逃至及】

【大兵平杭州士英欲谒鲁王鲁王诸臣力拒之士英与大铖俱走严州方国安营国安士英同鄉也大铖在营掀髯指掌日谈兵国安甚喜而士英则以南渡之坏半由大铖而已居恶名颇以为恨已而我】

【大兵击败士英国安士英国安帅衆渡钱塘又窥杭州大兵击败之溯江死者无算士英拥残兵欲入闽唐王以罪大不许明年我大兵剿湖贼获士英即诛之大铖赴江干乞降从】

【大兵攻仙霞関僵仆石上死或曰士英遁至台州山寺为僧为我兵搜获大铖国恩先後降後得士英大铖国安请唐王出関为内应疏遂骈斩士英国安于延平城大铖自触石死仍戮屍云福王母妃邹氏被士英挟至浙江後有福王妃兄黄调鼎迎王母妃养于洛数年邹乃卒调鼎葬之】 质实【黄调鼎福王时官左都督赵景和钱塘人本朝乾隆四十一年追諡节愍】

我

大清兵定南京

【大军营城北明总督京营忻城伯赵之龙奉表纳款勲戚则魏国公徐州爵驸马齐赞元灵璧侯汤国祚安远侯柳祚昌等大臣自大学士王铎礼部尚书钱谦益等文武数百员并城内官民迎降兴平伯高杰子元照广昌伯刘良佐等亦于沿途归附得马步兵二十三万八千三百豫亲王奏】

【闻我世祖章皇帝以既平河朔旋定江南】

【诏行祭告大赦事而大兵遂入屯城中时刑部尚书高倬行人司行人陆培吏部尚书张捷副都御史杨维垣皆死之而庶寮殉难者则有仪制司主事黄端伯户部郎中刘成治户部主事吴嘉允中书舍人龚廷祥钦天监博士陈于阶青阳知县龐昌允南昌知县刘曙等其诸生布衣死者则又有文乘吴可箕金璽马纯仁陈士达等】 质实【徐州爵宏基之子齐赞元尚光宗女遂平公主高倬忠州人为御史有声福王时议裁冗员不纳南都破投繯死陆培钱塘人奉使归值南京破以绳授二仆就缢死

本朝乾隆四十一年俱追諡忠节黄端伯新城人南都破令降不屈死 本朝乾隆四十一年追諡烈愍刘成治汉阳人南都破赵之龙将降封户部库成治手搏之还寓自縊死吴嘉允华亭人奉使出都闻城破谒方孝孺祠自縊死龚廷祥无锡人南都破衣冠步至武定桥投水死陈于阶上海人以史可法荐为博士南都破自縊死龐昌允西充人南都破走九华山谋举兵事泄殉节死刘曙长洲人由进士授官未行南都破殉节死 本朝乾隆四十一年俱追諡节愍文乘吴县人震孟子南都破殉节死吴可箕休宁人南都破自縊鸡鸣山黄金玺江宁人谋募兵守御南都破扼吭死马纯仁六合人南都既下六合归附题桥柱抱石沈死陈士达上元人南都破殉节死 本朝乾隆四十一年俱入祠】

我

大清兵至芜湖明总兵田雄刼福王由崧以降靖国公

黄得功死之明亡

【南京既定我大清定国大将军豫亲王多铎遂遣官兵及降将刘良佐等袭太平福王复走芜湖我大兵趋击之福王登舟欲渡江走】

【大兵据江口截其去路黄得功以战荻港时伤臂衣葛衣以帛络臂佩刀坐小舟方督麾下八总兵结束前迎战而良佐大呼岸上招降得功怒叱曰汝乃降乎忽飞矢至中其喉左偏得功知不可为掷刀拾所拔箭刺吭死其妻闻之自经死总兵翁之琪亦投江死田雄遂挟福王以降所属总兵及部衆俱降我】

【大兵执福王至南京改南直隶为布政司以应天府为江宁府郡县无不归附江南悉定我豫亲王遣贝勒博洛等统兵趋浙江持檄招抚閏六月大兵至杭州敌兵分两路拒战击败之乘夜渡钱塘江逃窜我大兵追至江岸驻营敌兵见之以为江潮朝夕有信江岸之营必皆被淹而江潮连日不至阖郡惊为神助明潞王朱常淂遂率衆开门纳款浙江悉平时闯贼李自成既遁英亲王阿济格率兵追剿自成走死肃亲王豪格剿击流贼张献忠屡经败窜寻射殪之余贼并陆续扫荡其福建江西湖广四川两广贵州云南各省我】

【大清以次平定海宇咸归一统矣】 质实【黄得功
本朝乾隆四十一年追諡忠桓翁之琪钱塘人 本朝乾隆四十一年追諡忠节】

发明【明季自流贼祸炽庄烈殉社稷太子二王不知所终其正统已失矣福王拥立江左使稍能奋志有为或如宋高南渡延明祚于一线乃政归马阮四镇交讧不亡何待唐王擅权于芝龙桂王執败于五虎流贼窜走旋抵蹙亡益复何足比数我】

【大清应运而兴江南既下九宇荡平一时亲臣荅臣同心戮力肇立丕基溯自我】

【世祖章皇帝顺治元年四月定北都以来久垂大一统之盛皇上权衡百代以明福王比建炎之例于芜湖就执始书明亡存胜国之余分益以彰怙冒之无外圣朝勲德远迈千古矣】

御定资治通监纲目三编卷四十